


Nhandejáry Nhe'ẽ



New Testament in Kaiwá (BR:kgk:Kaiwá)

**Nhandejáry Nhe'ẽ
New Testament in Kaiwá (BR:kgk:Kaiwá)**

copyright © 2006 Wycliffe Bible Translators, Inc.

Language: Kaiwá

Translation by: Wycliffe Bible Translators, Inc.

Copyright Information

© 2006, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

 You must give Attribution to the work.

 You do not sell this work for a profit.

 You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Kaiwá

© 2006, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

 You include the above copyright and source information.

 You do not sell this work for a profit.

 You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-27

PDF generated using Haiola and XeLaTeX on 18 Apr 2025 from source files dated 29 Jan 2022

7ba4d793-0e4f-5efd-8f91-509f2a6d9f6a

Contents

MATEUS	1
MARCOS	84
LUCAS	130
JOÃO	221
ATOS	280
ROMANOS	358
1 CORÍNTIOS	394
2 CORÍNTIOS	432
GÁLATAS	456
EFÉSIOS	471
FILIPENSES	483
COLOSSEENSES	491
1 TESSALONICENSES	500
2 TESSALONICENSES	507
1 TIMÓTEO	511
2 TIMÓTEO	521
TITO	528
FILEMÔM	532
HEBREUS	534
TIAGO	562
1 PEDRO	572
2 PEDRO	583
1 JOÃO	590
2 JOÃO	598
3 JOÃO	599
JUDAS	601
APOCALIPSE	605

Hesu Cristo rehewa nhe'ẽ porã

Mateus remimombe'ukwe

o evangelho de Mateus

*Hesu Cristo rembypykwe héry kwéry
(Lc 3.23-38)*

¹ Hesu Cristo Davi amyrĩ remiarirõ joapyri pyri voi. Ha Davi amyrĩ katu Abraão amyrĩ remiarirõ joapyri pyri voi. Hembypykwe héry kwéry a-rami.

² Yma ete va'ekwe oiko va'ekwe Abraão amyrĩ. Ta'ýry jevy jevyha ko va'e. Ta'ýry Isaque. Upéi Isaque ra'y jevy Jacó. Upéi ta'ýry jevy Judá tyvýry kwéry ave.

³ Upéi Judá ra'y jevy, Perez tyvýry Zerá ndive oiko va'ekwe. Isy héry Tamar. Upéi Perez ra'y jevy Esrom. Upéi ta'ýry jevy Arão.

⁴ Upéi ta'ýry jevy Aminadabe. Upéi ta'ýry jevy Naassom. Upéi ta'ýry jevy Salmom.

⁵ Upéi ta'ýry jevy Boaz. Isy katu héry Raabe. Upéi Boaz ra'y jevy Obede. Isy katu héry Rute. Upéi Obede ra'y jevy Jessé.

⁶ Upéi ta'ýry jevy mburuvixagwasu Davi.

Upéixa Abraão amyrĩ-gwi mburuvixagwasu Davi amyrĩ peve oĩ va'ekwe quatorze he'ýi joapyri pyri va'ekwe.

Upéi Davi ra'y jevy Salomão. Isy katu Urias rembirekokwe.

⁷ Upéi Salomão ra'y jevy Roboão. Upéi ta'ýry jevy Abias. Upéi ta'ýry jevy Asa.

⁸ Upéi ta'ýry jevy Josafá. Upéi ta'ýry jevy Jorão. Upéi ta'ýry jevy Uzias.

⁹ Upéi ta'ýry jevy Jotão. Upéi ta'ýry jevy Acaz. Upéi ta'ýry jevy Ezequias.

¹⁰ Upéi ta'ýry jevy Manassés. Upéi ta'ýry jevy Amom. Upéi ta'ýry jevy Josias.

¹¹ Upéi ta'ýry jevy Jeconias tyvy kwéry ndive.

Oiko jave Jeconias, he'ýi kwéry ndive oipyhy-ma íxupe heraha-vy Babilônia yvy akéno-py.

Upéixa Davi amyrĩ-gwi yvy akéno-py ojereraha hagwe peve oĩ va'ekwe quatorze he'ýi joapyri pyri va'ekwe.

¹² Yvy akéno-py ojereraha rire, oiko va'ekwe Jeconias ra'y Salatiel amyrĩ. Upéi ta'ýry jevy Zorobabel.

¹³ Upéi ta'ýry jevy Abiúde. Upéi ta'ýry jevy Eliaquim. Upéi ta'ýry jevy Azor.

¹⁴ Upéi ta'ýry jevy Sadoque. Upéi ta'ýry jevy Aquim. Upéi ta'ýry jevy Eliúde.

¹⁵ Upéi ta'ýry jevy Eleázar. Upéi ta'ýry jevy Matã. Upéi ta'ýry jevy Jacó.

¹⁶ Upéi ta'ýry jevy José. Ha'e Maria ména. Upe Maria Hesu sy voi. Hesu héry ave Cristo, Nhandejáry rembiporavokwe voi, judeu kwéry remiha'arõ va'e voi.

¹⁷ Upéixa yvy akéno-py ojereraha hagwe-gwi Cristo peve oĩ va'ekwe quatorze he'ýi joapyri pyri va'ekwe.

*Hesu Cristo oikomaha
(Lc 2.1-7)*

¹⁸ Hesu Cristo oikomaha a-rami. Oiko va'ekwe Maria isyrã José rembirekorã. Omenda e'ý mboyve, oikwaa-ma va'ekwe omembyrã. Ome'ẽ-ma va'ekwe íxupe imembyrã Nhe'ẽ Marangatu tee va'e. Ndaha'éi kwimba'e-gwi.

¹⁹ Ha imenarã José katu tekoha-rupi voi oiko va'e. Oikwaa gwembirekorã imemby-tagwi, opoise mo'ã íxugwi: “Imemby rei-ta xe rembirekorã” he'i mo'ã. “Xe nda'e mo'ãi joto mba'eve atýra-py” he'i ojéupe ojepy'amongoeta-vy. Upéa-gwi, “Apoi nhemi-ta íxugwi” he'i mo'ã ojéupe.

²⁰ Pyhare onhemongeta ha'e ae opy'a ndive: "Mba'éixa po apoi-ta íxugwi?" he'i he'i ojéupe. Upéi ikéra-py ojehexa uka íxupe Nhandejáry rembigwái yváy pygwa:

—Nde, José, Davi remiarirõre, he'i ohenói-vy íxupe. —Eraha katu Maria-pe nde róga-py ne rembirekorã. Ani katu eretí teí ereiko-vy indive. Ani erenotí teí ne rembirekorã ogwerekota va'e mitã, he'i íxupe. —Nhe'ẽ Marangatu tee va'e-rupi ae ogwerekota upe va'e mitã, he'i íxupe.

²¹ —Oiko-ta imemby kwimba'e va'e. Gwe'ýi kwéry-gwi omboyke va'erã hembiapo vaikwe, he'i íxupe ikéra pygwa. —Upéa-gwi erekeneoi va'erã íxupe Hesu-py. Pene resendeharã-gwi embohéry íxupe Hesu, he'i íxupe Nhandejáry rembigwái ikéra-py imombe'u-vy.

²²⁻²³ —Yma Nhandejáry nhe'ẽ-py omombe'u va'ety remimoigwe kватia-rehe a-rami:

"Oĩ oikwaa va'erã omembyrã omenda e'ý rehev. Ha upe rire katu oiko-ma va'erã imemby. Emanuel-py ohenói va'erã imemby-pe" he'i upe Nhandejáry rembiporavokwe Cristo syrã-rehe. Emanuel he'i Nhandejáry-rehe nhane moirúharã-rehe. Ipokatu voi upe va'e Nhandejáry kватia nhe'ẽ. Upéa-gwi yma gware he'i hagwe-rami ãy oiko-ma.*

²⁴ Ko'embra rire opáy-ma José. Ohendupa-ma Nhandejáry nhe'ẽ. Ogweraha-ma Maria gwóga-py gwembirekorã mo'ã.

²⁵ Hembireko jepe, gwembireko e'ý-rami joto ogwerek. Omboete-gwi íxupe, ogwerek mombyry joto íxupe. Ndokéiry vyteri hendive. Ha upe rire ae katu imemby kwimba'e oiko-ma rire, ogwerek ete-ma katu gwembireko-pe, ojehe'a tee-ma hese. ãy katu oiko tee gwembireko ndive. Maria memby rypykwe-pe, "Hesu" he'i ombohéry-vy íxupe.

2

Kwarahy resẽ-gwi ogwahẽ ou-vy hi'arandu eterei va'e

¹ Ha upéi katu Herodes mburuvixagwasu ramo oiko jave, oiko-ma Hesu. Belém tetã-my, Judéia yvy-py oiko-ma. Upe jave ogwahẽ-ma ou-vy Jerusalém tetã-my mombyrygwa hi'arandu eterei va'e. Mombyry-gwi kwarahy resẽ-gwi ou ra'e:

² —Kipy tipo oime mitã'i judeu kwéry ruvixagwasurã oiko va'ekwe? he'i oporandu-vy. —Pe mitã'i oikomaha kwaa ukaha va'e jasytata ojeupi oho-vy ramo kwarahy resẽ-my, orohexa-ma va'ekwe. Upéa-gwi mitã'i-pe oroju oromboete-vy, he'i Jerusalém tetã mygwa-pe.

³ Judeu ruvixarã rerakwã ohendu-ma ramo judeu ruvixagwasu Herodes, onhemondýi voi. Ndaipy'agwapyvéi-ma voi upéa oikwaa ramo. Entéro Jerusalém tetã mygwa gwive onhemondyipa hikwái. Ndaipy'agwapyvéiry oikwaa ramo upéa hikwái.

⁴ Upéa-gwi Herodes ohenói ou hagwã pa'i ruvixa kwéry gwive judeu rekombo'ehaty kwéry ndive:

—Mamo-py po oiko va'erã upe Nhandejáry rembiporavo Cristo? Kipy tipo hekwagwã? Mbava'e tipo he'i va'ekwe yma gware kватia nhe'ẽ? he'i oporandu-vy íxupe kwéry.

⁵ —Belém tetã-my, Judéia yvy-py oiko-ta, he'i. —Nhandejáry nhe'ẽ-py omombe'u va'ety remimoigwe kватia-rehe he'i a-rami:

⁶ "Ha'e-ta Belém tetã, Judéia yvy pygwa-rehe. Tetã'i jepe tuvixave va'e-rami joto. Upe-gwi oiko va'erã mburuvixagwasu. Gwymba-rehe

* ^{1:22-23 Is 7.14}

onhangarekoha-rami, onhangareko va'erā Israel kwéry xe re'ýi kwéry-rehe"
he'i Nhandejáry kватia nhe'ẽ. Upéa-gwi upe Nhandejáry rembiporavo oiko-ta Belém-py, he'i Herodes-pe hikwái.*

⁷ Upe ramo Herodes ohenói ou hagwā upe hi'arandu va'e kwéry. Omoha'e anho ohenói-vy oporandu hagwā upe jasytata-rehe:

—Araka'e pyhare po ojehexa uka ra'e peẽ-my jasytata? he'i oporandu-vy íxupe kwéry.

⁸ Oikwaa-ma ramo omondo Belém-py:

—Tapeho pejohu peve peheka íxupe, he'i. —Mamo pa oime pehexa porã. Petopa-ma ramo íxupe, peju jevy kuri pemombe'u xe-vy aikwaa hagwā xe ave aha hagwā ahexa íxupe, aha hagwā xe ave amboete íxupe, he'i mo'ã upe hi'arandu va'e-pe.

⁹ Ohendu-ma ramo mburuvixa nhe'ẽ, oje'óí hikwái oheka-vy. Upéi upe jasytata ojeupi ypy jave kwarahy resẽ-my ohexa va'ekwe oho henonde-rupi. Upéi mitã'i oimeha ári opyta yvate-py.

¹⁰ Ohexa ramo, ov'y'a eterei.

—Iporã ete katu. Jahexa jevy-ma jasytata, he'i herovy'a-vy.

¹¹ Upéi ogwahē oho-vy óga-py. Upe-py ohexa mitã'i-pe isy Maria ndive oiko ramo. Gwetypy'ã-rehe onhesũ imboete-vy íxupe. Omomba'egwasu íxupe hikwái. Upéi oipe'a imba'e ryru-gwi. Omboete eterei-vy, ome'ẽ rei mitã-pe ouro hepy va'e. Ome'ẽ íxupe hyakwā porã va'e, incenso héry va'e. Ome'ẽ ave íxupe hyakwā porã va'e mirra héry va'e ave.

¹² Pyhare ogwahē ou-vy Nhandejáry rembigwái yváy gwigwa. He'i:

—Aníke peho jevy mburuvixa róga-rupi, he'i hi'arandu va'e-pe.

Ike-py omombe'u íxupe. Upéa-gwi oikupe'o pe'o oje'óí-vy hikwái gwe'ýi happy.

Ogwerokanhy heraha-vy mitã'i Egito-py

¹³ Oho rire oje'óí-vy upe hi'arandu va'e, pyhare ojehexa uka ou-vy Nhandejáry rembigwái yváy gwigwa. José oke jave, ojehexa uka íxupe:

—Epu'ã katu, he'i, —eraha isy ndive mitã'i. Erokanhy heraha-vy mitã'i Egito yvy-py. Epyta ranhe upe-py eiko-vy. Xe ha'e ramo ae, ereju jevy va'erā, he'i íxupe. —Mburuvixa Herodes katu oheka uka-ta íxupe ojuka uka hagwā. Upéa-gwi epyta upe-py, he'i íxupe Nhandejáry rembigwái.

¹⁴ Upe-ma ramo opu'ã pyhare ogwerokanhy heroje'óí-vy. Ogweraha isy ndive mitã'i. Oho Egito yvy-py.

¹⁵ Upe-py opyta mitã'i ndive. Herodes omano ra'arõ-vy opyta Egito-py. Yma ete Nhandejáry nhe'ẽ-py omombe'u va'ety remimoigwe kватia-rehe he'i arami:

“Ahenói-ma xe ra'y-pe Egito yvy-gwi ou hagwā”

he'i upe Nhandejáry rembiporavo Cristo-rehe. Ipokatu voi Nhandejáry nhe'ẽ. Upéa-gwi yma gware he'i hagwe-rami, ãy oiko-ma.*

Ojejuka mitã' kwimba'e

¹⁶ Ha upéi katu ndouvéi-ma Herodes renda-py pe hi'arandu va'e. Oikupe'o-ma ra'e oho-vy íxupe.

“Xe mbotavy rei ra'e” he'i ojéupe Herodes. Upéa ombopoxy eterei-ma íxupe, ojéupe nomombe'úiry-gwi. Upéa-gwi omondo Hesu oiko hagwe-py. Mitã'i gwive he'i ojuka ukapa hagwā. Belém tetã mygwa ijerekwe rehewa ave he'i ojuka ukapa hagwā mitã' kwimba'e-pe gwive. Mokõi ro'y ogwereko va'e,

* 2:6 Mq 5.2 * 2:15 Os 11.1

ne'írã omboty vyteri mokõi ro'y va'e-pe gwive he'i ojuka ukapa hagwã. Pe hi'arandu va'e omombe'u ha-rupi rei íxupe, he'i ojuka ukapa hagwã.

17-18 Yma Nhandejáry nhe'ẽ-py omombe'u va'ety Jeremias remimoigwe kwatia-rehe a-rami he'i:

"Omemby ohapirõ va'e nhahendu-ma tetã héry va'e Ramá-py. Raquel remiarirõre voi upe va'e ohapirõ omemby kwéry. Ojahe'o ramo omemby kwéry-rehe nhahendu-ma voi. Ndoikovéi-magwi omemby nohenduséiry voi ombopy'agwapyharã mo'ã nhe'ẽ"
he'i va'ekwe imemby ojejuka va'ekwe-rehe. Upéixa yma he'i hagwe-rami, ãy oiko-ma Belém tetã-my.*

Ogweru jevy-ma mitã'i Egito yvy-gwi

19 Ha upéi katu omano Herodes. Omano rire, ojehexa uka jevy José-pe Nhandejáry rembigwái yváy gwigwa. Egito-py vyteri oime ramo, ikéra-py ojehexa uka jevy íxupe:

20 —Omano-ma mitã-rehe ija'e'ý va'ekwe. ãy ereraha jevy jepe arã upe-py. Ijukaseharágwe omano-ma. Epu'ã katu, he'i —eraha jevy mitã isy ndive. Ereiko hagwe-py tereho jevy. Israel kwéry yvy-py tereho, he'i José-pe.

21 Upe-ma ramo opu'ã oje'óí-vy. Mitã ogweraha isy ndive jevy gwetã-my. Israel kwéry yvy-py oho.

22 Ha upéi katu:

—Ãy Herodes ra'yre Arquelau oiko jevy mburuvixagwasu ramo Judéia yvy-py, he'i José-pe omombe'u-vy.

Upéixa-gwi ikyhyje oho hagwã ta'yre manda ha-py. Pyhare ojehexa uka jevy íxupe ou-vy Nhandejáry rembigwái yváy pygwa. José oke jave, ojehexa uka íxupe:

—Ani ereho teĩ upe-py, he'i íxupe.

Upéixa-gwi ndohóiry oyvy-py. Galiléia yvy-py ae ha'e oho.

23 Upe-py oho opyta Nazaré tetã-my. Yma Nhandejáry nhe'ẽ-py omombe'u va'ety remimoigwe kwatia-rehe he'i a-rami:

"He'i va'erã íxupe Nazaré pygwa"

he'i upe Nhandejáry rembiporavo Cristo-rehe. Ipokatu voi Nhandejáry nhe'ẽ. Upéa-gwi yma he'i hagwe-rami, ãy oiko-ma.

3

Ojekwaa João Batista Nhandejáry nhe'ẽ mombe'u-vy

(Mc 1.1-8; Lc 3.1-18; Jo 1.19-28)

1 Upe ramo ojekwaa-ma ou-vy João Batista. Tekwaty e'ý-my Judéia yvy-py ojekwaa-ma Nhandejáry nhe'ẽ mombe'u-vy:

2 —Onhemo'agwĩ-ma katu ou-vy Nhandejáry nhande ruvixarã. Pemboasy katu pene rembiapo vaikwe. Perova pende rekoha pemoirũ hagwã íxupe, he'i omombe'u-vy.

3 Upearã-rehe yma gware Nhandejáry nhe'ẽ-py omombe'u va'ety Isaías remimoigwe kwatia-rehe a-rami:

"Oĩ tekwaty e'ý-my onhe'ẽ hatã va'e. Pemopotĩ katu Nhandejáry raperã. Pembohape karẽ e'ý katu íxupe. Penhemotaírõ katu henonde, he'i onhe'ẽ hatã-vy"*

he'i João Batista rekorã mombe'u-vy.

4 Ha'e camelô mymba ragwekwe-gwi onhemonde oiko-vy. Ha ixumbe katu vaka pire gwigwa. Ho'u tukúry-pe oiko-vy. Ei ka'agwy ho'u ave.

* 2:17-18 Jr 31.15 * 3:3 Is 40.3

⁵ Upe jave ohopa oje'óí-vy henda-py Jerusalém tetā mygwa, Judéia yvy pygwa ave. Jordão ysyry jere rupigwa ave ohopa iha-py.

⁶ Ogwahē ramo henda-py, peteī teī onhemombe'u João-pe gwembiapo vaikwe-rehe: “Amboasy-ma xe rembiapo vaikwe” peteī teī onhemombe'u ramo, omongarai-ma íxupe. Jordão ysyry-py oporomongarai oiko-vy.

⁷ Ha upéi katu ogwahē ave ou-vy heta fariseu saduceu ndive. Onhemongarai ukase-vy ou íxupe hikwái. Ohexa ramo íxupe kwéry João he'i:

—Mbói-rami peē pende reko mbói reko-rami, he'i íxupe João. —Kiva'e po ndevy he'i erekanhya hagwā? Ndikatúi erekanhya nde rereko asyharā-gwi, he'i íxupe kwéry.

⁸ —Ererova ramo nde rekoha, ehexa uka nde reko porāha.

⁹ “Abraão amyrī nhande ru voi. Nhande kwéry hemiarirōre tee voi” ere rei erenhemboete ukase-vy. Ani joty ere upéa. Pehexa katu ko va'e ita. Ha'e-ta peē-my. Ko itakwe Nhandedjáry omondo kwaa va'erā kente ramo. Hetave omondo kwaa va'erā Abraão remiarirōre ramo. Ndaheko rasýiry arā hemimondo ramo ita.

¹⁰ Yva máta hi'a e'ŷ va'e oity va'erā. Hapy hagwā-pyma ogweraha va'erā. Oĩma háxa ijypy-py ombogwái hagwā hapo-rupi. Upéixa ete ogwereco asy va'erā hekoha vai va'e-pe.

¹¹ —Xe, he'i —y-py mante apomongarai va'e penhemboasy-gwi pende rekoha vaikwe-rehe ojekwaa hagwā peē penhemboasyha pende rekoha vaikwe-rehe. Ha oĩ xe rapykwerigwa katu napene mongarai mo'āi xe oromongaraiha-rami. Ha'e ombogwejy va'erā omoingo-vy pende py'appy Nhe'ẽ Marangatu tee va'e, he'i. —Tata-py ae pene mongarai va'erā omokanhy ngatu-vy pende reko tujakwe pendéhegwi. Tata-py imombopyrā jahapyha-rami ave, pende reko tujakwe oipe'a va'erā pendéhegwi. Pende aigwe ohapypa-ma va'erā. Ha'e ipu'akave va'e xéhegwi. Upéa-gwi, xe reko'ive íxugwi-gwi, xe ave atī íxugwi. Ni hembigwái ramo jepe ndikatúiry aiko.

¹² Yrupē-my nhamombo yvate-koty imboveve-vy. Upéi inhongatu haty-py nhamoī ha'ŷigwe. Ha ha'ŷi e'ŷ va'e pirekwe katu jahapy. Upéixa ete ha'e ogwahē-ma ou-vy oipe'a hagwā hekoha vai va'e-gwi hekoha porā va'e. Upe va'e ogweraha va'erā oha-py. Ha hekoha vai va'e katu ogwereco asy va'erā íxupe. Okái voi Nhandedjáry rata. Ndoikói voi imbogweharā, he'i judeu ruvixa kwéry-pe João Batista imombe'u-vy.

Onhemongarai Hesu

(Mc 1.9-11; Lc 3.21-22; Jo 1.32-34)

¹³ Upe ramo ogwahē ou-vy Hesu Galiléia yvy-gwi. Jordão ysyry-py ou. Ojéupe ave oipota omongarai.

¹⁴ Ha João katu nomongaraiséi íxupe:

—Iporāve katu xe mongarai nde voi. Nde, nde reko porāve xéhegwi, he'i íxupe João. —Nde reko porāve jepe, ma'erā ereju joty xe renda-py? Ma'erā erenhemongarai ukase joty xe-vy, he'i oporandu-vy.

¹⁵ —Ây eheja katu tanhemongarai, he'i Hesu. —Upéixa iporā jajapo entéro Nhandedjáry oipota va'e gwive, he'i João-pe.

Ha João he'i:

—Néi. Aipo ramo toromongarai, he'i Hesu-pe.

Ha omongarai íxupe.

¹⁶ Onhemongarai rire-ma, osē y-gwi ou-vy. Upe-ma ramo ojekwaa pya'e yváy-py. Upe-gwi ha'e ohexa ogwejy va'e. Pykasu-rami ogwejy ou-vy Nhe'ẽ Marangatu tee va'e. Ójeho ogwejy ramo ohexa.

¹⁷ Upéi ohendu yváy-gwi onhe'ẽ va'e. He'i:

—Kóá xe ra'y xe rembiayhu voi. Xe rembierohory porã ete va'e voi ko va'e, he'i yváy-gwi onhe'ẽ va'e Hesu-rehe.

4

*Anháy ruvixa ombojejavys mo'ã Hesu-pe
(Mc 1.12-13; Lc 4.1-13; Hb 4.15)*

¹ Ha upéi katu ogweraha Hesu-pe Nhe'ẽ Marangatu tee va'e. Tekwaty e'ŷ-my ogweraha íxupe. Anháy renda-py ogweraha íxupe anháy ruvixa otantea hagwã íxupe ombojejavys hagwã mo'ã.

² Quarenta áry, quarenta pyhare ave ohasa okaru e'ŷ reheve. Ha upe rire ae katu ivare'a-ma.

³ Upe ramo ohekoteta-vy ou anháy ruvixa. Ombojejavys mo'ã íxupe. Anháy he'i íxupe:

—Nde ere ndéjehe, “Xe Nhandedjáry ra'y voi”. Aipo ramo ere ko ita-pe eremondo hagwã íxupe mbojape ramo, he'i Hesu-pe anháy itantea-vy, ombojejavys mo'ã-vy.

⁴ Hesu ae ndojapóiry jotsy inhe'ẽ. Nhandedjáry nhe'ẽ ae jotsy omombe'u íxupe:

—Ko'a-rami ae voi Nhandedjáry nhe'ẽ oĩ va'e kwatia-rehe, he'i íxupe:

—“Nhane rembi'ukwe-rehe anho rei ndaha'ei nhande rekoverã tee. Nhandedjáry he'i va'e gwive ae nhande rekoverã tee”

he'i Hesu, Nhandedjáry kwatia nhe'ẽ omombe'u-vy íxupe.*

⁵ Upe rire anháy ruvixa ogweraha íxupe Jerusalém tetã marangatu-py. Nhandedjáry rôga kakwaa-py ogweraha íxupe. Upe-py ijyvateve va'e ári omonhembo'y íxupe. Anháy he'i íxupe:

⁶ —“Xe Nhandedjáry ra'y voi” ere nde ndéjehe, he'i íxupe. —Aipo ramo, he'a katu a-gwi. Ko'a-rami ae oĩ Nhandedjáry kwatia nhe'ẽ he'i anháy Hesu-pe ombojejavys ukase mo'ã-vy:

—“Nhandedjáry omonhangareko uka va'erã nde-rehe gwembigwái yváy pygwa-pe. Ipo-py nde joko va'erã pono ere'a-vy ererokwa hatã nde py ita-rehe”

he'i Nhandedjáry kwatia nhe'ẽ oiporu rei-vy. —Upéa-gwi he'a katu, he'i mo'ã Hesu-pe.*

⁷ Ha Hesu ae katu ndojapóiry jotsy inhe'ẽ. Nhandedjáry nhe'ẽ ae jotsy omombe'u íxupe:

—Ko'a-rami ave oĩ Nhandedjáry kwatia nhe'ẽ, he'i ave íxupe Hesu omombe'u-vy.

—“Ani katu eretantea teĩ Tupã nde Jary-pe imbojejavys ukase-vy mo'ã” he'i anháy ruvixa-pe Nhandedjáry kwatia nhe'ẽ omombe'u-vy.

⁸ Upéi ogweraha jevy Hesu-pe yvyatygwasu ári. Upe-py ohexa uka íxupe entero tetã tetã ko yvy-py oĩ va'e gwive. Mburuvixa vixa rôga kakwaa ohexa uka íxupe. Ijapo porã porãpyre, heta iporãve rãve va'e ohexa uka íxupe.

⁹ Ohexa ukapa rire he'i íxupe:

—Entero ne rembiexakwe gwive ame'ẽ arã nde-vy, he'i íxupe anháy. — Ne retypy'ã-rehe erenhesü ranhe ramo xe mboete-vy, ame'ẽ arã nde-vy, he'i otantea-vy imbojejavys ukase-vy mo'ã Hesu-pe.

¹⁰ Ha Hesu ae katu ndojapóiry inhe'ẽ. He'i jotsy íxupe:

—Tereho katu, nde Satanás, he'i jotsy íxupe. —Ko'a-rami ae oĩ Nhandedjáry kwatia nhe'ẽ, he'i ave íxupe Hesu:

—“Pemomba'egwasu katu Tupã pende Jary-pe. Íxupe anho mante pehendu pemboete-vy”

* 4:4 Dt 8.3 * 4:6 Sl 91.11-12

he'i anháy ruvixa-pe onhe'ẽ mbojevy-vy.

¹¹ Upéa he'i rire anháy ruvixa oheja íxupe oho-vy. Ha Nhandejáry rembigwái yváy pygwa ogwahé ou-vy iha-py. Hemikotevẽ ogweru.

*Onhepyrū Hesu Nhandejáry nhe'ẽ mombe'u-vy
(Mc 1.14-15; Lc 4.14-15)*

¹² Ha upéi katu João Batista onhemoi preso. Oherakwā rendu ramo, Hesu osẽ jevy oho-vy Galiléia yvy-py.

¹³ Gwetã Nazaré-py ndopytái. Ova oho-vy Cafarnaum tetã-my. Pe Cafarnaum Galiléia yugwarusu rembe'y-py. Zebulon yvy pygwa, Naftali yvy pygwa ave he'i yma gware.

¹⁴ Upe-py ova Hesu yma gware he'i hagwe-rami oiko hagwā ãy. Yma Nhandejáry nhe'ẽ-py omombe'u va'ety Isaías remimoigwe kватia-rehe a-rami:

¹⁵ “Oĩ Zebulon yvy pygwa, Naftali yvy pygwa ave. Oĩ yugwarusu rape-koty oĩ va'e, oĩ Jordão ysyry rovái pygwa, oĩ Galiléia yvy pygwa, judeu e'ŷ kwéry va'e.

¹⁶ Upe va'e kwéry ptyt̄-my rei oiko va'e-rami oiko va'ekwe. ãy katu hendy va'e-py ohexa porã va'e-rami oiko-ma va'erã hikwái. Gwī omano va'erã-rami, ohexa jokupe rei-ma va'e-rami oiko va'ekwe hikwái, ãy katu ohesape íxupe va'e-rami oiko va'erã hikwái;*

he'i Nhandejáry kватia nhe'ẽ. Yma he'i hagwe-rami, ãy oiko-ma.

¹⁷ Cafarnaum tetã-my ova rire, onhepyrū Hesu Nhandejáry nhe'ẽ omombe'u-vy:

—Pene mo'agwī-ma ou-vy Nhandejáry pende ruvixarã. Upéa-gwi pemboasy peteĩ teĩ pene rembiapo vaikwe. Perova katu pende rekoha vaikwe, he'i omombe'u-vy íxupe kwéry.

*“Peju katu xe moirū” he'i Hesu
(Mc 1.16-20; Lc 5.1-11)*

¹⁸ Ha upéi katu Hesu ogwata oho-vy Galiléia yugwarusu yke-rehe. Ohexa oho-vy Símão-pe, héry va'e Pedro ave, tyvýry André ndive. Ohexa omombo ramo oity hagwā y-py kyha oipyhy hagwā pira. Pira jopoihaty voi ha'e kwéry:

¹⁹ —Peju katu xe moirū, he'i íxupe kwéry. —Nde katu pira jopói kwaahaty. ãy ae orohekombo'e-ta xe moirū uka hagwā gwī kente kwéry-pe, he'i ohenóí-vy íxupe kwéry Hesu.

²⁰ Upe-ma ramo pya'e oheja okyha. Omoirū-ma oho-vy Hesu-pe.

²¹ Ha upéi ohasave Hesu oho-vy gwenonde-koty. Ohexa oho-vy mokõi Zebedeu ra'y, Tiago tyvýry João ave. Gwu ndive omoatyrō oiko-vy kanoagwasu-py kyha. Ohenóí íxupe ojéupe omoirū hagwā:

—Peju katu xe moirū, he'i íxupe kwéry.

²² Upe-ma ramo pya'e oheja okanóá gwu reheve. Oho hupive omoirū-vy Hesu-pe.

*Hesu oporombo'e oporombogwera ave
(Lc 6.17-19)*

²³ Ha upéi katu Hesu oho Galiléia tetã tetã-rupi. Ojeporahéi haty haty-rupi oporombo'e. Nhandejáry nhande ruvixarã rehegwá nhe'ẽ porã omombe'u mbe'u. Entéro mba'asy-gwi oporombogwera gwera oiko-vy.

²⁴ Upe-ma ramo isarambi oho-vy herakwā. Síria tetã tetã-rupi oho herakwā. Upéixa-gwi ogweru íxupe opamba'e mba'asy rerekoha va'e gwive. Gwī hasy ete va'e, gwī anháy rerekoha, gwī he'o'ã'o'ã va'e, gwī hajy jeapa va'e ogweru

* **4:16** Is 9.1-2

ave íxupe. Entéro hasy va'e íxupe ojereru va'ekwe gwive, ombogwerapa joty ha'e.

²⁵ Upe ramo heta ojogweroaty Hesu-rehe hikwái. Oĩ heta Galiléia yvy pygwa, oĩ heta Dez Cidades oje'eha tetã mygwa. Oĩ heta Jerusalém tetã mygwa, Judéia yvy pygwa ave. Oĩ heta Jordão ysyry rovái pygwa. Heta eta kente oho ijave oje'óí-vy.

5

Heko vy'a tee va'e

(Lc 6.20-23)

¹ Ha upéi katu heta eterei ijaty va'e omoirũse Hesu-pe. Ha ha'e katu ohexa ramo íxupe kwéry, ipa'ũ-gwi ojeupi oho-vy. Ijavyte kwéry-gwi ojeupi oho-vy. Yvyaty ári-ma ojeupi oho-vy. Upe-py ogwahẽ ramo, ogwapy-ma yvyaturu-rehe. Ogwapy rire, omoirũ íxupe hemimbo'e kwéry.

² Upe ramo onhepyrũ-ma ohekombo'e porã-vy gwemimbo'e kwéry-pe. He'i omombe'u-vy íxupe kwéry:

³ —Gwĩ, “Iporiahu va'e-rami ko yvy-py xe aiko” he'i ójehe va'e, gwĩ, “Xejéhegwi rei ndikatúiry xe aiko” he'i ójehe va'e, heko vy'a tee va'e. Nhandejáry nhande ruvixa ndive gwarã voi. Upéa-gwi ov'y'a.

⁴ —Gwĩ gwembiapokwe omboasy-vy hasẽ va'e, heko vy'a tee joty. Nhandejáry remimbopy'agwapyrã voi upéa. Upéa-gwi ov'y'a.

⁵ —Gwĩ ipoxy pya'e e'ŷ va'e, heko kirirĩ va'e, heko vy'a tee va'e. Ko yvy pygwa íxupe gwarã. Ko yvy imba'e teerã. Upéa-gwi ov'y'a joty.

⁶ —Gwĩ Nhandejáry remimbota gwive ojaposeve seve va'e, heko vy'a tee va'e. Ivare'a va'e-rami, ijuhéi va'e-rami ave oiko hemimbota ojapose eterei-gwi. Ojapo rire ov'y'a va'erã. Onhembopy'ajeko tee va'e-rami ov'y'a-ma va'erã oiko-vy.

⁷ —Gwĩ gwapixa-pe oiporiahuverekva'e, heko vy'a tee va'e. Oiporiahuverekva'e ave íxupe Nhandejáry. Upéa-gwi ov'y'a.

⁸ —Gwĩ hesakatu reheve ipy'a potĩ va'e, heko vy'a tee va'e. Ohexava'erã Nhandejáry-pe. Upéa-gwi ov'y'a.

⁹ —Gwĩ gwapixa peteĩxa omoingo porã va'e, ombojoja va'e, heko vy'a tee va'e. “Xe ra'y voi, xe rajy voi” he'i va'erã hese Nhandejáry. Upéa-gwi ov'y'a.

¹⁰ —Gwĩ Nhandejáry remimbota ojapo-gwi ogwerekova'e asy ramo jepe íxupe, heko vy'a tee joty. Nhandejáry nhande ruvixa ndive gwarã voi. Upéa-gwi ov'y'a.

¹¹ —Ha peẽ ave xe moirũ-gwi onhe'ẽ rei rei va'erã pende-rehe. Pende rerekova'e asy va'erã. Xe-rehe ndaija'ei-gwi opaixagwa ivai va'e omombe'u vai va'erã pende-rehe, ijapu va'erã pende-rehe. Upéixa pende rerekova'e, pende reko vy'a tee voi.

¹² Pevy'a katu. Perovy'a joty katu pende-rehe hembiapo vai va'e. Yváyypy heta eterei ombohekivia va'erã peẽ-my ome'ẽ-vy Nhandejáry. Upéa-gwi pevy'a joty. Pende rerekoha-rami ave ogwerekova'e asy va'ekwe myamyrĩ Nhandejáry nhe'ẽ-py omombe'u va'ety-pe. Yma gware-pe pene renonderã-rehe ogwerekova'e asy hagwe-rami ave, ãy pende rerekova'e asy ave va'erã.

Juky rehewa nhe'ẽ, yvypóry kwéry-pe ohesape va'e-rami oiko va'e rehewa nhe'ẽ ave

(Mc 9.50; Lc 14.34-35)

¹³ —Pejeapysaka katu juky rehewa nhe'ẽ-rehe. Juky-rami peẽ peiko ko yvy-py. Pono ine so'o-rehe juky nhamoĩ va'e-rami, peẽ peiko ko yvy-py ani hagwã

teko rei ivaive ive oho-vy. He porā juky ha ndahe porāvēi ramo, ndikatuvéima nhamoatyrō íxupe. Naiporāvēi-ma nhamoatyrō hagwā. Nde eremombo-ma va'erā. Ereprynū va'erā hese.

14—Yvypórý kwéry-pe pehesape va'e-rami ave peẽ peiko. Ojekwaa porā tetā yvyaty ári onhemoī va'ekwe. Ndikatúiry onhomí nhomi íxupe.

15 Ojekwaa porā ave tataendy. Nhamoendy ramo, ndajajaho'íry nha'ẽ gwy-py. Tataendy'y ári ae nhamoī. Upe ramo entéro óga pygwa-pe pe tataendy ohesapepa oĩ-vy.

16 Upéixa ete ohesape va'e-rami, tojekwaa porā ne rembiapo porākwe. Upéixa ramo nde rapixa kwéry ohexa va'erā ne rembiapo porā. Ohexa ramo, omomba'egwasu va'erā nde Ru yváy pygwa-pe, he'i Hesu.

Moisés amyrī remimombe'ukwe rehewa nhe'ẽ

17 Upéi he'i jevy Hesu:

—Ani ere tei: “Ogwahē-ma ou-vy Hesu ohekoviārō hagwā Moisés amyrī remimombe'ukwe tekoha” ani ere tei. “Ou-ma ohekoviārō hagwā Nhandejáry nhe'ẽ-py omombe'u va'ety amyrī remimombe'ukwe tekoha” ani ere tei. Agwahē-ma ae aju-vy ipokatu hagwā upe Nhandejáry remimo'arandukwe nhe'ẽ oiko hagwā he'i hagwe-rupi, he'i.

18 Upéi he'i ave:

—Pejeapysaka katu xe nhe'ẽ-rehe. Anhetegwa va'e amombe'u-ta peẽ-my. Ko yvy áry ndive oiko jave, nonhemohekoviārō mo'āi va'erā Moisés amyrī remimombe'ukwe nhe'ẽ. Nomokanhy mo'āi ni peteī ojehai va'ekwe. Ni peteī ndyky jaiporu va'e kwatia nhamonhe'ẽ porā hagwā nomokanhýi va'erā. He'i hagwe-rami oikopa peve nonhemohekoviārō mo'āi va'erā Nhandejáry kwatia nhe'ẽ.

19 Upéa-gwi oĩ ramo Nhandejáry kwatia nhe'ẽ ohendu rire mix̄ eterei va'e nohendusevēi va'e. Upéi ohendu e'ŷ uka hagwā ombo'e gwapixa-pe. Upe va'e apohare-pe nomomba'egwasúi arā voi Nhandejáry oiko ha-rupi nhande ruvixarā. Ombohekomix̄ive va'erā ae voi íxupe. Ha Nhandejáry kwatia nhe'ẽ apoha, “Pehendu katu Nhandejáry kwatia nhe'ẽ Moisés amyrī remimombe'ukwe” he'i ae va'erā gwapixa-pe, omomba'egwasu va'erā íxupe Nhandejáry oiko ha-rupi.

20 Ha gwī judeu rekombo'ehaty kwéry, fariseu kwéry ndive ojapose mo'ā Nhandejáry remimbota gwive ogwahē hagwā mo'ā oho-vy nhande ruvixa ramo Nhandejáry oiko haty-py. “Heta nhane rembiapo porā porā” he'i ójehé kwéry. “Upéa-gwi nhagwahē va'erā jaha-vy Nhandejáry oiko haty-py” he'i mo'ā ójehé kwéry. Ha nogwahē mo'āi voi. Ha'e kwéry heko-rupi peiko ramo, napemoirū mo'āi Nhandejáry pene ruvixarā-pe. Nhandejáry remimbota gwive pehenduseve seve ramo ae, pemoirū va'erā íxupe, he'i gwemimbo'e kwéry-pe Hesu.

Ipoxy rei va'e rehewa nhe'ẽ

21 Upe rire katu he'i jevy Hesu:

—“Ani ereporojuka tei” he'i araka'e yma gware-pe. “Oporojuka va'ekwe-pe ogweraha va'erā mburuvixa rovagwy-py oporandu hagwā íxupe hembiapokwe-rehe” he'i araka'e yma gware-pe. Upéa pehendu-ma.

22 Áy xe ae katu nde rekoha porāve hagwā amombe'u-ta peẽ-my. Gwe'ýi-rehe ipoxy rei va'e-pe gwive ogweraha va'erā mburuvixa renda-py ogwereko hagwā íxupe hembiapokwe-rami. Gwe'ýi-rehe onhe'ẽ rei va'e-pe ogweraha va'erā mburuvixa kwéry ojogweroaty haty-py omoporandu uka hagwā hembiapokwe-rehe íxupe. Ha, “Nde tavy. Ne arandu e'ŷ va'e” he'i va'e gwive gwapixa-pe katu, ojereraha va'erā tata opa rei rei e'ŷ va'e-py.

23 —Upéixa ramo ereho ramo Nhandejáry róga-py ne remime'érā ereme'ẽ-ma hagwā íxupe Nhandejáry apyka nhamboete haty-py, upe-py nde re'yi nde-rehe ija'e'ŷha-rehe ne mandu'a ramo, ani ereme'ẽ ranhe teĩ Nhandejáry-pe ne remime'érā.

24 Eheja rei katu Nhandejáry apyka renonde-py. Tereho ranhe katu nde rapixa ha-py erehekomojoja ranhe hagwā íxupe peteĩxa ereiko hagwā. Ha upe rire katu eju jevy Nhandejáry ha-py ne remime'érā ereme'ẽ hagwā íxupe.

25 Embojoja mani katu nde-rehe ija'e'ŷha-pe peho jave mburuvixa happy. Ne'irā vyteri erekwahē jave, embojoja ranhe katu ne nhe'ẽ nde rapixa ndive erembovy'a jevy hagwā íxupe. Nerembojái ramo íxupe, ne me'ẽ arā mburuvixa po-py. Upéi mburuvixa ne me'ẽ va'erā polícia po-py. Upéi nde reja va'erā preso.

26 Anhetegwa amombe'u-ta peẽ-my. Preso erepyta rire, ndopoi rei mo'ãi ndéhegwí. Nane mosẽ mo'ãi. Ndereve reveha gwive ne mbopaga uka va'erā. Erepagapa rire mante, ne mosẽ va'erā, he'i Hesu.

Mba'éixa nhanhemongy'a

(Mt 19.3-9; Mc 9.43-47; 10.11-12; Lc 16.18)

27 Upéi he'i jevy Hesu:

—“Ani erenhomongy'a teĩ nde rapixa rembireko ndive, nde rapixa ména ndive ereiko-vy” he'i araka'e yma gware-pe. Upéa pehendu-ma. Ha ãy katu xe ae nde rekoha porâve hagwā amombe'u-ta peẽ-my.

28 —Gwī opy'apy-py imandu'a gwapixa rembireko-rehe oikose-gwi indive va'e, hendive ndoikói vyteri ramo jepe, ojejavý joty. Gwesa-rupi joty ogwerekó gwapixa rembireko. Omongy'a-ma va'e-rami, ojapo vai-ma hese.

29 —Upéixa ramo nde resa nde akatúa-koty oĩ va'e-gwi erejejavý-ta ramo, ejekoko joty ne rembiapo vairágwe-gwi. Enohē katu peteĩ nde resakwe emombo ndejéhegwí nde resakwe, peteĩ hesa pehē va'e-rami ereiko hagwā. Nde resa mokõi reheve nde reraha ramo tata ijapy e'ŷ va'e renda-py, ivai eterei va'erā nde-vy. Iporâve erenohē eremombo peteĩ nde resakwe ndejéhegwí.

30 —Ha nde po nde akatúa-koty oĩ va'e-gwi erejejavý-ta ramo, ejekoko ae katu ne rembiapo vairágwe-gwi. Ejahya ae katu upe nde po emombo ndejéhegwí. Peteĩ ipo va'e rekoha-rami ae katu eiko. Mokõi nde po reheve nde reraha ramo tata ijapy e'ŷ va'e renda-py, ivai eterei arā. Iporâve erejahya peteĩ nde po ndéhegwí.

31 —“Gwembireko-gwi opoise va'e gwive, tojapo kwatia ome'ẽ hagwā gwembireko-pe, Apoi-ta ndéhegwí, he'i-vy va'e tome'ẽ íxupe” upéa he'i ave araka'e yma gware.

32 Ha ãy katu xe ae nde rekoha porâve hagwā amombe'u-ta peẽ-my. Gwembireko-gwi opoi va'e ojapo vai hese. Upéi hembirekokwe omenda jevy ramo, onhemongy'a-ma va'erā. Ha Nhandejáry katu omoingo asy va'erā imenakwe-pe, omenda amboaese jevy-gwi oheja rei gwembireko hagwe-rehe. Ha kunha hejapyre-rehe omenda jevy va'e katu, onhemongy'a va'erā ha'e-rami ave. Ha kwimba'e ambue ndive ojohu va'e gwembireko katu, opoi ramo gwembireko-gwi, ndojapo vaíry hese, he'i Hesu.

Ani ereiporu teĩ imba'e réry rei ne nhe'ẽ pokatuve hagwā mo'ã

(Tg 5.12)

33 Upéi he'i jevy Hesu:

—“Ani erejapo e'ŷ teĩ ne nhe'ẽ. Xe apu ramo xe rendu va'erā Nhandejáry, ere ramo, ejapo katu ne nhe'ẽ” he'i araka'e yma gware-pe. Upéa ave pehendu-ma.

³⁴ —Ãy ae katu nde rekoha porâve hagwâ amombe'u-ta peẽ-my. “Nanhe'ẽ rei mo'ãi, ajapo-ta voi” ere ramo, ani ereiporu teĩ imba'e réry rei ererovia uka hagwâ ne renduharâ-pe ne nhe'ẽ. Ani ereiporu yvây réry. Upe-py Nhandejáry ogwapy haty. Nde ae ne nhe'ẽ eiporu.

³⁵ Ani ereiporu teĩ yvy réry. Upe-py Nhandejáry opyrû haty. Ani ereiporu teĩ Jerusalém tetâ réry. Upe-py oiko Nhandejáry nhande ruvixagwasu. Nde ae ne nhe'ẽ eiporu.

³⁶ Ani ereiporu teĩ ne akâ réry ererovia uka hagwâ ne renduharâ-pe ne nhe'ẽ. Nhandejáry mba'e ne akâ. Nde ávy peteĩ va'e neremomorotî kwaái, neremohû kwaái ave. Nde ae ne nhe'ẽ eiporu.

³⁷ Erenhomoneta ramo, erejapose va'erâ-rehe. “Ajapo-ta” ere. Ha ndere-japoséi va'erâ-rehe, “Ndajapo mo'ãi” ere ave. Imba'e réry rei ani ereiporu teĩ. Imba'e réry rei ereiporu ramo, nde rekombo'e ra'e anhaygwasu. Anhayg-wasu rape-rupi ereiko ra'e, he'i Hesu gwemimbo'e kwéry-pe.

*Ani erejehepy teĩ nde rapixa-rehe
(Lc 6,29-30)*

³⁸ Upéi he'i jevy Hesu gwemimbo'e kwéry-pe:
—“Iporâ erejepy” he'i araka'e yma gware-pe. “Nde resa ombyai ramo nde rapixa, embyai katu hesa hekivia. Ne râi omopê ramo nde rapixa, emopê katu hâi hekivia. Nde-rehe ojapo hagwe-ramima nde rapixa ejapo ave hese” he'i araka'e nhande rekorâ omombe'u-vy araka'e. Upéa pehendu-ma.

³⁹ —Ãy ae katu iporâve amombe'u-ta peẽ-my. Aníke upéixa erejapo teĩ. Nde rapixa nde-rehe ojapose va'e ojapo ramo, ani joto kuri erejepy teĩ hese. Nde rovapete ramo jepe nde akatúa-gwi, ani joto kuri erejepy teĩ hese. Nde rovapete ramo jepe, ejerova rova joto íxupe. Eme'ẽ joto íxupe nde rova asu nde rovapete jevy hagwâ.

⁴⁰ Nde reraha ramo mburuvixa renonde-py oipe'a hagwâ ndéhegwi ne kamisa, eme'ẽ íxupe togweraha ne kamisa nde ao jo'a ndive.

⁴¹ “Eraha katu areko va'e peteĩ quilômetro” he'i ramo nde-vy peteĩ soldado omanda-vy, ejapo katu inhe'ẽ. Ejapove joto inhe'ẽ. Eraha joto katu ogwereko va'e mokõi quilômetro.

⁴² Gwî oikotevâ va'e ojerure ramo nde-vy, eme'ẽ katu íxupe. Ne mba'e oiporuse va'e-pe eiporuruka joto ave íxupe, he'i Hesu.

*Nde-rehe ija'e'ŷ ramo jepe, ehayhu joto kuri íxupe
(Lc 6,27-28,32-36; Rm 12,14)*

⁴³ Upéi he'i jevy Hesu:
—“Ehayhu katu nde re'yí-pe ha nde-rehe ija'e'ŷ va'e-pe ani ave erehayhu teĩ” he'i araka'e yma gware-pe. Upéa pehendu-ma.

⁴⁴ —Ãy ae katu nde rekoha porâve hagwâ amombe'u-ta peẽ-my. Nde-rehe ija'e'ŷ va'e jepe, ehayhu joto íxupe. Nde rerekoso asy va'e-rehe, ejapo joto oração. Embojeupi joto katu ne nhe'ẽ Nhandejáry-pe hese kwéry.

⁴⁵ Upéixa Nhandejáry rekoha. Upéixa ereiko va'erâ nde Ru yvây pygwa ra'y tee ramo. Nhande resape uka va'e peteixa nhande rerekoso. Hekoha vai va'e-pe hekoha porâva'e-pe ave omosê kwarahy omoendy-vy peteixa Nhandejáry. Hembiapo porâva'e-pe hembiapo vai va'e-pe ave omongy peteixa. Enterove va'e-pe ohayhu-gwi ojapo upéixa. Pende Ru yvây-py oĩ va'e ojapoha-rami ave, peẽ pejapo katu.

⁴⁶ —Nde rayhu va'e-pe anho erehayhu ramo, “Hekoha porâ eterei” nde'i mo'âiry nde-rehe Nhandejáry. Nde reko-ramima ave oiko gwî plata-py nhane mbopaga va'ety, hese imandu'a vai va'e.

⁴⁷ Nde re'ýi anho ererovy'a ramo, "Hembiaapo porã eterei" nde'íry va'erã nde-rehe Nhandejáry. "Xe rekoha porã" ere rei arã ndéjehe. Nde rekoramima ave oiko va'erã judeu e'ý va'e Nhandejáry kwaa e'ýha, gwe'ýi anho ogwerovy'a-vy.

⁴⁸ —Peiko ae katu Pende Ru yváy pygwa reko-rupi. Ha'e hekoha porã tee rei voi heko jejavy e'ý reheve. Ha'e-ramima peiko meme katu, he'i Hesu gwemimbo'e kwéry-pe.

6

Ne rembiapo porã ramo, ani erejapo teĩ enterove resa-py erejehexa ukase-vy

¹ Hesu he'i jevy gwemimbo'e kwéry-pe:

—Xáke, enhangareko porã katu ndéjehe, he'i. —Ne rembiapo porã ramo, ani erejapo teĩ enterove va'e resa-py erejehexa uka porãse-vy imandu'a porã hagwã mo'ã nde-rehe. Upéixa ereiko ramo, "Hekoha porã upe va'e. Íxupe gwarã ame'ë-ta" nde'i mo'ãi arã voi nde-rehe Nhandejáry pende Ru yváy pygwa. Nde rekoha oikwaa voi. Ani erejapo teĩ upéixa. Ndaipotái upéixa erenhemboete ukase ereiko-vy.

² —Iporiahu va'e-pe ereme'ëse ramo, ani ereiko gwĩ gweko-gwi rei enterove resa-py ojehexa uka porãse va'e reko-rupi, opy'a ky'aha omo'ã kwaa va'e reko-rupi. Atýra-py ojeporahéi haty-py omonhe'ë gwemimbygwasu, enterove imandu'a porã hagwã mo'ã hese. Tape-rupi ombopu onhemboete ukase-vy mo'ã. Anhetegwa va'e amombe'u-ta peë-my. Hexaháry-pe onhemboete uka rire, mba'eve nome'ë mo'ãvéi-ma íxupe Nhandejáry.

³⁻⁴ Iporiahu va'e-pe ereme'ëse ramo ae, eme'ë nhemi íxupe. Tojekwaa e'ý ne remime'ë. Toikwaa e'ý jepe nde po asu va'e nde po akatúa va'e rembiapo. Toikwaa e'ý nde reko irũ kwéry ne remime'ë. Upéixa nde Ru yváy pygwa ombohekivia va'erã nde-vy ome'ë-vy. Ndaipóri íxugwi okanhy va'e. Okanhy va'erãgwe jepe ae ojohu joty Nhandejáry, he'i Hesu.

Oração erejapo ramo, a-rami ejapo

⁵ Upéi he'i jevy Hesu:

—Gwĩ nombojekwaái joty va'e opy'a ky'aha, ojehexa uka porãse-vy rei ojapo va'e mo'ã oração, onhembo'yse oração apo-vy. Ojeporahéi haty-py ojapo oração imandu'a porã hagwã mo'ã hese. Ojéhegwi rei ojapo mo'ã oração enterove resa-py. Onhemboete ukase-vy rei ae onhembo'yse tape kurusupy. Anhetegwa va'e amombe'u-ta peë-my. Ojekwaa porã rire, mba'eve íxupe nombohekivia mo'ãvéi-ma Nhandejáry. Ani peiko teĩ ha'e kwéry heko-rami, he'i.

⁶ —Oração erejapo javé ae, eike katu koty-py. Ne rokẽ emboty ndejeheve. Upéi ne anho ha-py embojeupi ne nhe'ë nde Ru jahexa e'ý va'e-pe. Ha upe rire katu nde Ru yváy pygwa ne anho ha-py erejapo va'e rexava-vy, nde rovasa porã va'erã ombohekivia-vy nde-vy.

⁷ —Gwĩ judeu e'ý va'e Nhandejáry kwaa e'ýha onhembo'e mbo'e rei. Heta nhe'ë oiporu rei va'e omondo rei onhe'ë Nhandejáry-pe. "Xe nhe'ë puku ramo, anhe'ë porã-ma" he'i mo'ã ójehe. "Heta-gwi xe nhe'ë, ohendu-ta xe nhe'ë Nhandejáry" he'i mo'ã ójehe.

⁸ Ani peiko teĩ ha'e kwéry heko-rami. Erejerure e'ý reheve ne remikotevõ oikwaa-ma Nhandejáry nhande Ru.

⁹ —Oração erejapo ramo, a-rami ae kuri ere:

Ore Ru yváy-py ereime va'e. Opa-rupi tomboete nde réry marangatu va'e.

¹⁰ Ejehexa uka uka katu yvy pygwa-pe huvinxarã. Ne remimbota yváy pygwa ojapoha-rami, tojapo yvy pygwa ave.

11 Ìy eme'ẽ ore-vy ore remi'urã ãy gwarã.

12 Ore poriahuvereko katu oranjejavvy rire. Ore rapixa-pe ore-rehe ojejavvy rire orioiporiahuverekoha-rami, ore poriahuvereko katu ore-vy ave.

13 Ani teĩ ereheja ore rekombo'e vai anháy. Ore resende ae katu íxugwi. Nde ae ko mburuvixa teeve voi. Nde pu'aka porãve va'e voi nde. Tane momba'egwasu enterove va'e opa e'ŷ reheve. Amém.*

14 —Ha'e-ta peẽ-my. Nde-rehe ojejavvy rire nde rapixa-pe ereiporiahuvereko ramo, nde-vy ave nde poriahuvereko va'erã nde Ru yváy pygwa.

15 Ha nde rapixa-pe ndereiporiahuverekói ramo katu, nde-vy ave nande poriahuvereko mo'ãi va'erã nde Ru yváy pygwa, he'i Hesu.

Jakaru e'ŷ reheve rehewa nhe'ẽ

16 Upéi he'i jevy Hesu:

—Gwĩ opy'a ky'aha omo'ã kwaa va'e gweko-rehe rei onhemboete ukase va'e, okaru e'ŷ reheve ohasa mo'ã Nhandedjáry mboete-vy. Upéixa ojapo ramo, hova asy oiko-vy ov'yare'ŷ va'e-rami. Ndojehovahéiry. Ndojekyvu porãi ave ojehexa uka porã hagwã okaru e'ŷha onhemboete ukase-vy rei. Oipota enterove omanha hese. Anhetegwa va'e amombe'u-ta peẽ-my. Onhemboete rire, nombohekovia mo'ãi va'erã íxupe ome'ẽ-vy Nhandedjáry. Ani peiko teĩ ha'e kwéry heko-rami.

17-18 Ha peẽ katu Nhandedjáry mboete-vy pekaru e'ŷ reheve pehasa ramo, pejekyvu porã katu. Pejehovahéi katu. Upéixa pende rapixa-pe ndojekwaái va'erã pekaru e'ŷha. Ha Nhandedjáry ha'e anho mante oikwaa va'erã pekaru e'ŷha. Ndaipóri íxugwi okanhy va'e. Ne rembiapo nhemi oikwaa ramo, ombohekovia va'erã nde-vy ome'ẽ-vy ne rembiapo porãgwe-rehe, he'i Hesu.

Yváy pygwarã-rehe katu pepena

(Lc 12.33-34; 2 Tm 4.8; 1 Pe 1.4)

19 Upéi he'i jevy Hesu:

—Ani erenhongatu rei teĩ ko yvy-rehe ne mba'e kwéry. Onhembotapurupa arã nde ao. Onhembyaipa arã ne mba'e. Ombokwa arã nde róga-rehe imonda va'e oike hagwã nde koty-py. Ndaha'ei yváy pygwarã ko yvy pygwa va'e. Nhane rembiejarã meme voi.

20 Nhandedjáry reminhongatu yváy-py peẽ-my gwarã-rehe ae katu pepena peiko-vy ko yvy-py. Yváy-py onhongatu va'e-rami peiko katu ko yvy-py. Upe-py ndaipóri nhande ao ombotapuru rei va'erã. Ndaipóri nhane mba'e ombyai rei va'erã. Upe-py ndaipóri nhande róga-rehe ombokwa mbok waharã nhande koty-py oike-vy omonda va'erã nhandéhegwí nhane reminhongatu va'e.

21 Nhane rakate'ŷha-ma nhane renonde-py nhamoï meme jaiko-vy. Upéagiwi ani erenhongatu rei teĩ ko yvy-rehe ne mba'e kwéry. Hese anho ereity arã nde resa ereiko-vy. Epena ae katu nde reko porãrã yváy pygwarã-rehe, he'i Hesu.

Nhande resa nhande rete resapeha

(Lc 11.34-36)

22 Upéi he'i jevy Hesu:

—Ha nhande resa reheve katu ohexa va'e-rami oiko nhande rete. Jahexa porã ramo, ohexa vérampi ave nhande rete. Hembipepa íxupe va'e-rami oiko. Upéixa nde rekoha porã tee ramo, arakatu pygwa vérampi ereiko va'e, erejehesa rerova uka-vy Nhandedjáry-rehe.

* **6:13** Lc 11.1-4

²³ Ha naiporāi ramo nhande resa katu hesa e'ŷ va'e-rami oiko nhande rete. Ndohexa uka porāi ramo nhande-vy, pytū-my oiko ave nhande rete. Upéixa voi nde rekoha vai ramo, pytū-my vérāmi ereiko va'e, erejehesa rerovala uka e'ŷ-vy Nhandejáry-rehe. Ipytūmba rei voi nde-vy. Ndahapéi voi nde-vy, he'i Hesu.

*Ne remikotevē-rehe gwive ani erepena pena ereiko-vy
(Lc 12.22-31; Fp 4.6; 1 Pe 5.7)*

²⁴ Upéi he'i jevy Hesu:

—Avave ndikatúi ojáry mokōi va'e nhe'ŷ-py omaba'apo. Oĩ ramo nhande-rehe mokōi omanda va'e, peteĩ va'e-rehe nanhande a'ei va'erā. Outro-pe jahayhu va'erā. Peteĩ va'e-rehe nhane rakate'ŷ va'erā. Ha outro-pe ndajahexaséi va'erā. Upéa-gwi naiporāi nhane rakate'ŷ eterei plata-rehe. Erembotuvixave ramo plata, ipu'aka va'erā nde-rehe. Nerepenái va'erā Nhandejáry-rehe. Nde kupe-py oĩ va'e-rami ererekva va'erā íxupe.*

²⁵ —Upéa-gwi ha'e-ta peẽ-my. Aníke erepena pena anho rei ere'u va'erā-rehe ereikove hagwā. Nde aorā-rehe eremonde va'erā-rehe, gwīa-rehe ani erepena eterei teĩ. Nhane remi'urā anho rei-rehe naiporāi jaiko. Nhande rete pegwarā anho voi nhande ao, nhane remi'urā ave. Naiporāi nhapena upe va'e anho-rehe jaiko-vy. Upe va'e anho-rehe ndikatúi nhapena jaiko-vy.

²⁶ Pehexa katu gwyra reko. Onhemitŷ e'ŷ ramo jepe, koty-py onhongatu hagwā heraha-vy oikytī e'ŷ ramo jepe, omongaru joty íxupe nde Ru yváy pygwa. Ha gwyra kwéry natuvixamba'e etéiry Nhandejáry-pe. Ha peẽ katu pende tuvixave íxupe gwyra kwéry-gwi.

²⁷ Ani erepena eterei teĩ ndéjehe. Ereiko pukuseve mo'ã-gwi rei, ndereiko pukuve mo'ãiry.

²⁸ —Nde aorā orā-rehe ani erepena eterei teĩ ereiko-vy. Pehexa katu yvoty reko. Nomba'apói opotyrā-rehe. Oipogwā va'e-rami ndoikóiry. Nomba'apói ramo jepe, optya porā ete voi joty.

²⁹ Yma oiko va'ekwe myamyrī mburuvixa Salomão. Imba'e reta va'ekwe. Ijao porā ave va'ekwe. Upe va'e-rehe onhemomba'egwasu ete va'ekwe. Ha ha'e-ta peẽ-my. Xe ae katu amoeteve upéa yvoty-pe. Ha'e ijehexaha-rami e'ŷ jepe, iporāve joty katu íxugwi.

³⁰ Ha Nhandejáry katu ombopoty porā kapi'i. Etería henhói porā. Ko'ẽ ramo oikytī-ma arā, omombo va'erā tata-py ohapy-vy. Pe kapi'i Nhandejáry remimbopoty voi. Onhangareko porā hese-gwi, ipoty porā voi. Ha pende-rehe katu onhangareko porāve. Ne monde uka va'erā. Ma'erā ndapejeroviái hese? Hese anho ae pejerovia katu. Ome'ẽ va'erā nde-vy nde aorā.

³¹ Upéa-gwi ani erepena ndéjehe. “Mbava'e tipo ja'u va'erā? Mbava'e tipo jay'u va'erā? Mbava'e-py tipo nhanhemonde va'erā?” ani ere teĩ upéixa.

³² Upeixagwa-rehe opena pena oiko-vy judeu e'ŷ va'e Nhandejáry kwaa e'ŷha. Ha nde Ru yváy pygwa katu ne remikotevē gwive oikwaa va'e. Upéa rehewa ereikotevē va'e-rehe ha'e oikwaa voi. Upéa-gwi ani erepena pena teĩ hese ereiko-vy.

³³ Pepena ranhe ae katu Nhandejáry pende ruvixarā-rehe. Pemoĩ meme pene renonde-py ha'e ae hemimbota erejapo hagwā. Hese anho mante epena eiko-vy. Upéi upéa rehewa gwive ne remikotevē va'e ome'ẽ rei va'erā nde-vy.

³⁴ Ani pepena teĩ ko'ẽ ramogwarā-rehe. Pono pene mytu'e'ŷ pendéjehe ani pepena teĩ ko'ẽ ramo ojehu-ta va'e-rehe, gwī ivai-ta va'e-rehe. Ko'ẽ ramo ae pepena kuri hese, he'i Hesu gwemimbo'e kwéry-pe omombe'u-vy.

* **6:24 Lc 16.13**

7

*Ani nde rapixa rembiapo-rehe, “Ivai” ere teĩ erepondera-vy
(Lc 6.37-38,41-42; Rm 2.1-3; 1 Co 2.14-15; Tg 4.11-12)*

¹ Hesu he'i jevy gwemimbo'e kwéry-pe:

—Ani nde rapixa rembiapo-rehe, “Ivai” ere teĩ erepondera-vy. Ne rembiapo ojohu vai ave arã nde-rehe Nhandejáry.

² —Upe erejavaeterekoha-rami ave, “Ivai” he'i arã nde-rehe Nhandejáry. Nde rapixa ererekoha-rami nde ave nde rereko va'erã Nhandejáry.

³ —Ãy amombe'u-ta pene rekorã-rehe. Yvyra ra'ykwe rehewa nhe'ẽ-rami aiporu-ta peẽ-my imombe'u-vy. “Oĩ ra'e nde resa-py yvyra ra'ykwe” ere teĩ nde rapixa-pe. Ha nde ave tuvixave nde resa-py oĩ va'e. Heko porã va'e-rami ereikose mo'ã nde rapixa-pe.

⁴ Upéixa ramo ma'erã ere teĩ nde rapixa-pe: “Taipe'a nde resa-gwi pe yvyra ra'ykwe mixĩ oĩ va'e”. Nde ave tuvixave nde resa-py oĩ va'e.

⁵ Nde, “Ndaxe py'a ky'ái”, ere mo'ã ndéjehe. Nde nde rekoha vai-ma. Erova ranhe katu nde rekoha. Eipe'a ranhe katu ndejéhegwí pe yvyra tuvixave va'e nde resa-py oĩ va'e. Upéi erhexa porã arã ereipe'a hagwã nde rapixa resa-gwi upéi yvyra ra'ykwe mixĩ oĩ va'e.

⁶ “Ani ereme'ẽ teĩ jagwa-pe imarangatu porã va'e” ja'e. “Ojere arã nde su'u-vy.” “Ani eremombo kure rovagwy-py ne mba'e porã hepy va'e. Opyrũ rei arã hese omongy'apa-vy” ja'e. Nde rapixa ne nhe'ẽ porã ombojevy va'e, ndaha'éi ne nhe'ẽ porã íxupe gwarã.

*Hekoha porã tee va'e Nhande Ru yváy pygwa
(Lc 11.9-13; Jo 14.13-14)*

⁷ —Ejerure rure katu Nhandejáry-pe. Ha ne rembijerure katu ome'ẽ va'erã nde-vy. Eheka heka katu ndejéupe gwarã. Ha ne rembieka katu erejohu va'erã. Okẽ onhemboty va'e oipe'a uka hagwã ombota mbota va'e-rami, pene kyre'ỹ katu pejapo hagwã oração. Nde-vy oipe'a-ma va'e-rami okẽ, ohendu va'erã Nhandejáry pene nhe'ẽ.

⁸ Gwĩ ojerure rure va'e-pe gwive ome'ẽ va'erã. Gwĩ oheka heka va'e gwive ojohu va'erã. Gwĩ ombota mbota va'e-rami oha'arõ oĩ-vy va'e-pe gwive ojepe'a va'erã.

⁹ Ta'ýry gwemi'urã-rehe ojerure ramo, ndaipóri pene pa'ũ-my ita ome'ẽ va'erã íxupe.

¹⁰ Ta'ýry pira-rehe ojerure ramo, ndaipóri pene pa'ũ-my mbói ome'ẽ va'erã íxupe.

¹¹ Peẽ kwéry pende rekoha vai ramo jepe, peme'ẽ kwaa joty iporã porã va'e pende ra'y kwéry-pe. Ha pende Ru yváy pygwa katu hekoha porã tee va'e. Upéa-gwi ome'ẽ kwaa porãve voi pejerure va'e-pe gwive iporã porã tee va'e.

¹² Ha nhande kwéry katu jaipota nhande rapixa ojapo porã nhande-rehe. Aipo ramo, nde hese ave ejapo porã. Peteíxa pejapo porã ojóehe, he'i. —Tuvixa mba'eve ko va'e nhe'ẽ. Ko va'e nhe'ẽ-py anohẽ kuri peẽ-my judeu rekoharã Moisés amyrí remimombe'ukwe gwive, Nhandejáry nhe'ẽ-py omombe'u va'ekwe gwive ave. Peteí nhe'ẽ-py amombe'upa kuri peẽ-my, he'i gwemimbo'e kwéry-pe Hesu.

*Oĩ mokõi tape
(Lc 13.24)*

¹³ Upéi Hesu he'i jevy:

—Tapeho katu tape porã-rupi. Upe tape ypyrûha tape po'i voi. Upe-rupi tapeho katu. Ani peho teĩ tape vai-rupi. Upe tapegwasu mombyry

nhande rerahaha voi Nhandejáry-gwi. Tapegwasu nhepyrūha tuvixa oĩ va'e. Ndahekorasýi jaha hagwã upe tapegwasu-rupi. Heta oho tapegwasu-rupi va'e.

¹⁴ Ha ndaupéixairy tape Nhandejáry ha-py oho va'e. Upe tape ypyrūha tape po'i voi. Hasy-py nhagwahẽ va'erã upe tape-rupi Nhandejáry ha-py. Ha upe tape-rupi ogwata va'e ndahetáiry, he'i Hesu.

*Oĩ, "Nhandejáry nhe'ẽ-py amombe'u" he'i va'e mo'ã ójehe
(Lc 6.43-44; Tg 3.11-12; 1 Jo 3.10)*

¹⁵ Upéi Hesu he'i jevy:

—Oĩ, “Nhandejáry nhe'ẽ-py amombe'u” he'i va'e mo'ã ójehe. Xáke. Ani penhembotavy uka íxupe. Ojehexa uka porã va'erã ogwahẽ ou-vy pende ha-py. Ou va'erã ovexa-rami. Ipoxy e'ŷ va'e-rami ou va'erã ojehexa uka-vy. Ha opy'apy-py kwéry katu ipoxy. Heko poxy va'e-rami, jagwarete ivare'a va'e-rami voi ipoxy opy'a-py.

¹⁶ Pehexa kwaa va'erã hembiapo-rehe. Nhuatí-gwi ndikatúi jaipo'o hi'a uva. Karapíxu-gwi ndikatúi jaipo'o figo aju. Ndaha'ei figo aju-rami kara-pixu'a.

¹⁷ Hi'a porã yvyra porã. Ha ndahi'a porãi yvyra vai.

¹⁸ Ndoikói yvyra porã hi'a porã e'ŷ va'e. Ha yvyra vai hi'a porã va'e ndoikói ave.

¹⁹ Entéro yvyra ndahi'a porãi va'e gwive oity va'erã. Tata ári imombopyrã.

²⁰ Upéixa yvyra'a-rami pehexa kwaa va'erã hekoha-rehe. “Nhandejáry nhe'ẽ-py oromombe'u” he'i ramo mo'ã, hembiapo-rehe pehexa kwaa va'erã, he'i gwemimbo'e kwéry-pe Hesu.

*Enterove nomoirumbái va'erã Nhandejáry nhande ruvixa-pe
(Lc 13.25-27; 1 Jo 2.3-6)*

²¹ Upéi Hesu he'i jevy:

—Heta oĩ, “Nde xe Járy, nde xe Járy” he'i rei va'erã xe-vy. Upéa nomoirúi va'erã oho-vy Nhandejáry nhande ruvixa-pe. Nogwahẽi va'erã oho-vy oiko haty-py. Ha xe Ru yváy pygwa remimbota ojapo va'e ae katu omoirú va'erã íxupe oho-vy, he'i.

²² —Upe áry-py, enterove va'e-pe hembiapo apokwe-rami areko hagwã áry-py, heta, “Nde xe Járy, nde xe Járy” he'i rei va'erã xe-vy. “Nde réry-py Nhandejáry nhe'ẽ oromombe'u va'ekwe. Nde réry-py oromosẽ mosẽ oromondo-vy anháy-pe. Nde réry-py heta hexapyrã-rupi ore rembiapo porã va'ekwe. Heta ipu'aka va'e orojapo va'ekwe” he'i va'erã mo'ã xe-vy.

²³ Ha upe rire katu “Hesu réry-py xe rembiapo. Áy ae Hesu re'ýi tee-ma voi xe” he'i ójehe mo'ã va'e-pe xe Hesu ha'e va'erã íxupe kwéry: Yma gwive ko'ángá ete peve peẽ ndaha'ei xe re'ýi. Ndoroikwaái voi. Xe re'ýi e'ŷ voi peẽ, xe ha'e va'erã íxupe kwéry. Pende rekoha vai. Tapeho jevy katu xéhegwi, ha'e va'erã íxupe kwéry, he'i Hesu.

*Gwogarã ojapose ramo, oĩ ita ári omoĩ va'e, oĩ ave yvy ku'i ári omoĩ va'e
(Lc 6.47-49)*

²⁴ Upéi Hesu he'i jevy:

—Ko'ã va'e xe nhe'ẽ renduha, xe nhe'ẽ apoha hi'arandu porã voi. Ha hi'arandu va'e katu gwogarã ojapose ramo, ita ári omoĩ.

²⁵ Ojapopa rire, oky-ma. Oky-gwi y hygwasu ojaho'ipa hagwã óga. Ou ave yvytugwasu heity hagwã mo'ã ha ndo'airy. Ita ári ojapo ra'e. Upéa-gwi ndo'airy. Upéixa ete xe nhe'ẽ ojapo va'e oho porã voi ojeity ukase e'ŷ-vy.

26 Ha ko'ā va'e xe nhe'ē renduse e'ŷ va'e xe nhe'ē ojapo e'ŷ va'e katu nahi'arandu porāi. Ha hi'arandu e'ŷ va'e katu gwogarā ojapose ramo, nomoñry ita ári. Yvy ku'i ári rei omoñ gwóga.

27 Upéi oky-ma. Oky-gwi ovu y óga ojaho'ipa hagwā. Ou yvytugwasu oity hagwā ave óga-pe. Ha upe rire katu ho'a. Ho'apa ete voi hóga. Ho'a e'ŷ va'ekwe ndopytáiry. Omboasy eterei ho'a va'ekwe hóga. Upéixa ete ojeity uka-vy oho vai hi'arandu e'ŷ va'e, xe nhe'ē renduse e'ŷha, he'i Hesu Nhandejáry nhe'ē omombe'u-vy.

“Imbaraete voi inhe'ē” he'i

28 Omombe'upa rire, heta ojogweroaty aty va'e ogwerovy'a inhe'ē omboete-vy íxupe hikwái:

—Iporā ete Hesu nhe'ē, he'i hikwái.

29 —Inhe'ē ndaha'ei gwī nhande rekombo'ehaty kwéry nhe'ē-rami, he'i Hesu nhe'ē-rehe hikwái. —Ha'e kwéry ndoikwaapáiry. Ha'e ae onhe'ē nomombe'úiry. Ha Hesu ae katu ha'e ae onhe'ē omombe'u. Oporomonhe'égendu kwaa va'e-rami onhemonhe'ē. Imbaraete voi inhe'ē, he'i Hesu-rehe opondera-vy hikwái.

8

*Hesu ombogwera ijai aipa va'e-pe
(Mc 1.40-45; Lc 5.12-16)*

1 Ha upéi katu Hesu ogwejy jevy ou-vy upe yvyatyrusu ári-gwi. Ogwejy rire heta ijaty jaty va'e kente kwéry omoirū íxupe oje'ói-vy hikwái.

2 Upe jave ogwahē ou-vy iha-py mba'asy vai ogwereko va'e ijai aipa va'e. Gwetypy'ā-rehe onhesū omboete-vy hovagwy-py:

—Nhane mbogwerahaty voi nde, xe Járy. Xe-vy pa xe mbogwera ave arā nde? he'i Hesu-pe.

3 Ha'e oipysa opo omoñ hese:

—Orombogwera-ta voi katu nde-vy, he'i íxupe. —Xe nhe'ē-py tane potī katu, he'i hasy va'e-pe.

Upe-ma ramo opa-ma ojei íxugwi ijai aikwe. Okwera porā-ma.

4 Upéi he'i Hesu:

—Ejeapysaka katu xe nhe'ē-rehe. Ani eremombe'u avave-pe orombogwera-ma hagwe, he'i hasy va'ekwe-pe Hesu. —Tereho katu pa'i oĩ ha-py ejehexa uka-vy. Ehexa uka íxupe erekweramaha. Eme'ē íxupe upe myamyrī “Nhame'ē katu” he'i va'ekwe. Upéixa ramo, “Okwera-ma. Onhemopotī jevy-ma” he'i va'erā nde-rehe, atýra-py ne mombe'u-vy, he'i íxupe Hesu.

*Hesu ombogwera capitão, soldado kwéry ruvixa rembigwái-pe
(Lc 7.1-10)*

5 Ha upéi katu ogwahē oho-vy Hesu Cafarnaum tetā-my. Upe-py oike rire ogwahē ou-vy iha-py capitão, soldado kwéry ruvixa va'e:

6 —Xe pytygwō katu, Xe Járy Hesu, he'i. —Xe rembigwái oime koty-py. Nopu'āvēi-ma, hajy jeapa-gwīndoryrýiry. Hasy ete voi oĩ-vy, he'i íxupe soldado ruvixa.

7 —Aipo ramo, aha-ta nde róga-py ambogwera hagwā íxupe, he'i soldado ruvixa-pe.

8 —Nde, nde tuvixa mba'e-gwi, mba'éixa ereike-ta ereho-vy xe róga gwy-py? he'i omboete-vy íxupe. —Erenhembohekomirīve-ta para'e ereike ereho-vy. Tuvixave e'ŷ va'e-rami joty ereike-ta upe-py. Aipo ramo ne nhe'ē-py rei embogwera katu xe rembigwái-pe, he'i. —“Tokwera” ere ramo, okwera

va'erā. A-gwi rei ne nhe'ẽ-py mante okwera va'erā xe rembigwái hasy va'e, he'i Hesu-pe.

⁹—Oĩ xe-rehe omanda va'e. Inhe'ẽ ajapo va'e. Xe pogwy-py ave oĩ soldado xe amanda hese va'e. Kóa-pe, “Tereho katu” ha'e ramo, oho ave arã voi. Ha upéa-pe, “Eju katu” ha'e ramo, ou ave arã voi. Xe rembigwái-pe, “Ejapo katu xe nhe'ẽ” ha'e ramo, ojapo ave arã voi. Upéixa ave ne nhe'ẽ-py rei nde pu'aka nipo ra'e mba'asy-rehe erembogwera hagwã xe rembigwái-pe, he'i íxupe upe soldado ruvixa.

¹⁰Upéa nhe'ẽ rendu-vy “Mba'éixa ojerovia tee xe-rehe” he'i Hesu oponderavy hese.

—Ojerovia tee voi xe-rehe upe va'e, he'i kente kwéry-pe hapykwéri ogwa'ẽ va'e-pe. —Amombe'u-ta peẽ-my anhetegwa, he'i. —Oĩ Israel remiarirõre judeu kwéry xe-rehe ojerovia va'e. Ha ko va'e soldado ruvixa judeu e'ŷ ramo jepé, ojerovia teeve joty xe-rehe, he'i.

¹¹—Ha'e-ta peẽ-my. Heta mombyrygwa ogwahẽ va'erā oho-vy Nhandejáry nhande ruvixa ramo oiko haty-py. Heta kwarahy resẽ gwigwa oho va'erā jekarugwasu haty-py. Heta ka'aru gwigwa oho va'erā ave. Ogwapy va'erā okaru-vy Abraão ndive, Isaque ndive, Jacó ndive ave.

¹²Ha judeu kwéry va'e Nhandejáry re'yí va'e oho va'erágwe katu nogwahẽ mo'ái va'erā upe-py. Omosẽ va'erā íxupe imondo-vy pytū kwa-py. Upe-py ojahe'o va'erā. Hasẽ va'erā onhemboasy-gwi. Nhandejáry-rehe onhemoyrō-gwi, onhemohâingyry ngyrú va'erā oiko-vy, he'i judeu kwéry-rehe.

¹³Upéi he'i upe soldado ruvixa-pe:

—Tereho jevy katu nde róga-py. Xe reroviah-a-rami, toiko katu nde-vy, he'i. Upe-ma ramo okwera-ma hembigwái.

Entéro hasy va'e-pe gwive ombogwera Hesu

(Mc 1.29-34; Lc 4.38-41)

¹⁴Ha upéi katu Hesu oho Pedro róga-py. Ogwahẽ ramo upe-py ohexa Pedro raixo. Onheno ra'e oĩ-vy. Hasy ete voi heteraku-gwi.

¹⁵Omboja opo ipo-rehe. Opa-ma íxugwi heterakukwe. Opu'ã-ma Hesu remi'urã-rehe onhangareko-vy.

¹⁶Ka'aru ete-ma ojereru iha-py heta anháy ojepota hese va'e. Onhe'ẽ-py rei omosẽ mosẽ anháy imondo-vy. Entéro hasy va'e-pe gwive ombogwera-ma.

¹⁷Upéa rehogwa ojapo Hesu, upéixa hembiapo yma gware he'i hagwe-rami oiko hagwã ãy. Yma Nhandejáry nhe'ẽ-py omombe'u va'ety Isaías remimoigwe kwatia-rehe a-rami:

“Nhande kwéry nhande rasy ramo, omboyke-ma opaixagwa mba'asy heraha-vy nhandéhegwi”.^{*}
Yma he'i hagwe-rami, ãy oiko-ma.

“Xe oromoirũ-ta, xe Járy” he'i

(Lc 9.57-62)

¹⁸Ha upéi katu heta kente onhemboaty Hesu-rehe. Ohexa ramo heta onhemboaty hese, he'i gwemimbo'e kwéry-pe:

—Jahasa katu y rovái, he'i.

¹⁹Ne'írã vyteri onhembooru jave kanóa-py, ou ohogwaití-vy íxupe peteĩ judeu rekombo'ehaty:

—Xe oromoirũ-ta, porombo'eháry, he'i Hesu-pe. —Mamo ereho ha-rupi oromoirũ-ta, he'i íxupe.

²⁰Hesu he'i jevy íxupe:

* 8:17 Is 53.4

—Mykurē, yvykwa oī íxupe hógarā. Gwyra, oī ave íxupe haityrā. Ha xe ae katu Nhande Ryke'y tee va'e, ndaipóri xe-vy xe renagwā atongea-vy xe apyta hagwā, he'i. —Xe moirūse joty pa nde? he'i pe tekombo'ehaty-pe.

²¹ Upéi outro peteī hemimbo'e va'e he'i Hesu-pe:

—Xe oromoirū va'erā, xe Járy, he'i. —Aha'arō ranhe-ta xe ru omano ramo ajaty hagwā, he'i íxupe.

²² —Nahániry. Āy voi aipota xe moirū, he'i íxupe. —Xe moirūse e'ŷ va'e ae taimandu'a ranhe katu omano va'ekwe ojaty hagwā-rehe, he'i upe gwemimbo'e-pe.

*“Ekirirī katu” he'i y-pe
(Mc 4.35-41; Lc 8.22-25)*

²³ Upéi onhemboyrū-ma kanóa-py Hesu. Hemimbo'e kwéry onhemboyrū ave indive.

²⁴ Upe javé ou yvytugwasu marány. Ho'a yugwarusu-rehe omomýi hagwā yugwarusu. Upe-ma ramo omopu'ā pu'ā y-pe, ojaho'i ho'i kanóa-pe y. Ha Hesu ae katu oke joty oī-vy.

²⁵ Ha hemimbo'e kwéry oho omombáy íxupe:

—Ore resende katu, ore Járy, he'i. —Nhanheapymi-tama nhande, he'i Hesu-pe hikwái.

²⁶ —Mbava'e-gwi tipo pende py'amirī, he'i íxupe kwéry. —Ndapejerovia teéiry ra'e xe-rehe, he'i íxupe kwéry.

Upéi opu'ā onhe'ē-py omokirirī hagwā. He'i yvytugwasu-pe, y opu'ā va'e-pe ave

—Ekirirī katu, he'i ipoxy va'e-pe.

Upe-ma ramo ohopa-ma yvytu. Opytu'u jevy y. Okirirī porāmba jevy-ma y.

²⁷ Ha'e kwéry opondera voi hese:

—Mba'eixagwa heko va'e po, he'i opondera-vy hese. —Yvytugwasu jepe, y opu'ā pu'ā va'ekwe jepe ohendu inhe'ē, he'i Hesu-rehe hikwái.

*Mokōi anháy rerekoha
(Mc 5.1-20; Lc 8.26-39)*

²⁸ Upéi ogwahē-ma oho-vy y rovái. Gadara yvy-py ogwahē. Upe-py ogwahē-ma ramo, ou ohogwaitī-vy íxupe mokōi anháy rerekoha va'e. Ijyta-gwi osē ou-vy. Heko poxy eterei va'e. Upéa-gwi ohasase va'e oikupe'o íxupe ohasa hagwā. Ndikatúi ohasa ijypy-rupi.

²⁹ Onhe'ē hatā hatā Hesu-pe ombojevyse-vy mo'ā:

—Nde ko Nhandejáry ra'y. Ma'erā ereju ko'a-py, he'i Hesu-pe ombojevyse-vy mo'ā. —Ne'írā vyteri ore moingo asyha áry. Ma'erā ereju? he'i. —Ore moingo asyha áry-py ae ereju va'erā mo'ā, he'i Hesu-pe. —Āy katu ani ereju ore moingo asy-vy, he'i íxupe.

³⁰ Mombyry-gwi ohexa heta kure okaru jave.

³¹ Upéa-gwi ojerure rure íxupe:

—Ore mosē-ta ramo, ore mondo katu kure kwéry-pe. Ore mondo katu ipy'a kwéry-py, he'i anháy kwéry Hesu-pe.

³² —Tapeho, he'i íxupe kwéry.

Inhe'ē-rupi osē oho-vy oike kure kwéry py'a-py. Ha kure kwéry katu oriparapa oje'ói-vy. Yugwarusu-py ogwejy oje'ói-vy. Hi'apŷ ogwejy oje'ói-vy. Ho'a onheapymi oje'ói-vy y-py.

³³ Ha kure nhangarekoha oripara oje'ói-vy. Atygwasu-py oho omombe'u-vy. Anháy rerekohare-pe ojehu va'ekwe gwive omombe'u.

³⁴ Upe ramo atygwasu pygwa Hesu rogwaitī-vy osē ogwa'ē-vy. Ohexa-ma ramo Hesu-pe, ombojevyse íxupe:

—Ekwa jevy katu ore yvy-gwi, he'i Hesu-pe ojapura-gwi hikwái.

9

*Hesu ombogwera hajy jeapa va'e-pe
(Mc 2.1-12; Lc 5.17-26)*

¹ Ha upéi katu Hesu onhemboyrú jevy-ma oho-vy kanóa-py. Upéi ohasa y rovái ogwahé oho-vy ha'e ae oiko ha-py.

² Upe-py ojereru íxupe hajy jeapa apa va'e. Gwupa rehevé ou onheno oĩ-vy. Ójehe ojerovia tee ramo, ohexakwaa hese. Upéa-gwi he'i upe hajy jeapa apa va'e-pe:

—Ani erekhyje teĩ, xe ra'y, he'i íxupe ombopy'agwapy-vy.
Gwa'ýry-pe he'iha-rami he'i íxupe:

—Amboyke-ma ndéhegwí ne rembiapo vaikwe, he'i upe hajy jeapa apa va'e-pe.

³ Upe-py oĩ judeu rekombo'ehaty. Ohendu-ma ramo Hesu nhe'ẽ, ndojohu porãi:

—Onhemonhandejáry rei ou-vy, he'i mo'ã Nhandejáry Hesu-rehe. —Onhe'ẽ vai rei, he'i ojóupe hese.

⁴ Ha ipy'apóy oikwaa Hesu:

—Ma'erã-gwi erenhe'ẽ vai rei nde py'apy-py? he'i.

⁵ —Pejeapysaka porã katu xe nhe'ẽ-rehe. Oĩ ramo, “Amboyke-ma ndéhegwí ne rembiapo vaikwe” he'i va'e katu, ndajahexáí hemimboyke. Omboyke para'e. Tapa nomboykéiry ra'e. Ndajahexáiry. Ha oĩ ramo, “Epu'ã katu egwata eho-vy” he'i rei va'e katu, jahexá ave. Nomopu'ãiry upe va'e.

⁶ Áy aikwaa uka-ta peẽ-my xe nhe'ẽ rei e'ýha ko yvy-py. Xe Nhande Ryke'y tee va'e xe nhe'ẽ-py rei amboyke-ma voi yvypyóy rembiapo vaikwe, he'i Hesu onhe'ẽ-vy gwí imbo'eháry-pe.

Upe ramo he'i hajy jeapa va'e-pe:

—Epu'ã katu ehupi nde rupagwe. Tereho nde róga-py, he'i.

⁷ Upe-ma ramo opu'ã oho-ma gwóga-py.

⁸ Upéa ohexá ramo ijaty va'e kente, opondera eterei hese. Inhe'ẽ-py rei omopu'ã-gwi:

—Omopu'ã-ma ngatu, he'i Hesu-rehe. —Iporã porã ete va'e voi hembiapo, he'i hese. —Nhandejáry omombaraete voi upe kwimba'e. Herovia hexapyrã-rupi ha'e hembiapo, he'i Hesu-rehe Nhandejáry-pe omomba'egwasu-vy.

*“Xe moirũ katu” he'i Mateus-pe
(Mc 2.13-17; Lc 5.27-32)*

⁹ Upe-gwi ohasave Hesu oho-vy. Oho jave, ohexá Mateus héry va'e-pe ogwapy oĩ-vy ramo. Nhane mbopaga haty-py ogwapy oĩ-vy:

—Xe moirũ katu, he'i íxupe.

Upe-ma ramo opu'ã omoirũ-ma íxupe.

¹⁰ Upéi oho okaru Mateus róga-py. Ha'e okaru jave gwemimbo'e kwéry ndive ogwahé ave ou-vy heta nhane mbopaga uka va'ety, heta ojejavy va'e ou ave okaru ojoha-py.

¹¹ Upéa ohexá ramo fariseu kwéry, oporandu Hesu remimbo'e kwéry-pe:

—Ma'erã-gwi ne mbo'eháry okaru nhane mbopaga uka va'ety ndive, ojejavy va'e ndive ave? he'i Hesu-rehe.

¹² Upéa fariseu nhe'ẽ ohendu ramo Hesu:

—Nhane resãi ramo, nanhaikotevëi nhane mbogweraharã-rehe. Ha nhande rasy ramo ae katu, nhaikotevë-ma nhane mbogweraharã-rehe, he'i hemimopotïse-rehe onhemoirû uka hagwã.

13 — Ko'a-rami ae oĩ Nhandejáry kwatia nhe'ẽ:
 “Ijukapyrã xe mboete-vy pejuka rei ramo, pende py'a porã e'ŷ reheve ojóupe,
 xe ndajohu porãi arã. Ha pejoporiahuvereko rei ramo katu xe ajohu
 porã arã pende reko. Upe va'e xe aipota voi, he'i Nhandejáry”.*

Upéixa he'i Nhandejáry kwatia nhe'ẽ. Upéa nhe'ẽ, tapeho katu peikwaa
 hagwã he'ise va'e. Ndajúi va'ekwe ahenói-vy “Xe potí” he'i ójehe va'e-pe ou
 xe moirũ. Gwĩ ojejavý va'e-pe ae aju arova uka-vy hekoha íxupe xe moirũ
 hagwã, he'i fariseu kwéry-pe.

*Hesu remimbo'e kwéry ndohasái okaru e'ŷ reheve
 (Mc 2.18-22; Lc 5.33-39)*

14 Upéi ogwahẽ ou-vy Hesu renda-py João remimbo'e:
 — Ore orohasa orokaru e'ŷ reheve Nhandejáry oipotaha-rami, he'i. —
 Ohasa ave okaru e'ŷ reheve fariseu kwéry. Ha ne remimbo'e kwéry katu
 ndohasái voi okaru e'ŷ reheve. Ma'erã po ndoikói ore reko-rami, he'i Hesu-pe
 oporandu-vy.

15 Upéi Hesu he'i:

— Amombe'u-ta peẽ-my arandu rehewa nhe'ẽ omenda va'e rehewa-rami.
 Oime vyteri ramo omenda va'e, ndovy'are'ŷiry he'ŷi kwéry. Okaru e'ŷ reheve
 ndohasáiry. Ha ojererahaha óra ogwahẽ-ta. Upe óra-py ohasa va'erã okaru e'ŷ
 reheve he'ŷi kwéry, he'i ojehegwá omombe'u-vy.

16 Upéi he'i jevy upe pygwa-pe:

— Outro arandu rehewa nhe'ẽ háma amombe'u-ta peẽ-my ao rehewa-rami,
 uva rykwere rehewa-rami ave. Nanharemendá ipyahu va'e-py ao
 tuja. Nharemenda ramo ae katu onhynhy arã ra'e ipyahu va'e. Ojepoapy-vy
 onmondoro arã ao tuja. Osorogwasuve va'erã ao tuja.

17 Nanhanhunháiry ave uva rykwere pyahu va'e hyrurã tuja-py vakapi
 ipererí va'e-py. Ha nhanhunha ramo ae katu, ovu va'erã ra'e ipyahu va'e.
 Gwyrú tuja va'e onmondoro va'erã. Osyrypa arã ra'e pe uva rykwere onhehẽ-
 vy. Osoropa arã hyrukwe. Ha uva rykwere pyahu va'e ae katu nhanhunha
 hyru pyahu-py. Upéixa ramo opyta porã gwyrú ndive, he'i Hesu oipota-gwi
 fariseu kwéry onhemboheko pyahu.

*Hesu omoingove jevy kunhataí-pe
 (Mc 5.21-43; Lc 8.40-56)*

18 Upéa he'i javé, ogwahẽ ou-vy peteĩ mburuvixa. Gwetypy'ã-rehe onhesú
 Hesu rovagwy-py imboete-vy:

— Omano-ma xe rajy, he'i. — Omano ramo jepe, iporã ereho joty katu eremoĩ
 nde po hese oikove jevy hagwã, he'i Hesu-pe.

19 Inhe'ẽ-py opu'ã oho-vy mburuvixa ndive. Hemimbo'e kwéry hendive ave
 oho.

20 Upe-ma ramo ogwahẽ ou-vy peteĩ kunha. Are-ma hasy. Hasy doze ro'y
 ijysapy ogwejy eterei íxupe-gwi. Upéa-gwi ou hapykwéri, Hesu rapykwéri.
 Opoko-ma ijao poty-rehe.

21 “Amboja ramo jepe xe po ijao-rehe, akwera-ma va'erã” he'i ra'e ojéupe.

22 Upe-ma ramo ha'e ojere. Oma'ẽ ramo, ohexá-ma upe kunha-pe:

— Ani erekhyje teĩ xéhegwí, xe rajy, he'i imbopy'agwapy-vy íxupe. Gwajýry-
 pe he'ihá-rami, he'i kunha-pe: — Nde erejerovia-magwí xe-rehe, erekwera-
 ma, he'i kunha-pe.

Upéa nhe'ẽ he'i-ma ramo, pya'e okwera upe kunha.

* 9:13 Os 6.6

²³ Ha upéi katu ojere jevy oho hagwā mburuvixa róga-py. Upe-py ohexa heta oī óga-py ijayvu va'e. Gwemimby ombopu ohapirō-vy. Hasēmba-ma ave. Ohexa ramo:

²⁴—Tapehopa katu, he'i. —Nomano etéiry voi mitā kunha. Oke ae-ma oī-vy, he'i omosē-vy.

Ha óga-py oī va'e gwive katu onhembohory hese.

²⁵ Omosēmba rire, oike koty-py mitā kunha oī ha-py. Oipopyhy íxupe imopu'ā-vy.

²⁶ Upe ramo upe mitā kunha omopu'ā jevy va'ekwe rerakwā opa-rupi osarambi upe yvy-rupi oho-vy.

Hesu ombohesapyo jevy mokōi hesapyo e'ŷ va'e-pe

²⁷ Upe-gwi ohasave oho-vy Hesu. Ha mokōi hesapyo e'ŷ va'e katu ou hapykwéri:

—Davi remiarirōre nhane remiha'arō va'e, he'i ohenói hatā-vy íxupe. —Ore poriahuverekō katu, ore poriahuverekō katu, he'i ohenói hatā-vy íxupe.

²⁸ Upéi ha'e oike koty-py. Oike rire, ogwahē ave ou-vy upe mokōi hesapyo e'ŷ va'e:

—Pejerovia tipo xe-rehe apombohesapyo porā hagwā, he'i íxupe kwéry Hesu.

—Ha'e voi, he'i. —Orojerovia-ma nde-rehe, ore Járy, he'i íxupe.

²⁹ Upéi omoī hesa ári opo:

—Xe reroviaha-rami pehexa porā katu, he'i hesapyo e'ŷ va'e-pe.

³⁰ Upe ramo hesapyo porā-ma. Ha Hesu ndohejái omombe'u ojehegwa:

—Erekwera hagwe aníke eremombe'u mbe'u teñ avave-pe, he'i íxupe omanda pohýi-vy.

³¹ Ha okwera va'e katu ojoko ramo jepe íxupe, osē joty oho-vy. Omosarambi ra'e opa-rupi. Herakwā oho joty opa-rupi. Upe yvy-rupi osarambi joty ra'e.

Hesu ombogwera inhe'ēnge'ŷ va'e-pe

(Lc 11.14-15)

³² Koty-gwi osē jave, ojereru Hesu renda-py anháy rerekoha inhe'ēnge'ŷ va'e.

³³ Omosē imondo-vy anháy-pe. Inhe'ēnge'ŷ va'ekwe onhe'ē-ma. Ojog-weroaty va'e kente ohexa ramo, opondera eterei hese:

—Yma gwive ko'ánga ete peve ndajahexái voi a ramigwa, he'i. —Nhande kwéry yvy-rupi, Israel yvy-rupi ndajahexái voi a ramigwa, he'i opondera-vy hese.

³⁴ Ha fariseu kwéry katu ndojohu porāi hembiapo:

—Anháy ruvixa nhe'ē-py ae nipo ra'e omosē imondo-vy anháy-pe Hesu. Anháy ae nipo ombopu'aka ra'e Hesu-pe, he'i mo'ā hese hikwái.

Hesu oiporiahuvereko ijaty jaty va'e kente kwéry-pe

³⁵ Ha upéi katu Hesu ohasa oho-vy tetā tetā-rupi gwive. Tetā'i tā'i-rupi gwive ave ohasa oho-vy. Ojeporahéi haty haty-rupi Nhandejáry nhande ruvixarā rehewa nhe'ē porā omombe'u mbe'u. Opaixagwa mba'asy-gwi ombogwera gwera hasy va'e-pe.

³⁶ Ohexa ramo ijaty jaty va'e kente, oiporiahuvereko íxupe kwéry:

—Ovexa-rami rei oiko ra'e hikwái, he'i. —Ndoikóiry ramo ovexa-rehe onhangareko va'e, ndoiko porāi. Ipyrasypa, heterasypa ave. Ho'a ramo, ndaipóri henohēharā. Upéixa ete ovexa hasy va'e-rami, herekwa e'ŷ va'e-rami oiko ko ijaty va'e kente xe moirūse va'e. Upéa-gwi aiporiahuvereko-ma íxupe kwéry, he'i ojogweroaty va'e kente kwéry-rehe.

³⁷ Upe ramo omombe'u gwemimbo'e kwéry-pe nhe'ẽ mombe'uharã re-hegwa nhe'ẽ temitŷgwe kytiharã rehewa nhe'ẽ oiporu-vy.

—Heta hi'a porã ramo jepe, ndahetáiry joty oikytí va'e heraha-vy.

³⁸ Upéixa ete heta eterei oĩ ramo jepe nhe'ẽ porã ohenduse va'e, ndahetáiry joty imombe'uharã íxupe kwéry. Upéa-gwi pejapo oraçao temitŷgwe járy-pe omundo hagwã oikytiharã, he'i Nhandejáry-rehe, nhe'ẽ porã mombe'uharã-rehe oraçao ojapo uka-vy.

10

Doze voi Hesu irũ tee (Mc 3.13-19; Lc 6.12-16)

¹ Ha upéi katu Hesu ohenói gwemimbo'e kwéry omoirũ teeha doze va'e-pe. Upe va'e doze va'e ohenói ou hagwã. Ou ramo ombopu'aka íxupe kwéry omosẽ hagwã anháy imondo-vy. Opaixagwa mba'asy-rehe ave ombopu'aka íxupe kwéry ombogwera hagwã hasy va'e-pe.

² Gwĩ doze hemimondo va'e héry a-rami. Oĩ Simão ha'e tenonde va'e, tuvixave va'e. Pedro ombohéry jo'a íxupe. Tyvýry héry André. Oĩ ave mokõi Zebedeu ra'y Tiago, tyvýry héry João ave.

³ Oĩ ave Filipe Bartolomeu ndive. Oĩ Tomé Mateus ndive. Mateus nhane mbopaga uka va'ety plata-py governo pegwarã. Oĩ Alfeu ra'y Tiago. Oĩ Tadeu ave.

⁴ Oĩ ave Simão. Ha'e gwĩ ojehegwa e'ŷ va'e huvixa ramo oiko va'e-pe omosêse va'e kwéry irũ va'ekwe. Indive oĩ Judas Iscariotes, upe va'e Hesu pyhy ukaharã voi.

Hesu omundo upéa doze gwemimbo'e nhe'ẽ porã omombe'u hagwã (Mc 6.7-13; Lc 9.1-6)

⁵ Upéa doze gwemimbo'e omundo nhe'ẽ porã omombe'u hagwã:

—Tapeho a-rami, he'i. —Ani ereho teĩ judeu e'ŷ va'e oiko ha-rupi. Tetã Samaritano oiko ha-rupi ani ereike teĩ upe-py.

⁶ Tapeho ae katu Israel remiarirõre judeu kwéry oiko ha-rupi. Ovexa okanhy va'ekwe-rami oiko hikwái. Tapeho ae katu peheka-vy íxupe kwéry.

⁷ Pemombe'u mbe'u pehokwe-vy Nhandejáry rehewa nhe'ẽ íxupe kwéry: “Ogwahẽ-ma ngatu hi'óra. Pene mo'agwĩ-ma ou-vy Nhandejáry pende ruvixarã” peje kuri judeu kwéry-pe, he'i.

⁸ —Pembogwera gwerá katu hasy va'e-pe peho-vy. Pemoingove jevy katu omano va'ekwe-pe. Pembogwera katu mba'asy vai-gwi ijai aipa va'e-pe. Pemosê mosê katu anháy-pe. Pende rexakwaa rei hagwe-rami ave, pehex-akwaa rei pende rapixa pembopaga e'ŷ reheve.

⁹ Ani ereraha teĩ plata nde ku'akwaha gwy-py. Hepy va'e ouro ani ereraha teĩ. Ani ereraha plata. Moeda jepe ani ereraha teĩ.

¹⁰ Nde vosa ani ereraha teĩ ave ne ndive ereho jave. Ne kamisa ani erembojo'a ave kuri. Nde pyryru, nde pykoka ave ani ereraha teĩ. “Omba'apo va'e-pe nhame'ẽ hemikotevẽ” ja'e.

¹¹ Atygwasu-py ereike ramo, tetã'i-my ereike ramo ave, eporandu ranhe hembiapo porã porã va'e-rehe. “Kipy kipy tipo oĩ hembiapo porã va'e” peje. Epyta indive eresê peve pe tetã-gwi ereiko-vy upe-py.

¹² Ereike ramo óga-py, “Tapene mbopy'agwapy katu Nhandejáry” ere óga pygwa-pe.

¹³ Óga pygwa pene mogwahẽ porã ramo, peheja katu pene nhe'ẽ íxupe. Ha napene mogwahẽ ramo, ani peheja teĩ íxupe pene nhe'ẽ. Upe pene nhe'ẽ perupa jeyv katu íxugwi.

14 Ha oĩ ramo óga pygwa pende rerohory e'ŷ va'e, oĩ ramo tetã mygwa ave pene nhe'ẽ renduse e'ŷha va'e katu, pe tetã-gwi eresẽ jave, embovava nde py ho'apa hagwā yvy timbore nde py-gwi. Upéixa erejapo ramo, eremomandu'a uka arā hembiapo vaikwe-rehe. "Nhandejáry re'yi e'ŷ-rami nipo ra'e nhande" he'i va'erā ójehe.

15 Amombe'u-ta peẽ-my anhetegwa va'e. Upe áry-py, yvypóry rembi-apo apokwe-rami ojererekoha áry-py, omoingo asy va'erā gwī hekoha vai va'ekwe-pe Sodoma tetã mygwa amyrī kwéry-pe. Gomorra tetã mygwa amyrī kwéry-pe ave. Ogwereko asy va'erā íxupe kwéry. Ha pe tetã mygwa-pe ne nhe'ẽ renduse e'ŷ va'e-pe katu ogwereko asyve syve va'erā Nhandejáry, he'i gwemimbo'e kwéry-pe.

"Pende rereko asy va'erā" he'i

(Lc 12.11-12)

16 Upéi Hesu he'i jevy gwemimbo'e kwéry-pe:
—Pejeapysaka katu xe nhe'ẽ-rehe. Xáke pende-rehe. Oromondo-ta hekoha vai va'e pa'ũ-rupi ereiko hagwā. Ovexa jagwarete pa'ũ-my oiko va'e-rami peẽ peiko arā ipa'ũ-my. Aipo ramo penhangareko porã katu pendéjehe peẽ. Ju'igwasu onhangareko ójehe ha-rami, peiko arandu katu peẽ ave. Pykasu inharõ e'ŷ va'e reko-rami, peiko katu peẽ ave.

17 —Xáke pende reraha va'erā pende ruvixa renda-py. Ojeporahéi haty haty-rupi pene nupã va'erā.

18 Xe-rehe ha-py pende reraha va'erā mburuvixa renda-py. Mburuvixag-wasu renonde-py ave pende reraha va'erā. Judeu kwéry-pe, judeu e'ŷ kwéry-pe ave, pemombe'u va'erā Nhandejáry tuvixa mba'e voiha.

19 Pende reraha ramo, ani pemoi tei pende py'a-rehe pene nhe'ẽrā. Upe óra-py ou rei va'erā nde juru-py ne nhe'ẽrā.

20 Erenhe'ẽ ramo, ndaha'ei va'erā ne arandu-rupi. Nde juru-py ae Nhandejáry ombou va'erā nde-vy ne nhe'ẽrā. Pende Ru yváy pygwa va'e nhe'ẽ marangatu ou va'erā nde juru-py ne nhe'ẽrā ne monhe'ẽ hagwā.

21 Ha tyke'ýry oipyhy va'erā heraha-vy gwyvýry ojuka uka hagwā. Tyvýry ojuka uka va'erā gwyke'ýry-pe. Túvy ojuka uka va'erā gwa'ýry-pe gwajýry-pe ave. Ha ta'ýry kwéry tajýry kwéry ave ogwereko asy va'erā gwu-pe ojuka ukavy. Imemby kwéry ojuka ukase va'erā osy-pe.

22 Xe-rehe ha-py enterovéa ipy'a vai va'erā oiko-vy pende-rehe. Ha xéhegwi ova e'ŷ va'e, ogwereko asy ukaharã-pe onheme'ẽ e'ŷ va'e, ojererekoha asy ramo jepe onhembopyatã joty va'e katu, oresende va'erā íxupe Nhandejáry.

23 Pende rereko asy hagwe-gwi, tapekanhy katu peho-vy outro henda-py. Amombe'u-ta peẽ-my anhetegwa va'e. Xe Nhande Ryke'y tee va'e ajekwaa aju hagwā áry-py, oĩ vyteri va'erā Israel yvy pygwa tetã ne'írã vyteri pegwahē upe-py.

24 Hemimbo'e nonhembotuvixa mba'ei voi ombo'eháry-pe. Nonhembotuvixa mba'ei ave ojáry-pe hembigwái.

25 Iporã katu ombo'eháry-pe ohekoarupityse ramo hemimbo'e. Ojáry-pe ohekoarupityse ramo hembigwái, iporã ave. Onhe'ẽ vai rei kuri xe-rehe, "Anháy ruvixa Belzebu" he'i kuri xe-rehe. Upéixa he'i ramo xe-rehe, onhe'ẽ vaive va'erā voi pende-rehe. Xe óga járy-rami. Peẽ óga pygwa. Xe-rehe onhe'ẽ vaiha-rami ave, pende-rehe onhe'ẽ vaive va'erā, he'i gwemimbo'e kwéry-pe Hesu.

"Nhandejáry-gwi ae katu pekyhyje" he'i

(Lc 12.2-7)

26 Upéi he'i jevy gwemimbo'e kwéry-pe:

—Upéixa ramo, ani erekhyje teĩ pende rereko asy ukaharã-gwi. Entéro nhanhomí va'ekwe gwive, ojehexá jevy joty va'erã voi. Entéro nhamokanhy va'e gwive, ojekwaa jevy joty va'erã.

²⁷ —Nhemi ha-py peẽ-my xe remimombe'ukwe, atýra-py pemombe'u mbe'u jevy. Pende apysa-py peẽ-my xe rembierovovo xe remimombe'ukwe, pende róga apotaha ári, penhomboaty haty haty-rupi, perosapukái va'e-rami pemombe'u jevy.

²⁸ Oĩ nhande rete jukaharã. Ha nhane nhe'ẽgwe-rehe ae katu ndaipu'akáiry. Aníke erekhyje teĩ íxugwi. Ha Nhandejáry katu ipu'aka nhane nhe'ẽgwe-rehe. Omundo ramo, omondo arã omundo ha-py. Tata opa opa rei e'ŷ va'e haty-py nhane mondose ramo, nhande rete reheve nhane mondo va'erã. Íxugwi ae katu pekyhyje. Íxugwi ae katu enhemokirirí.

²⁹ Mokõi gwyra'i ovende ramo, ndahepýi. Nanhapenái joty hese. Ha Nhandejáry katu onhangareko hese. Hymba voi. Yvy-py peteĩ ho'a ramo, ojéhegwí rei ndo'áiry. Nhandejáry nhe'ẽ-py ae ho'a omano-vy.

³⁰⁻³¹ Heta eterei gwyra'i ovende ramo jepe ndahepy etéi joty. Ha nde ae katu tuvixa mba'eve Nhandejáry-pe gwyra kwéry-gwi. Ne akã ragwe jepe, mbovy po oĩ oikwaa-ma. Peteĩ teĩ oipapa-ma nde-rehe opena eterei-gwi. “Tuvixa mba'e” he'i nde-rehe Nhandejáry. Upéa-gwi aníke pekyhyje teĩ pendéjehe, he'i gwemimbo'e kwéry-pe.

Atýra-py, “Hesu re'ýi voi xe”

*he'i va'e
(Lc 12.8-9)*

³² Upéi he'i jevy Hesu:

—Atýra-py, “Hesu re'ýi voi xe” ere ramo katu, xe Ru yváy pygwa va'e renonde-py, “Xe re'ýi voi upe va'e” ha'e arã nde-rehe, he'i.

³³ —Ha atýra-py, “Hesu remimbo'e e'ŷ voi xe” ere ramo katu, xe Ru yváy pygwa renonde-py, “Xe re'ýi e'ŷ voi upe va'e” ha'e arã nde-rehe, he'i gwemimbo'e kwéry-pe.

*“Entéro yvypóry ijoja porã hagwã ndajúi va'ekwe” he'i
(Mc 8.34-35; Lc 9.24; 12.51-53; 14.26-27; Ap 12.11)*

³⁴ Upéi he'i jevy Hesu:

—“Ojekwaa-ma ou-vy Hesu entéro yvypóry ijoja porã hagwã” ani ere mo'ã ndejéupe. Upe va'erã-rehe ndajúi va'ekwe. Ha ijoja e'ŷ hagwã onhondive xe renduse e'ŷha xe renduseharã ave ae katu aju va'ekwe.

³⁵ Xe aju va'ekwe-gwi, ndoiko jojái va'erã ta'ýry gwu ndive. Ndojoeko rayhu reíry va'erã imemby kunha osy ndive. Imemby rembireko ndoiko porãi va'erã ome sy ndive ave.

³⁶ Nhande róga pygwa jepe nhande a'e'ŷha voi, he'i Nhandejáry kwaitia nhe'ẽ oiporu-vy.*

Upéi he'i jevy:

³⁷ —Oĩ ramo xe rayhu va'e, gwu-pe xéhegwí ohayhuve va'e, osy-pe ohayhuve va'e xéhegwí, ndaha'éi arã xe re'ýi tee. Oĩ ramo xe rayhu va'e, gwa'ýry-pe, gwajýry-pe ohayhuve va'e xéhegwí, omemby-pe ohayhuve va'e xéhegwí, ndaha'éiry xe re'ýi tee upe va'e, he'i.

³⁸ —Gwí xe moirũ tee hagwã okurusugwasu ohupi heraha-vy va'e-rami ijukapyrã-rami oiko va'e ae, xe re'ýi tee va'erã, he'i. —Upéa reko-rupi ndereikói ramo, ndaha'éi arã xe re'ýi tee.

* **10:36** Mq 7.6

³⁹ Gwekove-rehe hakate'ŷ va'e ndoikove mo'âi va'erâ Nhandejáry ndive. Ha xe-rehe ha-py gwekove-rehe nopenái va'e katu, oikove meme va'erâ Nhandejáry ndive, he'i gwemimbo'e kwéry-pe.

*Ne rembiapo porâkwe repy ohekoviårô va'erâ voi nde-vy Nhandejáry
(Mt 25.34-40; Mc 9.41; Jo 13.20)*

⁴⁰ Upéi he'i jevy Hesu:

—Ne mogwahê porâ va'e, xe háma ave xe mogwahê porâ va'erâ. Xe mogwahê porâ va'e, ha'e háma ave Nhandejáry xe mbou va'ekwe-pe omogwahê porâ va'erâ.

⁴¹ Ogwahê ou-vy ramo nde róga-py Nhandejáry nhe'ẽ-py omombe'u va'ety, emogwahê porâ katu íxupe Nhandejáry rembigwái-gwi. Nhandejáry ombohekivia va'erâ upe inhe'ẽ-py omombe'u va'ety-pe. Ha'e-rami ave ne rembiapo porâkwe repy ohekoviårô va'erâ voi nde-vy yváy-py. Ogwahê ou-vy ramo nde róga-py hekoha porâ va'e, emogwahê porâ katu íxupe hekoha porâ-gwi. Nhandejáry ombohekivia va'erâ upe hekoha porâ va'e-pe. Ha'e-rami ave ne rembiapo porâkwe repy ohekoviårô va'erâ nde-vy yváy-py.

⁴² Xe remimbo'e va'e heko'ive va'e jepe ijj'yuhéi-ma ramo, eme'ẽ y íxupe toy'u. Xe remimbo'e-gwi, emboy'u joty íxupe. Amombe'u-ta peẽ-my anhetegwa va'e. Ne rembiapo porâkwe repy ohekoviårô va'erâ voi nde-vy yváy-py, he'i gwemimbo'e kwéry-pe Hesu.

11

*Ogwahê ou-vy Hesu renda-py João Batista remimbo'e
(Lc 7.18-35)*

¹ Upéixa Hesuombo'e mbo'e upe doze gwemimbo'e kwéry-pe. Ombo'epa rire, osẽ oho-vy Hesu rupive hikwái. Upe-gwi ohasave oho-vy tetâ tetâ-rupi. Oporombo'e mbo'e Hesu oho-vy. Omombe'u mbe'u oho-vy ave Nhandejáry nhe'ẽ.

² Ha João Batista katu onhemoï preso oiko-vy. Ohendu ramo Cristo Nhandejáry rembiporavo va'e rerakwâ, mokõi gwemimbo'e omondo Hesu ha-py oikwaa hagwâ: “Mba'eixagwa po nde” omoporandu uka hagwâ omondo íxupe.

³ Ogwahê oho-vy ramo he'i:

—Nde tipo upe temiha'arô va'e voi, he'i oporandu-vy íxupe. —Ndaha'éi tipo nde? Tapa outro ae nhaha'arô va'erâ? he'i oporandu-vy Hesu-pe.

⁴ —Tapeho jevy katu, he'i João remimbo'e kwéry-pe. —Emombe'u João-pe ne remiendu endukwe, ne rembiexagwe xagwe ave emombe'u íxupe, he'i.

⁵ —Hesapyso e'ŷ va'ekwe hesapyso porâ-ma. Ogwata e'ŷ va'ekwe ogwata porâ-ma. Mba'asy vai-gwi ijai aipa va'ekwe okwera-ma. Ijapysa e'ŷ va'ekwe ijapysa porâ-ma. Omano ete va'ekwe oikove jevy-ma. Ha iporiahu va'e kwéry-pe katu omombe'u-ma Nhandejáry rehewa nhe'ẽ porâ.

⁶ Xe rembiapo rerakwâ rendu ramo, ohexa kwaâ-ma va'erâ xe rekoharehe. Oikwaa-ma va'erâ xe-rehe. Xe-rehe ojerovia ku'a ku'a va'e, “Nhandejáry rembiporavo tee para'e. Nhandejáry rembiporavo e'ŷ para'e” he'i rei va'e xe-rehe, ndovy'a mo'âi va'erâ. Ha xe-rehe ojerovia tee va'e, xe rerovia ku'a ku'a e'ŷ va'e katu xe rerovy'a tee va'erâ, he'i João-rehe.

⁷ Osẽ-ma ramo oho jevy-vy João remimbo'e, omombe'u Hesu ojogweroaty aty va'e kente-pe João rehewa nhe'ẽ omombe'u:

—Peho kuri tekwat y e'ŷ-my. Ma'erâ tipo peho araka'e? Upe-py heta oĩ kapiyvanhe'ẽ yvvytu ogwerova rova va'e. Upéa-rehe ndapehói ra'e.

⁸ Mbava'e rexa-vy rei tipo peho araka'e? Ijao porã va'e rexa-vy ndapehói araka'e. Mburuvixagwasu róga kakwaa-py oiko ijao porã va'e.

⁹ Mbava'e rexa-vy rei tipo peho araka'e. Nhandejáry nhe'ẽ-py omombe'u va'ety rexa-vy rei po peho araka'e? Upéa-rehe voi katu peho araka'e. Ha'e-ta peẽ-my: Gwĩ Nhandejáry nhe'ẽ-py omombe'u va'ety kwéry-gwi tuvixave va'e, João Batista héry va'e pehexa voi araka'e.

¹⁰ Pe Nhandejáry kwatia nhe'ẽ omotenonde íxupe va'ekwe-pe pehexa araka'e. Ko'a-rami ae oĩ Nhandejáry kwatia nhe'ẽ:

“Xe nhe'ẽ mombe'uharã amondo va'erã íxupe ne renonde-rupi. Ne'írã ereho jave, omopotĩ va'erã nde raperã”*

he'i va'ekwe João Batista rekoharã-rehe, upe xe nhe'ẽ ohendu uka va'erã-rehe.

¹¹ —Amombe'u-ta peẽ-my anhetegwa va'e. Yma gwive ãy peve ndaipóri va'ekwe João Batista-gwi tuvixave va'e. Ha ãy katu, Nhandejáry nhande ruvixa-pe omoirũ tee va'e gwive, tuvixave va'e João Batista-gwi. Onhom-boete e'ŷ ete va'e jepe, Nhandejáry nhande ruvixa-pe omoirũ tee joty ramo, tuvixave va'e João Batista-gwi.

¹² Are-ma va'ekwe João omombe'u va'ekwe ko'ânga ete peve. Heta kente onhemokyre'ŷ eterei omoirũ hagwã Nhandejáry-pe gwuvixarã. Ojapura-ma va'e-rami ikyre'ŷ. Oikese ha-py pya'e a'e oike ha-rami itarova-ma va'e-rami, omoirûse nga'u Nhandejáry-pe gwuvixarã.

¹³ Entero yma gware Nhandejáry nhe'ẽ-py omombe'u va'ety gwive omotenonde va'ekwe ãy oiko va'erã. Nhandejáry nhande ruvixarã oiko va'erã omotenonde va'ekwe Nhandejáry kwatia nhe'ẽ-py omombe'u-vy. João Batista peve omotenonde va'ekwe omombe'u-vy: “Onhemoingove jevy va'erã Elias amyri” he'i va'ekwe yma gware, Nhandejáry kwatia nhe'ẽ mombe'u-vy.

¹⁴ Pehenduse ramo peẽ-my ha'e va'e, pejeapysaka katu. Upe Elias amyri upe ou va'erã he'i va'ekwe yma gware, he'i João Batista-rehe, ojekwaa ramo va'e-rehe. Elias rekoria ojekwaa-ma João. ãy nomotenondevéi imombe'u-vy. Yma he'i hagwe-rami, ãy oiko-ma.

¹⁵ Ne aranduse ramo ejeapysaka porã katu xe nhe'ẽ-rehe.

¹⁶ —Xe amombe'u-ta peẽ-my mba'eixa po oiko ko'ãygwa. Mitã-rami voi ko'ãygwa. Mba'e jogwa haty-py onhembosarái mitã. Osapukái oirûrãgwe-pe:

¹⁷ “Ore remimby orombopu kuri ha peẽ ndapejerokyséi ra'e. Oro-hapirõ ra'anga kuri ha peẽ ndapejahe'oséiry ra'e” he'i oirûrãgwe-pe nonhembosaraiséi-gwi indive kwéry. Upe mitã oirû remimbota ndojaposéiry. Upe mitãgwe reko-rami ãygwa ndogwerovy'ái gwapixa reko.

¹⁸ Ojekwaa va'ekwe ou-vy João Batista. Nhandejáry oipotaha-rami ohasa okaru e'ŷ reheve. Uva rykwere ndo'úi va'ekwe. Ha hexaháry ae katu, “Anháy rerekoha” he'i mo'ã João Batista-rehe va'ekwe.

¹⁹ ãy xe Nhande Ryke'y tee va'e ajekwaa-ma aju-vy. Akaru-vy aju. Uva rykwere'u-vy aju. Ha xe rexaháry ae katu: “Okaru eterei upe va'e” he'i xe-rehe. “Ho'u eterei uva rykwere upe va'e. Oporombopaga uka va'ety ndive oiko va'e upéa. Gwĩ ojejavy va'e ndive ave oiko va'e upéa” he'i voi xe-rehe hikwái. Ha João rembiapo porã rexa kwaa-vy hese, xe rembiapo porã rexa kwaa-vy xe-rehe ave katu, “Hi'arandu tee nipo ra'e” peje va'erã ore-rehe, he'i João-rehe ijaty jaty va'e kente kwéry-pe.

*Hesu ndojohu porãi upe tetã mygwa inhe'ẽ rendu e'ŷ va'e-pe
(Lc 10.13-15)*

* **11:10** Ml 3.1

20 Ha upéi katu Hesu ndojohu porāi upe tetā mygwa inhe'ẽ rendu e'ŷ va'e-pe. Upe-py heta heroviapyrā-rupi hembiapo porā porā ramo jepe, ndogwerovái joty gwekoha. Nomboasýi gwembiapo vaikwe.

21 Upe ramo he'i:

—Apomboasy eterei peẽ-my Corazim tetā mygwa kwéry. Apomboasy eterei peẽ-my Betsaida tetā mygwa kwéry. Heroviapyrā-rupi xe rembiapo porā porā kuri pene retā pa'ũ-rupi apombojerovia ukase-vy mo'ã xéjehe. Ko'ã ramigwa voi ajapo ramo ra'e Tiro tetā-my Sidom tetā-my ave, pya'e voi omboasy arā araka'e gwembiapo vaikwe ra'e. Pya'e voi ogwerova arā araka'e gwekoha. Gwekoha-rupi ivy'are'ŷ va'e ao nhane mopirehatí va'e ao omonde arā araka'e. Tanimbu oipixy arā ójehe araka'e ojekwaa hagwā hese gwembiapokwe omboasyha.

22 —Upe áry-py yvypóry gwive hembiapo apokwe-rami ojererekohagwā áry-py, ogwereko asy va'erā Tiro tetā mygwa-pe, Sidom tetā mygwa ndive. Ha peẽ ae pende rerekohagwā asyasyve va'erā katu.

23 Ha peẽ Cafarnaum tetā mygwa katu, “Jajeupi va'erā yvate yváy-py jaiko hagwā” peje mo'ã pendéjehe penhembotuvixa ukase-vy. Ahániry, napene mbojeupi mo'ãi va'erā Nhandejáry. Pegwejy ae va'erā yvy gwy-py peho-vy, tata opa opa rei e'ŷ haty-py. Heroviapyrā-rupi xe rembiapo porā porā kuri pene retā pa'ũ-rupi apombojerovia ukase-vy mo'ã xéjehe. Upéixa ndajapói araka'e Sodoma tetā-my, upe hekoha vai eterei oiko va'e haty-py. Ha upéixa xe ajapo ramo ae katu araka'e upe-py, omboasy arā voi araka'e gwembiapo vaikwe, ogwerova arā araka'e gwekoha. Nonhehundíry arā araka'e. Ko'ângate peve optya arā ra'e pe tetā.

24 Upe áry-py yvypóry gwive hembiapo apokwe-rami ojererekohagwā áry-py, omoingo asy va'erā Nhandejáry Sodoma tetā mygwa-pe. Ha peẽ Cafarnaum tetā mygwa ae katu, pene moingo asyve syve va'erā voi, he'i Hesu upe tatā mygwa-pe omboasy-vy.

*“Peju katu xe ha-py apomotongea va'erā” he'i
(Lc 10.21-22)*

25-26 Upe ramo he'i Nhandejáry-pe Hesu:

—Xe Ru, he'i —Nde yváy pygwa Járy, yvy pygwa Járy ave. Oĩ oakã-gwi rei hi'arandu va'e. Nahi'arandu porāi. “Ore ae oroikwaa va'e” he'i va'e mo'ã ójehe, upe va'e-pe ndereikwaa ukái inharandu porārā. Ha gwī mitā vérami ne'írā inharandu va'e, “Ore oroikwaa va'e” he'i e'ŷ va'e ójehe katu, upéa va'e-pe ereikwaa uka inharandu porārā. Upéa ne remimbota porā voi, xe Ru. Ereipota voi upe va'e. Upéa-rehe atima porā nde-vy, he'i Nhandejáry-pe Hesu.

27 Upéi he'i:

—Opamba'e-rehe xe mbopu'aka va'ekwe xe Ru. Xe pogwy-py opamba'e omoĩ, he'i. —Xe kwaa porāha voi ndoikói. Xe Ru, ha'e anho mante xe kwaapa. Xe Ru kwaa porāha ndoikói. Xe ae Ta'yry xe anho mante aikwaapa va'e íxupe. Ha outro kwéry-pe xe aikwaa ukase ramo katu, oikwaapa ave arā xe Ru-pe, he'i.

28 —Peju katu xe ha-py. Peẽ pene kane'õ va'e, ipohýi va'e ogwerahaharami oiko va'e-rami peiko va'e, peju katu xe ha-py. Apomotongea va'erā, apomombytu'u va'erā.

29 Xe ko xe reko kirirí va'e. Xe reko amomirí va'e voi xe. Upéa-gwi xe nhe'ẽ pehendu katu, xe nhe'ẽ-rupi peiko katu. Xe remimbo'e ramo peiko ramo, pende py'agwapy va'erā, he'i.

³⁰ —Ndahasýiry niko xe remimombe'u pejapo hagwā. Pejapo ramo xe nhe'ẽ, omanda pohýi va'e pogwy-py ndapeikovéi-ma va'erā. Upéa-gwi pende py'agwapy porā va'erā peiko-vy, he'i Hesu upe pygwa-pe onhemombe'u-vy.

12

*“Xe nhande pytu'uga áry járy” he'i ójehe Hesu
(Mc 2.23-28; Lc 6.1-5)*

¹ Ha upéi katu nhande pytu'uga áry-py oho ogwata Hesu. Trigoty mbyterupi oho ogwata. Ha hemimbo'e kwéry katu ivare'a-ma oho-vy. Upéa-gwi oipo'o-ma oho-vy trigo rope ho'u hagwā.

² Upéa ohexa ramo fariseu kwéry, he'i:

—Ema'ẽ hese, he'i íxupe. —Ma'erā po ne remimbo'e oipo'o trigo rope pytu'uga áry-py? Yma gware reko-rupi ndoikóiry. Pytu'uga áry-py oipo'o ramo, ndatekoháiry ogwereko, he'i íxupe fariseu kwéry.

³ Upe-ma ramo Hesu he'i:

—Pemonhe'ẽ nhe'ẽ rei peiko-vy ndapeikwaáiry Davi amyrī rehewa nhe'ẽ kwatia-rehe omoñ va'ekwe, he'i. —Nahembí'úi-gwi, ivare'apa va'ekwe Davi oirū kwéry ndive.

⁴ Upéa-gwi oike koty-py va'ekwe, Nhandejáry-pe nhamboete haty-py oike va'ekwe. Oĩ upe-py upe mbojape Nhandejáry rovagwy-py pa'i remimōgwe. Nhandejáry nhe'ẽ-py ndaja'úi voi upe mbojape. Ha pa'i kwéry anho mante ho'u arā. Ha Davi katu pa'i e'ŷ ramo jepe, ho'u joto upe mbojape. Omongaru joto ave oirū kwéry-pe. Ivare'a-gwi, Nhandejáry, “Pejejavy ko” nde'íry íxupe. Ojohu porā hembiapokwe, ogwerovy'a ave.

⁵ Pemonhe'ẽ nhe'ẽ rei peiko-vy ndapeikwaái Moisés amyrī remimombe'ukwe nhane rekorā. Ndatekoha-ramiry jaiko nhamba'apo ramo pytu'uga áry-py. Ha pa'i kwéry katu ombo'apo joto pytu'uga áry-py. Nhandejáry róga kakwaa-py ombo'apo. Upe áry-py ombo'apo ramo jepe, Nhandejáry, “Pejejavy ko” nde'íry joto íxupe. Pytu'uga áry-py ombo'apo ramo Nhandejáry róga-py, ojohu porā joto huvixa kwéry hembiapo.

⁶ —Ha xe katu xe mbaraeteve Nhandejáry róga ruvixa kwéry-gwi.

⁷⁻⁸ Xe Nhande Ryke'y tee va'e. Upéa-gwi xe ko pytu'uga áry járy ave. Upéixa-gwi iporā joto xe amba'apo pytu'uga áry-py. He'i Nhandejáry kwatia nhe'ẽ:

“Ha peẽ katu ndapejoporiahuvereko kwaáiry peiko-vy. Aipo ramo, pene kyre'ŷ ramo jepe pejapo hagwā Moisés amyrī remimombe'ukwe gwive, pejapo rei joto. Xe aipota ae katu pende py'a porā onhondive” he'i Nhandejáry nhe'ẽ. Upéa kwatia nhe'ẽ pemonhe'ẽ rei peiko-vy, ndapeikwaáiry. Ne arandu ramo ra'e, ipy'a potī va'e-rehe, “Ipy'a ky'a” nde'íry arā ra'e, he'i fariseu kwéry-pe Hesu.

*Hesu ombogwera ipo ypi va'e-pe
(Mc 3.1-6; Lc 6.6-11)*

⁹ Upe-gwi Hesu ohasave oho-vy ojeporahéi haty-py oike oho-vy.

¹⁰ Upe-py oĩ ipo ypi va'e. Ha fariseu kwéry, “Hembiapo vai va'e upe va'e” he'ise Hesu-rehe. Upéa-gwi oporandu íxupe hikwáí:

—Tekoha-rami pa jaiko ra'e nhambogwera ramo pytu'uga áry-py? he'i ombojase rei hese-vy.

¹¹ Ha Hesu he'i:

—Pytu'uga áry-py pene rymba ovexa ho'a ramo yvy kwa-py, ndapeheja reíry va'erā, he'i íxupe kwéry. —Pehupi jevy va'erā ae heraha-vy, he'i.

¹² —Ovale voi nhane rymba ovexa. Ha tekove hasy va'e katu ovaleve voi ovexa-gwi. Ovaleve voi. Upéa-gwi pytu'uga áry-py nhaipytygwō ramo nhande rapixa, tekoha-rupi joto jaiko, he'i fariseu kwéry-pe.

¹³ Upéa he'i rire:

—Eipysó katu nde po, he'i ipo ypi va'e-pe.

Oipysó-ma, okwera porā-ma. Ijoja-ma ipo mokōive.

¹⁴ Ha fariseu kwéry ndojohu porā hembiapo porā va'e. Osē oho-vy ha'e kwéry nhemi ha-py:

—Mba'éixa tamo ra'e jajuka Hesu-pe? he'i. —Nhaha'arō jajuka hagwā íxupe, he'i onhonhe'ērendu-vy hikwái.

Nhandejáry rembiporavo tee va'e

¹⁵ Upéa oikwaa ramo Hesu, otekwarai-ma oho-vy outro henda-py. Otekwarai oho jave, heta va'e ave oho hapykwéri. Heta va'e-pe ombogwera gwera oho-vy.

¹⁶ Ombogwera-ma ramo, “Aníke xe mombe'u teñ” he'i okwera va'e-pe.

¹⁷ Upéixa ojapo ãy oiko hagwā Nhandejáry nhe'ē-py omombe'u va'ety Isaías amyrī he'i hagwe-rami.

¹⁸ A-rami voi omoñ va'ekwe kwaitia-rehe:

“Upe va'e xe rembigwái, xe rembiporavo va'e. Ha'e xe rembihayhu. Xe rembierovy'a va'e upéa. Xe Nhe'ē Marangatu amoñ-ta hese. Omombe'u va'erā entero yvypóry-pe gwive. Nhandejáry pende py'a omopotiharā, he'i va'erā xe-rehe.”

¹⁹ Ipoxy va'e onhonhe'ē mbojevy jevyha va'e-rami ndoikói va'erā. Osapukái va'e-rami ndoikói va'erā. Okirirī va'e-rami ae oiko va'erā. Atýra-py nohendúi va'erā íxupe onhe'ē hatā-vy.

²⁰ Heko kirirī va'erā. Takwáry, Xýky, he'i heseve va'e nomopēi va'erā. Upéixa opena va'erā iporiahu va'e-rehe. Tataendy ogwe-tama ramo, imbagwe e'ŷharā. Upéixa ete onhemboete e'ŷ va'e-pe ogwereko porā va'erā. Upéixa hembiapo porā porā va'erā. Ndovái va'erā Nhandejáry rape-gwi. Opa-rupi ojekwaa va'erā anhetegwa.

²¹ Hese ojerovia-ma va'erā yvypóry kente kwéry: Nhaha'arō katu íxupe jaikovy. Ou va'erā, he'i va'erā hese”*

he'i va'ekwe Nhandejáry kwaitia nhe'ē gwa'ýry rehewa omombe'u-vy.

Hesu omombe'u Belzebu rehewa nhe'ē

(Mc 3.20-30; Lc 11.14-23)

²² Upe ramo ojereru íxupe, Hesu-pe peteñ anháy rerekoha. Hesapysó e'ŷ va'e, inhe'ēnge'ŷ va'e ave. Ombogwera-ma ramo íxupe, inhe'ēnge'ŷ va'ekwe onhe'ē porā-ma, ha hesapysó e'ŷ va'ekwe hesapysó porā-ma.

²³ Hembiapo porā rexa-vy,

—Mba'éixa po oporombogwera, he'i ojóupe opondera-vy hese. —Upéa ko ndaha'ei para'e Davi amyrī remiarirõre, nhane remiha'arō? he'i hese ijaty jaty va'e kwéry.

²⁴ Ha fariseu kwéry katu upéa ohendu ramo: “Ojéhegwí rei ndaipu'akái omosē hagwā anháy” he'i. “Anháy ruvixa Belzebu nhe'ē-rupi ae omosē imondo-vy” he'i mo'ã ojéupe hikwái.

²⁵ Ha ha'e ipy'apóry oikwaa ramo, he'i fariseu kwéry-pe:

—Tape vai-rupi oho mburuvixagwasu re'yi onhondive onhorairō-vy. Naimbaraetevéi-ma. Tetā mygwa ndaija'ei ramo ojóehe, hóga pygwa ave ndaija'ei ramo ojóehe, tape vai-rupi oho. Hasy va'e-rami ndaipu'akavéi-ma ójehe. Ikangyve ngyve oho-vy, he'i arandu rehewa nhe'ē omombe'u-vy.

* 12:21 Is 42.1-4

26 —Aipo ramo, gwī Satanás re'ýi kwéry ave ndaijoráí ramo, ndoikovéi arã ra'e. Ndaijoráí arã onhondive ra'e. Aipo ramo, ndaipu'akái arã joty ójehe ra'e.

27 —“Belzebu nhe'ë-rupi omosë anháy” peje kuri xe-rehe. Aipo ramo, kiva'e nhe'ë-rupi pende re'ýi kwéry omosë anháy? Anháy ruvixa nhe'ë-rupi para'e, Nhandejáry nhe'ë-rupi para'e. Ha Nhandejáry nhe'ë-rupi omosë ramo katu, ma'erã po, “Anháy ruvixa nhe'ë-rupi hembiapo Hesu” peje kuri joty xe-rehe. “Ijapu” he'i va'erã pende-rehe pende re'ýi kwéry.

28 —Ha Nhandejáry Nhe'ë Marangatu tee va'e-rupi katu xe amosë anháy. Aipo ramo, xe rekoha-rehe pehexa kwaa ramo ra'e, “Oiko-ma nipo ra'e Nhandejáry nhande ruvixa ramo” peje arã ra'e xe-rehe.

29 —Amombe'u jevy-ta peẽ-my xe pu'akaveha Satanás-rehe. Ndikatúi avave oike imbaraete va'e róga-py omonda hagwā imba'e kwéry-rehe. Onhapytī ranhe ramo ae íxupe, ogwerahapa arã hóga-py oĩ va'e, he'i Hesu anháy rerekoha ombogwera-vy pono ipu'akave hese Satanás.

30 Upéi he'i jevy:

—Xe ndive ombo'apo e'ý va'e, ojoko xe rembiapo. Xe renda-py ogwenogwa'ë e'ý va'e, xe renda-gwi omondo mombyry omosarambi-vy, he'i ójehe ndaija'ei-gwi Satanás.

31-32 Upéi he'i jevy:

—Aipo ramo, anhete ko xe ha'e-ta peẽ-my: Ne rembiapo vai ramo, erenhe'ë vai ramo Nhandejáry-rehe, omboyke-ta ndéhegwí Nhandejáry entéro ne rembiapo vaikwe gwive. Erenhe'ë vai ramo ave xe Nhande Ryke'y tee va'e-rehe, omboyke-ta ndéhegwí ne rembiapo vaikwe. Ha erenhe'ë vai ramo katu Nhe'ë Marangatu tee va'e-rehe, nande poriahuvareko mo'äiry Nhandejáry. Nde py'a ky'a eterei-ma. Áy nande py'a potí mo'ävéi-ma va'erã. Ha upé áry-py xe aju jevyha áry-py nande py'a potívéi-ma va'erã opa e'ý-rehe, he'i fariseu kwéry-pe, “Anháy nhe'ë-rupi hembiapo ra'e Hesu” he'i-gwi Hesu-rehe.

“Hi'a-rehe jaikwaa yvyra”

*he'i Hesu
(Lc 6.43-45)*

33 Upéi omombe'u íxupe kwéry arandu rehewa nhe'ë yva máta rehewarami:

—Yva máta jaikwaa hi'a-rehe. Yvyra porã hi'a porã meme. Ha yvyra vai ndahi'a porãi. Hi'a vai meme voi. Hi'a-rehe jaikwaa yvyra, he'i fariseu rekoha-rehe.

34 Upéi he'i jevy Hesu:

—Peẽ mbói ipoxy va'e rekoha-rami peiko. Pende reko vai-gwi, ndikatúi penhe'ë porã. Nhande py'apóry-rehe nhande nhanhe'ë. Entéro nhande py'a-py jareko va'e-rehe, nhanhe'ë ave nhande.

35 Ipy'a-py hekoha porã va'e reminhongatu iporã. Upe-gwi ogwenohë nohë ipy'apóry iporã va'e. Ha hekoha vai va'e reminhongatu ipy'a-py katu, ivai vai. Upe-gwi ogwenohë nohë ojéhegwí ivai va'e. Ipy'apóry ivai va'e ogwenohë.

36 Amombe'u-ta peẽ-my anhetegwa va'e. Upe áry-py yvypóry gwive hembiapo apokwe-rami ojerereko hagwā áry-py, ogwereko asy va'erã onhe'ë rei rei va'e-pe. Peteí teí pene remimombe'ukwe rei-rehe pene monhe'ë uka va'erã Nhandejáry pende rerekoo asy-vy.

37 Erenhe'ë porã ramo, “Ipy'a potí-ma” he'i va'erã nde-rehe. Ha erenhe'ë rei ramo katu, “Ipy'a ky'a-ma” he'i va'erã nde-rehe, he'i gwī fariseu kwéry-pe hekoha mombe'u-vy.

*Judeu kwéry ohexase Hesu rembiapo porã
(Mc 8.11-12; Lc 11.29-32)*

38 Upe ramo oporandu Hesu-pe gwĩ fariseu kwéry, judeu rekombo'ehaty kwéry ndive:

—Oroipota ne rembiapo porã, porombo'eháry, he'i íxupe. —Ore rembiexarã-rupi ejapo jahexa e'ŷ va'e, he'i íxupe.

39 Upéi Hesu he'i íxupe kwéry:

—Peẽ katu ãy peiko va'e pende reko vai-ma. Ome tee-pe oheja va'e-rami peẽ peiko. Gwembireko tee-gwi opoi va'e-rami ave peẽ peiko. Pejehesa rerova rova va'e Nhandejáry-gwi. Upéa-gwi pejerure jahexa e'ŷ va'erã-rehe, he'i. —Ha ndahexa uka mo'ãi peẽ-my upeixagwa, he'i. —Ha Jonas amyrã rehewa nhe'õ ojehu íxupe va'ekwe katu amombe'u-ta peẽ-my. Hexapyrã-rupi íxupe ojehu va'ekwe-rami ave, ojehu va'erã xe-vy. Upe va'erã anho mante ahexa uka-ta peẽ-my, he'i.

40 —Amombe'uve-ta peẽ-my Jonas amyrã rehewa nhe'õ. Yma va'ekwe piragwasu omokõ-ma íxupe, Jonas-pe. Ha upe rire katu piragwasu rye py-py ohasa mbohapy áry mbohapy pyhare ave. Upéi osê jevy. Upéixa ete xe Nhande Ryke'y tee va'e anhemoõ va'erã itagwasu kwa-py mbohapy áry mbohapy pyhare ave ko itagwasu rye py-py.

41 Ha yma gware Jonas amyrã oho va'ekwe Nhandejáry nhe'õ omombe'u-vy. Nínive tetã mygware-pe omombe'u mbe'u va'ekwe. Upe nhe'õ ohendu ramo va'ekwe omboasy-ma gwembiapokwe, ogwerova-ma gwekoha va'ekwe. Ha ko'a-rupi oime tuvixa mba'eve va'e Jonas amyrã-gwi, he'i ójehe Hesu íxupe kwéry. —Ha xe nhe'õ rendu-vy jepe, ndaperovái joty pende rekoha ra'e. Upéa-gwi upé áry-py, yvypóry hembiapokwe pokwe-rami ojererekohagwã áry-py, Nínive tetã mygware opu'ã jevy va'erã Nhandejáry rovagwy-py pene mombe'u-vy, he'i. —Ojohu vai va'erã pene rembiapokwe.

42 Yma va'ekwe peteĩ mburuvixagwasu kunha va'e arapopy-koty oiko va'ekwe, oho mombyry va'ekwe mburuvixagwasu Salomão renda-py. Onhemo'arandu uka-vy oho. Yvy apy gwive mombyry ete oho va'ekwe ohendu hagwã Salomão nhe'õ. Ha ko'a-rupi oime hi'aranduve va'e Salomão-gwi, he'i ójehe Hesu. —Upéa-gwi upé áry-py opu'ã jevy va'erã upé mburuvixagwasu kunha Nhandejáry rovagwy-py pene mombe'u-vy. Pene rembiapokwe ndojohu porãi va'erã, he'i judeu ruvixa kwéry-pe Hesu.

*Hesu omombe'u anháy rehewa nhe'õ
(Lc 11.24-26)*

43 Upéi he'i jevy upé pygwa-pe:

—Mba'eixagwa pa pende rekoha amombe'u-ta peẽ-my. Anháy rerekoha-rami pende rekoha. Ói anháy heko ky'a va'e nhande-rehe ojepotase va'e. Ha ojepota rire osê-ma ramo katu oiko rei anháy tekwat e'ŷ e'ŷha-rupi, y e'ŷha-rupi ohasa oho-vy. Otongease mo'ã ha ndojohúiry opytu'u hagwã.

44 Upe ramo he'i ojéupe anháy: “Aha jevy-ta xe taperekwe-py, aiko hagwe-py jevy” he'i. Ojevy oho-vy otaperekwe-py. Otaperekwe-py ogwahê ramo upé-py otopa nandi oĩ. Ikoty oitypei ra'e. Omoõ porãmba ra'e.

45 Upe-ma ramo oho ogweru outro anháy hekoha vaive va'e íxugwi. Seteve ogweru. Hi'oitoha ojogweru, oike koty-py oiko hagwã. Upéixa oiko vaive anháy rerekoha. Osê rire íxugwi peteĩ anháy, hejahare oike jevy ipy'a-py. Sete hekoha vaive va'erã reraha-vy oike. Xe nhe'õ rendu e'ŷ-gwi, upéixa ete peiko va'erã. Peẽ, ãy peiko va'e, upé anháy rerekoha-rami peiko va'erã, he'i fariseu kwéry-pe.

*Hesu re'yi rehewa nhe'ẽ
(Mc 3.31-35; Lc 8.19-21)*

⁴⁶ Upéa he'i joty ramo Hesu atýra-rupi, ogwahẽ ou-vy isy tyvýry kwéry ndive. Opyta oĩ-vy oka-py. Onhomongetase hendive.

⁴⁷ —Nde sy ko nde ryvy kwéry ndive opyta oĩ-vy oka-py. Ne ndive onhomongetase, he'i íxupe omombe'u-vy.

⁴⁸ Ha Hesu he'i:

—Amombe'u-ta peẽ-my kiva'e pa xe sy, kiva'e pa xe ryvy, he'i.

⁴⁹ —Pehexa katu, he'i oikwave'ẽ ve'ẽ-vy ojyva-py gwemimbo'e rexax uka-vy. —Ko va'e kwéry xe sy voi, ko va'e kwéry xe ryvy voi, he'i gwemimbo'e kwéry mombe'u-vy.

⁵⁰ —Upe xe Ru yváy pygwa nhe'ẽ ojapo va'e gwive, xe ryvy-py ahenói íxupe kwéry, he'i. —Upéa xe reindy, ha'e voi hese. Upéa xe sy, ha'e voi ave hese, he'i gwemimbo'e kwéry-rehe mombe'u-vy.

13

*Hesu oiporu temitýgwe rehewa nhe'ẽ
(Mc 4.1-9; Lc 8.4-8)*

¹ Ha upe áry-py Hesu osẽ óga-gwi oho-vy. Oho yugwarusu rembe-py ogwapy ombo'e hagwã.

² Ha heta eterei ijatypa typa henda-py. Upéa-gwi onhemboyrú kanoagwasu-py íxugwi kwéry. Kanoá py-py ogwapy-ma. Ha ha'e kwéry ijaty va'e kente opyta rei yvy-py. Onhembo'y oĩ-vy y rembe-py hikwái.

³ Upéixa ramo, heta omombe'u mbe'u íxupe kwéry arandu rehewa nhe'ẽ. Temitýgwe rehewa nhe'ẽ-rami oiporu omombe'u hagwã arandu rehewa nhe'ẽ íxupe kwéry:

—Oho onhemity onhemity va'e. Omombo onhotý-vy.

⁴ Onhemity jave oĩ temitý ra'yi tape-rupi ho'a va'e. Ha upéi ou gwyra ho'upa.

⁵ Oĩ temitý ra'yi ave yvy pererí-rupi ho'a va'e. Upe-py oĩ mixími yvy. Pya'e rei henhoí-ma yvy ndahetáiry-gwi.

⁶ Kwarahy ojeupi rire, onhandu kwarahy aku hemitygwe. “Xi” he'i hogwe. Ha kwarahy ohapypa voi. Hovirupa ave ndahapói-gwi.

⁷ Oĩ nhuatíndy-rupi ho'a va'e ave. Ha nhuatí katu okakwaave íxugwi. Ojaho'ipa temitýgwe-pe.

⁸ Oĩ yvy porã-my ho'a va'e ave. Henhoí hemity hope-ma. Peteí hope katu cem voi ha'yi va'e, outro mixíve va'e katu sessenta ha'yi va'e voi, outro mixíve va'e katu trinta ha'yi va'e voi.

⁹ Ne aranduse va'e, ejeapsaka katu ko xe nhe'ẽ-rehe, he'i oporombo'e-vy Hesu temitýgwe rehewa nhe'ẽ oiporu-vy.

*Hemimbo'e kwéry oporandu Hesu-pe hemimombe'ukwe-rehe
(Mc 4.10-12; Lc 8.9-10)*

¹⁰ Upéi hemimbo'e kwéry ogwahẽve ou-vy Hesu ypy-py:

—Ma'erã po eremombe'u kuri íxupe arandu rehewa nhe'ẽ temitýgwe rehewa nhe'ẽ-rami? he'i oporandu-vy íxupe.

¹¹ —Peẽ-myte oikwaa uka-ma kuri Nhandejáry mba'éixa pa oiko-ta pende ruvixarã. Mba'éixa po pemoirú-ta íxupe pende ruvixarã oikwaa uka-ma ave. Ha ambue kwéry-pe katu ndoikwaa ukái.

¹² Oĩ hi'arandu va'e. Omo'aranduve va'erã íxupe hi'arandu porã porã hagwã. Ha inharandu e'ỹ va'e katu, hi'arandurágwe oipe'apa va'erã íxugwi. Opa va'erã íxupe.

¹³ Upéa-rehe amombe'u íxupe arandu rehewa nhe'ẽ temitȳ rehewa nhe'ẽ-rami, he'i. —Oma'ẽ ma'ẽ hikwái, ndohexáiry voi mba'eve. Ohendu hendi hikwái, nohendu poráiry. Ijapysa e'ŷ va'e-rami mba'eve ndoikwaái. Okanhymba ete jevy íxugwi.

¹⁴ Yma gware Nhandejáry nhe'ẽ-py omombe'u va'ety Isaías omombe'u va'ekwe aŷgwa rekorā. He'i hagwe-rami ãy oiko-ma:

“Pehendu hendi va'erā ha ijapysa e'ŷ va'e-rami pepyta va'erā. Pema'ẽ ma'ẽ rei va'erā xe-rehe ha ndapehexa kwaái va'erā xe-rehe.

¹⁵ Napehenduséi-gwi, aipe'a-ma pendéhegwi pene arandurágwe. Ijapysa e'ŷ va'e-ramima peiko peẽ kwéry. Hesapysa e'ŷ va'e-rami ave peiko. Ha xe renduse ramo katu, hesapysa va'e-rami peiko va'erā. Ijapysa va'e-rami pehendu va'erā ave. Pene akã-my perekoma va'erā pene arandu poráha. Perova arā pende rekoha. Pende rekoha perova-ma ramo, apombogwera-ma va'erā, he'i Nhandejáry.”*

Upéixa he'i Nhandejáry kwaitia nhe'ẽ.

¹⁶ Ha peẽ katu pevy'a ete va'erā. Ñy katu peẽ hesapysa va'e-rami peiko-ma. Ijapysa va'e-rami ãy peẽ peiko-ma ave.

¹⁷ Amombe'u-ta peẽ-my anhetegwa va'e, he'i. —Heta yma gware Nhandejáry nhe'ẽ-py omombe'u va'ety amyrí ohexase eterei mo'ã va'ekwe pene rembiexa ramo va'e ha ndohexái. Heta va'ekwe heko marangatu va'ekwe amyrí ohexase mo'ã va'ekwe ave ha ndohexa jepéiry. Ñy pene remiendu ramo va'e ohenduse mo'ã va'ekwe ha nohendúiry. Peẽ pehendu-gwi pevy'a ete voi peiko-vy, he'i gwemimbo'e kwéry-pe Hesu.

Hesu oikwaa uka gwemimbo'e kwéry-pe gwemimombe'u (Mc 4.13-20; Lc 8.11-15)

¹⁸ Upéi he'i jevy gwemimbo'e kwéry-pe:

—Ñy pejeapysaka katu xe nhe'ẽ-rehe. Mbava'e-rehe po he'ise temitȳgwe rehewa nhe'ẽ aikwaa uka-ta peẽ-my, he'i.

¹⁹ —Upe tape-rupi onhenhotý va'ekwe he'ise: Oĩ Nhandejáry nhande ruvixarã rehewa nhe'ẽ ohendu va'e ha he'ise va'e ndoikwaáiry. Ohendu-ma ramo, ou anháy ruvixa hekoha vai ete va'e. Oipe'apa-ma íxugwi ipy'a-gwi inharandu porárágwe. Oike-tama va'e oipe'a jevy íxugwi.

²⁰ Ha yvy pererí-rupi onhenhotý va'ekwe katu he'ise: Oĩ ohendu va'e nhe'ẽ porã. Ohendu-ma ramo, ov'y'a ogwerovia-vy.

²¹ Ha ndahapóiry vyteri. Upéa he'ise: Sapy'a ete ogwerovia. Ndogwerovia teéiry voi. Ha upe rire katu nhe'ẽ porã rendu-gwi, omoingo asy íxupe. Ojerereko asy-gwi, ndogweroviasevéiry. Pya'e a'e oheja nhe'ẽ porã.

²² Ha nhuatíndy-rupi onhenhotý va'ekwe katu he'ise: Oĩ nhe'ẽ porã rendu va'e. Ha hemikotevérã-rehe opena pena eterei oiko-vy. Oipotave tave rei ojéupe gwarã. Upéa-gwi ohendu rei jotty nhe'ẽ porã. Hembia po porâse ramo jepe, gwembiapo porârã-rehe nopenái jotty oiko-vy.

²³ Ha yvy porã-my onhenhotý va'ekwe katu he'ise: Oĩ ohendu va'e nhe'ẽ porã. Ohendu ramo mbava'e-rehe po he'ise oikwaa porã. Ogwerovia tee voi. Ogwerovia-gwi, oĩ trinta ha'ŷi va'e-rami hembia po porã va'e. Oĩ sessenta ha'ŷi va'e-rami, hetave ogwereko va'e gwembiapo porâha. Oĩ cem ha'ŷi va'e-rami, hetave rei voi ogwereko va'e gwembiapo porâha, he'i omombe'u-vy gwemimbo'e kwéry-pe Hesu.

Hesu oiporu jevy temitȳgwe rehewa nhe'ẽ

* **13:15** Is 6.9-10

24 Upéi omombe'u jevy upe pygwa-pe arandu rehewa nhe'ẽ. Temitygwe rehewa nhe'ẽ-rami oiporu omombe'u-vy:

—Oiko onhemitȳ va'e, he'i. —Nhandejáry nhande ruvixa-rehe he'ise onhemitȳ va'e. Ha'e oho kokwe-py onhemitȳ porã hagwã.

25 —Upéi nhande kwéry jake ramo pyhare, ogwahé ou-vy hese ija'e'ŷ va'e. Trigo pa'ũ-rupi onhotȳ trigo rehewa e'ŷ va'e. Kapi'i onhotȳ. Ha upe rire katu oho jevy-ma.

26 Henhói-ma upe trigo onhenhotȳ va'ekwe. Upéi hope-ma. Upe ramo henhói-ma ave upe kapi'i trigo rehewa e'ŷ va'e.

27 Henhói-ma ramo, oho oje'óí-vy omombe'u ojáry renda-py hembigwái: “Upe nde kokwe-py erenhotȳ uka va'ekwe ne remitygwe trigo ra'ŷi voi ra'e” he'i. “Mba'eixagwa kapi'i po trigo pa'ũ-rupi henhói-ma erejaty e'ŷ va'ekwe” he'i ojáry-pe omombe'u-vy.

28 “Xe rehe ija'e'ŷ va'e rembiapokwe voi nipo ra'e aipo va'e” he'i gwembigwái-pe. “Ereipota tipo ore oroho oromondoro trigo pa'ũ-gwi gwí kapi'i?” he'i oporandum-vy ojáry-pe.

29 “Ndikatúiry” he'i. “Aníke pejapo teĩ upéa. Pemondoro ramo kapi'i, ndaiapotái pemondoro ave upe trigo onhenhotȳ va'ekwe” he'i.

30 “Tokakwaa kapi'i trigo jave nhaikytí hagwã áry peve. Upe áry-py ha'e va'erã trigo kytíharã-pe: Pemondoro ndoro ranhe katu kapi'i. Pemboaty aty pejokwa pehapy hagwã. Ha upe rire katu pemondoro trigo pemboaty jaraha hagwã nhanhongatu hagwã-py” he'i Hesu omombe'u-vy Nhandejáry irũ rehewa oikwaa uka-vy.

*Hesu oiporu temitȳ héry va'e mostarda rehewa nhe'ẽ
(Mc 4.30-32; Lc 13.18-19)*

31 Ha upéi omombe'u jevy upe pygwa-pe arandu rehewa nhe'ẽ. Temitygwe rehewa nhe'ẽ-rami oiporu:

—Oĩ temitȳ héry va'e mostarda. Kwimba'e onhotȳ peteĩ temityrã okokwe-py. Nhandejáry nhande ruvixa irũ-rehe he'ise upe temitȳ mostarda.

32 Nhanhotȳ ramo mixí eterei. Mixíve opamba'e ra'ŷi-gwi, ko yvy arigwa ra'ŷi-gwi. Ha nhanhotȳ-ma rire, okakwaa porâve. Entéro temitȳ-gwi tuvixave xave oho-vy. Upéi imáta-ma, hakãmbe kãmbe ave. Upéa-rehe oveve ou-vy gwyra ogwapy hakãmby-rehe, he'i Hesu, Nhandejáry irũ hetave tave oĩ va'erã rehewa oikwaa uka-vy.

*Hesu oiporu fermento mbojape mbôvuha rehewa nhe'ẽ
(Lc 13.20-21; Mc 4.33-34)*

33 Ha upéi katu omombe'u jevy joto upe pygwa-pe arandu rehewa nhe'ẽ. Fermento mbojape mbôvuha rehewa nhe'ẽ-rami oiporu:

—Oĩ kunha. Oipyhy mbojape mbôvuha. Heta trigo ku'i reheve ombojehe'a ombovu hagwã. Ojavyky rire, omboapitajy ovupa ete hagwã. Upéixa ete Nhandejáry nhande Ruvixa irũ, he'i Hesu, Nhandejáry irũ hetave tave oĩ va'erã rehewa oikwaa uka-vy.

34 Upéixa omombe'u mbe'u aty atýra va'e kente kwéry-pe. Temitygwe rehewa nhe'ẽ oiporu e'ŷ reheve, fermento mbojape mbôvuha rehewa nhe'ẽ oiporu e'ŷ reheve, outro rehewa nhe'ẽ oiporu e'ŷ reheve nomombe'úi.

35 Upéixa oiko-ma Nhandejáry nhe'ẽ-py omombe'u mbe'u va'ety he'i hagwarami:

“Anhe'ẽ ramo, arandu rehewa nhe'ẽ amombe'u va'erã, ambue kwéry va'e rehewa nhe'ẽ aiporu-vy. Yma ko yvy onhemoingo hagwe gwive ãy peve ndojekwaaíry va'ekwe, ãy amombe'u-ta aikwaa uka-vy, he'i.”*

* 13:35 SI 78.2

Upéixa he'i Nhandejáry kwtia nhe'ẽ.

Hesu oikwaa uka kapi'i rehewa nhe'ẽ

³⁶ Ha upéi katu oheja oho-vy ijaty va'e kente. Ha'e ae katu oike koty-py. Oike rire, ogwahẽ ou-vy iha-py hemimbo'e kwéry:

—Eikwaa uka katu ore-vy mbava'e-rehe tipo he'ise upe kapi'i rehewa nhe'ẽ, kokwe-py oĩ va'e, he'i Hesu-pe hikwái.

³⁷ —Upe temitŷ porã onhotŷ uka va'ekwe he'i xe-rehe Nhandejáry tee va'e-rehe, he'i.

³⁸ —Upe kokwe he'i ko yvy-rehe. Upéi upe temitŷ porã he'i Nhandejáry re'yí-rehe. Upéi upe kapi'i he'i hekoha vai va'e-rehe.

³⁹ Upéi upe hese ija'e'ỹ va'e kapi'i onhotŷ va'ekwe he'i anháy ruvixa-rehe. Upéi upe nhaikytíha áry he'i ombopapa va'erâha áry-rehe. Upéi upe trigo kytíharã he'i Nhandejáry rembigwái yváy pygwa-rehe.

⁴⁰ Upe kapi'i omondoro omboaty onhapytõ omondo hagwã tata-py. Upéixa ete oiko va'erâha ombopapa va'erâha áry-py, he'i.

⁴¹ —Xe Nhandejáry tee va'e amondo mondo va'erâha xe rembigwái yváy pygwa va'e. Xe re'yí pa'ũ-gwi oipe'a va'erâha gwí oporombojeavy va'e-pe gwive. Entéro hembiapo vai va'e-pe gwive oipe'a va'erâha heraha-vy ojohapy haty-py omombo hagwã.

⁴² Upe-py hasë va'erâha, onhemohâingyry ngyrýu ave va'erâha oiko-vy onhemoyrõ-gwi Nhandejáry-rehe.

⁴³ Upe-ma ramo hekoha porã va'e gwive kwarahy rendy-rami ojekwaa va'erâha onhembohete resakã rendy-vy. Nhandejáry nhande ruvixa ramo oiko haty-py, ojekwaa va'erâha onhemohesakã va'erâha. Ne aranduse va'e, ejapysaka katu ko xe nhe'ẽ-rehe, he'i Hesu gwemimbo'e kwéry-pe omombe'u-vy.

Hesu oiporu hepy va'e rehewa nhe'ẽ

⁴⁴ Upéi omombe'u jevy íxupe, upe pygwa-pe mokõi arandu rehewa nhe'ẽ. Hepy va'e rehewa nhe'ẽ-rami oiporu omombe'u-vy:

—Oĩ kokwe-py heta plata yvy gwy-py ijatypyre araka'e. Upe ramo ojohu rei íxupe ijáry e'ỹ va'e. Upe hepy va'e ojohu va'e he'i Nhandejáry nhande ruvixa-pe omoirûse va'erâha-rehe. Otopa-ma ramo, upéi ojaty jevy. Ovy'a eterei ojohu va'ekwe-rehe. Upéa-gwi oho ovende entéro ogweroko va'e gwive ovendepa. Upe hemivende va'e repykwe ogweraha ojogwa hagwã upe kokwe, he'i Hesu omombe'u-vy, Nhandejáry-pe oate'ỹ e'ỹ rehewe omoirûse va'e rehewa oikwaa uka-vy.

⁴⁵ Upéi omombe'u jevy íxupe:

—Oĩ onhemba'ejogwa va'ety. Oheka heka oiko-vy ita kyra porã va'e, hepy ete va'e, pérola héry va'e ojogwa hagwã. Upe hepy va'e oheka va'e he'i Nhandejáry nhande ruvixa-pe omoirûse va'erâha-rehe.

⁴⁶ Iporã ete va'e otopa ramo oho ovende entéro gwembiereko gwive ovendepa. Upéi hemivende va'e repykwe ogweraha. Gwemimbota nga'u upéa oho ojogwa, he'i Hesu omombe'u-vy, Nhandejáry-pe oate'ỹ e'ỹ rehewe omoirûse va'e rehewa oikwaa uka-vy.

Hesu oiporu pira kyha rehewa nhe'ẽ

⁴⁷ Upéi omombe'u jevy upe pygwa-pe arandu rehewa nhe'ẽ. Pira kyha rehewa nhe'ẽ-rami oiporu íxupe kwéry:

—Oĩ pira kyha y-py omombo va'e. Upe omombo va'e he'i Nhandejáry nhande ruvixa rembigwái yváy pygwa-rehe. Yupa-py omombo rire, oipyhy opaixagwa pira.

48 Hyntyhē jave oipyhy ogwenohē y rembe'y-py. Upéi ogwapy oipe'a oiporavo imono'ō-vy. Pira porā omoī ajaka-py. Ha hi'upy e'ŷ katu omombo-ma voi.

49 Upéixa ete oiko va'erā ombopapa va'erāha áry-py. Nhandejáry rembigwái yváy pygwa oiporavo ravo va'erā oje'óí-vy. Hekoha porā va'e pa'ū-gwi, oipe'a va'erā hekoha vai va'e-pe.

50 Ojohapy haty-py omombo va'erā íxupe kwéry. Upe-py hasē hasē va'erā oiko-vy. Nhandejáry-rehe onhemoyrō-gwi, onhemohāingyry ngyrýu ave va'erā oiko-vy ave, he'i omombe'u-vy ombopapa va'erāha áry oikwaa uka-vy.

51 Ko'ā va'e he'i rire, oporandu gwemimbo'e kwéry-pe:

—Mbava'e-rehe po he'i ko'ā va'e? Peikwaa-ma tipo? he'i.

—Ha'e voi, he'i. —Orokwaa-ma, he'i íxupe, Hesu-pe.

52 —Aipo ramo, gwī judeu rekombo'ehaty va'e iporā oiko Nhandejáry nhande ruvixa remimbo'e ramo. Ambo'epa rire íxupe, oiko va'erā óga járy-rami. Hóga-py oī heminhongatu pyahu va'e, oī heminhongatu tuja va'e ave. Oipota ramo, gweminhongatu pyahu ogwenohē va'erā. Oipota ramo, gweminhongatu tuja ogwenohē va'erā ave. Upéixa ete upe judeu rekombo'ehaty Nhandejáry nhande ruvixa remimbo'e oiko ramo, nhe'ẽ pyahu omombe'u va'erā oikwaa uka-vy, yma gware nhe'ẽ omombe'u va'erā ave, he'i Hesu omombe'u-vy.

Hesu oho gwetā-my

(Mc 6.1-6; Lc 4.16-30)

53-54 Arandu rehewa nhe'ẽ omombe'upa rire, upe-gwi osē oho-vy gwetā-my ha'e ae oiko ha-py. Upe-py ojeporahéi haty-py ombo'e mbo'e gwe'ýi kwéry-pe. Hexapyrā-rupi ombo'e porā oiko-vy. "Mba'éixa onhemonhe'ẽ" he'i opondera-vy hese.

—Mamo-gwi po upéa ohendu aipo va'e nhe'ẽ? he'i hese. —Kiva'e omombe'u hi'arandu hagwā íxupe, he'i hese. —Hexapyrā-rupi voi Hesu hembiapo porā. Kiva'e po omombe'u íxupe ojapo hagwā upéa? he'i joa hese hikwái.

55 —Upéa óga apohaty ra'y voi, he'i. —Maria memby voi. Tiago José ndive, Simão Judas ndive ityvýry kwéry voi.

56 Heindýry kwéry oiko voi nhane pa'ū-rupi. Aipo ramo, mamo-gwi po upéa ohendu aipo va'e nhe'ẽ? he'i joa Hesu-rehe hikwái.

57 —Onhembotuvixa mba'e-ta tipo nhande-vy ra'e? he'i hese he'ýi kwéry. Upéa-gwi ndaija'ei hese hikwái. Upe ramo,

—Nhandejáry nhe'ẽ-py omombe'u va'ety-pe omboete voi. Ha he'ýi kwéry katu nomboetéi íxupe. Anheigwa nde'íry hese hóga pygwa omboete e'ŷ-vy, he'i ójehe Hesu omombe'u-vy, ndaija'ei-gwi ójehe.

58 Upe-py hese ndojeroviái-gwi, ndahetáí hembiapo porā hexapyrā-rupi upe-py.

14

João Batista rehewa nhe'ẽ

(Mc 6.14-29; Lc 9.7-9)

1 Upe ramo, ohendu Hesu rerakwā mburuvixagwasu héry va'e Herodes. Galiléia vvy pygwa ruvixa voi upéa.

2 Hesu rerakwā ohendu ramo he'i,

—Upéa João Batista nipo ra'e. Omano rire, oikove jevy-ma ra'e, ojekwaa jevy-ma ra'e, he'i mo'ā hese. —Upéa-gwi hexapyrā-rupi hembiapo porā porā oiko-vy, he'i mo'ā oirū-pe Hesu-rehe.

³ Yma va'ekwe Herodes he'i va'ekwe oipyhy hagwā Joāo-pe, ojepokwa reheve omoī hagwā preso. Upéa ojapo va'ekwe ombovy'a hagwā gwyvýry Filipe rembirekokwe Herodias. Ha'e omenda ra'e gwyvýry rembireko-rehe. Oipe'a ra'e gwyvýry-gwi hembireko.

⁴ Ha Joāo katu he'i:

—Tekoha e'ŷ-rupi ereiko ra'e ne rembireko ereipe'a va'ekwe nde ryvy-gwi, he'iri iri ra'e Herodes-pe.

⁵ Upéa-gwi ojukase mo'ā Joāo-pe. Ha kente kwéry katu he'i hese, “Upéa ko Nhandejáry nhe'ē-py omombe'u va'ety voi” he'i Joāo-rehe hikwái. Ha mburuvixa katu opy'apy-py ikyhyje ójehe. Nombopoxyséi íxupe kwéry. Upéa-gwi ndojukái joty íxupe.

⁶⁻⁷ Ha upéi katu mburuvixa oiko hagweha áry-py, oike ojeroky henonde-py Herodias memby kunhataī. Mburuvixa irū gwéry renonde-py ojeroky kunhataī. Ogwerovy'a eterei-gwi íxupe, kunhataī-pe, he'i mburuvixa: “Ne rembijerure va'e gwive ame'ē-ta nde-vy” he'i íxupe. Pono oapu “Tupā réry-py ame'ē-ta nde-vy” he'i. Nde'i reíry pe kunhataī ojeroky va'e-pe.

⁸ Upéi osy nhe'ē-rupi he'i: “Aipota ereme'ē xe-vy Joāo Batista akāgwe. A-py ete enterove va'e resa-py eme'ē mani katu xe-vy nha'ē-py” he'i mburuvixa-pe kunhataī.

⁹ Upe-ma ramoomboasy eterei he'i va'ekwe. Ha “Tupā réry-py ame'ē-ta nde-vy” he'i-gwi imboviapyre resa-py katu, he'i joty ome'ē hagwā kunhataī-pe hembijerure ojéupe.

¹⁰ He'i oho hagwā onhakā'o Joāo-pe onhemoī preso haty-py.

¹¹ Upéi ogweruruka nha'ē-py inhakāgwe ome'ē kunhataī-pe. Ha kunhataī ogweraha osy-pe.

¹² Ha Joāo remimbo'e ohendu ramo, ou hetekwe ogweraha. Ombosuru tetekwe renda-py ijaty-vy. Upe rire oho omombe'u Hesu-pe.

Hesu omongaru ijaty va'e kente-pe

(Mc 6.30-44; Lc 9.10-17; Jo 6.1-14)

¹³ Joāo rerakwā ohendu ramo, oho Hesu kanóa-py tekwat y e'ŷ-my oho. Ha'e anho oiko hagwā-py oho. Oikwaa ramo ihoha ijaty va'e kente, gwtā gwetā-gwi osē oje'ói-vy. Hapykwéri oje'ói ojohu jevy hagwā Hesu-pe. Yvy-rupi oje'ói.

¹⁴ Ha Hesu ojehexa uka jevy ramo, ohexama ijaty va'e kente-pe jevy oha-py:

—Ogwahē ogwa'ē-vy ra'e, he'i hese kwéry.

Ohexama,

—Aiporiahuvereko íxupe kwéry, he'i. —Aipo ramo, hasy va'e-pe ambogwera-ta, he'i.

Upe rire ha'e ombogwera hasy va'e-pe.

¹⁵ Upéi ka'aru-ma. Ogwahē ou-vy hemimbo'e kwéry iha-py:

—Ndaipóri a-py mba'eve, he'i. —Ka'aru-ma. Ere íxupe kwéry toho tetā mirī-rupi ojogwa hagwā gwemimbo'e kwéry-pe Hesu.

¹⁶ Ha ha'e he'i:

—Natekotevēiry oho okaru hagwā, he'i. —Peē ae peme'ē íxupe kwéry hemi'urā, he'i gwemimbo'e kwéry-pe Hesu.

¹⁷ —A-py ndahetáiry oī mbojape'i. Cinco oī mixī va'e. Mokōi pira ka'ẽ hendife oī, he'i íxupe.

¹⁸ Ha'e he'i:

—Peru katu a-py, he'i gwemimbo'e kwéry-pe.

¹⁹ Upéi he'i ijaty va'e kente-pe ogwapy hagwā kapi'ipe ári. Upéi oipyhy upe cinco mbojape'i mokōi pira ndive. Hovayva otima porā Nhandejáry-pe temi'urā-rehe. Upéi ombopopóy upe mbojape, ome'ẽ me'ẽ gwemimbo'e kwéry-pe. Ha hemimbo'e ome'ẽ ho'u va'erā-pe.

²⁰ Enterovete okaru, hygwyatāmba-ma ave hikwái. Upéi hemimbo'e kwéry omono'õ no'õ hembi'u rembyre kwéry. Doze ajaka omohynyhē hembyre kwéry-gwi ho'upa e'ŷ va'ekwe.

²¹ Upe mbojape ho'u va'ekwe heta heta voi oĩ. Oĩ cinco mil kwimba'e ho'u va'e. Heta kunha ave okaru va'e, heta ave mitā okaru va'e ave.

Hesu y ári rei ogwata oho-vy

(Mc 6.45-52; Jo 6.15-21)

²² Upe-ma ramo he'i gwemimbo'e kwéry-pe onhemboyrū hagwā kanóap-y:
—Tapeho mani katu peẽ xe renonde y rovái, he'i. —Xe ae, “Tapeho jevy katu pende ro nde róga-rupi” ha'e-ta ijaty va'e-pe, he'i gwemimbo'e kwéry-pe.

²³ Omondopa rire, ha'e anho ojeupi oho yvyaty ári. Ojapo oraçāo hagwā ojeupi oho-vy. Ka'aru ete-ma, pytū-ma.

²⁴ Upe ramo mombyry oĩ yvy ete-gwi kanoagwasu. Henonde-gwi ou ramo yvytu, ndogwata porāi. Omopu'ã y omoapŷ apŷ kanóap-pe.

²⁵ Ko'et̄í pytū vyteri jave, oho kanóap-pe ha-py Hesu. Y ári-rupi rei ogwata oho-vy.

²⁶ Y ári-rupi ogwata oho-vy ramo, onhemondýi eterei hexa-vy hemimbo'e kwéry. “Arygwypóry” he'i mo'ã hese hikwái. Osapukái, onhemondýi eterei-gwi.

²⁷ Upe-ma ramo ha'e he'i:

—Ani erejapura teĩ. Xe ae ko, xe ko Hesu, he'i gwemimbo'e kwéry ombopy'agwapy-vy.

²⁸ Upe ramo he'i Pedro:

—Nde voi ramo ra'e, ere xe-vy, “Eju katu y ári-rupi rei xe ha-py ave” he'i Hesu-pe.

²⁹ Aipo ramo,

—Eju y ári-rupi rei xe ha-py, he'i.

Upéi osẽ Pedro kanóap-gwi, ogwejy y-py ogwata y ári-rupi.

³⁰ Ha yvytugwasu rexava-vy, imytu'e'ŷ ójehe. Oypy oho-vy y gwy-koty. Onheapymi-tama ramo:

—Xe resende katu, xe Járy, he'i Hesu-pe.

³¹ Upe-ma ramo oipysa opo oipyhy íxupe:

—Mixi joty xe rerovia ra'e. Upe va'e-gwi ae nde erenheapymi-ta mo'ã. Ma'erā po nderejerovia teéiry ra'e xe-rehe ra'e? he'i Pedro-pe.

³² Onhemopyrū jevy rire kanóap-py ndayvytuvéi-ma.

³³ Upéi kanóap-py gwa onhesū íxupe gwetypy'ã-rehe:

—Tupā Nhandejáry ra'y tee katu va'e nipo nde ra'e, he'i íxupe imboete-vy hikwái.

Hesu ombogwera heta hasy va'e-pe

(Mc 6.53-56)

³⁴ Ha upéi katu ha'e ohasa oho-vy yugwarusu rovái. Genesaré yvy-py ogwahē oho-vy.

³⁵ Upe pygwa oikwaa ramo íxupe, omombe'u ojóupe ogwahēmaha Hesu. Tetā jerekwe-rupi omombe'u mbe'u ogwahēmaha Hesu. Ogweru entéro hasy va'e-pe gwive:

36 —Eheja hasy va'e tomboja jepe opo nde ao rembe-rehe, eheja tomboja jepe opo nde ao-rehe, he'i Hesu-pe. Ha omboja va'e gwive opo hese, okwera-ma joty hikwái.

15

Nhane rembypy reko rehewa nhe'ẽ (Mc 7.1-13)

1 Upe ramo ogwahẽ ou-vy Hesu ha-py gwī fariseu kwéry, judeu rekombo'ehaty kwéry ndive. Jerusalém tetā-gwi ou va'ekwe. Ogwahẽ ramo hikwái, oporandu íxupe:

2 —Ma'erã tipo ne remimbo'e ndoikói nhane rembypy reko-rupi? Ma'erã tipo ojepohéi porã e'ŷ rehewe okaru? Ma'erã tipo nonhemopotísevéiry nhande kwéry e'ŷ va'e ndive oiko rire? he'i íxupe.

Ha ha'e he'i:

3 —Ha peẽ katu ma'erã tipo ndapejapói Nhandejáry he'i va'ekwe? Ndere-japoséi voi nde ra'e Nhandejáry he'i va'ekwe. Ne rembypy rembiapokwe-rupi ae ereiko va'e, he'i.

4 —Nhandejáry he'i va'ekwe a-rami:

“Pemboete nde ru nde sy-pe ave. Ha entéro onhe'ẽ vai rei va'e gwive gwu-rehe osy-rehe ave, tojejuka katu”*

he'i Nhandejáry kwaitia nhe'ẽ.

5 Ha peẽ katu pepyrū Nhandejáry nhe'ẽ-rehe. Ndapehejáiry gwu osy-pe ome'ẽ hagwā. Pembo'e mbo'e rei judeu kwéry-pe a-rami. Peje, “Ava he'i ramo gwu osy-pe ave, Voive ereporandu ramo, ame'ẽ arã nde-vy ra'e. Áy katu ndikatuvéi-ma ame'ẽ nde-vy. Xe mba'e kwéry opa-ma. Ame'ẽmba-ma kuri Tupã Nhandejáry-pe. Aiporu jepe xe, Tupã mba'epa-ma, he'i gwu osy-pe ave.” Upéixa he'i ramo, iporã joty peẽ-my.

6 Upéixa ndapehejái oipytygwō gwu osy-pe ave. Ne nhe'ẽ-py gwu osy-pe nomboetevéi. Ne rembypy reko-rupi joty peiko. Upéa-gwi pepyrū joty Nhandejáry nhe'ẽ-rehe, pemboyke joty Nhandejáry nhe'ẽ peiko-vy.

7 Peẽ katu pemo'ã kwa va'e pende py'a ky'aha. Napetí kwaáiry peẽ. Ha Isaías amyrí anheiha-rupi omombe'u va'ekwe pende rekorã. Omoĩ va'ekwe kwaitia-rehe a-rami:

8 “Ha'e kwéry xe mboete onhe'ẽ-py rei. Opy'a-py katu naxe mboetéiry. Ndojehesa rerovái xe-rehe.

9 Xe momba'egwasu teĩ. Xe nhe'ẽ-py nombo'éiry. Ha teko rei nhe'ẽ-py ae, oporombo'e mbo'e oiko-vy”*

he'i Nhandejáry kwaitia nhe'ẽ pende-rehe, he'i judeu kwéry ruvixa-pe.

Hesu omombe'u mba'éixa nhanhemongy'a (Mc 7.14-23)

10 Upéi ohenói jevy ou hagwā ijaty va'e kente kwéry oha-py. He'i:

—Pejeapsaka porã katu xe nhe'ẽ-rehe peikwaa porã hagwā, he'i.

11 —Jakaru jave ndikatúi nhane mongy'a tembi'u. Nanhande py'a mongy'áiry voi tembi'u. Ha pene nhe'ẽ vai ramo katu onhemongy'a arã pende py'a, he'i ijaty va'e-pe arandu rehewa nhe'ẽ omombe'u-vy.

12 Upéi ogwahẽ ou-vy iha-py hemimbo'e kwéry:

—Fariseu kwéry ojohu vai kuri pene nhe'ẽ. Nderekwaái tipo upéa nde ra'e? Ne nhe'ẽ rendu-vy, “Aipo” he'i nde-rehe opondera eterei-vy. Ndojohu porãi voi, he'i Hesu-pe.

* 15:4 Ex 21.17 * 15:9 Is 29.13

13 Upéi ha'e omombe'u arandu rehewa nhe'ẽ temitŷgwe rehewa nhe'ẽ-rami, hesapyo e'ŷ va'e rehewa nhe'ẽ-rami ave he'i:

—Entéro temitŷgwe xe Ru yváy pygwa onhotŷ e'ŷ va'ekwe gwive, hapo gwive omondoro jevy va'erã, he'i fariseu kwéry rekoha vai-rehe.

14 —Ani pepena hese. Hesapyo e'ŷ va'e-rami oiko ramo jepe, gwapixa ogwerahase joty tape-rupi. Ha mokõi hesapyo e'ŷ va'e ojogweraha ramo, ho'a arã oho-vy mokõive onhondive yvy kwa-py, he'i fariseu kwéry-rehe.

15 Upe rire he'i Pedro:

—Mbava'e-rehe po he'ise arandu rehewa nhe'ẽ, eikwaa uka ore-vy, he'i Hesu-pe.

16 Upéa-rehe he'i gwemimbo'e kwéry-pe:

—Peẽ napene arandu porã vyteri peiko-vy. Ha'e kwéry-rami voi ndapeikwaa porã joty.

17 Ma'erã tipo ndapeikwaa porã vyteri? he'i. —Pekaru ramo, oho pende ryekwe-py tembi'u. Upéi osëmba jevy pendéhegwí. Napene mongy'áiry voi, he'i.

18 —Ha pene nhe'ẽ katu pende py'a-gwi osẽ-vy ombojekwaa-ma pende py'a pygwa, he'i. —Nde py'a ky'aha para'e, nde py'a potïha para'e ombojekwaa-ma pende-rehe. Ivai ramo pene nhe'ẽ, pene mongy'a arã.

19 Pende py'a-py katu penhemongeta peiko-vy pene rembiapo vairã-rehe. Upéa-gwi peporojuka. Pende py'a ky'a-gwi onhoembireko ndive, onhome ndive peiko. Kunha ndive pejogwereko rei ave. Pende py'a vai-py penhemongeta-gwi, pemonda rei peiko-vy, pende apu, pende rapixa-rehe penhe'ẽ vai rei peiko-vy.

20 Upeixagwa pejapo pende py'a vai-gwi. Upéixa ramo pende py'a vai-gwi, pene mongy'a-ma. “Ha pejepohéi porã e'ŷ rehewe pekaru ramo, pene mongy'a va'erã” he'i mo'ã fariseu kwéry. Upéixa ramo, napene mongy'avéima va'erã, he'i Hesu fariseu kwéry remimombe'ukwe-rehe.

Kunha Canaã yvy pygwa rehewa nhe'ẽ

(Mc 7.24-30)

21 Upe-gwi osẽ oho-vy Hesu. Okanhy oho-vy outro yvy-koty osẽ oho. Tiro tetã jerekwe-rupi, Sidom tetã jerekwe-rupi oho ave.

22 Upe-py oiko kunha Canaã yvy gwigwa ogwahẽ ou-vy Hesu ha-py:

—Xe Járy, Davi remiarirõre, xe poriahuvareko katu. Xe memby kunha ohasa asy eterei oiko-vy anháy ojepota hese va'e, he'i íxupe.

23 Ha Hesu mba'eve nde'íry íxupe. Onhemokirirõ íxugwi. Ogwahẽ ou-vy iha-py hemimbo'e kwéry:

—“Tereho katu” ere, “Tereho katu” ere íxupe. Nhane moakã rasy osapukáiy. Ejapo katu hemimbota-rupi íxupe oho jevy hagwã, he'i íxupe.

24 Upéi Hesu he'i kunha-pe:

—Ovexa okanhy va'ekwe-rami oiko Israel remiarirõre judeu kwéry. Íxupe kwéry anho mante xe mbou va'ekwe. Judeu e'ŷ va'e kwéry-pe naxe mboúi va'ekwe, he'i joty íxupe otantea-vy.

25 Ha kunha ou gwetypy'ã-rehe onhesũ hovagwy-py:

—Xe pytygwõ katu, xe Járy, he'iri iri íxupe.

26 Ha Hesu he'i:

—Nde ko ndaha'éi xe re'ýi. Xe re'ýi kwéry aipytygwõ ranhe-ta. Ha upé rire katu xe re'ýi e'ŷ-pe aipytygwõ-ta ave. Mitâgwe katu nhamongaru ranhe. Nanhamombói jagwa-pe mitâ remi'urã, he'i joty Hesu itantea-vy, ojekorerovia uka etese-vy kunha-pe.

²⁷ —Akói-ramima ngatu, xe Járy, he'i kunha Hesu-pe. —Ha tembi'u surukwe ijáry apyka gwy-py ho'u joty jagwa, he'i Hesu-rehe ojerovia joty-vy.

²⁸ Upe-ma ramo he'i,

—Nde kunha, erejerovia tee-ma ra'e xe-rehe, he'i íxupe. —Oiko-ta voi nde-vy gwarã ne remimbota, he'i kunha-pe.
Upe-ma ramo okwera porã imemby.

Hesu ombogwera gwera heta hasy va'e-pe

²⁹ Upe-gwi oho Hesu ohasa oho-vy Galiléia yugwarusu rembe'y-rupi. Upéi ojeupi vyvatty ári oho-vy ogwapy hagwã oĩ-vy.

³⁰ Ogwahẽ oje'óí-vy ijaty jaty va'e kente iha-py. Heta hasy va'e reraha-vy ogwahẽ oje'óí-vy hikwái. Oĩ ijyva mbaraete e'ŷ va'e, oĩ ogwata e'ŷ va'e, oĩ hesapyo e'ŷ va'e, oĩ onhe'ënge'ŷ va'e, oĩ heta mba'asy oiporu va'e ave. Peteĩ teĩ hasy va'e pya'e ombogwejy imoĩ-vy ipy renonde-py. Ombogwerapa-ma íxupe kwéry.

³¹ Upe ramo ohendu inhe'ënge'ŷ va'e onhe'ë porã-ma. Ohexa onhemaxuka va'e onhemoatyrõ-ma. Ohexa ogwata e'ŷ va'e ogwata porã-ma. Ohexa hesapyo e'ŷ va'e hesapyo porã-ma ave. Upe va'e kwéry rexava-vy,

—Mba'éixa ombogwera? he'i opondera eterei-vy. —Nhandejáry, Israelita kwéry Járy tuvixa mba'e voi, he'i omomba'egwasu-vy Nhandejáry-pe.

Hesu omongaru jevy ijaty va'e kente-pe

(Mc 8.1-10)

³² Ha upéi katu ohenói Hesu gwemimbo'e kwéry-pe ou jevy hagwã oha-py:
—Peju katu xe ha-py, he'i. —Ijaty jaty va'e kente iporiahu va'e xe-vy. Mbohapy áry xe moirũ okwa-vy. Ndogwerekói ave gwemi'urã. Upéa-gwi aiporiahuvereko íxupe kwéry. Amondo ramo íxupe kwéry peteĩ teĩ hóga kwéry-rupi ivare'apa rehevè, naipyatâvèi arã tape-rupi, ikangy arã tape-rupi oje'óí-vy, he'i gwemimbo'e kwéry-pe.

³³ Upe ramo hemimbo'e kwéry he'i íxupe:

—Mba'éixa-ta mora'ë nhahembi'u me'ë ko'ây ijaty jaty va'e kente kwéry-pe?
A-rupi ndaipóri voi kente tembi'u me'ëharã, he'i íxupe hikwái.

³⁴ —Mbovy tipo ererekö mbojape? he'i oporandu-vy gwemimbo'e-pe.

—Sete voi, he'i. —Oĩ ave ndahetáí pira'i ka'ë, he'i íxupe.

³⁵ Upéi ha'e he'i ojogweroaty va'e-pe ogwapy hagwã kapi'ipe ári:

—Pegwapy gwapy katu kapi'ipe ári, he'i íxupe kwéry.

³⁶ Upe rire oipyhy upe sete mbojape pira'i rehevè. Otima porã hese Nhandejáry-pe. Omboete rire, ombopo mbopóy ime'ë-vy gwemimbo'e kwéry-pe. Upéi ha'e kwéry ome'ë ho'u va'erã-pe.

³⁷ Upéixa enterove okaru. Hygwyatâ porãmba-ma hikwái. Upéi hemimbo'e kwéry omono'õ hembyre opyta va'ekwe ombooru sete ajakagwasu-py.

³⁸ Ha okaru va'e heta eterei voi. Oĩ irundy mil kwimba'e okaru va'e. Heta kunha okaru ave. Heta mitâgwe okaru ave.

³⁹ Upéi he'i:

—Tapeho jevy katu, tapeho jevy katu peteĩ teĩ pende róga-rupi, he'i ijaty va'e kente kwéry-pe.

Ha upe rire katu ha'e onhembooru kanoagwasu-py y-rupi oho hagwã. Magadã jerekwe-py oho.

1 Ha upéi katu ogwahē ou-vy Hesu ha-py fariseu kwéry saduceu kwéry ndive. Ombojejavyse-vy mo'ā íxupe ou hikwái:

—Hexapyrā-rupi ejapo katu ore-vy. Nhandejáry rembiapo porā ramigwa ejapo katu ore mbojerovia uka porā-vy, he'i Hesu-pe otantea-vy íxupe.

2 Ha Hesu he'i oporandu va'e-pe:

—Ka'aru ete ramo, aragwaju-ma ramo, “Aragwaju-ma ra'e” peje, “Ndoky mo'āiry ra'e” peje arā áry-rehe.

3 Ha ko'ëmba-ma ramo, “Aragwaju-ma ra'e, araigwe-ma ave ra'e. Upéa-gwi oky-tama ra'e” peje ave arā áry-rehe. Aipo ramo, áry-rehe pema'ẽ ramo, peikwaa-ma oikotaha. Ha xe rembiapo porā porā rexā-vy, ndapehexa kwaái xe-rehe. Mbava'e-rehe po he'ise xe rembiapo porā ndapeikwaái voi. Nhandejáry rembiaporā ndapeikwaáiry ave.

4 Peē ãy peiko va'e pende reko vai-ma. Ome tee-pe oheja va'e-rami, gwembireko tee-gwi opoi va'e-rami ave peē peiko. Peē pejehesa rerova rova Nhandejáry-gwi. Pejere jere íxugwi. Upéa-gwi pejerure jahexa e'ŷ va'erā-rehe. Ha ndahexa uka mo'āi peē-my upeixagwa. Ha Jonas amyrī rehewa nhe'ē upe ojehu íxupe va'ekwe katu peikwaa voi. Hexapyrā-rupi íxupe ojehu hagwe-rami ave, ojehu va'erā xe-vy. Upe va'erā anho mante ahexa uka va'erā peē-my, he'i hembiaporā-rehe oporandu va'e-pe.

Upéi katu Hesu oheja íxupe kwéry oho-vy.

*Judeu ruvixa remimombe'u rehewa nhe'ē
(Mc 8.14-21)*

5 Ha upéi katu oho yugwarusu rovái gwemimbo'e kwéry ndive. Gwemi'urā-rehe naimandu'avéi-ma hikwái, Hesu ndive oje'ói-vy.

6 Upe javé he'i Hesu:

—Xáke! Penhangareko porā katu pendéjehe. Ivai voi upe mbojape mbovuha fariseu saduceu ave rembiporu, he'i fariseu kwéry remimombe'u vaikwe joko-vy.

Upéa he'i gwemimbo'e kwéry-pe pono fariseu kwéry ohekombo'e vai íxupe kwéry.

7 Ha mbava'e-rehe po he'ise Hesu ndokwaái voi. Upéa-gwi,

—Nanhane mbojapéi-gwi nipo omombe'u ra'e upéa nhande-vy, he'i mo'ā ojóupe onhonhe'ēngendu-vy hikwái.

8 Ha Hesu oikwaa onhomongeta ramo:

—Ma'erā po, “Nanhane mbojapevéi-ma” peje penhonhe'ēngendu-vy? Mixí vyteri pejerovia xe-rehe peiko-vy ra'e, he'i íxupe kwéry.

9 —Ne'irā vyteri pehexa kwaá-ma xe-rehe. Ne'irā vyteri pejerovia tee xe-rehe. Napene akā porāi voi. Upe cinco mil kwimba'e-pe ambopopóy kuri cinco mbojape ame'ẽ hagwā. Upe rire mbovy ajaka-py pemboyrú hembyre? Napene mandu'avéi-ma tipo? he'i upe va'ekwe-rehe. —Ma'erā tipo napene mandu'avéi-ma hese? he'i.

10 —Ha upe rire katu upe irundy mil kwimba'e-pe ambopopóy sete mbojape ame'ẽ hagwā. Upéi mbovy ajakagwasu-py pemboyrú hembyre? Napene mandu'avéi-ma tipo? he'i upe va'ekwe-rehe. —Ma'erā tipo napene mandu'avéi-ma hese? he'i ndojeroviá-gwi hese hikwái.

11 —Mbojape rehewa nhe'ē namombe'úi kuri peē-my. Mbojape mbovuha ae katu fariseu kwéry saduceu kwéry ndive rembiporu amombe'u kuri peē-my. Xáke íxugwi. Mbava'e-rehe po ha'eze, ma'erā po ndapeikwaái? he'i gwemimbo'e kwéry-pe.

12 Upe ramo ipaha-py, mbava'e-rehe po he'ise, oikwaa porā-ma hemimbo'e:

—“Xáke mbojape mbouhuha-gwi” nde'i teéiry Hesu. Ndaha'éiry mbojape mbouhuha tee-rehe he'i Hesu, he'i. —“Xáke pono pene mboheko vai fariseu kwéry saduceu kwéry ndive” he'ise ae nhande-vy Hesu, he'i ojóupe Hesu nhe'ẽ kwaa-vy.

Atýra-py Pedro omombe'u Hesu rehewa nhe'ẽ. “Nde ko Cristo” he'i íxupe omombe'u-vy

(Mc 8.27-30; Lc 9.18-21)

¹³ Ha upéi katu ohasa oho-vy Hesu. Cesaréia de Filipe tetã jerekwe-rupi oho. Upe-py oporandu gwemimbo'e kwéry-pe:

—Mbava'e tipo he'i ra'e xe-rehe, Nhande Ryke'y tee va'e-rehe? he'i oporandu-vy.

¹⁴ —Nane mombe'u porãiry. Ne mombe'u joavy avy kuri, he'i. —“João Batista onhemingoje jevy va'ekwe ra'e ko upe va'e” oĩ he'i va'e nde-rehe. “Elias onhemingoje jevy va'ekwe ra'e ko upe va'e” oĩ he'i va'e upéixa nde-rehe. “Jeremias onhemingoje jevy va'ekwe ra'e ko upe va'e” oĩ he'i va'e nde-rehe. “Outro Nhandejáry nhe'ẽ-py omombe'u va'ety oikove jevy va'ekwe ra'e ko upe va'e” oĩ nde-rehe he'i va'e, he'i íxupe hemimbo'e kwéry omombe'u-vy.

¹⁵ —Ha peẽ ae katu, mbava'e tipo peje xe-rehe? he'i oporandu-vy.

¹⁶ —Nde ko Cristo, Nhandejáry rembiporavo va'e, Nhandejáry tee ra'y voi nde, he'i íxupe Simão Pedro.

¹⁷ —Nde Simão Jonas ra'y. Nde rerovy'a eterei-ma Nhandejáry, he'i Pedro-pe. —Ndaxe kwaa ukái nde-vy teko rei. Ha xe Ru yváy pygwa va'e ae katu xe kwaa uka-ma nde-vy.

¹⁸ Nde Pedro. Nde réry-rehe ita he'i. Nde reko ita-rami. Xe mombe'u porã-gwi ita-rami erenhemombaraete. Ñy, nde-rami heta nde rapykwerigwa onhemombaraete va'erã xe mombe'u porã ramo. Nde xe mombe'uha-rami ave, ha'e kwéry xe mombe'u porã ramo, xe-rehe ojerovia va'erã, amoingo va'erã xe re'yi ramo. Xe re'yi kwéry omano ramo jepe, ndaipu'akái va'erã hese anhaygwasu.

¹⁹ Xe nhe'ẽ-py eremombe'u va'erã Nhandejáry nhande ruvixarã rehewa nhe'ẽ. Eremombe'u ramo, oĩ xe rerovia va'erã. Oĩ xe rerovia e'ŷ va'erã. Okẽ-rehe onhangareko mbaraete va'e-rami erepyta va'erã. “Ipy'a potĩ-ma” ere ramo nde rapixa-rehe, Nhandejáry ave he'i ave va'erã hese: “Ipy'a potĩ-ma” he'i ave va'erã hese. Ogwahẽ va'erã Nhandejáry ha-py. Ha “Ipy'a ky'a joty” ere ramo nde rapixa-rehe, Nhandejáry ave he'i ave va'erã, “Ipy'a ky'a” he'i ave va'erã. Nogwahẽ mo'ãi va'erã Nhandejáry ha-py. Ipokatu va'erã voi ne nhe'ẽ, he'i Pedro-pe Hesu omombe'u-vy.

²⁰ Upéi he'i gwemimbo'e kwéry-pe:

—Ñy katu aníke xe mombe'u teĩ kuri. “Cristo, nhane remiha'arõ va'e voi upe va'e” ani peje teĩ kuri xe-rehe avave-pe, he'i onhemombe'use e'ŷ-vy.

Hesu omomb'eu ojejukaharã rehewa nhe'ẽ, onhemingoje jevyharã rehewa nhe'ẽ ave

(Mc 8.31-9.1; Lc 9.22-27)

²¹ Upéa he'i rire, omombe'u jevy jevy gwemimbo'e kwéry-pe ojéupe ojehu va'erã oikwaa uka-vy:

—Nhandejáry nhe'ẽ-py aha-ta Jerusalém tetã-my. Upe-py xe mbohasa asy va'erã gwĩ judeu ruvixa kwéry, pa'i ruvixa kwéry ndive. Gwĩ judeu rekombo'ehaty xe mbohasa asy va'erã. Xe juka uka va'erã. Ha mbohapy áry rire katu, anhemingoje jevy-ma va'erã, he'i gwemimbo'e kwéry-pe ojéupe ojehu va'erã oikwaa uka porã-vy íxupe kwéry.

22 Ha Pedro katu ogwenohē-ma ha'e anho ha-py hakate'ŷ-gwi:
—Tane resende katu Nhandejáry, he'i íxupe. —Koixagwa ndojehu mo'āi va'erā nde-vy, xe Járy, he'i onhe'ẽ joko-vy íxupe.

23 Ojere-ma Hesu:
—Ejei xe ypy-gwi, he'i Pedro-pe, Satanás-py ohenói-vy íxupe. —Anháy ruvixa Satanás nhe'ẽ-py xe rekombo'e vaise mo'ā ereiko-vy, he'i íxupe. —Ereipota mo'ā xe ajere Nhandejáry rape-gwi, he'i. —Nhandejáry remimbota nde ndereipotái. Teko rei remimbota ae erejohu porā, he'i íxupe.

24 Upe ramo he'i gwemimbo'e kwéry-pe:
—Peē xe moirūse ramo, anive pejapo rei teĩ pejapose va'e anho mante. Anive pepena teĩ pende rekove-rehe. Xe moirū ae katu peē. Okurusugwasu ohupi heraha-vy va'e-rami ijukapyrā-rami ae katu peiko.

25 —Ha gwekove-rehe hakate'ŷ va'e katu, ndoikove mo'āi Nhandejáry ndive. Ha xe-rehe ha-py gwekove-rehe nahakate'ŷiry va'e oikove meme va'erā Nhandejáry ndive.*

26 Nde para'e ko yvy apy gwive járy ramo ereiko va'erā. Ha Nhandejáry ndive ereiko e'ŷ ramo katu, mba'evete ndererekói va'erā. Opa ete-ma va'erā. Nhandejáry ndive ereiko e'ŷ ramo, nande reko repyvéi-ma va'erā. Nderetopái va'erā nde rekove repryrá. Eremano joty va'erā, he'i.

27 —Xe Nhande Ryke'y tee va'e amano rire aju jevy va'erā. Upe áry-py xe Ru rendy pype-ma aju va'erā. Ipu'akaha reheve aju jevy va'erā. Xe rembigwái marangatu yváy pygwa ndive aju jevy va'erā. Petei teĩ yvypóry kente kwéry-pe hembiapo apokwe-rehe areko va'erā.

28 Anhete ko xe ha'e-ta peē-my. Xe Nhande Ryke'y tee va'e aju jevy va'erā peē-my pende ruvixara. Ha oĩ ãy gwí pene pa'ũ-my xe rexá joty va'erā, xe aju jevy ramo. Xe rexá e'ŷ reheve nomano mo'āi. Xe rexá rire ae mante omamo va'erā, he'i gwemimbo'e kwéry-pe Hesu.

17

*Moisés amyrī Elias amyrī ndive ojereropyahu va'e rehegwa nhe'ẽ
(Mc 9.2-13; Lc 9.28-36)*

1 Seis áry rire, mbohapy ogweraha gwupive Hesu. Pedro, Tiago tyvýry João ndive ogweraha. Ha'e kwéry anho ogwerojeupi heraha-vy yvyatyrusu-rehe.

2 Upéi mbohapygwa resa-py ojehete rekoviārō-ma Hesu. Kwarahy rendy-ramima ave hendy hova. Ijao rembipepa-ma ave.

3 Upe-ma ramo ojekwaa ave mokõive Hesu ndive onhomongeta oĩ-vy ramo. Moisés amyrī ndive ojekwaa Elias amyrī.

4 Ohexa ramo, he'i Pedro:

—Iporā nhande nhaime a-py, ore Járy, he'i Hesu-pe. —Ereipota ramo xe ajapo, ajapo-ta mbohapy tapýi, petei va'e nde-vy gwarā, petei va'e Moisés pegwarā, petei va'e Elias pegwarā ave, he'i íxupe Pedro.

5 Onhe'ẽ vyteri javé, tatatī hesakā va'e ramigwa voi omo'ā-ma íxupe kwéry. Tatatī hesakā va'e pa'ũ-gwi ohendu-ma onhe'ẽ va'e:

—Ko va'e xe ra'y, xe rembihayhu va'e, he'i. —Arovya porā voi íxupe. Ejeapysaka katu inhe'ẽ-rehe, he'i Hesu-rehe tatatī hesakā ramigwa pa'ũ-gwi onhe'ẽ va'e.

6 Upe va'e nhe'ẽ ohendu ramo, mbohapy hemimbo'e onhemondýi eterei. Ojeity-ma. Ovapy-py ho'a oho-vy, onhemondýi eterei-gwi.

7 Ha Hesu opoko joty hese:

* **16:25** Mt 10.38-39; Lc 14.27; Gl 5.24

—Epu'ã jevy katu, he'i. —Anive erekhyje teĩ, he'i ovapy-py ho'a va'ekwe-pe.

⁸ Onheakãrupi jevy ramo, avave ndohexáiry. Hesu-pe anho mante ohexa.

⁹ Upéi ogwejy jevy ou-vy yvyaty-gwi. Ogwejy jave he'i:

—Anive eremombe'u teĩ ne rembiexagwe avave-pe, he'i. —Ha upe rire katu xe Nhande Ryke'y tee va'e amano rire, aikove jevy rire ae katu, emombe'u katu ne rembiexagwe, he'i íxupe kwéry omanda-vy.

¹⁰ Upéi oporandu íxupe hikwái:

—Jahexa kuri Elias oikove jevy ramo. Aipo ramo, ma'erã po he'i judeu rekombo'ehaty, “Toikove jevy ranhe ou-vy Elias Cristo renonde-rupi” he'i Hesu-pe.

¹¹ Upéi he'i Hesu íxupe kwéry:

—Ha'e-ma ngatu. Anhetegwa omombe'u hese judeu rekombo'ehaty. “Ou ranhe va'erã voi Elias” he'i, “omoatyrõmba hagwã” nde'i reíry hikwái.

¹² Ha ha'e-ta peẽ-my. Ou-ma va'ekwe Elias. Ojapose va'e rei, ojapo hese kuri, ndohexakwaáiry hese-gwi. Upéixa ete ave arã xe-rehe xe Nhande Ryke'y tee va'e-rehe ojapose va'e rei ojapo va'erã, he'i Elias rehewa nhe'ẽ oikwaa ukavy íxupe kwéry.

¹³ Upe ramo:

—João Batista-rehe nipo onhe'ẽ ra'e, he'i Hesu-rehe hikwái.

Hesu ipu'aka anháy-rehe imosẽ-vy

(Mc 9.14-29; Lc 9.37-43a)

¹⁴ Ogwahẽ jevy ou-vy ramo ijaty jaty va'e kente ha-py, oho onhesũ gwe-typy'ã-rehe Hesu rovagwy-py:

¹⁵ —Ndikatúi pa ereiporiahuvereko xe ra'y-pe, xe Járy? he'i. —He'o'ã o'ã va'e oiko asy voi. Oime ha-py rei ho'a. Tata-rupi y-py ave ho'a oho-vy.

¹⁶ Aru teĩ kuri íxupe ne remimbo'e ha-py. Ha ndikatúi ombogwera íxupe, he'i íxupe túvy.

¹⁷ Upéi he'i Hesu upe pygwa-pe:

—Peẽ xe-rehe pejerovia e'ỹ va'e, pene akã hatã va'e. Xe ae katu ndaxe are mo'ãi pene ndive. Ndoroipokwaa are mo'ãvéri-ma. Eru katu xe ha-py hasy va'e, he'i upe pygwa kwéry-pe.

¹⁸ Ogweru rire, oja'o anháy-pe imondo hagwã. Ha anháy katu osẽ íxugwi oho-vy. Upe-ma ramo okwera porã-ma hasy va'ekwe.

¹⁹ Ha upéi katu upe hemimbo'e ombogwerase mo'ã va'ekwe, oporandu nhemi Hesu-pe ha'e anho oho ha-py:

—Ma'erã-gwi po ndore pu'akáí anháy-rehe oromosẽ hagwã íxugwi imondo-vy, he'i íxupe

²⁰ Ha Hesu he'i:

—Peẽ katu ndapejerovia teéiry xe-rehe peiko-vy. Anhetegwa amombe'u-ta peẽ-my. Oĩ temitý ra'ỹi mixí eterei va'e voi mostarda héry va'e. Upe temitý ra'ỹi mixí va'e-rami, mixí jepe xe rerovia tee ramo, imbaraete joty va'erã ne nhe'ẽ. Ere va'erã ko yvyatygwasu-pe: “Ejei katu outro henda-py tereho” ere ramo, ojepa'a va'erã. Ipokatu voi va'erã ne nhe'ẽ mbaraete-vy, he'i íxupe.

²¹ —Nde ae rei ramo, nosẽi va'erã anháy. Nande pu'akáí va'erã hese. Ha Nhandejáry-pe ne nhe'ẽ eremondo mondo ramo, erekaru e'ỹ rehewe erehasa ramo ave, upéixa ramo nde pu'aka arã hese. Eremosẽ va'erã imondo-vy, he'i gwemimbo'e-pe Hesu omombe'u-vy.

Hesu omombe'u jevy ojéupe ojehu va'erã rehewa nhe'ẽ

(Mc 9.30-32; Lc 9.43b-45)

²² Ha hemimbo'e kwéry katu ojogweroatypa jevy peteī henda-py. Galiléia yvy-py ojehe'a jevy ojóehe. Upe ramo he'i íxupe kwéry Hesu:

—Xe Nhande Ryke'y tee va'e xe me'ẽ va'erã xe reraha-vy. Xe-rehe ija'e'ŷ va'e po-py xe me'ẽ va'erã.

²³ Upe rire xe juka uka va'erã. Xe juka rire, mbohapy áry ohasa jevy rire katu, xe moingove jevy-ma va'erã Nhandejáry, he'i íxupe kwéry Hesu.

Upéa ohendu ramo, ipy'a reraha, ipy'a nhemondýi. Ndovy'avéi hemimbo'e kwéry.

Hesu opaga imposto

²⁴ Ha upéi katu Hesu gwemimbo'e kwéry ndive ogwahē oho-vy Cafarnaum tetā-my. Upe-py ogwahē ramo, oho Pedro ha-py oporombopaga va'ety:

—Ne mbo'eháry ndopagái tipo imposto Nhandejáry róga kakwaa pegwarā? he'i Pedro-pe hikwái oporandu-vy.

²⁵ —Ome'ẽ-ta voi, he'i íxupe.

Koty-py oike jevy ramo, Hesu he'i ranhe íxupe:

—Kiva'e va'e-pe he'i ko yvy arigwa mburuvixagwasu va'e, “Peme'ẽ xe-vy imposto?” Gwe'ýi kwéry-pe pa ojerure ra'e? Gwe'ýi e'ŷ-pe pa ojerure ra'e? he'i Pedro-pe oporandu-vy.

²⁶ —Gwe'ýi e'ŷ-pe mante ojerure, he'i Pedro.

—Aipo ramo, he'i Hesu. —“Peme'ẽ katu” nde'íry gwa'ýry-pe. Xe Nhandejáry ra'y. “Eme'ẽ katu” nde'íry xe-vy xe Ru, he'i.

²⁷ —Ha “Hesu ndopagái imposto, nopenái ra'e Nhandejáry róga-rehe” ndaiptái he'i ra'e xe-rehe. Upéa-gwi ekwa tereho yugwarusu-py. Eity nde pinda erenohē hagwā pira. Erenohē ypy va'e eipyhy pira ejurupe'a. Ijuru-py erejohu-ta peteī itaendy plata. Eraha ereme'ẽ hagwā oporombopaga va'e-pe. Xe-rehe, nde-rehe ave eme'ẽ íxupe, he'i Pedro-pe Hesu.

18

Hesu omombe'u onhemboeteve va'erã rehewa nhe'ẽ

(Mc 9.33-37; Lc 9.46-48; Fp 2.3-7; 1 Pe 5.5-6)

¹ Upe ramo ogwahē ou-vy Hesu ha-py hemimbo'e kwéry:

—Nhandejáry nhande ruvixarã-pe omoirū tee va'e gwive pa'ũ-my, kiva'e-pe tipo nhambotuvixave va'erã? he'i oporandu-vy íxupe hikwái.

² Upéi ohenói mitā-pe ou hagwā. Omoī gwemimbo'e kwéry rovagwy-py omombe'u hagwā hesegwa nhe'ẽ:

³ —Amombe'u-ta peẽ-my anhetegwa. Ha peẽ penhemboete ukase ramo mo'ã, napemoirū mo'ãi va'erã Nhandejáry pende ruvixarã-pe. Ha pende rekoha perova ranhe ramo, mitā-rami pende reko pemomirī peiko-vy ramo ae katu, pemoirū-ma va'erã Nhandejáry-pe.

⁴ Upe onhemomirīve va'e katu, ko mitā-rami oiko va'e katu ave, upéa ko omboeteve va'erã íxupe Nhandejáry oiko ha-rupi nhande ruvixarã.

⁵ Xe réry-py pemogwahē ramo koixagwa, ko mitā-rami oiko va'e gwive, xe-vy xe mogwahē va'erã ave, he'i gwī onhemboete ukase mo'ã va'e-pe.

Hesu omombe'u nhane mbojejavy ukase va'e rehewa nhe'ẽ

(Mc 9.42-48; Lc 17.1-2)

⁶ Upéi he'i jevy Hesu:

—Pejeapysaka katu xe nhe'ẽ-rehe, he'i. —Ko mitā-rami oiko va'e, heko mirī va'e, xe-rehe ojerovia va'e ave, oĩ ohesa rerova uka va'erã xéhegwí ombojejavy uka-vy. Hekoha vai eterei upe va'e. Iporã arã ra'e jajuka hagwā ombo'e vai e'ŷ ngatu. Iporãve arã ra'e nhanhapytī itagwasu ijaju'y-rehe ra'e.

Iporāve arā ra'e nhamombo ygwasu-py ombo'e vai e'ŷ ngatu. Iporāve voi ko ra'e omano ranhe ra'e ombo'e vai e'ŷ ngatu pono xe-rehe ojeroviase va'e-pe ombo'e vaipa rei.

⁷ —Ojekwaa va'erā ou-vy nhane mbojejavy ukase va'e. Ha inhe'ẽ renduharā-pe katu, amboasy eterei. Ha nhane mbojejavy ukase va'e-pe katu amboasy eterei ave hembiapo vairā-rehe.

⁸ Xáke, penhangareko katu pendéjehe. Nde po-gwi para'e erejejavu ramo, nde py-gwi para'e erejejavu ramo, ejahya katu nde po, ejahya katu nde py ave eremombo-vy. Peteī ipo e'ŷ va'e rekoha-rami eiko. Peteī nde py e'ŷ va'e rekoha-rami ave eiko. Iporāve nde posogwe, ne karē ave, eregwahē hagwā ereho-vy Nhandejáry oiko haty-py. Ha ne mombo ramo tata opa opa rei e'ŷ va'e-py katu mokōi nde po reheve, mokōi nde py reheve ave, ivaive arā nde-vy. Nde poriahu ete va'erā.

⁹ Ha nde resa ne mbojejavy ukase ramo, enohē katu nde resa emombo ndéhegwi. Peteī nde resa e'ŷ va'e rekoha-rami eiko. Iporāve peteī nde resa reheve eregwahē ereho-vy Nhandejáry oiko haty-py. Ne mombo ramo tata opa opa rei e'ŷ va'e-py mokōi nde resa reheve, ivaive arā nde-vy.

¹⁰ Penhangareko porā katu pendéjehe. Oī hekoha porā va'e heko'ive va'e. Ha peē katu aníke pemboete e'ŷ teī íxupe. Nhandejáry rembigwái yváy pygwa va'e onhangareko va'e hese. Xe Ru rovagwy-py oī upe inhangarekoha. Upéa-gwi ani pemboete e'ŷ teī heko'ive va'e-pe.

¹¹ Xe ave Nhande Ryke'y tee va'e, okanhy va'ekwe aresende hagwā ajekwaa aju-vy va'ekwe. Upéa-gwi aníke pemboete e'ŷ teī upe mitā-rami hekomirīve va'e-pe, he'i gwemimbo'e kwéry-pe Hesu.

Ovexa okanhy va'ekwe

rehegwa nhe'ẽ

(Lc 15.3-7)

¹² Upéi Hesu omombe'u arandu rehegwa nhe'ẽ ovexa rehegwa nhe'ẽ-rami oiporu:

—Oī va'ekwe heta hymba ovexa va'e. Cem gwymba-rehe onhangareko oiko-vy. Upéi peteī okanhy ramo íxugwi, kóixa ojapo va'erā para'e, he'i. — Oheja va'erā upe noventa e nove okanhy e'ŷ va'e. Yvyatyrusu-py oheja va'erā mombyryve ryve oho arā oheka heka hagwā okanhy va'ekwe.

¹³ Ojohu-ma ramo, ov'y'a eterei gwymba-rehe, “Ajohu-ma peteī okanhy va'ekwe ajohu-ma upe okanhy va'ekwe” he'i. Heta okanhy e'ŷ va'e kwéry-rehe ov'y'a joty. Ha upe peteī okanhy va'ekwe-rehe, ojohu jevy-ma va'ekwe-rehe ov'y'a etereive voi oiko-vy.

¹⁴ Upéixa ete pende Ru yváy pygwa ndoipotái ni peteī mitā-rami ne'írā oikwaa vyteri va'e, heko mirī va'e, okanhy íxugwi mombyry oho-vy, he'i gwemimbo'e kwéry-pe Hesu.

Nhanhomboaty haty-py nhande rekoha rehegwa nhe'ẽ

(Lc 17.3-4; Gl 6.1)

¹⁵ Upéi he'i jevy Hesu:

—Ha nde rapixa, xe-rehe ojerovia va'e, hembiapo vai ramo nde-rehe, ne anho tereho kuri iha-py. Ekwa ha'e anho oiko ha-py, eikwaa uka katu íxupe katu nde-rehe hembiapo vaikwe. Ne rendu ramo, erenhombojoja jevy-ma ra'e.

¹⁶ —Ha nde-vy anho nane renduséi ramo, eraha kuri ne irū nde rupive peteī, mokōi para'e. Upéixa mokōi va'e, mbohapy va'e resa-py ojekwaa porā-ma va'erā ojehu va'erā gwive.

17 Ha peẽ mbohapygwa napene renduséi ramo ave katu, emombe'u Hesu reroviaha-pe onhomboaty aty haty-py. Ha upe va'e kwéry-pe nohenduséi ramo ave katu, anive eremboete teĩ íxupe. Onhomboete e'ŷ va'e-rami erekó íxupe, nhande kwéry e'ŷ-rami. Plata-py oporombopaga va'ety-rami rei joty erekó íxupe.

18 Amombe'u-ta peẽ-my anhetegwa va'e. Penhomboaty haty-py ipokatu va'erã pene nhe'ẽ. "Ipy'a potĩ-ma" peje ramo pende rapixa-rehe, Nhandejáry ave he'i ave va'erã hese, "Ipy'a potĩ-ma" he'i ave va'erã hese. Ha, "Ipy'a ky'a joty" peje ramo nde rapixa-rehe, Nhandejáry ave he'i ave va'erã, "Ipy'a ky'a" he'i ave va'erã. Ipokatu va'erã voi pene nhe'ẽ.

19 Anhete ko xe ha'e-ta peẽ-my. Ko yvy-py peẽ mokõi va'e penhomboaty ramo, perojoja ramo oração apo-vy, ome'ẽ va'erã peẽ-my pene rembigerure xe Ru yváy pygwa.

20 Xe réry-py erenhomboaty ramo, peẽ mokõi va'e para'e, peẽ mbohapy va'e para'e, upe-py ete pene pa'ũ-my aime va'erã xe ave, he'i Hesu mba'éixa jaiko nhanhomboaty aty haty-py omombe'u-vy.

*Tembigwái hekoha vai va'e rehewa nhe'ẽ
(Mt 6.14; Lc 17.3-4; Ef 4.32; Cl 3.13)*

21 Upe ramo onhemô'agwíve ou-vy Hesu ypy-py Pedro. He'i íxupe:
—Xe re'yí xe-rehe hembiapo vai ramo, iporã pa aiporiahuverekori kori joty íxupe? Sete vése peve pa aiporiahuvereko va'erã íxupe? he'i Hesu-pe Pedro oporandu-vy.

22 Ha Hesu he'i:

—Sete vése anho peve nome'ẽi arã. Sete vése setenta vése peve ae katu eiporiahuverekori kori katu íxupe, he'i. —Nde-rehe hembiapo vairi iri ramo jepe, eiporiahuvereko meme meme joty katu íxupe, he'i Pedro-pe Hesu.

23 Upéi he'i jevy:

—Upéa-rehe amombe'u-ta peẽ-my arandu rehewa nhe'ẽ mburuvixagwasu oporoporiahuvereko va'ety rehewa nhe'ẽ poru-vy. Oĩ mburuvixagwasu, oĩ ave hembigwái kwéry oreve va'e. Ijáry oipota ombohekvia jevy íxupe oreve va'e repy. Upe mburuvixagwasu he'i Nhandejáry nhande ruvixa-rehe.

24 Ohenói rire gwembigwái upe mburuvixagwasu, ou ijáry ha-py peteĩ hembigwái heta eterei oreve va'e, heta milhões oreve va'e.

25 “Erereve va'e repy eme'ẽ katu xe-vy” he'i gwembigwái-pe. Ha ndogwerekói-gwi ndikatúi ome'ẽ. Upe-ma ramo he'i hese ijáry outro gwembigwái-pe: “Eraha katu erekende hagwã entero ha'e ae ogwereko va'e gwive. Hem-bireko, ta'ýry, tajýry, ha'e ave evende katu. Upéi eru katu xe-vy upe ne remivende va'ekwe repykwe” he'i hese ijáry.

26 Upe-ma ramo upe hembigwái heta eterei oreve va'e onhesú gwetypy'ã-rehe ojáry rovagwy-py. “Aníke nde poxy teĩ xe-vy. Áy ndikatúiry apaga nde-vy. Emoĩ katu xe-vy araka'e pa aju-ta apagapa hagwã nde-vy” he'i ojáry-pe.

27 —Upéi ijáry oiporiahuvereko-ma íxupe. Ohexakwaa rei-ma íxupe. Ireveha oheja rei. Nombopagáí íxupe oiporiahuvereko-gwi íxupe.

28 Osẽ rire ojáry ha-gwi, upe hembigwái otopa oirũ mix̃imi plata-rehe oreve va'e íxupe. Ojyryvirunga íxupe, ombovava vava íxupe ijaju'y-rehe omoingo asy-vy. “Eme'ẽ mani katu, eme'ẽ mani katu erereveha repy” he'i oirũ-pe.

29 —Upe-ma ramo gwetypy'ã-rehe onhesú upe hembigwái rovagwy-py: “Aníke nde poxy teĩ xe-vy. Ani erejapura eterei teĩ. Apagapa arã voi ko nde-vy” he'i oirũ-pe.

30 Ha ndoiporiahuverekovéi-ma íxupe. Omoĩ uka preso opagaha óra peve.

³¹ Ha outro hembigwái kwéry katu hexaháry voi. Omboasy eterei hembi-apokwe. Oho omombe'u ojáry-pe entéro ojapo va'ekwe.

³² —Ha upe rire katu ijáry ohenói jevy upe gwembigwái-pe. “Tou katu” he'i. “Nde rekoha vai voi ko nde ra'e” he'i íxupe. “Orohexakwaa-ma kuri erejerure-gwi xe-vy. Norombopaga ukáiry nde reveha repy gwive.

³³ Ma'erã po ndereiporiahuverekói ne irũ-pe oroiportiahuvereko hagwera-mi?” he'i upe gwembigwái-pe.

³⁴ Upéa-gwi ipoxy íxupe ogwereko asy-vy. “Emoĩ íxupe preso. Embopaga uka íxupe eremoingo asy-vy, enterove oreve va'e gwive opaga hagwã” he'i hese ijáry.

³⁵ Upéixa ave pende rerekó asy va'erã xe Ru yváy pygwa va'e. Nde re'ýi nde py'a gwive ereiporiahuvereko e'ý ramo, peẽ-my ave pende rerekó asy va'erã, he'i Hesu arandu rehewa nhe'ẽ omombe'u-vy.

19

Omenda va'e rehewa nhe'ẽ

(Mt 5.31-32; Mc 10.1-12; Lc 16.18; 1 Co 7.10-11)

¹ Heta nhe'ẽ porã porã omombe'u Hesu ha upe rire katu osẽ oho-vy Galiléia yvy-gwi, ohasa ysyry Jordão rovái. Judéia yvy-py oho.

² Upe-py heta eterei ijaty va'e oho hapykwéri. Oavyte-py ogweraha Hesupe. Ha hasy va'e kwéry-pe katu ombogwera joto oho-vy.

³ Upe-py oĩ ave fariseu va'e. Ogewahẽ ou-vy iha-py. Omonhe'ëavyse mo'ã Hesu-pe. Upéa-gwi oporandu íxupe:

—Omenda va'ekwe opoi rei ramo gwembireko-gwi, oiko joto tipo tekoharupi, he'i omonhe'ëavyse mo'ã-vy Hesu-pe.

⁴⁻⁵ Ha Hesu he'i:

—Nhandejáry nhe'ẽ he'i a-rami:

“Yma ete va'ekwe kwimba'e ypy-pe ndive ojapo-ma ave kunha ypy. Upéa-gwi kwimba'e oheja va'erã gwu-pe osy-pe ave gwembireko oirûrã omoirû teeharã ndive omenda hagwã. Mokõi va'e-rami ndoikovéi-ma. Peteíxa ae onhomoirû-ma oiko-vy va'erã”*

he'i Nhandejáry kwaitia nhe'ẽ. Ma'erã napemonhe'ẽi upéa rehewa kwaitia nhe'ẽ peikwaa porã hagwã, oikwaa uka porã hagwã peẽ-my.

⁶ Nhandejáry kwaitia nhe'ẽ he'i hagwe-rami jaikwaa omenda va'ekwe rekoha. Ndoikovéi ha'e anho rei. Peteíxa ae hekoha. Upéa-gwi tomomboi uka e'ý katu teko rei Nhandejáry remimbojehe'a, he'i fariseu kwéry-pe.

⁷ Ha'e kwéry katu he'i joto omonhe'ëavyse-vy mo'ã íxupe:

—Aipo ramo, ma'erã he'i va'ekwe Moisés amyrí: “Erepoise ramo ne rembireko-gwi, ehai ranhe kwaitia-rehe ereikwaa ukapa hagwã. Upéi eme'ẽ íxupe kwaitia erepoi hagwã íxugwi” he'i va'ekwe Moisés amyrí. Ma'erã he'i va'ekwe yma gware upéa? he'i Hesu-pe oporandu-vy.

⁸ Ha Hesu he'i:

—Pende py'a ratã-gwi naphehenduséiry nhe'ẽ. Upéa-gwi Moisés amyrí he'i va'ekwe peẽ-my pepoi hagwã pene rembireko-gwi. Ha ojejapo hagwe áry-py kunha ypy kwimba'e ypy ndive katu, gwĩ omoirû va'ekwe Nhandejáry nde'íry voi va'ekwe opoi poi hagwã, he'i.

⁹ —Ha'e-ta peẽ-my: Gwembireko-gwi opoi rei va'e omenda jevy ramo, onhemongy'a va'erã, ojapo vai va'erã gwembirekokwe-rehe. Ha kwimba'e ambue ndive ae hembireko oiko va'e, gwembireko ojapo vai hese-gwi ae opoi

* 19:4-5 Gn 2.24

va'e katu, nonhemongy'ái va'erã, ndojapo vaíry gwembirekokwe-rehe, he'i omenda va'ekwe-rehe.

10 Upe ramo he'i íxupe hemimbo'e kwéry:

—Aipo ramo, naiporãi-gwi japoí nhane rembireko-gwi, iporãve para'e nhande nhamenda e'ý jaiko-vy nhane anho rei jaiko, he'i íxupe.

11 Ha Hesu he'i íxupe:

—Nda'éiry upéixa, he'i. —Nda'éiry enterove va'e-pe omenda e'ý hagwã. Gwĩ Nhandejáry oipota omenda e'ý va'e-pe ae, upéa-pe aipo ha'e. Ndaha'éiry enterove va'e-pe rei ha'e.

12 —Napeteíxairy omenda e'ý va'e. Oĩ oiko ypy ramo nahesãiry va'e. Nomendáiry. Ndaha'éiry omendasere'ý-gwi. Oĩ omenda e'ý va'e ikatu e'ý va'e. Oĩ ave omenda e'ý va'e nomendaséi-gwi. Hetea'e a'e omba'apo hagwã Nhandejáry nhande ruvixa-pe. Upéa-gwi nomendaséiry. Tomenda e'ý oiko-vy omendase e'ý va'e, he'i omenda e'ý va'e-rehe.

Mitã kwéry rehewa nhe'ẽ

(Mc 10.13-16; Lc 18.15-17)

13 Upe ramo ojereru okwa-vy Hesu renda-py mitã opo omoõ hagwã hese, ojapo hagwã oração hese. Ha hemimbo'e kwéry katu:

—Togweru e'ý katu mitã, he'i ojoko-vy mo'ã íxupe.

14 Ha Hesu he'i:

—Ani pejoko teĩ mitã ou va'erã. Tou katu xe renda-py, he'i joty Hesu. —Ha'e-ta peẽ-my: Kente kwéry onhemboete ukase rei va'e nomoirũi-ma va'erã Nhandejáry gwuvixarã-pe. Ha gwĩ onhembotuvixase e'ý va'e, mitã-rami hekomirĩve va'e ae, omoirũ-ma va'erã Nhandejáry gwuvixarã-pe. Upéa-gwi ani pejoko teĩ mitã ou va'erã, he'i mitã-rehe oikwaa uka-vy kiva'e po omoirũ-ta Nhandejáry-pe.

15 Upéi mitã-rehe opo omoõ rire, osẽ oho-vy.

Karia'y imba'e reta va'e

rehewa nhe'ẽ

(Mc 10.17-31; Lc 18.18-30)

16 Peteĩ óra-py ogwahẽ ou-vy Hesu ha-py karia'y imba'e reta va'e:

—Mbo'eháry, he'i Hesu-pe, —Mba'eixagwa ajapo-ta iporã va'e aikove hagwã Nhandejáry ndive apave'ý reheve, he'i Hesu-pe oporandu-vy.

17 —Ma'erã ereporandu xe-rehe iporã va'e-rehe, he'i. —Nhandejáry ha'e anho mante hekoha porã tee va'e. Nhandejáry ndive ereikove memese ramo, eiko katu Nhandejáry remimombe'ukwe nde rekorã-rupi, he'i upe imba'e reta va'e-pe Hesu.

18 —Heta hemimombe'ukwe. Mbava'e va'e xe ajapo-ta? he'i Hesu-pe oporandu-vy.

Upe i Hesu íxupe:

—“Ani ereporojuka teĩ. Ani eremoingo ambue mbue teĩ. Ani eremonda teĩ. Ani nde apu rei teĩ nde rapixa-rehe.”*

19 Emboete ae katu nde ru nde sy ave. Ehayhu rei katu nde rapixa-pe ave nde rekove erehayhuha-rami”**

he'i upe imba'e reta va'e-pe Hesu.

20 —Upéa nhe'ẽ namokanhýi ahendupa aiko-vy, he'i Hesu-pe upe karia'y. —Kiva'e nhe'ẽ ajapove-ta? he'i oporandu-vy Hesu-pe.

21 —Peteĩ anho nderejapói nde reko agwyje hagwã, he'i íxupe. —Nde reko agwyjese ramo, eraha ranhe evendepa erereko va'e. Upe rire katu eme'ẽmba

* 19:18 Ex 20.13-16 * 19:19 Ex 20.12; Lv 19.18

hepykwe iporiahu va'e kwéry-pe. Nde reko agwyje-ma va'erã, he'i íxupe. — Hetave oĩ va'erã nde-vy gwarã yváy-py. Ha upe rire katu eju xe moirũ, he'i upé karia'y imba'e reta va'e-pe.

²² Upéa nhe'ẽ ohendu ramo, ndovy'avéi oho-vy. Heta mba'e porã porã ogwerekó-gwi, ojepy'a reraha oho-vy. Imytu'e'ŷ-gwi om̄ba'e kwéry-rehe ojepy'a reraha oho-vy.

²³ Upe ramo he'i Hesu gwemimbo'e kwéry-pe:

—Amombe'u-ta peẽ-my anhetegwa va'e. Imba'e reta va'e hasy peve om̄oirũ va'erã Nhandejáry gwuvixarã-pe.

²⁴ —Amombe'u jevy-ta peẽ-my: Hasy eterei nhambohasa ka'ijugwasu kwarupi mymbagwasu cameló. Ha hasyve voi gwĩ imba'e reta-rehe ojerovia va'e om̄oirũ hagwã Nhandejáry nhande ruvixa-pe, he'i gwemimbo'e kwéry-pe.

²⁵ Ha ha'e kwéry katu onhemondýi eterei-ma upéa ohendu ramo.

—Aipo ramo, kiva'e nipo onheresende va'erã, kiva'e nipo onheresende va'erã. Avave nonheresende mo'âi arã ra'e, he'i ojóupe.

²⁶ Ha ha'e katu osareko reko oĩ-vy hese kwéry:

—Ojéhegwi rei nonheresendéi arã avave. Nhandejáry ha'e anho mante oĩ ne resendeharã. Ha'e opamba'e rerekó kwaaha voi, he'i gwemimbo'e kwéry-pe.

²⁷ Upe ramo he'i Pedro:

—Upe imba'e reta va'e, mba'eve voi novendéiry ne moirũ hagwã-rehe, he'i. —Ha ore katu opamba'e oroheja oromoirũ hagwã. Mbava'e tipo ombohekovicia va'erã ore-vy? he'i íxupe Pedro oporandu-vy.

²⁸ —Anhetegwa va'e amombe'u-ta peẽ-my, he'i. —Peẽ xe moirũ va'e ame'ẽ va'erã peẽ-my gwarã. Upe Nhandejáry ombopyahupa omoatyrõmbaha áry-py, xe Nhande Ryke'y tee va'e agwapy va'erã Nhandejáry ogwapy haty-rehe. Pe apyka resaupa hesakã va'e ári agwapy va'erã enterove areko hagwã hembi-apokwe pokwe-rehe. Upe áry-py peẽ ave pegwapy va'erã mburuvixa ogwapy haty-rehe doze apyka ári pegwapy ave va'erã perekó hagwã hembiapokwe pokwe-rehe Israel re'ýi kwéry doze tetã tetã-rupi oiko va'e-pe.

²⁹ Áy ha'e-ta enterove va'e-pe: Xe-rehe ha-py nde róga pygwa ereheja ramo, ombohekovicia va'erã nde-vy ne rembiejare. Xe moirũ hagwã nde ryke'y ereheja ramo, nde ryvy ereheja ramo, ne reindy ereheja ramo, nde ryke ereheja ramo, nde kypy'ýry ereheja ramo, nde kyvy ereheja ramo, nde ru ereheja ramo, nde sy ereheja ramo, nde ra'y, nde rajy ereheja ramo, ne memby ereheja ramo, nde yvy ereheja ramo ave xe moirũ hagwã, ombohekoviariõ va'erã nde-vy ne rembiejare-rehe. Nde rexakwaa rei jevy va'erã. Hetave arã ome'ẽ va'erã nde-vy. Peteñ ereheja va'ekwe rekovicia ome'ẽ va'erã nde-vy cem peve, he'i. —Ereikove meme va'erã Nhandejáry ndive erepave'ŷ reheve.

³⁰ Heta oĩ ãy onhemboeteve va'e. Ha upe rire katu ndatuvixa mba'éiry va'erã Nhandejáry-pe. Heta oĩ ãy onhemboete e'ŷ va'e. Ha upe rire katu tuvixa mba'e va'erã Nhandejáry-pe, he'i gwemimbo'e kwéry-pe Hesu.

20

Hesu omombe'u Nhandejáry nhande ruvixa rehewa nhe'ẽ uvaty járy rehewa nhe'ẽ-rami

¹ “Heta oĩ ãy onhemboete e'ŷ va'e. Ha upe rire katu tuvixa mba'e va'erã Nhandejáry-pe” he'i kuri Hesu. Upéa nhe'ẽ kwaa uka-vy gwemimbo'e kwéry-pe omombe'u íxupe arandu rehewa nhe'ẽ uvaty járy rehewa nhe'ẽ ramí:

—Oĩ va'ekwe uvaty járy, ha'e oporomomba'apo va'ekwe. Upe uvaty járy he'i Nhandejáry nhande ruvixa-rehe. Voi osẽ oho-vy oheka om̄ba'apo va'erã uvaty-py.

² —Otopa ramo: “Peteĩ áry ne rembiapo repy ame'ẽ-ta nde-vy” he'i omba'apo va'erã-pe. Inhe'ẽ omoporã rire, “Tapeho pemba'apo xe uvaty-py” he'i.

³ Ha upéi katu asaje ramo osẽ jevy oho-vy ijáry. Praça-py omba'apose va'e omomba'apoharã-pe oha'arõ haty-py oho ramo, ohexa omba'apo e'ŷ va'e.

⁴ “Peẽ ave tapeho pemba'apo xe uvaty-py” he'i, “Ne rembiapo repy ame'ẽ va'erã nde-vy” he'i omba'apo va'erã-pe. Inhe'ẽ-py oho omba'apo.

⁵ Upéi larose osẽ jevy oho-vy. Otopa jevy ramo nomomba'apói íxupe va'e, omba'apo e'ŷ va'e, “Pemba'apo” he'i. “Ne rembiapo repy ame'ẽ va'erã nde-vy” he'i íxupe. Upéi ka'arugwasu osẽ jevy oho-vy. Otopa jevy ramo nomomba'apói íxupe va'e-pe, “Pemba'apo” he'i jevy íxupe kwéry.

⁶ Upéi ka'aru ete osẽ jevy oho-vy otopa jevy omba'apo e'ŷ va'e, onhembo'y oĩ va'e-pe: “Ma'erã tipo penhembo'y rei peĩ-vy a-py ka'aru peve? Ma'erã tipo napemba'apói?” he'i íxupe kwéry oporandu-vy.

⁷ “Noromba'apói nore momba'aposéi-gwi” he'i uvaty járy-pe. “Aipo ramo, peẽ ave iporã peho pemba'apo xe uvaty-py” he'i omba'apo va'erã-pe.

⁸ Ka'aru pytū-ma jave, ijáry he'i gwembigwái-pe: “Ehenói omba'apo va'e kwéry-pe ou hagwã. Eme'ẽ peteĩ teĩ-pe hembiapokwe repy. Gwĩ ka'aru ae omba'apo va'e-pe, eme'ẽ ranhe íxupe. Ha upe rire katu eme'ẽ gwĩ voi gwive omba'apo va'e kwéry-pe” he'i gwembigwái-pe.

⁹ Ou ramo gwĩ ka'aru eteve omba'apo va'ekwe ome'ẽ íxupe peteĩ áry hembiapo repy.

¹⁰ Upéi ou ave gwĩ voi gwive omba'apo va'ekwe: “Ome'ẽve-ta nhande-vy” he'i mo'ã ojéupe. Ha ambue kwéry-pe ome'ẽha-rami ave ome'ẽ íxupe. Peteĩ áry hembiapo repy ae ome'ẽ íxupe.

¹¹ Ome'ẽ ramo, “Ma'erã po ambue kwéry-pe ereme'ẽha-rami ave ore-vy ereme'ẽ?” he'i ojáry-pe.

¹² “Gwĩ ka'aru ete omba'apo va'ekwe sapy'a ete omba'apo. Mixĩ mante omba'apo. Ma'erã po ore-vy ereme'ẽha-rami ave ereme'ẽ íxupe?” he'i. “Ore kwéry katu ore kane'õ-ma oromba'apo-vy. Kwarahy hakugwasu-rupi oromba'apo. Voi gwive ka'aru ete peve oromb'apo” he'i. “Ma'erã po hetave nereme'ẽi ore-vy? Ka'aru ae omba'apo va'e-gwi ore oroganave va'erãgwe” he'i ijáry-pe.

¹³ “Xe rapixa” he'i. “Ndajapo vaíry nde-rehe” he'i. “Peteĩ áry ne rembiapo repy ame'ẽ-ta nde-vy, ha'e ramo, eremoporã-ma kuri xe nhe'ẽ.

¹⁴ Eraha ne rembiapokwe repy tereho. Nde-vy ame'ẽha-rami ave ame'ẽse gwĩ ka'aru ete ae omba'apo va'ekwe-pe” he'i.

¹⁵ “Ndaipóri xe jokoharã xe ame'ẽse va'e ame'ẽ va'erã. Aiporiahuvereko kuri gwĩ ka'aru ete ae omba'apo va'ekwe-pe. Upéa-gwi nande a'éiry nipo ra'e xe-rehe” he'i omba'apo va'e-pe ijáry.

¹⁶ Upéixa ete heta oĩ ãy onhemboete uka e'ŷ ete oiko va'e. Ha upe rire katu tuvixa mba'e va'erã Nhandedjáry-pe. Heta oĩ ãy onhemboete ukaseve va'e. Ha upe rire katu natuvixa mba'éiry voi va'erã Nhandedjáry-pe, he'i gwemimbo'e kwéry-pe Hesu.

Hesu omombe'u jevy omanotaha (Mc 10.32-34; Lc 18.31-34)

¹⁷ Ha upéi katu Hesu ojeupi upi oho-vy. Jerusalém tetã-my ogwahẽ hagwã oho-vy. Ogwata jave ogwenohẽ gwĩ doze gwemimbo'e. Te'ýi jusu avyte-gwi íxupe kwéry anho ogwenohẽ omombe'u hagwã ojéupe oiko-ta va'e:

¹⁸ —Pejeapysaka katu, he'i. —Jaha jaiko-vy Jerusalém tetã-my. Upe-py xe Nhande Ryke'y tee va'e xe pyhy va'erã xe me'ẽ hagwã pa'i ruvixa kwéry-pe,

judeu rekombo'ehaty kwéry-pe ave. Upe-py, "Iporã eremano" he'i va'erã xevy.

¹⁹ Upéi xe me'ẽ va'erã nhande kwéry e'ŷ va'e-pe xe-rehe onhembohory hagwã, xe mbopi hagwã, xe juka hagwã kurusugwasu-rehe xe rupi-vy, he'i. —Ha upe rire katu mbohapy áry rire anhemoingove jevy-ma va'erã, he'i gwemimbo'e kwéry anho-pe onhemombe'u-vy.

Kunha rembíjerure

2 rehewa nhe'ẽ

(Mc 10.35-45)

²⁰ Upe ramo ogwahẽ ou-vy Hesu renda-py Zebedeu ra'y sy. Tiago João ndive ou isy. Onhesũ íxupe gwetypy'ã-rehe ombo'a'e jerure hagwã:

²¹ —Mbava'e tipo ereipota? he'i kunha-pe.

—Ne nhe'ẽ-py togwapy nde yke-rehe joja xe memby. Erejehexa uka ramo nhande ruvixa ramo, togwapy nde yke-rehe peteĩ nde akatúa-koty. Peteĩ nde asu-koty ave togwapy, he'i Hesu-pe ombotuvixa ukaseve-vy mo'ã omemby.

²² Upéi ha'e he'i:

—Ndapeikwaái pene rembíjerure-rehe, he'i. —Xe mbohasa asy hagwã-rami ave, pehasa asy-ta para'e, he'i oporandu-vy Zebedeu ra'y Tiago João ndive-pe.

—Ha'e voi, he'i. —Ne ndive ore orohasa asyse, he'i íxupe.

²³ —Néi, he'i. —Xe mbohasa asy hagwã-rami ave, pehasa asy va'erã voi, he'i mokõigwa-pe. —Ha xe Ru nde'íry apombogwapy hagwã xe yke-rehe joja. Ha'e ae ombogwapyse va'e ae, ombogwapy va'erã xe yke-rehe. Ajehexa uka ramo nhande ruvixa ramo, ha'e ae ombogwapyse va'e ombogwapy arã xe yke-rehe, he'i mokõigwa-pe.

²⁴ Ha hemimbo'e ojerure e'ŷ va'e katu oĩ dez. Ohendu-ma ramo onhembotuvixaseve mo'ã va'e-pe ogweropoxy voi. Tyvýry reheve Tiago-rehe ipoxy hikwái.

²⁵ Ha Hesu katu he'i:

—Peju katu xe ha-py, he'i entéro gwemimbo'e kwéry-pe. —Peikwaa voi judeu e'ŷ kwéry rekoha, Nhandejáry kwaa e'ŷha rekoha. Huvixa kwéry omanda voi hese oiko-vy. Ipu'aka voi hese gwĩ onhemboete va'e.

²⁶ —Upe va'e rekoha-rupi xe ndaiptái peiko. Pende rekorã a-rami. Erenhembotuvixa mba'e ukaseve ramo, eiko katu nde rapixa rembigwái ramo.

²⁷ Erenhemboete ukaseve ramo, erejejokwái va'e-rami eiko, he'i. —Nde rerekoseha-rupi voi eiko.

²⁸ Xe ave Nhande Ryke'y tee va'e jepe ndajúi va'ekwe xe rembigwái heta heta ajohu hagwã. Aju ae va'ekwe tembigwái-rami aiko hagwã. Ajejuka uka hagwã aju va'ekwe heta aresende va'erã-rehe, he'i gwemimbo'e kwéry-pe Hesu.*

Hesu ombogwera mokõi hesapyo e'ŷ va'e-pe

(Mc 10.46-52; Lc 18.35-43)

²⁹ Osẽ javé Jericó tetã-gwi, heta te'ýi jusu avyte-py oho Hesu.

³⁰ Upe-py tapegwasu rembe-py ogwapy oĩ-vy mokõi hesapyo e'ŷ va'e:

—Hesu ko ra'e ohasa tape-rehe —oĩ he'i va'e íxupe.

Upéa nhe'ẽ ohendu ramo he'i:

—Ore poriahuverekó katu, Davi remiarirõre. Ore poriahuverekó katu, he'i onhe'ẽ hatã-vy Hesu-pe.

³¹ —Pekirirõmba katu, he'i íxupe ijaty va'e inhe'ẽ joko-vy. Ha ha'e ae katu onhe'ẽ hatã-vy:

—Mbo'eháry, Davi remiarirõre, ore poriahuverekó katu, he'i Hesu-pe.

* **20:28** Lc 22.25-27

³² Upe-ma ramo optya Hesu. Ohenói ou hagwā:
—Mbava'e tipo ereipota xe ajapo hagwā nde-rehe? oporandu hesapyo e'ŷ va'e-pe.

³³ —Eipe'a katu ore resa, mbo'eháry, he'i íxupe.

³⁴ Ha'e katu oiporiahuvereko-ma hesapyo e'ŷ va'e-pe. Opo omoī hesarehe. Upe-ma ramo hesapyo jevy-ma hesapyo e'ŷ va'ekwe. Upe rire katu omokambara-ma íxupe tape-rupi iho ramo.

21

Hesu ogwahē oho-vy

*Jerusalém tetā-my
(Mc 11.1-11; Lc 19.28-40; Jo 12.12-19)*

¹ Ha upéi katu Hesu gwemimbo'e kwéry ndive ogwata oho-vy Jerusalém tetā-my. Hi'agwī oī ramo jepetetā íxugwi, nogwahēi joty upe-py oho-vy. Upe ramo ogwahē ranhe oho-vy Bettfagé tetā mirī-my. Yvyaty Oliveiras-py ogwahē ranhe oho-vy. Upe ramo omundo mokōi gwemimbo'e gwenonde-rupi:

² —Tapeho upe tetā mirī-my xe renonde-rupi, he'i. —Upe-py ereike-ma ramo, pya'e eretopa va'erā mburika onhenhapytī va'e. Hendive mburika'i eretopa-ta ave. Ejora eru xe-vy, he'i.

³ —“Ma'erā erejapo upéa?” he'i ramo nde-vy upe pygwa, ere íxupe, “Oiporuta nhande ruvixa. Pya'e ogweruruka jevy-ta nde ha-py.” Upéi ne nhe'ẽ-py pya'e oheja arā peru mokōi xe renagwā, he'i mokōi gwemimbo'e-pe Hesu.

⁴ Upéa he'i oiko hagwā myamyrī Nhandejáry nhe'ẽ-py omombe'u va'ety he'i hagwe-rami. Yma gware nhe'ẽ a-rami he'i:

⁵ “Emombe'u Sião tetā mygwa-pe. Pehexa katu. Ogwahē-ma ou-vy pende ruvixagwasu. Pende ruvixagwasu ramo jepetetā, nonhembotuvixa mba'e ukáiry joty ogwahē ou-vy. Gweko kirirī reheve joty ou. Mburika ári ogwahē ou-vy. Mburika ra'y ári ou”*

he'i yma gware nhe'ẽ. Yma gware remimombe'ukwe-rupi, ãy oiko-ma Hesu.

⁶ Ha upe mokōi hemimbo'e oho ojapo Hesu nhe'ẽ.

⁷ Ogweru jevy mburika ta'ýry reheve. Omoī hi'ári oao. Upéi ojeupi-ma hi'ári Hesu oho-vy.

⁸ Heta oī te'ýi jusu omomba'egwasu va'e íxupe. Omboi mboi oao oipysō hagwā Hesu renda opyrū hagwā-rupi. Oikytī kytī omoī-vy yvy-rupi yvyra rogwe hakā reheve. Yvy-rupi omohasāi imoī-vy.

⁹ Osapukái joa henonde rupigwa. Hapykwerigwa osapukái ave imboete-vy:
—Ereju-ma ra'e Davi remiarirõre ra'e, he'i íxupe. —Oromomba'egwasu voi, he'i íxupe. —Nhandejáry réry-py ra'e eregwahē-ma ereju-vy. Tande rovasa porā katu Nhandejáry. Nhamomba'egwasu katu íxupe, he'i Hesu-pe ijaty va'e kwéry hexa-vy.*

¹⁰ Upéi ogwahē oho-vy Jerusalém tetā-my. Upe-py oike rire, ndaipy'agwapyvái-ma pe tetā mygwa. Ogweronhe'ẽmba rei hikwái oikwaase-vy:

—Kiva'e po ou ra'e, kiva'e po ou ra'e? he'i oporandu randu-vy ojóupe hikwái.

¹¹ —Upéa Hesu pe Nhandejáry nhe'ẽ-py omombe'u va'ety Nazaré da Galiléia gwigwa, he'i hese hikwái hendive ogwahē ou-vy va'e.

*Hesu oike Nhandejáry róga kakwaa-py
(Mc 11.12-26; Lc 19.45-48)*

* 21:5 Zc 9.9 * 21:9 Sl 118.26

12 Upéi oike Hesu Nhandejáry róga kakwaa-py. Upe-gwi omosëmba ombo'evende oï va'e-pe, ombo'ejogwa oï va'e-pe omosë ave imondo-vy. Upe-py oï ave plata ombohekobia va'e hepy-rehe. Ombohekoviapa oiporu jevy va'erã-py. Imba'e renda ombovapy íxugwi kwéry. Ombovapy pykasu járy imba'e renda ave:

13 — “Xe róga xe mboete haty-py héry va'erã oraçao apohaty”* he'i Nhandejáry kватia nhe'ë, he'i. —Ha peẽ katu pemoingo upe-py gwí oporosakea nhemi va'e, he'i Nhandejáry róga kakwaa roka-py ombo'evende va'e kwéry-pe.

14 Ha hesapyo e'ë va'e, ikarë va'e ave katu ojereru íxupe Nhandejáry róga kakwaa-py. Ou ramo, ombogwera gwera íxupe kwéry.

15 Ha pa'i ruvixa kwéry judeu rekombo'ehaty kwéry ndive katu ipoxy íxupe. Hembiapo porã jahexa e'ë va'e ohexa. Nhandejáry róga kakwaa-py mitägwe nhe'ë ohendu:

—Nde Davi remiarirõre voi ore oromboete oroiko-vy, he'i Hesu-pe mitägwe. Upéa nhe'ë ogweropoxo judeu ruvixa kwéry:

16 —Erehendu-ma tipo mitägwe nhe'ë? he'i hikwái oporandu-vy íxupe.

—Ahendu voi mitã nhe'ë, he'i Hesu íxupe kwéry. —He'i Nhandejáry kватia nhe'ë a-rami:

“Erenhemomba'egwasu uka mitägwe-pe. Mitã kambu-pe gwive eren-hemomba'egwasu uka ave” he'i íxupe. “Ne mboete tee voi hikwái”* he'i Nhandejáry kватia nhe'ë. Pemonhe'ë rei upéa nhe'ë ndapeikwaáiry, he'i judeu ruvixa kwéry-pe Hesu.

17 Upéa he'i rire, oheja huvixa kwéry-pe. Osë Jerusalém tetã-gwi oho-vy. Ogwahë oho-vy Betânia tetã mirí-my. Upe-py oke.

*Figo máta rehewa nhe'ë
(Mc 11.12-14,20-24)*

18 Iko'ë-my voi ou jevy Jerusalém tetã-my. Ou jave ovare'a ogweru.

19 Ohexa figo máta tape rembe'y-rehe oï ramo. Oho ohexa hi'a pa ho'u hagwã mo'ã. Ha ogwahë ramo imáta-py, ndahi'áiry íxupe. Hogwe rei oï. Ndaipóri figo. Hesu he'i figo máta-pe:

—Anive nde a, he'i íxupe.

Upe-ma ramo ipirupa-ma voi oho-vy figo.

20 Ohexa ramo, opondera hese ipiru ramo hemimbo'e kwéry:

—Mba'éixa ipiru pya'e ra'e figo máta? he'i ojóupe hikwái.

21 Ha Hesu he'i:

—Anhetegwa va'e amombe'u-ta peẽ-my. Erejerovia tee ramo Nhandejáry-rehe, ererovia ku'a ku'a e'ë rehewe ererovia ramo, kóa figo máta-rehe xe ajapo hagwe-rami ave nde erejapo va'erã, he'i gwemimbo'e kwéry-pe. —Iporâve va'e erejapo va'erã. Eremoï ramo ne nhe'ë upe yvyatyrusu-pe, “Ejeupi enheapymi hagwã ygwasu-py” ere ramo, oiko-ta nde-vy, he'i.*

22 —Oime raë va'e-rehe erejerure ramo oraçao apo-vy, oiko va'erã ave nde-vy erejerovia tee ramo Nhandejáry-rehe, he'i gwemimbo'e kwéry-pe Hesu.

*“Kiva'e nhe'ë-py tipo ereporombo'e?” he'i Hesu-pe oporandu-vy
(Mc 11.27-33; Lc 20.1-8)*

23 Ha upéi katu oike jevy Nhandejáry róga kakwaa-py oporombo'e hagwã. Oporombo'e jave ogwahë ou-vy iha-py pa'i ruvixa kwéry. Gwí judeu ruvixa kwéry ou ave. Hesu rembiapo ndojohu porãi hikwái:

* 21:13 Jr 7.11 * 21:16 Sl 8.2 * 21:21 Mt 17.20

—Kiva'e nhe'ẽ-py tipo ereporombo'e a-rami? he'i íxupe. —“Iporã ereporombo'e a-rami” kiva'e tipo he'i nde-vy ra'e ereporombo'e hagwã a-rami? he'i oporandu-vy Hesu-pe hikwái.

24 Hesu he'i:

—Xe-vy peporanduha-rami ave aporandu-ta peẽ-my xe aikwaase pendéhegwí va'e-rehe, he'i íxupe kwéry Hesu. —Pemombe'u ranhe katu xe-vy peẽ-my aporandu-ta va'e-rehe, he'i íxupe Hesu. Upe rire, xe amombe'u-ta ave peẽ-my kiva'e nhe'ẽ-py pa aporombo'e, he'i íxupe kwéry Hesu.

25 —Ay aporandu ranhe-ta peẽ-my. Kiva'e nhe'ẽ-py oporomongarai araka'e João Batista amyrí? Nhandejáry nhe'ẽ-py para'e? Teko rei nhe'ẽ-py para'e? he'i íxupe kwéry. —Pemombe'u ranhe katu xe-vy, he'i huvixa kwéry-pe.

Ha ha'e kwéry katu ndoikwaáiry onhe'ẽrã Hesu-pe:

—Mbava'e ja'e rei-ta po Hesu-pe? he'i ojóupe oporandu randu-vy hikwái. —Nhandejáry nhe'ẽ-py oporomongarai va'ekwe João, ja'e ramo, “Ma'erã po ndapejeroviái araka'e hese?” he'i arã nhande-vy, he'i ojóupe hikwái.

26 —Ha teko rei nhe'ẽ-py oporomongarai va'ekwe, ja'e ramo katu, nhane mytu'e'ý arã nhandéjehe, he'i ojóupe. —“Pende apu” he'i arã nhande-vy te'ýi jusu. “Nhandejáry nhe'ẽ-py omombe'u va'ety ae katu João” he'i arã. Mbava'e tipo ojapo arã nhande-rehe hikwái? he'i ojóupe huvixa kwéry.

27 Upéa-gwi,

—Ndoroikwaáiry, he'i mo'ã Hesu-pe okyhyje-gwi.

—Aipo ramo, xe-vy napemombe'uiha-rami ave, kiva'e nhe'ẽ-py aporombo'e a-rami, ndaikwaa uka mo'ãi ave peẽ-my, he'i huvixa kwéry-pe Hesu.

Hesu omombe'u arandu rehewa nhe'ẽ mokõi ta'ýry rehewa nhe'ẽ-rami

28 Upéi he'i jevy íxupe kwéry ombo'ese-vy mo'ã:

—Areko peteĩ arandu rehewa nhe'ẽ amombe'u va'erã peẽ-my, he'i íxupe kwéry. —Oí va'ekwe mokõi ta'ýry va'e. Oho ranhe gwa'yrusu ha-py: “Tereho, ke'y, emba'apo etería xe uvaty-py” he'i gwa'yrusu-pe.

29 “Aha-ta xe. Aha-tama xe amba'apo, xe ru” he'i ha ndohóiry.

30 Upéi oho gwa'ymirí ha-py: “Tereho, xiryvy, emba'apo katu etería xe uvaty-py” he'i. Ha xiryvy he'i: “Ndaha mo'ãi” he'i gwu-pe. Ha upe rire katu omboasy onhe'ẽgwe oho-vy xirivy gwu nhe'ẽ apo-vy.

31 —Ay aporandu-ta peẽ-my: Kiva'e ojapo gwu nhe'ẽ? Tyke'ýry para'e? Tyvýry para'e? he'i oporandu-vy íxupe kwéry Hesu.

—Tyvýry ojapo, he'i íxupe.

—Aipo ramo, amombe'u-ta peẽ-my pende rekokwe. Gwĩ naimandu'a porãi hese va'e, nhane mbopaga uka va'ety kwéry, ikwimba'ese va'e kwéry ave omoirũ ranhe-ma Nhandejáry nhande ruvixarã-pe. Ha peẽ katu ne'írã pemoirũ Nhandejáry-pe. Pene renonde voive-ma ha'e kwéry omoirũ-ma íxupe.

32 —Ojekwaa ou-vy va'ekwe João amyrí tape porã oikwaa ukase mo'ã-vy peẽ-my. Ha peẽ ndaperoviáiry joty va'ekwe inhe'ẽ. Ha gwĩ hekoha vai va'e ae ogwerovia inhe'ẽ. Gwĩ nhane mbopaga uka va'ety, gwĩ ikwimba'ese va'e ave katu ogwerovia-ma ave va'ekwe inhe'ẽ. Upéa pehexa ramo jepe, ndaperováí joty va'ekwe pende rekoha. “Anhei ete nipo ra'e” ndapejéiry joty va'ekwe João nhe'ẽgwe-rehe. Ndaperoviáiry joty va'ekwe inhe'ẽ, he'i huvixa kwéry-pe Hesu.

Hesu omombe'u jevy arandu rehewa nhe'ẽ uvaty rehewa-rami

(Mc 12.1-12; Lc 20.9-19)

33 Ha upéi katu omombe'u jevy huvixa kwéry-pe arandu rehewa nhe'ẽ:

—Pejeapysaka katu xe nhe'ẽ-rehe. Amombe'u-ta peẽ-my arandu rehewa nhe'ẽ uvaty rehewa-rami, he'i. —Oĩ va'ekwe heta yvy járy. Ha'e oho onhoty uva ojapo hagwã uvaty. Upéi ogweroajere imboty-vy. Ojo'o itakwa hykwere ryrurã. Omboyvate ojeupi hagwã orepara hagwã. Upéi ijáry oiporuruka ombo'apo va'erã-pe. Hi'aju ramo, oipota omboja'o yva ojéupe. Ha upe rire katu osẽ mombyry oho-vy. Tetã ambue-py oho.

³⁴ —Hi'aju-ma ramo pe yva uva, ombou ivia ramo gwembigwái omboja'o íxupe hagwã mo'ã ombou.

³⁵ Ha uvaty-py ombo'apo va'e katu oipyhy imbouypyre-pe heraha-vy. Peteĩ va'e-pe oinupã. Peteĩ va'e-pe ojuka. Peteĩ va'e-pe ojapi japi ita-py.

³⁶ Hetave-ma ombou ivia ramo. Ha hemimbou ypy ogwereko hagwe-rami ave ogwereko íxupe kwéry.

³⁷ Ha upe rire katu ombou gwa'ýry. “Xe ra'y-pe katu omboete arã” he'i mo'ã ombou-vy.

³⁸ Ha gwĩ uvaty-py ombo'apo va'e ta'ýry ohexa ramo katu, “Upéa uvaty jaryrã voi” he'i hese. “Jaha jajuka íxupe” he'i. “Uvaty-rehe nhanhembojáry arã” he'i ojóupe hikwái.

³⁹ Upéa-gwi oipyhy íxupe. Omboyke uvaty-gwi ojuka.

⁴⁰ Ha upéi katu ogwahẽ jevy ou-vy ramo pe uvaty járy, mba'éixa ojapo-ta hese kwéry? he'i Hesu oporandu-vy.

⁴¹ Ha'e kwéry he'i:

—Ogwahẽ ou-vy ramo, ojuka-ma va'erã katu gwĩ hembiapo vai va'e-pe, he'i. —Upéi ohekoviariõ va'erã outro ombo'apo jevy va'erã. Hi'aju ramo pe yva uva, omboja'o va'erã ime'ẽ-vy yva aju heraha uka hagwã, he'i íxupe huvixa kwéry.

Upéixa Hesu omombe'u judeu ruvixa kwéry rekoha vai uvaty rehewa nhe'ẽ omombe'u-vy.

⁴² Ha upéi katu he'i jevy judeu ruvixa kwéry-pe:

—Pemonhe'ẽ nhe'ẽ teĩ peiko-vy yma gware nhe'ẽ Nhandejáry omoĩ uka va'ekwe kwatia-rehe, ha ndapeikwaáiry, he'i. —Yma gware nhe'ẽ a-rami he'i: “Ndovaléiry, he'i óga apoha ita-rehe. Ha upe ita katu ojohu vai ramo jepe, ojeporuve joty óga pytahoha ramo. Óga jekoha voi upe ita. Upéa Nhandejáry rembiapo porã, ja'e. Jahexa-vy, Iporã porã katu, ja'e Nhandejáry rembiapo-rehe”*

he'i xe-rehe yma gware nhe'ẽ. Ma'erã he'i va'e ndapeikwaáiry ra'e? he'i íxupe kwéry hekokwe mombe'u-vy.

⁴³ Upéi he'i jevy:

—Upéa-gwi ha'e-ta peẽ-my: “Xe moirũ katu pende ruvixarã” nde'ivéi-ma va'erã peẽ-my Nhandejáry. Ha peẽ kwéry e'ŷ va'e-pe katu, “Xe moirũ katu” he'i va'erã Nhandejáry. Ha'e kwéry ae katu ojapo va'erã hemimbota. Ogweroagwyje va'erã inhe'ẽ, he'i huvixa kwéry-pe hekorã mombe'u-vy.

⁴⁴ Upéi oiporu jevy yma gware nhe'ẽ, Nhandejáry omoĩ uka va'ekwe kwatia-rehe. He'i íxupe kwéry:

—“Upe ita-rehe ho'a va'e ojekaray'i va'erã ho'a-vy. Ha upe ita ho'a hese va'e omongu'i va'erã íxupe ho'a ramo hi'ári”

he'i ójehe Hesu huvixa kwéry-pe hekokwe mombe'u-vy.

⁴⁵ Ha pa'i ruvixa kwéry fariseu kwéry ave ohendu Hesu nhe'ẽ. Uvaty rehewa-rami ita rehewa-rami ave arandu rehewa nhe'ẽ ohendu hikwái. Ohendu ramo inhe'ẽ, oikwaa-ma ojehegwa nhe'ẽ hikwái:

—Nhande rehewa nhe'ẽ kuri omombe'u Hesu, he'i he'i ojóupe hikwái.

* **21:42** SI 118.22-23

⁴⁶ Upéa-gwi upe judeu ruvixa oipyhyse mo'ã íxupe. Ha ndoipyhýiry: “Hesu ko Nhandejáry nhe'ẽ-py omombe'u va'ety” he'i hese te'yi jusu. Ikyhyje-gwi, Hesu ndive heta oĩ va'e-pe nombopoxyséi-gwi, ndoipyhýiry íxupe hikwái.

22

Hesu omombe'u arandu rehewa nhe'ẽ jekarugwasu rehewa-rami (Lc 14.15-24)

¹ Ha upéi katu omombe'u jevy judeu ruvixa kwéry-pe. Arandu rehewa nhe'ẽ jekarugwasu rehewa nhe'ẽ-rami omombe'u:

² —Oĩ va'ekwe mburuvixagwasu ta'ýry omenda-ta va'e. Upe mburuvixagwasu he'i Nhandejáry nhande ruvixa-rehe. Ha omenda hagwã ta'ýry he'i ojapo hagwã omenda va'erã-pe jekarugwasu.

³ Upéi omondo gwembigwái gwemienói enóí ohenói ou hagwã: “Peju katu jekarugwasu ajapo ha-py” he'i uka íxupe kwéry. Ha ndouséiry hikwái.

⁴ Upe-ma ramo omondo jevy joto outro gwembigwái ohenói uka-vy. He'i gwembigwái-pe: “Tapeho pemombe'u xe nhe'ẽgwe. Xe jekarugwasu amoimba-ma. Ojuka-ma kuri xe rymba vaka ra'y onhemongyra va'ekwe. Ojapo va'erã gwive ojapopa-ma kuri. Peju katu jekarugwasu ojejapo ha-py, peje kuri pemombe'u gwĩ ou va'erã-pe” he'i gwembigwái-pe imondo-vy.

⁵ Ha hemienói mo'ã katu nopenáí voi inhe'ẽ-rehe ou hagwã. Gwembiapo apo-rupi joto oho hikwái. Peteĩ oho kokwe-py, outro oho omba'e vende hatypy.

⁶ Ha outro kwéry katu oipyhy hembigwái-pe. Onhembohory hese ojuka-vy.

⁷ Ha mburuvixagwasu ogweropoxy eterei-ma upe hembiapo vai vai va'ekwe-rehe. Omondo soldado kwéry hese ogweru hagwã hereko asy uka-vy. Ojuka hagwã gwĩ oporojuka va'ekwe-pe, omondo heko heko ha-rupi ohapy hagwã.

⁸ Ha upéi katu he'i jevy outro gwembigwái-pe: “Oĩmba-ma xe jekarugwasu ha xe remienoikwe xe motí voi” he'i. “Hekoha vai okwa-gwi, ndouí okaru” he'i.

⁹ “Upéa-gwi tapeho tapegwasu gwasu-rupi. Petopa va'e gwive Peru okaru hagwã,” he'i. “Jaha katu jekarugwasu ha-py” peje íxupe kwéry, he'i.

¹⁰ —Inhe'ẽ-py osẽ hembigwái kwéry oho-vy tapegwasu-rehe. Omboaty aty heru-vy otopa va'e gwive ogweru. Hekoha porã va'e, hekoha vai va'e ave ogweru. Jekarugwasu oikoha renda-py omohynyhẽ heru-vy.

¹¹ Upéi mburuvixagwasu oike upe-py hemienoikwe rexav-y. Oĩ peteĩ ou va'e nomondéi ra'e omendaha pygwa ao. Oao ae ra'e omonde ou-vy.

¹² “Xe rapixa” he'i. “Ma'erã po ereike ra'e ko'a-py omendaha pygwa ao e'ỹ reheve?” he'i oporandu-vy íxupe. Mba'eve nde'íry oike rei va'e. Okirirĩ rei oĩ-vy.

¹³ Upe-ma ramo: “Eipokwa eipykwa ave íxupe. Emosẽ íxupe imondo-vy pytũ kwa-py” he'i. “Upe-py ojahe'o va'erã. Nhandejáry-rehe onhemoyrõ-gwi” he'i, “onhemohãingyry ngyrýu va'erã oiko-vy. Hasẽ va'erã onhemboasy-vy” he'i gwembigwái-pe mburuvixagwasu, he'i Hesu arandu rehewa nhe'ẽ mombe'u-vy.

¹⁴ Upe rire he'i:

—Heta va'e-pe, “Xe moirũ katu pende ruvixarã” he'i ramo jepe Nhandejáry, ndahetáiry joto omoirũ va'erã íxupe. Ndahetáiry joto hembiporavo, he'i Hesu Nhandejáry irũ rehewa oikwaa uka-vy.

*Judeu ruvixa omonhe'ẽavyse mo'ã Hesu-pe
(Mc 12.13-17; Lc 20.20-26)*

15 Upe ramo gwī fariseu kwéry onhomboaty oje'óí-vy:
—Mba'éixa nhamonhe'ëavy-ta Hesu-pe jaipyhy uka hagwā íxupe, he'i oporandu randu-vy ojóupe.

16 Upéi ombou iha-py gwemimbo'e mburuvixagwasu Herodes re'ýi ndive:
—Orohexa kwaa-ma voi nde reko apu e'ýha nde-rehe, mbo'eháry. Ne nhe'ë ndojohu porāi ramo jepe, eremombe'u joty anhetegwa voi eremombe'u va'e. Avave-gwi neretíry eremombe'u hagwā. Nhandejáry remimbota eremombe'u voi. Erehexa kwaa voi hekoha enterove-rehe. Upéa-gwi anheihaarupi ne remimombe'u Nhandejáry rape kwaa uka-vy, he'i omboheko jejavy hagwā mo'ã Hesu-pe.

17 —Aipo ramo, iporā para'e nhande, judeu reko-rupi jaiko va'e, japaga nhame'ë-vy mburuvixagwasu César-pe hemimbopaga uka? Iporā para'e japaga e'ý? he'i. —Ne mba'e tipo eremombe'u arā ore-vy upéa-rehe oroikwaa hagwā, he'i íxupe omonhe'ëavyse-vy mo'ã hikwái.

18 Ha ha'e ohexa kwaa hese hekoha vai:
—Peē katu pende py'a ky'aha pemo'ã kwaa va'e, he'i. —Ma'erā xe monhe'ëavyse? he'i.

19 —Pehexa uka xe-vy plata atā mburuvixagwasu remimbopaga uka, he'i huvixa kwéry-pe.

Peteĩ ogweru.

20 —Kiva'e ra'anga pa upé va'e plata atā? Kiva'e ohai uka va'ekwe plata atā-rehe? he'i oporandu-vy íxupe kwéry Hesu.

21 —César ra'anga hembihai uka ave, he'i íxupe hikwái.

Ha Hesu he'i:

—Aipo ramo, César-pe imba'e eme'ë. Ne mbopaga uka ramo, eme'ë jevy íxupe, ijáry-pe. Ha Nhandejáry-pe katu hemimbota eme'ë íxupe, he'i huvixa kwéry-pe Hesu.

22 Upéa ohendu ramo, opondera Hesu nhe'ë-rehe hikwái. Ha ha'e kwéry he'i:

—Hasy va'e-rehe jepe nhaporandu ramo íxupe, omombe'u porā joty nhande-vy, he'i hese opondera-vy hikwái.

Upéi oheja íxupe oje'óí-vy hikwái.

*Saduceu kwéry omonhe'ëavyse mo'ã Hesu-pe
(Mc 12.18-27; Lc 20.27-40)*

23 Upe áry-py ogwahē ou-vy henda-py gwī saduceu kwéry, “Nonhemoin-gove jevýi va'erā gwī omano va'ekwe” he'i va'e. Ou ramo he'i:

24 —Mbo'eháry, he'i Hesu-pe hikwái, —Moisés amyrī omombe'u va'ekwe nhande-vy nhande rekorā. “Kwimba'e omano ramo, oheja ramo gwembirekokwe naimembýi reheve, tomenda jevy tyvýry gwovajare-rehe. Upéixa ramo, Ke'yra'y, he'i va'erā imemby ypy-rehe” he'i nhande-vy va'ekwe Moisés.

25 Oï va'ekwe peteĩ tyke'ýry, seis tyvýry. Tyke'ýry omenda kunha-rehe. Upéi omano ta'ýry e'ý mboyve. Tyvýry omenda gwovajare-rehe.

26 Tyvýry omano ramo, ndaita'ýryi ave. Upéi tyvýry ambue jevy omenda omano jevy ave. Peteĩ teĩ omenda hese gwovajare-rehe. Peteĩ teĩ omano ramo, ndaita'ýry jepéiry.

27 Omanomba rire, upé kunha omano ave.

28 Nhane moingove jevy ramo, kiva'e rembirekorā upé kunha? Gwī sete tyvýry kwéry omenda ra'e hese, he'i Hesu-pe hikwái hasy va'e-rehe oporandu-vy.

29 Upéi Hesu he'i íxupe kwéry:

—Pejavy-ma voi pene nhe'ẽ, he'i. —Nhandejáry nhe'ẽ kwatia-rehe ohai uka va'ekwe peẽ ndapeikwaáiry. Peẽ ndapeikwaái voi ave Nhandejáry opamba'e rerekó kwaaha voi, he'i íxupe kwéry.

³⁰ —Nhane moingove jevyha áry-py, kwimba'e nomendavéi-ma va'erã. Kunha ave nomendavéi-ma va'erã. Oiko va'erã Nhandejáry rembigwái yváy pygwa reko-rupi.

³¹⁻³² Ha Nhandejáry kwatia nhe'ẽ katu omombe'u peẽ-my omano va'ekwe oikove jevymaha:

“Xe katu Nhandejáry, xe Abraão járy, xe Isaque járy, xe Jacó járy ave”* he'i Nhandejáry kwatia nhe'ẽ, omano va'ekwe oikove jevy-ma va'e oikwaa ukaha. Ma'erã ndapeikwaái pemonhe'ẽ nhe'ẽ va'ekwe? Aipo ramo, Nhandejáry ndaha'éi omano va'ekwe járy, tekove járy ae. Ha'e onhemoingove jevy va'e járy, he'i saduceu kwéry-pe nhane moingove jevyha kwaa uka-vy.

³³ Upéa ohendu ramo, te'ýi jusu opondera hese:

—Hasy ete va'e-rehe jepe oporandu ramo Hesu-pe, omombe'u porã joty oporombo'e-vy, he'i hese te'ýi jusu pygwa kwéry.

Peteĩ tekoha mombe'uhaty omonhe'ẽavyse mo'ã Hesu-pe

(Mc 12.28-34; Lc 10.25-28; 1 Jo 5.3; Ap 2.4)

³⁴ Ha upéi katu oĩ fariseu kwéry-pe omombe'u va'e:

—Hesu ndive onhonhe'ẽ mbojevy jevy rire, ndoikwaavéi-ma onhe'ẽrã saduceu kwéry. Okiririmbá-ma, he'i.

Upéa ohendu ramo, ojogweroaty fariseu kwéry ou-vy Hesu renda-py.

³⁵ Fariseu pa'ũ-gwi peteĩ va'e, tekoha mombe'uhaty oporandu Hesu-pe omonhe'ẽavyse-vy:

³⁶ —Mbo'eháry, he'i, —Heta oĩ nhande rekoha nhe'ẽ. Kiva'e tuvixave va'e? he'i oporandu-vy íxupe.

³⁷ Ha Hesu oiporu Nhandejáry kwatia nhe'ẽ. He'i íxupe:

—“Ehayhu tee katu Nhandejáry-pe. Nde py'apy gwive ehayhu íxupe. Ehayhu íxupe nde koty gwive. Ne mandu'a meme katu hese hayhu-vy”* he'i íxupe.

³⁸ —Upéa nhande rekoha tuvixave va'e, nhande rekoha ypyve va'e.

³⁹ Ha upe rire katu oĩ outro tuvixa va'e:

“Ehayhu rei katu nde rapixa-pe nde ae nde rekove erehayhuha-rami”* he'i Hesu Nhandejáry kwatia nhe'ẽ poru-vy.

⁴⁰ —Upe mokõi nhe'ẽ-py ogwenohẽmba Moisés amyrí remimombe'ukwe tekoha rehewa nhe'ẽ, gwĩ Nhandejáry nhe'ẽ-py omombe'u va'ety nhe'ẽ ave. Mokõi nhe'ẽ-py he'ipa, he'i fariseu kwéry-pe Hesu.

Hesu omokirirĩ judeu ruvixa kwéry-pe

(Mc 12.35-37; Lc 20.41-44)

⁴¹ Fariseu avyte-py oĩ javé Hesu, oporandu. He'i:

⁴² —Mbava'e tipo peje ra'e Cristo Nhandejáry rembiporavo va'e-rehe? Kiva'e remiarirõ pa ha'e? he'i oporandu-vy fariseu kwéry-pe.

—Davi amyrí remiarirõre voi, he'i íxupe hikwái.

⁴³ —Aipo ramo, ma'erã po Davi ohenói íxupe xe Járy-py? Nohenói reíry íxupe. Ome'ẽ va'ekwe íxupe inhe'ẽrã Nhe'ẽ Marangatu tee va'e, he'i Hesu. —He'i va'ekwe Davi:

⁴⁴ “Nhandejáry he'i xe Járy-pe, Egwapy katu xe yke-rehe. Xe orombopu'aka va'erã ne a'e'ŷha-rehe. Orombopu'akapa peve eregwapy va'erã erei-vy xe yke-rehe”*

* 22:31-32 Ex 3.6 * 22:37 Dt 6.5 * 22:39 Lv 19.18 * 22:44 Sl 110.1

he'i Davi va'ekwe.

⁴⁵ Upéixa, xe Járy-py ohenói va'ekwe íxupe. Aipo ramo, hemiarirō pa? Ha gwemiarirō-rehe, “Xe Járy” nde'íry, he'i fariseu kwéry-pe Hesu omokirirī-vy.

⁴⁶ Upe ramo, onhe'ẽrā ndoikwaáiry avave. Upe áry rire, ndaipy'agwasuvéima oporandu-vy íxupe avave.

23

Judeu ruvixa kwéry rekoha rehewa nhe'ẽ

(Mc 12.38-39; Lc 11.43-46; 20.45-46)

¹ Ha upéi katu omombe'u jevy Hesu te'ýi jusu-pe. Gwemimbo'e kwéry-pe ave omombe'u jevy hekorā:

² —Gwī judeu rekombo'ehaty kwéry fariseu kwéry ave omombe'u peẽ-my Moisés amyrī remimombe'ukwe. Nhandejáry nhe'ẽ-py omombe'u peẽ-my oiko-vy.

³ Upéa-gwi pehendu inhe'ẽ entéro he'i va'e gwive peẽ-my pejapo katu. Ha ha'e kwéry ae ndojapói peẽ-my he'ihá-rami. Ombo'e mbo'eha-rupi ndoikói. Upéa-gwi inhe'ẽ pehendu ramo jepe, ha'e kwéry ae heko-rupi ani peiko joty katu, he'i.

⁴ —Nhandejáry nhe'ẽ omombe'u rire, hasyve jajapo va'erā nhe'ẽ omombe'u nhande-vy. Jareko asy nhane rymba mba'e ipohýi eterei nhamoï ramo hese. Upéixa ete hasy nhe'ẽ jajapo va'erā omombe'u nhande-vy. Nhane rymba ipohýi va'e ogweraha ramo, nhande ae mba'eve ndajarahái. Nanhaipytygwōiry. Upéixa ete ha'e kwéry nanhane pytygwōiry voi, he'i.

⁵ —Ojehexa uka porā hagwā ojapopa. Osyva-rehe, ojyva-rehe ave ojokwa imoï-vy Nhandejáry nhe'ẽ. Ombotuvixave ojokwa va'ekwe ojehexa porāve hagwā. Ojehexa hagwā ombopuku oao poty.

⁶ —Jekarugwasu-py oho ramo, óga járy yke-rehe ogwapysé onhemboete ukase-vy. Ojeporahéi haty-py oho ramo, mburuvixa kwéry pa'ũ-my ogwapysé.

⁷ Mba'e jogwa haty-py oho ramo, onhemboete ukase-vy oho. Ojererovy'a ukase-vy gwapixa kwéry-pe oho. “Porombo'ehaty” oipota he'i ójehe.

⁸ —Ha peẽ katu ojoe'ýi. Pene mbo'eháry xe voi. Upéa-gwi, “Porombo'ehaty” ndaiapotái peje ojóupe.

⁹ Peteĩ oĩ pende Ru yváy pygwa. Upéa-gwi yvypórý-pe rei, ani peje teĩ, “Nhande Ru”.

¹⁰ Xe Cristo xe anho-ma ngatu pene mbo'eharā. Ndaipóri outro. Upéa-gwi, ani peje teĩ ojóupe, “Xe mbo'eháry” peje.

¹¹ Pene pa'ũ-my erenhembotuvixa mba'e va'e, eiko katu nde rapixa rembgwái ramo.

¹² Upe onhembotuvixa mba'e ukaseve va'e-pe katu nomboetéi va'erā voi Nhandejáry. Ha onhemboete ukasere'ý va'e-pe katu, omboete-ma va'erā voi Nhandejáry, he'i upe pygwa-pe Hesu omombe'u-vy.

Hesu omombe'u judeu ruvixa kwéry-pe omboasyha

(Mc 12.40; Lc 11.39-42,52; 20.47)

¹³ Upe ramo, ojerova oma'ẽ-vy judeu rekombo'ehaty-rehe, fariseu kwéry-rehe ave:

—Apomboasy voi peẽ-my. Pehasa asy va'erā peẽ. Peẽ katu pende py'a ky'aha pemo'ã kwaa. Pejoko omoirūse va'e-pe omoirū e'ý hagwā Nhandejáry gwuvixarā-pe. Peẽ ae napemoirūséi íxupe. Ha imoirūseháry katu ndapeipotái omoirū íxupe. Upéa-gwi pehasa asy va'erā, he'i íxupe kwéry Hesu.

14 —Apomboasy voi peẽ-my. Pende poriahu va'erã. Pehasa asy va'erã peẽ, pende py'a ky'aha pemo'ã kwaa va'e. Tembirekokwe rembiporu pemonda heraha-vy. Upéi pejehexa uka porã hagwã, pene nhe'ẽ mbuku oraçao apo-vy Nhandejáry-pe. Upéa-rehe pene mbohasa asyve va'erã Nhandejáry. Apomboasy voi peẽ-my.

15 —Pehasa asy va'erã peẽ pende py'a ky'aha pemo'ã kwaa va'e. Opa-rupi pegwata peho-vy. Tetã tetã-rupi peho ygwasu-rupi peho ave. Hatã eterei pemba'apo peteĩ judeu e'ŷ va'e ojehesa rerova uka hagwã pendéjehe. Ha upe rire katu ojehesa rerova uka rire, pembohekoha vai íxupe. Upe pemokambara íxupe va'e, pende rekoha vaiha-rami, pembohekoha vaive pendéhegwi. Upéa-gwi oromboasy voi, he'i fariseu kwéry ndive judeu rekombo'ehaty-pe.

Upéi he'i jevy:

16 —Pehasa asy va'erã peẽ. Ndapehexái pene renonderã. Upéixa reheve peporogwerahase joty mo'ã. Ndohexái gwenonderã va'e-rami peiko. Upéixa reheve peporombo'ese mo'ã joty peiko-vy. Peporombo'e avy peiko-vy: “Ajapo-ta xe nhe'ẽ Nhandejáry róga kakwaa réry-py ajapo-ta xe nhe'ẽ, ja'e ramo, ja'e rei. Ndajajapói ramo jepe nhane nhe'ẽ, mba'eve joty ndajajejavýi” peje mo'ã peiko-vy. Ha “Ajapo-ta xe nhe'ẽ Nhandejáry róga pygwa ouro gwigwa réry-py, ja'e ramo katu ndaja'e reíry. Ndikatúiry nhande apu ja'e va'ekwe-rehe. Jajapo-ta mo'ã va'ekwe-rehe, ndajajapói ramo, jajejavý-ma va'erã” peje peporombo'e avy-vy. Ha ha'e-ta peẽ-my: “Nhandejáry róga réry-py” ja'e ramo, “Nhandejáry róga pygwa ouro gwigwa” ja'e ramo ave peteĩxa. Pene remimoĩ mokõi mo'ã, ha xe katu amopeteĩxa joty. Peporombo'e avy voi.

17 Peẽ pene arandu e'ŷ. Ndohexái gwaperã va'e-rami peiko. Ma'erã, “Gwĩ Nhandejáry pygwa ouro gwigwa tuvixa mba'eve Nhandejáry róga-gwi” peje? Ndaha'ei upéixa. Nhandejáry róga kakwaa ae katu omomarangatu gwĩ ouro gwigwa, he'i inharandu e'ŷha kwaa uka-vy íxupe.

18 Upéi he'i jevy:

—A-rami peporombo'e avy peiko-vy: “Oĩ upe apykagwasu hi'ári nhamoka'ẽ haty Nhandejáry mboete-vy, altar héry va'e. Ha'e héry-py ajapo-ta xe nhe'ẽ, ja'e ramo, ja'e rei” peje. “Ha, Ajapo-ta apykagwasu ári Nhandejáry-pe nhane remime'érã réry-py, ja'e ramo katu, ndaja'e reíry. Ndikatúiry nhande apu ja'e va'ekwe-rehe” peje mo'ã, he'i íxupe kwéry.

19 —Pehexa e'ŷ va'e-rami peiko, he'i. —Ma'erã, “Nhane remime'érã tuvixa mba'eve upe apykagwasu-gwi” peje. Ndaha'ei upéixa. Upe apykagwasu ae katu omomarangatu nhane remime'érã hi'ári nhamoĩ va'e, he'i.

20 —Aipo ramo, “Upe apykagwasu kakwaa réry-py ajapo-ta xe nhe'ẽ” peje ramo, “Entéro apyka ári oiko va'e gwive réry-py ajapo-ta xe nhe'ẽ” he'i hagwe-rami ave peje. Ndikatúiry pejapo e'ŷ pene nhe'ẽ. Pene remimoĩ mokõi mo'ã, xe amopeteĩxa joty, he'i.

21 —“Nhandejáry róga réry-py ajapo-ta xe nhe'ẽ” peje ramo, “Nhandejáry róga-py oĩ va'e réry-py ajapo-ta xe nhe'ẽ” he'i hagwe-rami ave peje. Peteĩxa ijoja pene nhe'ẽ. Ndikatúiry pejapo e'ŷ pene nhe'ẽ, he'i.

22 —“Yváy pygwa réry-py ajapo-ta xe nhe'ẽ” peje ramo, “Nhandejáry ogwapy haty réry-py ajapo-ta xe nhe'ẽ” he'i hagwe-rami peje. Upe-py ogwapy Nhandejáry nhande ruvixa. “Nhandejáry réry-py ajapo-ta xe nhe'ẽ” he'i hagwe-rami peje. Peteĩxa ijoja pene nhe'ẽ. Ndikatúiry pejapo e'ŷ pene nhe'ẽ, he'i.

23 Upéi he'i jevy judeu rekombo'ehaty kwéry ndive fariseu kwéry-pe:

—Apomboasy peẽ-my. Pehasa asy va'erã, peẽ pende py'a ky'aha pemo'ã kwaa va'e. Heta oĩ pene remity ikarape va'e. Oĩ hortelã, oĩ erva doce, oĩ cominho. Upéa pene remi'urã ndive pene remimbojehe'arã pembohe

porā hagwā tembi'u. Mixī eterei ramo jepe, dez-gwi peme'ē peteī joty Nhandejáry-pe. Ha Moisés amyrī remimombe'ukwe pende rekoharā tuvixave va'e-rehe katu naapepenái. Imarangatuve va'e-pe napehenduséiry peiko-vy. He'i va'ekwe peē-my pejogwereko porā hagwā, pejoporahuvereko hagwā, pende-rehe ojerovia tee hagwe-rami joty peiko hagwā. Upéa nhe'ē imarangatuve va'e napehenduséiry. Ha'e-ta peē-my: Mixīve va'e-rehe pende resarái e'ŷha-rami ave, pepena katu tuvixave va'e-rehe, he'i.

24 —Ndapehexái pene renonderā. Upéixa reheve peporogwerahase joty mo'ā. Pono mixī va'e reheve hoy'u, trapo-py ombogwa va'e-rami peiko. Ho'u va'erā-gwi oipe'ase va'e-rami peiko. Ha heta hi'upy e'ŷ reheve okaru va'e-rami peiko joty. Mixīve va'e-rehe pepena. Tuvixave va'e-rehe ndapehexáiry. Tuvixave va'e-rehe naapepenáiry, he'i íxupe kwéry Hesu.

25 Upéi he'i jevy gwī judeu rekombo'ehaty kwéry ndive fariseu kwéry-pe:

—Apomboasy peē-my. Pende poriahu va'erā. Pehasa asy va'erā peē pende py'a ky'aha pemo'ā kwaa va'e. Eremopotī porā mo'ā kópo nde prato ave. Ijape rei eremopotī. Ipy pygwa katu neremopotī. Pendejéupe gwarā peipotave tave. Pemonda monda-py pekaru. Upéa-gwi nde kópo nde prato ave ijape rei eremopotī. Ipy pygwa katu naipotī. Ipy-py eremoī eremondapyre.

26 —Ne arandu e'ŷ va'e. Hesapysō e'ŷ va'e-rami nde ereiko. Kópo eipyhéi ranhe. Upéixa hi'ári ipotī ave va'erā. Nde py'a potī ramo, ne rembiapo ave ipotī va'erā, he'i íxupe kwéry.

27 Upéi he'i jevy gwī judeu rekombo'ehaty kwéry-pe, gwī fariseu kwéry-pe ave:

—Apomboasy peē-my. Pehasa asy va'erā peē pende py'a ky'aha pemo'ā kwaa peiko va'e. Oĩ yta onhembojegwa va'ekwe morotī va'e-py. Ijehexa rei iporā ete voi. Ha ipy-py katu hyntyhē oĩ-vy ivai va'e. Omano va'ekwe kāgwe heta oĩ ipy-py.

28 Upéixa ete pende rekoha porā va'e-rami pende jehexa rei. Pende rova-py mba'eve ndaperekói. Pende koty py-py ivai voi. Pejapose va'e rei pejapo, he'i upē judeu ruvixa kwéry-pe.

Hesu omombe'u judeu ruvixa kwéry ohasa asy ete va'erā
(Lc 11.47-51)

29 Upéi he'i jevy gwī judeu rekombo'ehaty ndive fariseu kwéry-pe:

—Apomboasy eterei peē-my. Pehasa asy va'erā peē pende py'a ky'aha pemo'ā kwaa va'e. Pene ramói amyrī ojuka va'ekwe Nhandejáry nhe'ē-py omombe'u va'ety-pe. Heta hekoha porā va'e-pe ojuka ave va'ekwe. Ha ãy katu peē pejapo ikyta pemoī porā hagwā.

30 Peje ave: “Yma jaiko ramo ra'e, nanhamoirūiry arā ra'e nhane ramói amyrī-pe jajuka hagwā Nhandejáry nhe'ē-py omombe'u va'ety-pe” peje pendéjehē.

31 Aipo ramo, pene nhe'ē-py gwī oporojuka va'ekwe remiarirōre voi ra'e peē.

32 Ha'e kwéry hekokwe-rami pende reko vai voi ra'e, he'i. —Aipo ramo, peiko katu hekokwe-rupi, he'i íxupe kwéry.

33 —Peē mbói ipoxy va'e reko-rami peiko va'e. Pende ru reko vai niko mbói-rami. Mombyry ojéhegwí pene mondo va'erā Nhandejáry pende rerekō asy hagwā-py. Ndaiporivéi pene resendeharā.

34 Upéa-rehe ambou va'erā peē-my gwī Nhandejáry nhe'ē-py omombe'u va'ety gwī hi'arandu va'e ave ambou va'erā, he'i. —Gwī porohekombō'e va'ety ambou va'erā ave peē-my. Oĩ gwī pene rembijuka ukarā. Oĩ gwī

kurusugwasu-rehe pene remimořā. Oĩ gwĩ peporahéi haty haty-rupi pene remimbopirā. Upéa tetā tetā-rupi pene remimosē mosērā.

³⁵ Heta oĩ hekoha porā va'ekwe ne ramói amyrī rembia amyrīkwe. Yma gware gwive ãy peve katu ojuka juka joty hekoha porā va'ekwe-pe. Yma ete oiko va'ekwe Abel amyrī. Ipy'a potī va'ekwe ha'e. Ha ojuka ypy íxupe va'ekwe. Upéi katu heta va'e-pema ojuka juka. Baraquias ra'y Zacarias amyrī peve, ojuka juka va'ekwe. Upe Zacarias Nhandejáry kwatia nhe'ẽ-rehe omoři paha-ma va'ekwe. Ha'e ipy'a potī va'e. Ha pene ramói ojuka joty íxupe Nhandejáry róga kakwaa-py. Imarangatu ete va'e ha-py, onhegwahē e'ŷ haty renonde-py, apykagwasu kupe-py, ipa'ũ-my ojuka íxupe.

³⁶ Aipo ramo, anhetegwa va'e amombe'u-ta peě-my, he'i. —Abel amyrī gwive Zacarias amyrī peve ojuka meme hekoha porā va'e-pe. Upe ojejuka hagwe-rehe gwive apogwerekō asy uka va'erā voi peě-my. Pene rembia amyrī-rehe apombohasa asy uka va'erā. Āygwa ohasa asy va'erā entéro yma gwive ojejuka uka va'ekwe-rehe, he'i gwĩ judeu rekombo'ehaty-pe, fariseu kwéry-pe ave.

Hesu omombe'u Jerusalém tetā mygwa-rehe gweko kirirīha

(Lc 13.34-35)

³⁷ Upéi he'i Jerusalém tetā mygwa-pe:

—Apomboasy eterei peě-my. Nhandejáry nhe'ẽ-py omombe'u va'ety pene rembijuka juka voi. Peě-my hemimbou ita-py pene rembiapi api voi. Upéixa pende reko jepe, xe apomboatyse tyse mo'ã joty peě kwéry-pe pene mitāgwe reheve apokwavā kwavāse-vy, he'i. —Yrugwasu ogwero'aha-rami gwa'ýry, apomboatyse mo'ã. Ha napenhekwavā ukaséi joty xe-vy, he'i.

³⁸ —Pene retā peheja va'erā. Pende ro nde róga nandi-rupi oĩ va'erā.

³⁹ Xe ha'e-tama ãy peě-my. Ndaxe rexā mo'ãvēi-ma ãy. Ha upe rire katu xe aju jevy ramo, “Nhandejáry réry-py eregwahē-ma ereju-vy. Tande rovasa porā katu Nhandejáry” peje va'erā. Upe áry-py xe rexā jevy va'erā peě, he'i Jerusalém tetā mygwa-pe Hesu.

24

Ohasa asy va'erā rehewa nhe'ẽ

(Mc 13.1-13; Lc 21.5-19)

¹ Ha upéi katu osē oho-vy Hesu Nhandejáry róga kakwaa-gwi. Oho jave ohogwaití ogwahē-vy Hesu-pe hemimbo'e kwéry:

—Ehexa katu óga kakwaa. Heta voi ikoty, he'i íxupe hikwái.

² Ha Hesu he'i:

—Peě ae katu pehexa upéa óga kakwaa, he'i. —Āy oime porā. Ha anhetegwa va'e amombe'u-ta peě-my, he'i. —Ita heta omohāimba va'erā, omosarambipa va'erā. Ndojepota mo'ãvēi ojōehe, he'i gwemimbo'e kwéry-pe.

³ Ha upéi katu oho Hesu Oliveiras yvyaty-py. Hi'ári ogwapy. Ogwapy jave Hesu anho otopa ha-py oho hemimbo'e kwéry, he'i íxupe oporandu-vy:

—Araka'e tipo omohāimba-ta? Araka'e tipo ojehu va'erā ne remimombe'u? he'i oporandu-vy íxupe. —Mba'éixa po oroikwaa va'erā imombe'uháry? Araka'e tipo ereju jevy va'erā? Opa-tama ramo ko yvy, mba'éixa po oroikwaa va'erā imombe'uháry? he'i oporandu-vy íxupe hikwái.

⁴ Upe ramo he'i Hesu:

—Xáke pene mbotavyse va'erā. Ani joty pende tavy íxupe.

⁵ Heta ojekwaa va'erā ou-vy xe réry-py vérami mo'ã ou va'e. “Xe Cristo pene remiha'arõ va'e voi” he'i va'erā mo'ã ójehe peě-my, onhembocristo ra'anga-vy, oporombotavy rei-vy.

⁶ Pehendu va'erā pene pa'ū-rupi onhorairō ramo. Mombyry onhorairō va'e rerakwā pehendu ave va'erā. Pejeapysaka katu xe nhe'ē-rehe. Ani pekyhyje teī upéa-rehe. Upéa oiko va'erā voi. Upéa oiko-ma ramo, ne'írā vyteri ogwahē Nhandejáry nhe'ē apy-py.

⁷ Ha tetā mygwa onhorairō va'erā outro tetā mygwa ndive. Mburuvixag-wasu re'ýi onhorairō va'erā outro mburuvixagwasu re'ýi ndive. Ndaiporivéima va'erā ho'u va'erā. Yvy ryrýi oiko va'erā ave heta renda-py. Opa-rupi ndoiko meméi ramo jepe, oiko va'erā joty, he'i.

⁸ —Upéa-rupi pehasa asy ramo, ne'írā vyteri pehasa asy ete peiko-vy. Kunha imemby-ta va'e hasy íxupe. Ha upe rire katu hasyve syve oho-vy íxupe imemby hagwā. Upéixa ete yvypóry ohasa asy va'erā. Ha upe rire katu ohasa asyve syve oho-vy.

⁹ —Upe ramo pende pyhy va'erā pende rerekko asy hagwā pende juka hagwā. Entéro tetā tetā rupigwa ndaija'éi va'erā pende-rehe. Xéhegwí katu pende rerekko va'erā akói-rami.

¹⁰ Upe-ma ramo heta ova va'erā Nhandejáry rape-gwi, he'i. —Ojopyhy uka va'erā ojóehe ija'e'ý-vy.

¹¹ Ojekwaa va'erā ojéhegwí rei omombe'use rei va'e. "Nhandejáry nhe'ē voi xe remimombe'u" he'i rei va'erā ójehe heko vai ombo'e hagwā. Heta oporombotavy rei va'erā oiko-vy.

¹² Hetave tave rei hekoha vai va'e. Heta hekoha vai oĩ va'e-gwi, hekoha porã va'e jepe, ndojohayhu porâve râvéiry va'erā okwa-vy. Ojohayhu va'e-rami rei ojogwereko va'erā.

¹³ Ha Nhandejáry rape-gwi ova e'ý va'e katu ko yvy opa ete peve, oresende va'erā íxupe Nhandejáry.

¹⁴ Omombe'u ranhe va'erā opa-rupi nhe'ē porã. Nhandejáry nhande ruvixarā rehewa nhe'ē omombe'u ranhe va'erā entéro tetā tetā-rupi oiko-vy, enterove ohendu hagwā. Ha upe rire ae katu omomba ete-ma va'erā ko yvy, he'i.

¹⁵ Upéi oiporu Hesu Nhandejáry kwatia nhe'ē:
—Kwatia-rehe Daniel amyrí remimoígwe a-rami he'i:
"Oĩ va'erā pe ivai ete va'e, pene momarā va'e. Nhandejáry koty py-gwi pene mosẽ va'erā"*

he'i Hesu. Upéa nhe'ē eikwaa porã ãy eremonhe'ē va'e. Upéi he'i Hesu:
—Yma he'i hagwe-rami, pehexa va'erā upe ivai ete va'e, Nhandejáry róga koty-py onhemoi ramo. Imarangatu ete va'e rendagwe-py, teko rei mba'e oĩ e'ý haty-py pehexa va'erā upe ivai ete va'e pene momarāharā.

¹⁶ Pehexa-ma ramo upe va'e, pya'e voi tokanhymba kuri Judéia yvy pygwa kwéry oje'ói-vy. Yvyatygwasu ári-rupi tokanhy kuri oje'ói-vy.

¹⁷ Ogwejy ramo óga ári oĩ va'e, ani oike koty-py ogweraha hagwā mba'eve.

¹⁸ Ha kokwe-py oĩ va'e ani oho jevy ranhe gwóga-py oipyhy hagwā oao. Pya'e ae kuri tokanhymba katu oje'ói-vy, he'i.

¹⁹ —Upéa áry-rupi iporiahu va'erā kunha imemby-ta va'e, omokambu va'e ave. Apomboasy peẽ-my, he'i.

²⁰ —Ro'y eterei-rupi pekanhy ramo, ivaive arã peẽ-my. Upéa-rehe pemoi katu Nhandejáry-pe pene nhe'ē pono ivai ete peẽ-my. Pono ro'yha óra-py ojehu, pono japytu'uhá áry-py ojehu ave, pejapo oração.

²¹ Upéa áry-py ohasa asy eterei va'erā. Ko yvy rembypy oiko jave upéa áry e'ý mboyve ndohasa asy etéiry va'ekwe. Upéa áry-py ae ohasa asy eterei va'erā. Ha upe rire katu ndohasa asy etevéi-ma va'erā.

* ^{24:15} Dn 9.27; 11.31; 12.11

²² Ha Nhandejáry katu nombohasa asy hetave áryiry va'erã. Ombohasa asy hetave áry ramo ra'e, opa-ma arã ra'e enterove ko yvypóry. Ha gwembiporavo-rehe opena porã-gwi ae katu, nombohasa asy hetave áryiry va'erã.

²³ —Upe-ma ramo, “Ema'ẽ katu. Upe va'e Cristo voi” oĩ he'i va'e para'e peẽ-my. “Ema'ẽ katu. Upe va'e Cristo voi” oĩ ave he'i va'e para'e peẽ-my. Ani perovia inhe'ẽ.

²⁴ Ojekwaa va'erã ou-vy hekoha vai va'e. “Cristo pene remiha'arõ va'e voi xe” he'i rei arã ójehe peẽ-my. “Nhandejáry nhe'ẽ amombe'u voi” he'i rei arã ave ójehe. Hexapyrã-rupi voi hembiapo va'erã ohekoporú ou-vy ramo. Ohexa uka va'erã gwembiapo tuvixa va'e, ikatu ramo itavy hagwã mo'ã íxupe Nhandejáry rembiporavo. Xáke. Ani joty pende tavy íxupe.

²⁵ Pejeapysaka katu. Ko'ã mba'e oiko e'ỹ ngatu amombe'u-ma kuri peẽ-my, he'i.

²⁶ —Aipo ramo, “Amoete tekwat y e'ỹ-my oime Nhande Ryke'y tee va'e” he'i va'erã para'e peẽ-my. Ani joty peho. “A-py koty-py oime Nhande Ryke'y tee va'e” he'i va'erã para'e peẽ-my. Ani joty pende tavy íxupe. Ani perovia joty inhe'ẽ.

²⁷ Upéixa xe, Nhande Ryke'y tee va'e, ndaju jevy mo'ãiry. Kwarahy resẽ-gwi ka'aru peve overa va'e pehexaha-rami ae katu, xe aju jevy va'erã.

²⁸ Ojéhegwi rei yruvu mba'e retekwe-py pya'e ou meme va'e-rami ave ae aju jevy va'erã. Entéro xe remimombe'u oiko-ma ramo, aju jevy-ma va'erã, he'i Hesu omombe'u-vy gwemimbo'e kwéry-pe.*

*Hesu omombe'u ogwahẽ jevytaha áry
(Mc 13.24-27; Lc 21.25-28; Ap 1.7)*

²⁹ Upéi he'i jevy Hesu:

—Upe-ma ramo ohasa asy ete rire-ma, oje'o va'erã kwarahy rendy. Ha jasy nahendy mo'ãvéi. Ha okúi va'erã yváy-gwi jasytata. Ova ova va'erã gwendagwe-gwi entéro yváy rehewa imbaraete va'e.*

³⁰ Upe-ma ramo ojekwaa va'erã yváy-py oikwaa uka va'e xe aju jevy hagwã-rehe. Ha enterove tetã tetã mygwa ko yvy ári oĩ va'e gwive onheapiro'-vy ojahe'o va'erã. Xe Nhande Ryke'y tee va'e aju jevy ramo arai-rupi xe rexa va'erã. Xe pu'akaha rehewe aju va'erã pende resa mbojevy va'erã xe rendy porã tee-gwi, xe rexa-ma va'erã aju ramo.*

³¹ Mimbygwasu nhe'ẽ-py ambou va'erã xe rembigwái yváy pygwa ombojogweroaty hagwã heraha-vy xe rembiporavokwe. Opa-rupigwi ombojogweroaty va'erã. Kwarahy resẽ-gwi, kwarahy reike-gwi ave ombojogweroaty va'erã heraha-vy. Arapopy-gwi ave, yvyapy-gwi ave, yvyapy arendaja gwive ombojogweroaty va'erã, he'i íxupe kwéry omombe'u-vy.

*Figo máta rehewa nhe'ẽ
(Mc 13.28-31; Lc 21.29-33)*

³² Upéi he'i jevy Hesu:

—Áy amombe'u-ta peẽ-my ojehu va'erã rehewa nhe'ẽ figo máta rehewa-rami peikwaa porã hagwã xe agwahẽ jevytaha áry, he'i. —Oĩ figo máta. Hoky kyrú jevy-ma ramo, hogwe pyahu jevy-ma ramo, pehexa-ma voi. Pehexama ramo, peikwaa-ma voi opa-ma ra'e ro'y. Áry raku jevy-tama, peje.

³³ —Upéixa ete upe ojehu va'erã gwive pehexa ramo, peikwaa va'erã oike-ta va'e-rami xe agwahẽ jevytamaha áry.

* ^{24:28} Mc 13.14-23; Lc 21.20-24 * ^{24:29} Is 13.10; 34.4 * ^{24:30} Dn 7.13

³⁴ Anhetegwa va'e amombe'u-ta peẽ-my. Entéro peẽ-my xe remimombe'u oiko va'erã. Judeu kwéry oiko reheve joty ojehu va'erã.

³⁵ Opa va'erã áry yvy ave. Ha xe remimombe'u xe nhe'ẽ katu nombopapa mo'âiry, he'i gwemimbo'e kwéry-pe omombe'u-vy gwenonderã.

Hesu omombe'u gwemimbo'e kwéry-pe orepara hagwã
(Mc 13.32-37; Lc 12.37-40; 17.26-30,34-36; 1 Ts 5.2-3)

³⁶ Upéi he'i jevy Hesu:

—Mbava'e áry-py po ojehu va'erã ndajaikwaáiry, he'i. —Araka'e óra-ma po ojehu va'erã ndajaikwaáiry. Nhandejáry rembigwái yváy pygwa jepe ndoikwaáiry. Xe ta'ýry jepe ndaikwaái ave. Nhandejáry xe Ru ha'e anho mante oikwaa, he'i. —Araka'e óra-ma po aju jevy va'erã ndapeikwaái-gwi, perepara rei voi katu peiko-vy.

³⁷⁻³⁸ Xe Nhande Ryke'y tee va'e aju jevy ramo, yma gware-pe ojehu hagwérami ave ojehu jevy va'erã, he'i. —Yma ete Noé amyrí oiko jave, y ovu e'ý mboyve, okaru porã rei okwa-vy va'ekwe yma gware. Omenda va'ekwe okwa-vy. Upéixa va'ekwe oiko jave, oike-ma va'ekwe kanoagwasu-py Noé amyrí va'ekwe.

³⁹ Ojéupe ojehu va'erã ndoikwaái va'ekwe yma gware. Ojéupe ojehu va'erã-rehe naimytu'e'ýiry va'ekwe oiko-vy hikwái. Upe-ma ramo, pya'e ovu íxupe kwéry imonhapymimbaharã y. Xe Nhande Ryke'y tee va'e aju jevy hagwã áry-py, upéixa ete ojehu jevy va'erã. Mbava'e nipo ojehu va'erã íxupe kwéry ndoikwaáiry yvypóry.

⁴⁰ Kokwe-py mokõi ombo'apo jave, peteĩ ogweraha va'erã, peteĩ oheja va'erã.

⁴¹ Oĩ va'erã mokõi kunha oipokyty jave ojóehe itagwasu-py omongu'i hagwã. Peteĩ ogweraha va'erã, peteĩ oheja va'erã.

⁴² Upéa-gwi ha'arõ-vy perepara katu xe agwahẽ hagwã-rehe. Araka'e áry-pyma po xe pende Járy aju jevy va'erã ndapeikwaái-gwi, perepara rei katu peiko-vy, he'i.

⁴³ —Pejeapysaka katu xe nhe'ẽ-rehe peikwaa porã hagwã. Óga járy rehewa nhe'ẽ-rami amombe'u-ta peẽ-my peha'arõ hagwã peiko-vy. Óga járy-pe araka'e óra pyhare ou-ta imonda va'e he'i-vy, ndokéi arã ra'e orepara-vy. Nomoinge ukáiry arã ra'e imondase va'e-pe.

⁴⁴ Upéixa ete perepara katu peiko-vy peẽ ave xe Nhande Ryke'y tee va'e aju jevy va'erã-rehe. Upéa-gwi xe ra'arõ-vy peiko katu, he'i gwemimbo'e kwéry-pe omombe'u-vy.

Tembigwái rekoha rehewa nhe'ẽ
(Lc 12.42-48)

⁴⁵ Upéi oiporu jevy Hesu óga járy rehewa nhe'ẽ jarepara porã hagwã nhande-vy oikwaa uka-vy. Tembigwái rekoha rehewa nhe'ẽ-rami omombe'u:

—Oĩ va'ekwe óga járy, he'i. —Heta oĩ hembigwái. Kiva'e po hekoha porã-ta, kiva'e po hekoha vai-ta amombe'u-ta peẽ-my. Óga járy mombyry oho-ta ramo, peteĩ gwembigwái hese ojerovia va'e-pe, hi'arandu va'e-pe ave: “Enhangareko porã katu xe róga pygwa-rehe gwive” he'i. “Jakaru karuha órapy peteĩ teĩ va'e-pe emboja'o ja'o íxupe kwéry hemi'urã kwéry eremongaru-vy” he'i gwembiporavo-pe oho-vy.

⁴⁶ —Upéi ogwahẽ jevy-ma ou-vy ijáry. Onhe'ẽ ojapo va'e-pe otopa ramo, ojohu porã va'erã hembiapokwe. Iporã va'erã íxupe.

⁴⁷ Anhetegwa va'e amombe'u-ta peẽ-my: “Ãy ae xe mba'e reta-rehe gwive enhangareko meme ereiko-vy” he'i va'erã inhe'ẽ ojapo va'e-pe.

⁴⁸ Ha inhe'ẽ apo e'ŷha-pe katu ivai va'erã. Ndojohu porãi va'erã hembi-apokwe. Upe inhe'ẽ apo e'ŷha: “Hi'are-ma xe járy” he'i rei arã ojéupe.

⁴⁹ Upéa-gwi oinupã nupã oirũ hembigwái kwéry-pe hereko asy-vy. Oka'u va'e ndive okaru oiko-vy.

⁵⁰ Upe ramo ijáry ogwahẽ jevy va'erã ou-vy. Hese naimandu'avéi jave, oikwaa e'ŷ ete jave, ogwahẽ jevy-ma va'erã ou-vy.

⁵¹ Ogwahẽ rire, ombohasa asy va'erã íxupe. Ojéhegwí mombyry omondo va'erã íxupe. Gwí opý'a ky'aha omo'ã kwaa va'e renda-py omondo va'erã íxupe. Upe-py ojahe'o va'erã Nhandejáry-rehe onhemoyrõ-gwi. Onhemohääingry ngyrýu va'erã oiko-vy. Omondo hagwe-pe hasë va'erã onhemboasy-vy. Upéa-gwi perepara porã katu peiko-vy peẽ ave, he'i Hesu gwemimbo'e kwéry-pe.

25

Hesu omombe'u ogwahẽ jevytaha áry kunhataĩ rehewa nhe'ẽ-rami

¹ Upéi he'i jevy Hesu gwemimbo'e kwéry-pe:

—Amombe'u-ta peẽ-my xe agwahẽ jevytaha áry kunhataĩ rehewa nhe'ẽ-rami, he'i. —Oí va'ekwe dez kunhataĩ. Omenda-ta va'e-pe omoirũ. Upe kunhataĩ he'i Nhandejáry nhande ruvixa-pe omoirûse va'erã-rehe. Oho ohogwaifí-vy upe kwimba'e omenda va'e-pe. Tataendy rehev oho.

² —Cinco oĩ hi'arandu porã e'ŷ va'e. Cinco oĩ hi'arandu va'e.

³ Upe inharandu porã e'ŷ va'e tataendy rehev oho. Ha tataendyvy ryru oheja.

⁴ Ha upe hi'arandu va'e katu tataendyvy ryru rehev oho.

⁵ Hi'are ogwahẽ hagwã ou-vy upe omenda va'e. Oha'arõ jave hapehýi oke-ma.

⁶ Ha upe rire katu pyhare mbyte-py oĩ onhe'ẽ hatã va'e: “Ogwahẽ-ta ou-vy omenda va'e. Tapeho katu pehogwaití íxupe” he'i.

⁷ Upe-ma ramo opaypa-ma hikwái upe dez kunhataĩ. Upéi opu'ã pu'ã omoatyrõ gwataendy.

⁸ —Upéi hi'arandu porã e'ŷ va'e he'i: “Ogwe-tama ore rataendy” he'i. “Ne rataendyvy ryru-gwi eme'ẽ mani katu ore-vy” he'i hi'arandu va'e-pe.

⁹ —“Name'ẽ mo'ãi” he'i. “Orome'ẽ ramo, ore-vy gwarã ndoikovéi va'erã ore-vy. Tapeho katu ovende va'erã-py, pejogwa pendejéupe gwarã” he'i hi'arandu porã e'ŷ va'e-pe.

¹⁰ Oho jave ojogwa hagwã, ogwahẽ-ma ou-vy omenda va'e. Pe kunhataĩ oho e'ŷ va'e oike oje'óí-vy indive jekarugwasu-py. Okênda-py omboty-ma.

¹¹ Hi'areve ogwahẽ ou-vy hi'arandu porã e'ŷ va'e: “Ore járy” he'i. “Oroike-ta ore ave” he'i omenda va'e-pe.

¹² Ha ha'e he'i: “Anhetegwa amombe'u-ta peẽ-my. Xe ndoroikwaái voi. Peẽ ndaha'ei xe re'yí” he'i oikese mo'ã va'e-pe, he'i Hesu omombe'u-vy kunhataĩ rehewa nhe'ẽ-rami.

¹³ Upéi he'i jevy:

—Araka'e áry-ma po xe agwahẽ jevy va'erã, araka'e óra-ma po xe aju jevy va'erã ndapeikwaái voi. Ndapeikwaái voi xe aju jevy hagwã áry. Upéa-gwi xe ra'arõ-vy tapeiko meme katu, he'i Hesu gwemimbo'e kwéry-pe.

Hesu omombe'u ogwahẽ jevytaha áry plata atã rehewa nhe'ẽ-rami

(Lc 19.11-27)

¹⁴ Upéi he'i jevy gwemimbo'e kwéry-pe:

—Ãy amombe'u-ta peẽ-my xe agwahē jevytaha áry plata atã rehewa nhe'ẽ-rami, he'i. —Oĩ va'ekwe imba'e reta va'e. Upe imba'e reta va'e he'i Nhandejáry nhande ruvixa-rehe. Yvy ambue-py oho-tama ramo, ohenóí ou hagwā gwembigwái kwéry: “Penhangareko katu xe mba'e kwéry-rehe” he'i íxupe.

¹⁵ —Oĩ oito moeda tuvixa va'e hepy va'e ouro gwigwa ogwereko va'e. Peteĩ va'e-pe cinco ome'ẽ. Peteĩ va'e-pe ome'ẽ mokõi. Peteĩ va'e-pe peteĩ ome'ẽ oiporuruka-vy. Peteĩ teĩ oiporu kwaa hagwā-rami ome'ẽ. Upe-ma ramo osẽ oho-vy.

¹⁶ Upe cinco ome'ẽ ojéupe va'ekwe, pya'e oiporu porã oho-vy ome'ẽ va'ekwe ojéupe. Cincove ogana oiporu porã-gwi.

¹⁷ Ha upe peteĩ ome'ẽ ojéupe va'ekwe ndoiporúiry ijáry ome'ẽ va'ekwe. Oho ojo'o yvy-py ojaty hagwā ome'ẽ ojéupe va'ekwe.

¹⁸ —Are rire upe hembigwái járy ogwahē jevy-ma ou-vy. Ohenóí rire: “Mba'éixa peiporu peẽ-my ame'ẽ va'ekwe?” he'i oporandu-vy.

¹⁹ Upe cinco ome'ẽ íxupe va'ekwe, cincove ogweru jevy íxupe: “Cinco ereme'ẽ va'ekwe xe-vy, xe Járy” he'i, “Ko. Cincove agana va'ekwe” he'i ojáry-pe ome'ẽ-vy.

²⁰ —“Iporã eterei” he'i íxupe. “Nde reko porã voi ra'e” he'i íxupe. “Ajerovia tee voi nde-rehe” he'i íxupe. “Mixĩ va'e-rehe erenhangareko porã ra'e xe mbotavy e'ŷ rehewe” he'i íxupe. “Ãy tuvixave va'e-rehe oromonhangareko jevy-ta” he'i íxupe. “Xe moirũ katu onhondive javy'a hagwā” he'i cincove ogana va'ekwe-pe.

²¹ —Upe mokõi ome'ẽ íxupe va'ekwe ogwahē ou-vy ave, “Xe járy” he'i. “Mokõi ereme'ẽ va'ekwe xe-vy. Ko. Mokõive agana va'ekwe” he'i ojáry-pe ome'ẽ jevy-vy.

²² —Ohexa-vy ijáry, “Iporã eterei” he'i ovy'a-vy gwembigwái-pe ijáry. “Nde rekoha porã voi ra'e. Ajerovia tee voi nde-rehe” he'i íxupe. “Xe mbotavy e'ŷ rehewe erenhangareko porã ra'e mixĩ va'e-rehe” he'i íxupe. “Ãy tuvixave va'e-rehe oromonhangareko jevy-ta” he'i íxupe. “Xe moirũ katu onhondive javy'a hagwā” he'i mokõive ogana va'ekwe-pe.

²³ —Upéi ogwahē ave ou-vy upe peteĩ ome'ẽ íxupe va'ekwe: “Orohexa kwaa-ma, xe járy, nde reko-rehe” he'i. “Ne ma'e rakate'ŷ va'e voi ra'e nde. Nde rapixa-pe, Penhemity xe kokwe-py, ere erejaty uka-vy. Ha upe rire katu entéro hi'a va'e gwive eremono'õ uka ndejéupe gwarã. Nde rapixa-pe, Pemohäi-vy penhemity xe kokwe-py, ere erejaty uka-vy. Ha upe rire katu entéro hi'a va'e gwive eremboaty uka ndejéupe gwarã” he'i.

²⁴ —Upéixa-gwi xe kyhyje ndéhegwi. Xe kyhyje-gwi, aha ajaty ne remime'ẽgwe yvy-py anhomí-vy. Ko. Ne mba'e” he'i ojáry-pe ome'ẽ jevy-vy.

²⁵ —“Nde rekoha vai voi ra'e. Ne ate'ŷ voi ra'e” he'i gwembigwái-pe. “Xe járy kokwe-py onhemity e'ŷ rehewe, omohäi e'ŷ rehewe hemimono'õ ogwerahapa ojéupe gwarã, ere rei kuri xe-rehe.

²⁶ —Aipo ramo, ma'erã nerenhongatúiry xe mba'e banco-py? Ma'erã nere-mořy ojeporu hagwā-py, banco pygwa kwéry oiporu hagwā. Aipo ramo, xe aju jevy ramo, ome'ẽ jevy-vy xe-vy, hetave ome'ẽ arã mo'ã xe-vy” he'i upe peteĩ ome'ẽ íxupe va'ekwe-pe.

²⁷ —Upéi he'i upe pygwa-pe: “Peteĩ ogwereko va'e-gwi eipe'a jevy íxugwi, eme'ẽ dez ogwereko va'e-pe” he'i.

29 “Ogwereko va'e-pe ome'ẽve va'erã hetave tave ogwereco hagwã. Ha ogwereco e'ŷ va'e katu mixĩ ogwereco va'e jepe oipe'a jevy va'erã íxugwi.

30 Ha xe rembigwái inhate'ŷ va'e-pe katu, pemosẽ katu íxupe imondo-vy pytû kwa-rupi. Upe-py ojahe'o va'erã. Hasẽ va'erã onhemboasy-gwi. Nhandejáry-rehe onhemoyrõ-gwi, onhemohäängyry ngyryú va'erã oiko-vy” he'i gwembigwái kwéry-pe, he'i Hesu ogwahë jevytaha óra kwa uka-vy.

Hesu ogwereco va'erã

kente-pe hembiapo

apokwe-rehe

(Mt 13.36-43,47-50; Ap 20.11-15)

31 Upéi he'i jevy íxupe kwéry Hesu:

—Xe Nhande Ryke'y tee va'e aju jevy va'erã. Xe ae xe reko-rupi aju va'erã, he'i. —Enterove va'e remimboeterã-rami ajehexa uka arã aju-vy. Xe ndive ou va'erã entéro Nhandejáry rembigwái yváy pygwa gwive. Oroju ramo, pe apykagwasu hesakã va'e, mburuvixagwasu gwapy haty ramigwa ári agwapy-ma va'erã peteĩ teĩ hembiapo apokwe-rehe areko hagwã, he'i.

32 —Entéro tetã tetã mygwa ko yvy-py oĩ va'e gwive onhomboatypa va'erã ou-vy xe renonde-py. Ogwahë ramo ou-vy xe renonde-py aipe'a pe'a va'erã ojóhugwi hembiapokwe-rami. Herekwa cabrito kwéry-gwi ovexa oipe'aharami ave xe aipe'a va'erã hekoha vai va'e-gwi hekoha porã va'e, he'i.

33 —Hekoha porã va'e xe amoĩ va'erã xe akatúa-koty. Xe asu-koty amoĩ va'erã hekoha vai va'e.

34 Upe ramo xe huvinxagwasu va'e ha'e-ta xe akatúa kotygwa-pe: “Peju katu peẽ xe Ru rembihovasa va'e. Peju katu. Oĩ peẽ-my gwarã. Ko yvy rembypy gwive omoĩ va'ekwe pene renagwã. Peiko katu Nhandejáry pende ruvixa ndive pemoirũ-vy.

35 Xe vare'a ramo, xe mongaru va'ekwe. Xe y'uhéi ramo, xe mboy'u va'ekwe. Xe ndarekói ramo xe agwahë hagwã xe mogwahë joty va'ekwe nde ha-py.

36 Opi-vy aiko jave, ereme'ẽ va'ekwe xe-vy xe aorã. Xe rasy ramo, erenhangareko va'ekwe xe-rehe. Preso anhemoĩ jave, xe mboy'a hagwã ereju va'ekwe. Upéa-gwi peiko katu Nhandejáry pende ruvixa ndive pemoirũ-vy” ha'e va'erã hekoha porã va'e-pe, he'i.

37 —Upe ramo he'i rei va'erã xe-vy: “Araka'e tipo erejehexa uka araka'e nde vare'a ramo, ore Járy? Araka'e tipo oromongaru araka'e? Araka'e tipo erejehexa uka nde y'uhéi ramo? Araka'e tipo oromboy'u araka'e?

38 Araka'e tipo eregwahëse araka'e ore ha-py? Araka'e tipo erejehexa uka opi-vy ereiko ramo? Araka'e tipo orome'ẽ araka'e nde-vy nde aorã?

39 Araka'e tipo erejehexa uka araka'e nde rasy ramo? Araka'e tipo oronhangareko nde-rehe araka'e? Araka'e tipo preso erenhemoĩ ramo, orogwahë nde ha-py? Araka'e tipo oromboy'a orogwahë-vy araka'e nde ha-py” he'i va'erã oporandu-vy xe-vy, he'i.

40 —Upéi xe huvinxagwasu va'e ha'e va'erã íxupe kwéry: “Anhetegwa amombe'u-ta peẽ-my. Erejapo porã jave xe re'ýi-pe, xe-vyma ave erejapo porã-ma. Xe re'ýi heko'ive va'e-pe jepe ereipytygwõ tygwõ jave, xe-vy ave-ma xe pytygwõ” ha'e va'erã hekoha porã va'e-pe, he'i.

41 —Upéi ha'e va'erã xe asu kotygwa-pe: “Tapeho katu xéhegwi. Xe remimboykerã-ma voi peẽ. Oime tata anháy ruvixa pegwarã, hembigwái kwéry pegwarã ave. Upe tata nhepyrũ opa e'ŷ va'e. Tapeho katu upe-py.

⁴² Xe xe vare'a ramo va'ekwe, napepena penáiry joty va'ekwe xe-rehe xe mongaru hagwā-rehe. Xe y'uhéi ramo, napepenái va'ekwe xe-rehe xe mboy'u hagwā-rehe.

⁴³ Xe ndarekói ramo xe agwahē hagwā, naxe mogwahē ukái va'ekwe pende ha-py. Xe opi-vy aiko ramo, napeme'ëséiry va'ekwe xe-vy xe aorā. Xe rasy ramo, xe preso anhemoi ramo ave, napenhangarekóiry xe-rehe va'ekwe." Upéixa xe ha'e va'erā xe asu kotygwa-pe, he'i.

⁴⁴ —Upe-ma ramo he'i-ma va'erā xe-vy hikwái: "Araka'e tipo eregwahē ore ha-py nde vare'a ramo, ore Járy?" he'i va'erā xe-vy. "Araka'e tipo noromon-garúi va'ekwe? Araka'e tipo erejehexa uka nde y'uhéi ramo? Araka'e tipo noromboy'úi va'ekwe? Araka'e tipo noromogwahē ukái ndererekói ramo eregwahē hagwā? Araka'e tipo noroipytygwōi opi-vy ereiko jave?" he'i va'erā xe-vy. "Nde rasy ramo, preso erenhemoi jave, araka'e tipo noroipytygwōi?" he'i va'erā xe-vy xe asu kotygwa, he'i Hesu.

⁴⁵ —Upe jave ha'e arā íxupe kwéry: Xe huvixagwasu va'e anhetegwa amombe'u-ta peẽ-my. Xe re'ýi-pe nderejapo porāi jave, xe-vyma ave nderejapo porāiry ra'e. Xe re'ýi hekomiríve va'e-pe jepe nereipytygwōiry jave, xe-vyma ave naxe pytygwōiry ra'e, ha'e va'erā hembiapo vai va'e-pe, he'i.

⁴⁶ —Upe jave ojerereko asy haty-py opa e'ý reheve oje'ói va'erā hekoha vai va'e. Ha hekoha porā va'e katu oikove meme va'erā Nhandejáry ndive opa e'ý reheve, he'i gwemimbo'e kwéry-pe Hesu ogwahē jevy hagwā óra-py oikwaa uka-vy.

26

Judeu ruvixa kwéry onhombo'e mbo'e Hesu-rehe ijuka hagwā (Mc 14.1-2; Lc 22.1-2; Jo 11.45-53)

¹ Ko'ã va'e nhe'ẽ omombe'upa rire, he'i jevy gwemimbo'e kwéry-pe Hesu:

² —Peikwaa mokõi áry rire oiko-ta aretegwasu héry va'e páscoa. Upe áry-py xe Nhande Ryke'y tee va'e kurusugwasu-rehe xe moõ va'erā po-py xe me'ẽ va'erā xe reraha-vy xe juka uka hagwā, he'i ójehe, aretegwasu páscoa-rehe ave. Upe áry-py nanhambovúiry va'ekwe ja'u va'erā. Nhane mandu'a ave nhane rembypy ojerereko asy hagwe-rehe. Yma ete upe áry-py osẽ va'ekwe gwī hese ipu'aka va'e po-gwi. Upéa-rehe jareko aretegwasu páscoa ko'ãy peve.

³ Upe ramo pa'i ruvixa kwéry, judeu ruvixa kwéry ndive ojogweroaty-ma hikwái. Caifás pa'i ruvixagwasu róga kakwaa-py ojogweroaty.

⁴ Upe-py koty-py onhombo'e mbo'e Hesu-rehe hikwái:

—Nhambotavy íxupe jaipyhy-vy jajuka hagwā, he'i Hesu-rehe hikwái.

⁵ —Arete-py ae ani jaipyhy íxupe, he'i. —Atýra-py jaipyhy ramo, onhem-bopoxy arā ijaty jaty va'e kente kwéry nhande-vy, he'i ójehe Hesu pyhyharā kwéry.

Upéa-gwi oipyhy nhemise Hesu-pe hikwái.

Kunha onhohē Hesu akā-rehe omohyakwā porā-vy íxupe (Mc 14.3-9; Jo 12.1-8)

⁶ Ha Hesu katu oime Betânia tetã'i-my. Simão róga-py oime. Upe Simão mba'asy vai-gwi ijai aipa va'ekwe nhahenói íxupe va'e.

⁷ Upe ramo ogwahē ou-vy peteñ kunha. Hyakwā porā tee va'e hyru reheve ogweru. Pe hyru ojejapo va'ekwe alabastro-gwi. Ita kyra rendy-gwi ojapo va'ekwe. Ha hyakwā porā va'e hepy eterei voi. Upéa oipyhy onhohē Hesu akā-rehe. Ogwapy jave okaru-vy onhohē hese omohyakwā porā-vy íxupe.

⁸ Upe va'e ohexa ramo, ogweropoxy-ma hemimbo'e kwéry:

—Ma'erā po onhohē rei pe hyakwā porā va'e Hesu akā-rehe? he'i ojóupe hikwái oporandu-vy.

⁹ —Hepy eterei va'e onhohē rei, he'i ojóupe. —Ma'erā po ra'e hepy-rehe nome'ēiry ra'e, he'i. —Ma'erā ndogwerúi ra'e hepykwe ome'ē hagwā iporiahu va'e kwéry-pe. Ome'ē ramo ra'e hyakwā va'e repykwe, iporāve arā ra'e, he'i kunha rembiapo-rehe hikwái.

¹⁰ Upéa he'i va'e oikwaa-ma Hesu:

—Ma'erā po ko kunha-pe eremoakā rasy? ha'e he'i. —Hembiapo porā ete voi xe-vy, he'i íxupe kwéry.

¹¹ —Pene pa'ū-my oime meme va'erā iporiahu va'e. Ha xe ae katu naime meméi va'erā aiko-vy pene pa'ū-my, he'i íxupe kwéry.

¹² —Omano va'ekwe jajaty hagwā nhamohyakwāha-rami, amano e'ŷ ngatu xe mohyakwā ranhe ko kunha, he'i.

¹³ —Ha'e-ta ko kunha-rehe anhetegwa va'e. Opa-rupi entéro ko yvy-rupi, mamo xe rehewa nhe'ē porā omombe'u mbe'u ha-rupi ave omombe'u va'erā voi ko kunha rembiapo porā-rehe imandu'a hagwā hese, he'i gwemimbo'e kwéry-pe Hesu kunha-rehe.

“Aipyhy uka-ta peē-my Hesu” he'i Judas

(Mc 14.10-11; Lc 22.3-6)

¹⁴ Upe ramo peteī hemimbo'e kwéry va'e, Judas Iscariotes héry va'e, oho pa'i ruvixa kwéry ha-py:

¹⁵ —Aipyhy uka-ta peē-my Hesu, he'i. —Mbovy erepaga-ta xe-vy aipyhy uka ramo peē-my? he'i oporandu-vy Judas.

Ha ipyhyharā he'i:

—Trinta prata gwigwa moeda orome'ē-ta nde-vy, he'i Judas-pe hikwái.

¹⁶ Upéa nhe'ē omoporā Judas. Omoporā rire-ma, orepara oiko-vy Hesu-rehe Judas ipyhyharā-pe omombe'u hagwā óra ra'arō-vy.

Hesu omongaru gwemimbo'e kwéry-pe

(Mc 14.12-21; Lc 22.7-14,21-23; Jo 13.21-30)

¹⁷ Ha upéi katu aretegwasu-py ogwahē ou-vy Hesu ha-py hemimbo'e kwéry. Upe va'e semana-py mbojape ovu e'ŷ va'e ja'u. Oiko-ma ramo upéa semana, ogwahē ou-vy Hesu ha-py hemimbo'e kwéry:

—Kipy tipo orombogwejy-ta nde-vy ne remi'urā nhane mandu'a hagwā páscoa-rehe jakaru-vy? he'i oporandu-vy Hesu-pe.

¹⁸ Ha Hesu he'i íxupe kwéry:

—Tapeho katu tetā-my. Oĩ xe mogwahēharā. Tapeho iha-py peje-vy: “He'i kuri nhane mbo'eháry: Onhemo'agwī-ma amano hagwā áry. Nde róga-py xe mandu'a-ta páscoa-rehe. Xe remimbo'e kwéry ndive akaru-ta” peje kuri óga járy-pe, he'i gwemimbo'e kwéry-pe.

¹⁹ Upéi oho ojapo Hesu nhe'ē ombogwejy hemi'urā íxupe.

²⁰ Ka'aru ete ramo ogwapy ha'e doze gwemimbo'e kwéry ndive okaru hagwā.

²¹ Okaru jave he'i:

—Anhetegwa va'e amombe'u-ta peē-my, he'i. —Peteī pene pa'ū-my oĩ va'e xe mombe'u va'erā xe pyhyharā-pe, he'i gwemimbo'e kwéry-pe.

²² Ohendu ramo inhe'ē, ojepy'a rerahaha-ma hese hikwái. Nombovy'avéima íxupe kwéry:

—Xe tipo oropyhy uka-ta, xe Járy? he'i. —Xe para'e, ndaxéiry para'e? — onhemopeteī teī oporandu-vy íxupe.

23 —Peteĩ pende avyte-py oĩ va'e, hyru-py opo omoĩ va'e, xe mombe'u va'erã xe pyhyharã-pe, he'i. —Xe ndive omoaký va'e mbojape nha'ẽ-py xe mombe'u va'erã, he'i.

24 —Xe Nhande Ryke'y tee va'e aha va'erã xe ajejuka uka hagwã-py, he'i. —Nhandejáry kwaitia nhe'ẽ he'i hagwe-rami aha va'erã. Ha xe mombe'u va'erã katu xe pyhyharã-pe amboasy eterei íxupe. Ohasa asy eterei va'erã. Iporãve arã ra'e ndoikói ramo osyrã-pe ra'e, he'i gwemimbo'e kwéry-pe.

25 Upe ramo:

—Xe para'e, ndaxéiry para'e, xe mbo'eháry? he'i Judas, upe ipyhyharã-pe omombe'u-ta va'e.

—Nde voi, he'i Hesu. —Nde erenhemombe'uhá-rami voi nde, he'i Judas-pe.

26 Okaru joa jave, ha'e oipyhy mbojape, otima porã Nhandejáry-pe. Upéi ombopo mbopóy mbojape ome'ẽ gwemimbo'e kwéry-pe omongaru joty:

—Ko, he'i ome'ẽ-vy. —He'u katu. Ko mbojape xe rete-rehe he'i, he'i íxupe kwéry ojehegwigwa ome'ẽ-vy.

27 Upéi oipyhy ave copo, otima porã Nhandejáry-pe ome'ẽ íxupe kwéry:

—Peẽ kwéry pe'u katu ko va'e copo pygwa, he'i.

28 —Ko copo pygwa xe rugwy-rehe he'i, he'i íxupe kwéry. —Osryr va'erã xe rugwy imbaraete hagwã Nhandejáry he'i va'ekwe. Yma Nhandejáry, “Amopotí va'erã kente kwéry” he'i va'ekwe. Upéa nhe'ẽ imbaraete-ma va'erã xe rugwy osyry-ma ramo, he'i. —Heta kente-rehe ha-py osyry va'erã xe rugwy omboyke hagwã íxugwi kwéry hembiapo vaikwe, he'i Hesu.

29 —Ha'e-ta peẽ-my. Ha'u-ma kuri uva rykwere. Áy ae katu nda'u mo'ãvéima. Ha upe rire katu, xe Ru pende ruvixa oiko haty-py, ha'u jevy va'erã, he'i.

—Upe-py agwahã ramo uva rykwere pyahu ha'u jevy va'erã. Pene ndive ha'u jevy va'erã, he'i gwemimbo'e kwéry-pe.

30 Upéi oporahéi rire, osẽ oho-vy. Oliveiras yvyaty-py oho oje'óí-vy.*

*“Xe ndaikwaái voi, ere va'erã xe-rehe mbohapyha-rehe” he'i Pedro-pe
(Mc 14.27-31; Lc 22.31-34; Jo 13.36-38)*

31 Upe jave ha'e he'i gwemimbo'e kwéry-pe:

—Peẽ kwéry pejehesa rerova-ta xéhegwi. Ko va'e pyhare-py xe reja-ta peẽ, he'i. —Oĩ Nhandejáry kwaitia nhe'ẽ he'i va'e a-rami:

“Ajuka va'erã herekwa osarambipa hagwã ovexa hymba kwéry”* he'i. Yma he'i hagwe-rami, áy xe juka-tama, he'i.

32 —Ha upe rire xe anhemoingove jevy rire katu, aha va'erã Galiléia yvy-py, he'i. —Pene renonde aha ranhe va'erã, he'i íxupe kwéry.

33 Upéi Pedro he'i:

—Gwĩ ne irũ kwéry ndéhegwi ojehesa rerova ramo jepe, xe ae katu ndoro-hejái joty va'erã, he'i Hesu-pe.

34 —Anhetegwa va'e amombe'u-ta nde-vy, he'i Hesu Pedro-pe. —Etería ko va'e pyhare-py, ne'írã osapukái ramo gáju, “Xe ndaikwaái voi” ere va'erã xe-rehe mbohapyha-rehe, he'i íxupe.

35 —Ne ndive xe ajejuka uka ramo jepe, ndajehesa rerovái joty va'erã ndéhegwi, he'i íxupe Pedro. —“Xe ndaikwaáiry” nda'éiry joty arã nde-rehe, he'i Hesu-pe.

Pedro he'i hagwe-rami ave he'i inhirũ kwéry Hesu remimbo'e.

*Hesu ojapo oração Getsêmani yvaty-py
(Mc 14.32-42; Lc 22.39-46)*

* **26:30** Mc 14.22-26; Lc 22.15-20; 1 Co 11.23-25 * **26:31** Zc 13.7

36 Ha upéi katu Hesu oho oje'óí-vy gwemimbo'e kwéry ndive. Ogwahē oho-vy Getsêmani yvaty-py:

—A-py pegwapy katu, he'i. —Xe ae ahaseve-ta upe-py Nhandejáry ndive anhomongeta hagwā, he'i gwemimbo'e kwéry-pe.

37 Upéi mbohapy ondice ogweraha. Ogweraha Pedro. Mokōi Zebedeu ra'y ogweraha ave ondice. Upe ramo Hesu ov'yare'ŷ-ma oiko-vy. Ojepy'ajopy eterei-ma ave oiko-vy. Ogwahē vy'are'ŷgwasu íxupe:

38 —Ogwahē-ma vy'are'ŷgwasu xe-vy xe juka-ta va'e-rami, he'i. —Epyta nde a-py. Xe moirū katu ereke e'ŷ reheve, he'i gwemimbo'e-pe.

39 Upéi ha'e ae oho mbykymi hova-py ojeity yvy-rupi:

—Xe Ru, ereipe'ase ramo, eipe'a katu xéhegwi xe py'ajopyha. Xe-vy ojehu va'erā eipe'a katu xéhegwi. Ha ndereipe'aséi ramo ae katu, ani joty ereipe'a, he'i onhomongeta-vy Nhandejáry ndive.

40 Upéi ou jevy mbohapy gwemimbo'e ha-py. Ogwahē ramo, ikéra otopa:

—Ma'erā po ereke e'ŷ reheve naxe ra'arōiry? Ma'erā peteĩ óra-py jepe naxe ra'arōiry? he'i.

41 —Epáy katu. Ejapo katu oração xe ra'arō-vy pono penhembojejavy uka avave-pe, he'i. —Nde py'a kyre'ŷ voi. Ereke e'ŷ reheve erejapose mo'ã oração. Ha nde rete katu okese voi, he'i Pedro-pe.

42 Upéi oho jevy Nhandejáry ndive onhomongeta-vy:

—Ndereipe'aséi ramo xe py'ajopyha jepe, ereipota ramo ave xe ahasa asy jepe, tojapo joty katu ne remimbota, xe Ru, he'i oração apo-vy.

43 Ouri jevy ramo, ikéra otopa jevy-ma. Hapehýi eterei-gwi, okepa-ma hikwái.

44 Upéixa-gwi oheja jevy-ma oho-vy. Mbohapy jevy ojapo oração. Gwemimombe'ukwe omombe'u jevyri Nhandejáry-pe.

45 Upéi ou jevy-ma gwemimbo'e oī ha-py:

—Ma'erā po ereke joty eretongea-vy? he'i. —Ogwahē-ma ngatu xe óra. Xe Nhande Ryke'y tee va'e ãy xe me'ẽ-ta xe reraha-vy gwī ojejavvy va'e Nhandejáry kwaa e'ŷha va'e po-py, he'i.

46 —Epu'ã katu jaha. Ehexa katu. Onhemo'agwī-ma ra'e xéhegwi ou-vy upe xe pyhy ukaharā, he'i gwemimbo'e-pe omotenonde-vy opyhyharā-rehe.

Hesu pyhyharā onhemoĩ-ma hese hikwái

(Mc 14.43-50; Lc 22.47-53; Jo 18.3-12)

47 Onhe'ẽ vyteri jave Hesu, ogwahē-ma ou-vy Judas, peteĩ doze hemimbo'e kwéry va'e. Indive kwéry heta ou ave. Opo-py ogweru kyse puku. Yvyra ave ogweru hikwái. Upéa pa'i ruvixa kwéry remimbou, judeu ruvixa kwéry remimbou voi.

48 Ha Judas he'i ra'e íxupe kwéry: “Ahexa uka-ta peẽ-my pene rembipyhyse” he'i ra'e Hesu-rehe. “Upe ahovapyte-ta va'e pene rembipyhyrā voi” he'i ra'e íxupe kwéry Judas. “Ahovapyte jave peẽ peikwaa-ma arā. Peipyhy mani kuri íxupe” he'i ra'e ipyhyharā-pe.

49 Upéa-gwi oho pya'e Hesu renda-py oipyhy hagwā. Judas he'i:

—Mba'éixa pa xe mbo'eháry, he'i ogwahē-vy íxupe.

Upéi ohovapyte Hesu-pe.

50 Ha Hesu he'i:

—Xe irū, he'i, —Mba'e apo-vy ereju ra'e, he'i íxupe. —Ejapo mani katu erejapose va'e, he'i Judas-pe.

He'i-ma ramo, ou onhemoĩ-ma hese oipyhy hagwā íxupe hikwái.

51 Upe-ma ramo, peteĩ Hesu irū va'e omopu'ã okyse oikytī-vy. Ombogwái pa'i ruvixagwasu rembigwái-pe. Ohupity inambi, ho'a inambikwe oho-vy.

52 Ha Hesu he'i:

—Nde kyse katu emoi jevy hyru-py. Kyse omopu'ã va'e gwive kyse-py ave ojejuka va'erã, he'i kyse omopu'ã va'ekwe-pe.

53 —“Ndaipóri Hesu pytygwõharã” ere mo'ã. Xe Ru-pe ahenói ramo, pya'e ombou arã xe-vy heta gwembigwái yváy pygwa xe resendeharã. Setenta e dois mil ombou arã xe-vy xe resendeharã, he'i. —Hetave ombou arã xe-vy xe resendeharã, he'i.

54 —Ha nahenói mo'ãiry xe pytygwõharã-rehe. Oĩ Nhandejáry kwatia nhe'ẽ a-rami:

“Ohasa asy va'erã Cristo”

he'i va'ekwe. Aipo ramo, xe Ru-pe ahenói ramo xe resende hagwã, naimbaraetevéi arã Nhandejáry kwatia nhe'ẽ, he'i. —Yma he'i hagwe-rami, ãy ndoikói arã, he'i kyse omopu'ã va'ekwe-pe.

55 Upe ramo he'i ijaty jaty va'e kente-pe:

—Ma'erã po pegwahẽ peju-vy kyse reheve xe pyhy hagwã peju-vy? Ma'erã po yvyra reheve ave pegwahẽ peju-vy? “Hesu oporosakea va'e” peje tipo peju-vy xe-rehe? he'i íxupe kwéry. —Ha ndaha'éiry upeixagwa xe, he'i Hesu íxupe kwéry. Iko'ẽ ko'ẽ agwapy aporombo'e-vy ae Nhandejáry róga kakwaa-py aiko-vy. Ha ndaxe pyhyí voi ra'e.

56 Ha Nhandejáry nhe'ẽ-py omombe'u va'ety remimoigwe kwatia-rehe katu ipokatu voi, imbaraete voi. Upéa-gwi yma he'i hagwe-ramima, ãy oiko-ma, he'i. —Kóixa ndojehúi ramo ra'e xe-vy, ndaipokatúi arã ra'e Nhandejáry kwatia nhe'ẽ, he'i íxupe kwéry.

Upe-ma ramo, hemimbo'e kwéry gwive ohejapa íxupe. Okanhymba oje'óiv vy íxugwi.

Judeu ruvixa oporandu Hesu-pehekoha-rehe

(Mc 14.53-65; Lc 22.54-55,63-71; Jo 18.12-14,19-24)

57 Ha upéi katu Hesu pyhyhagwe ogweraha íxupe. Caifás pa'i ruvix-agwasu róga kakwaa-py ogweraha. Upe-py ojogweroaty ra'e gwí judeu rekombo'ehaty, judeu ruvixa kwéry ndive.

58 Ha Pedro katu oho hapykwéri meme. Hesu rapykwéri puku oho. Pa'i ruvixagwasu roka peve ogwahẽ oho-vy. Upe-py ogwahẽ ramo, oike ogwapy polícia kwéry ndive oiko-ta va'e ohexa hagwã.

59 Ha pa'i ruvixa kwéry judeu ruvixa kwéry ndive, oheka heka mo'ã Hesurehe ijapu va'erã. Ojuka ukase íxupe hikwái.

60 Hovagwy-py ou onhembo'y ramo jepe heta ijapu va'e, omombe'u joavy avy joti. Oipota peteixa omombe'u ojuka uka hagwã. Ha omombe'u joavy avy joti. Heta ijapu japu rire, ou onhembo'y mokõi va'e:

61 —Upéa remimombe'ukwe oromombe'u jevy-ta peẽ-my, he'i. —“Aitypa uka-ta ko Nhandejáry róga kakwaa, mbohapy áry-rupi amopu'ã jevy hagwã” he'i Hesu nhe'ẽgwe mombe'u-vy.

62 Upe jave opu'ã onhembo'y-ma pa'i ruvixagwasu oĩ-vy:

—Ne mombe'u kuri. Ma'erã-gwi nerenhemombe'úiry ra'e nde? he'i Hesupe.

63 Ha Hesu katu opyta okirirí rei íxugwi. Mba'eve nde'íry íxupe.

Upéi pa'i ruvixagwasu he'i:

—Nhandejáry Tupã oikove va'e réry-py, oromonhe'ẽ-ta nde apu e'ŷ reheve, he'i íxupe. —Nde pa Cristo nhane remiha'arõ va'e? he'i oporandu-vy íxupe. —Nde pa Nhandejáry ra'y tee va'e? Emombe'u katu ore-vy nde apu e'ŷ reheve, he'i íxupe omonhe'ẽse-vy.

64 Upéi Hesu he'i:

—Xe ko ha'e voi, he'i. —Nde xe mombe'uhá-rami xe Cristo voi, he'i pa'i ruvixagwasu-pe.

Upéi he'i jevy Hesu:

—Ha'e-ta peē-my kwéry. Xe Nhande Ryke'y tee va'e-pe xe rexa-ta kuri. Nhandejáry yke-rehe ijakatúa-koty agwapy ramo xe rexa va'erã. Imbaraeteve va'e Nhandejáry. Arai-rupi xe agwejy ramo xe rexa va'erã, he'i judeu ruvixa-pe.

⁶⁵ Upéa nhe'ẽ ogwenohẽ-ma ramo ojéupe, ogweropoxy pa'i ruvixagwasu. Ogwerovái-gwi, omondoro oao:

—Onhe'ẽ vai rei-ma onhemonhandejáry-vy mo'ã, he'i. —Pehendu-ma inhe'ẽ vaiha, he'i. —Outro imombe'uharã-rehe nanhaikotevéiry. Ojéhegwí rei onhe'ẽ vai-ma, he'i hese.

⁶⁶ —Mbava'e tipo pejapo-ta hese? he'i oporandu-vy.

—Tomano katu, tojejuka katu, he'i joa voi hese.

⁶⁷ Upe ramo onygwõ nygwõ hese. Osokea íxupe opo-py. Oĩ íxupe oipete va'e ave:

⁶⁸ —Nde Cristo, Nhandejáry nhe'ẽ mombe'uhaty ra'e nde. Aipo ramo, emombe'u ore-vy kiva'e va'e ne nupã, he'i oinupã nupã-vy íxupe hikwái.

“Ndaikwaáiry íxupe” he'i mo'ã Pedro Hesu-rehe

(Mc 14.66-72; Lc 22.56-62; Jo 18.15-18,25-27)

⁶⁹ Ha Pedro katu ogwapy oĩ-vy oka-py. Upe-ma ramo ogwahẽ ou-vy iha-py kunhataí pa'i ruvixagwasu rembigwái va'e:

—Nde ave eremoirũ ra'e Hesu Galiléia pygwa, he'i Pedro-pe.

⁷⁰ Ha Pedro he'i:

—Ndaxéiry, he'i. —Namoirüiry va'e voi íxupe, he'i upe-py oĩ va'e apyte-py Hesu-rehe. —Ne nhe'ẽ katu ndaikwaáiry, he'i mo'ã kunhataí-pe.

⁷¹ Upéi osẽ mbykymi oho-vy. Okẽ-my oho. Upe-py ohexa íxupe outro kunhataí:

—Upéa omoirũ va'e oiko-vy ra'e. Hesu Nazaré pygwa ndivegwa, he'i upe pygwa-pe.

⁷² —Ndaxéiry, he'i jevy Pedro kunhataí-pe. —Xe apu ramo, taxe moingo asy katu Nhandejáry, he'i. —Ndaikwaáiry xe íxupe, he'i mo'ã Pedro kunhataí-pe Hesu-rehe.

⁷³ Upe riremi onhemo'agwĩ-ma ou-vy Pedro renda-py upe-py opu'ã oĩ-vy va'e:

—Galiléia pygwa nhe'ẽ-rami ave erenhe'ẽ. Hendivegwa voi nipo ra'e nde, he'i íxupe. —Nde rekoha-rehe oroikwaa, he'i íxupe.

⁷⁴ Upe ramo he'i:

—Xe apu ramo, taxe moingo asy katu Nhandejáry, he'i. —Upe va'e xe ndaikwaáiry voi, he'i mo'ã upe pygwa-pe.

Upe-ma ramo pya'e osapukái gáju.

⁷⁵ Ha Pedro imandu'a-ma Hesu nhe'ẽgwe-rehe: “Ne'írã osapukái ramo gáju, Xe ndaikwaáiry voi, ere va'erã xe-rehe mbohapyha-rehe”. Upéa nhe'ẽ-rehe imandu'a-ma ramo Pedro, osẽ-vy ojahe'o. Hasẽ-ma osẽ oho-vy.

27

Hesu ojereraha mburuvixa Pilatos renda-py

(Mc 15.1; Lc 23.1-2; Jo 18.28-32)

¹ Ko'ẽmba-ma ramo, ojogweroaty jevy pa'i ruvixa kwéry, judeu ruvixa kwéry ndive:

—Mba'éixa jajuka uka-ta Hesu-pe? he'i onhombo'e mbo'e-vy hikwái hese.

² Upe-ma ramo, onhapytī-ma íxupe. Ipokwaha reheve ogweraha mburuvixa Pilatos po-py ome'ē-vy.

Ojejuvy Judas

(At 1.16-19)

³ Ha upéi katu. “Ojuka-ta voi nipo Hesu-pe ra'e” he'i ojéupe Judas pe Hesu mombe'uhare ipyhyharā-pe. Upéa-gwi omboasy eterei gwembiapokwe. Omboasy-gwi ome'ēse jevy ojéupe ome'ē va'ekwe ime'ēhare-pe. Upe trinta prata gwigwa moeda ome'ēse jevy mo'ā íxupe kwéry:

⁴ —Ajejavy-ma, he'i. —Heko jejavy e'ŷ va'e amombe'u kuri ijuka ukaharā-pe, he'i judeu ruvixa kwéry-pe Judas onhemombe'u-vy.

Ha ha'e kwéry katu nopenáí joty inhe'ē-rehe:

—Noropenáí ne nhe'ē-rehe, he'i. —Nde ae katu epena ne rembiaporā-rehe, he'i Judas-pe hikwái.

Nopenáí hese.

⁵ Upe ramo oity yvy-py upe trinta moeda. Nhandejáry róga kakwaa koty-py oity. Oity rire, osē ojejuvy hagwā-pyma oho.

⁶ Ha pa'i ruvixa kwéry katu omono'ō no'ō jevy hembieitykwe:

—Ko va'e moeda ojuka uka-ta mo'ā va'e repy, he'i. —Upéa-gwi ndatekoháiry nhamoī hagwā pirapire ryruty-py Nhandejáry róga oī va'e-py, he'i ojóupe.

⁷ Upéixa ramo onhombo'e mbo'e onhondive oikwaa hagwā gwembia-porā. Oikwaa rire, oho ojogwa yvy. Upe yvy tuju-gwi mba'e ryru apohaty mba'ekwe. Gwī yvy akéno-gwi ou va'ekwe ojaty hagwā ojogwa upe va'e yvy.

⁸ Upéa-gwi, ojejuka va'ekwe repykwe-py ojogwa-gwi, ombohéry, “Ojejuka va'ekwe yvy”. Ko'ānga ete peve héry upéixa.

⁹⁻¹⁰ Ko'a-rami ae yma gware Nhandejáry nhe'ē-py omombe'u va'ety Jeremias remimoīgwe kwatia-rehe:

“Oipyhy upe trinta prata gwigwa moeda oho ojogwa tuju-gwi mba'e ryru apohaty mba'ekwe. Nhandejáry xe-vy he'i hagwe-rami oho ojogwa.

Kwimba'e repykwe voi trinta moeda, he'i Israel re'ýi kwéry.”*

Yma he'i hagwe-rami ãy oiko-ma.

“Nahembiapo vaíry ra'e” he'i ramo jepe Hesu-rehe, ome'ē joty ijukaharā-pe (Mc 15.2-15; Lc 23.3-5,13-25; Jo 18.33-19.16)

¹¹ Ha upéi katu omonhembo'y imoī-vy Hesu-pe mburuvixa Pilatos rovagwy-py:

—Nde tipo ereiko ra'e judeu kwéry ruvixagwasu ramo? he'i oporandu-vy íxupe Pilatos.

Ha'e he'i:

—Xe voi aiko, he'i. —Ereha-rami aiko, he'i joty mburuvixa-pe.

¹² Ha pa'i ruvixa kwéry judeu ruvixa kwéry ndive,

—Hembiapo vai-ma, hembiapo vai-ma, he'i joa ramo hese, mba'eve joty nomombe'úiry.

Onhemokirirī rei joty Hesu.

¹³ Upéixa-gwi:

—“Hembiapo vai vai-ma upe va'e” he'i ramo nde-rehe, ma'erā po ra'e nerenhemombe'úiry? he'i íxupe oporandu-vy Pilatos.

¹⁴ Ha ha'e katu mba'eve joty nde'íry. Heta nhe'ē ombojase mo'ā ramo jepe hese, mba'eve joty nomombe'úiry gwī ójehe onhe'ē vai vai va'e-pe.

Upéa rexa-vy, “Ma'erā po Hesu nonhemombe'úi joty gwī ójehe onhe'ē vai vai va'e-pe?” he'i ojéupe mburuvixa opondera-vy Hesu-rehe.

* 27:9-10 Zc 11.12-13

15 Ha oiko jave aretegwasu, oĩ opoi uka va'erã íxugwi. Peteñ onhemoñ preso va'ekwe-gwi oĩ opoi uka jevy va'erã imondo-vy mburuvixa. Upéixa tekoha. Upe ijaty va'e kwéry ojerure va'ekwe-gwi opoi uka-ma imondo-vy.

16 Upéa ojehu jave Hesu-pe, oĩ peteñ onhemoñ va'e preso héry va'e Barrabás. Upéa-pe enterove va'e oikwaa íxupe.

17-18 Ha upéi katu heta kente ojogweroatypa. Upe ramo he'i: "Ndaija'éi-gwi rei Hesu-rehe oipyhy ra'e íxupe heru-vy xe-vy hikwái" he'i ojéupe mburuvixa. Upéa-gwi he'i:

—Kiva'e-gwi po peipota peẽ-my apoi, he'i, —arrabás-gwi para'e, Hesu Cristo héry va'e-gwi para'e? he'i oporandu-vy ijaty jaty va'e kwéry-pe.

19 Upe ramo ogwapy jave Pilatos oĩ-vy mburuvixa ogwapy haty-py, ombou onhe'ẽ hembireko íxupe:

—Upe va'e heko jejavy e'ŷ va'e. Eheja rei katu íxupe, he'i. —Pyhare ahexa kuri íxupe xe kéra-py. Íxugwi anhemondýi. Xe kéra-py ahasa asy ahexa ramo. Esyry katu ijypy-gwi, he'i omondo-vy onhe'ẽ ome-pe.

20 Ha pa'i ruvixa kwéry judeu ruvixa ndive katu,ombo'e mbo'e ijaty jaty va'e-pe:

—“Epoi katu Barrabás-gwi. Hesu ae katu tojejuka” peje katu, he'i ijaty va'e kwéry-pe ojojurupypa opo'ẽ-vy hikwái.

21 —Oĩ mokõi. Kiva'e-gwi tipo peipota apoi? he'i oporandu-vy íxupe kwéry.

Ha ha'e kwéry he'i:

—Barrabás-gwi epoi toho, he'i mburuvixa-pe hikwái.

22 —Aipo ramo, mbava'e tipo ajapo-ta Hesu Cristo héry va'e-rehe? he'i íxupe kwéry.

—Ejuka uka katu íxupe. Kurusugwasu-rehe ejuka uka íxupe, he'i joa joty íxupe.

23 —Ajuka rei va'erã. Nahembiapo vaíry voíte Hesu ra'e, he'i Hesu-rehe íxupe kwéry.

—Emboja katu, emboja katu imoñ-vy kurusugwasu-rehe omano hagwã, he'i joa joa hikwái onhe'ẽ hatãve tãve-vy hikwái.

24 Upe-ma ramo he'i: “Ndaxe pu'akavéi-ma upe ijaty va'e kwéry-rehe” he'i. “Xe rairõ rei-tama hikwái opoxy-gwi. Xe monghyje rei-ma hikwái” he'i ojéupe ikyhyje-vy. Upéa-gwi ojerure y-rehe. Upéa y-py ojepohéi atýra-py. Ojogweroatypa va'e kwéry resa-py ojepohéi:

—Xe potõ-ma, he'i. —Ko heko jejavy e'ŷ va'e ndajukaséi, he'i. —Ndaxe py'a vaíry hese. Pene nhe'ẽ-py ae katu ojejuka va'erã Hesu, he'i Hesu-rehe Pilatos.

25 —Ore nhe'ẽ-py voi tomano, he'i. —Hepyha ae katu ore-vy tojehu. Ore remiarirõ joapyri pyri-pe ave tojehu joty oho-vy, he'i mburuvixa-pe hikwái.

26 Upe rire inhe'ẽ-py opoi Barrabás-gwi imondo-vy. Ha Hesu-pe katu he'i ombopi hagwã íxupe. Ome'ẽ ijukaharã-pe omboja hagwã kurusugwasu-rehe ijuka-vy.

Soldado kwéry onhembohory Hesu-rehe (Mc 15.16-20; Jo 19.2-3)

27 Upe ramo mburuvixa rembigwái kwéry soldado va'e, ogweraha Hesupe. Mburuvixa róga kakwaa koty-py ogweraha íxupe. Upe-py entéro soldado gwive onhomboatypa hese.

28 Ijaoo tee omboi íxugwi hikwái. Omonde hese ao pytã va'e.

29 Upéi nhuatítõ-gwi ojapo íxupe ijegwaka ra'angarã omoñ hagwã inhakã-rehe. Ipo akatúa-py omoñ takwáry. Upéi gwetypy'ã-rehe onhesú hovagwy-py onhembohory-vy hese:

—Toiko are katu judeu ruvixagwasu, he'i omboete ra'anga anga-vy íxupe, onhembohory-vy hese.

³⁰ Upéi katu onygwō nygwō-ma ave Hesu-rehe. Oipyhy ipo pygwa takwáry. Ipo pygware-py onhakārupā rupā íxupe.

³¹ Onhembohorypa rire hese, omboi íxugwi ao pytā va'e. Omonde jevy hese ijaio. Upe rire ogweraha íxupe omboja hagwā kurusugwasu-rehe ijuka-vy.

Omboja Hesu-pe kurusugwasu-rehe ijuka-vy

(Mc 15.21-32; Lc 23.26-43; Jo 19.17-27)

³² Ha upéi katu soldado kwéry Hesu rehevē osē oje'ói-vy pe tetā-gwi. Osē javē, ohogwaitī Cirene tetā mygwa-pe héry va'e Simāo-pe. Ogweraha uka íxupe Hesu kurusugwasurā.

³³ Ogwahē oho-vy Gólgota oje'e ha-py. Akāgwe rendaty-rehe he'i Gólgota.

³⁴ Upe-py uva rykwere pohā hái va'e rehevē ome'ẽ íxupe ho'u uka-vy. Ome'ẽ íxupe pono ohendu eterei ojéupe hasy va'e. Ha otantea rire katu ndo'úiry.

³⁵ Upéi ijuka hagwā-pyma ogwenogwahē íxupe heraha-vy omboja hagwā íxupe kurusu-rehe. Omboja rire soldado kwéry ohuga onhomboja'o ja'o hagwā Hesu aokwe-rehe. Ogana gana va'e ogweraha ijaokwe.*

³⁶ Upéi ogwapy hese orepara-vy.

³⁷ Ha Hesu-rehe hemimombe'ukwe ohai omoī ikurusu-rehe inhakā ári: "Kóá Hesu judeu ruvixagwasu va'e" he'i omoī-vy.

³⁸ Oĩ ave mokōi imonda va'e kurusu-rehe omboja ave imoī-vy. Hesu yke-rehe omoī, peteī ijakatúa-koty, peteī ijasu-koty. Imbyte-py oĩ Hesu.

³⁹ Gwī ohasa oiko-vy va'e opuka hatā hese. Onhakāreity ity onhembohory-vy hese. He'i Hesu-pe hikwái:*

⁴⁰ —“Aity-ta mo'ã Nhandejáry róga kakwaa amopu'ãmba jevy hagwā mbo-happy áry-rupi” ere mo'ã kuri ndéjehe. —Aipo ramo, enheresende katu, he'i. —“Xe Nhandejáry ra'y” ere mo'ã kuri ndéjehe. Aipo ramo egwejy katu kurusu-gwi, he'i onhembohory-vy hese.

⁴¹ Upéixa ave onhembohory hese pa'i ruvixa kwéry judeu rekombo'ehaty ave. Upéixa ave onhembohory hese judeu ruvixa kwéry.

⁴² —Upéa opororesende va'ety. Ha ndaipu'akáiry gwekove-rehe onheresende hagwā, he'i hese onhembohory-vy. —“Xe Israel kwéry ruvixagwasu” he'i kuri ójehe. Aipo ramo ãy togwejy kurusu-gwi jarovia hagwā íxupe, he'i joa hese hikwái.

⁴³ —Nhandejáry-rehe ojerovia oiko-vy va'e. “Xe Nhandejáry ra'y” he'i kuri ójehe. Aipo ramo, oresendese ramo, toresende katu íxupe Nhandejáry ãy, he'i Hesu-rehe judeu ruvixa kwéry onhembohory-vy hese.*

⁴⁴ Upéixa ete ave upe mokōi imonda va'e hendive kurusugwasu-rehe onhemboja va'e, onhe'ẽ rei rei ave hese.

Omano Hesu

(Mc 15.33-41; Lc 23.44-49; Jo 19.28-30)

⁴⁵ Upéi kwarahy mbyte-py pytūmba-ma upe yvy ári. Mbohapy óra peve pytū. Ka'arugwasu peve pytūmba.

⁴⁶ Upe ramo onhe'ẽ hatā Hesu. He'i:

—Eli, Eli, lamá sabactâni? he'i.

Ha'e ae onhe'ẽ-py onhe'ẽ. Upéa he'ise: “Tupā xe Járy, Tupā xe Járy, ma'erā-gwi po xe rejapa xe anho eterei?”* he'i oporandu-vy.

⁴⁷ Ha upe-py oĩ inhe'ẽ ohendu va'e:

—Upéa ohenói Elias-pe, he'i mo'ã Hesu-rehe.

* 27:35 Sl 22.18 * 27:39 Sl 22.7; 109.25 * 27:43 Sl 22.8 * 27:46 Sl 22.1

48 Upe-ma ramo oripara ogweru bucha. Omoakŷ uva rykwere hepy ete e'ŷ va'e-py. Takwáry-py omoĩ, oipyte uka Hesu-pe omboy'u-vy.*

49 Ha outro kwéry katu he'i:

—Eheja katu. Ou-ta para'e Elias oresende hagwã íxupe, he'i hese.

50 Upéi onhe'ẽ hatã jevy-ma Hesu. Ha upe rire katu omano-ma.

51 Upe-ma ramo pya'e ojeka Nhandejáry róga kakwaa pygwa okêgwasu nhugwâha tuvixa ete va'e. Osoro hatã. Yvate-gwi yvy peve ojeka hatã ou-vy. Entéro-rupi omyimba yvy, itaty ojeka.

52 Ojepe'a ijyta. Heta heko marangatu va'e omano va'ekwe onhembotekove jevy-ma.

53 Oyta-gwi osẽ oho-vy. Oike oho-vy Jerusalém tetã marangatu-py heta kente va'e-pe ojehexa uka-vy. Hesu onhemoingove jevy rire upe onhembotekove jevy va'e kwéry ojehexa uka-vy oho Jerusalém-py.

54 Ha gwĩ capitão, soldado ruvixa va'e Hesu-rehe orepara va'e kwéry ndive katu, ohexya yvy omýi ramo. Entéro ojehu va'ekwe gwive ohexya ave. Upéa rexa-vy onhemondýi eterei hikwái. Upe jave ae he'i hikwái:

—Nhandejáry ra'y tee voi nipo ra'e, he'i Hesu-rehe hikwái.

55 Heta kunha oĩ upe-py. Galiléia yvy-gwi ou ra'e. Hesu irũ meme voi gwĩ kunha. Ome'ẽ me'ẽ Hesu-pe hemikotevê.

56 Oĩ Maria Madalena. Oĩ Maria, ha'e Tiago tyvýry José ndive isy ra'e oĩ ave upe-py. Oĩ ave Zebedeu ra'y sy. Oĩ outro kunha kwéry ou va'ekwe ave. Gwĩ kunha mombyry-gwi oma'ẽ joa Hesu-rehe hikwái.

Itakwa-py omoĩ Hesu retekwe

(Mc 15.42-47; Lc 23.50-56; Jo 19.38-42)

57 Ka'aru ete-ma. Ogwahẽ ou-vy imba'e reta va'e héry va'e José. Arimatéia tetã-gwi ou va'ekwe. Ha'e Hesu nhe'ẽ renduha voi.

58 Ogwahẽ rire oho mburuvixa renda-py ojerure Hesu retekwe-rehe:

—Ekwa eme'ẽ íxupe Hesu retekwe, he'i gwembigwái-pe Pilatos.

59 Upéixa-gwi ogweraha hetekwe onhugwã ao morotí iporã va'e-py.

60 Upéi oho ogweraha hetekwe imoĩ-vy hetekwe renderã ipyahu va'e-py. Ita ojo'o ra'e hetekwe renagwã. Upe-py omoĩ hetekwe. Upéi omboapajeréi imondo-vy itagwasu. Omboty hagwã itakwa rokẽ heseve omboapajeréi imondo-vy itagwasu. Ombotypa rire, oheja-ma oho-vy.

61 Ha Maria Madalena, Maria José sy ndive opyta upe-py. Hetekwe renda rokẽ rovagwy-py ogwapy oĩ-vy mokõive.

Soldado orepara Hesu retekwe renda-rehe

62 Iko'ẽ-my aretegwasu pegwarã omoĩmba rire, oho oje'ói-vy Pilatos renda-py. Upe-py oho pa'i ruvixa kwéry fariseu kwéry ndive:

63 —Nde, karai, he'i íxupe —Ore mandu'a upe ijapu va'e Hesu nhe'ẽgwe-rehe. “Mbohapy áry rire anhemoingove jevy va'erã” he'i va'ekwe oikove vyteri jave, he'i.

64 —Aipo ramo, mbohapyha áry peve, emonhangareko uka katu hyru-rehe, he'i. —Ou-ta para'e hemimbo'ekwe omonda hagwã hetekwe, he'i. —Ha upe rire katu, “Onhemoingove jevy-ma Hesu” he'i rei hagwã hese atýra-py. “Upéa Cristo, nhane remiha'arõ va'e” he'i ramo kuri hese, ijapu-ma va'erã voi hese. Ha ãy katu, “Onhemoingove jevy-ma” he'i ramo, ijapu vaive va'erã hese. Upéa-gwi emonhangareko uka katu hyru-rehe, he'i Pilatos-pe judeu ruvixa kwéry.

* 27:48 SI 69.21

65 —Néi, he'i íxupe kwéry. —Peraha katu soldado, he'i. —Tapeho jevy katu. Ani pene ate'ŷ teĩ ha'arõ-vy. Penhangareko porãha-rami, pemonhangareko uka porã porã katu hese, he'i judeu ruvixa-pe.

66 Soldado ome'ẽ rire íxupe ogweraha hagwã, oho oje'óí-vy hikwái. Oho onhangareko-vy hetekwe ryru-rehe. Itagwasu-rehe omoõ imbotyha ete pono oike nhemi koty-py imonda va'e. Upéi he'i:

—Perepara porã katu peiko-vy hetekwe ryru-rehe pono oike nhemi koty-py imonda va'e, he'i soldado kwéry-pe judeu ruvixa kwéry.

28

Hesu onhemoingove jevy-ma (Mc 16.1-10; Lc 24.1-12; Jo 20.1-10)

1 Pytu'uha áry rire, voi ete domingo-py, nako'ẽi vyteri ramo, oho ohexa Hesu retekwe renda. Upe-py oho Maria Madalena, Tiago sy ndive.

2 Upe-ma ramo, omýi eterei yvy. Ogwejy ra'e ou-vy yváy-gwi Nhandejáry rembigwái. Oho hetekwe renda-py, oipe'a imbotyha itagwasu omboapajeréi jevy-vy, ogwapy hi'ári.

3 Overa va'e-rami hendy hova, nhande resa mbojevy-vy. Ijaو morotĩ porã, iky'a e'ŷ va'e ijaو resakã va'e.

4 Ha gwí hetekwe renda-rehe oreparaharágwe onhemondýi eterei-ma íxugwi. Ombopy'a ryrrípa íxupe kwéry heity-vy. Omano va'ekwe-rami ho'a oje'óí-vy hikwái.

5 Ha Nhandejáry rembigwái va'e katu he'i kunha-pe:

—Ani pekyhyje teĩ. Hesu kurusu-rehe onhemboja va'ekwe retekwe-pe peju-ma pehexa kuri.

6 Peheka ramo jepe, ndaiporivéi-ma ko'a-py, he'i. —Oikove jevy-ma kuri. Aipo ho'e hagwe-rami oikove jevy-ma kuri. Oho-ma kuri. Peju katu peẽ pema'ẽ hupagwe-rehe, he'i. —Hendagwe rei-ma oĩ, he'i.

7 —Ha upe rire katu ekwa pya'e emombe'u hemimbo'e kwéry-pe, “Oikove jevy-ma Hesu” peje. “Ne renonderã-rupi oho-ta Galiléia yvy-py” ere hemimbo'e kwéry-pe. “Upe-py erhexa va'erã íxupe” peje hemimbo'e kwéry-pe, he'i. —Upéa nhe'ẽ mombe'u-vy aju, he'i mokõi kunha-pe Nhandejáry rembigwái yváy pygwa.

8 Upe-ma ramo pya'e oripara oho-vy hetekwe rendagwe-gwi pe kunha. Okyhyje ramo jepe, ov'yagwasu joty oho-vy jevy. Hemimbo'e kwéry renda-py oripara oho-vy omombe'u hagwã.

9 Upe-ma ramo ohogwaitĩ íxupe Hesu:

—Mba'éixa pa, he'i kunha-pe.

Upéi kunha onhemo'agwí-ma íxugwi oipyhy ipy omboete íxupe.

10 Upéi Hesu he'i:

—Ani pekyhyje teĩ. Ekwa teremombe'u gwí xe-rehe ojerovia va'e-pe, “Tapeho katu Galiléia yvy-py. Upe-py xe rexa va'erã, he'i kuri Hesu” ere íxupe kwéry, he'i kunha-pe Hesu.

Hesu retekwe-rehe orepara va'erágwe omombe'u ojehu va'ekwe

11 Kunha oho javé, oĩ soldado Hesu retekwe-rehe orepara va'erágwe va'e. Oho oje'óí-vy Jerusalém tetã-my omombe'u pa'i ruvixa kwéry-pe entéro ojehu va'ekwe gwive.

12 Upéi ojogweroaty pa'i ruvixa kwéry judeu ruvixa ndive onhombo'e mbo'e-vy. Aipo ramo, heta plata ome'ẽ soldado kwéry-pe ijapu hagwã Hesu retekwe-rehe:

13 —Atýra-py peje, “Pyhare ou nhemi Hesu remimbo'ekwe. Oroke jave omonda hetekwe heraha-vy” he'i. —“Nororepara porâiry-gwi, ojereraha hetekwe” peje rire, ani pekyhyje teñ, he'i íxupe.

14 —Upéa nhe'ẽ ohendu ramo mburuvixa, oronhomongeta arã hendive. Noromoingo asy ukái va'erã íxupe, he'i soldado-pe hikwái plata me'ẽ-vy.

15 Upe ramo upe soldado kwéry ogweraha plata. Judeu ruvixa he'i hagwérami ojapo, onhemombe'u mbe'u-vy. Judeu kwéry pa'ũ-rupi oho inhe'ẽgwe. Ko'ánga ete peve upéa rehegwa nhe'ẽ omombe'u mbe'u joty ojóupe.

“Tapeho opa-rupi xe moirûharã harã-pe xe mombe'u-vy” he'i Hesu gwemimbo'e kwéry-pe.

(Mc 16.14-18; Lc 24.36-49; Jo 20.19-23; At 1.6-8)

16 Ha upéi katu onze hemimbo'e kwéry va'e oho oje'ói-vy Galiléia yvyppy. Ojeupi oje'ói-vy yvyaty ári upe Hesu remimombe'ukwe-py ojeupi hagwã oje'ói-vy.

17 Ohexa ramo íxupe, gwetypy'ã-rehe onhesũ omboete-vy íxupe hikwái. Ha oĩ joty hese ndojerovia teéiry va'e. “Hesu para'e, tapa ndaha'éi Hesu” he'i joty hese va'e.

18 Upe ramo onhemo'agwî-ma gwemimbo'e kwéry-gwi ou-vy:

—Xe mbopu'aka-ma Nhandejáry enterove va'e-rehe, he'i. —Entéro yváy pygwa, entéro ko yvy-py oĩ va'e gwive ave oheja xe pogwy-py meme imoĩ-vy, he'i.

19 —Aipo ramo, xe nhe'ẽ-py tapeho katu opa-rupi. Entéro tetã tetã ko yvyppy oĩ va'e-rupi gwive, tapeho xe moirûharã harã-pe xe mombe'u-vy, he'i. —Xe renduharã harã-pe xe mombe'u peiko-vy. Pemongarai rai íxupe kwéry xe Ru réry-py, xe ta'ýry réry-py ave. Nhe'ẽ Marangatu tee va'e réry-py ave pemongarai rai peiko-vy.

20 Peje, “Opamba'e ore orojapo hagwã Hesu ore-vy he'i va'ekwe gwive, nde ave ejapo katu” peje xe renduharã-pe, he'i. —Ha xe ae katu apomoirû tee meme va'erã. Ndapoheja mo'ãi voíte peẽ-my. Ko yvy oiko vyteri jave xe apomoirû meme va'erã, he'i Hesu gwemimbo'e kwéry-pe omombe'u paha-vy onhe'ẽ.

Hesu Cristo rehewa nhe'ẽ porã

Marcos remimombe'ukwe

o evangelho de Marcos

¹ Ìy anhepyrũ amombe'u-vy Hesu Cristo rehewa nhe'ẽ porã. Ha'e katu Nhandejáry ra'y tee voi.

João Batista rehewa nhe'ẽ

(Mt 3.1-12; 11.10-14; Lc 3.1-18; Jo 1.19-28)

²⁻³ Yma va'ekwe oiko va'ekwe Isaías. Nhandejáry nhe'ẽ-py omombe'u-vy oiko va'ekwe. João Batista rekorã mombe'u-vy oiko va'ekwe. Hesu rekoha mombe'uhā rekorã omombe'u va'ekwe. A-rami omoi va'ekwe kwatia-rehe onhe'ẽ:^{*}

"He'i Nhandejáry: Ko va'e xe nhe'ẽ mombe'uhaty. Amondo-ta íxupe ne renonde omopotí hagwã nde raperã. Nde rerosapukái va'erã ne mombe'u-vy. Tekwaty e'ŷ-my nde rerosapukái va'erã. He'i va'erã upe pygwa-pe: Pemopotí katu Nhandejáry raperã. Pemokarẽ karẽ e'ŷ katu íxupe tape. Penhemooatyrõ katu henonde. Pembohape porã katu íxupe tape, he'i va'erã ne mombe'u-vy, he'i Nhandejáry."*

Upéixa voi omoi va'ekwe kwatia-rehe onhe'ẽ Isaías, Nhandejáry nhe'ẽ-py omombe'u va'ety.

⁴ Upéa-gwi yma gware he'i hagwe-rami ojekwaa-ma Hesu rekoha mombe'uhā. João Batista oporomongarai va'ety ojekwaa ou-vy. Tekwaty e'ŷ-my ojekwaa. Ojekwaa ramo, ohopa João renda-py ijaty va'e kwéry. Hemimombe'urã ohenduse hikwái:

—Erova katu nde rekoha, he'i. —Enhemongarai uka katu nde ave, he'i.

—Nde rekoha ererova ramo, erenhemongarai uka ramo ave, omboyke arã ndéhegwí Nhandejáry ne rembiapo vaikwe, he'i onhemonhe'ẽ-vy íxupe kwéry.

⁵ Upéixa ramo, ohopa João renda-py Judéia tetã mygwa. Ohopa ave entéro Jerusalém tetã mygwa. Onhemongarai uka hagwã Jordão ysyry-py oje'óí. Onhemombe'u ramo João-pe gwembiaapo vaikwe-rehe, omongaraipa íxupe kwéry.

⁶ Camelo mymba ragwekwe-gwi onhemonde oiko-vy. Vaka pire iku'a jopyha. Tukúry-rehe okaru. Ei ka'agwy ave ho'u oiko-vy.

⁷ He'i omombe'u-vy:

—Ou-ta peteĩ xe rapykwerigwa va'e ipu'akave va'e xéhegwí. Amboete eterei íxupe. Upéa-gwi xe miríve-gwi, xe atí-gwi ave, ni hembigwái ramo jepe ndaikatúi apyta.

⁸ Xe katu oromongarai kuri y-py. Ha'e katu napene mongaraivéi-ma va'erã y-py xe oromongaraiha-rami. Omoingo va'erã ae peẽ-my Nhe'ẽ Marangatu tee va'e pende py'a-py optya va'erã, he'i íxupe kwéry.

João Batista omongarai Hesu-pe

(Mt 3.13-17; Lc 3.21-22; Jo 1.32-34)

⁹ Upe jave oiko joty Hesu Nazaré tetã-my. Galiléia yvy-py oiko. Ha upéi katu ogwahé ou-vy João renda-py. Ha João katu omongarai íxupe Jordão ysyry-py.

¹⁰ Osẽ jave y-gwi, Hesu ohex-a-ma ojekwaa pya'e ramo yváy-py. Upe-gwi ha'e ohex-a ogwejy va'e. Pykasu-rami ogwejy ou-vy Nhe'ẽ Marangatu tee va'e. Ójehe ogwejy ramo ohex-a.

* 1:2-3 Mt 3.1 * 1:2-3 Is 40.3

¹¹ Ha upéi katu onhehendu yváy-gwi onhe'ẽ va'e:
—Nde katu xe ra'y xe rembihayhu. Xe orogwerohory ete va'e, he'i íxupe yváy-gwi onhe'ẽ va'e.

*Satanás ombojavyse mo'ã Hesu-pe
(Mt 4.1-11; Lc 4.1-13; Hb 2.18; 4.15)*

¹² Ha upéi katu pya'e ogweraha Hesu-pe Nhe'ẽ Marangatu tee va'e. Tekwaty e'ŷ-my ogweraha íxupe.

¹³ Upe-py optya Hesu. Quarenta áry optya ohekoteta hagwã íxupe anháy ruvixa Satanás. Ombojavyse ramo jepé íxupe, ha'e ohexá uka jotoy Satanás-pe gweko mbaraeteha. Optya oĩ-vy Hesu nhu pygwa mymba ndive. Ha upe jave ogwahẽ ou-vy yváy pygwa Hesu ha-py hembigwairã.

*Hesu onhemonhe'ẽ
(Mt 4.12-17; Lc 4.14-15)*

¹⁴ Ha upéi katu João onhemoõ preso. Onhemoõ preso rire, Hesu oho outro tetã-my. Galiléia yvy-py oho. Oho omombe'u Tupã Nhandejáry rehewa nhe'ẽ porã:

¹⁵ —Ogwahẽ-ma hi'óra, he'i. —Pene mo'agwĩ-ma ou-vy Nhandejáry pende ruvixarã, he'i. —Emboasy ne rembiapo vaikwe, he'i. —Erova katu nde rekoha. Erovia katu Nhandejáry rehewa nhe'ẽ porã, he'i.

*Eju xe moirũ, he'i Hesu
(Mt 4.18-22; Lc 5.1-11)*

¹⁶ Upéi Hesu oho ogwata Galiléia yugwarusu yke-rehe. Ohexá oho-vy Simão-pe tyvýry ndive. Tyvýry héry André. Ohexá omombo ramo oity hagwã y-py kyha. Omombo ramo oipyhy hagwã pira-pe ohexá. Ha'e kwéry katu pira jopoihaty voi.

¹⁷ —Eju katu xe moirũ, he'i íxupe Hesu. —Nde katu pira jopói kwaahaty voi, he'i íxupe. —Ha xe orombo'e-ta xe moirũ uka hagwã yvypóry kente kwéry-pe, he'i íxupe kwéry.

¹⁸ Ohendu-ma ramo upéa nhe'ẽ, pya'e oheja okyha. Oho hupive omoirũ hagwã íxupe.

¹⁹ Ha upéi henonde-rupi oho Hesu. Ohexá oho-vy mokõi Zebedeu ra'y, Tiago, tyvýry João ave. Ohexá omoatyrõ ramo kanoagwasu-py kyha.

²⁰ Ohexá ramo, pya'e ohenói íxupe kwéry Hesu. Ha ohejapa voi oirũ kwéry oho-vy. Kanoagwasu-py oheja íxupe kwéry oho-vy. Gwu Zebedeu ave oheja. Oheja ave gwembigwái. Oho hupive.

*Hesu omosẽ imondo-vy anháy-pe
(Lc 4.31-37)*

²¹ Upéi katu ogwahẽmba oho-vy Cafarnaum tetã-my. Pytu'uga áry-py pya'e oike Hesu ojeporahéi haty-py. Oike ramo onhemonhe'ẽ íxupe kwéry.

²² Ha henduháry,

—Mba'éixa po onhemonhe'ẽ, he'i opondera-vy hese hikwái: —Iporã ete inhe'ẽ, he'i. —Inhe'ẽ ndaha'éi gwĩ judeu rekombo'ehaty nhe'ẽ-rami, he'i hese. —Ha'e kwéry ndoikwaapáiry onhemonhe'ẽ hagwã. Ha'e ae onhe'ẽ nomombe'úiry hikwái. Ha Hesu katu ha'e ae onhe'ẽ ha'e omombe'u. Oporomonhe'ẽgendu kwaa va'e-rami onhemonhe'ẽ, he'i Hesu-rehe opondera-vy hikwái.

²³ Upe-ma ramo oime ojeporahéi haty-py anháy ojepota va'e hese. Osa-pukái he'i-vy:

²⁴ —Nde Hesu Nazaré pygwa. Ma'erã ore toryva? he'i íxupe. —Ereju-ma pa ore hundi hagwã? oporandu íxupe. —Xe oroikwaa voi kiva'e pa nde, he'i íxupe.
—Nde katu Tupã Nhandejáry ra'y imarangatu va'e, he'i Hesu-pe.

²⁵ Ha oja'o íxupe Hesu:

—Ekirirí katu. Esẽ íxugwi, he'i anháy-pe.

²⁶ Ha upéa-gwi omboheterryrýi-ma íxupe anháy. Osapukái osẽ-vy anháy íxugwi oho-vy.

²⁷ Ha ha'e kwéry,

—Mba'éixa po omosẽ” he'i opondera eterei-vy hese: —Mba'eixagwa tipo kóia? he'i. —Teko pyahu-py nhane mbo'e ra'e, he'i. —Ohendu uka kwaa va'e-ramiombo'e Hesu. Omanda ramo, ohendu voi íxupe anháy, he'i hese ojóupe hikwái.

²⁸ Upe-ma ramo onhehendu herakwã opa-rupi. Enterovete ohendupa inhe'ë. Galiléia yugwarusu jerekwe rupigwa gwive ohendupa.

Hesu ombogwera Simão raixo-pe

(Mt 8.14-15; Lc 4.38-39)

²⁹ Osẽ ramo ojeporahéi haty-gwi, ogwahẽ oike rehewe Simão róga-py. André oiko ave ojoha-py. Ogwahẽ onhondive Tiago João ave.

³⁰ Ha Simão raixo onheno oĩ-vy. Hasy heteraku-gwi. Pya'e omombe'u hese Hesu-pe.

³¹ Oho Hesu. Oipopyhy. Omopu'ã íxupe. Oheja-ma íxupe heterakukwe. Ha upéi katu okwera rire Simão raixo, ha'e ogweru íxupe kwéry hemi'urã.

Hesu ombogwera heta hasy va'e-pe

(Mt 8.16-17; Lc 4.40-41)

³² Ka'aru ete. Oike-ma kwarahy. Oupa Hesu renda-py. Ogweru íxupe hasy va'e kwéry. Opa anháy rerekoha va'e gwive ogweru íxupe.

³³ Ha entéro tetã mygwa ijatypa hokẽ rovagwy-py.

³⁴ Ha Hesu ombogwera heta-ma hasy va'e-pe. Opaixagwa mba'asy-gwi ombogwera. Omosẽ ave íxugwi kwéry heta anháy. Ha oikwaa voi íxupe anháy. Upéa-gwi omokirirí íxupe kwéry. Ndohejái onhe'ë.

Hesu osẽ oho tekwaty e'ŷ-my

(Lc 4.42-44)

³⁵ Ko'ë morotí javé opu'ã Hesu. Osẽ oho ha'e anho tekwaty e'ŷ-my. Opyta upe-py onhomongeta-vy Tupã Nhandejáry ndive.

³⁶ Ha upéi katu oheka heka íxupe Simão inhirũ gwéry ave.

³⁷ Otopa-ma ramo, he'i Hesu-pe:

—Enterovete nde reka kuri, he'i íxupe.

³⁸ Ha Hesu he'i:

—Jaha katu tetã ambue mbue-rupi tanhemonhe'ë upe-py ave. Upéa ajapo hagwã asẽ aju-vy, he'i íxupe kwéry.

³⁹ Upe rire oho Hesu opa-rupi. Galiléia yugwarusu jerekwe-rupi oho. Onhemonhe'ë nhe'ë oiko-vy ojeporahéi haty haty-rupi. Omosẽ mosẽ ave oiko-vy kente kwéry-gwi anháy-pe.

Okwera ijaipa va'e

(Mt 8.1-4; Lc 5.12-16)

⁴⁰ Ha mba'asy vai-gwi ijaipa va'e katu ogwahẽ ou-vy iha-py. Onhesũ omboete-vy Hesu-pe. Ojerure íxupe okwera hagwã:

—Nhane mbogwerahaty voi nde, he'i. —Xe-vy para'e xe mbogwera arã ave ra'e? he'i Hesu-pe.

⁴¹ Ha Hesu oiporiahuvereko íxupe. Upéa-gwi oipysø opo. Opoko hese:

—Orombogwera-ta voi katu nde-vy, he'i. —Ekwera katu, he'i íxupe.

⁴² Hesu onhe'ẽ-ma ramo íxupe, okwera-ma. Opa aiai íxugwi.

⁴³⁻⁴⁴ —Aníke eremombe'u avave-pe orombogweraha, he'i jevy jevy íxupe. —Ekwa mani ehexa uka pa'i-pe erekweramaha, he'i íxupe. —Eme'ẽ íxupe upe Moisés amyrĩ ereme'ẽ hagwā he'i va'ekwe. Ha upéixa enterove oikwaa-ta erekweramaha, he'i íxupe.

Upéi omondo pya'e íxupe Hesu.

⁴⁵ Ha upe okwera va'e katu osẽ omombe'upa joty. Opa-rupi omosarambi joty herakwā. Upéa-gwi ndikatuvéi-ma oike Hesu tetã tetâve-rupi. Tekwaty e'ŷ-my katu opyta oĩ-vy. Oupa vyteri Hesu renda-py. Opa-rupigwi ou hikwái.

2

Hesu ombogwera hajy jeapa va'e-pe

(Mt 9:1-8; Lc 5:17-26)

¹ Ha Hesu katu nda'aréi oiko tekwaty e'ŷ-my. Oho jevy oike Cafarnaum tetã-my. Oike ramo, ohendu-ma oimeha hóga-py hikwái.

² Upe rire heta ete ojogweroaty. Upéa-gwi ndikatúi oike avave hogá py-py. Gwĩ ogwahẽ va'e hokẽ rovagwy-rupi rei oiko hikwái. Ha Hesu katu omombe'u oiko-vy íxupe kwéry. Nhandejáry rehewa nhe'ẽ porã omombe'u.

³ Omombe'u jave, ogweru Hesu renda-py hajy jeapa va'e. Irundyve rehevè ogweru henda-py.

⁴ Heta eterei ojogweroaty-gwi ndikatúi ogweroike Hesu renda-py. Upéa-gwi ojeupi oipe'a óga, Hesu ári ombokwa. Ombogwejy mbegwe katu imbouvy. Ombogwejy hajy jeapa va'e-pe. Hupa rehevè ombogwejy.

⁵ Irundyve-pe, hajy jeapa va'e-pe ave ohexa Hesu. Ohexa ojerovia-ma ramo ójehe. Upéi he'i hajy jeapa va'e-pe:

—Amboyke-ma voi ne rembiapo vaikwe ndéhegwi, xe ra'y, he'i íxupe Hesu.

⁶ Ha oĩ upe-py gwĩ judeu rekombo'ehaty. Onhepy'amongeta-vy ogwapy upe-py:

⁷ “Ma'erã upe va'e onhe'ẽ upéixa?” he'i oporandu-vy ojéupe. “Onhemon-handejáry ra'anga anga rei-vy, onhe'ẽ rei rei Hesu” he'i. “Tupã Nhandejáry ha'e anho mante omboyke kwaa va'e nhandéhegwi nhane rembiapo vaikwe” he'i. “Ndaipóri avave omboyke va'erã” he'i opy'a-py ojéupe.

⁸ Onhepy'amongeta ramo upéixa hikwái, opy'a-py oikwaa-ma Hesu:

—Ma'erã-gwi erenhe'ẽ vai rei nde py'apy-py? he'i.

⁹ —Pejeapysaka porã katu xe nhe'ẽ-rehe, he'i íxupe kwéry. —Oĩ ramo, “Amboyke-ma ndéhegwi ne rembiapo vaikwe” he'i va'e katu, ndajahexáí hemimboyke, he'i. —Omboyke para'e. Tapa nomboykéiry ra'e. Ndajahexáiry. Ha oĩ ramo, “Epu'ã katu, eraha nde rupagwe, egwata eho-vy” he'i rei va'e katu, jahexa ave. Nomopu'ãiry.

¹⁰ Ay aikwaa uka-ta peẽ-my xe nhe'ẽ rei e'ŷha ko yvy-py. Xe Nhande Ryke'y tee va'e voi. Xe nhe'ẽ-py rei amboyke-ma voi yvypy rembiapo vaikwe. Peikwaa porã hagwā xe nhe'ẽ rei e'ŷha, ambogwera-ta upe hajy jeapa va'e-pe, he'i Hesu onhe'ẽ-vy gwĩ imbo'eháry-pe.

Upe rire-ma ojere hajy jeapa va'e-pe:

¹¹ —Ha'e-ta nde-vy. Epu'ã eraha nde rupagwe. Xe nhe'ẽ-py tereho nde róga-py, he'i íxupe.

¹² Ha upéi inhe'ẽ-py opu'ã oho. Gwupa ohupi heraha-vy. Osẽ oho enterove rovagwy-rupi. Upéixa Hesu ohexa uka íxupe kwéry onhe'ẽ rei e'ŷha. Upéa ohexa ramo ijaty va'e kente,

—Mba'éixa po oporombogweraha, he'i ojóupe opondera-vy hese hikwái.

Nhandejáry-pe omomba'egwasu hikwái.

—Ndojehexáiry va'e koixagwa, he'i ojóupe hikwái.

*Hesu ohenói Levi-pe
(Mt 9.9-13; Lc 5.27-32)*

¹³ Ha upéi katu oho jevy Hesu yugwarusu rembe-py. Ojogweroatypa jevy hikwái upe-py. Ou Hesu renda-py. Onhemonhe'ẽ íxupe kwéry upe yugwarusu rembe-py.

¹⁴ Upéi ogwata oho-vy y rembe-rupi. Ohexa oho-vy Levi-pe. Ha Levi Alfeu ra'y. Ohexa íxupe nhane mbopaga haty-py:

—Eju xe moirũ, he'i Levi-pe.

Ha upéi katu opu'ã. Oho hupive.

¹⁵ Ha Hesu okaru oĩ-vy Levi róga-py. Okaru ave Hesu ndive, hemimbo'e kwéry ndive ave, nhane mbopaga va'ety, heta ojejavvy va'e ave. Heta oĩ Hesu irũ. Upéa-gwi heta voi okaru indive.

¹⁶ Ha gwĩ fariseu judeu rekombo'ehaty va'e ohexa íxupe. Ohexa okaru ramo ojejavvy va'ety ndive, nhane mbopaga va'ety ndive ave:

—Ma'erã po okaru ra'e Hesu nhane mbopaga va'ety ndive, gwĩ ojejavvy va'e ndive ave, he'i oporandu-vy hemimbo'e kwéry-pe hikwái.

¹⁷ Ohendu-ma ramo upéa Hesu, omombe'u íxupe kwéry arandu rehewa nhe'ẽ nhane mbogwerahaty rehewa-rami:

—Nhane resãi ramo, nanhaikotevẽiry va'e nhane mbogwerahaty-rehe. Nhande rasy ramo ae, nhaikotevẽ va'e hese. Xe ndajúi ahenói hagwã, “Xe py'a poti” he'i ójehe va'e ou hagwã xe renda-py, he'i Hesu. —Ha gwĩ ojejavvy va'e katu aju va'ekwe ahenói-vy, he'i joty íxupe kwéry Hesu hemimopotíse-rehe onhemoirũ uka hagwã.

*“Ne remimbo'e kwéry katu ma'erã po ndohasáí okaru e'ŷ reheve” he'i oporandu-vy Hesu-pe
(Mt 9.14-17; Lc 5.33-39)*

¹⁸ Ha upéi katu ohasa okaru e'ŷ reheve João remimbo'e kwéry, fariseu kwéry ave. Ndaha'ei ojóupe gwarã-rehe upéixa oiko hikwái. Nhandejáry pegwarã-rehe ae upéixa oiko hikwái. Upe ramo ogwahẽ ou-vy Hesu renda-py oporandu va'e:

—Ma'erã ohasa okaru e'ŷ reheve João remimbo'e kwéry fariseu kwéry ave? he'i. —Ha ne remimbo'e kwéry katu ma'erã po ndohasáí okaru e'ŷ reheve? he'i oporandu-vy Hesu-pe.

¹⁹ Ha Hesu oiporu mendaha rehewa nhe'ẽ oikwaa uka porã hagwã. He'i íxupe kwéry:

—Oĩ vyteri ramo omenda va'ekwe, ndikatúi ohasa okaru e'ŷ reheve he'yi kwéry. Ma'erã ere kuri, “Tohasa okaru e'ŷ reheve” he'i oporandu-vy. — Ndikatúi ohasa okaru e'ŷ reheve onhondive oime ramo.

²⁰ Ha upe rire katu ogwahẽ va'erã hi'áry. Ojereraha va'erã íxugwi kwéry omenda va'ekwe. Ojereraha rire nda'ivýi va'erã okaru he'yi kwéry, he'i upe pygwa-pe ojehegwaa omombe'u-vy.

²¹ Upéi Hesu oiporu ao rehewa nhe'ẽ, uva rykwere rehewa nhe'ẽ ave oikwaa uka porã hagwã íxupe kwéry. He'i íxupe kwéry:

—Nanharemendái ipyahu va'e-py ao tujakwe. Nharemenda ramo, onhy arã ra'e ipyahu va'e ojepoapy-vy. Omondoro arã ao tujakwe-pe. Opyta arã ra'e osorove, he'i.

²² —Nanhanhunháiry uva rykwere pyahu va'e hyru vakapi nda'ijyvéi ma va'e-py. Nhanhunha ramo, ovu omondoropa-ma va'erã gwyru tuja. Osyrypa arã pe uva rykwere ra'e. Osoropa arã hyrukwe. Uva rykwere pyahu va'e katu

nhanhunha hyru pyahu-py ave, he'i Hesu ohekombopyahu kwaa uka hagwā íxupe kwéry.

*"Xe pytu'uhá áry járy" he'i Hesu
(Mt 12.1-8; Lc 6.1-5)*

²³ Ha upéi katu pytu'uhá áry-py oho ogwata Hesu. Trigoty mbyte-rupi oho. Ha hemimbo'e kwéry oipo'o-ma oho-vy trigo rope.

²⁴ Ha he'i Hesu-pe fariseu kwéry:

—Ema'ẽ hese, he'i. —Ma'erā po ha'e kwéry oipo'o trigo rope pytu'uhá áry-py? Jaipo'o ramo trigo rope, nhamba'apo voi. Ndikatúi nhamba'apo pytu'uhá áry-py, he'i Hesu-pe.

²⁵ Ha he'i íxupe kwéry Hesu:

—Ma'erā eremonhe'ẽ nhe'ẽ rei Nhandejáry kwtia nhe'ẽ, Davi amyrī re-hegwa nhe'ẽ? Mba'éixa katu ndereikwaáiry? he'i oporandu-vy íxupe.* Upéi he'i:

—Nahembi'úi-gwi, ivare'apa va'ekwe Davi inhirū gwéry ave.

²⁶ Upéa-gwi oike koty-py va'ekwe. Nhandejáry-pe nhambete haty-py oike, oiko ramo Abiatar pa'i ruvixagwasu ramo. Ho'u va'ekwe gwī mbojape Nhandejáry rovagwy-py pa'i remimoigwe. Nhandejáry ndohejái avave-pe ho'u va'erā upe mbojape. Pa'i kwéry rembi'u ae. Upéa ndikatúi ho'u avave. Ha Davi ae katu ho'u joty va'ekwe. Pa'i e'ŷ ramo jepe Davi ho'u joty va'ekwe. Omongaru ave oirū gwéry val'ekwe, he'i oikwaa uka-vy íxupe kwéry. —Iporā voi ra'e ja'u trigo rope ko'ánga, he'i oikwaa uka-vy.*

²⁷ Upéi he'i jevy íxupe kwéry Hesu:

—Omoĩ va'ekwe Tupã Nhandejáry upe pytu'uhá áry nhane kane'õgwa hagwā. Teko rei remimombe'u nhane mbohasa asy hagwā nomoíry va'ekwe. Nhande-rehe ha-py ae katu omoĩ va'ekwe pytu'uhá áry, he'i íxupe kwéry.

²⁸ —Ha xe katu Nhande Ryke'y tee va'e. Upéa-gwi xe ae pytu'uhá áry járy voi, he'i. —Xe ae pytu'uhá áry moĩha voi, he'i. —Xe ae amandave va'e, he'i íxupe kwéry Hesu.

3

*Okwera ipo ypi va'e
(Mt 12.9-14; Lc 6.6-11)*

¹ Ha upéi katu oike jevy Hesu ojeporahéi haty-py. Oike ramo ohexama oĩ ramo ipo ypi va'e. Upe ramo judeu ruvixa orepara Hesu-rehe:

² —Oporombogwera-ta para'e pytu'uhá áry-py? he'i hese oporandu-vy ojóupe hikwái.

Upéa-gwi orepara para hese hikwái ohexahagwā. Oity vai ukase mo'ã Hesu-pe. Oporombogwera ramo, "Omaba'apo ra'e", he'ise hese. Tembiapo vai ombojase mo'ã hese.

³ Ha Hesu he'i ipo ypi va'e-pe:

—Eju katu enhembo'y ore kwéry rovái, he'i íxupe.

⁴ Upe rire oporandu judeu ruvixa-pe:

—Iporā tipo pytu'uhá áry-py nhane rembiapo porā e'ŷ? Erejohu porā va'erā tipo jajapo vai ramo? Iporā tipo pytu'uhá áry-py nhaporombogwera e'ŷ? Erejohu porā va'erā tipo japorojuka ramo? he'i íxupe kwéry.

Onhe'ẽreitypa íxupe kwéry. Ha ha'e kwéry katu opyta okiririmbá hikwái íxugwi.

* 2:25 1 Sm 21.1-6 * 2:26 Lv 24.9

5 Ha upéi katu Hesu ndaija'éi ha'e kwéry heko vaiha-rehe orepara para-vy hese kwéry. Ndovy'avéi-ma. Ha'e kwéry nainhakã porãi-gwi, nainharan-duséiry-gwi, ndovy'áiry:

—Eipysó katu nde po, he'i íxupe, ipo ypi va'e-pe.

Oipysó ramo, okwera-ma ipo.

6 Ha fariseu kwéry osẽmba oho-vy íxugwi. Osẽ rire pya'e ojogweroaty Herodes irũ gwéry ndive:

—Mba'éixa tamo ra'e jajuka íxupe, he'i oporandu randu-vy ojóupe hikwái.

Ombogwera gwera hasy va'e kwéry Hesu

(Mt 4.24-25; Lc 6.17-19)

7 Ha upéi katu oho jevy Hesu yugwarusu rembe-py. Gwemimbo'e kwéry ndive oho. Heta eterei Galiléa yugwarusu jerekwe rupigwa oho ave hapykwéri. Heta eta ou upe Hesu ojapo va'ekwe rerakwã rendu-vy. Ohendu heta Judéia pygwa ave.

8 Ohendu heta Jerusalém pygwa, heta Iduméia pygwa ave. Heta Jordão ysry rovái pygwa ave ohendu. Ohendu heta Tiro jere rupigwa. Sidom jere rupigwa ave herakwã ohendu. Upéa-gwi oupa ete voi Hesu renda-py hikwái.

9-10 Ou ramo hikwái omongwera gwera heta va'e-pe Hesu. Upéa-gwi ijatypa hasy va'e kwéry opoko hagwã hese onhembogwera ukase-vy.

Upe ramo he'i Hesu:

—Emoĩ porã katu xe-vy xe renagwã kanóa pono xe jopy eterei, he'i gwemimbo'e kwéry-pe.

11 Ha anháy rerekoha katu ohexa ramo íxupe, ojeity ity Hesu rovagwy-rupi osapukái-vy:

—Nde katu Tupã Nhandejáry ra'y voi, peteĩ teĩ he'i ojeity-vy íxupe.

12 —Ani xe mombe'u mbe'u kiva'e pa xe, he'i peteĩ teĩ-pe oja'o-vy.

Hesu oiporavo doze kwimba'e-pe oirurã

(Mt 10.1-4; Lc 6.12-16)

13 Upéi ojeupi oho-vy yvyatyrusu-py. Ohenói gwembiporavokwe-pe. Ha oupa Hesu renda-py.

14 Ha Hesu katu oiporavo doze kwimba'e-pe omoirã hagwã íxupe:

—Oromondo-ta erenhemonhe'ë hagwã.

15 Xe nhe'ë-py eremosë-ta anháy, he'i íxupe kwéry.

16 Upéixa-rupi oiporavo Simão-pe. Ha Simão-pe ombohéry joapy Pedro-py.

17 Oiporavo ave Zebedeu ra'y-pe, Tiago, tyvýry João ave. Upe mokoïve va'e ombohéry joapy ave Boanerges-py. Héry he'ise: Tyapu ramigwa.

18-19 Oiporavo ave André, Filipe, Bartolomeu ndive. Oiporavo Mateus, Tomé, Alfeu ra'y Tiago ndive. Oiporavo ave Tadeu, Simão ndive. Upe va'e gwí huvixa ramo oiko va'e-pe omosëse va'e kwéry irũ va'ekwe. Oiporavo ave Judas Iscariotes. Upe va'e Hesu pyhyharã-pe omombe'u va'erã. Upe doze kwimba'e oiporavopa-ma Hesu oirürã.

Judeu rekombo'ehaty onhe'ë rei rei Hesu-rehe

(Mt 12.22-32; Lc 11.14-23)

20 Upéi Hesu oike oho-vy oga py-py. Ha heta eta ojogweroaty jevy. Upéa-gwi ndikatúi okaru Hesu inhirã gwéry ave.

21 Upéa ohendu ramo, Hesu róga pygwa osẽ oho onhangareko hagwã hese heraha-vy.

—Itavy, he'i mo'ã hese hikwái.

Upéa-gwi osẽ oho onhangareko hagwã mo'ã hese he'ýi kwéry.

22 Ha judeu rekombo'ehaty katu Jerusalém-gwi ou va'ekwe he'i:

—Gwī Belzebu anháy ruvixa katu ojepota ra'e Hesu-rehe. Upéa-gwi Belzebu nhe'ẽ-py omosē anháy imondo-vy. Upe anháy ruvixa nhe'ẽ-py omosē íxupe kwéry, he'i mo'ã hese hikwái.

²³ Upe va'e-rupi ohenói íxupe kwéry Hesu. Arandu rehewa nhe'ẽ omombe'u íxupe kwéry, tetā mygwa rehewa nhe'ẽ poru-vy. Imbaraete va'e rehewa nhe'ẽ oiporu ave:

—Mba'éixa katu omosē-ta hesegwa Satanás, upe anháy ruvixa va'e, he'i. —Ndikatúiry omosē.

²⁴ Ha mburuvixagwasu re'ýi ndaijojavéi-ma ramo, ndoiko poravéi-ma.

²⁵ Ha hóga pygwa ndaijojavéi-ma ramo, ndoiko poravéi-ma.

²⁶ Ha Satanás re'ýi kwéry ave ndaijojavéi-ma ramo ra'e, ndoiko poravéi-ma arã ra'e Satanás. Ndoikovéi-ma arã ra'e. Opa-ma arã ra'e, he'i.

²⁷ —Ha ndikatúi avave oike imbaraete va'e róga-py omonda hagwā imba'e kwéry-rehe. Onhapytī ranhe ramo ae íxupe, ogwerahapa arã hóga-py oĩ va'e, he'i íxupe kwéry Hesu.

Upéixa ha'e kwéry ijapuha oikwaa uka íxupe. Anháy ndikatúi omosē ojehewa, he'i ramo oikwaa uka íxupe ha'e kwéry ijapuha.

²⁸⁻³⁰ —Anháy ojepota ra'e Hesu-rehe, he'i mo'ã hese kuri hikwái.

Hesu Nhe'ẽ Marangatu tee va'e-pe omoanha anháy hikwái. Upéa-gwi he'i íxupe kwéry Hesu:

—Anhete ko xe ha'e-ta nde-vy. Ne rembiapo vai ramo, erenhe'ẽ vai ramo Nhandejáry-rehe, omboyke-ta ndéhegwí Nhandejáry ne rembiapo vaikwe. Ha erenhe'ẽ vai ramo katu Nhe'ẽ Marangatu tee va'e-rehe, nande porahuvereko mo'ãiry. Nde py'a ky'a-ma. Nande py'a potī mo'ãvéi opa e'ý rehewe, he'i íxupe kwéry Hesu.

Hesu re'ýi kwéry

(Mt 12.46-50; Lc 8.19-21; Hb 2.11-12)

³¹ Upe rire ou isy tyvýry kwéry ave. Opyta oka-py. Ohenói uka osē hagwā.

³² Heta ogwapy hikwái Hesu jerekwe-vy:

—Nde sy ou. Ou ave nde ryvy ne reindy ave. Oka-py ogwahē oĩ-vy, he'i íxupe.

—Nde rexase, he'i Hesu-pe.

³³ Ha ha'e nosēiry joty oho-vy. Upéi he'i:

—Amombe'u-ta peẽ-my kiva'e pa xe sy, kiva'e pa xe ryvy, he'i íxupe kwéry.

³⁴ Upe rire orepara gwenduha-rehe ojerekwe-rehe ogwapy va'e:

—Ehexa, he'i gwenduha-pe, —ko va'e kwéry xe sy. Upe va'e kwéry xe ryvy, he'i.

³⁵ —Nhandejáry nhe'ẽ ojapo va'e gwive upéa voi xe ryvy, he'i. —Upéa xe reindy, upéa xe sy ave, he'i gwenduha-pe Hesu.

4

Hesu omombe'u arandu rehewa nhe'ẽ temitýgwe rehewa-rami

(Mt 13.1-9; Lc 8.4-8)

¹ Ha upéi katu onhemonhe'ẽ jevy-ma Hesu yugwarusu rembe-rehe. Ha heta eterei ijatypa henda-py. Upéa-gwi oike kanoagwasu-py íxugwi kwéry. Ogwapy-ma kanóa py-py. Y rembe'y-py oĩ kanóa. Ha enterove opyta yvy-py hikwái. Y rembe-rehe opyta.

² Ha heta onhemonhe'ẽ nhe'ẽ íxupe kwéry arandu rehewa nhe'ẽ omombe'u-vy.

Omombe'u arandu rehewa nhe'ẽ íxupe kwéry temitýgwe rehewa-rami:

³ —Pejeapysaka joa joa, he'i. —Oho onhemitý onhemitý va'e. Omohäi gwemity.

⁴ Onhemitȳ jave, oime temitȳ ra'ŷi tape-rupi ho'a va'e. Ha upéi ou gwyra opa ho'u.

⁵ Oime temitȳ ra'ŷi ave yvy pererî-rupi ho'a va'e. Upe-py oĩ mixîmi yvy. Pya'e henhói-ma, yvy ndahetáiry-gwi.

⁶ Kwarahy haku-ma ramo, onhandu-ma temitȳgwe kwarahy aku. Ha kwarahy ohapypa voi. Ombohovirupa ave hapo e'ŷ reheve.

⁷ Oime nhuatîndy-rupi ho'a va'e ave. Ha nhuatî katu okakwaa-ma. Ojaho'ipa temitȳgwe-pe. Upéa-gwi ndahopéiry.

⁸ Oime yvy porã-my ho'a va'e ave. Henhói-ma hemitȳ. Okakwaa. Hope-ma. Oĩ trinta ha'ŷi va'e. Oĩ sessenta ha'ŷi va'e. Oĩ ha'ŷive va'e cem ha'ŷi va'e.

⁹ Ne aranduse va'e, ejeapysaka porã katu xe nhe'ẽ-rehe, he'i onhemonhe'ẽ-vy íxupe kwéry.

*Hesu oikwaa uka gwemimbo'e kwéry-pe temitȳgwe rehewa nhe'ẽ
(Mt 13.10-23; Lc 8.9-15)*

¹⁰ Ijatypa va'e oje'óí rire, oporandu Hesu-pe doze hemimbo'e kwéry inhirû gwéry ave:

—Temitýgwe rehewa nhe'ẽ ereiporu kuri. Mbava'e-rehe po he'i upe va'e? he'i oporandu-vy íxupe.

¹¹ Upéi he'i Hesu íxupe kwéry:

—Ha peẽ katu peikwaa voi mba'éixa po nhamoirû-ta Nhandejáry nhande ruvixa. Nhandejáry oikwaa uka-gwi peẽ-my peikwaa. Ha ambue kwéry-pe katundoikwaa ukáiry. Upéa-gwi temitȳgwe rehewa-rami amombe'u kuri Nhandejáry nhande ruvixarã rehewa nhe'ẽ, anhemonhe'ẽ-vy íxupe kwéry, he'i.

¹² —Ha upéi oma'ẽ ma'ẽ hikwái. Ha ndohexái mba'eve. Ohendu henu. Ha ndoikwaái mba'eve. Upéa-gwi ndogwerovái gweko. Ha Nhandejáry katu nomboykéiry íxugwi kwéry hembiapo vaikwe. Upéa-rehe arandu rehewa nhe'ẽ aiporu mante amombe'u-vy íxupe kwéry Nhandejáry rehewa nhe'ẽ, he'i.*

¹³ —Ha peẽ katu ndapeikwaa porãi ave. Ma'erã ndapeikwaa porãi? Aipo ramo, mba'éixa peikwaa-ta arandu rehewa nhe'ẽ gwive amombe'u mbe'u ramo?

¹⁴ Onhemitȳ va'e onhemitȳ. Upéa he'ise: Omoherakwã Nhandejáry rehewa nhe'ẽ porã.

¹⁵ Ha tape-rupi onhenhotý va'ekwe katu he'ise: Oĩ ohendu va'e nhe'ẽ porã. Ohendu-ma ramo, ou anháy ruvixa Satanás. Oipe'a ipy'a-gwi inhe'ẽ porã.

¹⁶ Ha yvy pererî-rupi onhenhotý va'ekwe katu he'ise: Oĩ ohendu va'e inhe'ẽ porã. Ohendu-ma ramo, ov'y'a ogwerovia-vy.

¹⁷ Ha ndahapóiry. Upéa he'ise: Sapy'a ete ogwerovia. Ndogwerovia teéiry voi. Ha upe rire katu nhe'ẽ porã rendu-gwi, omoingo asy íxupe. Ojererekoy asy-gwi, ndogweroviasévéiry. Pya'e a'e oheja nhe'ẽ porã.

¹⁸ Ha nhuatîndy-rupi onhenhotý va'ekwe katu he'ise: Oĩ ohendu va'e voi inhe'ẽ porã.

¹⁹ Ha onhesamondo mondo ombo'e-rehe: "Mba'éixa po aiko-ta ko'âng?" oporandu randu ojéupe. Ovy'a-ta mo'ã imba'e reta ramo. Oipotave tave ojéupe gwarã. Upéa-gwi ohendu henu rei inhe'ẽ porã. Nahembiapo porã porãiry.

²⁰ Ha yvy porã-my onhenhotý va'ekwe katu he'ise: Oĩ ohendu va'e inhe'ẽ porã. Ohendu ramo ogwerovia tee voi. Ogwerovia-gwi, oĩ hembiapo porã

* **4:12** Is 6.9-10

porā va'e. Oĩ hembiapo porāve rāve va'e. Oĩ hembiapo porā eterei va'e ave, he'i íxupe kwéry Hesu.

Hesu omombe'u mbe'u arandu rehewa nhe'ẽ

²¹ Ha upéi katu Hesu omombe'u jevy arandu rehewa nhe'ẽ tataendy rehewa-rami:

—Ndajarúi voi tataendy nhamoĩ hagwā mba'e ryru gwy-py. Ndajarúi ave nhamoĩ hagwā tupu gwy-py. Tataendy katu jaru nhamoĩ hagwā tataendy rendaty-py.

²² Oime va'e gwive onhenhomí va'e ojekwaa-ta voi. Ha pe ereikwaa e'ŷ va'e gwive, upéa ereikwaa-ta voi ave.

²³ Ne aranduse va'e, ejeapysaka porā katu xe nhe'ẽ-rehe, he'i.

²⁴ —Ejeapysaka porā erekhendu va'e-rehe. Ereme'ẽ me'ẽ va'ekwe ohekoviärö-ta nde-vy. Hetave ave ohekoviärö-ta.

²⁵ Heta ogwereko va'e-pe hetave ohekoviärö-ta. Ha naimba'e rexakwaái va'e-gwi katu, oipe'apa-ta íxugwi. Ogwereko va'e gwive oipe'apa-ta íxugwi, he'i íxupe kwéry Hesu.*

²⁶ Ha upéi katu omombe'u jevy Nhandejáry nhande ruvixarā rehewa nhe'ẽ temitýgwe rehewa-rami:

—Kwimba'e oho onhemitý. Onhemitý yvy-rupi.

²⁷ Upéi pyhare hare oke-ma. Iko'ẽmba ēmba opu'ã-vy. Henhói rei temitý. Okakwaa. Ha ndoikwaáiry mba'éixa po henhói.

²⁸ Hemitýgwe katu omohenhói rei yvy. Upe rire ombohope. Upe rire omoha'ŷi.

²⁹ Ijagwyje-ma ramo, oikytí uka ogwahē-ma hi'áry-gwi, he'i íxupe kwéry Hesu, Nhandejáry irū ojekwaa va'erā rehewa oikwaa uka-vy.

³⁰ —Mba'éixa aikwaa uka-ta peẽ-my Nhandejáry nhande ruvixaha? Mba'eixagwa nhe'ẽ aiporu-ta pene mo'arandu hagwā, he'i íxupe kwéry.

³¹ —Amombe'u-ta Nhandejáry nhande ruvixarā rehewa nhe'ẽ temitýgwe mostarda rehewa-rami, he'i. —Oĩ temitý héry va'e mostarda. Onhotý ramo, mix̄i eterei. Mix̄ive opamba'e ra'ŷi-gwi yvy arigwa-gwi.

³² Ha onhotý-ma rire, pya'e tuvixa. Entéro temitý-gwi tuvixave. Upéi hakāmby-ma. Upéa-rehe ojapo-ma gwyra gwaityrā. Hi'ã gwy-py ojapo, he'i íxupe kwéry Hesu, Nhandejáry irū hetave tave oĩ va'erā rehewa oikwaa uka-vy.*

³³ Upéixa voi omombe'u mbe'u íxupe kwéry Hesu arandu rehewa nhe'ẽ temitýgwe rehewa-rami. Peteĩ teĩ oikwaa peve omombe'u.

³⁴ Onhemonhe'ẽ-vy íxupe kwéry, temitýgwe rehewa nhe'ẽ va'e-rupi, tataendy rehewa va'e-rupi ave omombe'u íxupe. Upéa rehewa oiporu e'ŷ rehevə nomombe'úiry íxupe kwéry. Ha hemimbo'e kwéry anho hendiive oime ramo, oikwaa ukapa-ma íxupe kwéry.*

Ekirirī katu, he'i y-pe Hesu

(Mt 8.23-27; Lc 8.22-25)

³⁵ Ha upéi ka'aru ete-ma.

—Jaha jahasa y rovái, he'i gwemimbo'e kwéry-pe Hesu.

³⁶ Upéi ohejapa oho-vy ijaty va'e-pe hikwái. Ogwapy oĩ-vy kanoagwasu-py Hesu. Upéixa ramo ogweraha íxupe y-rupi y rovái. Oho ave hupive kanóá ambue va'e.

* **4:25** Mt 5.14-15; Lc 8.16-18 * **4:32** Mt 13.31-32; Lc 13.18-19 * **4:34** Mt 13.34-36

³⁷ Ha upéi katu ou yvytugwasu. Opu'ã pu'ã-ma y. Oike kanoagwasu-py y. Upéa-gwi haimete-ma kanóa hyhyhë y-gwi.

³⁸ Ha Hesu katu oke oĩ-vy kanóa-py. Hemimbo'e kwéry kupe-py oke. Oke inhakängtya ári. Ha omombáy-ma íxupe hikwái.

—Nhande nhanheapymi-tama, mbo'eháry, he'i omombáy-vy íxupe. — Nerepenái tipo nhande rekove-rehe? he'i íxupe.

³⁹ Ha opáy-ma Hesu. Ha opáy jave Hesu ohexa-ma y opu'ã pu'ã va'e. Ha oja'o yvytugwasu-pe omombyta hagwã:

—Ekirirí katu, he'i y-pe.

Inhe'ẽ rupi opyta-ma yvytu. Okirirímba ete voi.

⁴⁰ Ha'e he'i:

—Ma'erã nde py'amirí upéixa? Nderejeroviáiry xe-rehe. Ma'erã nderejeroviáiry xe-rehe? he'i íxupe kwéry.

⁴¹ Ha onhemondyipa-ma íxugwi hikwái.

—Kiva'e po ko va'e? Oja'o ramo yvytugwasu-pe, oja'o ramo y-pe ave íxupe, ohendu voi inhe'ẽ, he'i ojóupe hikwái hese.

5

Oike kure kwéry py'a-py anháy kwéry

(Mt 8.28-34; Lc 8.26-39)

¹ Ha upéi katu Hesu gwemimbo'e kwéry ndive ohasa yugwarusu rovái. Ogwahë Geraseno kwéry retã-my.

² Osẽ-ma ramo Hesu kanoagwasu-gwi, ou ohugwaití-vy íxupe anháy ojepota va'e hese. Oyta-gwi ou.

³ Oiko rei oyta-rupi anháy ojepota va'e hese. Ndikatuvéi onhapytí íxupe avave.

⁴ Onhapytí jevy jevy rei íxupe. Oipokwa pokwa íxupe corrente-py. Oipykwa pykwa ave íxupe. Ha anháy-rehe omenda va'e katu omondohoypa-ma. Omopesëgwe sëgwepa, omondoho ndohoypa-ma íxugwi. Ndaipóri ipu'aka va'e hese.

⁵ Pyhare osapukái oĩ-vy oyta-rupi, yvyaty aty-rupi ave. Áry ramo osapukái ave. Onhekýtí oiko-vy ita-rehe.

⁶ Mombyry-gwi ohexa-ma Hesu-pe. Oripara ojeity omboete hagwã íxupe.

⁷ He'i osapukái hatã-vy:

—Nde, Hesu, he'i. —Tupágwasu ra'y nde, he'i. —Ma'erã tipo erepena xe-rehe? he'i oporandu-vy Hesu-pe. —Tupã Nhandejáry réry-py, ajerure nde-vy. Aníke xe mbohasa asy, he'i Hesu-pe.

⁸ Upéa he'i jave,

—Anháy, he'i, —esẽ katu íxugwi, he'i íxupe Hesu.

⁹ Upéi oporandu íxupe:

—Mba'éixa nde réry? he'i íxupe.

—Heta xe ae xe moirü va'e. Upéa-gwi xe réry Heta ave, he'i Hesu-pe.

¹⁰ Upéi ojapura anháy ojerure-vy Hesu-pe pono omondopa íxupe kwéry pe tetã-gwi.

¹¹ Ha upe-py heta eterei oĩ kure. Yvyaty rembe'y-rehe okaru hikwái kure.

¹² Ha anháy kwéry ojerure íxupe:

—Ore mondo katu kure kwéry-rehe. Toroike ipy'a kwéry-py, he'i Hesu-pe.

¹³ —Tapeho, he'i íxupe kwéry Hesu.

Ha anháy kwéry katu osẽ íxugwi. Oike kure kwéry yta-py. Ha kure kwéry oriparapa ogwejy. Y rembe'y-py ogwejy oho-vy. Hi'apý ho'a-vy. Otigwe-vy ho'a yugwarusu-py. Heta eterei onheapymimba y py-py. Mokõi mil-rupi, gweta hagwe-ma onheapymimba.

¹⁴ Ha herekwa kwéry katu oriparapa oho-vy hikwái. Omombe'u tetã mygwa-pe. Tetã jerekwe-rehe oĩ va'e-pe omombe'u ave. Oupa ohexa ojehu va'ekwe.

¹⁵ Ogwahẽmba Hesu renda-py. Ohexa anháy rerekohare hikwái. Ohexa íxupe ogwapy ramo. Onhemonde ramo ohexa.

—Ndaitavyvéi-ma voi ra'e, he'i hexa-vy hikwái.

Upéa-gwi ikyhyjepa-ma hikwái.

¹⁶ Ha upe hexahare omombe'upa íxupe kwéry. Ojehu va'ekwe omombe'upa íxupe. Omombe'u ave anháy rerekohare rehewa nhe'ẽ. Kure kwéry rehewa nhe'ẽ omombe'u ave.

¹⁷ Upéa-gwi upe pygwa kwéry okyhyje-ma Hesu-gwi hikwái. Ojerure-ma íxupe osẽ hagwã hetã kwéry-gwi.

¹⁸ Upe rire onhemboyrú kanóá-py Hesu. Onhemboyrú-ma ramo ojapura upe anháy rerekohare omoirú hagwã íxupe.

¹⁹ Ha ndohejái omoirú íxupe:

—Tereho ae katu nde róga-py. Ekwa emombe'u nde re'ýi kwéry-pe erekwera porãmaha. “Nhandejáry ojapo porã porã xe-rehe” ere katu emombe'u-vy, he'i íxupe. —“Xe porahuvereko eterei-ma voi Nhandejáry” ere katu emombe'u-vy, he'i íxupe Hesu.

²⁰ Ha upéi katu oho omosarambi-vy anháy rerekohare Decapolis tetã mygwa-pe. “Ojapo porã porã xe-rehe Hesu” he'i omombe'u-vy.

—Nhandejáry ojapo porã porã hese, he'i opondera-vy hese hikwái.

Hesu omoingove jevy mitã kunha-pe

(Mt 9.18-26; Lc 8.40-56)

²¹ Ha upéi katu Hesu oho jevy kanoagwasu-py. Ohasa oje'ói-vy y rovái. Ogwahẽ rire heta eterei jevy ijatypa henda-py. Ha Hesu yugwarusu rembe-py onhembo'y oĩ-vy.

²² Ha upéi ojapura ou-vy ojeporahéi haty-py omanda va'e. Héry Jairo. Ohexa-ma ramo íxupe, onhesú omboete-vy Hesu renonde-py:

²³ —Omano-tama xe rajymi, he'i. —Jaha katu eremoĩ hagwã hi'ári nde po okwera hagwã, nomanovéi hagwã, he'i ojapura-gwi Hesu-pe.

²⁴ Upéa-gwi oho hendive Hesu. Ha ijaty va'e ojopypa íxupe oho-vy hapykwéri.

²⁵ Oime kunha. Are-ma hasy. Hasy doze ro'y. Tuvixa hasyha ogwejy íxupe.

²⁶ Ohasa asy ete va'ekwe. Heta oĩ imongweraharã mo'ã, ha nomongweráiry. Ha ome'ẽmba rei-ma va'ekwe ogwereko va'e íxupe kwéry okwera hagwã mo'ã. Ha ndokwerái joty. Opyta hasyve va'ekwe.

²⁷ Upéi katu ohendu Hesu rerakwã. Upéa-rehe ojogweroaty aty ramo hikwái, oho hapykwéri, Hesu rapykwéri.

²⁸ “Apoko ramo xe ijao-rehe jepe, akwera arã”, he'i ojéupe.

²⁹ Upéa-gwi opoko ijao-rehe. Opoko-ma ramo hese, opi-ma íxupe imba'asy. Oikwaa okweramaha imba'asy-gwi hete.

³⁰ Ha Hesu katu oikwaa-ma omongweramaha kunha-pe. Upéa-gwi ojere-ma Hesu ijatypa va'e mbyte-py:

—Kiva'e opoko-ma xe ao-rehe, he'i oporandu-vy.

³¹ Ha hemimbo'e kwéry he'i íxupe:

—Ema'ẽ katu ijatypa va'e-rehe. Ojejapipa voi nde-rehe ra'e. “Kiva'e opoko xe-rehe” ma'erã ere upéixa, he'i oporandu-vy.

³² Ha Hesu oma'ẽ oĩ-vy ohexa hagwã kiva'e po ojapo upéixa ra'e.

³³ Ha kunha katu oikwaa okweramaha. Upéa-gwi ikyhyje-ma. Oryrýi-ma ave. Ou ojeity henonde-py. Omombe'upa íxupe anhete va'e.

³⁴ —Xe rajy, he'i kunha-pe ipy'agwapy hagwā. Gwajýry-pe he'ihā-rami, he'i kunha-pe, —nde erejerovia-ma kuri xe-rehe, upéa-gwi erekwera-ma. Tereho nde py'agwapy rehewe. Nande rasyvéi-ma ne mba'asy-gwi, he'i kunha-pe.

³⁵ Onhe'ẽ vyteri jave, ou mburuvixa róga-gwi omombe'u:
—Omano ete-ma nde rajy, he'i túvy-pe. —Eheja katu toho mbo'eháry, he'i Jairo-pe omombe'u va'e.

³⁶ Ha Hesu katu ohendu omombe'u ramo:
—Aníke erekhyje. Ejerovia katu xe-rehe, he'i mburuvixa Jairo-pe.
³⁷ Ha upéi katu ndohejái omoirū íxupe avave. Mbohapy hemimbo'e anho mante omoirū íxupe. Oho indive omoirū Pedro, Tiago, tyvýry João ave.

³⁸ Ogwahē-ma mburuvixa róga-py. Ohexa heta ijayvu joa va'e. Ha ha'e kwéry hasẽmba voi osapukái-vy.

³⁹ Oike Hesu. He'i íxupe kwéry:
—Ma'erā tipo pende ayvu? Ma'erā tipo pene rasẽmba rei pekwa-vy? he'i íxupe kwéry. —Nomano teéiry voi upe mitã kunha. Oke ae maniko oĩ-vy ra'e, he'i íxupe kwéry.

⁴⁰ Ha'e kwéry katu onhembohory Hesu-rehe. Ha ha'e katu omosẽmba imondo-vy. Ogweraha ondive mitã ru, isy oirū ave. Oike mitã kunha oĩ ha-py.

⁴¹ Oipopyhy íxupe.
—“Talita cumi” he'i íxupe. Ha'e ae onhe'ẽ-py ohenói omopu'ã hagwā, “Mitã kunha, epu'ã katu” he'i-vy.

⁴² Upe mitã kunha opu'ã-ma ogwata-ma. Mitã kunha katu doze ro'y ogwereco va'e. Upéa-gwi,

—Mba'éixa omoingove jevy íxupe? he'i opondera eterei-vy hese hikwái.

⁴³ Ha Hesu he'i:
—Aníke avave ohendu, he'i jevy jevy íxupe kwéry Hesu. —Emongaru íxupe, mitã kunha-pe, he'i.

6

He'ýi kwéry ndogweroviái Hesu-pe

(Mt 13.53-58; Lc 4.16-30)

¹ Upe-gwi oho Hesu. Gwetã-my ogwahē jevy. Omoirū íxupe hemimbo'e kwéry.

² Ha pytu'uga áry-py Hesu onhemonhe'ẽ jevy-ma. Ojeporahéi haty-py onhemonhe'ẽ. Heta ohendu va'e inhe'ẽ,

—Mba'éixa onhemonhe'ẽ? he'i opondera-vy hese hikwái: —Mamo-gwi upéa ohendu aipo va'e nhe'ẽ? he'i hese. —Kiva'e omombe'u hi'arandu hagwā íxupe? he'i hese. —Ema'ẽ hese. Hexapyrā-rupi voi Hesu rembiapo porã. Mba'éixa ojapo upéixa? he'i hese.

³ —Upéa óga apohatygwe voi, he'i. —Maria memby voi. Tiago, José, Judas, Simão ave ityvýry kwéry voi. Heindýry kwéry oiko voi nhane ndive. Ma'erā onhembotuvixa ukase? he'i opondera-vy hese.

Upéa-gwi ndija'evéi Hesu-rehe hikwái.

⁴ Upéi he'i íxupe kwéry Hesu:

—Ha onhemonhe'ẽ va'ety onhemboete voi. Ha hetã mygwa katu nomboetevéiry íxupe. He'ýi kwéry ave nomboetevéiry íxupe. Hóga pygwa ave nomboetevéiry ave íxupe, he'i ójehe ndaija'evéi-gwi he'ýi kwéry.

⁵ Upéa-gwi ndikatúi hembiapo porã hexapyrā-rupi. Mbovymi hasy va'e-rehe mante omoĩ opo omongwera hagwā.

⁶ Ha ndogweroviái-gwi hikwái,

—Mba'éixa ndogweroviái? he'i opondera-vy hese kwéry Hesu.

Upéi oho tetāgwasu jerekwe-rupi. Tetā mirī mirī oī ha-rupi oho onhemonhe'ē-vy Hesu.

*Hesu remimbo'e kwéry oho onhemonhe'ē-vy
(Mt 10.5-15; Lc 9.1-6)*

⁷ Ha upéi katu Hesu ohenói doze gwemimbo'e kwéry-pe ogwahē hagwā ha'e-py. Mokō mokōi meme omboja'o ja'o imondo-vy:

—Xe nhe'ē-py emosē imondo-vy anháy, he'i íxupe kwéry.

⁸ —Aníke ereraha mba'eve. Nde pykoka anho eraha, he'i. —Ani ereraha ne remi'urā ani ereraha nde vosa. Ani ave ereraha pirapire ne ku'asā gwy-py, he'i íxupe kwéry.

⁹ —Emonde nde pyryru. Ne kamisa katu ani erembojo'a, he'i íxupe kwéry.

¹⁰ —Ereike ramo óga-py epyta upe-py. Ani erembopopa ereiko-vy. Eresē peve upe tetā-gwi, eiko petēi óga-py íxupe kwéry.

¹¹ Ha oī ramo tetā mygwa pende rerohory e'ŷ va'e, pene nhe'ē renduse e'ŷ va'e katu, eresē ramo upe tetā-gwi embovava nde py ho'apa hagwā vyv timbore nde py-gwi. Upéixa erejapo ramo, eremomandu'a uka arā hembiapo vaikwe-rehe. “Nhandejáry re'ýi e'ŷ-rami nipo ra'e nhande” he'i va'erā ójehe, he'i íxupe kwéry Hesu.

¹² Aipo-gwi hemimbo'e kwéry oho onhemonhe'ē-vy enterove va'e-pe:

—Erova nde rekoha, he'i.

¹³ Omosē imondo-vy heta anháy-pe. Hasy va'e-rehe omona nhandy omong-wera hagwā.*

João ojejuka

(Mt 14.1-12; Lc 9.7-9)

¹⁴ Ha Hesu rerakwā opa opa-rupi oho. Upéixa-gwi mburuvixagwasu Herodes ohendu ave Hesu rerakwā.

Kente kwéry omombe'u mbe'u ojóupe Hesu rerakwā. Gwī Hesu rexa-vy, he'i ojóupe:

—João Batista oikove jevy-ma, he'i mo'ã. —Upéa-gwi hexapyrā-rupi hembi-apo porā porā voi, oī he'i va'e mo'ã Hesu-rehe.

¹⁵ Hesu rexa-vy he'i ojóupe:

—Upe va'e ko Elias, oī he'i va'e mo'ã ave Hesu-rehe.

—Upe va'e ko onhemonhe'ē va'ety yma gwaréixa, oī he'i mo'ã va'e ave hese.

Upéixa voi ha'e kwéry hupi e'ŷ omombe'u. Omombe'u jokupe kupe hesegwa nhe'ē.

¹⁶ Upéixa ramo Herodes mburuvixagwasu va'e ohendu Hesu rerakwā. Upe ojapo japo va'ekwe ohendu:

—Upe João xe anhakā'o uka va'ekwe, oikove jevy-ma nipo ra'e, he'i mo'ã hese.

¹⁷⁻¹⁸ Are-ma omenda va'ekwe Herodes. Gwyvýry rembirekokwe-rehe omenda va'ekwe. Gwovajáry Herodias-rehe omenda va'ekwe. Tyvýry héry Filipe. Ha João katu he'i va'ekwe íxupe, Herodes-pe: “Ereiko ramo nde ryvy rembireko ndive, ndatekoháiry erereko” he'i va'ekwe íxupe. Upéa-gwi mburuvixagwasu omondo va'ekwe ipiári oipyhy uka hagwā João-pe. Omoī uka va'ekwe íxupe preso. Gwembireko-rehe onhe'ē-gwi, omoī uka íxupe preso.

¹⁹ Ha hembireko katu ndija'ei voi João-rehe. Ojuka-ta mo'ã.

²⁰ Ndikatúi ojuka, omboete-gwi íxupe mburuvixagwasu Herodes. Ha mburuvixa katu oheko kwaa voi íxupe. “Hi'arandu va'e João, heko marangatu va'e voi ave” he'i hese. Upéa-gwi omoīngatu joty íxupe. Ohendu ramo

* **6:13 Lc 10.1-12**

inhe'ẽ, ojapose vérami mo'ã inhe'ẽ. Ha ndojaposéi ave. Ndojapói ramo jepe, ogwerohory joty inhe'ẽ.

²¹ Hi'áry ogwahẽ ojuka hagwã íxupe. Oiko hagwe áry-py mburuvixagwasu omongaru porã imboviapyre. Mburuvixa kwéry, soldado ruvixa kwéry, imba'e reta va'e kwéry, Galiléia pygwa va'e omongaru porã.

²² Ojekaru ha-py oike-vy ojeroky hembireko memby kunha. Ombovy'a ojeroky ramo mburuvixagwasu Herodes-pe, imboviapyre ave ombovy'a. Ha upéi he'i kunhataĩ-pe mburuvixagwasu:

—Ejerure xe-vy ne remimbota-rehe. Oime ra'ẽ va'e voi ame'ẽ-ta nde-vy, he'i íxupe.

²³ —Oime ra'ẽ va'e-rehe erejerure ramo, ame'ẽ-ta nde-vy, he'i íxupe. Pono oapu-gwi —Tupã réry-py ame'ẽ-ta nde-vy, he'i. —Ha opamba'e xe areko va'e katu amombyte-ta nde-vy ime'ẽ-vy, he'i jevy jevy íxupe.

²⁴ Upéi osẽ oho-vy oporandu osy-pe:

—Mbava'e-rehe tipo xe ajerure-ta, he'i omombe'u-vy osy-pe.

Isy he'i íxupe:

—Ejerure katu João Batista akãgwe-rehe, he'i íxupe.

²⁵ Ojapura oike hagwã jevy mburuvixagwasu oĩ ha-py. Pya'e oike ojerure-vy:

—Ãy aipota eremboyrú xe-vy pya'e nha'ẽ-py João akãgwe araha hagwã, he'i ojerure-vy.

²⁶ Ha mburuvixagwasu katu onhe'ẽgwe omboasy eterei. “Tupã réry-py ame'ẽ-ta” he'i-gwi, ohendu-gwi ave imboviapyre inhe'ẽ, ndikatuvéi-ma João-rehe hakate'ŷ.

²⁷ Upe-ma ramo omundo peteĩ gwembigwái soldado ogweruruka hagwã íxupe inhakãgwe. Ha oho onhakã'o João-pe onhemoĩ va'e preso haty-py.

²⁸ Ogweru nha'ẽ-py inhakãgwe ome'ẽ kunhataĩ-pe. Ha kunhataĩ katu ome'ẽ osy-pe.

²⁹ Ha João remimbo'ekwe ohendu ramo, ou hetekwe ogweraha. Omoĩ yvkwa-py hetekwe.

Hesu ombopopóy cinco mil va'e-pe cinco mbojape

mokõi pira ave

(Mt 14.13-21; Lc 9.10-17; Jo 6.1-14)

³⁰ Ha hemimondo kwéry katu ou jevy Hesu ha-py. Omombe'u íxupe ojapo japo va'ekwe. Ombo'e mbo'e va'ekwe ou jevy omombe'u.

³¹ Ha heta ipohuha ou. Opopupáry-gwi ndikatuvéi okaru. Upéa-gwi he'i gwemimbo'e kwéry-pe:

—Jaha katu nhane anho ojeiko e'ŷ ha-py. Japytu'u mixĩ-vy jaha, he'i.

³² Akói ramo oho ha'e kwéry anho ojeiko e'ŷ ha-py. Kanoagwasu-py oho.

³³ Ha heta kente ohexa íxupe iho ramo. Oikwaa-ma ave. Upe ramo enterove tetã-gwi osẽ oho-vy. Yvy-rupi oripara oho-vy. Ha'e kwéry ranhe ogwahẽ y rovái. Ha Hesu nogwahẽ joty.

³⁴ Ogwahẽ ramo hembe'y-py, osẽ kanóa-gwi.

—Heta ojohapypa ra'e onhomboaty, he'i hexa-vy. —Upéa ovexa ijáry e'ŷ va'e-rami ndoiko kwaáiry ha'e kwéry anho, he'i. —Ndaherekwáiry, he'i.

Upéa-gwi oiporiahuvereko-ma íxupe kwéry. Oiporiahuvereko-gwi heta onhemonhe'ẽ nhe'ẽ íxupe kwéry.

³⁵ Ka'aru ete ou Hesu ha-py hemimbo'e kwéry:

—Ndaipóri mba'eve a-py, he'i. —Ka'aru ete-ma.

36 Ere íxupe kwéry toho tetā mirī-rupi tetāgwasu-rupi ave ojogwa hagwā gwemi'urā, he'i Hesu-pe.

37 Ha Hesu katu he'i gwemimbo'e kwéry-pe:

—Peē katu peme'ẽ íxupe kwéry hemi'urā, he'i.

—Oroho-ta tipo orojogwa duzentos repy mbojape hemi'urā kwéry orome'ẽ hagwā íxupe kwéry ho'u hagwā, he'i íxupe oporandu-vy.

38 Hesu he'i:

—Mbovy a-py ererekko mbojape? Ekwa terehexa, he'i íxupe.

Upe rire oho ohexa. Oikwaa rire, ou omombe'u:

—Cinco mbojape oĩ, he'i. —Mokōi pira ka'ẽ ave oĩ, he'i Hesu-pe.

39 Ha upéi katu he'i ojogweroaty mirī mirī hagwā ogwapy-vy. Kapi'i pyahu ári ogwapy hagwā, he'i íxupe kwéry.

40 Ha cem oĩ va'e, cinqüenta oĩ va'e ave ojoypy ypy-py ogwapy.

41 Ha Hesu katu oipyhy upe cinco mbojape. Mokōi pira ave oipyhy. Upéi hovayva yvate-koty omboete-vy temi'urā-rehe. Otima porā ave. Omboja'o ja'o upe mbojape. Ome'ẽ me'ẽ gwemimbo'e kwéry-pe ombogwejy hagwā entéro va'e rovagwy-py. Omboja'o ja'o ave mokōi pira enterovéa-pe.

42 Ha enterovete okaru. Hygwyatāmba-ma ave hikwái.

43 Upéi omono'õ ho'u va'ekwe rembyre, pira rembyre ave. Doze ajaka joty ra'e oĩ hembyre kwéry.

44 Upe okaru va'ekwe heta oĩ ra'e. Kwimba'e kwéry okaru va'e cinco mil oĩ ra'e.

Hesu oho ogwata-vy y ári

(Mt 14.22-33; Jo 6.15-21)

45 Upe ramo Hesu he'i:

—Eike katu kanoagwasu-py, he'i gwemimbo'e kwéry-pe. —Pekwa mani katu y rovái xe renonde, he'i. —Betsaida-py ekwa mani katu, he'i.

Oho rire, he'i ojogweroaty va'e-pe:

—Tapeho katu pende ro nde róga-rupi, he'i Hesu íxupe kwéry.

46 Upe rire, “Aha jevy-tama” he'i rire íxupe kwéry, oho yvyaty ári-rupi Hesu. Onhomongeta hagwā Nhandejáry ndive oho.

47 Ojekwaa-ma pytū ou-vy. Oĩ kanoagwasu y mbyte-py y ári ave. Ha Hesu katu optyta ha'e anho yvy-py.

48 Ohexa íxupe kwéry onhemombaraete ramo oipykúi-vy. Ndogwatavéi kanóa henonde-gwi ou ramo yvytu. Hembipe ramo Hesu oho gwemimbo'e kwéry ha-py. Pytū joty reheve oho íxupe kwéry ogwata-vy y ári. Ohenonde'a-ta mo'ã kanóa-pe.

49 Ha ha'e kwéry katu ohexa ramo íxupe ogwata y ári,

—Arygwypór,

he'i mo'ã hese. Osapukái ave.

50 Enterovéa hemimbo'e kwéry ohexa íxupe. Onhemondýi eterei-ma ave. Upéa-gwi osapukái joa. Upe ramo pya'e he'i íxupe kwéry:

—Anive erejapura teĩ. Xe ko Hesu, he'i voi. —Ani erekyhyje teĩ, he'i.

51 Upéi katu oike-ma kanoagwasu-py hendive kwéry. Ndayvytuvéi-ma.

—Mba'éixa omombyta yvytu? he'i opondera eterei-vy hese.

52 Ha Hesu ombopopóy ramo mbojape hexapyrā-rupi, ndoikwaáiry heko-rehe. Nainhakā porāi-gwi ndoikwaáiry heko-rehe hikwái. Upéa-gwi,

—Mba'éixa omombyta yvytu? he'i opondera eterei-vy hese.

53 Upéi katu oho yugwarusu rovái. Genezaré tetā-my ogwahē oho-vy hikwái. Isã-py onhapytī kanóa. Osẽ kanóa-gwi.

54 Osẽ jave, pya'e oikwaa Hesu-pe tetā mygwa.

55 Oripara oho-vy hikwái opa-rupi. Pe tetā kupe-rupi oripara para okwa-vy. Ha hasy va'e-pe katu ogweru Hesu ha-py. Hupa reheve ogweru. Ohendu-ma ramo Hesu oī ha-py ogweru-ma.*

56 Ha Hesu katu ogwahē ramo tetāgwasu-py, ogwahē ramo tetā nhepyrū-py, ogwahē ramo ave tetā mirī-my, óga pa'ū-rupi ombogwejy meme hasy va'e-pe hikwái. Ojerure íxupe:

—Tande pyhy nde ao rembe'y-rehe jepe hasy va'e, he'i íxupe hikwái oipyhy va'e gwive okwera-ma hagwā.

7

“Ma'erā tipo ndoikói yma gware reko-rupi ne remimbo'e” he'i Hesu-pe oporandu-vy

(Mt 15.1-20)

1 Ha fariseu kwéry ojogweroaty Hesu ha-py. Ogwahē ave ou-vy judeu kwéry rekombo'ehaty. Jerusalém tetā-gwi ou va'ekwe.

2-4 “Ndajajepohéi porāi ramo ndikatúi jakaru”, he'i va'e fariseu kwéry, opa judeu kwéry gwive ave. Ojepohe pohéi e'ŷ reheve ndokarúi va'e ojapo-gwi hembypy he'i va'ekwe. Ou jevy ramo mba'e jogwa haty-gwi nonhemopotíry ramo ndokarúi. Ojohéi kopo'i, ojohéi japepo, ojohéi nha'ẽ kwarepoti-gwi ojejapopyre. Hupa ojohéi ave. Heta mba'e ojapo hembypy he'i va'ekwe ohendu-gwi. Ha gwī fariseu kwéry, judeu rekombo'ehaty ave ohexa Hesu remimbo'e kwéry-pe okaru ramo ojepohéi e'ŷ reheve. Upéa he'ise: Ojepohe pohéi rei e'ŷ reheve okaru.

5 Upéa-gwi oporandu Hesu-pe hikwái:

—Ma'erā tipo ndoikói yma gware reko-rupi ne remimbo'e kwéry? Ma'erā okaru ojepohéi porā e'ŷ reheve? he'i. —Ma'erā tipo nonhemopotísevéliry nhande kwéry e'ŷ va'e ndive oiko rire? he'i íxupe.

6 Ha Hesu he'i íxupe kwéry:

—Peē katu pende py'a ky'a pemo'ã kwaa va'e. Ha Isaías amyrī anheiha-rupi omombe'u va'ekwe pende rekorā. Omoī va'ekwe kwatia-rehe a-rami:

“Ha'e kwéry xe mboete onhe'ē-py rei. Opy'apy-py katu naxe mboetéiry. Ndojehesa rerovái xe-rehe.

7 Xe momba'egwasu teī. Xe nhe'ē-py nombo'éiry. Ha teko rei nhe'ē-py ae oporombo'e mbo'e oiko-vy”*, he'i Nhandejáry kwatia nhe'ẽ pende-rehe.

8 Ha Nhandejáry he'i ramo, nderejaposéi voi inhe'ẽ. Ha teko rei katu omanda ramo, he'i va'e gwive erejapo japo voi, he'i íxupe kwéry Hesu.

9 —Nderejaposéi voi Nhandejáry he'i va'ekwe jajapo hagwā nhane rembypy he'i va'ekwe. Upéixa ramo, “Ore rembiapo porā” ere mo'ã ndéjehe.

10 Ha Moisés amyrī he'i va'ekwe:

“Pemboete nde ru, nde sy-pe ave. Ha entéro onhe'ẽ vai rei va'e gwu-rehe, osy-rehe ave, tojejuka katu”*, he'i Nhandejáry kwatia nhe'ẽ.

11 Ha peē katu pepyrū Nhandejáry nhe'ẽ-rehe. Ndapehejáiry gwu osy-pe ome'ẽ hagwā. Pembo'e mbo'e rei judeu kwéry-pe a-rami. Peje, “Ava he'i ramo gwu osy-pe ave, Voive ereporandu ramo ame'ẽ arā nde-vy ra'e. Áy katu ndikatuvéi-ma ame'ẽ nde-vy. Xe mba'e kwéry opa-ma. Ame'ẽmba-ma kuri Tupā Nhandejáry-pe. Aiporu jepe xe, Tupā mba'epa-ma, he'i gwu osy-pe ave.”

* 6:55 Mt 14.34-36 * 7:7 Is 29.13 * 7:10 Ex 20.12; 21.17

12 Upéixa he'i ramo, iporã jaty peẽ-my. Upéixa ndapehejái oipytygwõ gwu osy-pe ave. Ne nhe'ẽ-py gwu osy-pe ave nomboetevéi.

13 Ne rembypy reko-rupi jaty peiko. Upéa-gwi pepyrũ jaty Nhandejáry nhe'ẽ-rehe, pemboyke jaty Nhandejáry nhe'ẽ peiko-vy. Heta gwĩa-rami erejapo japo ave, he'i íxupe kwéry Hesu.

14 Upe rire ohenói jevy oha-py kente kwéry ou hagwã he'i:

—Pejeapysaka joa xe nhe'ẽ-rehe peikwaa porã hagwã, he'i arandu rehewa nhe'ẽ omombe'u-vy.

15 —Jakaru jave ndikatúi nhane mongy'a. Ndoikói tembi'u nhande py'a omongy'a va'erã. Ha nhane nhe'ẽ vai ramo ae katu onhemongy'a arã nhande py'a.

16 Pene arandu-ta ramo, pejeapysaka katu ko xe nhe'ẽ-rehe, he'i íxupe kwéry Hesu.

17 Upéi oheja íxupe kwéry Hesu. Oho oike koty-py. Oike rire, oporandu íxupe hemimbo'e kwéry. He'i:

—Tembi'u rehewa nhe'ẽ ereiporu kuri. Ha upéa, mbava'e-rehe tipo aipo va'e he'ise, he'i oporandu-vy íxupe hemimbo'e kwéry.

18 Ha Hesu he'i íxupe kwéry:

—Peẽ katu kente kwéry-rami ave ndapeikwaa porãi jaty. Ma'erã tipo ndapeikwaa porãi? Pekaru ramo, ndikatúi penhembohete ky'a. Ndaipóri tembi'u pene mbopy'a ky'a va'e.

19 Tembi'u katu pende py'a-rehe ndohói. Pende ryekwe-py ae oho. Upéi osẽmba jevy. Upéa-gwi napene mongy'áiry, he'i íxupe kwéry Hesu. —Upéixa jaikwaa entéro tembi'u ipotĩ voi, he'i.

20 Upéa-rehe he'i jevy íxupe kwéry Hesu:

—Ha pene nhe'ẽ vai ramo katu, onhemongy'a arã pende py'a, he'i.

21 —Pende py'apy-py katu penhemoneta peiko-vy pene rembiapo vairã-rehe. Upéa-gwi pende py'a vai. Pende py'a vai-gwi pejogwereko rei. Pende py'a vai-gwi pemonda rei peiko-vy, peporojuka ave. Pende py'a ky'a-gwi onhoembireko ndive, onhome ndive ave peiko.

22 Pende py'a vai-gwi peipota rei pende rapixa mba'e, ha pene rembiapo vai, ha peporombotavy, ha pene akã vai, napende a'ei pende rapixa-rehe, penhe'ẽ rei rei pende rapixa-rehe, ha penhembotuvixaseve mo'ã ave peiko-vy, ha napene nhe'ẽ rendúi ave.

23 Ha opaixagwa pejapo pende py'a vai-gwi. Upéixa ramo pende py'a vai-gwi penhemongy'a-ma, he'i íxupe kwéry Hesu.

“Ne memby-gwi opoi-ma anháy” he'i Hesu (Mt 15.21-28)

24 Upéi opu'ã oho-vy Hesu. Upe-gwi oho ogweroajere Tiro tetã jerekwe-rupi. Sidom tetã jerekwe-rupi oho ave. Oike koty-py optya hagwã. Ndoipotáí mo'ã onhemombe'u. Ha ndikatúi onhemi.

25 Ha peteĩ kunha pya'e ohendu herakwã. Ou ojeity Hesu rovagwy-py. Ha imemby kunha mixí va'e anháy rerekoha voi.

26 Ha kunha katu onhe'ẽ outro nhe'ẽ-py. Grego nhe'ẽ-py onhe'ẽ. He'ýi Sirofenícia pygwa. Ojerure Hesu-pe:

—Emosẽ katu imondo-vy xe memby-gwi anháy, he'i íxupe.

27 —Nde ko ndaha'éi xe re'ýi. Xe re'ýi kwéry aipytygwõ ranhe-ta. Ha upe rire katu xe re'ýi e'ý-pe aipytygwõ-ta ave, he'i. —Mitãgwe-pe katu nhamongaru ranhe. Nanhamombói jagwa-pe mitã remi'urã, he'i jaty Hesu itantea-vy, ojeheko rerovia uka etese-vy kunha-pe.

28 Ha kunha katu he'i íxupe:

—Akói-ramima ngatu, xe Járy, he'i kunha Hesu-pe. —Ha tembi'u sururukwe ijáry apyka gwy-py ho'u joto jagwa, he'i Hesu-rehe ojerovia joto-vy.

²⁹—Ere porã-ma, he'i. —Ekwa jevy katu. Ne memby-gwi opoi-ma anháy, he'i kunha-pe Hesu.

³⁰ Ha upéi oho gwóga-py. Ohexa omemby hupa-py. Onheno oĩ-vy ramo ohexa. Ha anháy osẽ-ma ra'e íxugwi oho-vy.

Ogweru Hesu-pe ndaijapysa porãi va'e

³¹ Ha upéi katu ojevy Hesu Tiro tetã jerekwe-gwi. Sidom-rupi ohasa oho-vy. Ohasa oho-vy ave Decápolis tetã-rupi. Galiléia yugwarusu-py oho.

³² Ha upe pygwa ogweru Hesu-pe ndaijapysa porãi va'e. Ha'e inhe'ẽngopa va'e ave. Ínhapekũ ratã va'e-rami oiko. Ojerure íxupe omoõ hagwã hi'ári opo.

³³ Ha Hesu ogwenohẽ íxupe. Ojogweroaty ha-gwi ogweraha íxupe ha'e anho. Ijapysaka-py okwã omopo'ẽ. Upéi ondyvu okwã-rehe Hesu. Upe rire omoõ inhapekũ apy-rehe.

³⁴ Upe rire hovayva yvate-koty. Onhe'ẽ va'erã-rami ipytuhẽ hatã:

—Efatá, he'i ha'e ae onhe'ẽ-py.

Upe va'e he'ise: “Tojepe'a nde apysa mbotyha”.

³⁵ Ha upéi katu ikwa-ma ijapysa. Nainhapekũ ratãvéiry ave. Nainhe'ẽngopavéi-ma ave. Onhe'ẽ porã-ma.

³⁶ Upéi Hesu he'i íxupe kwéry omombe'u e'ŷ hagwã avave-pe:

—Ani xe mombe'u teĩ, he'i jevy jevy mo'ã íxupe kwéry. He'iri iri íxupe Hesu ramo, ha'e kwéry katu omombe'uve uve joto. Ndogwereko nhemíry Hesu ombogwera hagwe. Nogwenotíry Hesu-pe.

³⁷ Ha henduháry gwive he'i:

—Hembia po porã e'ŷ va'e ndoikóiry. Hembia po porã porã meme ae katu Hesu. Ijapysa e'ŷ va'e omboapysa jevy va'e. Ha nonhe'ẽi va'e omonhe'ẽ porã jevy va'e Hesu, he'i ojóupe hikwái opondera eterei-vy hese.

8

Hesu ombopopóy irundy mil va'e-pe sete mbojape

(Mt 15.32-39)

¹ Upe ramo heta ojogweroaty jevy ramo, ndogwerekói ramo gwemi'urã, ohenói Hesu gwemimbo'e kwéry-pe ou jevy hagwã íxupe:

² —Peju katu xe ha-py, he'i. —Ojogweroaty va'e iporahu va'e xe-vy. Mbo-hapy áry xe mokambara okwa-vy. Ndogwerekói ave gwemi'urã. Upéa-gwi aiportahuvereko íxupe kwéry.

³ Oĩ mombyry-gwi ou va'ekwe. Amondo ramo íxupe kwéry hóga-py ivare'a ramo, naipyatãvái arã tape-rupi, he'i íxupe kwéry Hesu.

⁴ Upe ramo hemimbo'e kwéry he'i íxupe:

—Mba'éixa tamõ ra'e nhahembi'u me'ẽ ko'a rupigwa kente kwéry-pe? A-rupi ndaipóri kente tembi'u me'ẽharã, he'i íxupe hikwái.

⁵ —Mbovy tipo erereko mbojape, he'i oporandu-vy gwemimbo'e-pe:

—Sete voi areko, he'i íxupe.

⁶ Ha Hesu katu he'i ojogweroaty va'e-pe ogwapy hagwã yvy-py:

—Pegwapy katu, he'i íxupe kwéry.

Upe rire oipyhy upe sete mbojape. Otima Nhandejáry-pe. Otima rire ombopopóy ome'ẽ gwemimbo'e kwéry-pe. Ojogweroaty va'e rovagwy-rupi omoõ hagwã ome'ẽ.

⁷ Ha pira'i ka'ẽ ndogwereko hetái hikwái. Ha Hesu omboete ranhe Nhandejáry-pe pira ho'u va'erã-rehe. Upe rire omoõ uka ave hovagwy-rupi.

⁸ Upe rire ho'u-ma omohgywyatāmba porā ave íxupe kwéry. Upéi omboaty hembyre optya va'e omboyu sete ajakagwasu.

⁹ Ha heta eterei okaru va'e. Irundy mil para'e okaru va'e.

Ha upéi he'i:

—Tapeho katu pende ro nde róga-rupi, he'i íxupe kwéry Hesu.

¹⁰ Upe ramo pya'e oike kanoagwasu-py gwemimbo'e kwéry ndive oho hagwā. Dalmanuta jerekwe-py oho.

*“Ejapo katu ore-vy hexapyrā-rupi” he'i Hesu-pe
(Mt 12.38-42; 16.1-12)*

¹¹ Ha fariseu kwéry ou Hesu oĩ ha-py onhonhe'ẽ mbojevy jevy hagwā:

—Ejapo katu ore-vy hexapyrā-rupi. Nhandejáry rembiapo porā ramigwa ejapo katu ore mbojerovia uka porā-vy, he'i Hesu-pe. Ombovyte íxupe ombojeavyse-vy.

¹² Ha Hesu ndojohu porāi-gwi, optyapy-py onhe'ẽ va'erā-rami ipytuhē hatā:

—Ma'erā ãygwa ohexase hexapyrā-rupi xe rembiapo ramo. Anhete ko xe ha'e-ta peẽ-my. ãygwa-pe katu naxe rembiapo mo'āi hexapyrā-rupi, he'i íxupe kwéry Hesu.

¹³ Upéi oheja oho-vy íxupe kwéry. Oike jevy ramo kanoagwasu-py oho yugwarusu rovái.

¹⁴ Ha hemimbo'e naimandu'avéi-gwi ndogwerahái mbojape. Peteñmi ogweraha hendive. Peteñ anho mbojape oĩ kanóá-py.

¹⁵ He'i Hesu gwemimbo'e kwéry-pe:

—Ivai voi mbojape mbovuha fariseu kwéry, Herodes irū kwéry rembiporu, he'i íxupe kwéry Hesu omombe'u-vy, pono judeu ruvixa ohekombo'e vai íxupe kwéry.

¹⁶ Ha mbava'e-rehe po he'ise upéa ndokwaái voi. Upéa-gwi onhomongeta okwa-vy:

—Ma'erā po omombe'u upéixa Hesu. Nanhane mbojapéi-gwi omombe'u upéixa, he'i mo'ā ojóupe.

¹⁷ Ha Hesu katu oikwaa onhomongeta ramo. Upéa-gwi he'i gwemimbo'e kwéry-pe:

—Ma'erā pemombe'u mbojape perek e'ŷha? Ma'erā, “Nanhane mbojapevái” peje pemombe'u-vy? he'i. —Ma'erā tipo ndapehexa kwaavéi-ma xe-rehe? he'i. —Ma'erā tipo ndapeikwaavéi-ma xe reko? Napene akā porāi vyteri, he'i.

¹⁸ —Oĩ pende resa. Ma'erā tipo ndapehexavéi-ma? Oĩ pende apysa. Ma'erā tipo napehenduvéi-ma? Ma'erā tipo napene mandu'avéi-ma?

¹⁹ Xe ambopopóy kuri heta eta va'e-pe, cinco mil va'e-pe upe cinco mbojape. Ambopopóy rire, mbovy ajakagwasu-py eremboyu hembyrekwe? he'i íxupe kwéry oporandu-vy.

—Doze ajaka, he'i íxupe hikwái.

²⁰ —Aje'i-ma ambopopóy ave kuri upe sete mbojape ame'ẽ hagwā irundy mil va'e-pe. Ambopopóy rire, mbovy ajaka-py eremboyu hembyrekwe? he'i íxupe kwéry oporandu-vy.

—Sete ajaka, he'i íxupe.

²¹ —Ndereikwaái joty? Ma'erā ndereikwaái? he'i gwemimbo'e kwéry-pe Hesu.

Hesu ombogwera hesa e'ŷ va'e-pe

²² Ha upéi katu ogwahẽmba-ma Hesu gwemimbo'e kwéry ndive. Betsaida tetā-my ogwahē.

Ha ojereru Hesu ha-py hesa e'ŷ va'e-pe. Ojerure íxupe opoko hagwā hese.

²³ Ha Hesu katu oipopyhy ogweraha hesa e'ŷ va'e. Tetā avyte-gwi ogweraha. Onygwō rire hesa-py, omoī hi'ári opo:

—Erehexa-ma tipo? he'i íxupe oporandu-vy.

²⁴ —Ahexa-ma katu tekove-pe. Havē havē rei ahexa-vy, he'i. —Yvyra vyrami rei ahexa íxupe. Ogwata oĩ-vy ramo ahexa íxupe, he'i íxupe hovayva-vy hesa havē-gwi.

²⁵ Upéi omoī jevy Hesu hesa ári opo. Ha upéi ohexa katu oĩ-vy. Hesapyo jevy-ma. Ndahesa tatatīvēiry. Ohexa porāmba-ma.

²⁶ —Tereho nde róga-py, he'i. —Ani ereike jevy te'ŷí avyte-py, he'i íxupe Hesu.

*“Nde Cristo voi” he'i Pedro
(Mt 16.13-28; Lc 9.18-27)*

²⁷ Ohasa jevy oho Hesu gwemimbo'e kwéry ndive. Cesaréia de Filipe jerekwe rupigwa tetā mirī mirī-rupi oho. Oho jave oporandu gwemimbo'e kwéry-pe:

—Mbava'e he'i ra'e xe-rehe? he'i íxupe kwéry.

²⁸ Ha'e kwéry he'i:

—Nane mombe'u porāiry. Ne mombe'u joavy avy. Oĩ, “João Batista onhemoingove jevy va'ekwe ra'e” he'i va'e mo'ã nde-rehe. Oĩ, “Elias onhemoingove jevy va'ekwe ra'e” he'i va'e mo'ã ave nde-rehe. Oĩ, “Nhandejáry nhe'ẽ-py omombe'u va'ety onhemoingove jevy va'ekwe Hesu” he'i va'e mo'ã nde-rehe, he'i íxupe hikwái.

²⁹ Upéi Hesu he'i:

—Mbava'e ere xe-rehe? he'i íxupe kwéry oporandu-vy.

—Nde Cristo voi, Nhandejáry rembiporavokwe. Enterove remiha'arõ voi ko nde, he'i íxupe Pedro.

³⁰ —Xáke ne nhe'ẽ ohendupa va'erā, he'i. —Ani xe mombe'u mbe'u teĩ avave-pe, he'i íxupe kwéry.

³¹ Upe rire omombe'u-ma íxupe kwéry Hesu ojéupe ojehu-ta va'e:

—Xe Nhande Ryke'y tee va'e voi, he'i. —Xe áry oma'emboypy hagwe-py heta-ma xe ahasa asy-ta. Xe mbojevy-ta, xe juka uka-ta ave judeu ruvixa kwéry, pa'i ruvixa kwéry, judeu rekombo'ehaty kwéry ave. Mbohapy áry rire katu aikove jevy-ma va'erā, he'i.

³² Ohendupa hagwā-rami upéa he'i íxupe kwéry.

Ha Pedro katu ogwenohē-ma Hesu-pe ha'e anho hakate'ŷ-gwi.

—Aníke erenhe'ẽ teĩ upéixa, he'i inhe'ẽ joko-vy íxugwi.

³³ Ha Hesu katu ojere ohexa gwemimbo'e kwéry.

—Ani xe nhe'ẽ joko teĩ, he'i Pedro-pe. —Ejei xe ypy-gwi, he'i Satanás-py ohenói-vy íxupe. —Neremombe'úi voi Nhandejáry nhe'ẽ. Anháy ruvixa nhe'ẽ-py ae eremombe'u voi, he'i Pedro-pe.

*“Taxe moirū katu okurusugwasu ohupi heraha-vy va'e-rami peiko-vy” he'i Hesu
(Mt 16.24-28; Lc 9.23-27)*

³⁴ Upéi ohenói Hesu ou hagwā oha-py ojogweroaty va'e-pe. Gwemimbo'e kwéry-pe ave ohenói:

—Peẽ xe moirūse ramo, anive pejapo rei teĩ pejapose va'e anho mante. Anive pepena teĩ pende rekove-rehe. Xe moirū ae katu peẽ. Okurusugwasu ohupi heraha-vy va'e-rami ijukapyrā-rami ae katu peiko, he'i íxupe kwéry.

³⁵ —Ha gwekove-rehe hakate'ŷ va'e katu, ndoikove mo'ái Nhandejáry ndive. Ha xe-rehe ha-py gwekove-rehe nopenái va'e, Nhandejáry rehewa

nhe'ẽ porã-rehe ha-py gwekove-rehe nopenáí va'e ave, oikove meme va'erã Nhandejáry ndive, he'i.*

³⁶ —Nde para'e ko yvy apy gwive járy ramo ereiko va'erã. Ha Nhandejáry ndive ereiko e'ŷ ramo katu mba'evete ndererekói va'erã. Opa ete-ma va'erã. Oipe'apa va'erã ndéhegwi.

³⁷ Nhandejáry ndive ereiko e'ŷ ramo, nande reko repyvéi-ma va'erã. Eremano rei va'erã. Ndererekói ereme'ẽ va'erã Nhandejáry-pe erejehepy hagwã. Eremano joty va'erã, he'i.

³⁸ —Ha ãygwa katu Nhandejáry-pe nomboetéi va'e, hekoha vai va'e ave. Upéa-rupi, “Ndaikwaái íxupe” peje ramo xe-rehe, xe nhe'ẽ napehenduséi ramo ave, xe, Nhande Ryke'y tee va'e, napena pena mo'ãi ave pende-rehe. Xe amano rire aju jevy ramo xe Ru rendy-rupi, hembigwái marangatu reheve, napena pena mo'ãi pende-rehe agwahẽ ramo, he'i íxupe kwéry Hesu.

9

¹ Ha Hesu katu he'i ondice oĩ va'e-pe:

—Anhete ko xe ha'e-ta peẽ-my, he'i. —Pene pa'ũ-my oĩ ohexá va'erã Nhandejáry gwuvixarã-pe. Ombaraete reheve oiko ramo, ohexá va'erã. Ohexá e'ŷ reheve nomano mo'ãi. Ohexá rire mate, omano va'erã, he'i íxupe kwéry Hesu.

Ojehete rekoviárõ Hesu (Mt 17.1-13; Lc 9.28-36)

² Seis áry rire, mbohapy ogweraha gwupive Hesu. Pedro, Tiago, João-pe ogweraha. Ogwerojeupi heraha-vy yvyatyrusu-rehe ha'e kwéry anho. Upepy ha'e kwéry hovagwy-rupi ojehete rekoviárõ-ma Hesu.

³ Overapa ijaо hendy-vy. Hesakã ete ipotí-gwi. Imorotí ete ijaо. Upéixa omomorotí rei ijohei hagwã, ndikatúi ko yvy-rehe oiko va'e.

⁴ Ha upéi mokõi ojekwaa íxupe kwéry. Moisés ndive ojekwaa Elias. Onhomongeta oĩ-vy Hesu ndive.

⁵ Ha Pedro katu he'i Hesu-pe:

—Iporã nhande nhaime a-py, mbo'eháry, he'i Pedro íxupe, —Torojapo mbohapy tapýi, peteĩ nde-vy gwarã, peteĩ Moisés pegwarã, peteĩ Elias pegwarã ave, he'i íxupe.

⁶ Upéixa he'i ndoikwaái-gwi onhe'ẽrã, ikyhyje eterei-gwi hikwái.

⁷ Upe rire omo'ãy-ma íxupe kwéry arai. Ohendu-ma arai-gwi onhe'ẽ va'e íxupe kwéry:

—Upe va'e xe ra'y, he'i. —Xe rembihayhu va'e voi, he'i. —Ejeapysaka katu inhe'ẽ-rehe, he'i íxupe onhe'ẽ va'e.

⁸ Onhe'ẽmba rire-ma pya'e osareko reko oĩ-vy hemimbo'e. Avave ndohexavéi-ma. Hesu-pe anho mante ohexá gwupive oho ramo.

⁹ Ogwejy jevy yvyaty ári-gwi. Ogwejy gwejy ou ramo he'i íxupe kwéry Hesu:

—Ani eremombe'u avave-pe eréhexa v'ekwe, he'i íxupe kwéry. —Xe Nhande Ryke'y tee va'e, aikove jevy rire ae, emombe'u katu, he'i íxupe.

¹⁰ Upéa-gwi avave-pe nomombe'úi hembiexakwe. He'i ojóupe:

—“Xe aikove jevy-ta” he'i ramo Hesu, mbava'e-pe po he'i Hesu? he'i oporandu randu-vy ojóupe hikwái.

¹¹ Ha upéi katu oporandu íxupe hikwái:

—Ma'erã, “Tou ranhe Elias” he'i judeu rekombo'ehaty, he'i íxupe.

¹² —Ou ranhe voi Elias omoatyrõmba hagwã. Omoatyrõmba ramo jepe, omoñjoty va'ekwe kwatia-rehe xe mbohasa asy va'e rehegwa nhe'ẽ. “Nhande

* ^{8:35} Mt 10.38-39; Lc 14.27; Jo 12.25-26

Ryke'y tee va'e-pe ombohabasa asy va'erā, ombojevy ave va'erā íxupe" he'i joty xe-rehe omoī-vy kwatia-rehe. Peikwaa tipo upe va'e nhe'ē? he'i.

¹³ —Ha Elias katu ou ra'e. Ou voi kuri, ha'e-ta nde-vy. Ojapose va'e ojapo hese. Yma he'i hagwe-rami, ãy ojapo-ma hese, he'i íxupe kwéry Hesu.

*Hesu omosē imondo-vy kunumi-gwi anháy
(Mt 17.14-21; Lc 9.37-43a)*

¹⁴ Ha upéi katu Hesu ogwahē jevy ou-vy gwemimbo'e kwéry renda-py. Ogwahē jevy ramo ohexa heta rehevə ojogweroaty aty ramo hikwái. Heta oī kente kwéry ijerekwe-rehe. Imbyte-py oī Hesu remimbo'e kwéry. Hendive onhomongeta hatā hatā oiko-vy judeu rekombo'ehaty.

¹⁵ Upe ramo, osareko-ma Hesu-rehe hikwái. Hesu rexa-vy, "Mba'éixa ogwahē?" he'i opondera eterei-vy hese hikwái. Ndouitaha-gwi, ogwahē ou-vy. Ohexa ramo íxupe, oriparapa oje'óí-vy Hesu renda-py ohogwaitī hagwā íxupe. Ogwerohory-ma íxupe.

¹⁶ —Mbava'e-rehe tipo penhomongeta hatā hatā ra'e peiko-vy? he'i íxupe kwéry Hesu.

¹⁷ Ha ojogweroaty va'e avyte-gwi peteī va'e omombe'u:

—Xe ra'y-rehe katu ojepota kuri anháy. Xe ra'y nonhe'ēve ēvēi-ma oī-vy anháy ojepota-gwi hese, he'i.

¹⁸ —Aru mo'ā kuri nde ha-py erembogwera hagwā, xe Járy. Ha ndorotopái, he'i. —Ha ogwahē ha-py íxupe anháy, oity íxupe imondo-vy. Ijuruyjúi, onhemohāingyrýu, onhembohete hatā ave. Ajerure mo'ā ne remimbo'e kwéry-pe omosē hagwā imondo-vy íxugwi anháy. Ha ndikatúi omosē, he'i Hesu-pe.

¹⁹ Upéi he'i Hesu íxupe:

—Aŷwa katu ndojeroviái vyteri xe-rehe. Ndapyta are mo'āi ne ndive. Ndoroipokwaa are mo'āvēi-ma. Eru katu íxupe xe ha-py, he'i íxupe kwéry Hesu.

²⁰ Ogweru íxupe kunumi hikwái. Ha anháy katu ohexa ramo Hesu-pe, omboheteryrýi-ma mitā kunumi-pe. Ho'a oho-vy yvy-py. Ijapajeréi oiko-vy yvy-rehe ijuruyjúi ramo.

²¹ Upéi oporandu túvy-pe Hesu:

—Are-ma voi tipo araka'e ojepota hese anháy? he'i íxupe.

—Imitā gwive ãy peve ojepota joty hese, he'i.

²² —Oity meme voi tata-py. Ojuka hagwā mo'ā y-py ave oity íxupe. Ha nde pu'aka ramo, erejapose va'e erejapo-ta hese, he'i. —Ore poriahuverekō katu ore pytygwō hagwā, he'i Hesu-pe.

²³ —Ma'erā tipo, "Nde pu'aka ramo" ere xe-vy? Ererovia tee ramo, opamba'e-rehe ipu'aka-ta Nhandejáry ojapo-vy nde-vy, he'i íxupe Hesu.

²⁴ Upe ramo hatā onhe'ē mitā ru:

—Xe arovia-ma. Ha arovia e'ŷ ramo, xe pytygwō xe arovia porāve hagwā, he'i.

²⁵ Ha Hesu katu ohexa kente kwéry oripara joa ogwa'ē-vy. Ohexa ramo oja'o-ma anháy-pe:

—Erejepota-gwi kunumi-rehe, nonhe'ēvēi, nohenduvéi. Ha'e-ta nde-vy, Epoi íxugwi. Anive ereju erejepota hese, he'i íxupe Hesu.

²⁶ Ha anháy katu osapukái rire, omboheteryrýi eterei rire íxupe, opoi íxugwi anháy oho-vy. Te'ōgwe-rami voi itúi yvy-rupi upe kunumi. Upéa-gwi,

—Omano-ma ra'e, heta he'i mo'ā va'e kunumi-rehe.

²⁷ Ha Hesu katu oipyhy íxupe ipo-rehe omopu'ā hagwā. Ha opu'ā-ma kunumi.

²⁸ Oike rire koty-py, oporandu Hesu-pe hemimbo'e kwéry ha'e kwéry anho:

—Ma'era tipo ore ae ndikatúiry oromosē imondo-vy anháy-pe, he'i Hesu-pe.

²⁹ —Koixagwa ndikatúi eremosē imondo-vy neremondói ramo Nhan-dejáry-pe ne nhe'ẽ, he'i. —Ha eremondo ramo ne nhe'ẽ íxupe, erehasa ramo erekaru e'ŷ reheve ave katu, eremosē-ta imondo-vy, he'i íxupe kwéry Hesu.

Hesu omombe'u mbe'u gwemimbo'e kwéry-pe

(Mt 17.22-23; Lc 9.43b-45)

³⁰⁻³¹ Upe-gwi Hesu ohasa jevy oho-vy. Galiléia-rupi ohasa hasa oho-vy. Ohasa ramo, oiko va'erā omombe'u mbe'u oiko-vy gwemimbo'e kwéry-pe. Upéa-gwi ndoipotái Hesu oikwaa hapykwere entéro va'e:

—Xe Nhande Ryke'y tee va'e voi. Xe mombe'u-ta voi xe pyhyharã-pe. Teko rei po-py voi xe me'ẽ-ta. Gwĩ xe jukase va'e xe pyhy-ta voi xe reraha-vy, he'i.

—Xe juka va'erā hikwái. Ha xe juka rire, mbohapy áry rire, aikove jevy-ma va'erā, he'i íxupe kwéry Hesu.

³² Hesu omombe'u porã ramo jepe, ndoikwaái joty inhe'ẽ.

—Mbava'e-rehe po he'i nhande-vy, he'i rei hikwái ojóupe. Ikyhyje-gwi, noporanduvéi íxupe.

³³ Upéi ogwahẽmba-ma Cafarnaum tetã-my. Oime ramo koty-py, oporandu íxupe kwéry Hesu:

—Mbava'e-rehe tipo penhomongeta ra'e pejukwe-vy tape-rehe? he'i íxupe kwéry.

³⁴ Ha'e kwéry katu okiririmbä ete Hesu-gwi. Ndoikwaái onhe'ẽrā hikwái. “Nhande kwaamá” he'i ojéupe hikwái. He'i ra'e hikwái tape-rehe ou-vy: “Kiva'e tipo onhembotuvixave va'erā nhane pa'ũ-gwi” he'i ojóupe. Upéa-gwi okiririmbä ete íxugwi hikwái. Ndoikwaavéiry rei onhe'ẽrā hikwái.

³⁵ Ha Hesu katu ogwapy oikwaa uka íxupe kwéry:

—Peju katu a-py, he'i doze oĩ va'e kwéry-pe. —Erenhemboete ukaseve tipo? he'i. —Aipo ramo, enhembohekemirïve katu, he'i íxupe kwéry. —Enterove va'e rembigwái ramo oiko va'e ramo eiko, he'i íxupe kwéry Hesu.

³⁶ Upéi oipyhy mitã ijavyte-py omoi. Upéi oikwavã íxupe, ohupi ojyva ári omoi-vy:

³⁷ —Eremogwahẽ ramo koixagwa mitã xe réry-py, xe-vy xe mogwahẽha-rami, eremogwahẽ va'erā. Xe mogwahẽ ramo katu, eremogwahẽha-rami ave xe mbouhare-pe, xe mogwahẽ va'erā, he'i íxupe kwéry Hesu.*

³⁸ Ha João katu he'i íxupe:

—Orohexa-ma kuri omosē ramo anháy-pe. Omosē imondo-vy nde réry-py rei. Ha nanhane mokambarái-gwi, “Ani eremosē tei Hesu réry-py rei” oro'e kuri íxupe, mbo'eháry, he'i João íxupe.

³⁹ Ha Hesu katu he'i:

—Ani erejoko tei íxupe. Xe réry-py hexapyrã-rupi ojapo va'e ndikatúi onhe'ẽ vai vai xe-rehe. Hembiaipo porã rire ndaikatúiry arã onhe'ẽ rei rei xe-rehe, he'i.

⁴⁰ —Ha nhane rembiaipo ojoko e'ŷ va'e katu, nhane pytygwõ va'e.

⁴¹ Anhete voi ko xe ha'e-ta nde-vy. Ha ne mboy'u va'e katu erejerovia-gwi xe-rehe, ombohekovia va'erā voi katu íxupe Nhandejáry, he'i.*

⁴² —Pejeapysaka katu xe nhe'ẽ-rehe. Ko mitã-rami oiko va'e, heko'ive va'e, xe-rehe ojerovia va'e ave, oĩ ohesa rerova uka va'erā xéhegwi ombojejavu uka hagwã. Hekoha vai eterei upe oporombojejavu uka va'e. Iporã arã ra'e jajuka hagwã ombo'e vai e'ŷ ngatu. Iporâve arã ra'e nhanhapytî hagwã ijaju'y-rehe itagwasu hese nhamoí-vy ipohyive hagwã, he'i. —Iporâve arã ra'e nhamombo

* 9:37 Mt 18.1-5; Lc 9.46-48 * 9:41 Lc 9.49-50

ygwasu-pyombo'e vai e'ŷ ngatu. Iporâve voi ko ra'e omano ranhe ra'e ombo'e vai e'ŷ ngatu pono xe-rehe ojeroviase va'e-pe ombo'e vaipa rei, he'i.

⁴³ —Xâke, penhangareko katu pendéjehe. Nde po-gwi para'e erejejavy ramo, enhepokytî katu eremombo-vy nde po. Peteï nde po e'ŷ va'e rekoharami eiko. Iporâve nde posogwe reheve eregwahê hagwâ ereho-vy Nhandejáry nhande ruvixa ha-py. Ha ne mombo ramo tata opa opa rei e'ŷ va'e-py katu mokõi nde po reheve, ivaive arã nde-vy. Nde poriahu ete va'erâ, he'i.

⁴⁴ —Upe-py ndopái tata. Nomanói te'õgwe'uha.*

⁴⁵ Ha nde py-gwi para'e erejejavy ramo, enhepykytî katu eremombo-vy nde py. Peteï nde py e'ŷ va'e rekoharami, eiko. Iporâve nde pysogwe reheve eremoirû hagwâ Nhandejáry ne ruvixarâ-pe. Ha ne mombo ramo tata opa opa rei e'ŷ va'e-py katu mokõi nde py reheve, ivai arã nde-vy. Nde poriahu ete va'erâ.

⁴⁶ Upe-py nomanói te'õgwe'uha. Ndopái tata.

⁴⁷ Ha nde resa ne mbojejavy ukase ramo, enohê katu nde resakwe emombo ndejéhegwi. Peteï gwesa ogwenohê va'ekwe-rami eiko. Iporâve peteï nde resa reheve eregwahê ereho-vy Nhandejáry nhande ruvixa oiko haty-py. Ne mombo ramo tata opa opa rei e'ŷ va'e-py mokõi nde resa reheve, ivaive arã nde-vy.

⁴⁸ Upe-py nomanói voi te'õgwe'uha. Ndopái tata.*

⁴⁹ Enterovéa tata-py ohasa va'erâ onhemopotî-vy.

⁵⁰ He porâ juky. Ha ndahéi ramo katu ndikatúi eremoatyrô jevy. Aipo ramo erekó katu nde py'apy-py juky ramigwa pono nde poxy onhondive, ne nhe'ẽ piro'y hagwâ onhondive, he'i íxupe kwéry Hesu.

10

*“Topoi e'ŷ katu kwimba'e gwembireko-gwi” he'i Hesu
(Mt 5.31-32; 19.1-12; Lc 16.18; 1 Co 7.10-17)*

¹ Upe-gwi osê Hesu Judéia tetâ tetâ-rupi oho-vy. Y Jordão kupe-rupi ave oho. Ha gwî kente kwéry ojogweroaty aty joty iha-py hikwái. Ha Hesu katu ojapo memeha-rupi ombo'e mbo'e joty oho-vy.

² Ha gwî fariseu kwéry katu ogwahê ou-vy iha-py ombovyte mo'ã hagwâ íxupe. He'i:

—Gwî omenda va'ekwe opoi rei ramo gwembireko-gwi, oiko joty tipo tekoha-rupi? he'i Hesu-pe oporandu-vy, ombojejavy ukase mo'ã-vy hikwái.

³ Upe ramo Hesu oporandu íxupe kwéry:

—Pene mandu'a vyteri pa Moisés amyrî he'i va'ekwe-rehe pejapo hagwâ? he'i íxupe kwéry.

⁴ Upéi ha'e kwéry he'i Hesu-pe:

—Upéa he'i voi va'ekwe Moisés amyrî. He'i va'ekwe: “Erepoise ramo ne rembireko-gwi, ehai ranhe kwatia-rehe ereikwaa ukapa hagwâ. Upéi eme'ẽ íxupe kwatia erepoi hagwâ íxugwi” he'i va'ekwe Moisés amyrî, he'i hikwái Hesu-pe.

⁵ Ha Hesu katu he'i íxupe kwéry:

—Ha pende py'aratâ-gwi nagehenduséiry inhe'ẽ. Upéa-gwi Moisés amyrî he'i va'ekwe peë-my pepoi hagwâ pene rembireko-gwi, he'i.

⁶ —Ha ojejapo hagwe áry-py kunha ypy kwimba'e ypy ndive katu gwî omoirû va'ekwe Nhandejáry nde'íry voi va'ekwe opoi poi hagwâ, he'i íxupe kwéry.*

⁷ —Nhandejáry nhe'ẽ he'i a-rami:

* 9:44 Is 66.24 * 9:48 Mt 5.30; 18.6-9; Lc 17.1-2 * 10:6 Gn 1.27

"Yma ete va'ekwe kwimba'e ypy ndive ojapo-ma ave kunha ypy. Upéa-gwi kwimba'e oheja va'erā gwu osy-pe gwembireko oirūrā-rehe omenda hagwā. Omoirū teeħarā ndive omenda.

⁸ Mokōi va'e-rami ndoikovéi-ma. Peteīxa ae onhomoirū-ma oiko-vy va'erā"^{*} he'i Nhandejáry kwatia nhe'ē. Nhandejáry kwatia nhe'ē he'i hagwe-rami, jaikwaa omenda va'ekwe rekoha. Ndoikovéi ha'e anho rei. Peteīxa ae hekoha.

⁹ Upéa-gwi tomomboi uka e'ŷ katu teko rei Nhandejáry remimbojehe'a, he'i fariseu kwéry-pe Hesu.

¹⁰ Ha upéa nhe'ē-rehe oporandu jevy íxupe koto-py hemimbo'e kwéry.

¹¹ Ha he'i íxupe kwéry:

—Gwembireko-gwi opoise va'e omenda jevy ramo, ojapo vai voi hese.

¹² Ha kunha oména-gwi opoise va'e omenda jevy ramo, ojapo vai voi ave hese, he'i íxupe kwéry Hesu.

Hesu oħovasa mitā-pe

(Mt 19.13-15; Lc 18.15-17)

¹³ Upe ramo ojereru Hesu ha-py mitā opo omoiñ hagwā hese. Ha hemimbo'e kwéry ojoko íxupe kwéry:

—Togweru e'ŷ katu mitā, he'i.

¹⁴ Ha Hesu katu ohexa ramo oja'o va'e, ojoko íxupe.

—Ani pejoko teiñ mitā ou va'erā, he'i. —Tou katu xe renda-py, he'i jotoy Hesu.

—Ha'e-ta peē-my: Koixagwa omoirū-ma va'erā Nhandejáry gwuvixarā-pe, he'i.

¹⁵ —Anhete ko xe ha'e-ta peē-my, he'i. —Erenhemboete ukase rei va'e neremoirū-ma va'erā Nhandejáry nde ruvixarā-pe. Ha gwī heko'ive va'e, mitā-rami onhemboete ukase e'ŷ va'e ae, omoirū-ma va'erā Nhandejáry gwuvixarā-pe, he'i íxupe kwéry. —Upéa-gwi ani pejoko teiñ mitā ou va'erā, he'i mitā-rehe oikwaa uka-vy kiva'e po omoirū-ta Nhandejáry-pe.

¹⁶ Upéi ohupi mitā-me oikwavā ohupi-vy ojyva ári:

—Nhandejáry tandem rovasa katu, he'i peteī teiñ-pe Hesu omoiñ-vy opo hese.

"Mba'éixa ajapo-ta xe aikove hagwā Nhandejáry ndive apave'ŷ reħeve" he'i Hesu-pe

(Mt 19.16-30; Lc 18.18-30; 1 Tm 6.6-10)

¹⁷ Osē mo'ā oho-vy Hesu. Ha ohogwaitiñ peteī kwimba'e íxupe oripara ou-vy. Hovagwy-py onhesū gwetypy'ā-rehe. Oporandu Hesu-pe:

—Nde ko nde reko porā va'e, mbo'eháry. Mba'éixa ajapo-ta xe aikove hagwā Nhandejáry ndive apave'ŷ reħeve, he'i Hesu-pe.

¹⁸ Hesu he'i íxupe.

—Ma'erā, "Nde reko porā va'e" ere xe-rehe? he'i oporandu-vy íxupe. — Ndaipóri ojejavu e'ŷ va'e. Nhandejáry ha'e anho mante heko porā ete va'e, he'i íxupe.

¹⁹ —Ereikwaa-ma Nhandejáry omombe'u va'ekwe nde rekora:

“Ani ereporojuka teiñ ereiko-vy, ani ereiko teiñ ambue mbue ndive, ani eremonda teiñ, ani nde apu rei teiñ nde rapixa-rehe, ani erembotavy ereraha hagwā nde rapixa rembiereko. Emboete ae katu nde ru nde sy ave”.*

Upéixa omombe'u va'ekwe Nhandejáry, he'i íxupe Hesu.

²⁰ —Xe mitā ramogware āy peve upéa nhe'ē namokanhýiry areko-vy, mbo'eháry. Ahendu vyteri aiko-vy xe, he'i Hesu-pe.

²¹ Ha Hesu oma'ē-vy hese, ohayhu voi íxupe:

* 10:8 Gen 2.24 * 10:19 Ex 20.12-16

—Peteĩ oĩ va'e nderejapói vyteri, he'i íxupe. —Eraha ranhe terejerure hepy upe ererekva'e-rehe. Upe rire iporiahu va'e kwéry-pe ereme'ẽmba hagwã hepykwe, he'i íxupe. —Hetave oĩ va'erã nde-vy gwarã yváy-py, he'i íxupe. —Ha upe rire katu eju xe moirũ, he'i íxupe Hesu.

22 Upéa nhe'ẽ ha'e ohendu ramo, ipy'areraha-ma voi oiko-vy. Ndaipy'agwapyvéi-ma. Ndovy'avéi-ma oho-vy heta mba'e ogwereco-gwi.

23 Ha Hesu oma'ẽ oĩ-vy gwemimbo'e kwéry-rehe:

—Imba'e reta va'e hasy peve omoirũ va'erã Nhandejáry gwuvixarã-pe, he'i íxupe kwéry.

24 Ha ojapura hese hikwái. Ha Hesu katu he'i jevy íxupe kwéry:

—Xe ra'y kwéry, he'i, —hasy eterei gwĩ imba'e reta-rehe ojerovia va'e omoirũ hagwã Nhandejáry gwuvixarã-pe, he'i.

25 —Hasy eterei nhambohasa ka'ijugwasu kwa-rupi mymbagwasu camelo, he'i. —Ha hasyve voi gwĩ imba'e reta va'e omoirũ hagwã Nhandejáry nhande ruvixa-pe, he'i gwemimbo'e kwéry-pe Hesu.

26 Ha ha'e kwéry katu onhemondýi eterei-ma hikwái:

—Aipo ramo, avave nonheresende mo'ãi arã ra'e. Kiva'e nipo onheresende va'erã? Kiva'e nipo onheresende va'erã? he'i ojóupe hikwái.

27 Ha Hesu oma'ẽ oĩ-vy hese kwéry:

—Ojéhegwrei rei nonheresendéi arã avave, he'i. —Tupã Nhandejáry ha'e anho mante oĩ ne resendeharã, he'i. —Ha'e opamba'e rerekva'e rereko kwaaha voi, he'i gwemimbo'e kwéry-pe.

28 Ha upéi katu he'i íxupe Pedro:

—Ha ore katu opamba'e orpheja oromoirũ hagwã, he'i Hesu-pe.

29 —Anhete ko xe ha'e-ta nde-vy, he'i íxupe Hesu. —Xe-rehe ha-py nde róga pygwa ereheja ramo, ombohekovicia va'erã nde-vy ne rembiejare. Xe moirũ hagwã, nde ryke'y ereheja ramo, nde ryvy ereheja ramo, ne reindy ereheja ramo, nde ryke ereheja ramo, nde kypy'yry ereheja ramo, nde kyvy ereheja ramo, nde sy ereheja ramo, nde ru ereheja ramo, nde ra'y, nde rajy ereheja ramo, ne memby ereheja ramo, nde yvy ereheja ramo ave xe moirũ hagwã, ombohekoviariõ va'erã nde-vy ne rembiejare, he'i íxupe Hesu. —Xe rehewa nhe'ẽ porã erehendu-gwi ereheja ramo, ombohekoviariõ va'erã nde-vy ne rembiejare. Nde rexakwaa rei jevy va'erã.

30 Hetave ome'ẽ va'erã nde-vy. Peteĩ ereheja rekoviá ome'ẽ va'erã nde-vy cem peve, he'i íxupe Hesu. —Ome'ẽ va'erã nde-vy nde rogarã, nde ryke'yra, nde ryvyrã, ne reindyrã, nde syrã ave. Ne mitãrã ome'ẽ va'erã nde-vy. Nde yvyrã ome'ẽ va'erã nde-vy. Heta nde-vy ome'ẽ ramo jepe, nde rerekva'e asy joty va'erã. Áy ome'ẽ va'erã nde-vy. Ha upe rire katu ko yvy opa rire-ma, ereikove meme va'erã Nhandejáry ndive erepave'ỹ rehewe, he'i íxupe Hesu.

31 —Heta oĩ áy onhemboeteve va'e. Ha upe rire katu ndatuvixa mba'éiry va'erã Nhandejáry-pe. Heta oĩ áy heko'ive va'e. Ha upe rire katu tuvixa mba'e va'erã Nhandejáry-pe, he'i gwemimbo'e kwéry-pe Hesu.

Hesu omombe'u jevy omanotaha

(Mt 20.17-19; Lc 18.31-34)

32 Ha upéi Hesu ogwata oho-vy tapegwasu-rupi. Jerusalém tetã-my ojéupi oho-vy. Gwemimbo'e kwéry renonde-rupi oho.

—Ma'erã po oho Jerusalém tetã-my, he'i opondera-vy hese hikwái.
Ha hapykwérigwa katu oiko-tagwi ikyhyje hikwái.

Upéi ogwenohẽ jevy gwĩ doze gwemimbo'e ha'e kwéry anho omombe'u hagwã ojéupi oiko-ta va'e:

³³ —Pejeapysaka katu xe nhe'ẽ rehe, he'i. —Jaha jaiko-vy Jerusalém tetā-my. Upe-py xe Nhande Ryke'y tee va'e, xe pyhy va'erã xe me'ẽ hagwã pa'i ruvixa kwéry-pe, judeu rekombo'ehaty-pe ave. Upe-py, "Tomano" he'i va'erã xe-rehe. Upéi xe me'ẽ va'erã xe reraha-vy nhande kwéry e'ŷ va'e-pe.

³⁴ Xe-rehe onhembohory va'erã, onygwõ ave va'erã xe-rehe. Xe mbopi va'erã ave, xe juka va'erã ave. Ha upe rire katu mbohapy áry rire anhemoin-gove jevy-ma va'erã, he'i gwemimbo'e kwéry-pe anho onhemombe'u-vy.

"Erenhemboete ukaseve ramo, erejejokwái va'e-rami eiko"

he'i Hesu

(Mt 20.20-28; Mc 9.35; Lc 22.24-27; Jo 13.12-17; Ef 4.2; Fp 2.3-4; 1 Pe 5.3)

³⁵ Upéi hi'agwĩ-ma ou Zebedéu ra'y, Tiago João ndive. Hesu ha-py ogwahẽ-ma ou-vy:

—Oroipota erejapo ore-vy oime raẽ va'e orojerure va'e nde-vy, mbo'eháry, he'i íxupe.

³⁶ —Mba'e pa ereipota xe ajapo nde-vy, he'i gwemimbo'e-pe.

³⁷ —Nde yke-rehe joja torogwapy erenhemomba'egwasu ramo, he'i íxupe.

³⁸ Ha Hesu katu he'i íxupe kwéry:

—Ndapeikwaái pene rembigerure-rehe xe-vy, he'i. —Xe mbohasa asy hagwã-rami ave, pehasa asy-ta para'e? Ajepy'apy hagwã-rami ave pejepy'apy-ta para'e? he'i oporandu-vy Zebedeu ra'y Tiago João ndive-pe.

³⁹ —Ha'e voi, he'i. —Ne ndive ore orohasa asyse, he'i íxupe.

—Néi, he'i, —Xe mbohasa asy hagwã-rami ave, pehasa asy va'erã voi. Ajepy'apy hagwã-rami ave, pejepy'apy va'erã voi, he'i íxupe kwéry mokõigwape.

⁴⁰ —Ha xe Ru nde'íry apombogwapy hagwã xe yke-rehe joja. Ha'e ae ombogwapyse va'e ae, ombogwapy va'erã xe yke-rehe, he'i íxupe Hesu.

⁴¹ Ha hemimbo'e ojerure e'ŷ va'e katu oĩ dez. Ohendu-ma ramo onhembotuvixasse mo'ã va'e-pe ogwerovy'rec'ŷ voi. Tyvýry reheve Tiago-rehe ija'e'ŷ hese hikwái.

⁴² Ha upéi katu:

—Peju a-py, he'i entéro gwemimbo'e kwéry-pe Hesu. —Peikwaa voi judeu e'ŷ kwéry rekoha, Nhandejáry kwaa e'ŷha rekoha. Huvixa kwéry he'iha omanda voi hese oiko-vy. Ipu'aka voi hese gwĩ onhemboete va'e.

⁴³ Upe va'e rekoha-rupi xe ndaipotái peiko, he'i. —Pende rekorã a-rami. Erenhembotuvixa mba'e ukase ramo, eiko katu nde rapixa rembigwái ramo.

⁴⁴ Erenhemboete ukaseve ramo, erejejokwái va'e-rami eiko, he'i. —Nde rerekoseha-rami eiko.

⁴⁵ Xe ave Nhande Ryke'y tee va'e jepe ndajúi va'ekwe xe rembigwairã heta ajoju hagwã. Aju ae va'ekwe tembigwái-rami aiko hagwã. Ajejuka uka hagwã aju va'ekwe heta aresende va'erã-rehe, he'i gwemimbo'e kwéry-pe Hesu.

Hesu ombogwera hesapyo e'ŷ va'e

(Mt 20.29-34; Lc 18.35-43)

⁴⁶ Ogwahẽmba Jericó tetã-my. Ohasa oho-vy. Upéi osẽ oho-vy Hesu gwemimbo'e kwéry ndive. Heta ojogweroaty va'e oho ave indive. Osẽ jave ogwapy oĩ-vy tapegwasu rembe'y-py hesapyo e'ŷ va'e. Héry va'e Bartimeu. Ha Bartimeu Timeu ra'y. Om̄ba'e repyrã-rehe ojerure va'evy.

⁴⁷ Ohendu ramo Hesu Nazaré pygwa ohasa ramo, onhe'ẽ hatã:

—Hesu, Davi remiarirõre, xe poriahuvereko katu, he'i onhe'ẽ hatã-vy.

⁴⁸ Heta oĩ va'e inhe'ẽ ojoko:

—Ekirirĩ katu, he'i íxupe.

Ha Bartimeu katu hatāve tāve joty onhe'ẽ:
 —Hesu, Davi remiarirõre, xe poriahuverekō katu, he'i onhe'ẽ hatā-vy.
49 Ha upéi optya-ma Hesu:
 —Ehenói katu íxupe tou xe ha-py. Hesu ne renói-ma kuri peje íxupe, he'i.
 Ha ohenói hesapysó e'ŷ va'e-pe hikwái:
 —Ani erejapura tei. Epu'ã katu. Hesu ne renói, he'i íxupe hikwái.
50 Ha upéi onhenhugwāha omombo opu'ã pya'e oho-vy Hesu ha-py.
51 —Mbava'e tipo ereipota xe ajapo nde-rehe? he'i hesapysó e'ŷ va'e-pe.
 —Eme'ẽ jevy xe-vy xe resapysorã, mbo'eháry, he'i Hesu-pe.
52 Upe-ma ramo Hesu he'i íxupe:
 —Tereho, he'i. —Xe-rehe erejerovia-gwi, erekwera-ma, he'i íxupe Hesu.
 Onhe'ẽ jave okwera-ma. Upe rire katu omokambara-ma íxupe tapegwasurupi oho jave.

11

Hesu oho Jerusalém tetā-my (Mt 21.1-11; Lc 19.28-40; Jo 12.12-19)

1 Ha Hesu gwemimbo'e kwéry ndive ogwahẽ ogwata oho-vy Jerusalém tetā-my. Hi'agwī oĩ ramo jepe íxugwi, nogwahẽ joty upe-py. Upe ramo ogwahẽ ranhe oho-vy Betfagé tetā mirī-my. Betânia-py yvyaty Oliveiras ypy-py ogwahẽ ranhe oho-vy. Ogwahẽ rire, omondo mokõi gwemimbo'e gwenonde-rupi:

2 —Tapeho katu upe tetā mirī-my nhande rovarehéi, he'i. —Ereike-ma ramo eretopa va'erã mburika'i onhenhapytī va'e. Ndojeupíry vyteri hi'ári avave. Ejora eru ko'a-py, he'i.

3 —“Ma'erã erejapo upéa?” he'i ramo nde-vy upe pygwa, ere íxupe, “Oiporuta nhande ruvixa” ere íxupe. “Pya'e ogweruruka jevy-ta” ere íxupe, he'i íxupe kwéry Hesu.

4 Ha upéi katu oho otopa onhenhapytī ha-py mburika'i. Okẽ rovagwy-py, tape yke-rehe otopa.

5 Ojora ramo mburika, oporandu íxupe mokõi hemimbo'e-pe, upe-py oĩ va'e:

—Ma'erã erejapo upéa, he'i Hesu remimbo'e-pe.

6 Ha Hesu nhe'ẽgwe omombe'u íxupe kwéry. Upéa-rupi oheja ogweraha mburika'i.

7 Ha upéi katu ogweru Hesu-pe. Omoĩ hi'ári oao. Ha Hesu ojeupi-ma hi'ári.

8 Heta va'e omboi mboi oao oipysó hagwā Hesu renda opyrū hagwā-rupi. Oikytī kytī omoĩ-vy yvy-rupi yvyra rogwe hakā reheve. Yvy-rupi omohasãi imoĩ-vy.

9 Osapukái joa henonde rupigwa. Hapykwerigwa osapukái ave:

—Ereju-ma, he'i imboete-vy. —Iporã ete katu, he'i onhe'ẽ hatā-vy. —Nhandejáry réry-py erekwahẽ-ma ereju-vy. Tande rovasa porã katu Nhandejáry, he'i Hesu-pe.*

10 —Upe va'e ou va'e nhande ruvixagwasurã. Upe va'e ou va'e nhane ramoirusu Davi ramigwa voi. Ou ramo, tohovasa íxupe Nhandejáry. Nhandejáry yváy-py oĩ va'e-pe jaha nhamboete, he'i Hesu-rehe onhe'ẽ hatā-vy.

11 Ha Hesu katu ogwahẽ-ma Jerusalém tetā-my. Nhandejáry-pe nhamboete haty-py óga kakwaa-py oike. Oike-vy osareko reko enterovéa-rehe. Osareko rire, ka'aru ete-ma. Upéa-gwi osẽ oho-vy Betânia-py. Gwemimbo'e kwéry ndive oho.

* **11:9** SI 118.25-26

¹² Ko'ẽ ramo Betânia-gwi ou-vy, ovare'a ogweru Hesu.

¹³ Mombyry-gwi ohexa figo máta hogwe porã va'e. Oho ohexa: "Hi'a para'e" he'i oho-vy. Ha ogwahẽ ramo, ndahi'airy íxupe. Hogwe rei oĩ. Ndaipóri figo. Ndaha'éi vyteri hi'aha áry:

¹⁴—Anive ho'u avave nde a, he'i figo máta-pe.

Upéixa omoõ onhe'ẽ yva máta-pe. Ha ohendu hemimbo'e kwéry inhe'ẽ.*

Hesu oike Nhandejáry-pe nhamboete haty-py óga kakwaa-py

(Mt 21.12-17; Lc 19.45-48)

¹⁵ Ha upéi katu ogwahẽ jevy-ma Jerusalém tetã-my hikwái. Ha Hesu oike Nhandejáry róga kakwaa-py. Upe-gwi omosẽmba om̄ba'e jogwa va'e. Oma'evende oĩ va'e ave omosẽ. Upe-py oĩ ave pirapire ombohekovia va'e hepy-rehe. Ombohekoviapa oiporu jevy va'erã-py. Upéa-gwi íxupe kwéry omosẽ imondo-vy. Imba'e renda ombovapy íxugwi kwéry. Ombovapy pykasu járy apyka kwéry ave.

¹⁶ Ndohejái avave ogweraha mba'eve Nhandejáry róga kakwaa roka-rupi.

¹⁷ Onhemonhe'ẽ-vy he'i íxupe kwéry:

—A-rami omoõ va'ekwe Nhandejáry kwaitia-rehe:

"Xe róga xe mboete haty-py héry va'erã onhe'ẽ mondo mundo Nhandejáry-pe

haty. Upe-py entéro va'e gwive ombojeupi inhe'ẽ Nhandejáry-pe"*

he'i. Ha peẽ katu pemoingo a-py gwĩ oporosakea va'e onhemi va'e-rami, he'i íxupe kwéry Hesu.

¹⁸ Ohendu herakwã pa'i ruvixa kwéry judeu rekombo'ehaty ave. Ohendu ramo, oheka heka ojuka hagwã mo'ã Hesu-pe. Ikyhyje-gwi íxugwi ojukase. Ha enterovéa, "Iporã ete hemimombe'u mbe'u" he'i opondera-vy hese hikwái. Upéa-gwi ikyhyje íxugwi pa'i ruvixa kwéry.

¹⁹ Ka'aru ete ramo osẽ-ma Hesu gwemimbo'e kwéry ndive. Tetã-gwi osẽ oje'ói-vy.

²⁰ Ko'ẽ ramo ohasa jevy. Ohasa ramo, ohexa yva máta ipirupa ra'e hapo gwive. Hokuipa-ma.

²¹ Ha Pedro katu imandu'a Hesu nhe'ẽgwe-rehe:

—Ema'ẽ erehexa hagwã, mbo'eháry, he'i Hesu-pe. —Ipiru-ma ra'e pe yva máta ere va'ekwe-pe, "Anive nde a ho'u avave" ere kuri íxupe. Ne nhe'ẽ pokatu voi nipo ra'e, he'i Hesu-pe.

²²⁻²³ Ha upéi katu he'i íxupe kwéry Hesu:

—Ejerovia katu Nhandejáry-rehe. Anhete ko xe ha'e-ta nde-vy. Eremoõ ramo ne nhe'ẽ ko yvyaty-pe, "Ejeupi enheapymi ygwasu-py" oiko-ta nde-vy. Ne nhe'ẽ hagwe-rami oiko-ta. Oiko-ta voi ndererovia ku'a ku'ái ramo nde py'apy-py. Oiko-ta voi nde-vy ererovia tee ramo oikotaha ne nhe'ẽ hagwe-rami.

²⁴ Upéa-gwi ha'e-ta nde-vy: Oime raẽ va'e-rehe erejerure ramo erenhomoneta-vy Nhandejáry ndive, erovia porã katu íxupe. "Oime ra'e xe-vy gwarã" ere ndejéupe. Ererovia porã ramo, oiko-ta voi nde-vy.

²⁵ Erepu'ã ramo erenhomoneta hagwã Nhandejáry ndive, eiporiahuvereko katu nde-vy hembiapo vai va'ekwe, nde poriahuverekohagwã nde Ru yváy-py oĩ va'e erejejavy va'ekwe-rehe, he'i.

²⁶ —Ereiporiahuvereko e'ŷ ramo nde rapixa-pe, nande poriahuverekomo'ãi nde Ru yváy-py oĩ va'e erejejavy va'ekwe-rehe, he'i íxupe kwéry Hesu.*

"Kiva'e tipo ojapo uka nde-vy ko'ã va'e" he'i Hesu-pe

(Mt 21.23-27; Lc 20.1-8)

* **11:14** Mt 21.18-19

* **11:17** Is 56.7; Jr 7.11

* **11:26** Mt 21.20-22; Mc 11.13-14

²⁷ Ha upéi katu ogwahē jevy Jerusalém tetā-my hikwái. Ha Hesu ogwata jave Nhandejáry róga kakwaa gwy-rupi, ou henda-py pa'i ruvixa kwéry, judeu rekombo'ehaty kwéry, judeu ruvixa kwéry ave:

²⁸ —Kiva'e nhe'ẽ-py tipo ereporombo'e? he'i íxupe. —Kiva'e he'i nde-vy ra'e erejapo hagwā a-rami? he'i oporandu-vy Hesu-pe hikwái.

²⁹ —Xe-vy peporanduha-rami ave aporandu-ta peẽ-my xe aikwaase pendéhegwiv'a'e-rehe, he'i. —Pemombe'u ranhe katu xe-vy peẽ-my aporandu-ta va'e-rehe. Upéi, xe amombe'u-ta ave peẽ-my kiva'e nhe'ẽ-py aporombo'e, he'i íxupe kwéry Hesu.

³⁰ —Ãy aporandu ranhe-ta peẽ-my. Kiva'e nhe'ẽ-py oporomongarai va'ekwe João Batista amyri? Nhandejáry nhe'ẽ-py para'e? Teko rei nhe'ẽ-py para'e? he'i íxupe kwéry. —Pemombe'u ranhe katu xe-vy, he'i huvixa kwéry-pe.

³¹ Ha ha'e kwéry katu ndoikwaáiry onhe'ẽrã:

—Mbava'e ja'e rei-ta po Hesu-pe? he'i ojóupe oporandu randu-vy hikwái. —“Nhandejáry nhe'ẽ-py oporomongarai va'ekwe João” ja'e ramo, “Ma'erã po ndapejeroviáí va'ekwe hese?” he'i arã nhande-vy.

³² Ha “Teko rei nhe'ẽ-py oporomongarai va'ekwe João” ja'e ramo katu, nhane mytu'e'ŷ arã nhandéjehe. “Pende apu” he'i arã nhande-vy te'ýi jusu, he'i ojóupe hikwái. —“Nhandejáry nhe'ẽ-py omombe'u va'ety ae katu João” he'i arã. Mbava'e tipo ojapo arã nhande-rehe hikwái? he'i ojóupe huvixa kwéry.

³³ Upéa-gwi,

—Ndoroikwaáiry, he'i mo'ã Hesu-pe okyhyje-gwi.

—Aipo ramo, xe-vy napemombe'uiha-rami ave, kiva'e nhe'ẽ-py aporombo'e a-rami, ndaikwaa uka mo'ãi ave peẽ-my, he'i judeu ruvixa kwéry-pe Hesu.

12

Hesu omombe'u arandu rehewa nhe'ẽ uvaty rehewa-rami

(Mt 21.33-46; Lc 20.9-18)

¹ Ha upéi katu Hesu omombe'u jevy judeu ruvixa kwéry-pe. Arandu rehewa nhe'ẽ uvaty rehewa-rami omombe'u:

—Oĩ va'ekwe uva onhotŷ va'ekwe. Oho onhotŷ uva ojapo hagwā uvaty. Upéi ogweroajere imboty-vy. Ojo'o itakwa hykwere ryrurã. Omboyvate ojeupi hagwā orepara hagwā. Upéi ijáry oiporuruka ombo'apo va'erã-pe. Hi'aju ramo, oipota omboja'o yva ojéupe. Ha upe rire katu oho mombyry. Tetā ambue-py oho.

² Hi'aju-ma ramo pe yva uva, ombou ivía ramo gwembigwái omboja'o hagwā yva mbyte-rupi heraha-vy.

³ Ha uvaty-py ombo'apo va'e katu oipyhy imboupyre-pe oinupã ombojevy rei mba'eve e'ŷ-rehe.

⁴ Outro jevy ombou ivía ramo, ha'e kwéry katu onhakärupã onhembosarái hese. Nomboetéiry íxupe.

⁵ Outrove ombou jevy. Ha'e kwéry katu ojuka íxupe. Heta ou ramo, onhembosarái hese kwéry. Ou va'e oinupã. Oinupã e'ŷ ramo, ojuka.

⁶ Peteĩ oikori vyteri ombou va'erã ta'yry hembiayhu. Ipaha-py ombou íxupe kwéry gwa'yry peteĩ. “Xe ra'y-pe katu omboete va'erã” he'i mo'ã imbou-vy.

⁷ Ha gwī uvaty-py ombo'apo va'e katu he'i ojóupe: “Upéa uvaty jaryrã voi” he'i. “Jaha jajuka íxupe. Uvaty-rehe nhanhembojáry va'erã” he'i ojóupe.

⁸ Upéa-gwi oipyhy íxupe ojuka omboyke uvaty-gwi.

9 Ha upéi katu oikwaa-ma ramo pe uvaty járy, mba'éixa ojapo-ta hese kwéry? he'i. —Ogwahē ou-vy ramo, ojuka-ma va'erā katu gwī hembiapo vai va'e-pe. Upéi ohekoviarō va'erā outro omba'apo jevy va'erā, he'i íxupe kwéry Hesu.

Upéixa omombe'u judeu ruvixa kwéry reko uvaty rehewa-rami.

10 Ha upéi katu he'i jevy judeu ruvixa kwéry-pe:

—Pemonhe'ẽ nhe'ẽ tei peiko-vy yma gware nhe'ẽ Nhandejáry omoī uka va'ekwe kwaitia-rehe, ndapeikwaáiry, he'i. —Yma gware nhe'ẽ a-rami: “Ndovaléiry, he'i óga apoha ita-rehe. Ha upe ita katu ojohu vai ramo jepe, ojeporuve joty óga pytahoha ramo. Óga jekoha voi upe ita.

11 Upéa Nhandejáry rembiapo porā, ja'e. Jahexá-vy, Iporā porā katu, ja'e Nhandejáry rembiapo-rehe”*

he'i xe-rehe yma gware nhe'ẽ. Ma'erā he'i va'e ndapeikwaáiry ra'e? he'i íxupe kwéry Hesu hekokwe mombe'u-vy.

12 Ohendu ramo inhe'ẽ, oikwaa pya'e ojehewa hikwái:

—Nhande rehewa nhe'ẽ kuri omombe'u Hesu, he'i ojóupe.

Upéa-gwi upe judeu ruvixa oipyhyse mo'ã íxupe. Ha ndoipyhýi, ikyhyje-gwi. Nombopoxyséi-gwi Hesu ndive heta oĩ va'e-pe, ndoipyhýiry joty íxupe hikwái. Upe rire ohejari jevy oje'óí.

Judeu ruvixa omonhe'ẽ avyse mo'ã Hesu-pe

(Mt 22.15-22; Lc 20.20-26)

13 Ha upéi katu judeu ruvixa kwéry omonhe'ẽ avyse mo'ã Hesu-pe. Upéa-gwi ombou iha-py fariseu-pe Herodes re'ýi ndive:

14 —Orohexa kwaa nde reko apu e'ýha nde-rehe, mbo'eháry. Ne nhe'ẽ ndo-johu porāi ramo jepe, eremombe'u joty anhetegwa va'e. Avave-gwi neretíry eremombe'u-vy. Nhandejáry remimbota eremombe'u voi. Erehexa kwaa voi hekoha enterove-rehe. Upéa-gwi anhei-rupi ne remimombe'u Nhandejáry rape kwaa uka-vy, he'i. —Aipo ramo, iporā para'e nhande, judeu reko-rupi jaíko va'e, japaga nhame'ẽ-vy mburuvixagwasu César-pe hemimbopaga uka? Iporā para'e japaga e'ý? he'i. —Iporā para'e nhame'ẽ? Iporā para'e nhame'ẽ e'ý? he'i. —Emombe'u ore-vy upéa-rehe oroikwaa hagwā, he'i oity vai ukase-vy íxupe hikwái.

15 Ha ha'e ohexa kwaa hese hekoha vai: “Omo'ã kwaa voi opy'a ky'aha” he'i ojéupe hese. Upéi he'i judeu ruvixa kwéry-pe:

—Ma'erā xe monhe'ẽ avyse? he'i. —Eru xe-vy moeda mburuvixagwasu remimbopaga uka tahexa, he'i íxupe kwéry.

16 Petei ogweru. Upéi oporandu íxupe kwéry:

—Kiva'e ra'anga pa upe va'e moeda? Kiva'e ohai uka va'ekwe moeda-rehe? he'i íxupe kwéry.

—César ra'anga. Hembihai uka ave, he'i íxupe hikwái.

17 —Aipo ramo, César-pe imba'e eme'ẽ. Ne mbopaga uka ramo, eme'ẽ jevy íxupe, ijáry-pe. Ha Nhandejáry-pe katu hemimbota eme'ẽ íxupe, he'i huvixa kwéry-pe Hesu.

—Hasy va'e-rehe jepe nhaporandu ramo íxupe, omombe'u porā joty, he'i Hesu-rehe opondera-vy hikwái.

“Nonhemoingove jeví va'erā gwī omano va'ekwe” he'i mo'ã saduceu kwéry

(Mt 22.23-33; Lc 20.27-40; 1 Co 6.14; 15.12-32; 1 Ts 4.16-17)

18 Ha upéi katu ou Hesu renda-py saduceu kwéry, “Nonhemoingove jeví va'erā gwī omano va'ekwe” he'i va'e. Ou oporandu íxupe:

* 12:11 Sl 118.22-23

19 —Moisés amyrī omombe'u va'ekwe nhande-vy nhande rekorā, mbo'eháry. “Tyke'ýry omano ramo, oheja ramo gwembirekokwe naimembýi vyteri ramo, tomenda tyvýry gwovajare-rehe. Upéixa ramo, Ke'y ra'y, he'i mo'ã va'erā imemby ypy-rehe” he'i nhande-vy Moisés.

20 Oĩ va'ekwe peteĩ tyke'ýry, seis tyvýry. Tyke'ýry omenda kunha-rehe. Upéi omano ramo, ndaita'ýry jepéiry.

21 Tyvýry omenda hovajare-rehe. Tyvýry omano ramo, ndaita'ýryi. Upéi tyvýry ambue jevy omenda omano.

22 Peteĩ teĩ omenda hese gwovajare-rehe. Peteĩ teĩ omano ramo ndaita'ýry jepéi. Omanomba rire, upe kunha omano ave.

23 Nhane moingove jevy ramo, kiva'e rembirekorā upe kunha? Gwī sete tyvýry kwéry omenda ra'e hese, he'i Hesu-pe hikwái hasy va'e-rehe oporandu-vy.

24 —Ha peẽ katu pejavy-ma voi pene nhe'ẽ, he'i Hesu. —Nhandejáry nhe'ẽ kватia-rehe ohai uka va'ekwe peẽ ndapeikwaáiry. Peẽ ndapeikwaái voi ave Nhandejáry opamba'e rerekó kwaaha voi. Upéa-gwi pejavy voi pene nhe'ẽ, he'i íxupe kwéry.

25 —Nhane moingove jevyha áry-py, kwimba'e nomendavéi-ma va'erā. Kunha ave nomendavéi-ma va'erā. Oiko va'erā Nhandejáry rembigwái yváy pygwa reko-rupi.

26 Ha Nhandejáry kватia nhe'ẽ katu omombe'u peẽ-my omano va'ekwe oikove jevymaha. Moisés amyrī ohai va'ekwe yvyrá ra'y rehégwa nhe'ẽ a-rami:

“Xe katu Nhandejáry, xe Abraão járy, xe Isaque járy, xe Jacó járy ave”* he'i Nhandejáry kватia nhe'ẽ, omano va'ekwe oikove jevy-ma va'e oikwaa ukaha. Ma'erā ndapeikwaái pemonhe'ẽ nhe'ẽ va'ekwe?

27 Aipo ramo, Nhandejáry ndaha'ei omano va'ekwe járy, tekove járy ae. Ha'e onhemoingove jevy va'e járy. Pejavypa pene nhe'ẽ, he'i saduceu kwéry-pe Hesu nhane moingove jevyha kwaa uka-vy.

“Ehayhu tee katu Nhandejáry-pe” he'i Hesu

(Mt 22.34-40; Lc 10.25-28)

28 Ogwahē ou-vy judeu rekombo'ehaty pa'ũ-gwi peteĩ va'e. Ohendu íxupe kwéry onhonhe'ẽ mbojevy jevy ramo. Ohendu ramo, “Iporā Hesu remiomombe'u” he'i. Upéa-gwi oporandu Hesu-pe:

—Heta oĩ nhande rekoha nhe'ẽ. Kiva'e tuvixave va'e? he'i íxupe.

29 —Kiva'e tuvixave va'e amombe'u-ta nde-vy, he'i Hesu. Upéi oiporu Nhandejáry kватia nhe'ẽ:

—“Pehendu katu, Israel remiarirõ kwéry. Tupā Nhandejáry ha'e anho oiko ya'e.

30 Ehayhu tee katu Nhandejáry-pe. Nde py'apy gwive ehayhu íxupe. Ehayhu íxupe nde koty gwive. Ne mandu'a meme katu hese hayhu-vy. Ehayhu mbaraete ete ave íxupe”*

he'i.

31 —Ha upe rire katu oĩ outro tuvixa va'e:

“Ehayhu rei katu nde rapixa-pe nde ae nde rekove erehayhuha-rami”* he'i Hesu Nhandejáry kватia nhe'ẽ poru-vy. —Upé mokõi nhe'ẽ-gwi ndaipóri nhande rekoha nhe'ẽ tuvixave va'e, he'i íxupe Hesu.

32 —Ha'e-ma ngatu, mbo'eháry, he'i íxupe. —Anheigwa eremombe'u ere ramo Nhandejáry-rehe ha'e anho. Ndaipóri ha'e-rami tupā.

33 Ha Nhandejáry katu he'i va'ekwe nhande-vy,

* **12:26** Ex 3.6 * **12:30** Dt 6.4-5 * **12:31** Lv 19.18

“Pehapy mymba xe mboete-vy, pemoka'ẽ ave.”

Upéixa ramo iporã nhamboete-vy Nhandejáry-pe. Ha iporâve jahayhu íxupe nhande py'apy gwive, nhande koty gwive jahayhu. Jahayhu mbaraete ete ave. Iporâve ave jahayhu nhande rapixa-pe nhande ae nhande rekove jahayhuha-rami, he'i íxupe.

³⁴ Ha Hesu katu ohendu oarandu reheve omombe'u ramo:

—Haimete-ma eremoirũ Nhandejáry nde ruvixarã-pe, he'i íxupe.

Upe rire nonhembopy'agwasúi avave oporandu hagwã Hesu-pe mbava'e-rehe po he'i upéixa.

³⁵ Ha Hesu onhemonhe'ẽ nhe'ẽ oiko-vy Nhandejáry róga kakwaa-py. Onhemonhe'ẽ-vy oporandu:

—“Davi remiarirõre voi Cristo nhane remiha'arõ va'e” he'i omombe'u-vy judeu rekombo'ehaty. Ma'erã po he'i upéa hikwái?

³⁶ He'i va'ekwe Davi amyrí:

“Nhandejáry he'i xe Járy-pe, Egwapy katu xe yke-rehe. Xe orombopu'aka va'erã ne a'e'ýha-rehe. Orombopu'akapa peve eregwapy va'erã ereĩ-vy xe yke-rehe.”*

Upéixa ome'ẽ va'ekwe Davi-pe inhe'érã Nhe'ẽ Marangatu tee va'e.

³⁷ Ha Davi katu xe Járy-py ohenói va'ekwe íxupe. Aipo ramo hemiarirõ pa? Ha gwemiarirõ-rehe, “Xe Járy” nde'íry, he'i íxupe kwéry Hesu omokirirí-vy judeu ruvixa kwéry-pe.*

Ha te'ýi jusu ohendu ramo inhe'ẽ, ogwerohory joa íxupe.

“Xáke judeu rekombo'ehaty-gwi” he'i Hesu

(Mt 23.1-12; Lc 20.45-47)

³⁸ —Xáke judeu rekombo'ehaty-gwi, he'i onhemonhe'ẽ-vy. —Ani erejapo teĩ ha'e kwéry hembiapo-rami. Oao puku reheve ogwatase voi. Ogwata oho-vy mba'e jogwa haty-py. Onhemboete va'erã-rehe oho.

³⁹ Ojeporahéi haty-py ogwapyse mburuvixa pa'ũ-my. Mburuvixa gwapy haty-py ogwapyse onhembovía ramo ojekarugwasu haty-py.

⁴⁰ Ha tembirekokwe rembiporu omonda heraha-vy. Upe rire omondo mondo ra'anga rei Nhandejáry-pe heta onhe'ẽ enterove ohexa hagwã. Upe va'e temiexagwã rei ra'e. Ombohasa asyve va'erã íxupe kwéry Nhandejáry, he'i judeu rekombo'ehaty-rehe Hesu.

Tembirekokwe okwerí va'e

(Lc 21.1-4)

⁴¹ Upéi ogwapy-ma Hesu Nhandejáry róga kakwaa-py pirapire imboyrú haty rovái. Oma'ẽ heta oĩ va'e-rehe pirapire omboyrú ramo hyruty-py. Heta oikotevẽ e'ý va'e heta ome'ẽ me'ẽ.

⁴² Ha upéi ou tembirekokwe ogwereko e'ý va'e. Mokõi moeda ombohyru, ohupity va'e peteĩ plata hatã.

⁴³ —Peju katu. Peju a-py, he'i gwemimbo'e kwéry-pe. —Anhete ko xe ha'e-ta peẽ-my. Kóa tembirekokwe okwerí va'e, hetave ombohyru enterove ombohyru va'e-gwi.

⁴⁴ Ha'e kwéry katu heta ogwereko-gwi, ome'ẽ. Ha kunha katu opa ogwerekomi va'e hembi'u repyrã, ome'ẽmba ete voi, he'i gwemimbo'e kwéry-pe Hesu.

13

Oje'o va'erã kwarahy rendy

* **12:36** Sl 110.1 * **12:37** Mt 22.41-46; Lc 20.41-44

1 Ha upéi katu osẽ oho-vy Hesu Nhandejáry róga kakwaa-gwi. Oho jave he'i íxupe hemimbo'e:

—Ema'ẽ ehexa ita iporã va'e, mbo'eháry. Óga tuvixa vixa va'e ehexa, he'i Hesu-pe.

2 Ha he'i íxupe Hesu:

—Ehexa katu upéa óga tuvixa va'e, he'i. —Ha upe rire katu ita reta omohäimba va'erã, omosarambipa va'erã. Ndojepota mo'ãvái-ma ojóehe, he'i gwemimbo'e-pe.*

3 Ogwapy oĩ-vy yvyaty Oliveiras ári jave, Nhandejáry róga rovarehái ogwapy oĩ-vy. Ogwapy ha'e anho jave, oporandu íxupe Pedro, Tiago, João, André ndive:

4 —Emombe'u katu ore-vy, he'i. —Araka'e tipo omohäimba-ta? Araka'e tipo ojehu va'erã ne remimombe'u? he'i. —Mba'éixa po oroikwaa va'erã imombe'uháry? Ojehu-tama ramo ne remimombe'u gwive, mba'éixa po oroikwaa va'erã imombe'uháry? he'i Hesu-pe hikwái.

5 Oporandu rire-ma he'i íxupe kwéry Hesu:

—Xáke pene mbotavyse va'erã.

6 Heta ojekwaa va'erã xe réry-py vérami mo'ã ou va'e. “Xe Cristo pene remiha'arõ va'e voi” he'i va'erã mo'ã ójehe onhemocristo ra'angase-vy, oporombotavy rei-vy.

7 Pehendu va'erã herakwã hi'agwĩ pendéhegwí onhorairõ ramo. Mombyry onhorairõ va'e rerakwã pehendu ave va'erã. Pehendu ramo, ani pekyhyje teĩ upéa-rehe. Upéa oiko va'erã voi. Upéa oiko-ma ramo, ne'írã vyteri ogwahẽ pehendu va'e ijapy-py.

8 Ha tetã mygwa onhorairõ va'erã outro tetã mygwa ndive. Ha mburu-vixagwasu re'yí onhorairõ va'erã outro mburuvinxagwasu re'yí ndive. Oiko oiko ha-rupi ae oiko va'erã yvyryryí. Ndaiporivéi-ma ho'u va'erã. Upéa-rupi pehasa asy ramo, ne'írã vyteri pehasa asy ete peiko-vy. Kunha imemby-ta va'e hasy íxupe. Ha upe rire katu hasyve syve oho-vy íxupe imemby hagwã. Upéixa ete yvypóry ohasa asy va'erã. Ha upe rire katu ohasa asyve syve oho-vy, he'i íxupe kwéry Hesu.

9 —Xáke pende pyhy va'erã pende reraha-vy mburuvinxá oĩ ha-py. Ojeporahéi haty-py pene nupã va'erã. Xéhegwí pene monhe'ẽ uka va'erã mburu-vixa rovagwy-py. Mburuvixagwasu rovagwy-rupi ave pene monhe'ẽ uka va'erã. Xe mombe'u mbe'u hagwã-py pene monhe'ẽ uka va'erã. Xéhegwí katu pende rereko va'erã akói-rami.

10 Ha xe rehegwa nhe'ẽ porã katu pemombe'u ranhe va'erã enterove tetã-my. Ha upe rire ae katu ombopapa ave-ma va'erã ko yvy, he'i.

11 —Pene monhe'ẽ uka-vy pende reraha va'erã. Pende pyhy pende reraha-vy ramo oikwaa hagwã pene rembiapo vai para'e, ani erejapura teĩ ere va'erã-rehe. Ou rei va'erã nde juru-py ne nhe'ẽrã. Ome'ẽ va'erã nde-vy ne nhe'ẽrã Nhe'ẽ Marangatu tee va'e. Upéixa ramo eremombe'u va'erã, he'i.

12 —Ha tyke'ýry oipyhy va'erã heraha-vy gwyvýry ojuka uka hagwã. Ha túvy ojuka uka va'erã gwa'ýry gwajýry ave. Ha ta'ýry kwéry tajy kwéry ave ogwereco asy va'erã gwu osy ave ojuka uka hagwã.

13 Ha xe-rehe ha-py katu enterovéa ndaija'e mo'ãi pende-rehe, he'i. —Ha Nhandejáry rape-gwi ova e'ŷ va'e katu ko yvy opa ete peve, oresende va'erã íxupe Nhandejáry, he'i íxupe kwéry Hesu.*

14 Upéi oiporu Hesu Nhandejáry kwatia nhe'ẽ:

* **13:2** Mt 24.1-2; Lc 21.5-6 * **13:13** Mt 24.3-14; Lc 21.7-19; 2 Tm 3.1-9

—“Oĩ va'erã upe ivai ete va'e, pene momarã va'e. Nhandejáry róga kakwaa koto py-gwi pene mosẽ va'erã”*
he'i Hesu. —Upéa nhe'ẽ eikwaa porã ây eremonhe'ẽ va'e.

Upéi he'i Hesu:

—Yma he'i hagwe-rami, pehexa va'erã upe ivai ete va'e Nhandejáry róga-py, gwenagwã e'ŷ ha-py omonhembo'y ramo. Pehexa-ma ramo upe va'e, pya'e voi tokanhymba kuri Judéia yvy pygwa kwéry oje'ói-vy. Yvyatygwasu ári-rupi tokanhymba kuri oje'ói-vy.

¹⁵ Ogwejy ramo óga ári oĩ va'e, ani oike koto py ogweraha hagwã mba'eve.

¹⁶ Ha kokwe-py oĩ va'e ani oho jevy ranhe hóga-py oipyhy hagwã oao. Pya'e ae kuri tokanhymba katu oje'ói-vy.

¹⁷ Upe áry-rupi iporiahu va'erã kunha imemby-ta va'e omokambu va'e ave.

¹⁸ Ro'y eterei-rupi pekanhy ramo, ivaive arã peẽ-my. Upéa-rehe pemoĩ katu Nhandejáry-pe pene nhe'ẽ pono ivai ete peẽ-my.

¹⁹ Upe áry-py ohasa asy eterei va'erã yvypóry kente kwéry gwive. Ko yvy rembypy Nhandejáry remimoingokwe oiko jave, upe áry e'ŷ mboyve, ndohasa asy etéiry va'ekwe. Upe ary-py ae ohasa asy eterei va'erã. Ha upe áry rire katu ndohasa asy etevéi-ma va'erã.*

²⁰ Ha Nhandejáry katu nombohasa asy hetave áryiry va'erã. Ombohasa asy hetave áry ramo ra'e, opa-ma arã ra'e enterove ko yvypóry. Ha gwembiporavo-rehe opena porã-gwi ae katu, nombohasa asy hetave áryiry va'erã, he'i.

²¹ —Upe-ma ramo, “Ema'ẽ katu. Ko va'e Cristo voi” oĩ he'i va'erã para'e peẽ-my. “Ema'ẽ katu. Upe va'e Cristo voi” oĩ he'i va'erã para'e peẽ-my. Ani perovia inhe'ẽ.

²² Ojekwaa va'erã, “Cristo pene remiha'arõ va'e voi xe” he'i va'e mo'ã ójehe peẽ-my. “Nhandejáry nhe'ẽ-py mba'e xe-vy anho oikwaa uka xe remimombe'urã” he'i va'e mo'ã ójehe, ojekwaa va'erã ou-vy. Hexapyrã-rupi voi hembiapo va'erã ohekoporou ou-vy ramo. Ohexa uka va'erã gwembiau tuvixa va'e, iku ramo, itavy hagwã mo'ã íxupe Nhandejáry rembiporavo.

²³ Xáke. Ani joty pende tavy íxupe. Ko'ã mba'e oiko e'ŷ ngatu amombe'u-ma peẽ-my, he'i íxupe kwéry Hesu.*

²⁴ —Upe-ma ramo ohasa asy ete rire-ma, oje'o va'erã kwarahy rendy. Ha jasy nahendy mo'ãvéi.

²⁵ Ha okúi va'erã yváy-gwi jasytata. Ova ova gwendagwe-gwi entéro yváy rehewa imbaraete va'e.*

²⁶ Upe-ma ramo xe rexâva'erã yvypóry kente kwéry gwive. Xe Nhande Ryke'y tee va'e-pe xe rexâva'erã aju jave arai-rupi. Xe pu'akaha tee jave nhande resa mbojevy va'erã xe rendy porã-rupi xe rexâva'erã, he'i.

²⁷ —Ambou va'erã xe rembigwái yváy pygwa ombojogweroaty hagwã xe rembiporavokwe. Opa-rupigwi ombojogweroaty va'erã íxupe kwéry. Kwarahy resê-gwi, ka'aru-gwi ave ombojogweroaty va'erã heraha-vy. Arapopy-gwi, yvy apy-gwi yvy apy arendaja gwive ombojogweroaty va'erã, he'i íxupe kwéry omombe'u-vy.*

*Hesu omombe'u gwemimbo'e kwéry-pe orepara hagwã
(Mt 24.32-44; Lc 21.29-36)*

²⁸ Upéi he'i jevy Hesu:

* ^{13:14} Dn 9.27; 11.31; 12.11 * ^{13:19} Dn 12.1; Ap 7.14 * ^{13:23} Mt 24.15-28; Lc 21.20-24; 2 Ts 2.3-12
* ^{13:25} Is 13.10 * ^{13:27} Mt 24.29-31; Lc 21.25-28; 2 Pe 3.10-13; Ap 1.7

—Aŷ amombe'u-ta peẽ-my ojehu va'erã rehewa nhe'ẽ figo máta rehewa-rami, he'i, —peikwaa porã hagwã xe agwahẽ jevytaha áry. Oĩ figo máta. Hoky kyrú jevy-ma ramo, hogwe pyahu jevy-ma ramo, pehexa-ma voi. Pehexa ramo, peikwaa-ma voi opa-ma ra'e ro'y. Áry raku jevy-tama.

²⁹ Upéixa ete upe ojehu va'erã gwive pehexa ramo, peikwaa-ma va'erã oiketa va'e-rami xe agwahẽ jevytamaha áry.

³⁰ Anhete ko xe ha'e-ta peẽ-my. Entéro peẽ-my xe remimombe'u oiko va'erã. Judeu kwéry oiko reheve joto ojehu va'erã.

³¹ Opa va'erã áry yvy ave. Ha xe remimombe'u xe nhe'ẽ katu nombopapa mo'âiry, he'i.

³² —Mbava'e áry-py po ojehu va'erã ndajaikwaáiry. Araka'e óra-ma po ojehu va'erã ndajaikwaáiry. Nhandejáry rembigwái yváy pygwa jepe ndoikwaáiry. Xe ta'ýry jepe ndaikwaái ave. Nhandejáry xe Ru ha'e anho mante oikwaa.

³³ Araka'e óra-ma po aju jevy va'erã ndapeikwaái-gwi, xáke, perepara voi katu. Emondo mondo katu ave Nhandejáry-pe ne nhe'ẽ, he'i íxupe kwéry.

³⁴ Upéi oiporu jevy Hesu óga járy rehewa nhe'ẽ jarepara porã hagwã nhande-vy oikwaa uka-vy:

—Oĩ va'ekwe óga járy, he'i. —Heta oĩ hembigwái. Ijáry oho ramo mombyry, oheja gwembigwái onhangareko hagwã hóga-rehe. Petei tei-pe hembiaporã ome'ẽ. “Erepara porã hese” he'i okẽ-rehe onhangareko va'e-pe.

³⁵ Ha upéixa ha'e-ta peẽ-my, “Óga járy” he'i xe-rehe. Upéa-gwi perepara katu. Nderekwaái voi araka'e po xe aju va'erã. Ka'aru ete para'e, pyhare mbyte para'e, gáju sapukái-py para'e, ko'ẽ hembypyttí jave para'e.

³⁶ Upéa-gwi perepara katu pono peha'arõ e'ý reheve aju pya'e orotopa peke jave.

³⁷ Peẽ-my ha'eha-rami, ha'e-ta enterovéa-pe oikwaa hagwã. Xe ra'arõ arõ katu perepara-vy, he'i íxupe kwéry Hesu.*

14

*Judeu ruvixa kwéry onhombo'e mbo'e Hesu-rehe ijuka hagwã
(Mt 26.1-5; Lc 22.1-2; Jo 11.47-53)*

¹ Mokõi áry rire oiko-ta aretegwasu héry va'e páscoa. Upe áry-py nanham-bovúiry va'ekwe ja'u va'erã. Nhane mandu'a ave nhane rembypy ojererekoy asy hagwe-rehe. Yma ete upe áry-py osẽ va'ekwe gwí ipu'aka va'e pogwi. Ha upéi katu ne'írã oiko ramo aretegwasu, pa'i ruvixa kwéry judeu rekombo'ehaty ave onhombo'e mbo'e Hesu-rehe hikwái:

—Nhambotavy Hesu-pe jaipyhy hagwã íxupe jajuka hagwã, he'i.

² —Arete-py ae ani jaipyhy íxupe, he'i. —Atýra-py jaipyhy ramo, onhem-bopoxy arã ijaty jaty va'e kente kwéry nhande-vy, he'i ojóupe Hesu pyhyharã kwéry.

Upéa-gwi oipyhy nhemise Hesu-pe.

*Kunha onhohẽ Hesu akã-rehe omohyakwã porã-vy íxupe
(Mt 26.6-13; Jo 12.1-8)*

³ Ha Hesu katu oime Betânia tetã'i-my. Simão róga-py oime. Ha Simão mba'asy vai-gwi ijai aipa va'ekwe nhahenói íxupe va'e. Ogwapy okaru-vy Hesu. Okaru ramo, ogwahẽ ou-vy peteí kunha. Ogweru hyakwã porã tee va'e. Hyru reheve ogweru. Ha hyru ojejapo va'ekwe ita kyra rendy-gwi héry va'e alabastro. Ha hyakwã porã va'e héry nardo. Ha nardo hepy eterei voi. Ojoka onhohẽ Hesu akã-rehe omohyakwã porã-vy íxupe.

* ^{13:37} Lc 12.35-40; 17.26-36; At 1.7; 1 Ts 5.2-4

4 Ha upe-py oĩ ipoxy va'e:

—Ma'erã po onhohẽ rei upe hyakwã porã va'e Hesu akã-rehe? he'i ojóupe oporandu-vy. —Hepy eterei va'e onhohẽ rei, he'i ojóupe hikwái.

5 —Ma'erã po ra'e hepy-rehe ae nome'ẽiry, he'i. —Iporiahu va'e kwéry-pe nhame'ẽ ramo ra'e hyakwã va'e repykwe, iporãve arã ra'e, he'i. —Hyakwã repy peteĩ ro'y tembiapo repy para'e, hetave para'e, he'i onhe'ẽngi ẽngi-vy kunha-pe hikwái.

Upéixa ramo kunha ndive ipoxy voi hikwái.

6 Upéi he'i íxupe kwéry Hesu:

—Eheja katu, he'i. —Ma'erã po ko kunha-pe eremoakã rasy? he'i. —Hembiapo porã ete voi xe-vy.

7 Pene pa'ũ-my oime meme va'erã iporiahu va'e kwéry. Ereme'ẽse ramo, ereme'ẽ-ta íxupe kwéry. Ha xe ae katu naime meméi va'erã aiko-vy pene pa'ũ-my, he'i.

8 —Ha ko kunha katu ome'ẽseha-rami ome'ẽ xe-vy. Nhamano va'ekwe nhande retekwe nhamohyakwãha-rami, amano e'ŷ ngatu xe mohyakwã ranhe ko kunha, he'i.

9 —Anhetegwa va'e amombe'u-ta peẽ-my. Opa-rupi entéro ko yvy-rupi mamo xe rehewa nhe'ẽ porã omombe'u mbe'u ha-rupi ave omombe'u va'erã voi ko kunha rembiapo porã imandu'a hagwã hese, he'i gwemimbo'e kwéry-pe Hesu.

Judas oho omombe'u Hesu pyhyharã-pe

(Mt 26.14-16; Lc 22.3-6)

10 Ha upéi katu oho peteĩ doze hemimbo'e kwéry-gwi. Héry va'e Judas Iscariotes. Pa'i ruvixa kwéry ha-py oho omombe'u Hesu pyhyharã-pe.

11 Ha ha'e kwéry ohendu ramo inhe'ẽ, ov'y a joa eterei:

—Ereipyhy uka ramo ore-vy, orome'ẽ-ta nde-vy pirapire, he'i Judas-pe.

Ha Judas katu orepara oiko-vy Hesu-rehe ipyhyharã-pe omombe'uga óra ra'arõ-vy.

Hesu gwemimbo'e kwéry ndive okaru imandu'a hagwã páscoa-rehe

(Mt 26.17-30; Lc 22.7-23; Jo 13.21-30; 1 Co 11.23-25)

12 Ha upéi oiko-ma aretegwasu. Upe va'e semana mbojape ovu e'ŷ va'e ja'u. Upe va'e áry-py jajuka ovexa nhamoka'ẽ-vy Nhandejáry-pe nhamboete-vy. Upe jave oporandu Hesu-pe hemimbo'e kwéry:

—Kipy tipo orombogwejy-ta nde-vy ne remi'urã nhane mandu'a hagwã páscoa-rehe jakaru-vy, he'i íxupe.

13 Ha Hesu katu omondo mokõi gwenonde:

—Tapeho katu tetã-my, he'i. —Pende topa-ta kwimba'e y ryru rehev. Tapeho hapykwéri.

14 Oike ramo hóga-py, peje óga járy-pe: “Kipy oĩ nde koty ereiporu e'ŷ va'e? Aiporu-ta. Xe remimbo'e kwéry ndive akaru hagwã aiporu-ta. Páscoa-rehe xe mandu'a hagwã aiporu-ta, he'i kuri nhane mbo'eháry” peje pemombe'u-vy, he'i íxupe.

15 —Upéi ohexa uka-ta nde-vy koty ijyvate va'e, tuvixa va'e, oĩmba voi va'e. Nhane mohenonde katu upe-py, koty tuvixa oĩmba va'e-py, he'i gwemimbo'e-pe Hesu.

16 Upéi mokõi hemimondo osẽ oho-vy omohenonde hagwã. Ogwahẽ ramo, opamba'e ojohu Hesu nhe'ẽ-py. Upéa-gwi omohenonde okaru hagwã imandu'a hagwã páscoa-rehe.

¹⁷ Ha upéi katu ka'aru ete ramo ogwahē-ma Hesu ou-vy. Óga-py ogwahē ou-vy doze gwemimbo'e kwéry ndive. Óga oiporuruka hagwe-py íxupe ogwahē.

¹⁸ Okaru joa ramo, he'i íxupe kwéry Hesu:

—Anhetegwa va'e amombe'u-ta peẽ-my, he'i. —Peteĩ pene pa'ũ-my oĩ va'e xe karu rovái xe mombe'u va'erā xe pyhyharā-pe, he'i.

¹⁹ Ohendu ramo inhe'ẽ ojepy'arerahapa-ma hese, ndovy'avéi-ma hikwáí:

—Xe para'e ndaxéiry para'e, he'i hikwái onhemopeteĩ teĩ oporandu-vy Hesu-pe.

²⁰ —Xe mombe'u va'erā peteĩ xe remimbo'e pende avyte-py oĩ va'e, nha'ẽ-py opo omoĩ va'e. Xe ndive omoakỹ va'e mbojape nha'ẽ-py xe mombe'u va'erā, he'i.

²¹ —Xe Nhande Ryke'y tee va'e aha va'erā xe ajejuka uka ha-py. Nhandejáry kwatia nhe'ẽ he'i hagwe-rami aha va'erā. Ha xe mombe'u va'erā katu xe pyhyharā-pe amboasy eterei íxupe. Ohasa asy eterei va'erā. Iporāve arā araka'e ndoikói ramo araka'e osyrā-pe, he'i gwemimbo'e kwéry-pe.

²² Okaru joa jave Hesu oipyhy mbojape. Otima porã Tupã Nhandejáry-pe. Upéi ombopo mbopóy mbojape. Ome'ẽ íxupe kwéry omongaru joty:

—Ko, he'i ome'ẽ-vy íxupe. —Ko mbojape xe rete-rehe ha'e, he'i íxupe kwéry Hesu.

²³ Upéi oipyhy ave copo. Otima porã Nhandejáry-pe. Ho'u uka íxupe kwéry ome'ẽ-vy. Ho'u joa uva rykwere:

²⁴ —Ko copo pygwa xe rugwy-rehe he'i. Onhehẽ va'erā xe rugwy imbaraete hagwã Nhandejáry remimombe'u. Yma Nhandejáry, “Amopotĩ va'erā kente kwéry-pe” he'i va'ekwe. Upéa nhe'ẽ imbaraete-ma va'erā xe rugwy onhehẽ-ma ramo. Heta kente-rehe ha-py onhehẽ va'erā xe rugwy, he'i.

²⁵ —Ha'e-ta peẽ-my. Ha'u-ma kuri uva rykwere. ãy ae katu nda'u mo'ãvéima. Ha upe rire katu, pende ruvixa ramo xe Ru oiko haty-py, ha'u jevy va'erā, he'i. —Upe-py agwahē ramo uva rykwere pyahu ha'u jevy va'erā, he'i gwemimbo'e kwéry-pe.

“Xe ndaikwaái voi, ere va'erā xe-rehe” he'i Pedro-pe Hesu

(Mt 26.31-35; Lc 22.31-34; Jo 13.36-38)

²⁶ Upéi Nhandejáry mboete-vy oporahéi joa. Oporahéi rire osẽ oho-vy Oliveiras yvyaty-py.

²⁷ —Peẽ katu pejehesa rerova-ta xéhegwi, he'i íxupe kwéry Hesu. —Oĩ Nhandejáry kwatia nhe'ẽ he'i va'e a-rami:

“Ajuka va'erā herakwa osarambipa hagwã ovexa hymba kwéry” he'i.*
Yma he'i hagwe-rami, ãy xe juka-tama, he'i.

²⁸ —Ha upe rire xe anhemoingove jevy rire katu aha va'erā Galiléia yvy-py. Pene renonde aha ranhe va'erā, he'i íxupe kwéry.

²⁹ Upe ramo he'i Pedro:

—Gwĩ ne irũ kwéry ndéhegwi ojehesa rerova ramo jepe, xe ae katu ndoro-hejái joty va'erā, he'i íxupe Pedro.

³⁰ Ha Hesu katu he'i:

—Anhete ko xe ha'e-ta nde-vy: Etería ko va'e pyhare-py ne'írã vyteri osapukái ramo gáju imokõiha-rehe, “Xe ndaikwaái voi” ere va'erā xe-rehe mbohapyha-rehe, he'i íxupe Pedro-pe.

³¹ Ha hatã hatã onhe'ẽ Pedro:

—Xe ajejuka uka-ta ramo jepe ne ndive, ndajehesa rerovái joty va'erā ndéhegwi. “Xe ndaikwaáiry” nda'éiry joty arā katu nde-rehe, he'i Hesu-pe.

Pedro he'i hagwe-rami ave, he'i inhirũ kwéry Hesu remimbo'e.

* **14:27 Zc 13.7**

*Hesu pyhyharā onhemoī-ma hese hikwái
(Mt 26.36-56; Lc 22.39-53; Jo 18.3-12)*

32 Ohopa ogwata-vy hikwái. Getsēmani yvaty oje'e ha-py ogwahē oho-vy:
—A-py pegwapy katu, he'i. —Xe anhomongeta jave Nhandejáry ndive, xe ra'arō ranhe a-py, he'i gwemimbo'e kwéry-pe.

33 Upéi mbohapy ondice ogweraha. Ogweraha Pedro, Tiago, João. Upéi ogwahē vy'are'ŷgwasu íxupe. Ojepy'ajopy eterei-ma ave oiko-vy:

34 —Ogwahē-ma vy'are'ŷgwasu xe-vy xe juka-ta va'e-rami, he'i. —Epyta a-py. Xe moirū katu ereke e'ŷ reheve, he'i íxupe kwéry.

35 Upéi ha'e ae oho mbykymi ojeity yvy-rupi. Ojerure Nhandejáry-pe:
—Ikatu-ta ereipe'a xéhegwi xe ajepy'ajopyha? he'i oporandu-vy.

Upéi he'i jevy:

36 —Nde katu opamba'e erejapo kwaa va'e, xe Ru, he'i gwu-pe. —Upéa-gwi eipe'a katu xéhegwi xe ajepy'ajopyha. Ereipe'ase ramo, eipe'a katu xéhegwi. Ha ndereipe'aséi ramo, ani joty ereipe'a ave, he'i onhomongeta-vy Nhandejáry ndive.

37 Upéi ou jevy mbohapy gwemimbo'e ha-py. Ogwahē ramo ikéra otopa:
—Ma'erā po ereke joty ereĩ-vy, Simão? he'i Pedro-pe. —Ma'erā po naxe ra'arōi peteĩ óra-py jepe? Ma'erā nem mix̄imi naxe moirūiry? he'i.

38 —Epáy katu. Ejapo katu oraçao xe ra'arō-vy. Nerenhembojejavy ukái arā, he'i íxupe. —Nde py'a kyre'ŷ voi. Ereke e'ŷ reheve erejapose mo'ã oraçao. Ha nde rete katu okese voi, he'i Pedro-pe.

39 Upéi oho jevy Nhandejáry ndive onhomongeta-vy. Gwemimombe'ukwe omombe'u jevy.

40 Ouri jevy ramo, ikéra otopa jevy-ma. Hapehýi eterei-gwi okepa-ma hikwái. Otū-gwi ndoikwaái onhe'ẽrā okwa-vy.

41 Ouri uri. Mbohapyha-rehema ou jevy.

—Ma'erā po ereke joty eretongea-vy? he'i Hesu. —Ha'eve-ma. Ogwahē-ma ngatu xe óra. Xe ko Nhande Ryke'y tee va'e xe pyhy uka-tama hekoha vai va'e-pe. Xe me'ẽ va'erā gwī ojejavý va'e Nhandejáry kwaa e'ŷha va'e po-py, he'i.

42 —Epu'ã katu. Jaha. Ehexa katu. Onhemo'agwī-ma ra'e xéhegwi ou-vy upe xe pyhy ukaharā, he'i gwemimbo'e-pe.

43 Onhe'ẽ jave Hesu, pya'e ogwahē ou-vy Judas, peteĩ Hesu remimbo'e kwéry va'e. Heta ou ave hendive ogweru opo-py kyse puku yvyra ave. Ogwahē ou-vy pa'i ruvixa kwéry remimbou, judeu rekombo'ehaty remimbou ave. Judeu ruvixa kwéry remimbou ave ogwahē ou-vy.

44 Ha Judas katu Hesu pyhy ukaha he'i ra'e: "Ahexa uka-ta peẽ-my pene rembipyhyse" he'i ra'e. "Upe va'e ahovapyte-ta va'e pene rembipyhyrā voi" he'i. "Peipyhy hatā íxupe heraha-vy pono okanhy" he'i ra'e ipyhyharā-pe.

45 Ây ou pya'e ha'e anho Hesu oĩ ha-py ohovapYTE hagwā Hesu-pe:
—Mbo'eháry, he'i ogwahē-vy Judas íxupe.

Upéi ohovapYTE Hesu-pe.

46 Ha upéi katu ha'e kwéry ou onhemoī-ma hese oipyhy hagwā íxupe hikwái.

47 Upe-ma ramo peteĩ upe-py oĩ va'e omopu'ã kyse oikytí-vy. Ohaxea pa'i ruvixagwasu rembigwái-pe onambi'o-vy. Ohupity oinambi'o hagwā.

48-49 Ha Hesu katu he'i:

—Ma'erā po pegwahē peju-vy kyse reheve xe pyhy hagwā peju-vy? Ma'erā po yvyra reheve ave pegwahē peju-vy? he'i oporandu-vy íxupe kwéry. —"Hesu oporosakea va'e" peje tipo peju-vy? Ha ndaha'éiry upeixagwa xe. Iko'ẽ ko'ẽ anhemonhe'ẽ nhe'ẽ aiko-vy Nhandejáry róga kakwaa-py. Anhemonhe'ẽ meme ramo, xe mokambara voi. Ha naxe pyhýiry voi ra'e. Ha Nhandejáry

kwatia nhe'ẽ imbaraete voi. Upéa-gwi yma he'i hagwe-rami, ãy oiko-ma, he'i íxupe kwéry Hesu.

⁵⁰ Ha upéi katu ha'e anho ete-ma oheja Hesu-pe hikwái. Ohopa íxugwi hemimbo'e kwéry.

⁵¹ Ha upéi oho hapykwéri karia'y. Upe karia'y Hesu rapykwerigwa morotĩ va'e-py mante onhenhugwã. Oipyhy-ma mo'ã íxupe hikwái.

⁵² Ijao rei oipe'a. Ha karia'y omboi oao oripara oho-vy. Opi-vy oheja oho-vy oaokwe.

*Judeu ruvixa oporandu Hesu-pehekoha-rehe
(Mt 26.57-68; Lc 22.54-55,63-71; Jo 18.13-14,19-24)*

⁵³ Ha upéi katu Hesu pyhy hagwe ogweraha íxupe. Pa'i ruvixagwasu róga kakwaa-py ogweraha Hesu-pe. Upe-py ojogweroaty pa'i ruvixa kwéry. Judeu ruvixa kwéry hekombo'ehaty kwéry ndive ojogweroaty.

⁵⁴ Ha Pedro oho hapykwéri meme. Hesu rapykwéri puku oho. Pa'i ruvixagwasu roka-py oike ogwahẽ-vy. Polícia kwéry ndive ogwapy oĩ-vy. Tata ypy-py ojepe'e oĩ-vy.

⁵⁵ Ha pa'i ruvixa kwéry entéro judeu ruvixa kwéry ndive ojuka ukase voi Hesu-pe. Upéa-gwi oheka heka mo'ã Hesu-rehe onhe'ẽ va'erã. Ha ndotopái voi.

⁵⁶ Heta omombe'u mbe'u apu rei Hesu-rehe. Ha ndaijojái inhe'ẽ kwéry. Omombe'u joavy avy joto. Upéa-gwi ndaipóri Hesu-rehe onhe'ẽ hagwã.

⁵⁷ Ha upe rire katu ou onhembo'y va'e omombe'u. Apu rei omombe'u hese:

⁵⁸ —Upéa remimombe'ukwe orohendu va'ekwe oromombe'u-ta peẽ-my: “Aitypa uka-ta ko Nhandejáry róga kakwaa teko rei rembiapokwe xe ae amopu'ã jevy hagwã. Teko rei rembiapo e'ŷ amopu'ã jevy-ta xe. Mbohapy áry-rupi amopu'ã jevy-ta. Upéixa he'i Hesu” he'i omombe'u-vy hikwái.

⁵⁹ Ha hemimombe'u katu ndaijojáiry vyteri.

⁶⁰ Omombe'u joavy avy joto. Upe-ma ramo onhembo'y-ma oĩ-vy pa'i ruvixagwasu ha'e kwéry hovái:

—Ejeapysaka katu, he'i. —Heta ne mombe'u mbe'u hikwái. Ma'erã po neremombe'u mo'ãi ne mombe'uhare-pe? he'i Hesu-pe.

⁶¹ Ha ha'e katu opita okirirí íxugwi. Mba'eve nomombe'úi. Upéi pa'i ruvixagwasu he'i:

—Nde pa Cristo, nhane remiha'arõ va'e? Nde pa Nhandejáry onhemomba'egwasu va'e ra'y? he'i jevy íxupe, Hesu-pe, omonhe'ẽse-vy.

⁶² —Xe ko ha'e voi, he'i. —Xe Nhande Ryke'y tee va'e-pe xe rexaxa va'erã Nhandejáry yke-rehe ijakatúa-koty agwapy ramo xe rexaxa va'erã. Imbaraeteve va'e Nhandejáry. Arai-rupi xe agwejy ramo xe rexaxa va'erã, he'i onhemombe'u-vy judeu ruvixa-pe.

⁶³⁻⁶⁴ Upéa nhe'ẽ ogweropoxy pa'i ruvixagwasu. Ogwerovái-gwi omondoro oao:

—Pehendu-ma voi inhe'ẽ vaiha, he'i. —Outro imombe'uharã-rehe nanhaikotevẽiry-ma, he'i. —Ojéhegwi rei onhe'ẽ vai-ma, onhemonhandejáry-vy mo'ã, he'i hese. —Mbava'e tipo pejapo-ta hese? he'i íxupe kwéry oporandu-vy:

—Tomano katu, tojejuka katu, he'i joa joto voi hese hikwái.

⁶⁵ Upéi onygwõ nygwõ Hesu-rehe. Ohesagwã ojokwa. Osokea kea íxupe opo-py:

—Emombe'u ore-vy, kiva'e va'e ne nupã, he'i oinupã nupã-vy íxupe hikwái. Oinupã nupã ave íxupe polícia kwéry.

*“Xe ndaha'éi Hesu ndivegwa” he'i mo'ã Pedro
(Mt 26.69-75; Lc 22.56-62; Jo 18.15-18,25-27)*

⁶⁶ Ha Pedro katu opyta oĩ-vy oka-py, pa'i ruvixagwasu rokẽ rovagwy-py. Upe-ma ramo ogwahẽ ou-vy kunhataĩ pa'i ruvixagwasu rembigwái va'e.

⁶⁷ Ohexa Pedro-pe ojepe'e ramo. Omanha hova-rehe:

—Upe Nazaré pygwa ndive ereiko va'e voi nipo nde ra'e. Hesu ndive ereiko va'e voi ave nde, he'i íxupe hembigwái.

⁶⁸ —Ndaikói va'e voi xe, he'i. —Ndaikwaáiry mba'eve xe, he'i. —Ne nhe'ẽ katu ndaikwaái voi, he'i. —Mbava'e rehe po aipo ere, ndaikwaái voi xe, he'i mo'ã íxupe Pedro.

Hesu irũ e'ŷ-rami ojejapo ha'e. Upéi katu osẽ oho-vy mbykymi. Okẽ-my oho. Ha osapukái gáju.

⁶⁹ Ha ohexa jevy-ma íxupe hembigwái:

—Hesu ndivegwa voi upe va'e, he'i jevy upe-py oĩ va'e-pe.

⁷⁰ —Naháni, ndaxéiry, he'i jevy Pedro kunhataĩ-pe.

Upe riremi he'i jevy íxupe upe-py oĩ-vy.

—Galiléia pygwa voi nde. Hesu ndivegwa voi nipo ra'e nde, he'i Pedro-pe.

⁷¹ Upe ramo he'i:

—Xe apu ramo, taxe moingo asy katu Nhandejáry, he'i. —Upe kwimba'e ne remimombe'ukwe ndaikwaái voi xe, he'i mo'ã íxupe Pedro.

⁷² Ha upéi imokõiha-rehema osapukái pya'e jevy gaju. Imandu'a-ma Hesu nhe'ẽgwe-rehe, “Ne'írã osapukái ramo gáju imokõiha-rehe, Xe ndaikwaáiry, ere va'erã xe-rehe mbohapyha-rehe”. Upéa nhe'ẽ-rehe imandu'a-ma ramo Pedro, ojahe'o-vy hasé.

15

*Hesu ojereraha mburuvixagwasu Pilatos renda-py
(Mt 27.1-2,11-26; Lc 23.1-5,13-25; Jo 18.28-19.16)*

¹ Ko'ẽmba-ma ramo ojogweroaty jevy pa'i ruvixa kwéry, judeu ruvixa kwéry ndive, judeu rekombo'ehaty ndive ave. Entéro judeu ruvixa kwéry gwive ojogweroaty onhomongeta-vy:

—Mbava'e tipo jajapo-ta Hesu-rehe? he'i onhombo'e mbo'e-vy hese.

Upéi oikwaa-ma ramo, onhapytĩ-ma íxupe hikwái. Ipokwaha reheve ogweraha mburuvixagwasu Pilatos po-py ome'ẽ-vy.

² —Nde tipo ereiko ra'e judeu kwéry ruvixagwasu ramo? he'i oporandu-vy íxupe Pilatos.

—Nde ae xe renói voi. “Judeu kwéry ruvixagwasu” nde ae ere-ma xe-rehe. Xe voi, he'i joty íxupe Hesu onhemombe'u-vy.

³ Ha pa'i ruvixa kwéry heta omboja rei inhe'ẽ hese va'e.

—Hembiapo vai-ma, hembiapo vai-ma, he'i joa hese.

Ha Hesu katu nomombe'uvéiry.

⁴ —Heta nde-rehe nhe'ẽ onhemboja mboja rei va'e. Ma'erã po nerensemombe'úiry? he'i jevy íxupe Pilatos oporandu-vy.

⁵ Ha Hesu katu mba'eve joty nomombe'úiry. Nonhemombe'úi-gwi, “Ma'erã po nonhemombe'uséiry?” he'i ojéupe opondera-vy hese.

⁶ Ha oiko jave aretegwasu, oĩ opoi uka íxugwi va'erã. Peteĩ onhemoĩ preso va'ekwe-gwi oĩ opoi uka jevy va'erã imondo-vy mburuvixagwasu-pe. Upe ijaty va'e kwéry ojerure va'ekwe-gwi opoi uka-ma imondo-vy.

⁷ Oĩ hembiapresakwe oporojuka va'ekwe. Ohekoviärõ hagwã mo'ã mburuvixagwasu-pe, oporojuka va'ekwe. Indive kwéry oĩ héry va'e Barrabás.

8 Ha upéi katu ou ijaty va'e ojerure-vy ojapo hagwā íxupe kwéry ojapo japo hagwe-rami:

—Epoi katu ore-vy toho jevy aretegwasu-py erepoi meme hagwe-rami, he'i Pilatos-pe hikwái.

9-10 Ha mburuvixa oikwaa pa'i ruvixa kwéry rekoha vaiha. Ohexa kwaa hese: “Ndaija'éi-gwi rei hese, oipyhy ra'e íxupe heru-vy xe-vy hikwái” he'i ojéupe mburuvixa. Upéa-gwi he'i ijaty va'e-pe:

—Peipota tipo apoi peẽ-my upe judeu kwéry ruvixagwasu-gwi? he'i íxupe kwéry oporandu-vy.

11 Ha pa'i ruvixa kwéry katu he'i:

—Ejerure katu Hesu rekovía Barrabás-rehe, he'i jevy jevy ijaty va'e-pe ojojurupypa opo'ẽ-vy hikwái.

Pa'i ruvixa nhe'ẽ-py he'i Pilatos-pe ijaty va'e:

—Epoi ore-vy íxugwi, Barrabás-gwi toho, he'i.

12 —Aipo ramo, mbava'e tipo ajapo-ta Hesu-rehe? Upe va'e judeu ruvixagwasu pene remihenói, he'i jevy íxupe kwéry.

13 —Ejuka uka katu íxupe. Kurusugwasu-rehe ejuka uka katu íxupe, he'i joa joty íxupe onhe'ẽ hatã-vy.

14 —Ajuka rei va'erã. Nahembiapo vaíry voíte Hesu ra'e, he'i íxupe kwéry Hesu-rehe.

—Emboja katu, emboja katu imoĩ-vy kurusugwasu-rehe omano hagwā, he'i joa joa hikwái onhe'ẽ hatãve tãve-vy.

15 Ha Pilatos katu ombovy'ase íxupe kwéry. Upéa-gwi ha'e kwéry inhe'ẽ-py opoi imondo-vy íxugwi. Barrabás-gwi opoi Pilatos. Upéi he'i ombopi hagwā Hesu-pe. Ome'ẽ ijukaharã-pe omboja hagwā kurusugwasu-rehe ijuka-vy.

Soldado kwéry onhembohory Hesu-rehe (Mt 27.27-31; Jo 19.2-3)

16 Ha upéi katu soldado kwéry ogweraha kóty-py Hesu-pe. Mburuvixa róga kakwaa-py ogweraha íxupe. Hoga kakwaa héry pretório. Upe-py enterove soldado gwive onhomboatypa hese.

17 Omonde Hesu-rehe ao pytã va'e. Upéi nhuatã-gwi ojapo íxupe ijegwaka ra'angarã omoĩ hagwā inhakã-rehe.

18 Upe rire omboete ra'anga anga rei íxupe onhembohory-vy:

—Toiko are katu, toiko are katu judeu ruvixagwasu, he'i onhembohory-vy hese.

19 Onhakãrupã rupã íxupe takwáry-py. Onygwõ nygwõ hese. Onhesũ nhesũ gwetypy'ã-rehe omboete a'ã a'ã hagwā íxupe.

20 Onhembohorypa rire hese, omboi íxugwi ao pytã va'e. Omonde jevy hese iiao. Upe rire ogweraha Hesu-pe omboja hagwā kurusugwasu-rehe ijuka-vy.

Omboja Hesu-pe kurusugwasu-rehe ijuka-vy (Mt 27.32-44; Lc 23.26-43; Jo 19.17-27)

21 Upe ramo oĩ ohasa rei va'e. Upe va'e Cirene pygwa héry va'e Simão. Simão Alexandre ru, Rufo ru ave. Tetã jerekwe-gwi ou ra'e. Ha soldado katu ogweraha uka íxupe Hesu kurusugwasurã.

22 Upéixa ramo ogweraha Hesu-pe. Gólgota oje'e ha-py ogweraha. Akãgwe rendaty-rehe he'i Gólgota.

23 Upe-py ogwahẽ ramo, uva rykwere-py omoĩ pohã héry va'e mirra. Ome'ẽ íxupe ho'u uka-vy. Ome'ẽ íxupe pono ohendu eterei ojéupe hasy va'e. Ha ndo'úiry.

24 Ha upéi katu ijuka hagwā-pyma ogwenogwahē omboja íxupe kurusugwasu-rehe. Upéi omboja rire soldado kwéry ohuga onhomboja'o ja'o hagwā Hesu aokwe-rehe. Ogana gana va'e ogweraha ijaokwe.

25 Pyhareve asaje ramo, omboja-ma íxupe kurusu-rehe imoī-vy.

26 Ha Hesu-rehe hemimombe'ukwe ohai omoī ikurusu-rehe inhakā ári. "Kóá judeu ruvixagwasu" he'i imoī-vy.

27 Oĩ ave mokōi imonda va'e kurusu-rehe omboja ave imoī-vy. Hesu yke-rehe joty ave omoī peteī ijakatúa-koty, peteī ijasu-koty. Imbyte-py oĩ Hesu.

28 Ogwereko íxupe ojejavy va'ekwe-rami. Nhandejáry kwatia nhe'ẽ he'i hagwe-rami, ãy oiko-ma. Upéa-gwi ogwereko asy íxupe.

29 Gwī ohasa oiko-vy va'e opuka hatā Hesu-rehe. Onhakāreity ity onhembohory-vy hese:

—Aa! Ereity-ta mo'ã Nhandejáry róga kakwaa eremopu'ãmba jevy hagwā mbohapy áry-rupi, he'i mo'ã.

30 —Aipo ramo, egwejy katu kurusu-gwi erenheresende-vy, he'i.

31 Ha upéixa ave onhembohory hese ojóupe pa'i ruvixa kwéry, judeu rekombo'ehaty ndive:

—Upéa opororesende va'ety. Ha ndaipu'akáiry gwekove-rehe onheresende hagwā, he'i hese onhembohory-vy.

32 —“Xe Cristo nhane remiha'arõ va'e. Xe Israel kwéry ruvixagwasu” he'i kuri ójehe. —Aipo ramo ãy togwejy katu kurusu-gwi. Jahexa ramo, jarovia arā, he'i joa hikwái.

Hesu jave kurusugwasu-rehe onhemboja va'ekwe onhe'ẽ rei rei ave hese.

Omano Hesu

(Mt 27.45-56; Lc 23.44-49; Jo 19.28-30)

33 Upéi kwarahy mbyte-py pytūmba-ma upe yvy ári. Upe tetā-rehe pytūmba ete-ma. Mbohapy óra peve optya. Ka'arugwasu peve optya.

34 Ka'arugwasu ramo onhe'ẽ hatā Hesu. Ha'e ae onhe'ẽ-py onhe'ẽ:

—Eloí, Eloí, lamá sabactâni? he'i ha'e ae onhe'ẽ-py. Upéa he'ise, “Tupā xe Járy, Tupā xe Járy, ma'erā-gwi po xe rejapa xe anho eterei?” he'i oporanduvy.*

35 Ha upe-py oĩ inhe'ẽ ohendu va'e:

—Ejeapysaka katu. Upéa ohenói Elias-pe, he'i mo'ã Hesu-rehe.

36 Upe ramo oripara ogweru bucha. Omoakŷ uva rykwere hepy ete e'ŷ va'e-py. Takwáry-py omoī. Oipyte uka Hesu-pe omboy'u-vy:

—Eheja katu. Ou-ta para'e Elias ombogwejy hagwā kurusu-gwi oresende-vy, he'i Hesu-rehe hikwái.*

37 Ha upéi katu onhe'ẽ hatā jevy-ma Hesu. Ha upe rire katu omano-ma.

38 Upe-ma ramo pya'e ojeka Nhandejáry róga kakwaa pygwa okēgwasu nhugwāha tuvixa ete va'e. Osoro hatā. Yvate-gwi yvy peve ojeka hatā ou-vy.

39 Ha Hesu rovagwy-rupi oĩ capitão, soldado ruvixa va'e. Onhe'ẽ hatā omano hagwā ramo, ohexá íxupe:

—Upe va'e Nhandejáry ra'y tee voi nipo ra'e, he'i Hesu-rehe ohexá-vy.

40 Ha kunha heta oĩ upe-py. Mombryry-gwi oma'ẽ joa Hesu-rehe hikwái. Oĩ Maria Madalena, oĩ Salomé, oĩ Maria, ha'e Tiago tyvýry José sy ndive voi. Tyke'ýry héry ave Tiago ikarapemi va'e.

41 Upéa kunha kwéry omoirū irū ra'e Hesu-pe Galiléia-rupi. Ome'ẽ me'ẽ ra'e Hesu-pe hemikotevē. Oĩ ave heta kunha ambue va'e hendive ou va'ekwe Jerusalém-my.

* 15:34 Sl 22.1 * 15:36 Sl 69.21

*Omoī itakwa-py Hesu retekwe
(Mt 27.57-61; Lc 23.50-56; Jo 19.38-42)*

42 Ka'aru ete-ma. Upe áry-py judeu kwéry omoī porāmba gwemi'urā iko'ē ho'u va'erā. Ndoikói vyteri pytu'uga áry.

43 Ndoikói-gwi vyteri, oho José Pilatos renda-py. Upe va'e José Arimatéia pygwa, judeu ruvixa va'e, onhemboete va'e voi. Ha'e ave oha'arō arō va'e Nhandedjáry nhande ruvixa-pe omoirū hagwā. Upéixa ramo onhem-bopy'agwasu oho hagwā Pilatos renda-py ojerure Hesu retekwe-rehe.

44 Ha Pilatos ohendu ramo omanoha,

—Pya'e omano ra'e, he'i Hesu-rehe opondera-vy.

Upéi ohenói upe soldado ruvixa-pe oporandu hagwā íxupe:

—Omano-ma tipo ra'e Hesu? he'i soldado ruvixa-pe.

45 —Ha'e voi. Omano ete-ma voi, he'i íxupe omombe'u-vy.

Upe rire he'i José-pe Pilatos:

—Aipo ramo eraha hetekwe, he'i.

46 Ha upéi katu José oho ojogwa ao morotī iporā va'e onhugwā hagwā hetekwe. Ombogwejj kurusu-gwi. Onhugwā ao morotī-my. Upe rehevē omoī itakwa-py hetekwe. Ita-gwi ojo'o ra'e hetekwe renagwā. Upe-py omoī hetekwe. Upéi omboapajeréi imondo-vy itagwasu. Omboty hagwā itakwa rokē omboapajeréi itagwasu.

47 Ha Maria Madalena José sy ndive oma'ē oī-vy. Ohexa joty omoī ramo hetekwe.

16

*Hesu onhemoingove jevy-ma
(Mt 28.1-10; Lc 24.1-12; Jo 20.1-10)*

1 Pytu'uga áry rire oho Salomé ndive Maria Madalena, Maria Tiago sy ave. Oho ojogwa pohā hyakwā va'e omona hagwā hetekwe-rehe.

2 Iko'ē ramo, domingo-py osē-ma ramo kwarahy, voi oho ogwata-vy. Itakwa-py oho.

3 Oho javē,

—Kiva'e oipe'a-ta nhande-vy itagwasu itakwa rokē-gwi, he'i ojóupe opo-randu randu-vy.

4 Oma'ē ramo ohexa-ma itagwasu ojepe'a va'ekwe. Ha ita tuvixa eterei voi.

5 Ha upéi katu oike itakwa rye py-py. Oike ramo ha'e-py Nhandedjáry rembigwái karia'y-pe ohexa-ma. Ohexa ogwapy oī-vy ramo ijyke-rehe. Ao morotī puku va'e omonde ramo ohexa. Ohexa ramo, onhemondýi-ma.

6 Ha he'i íxupe karia'y:

—Aníke penhemondýi teñ, he'i. —Peju-ma ra'e, he'i. —Peheka voi peju-vy Hesu Nazaré pygwa kurusu-rehe onhemboja va'ekwe retekwe-pe, he'i. —Oikove jevy-ma kuri Hesu. Peheka ramo jepe ndaiporivéi-ma ko'a-py. Oho-ma kuri. Peju katu peē pema'ē hupagwe-rehe. Hendagwe rei-ma oī, he'i.

7 —Ha upe rire katu ekwa emombe'u hemimbo'e kwéry-pe, Pedro-pe ave. Ere íxupe: “Hesu oho-ta Galiléia tetā-my. Ne renonde oho-ta. Upe-py erhexa va'erā íxupe. He'i hagwe-rami erhexa va'erā” he'i íxupe kwéry karia'y.

8 Ha kunhagwe katu osē pya'e itakwa-gwi. Oripara oho-vy. Ipy'a ryrýi-ma onhemondýi-gwi. Okyhyje-gwi nomombe'úiry avave-pe.

*Hesu ojehexa uka jevy-ma
(Mt 28.16-20; Lc 24.13-35; Jo 20.11-18)*

9 Ha Hesu katu, oikove jevy ramo, ojehexa uka jevy. Voi domingo-py ojehexa uka Maria Madalena-pe. Íxugwi omosē va'ekwe imondo-vy sete anháy. Áy katu íxupe anho ranhe ojehexa uka Hesu.

10 Ohexa rire, Maria oho omombe'u Hesu irūgwe-pe. Ha'e kwéry hasē ojahe'o-vy hikwái. Upe jave omombe'u:

11 —Hesu oikove jevy-ma, he'i omombe'u-vy. —Ahexa jevy-ma íxupe kuri, he'i íxupe kwéry omombe'u-vy.

Ha ohendu ramo inhe'ẽ ndogweroviáiry voi íxupe.

12 Ha upe rire katu Hesu ojehexa uka jevy mokõi oirūgwe-pe. Gweko ambue va'e-rami ojehexa uka íxupe tetã jere-rehe ogwata ramo oiko-vy. Oirūgwe ramo jepe ndoikwaavéiry oirūgwe.

13 Ha oikwaa-ma ramo oho jevy omombe'u Hesu remimbo'e kwéry-pe. Ha ndogweroviáiry voi inhe'ẽ.

14 Ha upéi katu ojehexa uka jevy onze gwemimbo'e kwéry-pe. Okaru joa jave ojehexa uka íxupe. He'i íxupe kwéry Hesu:

—Xe rexahare xe mombe'u ramo nde-vy, ma'erã ndereroviáiry? he'i. —Xe aikove jevymaha omombe'u ramo nde-vy, ma'erã ndereroviáí? Nane akã porãi-gwi, nane mba'e reroviáiry-gwi, xe mombe'u ramo ndereroviáiry, he'i íxupe kwéry.

15 Upéi he'i íxupe kwéry:

—Tereho opa-rupi emombe'u Nhandejáry rehewa nhe'ẽ porã. Entéro yvypóry-pe kente kwéry va'e-pe gwive emombe'u.*

16 Upe ogwerovia va'e, onhemongarai va'e ave, oresende va'erã íxupe Nhandejáry. Ha ogwerovia e'ŷ va'e katu, nomboyke mo'ãiry voi íxugwi hembiapo vaikwe, he'i íxupe kwéry.

17 —Ha xe rerovia va'e katu xe réry-py omosē va'erã imondo-vy anháy. Áy oikwaa e'ŷ nhe'ẽ va'e-py onhe'ẽ va'erã.

18 Oipyhy ramo mbói reheve, naimboirasy mo'ãiry. Hi'upy e'ŷ jepe ho'u ramo, ndahasýi ave arã. Hasy va'e-rehe omoï ramo opo, ombogwera va'erã íxupe. Upéixa voi hexapyrã-rupi hembiapo porã porã va'erã xe rerovia va'e, he'i íxupe kwéry Hesu.

Ogwerajeupi Hesu-pe Nhandejáry

(Lc 24.50-53; At 1.6-11)

19 Upéi omombe'u rire ogwerajeupi heraha-vy íxupe Nhandejáry. Ha Hesu ogwapy-ma Nhandejáry yke-rehe ipu'aka reheve.

20 Ha hemimbo'e kwéry katu osẽ oho-vy opa-rupi onhemonhe'ẽ nhe'ẽ-vy. Ha Nhandejáry oipytygwõ íxupe kwéry. Upéa-gwi hexapyrã-rupi hembiapo porã porã hikwái. Nhandejáry Hesu Cristo rehewa nhe'ẽ porã omombe'u ramo, ogwerovia inhe'ẽ henduháry. Hembiapo porã rexá-vy, Anhetegwa nipo ra'e inhe'ẽ, he'i ogwerovia-vy.

* **16:15** At 1.8

Hesu Cristo rehewa nhe'ẽ porã Lucas remimombe'ukwe o evangelho de Lucas

Onhypyrũ ohai-vy onhe'ẽ Lucas

¹⁻² Mba'éixa pa, Teófilo? Xe, Lucas, ahai-ta ko kwatia-rehe xe nhe'ẽ nde-vy gwarã. Hesu Cristo rehewa nhe'ẽ ahai-ta nde-vy, Teófilo. Oĩ-ma Hesu Cristo rehewa kwatia nhe'ẽ gwĩ ambue kwéry ohai va'ekwe. Hesu rerakwã, mbava'e tipo ojapo araka'e ore pa'ũ-rupi ha'e kwéry kwatia-rehe omoõ va'ekwe. Hesu irûgwe kwéry ohexapa araka'e hembiapo, ohendu ave araka'e hemimombe'u, ha omombe'u mbe'u araka'e ojehegwã nhe'ẽ porã. Aipo ramo inhirûgwe omombe'u jevy ramo hesegwa nhe'ẽ, henduháry kwatia-rehe omoõ va'ekwe gwemiendukwe.

³ Ha xe katu, xe ave anhomongeta va'ekwe Hesu irûgwe kwéry ndive. Heta Hesu rehewa nhe'ẽ aikwaase-gwi aporandu randu íxupe kwéry hesegwa nhe'ẽ-rehe. Aikwaa porãve hagwã aporandu randu aiko-vy va'ekwe íxupe kwéry. Omombe'upa va'ekwe xe-vy. Hexahare remimombe'ukwe ahai kuri nde-vy ko kwatia-rehe.

⁴ Hesu rerakwã nhahendu meme-ma va'ekwe. Eremonhe'ẽ-ma rire ko kwatia, hesegwa nhe'ẽ anhetegwa ete ereikwaa va'erã. Ere arã “Omombe'u porã xe-vy Hesu rehewa nhe'ẽ”.

Nhandejáry omondo gwembigwái omombe'u hagwã Zacarias-pe ta'yryrã-rehe

⁵ Herodes oime ramo mburuvinxagwasu judeu kwéry yvy-pe pa'i ramo Zacarias oiko. Pa'i Abias re'yikwe ha'e Nhandejáry rembigwái ramo jevy oiko. Hembireko pa'i Arão re'yikwe va'e. Isabel hembireko réry.

⁶ Ha pe mokõi ojapo meme Nhandejáry remimbota. Oiko meme Nhandejáry nhe'ẽ-rupi. Upéixa-gwi Nhandejáry he'i hese: “Ipy'a porã voi Zacarias, hembireko ave ipy'a porã” he'i Nhandejáry hese.

⁷ Ha ha'e katu ndata'ýryi va'e voi. Imemby e'ŷ va'e voi hembireko. Ogwerogwaigwí-ma omemby e'ŷ. Ogwerotuja-ma gwa'ýry e'ŷ gwajýry e'ŷ ave.

⁸⁻¹⁰ Ha peteĩ áry Nhandejáry nhe'ẽ-py inhirû kwéry oiporavo Zacarias-pe omohyakwã hagwã koty'i. Abias re'yikwe ndive, Zacarias oime Nhandejáry róga kakwaa-py. Nhandejáry renonde-py ombo'apo hikwái. Ha peteĩ va'e mate oike Nhandejáry koty'i-py imohyakwã hagwã. Upe javé ojogweroaty va'e oka-gwi rei omundo onhe'ẽ Nhandejáry-pe. Ha peteĩ áry hapixa kwéry Nhandejáry réry-py oiporavo Zacarias-pe omoinge hagwã koty'i-py. Hyakwã javé, oka-py joa-ma oĩ hikwái. Osẽ ramogwarã oha'arõ hikwái.

¹¹ Upe javé ou Nhandejáry rembigwái yváy pygwa ojehexa uka hagwã Zacarias-pe. Onhembo'y hyakwã va'e renda yke-rehe ha upe-py ojehexa uka íxupe.

¹² Ohexa-ma ramo Nhandejáry rembigwái, onhemondýi Zacarias. Ndoik-waái mba'e pa ojapo-ta.

¹³ Aipo ramo Nhandejáry rembigwái he'i íxupe:

—Ani erekhyje, Zacarias, he'i íxupe. —Nhandejáry ohendu-ma ne rembi-jerure. Igwaigwí eterei jepe ne rembireko ha'e imemby-ta joto. Nde ra'y tee oiko-ta, he'i íxupe. —Oiko-ma ramo embohéry íxupe João-py. João voi heryrã, he'i íxupe.

14 —Oiko-ma ramo nde ra'y, erevy'a va'erā. Heta heta-ta kente kwéry ovy'a arā nde ra'y reko porā-rehe, he'i íxupe.

15 —Nhandejáry rovagwy-py nde ra'y oiko-ta heko marangatu va'erā. Ndo'u mo'āi oporomonga'u va'e. Oiko e'ŷ mboyve Nhandejáry Nhe'ē Marangatu tee oiko-tama ipy'apy-py.

16 Ha heta-pe ombojerovia uka va'erā Nhandejáry-rehe nde ra'y. Gwe'yi kwéry, Israel remiarirōre kwéry, ombojerovia uka va'erā Tupā Nhandejáry-rehe.

17 Nhandejáry nhe'ē-py omombe'u va'etykwe Elias amyrī-rami oiko-ta nde ra'y, he'i íxupe. —Nhandejáry ombopu'aka-ta íxupe, omoarandu-ta íxupe ogwata hagwā gwenonde-rupi. Inhe'ē-rupi kente kwéry ogwerova arā gwekoha. Upéixa-gwi túvy ipy'a porā va'erā gwa'ýry ndive. Heta nhe'ērenduse e'ŷha omoarandu arā heko porā hagwā. Upeixagwarā nde ra'y oiko-ta, he'i Nhandejáry rembigwái Zacarias-pe ta'ýry-rehe omotenonde-vy hesegwa nhe'ē.

18 Upe-ma ramo Zacarias he'i:

—Mba'éixa ko arovia-ta ne nhe'ē? he'i íxupe. —Xe, xe tuja-ma, xe rembireko igwaigwī-ma ave, he'i joty ndogweroviái-gwi.

19 Upéi Nhandejáry rembigwái he'i íxupe:

—Xe Gabriel, Nhandejáry rembigwái. Hendivegwa voi xe, he'i íxupe. —Ha'e xe mbou amombe'u hagwā nde-vy inhe'ē porā.

20 Anhetegwa nhe'ē amombe'u kuri nde-vy. Ha nde, ndereroviái joty xe nhe'ē. Ndereroviái-gwi, nerenehē'ē mo'āvēi-ta. Nde ra'y oiko rire ae, erenhe'ē jevy va'erā. Anhetegwa voi amombe'u kuri nde-vy, he'i íxupe.

21 Ha upe jave kente kwéry oha'arō hikwái íxupe oka-py. “Hi'are eterei Zacarias. Ma'erā nosēi Nhandejáry róga-gwi” he'i joa hese hikwái.

22 Ha Zacarias osē-ma ramo koto'i-gwi ndikatuvéi onhe'ē íxupe kwéry.

“Mba'e tipo? Ma'erā-gwi nonhe'ēvéi Zacarias?” he'i hese. “Yváy pygwa para'e ojehexa uka íxupe” he'i hese. “Upéixa-gwi para'e nonhe'ēvéiry” he'i hikwái.

Ojepombovava rei omombe'u hagwā mo'ā onhe'ē. Ndojeroviái-gwi, opyta inhe'ēngu Zacarias. Onhe'ē jokopa íxupe.

23 Upéi gwī ombo'apo hagwā áry-py ombo'apopa rire, oho jevy gwóga-py Zacarias.

24-25 Ha upe rire hembireko oha'arō oiko-vy omemby hagwā. Ha avave-pe nomombe'úi, opyta pyta meme gwóga-py hembireko. He'i ojéupe: “Xe rexakwaa ha xe poriahuverekoma Nhandejáry. Are-ma xe ndavy'ái. Naxe membýi-gwi ndavy'ái” he'i. “Atí eterei naxe membýi-gwi” he'i. “Āy katu avy'a voi. Ndaijegwaruvéi arā kente kwéry xéhegwi” he'i. “Ajohu-ta mitā. Avy'a ete” he'i opy'apy-py Zacarias rembireko mitā'i ojohu-tarehe.

Cinco jasy-rehema teñ nomombe'úi avave-pe mitā'i oikotaha.

Nhandejáry omondo gwembigwái omombe'u hagwā Maria-pe imembytaha

26-27 Ha upe rire, ohasa peteñ jasy jevy Nhandejáry omondo gwembigwái omombe'u hagwā Maria-pe imembytaha reheha-ma. Omundo gwembigwái yváy pygwa omombe'u hagwā Maria-pe. Héry va'e Gabriel. Upéi Nhandejáry nhe'ē-rupi Gabriel ou Galiléia yvý-py. Nazaré tetā-my ou omombe'u hagwā Nhandejáry nhe'ē Maria-pe. Maria kunhatañ rei oiko-vy. Omenda e'ŷ va'e ha imena'ŷ va'e voi Maria. Ndoikói va'e vyteri kwimba'e ndive. Imerā héry José. Mburuvixa Davi amyrī remiarirōkwe José. Upe ramo ndoikói vyteri Maria ndive.*

* 1:26-27 Mt 1.18

²⁸ Ha upéi katu ogwahē Nhandejáry rembigwái Maria ha-py. He'i ojehexa uka-vy:

—Evy'a katu, Maria, he'i. —Nhandejáry nde rexakwaa-ma. Hembiporavo voi ko nde. Nhandejáry oĩ ne ndive, he'i íxupe.

²⁹ Upéi ohendu-ma ramo Maria he'i ojéupe “Mba'e tipo, ma'erā tipo aipo he'i xe-vy?” he'i. “Tupā Nhandejáry rembigwái nipo ra'e ojehexa uka xe-vy ra'e” he'i. “Ma'erā tipo aipo he'i xe-vy?” he'i ojepy'amongeta-vy.

³⁰ Upe jave Nhandejáry rembigwái he'i jevy:

—Ani erekhyje tei. Tupā Nhandejáry ový'a nde-rehe, nde poriahuvereko voi Nhandejáry.

³¹ Ome'ẽ-ta voi nde-vy ne membyrã, he'i íxupe. —Kunumi voi ne memby-ta. Oiko ramo ne memby, embohéry kuri Hesu-py he'i íxupe.*

³² —Ne memby Nhandejáry voi. Teko jaryrã voi ne membyrã, he'i íxupe. —“Tupāgwasu ra'y” oje'e-ta íxupe. Tupā Nhandejáry nhe'ẽ-py oiko-ta mburuvix-agwasu voi ne membyrã. Nhamoigwasu Davi amyrí oiko hagwe-rami, oikota mburuvixagwasu ramo judeu kwéry-pe ne memby, he'i íxupe.

³³ —Jacó remiarirõ kwéry-gwi oiko va'erā mburuvixagwasu. Avave no-hekoviariõ íxupe. Opave'ỹ arã voi ne membyrã mburuvixagwasu ramo oikota.*

³⁴ Ohendu-ma ramo inhe'ẽ he'i Nhandejáry rembigwái-pe Maria:

—Xe, mba'éixa xe memby-ta, he'i íxupe. —Namendái vyteri niko. Ndaikói vyteri kwimba'e ndive, he'i.

³⁵ —Ndoiko reíry-ta ne membyrã. Nhe'ẽ Marangatu tee-rupi oiko va'erā ne membyrã. Upe ohekowaa va'e nhe'ẽ-rupi ae oiko va'erā, he'i íxupe. —Tupā marangatu ne membyrã. Imarangatu va'erā voi ne memby. Upéixa-gwi he'i arã hese hikwái “Nhandejáry Tupāgwasu ra'y” he'i hese.

³⁶ —Ha nde ryke Isabel ave, igwaigwī-ma jepe imemby-ta joty, he'i omombe'u-vy íxupe. —Nde'ivéi arã hese “Ikatu e'ỹ-gwi naimembýi Isabel”. Áy oha'arõ oiko-vy, he'i.

³⁷ —Nhandejáry-pe ndaipóri ikatu e'ỹ va'e. Ohekowaa hagwā ndahekorasýi voi Nhandejáry-pe. Ohekowaaapa va'e opamba'e, he'i.

³⁸ Upéi Maria he'i:

—Iporã. Arovia-ma Nhandejáry-pe, he'i. —Toiko katu hemimbota. Toiko katu ne remimombe'ukwe, he'i rire, ndohexavéi Nhandejáry rembigwái yváy pygwa-pe. Oho jevy-ma yváy-py.

Maria oho oipohu hagwā gwyke Isabel-pe

³⁹⁻⁴⁰ Upe rire, ndahi'aréi Maria oho oipohu hagwā gwyke Isabel-pe. Mombyry oho. Judéia yvy-py oho. Tetā mirí-my yvyaty-py oime Zacarias róga. Upe tape-rehe oho Maria. Ha ogwahē-ma ramo hóga-py:

—Ereikove tipo? he'i oike oho-vy.

⁴¹ Ohendu-ma ramo Maria nhe'ẽ tykéry Isabel ový'a. Omýi-ma imembyrã ohendu jave Maria nhe'ẽ. Ha Nhandejáry Nhe'ẽ Marangatu tee va'e omo-hynyhē Isabel py'a-py.

⁴² Upéixa-gwi Isabel onhe'ẽ-vy he'i.

—Entéro kunha kwéry-gwi nipo nde rovasave ra'e Nhandejáry. Ne membyrã hembihovasa tee voi. Nhandejáry nde rovasa ete-gwi nipo erevy'a ra'e. Ha xe ave, xe mbovy'a kuri, he'i Isabel okypy'ýry Maria-pe.

⁴³ —Nde, xe Jaryrã syrã voi, ereju ra'e xe pohu-vy. Avy'a eterei eregwahē ramo, he'i.

* ^{1:31} Mt 1.21 * ^{1:33} Is 9.7

44 —Ahendu jave ne nhe'ẽ, xe membyrã ovy'a-ma ave. Omýi-ma kuri ovy'a eterei-gwi.

45 Nde ave erevy'a eterei nipo ra'e. Nhandejáry-pe ere ra'e "Arovia-ma. Toiko katu ne remimbota". Upéixa-gwi nde rovasa ete-ma ra'e Nhandejáry, he'i Maria-pe.

Maria omboete Nhandejáry-pe oporahéi-vy

46 Upéi Maria omboete Nhandejáry-pe:

—Xe Járy,
he'i,
—xe py'apy gwive aporahéi-ta oromboete hagwã oromomba'egwasu eterei-gwi,
he'i.

47 —Xe py'apy gwive arovya Tupã Nhandejáry-pe.

Xe resendeha voi upe va'e.

48 Xe rexakwaa voi xe poriahuverekohagwã.

Xe ko Nhandejáry rembigwái voi jepe, imandu'a joty xe-rehe Nhandejáry. Yvy opa e'ŷ mboyve kente kwéry he'i va'erã xe-rehe: "Tupãgwasu Nhandejáry rembihovasakwe voi upe va'e" he'i va'erã xe-rehe.

49 Nhande-vy ikatu e'ŷ va'e ojapo xe-vy Nhandejáry xe ruvixa.

Héry imarangatu tee va'e,

he'i Maria oporahéi-vy Nhandejáry mboete-vy.

50 Upéi oporahéi jevy. Porahéi-py omombe'u pyahu jevy Maria:

—Entéro ojerovia va'e gwive hese poriahuverekoha voi ha'e.

51 Yvy apy-rehe gwive heta mba'e porã opu'aka-rupi ojapo Nhandejáry. Onhemomba'egwasu rei va'e-pe omosarambi ha'e ponove oakã-gwi rei ojapo opamba'e.

52 Mburuvixagwasu imbaraete va'e kwéry jepe
oipe'a omanda oikovyha-gwi kente rei-rami jevy oiko hagwã.
Ha omomba'egwasu eterei heko'ive va'e-pe.

53 Iporiahu va'e-pe heta imba'e porãrã ome'ẽ va'erã.

Ivare'a va'e-pe ave ome'ẽ hemi'urã.

Ha imba'e retave va'ekwe jepe omondo ipo nandi reheve

he'i.

54-55 —Nhane ramoigwasu amyrã kwéry-pe omombe'u araka'e Nhandejáry:
"Apohovasa-ta, ne remiarirõ kwéry-pe ave ahovasa-ta.

Äy peiko va'erã gwive apohovasa-ta."

Upéixa he'i nhane ramoigwasu Abraão amyrã-pe,
hemiarirõ kwéry-pe ave.

Ha imandu'a katu gwemimombe'ukwe-rehe oiko hagwã he'i va'ekwe.
Ipokatu inhe'ẽ.

Upéa he'i va'ekwe-gwi oiporiahuverekohameme
nhande re'yi kwéry-pe,
Israel re'yi kwéry-pe.

Ohovasa porã nhande-vy Nhandejáry,*

he'i oporahéi-vy. Maria oporahéi Nhandejáry-pe omboete-vy.

56 Ha upe rire Maria hi'are jevy gwykéry róga-py. Mbohapy jasy ohasa rire,
oho jevy gwóga-py.*

João Batista onase ramogware

* 1:54-55 Jn 17.7,19 * 1:56 1 Sm 2.1-10

⁵⁷ Imemby oikotamaha áry-py imemby-ma Isabel. Kunumi voi imemby.

⁵⁸ Oiko-ma ramo, hóga ypy-rehe oĩ va'e, hapixa kwéry, ha he'ýi kwéry ave ou ogwerohory íxupe imemby javé.

—Nhandejáry nde poriahuverekko-gwi ome'ẽ nde-vy ne membyrã, he'i íxupe.

⁵⁹ Upéi ogwerekko-ma ramo ocho áry ogweraha íxupe oipirekytĩ uka hagwã ha ombohéry hagwã ave. Ha enterove omboheryse íxupe.

—Nhambohéry-ta íxupe Zacarias-py, he'i hikwái. Omoõse mo'ã túvy réry hese.

⁶⁰ —Ani eremoõ túvy réry hese, he'i isy. —João ae ambohéry-ta íxupe, he'i isy.

⁶¹ Ndojohu porãi hikwái.

—Ndaipóri nde re'ýi kwéry pa'ũ-my avave héry va'e João, he'i isy-pe hikwái.

⁶² Upéixa-gwi oporandu hikwái túvy-pe. Onhepombovava hikwái oporandu-vy túvy-pe gwa'ýry reryrã omombe'u hagwã.

⁶³ Upéi onhepombovava ojerure-vy ome'ẽ uka hagwã ojéupe kwaitia. Ome'ẽ-ma rire ohai kwaitia-rehe. “João héry” he'i ohai-vy. Omombe'u ramo, “Ma'erã po omboheryse João-py” he'i hikwái opondera-vy.

⁶⁴ Ha ohai jave gwa'ýry réry, omonhe'ẽ uka jevy íxupe Nhandejáry. Nainhe'ënguvéi-ma. Onhe'ẽ porã jevy-ma ha omomba'egwasu Nhandejáry-pe:

—Imarangatu tee va'e Nhandejáry, he'i onhe'ẽ-vy. —Ndaipóri ha'eixagwa ohekokwaa va'e, he'i Nhandejáry-pe omboete-vy.

⁶⁵ Ha entéro oikwaa va'e opy'amirĩ reheve opondera ndera hesegwa hikwái. João rehewa rerakwã omombe'u mbe'u Judéia yvy-rupi. Tetã ambue mbue mygwa-pe omombe'u mbe'u ave hikwái.

⁶⁶ Ha herakwã renduha kwéry onhemoneta opy'apy-py hese.

—Mbava'e tipo ojapo-ta upe kunumi? he'i. —Okakwaa-ma rire, mba'e po oiko va'erã íxugwi? he'i oporandu randu ojóupe. —Ha'e Nhandejáry rembihovasa voi nipo ra'e, he'i ojóupe hese.

Ha Nhandejáry ohovasa meme mitã-me. Omombaraete ave íxupe onhe'ẽ-py oiko hagwã.

Zacarias omotenonde gwa'ýry rehewarã

⁶⁷ Ha upéi katu Nhandejáry Nhe'ẽ Marangatu tee va'e omohynyhẽ túvy Zacarias py'apy. Ome'ẽ íxupe hembiporaheirã:

⁶⁸ —Tonhemomba'egwasu katu Tupã Nhandejáry, he'i oporahéi-vy.

—Gwe'ýi kwéry Israel remiarirõre kwéry-pe oipytygwõ-ma. Nhane resende-tama. Tuvixa mba'e voi Nhandejáry, judeu kwéry Járy, he'i oporahéi-vy.

⁶⁹ —Ombou-ma nhande-vy ipu'aka ete va'e nhane resende va'erã, he'i.

—Gwembigwái Davi amyrĩ remiarirõ ombou, nhande re'ýi ete va'e voi, he'i oporahéi-vy.

⁷⁰ —Yma va'ekwe Nhandejáry omombe'u ha omotenonde-ma va'ekwe nhane resende va'erã rehewa nhe'ẽ.

Inhe'ẽ-py omombe'u va'ety kwéry heko marangatu ete va'ekwe omohenonde-ma va'ekwe omombe'u-vy hesegwarã voi va'ekwe nhe'ẽ.

⁷¹ —Gwĩ nhande rayhu e'ŷ va'e-gwi nhane resende va'erã.

Gwĩ nhande-rehe ija'e'ŷ va'e-gwi ave nhane resende ave va'erã imbaraete e'ŷ hagwã nhande-rehe, he'i oporahéi-vy.

72 —Ha inhe'ẽ-rupi oiporiahuvereko meme araka'e nhane ramoigwasu kwéry-pe Nhandejáry.

Imandu'a meme katu onhe'ẽ marangatu-rehe oikopa hagwā omombe'u hagwe-rami.

73-74 —Onhomongeta araka'e nhane ramoigwasu Abraão amyrī ndive.

He'i íxupe: "Hupigwa va'e voi amombe'u-ta nde-vy.

Ne nhemonharā kwéry-pe aresende-ta hese ija'e'ŷ va'erāgwe-gwi xe mboete porā hagwā kyhyje e'ŷ reheve aresende-ta íxupe kwéry.

75 Heko marangatu reheve, py'a potī reheve xe mboete hagwā. Ko yvy-rehe oiko aja oiko porā meme hagwā xe ndive aresende-ta íxupe kwéry" he'i Nhandejáry.

Nhande rehegwarā voi upéa nhe'ẽ Abraão amyrī-pe omombe'u araka'e Nhandejáry,

he'i Zacarias Nhandejáry-pe omboete-vy.

76 —Ha nde,

he'i Zacarias gwa'ýry-pe hekorā omohenonde-vy íxupe,

—Nde-rehe kente kwéry he'i va'erā "Nhandejáry Tupāgwasu nhe'ẽ omombe'u va'ety" he'i va'erā nde-rehe.

Nhandejáry ne mondo-ta gwembiporavo va'e renonde-rupi.

Ogwahētamaha óra-py eremombe'u va'erā.*

77 Henonde-rupi ereho-ta eremombe'u-vy nhande re'ýi kwéry-pe.

"Nhane resendeharā ou-tama" ere va'erā ereho-vy.

"Nhane rembiapo vai omboyke-vy ou-ta.

Nhane mopy'a potī-vy ou-ta" ere va'erā ereho-vy eremombe'u-vy, he'i.

—Nhandejáry renonde-rupi eremombe'u-ta hembiporavo kwéry-pe.

78 —"Nhandejáry heko porā tee va'e oiporiahuvereko kwaa va'e nhande poriahuvereko va'erā voi" ere va'erā hese.

"Nhande rayhu eterei-gwi ombou-ta yváy-gwi nhane resendeharā nhane moaranduharā" ere arā hesegwa nhe'ẽ eremombe'u-vy.

79 —"Nhande re'ýi e'ŷ resapeharā-rami ave upé ou-ta va'e.

Ha'e kwéry pytū mygwa-rami oiko.

Oikwaa e'ŷ va'e Nhandejáry-rehe, ogwerovia e'ŷ-gwi íxupe, omano rire on-hehundipa va'erā.

Oikwaa uka va'erā íxupe kwéry Nhandejáry remimbota oiko porā hagwā hendive.

Ombou-ta nhande-vy nhane resendeharā.

Ohexa uka-ta nhande-vy nhane raperā nhane mbopy'agwapy hagwā inhe'ẽ-rupi jaiko hagwā."

Upe Nhandejáry nhe'ẽ eremombe'u meme-gwi he'i va'erā nde-rehe: "Nhandejáry, Tupāgwasu va'e nhe'ẽ-py omombe'u va'ety tee voi" he'i va'erā kente kwéry nde-rehe,*

he'i Zacarias. Nhe'ẽ Marangatu tee va'e omohynyhē íxupe ipy'apy. Upéa-rupi Nhandejáry ome'ẽ inhe'era omombe'u hagwā gwa'ýry rekora omotenonde hesegwarā.

80 Upéi okakwaa porā-ma upé mitā. Hi'arandu porā voi upéa oiko-vy. Nhandejáry nhe'ẽ-py oiko, ojerovia ete hese. Ava rekwyat e'ŷ-rupi ogwata gwata oiko-vy. Gwe'ýi kwéry-pe Israel remiarirō kwéry-pe atýra-py ojehexa uka hagwā áry peve ogwata gwata oiko-vy ava rekwyat e'ŷ-rupi.

* 1:76 Ml 3.1 * 1:79 Is 9.2

2

Hesu oiko ramogware
(Mt 1.18-25)

¹⁻² Quirino oiko jave Síria pygwa kwéry-pe mburuvixa ramo, Augusto ohai uka kватia. Mburuvixagwasu voi Augusto. Omomhangareko uka entéro yvy pygwa kwéry-rehe. Omomarandu uka íxupe kwéry: “Ohai-ta kватia-rehe pende réry. Ne ramoigwasu oiko hagwe-py tekotevē ereho. Upe-py mante ohai arã nde-vy nde réry.” Upéixa he'i oipapa hagwā entéro yvy pygwa kwéry-pe. Onhypyrū upe pygwa kwéry-pe héry ohai-vy.

³ Upéixa-gwi enterove oho. Gwamoigwasu oiko hagwe-py oje'ói-vy hikwái. Ohenói uka-gwi íxupe kwéry oho.

⁴⁻⁵ Ha José ave oho gwamoigwasu oiko hagwe-py. Osẽ Galiléia yvy-gwi. Nazaré tetã-gwi osẽ oho hagwā Judéia yvy-py. Oho Belém tetã-my. Gwamoigwasu Davi oiko hagwe-py oho ohenói uka-gwi íxupe kwéry. Oho Maria ndive. Imemby-tama jave ogweraha gwembirekorã. Ha hembirekorã teĩ Maria.

⁶ Upéi ogwahē oje'ói-vy hikwái Belém tetã-my. Ha oime jave upé-py ogwahē-ma imemby hagwā áry.

⁷ Oiko-ma mitã. Kunumi voi imemby rypykwe. Oiko-ma ramo mitã isy onhugwā omemby huparã-py. Upéi omoheno omemby mymba karu haty-py rei imoĩ-vy. Mbohupa róga-py ndaipóri henagwā-gwi yvyranha'ẽ-py rei omoĩ omoheno-vy omemby-pe.

Nhandejáry rembigwái ojehexa uka hymba rerekwa kwéry-pe

⁸⁻⁹ Upe-ma ramo gwī Belém pygwa-pe ojehexa uka Nhandejáry rembigwái yváy pygwa. Mymba rerekwa kwéry-pe ojehexa uka. Oime jave nhu-my, Belém jerekwe-rehe, pyhare ramo onhangareko gwymba ovexa-rehe. Upéi sapy'a ojehexa uka íxupe kwéry Nhandejáry rembigwái. Hembigwái ojehexa uka jave Nhandejáry omohendy hymba rerekwa jerekwe-rehe. Áry-rami rei hendy íxupe kwéry imarangatu tee va'e. Ohesapeve rei-ma ramo hendy va'e, omopy'amirī íxupe kwéry.

¹⁰ Upéi Nhandejáry rembigwái he'i íxupe kwéry:

—Ani nde py'amirī teĩ ereiko-vy, he'i íxupe. —Aju pene momarandu-vy. Pene mbovy'a-ta ko nhe'ẽ porã, ha pende re'ýi kwéry-pe ave ombovy'a va'erã, he'i.

¹¹ —Pene resendeharã oiko-ma kuri. Pene ramoigwasu Davi amyrī oiko hagwe-py oiko-ma kuri. Mburuvixagwasu voi ha'e. Ha'e ko Cristo, Nhandejáry rembiporavo va'e voi, he'i íxupe. —Pende Járy voi ave, he'i.

¹² —Mitã'i oime-ma teĩ mymba karu haty-py. Ijaو-py onhugwā rire-ma omoheno íxupe hupa-py mymba karu haty-py. Upe-py peho ramo, petopama va'erã pene resendeharã-pe. Kóa nhe'ẽ amombe'u peẽ-my pene rembiexarã peikwaa porã hagwā pene resendeharã oikomaha, he'i Nhandejáry rembigwái ojehexa uka-vy íxupe kwéry.

¹³ Upéa he'i jave heta heta Nhandejáry rembigwái yváy pygwa kwéry ou ojehexa uka okwa-vy íxupe kwéry. Onhe'ẽ va'e ndive oiko-vy ojehexa uka heta hikwái. Ha oporahéi omboete hagwā Nhandejáry-pe.

¹⁴ —Tomomba'egwasu Tupã Nhandejáry yváy pygwa oĩ va'e-pe.

Iporã ete eterei Nhandejáry.

Avave ha'eixagwa ndoikói.

Yvypóry-pe ombopy'agwapy ohexakwaa rei-vy,
 he'i oporahéi-vy.

15 Upéixa oporahéi rire, oho jevy yváy-py oje'ói-vy hikwái. Oho-ma rire upe mymba rerekwa va'e kwéry he'i ojóupe:

—Jaha katu, he'i. —Jaha-ta Belém tetã-my. Jahexa hagwã mba'e tipo oiko upe-py, he'i oje'ói-vy hikwái. —Jahexa-ta ko Nhandejáry omombe'u uka kuri nhande-vy va'ekwe jahexa-ta, he'i.

16 Ha pya'e oje'ói hikwái. Ogwahẽ-ma ramo upe-py ojohupa íxupe kwéry. Ohexa isy Maria-pe, ohexa José-pe, ohexa ave mitã'i-pe ave. Ha mitã'i katu onheno oĩ-vy mymba karu haty-py.

17 Ha ohexa-ma Nhandejáry remimombe'ukwe. Upéi omombe'u jevy mitã'i rehewa nhe'ẽ. Nhandejáry rembigwái he'i va'ekwe omombe'u jevy mymba rerekwa va'e kwéry.

18 Ha entéro ohendu va'e opondera-vy rei oiko hikwái.

—Mba'eixagwa pa ko mitã, he'i ojóupe hikwái.

19 Ha isy Maria katu opondera ndera oiko-vy. Onhongatu opy'apy-py hesegwa nhe'ẽ. Imandu'a ndu'a opamba'e-rehe oiko-vy.

20 Upéi hymba rerekwa kwéry oho jevy nhu-my. Oho jave oporahéi hikwái. Omomba'egwasu Nhandejáry-pe oporahéi-vy.

—Tupã xe Járy nde tuvixa, he'i oporahéi-vy. —Iporã ete va'e erehexa uka kuri ore-vy. Iporã ete va'e oroikwaa kuri. Nde tuvixa ete, he'i oporahéi omboete-vy.

Upe Nhandejáry rembigwái remimombe'ukwe otopa. Upéixa-gwi omboete ete Nhandejáry-pe oiko-vy hikwái.

Nhandejáry rogagwasu-py Hesu mitã'i-pe omboete

21 Ogwereko-ma ramo oito áry oikytímirí uka mitã pire. Judeu va'e ra'y-gwi Nhandejáry réry-py oipirekytí íxupe. Oipirekytí uka rire íxupe ombohéry "Hesu" he'i íxupe. Nhandejáry rembigwái yváy pygwa omombe'u ramo oiko va'erãha omombe'u ave heryrã.

22 Ha upe rire ogwahẽ-ma isy-pe, tuvanga-pe ave hi'óra ojapo hagwã Nhandejáry nhe'ẽ. Ohai uka va'ekwe Moisés amyrí-pe mba'éixa pa onhemopotí jevy kunha oiko-ma rire mitã. Upéixa-gwi oho Jerusalém tetã-my. Mitã'i ave ogweraha ohexa uka hagwã pa'i-pe.

23 Moisés amyrí rembihaikwe he'i ave entéro judeu kwéry-pe "Ne mitã ypykwe kwimba'e ramo ereme'ẽ íxupe Nhandejáry pegwarã".* Upe Nhandejáry nhe'ẽ ojapo hagwã ogweraha íxupe Jerusalém-my, Nhandejáry róga kakwaa-py ogweraha íxupe.

24 Mokõi gwymba ave ogweraha. Moisés rembihaikwe Nhandejáry nhe'ẽ: "Oiko-ma ramo mitã'i, erehapy uka mokõi ne rymba Nhandejáry-pe eremboete-vy" he'i va'ekwe ohai-vy. "Pa'i ojuka va'erã ohapy va'erã ereme'ẽ íxupe" he'i. "Pykasu ramo, mokõi pykasu ave eraha erehapy uka va'erã. Pyku'i ramo, mokõi pyku'i ave eraha erehapy uka va'erã." Upéixa ohai uka va'ekwe Nhandejáry. Upéa ojapo hagwã oho hikwái Jerusalém-my. Upéa ojapo-vy oho hikwái.*

25-27 Ha ogwahẽ-ma ramo, oike Nhandejáry róga kakwaa-py. Nhandejáry nhe'ẽ ojapo-gwi oike. Oike jave oĩ ave upe-py peteĩ kwimba'e, héry va'e Simeão. Nhandejáry-rehe ojerovia eterei va'e Simeão oiko Jerusalém tetã-my. Hekoha porã Nhandejáry renonde-py. Imarangatu va'e. Nhandejáry rembiporavo va'e ogwahétaha óra ra'arõ-vy oiko Simeão. Israel remiarirõ kwéry ombopy'agwapy va'erã oha'arõ oiko-vy. Ha Nhe'ẽ Marangatu tee va'e oiko ipy'apy-py. Henonderã omombe'u araka'e íxupe:

* 2:23 Ex 13.2,12 * 2:24 Lv 12.6-8

—Nde, Simeão, he'i íxupe Nhe'ẽ Marangatu tee va'e —erehexa-ta Nhandedjáry rembiporavo va'e. Íxupe erehexa rire ae mate eremano va'erã, he'i íxupe. — Erehexa e'ŷ reheve neremano mo'âi, he'i íxupe omombe'u mbava'e oiko-ta va'e íxupe.

Upe rire Nhe'ẽ Marangatu tee va'e he'i íxupe oho hagwã Nhandedjáry róga kakwaa-py. Ha upe-py oĩjave oike Hesu sy, tuvanga ave ogweru Hesu-pe upe-py Nhandedjáry nhe'ẽojapo hagwã.

²⁸ Upéi Simeão ohupi Hesu mitã'i ojyva ári. Omboete ete Nhandedjáry-pe, mitã'i-rehe he'i:

²⁹⁻³² —Xe Járy, yváy-py ereiko va'e, atima porã nde-vy ko mitã'i-rehe.

Ko va'e ne rembiporavokwe ra'e, ne remimbou voi ra'e.

Ko va'e ore resendeharã ra'e aheda-ma katu.

Ne remimbou oheda-ma yvypyór.

Erembou íxupe entéro opa opa kente ambue mbue kwéry-pe, judeu e'ŷ va'e-pe
omo'arandu hagwã, pytû-my rei oiko va'e-pe arakatu-py ae omoingo
hagwã.

Ne remimbota oikwaa va'erã.

Nde pu'akaha reheve oikwaa uka-ta ave nde rekoha marangatu tee Israel
remiarirõre kwéry-pe.

Ko mitã katu ne remimbou ore resendeharã.

Xe py'agwapy-ma.

Aheda-ma ore resendeharã.

Naha'arõvéi-ma ore mbopy'agwapyharã-pe.

Aheda-ma katu íxupe.

Xe mbovy'a voi. Xe, ne rembigwái, amano ramo jepe xe py'agwapy-ma va'erã
aiko-vy.

Ne remimombe'ukwe ãy aheda-ma,*

he'i Nhandedjáry-pe omboete-vy Simeão.

³³ Ha Hesu sy, tuvanga ave ohendu-ma ramo “Mba'eixagwa po ko mitã” he'i
opondera-vy mitã'i-rehe.

³⁴⁻³⁵ Upéi Simeão omundo onhe'ẽ Nhandedjáry-pe ohovasa hagwã íxupe
kwéry. Upe rire Maria-pe, Hesu sy-pe he'i:

—Ejeapysaka porã katu xe nhe'ẽ-rehe, he'i isy-pe. —Ko mitã'i Nhandedjáry
rembiporavo tee va'e voi, he'i. —Ombojoavy avypa va'erã Israel remiarirõre
judeu kwéry. Ha'e kwéry onhemongeta va'erã hese opy'apy-py. Ha on-
hemongetaha Nhandedjáry oikwaa uka va'erã enterove-pe. Heta voi ndaija'ei
va'erã hese, ha upéa-rehe Nhandedjáry ombohasa asy-ta íxupe kwéry. Heta
ave ojerovia va'erã hese. Íxupe kwéry oresende va'erã. Oikwaa va'erã
onhemongetaha okwa-vy. Ha nde, isy, eremboasy-ta íxupe. Ne memby-rehe
ne mytu'e'ŷ-gwi, nde py'a kutu va'erã, he'i omotenonde-vy Maria-pe.

³⁶⁻³⁷ Upéa he'i jave Simeão, igwaigwí ete va'e ogwahẽ-ma. Nhandedjáry
nhe'ẽ-py omombe'u va'ety upe kunha. Aser re'yi gwigwa. Fanuel rajy. Héry
Ana. Ha igwaigwí voi. Kunhataï ramo omenda araka'e. Upéi, sete ro'y
rire omamo ime. Ime omamo rire-ma hi'are jevy. Ohupity-ma oitenta e
quatro ro'y tembirekokwe ramo rei-ma oiko. Ha oiko meme joty Nhandedjáry
róga kakwaa-py. Nosẽi voi upe-gwi oiko-vy. Omboete ete Nhandedjáry-pe
oiko-vy upe-py. Áry ramo, pyhare ramo ave omboete ete oiko-vy. Omundo
mondo ave onhe'ẽ Nhandedjáry-pe. Okaru e'ŷ reheve omundo mondo onhe'ẽ
Nhandedjáry-pe ojerovia tee-gwi hese.

³⁸ Ha Simeão omombe'u jave mitã'i rehewa nhe'ẽ, ogwahẽ-ma Ana ou-vy.
Omundo onhe'ẽ Nhandedjáry-pe. He'i:

* ^{2:29-32} Is 42.6; 49.6

—Atima voi nde-vy xe Járy, he'i. —Nde pu'aka tee va'e xe mbovy'a eterei, xe Járy. Ahexa-ma ore resendeharã, he'i omboete-vy mitã'i Hesu rexa-vy. Upe rire omombe'u mbe'u mitã Hesu rehegwa nhe'ẽ heta judeu kwéry-pe. Gwesendeharã oha'arõ va'e-pe Jerusalém tetã mygwa-pe omombe'u igwahẽha.

³⁹ Ha ojapopa-ma ramo Nhandejáry remimombe'ukwe mitã ypykwe kwimba'e-rehe, oho jevy gwóga-py. Galiléia yvy-py, Nazaré tetã-my oime hóga. Ojapopa rire, ohexa ukapa rire, ogweraha jevy-ma íxupe.

⁴⁰ Upéi imbaraete okakwaa-vy. Hi'arandu porã-ma voi Hesu. Nhandejáry rembihovasa voi.

Hesu mitã ramo onhomongeta gwĩ Nhandejáry nhe'ẽ mbo'eha kwéry ndive

⁴¹ Ha túvy kwéry oho meme hikwái Jerusalém-my. Aretegwasu páscoa áry ohasa meme hagwã upe-py.

⁴² Hesu ogwereco-ma ramo doze ro'y oho indive kwéry Jerusalém-my páscoa áry ohasa hagwã upe-py. Judeu kwéry reko-rupi oho hikwái.

⁴³ Ohasa-ma rire aretegwasu oho jevy-ma hikwái gwóga rape-rupi. Ha ohokwe-vy he'yi kwéry anho-ma oje'ói hikwái. Ha Hesu katu nomoirãí íxupe kwéry oje'ói ramo. Ha ha'e opyta Jerusalém-my. Ha túvy kwéry ndoikwaái ipytaha.

⁴⁴ “Gwapixa kwéry ndive oho Hesu” he'i mo'ã hese. Ha ka'aru-ma ramo ae oheka mo'ã íxupe. Ha ndotopáiry. Gwe'yi kwéry ndive ndoikóiry ave. Gwapixa kwéry ndive ndoikóiry ave. Upe pygwa pa'ũ-rupi oheka rei ave íxupe.

⁴⁵ Íxupe ndojohúi-gwi oho jevy tuvanga, isy ave. Jerusalém-my Hesu reka-vy oho jevy.

⁴⁶ Upe rire, ohasa-ma rire mbohapy áry otopa jevy íxupe. Nhandejáry róga kakwaa-py ogwapy oĩ-vy. Gwĩ Nhandejáry nhe'ẽ mbo'eha mbyte-py ogwapy oĩ-vy. Hesu ojeapysaka saka ohendu hagwã inhe'ẽ oiko-vy Hesu. Oporandu randu ave íxupe kwéry Nhandejáry nhe'ẽ oikwaave hagwã. Onhomongeta ave hendive kwéry.

⁴⁷ Ha onhomongeta jave porombo'eha kwéry ndive heta kente kwéry ohendu va'e ave. Ha'e kwéry opondera ndera voi hese hi'arandu eterei-gwi. Oporandu ramo íxupe, hi'arandu voi omombe'u hagwã oporandu va'e-pe.

⁴⁸ Upéixa oiko jave ogwahẽ tuvanga, ha isy ave. Isy ohexa-ma ramo Hesu-pe he'i “Ma'erã po opyta ra'e ko'apy?” he'i opondera-vy hese. Upéi isy he'i íxupe:

—Ma'erã-gwi ko va'e erejapo ore-vy? Ne ruvanga ndive orojapura voi kuri nde-rehe. Oroheka heka voi kuri nde-vy oroiko-vy, he'i íxupe isy onhemonhe'ẽ-vy.

⁴⁹ Ha'e katu he'i osy-pe:

—A-py voi aime, he'i osy-pe onhemombe'u-vy. —Xe rendagwe-rupi xe reka rei ereiko-vy. Ndapyta reíry. Xe Ru yváy-py oĩ va'e remimombe'ukwe-rehe apena eterei-gwi apyta ko'a-py, he'i osy-pe. —Tekotevẽ amondo xe resa hese aiko-vy, he'i osy-pe.

⁵⁰ Ha isy, tuvanga ave nohendu kwaái inhe'ẽ.

⁵¹ Upéi Hesu oho jevy indive kwéry Nazaré-py. Ha tuvanga nhe'ẽ-py oiko. Isy imandu'a ndu'a opy'apy-py hese, omono'õ no'õ hesegwa nhe'ẽ.

⁵² Hesu katu okakwaa porã. Hi'aranduve nduve oiko-vy. Nhandejáry ndive kente kwéry ndive ave ipy'a porã ave oiko-vy.

3

*Kente kwéry-pe onhemonhe'ẽ João Batista
(Mt 3.1-12; Mc 1.1-8; Jo 1.19-28)*

¹ Tekwaty e'ŷ-my oiko ramo Zacarias ra'y João Batista, Nhandejáry omombe'u íxupe inhe'ẽrã.

Upe jede Tibério César oiko mburuvixagwasu ramo. Ojapo-ma quinze ro'y oiko hagwe mburuvixagwasu ramo upe pygwa kwéry-pe. Ha Judéia yvy pygwa-pe katu Pôncio Pilatos oiko mburuvixa ramo ave. Ha Galiléia yvy pygwa-pe katu Herodes oiko mburuvixa ramo ave. Ha tyvýry Filipe katu oiko mburuvixa ramo Ituréia yvy pygwa-pe, Traconites yvy pygwa-pe ave. Ha Abilene yvy pygwa-pe katu Lisâncias oiko mburuvixa ramo ave. Upe mburuvixa kwéry omanda-ma jave, Nhandejáry onhomongeta João Batista ndive.

² Upe jede oiko ave pa'igwasu Anás ha pa'igwasu Caifás ave. Pa'i kwéry-gwi imburuvixave va'e upe mokõi va'e. Ha upe jede Nhandejáry omundo João Batista-pe omombe'u hagwã inhe'ẽ.

³ Upéixa-gwi oho Jordão ysyry jere-rupi upe pygwa-pe Nhandejáry nhe'ẽ omombe'u mbe'u-vy. Ha upe pygwa okwa va'e kwéry-pe onhemonhe'ẽ ramo João Batista he'i:

—Pende rekoha vai eterei. Taperova katu pende rekoha, he'i íxupe kwéry.
—Enhémongarai uka katu Nhandejáry nhe'ẽ-rupi ereiko hagwã, he'i. —Nde rekoha ererova ramo, erenhémongarai uka ramo ave, ne rembiapo vaikwe omboyke arã ndéhegwi Nhandejáry, he'i Nhandejáry nhe'ẽ-rupi omombe'u-vy íxupe kwéry.

⁴ Nhandejáry nhe'ẽ kwaitia-rehe ohai va'ekwe Isaías amyrĩ:
“Tekwaty e'ŷ-my ou va'e-pe osapukái va'erã xe nhe'ẽ-py omombe'u va'ety: Outama Nhandejáry rembiporavo va'e, osapukái va'erã ho'e-vy. Pembo-hape porã katu íxupe, he'i va'erã. Pemopotĩ íxupe haperã.”

⁵ Entero yvy pyko'ẽ ko'ẽ gwive emohynyhẽ katu. Eity entero yvyatyrusu gwive. Entero yvy atymirĩ ave eity katu erembojoja hagwã haperã. Emokarẽ karẽ e'ŷ katu tape ikarẽ va'e. Emboyke katu ne rembiapo vaikwe ndejéhegwi, he'i va'erã onhe'ẽ hatã-vy.

⁶ Enterove ohexa va'erã Nhandejáry rembiporavo nhane resendeharã voi, he'i va'erã onhe'ẽ hatã-vy tekwaty e'ŷ-my ou va'e kwéry-pe xe nhe'ẽ-py omombe'u va'ety”

he'i Nhandejáry nhe'ẽ kwaitia-rehe oĩ va'e. Isaías amyrĩ Nhandejáry nhe'ẽ-py omombe'u va'ety omotenonde va'ekwe ohai-vy João Batista rehewarã nhe'ẽ.*

⁷ Ha upéixa-gwi Nhandejáry nhe'ẽ-py João Batista omombe'u gwenda-py ou va'e-pe gwive. Ojogweroatypa henda-py onhemongarai uka hagwã. Upéarehe João onhemonhe'ẽ íxupe kwéry:

—Xáke, he'i. —Kiva'e nhe'ẽ-rupi po ereju erenhemokanhy uka hagwã mo'ã nde rerekoy asy eteharã-gwi? Mbói ramigwa voi peẽ, pende rekoha vai va'e. Ndikatúi erenhembotavy rei Nhandejáry-pe, he'i.

⁸ —Nhandejáry ko oikwaa. Erova tee nde rekoha. Ne rembiapo porãrã-rupi erehexa uka katu nde rekoha pyahurã. Ani ave ere rei nde py'apy-py “Xe Abraão remiarirõre, upéixa-gwi naxe mbohasa asy mo'ãi-ta Nhandejáry” ani ere rei aipo-rami nde py'apy-py. Xe ha'e-ta katu peẽ-my, oipota ramo Nhandejáry, onhe'ẽ-py rei omoingo arã ita-gwi rei Abraão remiarirõrã. Inhe'ẽ

* ^{3:6} Is 40.3-5

pokatu voi Nhandejáry. Opa mba'e rekokaahaa voi ko Nhandejáry, he'i onhemonhe'ë-vy.

⁹—Ha ndahi'aréi-tama ou hagwā Nhandejáry. Ogwahē-tama nhande rekoha vai rexa-vy. Yvyra hi'a vai va'e-rami nhande rekoha vai ramo nhane mbo-hasa asy-ta. Yvyra oityha-rami nhane mbohosa asy-ta. Oity rire ohapypa. Upe-rami ave omoingo asy-ta hekoha vai va'e-pe. Erova katu nde rekoha, he'i.

¹⁰ Ha ha'e kwéry he'i:

—Mbava'e tipo orojapo-ta orogwerova hagwā ore rekoha oroiko porā hagwā Nhandejáry ndive, he'i hikwái oporandu-vy íxupe.

¹¹ João Batista he'i íxupe kwéry:

—Mokōi nde kamisa ererekō ramo, eme'ë peteī ogwereko e'ŷ va'e-pe. Ne remi'urā ererekō ramo, emboja'o ja'o ereme'ë hagwā ogwereko e'ŷ va'e-pe, he'i íxupe kwéry.

¹² Upéi gwī plata-py oporombopaga va'ety kwéry ave ou onhemongarai ukase-vy íxupe:

—Ha ore tipo, he'i, —mbava'e tipo orojapo-ta? he'i oporandu-vy.

¹³ Ha João Batista he'i:

—Ereporokobra ramo, ani erembopaga hepy eterei. Ani eremombyta ndejéupe peipe'ave va'ekwe, he'i oporombopaga va'ety kwéry-pe.

¹⁴ Upe rire soldado kwéry ave oporandu íxupe:

—Ha ore tipo, he'i, —mbava'e tipo orojapo-ta orogwerova hagwā ore rekoha? he'i oporandu-vy.

João he'i íxupe:

—Ani pene rembiapo vai avave-rehe. Ani pembohosa asy avave-pe peipe'a vai hagwā íxugwi iplata. Ani ave pende apu avave-rehe nde platarā ome'ë hagwā peẽ-my. Pene rembiapo repy-rehe ani katu erenhe'ë rei rei ereikovy. Pevy'a joty, he'i onhemonhe'ë-vy soldado kwéry-pe oipe'a uka hagwā ha'e gwekoha vaikwe. —Pende rekoha porā katu, he'i íxupe kwéry.

¹⁵ Upeixagwa onhemonhe'ë ramo, kente kwéry onhemongeta opy'apy-py:

—Hi'are-ma nhaha'arō Nhandejáry rembiporavo tee va'e ou hagwā. Ogwahē vyteri para'e, nogwahē-ma para'e. João nipo ra'e Nhandejáry rembiporavo tee voi ra'e? Ha'e Cristo voi nipo ra'e, he'i rei João-rehe hikwái.

¹⁶ Ha João Batista he'i enterovéa-pe:

—Xe katu oromongarai y-py. Ou-ta peteī va'e xe rapykwerigwa ipu'akave va'e xéhegwí. Amboete eterei-gwi íxupe, atī amba'apo hagwā íxupe. Ha'e niko nane mongarai mo'ai xe oromongaraiha-rami. Ha'e niko ombou-ta nde-vy Nhe'ë Marangatu tee va'e omohynyhē hagwā nde py'a erehupity hagwā nde rekoha porārā. Temimombokwe jahapyha-rami ave ombou va'erā tata nde reko tujakwe pe'a-vy ndéhegwí, he'i Hesu rekora mombe'u-vy João Batista.

He'i ave:

¹⁷ —Trigo rehewa nhe'ë-rami aiporu-ta ereikwaa porāve hagwā Nhandejáry ogwahēha rehewa nhe'ë, he'i. —Jaapiro trigo-gwi ipire. Ha'ŷigwe katu hyru-py nhanhongatu imoī-vy ha ipirekwe katu nhamboaty jahapy hagwā. Upeixagwa pire oipiro va'e-rami nhande rerekō arā. Ha'e nhande rekokaahaa. Hese ojerovia va'ekwe hendive opyta va'erā. Hese ojerovia e'ŷ va'ekwe trigo pirekwe-rami omboaty-ta tata-py. Tata opave'ŷ-my voi oiko-ta ohasa asy meme hagwā.

¹⁸ Upéixa voi onhemonhe'ë kente kwéry-pe. Nhandejáry Hesu rehewa nhe'ë porā omombe'u mbe'u voi oiko-vy.

¹⁹ Hembiaapo vai-rehe onhemonhe'ë voi íxupe kwéry João Batista. Upéixa-gwi mburuvixagwasu Herodes-pe ave onhemonhe'ë.

—Ne rembiapo vai nde ryvy-rehe, he'i íxupe. —Hembirekokwe ereipe'a araka'e íxugwi eremenda hagwā hese. Naiporāi voi ererekō Herodias nde rovajare-pe. Ne rembiapo vai meme-ma nde. Nde rekoha vai voi, he'i mburuvixagwasu Herodes-pe.

²⁰ Upéa-rehe ojapo vai eteve jevy Herodes. Oipokwa uka João Batista-pe oapresa hagwā imoī-vy.

*Omongarai João Batista Hesu-pe
(Mt 3.13-17; Mc 1.9-11)*

²¹⁻²² Ne'írā oiko preso ramo João Batista omongarai heta kente kwéry-pe. Ha upe rire, omongarai ave Hesu-pe. Hesu onhemongarai jave omondo onhe'ẽ Nhandejáry-pe oiko-vy. Ha upe jave yváy-gwi ogwejy Nhe'ẽ Marangatu tee va'e ou-vy. Pykasu-rami ojehexa uka ogwejy-vy Hesu-rehe. Ha upe jave ohendu ave yváy-gwi onhe'ẽ va'e:

—Nde xe ra'y tee va'e, xe rembihayhu tee voi nde, he'i Hesu-pe. —Nde xe mbovy'a voi ereiko-vy, he'i Hesu-pe.

*Hesuypykwe
(Mt 1.1-17)*

²³ Ogwereko-ma ramo trinta ro'y, Hesu onhepyrū-ma oporombo'e mbo'e-vy. “José ra'y tee voi” he'i rei va'e hese heta oĩ. Tuvanga mate José. Ha José ratyu Eli.

²⁴ Upéi myamyrī nhamoigwasu kwéry ko va'e: Eli Matā ra'y. Matā Levi ra'y. Levi Melqui ra'y. Melqui Janai ra'y. Janai José ra'y.

²⁵ José Matatias ra'y. Matatias Amós ra'y. Amós Naum ra'y. Naum Esli ra'y. Esli Nagaí ra'y.

²⁶ Nagaí Máate ra'y. Máate Matatias ra'y. Matatias Semei ra'y. Semei José ra'y. José Jodá ra'y.

²⁷ Jodá Joanā ra'y. Joanā Resá ra'y. Resá Zorobabel ra'y. Zorobabel Salatiel ra'y. Salatiel Neri ra'y.

²⁸ Neri Melqui ra'y. Melqui Adi ra'y. Adi Cosā ra'y. Cosā Elmadā ra'y. Elmadā Er ra'y.

²⁹ Er Josué ra'y. Josué Eliézer ra'y. Eliézer Jorim ra'y. Jorim Matā ra'y. Matā Levi ra'y.

³⁰ Levi Simeão ra'y. Simeão Judá ra'y. Judá José ra'y. José Jonā ra'y. Jonā Eliaquim ra'y.

³¹ Eliaquim Meleá ra'y. Meleá Mená ra'y. Mená Matatá ra'y. Matatá Natā ra'y. Natā Davi ra'y.

³² Davi Jessé ra'y. Jessé Obede ra'y. Obede Boaz ra'y. Boaz Salá ra'y. Salá Naassom ra'y.

³³ Naassom Aminadabe ra'y. Aminadabe Admim ra'y. Admim Arni ra'y. Arni Esrom ra'y. Esrom Farés ra'y. Farés Judá ra'y.

³⁴ Judá Jacó ra'y. Jacó Isaque ra'y. Isaque Abraão ra'y. Abraão Terá ra'y. Terá Nacor ra'y.

³⁵ Nacor Serugue ra'y. Serugue Ragaú ra'y. Ragaú Fáleque ra'y. Fáleque Éber ra'y. Éber Salá ra'y.

³⁶ Salá Cainā ra'y. Cainā Arfaxade ra'y. Arfaxade Sem ra'y. Sem Noé ra'y. Noé Lameque ra'y.

³⁷ Lameque Metusalém ra'y. Metusalém Enoque ra'y. Enoque Jarete ra'y. Jarete Maleleel ra'y. Maleleel Cainā ra'y.

³⁸ Cainā Enos ra'y. Enos Sete ra'y. Sete Adão ra'y. Adão Nhandejáry ra'y.

4

*Anhaygwasu ombojejavy ukase mo'ã Hesu-pe
(Mt 4.1-11; Mc 1.12-13; Hb 2.18; 4.15)*

¹ Hesu py'a omohynyhëmba Nhe'ẽ Marangatu tee va'e. Upe rire ombou íxupe jevy ysyry Jordão-gwi, ogweraha íxupe tekwaty e'ŷ-my.

² Quarenta áry optya upe-py anháy ruvixa ombojejavy uka mo'ã Hesu-pe. Ha mba'eve ndo'úi upe-py. Upéi ivare'a voi Hesu.

³ Upe-ma ramo anhaygwasu he'i íxupe:

—Nde Tupã Nhandejáry ra'y tee ramo, kóa erejapo kwaa arã. Ita-gwi erejapo va'erã mbojape, he'i anhaygwasu Hesu-pe ombojejavy hagwã mo'ã íxupe.

⁴ Hesu katu he'i íxupe inhe'ẽ ojoko-vy:

—Nhandejáry ohai uka va'ekwe onhe'ẽ marangatu he'i uka nhande-vy:
“Ndaha'ei tembi'u-rehe anho oikove kente kwéry, he'i Nhandejáry onhe'ẽ-
py”*

he'i Hesu anhaygwasu-pe ojoko-vy.

⁵⁻⁷ Upéi anhaygwasu ogweraha Hesu-pe ijvate va'e ári. Cerro apyte-py oiko ramo ombojejavyse-gwi he'i Hesu-pe:

—Tetã tetã erehexa pa? Entéro tetã yvy arigwa oĩ va'e gwive erehexa pa?
Upe oĩ va'e gwive xe mba'e meme voi, he'i íxupe. —Upe oĩ va'e gwive xe-vy onheme'ẽmba va'ekwe. Ame'ẽse va'e-pe ame'ẽ jevy va'erã. Erenhesũ ramo xe-vy, xe momba'egwasu ramo, ame'ẽ va'erã nde-vy, he'i. —Apomomburuvixa va'erã enterove ne mboete hagwã, he'i ombojejavyse-vy mo'ã Hesu-pe.

⁸ Ha Hesu katu he'i íxupe inhe'ẽ ojoko-vy:

—Nhandejáry ohai uka va'ekwe onhe'ẽ, he'i uka nhande-vy:

“Tupã Nhandejáry-pe mante erenhesũ va'erã. Ha'e ae eremboete tee va'erã”*
he'i nhande-vy Nhandejáry nhe'ẽ, he'i Hesu anhaygwasu-pe inhe'ẽ ojoko-vy.

⁹ Upe rire anhaygwasu ogweraha jevy íxupe Jerusalém tetã-my. Nhandejáry róga kakwaa apy-rehe omoĩ íxupe. Ombojejavy ukase mo'ã-gwi Hesu-pe he'i:

—Nde Tupã Nhandejáry ra'y tee ramo, a-gwi erejeity va'erã yvy-py, he'i íxupe otantea-vy.

¹⁰ He'i ave —Tupã Nhandejáry nhe'ẽ ohai uka va'ekwe-py he'i:

“Tupã Nhandejáry he'i va'erã gwembigwái yváy pygwa kwéry-pe on-hangareko hagwã nde-rehe pono mba'e vai ojehu nde-vy, pono erevyapi.

¹¹ Ipo-py nde reraha va'erã pono ererokwa nde py ita-rehe”*
he'i anhaygwasu Hesu-pe.

¹² Upéi Hesu he'i:

—Nhandejáry nhe'ẽ-py he'i ave:

“Ani katu eretantea tei Tupã Nhandejáry-pe hemimbota e'ŷ erejapo-vy”*
he'i íxupe Hesu.

¹³ Upéi anhaygwasu ndojohuvéi ombojejavy uka hagwã mo'ã. Upe rire anhaygwasu oho sapy'a jevy íxugwi.

*Hesu omombe'u Nhandejáry nhe'ẽ Galiléia yvy pygwa kwéry-pe
(Mt 4.12-17; Mc 1.14-15)*

¹⁴ Aipo ramo Hesu ou jevy Galiléia yvy-py. Nhandejáry Nhe'ẽ Marangatu tee va'e mbaraete reheve ogwahẽ jevy ou-vy Galiléia yvy-py. Ha enterove herakwã porã ohendu.

* 4:4 Dt 8.3 * 4:8 Dt 6.13 * 4:11 Sl 91.11-12 * 4:12 Dt 6.16

¹⁵ Ha Hesu oho omombe'u mbe'u ojeporahéi haty-rupi. Ha henduháry kwéry omomba'egwasu íxupe.

*Nazaré tetā mygwa-pe Hesu onhemombe'u
(Mt 13.53-58; Mc 6.1-6)*

¹⁶ Hesu ogwahē jevy okakwaa hagwe-py. Nazaré tetā-my ogwahē jevy ouvy. Ha oiko meme hagwe-rami joty oiko upe-py. Pytu'aha áry-py oho oike ojeporahéi haty-py. Opu'ã onhembo'y omonhe'ẽ hagwā Nhandejáry kватia nhe'ẽ.

¹⁷ Upéi ome'ẽ íxupe hemimonhe'ẽrā Nhandejáry nhe'ẽ-py omombe'u va'ety héry va'e Isaías ohai va'ekwe. Oipe'a pe'a ojohu ramo peteĩ nhe'ẽ katu omonhe'ẽ-ma. Omonhe'ẽ ohendu hagwā ojogweroaty va'e:

¹⁸ —“Tupā Nhandejáry Nhe'ẽ Marangatu tee va'e oĩ xe py'apy-py. Amombe'u hagwā iporiahu va'e kwéry-pe inhe'ẽ marangatu xe poravo-ma. Preso oiko va'e kwéry-pe ha'e hagwā, Preso ereiko ha-gwi ne mosě-tama, ha'e hagwā íxupe kwéry xe mbou. Hesapyo e'ỹ va'e-pe ambohesapyo hagwā xe mbou. Anohē hagwā aresende-vy gwī ojererekō asy va'e-pe xe mbou.

¹⁹ Enterovéa-pe ha'e hagwā, Ndahi'are ete mo'ãi Nhandejáry oresende hagwā gwa'ýry tee kwéry-pe, gwajýry tee kwéry-pe ave, ha'e hagwā amombe'u-vy xe mbou”*

he'i omonhe'ẽ-vy kватia nhe'ẽ Hesu.

²⁰ Upéi omboty kватia. Ome'ẽ jevy herekwa-pe. Upe rire ha'e ogwapy. Ha entéro upe-py ojogweroaty va'e oma'ẽ hese. Ohexa katu katu íxupe.

²¹ Upéi Hesu he'i íxupe kwéry onhemombe'u-vy:

—Xe rehewa ohai va'ekwe omotenonde-vy, ãy oiko-ma. Amonhe'ẽ kuri kватia-py Nhandejáry nhe'ẽ. Xe rehewa voi nhe'ẽ pehendu-ma kuri, he'i onhemombe'u-vy.

²² Ha enterove ohendu va'e ojohu porā Hesu-rehe. Onhomongeta porā Hesu-rehe:

—Iporā voi omonhe'ẽ va'e kuri, he'i. —Imarangatu voi inhe'ẽ hemimombe'u, he'i opondera-vy hese. —José ra'y ae nipo ra'e ko va'e, he'i ave opondera-vy ndojeroviaséi-gwi hese.

²³ Upéi Hesu he'i ave íxupe kwéry:

—Pejese mo'ã xe-rehe, “Xe ndaroviái voi. Ndajerovia mo'ãi hese” peje mo'ã xe-rehe. “Ne rerakwā orohendu va'ekwe Cafarnaum tetā mygwa-gwi ogwahē va'ekwe ko'a-py. A-py ave ne mongakwaa hagwe-py ejapo hexapyrā-rupi ave ore remiexagwā-rupi ejapo ave” peje mo'ã kuri xe-vy xe-rehe nderejeroviaséi-gwi, he'i íxupe kwéry.

²⁴ —Anhetegwa ha'e-ta peẽ-my, he'i. —Nhandejáry nhe'ẽ-py omombe'u va'ety gwetā mygwa-pe nohenduséi voi, he'i Hesu ojerovia e'ÿha-rehe onhemonhe'ẽ-vy íxupe kwéry.

²⁵⁻²⁶ —Napene mandu'a porāi ra'e myamyrī nhande re'ýi hekoha kwéry-rehe. Nhande judeu kwéry Nhandejáry re'ýi tee jepe, myamyrī kwéry ndojeroviái-gwi hese Nhandejáry ndovy'ái joty. Upéa ereikwaa porā hagwā judeu e'ỹ va'e-pe ójehe ojerovia va'e-pe ohexakwaa porā va'ekwe Nhandejáry, he'i. —Israel remiarirõre judeu kwéry ndojeroviái va'ekwe ójehe jave, Elias amyrī-pe omondo va'ekwe oipytygwō hagwā judeu e'ỹ va'e-pe. Nhandejáry nhe'ẽ-rupi oho. Sidom yvy-py, Sarepta tetā-my omogwahē. Judeu e'ỹ va'e-pe jepe Nhandejáry omogwahē joty. Peteĩ tembirekokwe-pe mate oipytygwō. Ha ndaha'ei Israel remiarirõre-pe. Ha'e kwéry katu upe jave ivare'apa rei

* ^{4:19} Is 61.1-2

va'ekwe okwa-vy, hi'are eterei ndokyvéi-gwi. Mbohapy ro'y-rupi, ha seis jasy-rupi ave ndokyvéiry. Hi'upy ndoikovéi. Ha ivare'apa okwa-vy. Nahembi'uvéi. Ha judeu e'ŷ va'e-pe ójehe ojerovia va'e-pe mate oipytygwô uka Nhandejáry, he'i.*

²⁷ Upéi he'i jevy:

—Nhandejáry nhe'e-py omombe'u va'ety Eliseu amyrî oiko jave oime ave heta mba'asy vai-gwi ijai aipa va'e Israel tetâ mygwa judeu kwéry. Ha ha'e kwéry-pe nomopotíry, nombogwerái íxupe kwéry. Peteñ Israel e'ŷ va'e-pe mate ójehe ojerovia-gwi ombogwera joty. Síria gwigwa va'e-pe ombogwera. Héry va'e Naamã, he'i Hesu onhemonhe'ẽ-vy ojeporahéi haty-py oime va'e kwéry-pe.*

²⁸ Upéi inhe'ẽ renduha ipoxy voi Hesu-rehe “Onhemonhe'ẽ rei nhande-vy Hesu” he'i mo'ã Hesu-rehe hikwái.

²⁹ Ipoxy eterei-gwi opu'ã onhembo'ypa hikwái ogwenohé hagwã Hesu-pe gwtâ-gwi. Hesu rupive ojeupi oje'óí-vy oity hagwã mo'ã Hesu-pe yvyaty aty apyte-gwi. Upe tetâ oime yvyaty aty yke-rehe. Yvateve teve hupive oje'óí oity hagwã mo'ã yvyaty apyte-gwi ojuka hagwã mo'ã.

³⁰ Ha Hesu katu ohasa rei jepe ipa'ũ-rupi oho-vy. Ohose ha-py oho joty.

*Hesu omosê imondo-vy anháy-pe
(Mc 1.21-28)*

³¹ Hesu ogwejy ou-vy Galiléia yvy-py. Cafarnaum tetâ-my ogwahé ou-vy. Pytu'uga áry-py omombe'u upe pygwa kwéry-pe.

³² Ha onhemonhe'ẽ ramo ohendu va'e kwéry opondera hese hikwái.

—Onhemonhe'ẽ porã tee nipo ra'e Hesu, he'i hese ojóupe hikwái. —Onhe'ẽ voi omombe'u, he'i. —Oikwaa arandu tee omombe'u hagwã, he'i opondera eterei-vy hese hikwái.

³³ Ha upe-py, ojeporahéi haty-py, oĩ ave anháy ojepota va'e. Anháy réry-rupi ae osapukái he'i mo'ã Hesu-rehe:

³⁴ —Nde, Hesu Nazaré pygwa, ma'erã-gwi eregwahé? Nde katu Tupã Nhandejáry ra'y tee. Ne marangatu voi ko nde. Ore hundi hagwã ereju para'e? he'i Hesu-pe anháy.

³⁵ Hesu ae oja'o-ma íxupe. Omokirirî uka íxupe:

—Ekirirî katu, he'i íxupe. —Esẽ katu kwimba'e-gwi, he'i íxupe omosê-vy.

Upéi anháy oity upe kwimba'e-pe yvy-py. Ojogweroaty va'e pa'ũ-my oity rire osê-ma íxugwi. Mba'eve jepe ndojapóiry kwimba'e-rehe.

³⁶ Ha upe pygwa oĩ va'e kwéry opondera Hesu-rehe.

—Mba'eixagwa ko nhe'ẽ? he'i oporandu-vy ojóupe. —Hesu ipu'akave para'e anháy-rehe, he'i. —Ha'e onhe'ẽ-py rei omosê anháy kwéry imondo-vy, he'i ojóupe hikwái Hesu-rehe opondera-vy.

³⁷ Upeíxa-gwi Hesu réry opa-rupi oho. Upe yvy jerekwe-rupi oikwaapa-ma Hesu rehegwa nhe'ẽ herakwã porã eteha.

*Hesu ombogwera Simão raixo-pe
(Mt 8.14-15; Mc 1.29-31)*

³⁸ Osê-ma ramo ojeporahéi haty-gwi oho oike Simão róga-py. Ha Simão raixo katu hasy voi oĩ-vy upe-py. Heteraku eterei. Upéa-rehe ojerure hikwái Hesu-pe ombogwera hagwã íxupe.

³⁹ Upéi Hesu oho hasy va'e renda-py. He'i:

—Epoi íxugwi, he'i mba'asy-pe.

* **4:25-26** 1 Rs 17.1,8-16 * **4:27** 2 Rs 5.1-14

Oipe'a heterakukwe íxugwi. Omoro'ysã hete inhe'ẽ-rupi. Okwera-magwi Simão raixo oho omomimói imbohupa remi'urã kwéry.

Hesu ombogwera heta hasy va'e-pe

(Mt 8.16-17; Mc 1.32-34)

⁴⁰ Oike-ma kwarahy. Oupa Hesu renda-py. Ogweru íxupe hasy va'e kwéry. Opaixagwa mba'asy oiporu va'e ogweru henda-py. Ha Hesu ombogwerapa íxupe kwéry. Peteĩ teĩ-rehe omoĩ opo ombogwera hagwã íxupe kwéry.

⁴¹ Heta anháy omosẽ ave íxugwi kwéry. Osẽ-vy osapukái imombe'u-vy.

—Nde Hesu Nhandejáry ra'y tee nde, he'i. Oikwaa voi Hesu-pe. —Nde Cristo voi. Nhandejáry rembiporavo tee va'e voi nde, he'i anháy Hesu-pe.

Upéi omokiririmbá íxupe kwéry.

—Ekirirí katu. Ani xe mombe'u avave-pe, he'i jevy íxupe Hesu. Omokiririmbá íxupe kwéry. Ndohejái onhe'ẽ anháy. Omokirirí íxupe.

Hesu onhemonhe'ẽ Judéia pygwa kwéry-pe

(Mc 1.35-39)

⁴² Ko'ẽmba-ma ramo osẽ oho Hesu anho tekoha e'ŷ-my. Ha heta eta ou hapykwéri oheka heka íxupe. Otopa-ma ramo, he'i Hesu-pe:

—Ani ereho teĩ. Epyta katu ko'a-py. Ani ore reja rei ereho-vy, he'i Hesu-pe.

⁴³ Upéi Hesu he'i:

—Tekotevẽ aha tetã ambue mbue-rupi. Gwĩa-rupi ave taha tamombe'u Nhandejáry nhande ruvixarã rehegwa nhe'ẽ porã, he'i. —Upe va'e ajapo hagwã xe mbou Nhandejáry ko yvy-py, he'i.

⁴⁴ Upe rire oho Hesu opa-rupi. Galiléia yvy jerekwe-rupi oho. Ojeporahéi haty-haty-rupi ogwahẽ omombe'u hagwã nhe'ẽ oiko-vy.

5

Pira mbo'a haty-py heta ombo'a pira

(Mt 4.18-22; Mc 1.16-20)

¹ —Ha upéi katu onhemonhe'ẽ jevy-ma Hesu yugwarusu rembe'y-py. Genesaré yugwarusu héry. Ha heta eterei ijatypa henda-py ohendu henu Nhandejáry nhe'ẽ hemimombe'u.

² Upe jave Hesu ohexa mokõi kanoagwasu. Y rembe-rehe oĩ kanóa. Pira jopoihaty osẽsẽ kuri ra'e hikwái. Okyha pira mbo'a haty kwéry ojohéi-vy osẽsẽ ijáry.

³ Upéi oike Hesu kanóa-py. Simão mba'e voi kanóa. Aipo ramo Hesu he'i Simão-pe:

—Jaha mixĩ y rembe'y-gwi enterove ohendu porã hagwã xe nhe'ẽ. He'i-vy ogwapy-ma kanóa-py.

Ogwapy jave onhemonhe'ẽ nhe'ẽ ojogweroaty va'e-pe. Ojeapysaka Hesu remimombe'u-rehe ohendu hagwã yvy-gwi.

⁴ Opa-ma, onhemonhe'ẽ rire he'i Simão-pe:

—Jaha hypyve ha-py ereity hagwã nde kyha heta pira ereipyhy hagwã, he'i íxupe.

⁵ Ha Simão katu he'i:

—Oromba'apo kuri, mbo'eháry. Pyhare puku jave oromba'apo ha mba'eve norogwenohẽi. Ne nhe'ẽ-py ae oroity jevy-ta ore kyha kwéry.

⁶ He'i-vy ombogwejy jevy hikwái ombo'a hagwã pira. Hesu nhe'ẽ-py oity jevy okyha opira jopói-vy. Upe rire heta pira oipyhy. Haimete omondoro kyha. Pira ipohýi eterei-gwi.

⁷ Upe-ma ramo ohenói opptygwōharā inhirū kanóá ambue pygwa kwéry. Upéi ou hikwái omohynyhē kanoagwasu kwéry-py pira. Pira ipohýi eterei-gwi haimeete-ma onheapymí kanóá mokōive va'e.

⁸ Pira heta eterei-ma ramo onhesú Hesu renonde-py Simão Pedro Hesu omboete-vy. He'i íxupe:

—Xe Járy, ejei katu xéhegwi. Xe py'a ky'a eterei aiko hagwā ne ndive, atí eterei aiko hagwā ne ndive, he'i Simão opondera ndera Hesu-rehe.

⁹ Heta eterei pira-gwi opondera hese. Inhirū gwéry ave opondera ndera Hesu-rehe.

¹⁰ Tiago, João ave opondera ave. Simão ndive ojopói meme upe mokōi Zebedeu ra'y. Onhemongeta opy'apy-py Hesu-rehe oiko-vy hikwái. “Mba'éixa po oikwaa Hesu pira-rehe?” he'i opondera-vy. Ha Hesu he'i Simão-pe:

—Ani eretí teí xéhegwi, he'i. —Ãy erenhypyru-ta Nhandejáry nhe'ẽ eremombe'u-vy. Ne nhe'ẽ rendu ramo, heta kente kwéry xe moirū va'erā.

—Iporā, he'i Hesu-pe.

¹¹ Upéi ogweru jevy okanóá kwéry y rembe-py omoñ. Ha oheja okanóá oho Hesu omoirū hagwā.*

Mba'asy vai oiporu va'e-pe Hesu ombogwera (Mt 8.1-4; Mc 1.40-45)

¹² Hesu oime jave tetã-my ogwahē hasy vai va'e. Mba'asy vai oipirem-boaipa íxupe. Ohexa-ma ramo Hesu-pe, onhesú henonde-py. Ovapy-py ho'a oĩ-vy omboete-vy Hesu-pe. Ojerure rure íxupe:

—Xe Járy, nde porombogwerahaty voi nde. Nde ae xe rexakwaa ramo xe mbogwera hagwā, he'i Hesu-pe.

¹³ Hesu katu oipysa-ma opo hese:

—Xe katu orohexakwaa voi, he'i omoñ opo hese-vy ombogwera hagwā íxupe. —Tane mopotí katu ko mba'asy vai-gwi, he'i íxupe ombogwera hagwā.

Onhe'ẽ jave íxupe okwera-ma. Hesu opoko hese va'e ijai va'ekwe okwerapa-ma.

¹⁴ Upéi he'i jevy íxupe:

—Aníke eremombe'u avave-pe, he'i. —Tereho mani ehexa uka pa'i-pe erekweramaha, he'i. —Eme'ẽ íxupe upe myamyrí Moisés he'i va'ekwe ereme'ẽ hagwā erenhemopotí jevy hagwā. Upéixa oikwaa-ta enterove erek-weramaha, he'i omondo-vy íxupe.

¹⁵ Ha opa-rupi omosarambi Hesu rerakwā. Upéa-gwi hetave tave ojog-weroaty henda-py ohendu hagwā inhe'ẽ onhembogwera uka hagwā ave entéro imba'asy-gwi.

¹⁶ Hesu oho joty tekwat y e'ŷ-my Nhandejáry-pe ombojeupi-vy onhe'ẽ.

Hajy jeapa va'e-pe Hesu ombogwera (Mt 9.1-8; Mc 2.1-12)

¹⁷ Upéi Hesu omombe'u jevy Nhandejáry rehewa nhe'ẽ porā. Óga py-py ogwapy va'e kwéry ohendu. Oĩ upe-py fariseu va'e kwéry. Oĩ Moisés amyrí rembihai va'ekwe omombe'u va'e kwéry. Opa rupi-gwi ha'e kwéry ou. Galiléia yvy jerekwe-rehe tetã'i tã'i-rupi oĩ va'e gwive ou, Judéia yvy jerekwe-rehe tetã'i tã'i-rupi oĩ va'e gwive ou ave. Jerusalém tetãgwasu-gwi ou ave. Ha Nhandejáry ombopu'aka Hesu ombogwera gwera hagwā hasy va'e kwéry-pe.

¹⁸ Upe jave gwī kwimba'e kwéry ogweru hajy jeapa va'e. Hupa rehewe ogweru Hesu renda-py. Ha ndaikatúi oike. Mba'éixa oike arã óga-py.

* ^{5:11} Jo 21.1-14

19 Heta eterei ojogweroaty-gwi ndikatúi ogwerohasa hasy va'e-pe okẽ-rupi. Upéa-gwi ojeupi oipe'a óga arigwa. Ombokwa Hesu ári. Ikwa-rupi ombogwejy hajy jeapa va'e. Hupa reheve ombogwejy gwejy íxupe. Ojogweroaty va'e pa'ũ-my, Hesu renonde-py omoñ hasy va'e ombogwejy-vy.

20 Ohexa-ma íxupe kwéry Hesu. Oikwaa-ma ojerovia etemaha ójehe.

Upéa-gwi he'i hajy jeapa va'e-pe:

—Amboyke-ma ne rembiapo vaikwe ndéhegwi, he'i íxupe Hesu.

21 Ha judeu rekombo'ehaty kwéry, fariseu kwéry ave upe-py oĩ va'e onhepy'amongoeta-vy ogwapy okwa-vy. “Onhe'ẽ vai rei nipo ra'e upe va'e. Onhemonhandejáry rei ra'e” he'i mo'ã hikwái Hesu-rehe. “Tupã Nhandejáry ha'e anho mante omboyke va'e nhandéhegwi nhane rembiapo vaikwe. Ha'eixagwa ndaipóri voi. Ndaipóri ambue omboyke va'erã nhane rembiapo vaikwe” he'i. “Ma'erã, Amboyke-ma ne rembiapo vaikwe ndéhegwi, he'i kuri Hesu. Onhemonhandejáryse mo'ã” he'i rei hikwái Hesu-rehe.

22 Upéi Hesu he'i íxupe kwéry:

—Ma'erã-gwi aipo-rami ere nde py'apy-py xe-rehe? he'i íxupe.

23 —Mbava'e pa hasyve jajapo hagwã nhambogwera íxupe para'e, nhamboyke hembiapo vaikwe íxugwi para'e? he'i.

24 —Nhambogwera ramo pya'e enterove oikwaa arã. Ha nhamboykepa ramo hembiapo vaikwe íxugwi ndajahexáiry. Ajehexa uka-ta nde-vy xe ko ipu'aka tee va'e voi. Xe ko Nhande Ryke'y tee va'e amboyke kwaa voíte hembiapo vaikwe aporombogwera kwaa ave, he'i. —Xe nhe'ẽ-py joty amboyke vvy arigwa rembiapo vaikwe. Upéa peikwaa hagwã anhe'ẽ-ta hajy jeapa va'e-pe ambogwera hagwã íxupe, he'i Hesu.

Upéi katu he'i hajy jeapa va'e-pe:

—Epu'ã katu. Tereho nde róga-py. Eraha nde rupa ave, he'i.

25 Aipo ramo inhe'ẽ-py opu'ã oho-vy. Enterove rovagwy-rupi opu'ã ohupima gwupagwe heraha-vy. Gwóga-py oho jave omomba'egwasu-ma Tupã Nhandejáry-pe.

26 Upéa-gwi enterove opondera eterei Hesu-rehe hikwái. Onhemondýi okwa-vy. Otímba ete-ma hikwái.

—Nhandejáry pu'aka-rupi nipo ombogwera ra'e, he'i. —Ipu'aka tee va'e jepe imandu'a porã nhande-rehe Nhandejáry, he'i omomba'egwasu-ma Nhandejáry-pe hikwái. —Ay hembiapo porã hexapyrã-ma nipo ra'e jahexama. Ohexa uka-ma nhande-vy heroviapyrã, he'i opondera-vy hese hikwái.

Levi-pe Hesu ohenói

(Mt 9.9-13; Mc 2.13-17)

27 Upe rire-ma osẽ oho-vy. Ohexa plata-py governo pegwarã nhane mbopaga uka va'ety-pe. Héry va'e Levi. Ohexa íxupe ogwapy oĩ-vy nhane mbopaga haty-py. He'i íxupe:

—Eju, xe moirũ, he'i íxupe.

28 Ha upéi katu opu'ã, ohejapa omoirũ hagwã íxupe.

29 Upe rire Levi omongaru heta inhirũ gwéry-pe. Hesu ndive okaru hagwã ohenói íxupe kwéry. Oĩ upe-py heta nhane mbopaga va'ety. Levi remienói kwéry pa'ũ-my oime hikwái. Ogwapy oĩ-vy okaru va'e renda-py. Hesu ndive okaru ave hikwái.

30 Ha gwĩ fariseu kwéry judeu rekombo'ehaty kwéry gwive hemimbo'e kwéry-pe onhe'ẽ rei rei:

—Ma'erã-gwi pekaru gwĩ nhane mbopaga va'ety ndive, hekoha vai va'e ndive ave? he'i oporandu-vy íxupe kwéry.

31 Hesu katu onhemonhe'ẽ oporandu va'e-pe:

—Nhane resāi ramo nanhaikotevēi nhane mbogwerahaty-rehe. Nhande rasy ramo ae nhaikotevē-ma va'erā hese.

³² Upéixa voi ave hembiapo vai va'e oikotevē-ma va'erā xe-rehe ave, he'i. —Aju ahenói íxupe ogwerova-ma hagwā gwekoha. “Xe rekoha porā” he'i onhemboete-vy va'e-pe ndajúi ahenói-vy, he'i Hesu onhemonhe'ē-vy íxupe kwéry.

*Okaru e'ŷ reheve va'e rehewa nhe'ē
(Mt 9.14-17; Mc 2.18-22)*

³³ Upéixa-gwi he'i Hesu-pe:

—João remimbo'e kwéry, fariseu remimbo'e kwéry ave heta gwembi'u ogwerekō jepe, ohasa meme okaru e'ŷ reheve ombojeupi-vy onhe'ē Nhandejáry-pe. Ne remimbo'e kwéry ae okaru joto hoy'u joto ave oiko-vy. Ma'erā tipo upéixa ojapo? Ma'erā tipo ndohasáiry okaru e'ŷ reheve ne remimbo'e kwéry? he'i ojohu vaise mo'ā Hesu-pe.

³⁴⁻³⁵ Upéi Hesu oiporu omenda va'e rehewa-rami nhe'ē omombe'u hagwā íxupe kwéry.

—Ojogweroaty omenda va'erā-rehe. Upéi omenda rire oukwe-vy okaru hikwái. Avave nde'íry arā hendive oĩ va'e-pe ohasa hagwā okaru e'ŷ reheve. Ogewahē-ta joto hi'áry ojereraha va'erā íxugwi upe omenda va'ekwe kuri. Ojereraha rire ae, heta jepe ogwerekō gwemī'urā, ohasa joto va'erā okaru e'ŷ reheve oiko-vy, he'i Hesu arandu nhe'ē oiporu-vy ojéhegwā nhe'ē omombe'u hagwā.

³⁶ Ha upéi katu Hesu omombe'u jevy tekoha pyahurā rehewa nhe'ē. Ao nharemenda va'e rehewa nhe'ē-rami oiporu omombe'u-vy.

—Ao pyahu-gwi nanhaikytīry nharemenda hagwā ao tuja-pe. Upéixa nharemenda ramo, ojepoapy arā ra'e ipyahu va'e. Ndojehe'a porāi arā ra'e ituja va'e ndive, he'i Hesu arandu nhe'ē oiporu-vy.

³⁷ Upéi katu oiporu jevy arandu nhe'ē teko pyahu-rehe omombe'u jevy-vy. Uva rykwere ryru rehewa nhe'ē-rami oiporu.

—Nanhanhunhāiry uva rykwere pyahu va'e hyru tujakwe vakapi va'e-py. Nhanhunha ramo, ombovu omondoro arā ra'e gwyrū vakapi tujakwe. Osyrypa arā pe uva rykwere osoropa arā hyrukwe.

³⁸ Uva rykwere pyahu va'e nhanhunha hyru pyahu-py ave. Upéixa ramo mokōive hi'are porā.

³⁹ Ha'e-ta ave peē-my: Uva rykwere ituja va'e ho'u rire, ipyahu va'e ndo'uséiry avave. “He porā eterei ko va'e” he'i voi ituja-rehe hikwái, he'i Hesu arandu nhe'ē oiporu-vy omombe'u hagwā tekoha pyahu ndaha'éi tekoha tujakwe-rami.

6

*“Pytu'uga áry Járy voi ko xe” he'i Hesu
(Mt 12.1-8; Mc 2.23-28)*

¹ Ha upéi katu pytu'uga áry-py oho ogwata Hesu. Kokwe mbyte-rupi oho. Ha hemimbo'e kwéry oipo'o-ma trigo rope. Oipokyty opo-py ho'u hagwā inhapīgwe.

² Ha gwī fariseu kwéry he'i íxupe kwéry:

—Ma'erā tipo upéixa erejapo? Naiporāi voi jaipo'o trigo rope pytu'uga áry-py, he'i íxupe. —Tekotevē japytu'u opa nhane rembiapo-gwi, he'i ojohu vai-vy íxupe kwéry.

³ Upéa he'i-gwi Hesu he'i ojohu vai va'e kwéry-pe:

—Peē, pemonhe'ẽ rei ra'e Nhandejáry nhe'ẽ kwatia-rehe. Napene mandu'áiry nhane ramoigwasu Davi rehewa nhe'ẽ-rehe. Yma, nahembi'ú-gwi ivare'a eterei va'ekwe myamyrí Davi inhirū gwéry ndive.*

⁴ Upéa-gwi oike Nhandejáry-pe nhamboute haty-py. Koty-py oike rire, ho'u gwī mbojape Nhandejáry rovagwy-py pa'i remimoigwe. Upéa ndaikatúi ho'u avave. Nhandejáry ndohejái avave-pe ho'u rei upe mbojape. Pa'i kwéry rembi'u va'e ae upéa. Pa'i e'ŷ ramo jepe ho'u joty va'ekwe Davi. Ome'ẽ ave oirū gwéry-pe. Ha'e kwéry ho'u ave. Nhandejáry oheja rei íxupe kwéry.

⁵ Ha xe katu, xe Nhande Ryke'y tee va'e. Upéa-rupi pytu'uhá áry Járy voi ko xe, he'i íxupe kwéry Hesu onhemonhe'ẽ-vy.

*Ipo ypi va'e-pe ombogwera
(Mt 12.9-14; Mc 3.1-6)*

⁶ Ha upéi katu pytu'uhá áry jevy-ma ramo Hesu oike ojeporahéi haty-py. Omombe'u jave ohexa oĩ ave upe-py ipo ijakatúa ypi va'e.

⁷ Ha gwī judeu rekombo'ehaty kwéry, fariseu kwéry ave omangea ngea mo'ã Hesu-rehe omboja reise mo'ã Hesu-rehe nhe'ẽ. “Hembia-po-gwi opytu'u-ta para'e, ndopytu'ú mo'ãi para'e?” he'i ojéupe hikwái. “Ombogwera hagwā ombo'apo-ta para'e. Japytu'uhá áry-py naporai nhamba'apo. Ndaha'ei Nhandejáry remimbota” he'i rei ojéupe hikwái. Omboja rei Hesu-rehe nhe'ẽ. Upéixa-gwi Hesu-rehe oma'ẽ oha'arō-vy.

⁸ Hesu ae ipy'amongogetaha jepe oikwaa-ma. Upéa oikwaa jave he'i ipo ypi va'e-pe:

—Epu'ã katu. Eju enhembo'y ore mbyte-py, he'i íxupe.

Upéixa-gwi ha'e opu'ã ou-vy Hesu rovagwy-py.

⁹ Úpe-ma ramo Hesu oporandu upe pygwa kwéry-pe.

—Aporandu-ta peē-my pene arandurā-rehe, he'i íxupe kwéry. —Mbava'e tipo pejohu porāve jajapo hagwā pytu'uhá áry-py? Jajapo porā tipo? Jajapo vai tipo? he'i. —Peē-my iporā tipo nhaporombogwera pytu'uhá áry-py? Iporā tipo japorojuka para'e? Mbava'e pa pejohu porāve peē? he'i onhemonhe'ẽ-vy íxupe kwéry.

¹⁰ Upéi ojogweroaty va'e-rehe osareko ranhe. Upéi he'i ipo ypi va'e-pe:

—Eipysó katu nde po, he'i íxupe.

Oipysó-ma ramo opo. Pe ipo ypi va'ekwe okwera-ma.

¹¹ —Ombogwera-ma íxupe. Hembia-po-gwi ndopytu'úi Hesu, he'i rei ipoxy-vy hese hikwái. —Nhandejáry remimbota ndojapói ra'e. Mba'e tipo jajapo-ta hese? he'i oporandu randu-vy ojóupe hikwái.

Ha ojapo vaise mo'ã Hesu-rehe hikwái.

*Hesu oiporavo doze kwimba'e-pe onhe'ẽ mombe'uharā
(Mt 10.1-4; Mc 3.13-19)*

¹² Ha upéi katu Hesu ojeupi oho-vy yvyatyrusu-py. Oho ombojeupi hagwā onhe'ẽ Nhandejáry-pe upe-py. Pyhare-rupi omundo mondo Nhandejáry-pe onhe'ẽ.

¹³ Ko'ëmba-ma ramo ohenói gwemimbo'e kwéry-pe ogwahē hagwā henda-py. Upéi oiporavo doze kwimba'e-pe.

—Peē xe remimondorā kwéry voi, he'i upe doze gwembiporavo kwéry-pe.

¹⁴ Oiporavo Simão-pe. Ha ombohéry joa íxupe Pedro. Oiporavo Simão ryvy André-pe ave. Oiporavo Tiago-pe ave, João-pe ave, Filipe-pe ave, Bartolomeu-pe ave,

¹⁵ Mateus-pe ave, Tomé-pe ave, Alfeu ra'y Tiago-pe ave, Simão-pe ave. Ha'e gwī huvixa ramo oiko va'e-pe omosêse va'e kwéry irū va'ekwe.

* **6:3** 1 Sm 21.1-6

16 Hesu oiporavo ave Tiago ra'y Judas-pe ave, Judas Iscariotes-pe ave. Doze kwimba'e-pe oiporavo omombe'u porāve hagwā inhe'ēgwe. Ha Judas Iscariotes oiko va'erā Hesu pyhy ukaharā.

Hesu ombogwera heta hasy va'e-pe

(Mt 4.23-25)

17 Upe rire ogwejy jevy gwemimondo va'erā kwéry ndive. Ogwahē-ma ramo yvyatyrusu renonde-py opyta. Upe-py heta eta onhe'ē renduha kwéry-pe otopa jevy. Heta eta ojogweroaty va'e oī ave upe-py ou araka'e Judéia yvy jerekwe rehewa. Ou araka'e Jerusalém tetā mygwa ave. Ou ave araka'e mombyryvegwa. Ygwasu rembe'y rehewa Tiro tetā jerekwe rehewa, Sidom tetā jerekwe rehewa ou ojogweroaty upe-py.

18 Hesu nhe'ē rendu-vy ou. Onhembogwera uka hagwā ave mba'asy-gwi ou. Ha gwī anháy ombohasa asy va'e-pe ave Hesu ombogwerapa.

19 Ha enterove ojogweroaty aty va'e omoīse opo Hesu-rehe. Ipu'aka rehewe onhembogwera ukase eterei-gwi omoīse opo hese. Ha ombogwerapa joty enterovéa-pe.

Pende reko vy'a ete joty voi katu

(Mt 5.1-12)

20 Ha upéi katu Hesu ojerova-ma oma'ē gwemimbo'e kwéry-rehe ohekombo'e hagwā íxupe kwéry. He'i ranhe iporiahu va'e kwéry-pe:

—Peē, xe-rehe pepena-gwi pende poriahu va'e, pende reko vy'a ete joty peiko-vy. Nhandejáry pende ruvixa tee ndive gwarā voi peē. Upéa-gwi pevy'a katu.

21 —Peē pende vare'a va'e pende reko vy'a ete joty peiko-vy. Āy ae joty pende vare'a. Nhandejáry pene moangapyhy porā va'erā. Upéa-gwi pevy'a.

—Peē pejahe'o va'e pende reko vy'a ete joty peiko-vy. Āy ae pejahe'o. Pepuka va'erā. Upéa-gwi pevy'a.

22 —Peē ave, xe moirū-gwi pende rereko asy va'e, pende reko vy'a ete joty. Xe Nhande Ryke'y tee va'e. Oī ramo xéhegwí pende-rehe ndaija'éi va'e, pende joko ramo ave, onhe'ē rei rei ramo ave pende-rehe, pevy'a katu. Oī ramo nde-vy he'i va'e: "Nde Hesu-rehe erejerovia va'e ndorohexasevéi. Nahendusevéi ave nde réry. Ejei katu a-gwi" he'i ramo nde-vy, evy'a joty kuri eiko-vy.

23 Aipo-rami pende rereko ramo, pevy'a katu. Erovya joty katu nde-rehe hembiapo vai va'e. Pende rexakwaa-ta voi katu peē-my Nhandejáry yváy pygwa. Heta voi oī nde-vy gwarā yváy-py. Upéa-gwi evy'a katu. Yma va'ekwe myamyrī nhane ramoigwasu kwéry upéixa ave ogwereco asy va'ekwe Nhandejáry nhe'ē-py omombe'u va'ety kwéry-pe. Yma gware-pe pene renonderā-pe ogwereco asy hagwe-rami ave, āy pende rereko asy ave va'erā.

Pende reko vy'are'ŷ va'erā peiko-vy

24 Upe-ma ramo Hesu onhemonhe'ē imba'e reta-rehe ojerovia va'e kwéry-pe:

—Peē, pene mba'e reta reta va'e, pendejéupe gwarā-rehe mate pepena rei va'e, apomboasy eterei pee-my. Pende reko vy'are'ŷ va'erā. A-py mate pevy'a va'erā peiko-vy.

25 —Peē, mba'eve pene rekotevē pene rygwyatā jepe va'e, apomboasy eterei peē-my. Pende reko vy'are'ŷ va'erā. Ivare'a ete va'e-rami peiko va'erā.

—Peē, pepuka va'e, apomboasy eterei peē-my. Āy ae pepuka. Teko rei-rehe pevy'a. Pejahe'o va'erā penheapirō-vy.

26 —Peē, opavave pene mboete va'e, apomboasy eterei peē-my. Pende reko vy'are'ŷ va'erā. Upéixa ave yma gware nhane ramoigwasu amyrī kwéry

omboete rei va'ekwe Nhandejáry nhe'ẽ mombe'u a'ã a'ãha rei va'e kwéry-pe. Yma gware-pe pene renonderā-pe omboete rei hagwe-rami ave, ãy pene mboete rei ave. Apomboasy voi peẽ-my.

*Peiko porã, Nhandejáry-rami pene rembiapo porã va'erã
(Mt 5.38-48; Rm 12.14)*

²⁷ —Ha peẽ, xe renduha kwéry, peẽ-my ha'e tee-ta katu. Peiko porã katu. Ehayhu katu nde-rehe ija'e'ŷ va'e-pe. Ejapo porã katu nde rayhu e'ŷ va'e-pe.

²⁸ Ejerure Nhandejáry-pe ohovasa porã hagwã nde-rehe onhe'ẽ rei rei va'e-pe. Ha ne mbohasa asy va'e-rehe ejerure rure joty Nhandejáry-pe ohexakwaa porã hagwã íxupe oiporiahuvereko hagwã íxupe.

²⁹ Ha nde rova pete ramo, ejerova joty íxugwi eme'ẽ joty íxupe nde rova rovái nde rova pete jevy hagwã. Ha oipe'a ramo ndéhegwí nde kamisa, eheja joty togweraha nde ao jo'a reheve.

³⁰ Nde-vy ojerure va'e-pe eme'ẽ hemimbota. Ha ogweraha ramo ndéhegwí ne mba'e ani erejerureve teĩ joty ne mba'ekwe-rehe.

³¹ Peiko porã joty. Nde rerekoseha-rami eiko enterovéa-pe.

³² —Eiporiahuvereko katu enterovéa-pe. Nde rayhu va'e-pe anho erehayhu ramo, upe ne rembiapo porã-rehe “Hekoha porã voi” nde'i mo'ãiry nde-rehe Nhandejáry. Hekoha vai va'e ave ohayhu kwaawapixa-pe.

³³ Nde-vy ojapo porã va'e-pe mante ne rembiapo porã ramo, ani ere upéa-rehe, “Ko xe rembiapo porã-rehe Nhandejáry xe rexakwaa arã”. Hekoha vai va'e kwéry ave ojapo porã ave íxupe hembiapo porã va'e-pe. Nde reko-rami ave oiko hikwái.

³⁴ Ha oiporuse va'e-rehe ani ere, “Aiporu uka ramo ko va'e-pe ohekoviariõ porã va'erã xe-vy. Upéixa-gwi aiporu uka-ta íxupe” ani aipo ere teĩ. Aipo he'i ave hekoha vai va'e gwapixa kwéry-rehe. Upéixa ereiporu uka ramo jepe, naporãi arã.

³⁵ Ha'e-ta katu peẽ-my: Ehayhu katu nde-rehe ija'e'ŷ va'e kwéry-pe gwive. Ejapo porã meme katu. Ani ereha'arõ mba'eve-rehe ne rembiporu ukakwe-rehe ome'ẽ jevy va'erã. Ani ere teĩ, “Ndaiporu uka mo'ãi nde-vy xe mba'e”. Eiporu uka rei katu, he'i Hesu ohekombo'e-vy.

—Ko xe nhe'ẽ-rupi ereiko ramo, he'i, —pende rexakwaa va'erã voi peẽ-my Nhandejáry yváy pygwa, he'i. —Ha'e he'i arã ave nde-rehe “Xe ra'y, xe rajy” he'i arã ave nde-rehe Nhandejáry Tupágwasu. Oĩ heta hembiapo vai va'e. Oĩ ave heta Nhandejáry-pe nomboetéi va'e. “Iporã voi Nhandejáry” nde'íry. “Ome'ẽ-ma xe-vy xe remikotevẽ” nde'íry. Ha Nhandejáry katu ipy'a porã hese kwéry. Ome'ẽ me'ẽ íxupe kwéry hemikotevẽ. Nhandejáry, Nhande Ru yváy-py oĩ va'e nhande poriahuvereko meme va'e.

³⁶ Upéixa-gwi ha'e-ta peẽ-my: Peiporiahuvereko porã enterovéa-pe. Nhandejáry nhande Ru yváy-py oĩ va'e-rami pejoporiahuvereko porã katu.

*Ani erehekojohu rei nde rapixa-pe
(Mt 7.1-5; Rm 2.1-3; 14.1-4; 1 Co 4.5; Tg 4.11-12)*

³⁷ —Ani erehekojohu rei nde rapixa-pe. Ani erejohu vai nde rapixa rembiapo ani hagwã upéixa ave Nhandejáry ojohu vai nde-vy ne rembiapo. Ani ave ere mo'ã teĩ nde rapixa-pe: “Tane mbohasa asy ne rembiapo vaikwe-rehe” ani upéixa ave Nhandejáry he'i hagwã nde-rehe. Eiporiahuvereko katu nde-rehe hembiapo vai va'ekwe-pe. Upéixa nde rapixa-pe ereiporiahuvereko hagwe-rami nde poriahuvereko va'erã Nhandejáry ne rembiapo vaikwe-rehe.

³⁸ Eme'ẽ katu hemikotevẽ nde rapixa kwéry-pe. Hemikotevẽ ereme'ẽ porã ramo ne remime'ẽgwe rekovia hetave ome'ẽ va'erã nde-vy Nhandejáry. Erem-boyru ime'ẽ-vy mba'e ryru-py. Upe va'ekwe-gwi hetave ome'ẽ arã nde-vy. Omohynyhẽve va'erã nde-vy ime'ẽ-vy ne mba'e ryru. Ojapete peteve va'erã imoĩ-vy mba'e ryru-py ome'ẽ hagwã nde-vy ombohekovia-vy hetave ome'ẽ va'erã nde-vy. Nde rapixa ererekoha-rami ave nde rerekoharã Nhandejáry.

Arandu nhe'ẽ hesapysso e'ỹ va'e rehewa nhe'ẽ-rami

³⁹ Upe-ma ramo omombe'u íxupe kwéry arandu nhe'ẽ hesapysso e'ỹ va'e rehewa nhe'ẽ-rami.

—Ndovaléi voi hesapysso e'ỹ va'e oporogweraha hagwã. Ndaikatúi voi ogweraha gwapixa hesapysso e'ỹ va'e-pe ave. Ojopopyhy rei arã ojereraha uka mo'ã-vy ohexa e'ỹ-gwi. Mokõive rei ho'a arã yvykwa-py oje'óí-vy.

⁴⁰ Upéixa ave ndaipóri heko tuvixave va'e ombo'eha-gwi. Avave ndaheko tuvixavéi ombo'eha-gwi. Ombo'e hagwe-rupi ae-ma ha'e oiko.

Nde resa-py oĩ va'e rehewa nhe'ẽ-rami arandu nhe'ẽ

(Mt 7.3-5)

⁴¹⁻⁴² Upéi omombe'u jevy íxupe kwéry nde resa-py oĩ va'e rehewa nhe'ẽ-rami omombe'u.

—Nde, nde resa-py yvyravogwe oĩ va'e, ma'erã-gwi ere nde rapixa-pe “Nde resa-py oĩ yvyra ra'ykwe. Upéixa-gwi nande resapysovéi-ma”. Upéa ere javé tuvixave va'e oĩ joto nde resa-py. Ndovaléi voi ereheka rei hagwã mixïve va'e nde rapixa resa-py oĩ va'e, nde resa e'ỹ javé. “Tanohẽ nde resa-gwi” ere rei nde rapixa-pe nde reko porã a'ã a'ã-vy. Enohẽ ranhe katu nde resa-gwi upé yvyravogwe nde rekoha ererova-vy. Upe rire ae erhexa porã-ta. Erehexa porã-ma ramo, erenohẽ arã hesa-gwi upé-py oĩ va'e, he'i Hesu íxupe kwéry onhemonhe'ẽ-vy. Arandu nhe'ẽ oiporu ponove ojohu vai rei gwapixa rekoha.

Hi'a ro'opy-rehe jaikwaa yvyra rehewa nhe'ẽ

(Mt 7.16-20; 12.33-37)

⁴³ Upéi omombe'u jevy ipy'a rekoha rehewa nhe'ẽ hi'a ro'opy-rehe jaikwaa yvyra rehewa nhe'ẽ-rami.

—Yvyra jaikwaa hi'a ro'opy-rehe. Ndaipóri yvyra porã hi'a vai va'e. Yvyra porã hi'a porã meme. Ndaipóri ave yvyra vai hi'a porã va'e. Hi'a vai meme. Yva aju-rehe ohexa uka nhande-vy gwekoha yvyra.

⁴⁴ Peteĩ yvyra-gwi peteĩxa meme hi'a. Nhuatĩ máta-gwi nanhamondohóyry yva aju ja'u va'erã. Ha jukéri-gwi ndajaipo'óí yva aju ja'u va'erã.

⁴⁵ Upéixa ave nhande kwéry, mba'e aju-rami jahexa uka nhande py'apóry nhande rekoha-rehe. Nhande py'a porã ramo nhande rekoha porã meme va'erã. Ha nhande py'a vai ramo nhande rekoha vai va'erã. Upéixa ave nhande py'a rekoha-ramima nhanhe'ẽ.

Hesu-rehe ojerovia va'e rehewa nhe'ẽ

(Mt 7.24-27)

⁴⁶ —Erejapo e'ỹ javé xe nhe'ẽ ere rei xe-vy “Xe Járy” he'i Hesu onhemonhe'ẽ-vy íxupe kwéry.

⁴⁷ —Amombe'u-ta peẽ-my mba'éixa pa oiko va'erã xe-rehe ojerovia va'e. Ou xe renda-py, ohendu porã xe nhe'ẽ, oiko meme xe nhe'ẽ-rupi. Aiporu jevy-ta xe-rehe ojerovia va'e rehewa nhe'ẽ ita ári omoĩ gwoyrã va'e rehewa nhe'ẽ-rami.

⁴⁸ —Peteĩ kwimba'e ojapo va'ekwe gwogarã. Ysyry rembe'y-py ojo'o okytakwarã. Yvykwa ipy pukukwe ojo'o okytakwarã. Ita ári omoĩ okyta. Ojapopa rire ou sapy'a peteĩ marány. Heta eterei oky-gwi, ysyrygwasu hyňyhẽmba-ma.

Oipete pete hóga-pe. Ha ndoitýiry jaty hóga. Hatā jaty oī hatā ojapo va'ekwe-gwi. Omombaraete porā gwóga-gwi ndo'áiry jaty hóga. Ita ári omoī-gwi hatā jaty hóga oī, he'i arandu nhe'ē omombe'u-vy.

Upéi he'i jevy:

—Ha'e-ta ave peē-my, Xe-rehe ojerovia va'e upéixa ete ave ndojeity ukase mo'āi, oiko meme va'erā voi xe nhe'ē-rupi.

⁴⁹ —Ha upe xe nhe'ē nohendu porāi va'e, ohendu rei-gwi ndoikói xe nhe'ē-rupi va'e-rehe amombe'u-ta peē-my gwī pya'e vérami gwóga ojapo va'e rehewa nhe'ē-rami.

—Peteī kwimba'e ojapo araka'e gwogarā. Pya'e a'e ojapo gwogarā. Ysyry rembe'y-py ojo'o okytakwarā. Yvykwa nandi rei-py omoī okyta. Ndaipy pukúi ave. Upéi oky heta ramo, ysyry okakwaa-ma ramo, y oipete hatā ramo hóga-pe, oitypa-ma hóga. Ojejapipa-ma hóga-rehe. Ndojapo porāiry gwóga. Upéa-gwi oity. Ijáry nahi'arandu porāi-gwi, oity uka gwóga, he'i arandu nhe'ē omombe'u-vy. Upéi he'i: —Ha'e-ta peē-my: Xe nhe'ē-rupi oiko e'ŷ va'e upéixa ave ojeity uka rei arā voi oho vai rei hagwā upe xe nhe'ē ohendu rei va'e nahi'arandu porāi-gwi, he'i.

7

Mburuvixa rembigwái-pe Hesu ombogwera

(Mt 8.5-13)

¹ Ojogweroaty aty va'e-pe omombe'u heta rire Hesu ohasa-ma ou-vy oike hagwā Cafarnaum tetā-my.

² Ha upe-py oime capitão, soldado ruvixa va'e judeu e'ŷ va'e. Heta soldado-rehe omanda va'e, heta hembigwái ave. Ha peteī hembigwái hembihayhu porā va'e katu hasy ete. Omano-tama oī-vy hembigwái.

³ Hasy ete jave hembigwái soldado ruvixa ohendu-ma Hesu rerakwā. Ohendu-ma ramo he'i gwī judeu ruvixa-pe:

—Tereho Hesu renda-py. Emombe'u íxupe ou hagwā xe ha-py. Aikotevē hese. Aipota eterei ou ombogwera hagwā xe rembigwái xe rembiayhu ete va'e-pe, he'i omondo-vy íxupe.

⁴ Aipo ramo judeu ruvixa kwéry oho onhomongeta Hesu ndive. Ojerure rure Hesu-pe:

—Iporā voi ereho erembogwera upe romano va'e soldado ruvixa rembigwái-pe, he'i íxupe. —Iporā voi ereiporiahuvereko íxupe.

⁵ Ha'e nhande rayhu ra'e. Nhande re'ýi kwéry-pe hembiapo porā meme va'e. Ojapo uka va'ekwe peteī ogagwasu nhande porahéi hatygwā. Upéa-gwi iporā voi ereiporiahuvereko íxupe hembigwái-pe erembogwera hagwā, he'i jevy jevy Hesu-pe.

⁶ Aipo ramo Hesu ou indive hasy va'e rexava-vy ou oiko-vy. Ogwahē-tama ramo ou-vy Hesu ohogwaití jevy-ma íxupe ou-vy. Soldado ruvixa omundo gwapixa kwéry Hesu roghogwaití uka-vy.

Ha igwahē ramo he'i íxupe:

—Ani erenhemomirí erégwahē hagwā xe róga-py nde, mbo'eháry. Ne rembiapo porā eterei va'e atī eterei ereju hagwā xe renda-py. Naxe py'a porāi-gwi xe atī eterei orohogwaití hagwā.

⁷ Atī eterei-gwi ndahái kuri anhomongeta ne ndive. Iporāve ne nhe'ē-py rei erembogwera xe rembigwái-pe, he'i uka.

⁸ Ha ha'e he'i uka ave

—Aikwaa voi mburuvixa nomanda reíry. Xe ko, xe ave mburuvixave va'e nhe'ē gwy-py ave aiko. Ha oime ave soldado kwéry xe nhe'ē gwy pygwa ave.

Ha'e ramo peteī soldado-pe, "Tereho" amanda ramo íxupe, oho joty. Ha'e ramo outro-pe, "Eju" ou joty ave. Ha'e ramo xe rembigwái-pe, "Ejapo ko xe remimbota" ha'e ramo, ojapo joty ave. Upéa-rehe aikwaa ne nhe'ē-py rei okwera arā xe rembigwái, he'i uka Hesu-pe soldado ruvixa.

⁹ Ohendu-ma ramo inhe'ē kwéry Hesu ojere omongoeta hagwā omoirūhatype:

—Ndajohúi vyteri Israel pygwa kwéry-pe ko judeu e'ŷ va'e-rami xe-rehe ojerovia va'e. Ne'írā ojerovia tee Israel pygwa kwéry xe-rehe, he'i.

¹⁰ Upe rire soldado ruvixa remimbou kwéry oho jevy. Ogwahē-ma ramo mburuvixagwasu róga-py, ohexa hembigwái. Hesāi jevy-ma hembigwái. Okwera porā-ma ra'e.

Omano va'ekwe Hesu omoingove jevy

¹¹ Upe rire Hesu oho tetā Naim-my. Hemimbo'e kwéry ave, ojogweroaty va'e ave oho indive.

¹² Ogwahē-tama ramo upe tetā rokē-my ohexa osēsē va'e kwéry. Omano va'ekwe ogweraha-tama hetekwe rendaty-py. Túvy omano rire ae-ma omano ta'yry ave. Isykwe tembirekokwe memby voi omano jevy. Peteīmi oiko va'e. Ha heta upe tetā mygwa oho omoirū upe tembirekokwe-pe. Osēsēmba hikwái.

¹³ Ohexa-ma ramo kunha-pe Hesu oiporiahuvereko íxupe. He'i upe tembirekokwe-pe:

—Ani erehapiro ne memby-pe, he'i.

¹⁴ Upéa he'i-vy ogwahē hyru ypy-py omoī opo hyru-rehe. Herahahare kwéry optyta. Opyta-ma ramo Hesu he'i:

—Ha'e-ta nde-vy: Epu'ã katu, karia'y, he'i omano tee-ma va'ekwe-pe.

¹⁵ He'i-ma ramo upe omano tee va'ekwe opu'ã jevy ogwapy-vy. Onhypyrū jevy-ma onhe'ē. Upéi Hesu he'i isy-pe:

—Ko ne memby amoingove jevy-ma, he'i.

¹⁶ Upe-ma ramo ikyhyjepa rei Hesu-gwi hikwái. Ikyhyjepa-gwi omboete katu Nhandejáry-pe:

—Ou-ma nipo nhane pa'ū-my Nhandejáry nhe'ē-py omombe'u va'ety ra'e. Ipu'aka va'e voi oiko-ma nhane pa'ū-my, he'i Hesu-rehe Nhandejáry-pe omomba'egwasu-vy.

He'i ave hikwái:

—Nhandejáry nipo ou-ma ra'e oresende hagwā oipytygwō hagwā gwe'yi kwéry-pe, he'i hese hikwái.

¹⁷ Opa-rupi oho Hesu rerakwā. Judéia pygwa kwéry ohendu-ma, ijerekwe-rupi ave tetā ambue mbue pygwa kwéry ohendu-ma Hesu rembiapo porāgwe.

João Batista rembijokwái rehewa nhe'ē

(Mt 11.2-26)

¹⁸ Ha João remimbo'e kwéry omombe'u jevy íxupe Hesu rerakwā: "Omano ete va'e omoingove jevy" omombe'u íxupe. Upéa ohendu-gwi João ohenói mokōi gwemimbo'e va'e:

¹⁹ —Tereho Hesu ha-py, he'i ojokwái-vy. —Eporandu íxupe, "Nde tipo, Nhandejáry rembiporavo tee va'e nhane remiha'arō va'e voi nipo ra'e nde?" ere íxupe. Ha ndoikói ramo, eporandu ave, "Ambueve va'e-rehe para'e tekotevē nhaha'arō?" ere Hesu-pe, he'i João mokōi gwemimbo'e-pe imondo-vy.

²⁰ Ogwahē-ma ramo Hesu ha-py oporandu-ma íxupe:

—João Batista ore mbou oroporandu hagwā nde-vy. Nde tipo, Nhandejáry rembiporavo tee va'e voi tipo nde ra'e? he'i íxupe. —Ambueve va'e-rehe pa tekotev̄ nhaha'arō? he'i oporandu-vy Hesu-pe.

²¹ Ha Hesu ae onhemokirir̄ íxugwi. Henonde-py ombogwera heta hasy va'e-pe, imba'asy va'ekwe ombogwera ave. Omosēsē ave anháy kente kwéry-gwi, ohexa e'ŷ va'e kwéry-pe ombohesapyo ave.

²² Upéa ojapo rire ae-ma he'i João remimbou kwéry-pe:

—Tapeho jevy katu. Emombe'u João Batista-pe mba'e pehexa kuri mba'e pehendu kuri ave. Hesapyo e'ŷ va'ekwe gwive hesapyo-ma. Ikarē va'ekwe opu'ã porā jevy-ma ave. Mba'asy vai-gwi ijai aipa va'ekwe ipire porā jevy-ma ave. Ijapysa e'ŷ va'ekwe ijapysa porā-ma ave. Omano ete va'ekwe oikove jevy ave. Iporiahu va'e kwéry-pe omombe'u Nhandejáry nhe'ẽ porā.*

²³ Hexapyrā-rupi voi ojapo Nhandejáry heroviapyrā-rupi ojapo. Upéixa-gwi heko vy'a va'erā upe xe-rehe ojerovia tee va'e kwéry. Ha ndovy'a mo'ãi arā upe xe-rehe, "Ha'e para'e, ndaha'éi para'e Nhandejáry rembiporavo tee va'e?" he'i va'e. Tereho eremombe'u hagwā João-pe jevy, he'i Hesu João remimbou kwéry-pe.

João Batista-rehe omombe'u Hesu

(Mt 11.7-19)

²⁴⁻²⁵ Oho jevy-ma ramo João Batista remimbou, Hesu omombe'u jevy ojogweroaty va'e-pe hesegwa nhe'ẽ:

—Peho araka'e João Batista pehexa hagwā. Peho ae tekwat y e'ŷ-my. Ndapehói para'e ikangy kangy va'e rexa-vy jahapéixa onhembovava va'e ndapehexaséi para'e peho-vy ra'e. Ndapehói ave ijao porā porā va'e erehexavy. Ijao porā porā va'e ndopytái tekwat y e'ŷ-my. Gwī ijao porā porā va'e, imba'e reta reta va'e mburuvixagwasu róga-py oiko.

²⁶ Peho ra'e pehexa hagwā ae Nhandejáry nhe'ẽ-py omombe'u va'ety. Anhete ha'e-ta: Upéa voi ko João Batista. João Batista oĩ ha-py peje'óí-vy ra'e. Ha'e-ta ave peẽ-my: Oĩ heta Nhandejáry nhe'ẽ-py omombe'u va'ety. João Batista rekoha ae ipu'akave hese kwéry-gwi.

²⁷ Nhandejáry kwtia-rehe oĩ João Batista rehewa nhe'ẽ.

"Amondo-ta xe rembigwái ne renonde-py. Xe nhe'ẽ mombe'uhu upe va'e.

Amondo-ta íxupe omopotí hagwā nde raperā"*

he'i va'ekwe Nhandejáry ohai uka-vy hese va'ekwe.

²⁸ —Xe katu ha'e-ta peẽ-my: Yma gwive ãy peve ndaipóri va'ekwe Nhandejáry nhe'ẽ-py omombe'u va'ety João Batista rekoha-gwi tuvixave va'e. Upéixa ramo jepe oiko-ta hekoha tuvixave va'e kwéry íxugwi, he'i Hesu. —Nhandejáry nhante ruvixa-pe omoirū tee va'e gwive, hese ojerovia va'e og-wereko arā gwekoha tuvixave João Batista rekohagwe-gwi. Gwī Nhandejáry ndive oiko va'e entéro upe pygwa-gwi heko mirīve va'e jepe hekoha tuvixave va'erā João Batista rekohagwe-gwi.

²⁹ Enterove ohendu va'e, gwī plata-py nhane mbopaga va'ety kwéry gwive, onhemongarai uka va'ekwe João Batista-pe va'e kwéry he'i:

—Nhandejáry hembiapo porā meme ete va'e voi, he'i íxupe omboete-vy.

³⁰ Gwī fariseu kwéry ae, ndoikoséi Nhandejáry reko potīha-rupi, gwī Moisés remimombe'ukwe-rehe oporombo'eha ave ndoikoséi Nhandejáry reko potīha-rupi ave. Upéixa-gwi nonhemongarai ukáiry va'ekwe João-pe hikwái.

³¹ Upéi Hesu onhemonhe'ẽ jevy enterove upe-py ojogweroaty va'e-pe. He'i:

—Mba'eixa pa oiko ko'ãygwa amombe'u-ta peẽ-my.

* ^{7:22} Is 35.5-6; 61.1 * ^{7:27} Ml 3.1

³² Mitāgwe reko rami voi ãygwa reko. Onhembyasarái mitā mba'ejogwa haty-py. Osapukái oirürā-rehe "Mbaraka orombopu kuri ha peẽ katu ndape-jerokyséi ra'e. Orohapirō ra'anga kuri ha peẽ katu ndapejahe'oséiry ra'e" he'i oirürā kwéry-pe nonhembyasaraiséi-gwi. Ha ko'ãygwa mitāgwe ramigwa voi ndogwerovy'áí gwapixarágwe reko, he'i.

³³ —Ou va'ekwe João Batista. Mbojape ndo'úi. Uva rykwere ndo'úi ave Nhandejáry-pe omboete tee-vy. Peẽ ae peje mo'ã hese: "Anháy voi ra'e ijáry" peje mo'ã hese napehenduséi-gwi rei inhe'ë, he'i.

³⁴ —Xe-ma Nhande Ryke'y tee va'e voi xe. Xe aju-ma ko'a-py akaru rehevē uva rykwere ha'u ave aiko-vy. Peẽ ae, peje mo'ã xe-rehe: "Uva rykwere ho'u eterei upe va'e" peje mo'ã xe-rehe napehenduséi-gwi. "Okaru eterei upe va'e" peje mo'ã xe-rehe. "Plata-py oporombopaga va'ety kwéry ndive oiko va'e upéa" peje vai xe-rehe. "Ojejavy va'e kwéry ndive oiko va'e upéa" peje vai ave xe-rehe.

³⁵ Anhete voi ha'e-ta peẽ-my: Nhandejáry reroviaha oikwaa-ma voi Nhandejáry inharanduve ete va'e voi. Jaiko ramo Nhandejáry nhe'ë-rupi, nanhamombe'u pehē pehëmba reíry mba'eve-rehe, he'i Hesu.

Hesu oiko fariseu va'e róy-py

³⁶ Peteĩ fariseu va'e ohenói Hesu-pe okaru hagwã ondice. Héry va'e Simão. Ha ohenói-gwi Hesu oho hóga-py. Oike rire ogwapy-ma oĩ-vy okaru hagwã.

³⁷⁻³⁸ Oime jave upe-py peteĩ kunha ou Hesu renda-py. Upe tetã mygwa voi upe kunha. Enterove upe tetã mygwa kwéry oikwaa-ma mandu'aha porã e'ŷha voi upe kunha. Ha ohendu-ma ramo Hesu okaru-vy oĩ-vy fariséu róga-py, upe kunha ou-ma ave. Ogweru hyakwã porã tee va'e omboete hagwã Hesu-pe. Hyru rehevē ogweru. Upe hyru ojejapo va'ekwe ita-gwi héry va'e alabastro. Hepy eterei. Hepy ave hyakwã va'e. Ha hyakwã va'e rehevē ou oike fariseu róga-py. Onhemoagwíve Hesu-gwi. Ovy'a eterei Hesu ombogwerahekoha-gwi. Ojahe'o optya-vy. Omoaký aký Hesu py gwasay-py. Omokã mokã ipy ho'ávy-py. Oipyte pyte Hesu py omboete-vy. Hyakwã porã ogweru va'ekwe onhohë ave Hesu py-rehe otima porã hagwã íxupe.

³⁹ Upéixa ojapo jave upe kunha, fariseu va'e ohexa katu íxupe. He'i rei opy'apy-py: "Ko kwimba'e Nhandejáry nhe'ë-py omombe'u va'ety mo'ã" he'i rei rei hese. "Nhandejáry nhe'ë-py omombe'u va'ety ramo, oikwaa-ma arã ra'e kóá ko kunha mandu'a vaiha voi. Ndoikwaái para'e" he'i mo'ã Hesu-rehe. "Ndoikwaái-gwi para'e: Ani eremoï nde po xe-rehe, nde'íry kunha tavy-pe. Ndoikwaái para'e" he'i rei rei Hesu-rehe opy'apy-py. Mba'eve nohendu ukái joty.

⁴⁰ Ha Hesu katu he'i íxupe:

—Simão, anhomongetase ne ndive, he'i íxupe.

—Mbava'e-rehe erenhomongetase xe ndive? he'i Simão Hesu-pe.

⁴¹ Upéi Hesu omombe'u arandu nhe'ë oiporiahuvereko va'e rehogwa nhe'ë-rami omombe'u Simão-pe hesegwa nhe'ë:

—Mokõi kwimba'e oiporu va'ekwe plata peteĩ oiporu uka va'e-gwi. Ha peteĩ oreve vyterí quinhentos opaga va'erã ha peteĩ oreve cinqüenta opaga va'erã.

⁴² Ha ndogwererekói mba'eve ombohekivia hagwã ijáry-pe. Aipo ramo upe plata járy oiporiahuvereko íxupe kwéry. He'i íxupe kwéry: "Iporãve aheja rei nde-vy upe plata ereiporu va'ekwe xéhegwi" he'i íxupe. "Ani katu erembo-hekivia jevy xe-vy xe platakwe. Ne mba'e tee-rami voi ame'ë va'ekwe nde-vy" he'i íxupe kwéry. Upe mokõi nombohekoviái va'e ovy'a voi ijarykwe-rehe imboete-vy. Oheja rei-gwi nipo ha'e kwéry omboete voi plata jarykwe-pe

ra'e. Kiva'e tipo nde-vy omboeteve arā upe pirapire jarykwe-pe? he'i Hesu omombe'u Simão-pe arandu rehewa nhe'ẽ hesegwa nhe'ẽ.

⁴³ —Xe-vy, pirapire hetave ojéupe ome'ẽ va'ekwe omboeteve arā, he'i.

—Upéixa voi, he'i Hesu.

⁴⁴ Upéi Hesu oma'ẽ upe kunha-rehe ha he'i jevy Simão-pe:

—Peteñ nhe'ẽve ha'e-ta nde-vy, he'i jevy. —Erehexa ko kunha, he'i íxupe. —Ha'e ojapo porā kuri xe-vy, he'i. —Agwahẽ ne mbohupa-vy kuri xe. Ha nhande re'ýi ojapoha ramigwa nderejapói kuri xe-vy. Nhande re'ýi ome'ẽ ombohupa-pe y ojepyhéi hagwā. Nde, nereme'ẽi kuri ajepyhéi hagwā. Nde rekovia ko kunha aje'i-ma ra'e xe py omoaký gwasay-py. Ho'ávy-py oikyty omokā hagwā omoaký va'ekwe.

⁴⁵ Ha nde, ndaxe rova pytéi voi nde nhande re'ýi ojapoha-rami. Ha agwahẽ gwive ko kunha oipyte pyte xe py.

⁴⁶ Nde neremohyakwāi xe akā aceite hyakwā porā va'e-py nhande re'ýi ojapoha-rami. Ha ko kunha nde rekovia ojapo porāve xe-rehe. Omohyakwā xe py. Onhohē nhohē xe py-rehe hepyve pyve va'e. Hyakwā porā va'e onhohē xe py-rehe omohyakwāmba xe py.

⁴⁷ Anhete ha'e-ta nde-vy. Ko kunha-gwi amboyke-ma heta eta hembiapo vaikwe. Upéa-rehe xe rayhu-ma voi. Ha “Ndahetái xe rembiapo vaikwe” he'i va'e-gwi eremboyke ramo hembiapo vaikwe, mixí mate nde rayhu arā upe va'e, he'i Simão-pe onhemonhe'ẽ-vy.

⁴⁸ Upéi:

—Amboyke-ma ndéhegwi ne rembiapo vaikwe, he'i kunha-pe.

⁴⁹ Ohendu-ma ramo Hesu nhe'ẽ entéró upe-py ogwapy va'e oporandum ojéupe: “Kiva'e tipo ko kwimba'e: Amboyke-ma ne rembiapo vaikwe ndéhegwi, he'i kuri. Onhe'ẽ rei nipo ra'e” he'i rei hikwái opy'apy-py.

⁵⁰ Upéi Hesu he'i kunha-pe:

—Xe-rehe erejerovia tee-ma. Upéixa-gwi Nhandejáry omboyke-ma ndéhegwi ne rembiapo vaikwe. Nde py'agwapy rehewe tereho katu he'i kunha-pe.

8

Oho Hesu ndive kunha kwéry ave

¹ Ha upe rire-ma Hesu oho omombe'u Nhandejáry nhe'ẽ porā. Oho tetāgwasu kwéry-rupi. Oho tetā mirī kwéry-rupi ave. Oho-vy omombe'u mbe'u “Pemoirū katu Nhandejáry pende ruvixarā-pe” he'i omombe'u mbe'u oho-vy. Upe doze hembiporavokwe va'e oho indive.

² Gwī kunha hemimbogwerakwe ave oho indive. Gwī íxugwi omundopa va'ekwe anháy ave oho. Heta kunha oho. Oho Maria Madalena. Upe va'e-gwi omosē va'ekwe sete anháy.

³ Oho Joana, Cuza rembireko upéa. Cuza mburuvixa voi. Onhangareko mburuvixagwasu Herodes mba'e kwéry-rehe. Hembireko Joana oho. Oho Suzana ave. Hetave ave kunha Hesu ndive oho. Upe kunha kwéry ome'ẽ meme hemikotevē Hesu-pe, doze hembiporavo va'e-pe ave ome'ẽ hemikotevē. Oho meme indive ojapo hagwā gwemi'urā indive ho'u hagwā.

Temitygwe rehewa nhe'ẽ

(Mt 13.1-23; Mc 4.1-20)

⁴ Upéi ojogweroaty aty kente kwéry oikwaa porā hagwā Hesu nhe'ẽ. Entéró tetā tetā-gwi osésē hikwái ojogweroaty aty-vy. Ha Hesu omombe'u arandu nhe'ẽ temitygwe rehewa nhe'ẽ-rami.

5 —Oho onhemitŷ va'e onhemitŷ hagwā. Omohāi temity. Onhemitŷ jave oime temity ra'ŷi tape rembe'y-rupi ho'a va'e. Ha upéi ohasa va'e opyrūmba hese, gwyra ou ho'upa ave.

6 Oime ave temity ra'ŷi itaty-rupi yvy pererī-rupi ho'a va'e ave. Upéi henhóima ramo pya'e ipirupa jevy nainhakŷi-gwi yvy.

7 Oime ave temity ra'ŷi nhuatŷndy-rupi ho'a va'e ave. Upéi ojoparapa henhó-i-vy hemitŷ ndive okakwaa nhuatŷ. Ojaho'ipa upe temitygwe-pe.

8 Oime ave temity ra'ŷi yvy porā-my ho'a va'e. Upéi okakwaa-ma hemitŷ. Hope porā-ma oho-vy. Hi'a porā-ma rire cem ha'ŷi meme-ma oĩ, he'i Hesu íxupe kwéry omombe'u-vy arandu nhe'ẽ.

Upéi:

—Ne aranduse va'e ejeapysaka katu ko xe nhe'ẽ-rehe, he'i onhe'ẽ hatā-vy íxupe kwéry.

9 Upe rire Hesu reroviaha kwéry oporandu íxupe:

—Mbava'e tipo eremombe'use kuri ore-vy? Ore, norohendu kwaái kuri upe temitygwe rehewa nhe'ẽ, he'i oporandu-vy íxupe.

10 —Peẽ peikwaa voi ra'e mba'éixa po nhamoirū Nhandejáry-pe nhane ruvixarā. Nhandejáry ome'ẽ-ma peẽ-my pene arandurā. Oikwaa uka-gwi peẽ-my peikwaa-ma. Ha kente ambue kwéry-pe ndojeroviái va'e-pe ndoikwaa ukáiry. Upéa-gwi arandu rehewa nhe'ẽ aiporu ramo, ndojeroviái-gwi okanhy inharandurā íxugwi kwéry, he'i. —Upéixa-gwi oma'ẽ ma'ẽ rei ha'e kwéry, ha mba'eve ndohexáiry. Ohendu hendi rei hikwái, mba'eve ndoikwaaáiry. Ndojeroviái hese-gwi Nhandejáry ndoikwaa ukáiry íxupe kwéry, he'i Hesu omombe'u-vy.*

11 Upéi he'i ave:

—Temitŷgwe rehewa nhe'ẽ amombe'u kuri aikwaa uka-ta peẽ-my, he'i.

—“Temitŷ ra'ŷi” he'ise Nhandejáry nhe'ẽ porā.

12 Upe tape rembe'y-rupi ho'a va'e nhe'ẽ he'ise: Oĩ nhe'ẽ porā nohendu kwaái va'e. Ohendu-ma ramo, ou oipe'a anhaygwasu nhe'ẽ porā inharandu porārāgwe ipy'a-gwi pono ogwerovia, pono onheresende uka Nhandejáry-pe, he'i.

13 —Ha itaty-rupi ho'a va'e nhe'ẽ he'ise: Oĩ nhe'ẽ porā ohendu rei va'e. Ohendu-ma ramo ov'a ogwerovia-vy. Ha pya'e henhóí ndahapóiry va'e-rami ndogweroviái ipy'apy rehewe. Sapy'a ndogweroviavéi. Ohasa asy-tama ramo, imbojejavyharā ou ramo naimandu'avéi-ma Nhandejáry nhe'ẽ porā-rehe.

14 —Ha nhuatŷndy-rupi ho'a va'e nhe'ẽ he'ise: Oĩ nhe'ẽ porā ohendu mixí va'e. Ha onhesamondo mondo om̄ba'e-rehe: “Mba'e tipo ojehu-ta xe-vy ko'ângâ” he'i ojepy'apy-vy. Imba'e reta reta-rehe ojapura. Oipotave tave ojéupe gwarā. Opaixagwa ojapose ojererohory mo'ã hagwā. Om̄ba'e retarā-rehe ete ha'e oikotevē. Nhandejáry remimbota, gwembiapo porārā mo'ã ojapo. Ha nopenái inhe'ẽ porā-rehe. Temitygwe naħa'ŷiry va'e-rami opyta.

15 Ha yvy porā-my ho'a va'e nhe'ẽ he'ise: Oĩ nhe'ẽ porā-rehe ojapysaka va'e. Ohendu-ma ramo ogwerovia tee voi. Ogwerovia-gwi ipy'a potí porā. Nhandejáry rape-rehe ogwata gwata. Hembiapō porāvē rāvē va'e ogwerovia-gwi. Upéixa-gwi “Heta ha'ŷi va'e ramigwa” ha'e hese, he'i Hesu gwemimbo'e kwéry-pe gwemimombe'ukwe oikwaa uka-vy íxupe kwéry.

Tataendy rehewa nhe'ẽ

(Mc 4.21-25)

16 Upéi Hesu omombe'u jevy arandu nhe'ẽ tataendy rehewa nhe'ẽ-rami:

* **8:10** Is 6.9-10

—Tataendy nhamoendy ramo jepe ndaha'éi nhamoī hagwā mba'e ryru gwy-py. Ndaha'éi ave nhamoī hagwā tupā gwy-py. Tataendy nhamoendy nhamoī hagwā tataendy rendaty-py, nhande resape porā hagwā.

¹⁷ Upéixa ave ojekwaa porā va'erā gwī onhenhomī va'ekwe gwive. Ha Nhandejáry oikwaa uka va'erā enterove va'e-pe oikwaa e'ŷ va'ekwe gwive oikwaa porāmba hagwā. Hesakā va'e ramigwa-py ojekwaapa va'erā. Nhande py'apy-py oime va'e gwive ojekwaa uka va'erā.

¹⁸ —Ejeapysaka porā katu xe nhe'ē-rehe. Ne arandu porā-ma ramo, hetave ojekwaa va'erā nde-vy ne aranduve nduve hagwā-vy ereho. Nahí'arandúi va'e ae nohendu kwaái-vy voi. Okanhymba va'erā íxugwi inharandurāgwe, he'i Hesu omombe'u-vy gwemimbo'e kwéry-pe.

Hesu re'yi kwéry

(Mt 12.46-50; Mc 3.31-35; Hb 2.11-13)

¹⁹ Upe ramo ou isy tyvýry kwéry ndive. Ndikatúi ogwahē henda-py. Hesu jerekwe-rehe heta eterei onhomboaty hikwái.

²⁰ Upéi oikwaa va'e he'i Hesu-pe.

—Nde sy oī oka-py. Nde ryvy kwéry ave oī upe-py. Nde rexase, he'i omombe'u Hesu-pe.

²¹ Ha'e katu he'i:

—Nhandejáry nhe'ē ohendu va'e gwive, inhe'ē ojapo va'e gwive upe va'e kwéry-pe xe ha'e, “Xe sy, xe ryvy” ave, he'i íxupe kwéry Hesu hekorā omombe'u-vy.

Hesu omokirirīy, yvytu ave

(Mt 8.23-27; Mc 4.35-41)

²² Ha upe rire, peteī áry-py, Hesu onhemboyrū kanoagwasu-py gwemimbo'e kwéry ndive:

—Jaha jahasa hagwā y rovái, he'i íxupe kwéry.

He'i-vy oho hikwái.

²³ Oipykúi oje'ōi-vy jave hikwái Hesu oke oī-vy. Upe jave y-rehe ho'a yvytugwasu. Omopu'ā pu'ā y-pe. Onhehē-ma kanoagwasu-py y. Haimete ete y omohynyhē kanóa. Ombopohýi eterei kanóa y. Haimete ete omonheapymi kanóa y gwy-py.

²⁴ Upéixa-gwi oho omombáy Hesu-pe:

—Epáy katu, mbo'eháry. Nhanheapymimba-tama. Onheapymi-tama nhande ryru y gwy-py, he'i Hesu-pe omombáy-vy.

Opáy-ma Hesu. Oja'o yvytugwasu-pe. Omombyta y. Inhe'ē-py okirirī-ma.

²⁵ Upéi he'i ondivegwa kwéry-pe:

—Ma'erā nderejeroviái xe-rehe, he'i onhemonhe'ē-vy ondivegwa kwéry-pe.

Ha oponderapa hese hikwái:

—Mba'eixagwa po ko va'e? Onhe'ē ramo y-pe yvytu-pe ave omokirirī inhe'ē-py rei. Mba'eixagwa po ko va'e, he'i joa Hesu-rehe hikwái.

Anháy rerekoha-gwi Hesu omosē anháy kwéry

(Mt 8.28-34; Mc 5.1-20)

²⁶ Ha upe rire oipykúi oho-vy ogwahē hagwā Geraseno kwéry retā-my. Upe tetā opyta yrusu rembe'y-py. Galiléia yvy rovake opyta.

²⁷⁻²⁹ Ha osē-ma ramo kanóa-gwi, ou ohogwaitī-vy íxupe upe anháy ojepota va'e va'ekwe hese. Tetā-gwi ou. Hi'are-ma oiko opi-vy. Óga-py ndoikovéi ave. Oiko rei ikyta-rupi upe anháy ojepota va'e hese. Ojepota-gwi omenda va'ekwe anháy-rehe. Oiko meme indive. Upe tetā mygwa kwéry oapresa mo'ā íxupe. Ndikatuvéi onhapytī íxupe. Onhapytī jevy jevy rei íxupe. Ojokwa jokwa íxupe

oipokwa oipykwa ave calena-py. Ha omondohoypa. Omopẽmba íxupe oho-vy. Anháy ogweraha íxupe tekwaty e'ŷ-my oheja.

Upéi Hesu ou ohogwaití íxupe. Ohexa-ma ramo Hesu-pe osapukái-vy ojeity íxupe:

—Hesu Tupãgwasu ra'y tee voi ko nde, he'i íxupe. —Mba'e tipo erejapo-ta xerehe, he'i oporandu-vy íxupe. —Ajerure nde-vy ani xe mbohasa asy teĩ, he'i Hesu-pe anháy.

Upe jave:

—Esẽ katu ko kwimba'e-gwi, he'i Hesu anháy-pe.

³⁰ Ha kwimba'e-pe he'i:

—Emombe'u xe-vy nde réry, he'i íxupe.

—Ore reta-gwi xe réry Heta ave, he'i. Heta-ma voi anháy-rehe ojepota-ma va'ekwe.

³¹ Upéi ojerure rure Hesu-pe anháy kwéry pono omondopa íxupe kwéry anháy opyta hagwã-my.

³² Upe jave y rembe'y-py oĩ heta kure. Yvyaty rembe'y-rehe okaru joa kure. Ha anháy kwéry ojerure Hesu-pe oheja hagwã kure yta-py oike.

—Tapeho katu, he'i íxupe kwéry.

³³ Ha anháy kwéry osẽ kwimba'e-gwi oike jevy kure yta-py. Ha kure kwéry oriparapa ogwejy-vy. Y rembe'y-py ogwejy oje'óí-vy yugwarusu-py. Onheapymimba y gwy-py oje'óí-vy hikwái.

³⁴ Upéa ohexa-ma ramo, kure-rehe onhangareko va'e kwéry oriparapa oho-vy hikwái. Omombe'u tetã mygwa kwéry-pe. Tetã jere rehewa-pe ave omombe'u.

³⁵ Oupa ojehexapa ojehu va'ekwe gwive. Ogwahẽmba Hesu renda-py. Ohexa anháy rerekohare ave ogwahẽ hikwái. Ohexa íxupe Hesu renonde-py ogwapy-vy oĩ-vy. Onhemonde-ma oĩ-vy. Ndaitavyvéi-ma anháy rerekohare. Upéa-rehe ipy'amirĩmba hikwái. Ipu'aka eterei Hesu.

³⁶ Ha gwĩ hexahare omombe'upa íxupe kwéry. Anháy rerekohare rehewa nhe'ẽ omombe'u. Mba'eixagwa pa ombogwera anháy rerekohare omombe'u.

³⁷ Ha upéa-rehe ipy'amirĩmba Hesu-gwi Geraseno kwéry. He'i íxupe opoi hagwã hetã-gwi. Upéixa-gwi onhemboyrú jevy kanóa-py Hesu hendive kwéry ave ohasa jevy y rovái oje'óí-vy.

³⁸ Oike-ma ramo kanóa-py, anháy rerekohare ojerure íxupe omoirũse eterei íxupe. Ha ndohejái oho ondice. Omondo íxupe:

³⁹ —Tereho nde róga-py, he'i. —Emombe'u nde re'ýi kwéry-pe erekwera porãmaha. “Nhandejáry ojapo porã porã xe-rehe” ere katu emombe'u-vy íxupe kwéry, he'i Hesu íxupe.

Ha upéi katu oho omoherkwã upe tetã mygwa-pe:

—Xe-rehe ojapo porã porã Hesu, he'i. —Inhe'ẽ-py rei omosẽ imondo-vy xéhegwí anháy kwéry. Xe mbogwera-ma. Ndaxe tavyvéi-ma ãy, he'i. —Ojapo porã voi xe-rehe Hesu, he'i omombe'u-vy gwe'ýi kwéry-pe.

*Jairo rajy rehewa nhe'ẽ, kunha ombogwera va'e rehewa nhe'ẽ ave
(Mt 9.18-26; Mc 5.21-43)*

⁴⁰ Ha y rovái ogwahẽ jevy ramo heta eta ojogweroaty aty y rembe'y-py Hesu ra'arõ-vy. Ogwerohory eterei Hesu ogwahẽ ramo.

⁴¹⁻⁴² Ha upe ramo ogwahẽ ou-vy kwimba'e. Ojeporahéi haty pygwa ruvixa upéa. Héry Jairo. Ogwahẽ-ma ramo onhesũ omboete-vy Hesu rovagwy-py.

—Mbo'eháry, he'i, —Omano-tama xe rajy, he'i. —Eju katu, jaha, he'i íxupe. —Ha'enhomi xe rajy oiko, he'i. —Ogwereko-ma doze ro'y, ha omano-tama. Eju katu jaha embogwera íxupe ani hagwā omano, he'i ojapura-vy hese.

Upéa-gwi Hesu oho hendive. Tape-rehe oho ramo, ijaty jaty Hesu-rehe ojoko-vy ojopypa íxupe.

⁴³ Tape ku'a-rupi ou kunha. Hapykwéri ete-ma ou. Are-ma hasy. Doze ro'y-ma ogwerek ojegwaha. Ome'ẽmba va'ekwe ogwerek va'e ombogwerahaty kwéry-pe okwera hagwā mo'ã. Opaga paga rei okwera hagwā mo'ã. Ha ndokwerái joty.

⁴⁴ Upéa-gwi ou Hesu rapykwéri. Opoko ija o poty-rehe. Opoko-ma ramo omoõ opo hese, opi-ma íxugwi ijegwaha. Okwera-ma kunha.

⁴⁵ Upéa-rehe Hesu oporandu:

—Kiva'e opoko kuri xe-rehe? he'i oporandu-vy onhomongeta hagwā indive.

Enterove he'i joa:

—Ndaha'ei xe, he'i Hesu-pe.

Ha Pedro katu, oirũ gwéry ndive, he'i:

—Ijatypa hikwái, mbo'eháry. Ojogweroaty aty oje'óí-vy nde rexá-vy. Ojejapi japi oje'óí-vy, he'i íxupe. —Ereporandu rei para'e, “Kiva'e opoko kuri xe-rehe?” ere rei ra'e, he'i.

⁴⁶ Upéi katu Hesu he'i jevy:

—Opoko-ma voi xe-rehe kuri. Onhembogwera uka hagwā opoko xe-rehe kuri. Okwera-ma xe-rehe opoko-gwi, he'i.

⁴⁷ Ha kunha katu oikwaa.

“Ndikatúi anhemí Hesu-gwi” he'i opy'apy-py. Ou, ikyhyje omboryrýi. Ou ojeity henonde-py. “Ipoxy para'e xe-rehe. Naxe mbogweraséi para'e” he'i mo'ã Hesu-rehe opy'a-py. Omombe'upa anhetegwa va'e. Ijaty va'e ohendu ave omombe'u ramo.

—Anhembogwera uka hagwā kuri nde-rehe apoko kuri, he'i íxupe. —Xe po amoõ ramo nde-rehe akwera-ma, he'i Hesu-pe hasy va'ekwe kunha.

⁴⁸ —Ãy katu erekwera-ma. Xe rajy-rami voi oroporiahuvereko, he'i kunha-pe imbopy'agwapy-vy Hesu. —Nde erejerovia-ma xe-rehe. Upéa-gwi erekwera-ma. Ne resãi porã-ma. Nde py'agwapy reheve tereho, he'i Hesu íxupe.

⁴⁹ Onhe'ẽ javé kunha-pe, ou mburuvixa Jairo róga-gwi omombe'u:

—Omano ete-ma nde rajy. Ndovalevéi, natekotevéi oho mbo'eháry nde róga-py. Eheja katu toho, he'i mburuvixa-pe.

⁵⁰ Ha Hesu ohendu omombe'u ramo:

—Ani eremboasy teĩ. Ejervia katu xe-rehe. Ambogwera-ta íxupe, he'i túvy-pe.

Upéi oho ohexa omano va'ekwe.

⁵¹⁻⁵⁴ Ogwahé-ma ramo óga-py ndohejái avave oike indive. Pedro mante oike, João, Tiago, mitã ru, mitã sy ave oike. Upe va'e mante oike omoirũ-vy Hesu-pe.

Ha ijayvu joa hikwái gwī ndoikéi va'e kwéry. Hasẽmba hapirõ-vy.

Hesu ae he'i:

—Ani pene rasẽ teĩ, he'i. —Nomano tee mo'airy. Oke ae-ma oĩ-vy, he'i omano tee va'e-rehe.

Ha ha'e kwéry onhembohory hese hikwái.

—Omano ete-ma, he'i hikwái ohapirõ joa-vy.

Upéi oike Hesu mitã kunhagwasu oĩ va'e ha-py. Inhirũ mbohapy reheve, mitã kunha ru, isy ave ogweroike ondice. Oipopyhy mitã kunhagwasu-pe:

—Mitā kunhagwasu, epu'ã katu, he'i ohenói-vy mitā kunha omano va'ekwe-pe.

⁵⁵ He'i-ma ramo Hesu, oikove jevy mitā kunha. Pya'e opu'ã.

—Emongaru mani katu ne memby, he'i Hesu isy-pe.

⁵⁶ “Mba'éixa omoingove jevy íxupe?” he'i opondera eterei-vy hese hikwái. Ha Hesu katu he'i:

—A-rami xe amoingove jevyha kuri, ani ae teĩ xe mombe'u kuri, he'i íxupe kwéry Hesu.

9

Gwemimbo'e kwéry omundo Hesu

(Mt 10.1,5-15; Mc 6.7-13)

¹ Ha upéi katu Hesu ohenói doze gwemimbo'e kwéry-pe ojogweroaty hagwā henda-py.

—Xe nhe'ẽ-py emosẽ sëmba katu anháy imondo-vy, he'i íxupe kwéry. —Xe nhe'ẽ-py ereporombogwera-ta ave, he'i.

² —Tereho eremombe'u hagwā Nhandejáry rehewa nhe'ẽ. “Pemoirū katu Nhandejáry pende ruvixarā-pe” ere kuri xe mombe'u-vy, he'i íxupe kwéry. —Ha hasy va'e-pe erembogwera-ta ave, he'i íxupe kwéry imondo-vy.

³ —Ani ereraha mba'eve nde rupive. Nde pykoka ani ereraha teĩ. Nde plata ryru ani ereraha teĩ ave. Nde avio ani ereraha teĩ ave. Nde plata ani ereraha teĩ ave. Ne kamisa mokõi ani ave ereraha teĩ, he'i. —Nandi ete voi tapeho, he'i íxupe kwéry.

⁴ —Ereike ramo óga-py, epyta upe-py. Eresẽ peve upe tetã-gwi, eiko peteĩ óga-py. Ani erembopopa óga ereiko-vy.

⁵ Ha tetã mygwa kwéry nane mogwahéséiry ramo, eresẽ jave embovava nde py ho'apa hagwā yvy timbore nde py-gwi. Hekoha vaipaha eremombe'u hagwā emopotí porã nde py. He'i arã upe pygwa, “Nhande rekoha vai eterei-gwi nipo ra'e opy omopotí poť oho-vy” he'i arã nde-rehe. “Nhandejáry re'yí e'ŷ-rami nipo ra'e nhande kwéry rekoha” he'i arã gwekoha vaiha oikwaa-vy hikwái, he'i íxupe kwéry Hesu omundo-vy.

⁶ Aipo ramo oho hemimbo'e kwéry. Tetã'i tã'i-rupi onhemonhe'ẽ enterove-pe oho-vy. Nhandejáry Hesu Cristo rehewa nhe'ẽ porã omombe'u. Ha opa ohoha-rupi ombogwera hasy va'e-pe.*

Hesu rerakwā ohendu Herodes

(Mt 14.1-12; Mc 6.14-29)

⁷ Upe jave Galiléia pygwa mburuvixagwasu ohendu-ma Hesu rerakwā. Herodes mburuvixagwasu réry. Ohendu-ma ramo herakwā, he'i:

—Kiva'e tipo upe va'e, he'i opondera-vy.

Omombé'u joavy avy, omombé'u jokupe kupe rei íxupe. Oĩ he'i va'e Hesurehe: “João Batista amyrí voi ra'e ojehexa uka jevy ra'e” he'i rei va'e hese.

⁸ Oĩ ave he'i rei va'e hese: “Upéa ko myamyríkwe Elias ojehexa uka jevy ra'e” he'i rei hese. Oĩ ave he'i va'e hese: “Upéa ko yma myamyríkwe Nhandejáry nhe'ẽ-py omombe'u va'ety ojehexa uka jevy-ma ra'e” he'i rei va'e hese.

⁹ Upéa-rehe Herodes he'i:

—Kiva'e tipo upe va'e, he'i. —João amyrí anhakã'o uka va'ekwe ndaha'éi nipo ha'e voi ra'e, he'i mo'ã hese. —Aipo ramo kiva'e nipo aipo va'e ra'e, he'i rei hese. —Ahendu herakwā jokupe kupe rei. Ahexase eterei Hesu-pe, he'i.

Hesu ombopopóy heta va'e-pe cinco mbojape, mokõi pira ave

(Mt 14.13-21; Mc 6.30-44; Jo 6.1-14)

* ^{9:6} Lc 10.1-12

10 Upe rire hemimondo kwéry ou jevy-ma ramo Hesu renda-py omombe'upa íxupe. Ojapo japo va'ekwe omombe'u íxupe. Upe-ma ramo ha'e ogweraha íxupe kwéry Betsaida tetā-my omokane'ogwa-vy mo'ã ogweraha.

11 Oikwaa-ma ramo jepe kente kwéry oho hapykwéri. Ogwahē-ma ramo hikwái ojogweroohory ogwahē-vy Hesu ha-py. Omombe'u íxupe kwéry. Nhandejáry nhande ruvixarã rehewa nhe'ẽ omombe'u íxupe kwéry. Ha hasy va'e-pe ombogwera meme.

12 Ka'aru ete-tama ramo upe doze hemimondo kwéry ou onhemoagwíve-ma Hesu-gwi. He'i Hesu-pe:

—Ere ojogweroaty va'e-pe toho tetā mirī-rupi tetā jerekwe-rupi gwemi'urã toheka, oke hagwā ave, he'i Hesu-pe. —Ndaipóri mba'eve a-py, he'i Hesu-pe.

13 Ha'e katu he'i íxupe kwéry:

—Peẽ jepe peme'ẽ hemi'urã kwéry íxupe kwéry, he'i.

—Ndahetái nhane remi'urã, he'i —cinco mbojape, mokōi pira ka'ẽ mate oĩ, he'i. —Oroho-ta tipo orojogwa heta hetave hemi'urã kwéry hetave ho'u hagwā, he'i oporandu-vy Hesu-pe.

He'i ave íxupe:

—Heta eterei oime kente kwéry ko'a-py, he'i onhomongeta-vy Hesu-pe.

14 Haimete cinco mil Hesu nhe'ẽ renduhaty oime upe-py. Upéixa-gwi he'i hese kwéry “Heta eterei voi oime kente kwéry ko'a-py” he'i.

Ha Hesu he'i:

—Nahániry, pembogwapy uka katu íxupe kwéry. Cinqüenta oĩ va'e ojoypy ypy-py ogwapy hagwā, he'i gwemimondo kwéry-pe. —Ojogweroaty mirī mirī-vy pembogwapy uka íxupe kwéry, he'i íxupe kwéry.

15 Ha'e kwéry omombe'u enterove ogwapy hagwā. Ha ogwapypa-ma hikwái.

16 Upéi Hesu oipyhy upe cinco mbojape. Mokōi pira ave oipyhy. Upéi hovayva temi'urã-rehe omboete-vy. Hemime'erã-rehe Hesu otima porã Nhandejáry-pe. Upéi ombopopóy temi'urã. Ome'ẽ me'ẽ gwemimbo'e kwéry-pe ombogwejy hagwā enterove rovagwy-py.

17 Ha enterovete okaru. Hygwyatâmba-ma ave hikwái. Upéi ombohyru ho'u va'ekwe rembyre. Doze ajaka jevy joto ombohyru hembyre kwéry. Hynyhëmba.

“Nde ko Nhandejáry rembiporavokwe voi” he'i Hesu-pe Pedro

(Mt 16.13-23; Mc 8.27-33)

18 Hesu omundo jevy onhe'ẽ Nhandejáry-pe. Ha'enho ombojeupi onhe'ẽ. Ha hemimbo'e kwéry oĩ ave hendive. Upéi oporandu íxupe kwéry ojekwaa uka hagwā.

—Mbava'e tipo he'i ra'e kente kwéry xe-rehe? he'i oporandu-vy.

19 Ha'e kwéry he'i:

—Ne mombe'u joavy avypa kuri hikwái. “Yma myamyrī omano va'ekwe ojehexa uka jevy kuri nhande-vy” he'i joa kuri nde-rehe entero kente kwéry, he'i íxupe. —“João Batista amyrī voi ojehexa uka jevy nipo ra'e” oĩ he'i va'e nde-rehe. “Elias amyrī ojehexa uka jevy nipo ra'e” oĩ ave he'i va'e nde-rehe. “Myamyrī Nhandejáry nhe'ẽ-py omombe'u va'ety ojehexa uka jevy nipo ra'e” oĩ he'i ave va'e nde-rehe, he'i íxupe.

20 —Ha nde katu, mbava'e ere xe-rehe? he'i ave oporandu-vy íxupe kwéry.

Ha Pedro katu he'i:

—Nde ko Cristo voi, he'i íxupe. —Nde ko Nhandejáry rembiporavokwe voi nde, he'i íxupe Pedro.

²¹ —Ha'e voi xe. Ani ae katu xe mombe'u teĩ kuri avave-pe, he'i. —“Cristo nhane remiha'arõ voi upe va'e” ani peje teĩ avave-pe xe mombe'u-vy, he'i íxupe kwéry.

²² —Xe Nhande Ryke'y tee va'e voi ko xe, he'i. —Tekotevẽ xe ahasa asy aiko-vy. Xe mbojevy-ta judeu ruvixa kwéry, pa'i ruvixa kwéry ave, judeu rekombo'ehaty kwéry ave. Upéi xe jukase-ta hikwái. Ha xe juka uka-ta joty hikwái. Xe juka-ma rire, mbohapy áry rire aikove jevy-ma va'erã, he'i ojehegwa omotenonde-vy íxupe kwéry.

Hesu moirũse va'e rehewa nhe'ẽ

(Mt 10.38-39; 16.24-28; Mc 8.34-9.1; Lc 14.27)

²³ —Xe moirũse ramo anive ne rakate'ŷ nde rekove-rehe. Okurusugwasu-rehe omano va'erã-rami ae katu eiko nderejapovéi hagwã erejapose va'e. Xe reko-rupi ae ereiko meme hagwã.

²⁴ Gwekove-rehe hakate'ŷ va'e ndoikói va'erã voi Nhandejáry ndive. Ha xe-rehe ha-py gwekove-rehe nopenái va'e oikove meme va'erã Nhandejáry ndive.

²⁵ Ndovaléi va'erã nde-vy ko yvy apy gwive járy ramo ereiko hagwã, ne mba'e retave tave ererekó hagwã erepena e'ŷ Nhandejáry-rehe. Ndereiko porã ramo Nhandejáry ndive, ndovaléi arã nde-vy nde rekoha porã mo'ã. Ha'e nde joko-ta gwenda-gwi, he'i.

²⁶ —Ha kente gwapixa renda-py ogwenotí he'i hagwã, “Ajerovia-ma Hesu-rehe” he'i hagwã va'e, nohenduséi ave xe nhe'ẽ. Upéa-rehe xe ave, xe Nhande Ryke'y tee va'e voi, napena mo'ãi ave hese, he'i. —Xe amano rire aju jevy va'erã. Xe pu'aka resakã rehewe agwahé jevy va'erã aju-vy. Xe Ru pu'aka resakã rehewe agwahé jevy va'erã aju-vy. Hembigwái marangatu va'e yváy gwigwa va'e ndive agwahé jevy va'erã aju-vy. Ha upéixa aju ramo, napena pena mo'ãi hese kwéry xéhegwi otí va'ekwe-rehe, he'i voi.

²⁷ —Anhete ko xe ha'e-ta nde-vy. Oĩ a-py gwĩ nhane pa'ũ mygwa ohexa ranhe-ta mba'eixagwa pa oiko va'e Nhandejáry nhande ruvixarã. Ohexa e'ŷ rehewe nomano mo'ãi. Ohexa rire mate omano va'erã, he'i onhemombe'u-vy íxupe kwéry Hesu.

Hesu onhomoneta mokõi ojereropyahu jevy va'e ndive

(Mt 17.1-8; Mc 9.2-8)

²⁸ Peteĩ semana rire mbohapy ogweraha gwupive Hesu. Pedro, João, Tiago ave ogweraha omundo hagwã onhe'ẽ Nhandejáry-pe. Ogwerojeupi yvyatyrusu-rehe heraha-vy.

²⁹ Ha Nhandejáry ndive onhomoneta jave ojehekoviarõ-ma oiko-vy Hesu. Ijao imorotigwasu ete va'e voi. Nhande resa mbojevy ete hesakã-gwi ijao.

³⁰ Ha sapy'a mokõi va'e ojereropyahu jevy va'ekwe onhomoneta indive. Moisés, Elias ave

³¹ ojereropyahu jevy ramo va'ekwe ojehexa uka jevy íxupe. Nhandejáry omoendy porã ijere-rehe. Upe rehewe ojehexa uka. Hesu ndive onhomoneta jave ojehexa uka. Mba'e ojehu va'erã-rehe onhomoneta. Hesu ohasa asy va'erã Jerusalém-my. Ojuka-tama íxupe upe-py. Upéa-rehe onhomoneta-ma Hesu ndive upe mokõigwa.

³² Ha upe jave Pedro, inhirũ ndive hapehýi eterei-gwi oke hatã-ma oĩ-vy. Opáy-ma ramo, ohexa Hesu hendy ete rehewe. Mokõi indive onhomoneta va'e ave ohexa-ma ave.

³³ Ha upéi katu upe mokõigwa oje'óí-tama hikwái. Upe jave Pedro he'i Hesupe:

—Iporā voi japyta ko'a-py, mbo'eháry. Iporā arā orojapo-ta peē-my gwarā tapyirā. Peteī nde-vy gwarā, peteī Moisés pegwarā, peteī Elias pegwarā orojapo-ta, he'i Pedro. Onhemondýi eterei íxugwi ndoikwaáiry mba'e pa he'i.

³⁴ Onhe'ẽ jave omo'ã-ma íxupe kwéry arai. Oiko jave arai-py onhemondyipa íxugwi hexa-vy.

³⁵ Ohendu-ma arai pa'ũ-my onhe'ẽ va'e:

—Hesu xe ra'y tee, he'i. —Xe rembiporavo va'ekwe, he'i. —Ejeapysaka porā katu inhe'ẽ-rehe, he'i. —Inhe'ẽ-rupi eiko katu, he'i íxupe kwéry Nhandejáry.

³⁶ Opa-ma ramo upe va'e nhe'ẽ, ohexa Hesu anho-ma optyta oĩ-vy. Mokõi indive onhomongeta va'ekwe-pe ndohexavéi-ma. Upéa-rehe Hesu remimbo'e okiririmbá optyta-vy. Ohexa va'ekwe avave-pe ndoikwaa ukáiry.

Hesu omosẽ imondo-vy anháy

(Mt 17.14-21; Mc 9.14-29)

³⁷ Upéi áry ambue-ma ramo, ogwejy jevy hikwái yvyatyrusu ári-gwi. Ha heta eta ou ohogwaití-vy Hesu-pe.

³⁸ Upéi ojogweroaty va'e pa'ũ-my oĩ inhe'ẽ hatã va'e:

—Ajerure-ta nde-vy xe ra'y-rehe, mbo'eháry. Ha'e anhomí xe ra'y.

³⁹ Ha anháy ojepota-ma hese. Ogewereko ramo sapy'a ombosapukái oity imondo-vy íxupe, he'i omombe'u Hesu-pe. —Onhembohete hatã ombojuruyjuipa-ma íxupe. Omboheteryrýi oiko-vy oityha óra. Ndopoi mo'ãi voi íxugwi, he'i.

⁴⁰ —Ajerure rei ne remimbo'e-pe omosẽ hagwã mo'ã imondo-vy. Ndikatúi omosẽ, he'i Hesu-pe ojerure-vy gwa'ýry ombogwera hagwã.

⁴¹ Hesu katu he'i:

—Äyga katu ndojeroviái vyteri xe-rehe. Ndogwerovaséi gwekoha xe ndive oiko hagwã. Ndapyta are mo'ãi pene ndive. Ndoroipokwaa mo'ãvétama.

Upéi he'i túvy-pe:

—Eru katu nde ra'y xe ha-py.

⁴² Ou-tama ramo nogwahẽ jepéiry ramo, anháy oity jevy-ma íxupe imondo-vy yvy-py, omboheteryrýi íxupe. Hesu ae oja'o-ma anháy-pe:

—Epoi íxugwi. Anive erejepota hese, he'i anháy-pe ombogwera hagwã kunumí-pe.

Ombogwera-ma rire he'i:

—Eraha jevy nde ra'y, he'i túvy-pe.

⁴³ Ha entéro ohexa va'e opondéra nderá oiko-vy:

—Ipu'aka tee va'e voi nipo Nhandejáry ra'e, he'i hikwái hese.

Gwenonde-rupi Hesu omombe'u ojejukaha

(Mt 17.22-23; Mc 9.30-32)

Ha Hesu rembiapo porā ete-rehe opondéra-vy oiko jave, Hesu he'i gwemimbo'e kwéry-pe:

⁴⁴ —Pejeapysaka porā katu ko xe nhe'ẽ amombe'u va'erã-rehe peē-my. Ajekwaa uka-tama peē-my. Xe Nhande Ryke'y tee va'e xe mombe'u-ta voi xe pyhyharã-pe. Xe pyhy-ta xe reraha-ta kente kwéry xe juka hagwã, he'i.

⁴⁵ Ha Hesu nhe'ẽ katu ndoikwaái voi. Ojeapysaka rei hikwái ndoikwaái inhe'ẽ. Onhenhomí íxugwi, upéa-gwi ndoikwaái. Ha mba'eve noporandúi íxupe. Otí eterei oporandu hagwã.

Kiva'e po Nhandejáry ombotuvixave-ta?

(Mt 18.1-5; Mc 9.33-37)

⁴⁶ Ha onhomongeta onhondive hemimbo'e kwéry:

—Kiva'e opyta-ta onhembotuvixave hagwā —oporandu randu ojóupe. Onhembotuvixaseve mo'ā hikwái.

⁴⁷ Hesu ae katu oikwaa-ma joty mba'e-rehe onhepy'amongoeta hikwái. Upéa-rehe oipyhy mitā oyke-py omoī omombe'u hagwā íxupe kwéry hekorā.

⁴⁸ —Eremogwahē ramo mitā xe réry-py, ererovy'a ramo íxupe, xe mogwahē ave arā. Xe mogwahē ramo katu, eremogwahē ave arā xe mbouhare-pe ave, he'i. —Nonhemboete ukái va'e-pe Nhandejáry ombotuvixa-ta joty imboetevy, he'i.

*“Nhande-rehe ndaija'e'ŷi va'e nhane pytygwō va'e joty” he'i Hesu
(Mc 9.38-40)*

⁴⁹ Ha João katu he'i íxupe:

—Orohexa-ma kuri kwimba'e omosē ramo anháy-pe, mbo'eháry. Omosē imondo-vy nde réry-py. Ha upe va'e nanhane moirūi-gwi oro'e íxupe “Ani eremosē teĩ Hesu réry-py” oro'e kuri íxupe, he'i Hesu-pe João.

⁵⁰ Ha Hesu katu he'i:

—Ani erejoko teĩ íxupe xe nhe'ẽ-py oiko va'e. Nhande-rehe ndaija'e'ŷi va'e nhane pytygwō va'e joty, he'i íxupe.

Hesu ohose jevy Jerusalém tetā-my nhande-rehe ha-py ojejuka uka hagwā

⁵¹ Haimete ogwahē-ma hi'óra ojeupi jevy hagwā yváy-py. Upe-ma ramo he'i gwemimbo'e kwéry-pe:

—Taha jevy ranhe Jerusalém tetā-my, he'i.

Ohose eterei jevy Jerusalém-my.

⁵² Omondo gwenonderā gwī hendive okwa va'e. Osē-ma oho-vy ohexa hagwā Hesu rejupagwā. Jerusalém tetā rape ku'a-py rei Samaria yvy pygwa tetā'i-my ogwahēse mo'ā.

⁵³ Ha upe pygwa oikwaa-ma ramo Hesu ohose Jerusalém-my, nomogwahē mo'āi henonderā-rupi oho va'e-pe gwtā-my.

⁵⁴ Upéa-rehe hemimbo'e Tiago, João ave oporandu Hesu-pe:

—Mbo'eháry, ereipota tipo orohenói tata yváy-gwi ho'a hagwā ko tetā mygwa ári ohundipa hagwā íxupe kwéry, he'i oporandu-vy nomogwahē ukái-gwi íxupe upe pygwa kwéry.

⁵⁵ Hesu ojere ha onhemonhe'ẽ íxupe kwéry:

—Naháni. Ndikatúi. Ani erejapo vai hese kwéry, he'i. —Ndereikwaái vyteri xe ae xe rekoha.

⁵⁶ Xe Nhande Ryke'y tee va'e aju aresende hagwā kente kwéry. Nahundiséiry avave-pe, he'i onhemonhe'ẽ-vy íxupe kwéry.

Upéi ohasa oho-vy tetā'i ambue-py ogwahē oho-vy.

*“Xe moirū katu” he'i Hesu
(Mt 8.18-22; Lc 14.26-27)*

⁵⁷ Hesu ndive oje'ói hikwái. Ha peteĩ va'e he'i íxupe:

—Oromoírū meme-ta mamo ereho ha-py.

⁵⁸ Hesu ae he'i íxupe:

—Mba'eixagwa pa xe amombe'use peẽ-my. Agwara kwéry ogwerek okeha yvyrakwa, gwyra kwéry gwaity ogwerek. Ha xe, Nhande Ryke'y tee va'e, ndarekói xe rupagwā anhemokane'ōgwa hagwā, he'i oikwaa hagwā gwekorā.

⁵⁹ Peteĩ upe-py oĩ va'e-pe ae he'i:

—Xe moirū katu, he'i.

Upe va'e he'i Hesu-pe:

—Xe reja ranhe aha'arō hagwā xe ru omano. Upe rire ae-ma aha va'erā ne ndive oromoírū hagwā, he'i íxupe.

⁶⁰ Upéi:

—Nahániry. ãy voi aipota xe moĩru, he'i íxupe. —Xe moirũse e'ŷ va'e ae taimandu'a ranhe katu omano va'ekwe ojaty hagwā-rehe, he'i. —Nde xe moirũ meme katu, he'i. —Emoherakwā Nhandejáry nhande ruvixarā rehewa nhe'ẽ, he'i.

⁶¹ Upéi peteĩ va'e he'i jevy íxupe:

—Oromoírū-ta xe Járy. Taha ranhe tamombe'u xe róga ygwa-pe oromoírū hagwā, he'i Hesu-pe.

⁶² Hesu ae he'i íxupe:

—Xe moirũ katu. Kavaju-py om̄ba'apo va'e-rami ani erejapo. Kavaju omboasuru yvy jave ojeapa ramo, ojapo parī parī oho-vy. Gwapykwe-koty orepara-gwi ndohexái gwenonderā. Xe-rehe nderejerovia porāi ramo kavaju-py om̄ba'apo va'e-rami upéixa nde rekoha karē karē arā ave. Upéixa ramo ou ramo Nhandejáry nhande ruvixarā nande py'a porāi va'erā ereiko hagwā indive, he'i íxupe. —Ani ererepara rei teĩ nde rekokwe-rehe. Xe moirũ ae katu, he'i íxupe.

10

Setenta gwemimbo'e kwéry-pe omondo Hesu

¹ Upe rire oiporavo Hesu setenta kwimba'e omondo hagwā gwenonderā. Onhe'ẽ mombe'uharā omondo mokō mokōi tetā tetā-rupi oho hagwā.

² Arandu nhe'ẽ temitŷgwe kytiháry rehewa-rami oiporu omombe'u hagwā íxupe kwéry hekoharā. He'i íxupe kwéry:

—Tuvixa eterei voi kokwe ha temitŷgwe hi'aju va'ekwe heta eterei oĩ. Upéixa ave oĩ heta eterei nohendúi vyteri va'e Nhandejáry nhe'ẽ.

—Ha temitŷgwe kytiháry ndahetáiry. Ndahetáiry-gwi ojerure kokwe járy-pe ombohetave hagwā ikytiharā imondo-vy. Upéixa ete peẽ pejerure katu Nhandejáry-pe ombohetave hagwā onhe'ẽ mombe'uharā omosarambi hagwā onhe'ẽ.

³ —Tapeho, he'i ave íxupe kwéry. —Xe oromondo-ta ãy hembiapo vai va'ety ha-rupi, he'i. —Mymba ra'y jagwarete pa'ũ-my oiko va'e-rami peiko va'erā upe-py.

⁴ Ani ereraha mba'eve rei nde rupive. Ani ereraha ne mba'e ryru. Nde plata ryru ave, ani ereraha teĩ. Nde py rehewa ave ani ereraha teĩ. Ne rogwaiť ramo tape-rupi, ani joty erepyta teĩ.

⁵ Eregwahē-ma ramo óga-py ereike-ma ramo, ere-ta óga pygwa-pe “Nhandejáry tane mbopy'agwapy porā katu” ere arā óga pygwa-pe.

⁶ Upe óga pygwa kwéry ojohayhu porā ramo, ipy'agwapy porā va'erā. Ha ndojohayhu porāi ramo upe pygwa kwéry, ojevypa jevy arā nde-vy ne nhe'ẽ.

⁷ Peteĩ va'e óga-py mate erepyta. Ani erembopopa óga ereho-vy. Ome'ẽ arā ne remi'urā, ne mboy'u ave arā. Ani nde py'amirī teĩ erekaru hagwā. Om̄ba'apo va'e-pe ohembi'u me'ẽ voi.

⁸ —Tetā ambue-py eregwahē ereho-vy ramo, ne mogwahē porā ramo terepyta upe-py. Ne rembi'u me'ẽ rire tere'upa mani.

⁹ Terembogwera hasy va'e upe-py okwa va'e-pe ha teremombe'u mbe'u íxupe kwéry: “Hi'agwī-ma pendéhegwí hi'óra Nhandejáry oiko hagwā nhande ruvixarā” ere eremombe'u-vy, he'i Hesu gwemimondorā kwéry-pe.

¹⁰⁻¹¹ Upéi:

—Eregwahē ramo tetā ambue-py ha nane mogwahē porāi ramo, hape heta-rupi teregwata gwata-vy eremombe'u-vy. Enhe'ẽ hatā atā eremombe'u-vy, “Oĩ xe py-rehe ne retā timbore. Ambovava-ta xe py xe py-gwi ho'apa hagwā ereikwaa tee hagwā Nhandejáry nhe'ẽ nerehenduséiha. Ne mo'agwī-ma ra'e

ou-vy Nhandejáry nhande ruvixarā, ha nerehenduséi upe xe remimombe'u hesegwa nhe'ē. Upéixa-gwi napene arandu porāiry pejejavy-vy" emombe'u íxupe kwéry, he'i.

¹² —Anhetegwa ha'e-ta peẽ-my, Nhandejáry ojohu-ta enterovéa-pe hembiapokwe-rehe, ha ombohosa asy-ta ójehe ojerovia e'ŷ va'e-pe. Hekoha vai eterei va'ekwe Sodoma tetā mygwa kwéry. Upéixa-gwi Nhandejáry ombohosa asy va'ekwe íxupe kwéry. Ha ko'ãygwa nohenduséi ramo ne remimombe'u, nohenduséi-gwi ombohosa asy eterei va'erā íxupe kwéry. Sodoma tetā mygwa ohasa asy va'erā, ha upe ne nhe'ē xe rehewa nohenduséi va'e ohasa asyve va'erā.*

*Ovy'are'ŷ va'erā Hesu-rehe
(Mt 11.20-24)*

¹³ Upe rire Hesu omombe'u tetā ambue-rehe.

—Peẽ Corazim tetā mygwa kwéry apomboasy peẽ-my. Pehasa asy ete va'erā. Peẽ Betsaida tetā mygwa kwéry apomboasy peẽ-my. Pehasa asy va'erā. Hexapyrā-rupi xe rembiapo porā meme pene retā-my ajapo-ma pejerovia hagwā mo'ā xe-rehe. Ko'ãixagwa hexapyrā-rupi xe rembiapo porā ramo ra'e Tiro tetā-my, Sidom tetā-my, pya'e voi ojerovia arā araka'e xe-rehe upe pygwa kwéry. Omboasy arā araka'e gwembiapo vaikwe. Gwekohakwe-rupi ivy'are'ŷ va'e ao omonde arā araka'e, ivy'are'ŷ va'e renda-py ogwapy arā araka'e onhehapirō-ma voi arā araka'e. Tanimbu oipixy arā ójehe araka'e ojekwaa-vy. Ogwerova arā araka'e gwekoha, oiko arā mo'ā araka'e Nhandejáry reko-rupi. Ndaxe rexái-gwi ndojeroviái xe-rehe. Ohexa ramo araka'e, pya'e ogwerova arā gwekoha araka'e.

¹⁴ Kente kwéry hembiapo apokwe-rehe ojererekramo, hembiapo vai va'e-pe ombohosa asy va'erā Nhandejáry. Upe áry ombohosa asy voi arā Tiro tetā mygwa-pe, Sidom tetā mygwa-pe ave. Ha peẽ-my ombohosa asyve syve va'erā íxugwi upe tetā mygwa kwéry-gwi.*

¹⁵ Peẽ Cafarnaum tetā mygwa napenhembojeupi mo'āi Nhandejáry rendapy. Ndereho mo'āi yváy-py. Peẽ-my pene mbogwejy va'erā tatagwasu ogwe e'ŷ va'e-py, anháy renda-py peho va'erā, he'i Hesu omotenonde-vy gwekoha vai-gwi ndogwerovái va'e-pe.*

¹⁶ Upéi he'i gwemimondorā kwéry-pe:

—Kente ohendu ramo ne nhe'ē, xe nhe'ē ave ohendu-ma va'erā. Ha nderehe ija'e'ŷ va'e, ija'e'ŷ ave arā xe-rehe. Ha xe-rehe ija'e'ŷ va'e, ija'e'ŷ ave arā Nhandejáry xe mbouhare-rehe ave arā. Tereho xe renonde-rupi xe nhe'ē eremombe'u hagwā tetā tetā-rupi, he'i.

Hesu ha-py ogwahē jevy hemimondo kwéry

¹⁷ Ha upéi katu omombe'u mbe'u Hesu nhe'ē rire, ou jevy upe setenta hemimondo va'ekwe, Hesu ha-py ogwahē jevy ou-vy. Ovy'a ete rehewe ogwahē jevy omombe'u Hesu-pe:

—Mbo'eháry, ore nhe'ē-py osésëmba oje'óí-vy anháy hese omenda va'ekwe-gwi. Nde réry orohenói ramo, ore nhe'ē-py osëmba oje'óí-vy, he'i omombe'u Hesu-pe ov'y'a voi.

¹⁸ Ha'e katu:

—Ha'e voi. Ahexa-ma kuri anhaygwasu Satanás ho'a-ma yváy-gwi. Overa va'e-rami ho'a va'ekwe.

¹⁹ —Pejeapysaka porā katu xe nhe'ē-rehe. Xe apombopu'aka-ma opamba'e vai-rehe, anháy-rehe jepe apombopu'aka-ma joty. Ndojehu mo'āi peẽ-my

* **10:12** Gn 19.24-28 * **10:14** Is 23.1-18; Ez 26.1-28.26; Jl 3.4-8; Am 1.9-10; Zc 9.2-4 * **10:15** Is 14.13-15

mba'eve ivai va'e. Erepypy ramo mbói-rehe erepyrū rei va'erā joty. Japeusa-rehe ave erepyrū rei va'erā joty. Xe nhe'ẽ-py apombopu'aka-ma.

20 —Anháy kwéry ohendu-ma jepe ne nhe'ẽ, ani erekv'a joty teĩ upéa-rehe. Oĩ iporâve va'e nde-vy ne mbovy'a tee hagwā. Oiko-ma peteĩ teĩ pende réry yváy-py. Ohai uka va'ekwe Nhandejáry kwatia-rehe. Peẽ he'yí tee voi. Upéa-rehe ae voi peẽ pevy'a tee katu peiko-vy.

*Ovy'a voi oiko-vy Hesu
(Mt 11.25-27; 13.16-17)*

21 Ha upéi katu Hesu-pe ombohory ete Nhe'ẽ Marangatu tee va'e. Ovy'a eterei-gwi he'i:

—Oromboete voi katu, oromomba'egwasu ave xe Ru, yváy-py ereiko va'e. Nde ko, yváy Járy voi, nde. Nde ko, yvy Járy ave ko nde. Ne arandu, nde rekoha rehewa ereikwaa uka gwī ne arandu oikwaase va'e-pe. Ha onhemo'aranduseve va'e-pe nderejekwaa uka mo'ãiry nde. Eremokanhy uka ne arandu porã íxugwi. Nonhemo'arandusevegwasúi va'e-pe ae, gwī “Mitã-rami ne'írã aikwaapa” he'i ójehe onhemomixí-vy va'e-pe erejekwaa uka. Ne remimbota porã-rupi erejapo upéa. Ne arandu tee va'e nde, he'i Nhandejáry-pe omboete-vy.

22 Upéi he'i:

—Xe Ru omoĩ va'ekwe opa va'e xe pogwy-py. Xe mbopu'aka va'ekwe hese kwéry, he'i. —Ha xe kwaapaha ndaipóri. Xe Ru mate xe kwaapaha. Ha ndaipóri ave xe Ru kwaapaha. Xe ae, ta'yry, xe anho mante aikwaapa íxupe. Aikwaa ukase ramo ambue va'e-pe, ha'e ave oikwaapa va'erā xe Ru-pe, he'i Hesu ojekwaa uka-vy íxupe kwéry.

23 Upéi ojere onhe'ẽ mbegwe hagwā gwemimbo'e kwéry-pe.

—Ovy'a ete va'erā pene rembiexa exa ohexva va'e.

24 Ha'e-ta voi peẽ-my: Yma gware, Nhandejáry nhe'ẽ-py omombe'u va'ety amyrí kwéry, mburuvixagwasu amyrí kwéry ave oipota eterei mo'ã va'ekwe ohexva pene rembiexa va'e ha ndohexáiry. Xe, Nhandejáry rembiporavo va'e xe rexase eterei mo'ã va'ekwe. Ndaxe rexáiry. Ohenduse eterei mo'ã ave va'ekwe pene remiendu endu va'e ha nohendúiry. Ha peẽ pehendu-gwi pevy'a ete voi peiko-vy, he'i Hesu gwemimbo'e kwéry-pe.

*“Kiva'e tipo ahayhu-ta” oporandu Hesu-pe
(Mt 22.34-39; Mc 12.28-31)*

25 Upéi peteĩ judeu rekombo'ehaty omonhe'ẽ avyse mo'ã Hesu-pe. Moisés amyrí rembihaikwe-rehe omombe'u meme upe va'e ha he'i Hesu-pe:

—Mba'e tipo ajapo-ta opave e'ŷ hagwā xe rekove, mbo'eháry, he'i ombojavy ukase mo'ã-vy.

26 Ha Hesu katu he'i:

—Moisés amyrí ohai va'ekwe kwatia-rehe jaikwaa hagwā Nhandejáry remimombe'ukwe. Nde, eremonhe'ẽ kwatia nhe'ẽ kwaa va'e ereikwaa-ma ra'e eremombe'u jevy hagwā. Mba'e tipo eremonhe'ẽ upe-py? he'i Hesu mbo'eháry-pe oporandu-vy.

27 Upéi upe mbo'eha he'i jevy Hesu-pe:

—“Ejerovia katu Tupã Nhandejáry-rehe. Ehayhu íxupe nde py'apy gwive. Nde koty gwive ave ehayhu íxupe. Ne mandu'a meme hese hayhu-vy. Íxupe ehayhu mbaraete ete porã katu.” Ha “Ehayhu katu nde rapixa kwéry-pe. Nde ae nde rekoha erejehayhuha-rami ehayhu rei katu íxupe kwéry” he'i oikwaavvy.*

* **10:27** Dt 6.5; Lv 19.18

²⁸ —Ere porã —Hesu he'i upe mbo'eha-pe. —Upéixa erejapo ramo nde rekove opave'ŷ va'erã, he'i Hesu íxupe.

²⁹ He'i-ma ramo upe Moisés remimombe'ukwe-rehe mbo'eha onhembo-heko porãse mo'ã. Upéixa-gwi oporandu jevy Hesu-pe.

—Kiva'e-rehe he'ise xéhegwi hi'agwĩ va'e? Kiva'e tipo ahayhu-ta? he'i.

³⁰ Upéi Hesu omombe'u íxupe kiva'e jahayhu hagwã ojeporiahuvereko va'e rehewga nhe'ẽ-rami:

—Peteĩ kwimba'e ogwejy oho-vy Jerusalém tetã-gwi, he'i. —Ohose mo'ã Jericó tetã-my upe judeu va'e. Tape ku'a-rupi hekoha vai va'e oipyhy íxupe. Oipe'a ijao, oinupã íxupe, ogwerahapa imba'e kwéry omondapa íxugwi. Mba'eve ndohejáí íxupe. Ogwerahapa imba'e kwéry íxugwi. Ha oinupã eterei-gwi haimete ojuka íxupe. Omano-tama ramo oheja íxupe tape yke-rehe.

³¹ —Upe rire, oime jave tape yke-rehe ou pa'i judeu kwéry ruvixa pa'i va'e. Ohex-a-ma ramo omano-tama va'e ohasa rei joto tape yke rovái-rupi oho-vy. Noipytygwõi hasy va'e-pe.

³² —Upéixa ave ojapo pa'i pytygwõha ave. Noipytygwõi omano-tama va'e-pe. Ogwahẽ-ma ramo henda-py, ohex-a-ma ramo íxupe oikupe'o hasy va'e-pe oho-vy.

³³ —Upéi peteĩ Samaria pygwa va'e ogwahẽ ou-vy tape-rupi. Samaria yvy pygwa judeu kwéry-rehe ija'e'ŷ va'e jepe, ohex-a-ma ramo omano-tama va'e-pe, oiporiahuvereko íxupe.

³⁴ Ha'e ae jepe oipytygwõ judgeu va'e-pe. Oipohano íxupe. Ikutu hagwe-py omoĩ óleo, omoĩ ave vinho, ombogwera hagwã. Upéi ojokwa ave íxupe ikutu hagwe. Upe rire ohupi gwenda ári ogweraha hagwã ombohupa róga-py. Upe-py onhangareko hese.

³⁵ —Ko'ẽmba-ma ramo, oho mombyry e'ŷ ngatu, upe Samaria pygwa on-homongeta mbohupa róga járy ndive. He'i: “Taha xe tape puku-rupi. Mom-byryve aha-ta. Ko, mokõi plata ame'ẽ-ta nde-vy. Enhangareko porã ko hasy va'e-rehe xe rekivia enhangareko porã hese” he'i. “Ereiporupa ramo ko plata hese erenhangareko-gwi, hetave ame'ẽ-ta nde-vy. Agwahẽ jevy ramo hepyve ramo ame'ẽ jevy-ta nde-vy. Enhangareko porã hese xe rekivia” he'i mbohupa róga járy-pe, he'i Hesu arandu rehewga nhe'ẽ mombe'u-vy.

³⁶ Upéa omombe'u rire, Hesu oporandu mbo'eha-pe:

—Mbohapy ohex-a upe haimete omano va'e-pe. Nde-vy ramo kiva'e tipo onhangareko hese ohayhu va'e ramigwa? he'i oporandu íxupe onhemonhe'ẽ-vy.

³⁷ —Upe oiporiahuvereko íxupe va'e, he'i Hesu-pe.

—Upéixa voi, he'i Hesu. —Ha nde, nde ave tekotevẽ ereiporiahuvereko kente kwéry-pe ave, he'i Hesu upe oity vai ukase mo'ã va'e-pe.

Hesu oho Marta kwéry róga-py oipohu-vy

³⁸⁻³⁹ Hesu, gwemimbo'e kwéry ndive, ogwahẽ oike-vy tetã'i-my. Ogwahẽ-ma ramo optyta Marta róga-py. Ha ikypy'y Maria oime ave hóga-py ogwapy oĩ-vy Hesu ha-py ohendu hagwã inhe'ẽ. Ohenduse eterei inhe'ẽ naimandu'avéi mba'eve-rehe.

⁴⁰ Ha tykéry katu ojapura pura ombo'apo-vy. Hemi'urã heta ojapo-vy oho ou oho ou. Upéi ou Hesu-pe ojapura-vy:

—Nerepena mo'ãi tipo xe-rehe, xe Járy? Xe kypy'y xe reja rei. Naxe pytygwõiry, he'i. —Xe ae ajapopa hagwã nhane remi'urã xe reja ou-vy naxe pytygwõséi para'e, he'i okypy'ýry-rehe. —Ere íxupe xe pytygwõ hagwã, he'i Hesu-pe.

⁴¹ Ha Hesu he'i:

—Nahániry, he'i íxupe. —Nde erejapura eterei opamba'e-rehe. Nande py'agwapyvéi-ma, he'i íxupe.

⁴² —Nanhaikotevē mo'āi heta mba'e-rehe, Peteñ mate nhaikotevēve va'e. Ha nde kypy'y katu imandu'a upéa-rehe. Íxupe gwarā opa e'ŷ va'erā-rehe imandu'a, he'i Hesu onhemonhe'ẽ-vy Marta-pe.

11

Koixagwa nhandomongeta Nhandedjáry ndive (Mt 6.9-15)

¹ Gwemimbo'e kwéry ndive Hesu oime peteñ henda-py. Upe jave Hesu omondo mondo onhe'ẽ Nhandedjáry-pe. Onhe'ẽmba-ma rire, peteñ indive oĩ va'e he'i íxupe ojerure-vy:

—Ore Járy, emombe'u ore-vy orombojeupi kwaa hagwā ore nhe'ẽ Nhandedjáry-pe, he'i. —João araka'e omombe'u gwemimbo'e kwéry-pe. Upe va'e ramigwa ave, nde emombe'u orombojeupi kwaa hagwā ore nhe'ẽ Nhandedjáry-pe, he'i ojerure-vy íxupe. Oporandu onhe'erā-rehe.

² Aipo ramo Hesu he'i omombe'u-vy:

—Koixagwa nhane nhe'ẽ Nhandedjáry ndive nhandomongeta porā ramo: “Ore Ru” ja'e-ta. “Tonhemomarangatu kena nde réry. Nde ko ore ruvixa voi. Xe ruvixa ete ko nde, te'i enterove nde-vy.

³ Ha ãy katu eme'ẽ meme ore-vy ãy gwarā ore remi'urā, ore remikotevē ave eme'ẽ ore-vy.

⁴ Ore poriahuverekko katu ore rembiapo vaikwe-rehe anive hagwā ne mandu'a hese. Ore-rehe hembiapo vai va'ekwe-pe oroiporiahuverekoharami, ore poriahuverekko katu. Ani tei ereheja ore rekombo'e vai anháy.”

Aipo-rami voi nhandomongeta Nhandedjáry ndive, he'i íxupe kwéry.

Hemikotevē-rehe ojerure va'e-rami rehewa nhe'ẽ (Mc 11.24-25; Lc 18.1; Rm 12.12; Ef 6.18; 1 Ts 5.17)

⁵⁻⁷ Upéi omombe'u íxupe kwéry arandu rehewa nhe'ẽ. Hemikotevē-rehe ojerure rure va'e rehewa nhe'ẽ-rami omombe'u:

—Nde, ne remikotevē-rehe ereho nde re'yi róga-py. Pyhare mbyte-py ogwahē ramo ne mbohupa, ha ndaipóri ramo hemi'urā, ereho nde re'yi róga-py erejerure-vy hemi'urā-rehe. “Eme'ẽ xe-vy xe mbohupa ho'u va'erā” ere erejerure-vy. “Mbohapy mbojape eme'ẽ xe-vy amongaru hagwā íxupe. Ogwahē kuri xe mbohupa. Ha xe, ndarekói hemi'urā ame'ẽ va'erā” ere nde re'yi-pe. Oĩ ramo kóixa he'i va'e nde-vy: “Oronhenomba-ma. Mitā kwéry ndive oronheno-ma. Okepa-ma mitā. Ndikatúi apu'ã aipe'a hagwā ore rokē.”

⁸ Oĩ ramo aipo-rami he'i va'e nde-vy, erejerure rure jevy va'erā. Nde re'yi-gwi jepe nopu'ã mo'āi joto. Erejerure eterei-gwi joto opu'ã va'erā ome'ẽ va'erā nde-vy ne remikotevē, he'i omombe'u-vy arandu rehewa nhe'ẽ.

Hesu omombe'u gwemiendu kwéry ojapo hagwā oraçāo (Mt 7.7-11)

⁹ —Ha xe katu, xe ha'e-ta peẽ-my: Upéixa va'e-rami tekotevē erejerure rure Nhandedjáry-pe. Ejerure rure katu íxupe, ne rembijerure ome'ẽ va'erā nde-vy. Eheka eka katu ndejéupe gwarā. Ne rembieka katu erejohu va'erā. Okē onhemboty va'e oipe'a uka hagwā ombota mbota va'e-rami, pene kyre'ŷ katu pejapo hagwā oraçāo. Nde-vy oipe'a-ma va'e-rami okē, ohendu va'erā Nhandedjáry pene nhe'ẽ.

¹⁰ Gwī ojerure rure va'e-pe gwive ome'ẽ va'erā. Gwī oheka heka va'e gwive ojohu va'erā. Gwī ombota mbota va'e-rami oha'arō oĩ-vy va'e-pe gwive ojope'a va'erā.

11 —Nde, túvy kwéry, ereme'ẽ mba'e porã nde ra'y kwéry-pe. Pão-rehe ojerure ramo, pão rekoviārã avave nome'ẽi ita gwa'ýry-pe. Upéixa ave pira-rehe ojerure ramo, pira rekoviārã avave nome'ẽi mbói íxupe.

12 Yrygwasu rupi'a-rehe ojerure ramo, hekoviārã avave nome'ẽi japeusa íxupe.

13 Peẽ kwéry pende rekoha vai ramo jepe, peme'ẽ kwaa joty iporã porã va'e pene mitãgwe-pe. Ha pende Ru yváy pygwa katu hekoha porã tee va'e. Upéa-gwi ome'ẽ kwaa porãve voi peẽ pejerure va'e-pe. Omohynyhẽ-ta nde py'a Nhe'ẽ Marangatu tee va'e. Ojerure va'e py'a omohynyhẽ-ta.

“Ndaha'éi Belzebu nhe'ẽ-py amosẽ anháy kwéry” he'i Hesu

(Mt 12.22-30; Mc 3.20-27)

14 Ha upéi katu Hesu omosẽ kwimba'e-gwi anháy imondo-vy. Anháy ojepota hese-gwi nainhe'ẽi, inhe'ẽnge'ỹ va'e. Anháy osẽ-ma ramo íxugwi, onhe'ẽ jevy-ma. Upéa-rehe,

—Mba'éixa po oporombogweraha? he'i ojóupe opondera-vy Hesu-rehe.

15 Ha gwĩ ipa'ũ-my oĩ va'e he'i rei Hesu-rehe:

—Belzebu ojepota ra'e hese, Hesu-rehe, he'i. —Belzebu anháy ruvixa. Upéa-gwi Belzebu nhe'ẽ-py omosẽ anháy imondo-vy, he'i rei Hesu-rehe.

16 Ha kente ambue he'i ave íxupe:

—Orohexase ne rembiapo porã voiha. Nderejapo kwaái para'e, erejapo kwaa para'e. Yváy-gwi hexapyrã-rupi orohexase erejapo ramo, he'i ave Hesupe.

Opú'akaha oiporu avy ukase mo'ã íxupe hikwái.

17 Ha Hesu katu oikwaa-ma ipy'a-py onhemongeta okwa-vy ramo. Upéa-rehe he'i íxupe kwéry:

—Ndaha'éi Belzebu nhe'ẽ-py amosẽ anháy kwéry, he'i. —Mburuvixa reminhangareko kwéry ndaijojái ramo, onhorairõ ramo, ndikatuvéi arã oiko porã onhondive. Upéixa ave óga pygwa kwéry ndaijojái ramo, onhorairõ ramo, ndikatuvéi arã oiko porã onhondive.

18 Ha anháy ruvixa Satanás re'yí kwéry ave ndaijojái ramo ra'e, onhorairõ ramo ra'e ave, ndikatuvéi arã ra'e oiko porã ra'e anhaygwasu gwe'ýi ndive. Ndoikovéi arã ra'e gwe'ýi kwéry-pe mburuvixa. Aipo ramo omosẽ arã mo'ã ra'e avave-gwi anhaygwasu pe anháy ruvixa va'e réry-py voi, he'i. —Ere rei kuri xe-rehe, “Belzebu nhe'ẽ-py omosẽ anháy imondo-vy” ere rei kuri xe-rehe.

19 —Ha pende re'yí kwéry omosẽ ave anháy imondo-vy. Ma'erã-gwi nderéiry “Belzebu nhe'ẽ-py omosẽ anháy imondo-vy nhande re'yí kwéry”? Upéa ndere mo'ãi nde re'yí-rehe. Nde re'yí kwéry rembiapokwe-rehe enterove oikwaa ne akã tavyha, ne rembiapo vaiha ave.

20 —Ndaha'éi Belzebu nhe'ẽ-py xe rembiapo. Nhandejáry nhe'ẽ-py voi amosẽ mosẽ imondo-vy anháy kwéry, he'i. —Aipo ramo, xe rekoha-rehe pehexa kwaa ramo ra'e, “Oiko-ma nipo Nhandejáry nhande ruvixa ramo ra'e” peje arã ra'e xe-rehe, he'i.

21 Imbaraete va'e rehewa nhe'ẽ-rami omombe'u arandu nhe'ẽ. Anháy-rehe opú'akaveha omombe'u.

—Omonda va'e ndoikéiry imbaraete va'e róga-py. Onhangareko voi ombo'e-rehe.

22 Ogwahẽ-ma ramo imbaraeteve va'e ipu'aka va'erã hese, oipe'apa-ma va'erã íxugwi. Inhemombaraeteha, imba'e kwéry ogwerahapa arã íxugwi omboja'o ja'o arã gwapia-pe ime'ẽ-vy.

23 —Xe ndive omba'apo e'ŷ va'e, ojoko xe rembiapo. Xe renda-py ogwenogwa'ē e'ŷ va'e, xe renda-gwi mombyry omosarambi-vy, he'i Hesu onhemombe'u-vy.

Anháy ou jevy gwendagwe-py

(Mt 12.43-45)

24 Upéi he'i jevy:

—Ojepota va'ekwe hese osẽ rire, ogwata gwata jevy-ma oiko-vy anháy. Opytu'u renda-py oheka eka-vy ojehasa asa y e'ŷha renda-rupi. Ha ndotopái gwenagwā. “Xe rendagwe-py jevy aha-ta, asẽ hagwe-py aha jevy-ta” he'i ojéupe.

25 Ogwahē jevy-ma ramo ohexa gwendagwe. Omoatyrõmba-ma opy'a kwimba'e. Ndaiporivéi anháy ipy'a-py. Gwendagwe ohexa jevy: “Iporã voi xe rendagwe” he'i, “Opyta rei” he'i ojéupe kwimba'e py'a-rehe. “Óga járy oitypei porã rire, omoi porã jevy imba'e kwéry omopotí-vy. Upéixa upe óga járy-rami omopotí opy'a kwimba'e ra'e. Opyta rei xe rendagwe” he'i anháy ojéupe.

26 Upe-ma ramo, oho oheka oirûrã kwéry. Sete anháy ojohu ivaive va'e ojéhegwí. Ogweru, omoinge jevy gwendagwe-py. Oike rire pe kwimba'e reko ivai voi. Are va'ekwe pe kwimba'e peteñ anháy ojepota hese ramo, omboheko vai voi íxupe. Ha ãy katu ombohekoha vaive ive, he'i Hesu omombe'u-vy.

Ovy'a ete va'e

27 Upe he'i jave peteñ kunha omboaty va'e pa'ũ-gwi osapukái:

—Tovy'a katu nde sy, he'i, —ne mokambuhare, ne moingohare. Tovy'a voi katu he'i omboete-vy íxupe.

28 Hesu katu:

—Tovy'ave katu Nhandejáry nhe'ẽ renduha inhe'ẽ-rupi ogwata va'e tovy'ave xe sy-gwi, he'i.

“Ipu'aka ete tee va'e Nhandejáry” he'i Hesu

(Mt 12.38-42)

29 Ha upéi katu Hesu omombe'u jevy ojogweroaty va'e-pe:

—Ãygwa heko vai voi Nhandejáry-rehe. Inhe'ẽ ndojaposéi-gwi, ndojeroviaséi ave xe-rehe. “Ne rembiaporã avave ndohexái vyteri va'e ramigwa erejapo ramo, oroikwaa arã mba'exagwa nde” ere rei xe-vy. Upéa erhexa hagwā ndajapo mo'ãi.

—Pene mandu'a katu myamyrí Jonas rehewa nhe'ẽ-rehe.

30 Yma va'ekwe Nhandejáry momondo myamyrí Jonas-pe oho hagwā Nínive tetã-my. Upe tetã mygwa kwéry oikwaa hagwā ipu'aka tee va'e voi Nhandejáry, Jonas oho upe-py. Ha xe ave, Jonas ramigwa xe mbou ave Nhandejáry pende ha-py. Xe Nhande Ryke'y tee va'e voi xe mbou ãygwa oikwaa porã hagwā ipu'aka teeha Nhandejáry.

31 —Ha'e-ta ave peẽ-my: Gwenonde-py Nhandejáry ombojogweroaty va'erã kente kwéry peteñ tei ogwerekohagwā hembiapokwe-rehe. Upe-py ko'ãygwa onhembo'y ramo ojekwaa hagwā hembiapokwe. ãygwa onhembo'y jave, yma gware kunha mburuvixa Sabá tetã mygwa onhembo'y ave omombe'u hagwā pene rembiapo vaiha.

—Upe kunha amyrí ou va'ekwe amo mombyry ete ko yvy apy gwive ou ohendu hagwā mburuvixagwasu Salomão amyrí. Ha xe aiko ko'a-py pene pa'ũ-my. Xe tuvixave myamyrí Salomão-gwi. Aikwaave íxugwi ha naphehenduséi xe nhe'ẽ. Upe pene rembiapo vaiha-rehe omombe'u va'erã upe kunha.

³² Ha yma gware Nínive pygwa kwéry opu'ã va'erã onhembo'y. Äygwa omombe'u-vy onhembo'y va'erã Nhandejáry renonde-py. Pene rembiapo vaiha omombe'u va'erã. Ha'e kwéry ohendu-ma va'ekwe Jonas remimbo'e. Inhe'ẽ ohendu-gwi ogwerova gwekoha va'ekwe. Ojerovia-ma va'ekwe Nhandejáry-rehe. Ha xe aiko ko'a-py. Xe tuvixave myamyrí Jonas-gwi, ha nape-hendu mo'ãi xe nhe'ẽ, he'i onhemombe'u-vy.

Tataendy rehewa nhe'ẽ

(Mt 5.15; 6.22-23)

³³ Upeí he'i jevy ojogweroaty va'e-pe:

—Nanhamoendýi tataendy nhanhomí hagwã. Nanhamoíry mba'e ryru gwy-py. Tataendy nhamoendy nhamoí hagwã hendaty-py ohesape porã hagwã oike va'e-pe.

³⁴ —Upéixa ave nhande resa. Hesãi porã ramo nhande resa, jahexá porã. Hembipe porã-rupi jagwata porã. Upéixa nde py'a porã ramo, Nhandejáry arandu ohesape nde py'a-py hemimbota-rupi ereiko hagwã. Ha nde resa hasy ramo, nde resa ivai ramo katu, nande resapysovéi-ma. Ndereiko porãvéi-ma. Pytû-my vérami rei ereiko. Opyta rei ndéhegwí Nhandejáry arandu.

³⁵ —Erepara katu nde py'a reko-rehe. Nande py'a porãi ramo, pytû-my rei vérami ereiko va'erã.

³⁶ Nde py'a porã meme ramo, nde py'a vai e'ŷ rehewe erhexa porã va'erã. Tataendy nde resape porãha-rami erhexa porã va'erã, he'i onhemonhe'ẽ-vy upe pygwa kwéry-pe.

Hesu onhemonhe'ẽ fariseu kwéry-pe, tekoha mbo'eha kwéry-pe ave

(Mt 23.1-36; Mc 12.38-40)

³⁷ Onhemonhe'ẽmba rire Hesu, peteĩ fariseu va'e he'i íxupe:

—Jaha katu xe róga-py jakaru hagwã, he'i Hesu-pe.

Upéixa-gwi oho indive. O gwahé-ma ramo ogwapy okaru hagwã.

³⁸ Ha Hesu ndojepohéiry okaru hagwã judeu kwéry ojapoha-rami. Upéa-rehe upe fariseu he'i ojéupe: "Ma'erã-gwi ndojepohéiry Hesu? Nhande re'yi kwéry ojapoha-rami ndoikóiry" he'i opy'apy-py opondera-vy hese.

³⁹⁻⁴¹ Upéi Hesu he'i íxupe:

—Peẽ fariseu kwéry erejohéi ramo copo, nha'ẽ ave, ijape meme rei mate erejohéi. Nderejohéiry ipy. Jahexá ramo, "Omopotí porã poku" ja'e mo'ã. Ha neremopotí porãi joty ra'e. Ipy iky'a vyteri. Upéixa ave peẽ, nde py'a ky'a meme ne rembiapo vai-gwi. Pendejéupe gwarã peipotave tave. Upéixa ave eremonda monda-py ereiko, nane arandu porãi. Nderekwaaí para'e ijapejapaha ipy'a ave ojapo va'ekwe. Ha'e-ta ko pe'ẽ-my: Ejepy'a me'ẽ kena Nhandejáry-pe. Upe rire nde py'a potõha rexá uka-vy eme'ẽ iporahu va'e-pe ne remime'ẽrã.

⁴² —Apomboasy voi peẽ-my, fariseu kwéry. Pehasa asy va'erã peẽ. Nhande re'yi ojapoha-rami pejapo meme ha Nhandejáry remimbota tee nderejapói. Pene mandu'a porã peme'ẽ hagwã pene mba'e Nhandejáry-pe, ha napene mandu'ái ae peïko porã hagwã indive, kente kwéry ndive ave. Ne rembiapo porã-rehe erejerovia eterei. Eremboaty mirí mirí ne mba'e kwéry dez oĩ va'e meme eremboaty. Ha upe rire ereipe'a dez-gwi peteĩ ereme'ẽ va'erã Nhandejáry-pe. Hembyre opyta va'erã nde-vy. Mixí mixí va'e gwive ereme'ẽ Nhandejáry-pe. Ereme'ẽ itái va'e, pohã ka'agwy pygwa ave, temitýgne nhane remimbojehe'a va'e ereme'ẽ ave. Upéa erejapo ramo iporã. Nhande re'yi ojapoha-rami erejapo upe va'e mba'e ereme'ẽ meme hagwã Nhandejáry-pe. Oĩve joty erejapo va'erã íxupe. Tapejogwereko porã katu. Tapehayhu rei katu

Nhandejáry-pe. Upéixa mixíve va'e-rehe pende resarái e'ŷha-rami ave, pepena katu tuvixave va'e-rehe, he'i onhemboasy-vy fariseu kwéry-rehe.

43 —Apomboasy voi peẽ-my, fariseu kwéry. Pehasa asy va'erã peẽ penhemboetese rei-gwi, he'i. —Ojeporahéi haty-rupi ereho penhemboetese rei hagwā. Upéixa-gwi eregwapyse mburuvixa kwéry pa'ū-my ha peho ramo mba'ejogwa haty-py ereipota enterove ne mboete rei.

44 —Apomboasy voi peẽ-my, pemohembiapo vai uka kente kwéry-pe. Upéa-rehe erehasa asy va'erã, he'i. —Peẽ peikwaa naporãi voi judeu kwéry ogwata hetekwe renda ári. Ha oĩ omano va'ekwe retekwe omoĩ rei itagwy-py hendaty e'ŷ-py omoĩ. Upéi oikwaa e'ŷ-gwi judeu ogwata arã hi'ári. Ndoikwaái-gwi ojapo vai arã. Ha peẽ fariseu kwéry upéixa ave penhom kente kwéry-gwi Nhandejáry nhe'ẽ hi'arandurāgwe ha upéixa pemohembiapo vai uka íxupe kwéry, he'i Hesu onhemonhe'ẽ-vy.

45 Upéa-rehe he'i íxupe peteĩ teko mbo'eha:

—Mbo'eháry, upéixa ramo ere vai ore-rehe ave, erenhe'ẽngi arã mo'ã ore-rehe, he'i Hesu-pe ndovy'áiry-gwi. Ndojohu porãi inhe'ẽgwe.

46 Ha Hesu katu he'i:

—Apomboasy voi peẽ-my peẽ Moisés remimombe'ukwe mbo'eha kwéry, pehasa asy-ta ave. Pene rembiapo vai kente kwéry-rehe. Pemombe'u ramo Nhandejáry nhe'ẽ, Moisés amyrĩ ohai va'ekwe, hasyve nhe'ẽ pemombe'u. “Tapeiko ko nhe'ẽ-rupi” peje rei pene renduha kwéry-pe. Mba'e ipohýi eterei ogweraha mo'ã hagwāixa pene remimombe'ukwe oiko íxupe kwéry. Ha, “Tapeiko ko nhe'ẽ-rupi” peje hese. Peẽ ae ndereiko mo'ãi va'erã upe ne remimombe'ukwe-rupi.

47 —Pehasa asy-ta ave pene rembiapo vaikwe-rehe. Myamyrĩ kwéry pene ramoigwasu kwéry ojuka meme va'ekwe Nhandejáry nhe'ẽ-py omombe'u va'ety-pe. Ha peẽ katu pemopu'ã ita'i pemoĩ porã hagwā ijukapyre rendagwe-py.

48 Upéa-rupi pemořru joty hembiapo vai va'e kwéry-pe. “Hembiapo porã oiko-vy va'ekwe nhane ramoigwasu” peje joty pemombe'u-vy. Nhandejáry nhe'ẽ omombe'u va'ety-pe ojuka va'ekwe, ha ãy katu peẽ pejohu porã upe hembiapo vaikwe.

49 —Upéa-rehe Nhandejáry, inharandu tee va'e, he'i va'ekwe:

“Amondo-ta íxupe kwéry xe nhe'ẽ-py omombe'u va'ety, xe nhe'ẽ mosaram-bihaty ave. Oĩ arã gwĩ pene rembijuka ukarã. Oĩ ave arã gwĩ pene remimbohosa asyrã”

he'i va'ekwe Nhandejáry omombe'u-vy, he'i Hesu onhemonhe'ẽ-vy íxupe kwéry.

50-51 —Ha ha'e-ta peẽ-my, he'i. —Upéa he'i va'ekwe Nhandejáry ombohosa asy hagwā ãygwa-pe ave. Ymagware inhe'ẽ-py omombe'u va'ety kwéry jukahare-rehe ombohosa asy-ta ãygwa-pe ave.

—Ymagware Abel amyrĩ gwive Zacarias amyrĩ peve ojuka meme va'ekwe Nhandejáry nhe'ẽ mombe'uhaty-pe. Zacarias amyrĩ-pe ojuka Nhandejáry roka-py. Mymba ohapyhaty renda ypy-py onhegwahé e'ŷ haty renonde-py ipa'ū-my oime jave Zacarias amyrĩ, ojuka va'ekwe ave íxupe. Ha ãygwa, “Iporã rei” he'i mo'ã ymagware rembiapokwe-rehe. Upéixa-gwi, ymagware rembiapo vaikwe ojohu porã-gwi ombohosa asy-ta ave ãygwa kwéry-pe Nhandejáry.

52 —Apomboasy voi peẽ-my, peẽ Moisés remimombe'ukwe mbo'eha kwéry. Pevy'are'ŷ va'erã. Naiporãi pende rekoha. Pemonhe'ẽ rei rei meme Nhandejáry nhe'ẽ. Ndaperoviaséi íxupe. Ha hese ojeroviase va'e-pe ndapehejái

oyerovia ave hese peiko-vy. Upéa-rehe pehasa asy-ta voi, he'i Hesu Moisés amyrī remimombe'ukwe omombe'u va'e kwéry-pe onhe'ē-vy.

⁵³ He'i rire, Hesu osē oho-vy upe fariseu róga-gwi. Osē rire judeu rekombo'ehaty kwéry, fariseu kwéry ave opyta ipoxy hese. Ombojevy jevy inhe'ē. Oporandu opaixagwa-rehe omonhe'ē avy ukase mo'ā hagwā hikwá. Oheka heka rei ndotopái hembiapo vaikwe.

⁵⁴ Inhe'ē-rehe, hembiapo-rehe hembiapo vai ombojase mo'ā hese. Ha ndikatúi omboja rei hese. Hembiapo porā meme mate Hesu.

12

*“Pene mbotavyse fariseu kwéry” he'i Hesu kente kwéry-pe
(Mt 10.26-33)*

¹ Upe jave ojogweroaty aty heta kente. Heta eterei-gwi onhomoanhamba, opyrūmba ojóehe. Ha Hesu katu gwemimbo'e kwéry-pe ranhe he'i:

—Ani kena ererovia rei fariseu nhe'ē. Pene mbotavyse. Mbojape mbovuha nhanhomihā-rami opy'a ky'aha omo'ā kwa, he'i. —Ani katu upéixa ereiko teī.

² Omokanhy va'ekwe gwive ojehexa uka jevy joty va'erā. Nhane reminhomigwe gwive ojekwaapa joty va'erā.

³ Opa ne remimombe'ukwe nhemi ha-py ere va'ekwe, atýra-py ohendu endu va'erā. Ere mbegwe mbegwe va'ekwe nde róga-py omombe'u hatā hatā jevy va'erā. Enterove remiendurā-rupi omombe'u hatā hatā va'erā. Fariseu rekoha-rami ani ereiko teī, he'i Hesu ohekombo'e-vy gwemimbo'e kwéry-pe.

⁴ He'i ave Hesu:

—Peē, xe rembiayhu va'e kwéry, ani erekhyje rei teī. Oī nhande rete jukaharā. Nhane nhe'ēgwe-rehe ae ndaipu'akáiry voi. Ani erekhyje rei teī íxugwi.

⁵ Tupā Nhandejáry tee-gwi ae erenhemokirirī erenhemomirī va'erā. Ha'e oipe'a va'erā ndéhegwí nde rekove. Ha upe rire oikwaa mamo pa ogwahē-ta ne nhe'ēgwe. Ha'e ipu'aka tee va'e voi. Oikwaa ne mondo hagwā anháy renda-py. Upe nde rekove oipe'a kwa va'e-gwi mate erenhemomirī va'erā.

⁶⁻⁷ —Ani erekhyje teī. Nhandejáry pene nhangarekoha voi. Ne mandu'a katu manimbe-rehe. Mixī eterei-gwi yvypór yopenáiry hese. Nhavende ramo, mokōi-rehe mixīmi nhagana arā. Ndovaléi voi yvypór-pe. Nhandejáry ae onhangareko hese kwéry. Hymba tee voi manimbe. Omano ramo peteī, ha'e oikwaa gwymba omano ramoha hese kwéry opena-gwi. Ha nde-rehe openave gwembaiayhu tee-gwi. Oikwaa voi nde rehewa. Ne akā ragwe jepe peteī teī oipapapa-ma gwembaiayhu tee-gwi. Upéixa-gwi ani erekhyje teī va'erā avave-gwi.

⁸ —Ha xe katu, he'i ave —xe Nhande Ryke'y tee va'e. Ere ramo nde rapixa-pe: “Hesu reroviaha voi ko xe” xe ave ha'e arā Nhandejáry rembigwái yváy pygwa kwéry-pe: “Xe rembiayhu voi upe va'e” ha'e arā nde-rehe.

⁹ Ha ere ramo “Xe ndajerovia mo'āi Hesu-rehe. Xe ndaiko mo'āiry Hesu rembigwái ramo” ere ramo, xe ave ha'e arā Nhandejáry rembigwái yváy pygwa kwéry-pe: “Ndaha'éi voi xe re'yí upe va'e” ha'e arā nde-rehe.

¹⁰ —Xe ko Nhande Ryke'y tee va'e. Ne rembiapo vai ramo, xe-rehe erenhe'ē rei rei ramo jepe, omboyke-ta joty ndéhegwí Nhandejáry ne rembiapo vaikwe. Nhandejáry Nhe'ē Marangatu tee va'e-rehe ae erenhe'ē vai vai ramo nomboyke mo'āvēi-ta ndéhegwí ne rembiapo vaikwe Nhandejáry. Nande py'a potī mo'āvēi opa e'ŷ reheve.

11 —Upéixa-gwi ou ramo ipoxy va'e nde pyhy nde reraha-vy, ani erejapura nde py'apy-py. Nde reraha ramo ojeporahéi haty-py, ani erejapura teĩ. Nde reraha ramo mburuvixa renonde-py, mburuvixagwasu renonde-py ave, ani erejapura teĩ ne nhe'ẽrã-rehe. “Mba'e tipo ha'e va'erã? Mba'éixa tipo anhe'ẽta?” aipo-rami ani ere rei teĩ nde py'apy-py ereho-vy.

12 Nhe'ẽ Marangatu tee va'e ae ne monhe'ẽ uka va'erã. Ipoxy va'e nde reraha jave, Nhe'ẽ Marangatu tee va'e ome'ẽ va'erã nde-vy ne nhe'ẽrã, he'i Hesu gwemimondo kwéry-pe pono ikyhyje oho-vy.*

Hesu onhemonhe'ẽ om̄ba'e reta-rehe opena eterei va'e-pe

13 Ha ojogweroaty va'e pa'ũ-gwi peteĩ he'i Hesu-pe:

—Mbo'eháry, emombe'u xe ryke'y-pe omboja'o ja'o hagwã ore ru amyrí mba'ekwe. Xe ave aipota xe mba'erã, he'i Hesu-pe.

14 Aipo ramo Hesu he'i íxupe:

—Nahániry. Ndajúiry mba'ekwe amboja'o hagwã. Mba'eve namboja'o ukáiry. Ndaha'éi upearã xe aju.

15 Upéi he'i ave íxupe kwéry:

—Pejeapysaka katu ko xe nhe'ẽ-rehe. Xáke, ani ereipota rei rei pende rapixa mba'e. Nhane mba'e reta reta rei ndaha'éi nhande rekoverã tee. Mba'eve ndererekói ramo jepe, nde py'a poti ramo ereiko porã va'erã, he'i onhemonhe'ẽ-vy íxupe kwéry.

16 Upéi arandu nhe'ẽ omombe'u ojogweroaty va'e kwéry-pe. Imba'e reta va'e rehewa-rami omombe'u gwekorã:

—Oime araka'e peteĩ imba'e reta va'e, ijyvy porã va'e. Ijyvy porã-gwi nipo opu'ã porã íxupe hemitýgwe ra'e. Heta eterei hemitýgwe.

17 Upéixa-gwi he'i opy'apy-py: “Upe xe remitýgwe ryrurã mixi eterei. Heta eterei xe remitýgwe. Ndaijái arã xe remitýgwe ryru-py. Mba'e tipo ajapo-ta?” he'i opy'apy-py.

18 Upéi he'i ave, “Aikwaa-ma ajapo va'erã. Aitypa uka-ta upe xe remitýgwe ryru kwéry. Ambotuvixave-ta xe remitýgwe ryrurã. Ipyahu va'e-py amboyruta xe remitýgwe, xe mba'e reta ave” he'i opy'apy-py.

19 “Avy'a va'erã voi ko xe” he'i. “Xe mba'e reta reta xe mbovy'a va'erã” he'i. “Namba'apovéi arã aiko-vy, heta eterei-ma xe mba'e kwéry-gwi. Naxe kane'ovéi-ma va'erã” he'i. “Apytu'u-ta. Akaru-ta. Opaixagwa ajapota anhembovy'a hagwã” he'i upe imba'e reta va'e opy'apy-py, he'i Hesu omombe'u-vy arandu rehewa nhe'ẽ.

20 —Ha upéixa oiko jave upe imba'e reta va'e, Nhandedjáry he'i íxupe: “Nde, nane arandu porãi voi. Ne rembiereko heta ndovalevéi va'erã nde-vy. Ko pyhare eremano ete-ma va'erã. Ne mba'ekwe opyta rei-ta. Nde rekoviare mate oiporu-ta. Ndovaléi voi arã nde-vy ne mba'e reta” he'i Nhandedjáry upe om̄ba'e reta-rehe opena eterei va'e-pe, he'i Hesu omombe'u-vy arandu rehewa nhe'ẽ.

21 Upéi he'i ave omombe'u-vy íxupe kwéry:

—Upéixa voi om̄ba'e reta-rehe opena eterei va'e. Om̄ba'e reta reta ojéupe gwarã-rehe mate opena. Ha Nhandedjáry remimbota-rehe nopenáiry. Ojéupe gwarã nonhongatu mo'aĩ yváy-py.

*Nhandedjáry onhangareko kente kwéry-rehe
(Mt 6.25-34)*

22 Upéi omombe'u gwemimbo'e kwéry-pe imba'e-rehe:

* **12:12** Mt 10.19-20; Mc 13.11; Lc 21.14-15

—Ani erejepy'apy teĩ ne remikotevẽrã-rehe. Anive ereporandu nde py'apy-py upéa-rehe. “Ma'erã tipo ajapo-ta xe remi'urã-rehe? Mba'éixa tipo ajapo-ta xe aorã-rehe?” naporãi aipo ere erejepy'apy eterei ereiko-vy.

²³ Ndaha'éi nhane rembi'u-rehe, nhande ao-rehe jaiko porã Nhandejáry ndive.

²⁴ —Ne mandu'a porã katu xop̄igwasu-rehe. Onhemity e'ŷ va'e upéa, omono'õ e'ŷ va'e ave, ojapo e'ŷ va'e gwembi'u renagwã va'e ave, nomōngatúi gwemi'urã. Nhandejáry ae omongaru íxupe kwéry. Ha kente katu iporâve gwyra kwéry-gwi. Iporâve-gwi onhangareko porâve-ta hese kwéry Nhandejáry.

²⁵⁻²⁶ —Erejepy'apy eterei ne remikotevẽ-rehe. Nde ae nande pu'akái ndéjehe. Nde ae ni peteĩ áry nderehupity kwaáiry nde tujave hagwã. Nde ae nande pu'akái ndéjehe. Upéixa ramo anive erejepy'apy teĩ ne remikotevẽ-rehe, he'i Hesu omombe'u-vy.

²⁷ Upéi he'i ave:

—Tapene mandu'a katu yvoty nhu mygwa-rehe, okakwaa rei va'e-rehe. Nomba'apói, noipogwãiry. Iporã rei oĩ-vy. Ha'e-ta katu xe, Mburuvixagwasu Salomão amyrí ao iporã ete voi va'ekwe. Ha ijao-gwi iporâve voi yvoty.

²⁸ Ndahi'aréi va'e voi yvoty. Áy katu oĩ, ko'ẽ ramo ipirupa jevy-ma va'erã, ohapy jevy-ma va'erã, ndaiporivéi jevy-ma va'erã. Nhandejáry mba'e voi yvoty. Onhangareko porã omba'e-rehe. Ha nde katu, nde ave Nhandejáry remimoingo va'e voi nde. Yvoty-gwi nde tuvixave íxupe. Upéixa-gwi onhangareko porâve ave nde-rehe Nhandejáry. Ma'erã nderejeroviái hese? Ejerovia ete katu hese nde py'agwapy hagwã.

²⁹ —Ani erejapura teĩ ani erevy'are'ŷ teĩ ne remikotevẽ-rehe. Ere rei rei nde py'a-py, “Mba'e tipo ajapo-ta ajohu hagwã xe remi'urã, xe ay'u hagwã?” ere rei nde py'apy-py.

—Ani erejapura eterei teĩ ne remikotevẽ-rehe.

³⁰ Entéro kente, Nhandejáry-rehe ojerovia e'ŷ va'e gwive upéa ojapo. Ha nde, ani erejapo ha'eixagwa. Nhandejáry, nde Ru yváy pygwa oikwaa-ma ne remikotevẽ.

³¹ Nde katu epena meme hese. Ha'e ne ruvixarã. Hemimbota-rehe mate epena. Upéixa erejapo meme ramo, ha'e nde rexakwaa porã-ta. Ome'ẽ-ta nde vy ne remikotevẽ va'e.

³² —Upéixa-gwi peě, xe rembiayhu kwéry ani pejapura rei teĩ. Napende retáí ramo jepe, ani pekyhyje rei teĩ. Nhandejáry Nhande Ru yváy pygwa pende poravo-ma va'ekwe peiko hagwã hendive. Pemoirũ-ma va'erã íxupe pene ruvixarã.

³³⁻³⁴ Upéixa-gwi anive ne rakate'ŷ eterei ne mba'e kwéry-rehe. Iporâve ne rakate'ŷ Nhandejáry remimbota-rehe nde rekoha porãrã hagwã. Upéa-rehe evendepa ne mba'e kwéry hepykwe ereme'ẽ hagwã iporiahu va'e kwéry-pe. Upéixa erejapo nde rekoha porâve hagwã yváy-py. Hyru-py eremono'õ va'e, ne mba'e, ndohói arã ne ndive yváy-py. Ndaha'éi upe pygwarã ne mba'e ko yvy pygwa va'e. Nhandejáry remimbota-rupi ereiko ramo ae, nde rekoha porãrã erehupity arã yváy-py. Nde rekoha porãrã hemimonda e'ŷ va'e, hembi'u e'ŷ va'e ave nde ao raso rembi'u e'ŷ va'e ave nde rekoha porãrã. Ne rakate'ŷha-rehe erepena pena va'erã. Erepýtase arã indive. Upéixa-gwi iporâve nde-vy ne rakate'ŷ Nhandejáry remimbota-rehe, he'i Hesu gwemimbo'e kwéry-pe.*

* 12:33-34 Mt 6.19-21

*Mburuvixa-pe oha'arō va'e rehewa nhe'ē oiporu Hesu
(Mt 24.43-44; 25.1-13; Mc 13.35-37; Lc 21.34-35)*

35-37 Upéi he'i jevy Hesu:

—Xe ra'arō katu xe Nhande Ryke'y tee va'e agwahēha óra. Amombe'u-ta peē-my mba'éixa pa tekotevē xe ra'arō mburuvixa-pe oha'arō va'e rehewa nhe'ē-rami.

—Oī va'ekwe imba'e reta va'e. Oho omenda va'e karugwasu ha-py. Ha hembigwái kwéry oha'arō arō íxupe ou jevy hagwā. Oku'a jopyha ndoipe'áiry. Tataendy nombogwéiry. Oha'arō tee oiko-vy. Omonhenduha oha'arō. Og-wahēhaty oha'arō sapy'a ogwahē ramogwarā oipe'a hagwā okē.

—Ha'e-ta katu peē-my: Ovy'a voi va'erā upe ijáry-rehe oha'arō va'e kwéry. Ogwahē ramo ijáry, ogwerekō porā va'erā gwī gwembigwái ndokéiry va'e-pe.

38-40 —Avave ndoikwaái igwahē hagwā áry. Pyhare pyte-py para'e ogwahē-ta, haimete-ma ko'ē jave para'e ogwahē-ta. Oha'arō arō joto oiko-vy hembigwái. Ogwahē ramo ijáry ndokéi va'e ov'y'a va'erā. Ijáry joto ohexakwaa va'erā upe gwembigwái ha'arōha-pe.

—Upe hembigwái ha'arōháixa peē katu tapeiko xe ra'arō-vy, he'i Hesu. —Xe Nhande Ryke'y tee va'e aju jevy-ta. Avave ndoikwaái agwahē hagwā áry. Xe ra'arō arō-vy katu peiko kena.

—Amombe'u jevy-ta mba'éixa pa tekotevē xe ra'arō óga járy nhe'ē-rami, he'i Hesu.

—Óga járy oikwaa ramo ra'e imonda va'e ogwahē ramoha áry ndokéi arā ra'e ha'arō oiko-vy pono oike imondase va'e.

—Upéixa ave peē xe ra'arō-vy peiko katu. Ndereikwaái arā xe agwahē hagwā áry. Tane mandu'a meme katu xe-rehe. “Ogwahē-tama para'e” ere xe-rehe. Upéixa xe ra'arō, he'i Hesu gwembiayhu kwéry-pe.*

Tembigwái gwerekwa rekoria opyta va'e rehewa nhe'ē

41 Upéi Pedro he'i Hesu-pe oporandu-vy:

—Kiva'e-pe eremombe'u kuri arandu rehewa nhe'ē, ore Járy? Ore-vy gwarā para'e, entéro va'e pegwarā para'e? he'i oporandu-vy. —Ore, ndoroikwaái, he'i.

42 —Amombe'u-ta peē-my tembigwái rekoha rehewa nhe'ē-rami peha'arō hagwā peiko-vy, he'i. —Kiva'e po hekoha porā va'e, kiva'e po hekoha vai ave amombe'u-ta peē-my, he'i.

—Oī va'ekwe kwimba'e heta hembigwái va'e. Mombyry ohose-gwi he'i gwembigwái hi'arandu va'e-pe: “Xe mba'e-rehe enhangareko katu. Xe rembigwái kwéry-rehe eremanda ave. Eremboja'o ja'o hagwā ereme'ē-vy hemi'urā kwéry íxupe gwarā” he'i. Upéa he'i rire oho oheja gwekoviārā ijáry.

43 —Ogwahē jevy-ma ramo otopa jevy gwembigwái-pe. Ovy'a voi arā upe ijáry nhe'ē-rupi omanda porā va'e ogwahē jevy-ma ramo herekwa.

44 —Anhetegwa amombe'u-ta peē-my: Upe herekwa va'e ov'y'a eterei va'erā gwembigwái ndive. Ovy'a-gwi he'i va'erā íxupe: “Iporā voi ne rembi-apokwe. Avy'a voi ne rembiapokwe-rehe. Upéixa-gwi xe areko va'e-rehe erenhangareko meme-ta.” Aipo he'i arā ijáry gwembigwái porā va'e-pe.

45 —Ha ndovy'a mo'ai va'erā upe ijáry nhe'ē-rupi ndoikói va'e, omanda vai va'e. Upéa, ndoúi jave ijáry, he'i rei arā nipo opy'apy-py “Hi'are-ta voi xe rerekwa.” Ha upéa-rehe nahembiapo porāvēi-ma. Tembiapo vai vai ojapo. Onhembosarái hembigwái ambue kwéry-rehe, kwimba'e-pe kunha-pe ave oinupā nupā oiko-vy. Okaru karu oiko-vy. Oka'u ka'u ave oiko-vy.

* **12:38-40** Mt 24.42-44; Mc 13.32-37; Lc 21.34-36

46 —Ha hembiapo vai jave, ojáry-rehe naimandu'avéi jave, ogwahē jevy va'erā ijáry. Ogwereko asy asy ete uka va'erā gwembigwái hembiapo vaikwe-rehe. Omoï uka va'erā upé gwembigwái hembiapo vai va'e kwéry ha-py. Nhandejáry-rehe ndojeroviái va'e ha-py omondo arā íxupe.

47 —Ha'e-ta ave peẽ-my: Upé ijáry remimbota oikwaa-ma jave ojapo e'ŷ va'e ohasa asy asy va'erā. Gwembiapo porā e'ŷ-rehe ohasa asy va'erā. Ndojaposéi-gwi ndojapói.

48 Ha upé ijáry remimbota ndoikwaái va'e hembiapo vai-rehe jepe ndohasa asy etéiry va'erā joty.

—Heta ome'ẽ me'ẽ rire nhande-vy, hekvia heta ojerure rure ave arā. Hetave tave ome'ẽ rire, hetave tave ave ojerure rure arā nhande-vy.

*“Tata-rami aru xe pu'aka kente kwéry-rehe” he'i Hesu
(Mt 10.34-36)*

49 Upéi he'i jevy Hesu:

—Aju va'ekwe ko yvy-py. Tata-rami aru xe pu'aka kente kwéry-rehe. Ambojepotase eterei va'e vérami aiko-vy pya'e hendy porā hagwā.

50 Tekotevē ae ahasa asy xe aiko-vy ou e'ŷ mboyve. Ajepy'apy hese aha'arō-vy. Ahasa asy ha'arō-vy.

51 —Pende py'a-py penhemongeta rei xe-rehe. “Ou ombopy'agwapy enterove-pe peteixa oiko hagwā hikwái. Ou ponove ndaija'éi ojóehe ou-vy” peje rei xe-rehe peiko-vy. Ndaha'éiry upéa-rehe xe aju. Aju kente kwéry amboja'o-vy. Ndaijojavéi voi va'erā kente kwéry xe-rehe ha-py. Napeteixáiry voi va'erā.

52 Ay gwive he'ŷi kwéry, peteñ óga gwigwa napeteixavéi va'erā xe moirū va'e ipa'û-my oĩ-gwi. Ndaijojavéiry arā gwe'ŷi kwéry ndive upéixa-gwi.

53 Túvy ija'e'ŷ va'erā gwa'ýry-rehe ha ta'ýry gwu-rehe. Kunha ija'e'ŷ va'erā omemby kunha-rehe ha imemby kunha osy-rehe. Kunha ija'e'ŷ va'erā ome sy-rehe. Imena sy ija'e'ŷ va'erā omemby rembireko-rehe ave. Napeteixáiy ojohayhu va'erā xe-rehe ha-py, he'i onhemombe'u-vy Hesu.

*“Áry-rehe ne arandu voi” he'i Hesu
(Mt 16.2-3; 5.25-26)*

54 He'i ave gwenonde-py ijaty okwa va'e-pe:

—Ygwasu-gwi ou ramo arai oky hagwā, “Oky-tama nhande-vy” peje ramo, oky voi.

55 “Yvy aku-gwi ou yvytu haku vai hagwā nhande-vy” peje ave. Haku vai voi ave.

56 Arai erehexa ramo ereikwaa-ma oky hagwā. Yvytu aku nde pete ramo ereikwaa-ma haku vai-ta ave. Áry-rehe ne arandu voi. Ma'erā-gwi nane arandu porāi Nhandejáry rehewa nhe'ẽ erehendu hagwā. Nde, nde py'a ky'aha eremo'ã kwaa, ma'erā-gwi nane arandu porāi erehexa kwaa hagwā xe-rehe. Mbava'e-rehe po he'ise xe rembiapo porā ndapeikwaái voi.

57 Ma'erā-gwi po nderejehexa kwaáiry nde rekoha-rehe ne arandu porā hagwā? he'i onhemonhe'ẽ-vy.

58 —Oĩ ramo nde-vy ipoxy va'e, he'i ramo nde-vy: “Ne rembiapo vai va'ekwe xe-vy. Nerembohekoviái xe-vy xe mba'e ne rembiporu va'ekwe. Upéa-rehe aha-ta mburuvixa-pe oromombe'u-vy.” Aipo he'i ramo nde-vy, ani nde poxy teñ joty. Enhe'ẽ mbegwe mbegwe joty íxupe. Nde reraha ramo mburuvixa renda-py, tape-rupi erenhe'ẽ porā porā joty íxupe ponove ipoxy ne ndive. Ereiko porā jevy hagwā indive embopy'a porā jevy ndejéupe. Ipoxy reheve

ogwahē ramo mburuvixa renda-py, naporāi arā voi nde-vy. Ne rembiapo vai-rehe mburuvixa ne moī uka arā preso. Polícia-pe nde pyhy uka va'erā, nde reraha uka va'erā.

⁵⁹ Nde, neresēvēi-ma va'erā ne moī hagwe-gwi. Erembohekoviapa ete-ma rire mate, ne mosē jevy va'erā, he'i Hesu.

13

Ndererovái ramo nde rekoha, eremano va'erā

¹ Upe jave ogwahē Hesu ha-py omombe'u íxupe:

—Mburuvixa Pilatos ojuka uka araka'e gwī galileu kwéry-pe. Oime jave Nhandedjáry-pe ojeporahéi haty-py, ojuka íxupe kwéry. Nhandedjáry-pe omboete jave gwymba ojuka uka-vy íxupe ave ojuka, he'i omombe'u-vy.

²⁻³ Upéa-rehe Hesu he'i íxupe kwéry:

—Ani ere teī nde py'apy-py: “Ojejavy eterei va'e-pe mate Nhandedjáry ombohasa asy onhehundipa” ani ere teī upéa-rehe, he'i. —Anhete ha'e-ta nde-vy, ndererovái ramo nde rekoha, sapy'a ou va'erā Nhandedjáry ne mbohasa asyharā, ne rembiapo vai-rehe eremano va'erā, he'i onhemonhe'ē-vy íxupe kwéry.

⁴⁻⁵ —Ho'a-ma ramo va'ekwe upe óga yvate vate va'e héry Siloé, dezoito omano va'ekwe. Hi'ári ho'a-gwi omano joa-ma hikwái. Kóxa ani peje teī hese kwéry: “Hembiapo vai eterei va'e voi nipo ra'e. Jerusalém mygwa kwéry-gwi nipo ra'e hembiapo vaive ra'e. Upéa-gwi nipo ra'e ombohasa asy íxupe Nhandedjáry onhehundipa hagwā.” Ani peje teī aipo-rami hese kwéry. Anhete ha'e-ta nde-vy. Ndererovái ramo nde rekoha, nderejeroviái ramo Nhandedjáry-rehe, nde ave upeixa sapy'a eremano arā, erenhehundi arā, he'i Hesu onhemonhe'ē-vy íxupe kwéry.

Figo máta rehewa nhe'ē

⁶ Ha upéi katu Hesu omombe'u arandu nhe'ē figo máta rehewa nhe'ē-rami.

—Uvaty mbyte-py kwimba'e onhoty va'ekwe peteī figo yvyrarā. Upéi hi'are rire ou oheka mo'ā ijyva figo. Ha ndojohúi.

⁷ Upéixa-gwi he'i gwembigwái-pe uvaty-rehe onhangareko va'e-pe: “Ohasma mbohapy ro'y upe figo máta anhoty hagwe. Hi'a-rehe aju meme mo'ā. Ndaipóri. Ndahi'airy joty. Oĩ rei-ma. Eity íxupe” he'i gwembigwái-pe.

⁸ Ha hembigwái he'i íxupe: “Iporāve ereheja peteī ro'yve íxupe” he'i hembigwái gwerekwa-pe. “Ajo'o porā-ta ijerekwe-rehe. Amohu'ū-ta amoporāve yvy ijerekwe-rehe.

⁹ Peteī ro'y rire jevy hi'a ramo iporā arā. Ha hi'a e'ŷ vyteri ramo katu, aity arā íxupe” he'i gwerekwa-pe.

Upe arandu rehewa nhe'ē, figo yvyrá rehewa-rami omombe'u Hesu.

Kunha ikarapā va'e-pe ombogwera Hesu

¹⁰ Peteī pytu'uga áry-py Hesu oho jevy omombe'u ojeporahéi haty-py.

¹¹ Ha ogwahē kunha ikarapā va'e. Ojapo-ma dezoito ro'y ikarapāha oiko-vy. Ndahi'yvi porāvēi-ma. Anháy ojepota hese-gwi omokarapā íxupe.

¹² Ha ohexá-ma ramo íxupe, Hesu ohenói gwenda-py. Upéi he'i íxupe:

—Kunha, orombogwera-ma nde rasy vaikwe-gwi,

¹³ he'i hese opo omoī-vy. Upe jave opu'ā porā-ma kunha.

—Nhandedjáry imarangatu tee va'e, he'i kunha omboete-vy. Nhandedjáry ombogwerahare-pe omomba'egwasu.

¹⁴ Upéa-rehe ojeporahéi haty járy he'i ojogweroaty va'e kwéry-pe:

—Ani teĩ ereju pytu'uga áry-py ne mbogwera uka hagwã, he'i. —Áry rei-py katu ereju va'erã, he'i íxupe. —Seis áry meme-py nhamba'apo meme. Peteĩ áry-py japytu'u. Anive ereju pytu'uga áry-py ne mbogwera hagwã, he'i íxupe ipoxy-vy.

¹⁵ Hesu katu he'i íxupe:

—Nde, nde py'a ky'aha eremo'ã kwaa eterei. Erenhemboete rei ereikovy. Ndereikwaa porãi Nhandejáry nhe'ẽ, he'i. —Pytu'uga áry-py meme eremboy'u ne rymba kwéry. Erejora ne rymba vaka, ne rymba mburika ave eremboy'u hagwã ereraha-vy y rembe-py imboy'u-vy, he'i. —“Ndaha'éi tembiapo rei ajapo amboy'u-vy” ere ereho-vy. “Áry meme hoy'u hagwã ndaha'éi hembiapo rei” ere. “Amboy'u hagwã ae xe rymba” ere.

¹⁶ —Upéixa voi ave ambogwera arã pytu'uga áry-py. Kente iporãve voi mymba-gwi. Ha ko kunha Abraão remiarirõre voi. Ojapo-ma dezoito ro'y anhaygwasu Satanás ndopoíry íxugwi. Omokarapã-ma íxupe. Iporã voi pytu'uga áry-py imba'asy, anhaygwasu remimoigwe ajorapa-ma kunha-gwi, he'i oikwaa ukase-vy huvixa kwéry-pe gwembiaapo porã.

¹⁷ Inhe'ẽgwe ohendu-ma ramo, otĩ-ma hese ija'e'ỹ va'e kwéry. Ha enterove ojogweroaty aty va'e ogwerovy'a Hesu rembiapokwe.

Temitȳ mostarda rehewa nhe'ẽ-rami arandu nhe'ẽ
(Mt 13.31-32; Mc 4.30-32)

¹⁸ He'i íxupe kwéry Hesu:

—Mba'éixa aikwaa uka-ta peẽ-my Nhandejáry nhande ruvixaha? Mba'eixagwa nhe'ẽ aiporu-ta pene mo'arandu hagwã? he'i.

¹⁹ —Ne arandurã amombe'u-ta temitȳ mostarda rehewa nhe'ẽ-rami aiporu-ta, he'i.

—Kwimba'e kokwe-py onhotȳ araka'e temitȳ. Héry va'e mostarda onhotȳ. Mixi ete va'e mostarda ra'yi. Okakwaa-ma rire ae oiko-ma tuvixa va'e yvyra. Hakãmby-py gwyra ojeaitiyvapo-ma, he'i Hesu Nhandejáry irũ hetave tave oĩ va'erã rehewa kwaa uka-vy.

Mbojape mbovuha rehewa nhe'ẽ-rami arandu nhe'ẽ
(Mt 13.33-35)

²⁰ Upéi he'i jevy:

—Mba'eixagwa nhe'ẽ aiporu-ta aikwaa uka hagwã peẽ-my Nhandejáry nhande ruvixaha? he'i.

²¹ —Mbojape mbovuha rehewa nhe'ẽ-rami amombe'u-ta.

—Kunha oipyhy hu'i ojapo hagwã mbohapy mbojaperã. Ha hu'i-py omoĩ moĩ imbovuha. Ijavyte-rupi voi ojehe'apa hese. Indive ovu. Ombovupa-ma íxupe, he'i Hesu, Nhandejáry nhe'ẽ irũ hetave tave oĩ va'erã rehewa kwaa uka-vy.

Okẽ po'i rehewa nhe'ẽ
(Mt 7.13-14,21-23; Jo 10.7)

²² Hesu ogwata gwata oho-vy Jerusalém-my. Tetã-rupi, tetã'i-rupi ohasa oho-vy. Ohasa ramo ombo'e mbo'e upe pygwa kwéry-pe.

²³ Upe jave peteĩ oporandu íxupe:

—Mbo'eháry, ndahetáí tipo onheresende va'erã? he'i.

²⁴ Hesu katu arandu nhe'ẽ omombe'u íxupe, okẽ rehewa nhe'ẽ-rami.

—Oĩ okẽ ereike hagwã yváy-py. Ipo'i va'e voi. Hasy peve ohasa va'erã. Heta va'e ohasase mo'ã pe okẽ-rupi. Anhetegwa ha'e-ta nde-vy. Ne kyre'ỹ re'ỹ katu erehasa porã hagwã pe okẽ-rupi, he'i Hesu ombojerovia ukase mo'ã-vy íxupe.

²⁵ Upéi omombe'u jevy Nhandejáry rehewa nhe'ẽ óga járy rehewa-rami.

—Óga járy opu'ã omboty hagwā gwokē. Omboty-ma ramo ndikatuvéi-ma ereike koky-py. Okē-my rei erenhe'ẽ-ta. “Eipe'a ne rokē oroike hagwā” ere rei arā óga járy-pe. Ha upéixa ave ere rei arā Nhandejáry-pe. Ereipota mo'ã okē oipe'a-gwi nde-vy. “Ndoroikwaái voi nde” he'i arā nde-vy. “Ndaikwaái xe” he'i arā nde-rehe.

²⁶ Ha nde katu ere arā, “Nde karu rovái tee va'ekwe xe. Ne ndive hay'u va'ety tee va'ekwe xe. Xe retā-my xe mbo'e tee va'ekwe ave nde” ere arā íxupe.

²⁷ Ha'e ae he'i arā nde-vy, “Xe katu, ndoroikwaái voi” he'i arā nde-vy. “Tereho mombyry xéhegwi. Nde ne rembiapo vai-gwi ndikatúi ereike ko'a-py. Nde-vy ndaipe'a mo'ãi ereike hagwā” he'i arā Nhandejáry nde-vy.

²⁸ Upéa-rehe erejahe'o va'erā. Ndaikatúi ereike-gwi Nhandejáry nhande ruvixa oiko haty-py, nde vy'are'ỹ va'erā. Ne ramói amyrī Abraão oiko-ta Nhandejáry ndive. Ne ramói amyrī Isaque ave oiko-ta Nhandejáry ndive ave. Ne ramói amyrī Jacó ave oiko-ta Nhandejáry ndive ave. Nhandejáry nhe'ẽ-py omombe'u va'ety amyrī kwéry ave oiko-ta indive. Ha'e kwéry meme Nhandejáry ndive oikopa va'erā. Ha nde, mombyry-gwi rei erehexa arā íxupe kwéry. “Ndikatúi ereike ko'a-py” he'i arā Nhandejáry nde-vy, he'i arandu nhe'ẽ oiporu-vy íxupe kwéry.

²⁹ —Ha'e-ta peẽ-my heta judeu e'ỹ va'e omoirū-ta Nhandejáry gwuvixarā-pe. Yvy apy gwive opa yvy arigwa oho-ta ave oiko hagwā Nhandejáry nhande ruvixa oiko haty-py. Upe-py ogwapy-ta indive yváy-py.

³⁰ Ha heta oĩ ãy onhemboete uka e'ỹ va'e. Ha yváy-py tuvixa mba'e va'erā Nhandejáry-pe. Heta oĩ ave ãy onhemboete ukaseve va'e. Ha natuvixa mba'éiry voi va'erā Nhandejáry-pe, he'i íxupe kwéry Hesu omombe'u-vy.

Jerusalém tetā mygwa-pe ohayhu Hesu (Mt 23.37-39)

³¹ Ha upe javé gwī fariseu kwéry ogwahē ijukaharā omombe'u íxupe.

—Nde jukaharā ogwahē-tama, he'i íxupe. —Ekwa katu. Ekanhy mani íxugwi. Herodes, nhande ruvixagwasu nde juka ukase-ma, he'i íxupe.

³² Hesu ae he'i:

—Xe areve-ta ko'a-py. Nakanhy mo'ãi voi íxugwi. Nhandejáry oipota-ma ramo mate amano va'erā. Ndaha'ei mburuvixa nhe'ẽ-py amano va'erā, he'i Hesu. —Mbarakajagwasu hembiapo nhemi nhemi ombotavy gwemi'urā-pe. Upéixa ete ne mbotavy meme Herodes, he'i Hesu Herodes-rehe. —Tereho jevy emombe'u íxupe xe nhe'ẽgwe, he'i. “Oĩve xe rembiaporā” ere íxupe. “Hetave anháy amosē-ta, hetave tave ambogwera-ta vyteri” ere íxupe, he'i Hesu omombe'u uka-vy. —“Ko'ẽ mbue mbue ramo mate ambopa-ta xe rembiaporā” ere íxupe kuri.

³³ “Aikwaa-ma amanotaha óra” ere íxupe, he'i. —“Ãy katu, ko'ẽ ramo ave ahase ha-py aha-ta” ere íxupe. “Ndaha'ei ko tetā-my amano va'erā. Aha ranhetá Jerusalém tetā-my amano hagwā upe-py” ere íxupe. “Jerusalém tetā mygwa meme ojuka Nhandejáry nhe'ẽ-py omombe'u va'ety-pe” ere íxupe, he'i Hesu omondo onhe'ẽgwe mburuvixagwasu-pe.

³⁴ Upéi he'i Jerusalém tetā mygwa kwéry-rehe:

—Yma gware ãy peve erejuka meme Nhandejáry nhe'ẽ-py omombe'u va'ety-pe. Ombou ramo nde ha-py, erejuka meme íxupe. Ita-py erejapi íxupe ijuka-vy. Upéixa pejapo meme voi peẽ. Xe aipota voi xe-rehe erejerovia. Xe rembiayhurā amboatyse xe ndive xe renda pygwarā. Ha nderejeroviaséi xe-rehe, he'i. —Yrygwasu ra'y kwéry ojerovia osy-rehe. Ojohu-tama ramo ivai va'e ou, omboaty ipepogwy-py. Ha'e onhangareko porā hese kwéry.

Ohayhu porā gwa'y kwéry-pe. Xe ave, yrygwasu-rami, anhangareko porāse mo'ā pende-rehe kwéry. Ha nderejeroviaséi xe-rehe.

³⁵ —Pejeapysaka katu, anhete ha'e-ta nde-vy, aha-tama ko xe, orohejatama. Ava osē va'e-rami hóga-gwi, aha ave ne renda-gwi. Ha ndaxe rexavéima va'erā. Agwahē jevy-ma ramo, xe rexa jevy-ma ramo, ere arā xe-vy: “Tande rovasa ete katu Nhandejáry. Ha'e ne mbouha-rupi eregwahē ore-vy” ere arā xe-vy, he'i Hesu onhemombe'u-vy íxupe kwéry.*

14

Irurupa va'e-pe ombogwera Hesu

¹⁻³ Peteī pytu'uga áry-py Hesu oho okaru fariseu róga-py. Fariseu kwéry ruvixa upe va'e. Ha heta heta kente oī hóga-py. Orepura para Hesu-rehe oī-vy hikwái. Hi'ypa-ma kwimba'e irurupa va'e oī ave upe-py. Hesu renonde-py oī. Ha fariseu kwéry, Moisés remimombe'ukwe mbo'eha kwéry ave oha'arō ohexa hagwā.

—Mbava'e nipo Hesu ojapo arā, he'i ojóupe hikwái. —Oporombogwera-ta para'e pytu'uga áry-py. Ndopytu'u tee mo'āi para'e gwembiapo-gwi, he'i ojóupe orepara para jave Hesu-rehe.

Upéi Hesu he'i íxupe kwéry:

—Mbava'e tipo iporā Nhandejáry-pe jajapo hagwā pytu'uga áry-py? Oipota tipo nhaporombogwera? Oipota tipo ndajaiporiahuverekói hasy va'e-pe? Peē nipo pejohu vai ra'e nhaporombogwera ramo pytu'uga áry-py.

⁴ Ha okiririmbā íxugwi.

Upe-ma ramo ombogwera hasy va'e-pe. Upéi he'i íxupe:

—Tereho jevy nde róga-py, he'i íxupe Hesu.

⁵ Upéi omombe'u jevy íxupe kwéry pytu'uga áry rehewa nhe'ē.

—Peē kwéry, sapy'a pemba'apo ave pytu'uga áry-py, he'i íxupe kwéry. —Nde ra'y ho'a ramo ygwa-py, ne rymba ho'a ramo ave, sapy'a erenohē jevy arā upe ygwa-gwi. Nderéi va'erā “Nanohē mo'āi pytu'uga áry-py” aipo ndere mo'āi. Erenohē pya'e va'erā.

⁶ Ohendu-ma ramo upéa nhe'ē, ndikatúi ojohu vai.

Mba'éixa pa oiporavo gwenagwā ogwapy hagwā rehewa nhe'ē

⁷ Ha gwī fariseu ohenói va'ekwe ou heta okaru porā hagwā. Ha ogwahē ramo peteī teī oiporavo gwenagwā ogwapy hagwā. Iporāve rāve va'e-py ogwapyse. Upéa-rehe Hesu omombe'u íxupe kwéry arandu rehewa nhe'ē omenda va'e rehewa nhe'ē-rami. He'i:

⁸⁻⁹ —Ne renói ramo erekaru hagwā omenda va'e ha-py, ani erenhembotuvixa eterei erewapy hagwā. Ejehexa uka porā katu. Imbotuvixapyrā va'e renda-py ani erewapy teī. Imbotuvixapyrā e'ŷ-rupi eiko pono ne mbova óga járy nde gwapy ha-gwi. “Niporāi erewapy ko'a-py. Ko va'e mburuvixave renda ae ko. Ha'e ae ogwapy-ta ko'a-py. Nde, erewapy mombyryve xéhegwi” pono he'i nde-vy. Aipo-rami ne mbova ramo nane mbovy'ái arā. Ne mopu'ā pu'ā ramo ne motī-ma arā.

¹⁰ Iporāve erewapy imbotuvixapyrā e'ŷ hagwā-rami. Upe-py erewapy jave óga járy ou arā nde ha-py: “Iporāve xe ypy pyve erewapy ko'a-py erekaru porāve arā nde” he'i arā nde-vy ne mbotuvixave-vy va'erā. Upéixa ramo ohendu va'e ne mbotuvixave va'erā enterovéa-gwi.

¹¹ Ha'e-ta peē-my, onhembotuvixaseve va'e-rehe avave nopenáiry, ha upe onhemomirīve va'e-pe katu ombotuvixave va'erā.

¹² Upéa omombe'u rire he'i gwenoihare-pe:

* 13:35 Sl 118.26

—Nde, ereporomongaru porāse ramo, ani erehenói nde-vy jevy ne mongaru va'erā kwéry-pe. Nde rapixa kwéry, nde ryvy kwéry, nde ryke'y kwéry, nde re'yi kwéry, nde rapixa imba'e reta va'e kwéry ave ani erehenói upe va'e kwéry mante eremongaru porā hagwā. Ha'e kwéry ne renói jevy arā ne mohekoviarō uka arā. Ha ko yvy-py mate iporā va'erā nde-vy.

13-14 —Iporāve ereporomongaru porāse ramo jepe ne mohekoviarō e'ŷ va'erā-pe joty erehenói. Iporiahu va'e kwéry, ikarapā va'e kwéry, ogwata e'ŷ va'e kwéry, hesapyo e'ŷ va'e kwéry ave erehenói va'erā eremongaru porā hagwā íxupe kwéry. Upe va'e kwéry ndogwerekói mba'eve ne mongaru jevy hagwā. Upéa erejapo ramo Nhandejáry katu nde rovasa porā arā yváy-py, he'i íxupe. —Upe áry-py, entéro omano va'ekwe gwive omoingove jevy va'erā áry-py, nde rerekō porā va'erā Nhandejáry ne rembiapo porākwe-rehe, he'i Hesu ombo'e-vy.

Kente kwéry omongaru uka va'e rehewa nhe'ē

15 Peteĩ indive okaru va'e ohendu-ma ramo he'i íxupe:

—Nhandejáry nhande ruvixa oiko haty-py, ový'a ete va'erā indive okaru ramo.

16 —Néi, he'i Hesu. —Amombe'u-ta peẽ-my Nhandejáry ndive oiko va'erā rehewa nhe'ē kente kwéry omongaru uka va'e rehewa nhe'ē-rami.

—Kwimba'e ojapo uka heta temi'urā omongaru porā hagwā heta kente-pe. Ha omombe'u heta va'e-pe ou hagwā okarugwasu ha-py.

17 Ojapopa-ma rire omondo gwembigwái omombe'u hagwā okaru va'erā-pe. “Ejo katu, jaha jakaru. Ojapopa-ma nhane remi'urā, ere xe remihenói-pe” he'i omondo-vy íxupe kwéry.

18 —Ohenói-ma ramo avave ndouséi indive. Peteĩ va'e he'i uka íxupe: “Yvy ajogwa va'ekwe ahexa ranhe-ta” he'i uka. “Ahexa ranhe-ta ndaha mo'āi ranhe. Ani erejohu vai teĩ aha e'ŷ ramo” he'i uka jevy íxupe.

19 —Upéi, hemienói ambue va'e ave he'i uka íxupe: “Heta xe rymba pyahu ajogwa va'ekwe. Tekotevē aikwaa nomba'apo porāi para'e, omba'apo porā para'e. Upéa-rehe ndaha mo'āi akaru hagwā ne ndive. Ani erejohu vai teĩ, ndahái ramo” he'i uka jevy íxupe.

20 —Upéi, outro he'i uka ave íxupe: “Amenda-ma kuri. Ndikatúi aha” he'i uka ave.

21 —Ogwahē jevy-ma ramo hembigwái omombe'upa gwerekwa-pe. Oikwaa-ma ramo ndovy'ái voi ijáry. Ima'eandu-gwi he'i gwembigwái-pe “Ekwa katu. Tereho hekoviarā embou iporiahu va'e kwéry okaru hagwā” he'i. “Tetāgwasu-py ekwa ehexa íxupe kwéry. Tapegwasu rupigwa, tape po'i rupigwa embou. Ikarapā va'e kwéry, hesapyo e'ŷ va'e kwéry, ogwata e'ŷ va'e kwéry ave embou katu okaru hagwā” he'i gwembigwái-pe.

22 —Upéi oho jevy hembigwái. Ogwerupa ete rire-ma, he'i gwerekwa-pe: “Aha ambovíva va'ekwe kuri ogwahēmba-ma” he'i. “Ajohu va'e kwéry gwive ogwahēmba-ma” he'i. “Nomboaty hetái joty. Hendarā kwéry ne'írā vyteri omohynyhēmba” he'i.

23 —“Aipo ramo ekwa jevy tape tape-rupi tereho. Erejohu va'e gwive erembou hagwā henagwā-rupi ogwapy hagwā. Oĩ rei tenda va'e nhamohynyhē hagwā.

24 Anhete ha'e-ta katu nde-vy: Tenonde-rupi ahenói uka va'ekwe ndo'u mo'āvéi-ma xe rembi'u” he'i ndovy'ái-gwi hese kwéry, he'i Hesu arandu nhe'ē omombe'u-vy.

*Tekotevē omoirū hagwā Hesu-pe
(Mt 10.37-38; Mc 8.34; Lc 9.23)*

²⁵ Ogwata ramo Hesu heta eterei oho ave hapykwéri. Upéi ojere he'i hagwā íxupe kwéry:

²⁶ —Xe moirūse ramo ndikatúi xéhegwi erehayhuve avave-pe. Nde ru-pe, nde sy-pe, ne rembireko-pe, nde ra'y kwéry-pe, nde rajy kwéry-pe, nde ryke'y kwéry-pe, nde ryvy kwéry-pe, ne reindy kwéry-pe, ne ména-pe, ne memby kwéry-pe, nde ryke kwéry-pe, nde kypy'y kwéry-pe, nde kyvy kwéry-pe ave erehayhuve ramo xéhegwi ndikatúi arā xe moirū. Xe moirūse ramo ndikatuvéi ne rakate'ý nde rekove-rehe.

²⁷ Tekotevē ereiko okurusugwasu ogweraha va'e-rami. Upéixa ijukapyrā-rami ndereikoséi ramo ndikatúi xe moirū xe re'ýi tee ramo.

²⁸ —Amombe'u-ta peẽ-my xe moirūse va'e rehewa nhe'ẽ gwogarā omopu'ãse va'e rehewa nhe'ẽ-rami.

—Kwimba'e omopu'ãse ramo gwogarā ijvvate vate va'e, opy'a ndive onhemoneta porā arā. “Oĩ tipo heta xe plata ajapopa hagwā? Oĩ tipo xe pytygwōharā jajapo porā hagwā? Arekopa tipo ajapopa hagwā xe rogarā?” oporandu arā opy'apy-py.

²⁹ Nonhemongeta porāi ramo omopu'ã rei ramo gwóga mo'ãrā, entéró ohexa va'e opuka va'erā hese hógarā-rehe mo'ã ohexa ramo.

³⁰ “Omoõ mo'ã gwóga renagwā. Omopu'ã ku'a ku'a rei henagwārāgwe. Ndajapopái oheja hagwā” he'i va'erā onhembohory va'erā hóga-rehe. “Ojapo-ta mo'ã óga oheja jevy gwogarāgwe” he'i arā, he'i Hesu arandu nhe'ẽ omombe'u.

³¹ Upéi he'i jevy:

—Amombe'u jevy-ta peẽ-my xe moirūse va'e rehewa nhe'ẽ mburuvixagwasu onhorairō va'e rehewa nhe'ẽ-rami.

—Mburuvixagwasu onhorairō-tama ramo mburuvixagwasu ambue ndive, onhemongeta porā opy'apy ndive soldado kwéry-rehe. Dez mil mate ogwereko ramo, ha hese ija'e'ý va'e hetave ogwerekō ramo, vinte mil ogwerekō ramo, oporandu arā opy'apy-py: “Isoldado kwéry imbaraeteve tipo xe soldado kwéry-gwi?” he'i arā. “Ome'ẽ-ta tipo aipe'a imburuvixave ramo oikoha íxugwi?” oporandu arā opy'apy-py.

³² —Ha nome'ẽi-tama ramo, nonhorairōsevéi-ma va'erā. Gwenonde-rupi omondo arā onhomongeta va'e. Ojerure uka-ta upé ipu'akave va'e-pe oiko porā jevy hagwā onhondive, he'i omombe'u arandu nhe'ẽ.

³³ —Upéixa ave, xe moirūse va'e tonhemongeta porā opy'a ndive. Nome'ẽi voi xe moirū ku'a ku'a. Gwekove-rehe hakate'ý va'e, gwe'ýi kwéry-rehe hakate'ý va'e, omaba'e-rehe hakate'ý va'e naxe moirū etéi arā oiko-vy, he'i íxupe kwéry oiporavo uka hagwā.

Juky rehewa nhe'ẽ

(Mt 5.13; Mc 9.50)

³⁴ Upéi he'i jevy:

—Amombe'u jevy-ta peẽ-my xe moirūse va'e rehewa nhe'ẽ juky rehewa nhe'ẽ-rami.

—He porā juky. Ha ndahéi ramo katu, ndikatúi eremoatyrō jevy.

³⁵ Ndovalevéi-ma. Yvy pygwarā ndovaléiry. Ha ne remimomborā-ma voi va'erā upéa, he'i. —Ne aranduse ramo, ejeapysaka porā ko xe nhe'ẽ-rehe, he'i Hesu omombe'u-vy íxupe kwéry.

15

Hembiau vai va'e ndive Hesu oiko

¹ Onhemboja Hesu renda-py plata-py oporombopaga va'ety kwéry, gwī ojejavý va'e kwéry ave inhe'ẽ rendu-vy.

² Ha upéa-rehe fariseu kwéry, judeu rekombo'ehaty kwéry ave onhe'ẽ rei rei hese:

—Kóa nahi'arandúiry voi, he'i rei hese. —Gwĩ ojejavy va'e kwéry ndive oiko meme okaru ave indive kwéry, he'i hese ojohu vai-vy hese.

Ovexa kanhygwe rehewa nhe'ẽ (Mt 18.12-14)

³ Upéa-rehe Hesu omombe'u gwĩ ójehe ojerovia va'erã rehewa nhe'ẽ ovexa kanhygwe rehewa nhe'ẽ-rami.

⁴ —Ne rymba ovexa heta ete ererekko ramo, cem ererekko ramo, eren-hangareko hese. Peteĩ okanhy-ma ramo, ereheja upe okanhy e'ŷ va'e kwéry anho nhu porã-my ereheka heka hagwã íxupe.

⁵ Erejohu-ma ramo, “Ajohu-ma xe rymba” ere va'erã. Erehupi va'erã íxupe nde ati'y-rupi ereru hagwã ne rymba kanhygwe. Erevy'a eterei ne rymba erejohu jevy-ma ramo.

⁶ Eregwahẽ-ma ramo rire nde róga-py erehenói arã enterove-pe jevy ov'y'a ave hagwã. Nde re'yi kwéry, nde rapixa kwéry ave erehenói arã ov'y'a ave hagwã. “Ajohu jevy xe rymba okanhy va'ekwe” aipo ere arã eremombe'u-vy íxupe kwéry erembovy'a-vy jevy, he'i.

⁷ —Upéixa ave yváy pygwa ov'y'a joa arã. Hembiapo vaikwe va'e ogweroma oiko-vy ramo gwekoha ov'y'a joa-ma va'erã oiko-vy. Ojejavy va'e ojerovia-ma ramo xe-rehe ov'y'a joa-ma va'erã yváy pygwa ave. Heta heko porã va'e ojerovia oiko-vy ramo xe-rehe ombovy'a arã yváy pygwa kwéry. Ha peteĩ hekoha vai va'ekwe ogwerova ramo gwekoha katu, ombovy'agwasuve arã íxupe kwéry, he'i Hesu.

Om̄ba'e oheka oiko-vy kunha

⁸ Upéi omombe'u jevy arandu rehewa nhe'ẽ om̄ba'e oheka va'e rehewa nhe'ẽ-rami.

—Kunha ogwereko araka'e dez plata, ovale voi va'e. Ha okanhy peteĩ íxugwi. Upéixa-gwi omohendy tataendy, oitypei porã koty-py. “Tajohu jevy xe mba'e kanhygwe” he'i. Ndohejái mba'eve gwendagwe-py oitypei oheka-vy.

⁹ Ojohu-ma ramo ohenói kunha kwéry-pe ogwerovy'a jevy va'erã. Hapixa kwéry, he'yi kwéry hóga ypy rupigwa kwéry ogwahẽ-ma ramo, omombe'u: “Ajohu-ma xe plata okanhy va'ekwe. Pevy'a katu xe ndive ajohu jevy-ma xe plata” he'i íxupe kwéry.

¹⁰ —Upéixa ave ogwerovy'a arã Nhandejáry hekoha vai va'ekwe-pe ogwerova-ma ramo gwekoha. Ovy'a arã gwembigwáí kwéry yváy pygwa ndive.

Ta'ymirĩ okanhy va'ekwe rehewa nhe'ẽ

¹¹ Hesu omombe'u jevy arandu rehewa nhe'ẽ ta'ymirĩ okanhy va'ekwe rehewa nhe'ẽ-rami.

—Oiko va'ekwe kwimba'e. Mokõi ta'ýry va'e upéa.

¹² —Ha ta'ymirĩ he'i gwu-pe: “Eme'ẽ mani xe-vy xe mba'erã. Ñy voi eme'ẽ xe-vy. Naha'arõséi eremano rire ae areko hagwã ne mba'ekwe” he'i gwu-pe. “Iporãve ereme'lẽ xe-vy ereikove rehewe” he'i gwu-pe ta'ymirĩ hereko asy-vy.

Upéixa-gwi túvy omboja'o ja'o opa om̄ba'e. Heta voi om̄ba'ekwe omboja'o ja'o gwa'y kwéry-pe ome'ẽmba íxupe kwéry.

¹³ —Upéi, ndahi'aréi ta'ymirĩ oho-ma mombyry. Omboatypa om̄ba'e gwu mba'ekwe ome'ẽ kuri va'e ovendepa oho-vy. Hepykwe ae ogweraha. Mombyry ete oho. Ogwahẽ ramo tetã ambue-py ojapo opaixagwa. Omokanhy rei rei om̄ba'e repykwe.

14 Omokanhymba-gwi mba'eve ndogwerekói, ndaiporivéi-ma imba'e, ndaiporivéi-ma ave imba'e repyrārāgwe. Iporiahu ete jevy opyta-vy.

—Ha upe rire, iporiahu ete jave tetā ambue pygwa kwéry-pe nahenhóiry hemitygwe. Upéixa-gwi ohasa asy upe tetā mygwa. Ndogwerekovéi gwemi'urā-gwi ivare'apa upe pygwa. Ha ohasa asyve ta'ymirī. Ndaipóri tembi'u-gwi ohasa asy oiko-vy.

15 —Ivare'apa eterei-gwi oho upe-py oiko va'e-pe ojerure gwemi'urā-rehe. Ha upe va'e omomba'apo íxupe. “Eremba'apose ramo, tereho xe yvy nhu-my enhangareko xe rymba kure kwéry-rehe, xe rymba kure mongaruha ramo ereiko hagwā” he'i upe pygwa ta'ymirī-pe. “Iporā. Apyta-ta ne rembigwái ramo” he'i.

16 —Ha hymba kwéry-rehe onhangareko jave, ta'ymirī ivare'a vyteri oiko-vy. “Xe vare'a” he'i. “Akaruse eterei. Xe vare'a-gwi ha'use mo'ã kente rembi'u e'ŷ va'e, ko kure rembi'u rei-ma ha'use. Pono xe juka xe vare'a ha'use mo'ã ko kure rembi'u.” He'i-ma ramo ojéupe, avave ho'u va'erā nome'ëséi ta'ymirī-pe.

17 —Upe rire ae imandu'a jevy gwu-rehe: “Oĩ heta xe ru rembigwái omba'apo va'e. Upe xe ru róga pygwa kwéry okaru porā. Hembigwái kwéry ave okaru porā ave. Ndaivare'ái voi xe ru ndive omba'apo va'e kwéry. Ha xe, amano-tama xe vare'a eterei-gwi ko xe yvy e'ŷ-py aiko-vy” he'i ojéupe.

18 “Taha jevy xe ru róga-py. Ha'e-ta íxupe, Ajapo vai va'ekwe nde-rehe, aipo ha'e-ta íxupe. Nhandejáry-rehe ave ajapo vai va'ekwe ave.

19 Ajapo vai eterei-gwi xe atī agwahē jevy hagwā. Xe rembiapo vai eterei nde-rehe, anive, Xe ra'y, ere xe-rehe. Atī eterei, Xe ra'y, ere hagwā xe-vy. Aikose eterei ne rembigwái ramo, aipo ha'e-ta xe ru-pe” he'i opy'apy-py.

20 —He'i-ma ramo osē upe yvy-gwi ojevy hagwā gwu renda-py. Mombyry-gwi ou jevy. Ogewahē e'ŷ jave gwu róga-py, mombyry vyteri gwu róga-gwi ou-vy ohex-a-ma íxupe túvy. Ohex-a-ma ramo, oiporiahuvereko gwa'ymirī-pe. Oripara oho-vy ohogwaitī hagwā gwa'ýry-pe. Ohova pyte pyte íxupe. Oiporiahuvereko voi gwa'ýry-pe.

21 —Aipo ramo ta'ymirī he'i gwu-pe: “Xe rembiapo vai va'ekwe nde-rehe. Xe rembiapo vai va'ekwe Nhandejáry-rehe ave. Xe rembiapo vai-gwi xe atī voi ndéhegwi. Anive, Xe ra'y, ere teĩ xe-vy xe rembiapo vai eterei va'ekwe-gwi” he'i gwu-pe.

22-23 —“Ani eretī teĩ xéhegwi. Nde xe ra'y tee” he'i. “Orohayhu eterei. Avy'a orohex-a-vy” he'i túvy íxupe.

—Upéi he'i gwembigwái kwéry-pe omanda-vy: “Pekwa pya'e peru xe ra'y aorā. Eru ao porā ete omonde hagwā. Ikwāyrurā eru ikwā-rehe omoi hagwā. Ipy ryrurā eru ave omonde hagwā. Iporā porāve va'e eru xe ra'y pegwarā” he'i.

—“Peru ave vaka ra'y ikyrave va'e pejuka hagwā íxupe. Heta eta vaka ro'o ja'u-ta javy'a eterei-gwi.

24 Ko xe ra'y okanhy va'ekwe oiko-vy ha ko'ánga ogwahē jevy ou-vy. Omano vérami va'ekwe ha oikove jevy-ma nipo ra'e” he'i hese gwembigwái kwéry-pe.

—Upéi onhepyrū ogwahē ramo ov'y'a joa.

25 Upe jave ta'y rypykwe oime kokwe-py. Gwóga-py ogwahē-tama ramo ohendu ombopu va'e, ohendu ave ogwahu va'e.

26 Ohendu-ma ramo ohenói hembigwái oikwaa hagwā: “Mbava'e tipo aipo va'e?” he'i.

27 —“Nde ryvy ogwahē kuri. Hesāi porā ogwahē ou-vy. Ovy'a eterei nde ru. Upéixa-gwi ojuka uka vaka ra'y ikyrave va'e hemi'urā.”

28 —Aipo ohendu-ma ramo ta'yrusu ipoxy gwyyvýry-rehe, ndoikeséi gwóga-py. Upe-ma ramo túvy osẽ oho-vy ohogwaití-vy íxupe. Ojerure rure gwa'y rypy-pe oike hagwã gwóga-py.

29 —Upe va'e ae he'i gwu-pe: “Xe katu, xe are-ma amba'apo ne ndive. Are-ma aiko ne nhe'ë-rupi. Ne remimbota mate ajapo aiko-vy. Ne'íra vyteri ereme'ë xe-vy ne rymba mixí va'e ha'u va'erã xe rapixa kwéry ndive.

30 Ha ko ne mba'e hundipahare katu ogwahë ramo, ne rymba ikyrave va'e erejuka íxupe. Hembiapo vai va'ekwe nde-rehe. Opa mba'e ojapo nipo oikovy ra'e kunha vai ndive nipo oiko ra'e ave ha ogwahë ramo, ne rymba ikyrave va'e erejuka nipo ra'e íxupe.”

31 —He'i-ma ramo, túvy he'i íxupe: “Xe ra'y, nde ko ereiko meme xe ndive. Entéro xe mba'e gwive ne mba'e voi.

32 Tekotevë javy'a ko'ánga onhondive. Ko nde ryvy, Omano, ha'e mo'ã va'ekwe hese, oikove teñ nipo ra'e. Okanhy va'ekwe ha ko'ánga ogwahë jevy ou-vy. Tekotevë nhanhombovy'a jevy katu” he'i túvy gwa'yrusu-pe, he'i Hesu, gwí ojejavvy rire ojehesa rerova uka va'e-rehe Nhandejáry ovv'aha kwaaw uka-vy.

16

Tembigwái nonhangareko porãi gwerekwa mba'e-rehe rehewa nhe'ë

1 Hesu omombe'u jevy doze gwemimbo'e kwéry-pe. Arandu nhe'ë omombe'u tembigwái rehewa nhe'ë-rami.

—Kwimba'e onhangareko uka omaba'e reta reta peteñ gwembigwái-pe. Upe imba'e reta va'e oiporu uka meme omaba'e kente kwéry-pe ombohekovicia hetave hagwã íxupe. Ha ohekoviärö-vy hembigwái-pe ogweru hikwái. Ijáry ete nonhangarekói voi hese, hembigwái mate ojapo.

—Upe jave gwí oikwaa va'e he'i imomba'apoha-pe: “Nonhangareko porãi voi ne rembigwái ne mba'e-rehe. Ndohekoviärö porãi nde-vy oiporuruka hagwe” he'i omombe'u-vy.

2 —Ha upéi katu upéi va'e ohenói uka gwembigwái-pe: “Ne rembiapo vai rerakwã ahendu kuri. Anhete pa erejapo. Nerembohekovicia porãi nipo xe mba'e aheja nde-vy va'ekwe ereiporuruka hagwã. Upéixa ramo noromomba'apo mo'ávái” he'i gwembigwái-pe, hembiapo vai va'ekwe-rehe.

3 —Ha upéi katu hembigwái onhemongeta opy'apy-py: “Mbava'e tipo ajapo-ta? Xe momba'apoha xe mosé-ta. Namba'apo mo'ávái-ma íxupe. Xe kangy eterei amba'apo hatã hagwã. Ndikatúiry amba'apo mbaraete hagwã. Ndajo'o kwaái yvy. Atí eterei ajerure rure hagwã xe remikotevë-rehe. Mbava'e tipo ajapo-ta aiko porã hagwã namba'apovái-ma ramo a-py?” he'i opy'a-py onhemongeta-vy.

4 —Upéi he'i jevy opy'a-py: “Aikwaa-ma mba'e ajapo-ta kente kwéry xe moirü porã hagwã, xe mogwahë hagwã gwóga-py” he'i opy'apy-py.

5 —Upéi omomba'apoha mba'e oiporu va'ekwe ohenói. Ogwahë ypy va'e-pe he'i: “Mbovy tipo erereve vyteri xe momba'apoha-pe?” he'i oporandum-vy íxupe.

6 “Heta nhandy aiporu va'ekwe. Cem ryrugwasu-rehe areve voi íxupe.” “Ki, ehái nde kwtia-py mixíve ereve hagwã. Cinquenta ryrugwasu-rehe erehai” he'i oreve va'e-pe. Ome'ë íxupe ikwtia ohai mixíve oreve hagwã.

7 —Upéi oporandum kwimba'e ambue-pe: “Ha nde tipo, mbovy tipo erereve ave nde?” he'i. “Heta trigo aiporu va'ekwe. Cem ryrugwasu-rehe areve vyteri ne momba'apoha-pe” he'i. “Ehai mixíve nde kwtia-rehe. Oitenta ryrugwasu-rehe mate erehai” he'i ome'ë-vy íxupe ikwtia ohai hagwã.

8 —Ha upéa oikwaa-ma ramo imomba'apohare he'i hese: “Hi'arandu nipo ra'e xe rembigwaikwe xe mbotavy hagwā” he'i gwembigwaikwe-rehe, he'i Hesu arandu nhe'ẽ tembigwái rehewa nhe'ẽ-rami omombe'u-vy.

Ha Hesu he'i ave:

—Ha'e-ta katu peẽ-my ko'ãygwa pytū mygwa-rami oiko va'e hi'arandu voi ombovia uka hagwā gwapixa-pe. Ha oĩ arakatu pygwa-rami oiko va'e, Nhandedjáry-rehe ojerovia va'e, nahi'arandu porāi gwapixa ndive oiko porā hagwā.

9 —Ha'e-ta ave peẽ-my, ani ereiporu rei ne mba'e, nde pirapire ave ndejéupe gwarā anho-rehe. Iporāve ereme'ẽ hemikotevē iporahu va'e kwéry-pe. Upéixa nde py'a porā rehewe ereiporu ramo ne mba'e reta, gwī ereiporahu-vereko va'ekwe ov'y'a jevy va'erā ne ndive. Ha eregwahē-ma ramo yváy-py ne mogwahē porā arā.

10 Tereiporu porā ne mba'e ereiko porā hagwā. Ndahetái ramo ne mba'e, ereiporu kwaa ramo, iporā arā nde-vy. Hetave tave ererekko ramo ereiporu kwaa arā upe ne mba'e reta voi ave. Nde py'a porā-gwi ereiporu kwaa ne mba'e. Ha ndahetái ramo ne mba'e, ndereiporu porāi ramo upe ne mba'e mbovy, hetave tave ererekko ramo, ndereiporu kwaái arā upe hetave va'e ave. Nande reko porāi-gwi ndereiporu kwaái ne mba'e.

11 —Ha nane arandu porāi-gwi ndereiporu porāi ne mba'e ko yvy pygwa. Mba'éixa po ereiporu kwaa va'erā Nhandedjáry remime'erā? he'i Hesu omombe'u-vy.

12 —Ha ndereiporu porāi ramo ko'a-py ereiporu va'e, avave nome'ẽi arā ne mba'e teerā nde-vy.

13 —Ndaikatúi eremba'apo mokōive-pe. Peteĩ va'e-rehe nande a'e porāiry va'erā. Ambue katu erehayhu tee va'erā. Peteĩ va'e-rehe ne rakate'ỹve arā. Ha outro-rehe katu nerepenái arā. Peteĩ va'e nhe'ẽ-rupi mate ereiko arā, he'i omombe'u-vy. —Upéixa ave ereiko ramo Nhandedjáry nhe'ẽ-py, ndikatuvéi erepena eterei ko yvy-rehe oiko va'e nde pirapire-rehe. Ne rakate'ỹ eterei ramo pirapire-rehe, ipu'aka va'erā nde-rehe. Nerepenái va'erā Nhandedjáry-rehe. Nde kupe-py rei oĩ va'e-rami ererekko va'erā íxupe.

Fariseu kwéry-pe onhemonhe'ẽ Hesu

14 Ohendu-ma ramo upe nhe'ẽ fariseu kwéry, onhembohory hese. Plata rayhuha ha'e kwéry. Omba'e reta rayhuha ave ha'e kwéry. Upéixa-gwi Hesu remimombe'u-rehe ndovy'airy.

15 Upéa-gwi Hesu he'i íxupe kwéry:

—Peẽ penhemboheko marangatu rei yvypóry renonde-py. Peje rei pen-dejéupe “Aiko porā Nhandedjáry nhe'ẽ-py” pejé mo'ã, pende apu rei pendéjehé, pende rerovia rei kente kwéry. Nhandedjáry ae ohexa porā nde py'apy-py. Oikwaa-ma katu mbava'e-rehe erejerovia ete. Oikwaa-ma ave mbava'e-rehe erenhemoneta nde py'apy-py, he'i onhemonhe'ẽ-vy íxupe kwéry. —Oĩ heta mba'e, heta hembiapo ave ovale e'ỹ va'e voi katu Nhandedjáry-pe. Ha kente kwéry he'i rei upe mba'e-rehe, “Iporā katu” he'i rei hembiapo-rehe. “Ovale voi” he'i rei hese. Ndoikói peteĩxa Nhandedjáry ndive-gwi, aipo he'i rei hese, he'i Hesu onhemonhe'ẽ-vy.

16 —Myamyrī ojerovia araka'e Nhandedjáry-rehe. Upéixa-gwi oiko porā araka'e inhe'ẽ-py. Ohendu meme katu araka'e Moisés amyrī rembi-haikwe. Nhandedjáry nhe'ẽ-py omombe'u va'ety amyrī kwéry rembi-haikwe ave ohendu meme ave araka'e. Upéa-rehe oikwaa-ma araka'e Nhandedjáry remimbota ojapo hagwā, he'i.

—Upe rire ou-ma va'ekwe João Batista. “Ou-tama Nhandejáry nhande ruvixarã” omombe'u meme. Upe rire ãy peve onhemosarambi rambi upe nhe'ẽ. Ha heta kente ikyre'ỹ voi omoirũ hagwã Nhandejáry-pe. Oikese ha-py pya'e a'e oike ha-rami ojapura-ma va'e-rami omoirûse eterei Nhandejáry-pe gwuvixarã, he'i.

¹⁷ —Ha'e-ta ave peẽ-my, áry opa va'erã. Yvy ave opa va'erã ave. Nhandejáry nhe'ẽ ae Moisés amyrí remimombe'ukwe ndopái va'erã. He'i hagwe-rami oikopa peve nonhehekoviarõ mo'ãi voi, he'i Hesu.

Mendare rehewa nhe'ẽ
(Mt 19.1-12; 5.31-32; Mc 10.11-12)

¹⁸ He'i ave:

—Gwembireko-gwi opoi va'ekwe omenda jevy ramo ambue kunha-rehe, ojapo vai voi Nhandejáry renonde-py. Ha kunha ome oheja va'ekwe-rehe omenda va'e ojapo vai ave Nhandejáry renonde-py, he'i Hesuombo'e-vy íxupe kwéry.

Mokõi kwimba'e rehewa nhe'ẽ

¹⁹ Upéi Hesu omombe'u jevy arandu nhe'ẽ mokõi kwimba'e rehewa nhe'ẽ-rami.

—Oiko va'ekwe peteĩ kwimba'e imba'e reta va'e. Hepyve pyve va'e ao meme voi katu ha'e omonde. Ha okaru porã porã meme ave.

²⁰ Ha hokẽ-my ogweru omoĩ-vy kwimba'e iporiahu ete va'e. Héry va'e Lázaro. Hasy va'e voi Lázaro. Ipire aipa va'e voi. Ikangy voi hasy ete-gwi.

²¹ Ha ivare'a eterei-gwi ogwapy oĩ-vy upe-py. Oha'arõ ho'u va'erã mo'ã. Tembi'u sururukwe ho'a va'ekwe ho'u hagwã oĩ upe-py. Onhemohygwyatã-vy mo'ã ou oha'arõ oĩ-vy upe-py. Ha upéixa oĩ jave gwí jagwa ou ohere íxugwi ijai ai.

²² —Upe rire omano Lázaro. Omano ramo Nhandejáry rembigwái yváy pygwa ou ogweraha íxupe oiko hagwã Abraão amyrí ndive ogwenogwahẽ íxupe heraha-vy Nhandejáry renda-py.

—Upéi omano ave upe imba'e reta va'ekwe ave. Ha omoĩ hetekwe hetekwe rendaty-py.

²³ Omano rire-ma oime jave nhane mbohasa asy va'e renda-py, ohasa asy-ma voi oiko-vy.

—Upéi oma'ẽ jave mombyry-kotypy ohexa Lázaro amyrí-pe oiko ramo Abraão amyrí ndive.

²⁴ Upéi osapukái Abraão amyrí-pe. He'i “Xe poriahuvoreko katu, xe ramoigwasu Abraão” he'i gwamoigwasu-pe. “Embou Lázaro xe pytygwõ uka-vy. Omoakými hagwã jepe xe apekũ” he'i. “Okwã apy omoaký hagwã y-py omoro'ysã hagwã xe apekũ” he'i. “Aiko asy eterei ko tata rendy-py” he'i.

²⁵ —Upéa-rehe Abraão amyrí he'i íxupe: “Namondo mo'ã nde ha-py Lázaro” he'i íxupe. “Nde, tekotevẽ ne mandu'a nde rekohagwe-rehe. Eremano e'ỹ mboyve va'ekwe, ereiko ramo yvy ári ne mba'e reta-rehe mate erepena va'ekwe ereiko-vy. Ha upe-py nde rekoha porã va'ekwe. Áy ae katu ereiko asy va'erã. Nde rekoha porãgwe ndovalevéi-ma va'erã nde-vy. Erehasa asy-ta voi katu ereiko-vy” he'i íxupe. “Ha Lázaro amyrí nde ramigwa e'ỹ va'ekwe. Ha'e oiko ramo va'ekwe yvy ári ohasa asy voi va'ekwe. Áy katu ha'e oiko porã-ma” he'i Abraão amyrí imba'e reta va'ekwe-pe.

²⁶ “Oĩ ave yvykwagwasu nhane mbyte-py. Ko'a pygwa ohasase mo'ã upe-py. Ndikatúi ohasa yvykwagwasu-gwi” he'i. “Ha ndikatúi ave upe pygwa ohasa ou hagwã ore ha-py ave” he'i Abraão amyrí upe imba'e reta va'ekwe-pe.

27 —“Aipo ramo” he'i Abraão amyrī-pe, “Emondo emogwahē uka Lázaro amyrī xe ru róga-py” he'i.

28 “Oiko cinco xe ryvy kwéry oikove va'e. Emondo Lázaro amyrī omombe'u hagwā íxupe kwéry Nhandejáry nhe'ẽ pono omano rire ha'e kwéry ave ou ko'a-py, ko ohasa asy hagwā-py” he'i ojerure-vy íxupe.

29 —Upéi Abraão amyrī he'i íxupe: “Oĩ Nhandejáry nhe'ẽ ohai uka va'ekwe. Upéa ae mate ha'e kwéry tohendu” he'i íxupe. “Nhandejáry nhe'ẽ Moisés amyrī rembihaikwe ogwereco nipo ra'e. Nhandejáry nhe'ẽ-py omombe'u va'ety rembihaikwe ogwereco ave nipo ra'e. Upéa nhe'ẽ ae katu ha'e kwéry tohendu” he'i Abraão amyrī íxupe.

30 —Ha'e he'i “Nahániry” he'i jevy. “Nde, ereikwaa, upe hembihaike rehewa nhe'ẽ ha'e kwéry nohenduséi voi. Ohexa ramo peteĩ omano va'ekwe oikove jevy-ma ramo ae ogwerovia arā inhe'ẽ. Ogwerova arā gwekoha ave” he'i ojerure rure-vy.

31 —“Ndojeroviaséi voi nipo ra'e hikwái” he'i Abraão amyrī íxupe. “Nohenduséi nipo ra'e Moisés amyrī rembihaikwe. Nohenduséi nipo ra'e Nhandejáry nhe'ẽ-py omombe'u va'ety amyrī rembihaikwe ave. Omano va'ekwe oikove jevy-ma ramo nohenduséi ave arā voi inhe'ẽ. Nohenduséi ete voi Nhandejáry nhe'ẽ” he'i íxupe Abraão amyrī. “Namondo mo'ãi Lázaro amyrī upe-py” he'i ave Abraão amyrī, he'i Hesu omombe'u ramo arandu rehewa nhe'ẽ íxupe kwéry.

17

Kente-pe ombotavyse va'erā rehewa nhe'ẽ (Mt 18.6-7; Mc 9.42)

1 Upéi Hesu he'i gwemimbo'e kwéry-pe:

—Oĩ heta kente-pe ombotavy va'erā. Ohesa rerova uka va'erā xéhegwi ombojejavy uka-vy. Amboasy upe imbotavyharā-pe. Ohasa asy eterei va'erā.

2 Iporāve arā ra'e jajuka ombo'e vai e'ŷ ngatu. Iporāve arā ra'e nhanhapytī nhamoï-vy ijaju'y-rupi itagwasu-rehe ipohyive hagwā. Iporāve arā ra'e nhamombo ygwasu-py ombo'e vai e'ŷ ngatu omano pono xe-rehe ojeroviase va'e-pe ombotavy rei.

Nde-rehe hembiapo vai va'e ndive eiko porā

3 —Peẽ xe reroviahva va'e kwéry, penhangareko porā katu peteĩ teĩ pendéjehe. Oĩ ramo nde rapixa xe reroviahva va'e jepe nde-rehe hembiapo vai va'e, enhemonhe'ẽ porā jevy katu íxupe. Ha ohendu-ma ramo ne nhe'ẽ, “Arova-ta xe rekoha xe anhemboasy xe rembiapo vaikwe-rehe nde-vy” he'i ramo eiporahuvereko íxupe. Anive eremomandu'a hembiapo vaikwe-rehe.

4 Nde-rehe hembiapo vai meme ramo, ha onhemboasy meme gwembiapo vaikwe-rehe ramo, eiporahuvereko meme katu íxupe. Eiko porā rei indive, he'i Hesu omombe'u-vy hekoha kwéryrā.

5 Upéa-rehe hemimbo'e kwéry he'i íxupe:

—Ore pytygwō katu orojerovia teeve hagwā Nhandejáry-rehe, he'i onhepytygwō ukaseve-vy ojerovia ete hagwā.*

6 —Erejerovia mixīmi-ma ramo Nhandejáry-rehe, ome'ẽ-ta nde-vy ne rembijerure, he'i. —Oĩ temitŷgwe héry va'e mostarda. Mixī eterei haimete nome'ẽi erehexa hagwā. Upe mixīgwe va'e-gwi osẽ tuvixa va'e. Yvyrami opyta. Upéixa ave mixīmi jepe erejerovia tee ramo Nhandejáry-rehe, “Ehapo'o ehekŷi ko yvyragwasu” ere ramo, ohapo'o joty va'erā. “Erenhotŷ

* **17:5** Mt 17.20; 21.21; Mc 11.23

jevy ko yvyragwasu ygwasu-py” ere ramo íxupe, onhotŷ jevy va'erã y-py. Ne rembijerurekwe ojapo-ta Nhandejáry, he'i íxupe kwéry. —Nde-vy ikatu e'ŷ va'e ojapo va'erã nde-vy ne rembijerurekwe, he'i Hesu.

7-9 He'i ave íxupe kwéry:

—Eremomba'apo heta ne rembigwái kokwe-py ombo'apo va'e. Mymbarehe onhangareko va'e ombo'apo heta. Ombo'apo rire-ma ogwahē jevy nde róga-py. Upéi ere íxupe: “Ekwa katu ejapo xe remi'urã. Eru xe-vy ha'u va'erã, hay'u hagwã ave”.

Erekaru porã rire ae-ma ere ne rembigwái-pe, “Ekaru katu”. Avave nde'íry ombo'apo va'e-pe: “Atima nde-vy ne rembiapo-rehe” nde'íry. Nde'íry ave, “Atima nde-vy xe nhe'ẽ-rupi eremba'apo-gwi” nde'íry.

10 —Peẽ ave, peiko ramo Nhandejáry nhe'ẽ-py, hemimbota meme peteĩ teĩ pejapo ramo, ani peje pendéjehe, “Xe rembiapo porã voi ko xe” ani peje teĩ pendéjehe. Iporãve ere “Hembigwái porã ete ndaikói Nhandejáry-pe. Hemimbotami mate ajapo íxupe” peje ae katu pendéjehe, he'i hekoharã omombe'u gwemimbo'e kwéry-pe.

Dez mba'asy vai ogwereco va'e-pe ombogwera Hesu

11 Hesu ogwata oho-vy Jerusalém tetã-my. Tape puku-rehe oho. Samaria pygwa yvy-rupi oho, Galiléia pygwa yvy-rupi ave oho.

12 Oike-tama peteĩ tetã'i-my ou ohogwaiti mo'ã íxupe dez aiai mba'asy vai ogwereco va'e. Ipire omboai mba'asy ani eremoagwî teĩ mba'asy vai ogwereco va'e-pe. Ogwahē mo'ã Hesu renda-py. Mombyry jave íxugwi opyta. Onhe'ẽ hatã he'i-vy:

13 —Mbo'eháry Hesu, ore poriahuverekó katu ore mbogwera katu, he'i onhe'ẽ hatã-vy.

14 Hesu ohexama ramo íxupe kwéry he'i:

—Tapeho pejehexa uka pa'i kwéry-pe judeu kwéry rekoha-rupi, he'i íxupe kwéry.

Ha oho hikwái. Tape-rupi ogwata oho jave okwerapa-ma hikwái. Hesu nhe'ẽ-py okwerapa-ma.*

15 Oikwaa-ma ramo ikweraha peteĩ ou jevy ohogwaiti Hesu-pe:

—Xe mbogwera-ma hexapyrã-rupi xe mbogwera-ma, he'i. —Tonhemomarangatu katu Nhandejáry réry. Onhemomba'egwasu ete va'e Nhandejáry, he'i.

Omboete Nhandejáry-pe osapukái-vy ou jave tape-rupi ov'y'a eterei-gwi.

16 Ogwahē-ma ramo Hesu-pe onhesû henonde-py omboete íxupe-vy:

—Xe Járy, ne rembiapo porã eterei. Nde ko ne marangatu tee va'e. Atima voi nde-vy xe mbogwera-gwi. he'i íxupe.

Ovy'a eterei okwera-ma ramo upe Samaria pygwa va'e.

17-18 Upéi Hesu he'i íxupe:

—Ndaha'ei ne anho orombogwera kuri, he'i. —Enterovéa-pe voi ambogwera kuri, he'i. —Ha ne anho mate ereju xe mboete-vy, he'i okwera va'e-pe.

Ha ojogweroaty va'e-pe omombe'u.

—Ko samaritano va'e mate ou jevy xe mboete-vy. Nhande re'ýi e'ŷ va'e mate ov'y'a para'e ambogwera-magwi íxupe, he'i. —Nove ndoúiry va'e kwéry-pe ambogwera ave kuri, he'i.

19 Upéi he'i samaritano va'e-pe:

—Epu'ã katu. Orombogwerapa-ma. Xe-rehe erejerovia-gwi ororesende-ma, he'i íxupe Hesu.

* **17:14** Lv 14.1-32

*Kóixa Nhandejáry nhande ruvixa ramo
(Mt 24.23-28,37-41)*

20 Gwī fariseu kwéry oporandu Hesu-pe:

—Araka'e tipo ojekwaa-ta Nhandejáry nhande ruvixarā, he'i oporandu-vy.

—Ndaha'ei nhande resa-rupi jahexā Nhandejáry nhande ruvixa ramo, he'i omombe'u-vy íxupe kwéry.

21 —Upéa-rehe ndikatúi ere, “A-py ou-ma Nhandejáry. A-py ojekwaa-ma huvixarā”. Nde'íry ave “Upe-py ou-ma. Ojekwaa-ma huvixarā upe-py” nde'íry ave, he'i Hesu omombe'u-vy. —Avave ndohexái kipy po oiko. Nhande py'apy-py oiko nhande ruvixarā, he'i upe fariseu kwéry-pe ombo'e-vy.

22 Upéi he'i doze gwemimbo'e kwéry-pe:

—Ou va'erā peē-my peteī áry xe rexase eterei va'erā. Ha xe Nhande Ryke'y tee va'e-rehe peje-ta, “Ahexā nga'u íxupe. Peteī áry-rupi ahexā ramo íxupe avy'a va'erā” peje arā xe-rehe. Ha ndaxe rexa mo'ai-ta vyteri.

23 “Ogwahē-ma ko'a-py” he'i rei va'erā xe-rehe. Ijapu rei va'erā xe-rehe. “Ogwahē-ma upe henda-py” he'i rei va'erā xe-rehe ijapu va'e. Ani erejerovia teī hese kwéry. Ani teī ereho xe reka-vy ave.

24 Agwahē ramo xe, Nhande Ryke'y tee va'e, enterove oikwaa-ta, ohexā-ta xe gwahē ramo. Ha'e-ta peē-my: Omohembipepa aragwaju-rami va'erā peē-my agwahē-ma ramo. Xe rexapa va'erā.

25 —Ahasa asy ranhe-ta. Áygwa xe joko-ta ija'e'ý-ta xe-rehe.

26 Xe Nhande Ryke'y tee va'e agwahē jevy ramo, yma gware-pe ojehu hagwe-rami ave, ojehu jevy va'erā. Oikove vyteri jave Noé amyrī

27 gwī kente kwéry oiko rei araka'e. Okaru, oy'u, omenda ave, ome'ë gwajjýry omenda hagwā ave. Upéixa rei okwa araka'e hikwái. Nhandejáry-rehe katu nopenáiry araka'e hikwái. Upéi Noé oike okanoagwasu-py. Oike rire-ma, pya'e oky araka'e. Tuvixa oky. Yvu mbovu-vy araka'e oky. Ha onhehundipa oike e'ý va'ekwe gwive.

28 —Upéixa ave ojehu araka'e myamyrī Sodoma tetā mygwa kwéry-pe. Oiko-ma jave Ló amyrī upe pygwa kwéry oiko rei ave araka'e. Okaru, oy'u rei, ojogwa ombo'erā, ovende ave ombo'ekwe, kokwe ojaty, gwogarā omopu'ā ave. Upéixa rei okwa araka'e.

29 Upéi Ló osē araka'e tetā-gwi oho-vy. Osēha áry-py ho'a tata yváy-gwi ohapy hagwā araka'e tetā mygwa. Iku'i sa'yju va'e ho'a-ma araka'e ohapy hasyve hagwā tetā mygwa kwéry ohundipa hagwā.

30 —Upéixa oiko-ta ave agwahē jevy ramo. Xe, Nhande Ryke'y tee va'e agwahē jevy-ta.

31 Agwahēha áry ramo xe-rehe mate pepena va'erā. Agwahē jave ereime ramo óga ári, ani teī ereike koty-py mba'eve ereraha hagwā. Ereime ramo kokwe-py, ani erejevy nde róga-py.

32 Ne mandu'a jevy katu Ló amyrī rembireko-rehe. Ojevyse mo'ā onhehundi-ma va'ekwe.

33 Gwekove-rehe hakate'ý va'e katu, onhehundipa ete va'erā. Ndohói va'erā Nhandejáry renda-py. Ha xéhegwi gwekove-rehe nopenái va'e, ohekoviárō arā hekove íxupe. Oresende-ta íxupe Nhandejáry.

34 —Ha'e-ta ave peē-my: Pyhare-py agwahē jevy ramo, mokõi va'e oke jave koty-py. Peteī va'e-pe Nhandejáry ogweraha va'erā. Inhirūgwe-pe katu oheja va'erā.

35 Mokõi kunha hu'irā ojoso va'e oime jave agwahē ramo, peteī va'e-pe Nhandejáry ogweraha va'erā. Inhirūgwe-pe oheja va'erā.

³⁶ Mokõi oime jave kokwe-py agwahẽ ramo, peteĩ va'e-pe ogweraha va'erã. Inhirûgwe-pe oheja va'erã, he'i ombo'e-vy doze gwemimbo'e kwéry-pe.

³⁷ Upéa-rehe oporandu íxupe:

—Mamo tipo oiko va'erã upéa, ore Járy, he'i íxupe.

Upéi Hesu he'i íxupe kwéry:

—Anhete voi oĩ ramo hetekwe, yruvu kwéry ogwejy katu ete arã ho'u hagwã. Anheteve ha'e-ta nde-vy: Oikopa-ma ramo xe remimombe'u, aju jevy-ma va'erã, he'i Hesu omombe'u-vy gwemimbo'e kwéry-pe.

18

Tembirekokwe ojerure rure va'e rehewa nhe'ẽ

¹ Upéi Hesu he'i gwemimbo'e kwéry-pe:

—Tapembojeupi meme katu pene nhe'ẽ Nhandejáry-pe peiko-vy. Ani ne ate'ỹ teĩ ne nhe'ẽ erembojeupi-vy, he'i.

Upéi arandu nhe'ẽ omombe'u íxupe kwéry. Tembirekokwe rehewa nhe'ẽ-rami omombe'u.

² —Mburuvixa ipy'a vai va'e oĩ va'ekwe peteĩ tetã-my. Ndojeroviái Nhandejáry-rehe nopenáí hese. Ojéupe gwarã mate ojapo. Ndojapóiry mba'eve avave pegwarã.

³ —Ha peteĩ tembirekokwe upe pygwa va'e oho meme mburuvixa rendapy. Ojerure rure rei íxupe ohepy hagwã imbohasa asyhare-pe. Ha ndojapói inhe'ẽ.

⁴⁻⁵ Ijerureha ndojapóiry íxupe. Are ohendu hendu rei kunha nhe'ẽ. Upéi he'i opy'apy-py: "Xe mokane'o eterei ko tembirekokwe nhe'ẽ. Upéa-gwi ajapo-ta inhe'ẽ. Ndaha'ei pono xe mbohasa asy Nhandejáry. Napenáí hese. Ndaha'ei ave pono onhe'ẽ vai hagwã avave xe-rehe. Xe napenáiry avave-rehe aiko-vy. Pono xe toryvave ajapo-ta íxupe inhe'ẽ, aipytygwõ-ta íxupe" he'i mburuvixa kunha-rehe, he'i Hesu omombe'u ramo arandu nhe'ẽ.

⁶ Upéi he'ive íxupe kwéry:

—Ha'e-ta peẽ-my: Upe mburuvixa ipy'a vai jepe hembiapo porã nainhate'ỹi va'e-pe. Hembijerure ojapo voi íxupe.

⁷ Ha Nhandejáry katu ipy'a porã ete nhane ndive. Gwembiporavo-pe oiporahuvereko meme. Oipytygwõ-ta íxupe, omondo mundo íxupe onhe'ẽ va'e-pe oipytygwõ. Ohendu voi inhe'ẽ. Ani ere teĩ, "Hi'are eterei Nhandejáry xe rembijerure ojapo hagwã". Omundo mundo íxupe onhe'ẽ va'e-pe oipytygwõ. Ani ave ere teĩ, "Xe nhe'ẽ nohendúi para'e ohendu para'e Nhandejáry" ani ere teĩ Nhandejáry-rehe, he'i Hesu omombe'u-vy. —Ereikokwe-vy joty ani ne ate'ỹ teĩ eremondo hagwã ne nhe'ẽ íxupe. Áry-py, pyhare-py ave eremondo mundo ne nhe'ẽ íxupe. Nde porahuvereko-ta ne rembijerure ojapo-ta nde-vy.

⁸ Ndahi'aréi ne pytygwõ hagwã nde hese erejerovia va'e, he'i. —Xe ko Nhande Ryke'y tee va'e. Agwahẽ jevy ramo, ndahetáí arã voi nipo ra'e upéixa ojerure rure va'e xe ra'arõ va'erã. Ani katu ne ate'ỹ eterei ereiko-vy. Emondo mundo katu ne nhe'ẽ Nhandejáry-pe, he'i Hesu omombe'u-vy.

Mokõi kwimba'e ombojeupi onhe'ẽ Nhandejáry-pe rehewa nhe'ẽ

⁹ Upéi Hesu omombe'u jevy ojogweroaty va'e-pe. Upe-py oĩ onhemboete rei va'e kwéry. Oĩ ave gwapixa-rehe onhe'ẽ rei rei va'e kwéry. Upéa-rehe Hesu onhemonhe'ẽ íxupe kwéry. Arandu nhe'ẽ oiporu omombe'u hagwã mba'eixagwa py'a jareko nhambojeupi ramo nhane nhe'ẽ Nhandejáry-pe. Mokõi kwimba'e rehewa nhe'ẽ-rami omombe'u.

¹⁰ —Mokõi kwimba'e oho ojeporahéi haty-py ojapo hagwã oração. Peteĩ fariseu va'e, outro plata-py nhane mbopaga va'ety.

11 Ha omondo hagwā onhe'ē Nhandejáry-pe upe fariseu va'e onhembo'y. Ipy'apy-py ae onhemongeta. Onhembotuvixa eterei-gwi onhenohē porā mo'ā Nhandejáry-pe.

—“Tupā xe Járy” he'i onhemongeta-vy. “Avy'a ete xe rekoha-rehe” he'i mo'ā. “Ambue kwéry-rami ndaikói voi xe” he'i. “Imonda e'ŷ va'e xe. Hekoha vai e'ŷ va'e ave xe. Namenda mendái kunha ambue-rehe ave aiko-vy. Naxe rembiapo vaíry voi avave-rehe” he'i mo'ā. “Avy'a eterei. Xe ndaikói voi ko plata-py oporombopaga va'ety rekoha-rami” he'i onhembotuvixa-vy. “Xe rembiapo porā voi aiko-vy” he'i.

12 “Ha nde-rehe ajerovia-gwi peteĩ teĩ semana mokõi áry meme ahasa asy karu e'ŷ rehev aiko-vy” he'i. “Xe areko va'e aipapa meme dez-gwi aipe'a peteĩ ame'ē nde-vy gwarā” he'i omondo-vy onhe'ē Nhandejáry-pe onhenohē porā hagwā mo'ā íxupe, he'i Hesu omombe'u-vy.

13 —Ha upe oporombopaga va'ety otĩ oike hagwā ojeporahéi haty-py. Mombyry-rupi rei oiko. Noma'ē ma'ēi voi oiko-vy otĩ eterei-gwi. Ndjeeesaupíry ojahe'o voi oĩ-vy onhemboasy-vy “Xe ko xe py'a vai voi aiko-vy” ho'e-vy hasē. “Tupā, xe Járy” he'i, “Xe poriahuverekat” he'i onhemboasy-vy íxupe. “Xe rembiapo vai eterei voi aiko-vy” he'i onhemboasy-vy, he'i Hesu omombe'u-vy.

14 Ha he'i ave Hesu:

—Ha'e-ta katu xe: Onhemboasy va'e-gwi omboyke voi-ma hembiapo vaikwe Nhandejáry. Ohendu voi inhe'ē. Ipy'a potĩ-vy oho jevy gwóga-py. Ha upe fariseu va'e-gwi hembiapo vaikwe nomboyke mo'āi voi onhenohē porāse mo'ā íxupe-gwi, he'i Hesu arandu nhe'ē oiporu-vy.

Upéi he'i jevy.

—Anhete ha'e-ta peẽ-my: Onhemboeteseve va'e-rehe avave nopenái arā, ha onhemomirī va'e-pe ae katu omboete va'erā, he'i Hesu omombe'u-vy.

Mitāgwe-pe Hesu ohovasa (Mt 19.13-15; Mc 10.13-16)

15 Ogweru ave okwa-vy Hesu renda-py mitāgwe Hesu omoī hagwā opo mitā kwéry-rehe ohovasa hagwā. Ha hemimbo'e kwéry ohexama ramo, hakate'ŷ Hesu-rehe.

—Ani ereru Hesu ha-py mitā mixī mixī va'e, he'i ojoko-vy.

16 Ha Hesu katu he'i:

—Eheja katu tou mitā'i gwive xe renda-py. Ani erejoko teĩ. Mitā'i reko mirī vérampi va'e meme omoirū-ta Nhandejáry gwuvixarā-pe, he'i omombe'u-vy.

17 —Anhete ko ha'e-ta peẽ-my. Nhandejáry oiko ha-rupi huvixa ramo ndaipóri-ta onhembotuvixave va'e. Onhemohekomirīve va'e ae omoirū-ta íxupe, he'i Hesu omombe'u-vy.

Imba'e reta va'e onhomongeta Hesu ndive (Mt 19.16-22; Mc 10.17-22)

18 Peteĩ mburuvixa oporandu Hesu-pe:

—Mbo'eháry, nde reko porā va'e. Mba'e tipo ajapo-ta xe aikove hagwā Nhandejáry ndive apave'ŷ rehev? he'i oporandu-vy Hesu-pe.

19 —Ne mandu'a porā katu ne nhe'ēgwe-rehe, he'i íxupe Hesu. —“Nde reko porā va'e” ere kuri xe-rehe. Nhandejáry, ha'e anho mante heko porā tee va'e, he'i Hesu íxupe.

20 —Ereikwaa-ma Nhandejáry omombe'u va'ekwe nhande rekorā, he'i ave Hesu. —Ani ereiko teĩ ambue mbue ndive, he'i. —Ani ereporojuka teĩ. Ani

eremonda teĩ. Ani nde apu teĩ avave-rehe. Emboete katu nde ru, nde sy ave. Upéixa omombe'u va'ekwe Nhandejáry nde rekorã, he'i íxupe Hesu.*

²¹ —Xe mitã ramogware ây peve upéa nhe'ẽ namokanhýi, he'i. —Ahendu vyteri aiko-vy xe, he'i Hesu-pe.

²² Ohendu-ma ramo, Hesu he'i íxupe:

—Peteĩ oĩ va'e nderejapóí vyteri, he'i íxupe. —Erereko va'e gwive evendepa katu. Hepykwe ae eru eme'ẽmba iporiahu va'e kwéry-pe. Upéixa erejapo ramo, nde rekoha porãrã erereko arã yváy-py. Upe rire eju katu xe moirã, he'i íxupe Hesu.

²³ Ohendu-ma ramo inhe'ẽ ndovy'avéi-ma. Ipy'a reraha eterei omba'e reta reta-rehe.

Hasy eterei opamba'e ogwereco va'e oiko hagwã Nhandejáry mburuvixa ramo oiko ha-rupi

(Mt 19.23-30; Mc 10.23-31)

²⁴ Ha Hesu oma'ẽ hese. Oikwaa-ma ndovy'avéi-ma upe va'e. Upéixa-gwi he'i onhondive oĩ va'e-pe:

—Hasy peve opamba'e ogwereco va'e omoirã hagwã Nhandejáry gwuvixarã-pe, he'i.

²⁵ —Hasy eterei nhambobhasa ka'ijugwasu kwa-rupi mymbagwasu camelô, ndaijaséiry. Ha hasyve imba'e reta va'e omoirã hagwã Nhandejáry gwuvixarã-pe, he'i.

²⁶ Ha ohendu va'e kwéry he'i:

—Kiva'e onheresende-ta, aipo ramo? Hasy eterei nipo nhanheresende hagwã ra'e, he'i.

²⁷ Ha Hesu katu he'i:

—Peẽ-my hasy eterei va'e ndahasy mo'ãi Tupã Nhandejáry-pe. Ha'e anho mante ne resende va'erã, he'i.

²⁸ Ha upéi katu he'i íxupe Pedro:

—Ore niko orogwereko va'e gwive orohejapa oroju-vy oromoirã hagwã, he'i Hesu-pe.

²⁹ —Anhete ko xe ha'e-ta nde-vy, he'i íxupe Hesu. —Xe omoirã hagwã gwóga, gwóga pygwa ave oheja va'e hetave ojohu va'erã gwembiejare rekoviãrã. Gwembireko, gwyke'ýry, gwyvýry, gweindýry, gwa'ýry, gwajýry, oména, omembýry, gwykery, okypy'y kwéry, okyvýry, gwu, osy oheja ramo omoirã hagwã Nhandejáry gwuvixarã-pe,

³⁰ hetave tave ome'ẽ va'erã íxupe Nhandejáry. Ohexakwaa rei va'erã íxupe ko'ãy, ha yvy opa-ma rire oikove meme va'erã Nhandejáry ndive opave'ý reheve, he'i Hesu.

Omanotaha omombe'u Hesu

(Mt 20.17-19; Mc 10.32-34)

³¹ Upéi ohenói jevy gwí doze gwemimbo'e íxupe kwéry anho omombe'u hagwã.

—Jaha jaiko-vy Jerusalém tetã-my. Ha xe Nhande Ryke'y tee va'e ahasa asyta upe-py, he'i. —Nhandejáry nhe'ẽ-py omombe'u va'ety kwéry omohenonde va'ekwe ihai-vy mba'e pa ojehu-ta xe-vy. Upe ohai va'ekwe xe rehegwa ây ojapopa-ta, he'i.

³² —Xe pyhy-ta xe reraha judeu e'ý va'e kwéry-pe. Onhembohory-ta xe-rehe, xe rerekoy asy-ta ave, onygwõ-ta ave xe-rehe.

³³ Xe mbopi rire xe juka-ta. Mbohapy áry-py anhemoingove jevy-ma va'erã, he'i gwemimbo'e kwéry anho-pe onhemombe'u-vy Hesu.

* **18:20** Ex 20.12-16

³⁴ Ha hemimbo'e kwéry nohendu kwaái voi Hesu nhe'ẽ. Ojeapysaka rei hikwái. Onhenhomí voi íxugwi kwéry pono oikwaa he'ise va'e.

*Jericó tetã mygwa hesapysso e'ŷ va'e-pe ombogwera Hesu
(Mt 20.29-34; Mc 10.46-52)*

³⁵ Ogwahē-tama Jericó tetã-my. Hi'agwī-ma oĩ ramo tetã hesapysso e'ŷ va'e ogwapy oĩ-vy tapegwasu rembe'y-py. Om̄ba'e repyrā-rehe ojerure oĩ-vy.

³⁶ Ha Hesu ndive ojogweroaty va'e ohasa oje'óí-vy tape-rupi. Ohendu ramo ijayvu, oporandu ohexa va'e-pe:

—Mbava'e tipo ajapo oje'óí-vy? he'i hese.

³⁷ —Hesu Nazaré pygwa ohasa oje'óí-vy, he'i íxupe.

³⁸ Ohendu-ma ramo, onhe'ẽ hatã ohenói-vy:

—Hesu, Davi remiarirōre, xe poriahuverekō katu, he'i.

³⁹ Henonde-rupi ohasa va'e inhe'ẽ ojoko mo'ã íxugwi:

—Ekirirī katu, he'i íxupe omongirirīse mo'ã-vy íxupe.

Ha'e katu hatāve tāvē joty osapukái oĩ-vy:

—Xe poriahuverekō katu, Davi remiarirōkwe, he'i joty.

⁴⁰ Upéi opyta-ma Hesu.

—Eru íxupe, he'i.

Ou-ma ramo oporandu íxupe Hesu:

⁴¹ —Mbava'e tipo ereipota xe ajapo hagwā nde-rehe? he'i hesapysso e'ŷ va'e-pe ijeroviaha ojekwaa uka hagwā.

—Eme'ẽ xe resarā xe-vy, mbo'eháry, he'i.

⁴² —Ema'ẽ. Nde resapysso-ma ngatu, he'i. —Xe-rehe erejerovia-gwi erekwera-ma, he'i.

⁴³ Onhe'ẽ jave okwera-ma. Okwera-ma ramo, omoirū-ma íxupe oho-vy. Omboete ete Nhandedjáry-pe oho-vy Hesu rappykwéri.

Ha upe pygwa oĩ va'e gwive, upéa ohexa va'e gwive, Nhandedjáry-pe omomba'egwasu ete voi.

19

Zaqueu rehewa nhe'ẽ

¹ Ogwahē-ma Hesu Jericó tetã-my. Ohasa oho-vy tetã-rupi.

²⁻³ Ha peteĩ mburuvixa ohexase eterei Hesu-pe. Pirapire-py nhane mbopaga va'ety kwéry-pe mburuvixa upéa. Imba'e reta va'e. Ikarape va'e. Héry va'e Zaqueu. Ikarape-gwi ndikatúi ohexa kente ári-rupi Hesu-pe. Heta eterei ojogweroaty va'e ogweroajere Hesu-pe omanha manha hese-vy.

⁴ Upéi Hesu oho hagwā-rupi oho yvyra-rehe ojeupi Zaqueu. Oripara oho-vy yvate ojeupi oĩ-vy ohexa hagwā Hesu-pe.

⁵ Ogwahē-ma ramo Hesu upe yvyra gwy-py, opyta. Orepara yvate-koty oma'ẽ Zaqueu-rehe.

—Zaqueu, egwejy. Pya'e egwejy. Aha-ta nde róga-py, he'i íxupe.

⁶ Pya'e ogwejy oho ohogwaitī Hesu-pe. Ovy'a eterei Zaqueu. He'i Hesu-pe:

—Jaha katu, he'i.

Pya'e oho indive.

⁷ Hexaháry ndojohu porāi. Ojohu vaipa voi. Onhe'ẽ vai vai Hesu-rehe.

—Hesu omoirū rei opaixagwa va'e-pe. Ojeavy va'ety jepe, Hesu katu omoirū joty íxupe, he'i hese ojohu vai-vy.

⁸ Ha upe rire, ogwahē-ma rire, hóga-py oĩ-ma rire, Zaqueu he'i:

—Xe Járy, arova katu xe rekoha, he'i íxupe. —Iporiahu va'e kwéry-pe ame'ẽ-ta heta xe mba'ekwe. Amboja'o ja'o-ta xe rembierekokwe. Ame'ẽ-ta iporiahu

va'e kwéry-pe. Ha xe rembiapo vaikwe-gwi heta voi xe pirapire, he'i. — Peteĩ va'e-rehe areko ramo xe rembiapo vai-rupi ahekoviariõ-ta ame'ẽve-ta voi. Ijarykwe-pe irundy voi ame'ẽ-ta hekovia. Arova-ta ave xe rekoha, he'i Hesu-pe.

⁹ Upe-ma ramo Hesu he'i:

—Ây eremoirũ-ma Nhandejáry nde ruvixa-pe. Omboyke-ma ndéhegwi ne rembiapo vaikwe. Ne resende-ma. AAraão remiarirõre voi ko nde.

¹⁰ Xe, Nhande Ryke'y tee va'e agwahẽ-ma aju-vy aheka Nhandejáry-gwi mombyry oiko va'e-pe aresende hagwã.

Mburuvixagwasu oplata oiporu uka va'e rehewa nhe'ẽ

(Mt 25.14-30)

¹¹ Upe nhe'ẽ ohendu hikwái. Ha namombyry etéiry Jerusalém tetã-gwi. Upéixa-gwi ohendu-ma ramo upe nhe'ẽ ojogweroaty va'e he'i opy'a-apy. "Ojekwaa-tama para'e Nhandejáry nhande ruvixarã. Ogwahẽ-tama Hesu Jerusalém-my" he'i. "Ojekwaa-tama para'e nhande ruvixarã."

Upéa-rehe Hesu omombe'u jevy íxupe kwéry arandu nhe'ẽ mburuvixagwasu oplata oiporuruka va'e rehewa nhe'ẽ-rami. He'i:

¹² —Peteĩ mburuvixa oho mombyry. Yvy ambue-py oho onhemomburuvixagwasu hagwã. Oiko-ma ramo mburuvixagwasu, ou jevy va'erã oiko hagwe-py.

¹³ Oho e'ŷ ngatu ohenói gwĩ dez va'e gwembigwái. Peteĩ teĩ-pe ome'ẽ plata. Peteĩ meme ome'ẽ íxupe kwéry. Ome'ẽ jave he'i gwembigwái-pe. "Ko xe plata eiporu porã erembohe'ýi hagwã xe rapykwe-py. Agwahẽ jevy-ma aju-vy ramo, aporandu jevy arã nde-vy he'yiverã-rehe" he'i omanda-vy gwembigwái-pe.

¹⁴ —Ha heta he'ýi kwéry ndija'íi rei mburuvixa-rehe. Upéixa-gwi nhe'ẽ rei omundo hapykwéri mburuvixave va'e-pe: "Upe va'e ore ndoroipotái ore ruvixarã. Ipogwy-py ndoroikoséiry. Hekoha vai eterei" he'i rei hese.

¹⁵ —Oiko-ma ramo mburuvixagwasu ramo, ogwahẽ jevy oyvy-py. Upéi ohenói gwembigwái kwéry oplata rehewa oikwaa hagwã.

¹⁶ —Ogwahẽ ypy va'e omombe'u íxupe: "Xe ruvixa, aiporu va'ekwe nde plata" he'i omombe'u-vy. "Ereme'ẽ peteĩ xe-vy va'ekwe amoïve nde-vy. Ambohekivia nde-vy dez jevy" he'i omombe'u-vy.

¹⁷ —Ovy'a hemimbohekoviakwe-rehe mburuvixa. "Iporã voi" he'i. "Xe rembigwái porã voi, nde. Ndahetái mba'e jepe erenhangareko kwaa porã hese. Upéixa-gwi dez tetã mygwa-pe ereiko-ta mburuvixa ramo" he'i íxupe.

¹⁸ —Upéa ogwahẽ rire, peteĩ jevy ogwahẽ: "Peteĩ nde plata aiporu-gwi amoïve nde-vy cinco jevy ave" he'i íxupe.

¹⁹ —"Aipo ramo erenhangareko kwaa ave nde. Upéixa-gwi ereiko-ta mburuvixa ramo. Cinco tetã va'e-rehe erenhangareko-ta" he'i gwembigwái-pe.

²⁰ —Upe rire ou peteĩ jevy hembigwái ave he'i gwerekwa-pe: "Ame'ẽ jevy-ta nde-vy nde plata" he'i íxupe. "Upe peteĩ ereme'ẽ va'ekwe xe-vy anhangareko porã hagwã anhugwã imoï-vy ao-py.

²¹ Xe ko, atĩ voi ndéhegwi" he'i íxupe. "Aikwaa voi ne rakate'ýha. Ereme'ẽ e'ŷ va'ekwe jepe, ereipe'a joty ijáry-gwi. Erenhemity e'ŷ rehewe, eremono'õ uka vai joty ne mba'erã ijarykwe-gwi. Upéixa-gwi atĩ ndéhegwi" he'i.

²² —"Ne rembiapo vai voi ko nde xe-rehe" he'i herekwa íxupe. "Nderevaléi voi" he'i ave. "Ma'erã-gwi ndereiporu porã xe plata?" he'i íxupe. "Ere kuri xe-vy: Ne rakate'ýha aikwaa voi, ere" he'i íxupe. "Ereme'ẽ e'ŷ va'ekwe ereipe'a ijáry-gwi, ere xe-vy, Eremono'õ uka vai ne mba'erã ijarykwe-gwi, ere ave kuri xe-vy.

²³ Aipo ramo ma'erā-gwi nereme'ēi va'ekwe xe plata pirapire oiporuruka va'e-pe? Oiporuruka va'ekwe repy ohekoviārō jevy hagwā xe-vy. Ne rembi-apo vai voi xe-rehe" he'i ov'y are'ŷ-vy inhate'ŷ va'e-pe.

²⁴ —Upéi he'i gwembigwái ambue-pe: "Eipe'a jevy xe plata íxugwi. Upéa ave ereme'ē jevy hagwā upe dez plata omono'ō va'e-pe" he'i.

²⁵ —Upéa-rehe he'i gwerekwa-pe: "Ogwereko-ma dez. Naiporāi ereme'ēve íxupe" he'i jevy.

²⁶ —"Iporā ereme'ēve íxupe" he'i herekwa. "Nhande re'ýi he'i meme: Heta ogwerekva va'e-pe hetave ome'ē jevy va'erā. Ha inhate'ŷ va'e, naimba'e rex-akwaái va'e-gwi oipe'apa va'erā íxugwi. Mixí ogwerekva ramo jepe, ogwerekva va'e gwive oipe'apa jevy-ta íxugwi" he'i.

²⁷ "Ha'e-ta ave peē-my: Peru katu xe-rehe ija'e'ŷ va'ekwe. Ndaxe potáiry va'ekwe gwuvixarā. Xe renonde-py jevy pejuka íxupe kwéry" he'i omanda-vy ijukaharā-pe, he'i Hesu nhande ruvixa ramo ndojehexa uka pya'eséi-vy.

Jerusalém tetā-my ogwahē Hesu

(Mt 21.1-11; Mc 11.1-11; Jo 12.12-19)

²⁸ Upe rire, upéa omombe'u rire, Hesu oho Jerusalém tetā-my. Gwemimbo'e kwéry renonde-rupi oho tape-rupi oje'ói-vy.

²⁹ Ha nogwahēi vyteri, onhemogwī ranhe Betfagé tetā mirī-gwi. Betânia tetā-gwi ave. Yvyatyrusu Oliveiras ypy-py ogwahē gwahē ranhe oho-vy. Upe-gwi omondo gwenonde-rupi mokōi gwemimbo'e:

³⁰ —Tereho tetā mirī-my ore renonderā-rupi, he'i íxupe. —Ereike-ma ramo eretopa-ta mburika'i onhenhapytī ha-py. Hi'ári ojejeupi e'ŷ va'e. Ejora heruvy, he'i.

³¹ —Erejora ramo mburika, "Ma'erā tipo erejora mburika?" he'i va'erā ndevy. Aipo ramo ere íxupe, "Araha-ta. Oikotevē hese nhande ruvixa" ere kuri íxupe, he'i imondo-vy.

³² Ha upéi katu oho upéa mokōi va'e ha otopa omombe'u hagwéixa.

³³ Ojora jave mburika'i ijáry oporandu mokōi hemimbo'e-pe:

—Ma'erā tipo erejora xe rymba mburika'i? he'i.

³⁴ —Nhande ruvixa oiporu-ta íxupe. Oiporu hagwā araha-ta, he'i.

—Aipo ramo eraha, he'i.

³⁵ Ha upéi katu ogweru Hesu-pe. Omoī hi'ári oao. Ha Hesu-pe ohupi omoī mburika ári oho mombyryve hagwā.

³⁶ Ha oho jave heta va'e omboi oao oipyso hagwā Hesu ogwata hagwā hi'ári. Haperā-rupi omoī omboete-vy. Hesu mboete-vy ha'e oipyso oao. Ogwejy oje'ói-vy hikwái.

³⁷ Upéi ogwahē-tama ramo ogwejy tape-rupi yvyatyrusu Oliveiras ári-gwi. Ogwejy oje'ói-vy jave, ogwahē-tama ramo Jerusalém tetā-my, hese ojerovia va'e kwéry ogwerohory Hesu-pe. Osapukái joa oporahéi ave omboete Nhandejáry-pe. Heta hembiapo porā hexapyrā-rupi ohexa va'ekwe-rehe omboete íxupe:

³⁸ —Ereju-ma, he'i. —Iporā katu, he'i osapukái-vy íxupe. —Nhandejáry ombou-ma nhande-vy mburuvixagwasu. Tohovasa vasa katu Nhandejáry, he'i hese. —Toiko yváy-py py'agwapy porā. Nhandejáry yváy-py oī va'e-pe jaha nhamboete, he'i oporahéi-vy.*

³⁹ Upéa-rehe gwī fariseu va'e oī jave ojogweroaty va'e pa'ū-my he'i Hesu-pe:

—Mbo'eháry, ejoko katu íxupe kwéry pono aipo-rami he'i nde-rehe, he'i Hesu-pe.

* 19:38 SI 118.26

40 —Tekotevē oiko xe mboete va'erā. Kente kwéry naxe mboetéi ramo ra'e Nhandejáry omonhe'ẽ uka va'erā ra'e ita kwéry-pe xe mboete hagwā. Kente rekoviārā xe mboete hagwā, he'i Hesu fariseu kwéry-pe.

Hesu ojahe'o Jerusalém tetā mygwa kwéry-rehe

41 Ogwahē-tama ramo, ohex-a-ma ramo Jerusalém tetā Hesu ojahe'o upe pygwa kwéry-rehe.

42 —Apomboasy voi peẽ-my. Ndapeikwaái vyteri mba'eixagwa pa pene mbopy'agwapy, he'i. —Nhandejáry xe mbou va'ekwe pene mo'arandu hagwā mo'ā ha napehenduséi xe nhe'ẽ. Napehenduséi-gwi pene arandurāgwe okanhy-ma pendéhegwí.

43 Ogwahē-tama peẽ-my pehasa asy hagwā. Pende-rehe ija'e'ŷ va'e kwéry ou va'erā. Pene retā jerekwe-rehe ojo'o-ta yvykwa. Omopu'ã-ta ave ne mbotyhaty ponove avave osẽ pene retā-gwi, pende jopy-ta.

44 Pene hundipa-ta. Oity-ta pene retā. Ha peẽ kwéry upe-py oĩ va'e onhehundipa-ta. Ita-gwi pejapo va'ekwe pende róga kwéry. Ha upe ita kwéry oity-ta. Ndohejái arā ni peteĩ ita hendagwe-py. Oitypa ete arā. Upéixa pene mbohasa asy-ta. Nhandejáry xe mbou-ma ha "Nhane remiha'arō ogwahē-ma ra'e" nderéiry xe-rehe. Ndapejeroviáiry joty xe-rehe, he'i. —Upéa-rehe pene hundipa-ta Nhandejáry, he'i Hesu Jerusalém mygwa kwéry-rehe.

*Om̄ba'evende va'e kwéry-pe omosẽmba Nhandejáry róga kakwaa-gwi Hesu
(Mt 21.12-17; Mc 11.15-18; Jo 2.13-22)*

45 Upe rire oike Hesu Nhandejáry róga kakwaa-py. Om̄ba'evende va'e-pe omosẽmba.

46 He'i íxupe kwéry onhemonhe'ẽ-vy:

—Oĩ kwaitia-rehe Nhandejáry nhe'ẽ he'i: "Héry-ta xe róga xe mboete haty inhe'ẽ mondo haty Nhandejáry-pe". Ha peẽ katu peiporu Nhandejáry róga oporosakea nhemi va'e róga-rami, he'i íxupe kwéry Hesu omosẽ-ma ramo imondo-vy.*

47 Ha Hesu oho meme Nhandejáry róga kakwaa-py ombo'e mbo'e oiko-vy. Iko'ẽmba ãmba ombo'e meme-vy upe-py.

Ha pa'i ruvixa kwéry, judeu rekombo'ehaty kwéry, judeu ruvixa kwéry ave oheka heka ojuka hagwā Hesu-pe.

48 Ha ndotopái mba'e-rehe ojuka íxupe. Enterovéa kente kwéry ojeapysaka katu katu eterei ohendu hagwā inhe'ẽ.

20

*"Kiva'e nhe'ẽ-rupi ko'ã va'e erejapo?" oporandu Hesu-pe
(Mt 21.23-27; Mc 11.27-33)*

1 Ha peteĩ áry Hesu oime jevy Nhandejáry róga kakwaa-py omombe'u mbe'u hagwā Nhandejáry nhe'ẽ porā. Ha omombe'u jave ou henda-py pa'i ruvixa kwéry, judeu rekombo'ehaty kwéry, judeu ruvixa kwéry ave:

2 —Kiva'e nhe'ẽ-py ko'ã va'e erejapo? he'i. —Kiva'e tipo nde-vy a-rami oporombo'e uka ave nde-vy? he'i ave. Oporandu Hesu-pe hikwái.

3 —Xe ave aporandu-ta peẽ-my peteĩ mba'e, he'i. —Pemombe'u ranhe ramo xe-vy aporandu-ta va'e-rehe, amombe'u-ta ave nde-vy kiva'e nhe'ẽ-py xe rembiapo, he'i.

Upéi oporandu omokirirī hagwā íxupe kwéry:

* **19:46** Is 56.7; Jr 7.11

4 —Kiva'e nhe'ẽ-py va'ekwe João Batista amyrĩ oporomongarai oiko-vy va'ekwe? Nhandejáry nhe'ẽ-py para'e, teko rei nhe'ẽ-py para'e oporomongarai oiko-vy ha'e ae ho'arandu-rupi rei para'e ojapo? he'i. —Emombe'u ranhe katu xe-vy, he'i íxupe kwéry Hesu. Ha'e katu oikwaa-ma.

5 Upéa-rehe oporandu randu ojóupe:

—Nhandejáry nhe'ẽ-py katu oporomongarai va'ekwe” ja'e ramo “Ma'erã nderejeroviái va'ekwe hese?” he'i arã nhande-vy, he'i ojóupe hikwái.

6 —Ha, “Teko rei nhe'ẽ-py oporomongarai va'ekwe” ja'e ramo, nhande api va'erã ita-py kente kwéry nhande juka hagwã, he'i ojóupe. “João niko Nhandejáry nhe'ẽ-py omombe'u va'ety voi” he'i kente kwéry hese, he'i ojóupe hikwái. —Iporâve nhakirirĩ rei hese jaiko-vy, he'i ojóupe.

7 Upéa-rehe he'i Hesu-pe:

—Ndoroikwaáiry, he'i mo'ã.

8 —Aipo ramo, xe ave namombe'u mo'ãi peẽ-my kiva'e pa ojapo uka xe-vy ko'ã va'e, he'i íxupe kwéry Hesu.

*Arandu rehewa nhe'ẽ uvaty-py omba'apo va'e rehewa nhe'ẽ-rami
(Mt 21.33-46; Mc 12.1-12)*

9 Ha upéi katu omombe'u upe pygwa-pe arandu rehewa nhe'ẽ uvaty-py omba'apo va'e rehewa-rami:

—Oĩ va'ekwe uva onhotõ va'ekwe. Oho onhotõ uvaty omoõ hagwã. Ha omoõ rire oheja omba'apo va'erã-pe yva aju omboja'o ja'o arã ime'ẽ-vy va'e-pe. Upéi oho mombyry. Tetã ambue-py hi'are voi oiko-vy.

10 Hi'aju ramo omundo va'erã ivía ramo gwembigwái omboja'o hagwã yva mbyte-rupi ogweruruka hagwã ojéupe. Ha uvaty-py omba'apo va'e katu hembigwái-pe oinupã jevy imbou-vy. Nome'ẽi íxupe ogweraha va'erã. Ombojevy oinupã-vy.

11 Ambue jevy omundo ivía ramo. Ha'e kwéry oinupã onhembosarái hese, ombojevy rei ave mba'eve e'ŷ ogweru hagwã íxupe nomboetéi-gwi.

12 Ambueve omundo jevy ombohugwypa, omonha imbojevy imbou-vy.

13 Upe rire uvaty járy he'i opy'a-py: “Mbava'e tipo ajapo-ta” he'i opy'a-py. “Amundo jevy-ta xe rembiayhu tee. Amondo-ta xe ra'y. Omboete-ta para'e xe ra'y ogwahẽ oho-vy ramo” he'i mo'ã. Upéa-rehe gwa'ýry omundo.

14 Ohexa-ma ramo ta'ýry omba'apo va'e he'i ojóupe:

—Upéa uvaty jaryrã. Jaha jajuka íxupe, he'i jevy hese. —Upéixa ramo opyta arã nhande-vy imba'erãgwe, he'i ojóupe.

15 Upéixa-gwi uvaty-gwi ogwenohẽ ojuka íxupe. Oikwaa-ma ramo uvaty járy, mba'e tipo ojapo-ta íxupe kwéry?

16 Ohepy joty va'erã íxupe kwéry. Ogwahẽ-ta voi ojuka uka upe hembiapo vai va'e-pe. Ohekoviärõ-ta omba'apo va'erã, he'i Hesu judeu ruvixa kwéry rekokwe oikwaa uka-vy.

Ohendu-ma ramo Hesu nhe'ẽ, upe uvaty rehewa-rami hesegwa omombe'u va'e nhe'ẽ, he'i:

—Niporãi voi oiko ramo upéixa, he'i.

17 Upéi Hesu oma'ẽ hese kwéry ha he'i jevy:

—Pene mandu'a kena Nhandejáry nhe'ẽ ohai uka va'ekwe-rehe.

“Ndovaléi upe ita, he'i óga omopu'ã va'e imboyke-vy. Ha ojohu vai jepe, upe ita óga pytahoha ramo oiporu. Óga pytahoha voi ita.”*
he'i Nhandejáry kwtia nhe'ẽ.

* 20:17 SI 118.22

18 Ho'a-ma ramo upe ita-rehe opẽmba va'erã ho'a va'e. Ha ho'a-ma ramo upe ita kente ári omongu'ipa-ma va'erã íxupe, he'i jevy ita rehewa nhe'ẽ-rami ojéhegwā nhe'ẽ henduháry rehewa nhe'ẽ ave omombe'u-vy.

*Iporã tipo japaga nhame'ẽ-vy mburuvixagwasu César-pe hemimbopaga uka?
(Mt 22.15-22; Mc 12.13-17)*

19 Ohendu ramo inhe'ẽ oikwaa pya'e ojéhegwā hikwái.

—Nhande rehewa nhe'ẽ omombe'u Hesu arandu nhe'ẽ oiporu ramo, he'i ojóupe judeu rekombo'ehaty kwéry, pa'i ruvixa kwéry ave.

Upéa-gwi oipyhyse mo'ã íxupe. Ha ikyhyje-gwi ndoipyhýiry. Hesu reroviaha heta oĩ indive-gwi ikyhyje. Nombopoxyséiry íxupe kwéry.

20 Upéixa-gwi ome'ẽ plata gwembigwairã-pe:

—Peho meme Hesu ndive pemonhe'ẽ avy hagwã íxupe, he'i ome'ẽ-vy inhe'ẽ mbojejavý uka va'erã-pe mo'ã hepyrã. —Pejeapysaka porã katu inhe'ẽ-rehe. Pende rekoha porã va'e-rami peiko-vy pehendu hendi ra'anga inhe'ẽ. Petei nhe'ẽ va'e oavy ramo nhamombe'u-ta mburuvixa-pe oipyhy uka va'erã ojuka uka hagwã, he'i omonhe'ẽ avyse mo'ã-vy Hesu-pe.

Inhe'ẽ avy ramo ohendu hagwã mo'ã oiko indive.

21 Aipo ramo imonhe'ẽ avyharã mo'ã oho indive. Oporandu íxupe:

—Mbo'eháry, jaikwaa anhei-rupi erenhe'ẽ. Anhei-rupi ne remimombe'u mbe'u, he'i omonhe'ẽ avyse-vy. —Nerepenáí avave-rehe neremo'ãí avave-pe. Nde-vy enterovéa peteixante. Anheigwa eremombe'u Nhandejáry rape porã-rehe ereporombo'e ramo, he'i.

22 —Iporã tipo nhande judeu reko-rupi jaiko va'e japaga nhame'ẽ-vy hemimbopaga uka mburuvixagwasu César-pe? Iporã tipo japaga e'ŷ íxupe? he'i oporandu-vy hikwái Hesu-pe.

23 Ha Hesu katu oikwaa voi hese. Ndogwerekói ramo gwova-py mba'eve, oikwaa joty ipy'a ky'aha.

24 —Eme'ẽ xe-vy plata atã mburuvixagwasu remimbopaga uka xe ahexa hagwã, he'i.

Ome'ẽ rire oporandu rei íxupe kwéry:

—Kiva'e ra'anga oĩ ko'a-py? Kiva'e ohai uka va'ekwe? oporandu rei íxupe kwéry.

—César ra'anga, he'i. —Hembihai uka ave, he'i íxupe.

25 —Aipo ramo, eme'ẽ César-pe imba'e. Ha Nhandejáry-pe katu eme'ẽ hemimbota ave, he'i íxupe kwéry Hesu.

26 Ndikatúi omonhe'ẽ avy íxupe ojogweroaty pa'ũ-rupi. “Hasy va'e-rehe jepe nhaporandu ramo íxupe, omombe'u porã joty” he'i hese opondera-vy. Ha mba'eve noporanduvéi íxupe.

*Jaikove jevy va'e rehewa nhe'ẽ
(Mt 22.23-33; Mc 12.18-27)*

27 Ha upéi ou henda-py gwĩ saduceu kwéry. “Ndoikovéi-ma va'erã omano va'ekwe” he'i rei va'e saduceu kwéry.

28 Ou oporandu Hesu-pe:

—Mbo'eháry, he'i íxupe hikwái, —Moisés amyrí omoõ va'ekwe kwaitia-rehe Nhandejáry remimbota ohai nhande-vy:

“Tyke'ýry omano ramo, oheja ramo gwembirekokwe naimemby jepéi ramo, tomenda katu tyvýry gwovajare-rehe. Upéixa ramo, Ke'y ra'y, he'i mo'ã va'erã imemby ypy-rehe.”*

Upéixa voi Moisés amyrí omoõ va'ekwe nhande-vy kwaitia-rehe, he'i.

* **20:28** Dt 25.5

²⁹ —Oĩ va'ekwe peteĩ tyke'ýry seis tyvýry. Tyke'ýry omenda kunha-rehe. Upéi omano ramo, ndata'ýry jepéiry.

³⁰ Tyvýry omenda gwovajare-rehe. Ndata'ýry jepéi ramo omano ave tyvýry. Upéi tyvýry ambue jevy omenda hese.

³¹ Peteĩ teĩ omenda hese, gwovajare-rehe. Peteĩ teĩ omano ramo ndaita'ýry jepéi hikwái.

³² Upe rire upe kunha ave omano-ma ave.

³³ Oikove jevy ramo, kiva'e rembirekorã upe kunha? Gwĩ sete tyvýry kwéry omenda va'ekwe hese, he'i oporandu-vy Hesu-pe upe “Omano va'ekwe ndoikove jeví” he'i va'e kwéry.

³⁴⁻³⁵ Ha upéa-rehe Hesu omombe'u íxupe kwéry:

—Amombe'u-ta peẽ-my omano va'ekwe oikove jevymaha. Tekoha-rupi porã oiko va'ekwe gwive onhemoingove jevy rire katu nomendavéi-ma va'erã ãygwa omendaha-rami, he'i íxupe. —Kwimba'e kwéry nomendavéi-ma va'erã. Kunhagwe ave nomendavéi-ma va'erã.

³⁶ Oiko va'erã Nhandejáry rembigwái yváy pygwa reko-rami. Upéixa-gwi nomendavéi-ma va'erã. Nomanovéi-ma va'erã ave, he'i. —Ha'e kwéry Nhandejáry ra'y voi, Nhandejáry rajy ave. Oikove jevy-ma va'erã.

³⁷ Upéixa ave Moisés amyrí omombe'u ave omano va'ekwe oikove jevy va'erã. Yvyra ra'y okái va'e rehewa nhe'ẽ omombe'u ramo, omombe'u ave Nhandejáry nhe'ẽ. He'i Moisés:

“Nhandejáry a-rami he'i: Xe-ma Abraão Járy va'e xe. Isaque Járy va'e ave xe.

Jacó Járy va'e ave xe”*

he'i Nhandejáry Moisés amyrí kватia-rehe. Ha omanomba rire ae upe myamyrí, he'i va'ekwe upéixa, he'i Hesu.

Upéi he'i:

³⁸ —Ha'e-ta katu xe: Nhandejáry ndaha'éi omano va'ekwe Járy. Oikove va'e Járy voi Nhandejáry. Íxupe oikovepa joto, he'i Hesu nhane moingove jevyha-rehe omombe'u-vy.

³⁹ Upéa-rehe gwĩ judeu rekombo'ehaty he'i íxupe:

—Iporã voi ne nhe'ẽ. Hasy va'e-rehe jepe oroporandu ramo nde-vy, eremombe'u porã joto, he'i íxupe.

⁴⁰ Ha upe rire ave ndaipy'agwasuvéi oporandu mba'eve-rehe Hesu-pe. Ndikatúi omonhe'ẽ avy íxupe.

*Nhane remiha'arõ va'e Davi remiarirõre
(Mt 22.41-46; Mc 12.35-37)*

⁴¹ Ha upéi katu Hesu oporandu imonhe'ẽ avyse mo'ã va'e kwéry-pe.

—Mba'éixa tipo Cristo ymagware Davi remiarirõre?

⁴² Iporahéi kwéry-py kватia-rehe omoñ-vy omombe'u va'ekwe Davi Cristo rehewa nhe'ẽ:

“Nhandejáry he'i xe Járy-pe: Egwapy katu xe yke-rehe, he'i.

⁴³ Xe orombopu'aka-ta ne a'e'ýha-rehe, he'i. Xe yke-rehe eregwapy ereha'arõ-vy nde pogwy-py amoingo hagwã ne a'e'ýha kwéry, he'i Nhandejáry xe Járy-pe.”*

Upéixa ohai va'ekwe Davi amyrí Nhandejáry kватia nhe'ẽ héry va'e Salmo-py.

⁴⁴ Ha Davi amyrí katu “Xe Járy” he'i Cristo-rehe. Nhane remiarirõ-rehe “Xe Járy” ndaja'éiry. Aipo ramo hemiarirõ pa? he'i Hesu omokirirõ-vy íxupe kwéry.

*Judeu rekombo'ehaty kwéry reko-rehe Hesu onhemonhe'ẽ
(Mt 23.1-37; Mc 12.38-40)*

* 20:37 Èx 3.6 * 20:43 Sl 110.1

⁴⁵ Enterovete va'e ohendu jave Hesu he'i gwī doze gwemimbo'e kwéry-pe:

⁴⁶ —Xáke, onhemboetese rei judeu rekombo'ehaty kwéry. Oao puku re-heve ogwatase voi. Kente kwéry-pe omboete uka onhembotuvixa vixa oho-vy mba'e jogwa haty-py. Ojeporahéi haty-py ogwapyse mburuvixa pa'ū-my. Mburuvixa gwapy haty-rupi ogwapyse onhembovía ramo jekarugwasu haty-py.

⁴⁷ Ha tembirekokwe rembiporu omonda heraha-vy. Upe rire temiex-agwā rei omondo mondo ra'anga rei Nhandejáry-pe heta onhe'ẽ enterove ohendu hagwā. Ombohasa asyve-ta íxupe kwéry Nhandejáry, he'i judeu rekombo'ehaty-rehe omombe'u-vy.

21

Tembirekokwe iporiahu va'e rehewa nhe'ẽ

(Mc 12.41-44)

¹ Ohexa Hesu kente kwéry Nhandejáry roga kakwaa-py. Oma'ẽ oĩ-vy plata mboyrú haty-rehe Hesu. Ógwahē imba'e heta va'e kwéry omoõ heta jepe hetave tave omombyta joty ojéupe gwarā.

² Ohexa ave kunha tembirekokwe okwerī ome'ẽ va'e mokōi plata atā, omoõ hyru-py.

³ Upe-ma ramo Hesu he'i:

—Anhete ha'e-ta peẽ-my, he'i. —Ko kunha tembirekokwe iporiahu va'e ome'ẽ hetave enterove-gwi.

⁴ Ha'e kwéry katu ome'ẽ heta jepe hetave tave omohemby ojéupe gwarā kwéry. Ko kunha katu imboriahu-gwi ome'ẽmba-ma gwembi'u repyrāgwe, he'i Hesu.

Hesu he'i Nhandejáry róga kakwaa opa va'erā

(Mt 24.1-2; Mc 13.1-2)

⁵ Oĩ Nhandejáry róga kakwaa-rehe omombe'u mbe'u ojóupe. Iporā eterei omoõ heseombojegwa-vy. Hemime'ẽgwe ēgwe-rehe ita porā porā va'e-rehe onhomongeta hikwái.

⁶ Ha Hesu he'i:

—Ogwahē va'erā áry gwī pehexa va'e gwive ho'apa va'erā. Ndopytái va'erā peteĩ ita ojo'ári, he'i.

Nhandejáry rogagwasu opa va'erā rexā ukaha

(Mt 24.3-14; Mc 13.3-13)

⁷ Ha oporandu hikwái Hesu-pe:

—Mbo'eháry, araka'e tipo oiko va'erā upéa? Mbava'e tipo oiko-ta oroikwaa hagwā ojehu-ta ramo ne remimombe'ukwe gwive? he'i oporandu-vy hikwái.

⁸ Ha Hesu he'i:

—Aníke penhembotavy teĩ. Heta he'i rei va'erā, “Xe ko Cristo, pene remiha'arō va'e” he'i arā ijapu-vy. Ani ererovia teĩ íxupe. He'i rei arā ave, “Ogwahē-ma hi'óra oiko hagwā Nhandejáry nhande ruvixarā” he'i arā oapu rei-vy. Ani ererovia teĩ íxupe.

⁹⁻¹⁰ Nhorairō rerakwā erehendu ramo ani erekhyje teĩ. Nhorairō-py ohekoviariō arā mburuvixa. Upéa oiko va'erā voi. Upe jave jepe ne'írā vyteri ogwahē inhe'ẽ ijapy-py, he'i.

Upéi he'i jevy íxupe kwéry:

—Ojehu va'erā pene monghyje va'erā. Yvypóry onhorairōmba va'erā onhondive. Tetā mygwa kwéry onhorairō va'erā tetā ambue mygwa kwéry ndive. Mburuvixagwasu gwembigwái soldado kwéry-pe omonhorairō uka ave arā ambue mburuvixagwasu rembigwái soldado kwéry ndive.

¹¹ Heta tetā-rupi oiko va'erā yvyryrýi hatā, nhembyahýi ave, ha mba'asy ave oiko va'erā. Oĩ va'erā heta pene monghyjeharā. Yváy-rehe ave ojehexa va'erā hexapyrā.

¹² —Ojehu e'ŷ mboyve upéixa pehasa asy ete va'erā. Nde pyhy arā nde reraha ne mbohasa asy-vy, ojeporahéi haty-py ne monhe'ē uka hagwā. "Erenhemonhandejáry rei Hesu-rehe" he'i arā nde-vy. Upéi katu ne mombo va'erā preso ojepyta haty-py. Xe-rehe ha-py nde reraha va'erā mburuvixa renda-py, mburuvixagwasu renda-py ave.

¹³ Upéixa nde rerekó asy va'erā xe rehewa nhe'ē eremombe'u hagwā íxupe kwéry. Emombe'u porā katu xe rehewa nhe'ē.

¹⁴ Ani nde py'a nhemondýi teĩ ere va'erā-rehe. Xe oromoarandu va'erā.

¹⁵ Ne nhe'ērā ame'ē va'erā nde-vy, ne arandurā ave ame'ē va'erā nde-vy ndikatúi hagwā gwī nde-rehe ija'e'ŷ va'e ne mboapu. Onhe'ē poxy rei rei va'e nane nhe'ē mbojevy kwaái va'erā.*

¹⁶ Nde re'ŷi ete va'e kwéry ave pende rerekó asy va'erā. Nde ru, nde sy, nde ryke'y, nde ryvy, ne reindy, nde kyvy, nde kypy'y, nde ryke enterovete nde reraha uka va'erā nde rerekó asy-vy, ne irū kwéry ave xe-rehe ha-py pende rerekó asy asy va'erā. Ija'e'ŷ va'erā pende-rehe. Oĩ gwī pene pa'ū mygwa-pe ojuka va'erā ave.

¹⁷ Xe-rehe ha-py enterove ija'e'ŷ va'erā pende-rehe.

¹⁸ Upéixa ramo jepe ne mbaraete katu. Xe ororesende jevy va'erā. Peteĩ jepe nde ávy nokanhýi va'erā.

¹⁹ Xe nhe'ē-py meme katu eiko erenheresende hagwā, he'i Hesu omotenonde-vy íxupe kwéry hekorā.

Onhehundi-ta Jerusalém tetā

(Mt 24.15-21; Mc 13.14-19)

²⁰ Hesu he'i jevy:

—Pehexa ramo Jerusalém tetā-my ogweroajere ramo soldado kwéry mburuvixa ndive peikwaa-ma va'erā onhehunditamaha.

²¹ Upe-ma ramo Judéia-py oĩ va'e tokanhymba katu yvyatyrusu-rupi tokanhymba oje'ói-vy. Tetā-my oĩ va'e tosẽ katu pya'e okanhy-vy. Nhu-my oĩ va'e ani oike teĩ tetā-my. Tokanhymba katu.

²² Upe áry-py Nhandejáry nhe'ē he'i va'ekwe gwive oiko va'erā. Judeu kwéry ohasa asy asy va'erā hembiapo apokwe-rehe.

²³ Ombovy'are'ŷ va'erā íxupe kwéry. Ivy'are'ŷve va'erā gwī kunha imemby va'erā, gwī imemby mixī va'e ave. Ohasa asy eterei va'erā hikwái. Judeu kwéry-pe ijyvy rehewe Nhandejáry ombohasa asy-ta voi.

²⁴ Oĩ va'e kysepuku-py omano va'erā. Oĩ va'e omboja'o heraha-vy tetā ambue-py oiko hagwā tembigwái ramo. Oĩ ave opyta va'e Jerusalém tetā-my judeu e'ŷ va'e pogwy-py. Hi'are va'erā upéixa. Judeu e'ŷ va'e kwéry ojapopa upe Nhandejáry omotenonde hesegwa peve, opyta va'erā ipogwy-py Jerusalém tetā upe-py oĩ va'e gwive.

Nhande Ryke'y tee va'e ou jevymaha rehewa nhe'ē

(Mt 24.29-31; Mc 13.24-27)

²⁵ Hesu he'i jevy:

—Gwī yváy rehewa ojei va'erā gwape-gwi. Yváy-gwi kwarahy oje'o va'erā. Jasy ave hendy'ã va'erā, jasytata ave ojei va'erā gwape-gwi. Kente kwéry tetā tetā mygwa katu onhemondýi va'erā ygwasu ryapu rendu ramo.

* ^{21:15} Mt 10.18-19; Lc 12.11-12; Jo 16.2-3

²⁶ Kwimba'e kwéry katu ikyhyje ete-gwi omano va'e-rami oiko va'erã. Ova ova va'erã gwendagwe-gwi entéro yváy rehewa imbaraete va'e. Upéa-gwi onhepy'a mondýi va'erã oha'arõ-vy ou va'erã-rehe.

²⁷ Upéi katu xe Nhande Ryke'y tee va'e ajehexa uka va'erã agwejy ramo arai-rehe. Xe pu'aka reheve, xe rendy marangatu pende resa mbojevy va'e reheve xe rexâ va'erã aju-vy.*

²⁸ Upe va'e ojehu-ma ramo, tane mbaraete katu. Ani katu ne kyre'ŷ e'ŷ tei, hi'agwî ne resende va'erã.

"Aju jevymaha óra eha'arõ eiko-vy" he'i Hesu

(Mt 24.32-35; Mc 13.28-31)

²⁹ Upéi omombe'u jevy Hesu arandu rehewa nhe'ë figo máta rehewa-rami:

—Pema'ë katu figo máta-rehe, opa yvyra rakã-rehe.

³⁰ Henhói-ma ramo hogwe pyahu-ma ramo peikwaa-ma voi ogwahë-tama áry hakuha. Pehexâ ramo peikwaa.

³¹ Upéixa ave xe remimombe'ukwe. Pehexâ ramo oikomaha xe remimombe'ukwe, peikwaa va'erã Nhandejáry oiko-tama entéro va'e ruvixarã.

³² Anhete ko ha'e-ta peë-my: Ñygwa omano e'ŷ mboyve ojehu va'erã ko va'e.

³³ Áry opa va'erã, ko yvy gwive opa va'erã. Xe nhe'ë, xe remimombe'ukwe ae ndopái va'erã. Opyta va'erã opa e'ŷ reheve.

³⁴⁻³⁵ —Xáke! Perepara porã katu pende rekoha-rehe. Peiko porã katu xe ra'arõ-vy. Ani pene mandu'a eterei tei pene monga'uharã-rehe. Ani pene mandu'a eterei tei ave pene mbohoryharã-rehe. Ani ave pejepy'apy eterei tei pene remikotevë ko'a pygwa-rehe. Xe aju jevy hagwã-rehe ae tapene mandu'a ndu'a katu peiko-vy. Sapy'a, ndorepara porãiha óra-py ombo'a nhuhã mymba. Upéixa ave sapy'a naxe ra'arõ porãiha óra-py ojekwaa va'erã entéro ko yvy rupigwa kwéry-pe xe aju jevyha áry.

³⁶ Upéa-rehe perepara katu ha'arõ-vy xe agwahë hagwã-rehe. Pejerure rure katu Nhandejáry-pe mba'eve rei ndoikói hagwã peë-my. Xe Nhande Ryke'y tee va'e aju jevy va'erã. Pejerure íxupe pene mbopy'a porã hagwã pono penotí pende rekoha xe renonde-py.*

Enterove ohenduse Hesu oiko-vy

³⁷ Nhandejáry róga kakwaa-py Hesu oporombo'e áry jave. Pyhare ramo osë oho-vy yvyatyrusu Oliveiraty-py.

³⁸ Ha pyharevete meme ou jevy Nhandejáry róga kakwaa-py. Entéro tetã mygwa oho-ma ohendu hagwã Hesu remimombe'u.

22

"Mba'éixa pa jajuka-ta Hesu-pe?" oporandu ojóupe

(Mt 26.1-5; Mc 14.1-2; Jo 11.45-53)

¹ Ogwahë-tama aretegwasu. Upe-ma ramo gwî ija'e'ŷha ojukase eterei Hesu-pe. Judeu kwéry-pe mate upe aretegwasu. Héry va'e páscoa. Oime jave páscoa mbojape imbovuha e'ŷ va'e ho'u judeu kwéry.

² Ha ogwahë-tama ramo aretegwasu, gwî judeu va'e ojukase voi Hesu-pe. Pa'i ruvixa kwéry, hekombo'ehaty kwéry ndive ija'e'ŷha kwéry ojukase íxupe.

—Mba'éixa pa jajuka-ta upe va'e, he'i meme ojóupe hikwái. —Iporâve jajuka uka nhemi íxupe ani hagwã nhambopoxy ija'eha kwéry-pe.

* 21:27 Dn 7.13 * 21:36 Mt 24.42-44; Mc 13.35-37; Lc 12.35-40; Rm 13.12-13

Upéixa he'i meme ojóupe ojukase eterei-gwi Hesu-pe. Ijaty jaty va'e-gwi ikyhyje eterei-gwi hikwái.

*Judas onhomongeta pa'i ruvixa kwéry ndive Hesu oipyhy uka hagwā
(Mt 26.14-16; Mc 14.10-11; Jo 13.2,27)*

³ Upe javé anhaygwasu Satanás oike-ma gwembigwairā py'a-py. Judas Iscariotes héry ete. Peteī doze Hesu remimbo'e kwéry va'e Judas. Ha anhaygwasu ogwapy ijyke-rehe ojokwái hagwā.

⁴ Upéi Judas oho onhomongeta pa'i ruvixa kwéry ndive. Anhaygwasu nhe'ẽ-rupi oho. Oho otopa hagwā Hesu-rehe ija'e'ýha kwéry. Pa'i ruvixa kwéry ndive Nhandejáry róga kakwaa-rehe onhangareko va'e kwéry ndive ave ojotopa he'i hagwā mba'e-rami po oipyhy arā Hesu-pe.

⁵ Upéa-rehe ov'y'a eterei okwa-vy.

—Nde, ereme'ẽ ramo Hesu ore-vy, orome'ẽ-ta nde-vy nde platarā. Hesu-rehe orome'ẽ-ta nde platarā, he'i Judas-pe ov'y'a-vy hikwái.

⁶ —Iporā ereme'ẽ kuri xe-vy xe platarā, he'i íxupe kwéry.

Upéixa-ma ramo, Judas orepara oiko-vy Hesu-rehe ipyhyharā-pe omombe'uha óra ra'arō-vy. Ijaty aty e'ýha óra-rehe oha'arō arō oiko-vy.

*Aretegwasu remi'urā ojapo Hesu remimondo va'e
(Mt 26.17-19; Mc 14.12-16)*

⁷⁻⁸ Ogwahē-ma ramo aretegwasu, Hesu omondo Pedro, João ndive ojapo hagwā tembi'u aretegwasu-py ho'u va'erā. Páscoa áry-gwi judeu kwéry ojuka ovexa ho'u va'erā Nhandejáry-pe omboete-vy. Ojapo ave mbojape ombovu e'ý va'e ho'u va'erā. Upéixa ojapo hagwā Hesu omondo Pedro-pe, João-pe ave gwenonde.

—Tapeho tetā-my, he'i. —Pejuka peteī mymba ovexa ja'u va'erā nhande ave aretegwasu-py so'o mbixy, he'i imondo-vy.

⁹ —Kipy tipo orojapo-ta? he'i oporandu-vy hikwái íxupe.

¹⁰ —Peike javé ramo upe tetā-my, pehexa-ta peteī y ogweraha va'e. Kwimba'e y ryru ogweraha va'e pehexa-ta. Tapeho hapykwéri. Oike-ma ramo óga-py, pegwahē penhomongeta óga járy ndive.

¹¹ A-rami penhe'ẽ kuri íxupe, he'i. —“Mbo'eháry ore mbou oroporandu hagwā nde-vy: Kiva'e koty-py ha'u-ta páscoa remi'urā xe remimbo'e kwéry ndive? Aiporuse nde koty ore mandu'a hagwā páscoa-rehe” ere íxupe.

¹² Ohexa uka-ta peẽ-my peteī koty jaiporu-ta va'e. Kotygwasu, ijyvate va'e oimbá-ma va'e ohexa uka-ta peẽ-my. Upe koty-py ja'u-ta nhane remi'urā, páscoa-rehe imandu'a va'e pegwarā. Ore mohenonde pejuka mymba vexa nhande-vy gwarā, he'i Hesu omondo-vy gwenonde.

¹³ Upéi oho-ma okwa-vy. Mokõive oho tetā-my. Ha Hesu he'i hagwe-rami ojohu. Upéi ojapo tembi'u aretegwasu páscoa-rehe imandu'a-vy ho'u va'erā.

Aretegwasu áry ramo okaru paha-ma Hesu

¹⁴ Upéi okaru hagwā óra-py Hesu ogwapy doze gwemimondo kwéry ndive.

¹⁵ Okaru-tama ramo he'i íxupe kwéry:

—Ha'use eterei pene ndive ko aretegwasu-py tembi'u. Xe rerekoy asy amano hagwā e'ý mboyve akaruse pene ndive, he'i.

¹⁶ —Ha'e-ta katu peẽ-my: Ko'a-py nda'uvéi-ma ãy-rami aretegwasu-py tembi'u. Xe are-ta ha'u jevy hagwā. Oikopa-ma rire, ha'u jevy va'erā, he'i íxupe kwéry. —Nhandejáry nhande ruvixa oiko haty-py mate ha'u jevy va'erā, he'i gwemimondo kwéry-pe.

¹⁷ Upe-ma ramo Hesu oipyhy uva rykwere ryru. Omboete Tupā Nhandejáry-pe. Upéi ho'u uka gwemimondo kwéry-pe:

—Pe'upa katu, he'i.

¹⁸ —Anhete ha'e-ta peẽ-my. Nda'uvéi-ma voi uva rykwere. Nhandejáry nhande ruvixarã ojekwaa rire ae ha'u jevy va'erã, he'i onhemohekotenonde-vy.

*Hesu-rehe nhane mandu'a va'erã
(Mt 26.20-30; Mc 14.17-26; Jo 13.21-30; 1 Co 11.23-25)*

¹⁹ Oipyhy ave mbojape páscoa áry pegwa. Upéi otima rire Nhandejáry-pe ombopo mbopóy ome'ẽ-vy gwemimbo'e kwéry-pe ho'u hagwã. Ha he'i:

—Ko mbojape-rehe ha'e “Xe rete” he'i. —Pende-rehe ha-py anheme'ẽ va'erã peẽ-my amano hagwã, he'i. —Kóa ere'u ramo ne mandu'a kena xe-rehe, he'i.

²⁰ Upéixa ojapo ave okarupa-ma rire. Ome'ẽ íxupe kwéry ho'u uka-vy uva rykwere:

—Ko va'e pe'u katu, he'i. —Ko va'e-rehe ha'e “Xe rugwy” voi, he'i. —Osyry va'erã xe rugwy kente kwéry rekove-rehe. Tupã Nhandejáry he'i hagwã kente kwéry-rehe, “Ipy'a potí-ma. Hesu-rehe ojerovia-gwi omopotí-ma ipy'a” he'i hagwã Tupã Nhandejáry osyry va'erã xe rugwy, he'i íxupe kwéry.

²¹⁻²² —Xe Nhande Ryke'y tee va'e amano-ta. Xe ndive ogwapy oĩ-vy xe juka uka nhemi va'erã, he'i Hesu. —Tekotevẽ amano kente kwéry aresende hagwã. Amboasy upe xe juka ukaharã. Ohasa asy eterei va'erã, he'i Hesu.

²³ Upe-ma ramo oporandu randu ojóupe hikwái:

—Kiva'e pa ojuka uka nhemi-ta Hesu-pe, he'i ojóupe.

*Tuvixaseve va'e tekotevẽ onhemomix̄ive
(Mt 20.25-27; Mc 10.42-45)*

²⁴ Ha hemimbo'e kwéry katu onhomongeta ngeta onhondive:

—Kiva'e pa tuvixave nhane pa'ũ-my, he'i ojóupe.

²⁵ Upe-ma ramo Hesu he'i:

—Mburuvixa kwéry, ko yvy pygwa ogwereko pu'aka yvypóry kwéry-rehe. Onhe'ẽ-py omanda manda íxupe kwéry. Ha oĩ gwĩ mburuvixa katu onhembo-tuvixave kente kwéry renonde-py.

²⁶ Peẽ onhopa'ũ-my ndaiatúi upéixa peiko. Peẽ onhopa'ũ-my pende tuvix-ave ramo jepe penhemohekomirív katu peiko-vy onhopa'ũ-my. Mburuvixa katu toiko tembigwái-ramo.

²⁷ Ha'e-ta ave peẽ-my: Tuvixave va'e-pe tembigwái ogweru hemi'urã. Ha xe katu tembigwái-rami voi aiko pene pa'ũ-my, he'i.

²⁸ —Peẽ katu xe moirũ meme peiko-vy. Ambue kwéry xe mbojejavyse mo'ã meme jave xe moirũ-ma peẽ.

²⁹ Yma va'ekwe Nhandejáry he'i xe-vy: “Xe ra'y, nde ereiko-ta mburuvixa ramo xe moirũ va'erã-pe”. Upe va'e-rehe, pe xe Ru ome'ẽ hagwéixa xe-vy, xe ame'ẽ va'erã peẽ-my ave. Peiko-ta ave mburuvixa ramo.

³⁰ Nhandejáry ha-py xe aiko-ma ramo nhande ruvixarã, peiko-ta xe ndive. Pekaru ha pey'u-ta xe ndive. Pegwapy-ta ave mburuvixa gwapy haty-rupi pejohu hagwã Israel re'ýi kwéry-rehe hembiapokwe.

Ndojerovia teéi va'erã

Hesu-rehe Pedro

(Mt 26.31-35; Mc 14.27-31)

³¹ He'i ave Hesu:

—Ejeapysaka porã kena xe nhe'ẽ-rehe, Simão. Anhaygwasu ojerure-ma kuri pende-rehe. Oikwaase kiva'e-rehe pa pejerovia ete. Ipirekwe osẽsẽ hagwã ovale va'e-gwi nhambovava trigo-pe. Upéixa ave anháy ruvixa Satanás pende rerekose. Pene mbotavyse ponove peiko xe nhe'ẽ-rupi.

³² Xe katu ambojeupi kuri xe nhe'ẽ Nhandejáry-pe nde-rehe, Simão, erejerovia tee hagwã xe-rehe pono inhe'ẽ-rupi ereiko. Erejerovia ete jevy ramo xe-rehe, emokyre'ỹ katu nde rapixa kwéry-pe oiko porâve hagwã xe nhe'ẽ-rupi.

³³ Upe-ma ramo Pedro he'i:

—Aháni, oromoirũ-ta xe. Nde erepyta ramo preso, xe apyta ave arã ne ndive preso, he'i íxupe. —Eremano ramo amano ave va'erã ne ndive, he'i.

³⁴ Hesu katu he'i íxupe:

—Anhetegwa ha'e-ta nde-vy, he'i íxupe: —Etería gáju ndosapukái vyteri ramo jepe, mbohapy-ma ere-ta xe-rehe, “Upéa Hesu xe ndaikwaái” ere-ta xe-rehe, he'i íxupe.

“Nde kysepuku reheve ereho eremombe'u hagwã xe nhe'ẽ” he'i Hesu

³⁵ Upéi he'i íxupe kwéry:

—Apomondo mondo ramogware, peho nandi voi. Ndaperaháiry voi va'ekwe mba'eve. Pene mba'e ryru ndaperahái va'ekwe. Pende pirapire ryru ndaperahái ave va'ekwe. Upéixa nandi peho va'ekwe ramo mba'e tipo pene remikotevẽ? he'i joty Hesu oporandu-vy.

—Mba'eve-rehe noroikotevẽi upe jave, he'i íxupe hikwái.

³⁶ —Ãy katu ha'e-ta peẽ-my: Ogwereko va'e opirapire ryru om̄ba'e ryru ave, oipyhy-ta. Kysepuku ogwerek e'ỹ va'e kyse repyrã-rehe ome'ẽ-ta oao jo'a.

³⁷ —Nhandejáry nhe'ẽ kwatia-rehe ohai va'ekwe xe-rehe he'i: “Hembiapó vai va'e-rami ojererekva'erã”. Anhete ha'e-ta: Ojehu-tama xe-rehe ojehai va'ekwe, he'i íxupe gwekoharã omotenonde-vy.*

³⁸ Upe-ma ramo hemimbo'e kwéry he'i:

—Ko'a-py niko oĩ mokõi kysepuku, ore Járy.

Ha ha'e he'i:

—Iporã, he'i joty.

Yvyaty-gwi Hesu ombojeupi onhe'ẽ Nhandejáry-pe

(Mt 26.36-46; Mc 14.32-42)

³⁹ Oho meme ha-py oho jevy Hesu. Yvyatyrusu héry va'e Oliveiras ha-py oho. Gwemimbo'e kwéry ndive oho.

⁴⁰ Ogwahẽ-ma jave oho-ta ha-py oiporavo hagwe-py, ha'e he'i:

—Pejerure Nhandejáry-pe pono eremondo nde resa ne mbojejavy uka va'e-rehe, he'i.

⁴¹ Upe rire ojei íxugwi kwéry mombyrymive ojei. Gwetymy'ã-rehe onhesũ ha onhepyrũ onhomongetava Nhandejáry ndive:

⁴² —Ereipota ramo, xe Ru, eipe'a xéhegwi xe reko asyha. Ani oiko teĩ xe remimbota, ne remimbota ae toiko, he'i.

⁴³ Upe jave Nhandejáry rembigwái yváy pygwa ojehexa uka omombaraeteve hagwã íxupe.

⁴⁴ Ojepy'ajopy jave Hesu imbaraete pyve onhomongetave Nhandejáry ndive. Ombojeupi jave onhe'ẽ Nhandejáry-pe mba'e rugwy-rami otyky yvypy hy'aikwe ojepy'ajopy-vy.

⁴⁵ Upéi opa-ma ramo hi'oração opu'ã jevy ou-vy gwemimbo'e kwéry rendapy, oke okwa-vy va'e ojohu. Tuvixa ima'emboasy omonge íxupe kwéry.

⁴⁶ Ha Hesu he'i:

—Ma'erã tipo peke? Pepu'ã katu pejerure Nhandejáry-pe pene mombaraete hagwã, pono ne mbojehesa rerova uka íxugwi mba'eve nembojejavy uka-vy, he'i onhemonhe'ẽ-vy.

* 22:37 Is 53.12

*Preso ogweraha Hesu-pe**(Mt 26.47-56; Mc 14.43-50; Jo 18.3-11)*

⁴⁷ Hesu onhe'ẽ vyteri oĩ-vy, ogwahẽ heta kente kwéry. Peteĩ doze hemimbo'e kwéry va'e, héry va'e Judas ogweru íxupe kwéry. Judas katu ogwahẽ Hesu ypy-py ohovapyte hagwã íxupe.

⁴⁸ Upe-ma ramo Hesu he'i:

—Judas, peteĩgwe xe rovapyte mo'ã xe pyhy uka hagwã, xe Nhande Ryke'y tee va'e xe pyhy uka-ma, he'i.

⁴⁹ Upe jave hemimbo'e kwéry oĩ va'e Hesu ndive, ohex-a-ma ramo ojehu va'erã he'i hikwái:

—Mba'e tipo jajapo-ta, ore Járy? Oroipyhy-ta para'e ore kysepuku, orojoko hagwã íxupe kwéry? he'i.

⁵⁰ Peteĩ hemimbo'e katu oinambi'o-ma pa'i ruvixa rembigwái. Ijakatúa-koty oĩ va'e inambikwe oipe'a-ma.

⁵¹ Ha Hesu katu:

—Iporâvete peheja, he'i-vy opoko inambikwe-rehe imbogwera-vy.

⁵² Upe-ma rire he'i pa'i ruvixa kwéry-pe, porahéi haty pygwa ruvixa kwéry-pe ave, judeu ruvixa kwéry-pe ave gwĩ ou oipyhy hagwã Hesu va'e gwive-pe, he'i Hesu:

—Niporãi katu peju pende kysepuku reheve, ha pende yvyra reheve, xe pyhy hagwã. Xe ndaikói oporosake'a va'e-rami kysepuku reheve xe reraha hagwã.

⁵³ Heta áry-ma aiko pene ndive. Nhandejáry róga kakwaa-py aime meme ramo napemopu'ãiry pende po xe pyhy hagwã. Áy mate xe pyhy-ta. Kóa pende óra pene remimbota pejapo hagwã xe-rehe. Gwĩ pytûgwy-rupi ipu'aka va'e nhe'ẽ-rupi peiko-ma pene rembiaporã pejapo hagwã.

*“Upéa ndaikwaái xe” he'i Pedro Hesu-rehe**(Mt 26.57-58,69-75; Mc 14.53-54,66-72; Jo 18.12-18,25-27)*

⁵⁴ Oipyhy-ma ramo Hesu-pe ogweraha íxupe pa'i ruvixagwasu róga kakwaa-py. Ha Pedro katu oho Hesu rapykwéri puku.

⁵⁵ Omoendy-ma ramo tata, upe-py Pedro oho ave ojepe'e hagwã. Tata yppy ogwapy oĩ-vy va'e ndive ogwapy ave Pedro.

⁵⁶ Ohex-a-ma ramo íxupe tata rendy-py Pedro-pe tembigwái kunha va'e, ohex-a katu porã porã íxupe ha he'i:

—Ko kwimba'e Hesu ndivegwa va'e ave ra'e, he'i.

⁵⁷ Upe-ma ramo Pedro he'i:

—Upéa ndaikwaái voi xe, kunha, he'i íxupe Pedro.

⁵⁸ Upe riremi ohex-a jevy íxupe peteĩ kwimba'e.

—Nde ave ra'e ha'e kwéry va'e, he'i.

Pedro he'i jevy:

—Upéa xe ndaikwaái. Ndaha'ei hesegwa kwéry xe, he'i rei.

⁵⁹ Upe rire peteĩ óra-rupi, he'i jevy Pedro-pe ambue va'e:

—Anhete voi ra'e nde ave ereiko va'e indive. Nde ave ha'e Galiléia yvy pygwa ra'e, he'i íxupe.

⁶⁰ He'i jevy Pedro:

—Upéa xe ndaikwaái, mba'e-rehe tipo aipo-rami ere xe-vy? he'i rei.

Upéixa onhe'ẽ oĩ-vy jave ete, gáju osapukái.

⁶¹ Upe-ma ramo ojere Hesu oma'ẽ porã porã Pedro-rehe. Ha Pedro katu imandu'a Hesu he'i va'ekwe-rehe íxupe, “Ko'ánga gáju ndosapukái vyteri jepe, mbohapy-ma nde ere-ta xe-rehe: Upéa xe ndaikwaái, ere-ta”.

⁶² Upéa-gwi hasẽ-ma Pedro. Onhemboasy eterei-gwi ojahe'o oho-vy.

*Onhenupā ramogware Hesu
(Mt 26.67-68; Mc 14.65)*

⁶³ Gwī kwimba'e Hesu-rehe onhangareko va'e onhembohory hese. Ogwerohasa asy eterei Hesu-pe. Oinupā eterei íxupe.

⁶⁴ Ohesamboty íxupe ha he'i:

—Kiva'e pa ne nupā? Emombe'u katu, he'i íxupe.

⁶⁵ Heta mba'e he'i rei rei íxupe onhembohory-vy hese.

*Hesu pa'i ruvixa renonde-py
(Mt 26.59-66; Mc 14.55-64; Jo 18.19-24)*

⁶⁶ Ko'ẽ jave ramo ojogweroaty jevy judeu ruvixa kwéry, pa'i ruvixa kwéry, judeu rekombo'ehaty kwéry ndive ave, onhomongeta geta okwa-vy. Upéi katu oipyhy heru-vy Hesu-pe mburuvixa kwéry renonde-py. Ogwahē-ma ramo oporandu íxupe:

⁶⁷ —Nde tipo Cristo judeu kwéry remiha'arō va'e? Emombe'u katu ore-vy, he'i íxupe.

Upe ramo Hesu he'i:

—“Xe Cristo judeu kwéry remiha'arō va'e voi” ha'e ramo, ndaperoviái joty arã.

⁶⁸ Anhetegwa ha'e-ta peẽ-my: Aporandu ramo peẽ-my, napemombe'u mo'ãi xe-vy.

⁶⁹ Xe Nhande Ryke'y tee va'e ãy gwive agwapy-ta yváy-py Tupā Nhandejáry yke-rehe. Upe ipu'aka ete va'e ndive xe agwapy-ta, he'i íxupe kwéry Hesu.

⁷⁰ Upe-ma ramo enterove oĩ va'e oporandu íxupe:

—Aipo ramo Nhandejáry ra'y tee voi va'e tipo nde? he'i íxupe.

—“Nde ha'e voi” peje kuri xe-vy, he'i íxupe kwéry Hesu.

⁷¹ Upe-ma ramo he'i ojóupe:

—Nanhaikotevēví-ma imombe'uharã-rehe. Nhande katu nhahendu-ma voi ha'e inhe'ẽ tee voi. Onhemonhandejáry rei Hesu, he'i ojohu vai-vy Hesu nhe'ẽ.

23

*Hesu ojereraha mburuvixa héry va'e Pilatos renonde-py
(Mt 27.1-2,11-14; Mc 15.1-5; Jo 18.28-38)*

¹ Upe jave kente kwéry ijaty va'e opu'ãmba ojereraha hagwā Hesu ndive mburuvixagwasu Pilatos renda-py:

² —Oroipyhy-ma katu ko kwimba'e. Ohekombo'e va'ekwe-gwi ore re'ýi kwéry ndoikosevéí-ma mburuvixagwasu César nhe'ẽ-rupi, he'i hese. — Ha'e katu omombe'u kente kwéry-pe pono ome'ẽ mburuvixagwasu César-pe mba'eve, he'i rei ave hese. —“Xe Cristo Nhandejáry remimbou va'e pene ruvixarã” he'i ójehe, he'i omoñ vai-vy Hesu-pe.

³ Upe-ma ramo Pilatos oporandu Hesu-pe:

—Nde tipo judeu kwéry ruvixagwasu? he'i íxupe.

—Nde voi katu aipo ere kuri, he'i joty íxupe Hesu.

⁴ Upéi Pilatos he'i pa'i ruvixa kwéry-pe, ojogweroaty va'e kente kwéry-pe ave:

—Ko kwimba'e katu nahembia po vaíry va'e voi. Aipo ramo naporai ajuka uka íxupe, he'i.

⁵ Kente kwéry katu he'i jevy jevy:

—Hese ha-py hemimombe'u-gwi voi Judéia yvy pygwa kwéry ndogwerojojái onhonhe'ẽ onhomboja'o ja'o upéixa-gwi. Galiléia-gwi ko'a peve ndaija'evéi ojóhe íxugwi. ãy katu ogwahē-ma ko'a-py.

⁶ Aipo va'e rendu-vy Pilatos oporandu:

—Ko kwimba'e tipo Galiléia yvy pygwa? he'i oporandu-vy.

⁷ Oikwaa-ma ramo Pilatos Hesu upe pygwaha, omondo Hesu-pe upe pygwa ruvixa héry va'e Herodes-pe. Upe va'e oiko ave Jerusalém tetā-my ombohupa-vy. Upéixa-gwi omondo Hesu Herodes renda-py oporandu hagwā hembiapokwe-rehe. Ojohuse mo'ã Hesu-rehe hembiapo vaikwe.

Hesu ojereraha mburuvixa héry va'e Herodes renonde-py

⁸ Ovy'a mburuvixa Herodes ohexxa-ma ramo Hesu-pe. Ohendu va'e voi ave Hesu rerakwā porā. Yma-ma upéa-gwi ohexase eterei íxupe. Ohexase ave Hesu ojapo ramo hembiapo porā va'e hexapyrā-rupi jahexa e'ŷ vyteri va'e.

⁹ Oporandu heta Hesu-pe. Ha Hesu katu nonhe'ëiry íxupe.

¹⁰ Upe-ma ramo pa'i ruvixa, judeu rekombo'ehaty kwéry ndive ijapu hese hembiapokwe-rehe omboja hagwā mo'ã hembiapo vai Hesu-rehe.

¹¹ Soldado kwéry, huvixa ndive, omoingo asy-ma Hesu-pe. Omoingo vaima voi íxupe. Omoõ hese ijahoja porā va'e omomburuvixa a'ã hagwā íxupe, onhembohory hory hese, ha upe rire omondo jevy Pilatos oĩ ha-py.

¹² Upe mboyve Herodes, Pilatos ndive ndaija'ëiry ojóehe. Upe áry gwive oiko porā onhondive.

“Tojuka kena íxupe” osapukái Hesu-rehe

(Mt 27.15-26; Mc 15.6-15; Jo 18.39-19.16; At 3.13-14)

¹³ Omboaty uka Pilatos pa'i ruvixa kwéry, judeu ruvixa kwéry, judeu kwéry ave.

¹⁴ Upéi he'i:

—Ma'erā tipo Peru xe-vy ko kwimba'e pemombe'u hagwā hese hembiapo vaiha. “Ohekombo'e va'ekwe-gwi ore re'ŷi kwéry ndoikosevéi-ma mburuvix-agwasu nhe'ë-rupi” peje rei kuri hese. Upéa-rehe xe ajohu-ma kuri hese pene renonde-py. Ndoikói ra'e hese ivai va'e penhe'ë vai hagwā hese.

¹⁵ Herodes ave ndotopái hese mba'eve. Upéa-gwi ombou jevy nhande-vy. Upéixa ramo ko kwimba'e ndojapói ko ra'e mba'eve pejuka uka hagwā.

¹⁶ Ambopi uka-ta mante íxupe upéi apoi-ta íxugwi oho jevy hagwā, he'i íxupe kwéry.

¹⁷ Aretegwasu ramo mburuvixagwasu rekoha-rupi opoi peteī onhemoõ preso va'ekwe. Upéa-rehe, “Apoi-ta íxugwi” he'i.

¹⁸ Upéa ohendu-ma ramo entéro kente kwéry osapukái:

—Tojuka kena ko kwimba'e, he'i osapukái-vy. —Epoi Barrabás-gwi ore-vy gwarā, he'i osapukái-vy.

¹⁹ Barrabás katu onhemoõ araka'e preso. Upe tetā-my onhorairō araka'e ohekoviariõ hagwā mo'ã mburuvixagwasu. Oporojuka ave. Upéa-gwi onhemoõ preso araka'e. Ha “Epoi Barrabás-gwi” he'iri iri hikwáí.

²⁰ Mburuvixa ae katu opoise mo'ã Hesu-gwi. Upéa-rehe onhe'ë jevy kente kwéry ndive.

²¹ Ha'e kwéry ae katu osapukái hatāve tāve.

—Ejuka uka katu íxupe ehupi uka kurusugwasu-rehe ijuka-vy, he'i hese.

²² Mbohapyha-ma Pilatos he'i hese:

—Mba'eixagwa ivai va'e tipo ojapo? Ndahexái mba'eve ivai va'e hembiapokwe ajuka uka rei hagwā íxupe, he'i. —Ambopi uka rei-ta íxupe oho jevy hagwā, he'i.

²³ Aipo ramo ha'e kwéry osapukái joty:

—Tojuka katu, he'i osapuka pukái okwa-vy hese. —Kurusugwasu-rehe tojuka kena. he'i hese hikwáí

Isapukái katu imbaraeteve ojapo uka hagwā gwemimbota. Upéa-rupi isapukái-rupi ipoxyha-rupi ojapo joty íxupe kwéry.

24 Ijaty va'e nhe'ẽ rendu-vy, mburuvixa Pilatos ojapo uka hemimbota.

25 Upe kwimba'e onhorairõ va'ekwe, oporojuka va'ekwe ave, kente kwéry oipota va'ekwe osẽ preso onhemoõ ha-gwi, upé kwimba'e-gwi opoi uka. Hesu rekovia opoi hembiapo vai va'e-gwi. Ha ome'ẽ Hesu ijukaharã-pe onhemboaty va'e remimbota rei-rupi ogwereko hagwã íxupe.

*Hesu onhemoõ ramogware kurusugwasu-rehe
(Mt 27.32-44; Mc 15.21-32; Jo 19.17-27)*

26 Ha upéi katu soldado kwéry ogweraha Hesu-pe ojuka hagwã. Ogweraha jave ohogwaití Cirene pygwa, héry va'e Simão. Ou oiko-vy tetã jerekwe-gwi. Oipyhy ave Simão:

—Nde, eraha ko kurusugwasu Hesu rapykwéri, he'i-vy omoõ kurusugwasu Simão ape-rehe ogweraha hagwã Hesu rapykwéri.

27 Heta oho va'e hapykwerigwa. Ipa'ũ-my kwéry oĩ ave kunha ojahe'o Hesu-pe ombyasy va'e.

28 Upe-ma ramo Hesu ojere ha oma'ẽ hese kwéry. He'i:

—Ani xe mboasy, peẽ kunha. Peẽ ha pene memby ae kuri pemboasy, he'i Jerusalém mygwa-pe.

29 —Ogwahẽ va'erã áry oporombohasa asy va'erã, entéro he'i va'erã: “Ovy'a ete gwí kunha imemby e'ŷ va'e. Ikatu e'ŷ imemby va'e ave. Oporomokambu e'ŷ va'ekwe ave. Naimembýi-gwi ov'y'a” he'i va'erã oporombohasa asy-gwi.

30 Upe ramo he'i arã ave: “To'a vvyatyrusu nhande ári. Tanhande jatypa vvyatyrusu oitypa-vy. Nhande rekove rehewe tanhande aty” he'i arã ohasa asy eterei-gwi.*

31 —Ha ko'ánga koixagwa ojapo xe-rehe. Vaive ojapo arã pende-rehe. Xe, vvyra aky-rami heko porã va'e ko xe, ha xe-rehe hembiapo vai joty. Hembiapo vaive ive arã pende-rehe. Peẽ vvyra pirukwe-rami pende reko porã e'ŷ va'e. Hembiapo vaive ive arã pende-rehe, he'i Hesu kunhagwe-pe omboasy-vy.

32 Ha soldado kwéry ogweraha ave mokõi hembiapo vai va'e-pe Hesu ndive ojuka va'erã ogweraha.

33 Akãgue renda héry va'e-py ogweraha. Ogwahẽ-ma ramo upe-py omoõ íxupe kurusugwasu-rehe ohupi-vy. Upe mokõi hembiapo vai va'e ohupi ave hendive. Hesu kurusugwasu yke-rehe omoõ kurusugwasu mokõi. Hesu oĩ hembiapo vai va'e mbyte-py. Ijakatúa-koty oĩ peteĩ, ijasu-koty oĩ ave peteĩ. Kurusugwasu-rehe meme ohupi ojuka-vy.

34 Oime jave kurusugwasu-rehe Hesu ombojeupi onhe'ẽ Nhandejáry-pe:

—Eiporiahuvereko íxupe kwéry, xe Ru. Ndoikwaái-gwi kóixa ojapo hikwái, he'i.

Upéi onhomboja'o ja'o Hesu aokwe-rehe hikwái. Onhomboja'o hagwã ohuga soldado kwéry.

35 Ha entéro ojogweroaty va'e oma'ẽ ma'ẽ oiko-vy. Ohexapa hikwái.

Ha huvíxa kwéry ave onhembohory ave Hesu-rehe. He'i rei rei-vy:

—Kóá opororesende araka'e, he'i onhembohory hese. —Ay katu tonheresende kena. Heta he'i hese araka'e: “Hesu ko Cristo nhane remiha'arõ va'e. Nhandejáry rembiporavo va'e voi Hesu” heta va'e he'i va'ekwe Hesu-rehe. Ha ãy tipo ndoikwaái para'e onheresende hagwã. Tonheresende kena, he'i huvíxa kwéry onhe'ẽ rei rei onhembohory hese.

36 Ha soldado kwéry ave onhembohory hese. Onhemoagwí íxugwi ome'ẽ íxupe uva rykwere ndahepýi va'e ho'u hagwã mo'ã. Onhe'ẽ rei rei íxupe:

* 23:30 Os 10.8

³⁷ —Nde para'e judeu kwéry ruvixagwasu va'e. Aipo ramo enheresende kena, he'i onhembohory-vy hese.

³⁸ Ha ohai omoī hagwā Hesu akā ári. “Kóá judeu kwéry ruvixagwasu” he'i ohai omoī-vy. Mbohapy nhe'ẽ-py ohai. Grécia pygwa nhe'ẽ-py ohai. Roma pygwa nhe'ẽ-py ohai. Hebreu kwéry nhe'ẽ-py ohai ave. “Kóá judeu kwéry ruvixagwasu” he'i. Mbohapy nhe'ẽ-py ohai rire omoī inhakā ári.

³⁹ Ha peteī hembiapo vai va'e ave onhe'ẽ rei rei íxupe. Oime jave okurusugwasu-rehe, onhe'ẽ rei rei Hesu-pe he'i-vy:

—“Xe Cristo, Nhandejáry rembiporavo va'e” ere kuri ndéjehe. Aipo ramo enheresende katu. Ore ave ore resende katu.

⁴⁰ He'i-ma ramo, upe outro kurusugwasu-rehe oĩ va'e onhemonhe'ẽ oirū-me:

—Nde tipo, ma'erā-gwi nderekyhyjéi Tupā Nhandejáry-gwi? he'i. —Nhande ave nhamano-tama nhande kurusugwasu-rehe.

⁴¹ Nhane rembiapo vaikwe-rehe jahasa asy jaiko-vy. Ha'e ae rei ohasa asy. Mba'eve ndojapói, he'i gwembiapo vaikwe-gwi okurusugwasu-rehe oĩ va'e-pe.*

⁴² Upéi he'i ave:

—Nde, Hesu, xe poriahuverekó erejehexa uka ramo nde ore ruvixa ramo, xe poriahuverekó katu.

⁴³ Aipo ramo Hesu he'i íxupe:

—Anhete ko'ánga ereiko-ta xe ndive yváy-py, he'i Hesu upe ójehe ojerovia va'e-pe.

Hesu omano ramogware

(Mt 27.45-56; Mc 15.33-41; Jo 19.28-30)

⁴⁴⁻⁴⁶ Kwarahy mbyte-py pytūmba-ma upe yvy ári. Upe tetā pytūmba ete-ma. Opyta pytū mbohapy óra-rupi. Ka'arugwasu peve optya. Kwarahy ndohe-sapevéi-ma. Ka'arugwasu ramo onhe'ẽ hatā Hesu. Upéi he'i Nhandejáry-pe:

—Xe Ru, xe mogwahē katu nde ha-py.

He'i-ma ramo omano ete-ma Hesu.

Ha upéi oĩ Nhandejáry róga kakwaa pygwa okēgwasu nhugwāha tuvixa ete va'e. Omano-ma ramo Hesu, pya'e osoropa.

⁴⁷ Ha omano ramo soldado ruvixa ohexapa. Upéixa-gwi omboete Nhandejáry-pe:

—Péa ha'e voínte hembiapo vai e'ŷ va'e, he'i hese.

⁴⁸ Ha heta heta ojogweroaty aty va'e ou va'ekwe oma'ẽ hagwā ikurusu-rehe ojejuka va'e kwéry-rehe. Ha entéro ojehu va'ekwe gwive ohex-a-ma ramo, onhemboasy oiko-vy. “Xe ko, xe py'a vai voi aiko-vy” he'i. “Upe kwimba'e-rami ndaikói voi-ma xe” he'i onhemboasy-vy.

⁴⁹ Ha heta hese ojerovia va'e oĩ ave upe-py. Gwī kunhagwe Hesu rapykwéri ou va'ekwe Galiléia-gwi oĩ ave ijaty va'e pa'ũ-my. Mombyry-gwi oma'ẽ Hesu-rehe hikwái.

Itakwa-py omoī ramogware Hesu retekwe

(Mt 27.57-61; Mc 15.42-47; Jo 19.38-42)

⁵⁰⁻⁵¹ Ha upéi katu José oho Pilatos renda-py. Arimatéia pygwa José. Judeu kwéry retā Arimatéia. Ha José judeu ruvixa va'e, hembiapo porā va'e. Onhemboete va'e voi. Judeu ruvixa ambue kwéry ojukase ramo Hesu-pe, José ndojohu porāi hembiaporā. Ha'e oha'arō arō voi Nhandejáry nhande ruvixa-pe omoirū hagwā.

⁵² Ha José oho Pilatos renda-py ojerure Hesu retekwe-rehe.

* **23:41** SI 31.5

⁵³ Upéi ombogwejy kurusugwasu-gwi hetekwe. Onhugwā ao morotī iporā va'e-py. Upéi omoī itakwa-py hetekwe. Ita-gwi ojo'o va'ekwe-py omoī. Ipyahu itakwa. Ne'irā onhemoī tetekwe upe itakwa-py. Hesu retekwe omoī upe-py.

⁵⁴ Ka'aru-tama, haimete-ma pytu'uha áry. Ha upe áry-py judeu kwéry omoīmba-ma nga'u pono ombo'apo pytu'uha áry-py.

⁵⁵ Ha kunha kwéry Hesu ndive ou va'ekwe Galiléia-gwi va'e oho José rapykwéri. Ohexa itakwa. Ohexa ave omoī ramo hetekwe hyepy-py.

⁵⁶ Upe rire oho jevy gwóga-py omongu'i ngu'i hyakwā porā va'e hykwere omona hagwā Hesu retekwe-rehe omohyakwā hagwā hetekwe.

Ha pytu'uha áry-py Nhandejáry remimombe'ukwe-py optyu'u oiko-vy.

24

Oikove jevy-ma Hesu

(Mt 28.1-10; Mc 16.1-8; Jo 20.1-16)

¹ Domingo kwarahy osē-ma ramo, voi oho kunha kwéry ogwata. Hyakwā porā va'e omongu'i ngu'i va'ekwe ogweraha omona hagwā Hesu retekwe-rehe. Itakwa-py oho.

² Ogwahē-ma ramo ohexa-ma itagwasu ojepe'a va'ekwe.

³ Oike voi itakwa rye py-py. Oike-ma ramo ndotopavéi-ma hetekwe.

⁴ Ha upéa-rehe mba'eve ndoikwaái.

—Mbava'e tipo jajapo-ta, he'i.

Opondera-vy oiko jave mokōi karia'y ohexa, yváy pygwa rembihexa uka ra'e. Ao hesakā ete hemimonde ohexa.

⁵ Ohexa jave onhemondýi-ma, ojeayvy oma'ẽ yvy-rehe.

Upéi karia'y he'i:

—Ma'erā-gwi ereheka oikove va'e omano va'e renda-py? he'i.

⁶ —Hesu ndaipóri a-py. Opū'ã jevy-ma kuri oho-vy, he'i Hesu-rehe. — Nane mandu'avéi tipo inhe'égwe-rehe? Oime-ma ramo pene ndive Galiléia-py omombe'u-ma voi va'ekwe oikove jevymaha hagwā-rehe.

⁷ He'i va'ekwe nde-vy: “Xe Nhande Ryke'y tee va'e. Tekotevē xe pyhy xe reraha-vy hembiapo vai va'e kwéry-pe. Xe juka-ta kurusugwasu-rehe. Mbohappy áry-py katu aikove jevy-ta” he'i voi va'ekwe. Upe va'e he'i va'ekwe-rehe napene mandu'áiry nipo ra'e, he'i.

⁸ Ohendu-ma jave imandu'a jevy inhe'égwe-rehe.

⁹ Upéi oho jevy itakwa-gwi kunha kwéry. Oho ohexa Hesu remimbo'e kwéry-pe. Gwī onze hemimbo'ekwe-pe omombe'u. Hendive oī va'e-pe omombe'u ave.

—Hesu oikove jevy-ma katu, he'i.

¹⁰ Heta kunha ohexa kuri omombe'u hagwā íxupe kwéry. Maria Madalena ohexa kuri. Joana ave ohexa kuri. Tiago sy héry Maria ave ohexa kuri ave. Hapixa kwéry, indive oiko-ma ave itakwa-py ohexa kuri ave. Ha enterove omombe'u peteñxa nhe'ẽ Hesu remimondo kwéry-pe.

¹¹ Ohendu-ma ramo,

—Itavy kunha kwéry, he'i mo'ã.

Ndogweroviái Hesu oikove jevymaha.

¹² Pedro ae opu'ã oripara oho-vy itakwa-py. Ojeayvy ohovapyexa hagwā. Inhugwā hagwe mate ohexa. Ijaokwe morotī va'e anho oime. Ohexa rire oho jevy gwóga-py. Opondera eterei-ma oiko-vy.

Emaús tetā rape-rupi Hesu onhomongeta mokōi gwemimondo ndive
(Mc 16.12-13)

¹³ Upe áry-py mokõi inhirûgwe ogwata oho-vy Emaús tetã'i-my. Namombyrýi Jerusalém-gwi upe tetã'i. Dez quilômetro mate oĩ.

¹⁴ Tape-rupi ogwata jave onhomongeta Hesu rehewa nhe'ẽ-rehe. Hetekwe okanhy hagwe rehewa nhe'ẽ-rehe onhomongeta hese oje'óí-vy.

¹⁵ Onhomongeta jave ogwahẽ-ma Hesu omoirû íxupe kwéry ogwata-vy.

¹⁶ Ha'e katu ohexa teĩ Hesu-pe. "Ndoikové" he'i mo'ã hese-gwi ndoikwaái íxupe.

¹⁷ —Mbava'e-rehe penhomongeta peho-vy? Penhemboasyha-rehe para'e penhomongeta peho-vy, he'i Hesu íxupe kwéry, ogwahẽ-ma jepe íxupe.

Upéi opyta rei onhemboasy-vy hikwái.

¹⁸ Ha peteĩ, héry va'e Cléopas he'i íxupe:

—Nde tipo, ne anho nipo ndereikwaái ra'e mba'e pa oiko kuri Jerusalém-my? Enterove upe pygwa kwéry oikwaa-ma. Nde tipo upe-py ereiko rei nipo herakwã erekendu e'ŷ rehewe ra'e? he'i oporandu Hesu-pe jevy.

Ndohexa kwaáiry Hesu-pe Hesu voiha.

¹⁹ —Mba'e tipo oiko upe-py? he'i oporandu rei-vy Hesu.

Upéi omombe'u hikwái:

—Hesu rehewa nhe'ẽ ndereikwaái nipo ra'e. Ha'e Nazaré pygwa. Nhandejáry nhe'ẽ-py omombe'u va'etykwe. Ipu'aka va'ekwe. Hexapyrã-rupi hembiapokwe. Nhandejáry nhe'ẽ-py oiko porã va'ekwe. Hemimombe'ukwe, hembiapokwe kente kwéry ojohu porã voi va'ekwe, he'i omombe'u-vy.

²⁰ —Upéi mburuvixa kwéry ojuka uka va'ekwe íxupe. Pa'i ruvixa kwéry, nhande ruvixa kwéry ave íxupe ogweraha uka-ma judeu e'ŷ va'e-pe ojuka uka hagwã Hesu-pe. Ha ojuka-ma íxupe. Kurusugwasu-rehe ojejuka-ma va'ekwe, he'i Hesu-pe jevy omombe'u-vy hesegwa.

He'i ave:

²¹ —Ha ore katu, oro'e mo'ã va'ekwe hese, "Israel remiarirõre judeu kwéry resendeharã" oro'e mo'ã hese. Ohasa-ma mbohapy áry omano hagwe rire, he'i omombe'u-vy.

²² —Gwĩ ore ndive oiko meme va'e, kunha kwéry, ore mondýi kuri hesegwa nhe'ẽ omombe'u-vy. Kwarahy osẽ-ma ramo oho ra'e itakwa-py. Hetekwe rexav-y mo'ã oho kuri.

²³ Ndaiporivéi itakwa-py. Ogwahẽ jevy ore ha-py omombe'u kuri: "Nhandejáry rembigwái yváy pygwa ojehexa uka-ma kuri ore-vy" he'i omombe'u-vy ore-vy. "Oikove jevy-ma, he'i ojehexa uka va'e" kunha kwéry he'i ore-vy omombe'u-vy, he'i Hesu-pe inhirûgwe.

²⁴ —Ha gwĩ ore irû oho ohexa, he'i. —Kwimba'e oho itakwa-py kunha rapykwrí oho. Kunha omombe'u ha-rami voi omombe'u. Ndohexáiry ae Hesu-pe, he'i omombe'u-vy Hesu-pe jevy.

²⁵ Upe-ma ramo Hesu he'i íxupe kwéry:

—Peẽ napene arandúi voi ra'e. Ndapeikwaái voi Nhandejáry nhe'ẽ, he'i íxupe kwéry. —Nde are eterei erejerovia tee hagwã inhe'ẽ-py omombe'u va'ety remimombe'ukwe-rehe, he'i.

²⁶ —Nhandejáry nhe'ẽ-rupi tekotevõ oiko upéixa. Tekotevõ hembiporavo va'e ohasa asy, omano ave kente kwéry oresende hagwã. Tekotevõ oho yváy-py onhemomba'egwasu hagwã. Nhandejáry remimombe'ukwe ojehu-ma íxupe, he'i omombe'u-vy.

²⁷ Upéixa ojéhegwá nhe'ẽ omombe'u Hesu íxupe kwéry. Nhandejáry nhe'ẽ ohai uka va'ekwe Moisés amyrã-pe, onhe'ẽ-py omombe'u va'ety amyrã kwéry-pe ave. Upéa omombe'u jevy Hesu íxupe kwéry. Nhandejáry remimombe'ukwe ojéhegwá nhe'ẽ omombe'u mbe'u ogwata-vy.

²⁸ Upéi ogwahē oho ha-py, tetā'i Emaús-py ogwahē. Ha Hesu mombyryve oho-ta mo'ā.

²⁹ —Epyta ore ndive. Ka'aru ete-ma. Oike-tama kwarahy, he'i Hesu-pe hikwái.

Aipo ramo oho omoirū íxupe kwéry. Oike hóga-py.

³⁰ Ho'u-tama ramo Hesu oipyhy mbojape. Ha gwemi'urā-rehe omboete Nhandejáry-pe. Íxupe omondo onhe'ē rire omboja'o ja'o mbojape ome'ē íxupe kwéry ho'u hagwā.

³¹ Upe jave ae oikwaa-ma hikwái Hesu-pe Hesuha. Oikwaa-ma jave ndohexavéi jevy-ma íxupe. Okanhy-ma Hesu hesa kwéry-gwi.

³² —Nhane mbovy'agwasu kuri nhanhomoneta ramo tape-rehe. Nhandejáry nhe'ē, kwatia-rehe oī va'e omombe'u kuri tape-rehe. Oikwaa uka-ma kuri nhande-vy nhane mo'aranduve hagwā, nhane mbopy'agwapy voi kuri, he'i Hesu-rehe ojóupe.

³³ Pya'e opu'ā jevy oho jevy Jerusalém-my. Ogwahē-ma ramo ojohu gwī onze Hesu remimondokwe. Indive hetave oiko ojogweroaty-vy.

³⁴ —Oikove jevy-ma Nhandejáry Hesu, he'i omombe'u-vy. —Simão ohexama íxupe, he'i hikwái upe mokōi ogwahē va'e-pe.

³⁵ Ha upéi katu ou va'e omombe'u ave Hesu rexahare.

—Ore ave orohexá íxupe kuri, he'i omombe'u-ma. —Ore moirū kuri tape-rehe Hesu, he'i omombe'u-ma. —Ore mbo'e jevy kuri tape-rehe. Orokaru-tama ramo ae orohexá kwaa hese, he'i. —Hembiapo-vy voi ojapo-ma Hesu. Omundo onhe'ē Nhandejáry-pe omboete-vy. Ha upe rire omboja'o ja'o mbojape. Upe ojapo jave oroikwaa-ma hese, he'i omombe'u-vy Hesu irūgwe-pe. —Oroikwaa-ma Hesu voi ra'e, he'i.

Gwemimbo'e kwéry-pe ojehexá uka jevy Hesu

(Mt 28.16-20; Mc 16.14-18; Jo 20.19-23; At 1.6-8)

³⁶ Upéa omombe'u jave Hesu ogwahē íxupe kwéry. Ipa'ū-my ojekwaa-ma:

—Pende py'agwapy tapeiko-vy, he'i íxupe kwéry.

³⁷ Onhemondýi voi íxugwi hikwái. Ndaipy'agwapyvái-ma hikwái. Ikyhyje hexa-vy.

—Aragwypóry, he'i mo'ā hese ikyhyje va'e onhemondýi íxugwi.

³⁸ —Ani penhemondýi rei teī xéhegwí, he'i. —Ma'erā-gwi nde py'a-py ereporandu randu xe-rehe, “Oikove para'e Hesu, ndoikovéi para'e” anive upéixa peje teī xe-rehe. Ejerovia katu, he'i íxupe kwéry Hesu.

³⁹ —Pema'ē katu xe-rehe, he'i. —Xe po-rehe pema'ē, xe py-rehe ave pema'ē, he'i. —Epoko katu xe rete-rehe ereikwaa porā hagwā. “Aragwypóry rei-ma oiko” peje mo'ā xe-rehe kuri. Ha'e-ta peē-my: Aragwypóry ndaipiréi naikāgwéi ave. Ha xe ndaha'éiry. Xe rete renogwahē jevy peē-my, he'i.

⁴⁰ Ho'e-vy ohexá uka íxupe opo, opy ave:

—Pehexá katu xe kutu hagwe ave, he'i.

⁴¹ Ha ohexá jepe ndogweroviái joty íxupe. Ovy'a eterei-gwi opondera ndera eterei-gwi mba'eve-rehe ndojeroviái hikwái.

Aipo ramo Hesu oporandu:

—Oime tipo temi'urā, he'i ohexá ukave hagwā gwekoha.

⁴² Upéi ome'ē íxupe hemi'urā, piky mbixypyre eíra ave ome'ē íxupe.

⁴³ Ha ha'e kwéry hesa-py ho'u.

⁴⁴ Ho'u-ma rire he'i jevy:

—Oiko-ma xe remimombe'ukwe xe rehegwa amombe'u mbe'u va'ekwe peē-my. Aiko ramo va'ekwe pene pa'ū-my amombe'u mbe'u va'ekwe upe

nhe'ẽ peẽ-my. Xe rehewa nhe'ẽ Nhandejáry ohai uka va'ekwe kwaitia-rehe. Ymagware-pe Moisés amyrĩ-pe ohai uka va'ekwe, onhe'ẽ-py omombe'u va'ety amyrĩ kwéry-pe ave ohai uka va'ekwe. Davi amyrĩ-pe ave ohai uka va'ekwe porahéi kwéry héry va'e Salmo. Xe rehewa nhe'ẽ meme ohai uka va'ekwe íxupe kwéry. Omotenonde xe rehewa nhe'ẽ gwemimombe'ukwe ohai hagwã. Ha tekotevẽ oikopa Nhandejáry remimombe'ukwe, he'i.

⁴⁵ Upe-ma ramo oikwaa uka íxupe kwéry Nhandejáry nhe'ẽ kwaitia-rehe omoõ uka va'ekwe.

⁴⁶ He'i íxupe kwéry:

—Yma va'ekwe Cristo rekorã omoõ va'ekwe kwaitia-rehe Nhandejáry nhe'e. “Xe rembiporavo va'e pene remiha'arõ ojerereko asy va'erã. Omano tee rire oikove jevy-ta. Mbohappy áry-py oikove jevy-ta.

⁴⁷ Héry-py omombe'u mbe'u va'erã: Perova katu pende rekoha Nhandejáry omboyke hagwã pendéhegwi pene rembiapo vaikwe. Gwembiporavo réry-py omopotí va'erã pende py'a ky'akwe, he'i va'erã omombe'u-vy opa rupigwa ohendu hagwã Cristo rehewa nhe'ẽ. Jerusalém mygwa-pe omombe'u ranhetá. Upe rire oho omombe'u entéro tetã tetã mygwa kwéry-pe.” Upéixa omombe'u Nhandejáry kwaitia nhe'ẽ, he'i Hesu onhemombe'u-vy.

⁴⁸ —Upéa pehendu va'ekwe, pemoherakwã pemombe'u mbe'u opa-rupi xe aikove jevymaha, he'i.

⁴⁹ —Xe Ru nhe'ẽ amombe'u va'ekwe peẽ-my. “Ambou-ta Nhe'ẽ Marangatu tee va'e” he'i xe-vy va'ekwe xe Ru. Upe xe Ru remimbou ambogwejy-ta. Upéa-rehe peha'arõ Jerusalém tetã-my. Pene mbopu'aka tee rire-ma ae eresẽ upé-gwi, he'i íxupe kwéry Hesu.

Hesu ojereraha yváy-py ramogware

(Mc 16.19-20; At 1.9-11)

⁵⁰ Upe rire ogweraha íxupe kwéry Betânia ypy-py. Ohupi opo omondo onhe'ẽ Nhandejáry-pe.

—Enhangareko porã xe irûgwe-rehe, he'i ohovasa hagwã íxupe kwéry.

⁵¹ Omondo jave onhe'ẽ Nhandejáry-pe ojei oirûgwe-gwi ojereraha yváy-py.

⁵² Aipo ramo inhirûgwe omondo ave onhe'ẽ Nhandejáry-pe omboete-vy.

—Ore Ru, nde tuvixa voi. Nde pu'aka tee va'e voi katu, he'i omboete-vy.

Upe rire oho jevy Jerusalém tetã-my. Ovy'a eterei hikwái oje'óí-vy.

⁵³ Ha opyta meme Nhandejáry róga kakwaa-py. Omboete ete Nhandejáry-pe oiko-vy hikwái upe-py.

Hesu Cristo rehewa nhe'ẽ porã João remimombe'ukwe o evangelho de João

Hesu Cristo Nhandejáry reko kwaa ukaha voi

1 Ko'yvy nhepyru e'ŷ vyteri ramo, oiko-ma va'ekwe Nhandejáry reko kwaa ukaha. Upe heko kwaa ukaha Nhandejáry ndive oiko. Upe heko kwaa ukaha Nhandejáry va'e ave voi ko.

2 Ko'yvy nhepyru e'ŷ vyteri ramo, ha'e oiko va'ekwe Nhandejáry ndive.

3 Entéro mba'e rerekwaaharã voi ha'e oiko va'ekwe. Ojapo e'ŷ ramo mba'eve ndoikói. Ha'e anho mba'e apoharã oiko.

4 Ha'e nhane moingoharã voi. Nhane moingo rire, nhande py'a-py nhande resape va'e-rami nhane mo'arandu porã va'ekwe.*

5 Pytū-my oiko vérami va'e-pe ohesape. Ha ndaipóri imbogweharã.*

6 Ha upéi katu ojekwaa va'ekwe kwimba'e héry va'e João. Ha'e Nhandejáry remimo'i omombe'u hagwã.*

7 Ojekwaa ou-vy João anhetegwa mombe'uharã, hembiexagwe hemiedukwe mombe'uharã ave. He'i João: "Nhande resapeha va'e ko upe va'e nhane mo'arandu-vy" he'i ou-vy Nhandejáry reko kwaa ukaha-rehe. Ou omombe'u ogwerovia uka porã porã hagwã enterove va'e-pe.

8 Ha João katu ndaha'ei nhande resape teecharã. Nhande resapeharã mombe'uharã ae ojekwaa ou-vy.

9 Ha upe Nhandejáry reko kwaa ukaha katu nhande resape teecharã va'e voi. Upe ramo ogwahē-ma va'ekwe nhande-vy ou-vy ko yvy ári upe heko kwaa ukaha. Petei tei nhande resapeha hagwã nhane mo'arandu-vy ou va'ekwe. Ha'e nhande resape teecharã va'e voi.

10 Ha'e oiko va'ekwe nhane pa'ũ-rupi. Nhande kwéry-pe nhane moingo ramo jepe va'ekwe, ndajaikwaáiry joty va'ekwe voi íxupe.

11 Ogwahē ou-vy ramo jepe va'ekwe gwe'yi kwéry retã-my, ndogwerovy'áiry joty íxupe. Ombojevy ae íxupe he'yi judeu kwéry va'e.

12 Ha inhe'ẽ renduha-pe gwive he'i: "Eiko katu xe nhe'ẽ-py Nhandejáry ra'y ramo" he'i peteí tei-me. Ojerovia héry-rehe va'e-pe gwive: "Eiko katu Nhandejáry ra'y ramo" he'i.

13 Jaiko ramo nhande sy-gwi, ndajaikói vyteri Nhandejáry ra'y ramo. Jaiko ramo nhande ru gwa'yrýrã oipota-gwi, ndajaikói vyteri Nhandejáry ra'y ramo. Ojereropyahu nhande rekoha rire ae, oiko Nhande Ru tee ramo Nhandejáry. Nhandejáry ra'y ramo jaiko. Teko rei remimbota-rupi ndajaikói Nhandejáry ra'y ramo. Nhandejáry remimbota-rupi ae jaiko Nhandejáry ra'y ramo.*

14 Ha Nhandejáry reko kwaa ukaha nhande rete poru-ma va'ekwe. Nhande-rami oiko-ma va'ekwe. Nhane pa'ũ-rupima oiko. Oromá'ẽ ma'ẽ va'ekwe hese. Ore resa-rupi oiko va'e. Hekoha porã tee va'e ra'e. Orohexa porã ramo: "Ha'eixagwa ndaipóri" oro'e hese. "Nhande Ru ra'y tee ha'e anho oiko va'e rekoha-rami voi upéa" oro'e orohexa-vy. Ha'e nhande rerekwa porã porã meme va'ety nhande rexakwaa rei-vy. Ha'e anhetegwa meme va'e mombe'uhá ave.*

* **1:4** Gn 1.1; Jo 1.14; 10.30; 17.5; Hb 1.2-3; Ap 19.13 * **1:5** Jo 8.12; 1 Jo 1.5 * **1:6** Mt 3.1; Mc 1.4; Lc 3.1-2 * **1:13** Rm 8.14-17; Gl 3.26; Ef 1.5 * **1:14** Fp 2.7-8; Cl 2.9

15 Ha João katu omombe'u va'ekwe hesegwa. He'i:

—Upe va'e xe remimombe'ukwe kuri, he'i. —Ha'e kuri hese amombe'u-vy, “Ha'e ipyahuve ramo jepe xéhegwi, xe renondegwa joty” ha'e hese. “Upe va'e onhemboeteve va'e xéhegwi, hi'aranduve va'e xéhegwi. Xe rekove e'ŷ ramo vyteri, ha'e oiko va'ekwe yváy-py” ha'e kuri hese amombe'u-vy, he'i va'ekwe omombe'u-vy onhe'ẽ hatã-vy.

16 Ha ha'e katu ojehegwigwa-py nhande rovasapa porã rei kuri. Iporãve rãave va'e-py nhande rexakwaa rei oiko-vy.

17 Yma va'ekwe omombe'u nhande-vy va'ekwe tekoharã myamyrã Moisés omombe'u va'ekwe. Nhandejáry nhe'ẽ-py omombe'u nhane rekoharã. Ha upéi katu Hesu Cristo nhande rovasa kuri nhande rexakwaa rei-vy. Anhetegwa tee va'e omombe'u kuri nhande-vy.

18 Ha Nhandejáry katu nhane rembiexa e'ŷ va'e voi. Ha ta'ýry katu peteĩmi oiko va'e, Nhandejáry rembiayhu tee va'e voi, oikwaa uka nhande-vy Nhandejáry rehewa.

João oikwaa uka Hesu Cristo rehewa

(Mt 3.1-12; Mc 1.1-8; Lc 3.1-18)

19 Ha judeu ruvixa kwéry katu ombou va'ekwe João renda-py Jerusalém pygwa ombou. Hemimbou pa'i levita héry va'e ave. Ogwahẽ ramo ha'e-py, oporandu João-pe:

—Mbava'e tipo ere ndéjehe? he'i íxupe.

20 Ha João katu omombe'upa Hesu Cristo rehewa nhe'ẽ. “Mbava'e tipo ere ndéjehe?” he'i ramo íxupe, nokiriríry omombe'upa voi:

—Xe ndaha'éi Cristo. Xe katu nhane resende ou-vy va'erã e'ŷ va'e voi. Pene remiha'arõ e'ŷ xe, he'i ójehe íxupe kwéry.

21 Upe-ma ramo Jerusalém-gwi ou va'ekwe oporandu jevy íxupe:

—Aipo ramo, mbava'e tipo eremombe'u ndejehegwigwa? he'i íxupe. —Nde Nhandejáry nhe'ẽ-py omombe'u va'ety héry va'e Elias ymagware remimoher-akwãkwe pa nde ra'e? he'i oporandu íxupe.

Ha João katu he'i:

—Upe va'e e'ŷ ave xe, he'i íxupe kwéry.

Upéi oporandu jevy íxupe hikwái:

—Nde Nhandejáry nhe'ẽ-py omombe'u va'ety nhane remiha'arõ va'e ymagware remimoherakwãkwe pa nde ra'e, he'i íxupe.

—Ndaha'éiry. Upéa e'ŷ ave xe, he'i íxupe kwéry.

22 —Aipo ramo, mbava'e tipo eremombe'u ndejehegwigwa? he'i íxupe. —Emombe'u katu ore-vy orogweraha hagwã ne nhe'ẽgwe ore mbouhare-pe, he'i. —Mbava'e tipo ere ndéjehe? he'i íxupe hikwái.

23 Upéixa he'i-ma ramo, ha'e oiporu yma gware nhe'ẽ. Nhandejáry nhe'ẽ-py omombe'u va'ety héry va'e Isaías nhe'ẽ oiporu oikwaa uka hagwã mba'éixa hembiapo:

—Xe ko tekwat y e'ŷ-my gwĩ ou va'e-pe anhe'ẽ hatã va'e: “Pemoatyrõ katu Nhandejáry raperã” ha'e va'e voi kente kwéry-pe. Amombe'u íxupe tape ramigwarã-rami ambojehesa rerova uka hagwã hese, he'i ójehe oporandu va'e-pe.*

24 Upe ramo he'i íxupe hikwái. Upéa onhemboou va'ekwe fariseu kwéry va'e he'i:

25 —Aipo ramo mbava'e-gwi po ereporomongarai ereiko-vy? he'i íxupe. —Cristo ou va'erã e'ŷ nde. Elias héry va'e e'ŷ ave nde. Nhandejáry nhe'ẽ-py

* **1:23** Is 40.3

omombe'u va'ety, nhane remiha'arõ va'e e'ŷ ave nde. Upéa-gwi ma'erã po ereporomongarai ereiko-vy? he'i oporandu íxupe.

²⁶ Upe ramo he'i:

—Xe, he'i —y-py mante aporomongarai va'e. Ha pene pa'ũ-my katu oĩ peikwaa e'ŷ va'e.

²⁷ Ha'e ipyahuve ramo jepe xéhegwi, xe rekove e'ŷ ramo, oiko va'ekwe yváy-py, he'i. —Amboete eterei íxupe. Upéa-gwi, xe miríve-gwi, xe atí-gwi ave, ni hembigwái ramo jepe ndikatúi aiko, he'i íxupe kwéry oporandu va'e-pe.

²⁸ Upéixa oporandu randu ojóupe Betânia tetã-my, Jordão ysyry rovái. João oporomongarai ha-py onhomongeta hikwái.

Nhandejáry gwigwa ovexa ra'y ijukapyrã ramigwa voi Hesu

²⁹ Iko'ẽmba-ma ramo ohexa Hesu-pe ogwahẽ ou-vy ramo henda-py. Ohexa ramo, he'i íxupe:

—Upe va'e ko Nhandejáry gwigwa ovexa ra'y ijukapyrã ramigwa ou upéa. Nhane rembiapo vaikwe omboyke va'erã nhandéhegwi, he'i hese.

³⁰ —Upe va'e xe remimombe'u kuri, “Xe rapykwerigwa jepe ha'e. Xe aiko e'ŷ ramo, oiko-ma voi ha'e. Upe va'e onhemboeteve va'e xéhegwi. Xe aiko e'ŷ ramo, oiko-ma voi va'ekwe ha'e” ha'e kuri hese amombe'u-vy.

³¹ Xejéhegwi rei ramo ndahexa kwaái hese hekoha. Ha Nhandejáry nhe'ẽ-py xe agwahẽ va'ekwe aju-vy aporomongarai hagwã y-py. Ojehexa uka hagwã myamyrĩ Israel remiarirõ kwéry-pe upe nhane remiha'arõ va'e aporomongarai aiko-vy, he'i Hesu-rehe.

³²⁻³³ Upéi João omombe'u gwembiexagwe, gwemiendukwe omombe'u ave:

—Upe va'e, nhane remiha'arõ va'e ahexa ramo jepe, xejéhegwi rei ramo ndahexa kwaái hese hekoha. Nhandejáry olkwa uka ramo xe-vy ae, aikwaa-ma hekoha. He'i va'ekwe xe-vy Nhandejáry: “Eporomongarai katu y-py” he'i. Upéi he'i jevy: “Erehexa-ta Nhe'ẽ Marangatu tee va'e ogwejy ou-vy ramo pykasu-rami. Ogwapy hese oĩ-vy ramo erehexa-ta ave. Upe va'e hese ogwejy va'erã voi omoingo va'erã pende py'a-py Nhe'ẽ Marangatu tee va'e-pe” he'i kuri xe-vy Nhandejáry. Ha upe rire katu ahexa Nhe'ẽ Marangatu tee va'e-pe pykasu-rami ogwejy ou-vy ramo. Yváy-gwi ogwejy ogwapy hese. Upe va'e ahexa voi.

³⁴ Ahexapa-ma voi. Upéa-gwi amombe'u peẽ-my ahexa va'ekwe. Upe va'e katu Nhandejáry ra'y voi, he'i João omombe'u-vy.*

³⁵ Iko'ẽ jevy-ma ramo, João onhembo'y jevy oĩ-vy mokõi hemimbo'e ndive.

³⁶ Ha Hesu katu ohasa oho-vy. Ohexa ramo Hesu-pe:

—Upe va'e ko Nhandejáry gwigwa ovexa ra'y ijukapyrã ramigwa upéa, he'i Hesu-rehe.

³⁷ Ha mokõi hemimbo'e katu ohendu ramo inhe'ẽ, oho Hesu

³⁸ Ha Hesu ojeapa hese ohexa ou ramo gwapykwéri:

—Mbava'e tipo ereipota? he'i mokõive va'e-pe.

—Kipy tipo ereiko va'e nde, porombo'eháry? he'i Hesu-pe.

³⁹ —Peju katu pehexa, he'i íxupe.

Upéa-gwi amombe'u peẽ-my ahexa va'ekwe. Upéa-gwi opytá Hesu ndive. Ka'aru ete peve indive opytá.

⁴⁰ Upe mokõi va'e ohendu rire João nhe'ẽ oho ra'e Hesu rapykwéri. Peteí héry va'e André. Ha'e Simão Pedro ryvy va'e.

⁴¹ Pya'e oho gwyke'ýry reka-vy. Otopa rire he'i íxupe:

—Orotopa-ma Messias héry va'e, he'i íxupe.

Cristo nhane remiha'arõ va'e-pe he'i Messias.

* ^{1:34} Mt 3.13-17; Mc 1.9-11; Lc 3.21-22

⁴² Ogweru gwyke'ýry-pe Hesu renda-py. Ogewahē rire, ohexa katu katu íxupe Hesu:

—Nde katu João ra'y. Nde réry Simão. Ha ahekoviariõ-ta nde réry. Eren-hehenói-ta Cefas-py, he'i tyke'ýry-pe.

Ha inhe'ẽ ambue-py ohenói Pedro-pe. Pedro he'ise ita.

“Eju xe moirũ katu” he'i Filipe-pe Hesu

⁴³ Iko'ẽ jevy-ma ramo:

—Jaha katu Galiléia yvy-koty, he'i Hesu.

Upéi otopa Filipe-pe:

—Eju, xe moirũ katu, he'i íxupe.

⁴⁴ Ha Filipe katu Betsaida tetã mygwa. André tyke'ýry ndive upe tetã mygwa ave.

⁴⁵ Ha upéi katu Filipe oho otopa Natanael-pe. Ha omombe'u íxupe:

—Orotopa-ma voi José ra'y Hesu-pe, Nazaré pygwa va'e. Upe va'e-rehe yma ohai va'ekwe kwatia-rehe Moisés amyrĩ, nhane rekorã omombe'u jave nhande kwéry-pe. Ohai va'ekwe hese myamyrĩ Nhandejáry nhe'ẽ-py omombe'u va'ety kwéry ave, he'i Natanael-pe.

⁴⁶ —“Nazaré pygwa” ere kuri xe-vy, he'i. —Upéa tetã-gwi xe ndaikwaái osẽ porã va'e, he'i Filipe-pe imombe'u-vy.

—Nde katu eju terehexa, he'i Natanael-pe.

⁴⁷ Upéi Hesu ohexa Natanael-pe ogwahē ou-vy ramo henda-py:

—Upéa ko Israel re'ýi tee va'e. Nhane mbotavy e'ý va'e voi, he'i hese.

⁴⁸ Ohendu ramo inhe'ẽ, he'i:

—Mba'éixa po xe kwa? he'i Hesu-pe.

—Eregwapy erei-vy ramo vyteri figo máta gwy-py, orohexa-ma voi. Orohexa-ma voi kuri eregwapy ramo ha upe rire katu ne renói-ma Filipe, he'i Natanael-pe Hesu.

⁴⁹ —Nde katu Nhandejáry ra'y tee voi, porombo'eháry. Myamyrĩ Israel remiarirõ ruvixagwasu ave nde, he'i Hesu-pe.

⁵⁰ Upe-ma ramo Hesu he'i íxupe:

—Ha'e-ma kuri nde-vy, “Eregwapy erei-vy ramo figo máta gwy-py orohexa-ma” ha'e nde-vy. Upe va'e-gwi mante xe rerovia-ma tipo? he'i. —Ha ko'ánga katu tuvixa mba'e va'e erhexa va'erã iporãve va'e ave, he'i Natanael-pe Hesu.

⁵¹ Upéi he'i upe-py oĩ va'e-pe gwive:

—Anhetegwa va'e amombe'u-ta peẽ-my. Pehexa va'erã ojekwaa ramo yváy-py, Nhandejáry rembigwái ojeupi ramo xéhegwí. Ogwejy jevy ou-vy ramo ave xe renda-py pehexa va'erã. Pehexa ramo, pehexa kwa va'erã xe-rehe. “Ha'e ko Nhande Ryke'y tee va'e voi nipo ra'e” peje va'erã xe-rehe, he'i íxupe kwéry Hesu.

2

Omenda-ma omenda va'erã

¹ Mokõi áry rire omenda-ta Hesu re'ýi omenda va'erã. Caná tetã-my omenda-tama. Upe Caná Galiléia yvy pygwa. Upe-py omenda ha-py Hesu sy oĩ ave.

² Onhehenói Hesu oho hagwã gwe'ýi menda hagwã-py:

—Eju katu, he'i. —Ne remimbo'e kwéry ndive eju katu, he'i íxupe.

Upe-ma ramo ohopa hikwái omenda va'erã ha-py.

³ Upéi katu omendaha óra ndoikovéi-ma uva rykwere. Ho'upa-ma ra'e hikwái. Opa ramo, oho Hesu ha-py isy:

—Ndogwerekovéi-ma uva rykwere, he'i omombe'u-vy.

4—Ma'erā tipo eremombe'u xe-vy xe rembiaporā, he'i osy-pe. —Hi'óra-pyma voi xe xe rembiapo-ma va'erā, he'i osy-pe.

5 Upéi he'i hembigwái kwéry-pe isy:

—Peẽ-my he'i va'erā gwive pejapo katu, he'i.

6 Upe-py oĩ seis y ryrugwasu. Ita gwigwa ijapopyre y ryru. Ojoha'e-rami meme. Hynyhē ramo, peteĩ teĩ ogwereco oitenta litro para'e, cem litro para'e ogwereco. Upe y ryru-gwi judeu kwéry reko-rupi ogwenohē va'e y onhemopotī hagwā.

7 Ha upéi katu Hesu he'i íxupe kwéry:

—Pemohynyhē katu upe y ryru y-gwi, he'i hembigwái kwéry-pe.

Omohynyhēmba-ma. Ijuru gwive omoĩ omohynyhē-vy.

8 Upéi he'i íxupe kwéry:

—Äy pejara mixī mixī peraha temi'urā rerojaha-pe otantea hagwā, he'i. Upe-ma ramo ojara ogweraha.

9 Upéi pe huvixa otantea hembierukwe. Y omondo ra'e uva rykwere ramo. Hesu nhe'ẽ-py yojere uva rykwere ramo ra'e. Otantea ramo ohendu:

—Uva rykwere tee va'e, he'i ho'u-vy. —Kigwigwa po ojara ra'e? he'i.

Ndoikwaaí. Ha ijarahare ae oikwaa voi. Upéa-gwi pe huvixa ohenói ou hagwā omenda va'erā-pe. Osapukáí ou hagwā:

—Eju katu a-py, he'i íxupe.

10 Ogwahē ramo, he'i íxupe:

—Nhande kwéry uva rykwere tenonde nhame'ẽ va'e iporāve. Upe rire katu heta ho'u rire nhane remienoigwe, nhame'ẽ jevy va'e naiporāvēi-ma, he'i.

—Ha nde katu nderejapo kwaáiry upéixa. Iporāve va'e eremoĩ ngatu-ma. Ko'ángā ete peve eremoĩ ngatu, he'i omenda va'erā-pe.

11 Upéixa onhepyrū Hesu heroviapyrā-rupi hembiapo porā. Caná, Galiléia tetā-my hembiapo porā. Ohexa uka gwemimbo'e kwéry-pe gwekoha porāha. Ohexa kwaa ramo hese hekoha porā, ojerovia-ma hese hikwái.

12 Upe rire oho Hesu Cafarnaum tetā-my. Omoirū íxupe isy, tyvy kwéry hemimbo'e kwéry ave. Upe-py ndahi'aréiry opyta hikwái.

Hesu oho oike Nhandedjáry róga kakwaa-py

(Mt 21.12-13; Mc 11.15-17; Lc 19.45-46)

13 Ha upéi katu hi'agwī-ma ogwahē hagwā aretegwasu áry héry va'e páscoa. Judeu kwéry remimboete upe arete. Upe-ma ramo Hesu oho Jerusalém tetā-my.*

14 Nhandedjáry róga kakwaa-py oike ramo, otopa heta oma'e vende va'e. Upe-py oĩ vaka vendeha ovexa vendeha pykasu vendeha ave. Upe-py ogwapy oĩ-vy plata kambiaha. Okambiaseha-pe okambia.

15 Upe-ma ramo Hesu omosā ombopi hagwā. Omosēmba Nhandedjáry róga-gwi ovexa reheve. Vaka reheve omosēmba íxupe kwéry imondo-vy. Ombohekovicia va'e apyka ombovayva. Ombojerepa. Iplata oitypa yvy-py. Omosarambipa iplata.

16 Ha pykasu járy-pe katu he'i:

—Penohêm̄ba katu pykasu peraha-vy ko'a-gwi, he'i ijáry-pe. —Ani perekoteĩ xe Ru róga gwy-py pevende va'erā, imondopa hagwā he'i íxupe.

17 Upe va'e ohexa ramo, imandu'a hemimbo'e kwéry Nhandedjáry kwaitia nhe'ẽ-rehe oĩ va'e-rehe:

“Xe rakate'ỹ eterei nde róga-rehe. Upéa-gwi xe juka va'erā”*
he'i Nhandedjáry kwaitia nhe'ẽ Hesu-rehe.

* 2:13 Ex 12.1-27 * 2:17 Sl 69.9

¹⁸ Ha judeu ruvixa kwéry katu ogwahē ou-vy iha-py:

—Kiva'e nhe'ẽ-py erejapo-ma upéa? he'i íxupe. —Ejapo katu tuvixa mba'e oroikwaa hagwā Nhandejáry nhe'ẽ-py para'e erejapo hagwe, ne nhe'ẽ-py para'e, he'i íxupe judeu ruvixa kwéry.

¹⁹ —Néi, ajapo-ta. Pemboai ramo ko óga, mbohapy áry rire amopu'ã jevy arã, he'i judeu ruvixa kwéry-pe.

Ha ndoikwaáiry inhe'ẽ hikwái.

²⁰ —Imopu'ã hagwe Nhandejáry róga kakwaa quarenta e seis ro'y-ma ojapo, he'i íxupe. —Ma'erã ere kuri ore-vy, “Amopu'ã jevy-ta mbohapy áry rire” he'i oporandu-vy íxupe judeu ruvixa kwéry.

²¹ Ha, “ko óga” he'i ramo, nde'íry óga tee-rehe. Gwete-rehe ae he'i Hesu.

²² Upéa ohendu-ma ramo, ndoikwaáiry Hesu nhe'ẽ hemimbo'e kwéry. Ha omano rire onhemoingove jevy ramo katu, imandu'a hemimbo'e kwéry inhe'ẽgwe-rehe. Imandu'a ramo, ogwerovia-ma Nhandejáry kватia nhe'ẽ. Hesu nhe'ẽgwe ogwerovia-ma ave.

Nhande py'apóry oikwaapa Hesu

(Jo 5.41)

²³ Oiko jave aretegwasu héry va'e páscoa, oĩ Hesu Jerusalém-my. Heta hembiapo porã voi heroviapyrã-rupi. Upe-ma ramo Hesu rembiapo ohexama ramo, heta oĩ ojerovia va'e hese:

—Jajerovia-ma hese. Hesu réry-rehe jajerovia-ma, he'i hese hikwái.

²⁴ Ha Hesu katu ndojeroviái vyteri hese kwéry. Ndojerovia teéi vyteri ojeheha-gwi oikwaa voi. Upéa-gwi ndojeroviái vyteri hese kwéry.

²⁵ Nhande kwéry-pe peteĩ teĩ nhande kwaa porã-ma voi. Avave omombe'u e'ŷ reheve íxupe, nhande rekoha ohexa kwaapa-ma voi nhande-rehe. Oikwaapa voi nhande py'a-py oĩ va'e. Nhande py'apóry oikwaapa voi. Ndaipóri íxugwi okanhy va'e.

3

Peteĩ mburuvixa onhomongeta Hesu ndive

¹⁻² Ha upéi katu ogwahē ou-vy Hesu ha-py mburuvixa héry va'e Nicodemos. Pyhare-ma ou. Upe va'e fariseu kwéry va'e. Judeu kwéry ruvixa ave. Ogwahē rire he'i Hesu-pe:

—Avave onhe'ẽ-py rei nahembiapo porãiry ne rembiapoha-rami, porombo'eháry. Nhandejáry nhe'ẽ-py ae hembiapo porã arã ne rembiapo porãha-rami. Úpéa-gwi ne mbou-ma nipo ra'e Nhandejáry ore mbo'e hagwā, he'i Hesu-pe.

³ Upe ramo Hesu he'i íxupe:

—Ejeapysaka porã katu. Anhetegwa va'e amombe'u-ta nde-vy. Ndikatúi avave ojohu Nhandejáry-pe gwuvixarã. Onhembopyahu jevy ramo ae oikwaa va'erã, he'i mburuvixa-pe.

⁴ Ha mburuvixa he'i íxupe:

—Mba'éixa po nhanhembopyahu-ta nhande tuja ramo? he'i. —Ndikatuvéi-ma jaike nhande sy rye py-py jaiko jevy hagwā, he'i íxupe mburuvixa.

⁵ He'i jevy mburuvixa-pe:

—Ejeapysaka porã katu. Anhetegwa va'e amombe'u-ta nde-vy, he'i. —Ojéhegwí rei avave nomoirū mo'ãi Nhandejáry-pe gwuvixarã. Onhemopotí rire, onhembopyahu jevy-ma rire Nhe'ẽ Marangatu tee va'e oiko-magwi ipy'a-py ae, ojohu va'erã íxupe, he'i.

⁶ —Jaiko ramo nhande sy-gwi jaiko rei. Ha nhanhembopyahu jevy ramo katu, Nhe'ẽ Marangatu tee va'e-rupi jaiko va'erã.

⁷ Ha'e kuri nde-vy, "Nhandejáry oipota erenhembopyahu jevy" ha'e nde-vy. Ma'erā po erepondera xe nhe'ē-rehe? he'i.

⁸ —Oho yvytu. Ohose ha-koty rei oho. Nhahendu ou ramo hyapu va'e. Nhahendu ramo jepe, ndajaikwaái joty ki-gwi po ou. Ki-koty po iho hagwā ndajaikwaáry ave. Upéixa ete voi Nhe'ē Marangatu tee va'e-rupi nhan-hembopyahu jevy va'e gwive. Yvytu-rami rei ou Nhe'ē Marangatu tee va'e. Ndajaikwaái ki-gwi po ou. Ki-koty po iho hagwā ndajaikwaái ave, he'i upe mburuvixa-pe.

⁹ —Mba'éixa po oiko upéa? he'i Hesu-pe.

¹⁰ —Nde ko Israel remiarirōre judeu kwéry mbo'eháry voi. Imbo'eháry jepe, ndereikwaái joty voi xe nhe'ē. Ne arandu teī, he'i.

¹¹ —Amombe'u-ta nde-vy anhetegwa va'e. Oroikwaa-gwi oronhe'ē va'e. Oromombe'u va'e ore rembiexagwe. Ha ndaperoviái voi joty ore nhe'ē, he'i íxupe Hesu.

¹² —Ndaxe reroviáiry-ma kuri amombe'u ramo peē-my yvy arigwa rehewa. Aipo ramo, mba'éixa po xe rerovia-ta amombe'u ramo peē-my yváy pygwa rehewa?

¹³ Upéa rehewa avave ndoikwaái yváy-py ndojeupíry-gwi oho-vy. Ha xe ae katu Nhande Ryke'y tee va'e aiko upe-py. Upe-gwi aju kuri. Upéa-gwi xe aikwaa voi upéa rehewa, he'i mburuvixa-pe.

¹⁴ —Amombe'u-ta nde-vy myamyrī Moisés rehewa nhe'ē. Yma va'ekwe Moisés ohupi va'ekwe mbói ra'anga imoī-vy yvate yvyra-rehe. Tekwaty e'ŷ-my oiko jave ohupi va'ekwe. Upéixa voi Nhandejáry nhe'ē-py xe rupi-ta. Xe Nhande Ryke'y tee va'e-pe xe rupi-ta yvyra-rehe.*

¹⁵ Xe moī-ta kurusugwasu-rehe entéro ojerovia va'erā gwive xe-rehe oiko porā meme ete hagwā Nhandejáry ndive. Opa e'ŷ va'erā voi, he'i mburuvixa-pe.

¹⁶ —Nhande kwéry va'e-pe nhande rayhu tee rei-ma va'ekwe Nhandejáry. Upéa-gwi nhande rayhu-gwi, ombou ime'ē-vy va'ekwe nhande-vy gwa'ýry ha'e anho oiko va'e. Upéixa ramo jajerovia va'e gwive hese, nanhane mondóí va'erā mombyry ojéhegwi. Jaiko meme ete va'erā ae Nhandejáry ndive. Japave e'ŷ rehewe jaikove joty va'erā voi.*

¹⁷ Nhande kwéry va'e-pe ombou va'ekwe gwa'ýry. Nomboúi íxupe nhane mbohasa asy hagwā. "Pene rembiapo vai ko" nde'íry nhande-vy ou-vy. Ombou rei ae va'ekwe nhande kwéry va'e-pe. Nhane resendeharā rei ombou va'ekwe.

¹⁸ —Upéixa ramo jajerovia va'e gwive hese nhasē rei-ma nhane monhe'ē e'ŷ rehewe. Ha jajerovia e'ŷ va'e gwive hese katu nhane mbohasa asy hagwā-ma voi. Ndajajeroviái-gwi Nhandejáry ra'y réry anho-rehe, nhane mbohasa asy va'erā.

¹⁹ Ogwahē-ma va'ekwe ou-vy ko yvy ári nhande py'apy-py nhande resapeharā. Ha hembiapo vai va'e gwive katu ndojohu porāi nhande resapeha. Pytū ae ha'e kwéry ojohu porā va'ekwe. Upéa-gwi Nhandejáry, "Ambohasa asy va'erā" he'i imandu'a hese kwéry ombohasa asy hagwā.

²⁰ Ha hembiapo vai va'e gwive ndaija'ái nhande resape va'e-rehe. Ndoipotái ojekwaa hembiapo vaikwe. Upéa-gwi ndohói nhande resape va'e ha-py. Hembiapo vaikwe ojekwaa hagwā-my ndohoséiry voi.

²¹ Ha anhetegwa ojapo va'e gwive hembiapo ojekwaa porā hagwā-my oho va'e. Upe-py oho entéro ohexa porā hagwā hembiapo porākwe. "Nhandejáry reko-rupi hembiapo porā" oipota he'i ójehe, he'i pe mburuvixa-pe Hesu.

* ^{3:14} Nm 21.9 * ^{3:16} Jo 3.36; 6.40; 11.25-26; 20.31; Rm 5.8; 1 Jo 5.11-12

João omombe'u Hesu rehewa, ojehewa omombe'u ave

²² Onhomongeta rire mburuvixa ndive, oho oje'ó-i-vy Hesu hemimbo'e kwéry ndive Judéia yvy-py. Upe-py hendive kwéry opyta oporomongarai uka oiko-vy.

²³ Upe jave João oporomongarai oiko-vy ave. Enom tetã-my Salim ypy-py oporomongarai. Upe-py heta oĩ y. Heta oĩ va'e henda-py oje'ó. Onhemongarai uka-vy oje'ó.

²⁴ Oĩ e'ŷ ngatu preso omongarai joty entero va'e-pe.

²⁵ Ha upéi katu onhonhe'ẽ mbojevy jevy-ma João remimbo'e kwéry judeu kwéry va'e ndive:

—Nhanhemongarai hagwã a-rami tekoha, he'i.

—Ndaha'ei. Ndaikoséi nde reko-rupi. A-rami ae aikose, he'i outro.

Nohenduséi onhonhe'ẽ.

²⁶ Upe-ma ramo oje'oipa João renda-py:

—Naiporãi voi, porombo'eháry, he'i João-pe hikwái. —Oĩ va'ekwe kwimba'e ne ndive Jordão ysyry rovái. Hesegwa eremombe'u va'ekwe. Ha ko'ângá katu ogwahé ko'a-py upe va'e. Oporomongarai ko oiko-vy ko'a-py ave. Enterove ete oho henda-py, he'i íxupe hikwái.

²⁷ Ha João he'i:

—Nhande-vy Nhandedáry remime'êgwe mante jareko, he'i.

²⁸ —Ha'e kuri hese: “Xe ko ndaha'ei Cristo héry va'e. Pene remira'arõ e'ŷ xe. Cristo renonde-rupi mante xe mbou-ma” ha'e hese. Pehendu-ma voi xe nhe'ẽ anhemombe'u ramo, he'i.

²⁹ Upéi omombe'u íxupe kwéry peteñ nhe'ẽ.

—Kunha-rehe nhamenda-tama ramo, nhane rembirekorã voi pe kunha. Ndaha'ei nhane irũ rembirekorã. Ha nhane irũ katu, nomendáí ramo jepe, ov'y'a joty. Nhande ayvu ohendu ramo, ogwerohory joty nhande ayvu. Upéixa ete xe avy'a Hesu-rehe. Heta ojehesa rerova kuri hese oiko-vy. Ha xe irũ katu ndahetáí. Ndahetáí ramo jepe, xe avy'a joty Hesu-rehe. Xe avy'a eterei ko'ângá, he'i ójehe.

³⁰ —Nhandedáry nhe'ẽ-py ha'e onhembotuvixave xave oho-vy va'erã. Ha xe katu aiko kiriríve ríve aiko-vy va'erã, he'i ójehe João.

Yváy-gwi ogwejy va'ekwe

³¹ Yváy-gwi ogwejy va'ekwe entero va'e-gwi heko porâve va'e. Ha yvy pygwa katu oiko rei yvy ári ojehegwigwa mante omombe'u. Ha yváy gwigwa ou va'ekwe katu enterove va'e-gwi hekoha porâve va'e.

³² Ha'e omombe'u gwembiebagwe ha gwemiendukwe mate. Ha avave joty ndogweroviáí joty íxupe.

³³ Inhe'ẽ ogwerovia va'e ae: “Nhandedáry ijapu e'ŷ va'e. Anhetegwa voíte omombe'u va'e ae” he'i ete hese.

³⁴ Ha'e ko Nhandedáry remimbou va'e. Nhandedáry nhe'ẽ tee omombe'u va'e voi. Ha Nhandedáry katu nahakate'ŷiry ime'ẽ-vy íxupe Nhe'ẽ Marangatu tee va'e. Ome'ẽ me'ẽ rei íxupe. Upéa-gwi ha'e Nhandedáry nhe'ẽ tee omombe'u va'e voi.

³⁵ Ha Nhandedáry katu Nhandedáry Ru va'e ohayhu va'e gwa'ýry. Enterove va'e járy-ma voi oiko ta'ýry.

³⁶ Jajerovia ramo Nhandedáry ra'y-rehe, jaiko-ma opa e'ŷ reheve va'erã Nhandedáry ndive. Ha nhahendu e'ŷ ramo katu inhe'ẽ, ndajaiko mo'âvái-ma va'erã Nhandedáry ndive. Ha'e nhandedáry rereko asy va'erã.

4

Hesu onhomongeta kunha Samaria pygwa ndive

1-3 Upe ramo omombe'u fariseu kwéry-pe:

—Are-ma omoirū heta João-pe. Ha ko'ánga katu hetave Hesu-rehe ojehesa rerovapa. Hesu-pe háma omoirū heta. Omongarai-ma íxupe kwéry Hesu gwemimbo'erā, he'i omombe'u-vy.

Upéa oikwaa-ma ramo, osẽ oho-vy Hesu Judéia yvy-gwi. Oho jevy Galiléia yvy-koty. Ha Hesu katu oporomongarai e'ŷ va'e. Hemimbo'e kwéry mante ae oporomongarai va'e.

4 Ha upéi katu ohasa oho-vy Samaria yvy-rupi. Upe-rupi ndoho reíry.

5 Upéixa ramo ogwahē oho-vy Samaria pygwa tetā héry va'e Sicar-py. Ha Sicar katu hi'agwī oĩ myamyrī Jacó yvykwe-gwi pe ome'ẽ gwa'ýry José-pe va'ekwe-gwi.*

6 Upe-py oĩ Jacó ygwa. Ha upéi katu Hesu ogwahē rire ogwapy ygwa ypy-py. Ogwata puku ou-vy rire ikane'o. Upéa-gwi okane'o ramo ogwapy otongea-vy. Larose-ma ramo ogwapy oĩ-vy onhemokane'ōgwa hagwā.

7 Upe-ma ramo ogwahē ou-vy kunha Samaria pygwa va'e. Ogwenohē hagwā y ou. He'i íxupe Hesu:

—Hay'u-ta, he'i.

8 Ha ndaipóri inhirū. Hemimbo'e kwéry oje'ói kuri tetā-my oho ojogwa hagwā gwemi'urā kwéry.

9 Ha upéi he'i íxupe pe kunha:

—Nde ko judeu kwéry va'e. Xe katu Samaria pygwa va'e. Pende a'e'ŷha ore, he'i. —Aipo ramo ma'erā po erejerure xe-vy y-rehe. Judeu kwéry katu ndore rerohorýi va'e. Ndoiporúi ore mba'e, he'i íxupe.

10 Upéi Hesu he'i pe kunha-pe:

—Ndereikwaái voi Nhandejáry remime'érā. “Hay'u-ta” ha'e ramo nde-vy, ndaxe kwaái ave. Ha xe kwaá rire ra'e, erejerure arā xe-vy ra'e. Ame'ẽ arā nde-vy ra'e y. Yvu ramigwa va'e ame'ẽ arā nde-vy nde rekoverā, he'i kunha-pe.

11 Upéi he'i íxupe pe kunha:

—Hypy voi ygwa, porombo'eháry, he'i. —Ndererekói henohéha. Mamo-gwi nipo erenohé-ta y yvu ramigwa va'e, he'i íxupe kunha.

12 —Ore ramói ypykwe Jacó ome'ẽ va'ekwe ore-vy upéa ygwa. Hoy'u ave íxugwi. Ta'ýry hoy'u ave íxugwi va'ekwe. Omboy'u ave íxugwi va'ekwe gwymba, he'i. —Ha nde nerenhembotuvixa mba'éi tipo íxupe? he'i íxupe kunha.

13 Upéi he'i kunha-pe:

—Ko va'e y ja'u ramo, jay'u jevy jevy va'erā, nhande y'uhéi jevy va'erā.

14 Ha xe remime'érā ere'u ramo, nande y'uhéi mo'ávéri-ma va'erā, he'i. —Xe mba'e y ame'ẽ va'erā nde-vy nde py'a-py ndopái va'erā. Yvu-rami opupu va'erā. Yvu-rami oĩ va'erā nde py'a-py nde rekoverā. Ndopái-gwi ereiko va'erā opa e'ŷ reheve Nhandejáry ndive, he'i kunha-pe.

15 Upe-ma ramo he'i íxupe kunha:

—Eme'ẽ mani katu xe-vy, porombo'eháry, aipo ererekó va'e y. Ndaxe y'uhevéi-ma va'erā. Ndajuvéi-ma va'erā y-rehe ko'a-py, he'i íxupe.

16 Upéi he'i kunha-pe:

—Ekwa emombe'u ne ména-pe ou ave hagwā a-py. Upe rire peju katu ko'a-py, he'i.

Ha kunha he'i íxupe:

* **4:5** Gn 33.19; Js 24.32

17 —Naxe ménai voi, he'i.

Ha Hesu he'i íxupe:

—“Naxe ménai” ere-ma ramo, anhetegwa voi eremombe'u xe-vy.

18 Eremenda menda voi ereiko-vy va'ekwe. Cinco voi oiko ne menakwe. Indive ãy ereiko va'e ndaha'ei ne ména tee. “Naxe ménai” ere ramo, anhetegwa voi eremombe'u xe-vy, he'i kunha-pe Hesu.

19 Ohendu ramo inhe'ẽ: “Xe kwaa-ma ra'e” he'i ójehe.

Upéa-gwi he'i íxupe kunha:

—Nde ko, porombo'eháry, Nhandejáry nhe'ẽ-py eremombe'u va'ety nipo ra'e. Ahexa kwaa-ma nde-rehe, he'i oikwaa-gwi íxupe Hesu.

20 —Upe va'e yvyaty ári ojeupi meme va'ekwe ore ramói kwéry. Nhandejáry nhamboete haty-py oho meme. Ha peẽ, judeu kwéry va'e katu ndapejohu porãi upe-py oroho ramo. Jerusalém tetã-my mante oipota jaha Nhandejáry mboete-vy. “Upe-py ae tekoha” he'i judeu kwéry, he'i kunha omombe'u-vy.

21 Upéi he'i kunha-pe:

—Xe rerovia katu, kunha. Ogwahẽ-tama Nhandejáry óra, nhamboete tee hagwã íxupe óra. Ogwahẽ-ma rire, upe yvyaty ári napemboete mo'ãvéi-ma Nhandejáry Nhande Ru-pe. Napemboete mo'ãvéi-ma ave íxupe Jerusalém-my, upe oromboete haty-py.

22 Ha pende kwéry niko peikwaa e'ŷ va'e pemboete va'e. Ha ore kwéry katu oroikwaa va'e oromboete voi. Nhane resendeharã ko judeu kwéry va'e. Upéa-gwi oromboete va'e oroikwaa voi.

23 Ogwahẽ-ta hi'óra, he'i. —Ãy ogwahẽ pota-ma voi hi'óra. Ko'ângá katu Nhandejáry-pe omboete tee va'e gwive, omboete va'erã íxupe opy'a gwive. Nomboete ra'anga anga rei mo'ãvéi-ma íxupe. Upéa rehewa omboete tee harã Nhandejáry oipota, he'i.

24 —Ha Nhandejáry katu hete e'ŷ va'e jahexa e'ŷ va'e ha'e. Upéa-gwi jahexa e'ŷ ramo jepe, tanhamboete tee joty íxupe nhande py'a gwive. Ndikatuvéi-ma nhamboete ra'anga anga rei íxupe, he'i kunha-pe.

25 Upe ramo he'i íxupe kunha:

—Nhane remiha'arõ ko ou va'erã, he'i.

Nhane remiha'arõ va'e héry va'e Cristo.

Upéi he'i:

—Ogwahẽ rire ou-vy, opamba'e jaikwaa e'ŷ va'e gwive oikwaa uka va'erã nhande-vy, he'i íxupe.

26 —Xe voi niko ha'e. Xe Cristo-ma voi. Xe ne ndive anhomongeta va'e ha'e-ma voi, he'i kunha-pe Hesu.

27 Upéa he'i-ma ramo, ogwahẽ ou-vy hemimbo'e kwéry. Opondera hese:

—Mbava'e-gwi po onhomongeta kunha ndive oĩ-vy, he'i ojéupe.

Ha Hesu-pe katu nomongetáiry: “Mbava'e tipo ereipota?” nde'íry. “Ma'erã tipo erenhomongeta kunha ndive ereí-vy?” nde'íry íxupe. Opondera rei hese. Noporandúiry.

28 Upe ramo pe kunha oheja omba'e y ryru oho jevy pe tetã-my:

29 —Pekwa mani. Oĩ kwimba'e opamba'e xe rembiapokwe gwive omombe'u-ma va'e xe-vy. Peju katu jaha pehexa hagwã íxupe. Nhane remiha'arõ va'e para'e ha'e, he'i omombe'u-vy pe tetã mygwa-pe.

30 Osẽmba-ma upe tetã-gwi hikwái. Oime ou-ma hikwái. Hesu renda-koty ogwa'ẽ. Ne'írã vyteri ogwahẽ Hesu-pe.

31 Upe-ma ramo ou jave hikwái:

—Ekaru mani, ekaru mani, porombo'eháry, he'i íxupe hikwái.
Ojapura okaru hagwã mo'ã.

³² —Nda'u mo'āi, he'i. —Xe areko ha'u va'erā peikwaa e'ŷ va'e, he'i gwemimbo'e kwéry-pe.

³³ Upe-ma ramo he'i ojóupe hikwái:

—Ndogwerúi tipo avave Hesu-pe hemi'urā ra'e? he'i ojóupe.

³⁴ Upéi he'i gwemimbo'e kwéry-pe:

—Xe ajapo meme xe mbouhare remimbota ajapopa peve xe rembiaporā. Peē pejapura pene remi'urā-rehe. Ha xe ajapurave xe rembiaporā-rehe. Upéa ajapo ramo, ndakarúi ramo jepé, xe rygwyatā vérámi joty voi. Akaru-ma va'e-rami xe, he'i ójehe.

³⁵ Upéi he'i jevy gwemimbo'e kwéry-pe:

—“Irundy jasy rire ijagwyje-ma” ja'e va'e voi. Ha xe katu ha'e-ma peẽ-my. Pema'ē katu pehexa hagwā. Hi'aju-ma nipo ra'e temitŷgwe, he'i Hesu gweroviaharā-rehe temitŷgwe rehewa-rami.

Upéi he'i:

³⁶⁻³⁷ —Peteĩ onhemity va'e, outro kwéry oikytī va'e. Pe temitŷ omosarambi va'e-rami, peteĩ omombe'u mbe'u Nhandejáry nhe'ē. Pe oikytī va'e-rami, outro kwéry oporogwerovia uka va'e. Ko'ánga oĩ inhe'ē rerovia ukaha oikove opa e'ŷ reheve hagwā Nhandejáry ndive heroviaha. Hembiapo porā-rehe ohekoviariõ va'erā íxupe Nhandejáry. Peteĩ onhemity, outro kwéry oikytī. Ovy'a onhondive hikwái. Peteixa hembiapo. Upéixa ete inhe'ē mombe'uhaty inhe'ē rerovia ukaha ndive ov'y'a. Peteixa hembiapo.

³⁸ Oromondo kuri peporogwerovia uka hagwā pemombe'u ranhe e'ŷ re-heve. Outro kwéry oho pene renonde va'ekwe omombe'u hagwā Nhandejáry nhe'ē. Ha ko'ánga katu outro kwéry rembiapo porā porā-gwi, peporogwerovia uka-ma, he'i gwemimbo'e kwéry-pe Hesu.

³⁹ Ha heta oĩ Samaria pygwa va'e ojerovia va'e Hesu-rehe. Pe kunha, “Entéro xe rembiapokwe gwive omombe'u-ma kuri xe-vy” he'i ramo tetã mygwa-pe omombe'u-vy, ojerovia-ma hese hikwái.

⁴⁰ Ha upéi katu ogwahē ou-vy Hesu renda-py hikwái:

—Epyta katu ore ndive, epyta katu ore ndive, he'i íxupe.

Upéa-gwi mokõi áry optya hendive kwéry.

⁴¹ Inhe'ē ohendu ramo hetave-ma ogwerovia va'e oĩ.

⁴² He'i kunha-pe hikwái:

—Eremombe'u ramo kuri ore-vy orogwerovia-ma íxupe. Ha ko'ánga katu ore-vy tee-ma onhe'ē. Ore apysa-rupima orohendu inhe'ē. Upéa-gwi orogwerovia tee-ma voi íxupe, he'i. —Upe va'e entéro ko yvy ári oiko va'e gwive resendeharā nipo ra'e, he'i hese kunha-pe hikwái.

Hesu ombogwera mburuvixa ra'y-pe

⁴³ Mokõi áry rire upé-gwi oho jevy-ma Hesu. Ogwahē oho-vy Galiléia yvy-py:

⁴⁴ —Nhandejáry nhe'ē-py omombe'u va'ety ko nomboetéi íxupe hetã mygwa, he'i Hesu.

⁴⁵ Ha upéi katu ogwahē rire Galiléia yvy-py, ogwerohory íxupe upé pygwa kwéry. Oje'ói va'ekwe upé pygwa Jerusalém-my. Oiko jave aretegwusu héry va'e páscoa, upé-py ohopa. Upé-py ohexa va'ekwe entéro Hesu rembiapo porāgwe. Upéa-gwi ogwerohory voi íxupe hikwái.

⁴⁶ Ha upéi katu Hesu ogwahē jevy oho-vy Caná tetã-my, Galiléia yvy pygwa-py ogwahē oho-vy. Upé-py ykwe omundo va'ekwe uva rykwere ramo. Ha outro tetã-my héry va'e Cafarnaum mburuvixa ramo oĩ va'e upé-py. Hasy voi ta'ýry.*

* ^{4:46} Jo 2.1-11

47 —Ou-ma kuri Hesu Judéia yvy-gwi. O gwahē-ma ko'a-py, he'i-ma ramo mburuvixa-pe, oho ogwahē Hesu renda-py.
He'i Hesu-pe:

—Jaha mani katu embogwera xe-vy xe ra'y-pe, he'i íxupe. —Omano hagwā rami-ma oī. Embogwera mani íxupe, he'i íxupe mburuvixa.

48 Upe-ma ramo he'i íxupe Hesu:

—Ndaxe rerovia mo'āi nde xe rembiapo erhexa e'ŷ rehewe. Heroviapyrā-rupi xe rembiapo ramo, jahexa e'ŷ va'e ajapo ramo ae, xe rerovia va'erā, he'i mburuvixa-pe.

49 Upe-ma ramo he'i íxupe mburuvixa:

—Eju mani, porombo'eháry. Ani ne ate'ŷ teĩ ereju hagwā pono omano xe ra'y, he'i íxupe.

50 —Tereho katu. Oikove jevy-ma nde ra'y, he'i mburuvixa-pe.

Ogwerovia-ma inhe'ẽ oho-ma.

51 Oho javé, ohogwaití íxupe hembigwái ou-vy:

—Oikove jevy-ma nde ra'y, he'i íxupe omombe'u.

52 Upéi oporandu hembigwái-pe:

—Mbovy óra-py oikove jevy-ma xe ra'y? he'i oporandu-vy gwembigwái-pe.

—Kwehe larose rire nahete rakuvéi-ma, he'i túvy-pe hembigwái.

53 “Upéa óra-py ete voi Hesu omombe'u kuri xe-vy nipo ra'e, Oikove jevy-ma nde ra'y, he'i voi xe-vy” he'i ojéupe. Upe-ma ramo ojerovia tee voi hese. Hóga pygwa gwive ave ojerovia tee ave hese.

54 Upéixa imokōiha-rehe hembiapo porā heroviapyrā-rupi ogwahē rire Galiléia-py Judéia yvy-gwi.

5

Hesu ombogwera hasy va'e-pe ygwa ypy-py

1 Ha upe rire hi'agwī-ma ogwahē hagwā Judeu kwéry-pe arete áry hagwā. Upéa-rehe oho Hesu Jerusalém tetā-my.

2 Upe-py oī ygwa héry va'e Betesda hebreu nhe'ẽ-my. Ovexa rokē ypy-py oī. Ygwa ypy-py oī cinco ogapy onhemboty e'ŷ va'e.

3 Upe-py heta eterei oī hasy va'e. Onheno joa okwa-vy. Heta oī hesapyo e'ŷ va'e, heta oī ndogwata porāi va'e. Heta oī ijapa va'e ave.

4 Ha Nhandejáry rembigwái yváy-py oiko va'e ogwejy ou-vy va'e. Ndogwejy meméiry. Hi'óra-py ae ogwejy ou-vy y-py. Omomýi hagwā mante y ou ogwejy. Omýi rire y, ha'e ranhe oike va'e y-py, okwera-ma. Oime raẽ va'e mba'asy opoi-ma íxugwi. Upéa oha'arõ oī-vy entéró hasy va'e gwive.

5 Upe-py oī kwimba'e. Are-ma hasy. Ojapo trinta e oito ándo hasy hagwe.

6 Ha upéi katu ohexá íxupe Hesu. Ohexá kwaa hese are hasyha. “Are-ma onheno-vy rei oiko upé-py” he'i ojéupe. Upe-ma ramo ha'e he'i:

—Erekwerase tipo? he'i hasy va'e-pe oporandu-vy.

7 —Ndaipóri omýi javé xe moi va'erā y-py. Aikese mo'ā y-py, porombo'eháry. Ndaikatúi aike y-py. Oike xe renonde-rupi voive va'e, he'i Hesu-pe hasy va'e.

Upe-ma ramo he'i íxupe:

8 —Epu'ã katu, ehupi nde rupa. Upéi egwata, he'i íxupe Hesu.

9 Upe-ma ramo okwera-ma Hesu nhe'ẽ-py. Ohupi gwupa ogwata-ma voi. Japytu'uga áry-py okwera.

10 Upéa-gwi omombe'u mbe'u okwera va'ekwe-pe judeu ruvixa kwéry:

—Etería ko japytu'uga áry. Nde rupa ereraha ramo, eremba'apo voi. Ha naiporāi eremba'apo pytu'uga áry-py, he'i omombe'u-vy hasy va'ekwe-pe.

11 Upéi he'i judeu ruvixa kwéry-pe:

—He'i kuri xe-vy, “Ehupi nde rupa egwata katu” he'i xe-vy xe mbogwera-hare, he'i omombe'u-vy.

¹²—Kiva'e tipo, “Ehupi nde rupa egwata katu” he'i nde-vy, he'i oporandu-vy íxupe hikwái.

¹³ Ha okwera va'ekwe katu ndoikwaáiry ombogwerahare réry. Upe-py oĩ heta ojogweroaty va'e. Ha Hesu katu ndojehexa ukavéi-ma oho-vy.

¹⁴ Ha upe rire katu Hesu otopa okwera va'ekwe-pe. Nhandejáry róga kakawaa-py otopa íxupe:

—Nde ko erekwera-ma. Anive erejejavy teĩ pono ojehu jevy nde-vy ivaive va'e, he'i íxupe Hesu.

¹⁵ Upe ramo oho jevy omombe'u judeu ruvixa kwéry-pe:

—Hesu ko xe mbogwerahare ra'e, he'i omombe'u-vy.

¹⁶ Upéa-gwi ojukase voi Hesu-pe judeu ruvixa kwéry:

—Hesu ko omba'apo va'e japytu'uga áry-py, he'i ojóupe hese hikwái.

¹⁷ Upéi he'i íxupe kwéry Hesu:

—Ko'ánga ete peve xe Ru ndopytu'úi omba'apo-vy. Omba'apo meme ha'e oiko-vy. Ha'e-rami xe amba'apo ave aiko-vy, he'i ójehe Hesu.

¹⁸ Upéa ohendu ramo, ojukaseve voi íxupe hikwái. He'i ojóupe:

—Upe va'e ojapo meme va'e jajapo e'ý va'e japytu'uga áry-py, he'i hese.

—Ha ko'ánga katu, “xe Ru tee” he'i Nhandejáry-rehe. “Nhandejáry ko xe-rami” he'i. “Xe tuvixa mba'e Nhandejáry-rami” he'i Hesu ójehe. Upe va'e onhemonhandejáry ra'anga anga rei oiko-vy, he'i mo'ã Hesu-rehe onhombo'e mbo'e-vy judeu ruvixa kwéry.

Upéa-gwi ojukase voi Hesu-pe hikwái.

Nhandejáry nhe'ẽ-py Hesu omonhe'ẽ ranhe enterove va'e-pe

¹⁹ Upéi he'i jevy judeu ruvixa kwéry-pe Hesu:

—Anhetegwa voi amombe'u-ta peẽ-my. Xe ko Nhandejáry ra'y tee ramo jepe, xejéhegwi rei mba'eve ndajapói. Xe Ru xe-vy ohexa uka va'e gwive ae ajapo. Xe Ru rembiapo gwive katu ajapo ave xe. Xe Ru-rami ave ajapo, he'i.

²⁰—Xe ko xe Ru rembiayhu va'e. Entéro hembiapo gwive ohexa uka va'e xe-vy. Ha tuvixave va'e katu ohexa uka va'erã xe-vy pepondera va'erã hese.

²¹ Xe Ru ko ombotekove jevy va'e omano va'ekwe omoingove jevy íxupe. Ha'e-rami voi xe amoingove va'e amoingove va'erã-pe gwive.

²² Ha xe Ru nomonhe'ẽi va'e avave-pe. He'i va'ekwe xe-vy xe Ru xe amonhe'ẽ ranhe hagwã enterove va'e-pe hembiapo apokwe-rami ajapo hagwã hese.

²³ He'i va'ekwe xe-vy xe Ru aporomonhe'ẽ hagwã entéro xe mboete hagwã omboeteha-rami xe Ru-pe. Avave xe mboete e'ý ramo, nomboetéi ave xe mbouhare-pe. Xe Ru-pe nomboetéi.

²⁴—Anhetegwa va'e amombe'u-ta nde-vy. Peteĩ teĩ xe nhe'ẽ rendu va'e, xe mbouhare-pe ogwerovia va'e gwive, oikove-ma va'erã opa e'ý reheve Nhandejáry ndive. Ha'e nomondovéi-ma va'erã íxupe ojéhegwi ohasa asy hagwã. Oiko-ma va'erã opa e'ý reheve Nhandejáry ndive, he'i judeu ruvixa kwéry-pe Hesu.

²⁵ Upéi he'i jevy omombe'u-vy:

—Anhetegwa va'e amombe'u-ta peẽ-my. Ogwahé-tama omano va'ekweha áry, he'i. —Ay ogwahé-ma voi. Ohendu-ta xe nhe'ẽ omano va'ekwe. Xe ko Nhandejáry ra'y tee voi. Xe nhe'ẽ rendu va'e oikove jevy-ta.

²⁶ Ojéhegwi rei voínte oiko xe Ru. Upéixa ete ome'ẽ xe-vy xejéhegwi reínte aiko hagwã ave.

²⁷ Xe ko Nhande Ryke'y tee va'e voi. Upéa-gwi Nhandejáry nhe'ẽ-py amonhe'ẽ ranhe va'erã enterovéa-pe ajapo hagwã hese hembiapo apokwera-mi.

²⁸ —Ani pepondera teĩ xe nhe'ẽ-rehe. Ogwahẽ va'erã omano va'ekweha áry. Ohendu va'erã xe nhe'ẽ entéro ijyta-py oĩ va'e gwive.

²⁹ Osẽ va'erã ojejaty hagwe-gwi gwĩ hembiapo porã va'ekwe. Oikove jevy va'erã oiko meme hagwã Nhandejáry ndive. Ha gwĩ hembiapo vai va'ekwe oikove jevy va'erã amondo mombyry hagwã xejéhegwi, he'i omombe'u-vy judeu ruvixa kwéry-pe Hesu.

“Oĩ xe mombe'u va'e” he'i ójehe Hesu

³⁰ Upéi he'i jevy omombe'u-vy Hesu:

—Xejéhegwinte mba'eve ndajapói. Nhandejáry remimombe'u xe-vy va'e ae xe ajapo. Xe ajapose va'e mante ndajapói ave. Xe mbouhare remimbota ae ajapose meme voi. Upéa-gwi “Ko va'e heko porã va'e. Upe va'e heko vai va'e” xe ha'e ramo, anhetegwa amombe'u va'e voi.

³¹ —Xe amombe'u ramo xejehegwigwa mante: “Ijapu-ma” peje arã xe-rehe.*

³² Oĩ outro xe rekoha omombe'u va'e. Hemimombe'u va'e xe-rehe anhetegwa voi. Xe aikwaa ijanu e'ŷha.

³³ Ha pene remimondokwe oho kuri João renda-py. Oporandu ramo xe-rehe, ha'e omombe'u-ma íxupe kwéry anhetegwa va'e.

³⁴ Teko rei remimombe'u xéjehe napenáiry. Xe mombe'u joty Nhandejáry. Ha amombe'u peẽ-my xe-rehe teko rei he'i va'e, xe rerovia hagwã, pene resende hagwã Nhandejáry.

³⁵ —Ha João katu omombe'u porã va'ekwe xe rehewa. Sapy'a perohory inhe'ẽ va'ekwe. Nhande resape sapy'aha-rami omombe'u. Ha tataendy hendy porã nhande resape-vy. Nhande resape javy'a voi. Upéixa ete voi sapy'a perohory inhe'ẽ.

³⁶ Xe mombe'u porã va'ekwe João. Ha ko'ângá katu xe rembiapo porã porã rexá-vy, pehexa kwaa-ma va'erã xe-rehe xe rekoha. Ome'ẽ va'ekwe xe-vy xe Ru xe rembiaporã. Upe va'e xe ajapo voi. Ereikwaa porã ramo xe rembiapo, ere arã xe-rehe, “Upe va'e Nhandejáry Nhande Ru va'e remimbou voi nipo nhande-vy ra'e” ere arã xe-rehe.

³⁷ Ha xe mbouhare katu ha'e nga'u xe mombe'u-ma va'ekwe. Ha peẽ katu napehendúi va'e onhe'ẽ javé.

³⁸ Mba'eixagwa po Nhandejáry ndapehexái va'e. Nhandejáry remimbou ndaperoviái va'e. Upéa-gwi ndopytái voi pende py'a-py inhe'ẽ.

³⁹ Peje ojóupe, “Jaikwaa porã ramo Nhandejáry kwtia nhe'ẽ, jaikwaa va'erã mba'éixa po jaiko opa e'ŷ rehewe va'erã Nhandejáry ndive” peje pendéjehe. Upéa-gwi pemonhe'ẽ nhe'ẽ mo'ã peiko-vy Nhandejáry kwtia nhe'ẽ. Ha ndapeikwaa voi he'ise va'e. Upe va'e nhe'ẽ pemonhe'ẽ nhe'ẽ va'e xe mombe'u voi.

⁴⁰ Xe mombe'u ramo jepe inhe'ẽ, peẽ naxe moirûséiry joty peikove meme hagwã Nhandejáry ndive.

⁴¹ —Naxe mboetéi ramo teko rei, apyta akirirí joty. Napenáí joty hese. Xe Ru ae katu xe mboete va'e.

⁴² Ha peẽ katu peipota va'e pende rapixa ne mboete. Pende py'apy-py ndapehayhúi va'e Nhandejáry-pe. Aikwaa voi xe upé va'e.

⁴³ Nhandejáry nhe'ẽ-py aju amombe'u-vy va'ekwe ha naxe rerovy'áiry joty-ma peẽ. Ha xe e'ŷ va'e katu onhe'ẽ-py rei ou ramo jepe, upé va'e perovy'a joty arã.

* ^{5:31} Jo 8.14-18

⁴⁴ Peipota pende rapixa pene mboete. Ha Nhandejáry ha'e anho va'e katu napenhemboete ukáiry voi íxupe. Napepenái hese. Upéa-gwi ndikatúi xe rerovia.

⁴⁵ Ani “Hesu ko omombe'u va'erã Nhandejáry-pe nhande rekoha vai” ani peje teĩ pendejéupe. Myamyrí Moisés remimombe'ukwe-gwi ae ojekwaa-ma va'erã pende-rehe pende rekoha. “Nhande kwéry Moisés nhe'ëgwe renduha va'e voi. Upéa-gwi nanhane mboykéi va'erã ojéhegwí Nhandejáry” peje mo'ã pendéjehe. Ha Moisés nhe'ëgwe naphehenduséi-gwi ae, ojekwaa-ma va'erã pende-rehe pende reko vaiha.

⁴⁶ Moisés omoõ va'ekwe kwaitia-rehe xe rehewarã. Upéa-gwi perovia ramo íxupe ra'e, xe rerovia arã ra'e ave.

⁴⁷ Ha mba'éixa po xe rerovia-ta? Naperoviavéi-ma kwaitia-rehe omoõ va'ekwe. Upéixa ramo mba'éixa po xe rerovia-ta? he'i judeu ruvixa kwéry-pe Hesu.

6

Hesu omongaru cinco mil kwimba'e-pe

(Mt 14.13-21; Mc 6.30-44; Lc 9.10-17)

¹ Ha upe rire Hesu ohasa oho-vy yugwarusu rová. Upe yugwarusu mokõi héry va'e. Héry Galiléia yugwa. Héry va'e ave Tiberíades yugwa.

² Ha upéi katu heta eterei oĩ kente kwéry. Ohexa okwa-vy Hesu-pe omogwera gwera ramo hasy va'e-pe. Jahexa e'ý va'e hexapyrã-rupi ojapo ramo, ohexa. Upéa-gwi oho Hesu piári hikwái.

³ Upe ramo ha'e ojeupi oho-vy yvyaty-rehe. Upe-py ogwapy-ma oĩ-vy gwemimbo'e kwéry ndive.

⁴ Oiko-tama judeu kwéry aretegwasu va'e áry héry va'e páscua.

⁵ Ha upéi katu ha'e oma'ẽ ohexa heta eterei kente ogwa'ẽ ou-vy ramo henda-py ohexa. Upe-ma ramo he'i Filipe-pe:

—Mba'e-rami po jajogwa-ta hemi'urã ho'u va'erã mbojape? he'i oporandu Filipe-pe.

⁶ Upéa he'i oikwaa hagwã Filipe nhe'ẽ. Ha'e katu oikwaa-ma voi mbava'e tipo ojapo-ta.

⁷ He'i íxupe Filipe:

—Jajogwa ramo seis jasy ombo'apo va'ekwe repy-rehe mbojape hemi'urã kwéry, nome'ẽi arã peteĩ teĩ ho'u mixími hagwã, he'i íxupe kente kwéry-rehe.

⁸ Upe-ma ramo he'i íxupe hemimbo'e Simão Pedro ryke'y, héry va'e André:

⁹ —Ko va'e karia'y ogwereco cinco mbojape cevada-gwi ojejapo va'ekwe. Mokõi pira ka'ẽ ogwereco ave. Ha upe va'e ndaha'ẽ heta kente remi'urã, he'i íxupe André.

¹⁰ —Pembogwapy katu íxupe kwéry yvy-rupi, he'i gwemimbo'e-pe. Upe-py heta oĩ kapi'ipety. Ha upéi katu ogwapy-ma hikwái kapi'ipety-py. Cinco mil kwimba'e nunga-rupi ogwapy hikwái. Ndoipapái mitã-pe kunha-pe ave.

¹¹ Upéi ha'e oipyhy mbojape, otima porã Nhandejáry-pe ome'ẽ me'ẽ ogwapy va'e kwéry-pe. Pira ome'ẽ ave ho'useha-rami.

¹² Okaru porã hikwái, hygwyatãmba-ma hikwái. Okaru porã rire, he'i gwemimbo'e kwéry-pe:

—Pemono'õ no'õ pembohyru tembi'u rembyre pono onhehundi rei ho'a va'ekwe gwive, he'i gwemimbo'e kwéry-pe.

¹³ Upe-ma ramo omono'õmba cinco mbojape rembyre. Okaru va'e ho'u porã rire oheja ra'e. Upéa omono'õ no'õ omohynyhẽ nyhẽ doze ajaka jevy hembyre kwéry.

¹⁴ Upéi hexapyrã-rupi Hesu rembiapo porã ohexa ramo, he'i ojóupe hikwái:
—Upe va'e ko Nhandejáry nhe'ẽ-py omombe'u va'ety ojekwaa va'erã voi
va'ekwe ko yvy ári, he'i ojóupe Hesu-rehe upe pygwa kwéry.

¹⁵ Upe-ma ramo he'i opy'a-py Hesu: "A pygwa voi ou-tama xe jopyse mo'ã
xe pyhy-vy xe moingo hagwâ huvixagwasu ramo" he'i ójehe. Upéa oikwaa
ramo okanhy jevy ha'e anho vvyyaty-rehe oho-vy.

Y ári ogwata Hesu
(Mt 14.22-33; Mc 6.45-52)

¹⁶ Ka'aru ete-ma. Ha hemimbo'e kwéry katu ogwejy oho-vy yugwarusu
rembe-py.

¹⁷ Upéi onhemboyrú kanóa-py. Oho y-rupi hikwái. Cafarnaum tetã-ngoty
oho. Pytû-ma voi ha Hesu katu ne'írã vyteri ogwahê ou-vy gwemimbo'e
kwéry renda-py.

¹⁸ Vvytu eterei-ma ramo opu'ã y.

¹⁹ Oipykúi oho-vy cinco quilômetro para'e, seis quilômetro para'e. Ne'írã
ogwahê ogwahêse ha-py. Upe-ma ramo ohexa Hesu-pe hikwái y ári ogwata
ou-vy ramo ohexa. Ohexa-ma ramo íxupe, onhemondýi voi hikwái.

²⁰ Ha Hesu onhe'ẽ íxupe:

—Xe ae ko, he'i. —Ani pekyhyje teĩ, he'i gwemimbo'e kwéry-pe.

²¹ Inhe'ẽ ohendu ramo, ov'y a joa ogwerohory íxupe:

—Eike katu kanóa-py, he'i Hesu-pe hikwái.

Upéa-ma ramo pya'e ogwahê kanóa ogwahêse ha-py vvy ete-py oho-vy.

Hesu piári oho kente kwéry

²² Ko'ëmba-ma ramo, kente kwéry opyta va'e y rovái oho e'ŷ va'e he'i ojóupe:
—Mamo po oho ra'e Hesu? he'i ojóupe.

Oí ra'e peteĩ kanóa. Upe va'e-py onhemboyrú jave hemimbo'e kwéry non-
hemboyrúi ra'e Hesu. Hemimbo'e kwéry ae ha'e kwéry anho osẽ oje'õi-vy ra'e
Hesu e'ŷ reheve. Upéa-gwi he'i ojóupe: "Mamo po oho ra'e Hesu?" he'i.

²³ Upe jave ogwahê ou-vy outro kanóa Tiberíades tetã-gwi. Ogwahê-ma ou-
vy vvy ete-py. Upe tetã-my Nhandejáry Hesu otima porã kuri Nhandejáry-pe
upe va'e mbojape-rehe. Upe-py ho'u kuri upe va'e mbojape kente kwéry.

²⁴ Ha upéi katu gwî ogwahê ramo va'e he'i ojóupe:

—Ko'a-gwi oho nipo ra'e Hesu. Hemimbo'e kwéry oho ave nipo ra'e, he'i
ojóupe.

Upéa-gwi onhemboyrú-ma kanóa-py hikwái oho y-rupi Cafarnaum-my. Hesu
piári oho.

"Mbojape tee-rami pene moingovehaty voi ko xe" he'i ójehe Hesu

²⁵ Ogwahê rire oho-vy y rovái otopa Hesu-pe hikwái:

—Araka'e po ereju ra'e ko'a-py, porombo'eháry, he'i íxupe hikwái.

²⁶ Upe-ma ramo he'i íxupe kwéry Hesu:

—Anhetegwa va'e amombe'u-ta peẽ-my. Pe'u kuri upe va'e mbojape pene
rygwyatâmba-ma voi kuri. Upéa-gwi peju-ma xe piári. Heroviapyrã-rupi xe
rembiapo ramo, ndapeikwaái voi mbava'e-rehe xe rembiapo porã.

²⁷ Ani pepena eterei teĩ pene remi'urã-rehe. Pemoï porã ramo jepe, opa arã
pendéhegwi. Pemba'apo ae katu pene rembi'u teerã-rehe peiko hagwâ opa e'ŷ
reheve Nhandejáry ndive. Pene rembi'u teerã ko xe Nhande Ryke'y tee va'e
remime'ẽrã peẽ-my. Nhandejáry nhe'ẽ-py xe rembiapo. Upe va'e oikwaa uka-
ma kuri peẽ-my Nhandejáry, he'i judeu kwéry-pe.

²⁸ Upéi he'i íxupe hikwái:

—Orojapose voi oipota va'e Nhandejáry orojapo va'erã. Mba'éixa tipo orojapo-ta hemimbota, he'i oporandu-vy íxupe hikwái.

²⁹ —No'ã-rami pene rembiaporã. Xe ko Nhandejáry remimbou. Pejerovia katu xe-rehe, he'i íxupe kwéry.

³⁰ Upéi judeu kwéry:

—Néi, he'i, —Mba'éixa ne rembiapo porã-ta heroviapyrã-rupi, orohexa va'erã orogwerovia hagwã. Ehexa uka ore-vy nde pu'akaha-rupi ne rembiaporã oropondera hagwã hese.

³¹ Yma va'ekwe nhane ramoigwasu amyrã kwéry tekwat y e'ŷ-my oime jave va'ekwe ho'u va'ekwe tembi'u héry va'e maná:

“Ome'ẽ va'ekwe íxupe kwéry yváy gwigwa mbojape ho'u va'erã.”*

Upéixa omoõ va'ekwe kватia-rehe Nhandejáry nhe'ẽ, he'i íxupe omombe'u-vy.

³² Upéi he'i Hesu:

—Anhetegwa amombe'u-ta peẽ-my. Ndaha'éi Moisés ome'ẽ va'ekwe nhane ramói kwéry-pe upé va'e yváy gwigwa mbojape. Nhandejáry remime'ẽgwe ae upé va'e. Ko'ângá katu Nhandejáry ome'ẽ peẽ-my yváy gwigwa mbojape tee va'e.

³³ Upe mbojape tee Nhandejáry mba'e voi yváy gwigwa ogwejy va'ekwe pene moingove va'erã, he'i judeu kwéry-pe.

³⁴ —Eme'ẽ me'ẽ katu ore-vy upé va'e mbojape, porombo'eháry, he'i íxupe hikwái.

³⁵ —Xe ko mbojape tee ramigwa pene moingove va'e. Peteĩ teĩ xe moirũ va'e gwive ivare'a e'ŷ va'e-rami oiko va'erã. Ojerovia va'e gwive xe-rehe ijy'uhéi e'ŷ va'e-rami oiko va'erã, he'i.

³⁶ —Ha'e kuri peẽ-my, Peẽ ko xe rexá ramo jepe, ndapejeroviáí joty xe-rehe.

³⁷ Entéro xe rerovia uka va'e gwive xe Ru, xe moirũ va'erã. Xe-vy ou va'erã gwive, namboyke mo'ãvéi-ma va'erã íxupe.

³⁸ Ndaha'éi ajapose va'e mante ajapo hagwã agwejy va'ekwe aju-vy yváy-gwi. Xe mbouhare remimbota ae mante ajapo va'erã agwejy aju-vy.

³⁹ Ha xe mbouhare remimbota no'ã-rami. Ndoipotái xe amokanhy ni peteĩ xe moirũ uka va'ekwe gwive. Oipota xe amoingove jevy íxupe kwéry. Gwĩ omano va'ekwe opu'ã jevyha áry-py, oipota xe amoingove jevy enterove va'e xe moirũ uka va'ekwe gwive.

⁴⁰ Xe Ru remimbota no'ã-rami. Oipota xe rexá va'e gwive, xe rerovia va'e gwive ave oiko opa e'ŷ rehewe hendife. Upe va'e amoingove jevy va'erã gwĩ omano va'ekwe oikove jevyha áry-py, he'i judeu kwéry-pe Hesu.

⁴¹ Upe-ma ramo judeu kwéry ndojohu porãi inhe'ẽ:

—“Xe ko Nhandejáry gwigwa. Mbojape-rami aju pene moingove hagwã” he'i kuri Hesu, he'i ojóupe hikwái.

Hesu nhe'ẽ ndojohu porãi voi. Upéi he'i jevy hikwái:

⁴² —Upe va'e ko José ra'y voi. Ha'e Hesu voi. Túvy isy ndive ikwaapy voi-ma upé va'e. Aipo-rami, ma'erã po, “Xe ko yváy-gwi agwejy va'ekwe” he'i kuri nhande-vy, he'i ojóupe hikwái. Ndojohu porãiry Hesu nhe'ẽ.

⁴³ Upe-ma ramo ha'e he'i:

—Anive penhe'ẽ poxy xe-rehe, he'i.

⁴⁴ —Ndou mo'ãi xe-vy avave ojéhegwite. Xe Ru xe mbouhare xe moirũ uka ramo ae, xe moirũ va'erã. Gwĩ omano va'ekwe oikove jevyha áry-py, amoingove jevy va'erã xe reroviahape.

⁴⁵ Yma va'ekwe omoõ va'ekwe kватia-rehe Nhandejáry nhe'ẽ-py omombe'u va'ety nhe'ẽ. A-rami omoõ va'ekwe: “Enterove va'e-pe ombo'e-ta Nhandejáry”

* ^{6:31} Ex 16.4; Sl 78.24

he'i. Upéixa ramo entéro Nhandejáry nhe'ẽ ohendu va'e, Nhandejáry ombo'e íxupe va'e gwive, upe va'e gwive ou xe-vy.*

⁴⁶ Xe Ru-pe katu avave ndohexái va'e. Ha xe katu Nhandejáry-gwi aju va'ekwe ahexa va'e íxupe.

⁴⁷ —Anhetegwa va'e amombe'u-ta peẽ-my. Xe rerovia va'e gwive oikove-ma va'erã opa e'ŷ reheve Nhandejáry ndive.

⁴⁸ Xe ko mbojape tee-rami pene moingove va'e.

⁴⁹ Yma va'ekwe pene ramói kwéry ho'u va'ekwe maná héry va'e. Tekwaty e'ŷ-my ho'u hikwái. Ho'u ramo jepe, omano joty va'ekwe.

⁵⁰ Áy katu ko va'e yváy gwigwa va'e mbojape tee ramigwa ndaha'ei upe maná héry va'e ramigwa. Ko mbojape tee ramigwa ho'u va'e gwive ae nomano mo'âvéi-ma va'erã. Oikove meme va'erã Nhandejáry ndive.

⁵¹ Xe katu yváy-gwi agwejy va'ekwe aju-vy pene moingoveharã. Mbojape tee-rami xe ko pene moingove va'e. Upe mbojape tee ho'u va'e gwive oikove meme va'erã. Upe mbojape tee ame'ẽ va'erã kente kwéry-pe oikove hagwã. Upe mbojape tee xe rete voi, he'i ójehe judeu kwéry-pe.

⁵² Upéa nhe'ẽ ohendu ramo, onhe'ẽ poxy-ma ojóupe:

—Hesu he'i kuri ja'u hagwã hete, he'i mo'ã ojóupe. —Mba'éixa po Hesu ome'ẽ-ta nhande-vy gwete ja'u va'erã, he'i.

Upéa-gwi ogweropoxy Hesu nhe'ẽ hikwái.

⁵³ Upe-ma ramo he'i judeu kwéry-pe:

—Anhetegwa va'e amombe'u-ta peẽ-my. Xe ko Nhande Ryke'y tee va'e. Xe rete ndape'úi ramo, xe rugwy ndape'úi ramo, pemanova'erã, ndapeikovéi va'erã, name'ẽi va'erã peẽ-my pende rekoverã.

⁵⁴ Xe rete ho'u va'e gwive, xe rugwy ho'u va'e gwive, ame'ẽ-ta íxupe hekoverã. Gwĩ omano va'ekwe oikove jevyha áry-py, amoingove jevy va'erã íxupe kwéry.

⁵⁵ Xe rete ko pene rembi'u teerã voi. Xe rugwy pene rembi'u teerã voi.

⁵⁶ Xe rete ho'u va'e, xe rugwy ho'u va'e, xe moirũ tee va'e. Xe py'apy-py areko íxupe va'e voi. Opy'apy-py xe rerekovo ave.

⁵⁷ Nhandejáry Nhande Ru nhane moingove va'e xe mbou va'ekwe. Ome'ẽ va'ekwe-gwi xe-vy xe rekoverã, xe aiko ave. Upéixa ete voi xéhegwi okaru va'e ame'ẽ va'erã íxupe hekoverã.

⁵⁸ Ko va'e mbojape tee ramigwa yváy-gwi ogwejy va'ekwe kuri he'i xe-rehe. Ndaha'ei nhane ramói kwéry ho'u hagwe-rami. Ho'u ramo jepe, omano joty va'ekwe hikwái. Ko va'e mbojape tee ramigwa ae ho'u va'e gwive oiko meme va'erã, he'i judeu kwéry-pe Hesu.

⁵⁹ Upe va'e he'i Cafarnaum tetã-my, ombo'e mbo'e javé Hesu judeu kwéry oporahéi haty-py. Oipota ojerovia tee ójehe gwete rehegwa nhe'ẽ, gwugwy rehegwa nhe'ẽ ave omombe'u-vy íxupe kwéry.

“Ne nhe'ẽ ae mante orohendu ramo, oroiko meme-ma va'erã Nhandejáry ndive”

he'i Hesu-pe Pedro

⁶⁰ Upéa nhe'ẽ ohendu ramo, heta oĩ hemimbo'e kwéry va'e ndojohu porãi inhe'ẽ:

—Ipohýi voi upe va'e nhe'ẽ. Ndikatúi nhahendu. Kiva'e po ohendu-ta, he'i ojóupe hikwái.

⁶¹ Ha Hesu katu opy'a-py oikwaa-ma gwemimbo'e kwéry he'i va'e: “Ndo-johu porãi xe nhe'ẽ” he'i ojéupe.

* **6:45** Is 54.13

Upéi he'i gwemimbo'e kwéry-pe:

—Xe reja-ta tipo peẽ, he'i. —ndapejohu porãi-gwi xe nhe'ẽ? he'i.

⁶² —Peẽ ko xe rexa va'erã para'e Nhande Ryke'y tee va'e xe ajeupi jevy aha-
vy ramo xe rekwegwe-py. Upéixa xe rexa ramo, xe reja joty arã joty tipo, he'i.

⁶³ —Nhandejáry Nhe'ẽ Marangatu tee va'e ko nhane moingove va'e. Ha
nhande kwéry katu nhandejéhegwi mba'eve ndajajapóí va'e. Ha xe nhe'ẽ katu
pehendu ramo opyta pende py'a py'apy-rupi nhe'ẽ marangatu ramo. Pene
moingove va'e ave xe nhe'ẽ.

⁶⁴ Xe nhe'ẽ pehendu ramo jepe, oĩ joty pene pa'ũ-my xe rerovia e'ŷ va'e, he'i
gwemimbo'e kwéry-pe.

Oikwaa voi ra'e kiva'e va'e po ndogweroviái voínte va'erã ra'e íxupe. Kiva'e
po omombe'u hesegwa va'erã ra'e ija'e'ŷha-pe oikwaa-ma ra'e ave.

⁶⁵ He'i jevy gwemimbo'e kwéry-pe:

—Oĩ pene pa'ũ-my xe rerovia e'ŷ va'e. Upe va'e-gwi ete ha'e kuri peẽ-my,
“Ndou mo'ãi avave xe-vy ojéhegwi. Xe Ru, Tou, he'i ramo ae, ou va'erã” ha'e
kuri peẽ-my, he'i gwemimbo'e kwéry-pe.

⁶⁶ Inhe'ẽ ohendu ramo, heta oĩ íxupe omoirũ va'e ojere íxugwi. Nomoirũsevái
íxupe.

⁶⁷ Upe ramo he'i upe doze gwemimbo'e kwéry-pe:

—Ha xe rejase tipo peẽ ave, he'i.

⁶⁸ Ha Simão Pedro katu:

—Oroheja ramo, ndaipóri ore mbo'eharã oroho hagwã ha'e-py, ore Járy. Ne
nhe'ẽ ae mante orohendu ramo, oroiko-ma va'erã opa e'ŷ reheve Nhandejáry
ndive.

⁶⁹ Ko'ângá katu orogwerovia tee-ma. Ne mbou tee va'ekwe nipo ra'e
Nhandejáry. Nde reko marangatu tee nipo ra'e, he'i íxupe Pedro.

⁷⁰ Upe ramo Hesu:

—Xe apoporavo va'ekwe pepyta hagwã doze. Oroporavo ramo jepe, peteĩ
pene pa'ũ-my oĩ joty anháy nhe'ẽngenduha, he'i gwemimbo'e kwéry-pe.

⁷¹ Upéa he'i ramo omombe'u Simão Iscariotes ra'y Judas-rehe. Hese gwarã
nhe'ẽ omombe'u. Ha Judas katu doze hemimbo'e kwéry va'e voi. Indivegwa
jepe, omombe'u joty va'erã ija'e'ŷha-pe Hesu rehewa.

7

Hesu ryvy kwéry rehewa nhe'ẽ

¹ Ha upéi rire katu ndogwatavéi-ma Hesu Judéia yvy-rupi. Upe pygwa judeu
kwéry va'e ojukase íxupe. Upéa-gwi ndogwatavéi upe-rupi. Galiléia yvy-rupi
ae ogwata oiko-vy.

² Ha upéi katu hi'agwĩ-ma oĩ ogwahẽ hagwã judeu kwéry arete áry, héry va'e
Festa dos Tabernáculos, kwarahy ãy-my jaiko ramo peteĩ semana.

³ Upe ramo he'i íxupe Hesu ryvy:

—Tereho katu Judéia yvy-py, ne nhe'ẽ renduha ohexa hagwã ne rembiapo,
he'i.

⁴ —Erejehexa ukase ramo, ani erejapo nhemi ne rembiapo. Nde pu'akaha-
rupi, hexapyrã-rupi ne rembiapose ramo, atýra-py katu ejehexa uka, he'i íxupe
tyvýry.

⁵ Tyvýry jepe ndojeroviáiry joty hese: “Ha'e Cristo voi” nde'íry vyteri
gwyke'y-rehe.

⁶ Upéi he'i gwyvýry-pe:

—Nogwahẽi vyteri xe óra aha hagwã. Ha peẽ katu napende órai peho
hagwã. Pehose ramo, tapeho mani katu, he'i.

⁷ —Ha teko rei ndaija'e'ŷi pende-rehe. Ha xe katu aikwaa uka íxupe kwéry hembiapo vaikwe-gwi, ndaija'e porāi voi xe-rehe teko rei.

⁸ Tapeho katu Jerusalém-my aretegwasu mboete-vy. Ha xe katu nogwahēi vyteri xe óra aha hagwā. Upéa-gwi ndaha mo'āi joty, he'i gwiyvýry-pe.

⁹ Upe rire katu ndohói opyta joty Galiléia-py.

Hesu oho aretegwasu mboete hagwā-py

¹⁰ Ha tyvýry oho-ma tenonderā. Aretegwasu mboete hagwā-py oho-ma. Oho rire hikwái, oho ave Hesu. Ha hexapyrā-rupi katu ndohói. Onhemo'ā ha-rupi ae oho.

¹¹ Ogwahē e'ŷ ngatu oheka Hesu-pe judeu ruvixa kwéry aretegwasu mboete haty-py:

—Ne'írā vyteri tipo ogwahē, he'i oporandu Hesu-rehe.

¹² Ha kente kwéry omombe'u joavy avy hese:

—Hekoha porā va'e ha'e, he'i hese.

Outro he'i:

—Ndaha'ei hekoha porā va'e. Nhane mbotavy rei oiko-vy va'e ae, he'i mo'ā hese.

¹³ Ha atýra-py katu Hesu rehewa nhe'ẽ nomombe'úiry. Hevovo rei onhe'ẽ-vy, judeu ruvixa kwéry-gwi ikyhyje-gwi hikwái.

¹⁴ Ha upéi katu oho Hesu upe-py. Aretegwasu mbyte-py oike oho-vy Nhandejáry róga kakwaa-py. Ombo'e upe pygwa-pe.

¹⁵ Inhe'ẽ ohendu ramo, opondera hese hikwái:

—Mba'íixa po hi'arandu? he'i hese. —Onhembo'e e'ŷ rehewe, oikwaa rei onhe'ẽrā, he'i judeu ruvixa kwéry hese.

¹⁶ Onhe'ẽ íxupe kwéry Hesu:

—Ndaha'ei xejéhegwí xe ambo'e. Xe mbouhare rembigwaa uka xe-vy ae amombe'u. Nhandejáry rembiexa uka-py xe-vy ambo'e.

¹⁷ Hemimbota ojapose va'e gwive oikwaa va'erā ki-gwi po ou ra'e xe nhe'ẽ, Nhandejáry gwigwa para'e, xejéhegwigwa rei para'e. Nhandejáry gwigwa voínte xe nhe'ẽrā.

¹⁸ Ojéhegwí onhe'ẽ va'e onhembotuvixase mba'e. Ha imbouhare-pe ombo-tuvixase mba'e va'e katu, anhetegwa omombe'u. Ijapu e'ŷ va'e.

¹⁹ Pene rembypy Moisés omombe'u va'ekwe ramo jepe pende rekoharā, pene pa'ũ-my ndaipóri tekoha-rupi oiko va'e, he'i. —Upéa-gwi xe jukase voi. Ha naiporāi xe juka, he'i judeu ruvixa kwéry-pe Hesu.

²⁰ —Anháy ojepota nde-rehe ra'e, he'i. —Kiva'e nipo nde jukase? he'i íxupe ijaty va'e kwéry.

²¹ Upéi Hesu he'i:

—Peteĩ mba'e ajapo va'ekwe hexapyrā-rupi ajapo. Pehexa ramo pepondera joa hese.

²² Ha peẽ katu ndapepytu'u teéiry japytu'uga áry-py. Japytu'uga áry-py ereikytí mix̄mi joty nde ra'y pire. Moisés nhe'ẽ-py ereikytí ipire. Ha Moisés nomombe'u ranhéi va'ekwe nhande-vy ko'a-rami nhande rekorā. Nhane rembypy ae omombe'u va'ekwe nhane rekorā.

²³ Upéixa ramo japytu'uga áry-py jepe ereikytí joty arā ipire Moisés nhe'ẽgwe apo-vy. Upéa erejapo ramo, eremba'apo joty voi, he'i. —Nderepytu'u teéiry, eremba'apo ave nde. Ha ko'ângá katu xe amohešãimba kuri peteĩ hasy va'e. Japytu'uga áry-py amohešãimba-ma íxupe. Ma'erā po pende poxy xe-vy ra'e upeakwe-rehe? he'i íxupe kwéry. —Peẽ kwéry ave ndapepytu'u teéiry japytu'uga áry-py, he'i íxupe kwéry.

²⁴—Ani ere rei teĩ nde rapixa-rehe, “Hembiapo vai ra'e”. Erehexa porã rire mante ae hembiapo vaikwe, “Hembiapo vai-ma” ere arã hese ra'e, he'i judeu kwéry-pe Hesu.

Judeu ruvixa kwéry oipyhyse mo'ã Hesu-pe

²⁵ Upéixa ramo oĩ Jerusalém pygwa he'i va'e Hesu-rehe:

—Upe va'e hembijukase voi, he'i ojóupe Hesu-rehe.

²⁶ —Ha'e ko atýra-py omombe'u. Ha mburuvixa kwéry nombojevýi joty inhe'ẽ. Ohexa kwaa para'e hese hekoha hikwái. “Ha'e Cristo nhane remiha'arõ va'e” he'i para'e hese hikwái, he'i ojóupe.

²⁷ Ha oĩ he'i va'e, “Ojekwaa ramo Cristo, ki-gwi po ojekwaa uka ou-vy va'erã avave ndoikwaái” he'i Cristo, hemiha'arõ va'e-rehe he'i. Upéa-gwi he'i ojóupe:

—Ha upe va'e ae katu, ki-gwi po ou ra'e jaikwaa voi ogwahëha. Upe va'e ndaha'ei nipo Cristo ra'e, he'i mo'ã hese Jerusalém pygwa kwéry.

²⁸ Ha upe-ma ramo Nhandejáry róga kakwaa-py oporombo'e javé, onhe'ẽ hatã Hesu:

—“Jaikwaa voi íxupe. Ki-gwi po ou ra'e jaikwaa voi ogwahëha” peje mo'ã xe-rehe, he'i. —Xe katu ndajúi va'ekwe xe nhe'ẽ-py. Oime voi xe mbouhare. Ha'e Nhandejáry tee va'e. Peẽ katu ndapeikwaái íxupe.

²⁹ Xe ae aikwaa íxupe. Íxugwi-ma aju va'ekwe. Ha'e xe mbou va'ekwe. Upéa-gwi aikwaa voi íxupe, he'i ójehe íxupe kwéry Hesu.

³⁰ Inhe'ẽ ohendu ramo, oipyhyse mo'ã íxupe hikwái. Ha nogwahëi vyteri oipyhy hagwã óra. Upéa-gwi ndoipyhýi vyteri íxupe.

³¹ Heta oĩ jepe ojerovia va'e hese:

—Heta hembiapo porã va'ekwe Hesu. Opu'akaha-py, hexapyrã-rupi hembiapo, he'i. —Ojehexa uka ramo Cristo nhane remiha'arõ va'e, hetave íxugwi ndojapo mo'ãi va'erã voi. Ha'e nipo Cristo voi ra'e, he'i ojóupe ojerovia va'e hese.

Mburuvixa kwéry he'i oipyhy hagwã Hesu-pe

³² Upe ramo kente kwéry omombe'u joavy avy Hesu-rehe. Inhe'ẽ ohendu ramo he'i oipyhy hagwã íxupe pa'i ruvixa kwéry ndive fariseu kwéry. Oipyhy uka gwí Nhandejáry róga kakwaa-rehe onhangareko va'e polícia kwéry-pe mo'ã.

³³ Upe-ma ramo Hesu he'i:

—Ndaxe are mo'ãi ne ndive aiko-vy. Upe rire katu aha jevy-ta xe mbouhare ha-py.

³⁴ Peẽ xe reka va'erã ha ndaxe topa mo'ãi. Ndikatúi peju va'erã xe aha hagwã-py, he'i ójehe judeu ruvixa kwéry-pe.

³⁵ Upéi oporandu ojóupe hese hikwái:

—Upe va'e mamo-py po oho-ta jatopa e'ŷ hagwã-py íxupe? Oho-ta para'e oiko hagwã judeu kwéry pa'ũ-my grego yvy-py oiko va'e pa'ũ-my? Ombo'e-ta para'e nhande kwéry e'ŷ va'e, grego kwéry va'e-pe? he'i.

³⁶ —He'i kuri nhande-vy: “Peẽ xe reka reka-ta ha ndaxe topa mo'ãi” he'i. Upéi he'i, “Ndikatúi peju va'erã xe aha hagwã-py” he'i. Upéa he'i ramo, mbava'e-pe po he'i, he'i oporandu-vy ojóupe.

“Xe reroviaha py'apy gwive osẽ oho-vy va'erã yvu ramigwa” he'i Hesu

³⁷ Aretegwasu áry paha-py, iporã ete va'e-py, onhembo'y-ma Hesu. Hatã onhe'ẽ. Enterove ohendu hagwã-rami onhe'ẽ:

—Ijy'uhéi va'e gwive tou katu xe ha-py hoy'u hagwã, he'i. —Ijy'uhéi va'e ouse va'e-rami y-py hoy'u hagwã, taxe moirũ katu xe moirũse va'e gwive, he'i.

38 —Xe-rehe ojerovia va'e gwive, ipy'apy gwive osẽ oho-vy va'erã yvu ramigwa hapixa pegwarã. Upéixa he'i Nhandejáry kwatia nhe'ẽ, he'i ójeho omombe'u-vy Hesu.*

39 Yvu ramigwa he'i ramo, Nhe'ẽ Marangatu tee va'e-pe ae he'i. Entéro jajerovia hese va'e-pe gwive Nhe'ẽ Marangatu tee va'e hemime'ẽrã ae. Ne'írã omano Hesu oikove jevy hagwã onhembotuvixa mba'e hagwã. Upéa-gwi nome'ẽi vyteri Nhe'ẽ Marangatu tee va'e nhande-vy gwarã.

Kente kwéry omombe'u joavy avypa Hesu rehewa nhe'ẽ. Ndogwerojojái inhe'ẽ

40 Hesu nhe'ẽ ohendu ramo, oĩ he'i va'e hese:

—Upe va'e ko Nhandejáry nhe'ẽ-py omombe'u va'ety ou va'erã va'ekwe voi, he'i Hesu-rehe.

41 Oĩ outro he'i va'e:

—Upe va'e ko Cristo nhane remiha'arõ va'e voi, he'i.

Oĩ ave outro he'i va'e:

—Cristo ndaha'ẽi ou va'erã va'ekwe Galiléia-gwi, he'i mo'ã.

42 —Ha'e ae ko myamyrã Davi remiarirõ voi, he'i. —Belém-gwi ou va'erã va'ekwe. Davi oiko hagwe-gwi ou va'erã va'ekwe. Upéixa voi he'i Nhandejáry kwatia nhe'ẽ, he'i hese hikwái.*

43 Upéixa ramo omombe'u joavy avypa hesegwa nhe'ẽ. Ndogwerojojái inhe'ẽ hikwái.

44 Oĩ oipyhyse va'e mo'ã íxupe. Ha ndoipyhyí joty íxupe.

Mburuvixa kwéry ndojeroviái Hesu-rehe

45 Ha upéi katu ou jevy imondohare-pe gwĩ Nhandejáry róga kakwaa-rehe onhangareko va'e polícia. Ha pa'i ruvixa kwéry fariseu kwéry ndive oporandu polícia-pe:

—Ma'erã po ndereipyhyí íxupe heru-vy? he'i oporandu-vy.

46 Ha polícia katu he'i:

—Ha'eixagwa ndoikói onhe'ẽ porã va'e. Onhe'ẽ porã tee voi, he'i mburuvixa-pe.

47 He'i fariseu kwéry polícia-pe:

—Penhembotavy nipo ra'e peẽ ave, he'i.

48 —Ndojeroviái hese mburuvixave. Fariseuve ndojeroviái hese ave.

49 Teko rei katu nhande rekoha-rupi oiko e'ŷ va'e, ha'e kwéry anho ojerovia-ma hese. Ha gwĩ teko rei-rehe he'i vai-ma Nhandejáry, he'i mo'ã hese fariseu kwéry.

50 Ha peteĩ ipa'ũ-my oĩ va'e ndojohu porãi inhe'ẽ. Héry va'e Nicodemos. Pyhare onhomongeta ra'e Hesu ndive. Áy katu he'i hese:

51 —“Hembiapo vai ra'e” ja'e ramo hese nhamonhe'ẽ ranhe e'ŷ rehewe íxupe ndajaikóiry tekoha-rupi. Jaikwaa e'ŷ rehewe hembiapokwe, “Hembiapo vai ra'e” ja'e ramo ave, tekoha-rupi ndajaikói voi ave, he'i mburuvixa kwéry-pe Nicodemos.

52 —Nde Galiléia gwigwa para'e, he'i íxupe. —Emonhe'ẽ nhe'ẽ katu Nhandejáry kwatia nhe'ẽ. Ndaipóri Nhandejáry nhe'ẽ-py omombe'u va'ety Galiléia-gwi ou va'erã. Upéa ereikwaa porã hagwã emonhe'ẽ katu, he'i Nicodemos-pe hikwái.

53 Upe ramo mburuvixa kwéry ohopa jevy oje'ói-vy. Peteĩ teĩ jevy oje'ói hikwái. Gwóga gwóga-rupi oje'oipa jevy hikwái.

* 7:38 Ez 47.1; Zc 14.8 * 7:42 Mq 5.2

8

“Ko va'e kunha orojohu íxupe kuri oména e'ŷ ndive oiko jave” he'i

¹ Ha Hesu katu osẽ oho-vy Oliveiras vvyaty-py. Upe-py oke.

² Iko'ẽ-my oike jevy Jerusalém tetã-my. Nhandejáry róga kakwaa-py oike. Oike rire upe-py, enterove va'e ou henda-py. Upe-ma ramo ogwapy-maombo'e hagwã íxupe kwéry.

³ Ha escribea kwéry fariseu kwéry ndive ogwenogwahẽ heru-vy kunha-pe. Upéi entéro va'e pa'ũ-my omoõ íxupe hikwái.

⁴ He'i Hesu-pe hikwái:

—Porombo'eháry, ko va'e kunha orojohu íxupe kuri oména e'ŷ ndive oiko jave, he'i.

⁵ —Koixagwa kunha-pe gwive iporã ita-py jajapi jajuka hagwã he'i va'ekwe Moisés amyrã nhane rekorã mombe'u-vy, he'i Hesu-pe. —Ha ãy emombe'u katu ore-vy ne nhe'ẽ, he'i. —Mbava'e tipo ere-ta hese? he'i íxupe kunha-rehe.

⁶ Upéa he'i oipota-gwi mo'ã Hesu ojavy onhe'ẽ kunha-rehe. Ombojase mo'ã hese hikwái, “Ojejavvy-ma Hesu” he'i hagwã mo'ã hese hikwái. Ha ha'e katu okirirõ joty íxugwi. Ojeavvy ohai rei joty vvy oĩ-vy. Okwã-my ohai vvy oĩ-vy.

⁷ —Mbava'e tipo erejapo uka-ta hese? he'i jevy jevy oporandu-vy íxupe.

Upe-ma ramo onhembo'y-ma oĩ-vy. He'i:

—Pene pa'ũ-my ojejavvy e'ŷ va'e tojapi ranhe katu íxupe, he'i íxupe kwéry Hesu.

⁸ Upéa he'i rire ojeavvy jevy. Ohai jevy ikwã-my vvy.

⁹ Itujave va'e ranhe osẽ oho-vy ojóupe, tenonderã voi ha'e osẽ oho-vy. Upéixa-gwi Hesu anho jevy-ma opyta. Ha upe kunha katu onhembo'y oĩ-vy hendive.

¹⁰ Upe ramo hovayva-ma Hesu. He'i:

—Mamo tipo oje'oipa hikwái? he'i. —Ndopytái tipo peteĩ jepe he'i hagwã “Iporã ojejuka ko kunha” he'i hagwã nde-rehe? he'i kunha-pe.

¹¹ —Peteĩ jepe ndopytáiry, porombo'eháry, he'i íxupe kunha.

Upéi he'i kunha-pe:

—Xe nda'e mo'ãi ave nde-rehe, “Iporã ojejuka ko kunha” nda'e mo'ãi nde-rehe, he'i íxupe Hesu. —Ha tereho katu. Anive katu erejejavvy teĩ, he'i ae kunha-pe Hesu.

“Xe ko yvvpórý kwéry-pe pytû-rupi oiko va'e-rami va'e-pe ahesape va'e” he'i

¹² Ha upéi katu Hesu he'i jevy upe pygwa-pe:

—Xe ko gwã pytû-my oiko vérámi va'e-pe ahesape va'e, he'i. —Xe moirã va'e gwive ndoikói va'erã pytû-rupi. Arakatu-rupi ae meme oiko va'erã Nhandejáry ndive, he'i upe pygwa-pe Hesu.

¹³ Ha fariseu kwéry katu he'i íxupe:

—Ndejehégwigwa rei mante eremombe'u-ma. Nde apu rei eremombe'u-vy, he'i íxupe mo'ã.

¹⁴ Ha Hesu he'i:

—Ndaxe apúi voi, he'i. —Ha peẽ katu ndapeikwaái voi ki-gwi po aju ra'e. Kipy po aha jevy va'erã peẽ ndapeikwaái voi ave. Ha xe katu aikwaa voi xe aju hagwe. Xe aha hagwã aikwaa voi ave. Upéa-gwi xejehegwigwa amombe'u ramo jepe, anhetegwa joty amombe'u. Naxe apúi voi, he'i.

¹⁵ —Ha peẽ pene akã gwigwa rei pemombe'u. “Ko va'e hembiapo porã va'e. Upe va'e hembiapo vai va'e” peje mo'ã ramo, peje rei-ma peẽ. Pene akã gwigwa rei mante pemombe'u. Peiporavo vérámi mo'ã. Ha xe pene nhe'ẽ-rami namombe'úiry voi. Xe nda'e reíry pende rekoha-rehe, he'i.

16 —Amombe'u ramo ae peẽ-my, anhetegwa tee voi amombe'u joto. Naxe anho reíry amombe'u. Xe Ru xe mbouhare ave omombe'u, he'i.

17 —Pejeapysaka katu myamyrí Moisés he'i va'ekwe-rehe, kwatia-rehe omoĩ va'ekwe-rehe. He'i va'ekwe peẽ-my:

“Mokõive ogwerojoja voi onhe'ẽ ramo, mba'e tee voi omombe'u”
he'i pene rekora mombe'u-vy.

18 Xe amombe'u va'e xejehegwigwa. Ha xe Ru xe mbouhare xe mombe'u va'e ave. Ha ijoja voi ore nhe'ẽ. Upéa-gwi mba'e tee voi oromombe'u va'e, he'i fariseu kwéry-pe Hesu.

19 Upe va'e he'i-gwi:

—Kipy oĩ nde Ru? Kipy oĩ nde Ru? he'i íxupe hikwái oporandu-vy.

He'i fariseu kwéry-pe:

—Naxe kwaái voi peẽ. Ndapeikwaái xe ae xe rekoha. Xe Ru ndapeikwaái ave. Ha xe kwaáramo ra'e katu, xe Ru-pe ave peikwaa arã ra'e, he'i fariseu kwéry-pe Hesu.

20 Upéa he'i omombe'u, Nhandejáry róga kakwaa-py ombo'e javé. Pirapire omboyrú haty-py ombo'e javé, he'i upéa. Ha nogwahéi vyteri ojuka hagwã áry. Upéa-gwi ndoipyhyí íxupe heraha-vy avave.

“Napegwahéi va'erã peho-vy xe aha hagwã-py” he'i

21 Ha upéi katu he'i judeu kwéry-pe:

—Xe aha va'erã pendéhegwi. Aha rire xe reka rei va'erã peiko-vy. Xe reka ramo jepe, pemano joto va'erã. Pende py'a ky'a reheve pemano va'erã. Napegwahéi va'erã xe ho ha-py, he'i judeu kwéry-pe Hesu.

22 Upe ramo he'i ojóupe hikwái:

—“Napegwahéi va'erã peho-vy xe aha hagwã-py” he'i kuri ore-vy. Ha'e voi ojeahéi-tapa ójehe ra'e? he'i mo'ã hese ojóupe hikwái.

23 Upéi ha'e voi he'i:

—Peẽ yvy pygwa voi. Ha xe katu yváy pygwa. Peẽ teko rei rekoha-rupi peiko va'e. Ha xe katu hemimbota-rupi ndaikói va'e, he'i.

24 —Pende py'a ky'a reheve pemano va'erã, ha'e kuri peẽ-my. Xéjehe ha'e va'e ndaperoviái ramo, pemano va'erã voi pende py'a ky'a reheve, he'i judeu kwéry-pe.

25 Upe ramo he'i íxupe hikwái:

—Nde ko ma'erã tipo upéixa ere? Kigwigwa po nde? he'i oporandu-vy íxupe.

—Upéa amombe'u meme va'e peẽ-my, he'i.

26 —Heta pende rehewa nhe'ẽ xe amombe'u va'erã. Heta pende rekoha vai rehewa nhe'ẽ xe amombe'u va'erã. Napehenduí ramo jepe xe nhe'ẽ, anhetegwa va'e joto amombe'u. Ha xe mbouhare anhetegwa va'e omombe'u va'e. Xe Ru nhe'ẽ ahendu va'e gwive amombe'u entéro yvypóry-pe gwive, he'i judeu kwéry-pe.

27 Upéa he'i ramo, Gwu rehewa nhe'ẽ omombe'u. Ha judeu kwéry katu ndoikwaái voi inhe'ẽ. Naimba'ereroviái voi.

—Kiva'e po imbouhare, he'i ojóupe.

28 Upéixa ramo he'i jevy judeu kwéry-pe:

—Xe ko Nhande Ryke'y tee va'e. Xe rupi rire xe moĩ-vy kurusugwasu-rehe xe juka hagwã, “Anhetegwa nipo ra'e he'i va'e ójehe” peje va'erã xe-rehe. “Ojehegwínte mba'eve ndojapói nipo ra'e. Túvy ombo'e íxupe va'ekwe mante omombe'u nipo nhande-vy ra'e” peje va'erã xe-rehe, he'i.

29 —Xe mbouhare remimbota ajapo meme va'e. Upéa-gwi xe mbouhare naxe rejáí xe anho. Xe moirú meme voi oiko-vy, he'i judeu kwéry-pe.

30 Ha henduha heta oĩ hese ojerovia va'e.

“Xe oromoingo ramo Nhandejáry ra'y ramo, ndapeikói va'erã anháy rembigwái-rami” he'i

31 Upéa-gwi he'i judeu kwéry-pe gwí hese ojerovia va'e-pe:

—Xe nhe'ẽ pehendu ramo peiko-vy, xe remimbo'e tee ramo peiko, he'i.

32 —Upéixa xe remimbo'e ramo peiko ramo, peikwaa va'erã anhetegwa va'e. Upe ramo peẽnte-ma pemandā va'erã pendéjehe, he'i judeu kwéry-pe, hese ojerovia va'e-pe.

33 He'i íxupe hikwái:

—Myamyrí Abraão ko nhane rembypy voi. Avave nomandái va'e nhande-rehe, he'i. —Ma'erã ere kuri ore-vy, “Pendejehénte-ma pemandā va'erã” he'i íxupe.

34 Upéi he'i jevy judeu kwéry-pe:

—Pejeapysaka katu xe nhe'ẽ-rehe. Amombe'u-ta peẽ-my anhetegwa va'e. Ojejavy va'e gwive hekoha porã hagwã ndaipu'akái ójehe. Anháy rembigwái-rupi oiko-gwi, nomandái ójehe. Ha naiporãi jaiko anháy rembigwái ramo. Iporãve jaiko Nhandejáry re'ýi ramo.

35 Nhane irũ memerã voi nhande re'ýi ha nhane rembigwái katu ndaha'éi nhande re'ýi-rami. Nhamosẽ ramo, nhamosẽ íxupe oho hagwã.

36 Ha xe ko Nhandejáry ra'y voi. Upéa-gwi xe oromoingo ramo Nhandejáry ra'y ramo, ndapeikói va'erã anháy rembigwái-rami, hembiapose e'ŷ va'e vérarni. Nomandavéi va'erã pende-rehe anháy. Pende pu'aka va'erã pendéjehe ani pejejavý hagwã. Nhandejáry ra'y ramo peiko meme va'erã. Nomandavéi va'erã avave pende-rehe, he'i.

37 —Ha Abraão katu pene rembypy voi. Aikwaa upéa. Ha hemiarirõkwe ramo jepe, ndapeikói heko-rupi. Xe jukase joty voi peiko-vy, napehenduséi xe nhe'ẽ-gwi. Upéa-gwi xe jukase joty peẽ peiko-vy, he'i íxupe kwéry.

38 Xe ko amombe'u va'e xe-vy ohexa uka va'ekwe xe Ru. Ha peẽ katu pejapo va'e peẽ-my he'i va'ekwe pende ru, he'i judeu kwéry-pe.

39 Upéi he'i hikwái:

—Abraão ko ore ru tee voi, he'i íxupe.

He'i jevy judeu kwéry-pe:

—“Abraão ore ru tee voi” peje kuri xe-vy. Aipo ramo ma'erã ndapeikói Abraão reko-rupi? he'i.

40 —Nhandejáry remimombe'ukwe xe-vy, anhetegwa tee va'e, amombe'u ramo jepe peẽ-my, xe jukase joty peẽ peiko-vy. Ha pende reko-rupi ndoikói va'ekwe Abraão, he'i.

41 —Pende ru reko-rupi ae peiko peẽ, he'i judeu kwéry-pe.

Upéi ha'e kwéry he'i:

—Ore sy naimemby reíry va'ekwe. Nhandejáry ha'e anho ore Ru va'e. Ore kwéry ta'ýry tee, he'i íxupe.

42 Upéi ha'e he'i:

—Nhandejáry-gwi aju va'ekwe. Nhandejáry gwigwa voi xe. Xe ae xe nhe'ẽ-py ndajúi va'ekwe. Nhandejáry nhe'ẽ-py ae aju va'ekwe. Upéa-gwi Nhandejáry pende Ru ramo oiko ramo ra'e, xe rayhu arã peẽ ra'e.

43 Ma'erã po ndapeikwaái xe nhe'ẽ. Napehenduséi voi xe nhe'ẽ. Upéa-gwi ndapeikwaái voi xe nhe'ẽ, he'i.

44 —Anháy ruvixa ra'y voi peẽ, he'i. —Pende ru voi anháy. Peiko voi katu hemimbota-rupi. Yma ete gwive ko'ánga ete peve nhande jukase va'e voi. Anhetegwa tee va'e-rehe nopenái voi. Upéa-gwi anhetegwa va'e omombe'u e'ŷ va'e voi. Ha'e ijapu va'e. Ijapu va'e gwive ru ave. Upéa-gwi ojehégwínte ijapu. Gweko-rupi meme oiko. Ijapuse-gwite ijapu, he'i.

45 —Xe katu anhetegwa tee va'e amombe'u va'e. Upéa-gwi xe remimombe'u ndaperoviái peiko-vy. Ha peẽ katu anháy reko-rupi peiko-gwi ndaperoviái xe remimombe'u, he'i.

46 —Kiva'e po pene pa'ũ-gwi he'i-ta xe-rehe, “Ipy'a ky'a nipo Hesu ra'e ojejavy-gwi?” Ha “Ojejavy ko ra'e” he'i va'erã xe-rehe, ndoikóiry. Upéixa ramo peikwaa ramo xe remimombe'u anhetegwa tee ramo, ma'erã katu ndaxe reroviáséiry, he'i.

47 —Nhandejáry re'ýi gwive ohendu inhe'ë. Ha peẽ katu ndaha'ëi Nhandejáry re'ýi. Upéa-gwi napehenduséi voi inhe'ë, he'i judeu kwéry-pe Hesu.

Ne'írã vyteri myamyrí Abraão oiko ramo, xe Nhandejáry ramo aiko-ma voi va'ekwe

48 Upe-ma ramo he'i íxupe judeu kwéry:

—Nde ko ore kwéry e'ý va'e, Samaria pygwa va'e nipo ra'e. Anháy nipo ra'e ojepota nde-rehe oro'e hagwe-rupi ra'e, he'i mo'ã íxupe.

49 —Ndojepotáiry voi teĩ kuri xe-rehe anháy, he'i judeu kwéry-pe. —Xe Ru-pe amboete va'e. Ha peẽ xe mboete e'ý ramo, napemboetéi íxupe.

50 Nanhemboete ukái voi teko rei-pe. Ha peẽ xe mboete e'ý ramo jepe oĩ joto xe mboeteseharã. Anhetegwa va'e xe amombe'uhā oikwaa voi.

51 Anhetegwa va'e amombe'u-ta peẽ-my. Xe nhe'ë renduha gwive nomano mo'ávéi-ma. Oiko va'erã opa e'ý rehevē Nhandejáry ndive, he'i judeu kwéry-pe.

52 Upe ramo he'i íxupe hikwái:

—Anháy ojepota-ma nipo nde-rehe oiko-vy ra'e. Anhete teegwa-ma, he'i mo'ã. —Ojepota-ma nde-rehe anháy. Oroikwaa-ma voi ojepotaha nde-rehe anháy. Omano va'ekwe Abraão. Omano va'ekwe ave Nhandejáry nhe'ë-py omombe'u va'ety kwéry. Omano ramo jepe, “Xe nhe'ë renduha gwive nomano mo'ávéi-ma” ere kuri ore-vy. Ojepota-ma voi nde-rehe oiko-vy ra'e anháy, he'i mo'ã Hesu-pe.

53 —Omano-ma voi va'ekwe nhane ramói myamyrí Abraão. Ha Abraão enterove remimboete voi. Ha nde erenhemboete ukaseve mo'ã tipo ereiko-vy? Myamyrí Nhandejáry nhe'ë-py omombe'u va'ety omano-ma voi va'ekwe ave. Erenhemonhandejáry ra'anga anga rei nipo ra'e, he'i íxupe judeu kwéry.

54 Upéi Hesu he'i judeu kwéry-pe:

—“Tuvixave va'e mba'e voi xe” ha'e ramo xéjehe, nanhemboete teéiry arã ra'e. Ha xe mboete va'e xe Ru. Upe va'e, “Ore Járy” peje mo'ã hese, he'i.

55 —Nhandejáry kwaahaa e'ýha peẽ. Xe katu aikwaa voi íxupe. “Xe ndaikwaáiry íxupe” ha'e ramo, xe apu-tama xe ave. Pende reko-rupima xe aiko arã ra'e. Ha Nhandejáry kwaahaa xe. Aikwaa voi íxupe. Ahendu va'e inhe'ë, he'i.

56 —“Nhandejáry ra'y áry ahexa va'erã” he'i ojéupe myamyrí Abraão xe-rehe va'ekwe. Upéa-gwi ový'a eterei va'ekwe. Upéi xe ajehexa ukaha áry ohexa rire, ogwerohory hembiexagwe, he'i judeu kwéry-pe.

57 Ha'e kwéry he'i:

—Ne'írã eremboty cinqüenta ro'y. Ma'erã po ere kuri ore-vy, “Myamyrí Abraão-pe ahexa va'ekwe” ere kuri? he'i íxupe hikwái.

58 —Amombe'u-ta peẽ-my anhetegwa va'e, he'i. —Ne'írã vyteri myamyrí Abraão oiko ramo imitã ramo, xe Nhandejáry ramo aiko-ma voi va'ekwe, he'i judeu kwéry-pe.

59 Upe-ma ramo ojapi hagwã mo'ã íxupe oheka heka-ma ita. Oipyhy pyhy ojuka hagwã mo'ã íxupe. Ha Hesu okanhy onhemo'ã íxugwi kwéry. Upéi osẽ oho-vy íxugwi kwéry Nhandejáry róga kakwaa-gwi.

9

Hesu ombohesa hesapysō e'ŷ va'e-pe

¹ Ha upéi katu oho ogwata-vy Hesu. Ogwata jave ohexā peteī hesapysō e'ŷ va'e-pe. Imitā gwive ndahesapysóiry va'e.

² Ohexā ramo, oporandu Hesu-pe hemimbo'e:

—Mba'e-gwi upe va'e ndahesapysóiry va'e imitā gwive, porombo'eháry? Ha'e ojejavy-gwi para'e. Ojejavy-gwi para'e túvy isy ave? he'i íxupe oporandu-vy.

³ Upéi Hesu he'i íxupe:

—“Upe va'e hesa e'ŷ va'e ojejavy-gwi para'e, túvy isy ave ojejavy-gwi para'e, onase hesa e'ŷ rehēve” peje mo'ã. Ha ndaupéixairy, he'i. —Hesapysō e'ŷ va'e ae hembiapo porā hagwā íxupe Nhandejáry hexapyrā-rupi.

⁴ Áry ramo jajapo katu xe mbouhare rembiapo. Ou va'erā pyhare. Pytū jave ndikatúi om̄ba'apo avave. Áy ome'ẽ nhamba'apo. Ha nhamba'apo e'ŷ va'erā óra-py, nanhamba'apo mo'ãvēi-ma va'erā, he'i ójehē.

⁵ —Xe aime jave ko yvy ári, yvypórÿ kwéry-pe, pytū-rupi oiko va'e-rami va'e-pe ahesape va'e, he'i gwemimbo'e kwéry-pe Hesu.

⁶ Upéa he'i rire, onygwō yvy-py ombotuju hagwā gwendy-py. Ombotuju rire katu om̄ona-ma hesa e'ŷ va'e resa-rehe.

⁷ —Tereho katu Siloé ykwa-py ejehesahéi, he'i hesa e'ŷ va'e-pe. Y ojereru va'ekwe-pe he'i Siloé.

Ha upéi katu oho ejehesahéi. Hesapysō porā-ma oukwe-vy.

⁸ Ha hapixa kwéry, imba'ejerure oĩ-vy ramo hexaháry ave he'i ojóupe:

—Kiva'e tipo upéa? he'i. —Ogwapy va'evy va'ekwe ko upéa kwimba'e. Om̄ba'e repyrā-rehe ojerure rure va'ekwe. Ha áy hesapysō-ma nipo ra'e, he'i ojóupe hese hikwái.

⁹ —Ha'e voi —oĩ he'i va'e hese. —Imba'ejerure va'ekwe hesapysō voi ra'e áy, he'i.

Outro kwéry he'i hese:

—Ndaha'ei. Ijogwaha rei upe va'e, he'i mo'ã hese.

Ha ha'e voi katu he'i:

—Xe mba'ejerure va'ekwe voi xe, he'i ójehē.

¹⁰ Upe ramo he'i íxupe hikwái:

—Mbava'e tipo erejapo nde resa-rehe erehexa porā hagwā? he'i oporandu-vy.

Ha ha'e he'i:

¹¹ —Hesu héry va'e ombotuju kuri yvy omoĩ xe resa-rehe. Upéi, “Tereho katu Siloé ykwa-py ejehesahéi” he'i xe-vy. Upe ramo aha ajehesahéi xe resapysō-ma, he'i íxupe kwéry.

¹² —Kipy oime Hesu? he'i íxupe hikwái.

—Ndaikwaaíry kipy po oĩ, he'i íxupe kwéry.

“Mba'éixa ne mbohesa ra'e?” he'i íxupe judeu ruvixa kwéry

¹³⁻¹⁴ Ha upéi katu hesapysō e'ŷ va'ekwe ojereru fariseu kwéry renda-py. Ndojohu porāi ra'e Hesu rembiapo fariseu kwéry:

—Japytu'uha áry-pyte ombotuju Hesu hesapysō hagwā, he'i ojóupe fariseu kwéry.

¹⁵ Upéa-gwi oporandu íxupe:

—Mba'éixa pa nde resapysō jevy-ma? he'i íxupe fariseu kwéry.

—Xe resa-rehe omoĩ kuri tuju. Upéi aha ajehesahéi xe resapysō-ma, he'i fariseu kwéry-pe.

¹⁶ Upe ramo omombe'u joavy avy ojóupe fariseu kwéry:

—Hesu ko japytu'uga áry reko-rupi ndoikóiry. Upéa-gwi Nhandejáry nhe'ẽ e'ŷ-py hembiapo, oĩ he'i va'e hese.

Ha outro fariseu he'i:

—Hesu hexapyrã-rupi hembiapo porã va'e. Ma'erã, “Ojejavy ra'e” peje hese mo'ã? he'i ojóupe hese hikwái.

Upéixa ramo omombe'u joavy avy ojóupe Hesu-rehe.

¹⁷ Upéa-gwi oporandu jevy hesapysó e'ŷ va'ekwe-pe:

—Mba'eixagwa hekoha va'e tipo nde resa apohare? he'i. —Emombe'u katu ore-vy hesegwa, he'i íxupe fariseu kwéry.

—Nhandejáry nhe'ẽ-py omombe'u va'ety voi upe va'e, he'i fariseu kwéry-pe.

¹⁸ “Xe resapysó-ma” he'i ramo, ndogweroviái inhe'ẽ judeu ruvixa kwéry. Upéa-gwi ohenói uka hesapysó e'ŷ va'ekwe ru-pe. Isy-pe ohenói uka ave ou hagwã.

¹⁹ Ogwahé ramo, oporandu túvy-pe isy-pe ave:

—Nde ra'y tipo upe va'e, he'i túvy-pe. —Imitã gwive ndahesapysóiry va'e peje hese va'e? Mba'éixa tipo ohexá oiko-vy? oporandu túvy-pe isy-pe ave.

²⁰ He'i judeu ruvixa kwéry-pe:

—Ko va'e katu aikwaa voi xe ra'y teeha. Imitã gwive hesapysó e'ŷha aikwaa voi, he'i.

²¹ —Ha ndoroikwaái mba'éixa po ohexá ãy. Kiva'e po ombohesa ra'e íxupe ndoroikwaái ave. Ha xe ra'y-pe katu peporandu peikwaa hagwã. Naimitãvéry-ma voi xe ra'y. Ójehe gware omombe'u va'erã peẽ-my, he'i judeu ruvixa kwéry-pe.

²² Upéa he'i ikyhyje-gwi judeu ruvixa-gwi. Onhombo'e ra'e ojóupe judeu ruvixa kwéry:

—“Cristo, nhane remiha'arõ va'e voi Hesu” he'i va'e gwive, nhamosẽ katu ojeporahéi haty haty-gwi, he'i ojóupe.

Upéa-gwi ikyhyje voi túvy isy ave. Upéa-gwi he'i:

²³ “Naimitãvéry-ma voi xe ra'y. Ójehe gware omombe'u va'erã peẽ-my” he'i judeu kwéry-pe túvy isy ave.

²⁴ Upéa he'i-gwi:

—Eju katu, he'i jevy hesapysó e'ŷ va'ekwe-pe judeu ruvixa kwéry. —Ore kwéry ko oroikwaa voi pe kwimba'e Hesu héry va'e ojejavy javyha. Upéa-gwi etima porã katu Nhandejáry-pe nde resapysó jevymaha-rehe, he'i íxupe judeu ruvixa kwéry.

²⁵ —Ojejavy va'e para'e pe kwimba'e. Tapa ojejavy e'ŷ va'e. Xe ndaikwaáiry. Ha peteĩ mba'e xe aikwaa. Kwehe ndaxe resáiry va'e xe. ãy katu xe resa-ma voi. ãy katu ahexá porã-ma, he'i judeu ruvixa kwéry-pe.

²⁶ Upe ramo he'i íxupe hikwái:

—Mbava'e tipo ojapo nde-vy ra'e ne mbohesa hagwã? he'i. —Mba'éixa tipo ne mbohesa hagwã ra'e? he'i jevy íxupe judeu ruvixa kwéry.

²⁷ —Ma'erã po pehenduse jevy? Napenhenduséi kuri xe remimombe'u peẽ-my. Peikose para'e Hesu remimbo'e ramo peẽ ave, he'i judeu ruvixa kwéry-pe.

²⁸ Upe-ma ramo ipoxy-ma íxupe. Onhe'ẽ rei rei-ma íxupe:

—Hesu remimbo'e voi nde. Ha ore kwéry katu Moisés remimbo'e voi, he'i.

²⁹ —Nhandejáry remimombe'ukwe nipo araka'e Moisés-pe. Ha ki-gwi po ou Hesu ra'e ndoroikwaáiry, he'i íxupe judeu ruvixa kwéry.

³⁰ Upe ramo ha'e he'i:

—Apondera voi pende-rehe. Hesu xe mbohesa ramo jepe, ki-gwi po ou ra'e ndapeikwaáiry joto, he'i.

³¹ —Nhandejáry rekoha jaikwaa voi. Ojejavy va'e-pe gwive ndohexa mo'āi. Ha imboeteha gwive katu hemimbota apoha ave, upe va'e-pe ohexa va'erā, he'i.

³² —Pejeapysaka katu xe nhe'ē-rehe. Ko yvy nhepyrū gwive ãy ete peve, "Hesapyo-ma imitā gwive hesa e'ŷ va'e" nde'íry va'e, he'i.

³³ —Ojéhegwí mba'eve ndojapói va'e Hesu. Xe mbohesa-ma kuri. Nhandejáry remimbou voi nipo ra'e Hesu, he'i judeu ruvixa-pe.

³⁴ Upe nhe'ē ohendu-ma ramo ipoxy-ma hikwái:

—Nde py'a ky'apa-ma reheve ereiko va'ekwe. Upéa-gwi naiporāi voi nde ore mbo'e, he'i hesapyo e'ŷ va'ekwe-pe judeu ruvixa.

Upe rire omosē íxupe:

—Anive ereike teī ojeporahéi haty haty-rupi, he'i íxupe judeu ruvixa kwéry.

"Hí'arandu e'ŷ va'e aipota hesapysomaha va'e-rami oiko" he'i Hesu

³⁵ Ha upéi katu:

—Omosē ra'e hesapyo va'ekwe-pe judeu ruvixa, he'i Hesu-pe.

Upéa-gwi oho oheka íxupe Hesu. Otopa ramo, he'i:

—Erejerovia-ma tipo nde ereiko-vy Nhande ryke'y tee va'e-rehe, he'i oporandu-vy íxupe.

³⁶ —Kiva'e po ndaikwaái, porombo'eháry, ajerovia-ma hagwā hese, he'i Hesu-pe.

³⁷ —Erehexa-ma erei-vy íxupe. Xe voi, he'i ójehe. —Pende ryke'y tee va'e xe voi nde-vy anhe'ē va'e, he'i íxupe Hesu.

³⁸ —Ajerovia-ma nde-rehe, xe Járy, he'i íxupe.

Gwetypy'ā-rehe onhesū omboete-vy íxupe.

³⁹ Ha upéi katu he'i upe pygwa-pe Hesu:

—Ko yvy-py aju va'ekwe ojekwaa hagwā yvypóry kwéry rekoha, ipy'a-py oī va'e ojekwaa hagwā. Hesapyo e'ŷ va'e-rami voi oiko hi'arandu e'ŷ va'e. Aipota hesapyo-ma va'e-rami oiko hikwái. Ha, "Nhane arandu va'e" he'i ra'anga anga rei va'e katu, aipota hi'arandu e'ŷha enterove ohexa. Upéa-gwi aju va'ekwe ko yvy ári, he'i upe pygwa-pe Hesu.

⁴⁰ Oī fariseu kwéry va'e hendive oī va'e, upéa ohendu va'e:

—“Pene arandu e'ŷ peē ave” ere tipo ra'e kuri ore-vy ave, he'i oporandu-vy íxupe.

⁴¹ —Pende resapyo e'ŷ va'e-rami peiko ramo ra'e, ndaiky'áí arā ra'e pende py'a. Ñy katu, “Ore resapyo va'e-rami ore arandu porā va'e” peje mo'ā pendéhe. Upéa-gwi pende apu-gwi, iky'a-ma voi oī-vy pende py'a, he'i fariseu kwéry-pe Hesu.

10

Arandu rehewa nhe'ē omombe'u Hesu ovexa rehewa nhe'ē-rami

¹ Ha upéi katu he'i jevy upe pygwa-pe Hesu:

—Amombe'u-ta peē-my anhetegwa va'e. Jaike ramo xikéro-py ovexa oī ha-my, okē-rupi jaike va'e. Ha imondaháry oporosakeahatyva'e ave katu okē-rupi ndoikéiry. Ojeupi ae ohasa xikéro ári-rupi oike hagwā ovexa oī ha-my, he'i.

² —Ha okē-rupi oike va'e katu ovexa rerekwa voi, he'i.

³ —Ogwahē ou-vy ramo, imbotyhaty járy onhokendavo íxupe. Upéi ohenói gwymba. Peteī teī héry-py ohenói. Ohenói ramo, ohendu inhe'ē hymba. Upéi oka-py ogweraha.

⁴ Ogwenohē rire gwymba gwive, oho henonde-rupi. Oikwaa inhe'ē. Upéa-gwi oho hupive hikwái, he'i.

5 —Ha herekwa e'ŷ va'e-pe katu nomoirūséi voi. Ndohoséi hupive. Herekwa e'ŷ va'e nhe'ẽ ndoikwaái voi. Upéa-gwi okanhy oje'óí-vy íxugwi, he'i upe pygwa-pe Hesu.

6 Arandu rehewa nhe'ẽ omombe'u íxupe kwéry ovexa rehewa nhe'ẽ-rami. Ha henduha katu mbava'e-rehe po he'ise Hesu ndoikwaái voi hikwái.

“Pe herekwa heko porā tee va'e xe-rehe voi he'i” he'i Hesu

7 Upéixa ramo he'i jevy íxupe kwéry Hesu:

—Amombe'u-ta peẽ-my anhetegwa va'e. Ovexa rokẽ he'ise xe-rehe.

8 Xe renonde-py ou va'ekwe-rehe gwive he'ise imondaháry oporosakeahaty ave. Ha nohendúiry íxupe ovexa. Xe nhe'ẽ renduha-pe he'ise ovexa.

9 Okẽ, ha'e ramo xéjehe voínte ha'e. Okẽ-rupi oike va'e gwive xe-rehe ojerovia va'e aresende va'erã íxupe. Ndaikyhyjéi va'erã oike ike-vy. Ikyhyje e'ŷ rehewe osẽ osẽ va'erã. Oĩ hese onhangareko va'e. Oheka va'erã ho'u va'erã, he'i gwî hese ojerovia va'e-rehe.

10 —Ha imondaháry katu nopenái ovexa-rehe. Omonda hagwã mante íxupe ou va'e. Ijukapyrã voi ovexa. Ohundi hagwã mante íxupe ou. Ha xe katu aju va'ekwe amoingove hagwã ovexa-pe. Amoingove porâve râve va'erã íxupe, he'i.

11 —Herekwa heko porā tee va'e gwymba ndive ojejuka uka hagwãixa opyta. Pe herekwa heko porā tee va'e xe-rehe voi he'i, he'i.*

12-13 —Hembigwái ae katu ogana hagwã mante omba'apo va'e ndaha'éi herekwa tee. Ijáry e'ŷ voi upéa. Upe va'e nopenái mymba-rehe. Ogana hagwã mante omba'apo. Upéa-gwi ogwahé ou ramo jagwarete, nonhangareko porâi hymba-rehe. Oripara mante íxugwi. Upe-ma ramo oipyhy mymba-pe jagwarete omosarambipa hagwã.

14-15 Pe ovexa rerekwa hekoha porā tee va'e, ha'e ramo, xéjehe voínte ha'e. Xe Ru rekoha aikwaapa voi. Xe kwaa ave xe Ru. Upéixa ete aikwaa xe rymba. Ha xe rymba xe kwaa ave. Xe rymba rekoviá ajejuka ukase va'erã voi. Naxe rakate'ŷiry xe rekove-rehe xe rymba aresende hagwã, he'i.

16 —Mombryry mbyry oĩ va'e xe rymba xe areko va'e ave. Ndaha'éi a pygwa, ko xikéro pygwa. Mombryrgwa-pe ajererovia uka va'erã. Xe nhe'ẽ ohendu va'erã. Henda henda-rupi peteĩxa oiko va'erã. Peteĩ mante oĩ va'erã herekwa.

17 Xe rymba rekoviá ajejuka uka va'erã voi, xe aikove jevy hagwã. Upéa-gwi xe rayhu voi xe Ru.

18 Xe rekove-rehe ipu'akave va'e ndaipóri. Xe jukase-gwi mante naxe jukáí va'erã avave. Xe nhe'ẽ-rupi mante xe juka va'erã. Xe nhe'ẽ-py joty ajejuka uka va'erã. Xe nhe'ẽ-py joty aikove jevy va'erã. Upe va'e ajapo hagwã he'i va'ekwe xe-vy xe Ru omanda-vy, he'i judeu kwéry-pe Hesu.

19 Upe va'e nhe'ẽ ohendu ramo, omombe'u joavy avy judeu kwéry:

20 —Ojepota-ma ra'e hese anháy, he'i. —Itavy voi. Ma'erã po pehenduse inhe'ẽ? he'i hese heta oĩ va'e.

21 Outro kwéry he'i:

—Anháy ojepota hese va'e nonhe'ẽi ha'e-rami. Anháy rerekoha ndikatúi ombohesa jevy hesapyo e'ŷ va'e-pe, he'i ojóupe hese.

“Erenhemonhandejáry ra'anga anga rei ereiko-vy” he'i mo'ã Hesu-pe

22 Ha upéi katu oiko-ma Jerusalém tetã-my judeu kwéry arete. Nhandedejáry róga kakwaa nhamoatyrõmba hagwe áry arete héry va'e. Upe ramo ro'y eterei voi.

23 Ha Hesu katu ogwata oiko-vy Nhandedejáry róga kakwaa-py. Ogapy onhemboty e'ŷ va'e gwy-py, Salomão onhehenói va'e gwy-py ogwata oiko-vy.

* **10:11** Hb 13.20; 1 Pe 5.4; Ap 7.17

²⁴ Upe-ma ramo ogwahē ou-vy judeu ruvixa kwéry. Ogwata jave Hesu, ogweroajere íxupe hikwái:

—Are gwive ko'ángā ete peve orojapura eremombe'u hagwā ore-vy kiva'e tipo nde oroikwaa porā hagwā. Emombe'u porā katu ore-vy, he'i. —Nde tipo Cristo voi ore remiha'arō va'e? he'i oporandu-vy íxupe hikwái.

²⁵ Upéi Hesu he'i íxupe kwéry:

—Xe jehegwigwa nhe'ẽ amombe'u kuri peẽ-my. Ha ndaperoviáí voi xe nhe'ẽ. Xe Ru réry-py xe rembiapo porā va'e. Pende rexapyrā-rupi xe rembiapo. Upe va'e pehexa ramo, ma'erā peje xe-rehe, “Hesu nipo ndaha'éí Cristo ra'e” peje kuri xe-rehe, he'i.

²⁶ —Xe rymba kwéry e'ŷ va'e-rami peiko va'e xe-vy. Xe re'ýi e'ŷ va'e peẽ. Upéa-gwi ndaperoviáiry xe nhe'ẽ.

²⁷ Xe rymba kwéry xe nhe'ẽ renduha va'e voi. Peteĩ teĩ va'e-pe aikwaa. Xe rupive oje'óí va'erā.

²⁸ Xe rymba gwive amoingove va'e Nhandejáry ndive opa e'ŷ reheve optya hagwā. Mombyry oréhegwi noíry va'erā. Xe po pyte-py xe rembiereko meme voi. Ha ndikatúi ogweraha avave xe po pyte-gwi.

²⁹ Upéa xe Ru remimonhangareko uka xe-vy ime'ẽ-vy. Ha'eixagwa ndaipóri. Ipo pyte-py xe Ru rembiereko voi. Ha ndikatúi ogweraha avave ipo pyte-gwi, he'i.

³⁰ —Xe xe Ru ave peteĩxa, he'i judeu ruvixa kwéry-pe.

³¹ Upéa he'i-ma ramo, ojapi hagwā íxupe, ita oipyhy hikwái. Ojukase íxupe mo'ã hikwái.

³² Ha Hesu he'i:

—Pene pa'ũ-rupi heta xe rembiapo porā. Xe Ru nhe'ẽ-py ahexa uka peẽ-my xe ajapo porāha. Kiva'eixagwa-rehe po xe api apise peẽ? he'i judeu ruvixa kwéry-pe.

³³ —Ndorojapi mo'ãi ne rembiapo porā-rehe. Nhandejáry-rehe erenhe'ẽ rei hagwe-rehe ae orojapi-ta. Teko rei jepe erenhemonhandejáry ra'anga anga rei ereiko-vy. Upéa-rehe orojapise, he'i mo'ã íxupe judeu ruvixa kwéry.

³⁴ Upe-ma ramo omombe'u judeu ruvixa kwéry-pe Nhandejáry nhe'ẽ:

—Nhandejáry kwtia nhe'ẽ, pehendu va'e he'i no'ã-rami:

“Tupā kwéry voi peẽ, ha'e-ma peẽ-my”*

he'i Nhandejáry.

³⁵ Ha Nhandejáry nhe'ẽ anhetegwa tee va'e he'i meme. Upéa jaikwaa voi. Pejeapysaka katu xe nhe'ẽ-rehe. Gwī inhe'ẽ renduha-pe tupā kwéry-py ohenói va'ekwe Nhandejáry.

³⁶ Xe katu Nhandejáry rembiporavo ko yvy-py hemimbou voi xe. Ha, Nhandejáry ra'y voi xe, ha'e ramo xéjehe, ndapejohu porāi va'erā voi xe nhe'ẽ. Teko rei-pe tupā kwéry-py ohenói rei va'ekwe Nhandejáry. Aipo ramo, ma'erā po, “Erenhe'ẽ rei rei ereiko-vy Nhandejáry-rehe” peje joty xe-vy, “Nhandejáry ra'y voi xe, ere ramo”. Ma'erā aipo peje joty xe-vy? he'i.

³⁷ —Xe Ru rembiapo ajapo e'ŷ ramo, ani xe rerovia teĩ peẽ, he'i.

³⁸ —Ha hembiapo voi katu ajapo ramo, xe rerovia katu peẽ. Ha naxe reroviáí ramo jepe peẽ, pejerovia joty katu xe rembiapo porā-rehe. Aipo ramo peikwaa porā-ma arā voi ore rekoha peiko-vy. Peteĩxa xe moirū xe Ru oiko-vy. Ha xe katu amoirū peteĩxa xe Ru aiko-vy. Upe va'e peikwaa porā arā, he'i judeu kwéry-pe.

³⁹ Upéa he'i-gwi, oipyhyse jevy mo'ã íxupe hikwái. Ha judeu kwéry ndaipu'akái hese oipyhy hagwā. Osẽ oho-vy íxugwi kwéry.

* **10:34** SI 82.6

⁴⁰ Ha upéi katu oho jevy Jordão ysyry rovái. João Batista oporomongarai hagwe-py oho. Upe-py opyta.

⁴¹ Oiko jave upe-py, heta ou oheka-vy:

—Jahexá e'ŷ va'e ndojapói va'ekwe João. Ha Hesu-rehe hemimombe'u gwive anhetegwa nipo ra'e, he'i João-rehe hikwái.

⁴² Upéa-gwi upe-py heta oĩ ojerovia-ma va'e Hesu-rehe hikwái.

11

“Omano ete-ma Lázaro” he'i Hesu gwemimbo'e kwéry-pe

¹ Ha upéi katu oĩ hasy va'e Lázaro héry va'e. Oiko Betânia tetã'i-my. Upe-py oiko ave heindýry Maria, heindýry Marta ave.

² Upéa Maria Nhandejáry Hesu py omohyakwā va'erā. Ho'a vuku apy-py oikyty va'erā ipy omokā hagwā.

³ Upe va'e Maria tykery Marta ndive omomarandu uka Hesu-pe:

—Porombo'eháry, ha'e ko ne rembiayhu va'e hasy-ma, he'i Hesu-pe.

⁴ Upéa ohendu ramo:

—Omano hagwā-rami ndahasýi. Hasy-ma ae oĩ-vy Nhandejáry ohexa uka hagwā gwembiaipo porāha. Hasy-gwi xe Nhandejáry ra'y va'e ahexa uka va'erā ave xe rembiapo porāha anhembotuvixa mba'e hagwā, he'i hasy va'e-rehe Hesu.

⁵ Ha Marta Hesu rembiayhu voi. Ikypy'ýry ikyvy ave hembiayhu ave.

⁶ Ha upéixa ramo jepe oikwaa-ma ramo Lázaro hasymaha, opyta joty upe oĩ ha-py. Mokõi áry opyta joty upe-py.

⁷ Upe rire ae he'i gwemimbo'e kwéry-pe:

—Jaha jevy katu Judéia yvy-py, he'i íxupe kwéry.

⁸ —Nde api apise kuri mo'ã ita-py judeu ruvixa kwéry, porombo'eháry. Ma'erā po erehose jevy joty ha'e kwéry oĩ ha-my? he'i íxupe hemimbo'e.

⁹ Upéi he'i ha'e:

—Áry ramo hesakā meme voi. Jahexá nhande resapeha. Upéa-gwi jagwata porā nhanhepsanga e'ŷ reheve.

¹⁰ Ha pyhare katu nhande resapeha e'ŷ reheve jaiko. Upéa-gwi jagwata ramo, nhanhepsanga ramo, ja'a arā, he'i ójehe omanotaha áry-rehe.

¹¹ Upéa he'i rire, Lázaro rehegwa omombe'u gwemimbo'e kwéry-pe:

—Oke oĩ-vy nhande rapixa Lázaro. Aha-ta amombáy íxupe, he'i gwemimbo'e kwéry-pe.

¹² —Oke oĩ-vy ramo, okwera arā, ore Járy, he'i íxupe hemimbo'e kwéry.

¹³ Ha Hesu omombe'u Lázaro omanoha rehegwa nhe'ẽ okeha rehegwa nhe'ẽ-rami. Ha hemimbo'e kwéry katu mbava'e-pe po he'ise Hesu nhe'ẽ ndoikwaái voi:

“Lázaro oiko porā oke jave” he'i mo'ã ojóupe.

¹⁴ Upéa-gwi omombe'u porā íxupe kwéry omano hagwe:

—Omano ete-ma Lázaro, he'i.

¹⁵ —Naiméi-gwi omano jave, avy'a joty xe. Naiméi-gwi pejerovia va'erā xe-rehe. Upéa-rehe avy'a. Omano jepe jaha katu jahexá íxupe, he'i gwemimbo'e kwéry-pe.

¹⁶ —Jaha katu nhande ave nhamano hagwā indive, he'i hapixa kwéry-pe Hesu-rehe Tomé. Dídimo héry ave Tomé.

“Xe ko apomoingove jevy va'ety” he'i Hesu

¹⁷ Upe ramo oho oje'óí-vy Betânia tetã'i-my. Upe-py ogwahẽ ramo Hesu, Lázaro retekwe omoĩ-ma ra'e oheja-vy itakwa-py. Ojapo irundy áry oheja hagwe upe-py.

¹⁸ Ha Jerusalém hi'agwī oī Betânia tetā'i-gwi. Mbohapy quilômetro para'e.

¹⁹ Upéa-gwi heta judeu kwéry ou Jerusalém-gwi omoirū hagwā Marta-pe ikypy'ýry ndive. Ou pono omboasy eterei okyvypy-pe.

²⁰ Ha upéi katu ogwahē-tama Hesu Marta renda-py. Oikwaa-ma ramo Hesu ogwahētaha ou-vy, oho ohogwaitī íxupe. Ha ikypy'ýry katu opyta hóga-py. Ha upéi Marta ogwahē ohogwaitī-vy Hesu-pe.

²¹ —Ereime ramo ra'e a-py, xe Járy, nomanói arā ra'e xe kyvy, he'i Hesu-pe.

²² —Omano jepe, erejerure va'e-rehe gwive, ome'ẽ arā voi nde-vy Nhandejáry. Upéa aikwaa voi, he'i íxupe Marta.

²³ —Oikove jevy va'erā nde kyvy, he'i Marta-pe.

²⁴ —Ha'e voi. Aikwaa voi upéa. Jaikove jevy va'eha áry-py oikove jevy va'erā, he'i íxupe Marta.

²⁵ Upéi Hesu he'i:

—Xe ko apomoingove jevy va'ety. Apomoingove meme va'ety voi xe. Xe-rehe ojerovia va'e gwive omano ramo jepe, xe ndive oikove meme va'erā, he'i.

²⁶ —Xe ndive oikove va'e gwive, xe-rehe ojerovia va'e gwive nomano mo'ãvéi-ma. Ha omano ramo katu, namombyry mo'ã voi opyta xéhegwi. Xe moirū va'erā voi opa e'ý reheve. Ererovia tipo ko xe nhe'ẽ? he'i Marta-pe Hesu.

²⁷ —Ha'e. Arovia-ma, xe Járy, he'i. —Cristo voi nde nipo ra'e. Nhandejáry ra'y voi nde ra'e. Ko yvy-py ou va'erā va'ekwe voi nde nipo ra'e, he'i Hesu-pe Marta.

Hesa'y-ma Hesu

²⁸ Upéa he'i rire oho ohenói okypy'ýry. Íxupe anho he'i:

—Ogwahē-ma ou-vy porombo'eháry. Ne renói-ma, he'i nhemi okypy'ýry-pe.

²⁹ Inhe'ẽ ohendu-ma ramo, pya'e opu'ã oho-ma Hesu ha-py.

³⁰ Ha Hesu nogwahēi vyteri tetā'i-my. Oĩ jotty Hesu Marta ohogwaitī íxupe hagwe-py.

³¹ Ha upéi katu ikypy'ýry Maria opu'ã osẽ pya'e oho iha-py.

Ohexa ramo hupive oho ave judeu kwéry hóga-py oī va'e, omoirū hagwā íxupe ou va'ekwe:

—Oho-tama ijyta-py Maria ojahe'o hagwā upe-py, he'i mo'ã hese hikwái. Upéixa ramo oho hupive hikwái.

³² Upéi ogwahē oho-vy Hesu renda-py. Ogwahē-ma ramo, ojeity Maria Hesu rovagwy-py:

—Ereime ramo ra'e a-py, xe Járy, nomanói arā ra'e xe kyvy, he'i íxupe.

³³ Upe ramo ha'e ohexa Maria hasẽ ramo. Indive oĩ va'e judeu hasẽ ramo ohexa ave. Ohexa ramo, ndovy'avéi-ma. Ndaipy'agwapyvéi-ma voi Hesu:

³⁴ —Kipy pemoĩ ra'e omano va'ekwe-pe, he'i oporandu-vy upe pygwa-pe.

—Eju katu erhexa hagwā, porombo'eháry, he'i íxupe hikwái.

³⁵ Hesa'y-ma Hesu.

³⁶ Aipo ramo:

—Hembiajhu tee voi nipo ra'e, he'i omano va'ekwe-rehe hikwái.

³⁷ Outro he'i:

—Hesapysō e'ý va'ekwe-pe ombohesa kuri. Mba'éixa Hesu ndojapói Lázaro-rehe ombogwera hagwā? he'i Hesu-rehe hikwái.

Hesu omoingove jevy omano va'ekwe-pe

³⁸ Upe ramo ndaipy'agwapy etéi jevy-ma Hesu oho Lázaro retekwe ombo-suru hagwe-py. Omoĩ araka'e itagwasu omboty hagwā.

³⁹ —Peipe'a katu imbotyha, he'i Hesu.

—Ani ereipe'a teĩ. Ine-ma voi ra'e, xe Járy, he'i íxupe. —Xáke ine-ma voi. Ojapo irundy áry ombosuru hagwe, he'i íxupe Marta, omano va'ekwe reindykwe.

⁴⁰ Upéi Hesu he'i:

—Ha'e-ma kuri nde-vy, Xe rerovia ramo ojehexa uka va'erã nde-vy Nhandejáry. Tuvixa mba'eha-rupi ojehexa uka va'erã nde-vy, he'i Marta-pe.

⁴¹ Upe ramo oipe'a ita imboty hagwe hikwái. Ha Hesu hovayva-ma oĩ-vy yvate-koty:

—Erehendu-ma kuri xe nhe'ẽ, xe Ru, he'i Nhandejáry-pe. —Upéa-gwi atima porã nde-vy, he'i.

⁴² —Xe rendu meme va'e nde. Aikwaa. Upéa ha'e-ma a-py ijaty va'e ohendu hagwã, he'i hagwã xe-rehe, “Nhandejáry remimbou nipo ra'e ha'e” he'i hagwã xe-rehe, he'i Nhandejáry-pe oraçao apo-vy.

⁴³ Upéa he'i rire, he'i:

—Lázaro, esẽ katu, he'i onhe'ẽ hatã-vy.

⁴⁴ Upe-ma ramo osẽ ou-vy omano va'ekwe. Onhenhugwãmba-ma ipy ipo ave ou-vy. Ohovami ra'e ao-py íxupe:

—Pejora katu íxugwi oho hagwã, he'i upe pygwa-pe Hesu.

*Onhombo'e mbo'e-ma okwa-vy mburuvixa kwéry ojuka hagwã Hesu-pe
(Mt 26.1-5; Mc 14.1-2; Lc 22.1-2)*

⁴⁵ Ha heta oĩ judeu Marta pohuháry ou va'ekwe. Hesu rembiapo ohexa ramo, ojerovia tee-ma hese oïko-vy.

⁴⁶ Ha ojerovia e'ŷ va'e katu oho jevy fariseu kwéry-pe omombe'u Hesu rembiapokwe.

⁴⁷ Upe-ma ramo ojogweroaty fariseu kwéry pa'i ruvixa kwéry ndive:

—Jahexa e'ŷ va'e heta ojapo va'e Hesu. Mbava'e po jajapo-ta hese?

⁴⁸ Anive erejapo teĩ koixagwa, ndaja'éi ramo íxupe, enterove ojerovia tee arã hese, he'i. —Aipo ramo, mburuvixa kwéry romano va'e omanda pohýi arã nhande-rehe kwéry. Ohundi arã Nhandejáry róga kakwaa nhamboete hatypy. Nhane retã ave ogwereko asy arã. Omosêmba va'erã nhande ruvixa kwéry hekovia omanda mbaraeteve hagwã nhande-rehe, he'i ojóupe hikwái.

⁴⁹ Upe ramo he'i íxupe kwéry Caifás. Upe ándo-py pa'i ruvixagwasu voi Caifás. Ha upéi he'i:

—Mba'eve ndapeikwaáiry voi peẽ, he'i.

⁵⁰ —Pejeapysaka katu xe nhe'ẽ-rehe. Nhane retã retã gwive ogwereko asy ramo, naiporãi arã nhande-vy. Nhande-vy iporãve arã nhande rekovía peteĩ va'e omano ramo, he'i Hesu-rehe ojogweroaty va'e-pe.

⁵¹ Upéa he'i-ma ramo nomombe'úi ojehegwigwa. Upe ándo-py oiko pa'i ruvixagwasu ramo. Upéa-gwi Hesu rekorã-rehe omotenonde uka íxupe Nhandejáry: “Judeu kwéry rekovia omano va'erã Hesu” he'i ojehegwigwa e'ŷ va'e omombe'u-vy.

⁵² Ndaha'éi judeu kwéry rekovia mante omano va'erã Hesu. Entéro Nhandejáry re'yí kwéry opa-rupi osarambi va'ekwe rekovia ave omano va'erã. Henda henda-rupi peteĩxa ijoja hagwã oiko-vy omano va'erã Hesu.

⁵³ Upéa-gwi upéa va'e áry gwive onhombo'e mbo'e-ma okwa-vy mburuvixa kwéry judeu va'e ojuka hagwã íxupe.

⁵⁴ Upéa-gwi ndogwatavéi-ma judeu kwéry oĩ ha-rupi. Oho oje'ói-vy tekwaty e'ŷ-koty. Efraim tetã-my oho. Upe-py gwemimbo'e kwéry ndive opyta.

⁵⁵ Ha upéi katu oiko-tama aretegwasu páscoa héry va'e, Egito yvy-gwi judeu rembypy osẽ hagwe áry arete héry va'e. Ne'írã oiko jave arete, heta judeu

oho Jerusalém-my. Gweko-py oho. Tenondeve oho onhemopotí uka hagwā Nhandejáry róga kakwaa-py.

⁵⁶ Ogwahē ramo upe-py osareko reko Hesu-rehe hikwái:

—Emombe'u katu ore-vy Hesu rehewa nhe'ẽ. Ou-ta para'e. Tapa ndou mo'ãi katu Nhandejáry róga kakwaa-py, peteĩ teĩ he'i ojóupe Nhandejáry róga-py.

⁵⁷ Pa'i ruvixa kwéry fariseu ndive oipyhyse íxupe. Upéa-gwi he'i:

—Ereikwaa ramo oimeha, emombe'u katu ore-vy, he'i Hesu-rehe omanda-vy hikwái.

12

Maria omohyakwā Hesu py

(Mt 26.6-13; Mc 14.3-9)

¹ Ha upéi katu oiko-ta aretegwasu páscoa héry va'e. Seis áry rire oiko-ta. Upe ramo Hesu ogwahē oho-vy Betânia tetã'i-my. Upe-py oiko Lázaro Hesu remimoingovekwe.

² Upe-py ogwahē rire Hesu, omongaru porã íxupe. Ha Marta ogweroja íxupe hemi'urã oiko-vy. Heta Hesu karo irũ. Ipa'ũ-my ave okaro Lázaro.

³ Upe ramo Lázaro reindy Maria ogweru hyakwā porã tee va'e, nardo héry va'e. Hyru rehewe peteĩ litro ogweru. Upe va'e hyakwā porã va'e hepy va'e. Upéi Maria onhohē Hesu py-rehe, omohyakwā-vy ipy. Upe rire ho'avuku-py oikyty ipy omokā hagwā. Ha ohasapa hyakwā. Ojohupa koty hyakwā.

⁴ Upe-ma ramo he'i Judas Iscariotes, Hesu mombe'uharã ipyhyharã-pe:

⁵ —Hepy eterei hyakwā va'e. Ma'erã nome'ẽi hepy-rehe ra'e? he'i. —Doze jasy omba'apo va'ekwe repy upe va'e. Ma'erã po nome'ẽi ra'e iporiahu va'e-pe hyakwā va'e repy? he'i mo'ã Judas hyakwā va'e-rehe.

⁶ Ndaha'éiry ome'ẽse-gwi iporiahu va'e-pe. Imondaháry voi Judas. Pirapire ryru-rehe onhangareko va'e. Ha hyru-py oĩ va'e omonda monda oiko-vy va'e.

⁷ Upe ramo he'i Hesu:

—Ani nde poxy teĩ Maria-rehe. Eheja taxe mohyakwā. Heko-rupi ha'e ou. Xe mohyakwāse rei amano e'ŷ ngatu. Upéa-gwi gweminhongatu omoĩ xe-rehe, he'i judeu rekoha-rehe.

⁸ —Oiko meme pene pa'ũ-rupi iporiahu va'e kwéry. Peme'ẽse ramo, peme'ẽ va'erã íxupe kwéry. Xe ae ndaiko are mo'ãi pene pa'ũ-rupi, he'i upe pygwa-pe Hesu.

Judeu kwéry onhombo'e mbo'e-ma Lázaro-pe ave ojuka hagwā

⁹ Ha upéi katu heta ijaty va'e, judeu kwéry va'e, ohendu Hesu oimeha Betânia tetã'i-my. Upéa-gwi oje'õi ohexava-y. Lázaro-pe, Hesu remimoingovekwe rexa-vy ave oje'õi.

¹⁰⁻¹¹ Ha pa'i ruvixa kwéry katu oje'õi ohexava-y va'e ndojohu porãi:

—Heta judeu ko nanhane moirûvái-ma, he'i. —Hemimoingovekwe-gwi ojehesa rerova-ma oiko-vy Hesu-rehe. Ojerovia-magwi, ojehesa rerova-ma hese, he'i Hesu-rehe Lázaro-rehe ave.

Upéa-gwi onhombo'e mbo'e-ma Lázaro-pe ave ojuka hagwā hikwái.

Ogwahē ou-vy Jerusalém tetã-my Hesu; mburika ári ogwahē ou-vy

(Mt 21.1-11; Mc 11.1-11; Lc 19.28-40)

¹² (y 17-18) Iko'ẽ-my heta oĩ ijaty va'e Jerusalém-my oho va'ekwe, páscoa aretegwasu-py oho va'ekwe. Upe ramo ohendu-ma Hesu rerakwā hikwái:

—Ogwahē-tama ou-vy Hesu, he'i ijaty va'e-pe Hesu rerakwā omombe'u-vy.

Upe-py oĩ Hesu rembiapo porã rexahare. Omoirû ra'e Hesu-pe ohenói ramo Lázaro-pe oyta-gwi osẽ jevy hagwā. Omoingove jevy jave Lázaro-pe,

omoirū ra'e íxupe hikwái. Upéa-gwi omombe'u mbe'u herakwā. Ha upéi katu henduhare oho ohogwaitī-vy íxupe:

—Jahexa e'ŷ va'e opu'akaha-py ojapo kuri Hesu, he'i hese omombe'u-vy. Upéa-gwi oho ohogwaitī-vy íxupe.

¹³ Upe-ma ramo gwī henduhare oikytī heraha-vy pindo rogwe hakā re-heve. Ohogwaitī-vy oho. He'i:

—Tonhemomba'egwasu katu Nhandejáry, he'i onhe'ẽ hatā-vy hikwái. — Nhandejáry réry-py ou va'e-pe tohovasa katu, he'i. —Nhande ruvixarā-pe tohovasa katu. Nhande Israel kwéry ruvixagwasurā-pe tohovasa, he'i Hesu-rehe onhe'ẽ hatā hatā-vy hikwái.*

¹⁴ Ha upéi katu Hesu ojohu gwenagwā mburika ra'y ojeupi hagwā hi'ári. Upéixa ete omombe'u va'ekwe Nhandejáry kватia nhe'ẽ Hesu rehewarā nhe'ẽ:

¹⁵ “Ani pekyhyje teĩ, he'i Sião mygwa-pe, Pene ruvixagwasurā ko ogwahē-ma ou-vy mburika ári ou. Upéa-gwi ani pekyhyje teĩ”* he'i Nhandejáry nhe'ẽ Jerusalém pygwa-rehe.

¹⁶ Upéixa voi he'i va'ekwe Nhandejáry kватia nhe'ẽ Hesu rekorā omombe'u-vy. Ha hemimbo'e ndoikwaái voi ra'e Hesu rekorā rehewa nhe'ẽ. Mburika ári oho ramo, mbava'e-pe po he'ise upe va'e ndoikwaáiry voi. Ha onhembotuvixa mba'e rire katu Hesu, oikove jevy rire katu, imandu'a jevy Nhandejáry kватia nhe'ẽ-rehe hikwái. Hesu rekorā rehewa nhe'ẽ-rehe imandu'a jevy hikwái. Upe ramo:

—Nhandejáry kватia he'i hagwe-rami oiko nipo ra'e Hesu-pe. Hesu-pe jajapo va'ekwe, Nhandejáry nhe'ẽ-rupi jajapo nipo ra'e íxupe, he'i omombe'u ojóupe hemimbo'e kwéry.

Ha mburika ra'y ári ou jave omboete ete Hesu-pe ijaty aty va'e kwéry.

¹⁷⁻¹⁸ (-)

¹⁹ Ha fariseu kwéry:

—Erehexa pa? Enterove va'e ko ojehesa rerovapa-ma hese hikwái. Ha ojehesa rerova hagwā hese ndikatúi jajoko, he'i ojóupe fariseu kwéry.

“Orohexase Hesu-pe” he'i judeu e'ŷ va'e grego-py onhe'ẽ va'e

²⁰ Ha Jerusalém-py ogwahē ogwa'ẽ-vy heta eta va'ekwe aretegwasu mboeteha. Ipa'ũ-my oĩ ave gwī judeu e'ŷ va'e grego-py onhe'ẽ va'e.

²¹ Upe ramo ou Filipe oĩ ha-py. Filipe Galiléia yvy pygwa voi. Betsaida tetā mygwa voi. Ha upéi:

—Mba'ejáry, orohexase Hesu-pe, he'i Filipe-pe.

Oporandu jevy jevy oho hagwā-rehe.

²² Upe ramo oho omombe'u André-pe. Upéi mokōive oho omombe'u Hesu-pe.

²³ Inhe'ẽ ohendu ramo, he'i Hesu:

—Xe Nhande Ryke'y tee va'e. Ogwahē-ma anhemomba'egwasu ukaha óra, he'i.

²⁴ —Amombe'u-ta peẽ-my anhetegwa tee va'e. Xejehegwā amombe'u-ta trigo ra'ŷi rehewa nhe'ẽ-rami. Trigo ra'ŷi nhanhotŷ va'e yvy-py henhoi hagwā. Henhoi e'ŷ ramo trigo ra'ŷi mante oĩ. Peteĩ mante oiko. Ha henhoi ramo katu ndoikovéi-ma ha'ŷigwe. Ndoikovéi ójehe. Henhoi ijagwyje hagwā, onhembohetave hagwā, he'i.

²⁵ —Upéixa ete gwekove-rehe hakate'ŷ va'e, ojehéte oiko va'e, onhehundipa rei va'erā hekove. Ndotopái va'erā gwekove repyrā. Ha gwakate'ŷ hagwā

gwekove-rehe nopenái va'e katu ko yvy ári, omoī ngatu va'erā gwekove Nhandejáry ndive oiko opa e'ŷ reheve hagwā, he'i.

²⁶ —Xe rembigwái ramo oikose va'e gwive taxe moirū katu, he'i. —Upéixa ramo xe aime ha-rupi, xe ndive oiko va'erā ave xe rembigwái. Xe rembigwái va'e gwive omboete va'erā íxupe xe Ru, he'i upe pygwa-pe Hesu.

Kurusu-rehe omanotaha omombe'u Hesu

²⁷ Ha upéi katu he'i jevy upe pygwa-pe Hesu:

—Ko'ángā katu ajepy'apy-ma xéjehe, he'i. —Ndaxe py'agwapyvéi-ma xéjehe. Mbava'e po ha'e-ta xe Ru-pe, ndaikwaái. Ha'e-ta para'e, Xe resende katu xe áry-py. Xe amano hagwā áry-py xe resende katu, ha'e-ta para'e. Nahániry. Xe resende katu, aipo nda'e mo'âiry. Amano hagwā-ma agwahē aju-vy xe óra-py, he'i.

²⁸ —Tomomba'egwasu uka nde réry, he'i Gwu-pe.

Upe-ma ramo ohendu yváy-gwi onhe'ẽ va'e:

—Xe réry amomba'egwasu-ma kuri. Áy amomba'egwasu jevy-ta, he'i upe pygwa-pe Túvy.

²⁹ Ha ijaty va'e ohendu ave onhe'ẽ va'e. Hyapu va'e-rami ae ohendu inhe'ẽ:

—Hyapu-ma. Osunu-ma, he'i mo'ã yváy pygwa nhe'ẽ rendu-vy hikwái.

Outro he'i:

—Nhandejáry rembigwái yváy pygwa omombe'u íxupe, he'i mo'ã onhe'ẽ va'ekwe-rehe.

³⁰ Upéixa ramo he'i Hesu:

—Ndaha'éiry xe-vy anho omombe'u va'ekwe. Peẽ-my ave omombe'u onhe'ẽ va'e, he'i.

³¹ —Áy ogwahē-ma ãygwa óra. Yvypóry-pe ahexa uka-tama hekoha vaiha. Ha yvypóry ruvixa-pe amosē-tama imondo-vy, he'i anháy ruvixa-rehe.

³² —Ha xe ko, ko yvy-gwi xe rupi rire kurusu-rehe, anhemoirū uka-ta entéro kente kwéry-pe, he'i ijaty va'e-pe Hesu.

³³ Upéa he'i kurusu-rehe omanotaha omombe'u-vy.

³⁴ Ha upéi he'i íxupe ijaty va'e kwéry:

—Nhandejáry kwatia nhe'ẽ, orohendu va'e, he'i no'ã-rami, “Nomanói va'erā Cristo. Oiko meme va'erā opa e'ŷ-rehe” he'i. Upéixa ramo ma'erā, “Ohupi va'erā omoī-vy ko yvy-gwi Nhande Ryke'y tee va'e-pe” ere kuri ore-vy? Kiva'e po ko Nhande Ryke'y tee va'e, ndoroikwaái, he'i íxupe hikwái.*

³⁵ Upéi he'i Hesu:

—Sapy'a apombo'eve-ta ohesape va'e-rami. Ha upe rire katu, aha jevy-ma va'erā, he'i. —Pene pa'ũ-rupi xe aime jave, arakatu-rupi oiko va'e-rami tapeiko kena. Arakatu-rupi peiko ramo, ndapeikói va'erā hesapyo e'ŷ oiko va'e-rami. Pytū-rupi oiko va'e gwive ndohexáiry gwaperā.

³⁶ Apohesape jave pejerovia katu xe-rehe. Upéixa peiko-ma va'erā arakatu-rupi meme oiko va'e-rami, he'i ijaty va'e-pe Hesu.*

Judeu kwéry ndogweroviáiry Hesu nhe'ẽ

Onhe'ẽ oĩ-vy rire onhemo'ã-ma oho-vy Hesu. Ijaty va'e-gwi okanhy-ma oho-vy.

³⁷ Heta jahexa e'ŷ va'e gwive hexapyrā-rupi voi ojapo-ma. Ohexa jepe, ndojerovia etéi voi hese hikwái.

³⁸ Yma va'ekwe omoī kwatia-rehe. Hesu rekorā omoī va'ekwe Nhandejáry nhe'ẽ-py omombe'u va'ety héry va'e Isaías. Ohai va'ekwe no'ã-rami:

* ^{12:34} Sl 110.4; Is 9.7; Ez 37.25; Dn 7.14 * ^{12:36} Jo 1.4-5; 3.19,21; 8.12; Ef 5.8-13; 1 Ts 5.4-5; 1 Jo 1.5-7

"Kiva'e po ogwerovia nhane remimombe'u, xe Járy? Kiva'e-pe po ohexá uka Nhandejáry ipu'akaha?"*

he'i Nhandejáry nhe'ë.

39 Upéa-gwi hembihaike-rami ndogweroviáiry ave Hesu nhe'ë hikwái.

Ohai jevy va'ekwe Isaías no'ã-rami:

40 "Ogwerovia e'ë va'e-pe omoingo Nhandejáry pytû-rupi. Inharandu porârágwe oipe'apa íxugwi. Upéa-rehe hesapyo e'ë va'e-rami oiko. Nahi'arandu porãi voi. Ndojeréi Nhandejáry-rehe omoirû hagwã íxupe, Nhandejáry ombogwera hagwã íxupe kwéry"*

he'i Nhandejáry nhe'ë. Upéixa ete ohai va'ekwe judeu rekorã Isaías amyrí. Upéa-gwi ohai hagwe-rami ndikatúi ojerovia Hesu-rehe hikwái.

41 Ha Isaías upéte ojehexá uka va'ekwe Hesu rekoha. "Tuvixa mba'e" he'i Hesu rexa-vy. Upéa-gwi omoï va'ekwe kwatia-rehe Hesu rehewarã.

42 Judeu kwéry ndogweroviáí ramo jepe, heta oï mburuvixa judeu va'e ojerovia joto hese. Ha atýra-py katu nomombe'úiry ojeroviaha. Ikyhyje fariseu kwéry-gwi. Nonhemosë ukaséi ojeporahéi haty haty-gwi.

43 Onhemboete ukase ramo jepe Nhandejáry-pe, ojehexá uka porâse ave oiko-vy teko rei-pe. Upéa-gwi nomombe'úiry ojeroviaha atýra-py.

"Xe nhe'ë mbojevy va'e gwive, hekoha vai mombe'uharã oï ave íxupe" he'i Hesu

44 Ha upéi katu onhe'ë hatã Hesu:

—Xe-rehe ojerovia tee va'e gwive ojerovia xe mbouhare-rehe ave. Ndaha'éiry xe-rehete anho ojerovia va'e, he'i.

45 —Xe reko ohexá kwaa va'e gwive, xe mbouhare reko ohexá kwaa ave.

46 Yvypóry kwéry-pe ahésape hagwã aju va'ekwe xe-rehe ojerovia tee va'e gwive oiko e'ë hagwã pytû-rupi.

47 Xe remimombe'u renduse e'ë va'e gwive, namombe'u mo'ãi íxupe hekoha vaiha. Ndajúi va'ekwe yvypóry rekoha vai mombe'u-vy. Aresende-vy ae aju va'ekwe, he'i.

48 —Ha xe nhe'ë mbojevy va'e gwive, xe nhe'ë nohenduséi va'e gwive, oikwaa va'erã gwekoha vaiha. Xe aju jevytaha áry-py oikwaa va'erã gwembiapo vaikwe. Áy xe remimombe'u nohenduséi-gwi ombohasa asy va'erã íxupe kwéry Nhandejáry, he'i.

49 —Xe jehegwigwa namombe'úi va'e. Xe Ru nhe'ë ae amombe'u. Xe Ru xe mbouhare omombe'u xe-vy xe nhe'ë. Xe remimombe'urã ave omombe'u xe-vy. Upéa-gwi xe aju jevytaha áry-py xe nhe'ë nohenduséi-gwi ojekwaapa va'erã íxupe hembiapo vaikwe.

50 Ha xe Ru omombe'u va'e xe-vy xe nhe'ë katu ohendu va'e gwive amoingove va'erã íxupe Nhandejáry ndive opa e'ë reheve oiko hagwã. Xe jehegwigwa nhe'ë namombe'úi. Xe nhe'ë. Xe Ru omombe'u va'ekwe ae amombe'u voi xe, he'i Hesu upe pygwa-pe.

13

Hesu oipyhéi peteï teï gwemimbo'e kwéry-pe

1 Ha upéi katu ogwahë-tama aretegwasu héry va'e páscoa. Ogwahë-ma Hesu omanoha óra oheja hagwã ko yvy oho-vy. Ojeupi jevy-tama oho-vy Gwu oiko ha-py. Upéa oikwaa voi Hesu. Ko yvy pygwa he'ýi va'e hembiyahu meme voi. Meme ete ohayhu íxupe kwéry. Omano peve ohayhu.

* 12:38 Is 53.1 * 12:40 Is 6.10

² Okaru jave gwemimbo'e kwéry ndive, anháy ruvixa anhaygwasu ombo'e ra'e Simão ra'y Judas Iscariotes-pe. Omomandu'a uka ra'e Hesu pyhyharã-rehe:

—Emombe'u katu Hesu oimeha a-py. Ipyhyharã-pe emombe'u katu, he'i ra'e íxupe anhaygwasu.

³ Ha Nhandejáry omoingo ra'e Hesu-pe enterove va'e ruvixarã. Upéa oikwaa voi Hesu. Nhandejáry-gwi voi ou ra'e. Ko'ánga oho jevy-tama Nhandejáry oiko ha-py. Upéa oikwaa voi ave Hesu.

⁴ Upe-ma ramo opu'ã omboi oao jo'a. Oipyhy jepykytyhaty. Gwumby-rupi omoõ oku'a jopy hagwã.

⁵ Upéi hyrurã-py y onhohẽ oipyhéi-ma peteĩ teĩ gwemimbo'e kwéry-pe oipyhéi. Peteĩ teĩ oipyhéi rire omokã jepykytyhaty-py.

⁶ Ogwahẽ ramo Simão Pedro renda-py:

—Nde ko xe pyhéi-ta tipo, xe Járy? he'i íxupe oporandu-vy.

⁷ —Ko'ánga ndereikwaái voi mbava'e po xe ajapo-ta nde-rehe. Ha nde-vy oikwaa ukataha óra-py ereikwaa va'erã, he'i Simão Pedro-pe.

Upe ramo he'i:

⁸ —Xe ko apa e'ý ngatu nde ndaxe pyhéiry va'erã, he'i íxupe Pedro.

—Ndoropyhéiry ramo, naxe moirũ mo'ãvéi-ma voi nde, he'i Pedro-pe Hesu.

⁹ —Aipo ramo, he'i —xe pyhéi katu, xe Járy. Upéi xe pohéi mani ave, he'i.

—Xe akâhéi mani ave, he'i íxupe Pedro.

¹⁰ Upe ramo Hesu he'i:

—Ne nhe'ẽ katu ndajapo mo'ãi. Jajahu rire, nhane potĩ-ma voi, he'i. —Nhande jajahu rire, nhande rete gwive ipotĩ. Upéixa ramo nhande py mante jaikyty. Upéixa ete peteĩ teĩ pende py'a onhemopotĩ-ma ãy. Ha peteĩ va'e katu opyta ipy'a ky'a reheve.

¹¹ Upéa he'i kiva'e po oikwaa uka-ta ipyhyharã-pe oikwaa-gwi voi.

¹² Ha upéi katu oipyhéi rire omonde jevy oao jo'a omoirũ jevy hagwã íxupe kwéry:

—Peikwaa tipo mbava'e ajapo kuri pende-rehe, he'i.

¹³ —Peẽ, “Ore mbo'eháry” peje voi xe-rehe. “Ore járy” peje xe-rehe. Peje porã voi, he'i. —Pene mbo'eháry voi xe. Pende járy ave voi xe, he'i. —Peje porã voi, he'i.

¹⁴ —Pende járy jepe, pene mbo'eháry jepe apopyhéi jaty kuri, he'i. —Upéa-gwi iporã pejopyhéi.

¹⁵ Oropyhéi ranhe xe reko ra'ã hagwã peẽ, peiko hagwã-ma xe rekoha-rupi, penhopytygwõ hagwã tembigwái-rami.

¹⁶ Amombe'u-ta peẽ-my anhetegwa tee va'e. Ani, “Hembigwái voi xe jepe, xe járy-gwi tuvixave va'e voi xe” peje mo'ã pende py'apy-py. “Hemimondo voi xe jepe, xe mondohare-gwi tuvixave va'e voi xe” ani aipo peje mo'ã pende py'apy-py.*

¹⁷ Pene rembiaporã peikwaa voi. Upéa pejapo ramo pevy'a va'erã, he'i.

¹⁸ —Xe rembiporavo voi peẽ apokwaa voi. Ha pene pa'ũ-rupi oĩ peteĩ hembiapo porã e'ý va'e. Ovy'a va'erã, nda'éiry hese. Yma gwive he'i va'ekwe Nhandejáry nhe'ẽ upe va'e-rehe:

“Xe karu irũ omoirũ-ma xe a'e e'ýha-pe omoirũ”

he'i Nhandejáry nhe'ẽ. Upéa-gwi Nhandejáry nhe'ẽ he'i hagwe-rami omoirũ-ma kuri xe a'e e'ýha-pe xe irũ, he'i Judas Iscariotes-rehe.

¹⁹ —Upéa ãy ha'e-ma peẽ-my peje hagwã xe-rehe, “Nhandejáry voi Hesu nipo ra'e” peje hagwã xe-rehe. Ne'írã ojehu xe-vy mba'eve. Ha ojehu rire katu,

* ^{13:16} Mt 20.24-28; 23.8-12; Mc 9.35; Fp 2.3-7; 1 Pe 5.3

peje va'erā xe-rehe, "Hesu oikwaa ra'e ojehegwa nhe'ẽ ra'e. Nhandejáry voi Hesu nipo ra'e" peje va'erā xe-rehe, he'i.*

²⁰ —Amombe'u-ta peẽ-my anhetegwa tee va'e. Xe remimondo omogwahē va'e, xe mogwahē ave. Ha xe mogwahē va'e xe mbouhare-pe omogwahē ave, he'i gwemimbo'e kwéry-pe Hesu.

"Pene pa'ũ-rupi peteĩ va'e xe mombe'u va'erā xe pyhyharā-pe" he'i gwemimbo'e kwéry-pe Hesu

²¹ Upéa he'i rire, ndaipy'agwapyvái-ma Hesu oiko-vy. Omombe'u porã gwemimbo'e kwéry-pe:

—Amombe'u-ta peẽ-my anhetegwa tee va'e. Pene pa'ũ-rupi peteĩ va'e xe mombe'u va'erā xe pyhyharā-pe, he'i íxupe kwéry.

²² Upe ramo osareko ojóehe hikwái. Kiva'e-rehe po he'i Hesu ndoikwaáiry.

²³ Ha xe katu Hesu remimbo'e, ijyke-rehe agwapy va'e. Xe Hesu rembiayhu voi.

²⁴ Upe ramo Simão Pedro xe renói arepara hagwã hese. Upéi he'i:

—Kiva'e-rehe tipo ere kuri, eporandu katu íxupe, he'i xe-vy Pedro.

²⁵ Upe ramo ojoyke reheve aĩ ramo, ha'e Hesu-pe:

—Kiva'e-rehe tipo ere kuri, xe Járy —ha'e Hesu-pe anho aporandu-vy.

Ha Hesu he'i:

²⁶ —Upe ame'ẽ-ta va'e íxupe mbojape pehẽgwe amoakŷ rire. Upe va'e-pe ame'ẽ-ta, he'i xe-vy Hesu.

Upe-ma ramo oipyhy-ma mbojape. Hyru-py omoakŷ rire ome'ẽ Simão Iscariotes ra'y Judas-pe.

²⁷ Upe-ma ramo Judas oipyhy rire íxugwi mbojape, oheko me'ẽ-ma íxupe anháy ruvixa anhaygwasu. He'i íxupe Hesu:

—Ejapo pya'e katu erejapose va'e, he'i Judas-pe.

²⁸ Ikaru irũ mbava'e-pe po he'ise Hesu ndoikwaái voi.

²⁹ Ha Judas katu pirapire ryru-rehe onhangareko va'e. Upéa-gwi he'i rei hese opy'apy-py hikwái: "Ojogwa-ta para'e nhane remi'urâ" he'i rei hese. "Ome'ẽ-ta para'e iporiahu va'e-pe" he'i rei hese opy'apy-py.

³⁰ Ha Judas mbojape oipyhy rire-ma íxugwi, pya'e osẽ oho-vy. Pytū-ma ramo osẽ oho-vy.

"Xe apohayhuha-rami, pejohayhu katu peẽ ave" he'i Hesu gwemimbo'e kwéry-pe

³¹ Osẽ rire, he'i jevy Hesu gwemimbo'e kwéry-pe:

—Ko'ánga xe Nhande Ryke'y tee va'e, aikwaa uka-ta peẽ-my xe rekoha porã tee. Xe-rehe ohexaa kwaa va'e, ohexaa kwaa ave Nhandejáry-rehe hekoha porã tee va'e.

³² Nhandejáry rekoha porã tee aikwaa-gwi, Nhandejáry oiko ha-rupi ohexaa uka-ta enterove ohexapa va'erā xe rekoha porã tee. Áy katu xe rekoha porã tee ohexaa uka-tama, he'i.

³³ —Naxe are mo'ái pene pa'ũ-rupi, xe ra'y kwéry. Aha rire, xe reka va'erā. Ko'ánga xe ha'e hagwe-rami judeu kwéry-pe, amombe'u-ta peẽ-my. Xe aha hagwã-py ndikatúi peho ave, he'i.

³⁴ —Áy ame'ẽ-ta peẽ-my pende reko pyahurâ: Pejohayhu rei katu. Xe apohayhuha-rami, pejohayhu katu peẽ ave.

³⁵ Pejohayhu peiko-vy ramo, "Hesu nhe'ẽ renduha tee voi nipo ra'e" entéro he'i va'erā pende-rehe.*

* **13:19** Sl 41.9; Mt 26.20-25; Mc 14.17-21; Lc 22.21-23 * **13:35** Mt 22.39; Jo 15.12; Gl 5.14; 1 Pe 1.22; 1 Jo 3.11; 4.7

“Ne’írã osapukái ramo gáju, ere-ta xe-rehe mbohapyha, Ndaikwaái voi íxupe, ere-tama xe-rehe” he’i Pedro-pe Hesu

³⁶ Ha upéi katu oporandu íxupe Simão Pedro:

—Kipy tipo ereho-ta, xe Járy? he’i Hesu-pe.

—Xe aha hagwã-py ndikatúi ereho ãy. Ha upe rire katu ereho va'erã xe rapykwréi, he’i Pedro-pe.

³⁷ —Ma'erã tipo, xe Járy, ãy voi nderehejái aha nde rapykwréi, he’i íxupe. —Nde rekoviá amano hagwã-rami aĩ, he’i íxupe Pedro.

³⁸ —Upéa ere ramo, anhetegwa tipo ere xe-vy? he’i. —Amombe'u-ta nde-vy anhetegwa tee va'e. Ne’írã osapukái ramo gáju, ere mo’ã va'erã xe-rehe mbohapyha, “Ndaikwaái voi íxupe” ere mo’ã va'erã xe-rehe, he’i Pedro-pe Hesu.*

14

“Xe ko Nhandejáry rape rexaa ukaha voi” onhe’ë paha-vyma he’i ójehe Hesu

¹ Upe ramo Hesu he’i jevy gwemimbo'e kwéry-pe:

—Ndikatuvéi xe moirũ ramo jepe, anive pende py'agwapy e'ŷ peiko-vy. Pejerovia katu peiko-vy Nhandejáry-rehe. Pejerovia katu peiko-vy xe-rehe ave, he’i.

² —Xe Ru oiko ha-py heta oĩ jaiko hagwã. Ha ndaipóri ramo ra'e pene renagwã katu, amombe'u ave arã ra'e peẽ-my ra'e. Ha aha-tama amoĩ porã porã hagwã pene renagwã, he’i.

³ —Amoĩ porãmba rire katu, aju jevy arã pende-rehe apogweraha hagwã xe aiko ha-py peẽ ave peiko hagwã xe ndive.*

⁴ Xe agwahê hagwã-py peikwaa voi. Xe raperã peikwaa ave, he’i gwemimbo'e kwéry-pe Hesu.

⁵ Upéi Tomé he’i:

—Kipy po eregwahê-ta, ndoroikwaái voi, ore Járy. Upéa-gwi ndikatúi oroikwaa nde raperã, he’i íxupe Tomé.

⁶ Upéi Hesu he’i:

—Xe ko Nhandejáry rape rexaa ukaha voi, he’i ójehe. —Xe apu e'ŷ va'e. Anhetegwa mante mombe'uha voi xe, he’i ójehe. —Apomoingove va'e xe. Pene moingoveha voi xe, he’i ójehe Hesu. —Ojéhegwi rei nogwahêi va'erã oho-vy xe Ru oiko ha-py avave. Ha xe ae araha ramo katu íxupe, ogwahê va'erã oho-vy xe Ru ha-py.*

⁷ Xe-rehe pehexa kwaa ramo ra'e, xe Ru-rehe pehexa kwaa ave arã ra'e. Ha ko'ângä katu pehexa kwaa-ma hese. Peikwaa-ma hekoha, he’i Tomé-pe.

⁸ Upéi he’i Filipe:

—Ehexa uka katu ore-vy nde Ru, ore Járy. Xe remiporandu va'e orohexa-ma ramo, orovy'a arã. Naporanduvéi-ma arã nde-vy, he’i íxupe Filipe.

⁹ Upe ramo Hesu he’i:

—Xe are-ma voi pene pa'û-rupi aiko-vy. Ma'erã nderehexa kwaái vyteri xe-rehe, Filipe? Xe-rehe ohexa kwaa va'e, xe Ru-rehe ohexa kwaa-ma ave. Oikwaa-ma ave xe Ru-pe. Upéa-gwi ma'erã, “Ehexa uka katu ore-vy nde Ru” ere joty xe-vy. Ma'erã xe Ru erhexase joty? he’i.

¹⁰ —Xe reja e'ŷha voi xe Ru. Hembieja e'ŷ voi xe. Peteixa oronhomoirũ va'e voi, he’i. —Ma'erã po ndereroviáí xe nhe'ë, he’i Filipe-pe.

Upéi he’i jevy gwemimbo'e kwéry-pe:

* **13:38** Mt 26.31-35; Mc 14.27-31; Lc 22.31-34 * **14:3** 2 Co 5.1; Ap 21.1-4 * **14:6** At 4.12; Ef 2.18; 3.12

—Ndaha'éi xe jehegwigwa xe remimombe'u va'e peẽ-my. Xe Ru ae peteixa xe moirũ va'e. Xe Ru ae ojapo uka xe-vy xe rembiaporã.

¹¹ Peteixa xe moirũ va'e xe Ru. Ha peteixa amoirũ va'e íxupe. Perovia katu xe nhe'ẽ. Ha ndaperoviaséi ramo jepe, pehexa-ma niko xe rembiapo porã. Upéa-rehe xe rerovia katu, he'i.*

¹² —Amombe'u-ta peẽ-my anhetegwa tee va'e. Aha jevy-ta xe xe Ru oiko ha-py. Upéa-gwi xe-rehe ojerovia-ma oiko-vy va'e gwive, aipytygwõ va'erã íxupe kwéry. Xe rembiapo-rami hembiaapo porã va'erã. Hembiaapo porãve rãve va'erã katu aipytygwõ ramo íxupe, he'i.

¹³ —Oime raẽ va'e-rehe xe réry-py pejerure ramo, xe réry pehenói ramo, ajapo va'erã peẽ-my, aikwaa uka hagwã xe Ru rekoha porã tee peẽ-my.

¹⁴ Oime raẽ va'e-rehe pejerure ramo xe réry-py, xe-rehe pejerovia-gwi, ajapo va'erã peẽ-my, he'i gwemimbo'e kwéry-pe Hesu.*

“Xe rekovia ome'ẽ va'erã peẽ-my pene pytygwõharã pene ndive oiko meme va'erã” he'i Hesu

(Jo 7.38-39; 16.5,7,13; At 2.2-4; Rm 5.5)

¹⁵ Upéi he'i jevy Hesu:

—“Xe rembiayhu va'e voi Hesu” peje ramo xe-rehe, xe nhe'ẽ pejapo-ma va'erã, he'i.

¹⁶ —Xe nhe'ẽ pejapo ramo, xe ko ajerure va'erã xe Ru-pe pende-rehe. Xe rekovia ome'ẽ va'erã peẽ-my pene pytygwõharã. Pene ndive oiko meme hagwã ome'ẽ va'erã peẽ-my.

¹⁷ Upe va'e hemime'ẽrã Nhe'ẽ Marangatu tee va'e voi, anhetegwa tee va'e mombe'uhu voi ha'e. Ha teko rei-pe katu nogwahẽ mo'ãiry ou-vy Nhe'ẽ Marangatu tee va'e. Ndohexa kwaái hese teko rei. Ndoikwaáiry íxupe. Ha peẽ katu peikwaa voi íxupe. Pene ndive oiko Nhe'ẽ Marangatu tee va'e. Pende py'apy-py oiko va'erã, he'i.

¹⁸ —Pene tyre'ỹ hagwã ndapoheja mo'ãi. Pene renda-py aju jevy va'erã, he'i.

¹⁹ —Ãy ndaxe rexare mo'ãi ko yvypóry kwéry. Upe rire ndaxe rexare mo'ãvlei jevy-ma. Ndaxe rexái ramo jepe teko rei, peẽ katu xe rexare joty va'erã. Xe aikove jevy-ma va'erã. Upéa-gwi xe jave peikove ave va'erã peẽ.

²⁰ Xe aikove jevytaha áry-py peje va'erã xe-rehe, “Peteixa amoirũ nipo ra'e Gwu-pe. Peteixa nhamoirũ nipo ra'e Hesu-pe. Peteixa nhane moirũ nipo ra'e Hesu” peje va'erã xe-rehe, he'i. —Nhanhomoirũha peẽ peikwaa porã va'erã voi, he'i.

²¹ —Xe nhe'ẽ renduha, xe nhe'ẽ apoha, xe rayhuha voi upé va'e. Ha xe rayhu va'e, ohayhu ave va'erã íxupe xe Ru ave. Xe ave ahayhu ave va'erã íxupe. Ajekwaa uka ave va'erã íxupe, he'i gwemimbo'e kwéry-pe Hesu.

²² Upe-ma ramo oporandu íxupe Judas, ndaha'éi upé Judas ipyhy ukaharã:

—Ma'erã po nderejekwaa uka mo'ãi entéro yvypóry-pe, he'i íxupe. —Ma'erã po ore-vy anho erejekwaa uka-ta, ore Járy? he'i íxupe Judas oporandu-vy.

²³ Upéi Hesu he'i íxupe kwéry:

—Xe rayhu va'e gwive ohendu va'erã xe nhe'ẽ. Ohayhu va'erã íxupe xe Ru ave. Upéa-gwi orogwahẽ va'erã íxupe oroju-vy. Hendive oroiko va'erã, he'i Gwu-rehe, ójehave.

²⁴ —Ha xe rayhu e'ỹ va'e gwive, nohendu mo'ãi xe nhe'ẽ. Ha xe remimombe'u peẽ-my ndaha'éi xe jehegwigwa. Xe Ru xe mbouhare remimombe'u ae amombe'u peẽ-my, he'i.

²⁵ —Upe va'e peẽ-my xe remimombe'u voi pene pa'ũ-rupi aime jave.

* **14:11** Jo 10.30; Cl 2.9 * **14:14** Mt 18.19-20; Mc 11.24; Lc 11.9-10; Jo 15.7; 16.23; 1 Jo 5.14-15

²⁶ Ha ndaikovéi ramo, pene mbo'e va'erã pene pytygwõharã. Nhe'ẽ Marangatu tee va'e voi upe va'e. Upe va'e xe Ru remimbourã xe réry-py voi. Entéro xe-rehe omombe'u va'ekwe-rehe gwive, entéro xe remimombe'ukwe-rehe ave pene momandu'a uka va'erã, he'i.*

²⁷ —“Tereho katu nde py'agwapy reheve” he'i rei teko rei. Ha xe katu nda'e reíry upéixa. Orombopy'agwapy-ta. Xe py'agwapyha-rami orombopy'agwapy-ta. Upéa-gwi anive pene py'agwapy e'ŷ tei. Anive pekyhyje tei, he'i.*

²⁸ —“Aha jevy-ta. Ha upe rire katu aju jevy-ta pene ndive apyta hagwã” ha'e kuri peẽ-my. Upéa pehendu voi. Ñy xe rayhu tee ramo, pevy'a arã ra'e. Xe Ru ko tuvixave va'e xéhegwi. Aha-ta xe Ru-pe agwahẽ. Upéa-gwi aha jevy ramo jepe, pevy'a arã ra'e.

²⁹ Aha e'ŷ reheve amombe'u-ma peẽ-my xe aha hagwã. Aha rire-ma katu, aipota, “Anhetegwa voi nipo ra'e hemimombe'u” peje va'erã xe-rehe pene mandu'a-vy. Upéa-gwi amombe'u ãy xe aha hagwã peẽ-my.

³⁰ Ñy ogwahẽ-ta ou-vy anhaygwasu gwĩ Nhandejáry-rehe ija'e'ŷha-rehe omanda va'e voi. Upéa-gwi nanhomongoeta puku mo'ãi pene ndive. Ndaipu'akái xe-rehe anhaygwasu. Xe ndaikóiry inhe'ẽ-rupi. Xe Ru nhe'ẽ-py ae aiko.

³¹ Aipota teko rei oikwaa xe ahayhuha xe Ru-pe. Upéa-gwi xe Ru he'i va'e gwive ajapo-ta inhe'ẽ, he'i. —Nhapu'ã katu ko'a-gwi jaha, he'i.

15

“Uva máta tee va'e he'ise xe-rehe” he'i ójehe Hesu

¹ Upéi he'i jevy gwemimbo'e kwéry-pe Hesu:

—Amombe'u-ta peẽ-my xe rehegwa nhe'ẽ uva máta rehegwa nhe'ẽ-rami. Uva máta tee va'e he'ise xe-rehe. Uva máta járy he'ise xe Ru-rehe.

² Hakã hi'a e'ŷ va'erã gwive oipe'a. Uva máta-gwi oipe'a. Ha hakã hi'a porã va'erã katu oheja íxupe. Hakã gwyre mante oipe'a íxugwi. Hi'a porãve hagwã omopotí íxupe, he'i.

³ —Upéixa pene potí-ma pende py'a-py. Xe remimombe'u pehendu va'e gwive pene potí-ma voi pende py'a-py.

⁴ Xe moirũ katu peiko-vy peteixa. Ha xe ave peteixa oromoirũ-ta. Imáta-gwi oipe'a hakã va'e-rami upe va'e hakã ndahi'áiry. Upéixa ete naxe moirũvéi-ma ramo, napene rembiapo porãvéi-ma va'erã. Mba'eve ndapejapovéi-ma va'erã, he'i.

⁵ —Ha uva máta he'ise xe-rehe. Pende-rehe he'ise uva rakã. Peteixa xe moirũ va'e, xe ave amoirũ íxupe va'e, upe va'e heta hembiapo porã porã va'erã hi'a porã porã oĩ va'e-rami. Xe e'ŷ reheve mba'eve ete voi ndapejapo mo'ávéi-ma va'erã, he'i.

⁶ —Ha peteixa xe moirũ e'ŷ va'e katu hi'a e'ŷ va'e rakã-rami onhemombo va'erã. Ipiru va'erã. Ipiru rire omboaty va'erã ohapy hagwã-py, he'i.

⁷ —Peteixa xe moirũ ramo, pende py'a-py oiko ramo xe nhe'ẽ, oime raẽ va'e-rehe pejerure ramo katu, ome'ẽ va'erã peẽ-my.

⁸ Pene rembiapo porã porã ramo, ohexa kwaa va'erã xe Ru-rehe hekoha porã tee. Upéixa ramo pene rembiapo porã ramo, xe remimbo'e ramo peiko va'erã.

⁹ Xe Ru xe rayhuha-rami, xe ave apohayhu peẽ-my. Pene mandu'a meme katu apohayhuha-rehe.

* 14:26 1 Co 2.12 * 14:27 Fp 4.7; Cl 3.15

10 Xe nhe'ẽ pehendu peiko-vy ramo, pene mandu'a meme va'erã apohayhuha-rehe. Upéixa voi xe Ru nhe'ẽ ahendu-gwi xe mandu'a meme xe rayhuha-rehe, he'i.

11 —Upéa ha'e-ma peẽ-my pevy'a hagwã. Xe avy'aha-rami aipota pevy'a ave. Pevy'apa hagwã peiko-vy ha'e-ma peẽ-my.

12 Æy ha'e-ta peẽ-my: Pejohayhu katu peiko-vy. Apohayhuha-rami pejohayhu katu, he'i.*

13 —Oirũ rekovia ojejuka uka va'e, ohayhu tee rei oirũ-pe. Ndoikói ohayhuve va'e, he'i.

14 —Ha xe irũ voi peẽ. Xe nhe'ẽ pehendu ramo xe irũ tee voi peẽ.

15 Xe rembigwái, nda'evéi-ma pende-rehe. Mbava'e po ojapo ijáry ndoikwaái voi hembigwái. Ha xe Ru nhe'ẽ ahendu va'ekwe gwive, amombe'u-ma peẽ-my. Upéa-gwi, Xe rembigwái, nda'evéi-ma pende-rehe. Xe irũ tee-py ae apohenói.

16 Ndaxe poravóiry va'ekwe pene mbo'eharã. Apoporavo va'ekwe ae xe irũrã. Ame'ẽ va'ekwe peẽ-my pene rembiaporã hetave hi'a va'e-rami peiko hagwã. Aipota pende rekoha porã porã meme opa e'ŷ-rehe hi'a meme va'e-rami. Ndaipotái hesarái rei pende rekoha porã-rehe. Upéixa ramo oime raẽ va'e-rehe pejerure ramo xe réry-py ome'ẽ va'erã peẽ-my.*

17 Ha'e jevy-ta peẽ-my, Pejohayhu katu peiko-vy, ha'e, he'i gwemimbo'e kwéry-pe Hesu.

“Ndaija'éi pende-rehe teko rei” he'i Hesu gwemimbo'e kwéry-pe

18 Upe ramo he'i jevy gwemimbo'e kwéry-pe Hesu:

—Ha teko rei katu ndaija'éi xe-rehe. Æy ndaija'e mo'ãi pende-rehe. Ndaija'éi ramo pende-rehe, pene mandu'a katu xe-rehe ija'e'ŷ hagwe-rehe.

19 Teko rei reko-rupi peiko ramo ra'e, gwe'ŷi-rami pende rayhu arã ra'e. Ha apoporavo va'ekwe ndapeikovéi-ma hagwã teko rei reko-rupi. Ndapeikói teko rei re'ŷi va'e-rami. Upéa-gwi ndaija'éi pende-rehe teko rei, he'i.

20 —Ha'e kuri peẽ-my, Ani, “Hembigwái jepe xe, xe járy-gwi tuvixave va'e voi xe” peje mo'ã pende py'apy-py pendéjehe. Ani pende resarái ha'e va'ekwe-rehe. Xe rereko asy hagwe-rami, pende rereko asy ave va'erã. Xe rendu hagwe-rami, pene nhe'ẽ ave ohendu va'erã.

21 Teko rei ndoikwaái xe mbouhare-pe. Upéa-gwi koixagwa gwive ojapose va'e ojapo va'erã pende-rehe.

22 Ndajúi ramo ra'e, namombe'úi ramo yvypóry-pe ra'e, ndojekwaái arã ra'e ipy'a ky'aha. Ha ko'ângá katu, “Ndajaikwaái voi nhande py'a ky'aha” ndikatuvéiry he'i ójehe. Hekoha vaiha amombe'u teko rei-pe.

23 Xe-rehe ndaija'éi va'e xe Ru-rehe ndaija'éi ave.

24 Ipa'û-rupi xe rembiapo porã porã xeixagwa ojapo va'e ndaipóri. Upéa rehewa ndajapói ramo ra'e, ndaipy'a ky'ái arã ra'e hikwái. Ha ko'ângá katu xe-rehe ohexa kwaa ramo jepe, ndaija'éiry rei xe-rehe. Xe-rehe ndaija'éiry jave xe Ru-rehe ndaija'éiry ave, he'i.

25 —Yma va'ekwe he'i Nhandejáry kwatia nhe'ẽ judeu kwéry ohendu va'e. Äygwa rekorã omombe'u-ma voi va'ekwe: “Ija'e'ŷ rei xe-rehe” he'i Nhandejáry nhe'ẽ äygwa rekorã mombe'u-vy. Upéa-gwi hembihakwe-ramima ija'e'ŷ rei xe-rehe hikwái, he'i.*

26 —Ha pene pytygwoharã Nhe'ẽ Marangatu tee va'e xe Ru gwigwa voi, anhetegwa tee va'e mombe'uha voi. Peẽ-my xe remimbourã voi upé va'e. Xe

* **15:12** Mt 22.39; Jo 13.34; Gl 5.14; 1 Pe 1.22; 1 Jo 3.11; 4.7 * **15:16** Rm 8.29; Ef 1.4; 1 Ts 1.4; 1 Pe 1.2;

2.9 * **15:25** Sl 35.19; 69.4

Ru-gwi xe remimbourā voi. Ou ramo xe mombe'u va'erā. “Anhetegwa voi” he'i xe-rehe.

²⁷ Ha peē katu xe anhepyrū xe rembiapo gwive ãy peve xe moirū-ma peikovsky. Upéa-gwi xe mombe'u va'erā peē ave, he'i gwemimbo'e kwéry-pe Hesu.

16

¹ Upe ramo he'i jevy gwemimbo'e kwéry-pe Hesu:

—Pende rereko asyharā amombe'u-ma peē-my. Xe aha rire pende rereko asy va'erā gwī pende-rehe ija'e'ŷ va'e. Pende rereko asy ramo, ndaiapotái penhemondýi. Ndaipotái, “Ma'erā po nhande rereko asy oiko-vy” peje pendéjehe, he'i.

² —Pene mosē va'erā imondo-vy ojeporahéi haty haty-gwi. “Anive peike teř” he'i arā peē-my gwī pende-rehe ija'e'ŷ va'e. Upéi ogwahē va'erā peē-my pemano hagwā áry. Upe-ma ramo pende jukaharā: “Nhandejáry remimbota-rupi jajuka íxupe” he'i mo'ã va'erā pende-rehe.

³ Upéixa voi pene moingo asy va'erā hikwái, ndoikwaái-gwi xe Ru rekoha, xe rekoha ndoikwaái-gwi ave.

⁴ Upéixa amombe'u-ma peē-my pende-rehe ija'e'ŷ va'e rekorā. Ha upe rire katu pene moingo asy ramo, pene mandu'a va'erā xe remimombe'ukwe-rehe peē-my, he'i íxupe kwéry.

Hesu omombe'u Nhe'ẽ Marangatu tee va'e rehewa nhe'ẽ

(Jo 14.16)

Upéi he'i jevy gwemimbo'e kwéry-pe Hesu:

—Yma gwive ko'ánga ete peve xe aiko pene pa'ũ-rupi. Upéa-gwi namombe'úi peē-my pende-rehe ija'e'ŷ va'e rekorā, he'i.

⁵ —Ha ko'ánga katu aha jevy-ta xe xe mbouhare oiko ha-py. Aha-tama jepe aiko-vy, “Kipy tipo ereho-ta?” ndapejéiry xe-vy.

⁶ Ha xe aha hagwā amombe'u-gwi katu ndapev'yavéi-ma voi.

⁷ Ha anhetegwa tee va'e amombe'u-ta peē-my. Xe apytave ramo pene ndive, naiporāi arā peē-my. Ha aha ramo katu iporāve va'erā peē-my. Ndahái ramo, nogwahēi arā ou-vy peē-my pene pytygwōharā. Ha aha ramo katu, ambou va'erā peē-my pene pytygwōharā.

⁸⁻¹¹ Ogwahē ou-vy ramo pene pytygwōharā Nhe'ẽ Marangatu tee va'e, oikwaa uka va'erā yvypóry kwéry-pe ijapuha, “Jajejavv e'ŷ va'e voi nhande” he'i ramo mo'ã ójehe. Ndojeroviái voi xe-rehe oiko-vy. Upéa-gwi oikwaa uka va'erā íxupe kwéry hembiapo vaikwe. Ha Nhe'ẽ Marangatu tee va'e oikwaa uka ave va'erā íxupe kwéry ijapuha “Onhemonhandejáry rei voi Hesu” he'i ramo mo'ã xe-rehe. Ha aha ramo xe Ru oiko ha-py, peē ndaxe rexavéi-ma ramo katu, oikwaa uka va'erā íxupe kwéry xe-rehe ijapuha. Ha Nhe'ẽ Marangatu tee va'e oikwaa uka ave va'erā yvypóry kwéry-pe ijapuha, “Nhande rexakwaa rei va'erā voi Nhandejáry. Nhane rembiapo vaikwe-rehe katu nanhane rerekwa asy mo'ãi” he'i rei ramo ójehe. Ha ohexa kwaa-ma ramo anháy ruvixa-rehe gwī teko rei-pe ombo'e mbo'eha-rehe ndaipu'akaveimaha nhande-rehe katu, Nhe'ẽ Marangatu tee va'e oikwaa uka va'erā íxupe Nhandejáry-rehe ijapuha, he'i.

¹² —Hetave voi oĩ xe remimombe'use peē-my. Ha ãy amombe'u pukuve ramo katu, ipohýive arā peē-my.

¹³ Ha upe rire katu Nhe'ẽ Marangatu tee va'e, anhetegwa tee mombe'uhā ou ramo, oikwaa uka va'erā peē-my anhetegwa va'e gwive. Ojehegwigwa va'e nomombe'u mo'ãi. Ha hemiendu katu omombe'u va'erā. Oiko-ta va'erā pene renonderā omombe'u va'erā.

¹⁴ Xe rehewa omombe'u va'erā peẽ-my. Upéa-gwi xe rekoha porā tee oikwaa uka va'erā.

¹⁵ Ha xe rehewa katu xe Ru rehewa ave voi. Upéa-gwi ha'e kuri peẽ-my, Xe rehewa omombe'u va'erā ave peẽ-my Nhe'ẽ Marangatu tee va'e ou ramo, he'i gwemimbo'e kwéry-pe Hesu.

“Xe rexā jevy ramo, pevy'agwasu ete jevy-ma va'erā” he'i Hesu

¹⁶ Upéi he'i jevy íxupe kwéry:

—Ãy ndaxe rexā are mo'ãi peẽ, he'i. —Ha upē rire katu xe rexā jevy va'erā, he'i íxupe kwéry Hesu.

¹⁷ Ha hemimbo'e kwéry ndoikwaáiry inhe'ẽ. He'i ojóupe:

—Ãy ndaxe rexā are mo'ãi peẽ. Ha upē rire katu xe rexā jevy-ta” he'i kuri nhande-vy. “Aha-gwi xe Ru oiko ha-py” he'i kuri nhande-vy, he'i ojóupe.

¹⁸ —Ma'erā po, “Ha upē rire katu xe rexā jevy-ta” he'i kuri nhande-vy. Mbava'e-rehe nipo he'i nhande-vy, ndajaikwaáiry aipo he'i ramo, he'i ojóupe hikwái Hesu nhe'ẽ-rehe.

¹⁹ Ha Hesu oikwaa-ma oporanduseha ojéupe. Upéa-gwi he'i íxupe kwéry:

—Ha'e kuri peẽ-my, “Ãy ndaxe rexā are mo'ãi peẽ. Ha upē rire katu xe rexā jevy va'erā” ha'e kuri peẽ-my. Upē va'e xe nhe'ẽ-rehe peporandu randu tipo ojóupe peiko-vy? he'i íxupe kwéry.

²⁰ —Amombe'u-ta peẽ-my anhetegwa tee va'e. Pene rasẽ va'erā pejahe'o-vy. Ha teko rei katu ov'y'a va'erā. Pev'y'a e'ŷ va'erā. Ha upē rire katu ndapevy'avéi rire, pevy'a jevy-ma va'erā peiko-vy.

²¹ Imemby-ta va'e-rami peiko va'erā. Imemby-tama ramo kunha ndovy'avéi-ma. Imembytamaha óra-py ohendu-ma ramo gwasy, ndovy'avéi-ma. Ha imemby rire-ma katu, ov'y'a jevy omemby-rehe: “Oiko-ma mitã'i. Kunumi ra'e” he'i ojéupe. Upéa-gwi gwasy hagwe-rehe naimandu'avéi-ma, he'i.

²² —Upéixa ete peiko ãy. Imemby-tama va'e-rami peiko. Ãy ndapevy'avéi-ma. Ha upē rire katu apohexa jevy-ta. Xe rexā jevy ramo pevy'agwasu ete jevy-ma va'erā, he'i. —Upē ramo pene mbovy'are'ŷ va'e ndoikovéi-ma va'erā. Pev'y'a meme ete va'erā, he'i.

²³ —Upē áry-py napenoranduvéi-ma va'erā xe-vy. Amombe'u-ta peẽ-my anhetegwa tee va'e. Oime raẽ va'e-rehe pejerure ramo xe Ru-pe xe réry-py, ome'ẽ va'erā peẽ-my xe Ru.

²⁴ Ko'ângā ete peve ndapejeruréiry xe réry-py. Ãy pejerure rure katu xe réry-py. Ome'ẽ va'erā peẽ-my. Hemime'ẽgwe-rehe pevy'apa-ma va'erā, he'i gwemimbo'e kwéry-pe Hesu.*

“Xe ko xe pu'akave-ma aiko-vy yvypóry kwéry-rehe” he'i Hesu

²⁵ Upē ramo he'i jevy gwemimbo'e kwéry-pe Hesu:

—Amombe'u-ma kuri peẽ-my xe Ru rehewa nhe'ẽ ambue-py orombo'eharami. Ha ogwahẽ va'erā xe amombe'u porãha áry. Upē áry-py xe Ru rehewa nhe'ẽ ambue va'e orombo'eharami namombe'uvéi-ma va'erā.

²⁶ Upē áry-py pejerure va'erā xe Ru-pe. Xe réry-py pejerure va'erā íxupe. Pejeapysaka katu xe nhe'ẽ-rehe. Pende rekoviá ndajerure mo'ãi íxupe. Xe Ru-pe voi katu pejerure va'erā xe réry-py.

²⁷ Xe rayhu-gwi peẽ ha'e katu pende rayhu ave. “Nhandejáry-gwi ou va'ekwe nipo ra'e Hesu” peje-gwi xe-rehe, pende rayhu ave ha'e. Upéa-gwi xe Ru-pe voi katu pejerure va'erā.

* **16:24** Jo 14.13-14

²⁸ Xe ko asẽ va'ekwe xe Ru oiko ha-gwi aju-vy. Ko yvy-py aju va'ekwe. Ha ko'ánga katu aheja jevy-ta ko yvy aha-vy. Xe Ru oiko ha-py aha jevy-ta, he'i gwemimbo'e kwéry-pe Hesu.

²⁹ Upe ramo he'i íxupe hikwái:

—Ãy katu eremombe'u porã-ma ore-vy. Nde rehewa nhe'ë nere-mombe'uvéi-ma ambue-py ore mbo'eha-rami, he'i.

³⁰ —Opamba'e kwaaha voi nipo nde ra'e, he'i. —Orokwaase va'e ereikwaa uka ore-vy. ãy noroporandu mo'âvéi-ma nde-vy. Upéa-gwi Nhandejáry-gwi ereju va'ekwe nipo ra'e, he'i íxupe hemimbo'e kwéry.

³¹ Ha Hesu he'i:

—Ne'írã pejerovia tee xe-rehe peiko-vy, he'i.

³² —Ogwahé-tama ou-vy xe áry. Upe áry-py pesarambipa-ta peteĩ teĩ pende róga-rupi peho-vy. Upéixa xe anho xe rejapa-ta peho-vy. Xe rejapa ramo jepe, naxe anhói joty apyta va'erã. Xe moirũ joty arã xe Ru, he'i.*

³³ —Koixagwa peë-my xe remimombe'u voi. Aipota xe moirũ pende py'agwapy hagwã. Pene moingo asy va'erã teko rei. Pene moingo asy ramo jepe, ani joty pekyhyje teĩ. Ndaipu'akáí va'erã pende-rehe teko rei. Xe ko xe pu'akave-ma aiko-vy xe rendu e'ýha-rehe. Upéa-gwi ani pekyhyje teĩ teko rei-gwi, he'i gwemimbo'e kwéry-pe Hesu.

17

“Xe irû-rehe ajerure-ma nde-vy” he'i Nhandejáry-pe Hesu gwemimbo'e-rehe

¹ Upéa he'i rire, hovayva Hesu ombojeupi onhe'ë Nhandejáry-pe:

—Ogwahé-ma ou-vy xe aha hagwã óra, xe Ru, he'i íxupe. —Nde ra'y voi xe, he'i Gwu-pe. —Xe reko porãha ehexa uka katu ahexa uka hagwã nde reko porãha.

² Yma va'ekwe nde katu xe moingo entéro yvypyöry gwive jaryrã, xe amoin-gove hagwã ne rembiporavo va'e gwive ne ndive oiko hagwã opa e'ý rehewe.

³ Ha xe remimoingove katu ohexa kwaa porã nde-rehe nde rekoha. Ne anho Tupã tee voi. Ne ramigwa ndaipóri. Ha xe ne remimbou voi. Xe rekoha ohexa kwaa porã ave xe-rehe xe remimoingove. Upéa-gwi ehexa uka katu xe reko porãha.

⁴ Yvypyöry-pe ahexa uka-ma nde reko porãha. Ereme'ë va'ekwe xe rembia-porã gwive ajapo-ma katu.

⁵ Ko yvy oiko e'ý mboyve xe tuvixa mba'e-ma aiko ne ndive va'ekwe. Ko'ánga ne ndive aiko hagwe-rami, xe moingo jevy katu, xe Ru. Xe mbotuvixa mba'e jevy katu.

⁶ —Yvypyöry pa'ü-gwi ereiporavo va'ekwe xe irûrã ereme'ë hagwã xe-vy. Íxupe aikwaa uka-ma nde rekoha. Ne rembiporavo nde re'ýi voi. Upéi ereme'ë va'ekwe xe-vy xe re'ýirã. Ne nhe'ë ohendu hikwái.

⁷ Ko'ánga katu, “Nhandejáry remime'ëgwe voi íxupe nipo ra'e” he'i ereme'ë va'ekwe-rehe xe-vy.

⁸ Xe-vy ne remimombe'u amombe'u íxupe. Ha xe remimombe'u katu ohendu voi hikwái. “Nhandejáry-gwi ou nipo ra'e Hesu. Ombou nipo ra'e íxupe Nhandejáry” he'i nhande-rehe hikwái.

⁹ —Ha teko rei-rehe katu ndajerure mo'äi nde-vy. Xe-vy ne remime'ëgwe-rehe ae ajerure-ta nde-vy. Nde re'ýi voi. Upéa-gwi ajerure-ta nde-vy hese.

¹⁰ Xe areko va'e gwive ne mba'e ave. Ha nde ererekova'e gwive xe mba'e ave. Ha xe remimbo'e katu xe-vy ne remime'ëgwe xe irûrã ohexa uka-ma xe reko porã teeha.

* **16:32** Mc 14.27

¹¹ Ây katu aha-ta xe nde ereiko ha-py. Ndaiko mo'âvái-ma ko yvy ári. Ha xe remimbo'e katu oiko joto va'erã ko yvy ári. Nde reko marangatu voi, xe Ru. Ne nhe'ë-rupi aikwaa uka-ma kuri íxupe kwéry nde rekoha. Ây nde réry-py enhangareko porã katu hese ijoja meme oiko-vy hagwã. Peteïxa nhande, nhande jojaha-rami, aipota ijoja ave onhondive hikwái.

¹² Hendive xe aime jave ko yvy ári, anhangareko hese aiko-vy nde réry-py, ahexa uka íxupe va'ekwe-py. Anhangareko porã hese aiko-vy. Avave ndaxe rejái oho-vy. Peteï va'e mo'ã xe reja kuri oho-vy. Xe irû tee e'ÿ va'e upéa anhaygwasu rembieraha. Yma hekorã omoï va'ekwe kwatia-rehe. Upéa-gwi hembihaikwe-rami naxe moirûvái-ma ãy.*

¹³ —Ko'ânga aheja-tama ko yvy aha-vy nde ereiko ha-py. Ha aime jave katu kóa xe nhe'ë amombe'u íxupe kwéry ov'y'a hagwã. Xe avy'aha-rami aipota ov'y'apa hikwái.

¹⁴ Né nhe'ë amombe'u-ma kuri íxupe ha teko rei katu ndaija'éi-ma hese. Teko rei reko-rupi aiko e'ÿha-rami, xe irû ave ndoikovéi-ma heko-rupi. Upéa-gwi ndaija'evéi-ma hese teko rei.

¹⁵ “Eipe'a katu íxupe heraha-vy ko yvy-gwi” nda'e mo'âi nde-vy. Ha'e-ta ae, “Eresende katu íxupe. Anháy reko e'ÿ-rupi oiko hagwã eresende katu” ha'e-ta ae nde-vy hese kwéry.

¹⁶ Teko rei reko-rupi xe aiko e'ÿha-rami xe irû ave ndoikovéi-ma heko-rupi.

¹⁷ Teko rei reko-rupi ndoikovéi-gwi, ipotí-magwi eheja katu toiko ne irû tee ramo. Anhetegwa tee va'e ne nhe'ë. Né nhe'ë rendu ramo emoingo katu ne irû tee ramo.

¹⁸ Yvypóry kwéry-pe amombe'u hagwã xe mbou va'ekwe. Upéixa ete, “Tapeho opa-rupi xe mombe'u-vy” ha'e kuri xe irû-pe.

¹⁹ Ây apena hese-gwi, napenavéi-ma xéjehe. Hekovia ae amano hagwã-rami aí. Nde-vy anheme'ë-ta ne irû tee ramo oiko hagwã xe irû.

²⁰ —Xe irû-rehe ajerure-ma nde-vy. Ha ko'ânga katu xe irû nhe'ë renduharã-rehe ave ajerure-ta ave. Inhe'ë rendu-gwi ojerovia-ma va'erã xe-rehe.

²¹ Xe-rehe ojerovia va'erã-rehe ajerure-ta nde-vy peteïxa ijoja tee hagwã xe-rehe ojerovia va'e gwive. Nde ko xe moirûha-rami, xe Ru, xe oromoirûha-rami ave, aipota peteïxa nhane moirû hikwái, “Nhandejáry remimbou voi nipo ra'e Hesu” he'i hagwã xe-rehe yvypóry.

²² Nde rekoha erehexa uka xe-vy va'ekwe-rami, ahexa uka ave kuri íxupe xe rekoha peteïxa ijoja tee hagwã oiko-vy. Nhande nhande jojaha-rami aipota ijoja ave hikwái.

²³ Peteïxa amoírû íxupe. Peteïxa ave xe moirû nde. Upéixa jaiko ha'e kwéry ijoja porã tee hagwã. Ijoja porã tee ramo, “Nhandejáry remimbou voi nipo ra'e Hesu” aipota he'i va'erã xe-rehe teko rei. Aipota he'i va'erã, “Hesu-pe ohayhuha-rami Nhandejáry, Nhandejáry reroviahava ave hembiayhu voi nipo ra'e” he'i va'erã.

²⁴ —Ây, xe Ru, ko va'e xe-vy ne remime'ëgwe voi xe irûrã. Xe aiko ha-rupi, aipota xe moirû ave. Ndoikói výteri ramo ko yvy xe rayhu va'ekwe ereiko-vy. Upéa-gwi xe momba'egwasu va'ekwe xe rerekov-y. Ây aipota xe moirû xe momba'egwasuha ohexa hagwã hikwái.

²⁵ Nde ko erejejavy e'ÿ va'e, xe Ru. Teko rei katu nde kwaa e'ÿha voi. Xe ko ae nde kwaaha voi. Ha xe irû katu oikwaa-ma nde xe mbouhare.

²⁶ Aikwaa uka va'ekwe íxupe nde rekoha aiko-vy. Ây aikwaa uka jevy-ta aiko-vy, xe rayhuha-rami ereiko-vy, ojohayhu porãve râve hagwã ave. Peteïxa amoírûse ave íxupe kwéry, he'i Nhandejáry-pe onhe'ë ombojeupi-vy.

* 17:12 Sl 41.9

18

*Soldado kwéry polícia ndive oipyhy Hesu-pe
(Mt 26.47-56; Mc 14.43-50; Lc 22.47-53)*

¹ Upe oração ojapo rire, Hesu osẽ oho-vy gwemimbo'e kwéry ndive. Cedrom y rupagwe-rupi ohasa oje'óí-vy. Upe-py oĩ yvotyty. Upe-py oike oho-vy hikwái.

² Upe va'e yvotyty-py onhomboaty aty va'e gwemimbo'e kwéry ndive. Upéa-gwi Judas, Hesu pyhyharã-pe omombe'u va'erã oikwaa voi yvotyty.

³ Upéixa ramo Judas Hesu piári oho upe-py. Hendive oho soldado kwéry. Polícia pa'i ruvixa remimondo va'e, fariseu remimondo va'e ave indive oho. Gwesapeharã ave ogweraha. Gwataendyrã ave ogweraha. Ikutu hagwã reheve oho.

⁴ Ha Hesu oikotaha gwive oikwaapa voi. Upéa-gwi oho ohogwaití jaty íxupe:
—Kiva'e-pe tipo peheka peiko-vy? he'i oporandu-vy soldado kwéry-pe Hesu.

Ha soldado kwéry he'i íxupe:

⁵ —Oroheka Nazaré pygwa Hesu-pe, he'i íxupe hikwái.

—Xe voi ko ha'e, he'i onhemombe'u-vy soldado kwéry-pe.

Ha Judas katu Hesu pyhyharã-pe omombe'uhare ou ave Hesu pyhyharã ndive. Onhembo'y ave oĩ-vy upe-py.

⁶ “Xe voi ko ha'e” he'i-ma ramo Hesu, onhemondýi hikwái. Ogwevi mo'ã ramo ho'a oje'óí-vy yvvy-py soldado kwéry.

⁷ Ha Hesu oporandu jevy íxupe kwéry:

—Kiva'e-pe tipo peheka? he'i jevy íxupe kwéry.

—Nazaré pygwa Hesu oroheka va'e, he'i jevy íxupe.

⁸ —Xe voi ko ha'e, ha'e-ma kuri peẽ-my. Néi. Xe voi xe reka peiko-vy ramo, peheja katu toho xe irũ gwéry, he'i soldado kwéry-pe.

⁹ Upéa he'i oiko hagwã he'i hagwe-rami. He'i-ma kuri Gwu-pe: “Ne remime'égwe-rehe anhangareko porã porã aiko-vy. Ndojehesa rerováí xéhegwi avave” he'i kuri gwemimbo'e kwéry-rehe. Upéa-gwi ãy he'i: “Peheja katu toho xe irũ gwéry” he'i.

¹⁰ Upe-ma ramo Simão Pedro ohekýi hyru-gwi okyse. Omopu'ã-vy oikytíma pa'i ruvixagwasu rembigwáí-pe, Malco héry va'e-pe. Oinambijo-ma íxupe. Ijakatúa kotygwa oikytí íxugwi inambi.

¹¹ Upéi he'i Pedro-pe Hesu:

—Emoĩ jevy katu hyru-py nde kyse, he'i. —Nhandejáry nhe'ë-py ahasa asy va'erã. Ani, “Ndohasa asy mo'ãi Hesu” ere erenhemongeta-vy teĩ nde py'apy-py, he'i Pedro-pe.

Ogweraha Hesu-pe Anás róga-py hikwái

¹² Upe rire soldado kwéry huvixa ndive, judeu remimbou polícia ave oipyhy Hesu-pe oipokwa-ma heraha-vy.

¹³ Ogweraha ranhe Anás róga-py. Ha Anás katu Caifás ratyu. Ha Caifás upe va'e ro'y-py pa'i ruvixagwasu ramo opyta.

¹⁴ Upe va'e he'i-ma kuri judeu ruvixa kwéry-pe: “Peẽ-my iporãve arã nhande rekovia peteĩ va'e omano ramo” he'i kuri Hesu-rehe. Ha upéi katu ogweraha íxupe Anás róga-py.

*“Ndaha'éi xe hemimbo'e” he'i mo'ã Hesu-rehe Pedro
(Mt 26.57-58,69-70; Mc 14.53-54,66-68; Lc 22.54-57)*

¹⁵ Ha Simão Pedro outro Hesu remimbo'e ndive oho hapykwéri. Pe outro hemimbo'e katu pa'i ruvixagwasu kwaaha. Upéa-gwi oike pa'i ruvixa róga kakwaa-py Hesu rapykwéri.

¹⁶ Ha Pedro katu opyta oka-py. Okẽ-my rei oĩ. Upéi pe outro hemimbo'e pa'i ruvixagwasu kwaaha osẽ jevy ou-vy omombe'u pa'i rembigwái-pe okẽ-rehe onhangareko va'e-pe. Upe-ma ramo oheja Pedro oike:

—Eike katu, he'i íxupe pa'i rembigwái.

¹⁷ Oike rire he'i jevy Pedro-pe pa'i rembigwái:

—Nde tipo ndaha'ei Hesu remimbo'e, he'i oporandu-vy íxupe.

—Ndaha'ei xe, he'i mo'ã.

¹⁸ Ro'y eterei voi. Upéa-rehe pa'i rembigwái kwéry polícia ndive ohatapy ra'e ojepe'e hagwã. ãy onhembo'y tata ypy-py ojepope okwa-vy. Ipa'ũ-my ave Pedro ojepope oĩ-vy.

Pa'i ruvixagwasu oporandu Hesu-pe

(Mt 26.59-66; Mc 14.55-64; Lc 22.66-71)

¹⁹ Ha upéi katu pa'i ruvixagwasu oporandu Hesu-pe hemimbo'e kwéry-rehe.

—Mbava'e eremombe'u ijaty va'e-pe? he'i íxupe oporandu-vy.

²⁰ Ha Hesu he'i:

—Xe ko atýra-py meme amombe'u-ma enterove va'e-pe aiko-vy. Ojeporahéi haty haty-rupi xe ambo'e-ma aiko-vy. Nhandejáry róga kakwaa-py ave ambo'e-ma aiko-vy. Judeu kwéry ojogweroaty aty ha-rupi ambo'e aiko-vy. Nhemi ha-rupi ae namombe'úiry aiko-vy, he'i. —Ambue mbue va'e katu namombe'úi nhemi ha-rupi aiko-vy, he'i.

²¹ —Ani xe-vy ereporandu teĩ, he'i. —Xe renduhare-pe ae katu eporandu. Xe renduhare oikwaa porã va'e xe remimombe'ukwe, he'i pa'i ruvixagwasu-pe.

²² Upe-ma ramo peteĩ polícia upe-py oĩ va'e ohovapete íxupe:

—Ma'erã po nde py'agwasu-ma upéixa ere hagwã pa'i ruvixagwasu-pe, he'i íxupe pe polícia.

Upéi Hesu he'i:

²³ —Ereikwaa ramo xe nhe'ẽ porã e'ŷha, emombe'u katu a pygwa-pe xe apuha. Ha xe nhe'ẽ porã ramo jepe, ma'erã katu xe rovapete rei? he'i polícias-pe.

²⁴ Upe-ma ramo Anás omondo Hesu-pe. Pa'i ruvixagwasu Caifás oiko ha-py omundo. Ipokwaha reheve oho Hesu upe-py.

“Ndaha'ei xe hemimbo'e” he'i jevy mo'ã Hesu-rehe Pedro

(Mt 26.71-75; Mc 14.69-72; Lc 22.58-62)

²⁵ Upe ramo Pedro opu'ã joty ojepe'e oĩ-vy tata ypy-py. Ha oporandu íxupe upe pygwa:

—Nde tipo ndaha'ei Hesu remimbo'e? he'i íxupe.

—Nahániry xe, he'i joty mo'ã. —Ndaha'éiry Hesu remimbo'e xe, he'i mo'ã upe pygwa kwéry-pe.

²⁶ Upéi oporandu íxupe pa'i ruvixagwasu rembigwái va'e. Inambikytípyre re'ýi voi. Ha upéi katu oporandu íxupe:

—Nde tipo Hesu irũ? he'i. —Yvotyty-py nde orohexa voi kuri, he'i íxupe hembigwái.

²⁷ —Xe ndaikói kuri, he'i jevy mo'ã Pedro.

Upe-ma ramo osapukái-ma gáju.

Mburuvixagwasu róga kakwaa-py ogweraha Hesu-pe

(Mt 27.1-2,11-14; Mc 15.1-5; Lc 23.1-5)

²⁸ Ha upéi katu oipyhy jevy-ma Hesu-pe heraha-vy hikwái. Osẽ Caifás róga-gwi oje'óí hagwã mburuvixagwasu róga kakwaa-py. Voi ogwahẽ oje'óí-vy upe-py. Ha judeu ruvixa kwéry ndoikéiry mburuvixa róga-py. Pe mburuvixa

ndaha'éi judeu kwéry va'e. Heko-rupi oiko e'ŷ-gwi ndoikéiry kóty-py. Judeu kwéry e'ŷ va'e kóty-py ndoikéiry. He'i judeu ruvixa kwéry:

—Jaike ramo nhande kwéry e'ŷ va'e róga-py nhanhemongy'a arã. Aipo ramo, nhanhemongy'a ramo, ndikatúi arã jakaru aretegwasu-py, he'i ójehé kwéry.

Ha judeu ruvixa kwéry okaruse voi aretegwasu-py. Upéa-gwi ndoikéiry voi mburuvixagwasu róga-py.

²⁹ Upéixa ramo mburuvixagwasu Pilatos osẽ ou-vy kóty-gwi:

—Mbava'e tipo ojapo vai ra'e peru hagwã, he'i oporandu-vy judeu ruvixa kwéry-pe.

³⁰ —Nahembiaipo vaíry ramo ra'e, ndorogwerúi arã ra'e íxupe nde ha-py, he'i jóty hese mburuvixa-pe.

³¹ —Néi, he'i Pilatos. —Peẽ ko peraha katu íxupe pende reko-rupi pejapo hagwã hese, he'i íxupe kwéry.

Upéi he'i judeu ruvixa kwéry:

—Nderejuka ukaséiry jóty ore-vy hembiapo vai va'e, he'i. —Ne nhe'ë-py mante ojuka va'erã hembiapo vai va'e, he'i mburuvixa-pe.

³² Ha Hesu katu onhemombe'u-ma kuri mba'éixa omano-ta. Ñay onhemombe'u hagwe-ramima oiko-tama voi. Onhemombe'u hagwe-ramima onhe'ë-ma ãy judeu ruvixa kwéry.

³³ Ha upéi katu mburuvixa oike jevy kóty-py ohenói tou Hesu. Ou ramo, oporandu íxupe:

—Nde tipo judeu kwéry ruvixagwasu va'e? he'i íxupe mburuvixa Pilatos.

³⁴ Ha Hesu he'i:

—Ndejehegwi rei para'e ereporandu xe-vy xe kwaa hagwã. Xe mombe'u para'e nde-vy, he'i mburuvixa-pe.

³⁵ —Ndaha'éiry xe judeu kwéry va'e. Nde re'ýi ae pa'i ruvixa kwéry ave nde reru-ma ne moõ xe po-py. Mbava'e tipo erejapo ra'e? he'i íxupe Pilatos.

³⁶ Upéi Hesu he'i:

—Xe ko mburuvixagwasu jepe, namandái va'e yvypóry-rehe, he'i. —Amanda ramo hese kwéry ra'e, aheja arã ra'e xe irũ onhorairõ xe-rehe. Aheja arã ra'e xe resende judeu kwéry-gwi. Ko yvy arigwa-rami katu namandái va'e voi, he'i mburuvixa-pe.

³⁷ —Aipo ramo, nde mburuvixagwasu voi ra'e, he'i íxupe Pilatos.

Upéi he'i Hesu:

—Mburuvixagwasu-py xe renói-ma kuri, he'i. —Xe ko ndaju reíry va'ekwe ko yvy ári. Anhetegwa tee va'e mombe'uharã xe aiko-ma va'ekwe ko yvy-rehe. Ha anhetegwa rervoviaha gwive katu xe nhe'ë ohendu ave arã, he'i mburuvixa-pe.

³⁸ —Mbava'e nipo anhetegwa va'e, he'i Hesu-pe Pilatos.

“Emboja katu kurusu-rehe” he'i Hesu-rehe

(Mt 27.15-31; Mc 15.6-20; Lc 23.13-25)

Upéa he'i rire osẽ jevy kóty-gwi omombe'u hagwã judeu kwéry-pe:

—Nahembiaipo vaíry ra'e, he'i Hesu-rehe.

³⁹ —Páscoa aretegwasu-py peteñ preso oĩ va'e apoi-ta va'e íxugwi. Pende reko-rupi apoi íxugwi, he'i. —Aipo ramo, peipota tipo xe apoi pende ruvixagwasu Hesu-gwi, he'i judeu kwéry-pe.

⁴⁰ Upe-ma ramo entéro judeu kwéry va'e gwive onhe'ë hatã-ma osapukáí-vy hikwái:

—Nahániry, he'i. —Hesu-pe katu ndoroipotáiry erepoi. Barrabás ae oroipota erepoi, he'i mburuvixa-pe judeu kwéry.

Ha Barrabás katu oporasakeahaty voi.

19

¹ Ha upéi katu Pilatos omanda Hesu-rehe:

—Peipyhy katu Hesu-pe peraha-vy. Pembopi mbopi katu íxupe heraha-vy, he'i omanda-vy Hesu-rehe.

² Upe ramo soldado kwéry oipyhy ombopi íxupe. Upéi nhuatí-gwi ojapo íxupe inhakā rehewarā. Ijegwaka ra'anga ojapo omoī hagwā inhakā-rehe hikwái. Omonde hese ao pytā va'e, mburuvixa omonde va'e.

³ Upéi peteī teī ogwahē ou-vy hovagwy-py. Imboete ra'anga anga-vy ou hovagwy-py.

—Toiko are katu, toiko are katu, judeu ruvixagwasu, he'i onhembohory-vy Hesu-rehe.

Ohovapete pete íxupe.

⁴ Upe-ma ramo Pilatos osē jevy koty-gwi oho-vy he'i judeu kwéry-pe:

—Pejeapysaka katu xe nhe'ẽ-rehe. Anohē jevy-ta íxupe xe ha'e va'e hese peikwaa porā hagwā. Hesu rembiapo vaikwe ndajohúiry voi, he'i judeu kwéry-pe Hesu-rehe.

⁵ He'i rire-ma osē jevy-ma ou-vy koty-gwi Hesu. Inhakā-rehe oī nhuatí-gwi ijegwaka ra'anga. Ao puku pytā va'e-py onhemonde-ma ou-vy. Osē-ma ramo:

—Pehexa katu íxupe. Ou-ma katu. Pema'ẽ katu hese, he'i Hesu-rehe Pilatos.

⁶ Ohexa-ma ramo íxupe pa'i ruvixa kwéry polícia kwéry ave onhe'ẽ hatā-ma osapukái-vy:

—Ejuka katu íxupe. Kurusugwasu-rehe ejuka katu íxupe, he'i Hesu-rehe osapukái joa joa-vy hikwái.

—Nahembiapo vaíry vérami ko xe-vy, he'i. —Upéa-gwi peē perahase ramo katu, peraha katu íxupe pehupi hagwā imoī-vy kurusu-rehe omano hagwā, he'i judeu kwéry-pe.

⁷ Upéi ha'e kwéry he'i: “Xe ko Nhandejáry ra'y” he'i mo'ã ójehe. Ha ore katu ore rembypy Moisés remimombe'ukwe tekoha-rupi joty oroiko va'e. Hesu ae nainhe'ẽ rendúi. Upéa-gwi iporā katu ejuka íxupe, he'i mo'ã mburuvixa-pe Hesu-rehe hikwái.

⁸ “Hesu Nhandejáry ra'y” he'i-ma ramo, omonghyjeve íxupe judeu kwéry nhe'ẽ.

⁹ Oike jevy koty-py oporandu Hesu-pe:

—Ki-gwi tipo ereju ra'e? he'i íxupe.

Ha Hesu okirirī íxugwi. Mba'eve nde'íry mburuvixa-pe.

¹⁰ Upéa-rehe oporandu jevy íxupe:

—Ma'erā po neremombe'úi ra'e xe-vy? he'i. —Ejeapysaka katu xe nhe'ẽ-rehe, he'i. —Xe ko amanda va'e nde-rehe, he'i. —Apoi-ta para'e ndéhegwi. Orojuka uka-ta para'e kurusu-rehe, he'i íxupe Pilatos.

¹¹ Upe ramo Hesu he'i:

—Nhandejáry nhe'ẽ-py mante eremanda xe-rehe ereiko-vy, he'i íxupe. —Ne rembiapo vai-ma xe-rehe. Ha judeu ruvixa nde-vy xe juka ukase va'e katu hembiapo vaivete-ma xe-rehe, he'i mburuvixa-pe Hesu.

¹² Upéa ohendu ramo opoise ise mo'ã íxugwi. Ha judeu kwéry onhe'ẽ hatā jevy-ma íxupe:

—Mburuvixagwasu César katu ndojohu porāi onhemomburuvixa va'e-pe gwive. Upéa-gwi erepoi ramo íxugwi, ndojohu porāi va'erā erejapose va'e Hesu-rehe, he'i Pilatos-pe hikwái.

¹³ Upéa ohendu ramo, he'i ogwenohē jevy hagwā Hesu-pe koty-gwi. Osē rire-ma, ogwapy-ma Pilatos oī-vy mburuvixa ogwapy haty-py. Upe opu'ã

oĩ va'e ita-gwi ojapo va'ekwe ári ogwapy. Ha hebreu nhe'ẽ-py katu ohenói Gabatá-py.

¹⁴ Ha upéi katu haimete-ma larose. Oiko-tama páscoa aretegwasu. Upe-ma ramo he'i judeu kwéry-pe Pilatos:

—Pende ruvixagwasu ko ou-ma, he'i Hesu-rehe.

¹⁵ Ha ha'e kwéry katu:

—Emboja katu, emboja katu imoĩ-vy kurusu-rehe omano hagwã, he'i joa onhe'ẽ hatã-vy hese.

—Pende ruvixagwasu ko peipota tipo xe ajuka íxupe, he'i oporandu-vy judeu kwéry-pe.

Upe ramo he'i pa'i ruvixa kwéry:

—Mburuvixagwasu César anho voi ko ore ruvixa va'e, he'i mo'ã Pilatos-pe hikwái.

¹⁶ Upe-ma ramo Pilatos ojapo ha'e kwéry hemimbota. He'i omboja hagwã Hesu-pe imoĩ-vy kurusugwasu-rehe.

Omboja Hesu-pe imoĩ-vy kurusugwasu-rehe

(Mt 27.32-44; Mc 15.21-32; Lc 23.26-43)

Upéi ogweraha-ma íxupe omboja hagwã-py hikwái.

¹⁷ Ha upéi katu Hesu osẽ oho-vy. Onhemboja hagwã kurusu-rehe oĩ-vy hagwã-py oho. Kurusugwasu ogweraha ho'yrã ojave oho-vy. Akã rendaty-py oje'e ha-py ogweraha íxupe. Ha hebreu nhe'ẽ-py katu ohenói Gólgota-py.

¹⁸ Ha upéi katu ogwahé rire oho-vy upe-py, omboja íxupe imoĩ-vy kurusugwasu-rehe. Mokõi hembiapo vai va'e katu ave ohupi yvate. Hesu yke-rehe joja omoĩ íxupe kurusugwasu-rehe. Imbyte-py oĩ Hesu.

¹⁹ Ha Pilatos katu ohai imombe'u hagwã:

—Emoĩ katu kurusu-rehe Hesu akã ári, he'i omanda-vy. —“Ko va'e Hesu Nazaré pygwa judeu kwéry ruvixagwasu voi” he'i hagwã hese, he'i omanda-vy Pilatos.

²⁰ Peteĩ nhe'ẽ ambue mbue-py ohai imoĩ-vy. Ohai hebreu nhe'ẽ-py, ohai latim nhe'ẽ-py. Grego nhe'ẽ-py ohai ave. Ha upéi katu heta judeu ou omonhe'ẽ ohai va'ekwe. Hi'agwĩ oĩ pe tetã-gwi Hesu rupi hagwe-py.

²¹ Upéa-gwi pa'i ruvixagwasu oje'óí Pilatos oiko ha-py:

—“Judeu ruvixagwasu” ani erehai teĩ. “Xe judeu ruvixa voi ko, he'i mo'ã ójeho” ehai ae katu, he'i íxupe judeu ruvixa kwéry.

²² Ha Pilatos nohendúiry joty inhe'ẽ:

—Upéixa ahai-ma kuri. Ndaipe'a mo'ãvéi-ma xe ahai va'ekwe, he'i judeu ruvixa kwéry-pe.

²³ Ha irundy soldado katu omboja rire Hesu-pe imoĩ-vy kurusu-rehe, oipyhy ijaokwe omboja'o ja'o peteĩ teĩ ojóupe. Ha ikamisa pukukwe katu oipyhy ave. Onhembovyvy e'ý va'e.

²⁴ Upéixa ramo he'i soldado:

—Ani eremondoro teĩ kamisa puku. Jahuga katu hese. Aipo ramo, ogana va'e togweraha katu, he'i ojóupe Hesu aokwe-rehe onhemogana-vy.

Yma va'ekwe he'i Nhandejáry kwatia nhe'ẽ:

“Xe aokwe omboja'o peteĩ teĩ ojóupe. Ohuga xe kamisa-rehe hikwái”* he'i Hesu rehewarã omombe'u-vy. Upéa-gwi hembihaikwe-rami voi ãy ojapo Hesu aokwe-rehe.

²⁵ Ha upéi katu oĩ irundy kunha kurusu rovagwy-py. Oĩ Hesu sy. Upéi ikypy'ýry ave. Upéi Maria Madalena ave, Clopas rembireko Maria ndive.

* 19:24 Sl 22.18

²⁶ Upe ramo Hesu ohexama osy-pe. Ijyke-rehe xe anhembo'y aĩ-vy. Xe hemimbo'e hembiayhu va'e. Xe rexa-ma ave. Ore rexa ramo, he'i osy-pe:

—Ne memby voi upe va'e, he'i osy-pe xe-rehe.

²⁷ Upéi he'i xe-vy:

—Nde sy voi upe va'e, he'i xe-vy osy-rehe.

Ha upe rire katu xe róga-py araha Hesu sy oiko hagwã xe ha-py.

Omano-ma Hesu

(Mt 27.45-56; Mc 15.33-41; Lc 23.44-49)

²⁸ Ha upéi katu Hesu: “Ajapo va'erã gwive ajapopa-ma voi” he'i ojéupe. Ha Nhandejáry kwatia nhe'ẽ kwaaha voi Hesu. He'i va'ekwe Nhandejáry kwatia nhe'ẽ, “Xe y'uhéi-ma” he'i Hesu rekorã omombe'u-vy. Upéa-gwi hembihaike-rami:

—Xe y'uhéi-ma, he'i ójehe.

²⁹ Upe-py oĩ uva rykwere hepy e'ŷ va'e ryru. Upéi bucha omoaky. Yvyra apy-rehe, hissopo héry va'e apy-rehe omoĩ imondo-vy íxupe. Oipyte uka ho'u uka-vy íxupe.*

³⁰ Ho'u rire-ma:

—Ajapo va'erã gwive, ajapopa-ma voi, he'i ójehe.

He'i rire, onhakã reity-ma omano-ma.

Oikutu kyse puku-py Hesu arokã-my

³¹ Vierne omano Hesu. Iko'ẽ-my, sábado, oiko-ta aretegwusu. Omboete eterei upe va'e arete judeu kwéry. Upéa-gwi oipota omano pya'e:

—Naiporãi oĩ arete-py omano hagwã-rami joto, he'i ojóupe judeu ruvixa kwéry.

Upéa-gwi oho oje'óí-vy mburuvixa Pilatos oiko ha-py:

—Ere katu omopẽ hagwã kurusu-rehe oĩ va'e retyma omano pya'e hagwã, he'i. —Ha upe rire katu eipe'a uka mani kurusu-gwi, he'i íxupe judeu ruvixa kwéry.

³² Upe ramo oho soldado omopẽ hetyma. Hesu yke-rehe ohupi va'ekwe-pe omopẽ hetyma. Upéi outro ijyke-rehe ohupi va'ekwe-pe omopẽ ave hetyma.

³³ Ha ogwahẽ ramo katu oho-vy Hesu oĩ ha-py:

—Omano-ma oĩ-vy, he'i hese soldado.

Upéa-gwi nomopẽiry hetyma.

³⁴ Nomopẽiry ramo jepe hetyma, oikutu joto kyse puku-py Hesu arokã-my. Upéi oikutu rire Hesu arokã-my osyry-ma hugwy y ndive.

³⁵ Xe ko hexahare voi. Amombe'u-ma ojehu va'ekwe perovia hagwã peẽ ave. Anhetegwa tee va'e amombe'uga peikwaa voi. Anhetegwa teeha xe aikwaa ave.

³⁶⁻³⁷ Ha upéi katu yma he'i va'ekwe Nhandejáry kwatia nhe'ẽ:

“Ikágwe ni peteĩ nonhemopẽi va'erã”

he'i. Ha upéi he'i jevy outro Nhandejáry kwatia nhe'ẽ:

“Kysepuku-py oikutu va'ekwe-rehe oma'ẽ va'erã hikwái”*

he'i va'ekwe Nhandejáry kwatia nhe'ẽ Hesu rekorã omombe'u-vy. Upéa-gwi hembihaike-rami katu ojapo-ma hese hikwái.

Omoĩ itakwa-py Hesu retekwe

(Mt 27.57-61; Mc 15.42-47; Lc 23.50-56)

³⁸ Ha upe rire katu Arimatéia tetã mygwa José héry va'e ogwahẽ oho-vy Pilatos oiko ha-py. Upe-py oho ojerure hagwã Hesu retekwe-rehe:

* 19:29 Sl 69.21 * 19:36-37 Ex 12.46; Nm 9.12; Sl 34.20; Zc 12.10; Ap 1.7

—Arahase amoī hagwā itakwa-py hetekwe, he'i Hesu-rehe oporandu-vy íxupe.

—Eraha katu hetekwe, he'i íxupe Pilatos.

Ha José katu Hesu nhe'ẽ renduha voi. Henduha jepe ikyhyje judeu ruvixa kwéry-gwi. Upéa-gwi teta-py nomoirūiry voi va'ekwe Hesu-pe. Æy katu José oho-ma ogweraha-vy Hesu retekwe.

³⁹ Hendive oho ave Nicodemos héry va'e. Upe va'e Hesu rexa-vy oho va'ekwe. Pyhare oho va'ekwe. Æy oho ha'e José ndive. Heta ogweraha hyakwā va'e babosa mirra ndive héry va'e. Quarenta e cinco kilo ogweraha.

⁴⁰ Mokōive oipyhy hetekwe. Omohyakwā rire ae ao, onhugwā hetekwe aopy. Upéa ojapo va'e judeu kwéry omano va'ekwe-pe heko-rupi ojaty rekoria omoī hagwā hetekwe itakwa-py.

⁴¹ Hesu rupi hagwe-py oĩ yvotytygwasu. Upe-py oĩ itagwasu ikwa pyahu va'e. Ha'e-py nomoĩry vyteri hetekwe.

⁴² Hí'agwī voi oĩ upe yvotytygwasu. Ha sábado, judeu kwéry optytu'uga áry katu oiko-tama ave. Upéa-gwi pya'e omoī hetekwe itakwa-py. Ha itagwasu-pe ave omboty.

20

“Oipe'a ra'e Nhandejáry Hesu retekwe-pe itakwa-gwi” he'i

(Mt 28.1-8; Mc 16.1-8; Lc 24.1-12)

¹ Ha upéi domingo voi ramo, pyharevete kwarahy hembipe rei vyteri ramo, pytū para para vyteri jave oho. Oho ohexa hagwā Hesu retekwe Maria Madalena. Upe-py ogwahē oho-vy ramo, ohexa-ma itagwasu imbotyhare.

² Ojepé'a-ma oĩ-vy. Upéa ohexa-ma ramo, oripara jevy imombe'u ou-vy. Ogwahē ou-vy Pedro oiko ha-py. Xe Hesu remimbo'e inhirū tee va'e aiko ha-py ave ou omombe'u:

—Oipe'a ra'e hikwái Nhandejáry Hesu retekwe-pe. Kipy po ogweraha omoī hagwā ra'e íxupe? he'i ore-vy ou-vy Hesu rehewa omombe'u-vy.

³ Upe-ma ramo ore mokōive va'e oroho orohexa hagwā hetekwe rendagwe-py. Pedro ndive xe aha.

⁴ Ororipara oroho-vy. Ha xe hatāve aripara. Xe ranhe agwahē aha-vy upe-py.

⁵ Agwahē-ma ramo ajeayvy hetekwe rendagwe ahovapyexa hagwā. Ijaokwe imorotī porā va'e ahexa inhugwā hagwe mate oĩ ramo. Ha ndaikéiry.

⁶ Xe rapykwéri ogwahē ou-vy Simão Pedro ave. Ou-ma oike-ma itakwa rye py-py. Ijaokwe imorotī va'e mante ave ohexa. Inhugwā hagwe mo'ã oĩ.

⁷ Upe hovaho'i hagwe noĩry ijaokwe imorotī va'e ndive. Upe va'e anho oĩ.

⁸ Upéi xe agwahē ranhe va'ekwe, aike ave va'ekwe itakwa rye py-py. Ahexa-ma ramo, arovia-ma.

⁹ Ha Nhandejáry kwatia nhe'ẽ, Hesu oikove jevy va'erā, he'i va'ekwe katu, ne'írā oroikwaa he'ise va'e.

¹⁰ Ha upéi katu oroho jevy ore róga-py.

Hesu ojekwaa uka jevy Maria Madalena-pe

(Mt 28.9-10; Mc 16.9-11)

¹¹ Ha Maria Madalena katu ndaikéiry itakwa rye py-py. Ita yke-rehe optya hasē oĩ-vy. Gwasē reheve ojeayvy ohovapyexa hagwā.

¹² Upéi ohexa-ma mokōi Nhandejáry rembigwái yváy pygwa va'e. Ao morotī va'e omonde ramo ohexa. Hesu rupagwe ári ogwapy oĩ-vy. Peteī inhakā rupagwe-py, outro ikupy rendagwe-py. Mokōive oporandu íxupe:

¹³ —Ma'erā tipo ne rasē, he'i kunha-pe.

Kunha he'i íxupe:

—Ogweraha ra'e xe Járy retekwe, he'i íxupe kunha. —Kipy po omořra'e íxupe, xe ndaikwaáiry, he'i mokōive va'e-pe kunha.

¹⁴ Upéa he'i rire, ojerova ramo ohexa Hesu-pe onhembo'y ořvy ramo. Hesu teñ nipo ra'e ohexa, ha kunha ndoikwaáiry íxupe.

¹⁵ —Ma'erã tipo ne rasẽ erei-vy? he'i. —Kiva'e-pe tipo ereheka ereiko-vy, kunha, he'i kunha-pe Hesu.

“Yvotyty-rehe onhangarekoha voi upéa” he'i mo'ã opy'apy-py kunha Hesurehe. Upéa-gwi he'i Hesu-pe:

—Ereraha ramo ra'e íxupe, eremoř ambue henda-koty emombe'u katu xevy, xe araha hagwã íxupe, he'i mo'ã Hesu-pe ndoikwaái-gwi.

¹⁶ —Nde Maria, he'i íxupe Hesu.

Upe-ma ramo oikwaa-ma íxupe ojerova Hesu ha-koty:

—Nde Raboni, he'i íxupe onhe'ë-py hebreu nhe'ë-py.

Raboni he'ise xe mbo'eháry-pe.

¹⁷ Ha upéi katu he'i íxupe Hesu:

—Ndajeupíry vyteri aha-vy xe Ru oiko ha-py, he'i. —Upéa-gwi anive xe kwavã teñ. Tereho mani katu nde xe re'yi oiko ha-py emombe'u xe nhe'ë: “Ajeipi-ta aha-vy xe Ru ha-py. Xe Ru ko ha'e kwéry Túvy ave. Xe Járy ijáry kwéry ave. Upe va'e ha-py ajeipi-ta aha-vy” he'i. —Ko va'e nhe'ë eraha emombe'u katu íxupe kwéry, he'i kunha-pe Hesu.

¹⁸ Upe-ma ramo Maria Madalena oho jevy omombe'u Hesu remimbo'e kwéry-pe:

—Ahexa-ma kuri Nhandejáry Hesu-pe, he'i gwemimbo'e kwéry-pe.

Upéi omombe'u íxupe Hesu nhe'ëgwe.

Hesu ojekwaa uka jevy gwemimbo'e kwéry-pe

(Lc 24.36-43)

¹⁹ Upe áry-py domingo ka'aru ete ojogweroaty ořvy koty-py Hesu remimbo'e kwéry. Ikyhyje voi judeu ruvixa-gwi hikwái. Upéa-gwi hatã omboty hikwái okë. Upe-ma ramo ogwahë-ma ou-vy Hesu. Ipa'ü-my ojekwaa-ma ořvy:

—Tapende py'agwapy katu xe-rehe, he'i-ma íxupe kwéry.

²⁰ Upéa he'i rire, ohexa uka íxupe kwéry opo oikutu hagwe. Oarokã oikutu hagwe ohexa uka ave. Ojáry-pe ohexa ramo, ov'a eterei-ma hikwái.

²¹ Upe ramo he'i jevy íxupe kwéry:

—Tapende py'agwapy katu xe-rehe, he'i. —Xe Ru nhe'ë-py aju va'ekwewami, ãy xe nhe'ë-py apomondo-ta ave pemba'apo apo hagwã-rupi, he'i gwemimbo'e kwéry-pe.

²² Upéa he'i rire, oipeju peju íxupe kwéry:

—Toike katu pende py'a-py Nhe'ë Marangatu tee va'e, he'i opytu-py oipejukwe-vy.

²³ —Peje ramo, “Tomboyke katu ne rembiapo vaikwe Nhandejáry” peje ramo, omboyke va'erã Nhandejáry íxugwi hembiapo vaikwe. Ha peje ramo katu, “Ani Nhandejáry omboyke ne rembiapo vaikwe” peje ramo, nomboykéi ave va'erã íxugwi hembiapo vaikwe, he'i gwemimbo'e kwéry-pe Hesu.

Tomé rehewa nhe'ë

²⁴ Ogwahë ramo Hesu, ndoikóiry koty-py hemimbo'e héry va'e Tomé. Dídimo-py ohenói íxupe ave.

²⁵ Upe rire ogwahë ramo Tomé, omombe'u íxupe outro hemimbo'e kwéry:

—Orohexa-ma kuri Nhandejáry Hesu-pe, he'i Tomé-pe omombe'u-vy.

Upéi he'i íxupe kwéry Tomé:

—Xe ndaroviáiry, he'i Tomé. —Xe ahexa e'ŷ rehewe ipo ikutu hagwe, ndarovia mo'ãi, he'i. —Amoĩ e'ŷ rehewe xe po inharokã-rehe ikutu hagwe-py, ndarovia mo'ãi voi xe, he'i oirũ kwéry-pe Tomé.

²⁶ Peteĩ semana rire hemimbo'e kwéry ojogweroaty jevy-ma koto-py oĩ-vy. Hendive oĩ-ma Tomé. Onhemboty hatã hokẽ gwive. Onhemboty hatã ramo jepé, ogwahẽ-ma ou-vy Hesu ipa'ũ-my onhembo'y-ma oĩ-vy:

—Tapende py'agwapy katu xe-rehe, he'i íxupe kwéry.

²⁷ Upe-ma ramo he'i Tomé-pe:

—Emoĩ a-py ne kwã erehexa hagwã xe po, he'i. —Eipysó katu nde po emoĩ katu ne kwã xe arokã-rehe xe kutu hagwe-py ereikwaa hagwã, he'i. —Ani ne mba'e rerovia e'ŷ teĩ. Erovia tee katu, he'i Tomé-pe Hesu.

²⁸ —Xe Ruvixa voi ko nde ra'e, he'i. —Xe Járy voi ra'e, he'i íxupe Tomé.

²⁹ Upéi Hesu he'i íxupe:

—Néi, he'i. —Xe rexá-gwi xe rerovia-ma, Tomé, he'i. —Ha gwĩ xe rexá e'ŷ rehewe xe rerovia joty ramo, arový'a voi íxupe. Oiko porã porã tee rei va'erã upéa, he'i Tomé-pe Hesu.

João omombe'u ma'erã pa omoĩ kватia-rehe Hesu rehewa nhe'ẽ

³⁰ Ha Hesu katu heta hembiapo porã porã voi opu'akaha-rupi oiko-vy. Heroviapyrã-rupi ojapo gwemimbo'e kwéry remiexagwã. Ha namoimbáiry ko va'e kватia-py. Heta kватia-rehe amoĩ e'ŷ va'e oĩ.

³¹ Ha ko va'e katu kватia-rehe amoĩ va'ekwe. Peẽ-my gwarã amoĩ-ma peje hagwã Hesu-rehe: “Cristo nhane remiha'arõ va'e voi Hesu nipo ra'e. Nhandejáry ra'y tee voi nipo ra'e” peje hagwã Hesu-rehe amoĩ-ma. Aipota pejerovia-ma hese peiko-vy Hesu réry-py peiko meme hagwã Nhandejáry ndive.

21

Hesu ojehexa uka jevy sete gwemimbo'e-pe

¹ Ha upe rire katu Hesu ojehexa uka jevy gwemimbo'e kwéry-pe. Tiberíades ygwasu rembe-rehe a-rami ojehexa uka.

² Upe-py ojogweroaty oĩ-vy Simão Pedro Tomé ndive. Dídimo-py onhehenói ave Tomé. Hendive oĩ ave Caná da Galiléia pygwa Natanael. Omoirũ ave íxupe Zebedeu ra'y. Outro mokõi Hesu remimbo'e omoirũ ave íxupe.

³ Upe ramo Simão Pedro he'i oirũ-pe:

—Aha-ta ajopói pira, he'i oirũ-pe.

—Ne ndive oroho-ta ave pirapói-vy, he'i Pedro-pe hikwái.

Upe ramo ohopa onhemboyrú kanóá-py oje'óí-vy. Pyhare-rupi oho ojopói pira mo'ã ha nogwenohéiry mba'eve.

⁴ Iko'ẽ-my hembipe rei vyteri jave kwarahy, ohexá-ma Hesu-pe oĩ-vy ramo y rembe-py ojekwaa oĩ-vy. Hesu ohexá ramo jepé, ndoikwaáiry íxupe.

⁵ Upe ramo oporandu Hesu:

—Napenohéi tipo pira, xe ra'y? he'i íxupe kwéry.

—Mba'eve norogwenohéiry, he'i íxupe hikwái.

⁶ —Aipo ramo, pemombo katu kyha kanóá akatúa-koty. Penohé va'erã pira, he'i íxupe kwéry Hesu.

Inhe'ẽ-py omombo ramo ogwenohé. Upéi ndikatuvéi-ma ogwenohé jevy kyha ipohýi-gwi. Ndikatúi omboyrú kanóá-py. Heta eterei pira ojepyhy ra'e kyha-rehe.

⁷ Upe-ma ramo xe Hesu irũ tee va'e ha'e Pedro-pe:

—Nhandejáry Hesu voi upe va'e —ha'e amombe'u-vy.

Upéa ohendu ramo, omboi va'ekwe oao jo'a omonde jevy ho'a hagwā y-py.

⁸ Ha outro hemimbo'e kwéry katu ogwahē ou-vy kanóá-py. Hi'agwī oī y rembe-gwi. Cem metro-rupi ogwahē hagwā. Upéa-gwi ou kanóá-py ombo-tyryry heru-vy kyha pira reheve.

⁹ Osē rire kanóá-gwi ohexa tata. Tata ári omoka'ẽ-ta pira. Mbojape ohexa ave.

¹⁰ Upéi he'i Hesu:

—Penohē va'ekwe-gwi pira, eruve nhamoka'ẽve va'erā pira, he'i gwemimbo'e kwéry-pe.

¹¹ Upe ramo Simão Pedro onhemboyrū jevy kanóá-py kyha otira hagwā heru-vy. Upéi ombotyryry heru-vy yvy ete-py. Pira omohynyhē voi kyha. Kyha py-py oī cento e cinqüenta e três pira tuvixagwe va'e. Heta jepe pira, nomondoróiry joty kyha.

¹² Ha upéi he'i Hesu:

—Peju katu jakaru, he'i íxupe kwéry.

Ha ha'e kwéry katu oikwaa Nhandejáry Hesuha voi upe va'e. Upéa-gwi noporandú íxupe onhemombe'u hagwā. Ndaipy'agwasúi oporandu hagwā. Upéa-gwi noporandu jepíry.

¹³ Ha upéi katu Hesu oho ome'ẽ me'ẽ va'erā oipyhy. Mbojape ome'ẽ íxupe kwéry. Upe rire ome'ẽ me'ẽ pira ka'ẽ ave íxupe kwéry.

¹⁴ Upéixa voi oikove jevy rire, mbohapyha-rehema ojehexa uka jevy gwemimbo'e kwéry-pe Hesu.

Pedro rehewa nhe'ẽ

¹⁵ Okaru rire, oporandu Simão Pedro-pe Hesu:

—Xe rayhu tee tipo nde, João ra'y Simão? he'i. —Xe rayhu-ma voi ne irū. Nde tipo xe rayhuve joty tipo nde? he'i Pedro-pe.

—Ha'e katu. Ereikwaa voi xe orohayhuha, xe Járy, he'i Hesu-pe.

—Aipo ramo, enhangareko katu xe re'ýi-rehe ereiko-vy. Ovexa-rehe onhangareko va'e-rami, enhangareko hese, he'i Pedro-pe.

¹⁶ Upéi oporandu jevy íxupe:

—Nde tipo xe rayhu, João ra'y Simão, he'i.

—Ha'e katu, he'i. —Ereikwaa voi xe orohayhuha, xe Járy, he'i Hesu-pe.

—Aipo ramo, enhangareko katu xe re'ýi kwéry-rehe. Ovexa rerekwa-rami eiko íxupe kwéry, he'i Pedro-pe.

¹⁷ Upéi mbohapyha-rehema oporandu jevy íxupe:

—Xe rayhu tipo nde, João ra'y Simão, he'i íxupe.

Upe-ma ramo ndovy'avéi Pedro. Mbohapyha-rehe oporandu íxupe-gwi ndovy'avéi-ma. He'i Hesu-pe:

—Opamba'e ereikwaa va'e, xe Járy. Xe orohayhuha ereikwaa ave, he'i Pedro.

—Aipo ramo, he'i —enhangareko katu hereko-vy xe re'ýi kwéry-rehe. Ovexa rerekwa-rami enhangareko hese, he'i.

¹⁸ —Ne mitā ramo katu, nde ku'a jopyha eremoĩ ndéjehe eremboty eregwata hagwā. Erehose ha-koty ereho voi va'ekwe. Ha amombe'u-ta nde-vy anhetegwa tee va'e. Nde tuja ramo, ereipysø va'erā nde po nde pokwa hagwā. Upéi nde reraha va'erā erehose e'ý ha-koty. Nde pokwaha-rehe ereho va'erā, he'i Pedro-pe Hesu.

¹⁹ Upéa he'i oikwaa uka hagwā Pedro-pe, mba'éixa po Pedro omano hagwā:

—Xe moirū meme-gwi ojejuka uka ramo, omano ramo, ohexa uka va'erā enterove va'e-pe Nhandejáry rekoha porā, he'i Pedro omano-taha áry omombe'u-vy.

Ha upéi katu he'i Pedro-pe:
—Xe moirũ katu ereiko-vy, he'i íxupe Hesu.

Xe rehewa nhe'ẽ

²⁰ Upe rire ojerova Pedro xe rexá gwapykwe-gwi, xe Hesu irũ tee va'e aju ramo. Kwehe arete-py orokaru ramo, ha'e va'ekwe Hesu-pe ojoyke rehevē aĩ-gwi: “Kiva'e tipo ne mombe'u-ta nde pyhyrã-pe” ha'e va'ekwe Hesu-pe. Ây xe agwata aju-vy Pedro rapykweři-gwi.

²¹ Ha Pedro katu ojerova ramo xe-rehe xe rexá ramo, gwapykweři aju ramo, oporandu xe-rehe Hesu-pe:

—Mbava'e tipo oiko-ta ou xe rapykweři va'e-pe? he'i Hesu-pe xe-rehe.

²² —Xe aipota nomanói xe aju jevy peve ramo ra'e, namombe'úi arã nde-vy ra'e. Nde katu xe moirũ ereiko-vy, he'i Pedro-pe Hesu.

²³ Upéa-gwi Hesu remimbo'e kwéry he'i mo'ã ojóupe xe-rehe: “Nomano mo'ãvái-ma upe va'e”. Ha upéa nde'íry Hesu. He'i ae: “Xe aipota nomanói xe aju peve ramo ra'e, namombe'úi arã nde-vy ra'e” he'i hese Pedro-pe.

²⁴ Ko va'e Hesu rehewa nhe'ẽ gwive katu xe remimombe'u voi. Xe rembihaikwe ave voi. Anhetegwa tee va'e amombe'uga jaikwaa voi.

Hesu rehewa nhe'ẽ paha

²⁵ Heta Hesu rembiapo apo xe remimombe'u. Heta xe remimombe'u e'ý ave. Peteĩ teĩ omoĩ meme ramo Hesu rembiapo gwive, kwatia-rehe omoĩmba ramo, heta eterei arã oĩ kwatia. Ko yvy ári ndaiporivéi-ma arã vérami henagwã. Heta verei-gwi, ndaijavéi-tama vérami xe-vy.

Hesu remimondo rembiapokwe atos dos apóstolos

*Hesu ome'ẽ gwemimondo kwéry-pe hembiaporã
(Mt 28.16-18; Mc 16.14,19; Lc 24.36,50)*

¹ Are-ma xe Lucas amondo va'ekwe nde-vy, Teófilo, xe nhe'ẽ kватia-rehe. Hesu rehewa nhe'ẽ gwive amoõ va'ekwe kватia-rehe. Hesu ojapo va'ekwe gwive rehewa nhe'ẽ amoõ va'ekwe. Omombe'u va'ekwe gwive rehewa nhe'ẽ amoõ ave.*

² Onhypyrũ ombo'e mbo'e ojererojeupi oho peve yváy-py rehewa nhe'ẽ amoõ ave. Ohenói va'ekwe gwemimondo va'e, gwembiporavõpyre-pe ome'ẽ hagwã hembiaporã. Ha Nhe'ẽ Marangatu tee va'e katu oikwaa uka porãvã íxupe kwéry hembiaporã. Hesu ome'ẽ ranhe íxupe kwéry hembiaporã. Ome'ẽ rire katu ha'e ojererojeupi jevy oho-vy.

³ Ko'ãy amondo jevy-ta xe nhe'ẽ nde-vy, Teófilo. Hesu omano rire ha'e onhemoingove jevy va'ekwe voi. Oikove jevy ramo, ojehexa uka porã porã va'ekwe voi oiko-vy gwemimondo kwéry-pe. Quarenta áry ojehexa uka uka jevy oiko-vy va'ekwe íxupe kwéry. Nhandejáry nhande ruvixarã rehewa nhe'ẽ omombe'u oiko-vy. Ohexa ramo íxupe: "Ereikove jevy-ma nipo ra'e" he'i íxupe hemimondo kwéry.

⁴ Ijave kwéry opyta ramo Jerusalém-my:

—Ani pesẽ teĩ ko tetã-gwi, he'i. —Pepyta katu pekwa-vy a-py, he'i Hesu íxupe kwéry. —Xe Ru nhe'ẽ amombe'u va'ekwe peẽ-my: "Ambou va'erã Nhe'ẽ Marangatu tee va'e" he'i va'ekwe xe-vy xe Ru.

⁵ Upéa-gwi peha'arõ katu xe Ru remimbourã peẽ-my. Ha João Batista katu pene mongarai va'ekwe y-py. Ha ãy ae katu Nhandejáry omoõ-tama kuri pende py'apy-py Nhe'ẽ Marangatu tee va'e. Pene mongarai jevy-ta vérämi xe Ru, he'i íxupe kwéry Hesu.*

⁶ Upéixa ramo Hesu ndive onhomboaty hemimondo kwéry:

—Eremosẽ-ta tipo imondo-vy Israel re'yí e'ŷ, mbo'eháry, he'i íxupe hikwái. —Eremosẽ-ta tipo íxupe kwéry Israel kwéry ae omanda jevy hagwã ojóehe, he'i oporandu-vy íxupe.

⁷ Ha he'i Hesu:

—Nhandejáry omoõ va'ekwe onhe'ẽ peteĩ áry-py omosẽ hagwã imondo-vy Israel re'yí e'ŷ kwéry-pe. Nhandejáry nhe'ẽ-py ogwahë va'erã hi'áry. Ha ndoikwaa ukáí peẽ-my araka'e pa omosẽ-ta íxupe kwéry.

⁸ Ha pene rembiaporã katu amombe'u-ta peẽ-my. Nhandejáry ombogwejy-ta peẽ-my Nhe'ẽ Marangatu tee va'e oiko hagwã pende py'apy-py. Ombogwejy-ta ne mbopu'aka tee hagwã. Ne mbopu'aka tee rire, ereho va'erã eremombe'u mbe'u opa-rupi xe aikove jevymaha rehewa nhe'ẽ. Xe mombe'u mbe'u va'erã Jerusalém tetã-my okwa va'e-pe. Judéia yvy-rupi oiko va'e-pe gwive xe mombe'u mbe'u va'erã, he'i. —Samaria yvy-rupi oiko va'e-pe gwive xe mombe'u mbe'u va'erã ave. Yvy apy gwive xe rehewa nhe'ẽ ereraha va'erã xe mombe'u mbe'u-vy, he'i íxupe kwéry Hesu.

⁹ Upéa omombe'u rire, oho. Ha'e kwéry hesa-rupi ojereroyvate jevy-ma oho-vy áry-rehe. Yvateve teve oho. Arai kupe-rupima oho jevy, ndohexavéima íxupe hikwái.

* **1:1** Lc 1.1-4 * **1:5** Mt 3.11; Mc 1.8; Lc 3.16; Jo 1.33; At 11.16

10 Hesu rapykwere-rehe joty oma'ẽ oĩ-vy hikwái. Upe jave onhembo'y oĩ ramo ijyke-rehe mokõi ijao morotí va'e. Kwimba'e nipo upe va'e ra'e.

11 He'i Hesu remimondo kwéry-pe,

—Ore rapixa kwéry, Galiléia pygwa va'e, ma'erã tipo pende rovayva yva yvate-koty peĩ-vy, he'i. —Ko va'e Hesu, a-rami jevy ogwejy va'erã ou-vy. Pehexa-ma íxupe kuri ojereroyvate ramo oho-vy pendéhegwí. Ojereroyvate hagwe-rami jevy ogwejy va'erã ou-vy, he'i Hesu remimondo kwéry-pe.

Matias omoirũ Hesu remimondo kwéry-pe opyta hagwã doze jevy

12 Upe ramo hemimondo kwéry oje'oipa jevy gwetakwe reheve. Oliveiras yvyaty-gwi ogwejy oje'oipa hagwã Jerusalém tetã-my. Namombyry etéi opyta upe-gwi. Hi'agwí voi opyta. Upéa-gwi ogwahé pya'e oje'óí-vy Jerusalém tetã-my.

13 Upe-py oike rire ojeupi okoty yvate-py opyta haty-py. Oikepa upe-py hemimondo kwéry, Pedro, João, Tiago, André ndive. Oike ave Filipe, Tomé ndive. Oike ave Bartolomeu, Mateus ndive. Oike ave Tiago, Alfeu ra'y va'e, Simão Zelote va'e, Judas, Tiago ra'y va'e ndive oike.

14 Ha'e kwéry meme oikepa upe-py. Gweta kwéry reheve peteĩxa omundo mundo Nhandejáry-pe onhe'ẽ. Oraçao apo-vy hetea'e voi. Nainhate'ŷiry voi. Hendive kwéry onhomboaty kunhagwe. Hesu sy héry Maria omoirũ ave íxupe kwéry. Tyvýry omoirũ ave íxupe kwéry.

15 Oraçao ojapo meme hikwái. Ha peteĩ áry-py heta ojogweroaty jave, cento e vinte-rupi oĩ ramo upe-py, Pedro opu'ã omombe'u hagwã. Entéro va'e rovagwy-gwi opu'ã. Upéi he'i íxupe kwéry:

16 —Amombe'u-ta peẽ-my, xe re'yi kwéry. Yma voi Nhe'ẽ Marangatu tee va'e ome'ẽ va'ekwe myamyrí Davi-pe inhe'ẽrã omombe'u hagwã Judas amyrí rekorã, omotenonde hagwã oiko hagwã. Anhetegwa voi ra'e. Upéa-gwi yma omombe'u hagwe-rami, ãy oikopa voi kuri, he'i Pedro.

17 —Judas amyrí katu Hesu remimbo'ekwe, nhande javegwa voi. Hembíaporã ome'ẽ íxupe va'ekwe Hesu. Nhande-vy ome'ẽha-rami ome'ẽ ave íxupe va'ekwe.

18 Upéa oho va'ekwe omombe'u Hesu pyhyharã-pe. Kipy oime omombe'u ipyhyharã-pe. Ha upe rire katu ipyhy-vy Hesu-pe ogweraha-ma. Ojapo vai voi. Hesu mombe'uhare repykwe ogweraha Judas ojogwa hagwã yvy. Upe rire yvate-gwi ho'a upe-py yvy-py. Osoro ramo hye, ho'apa hyekwe po'ikwe yvy-py omano.

19 Omosarambi herakwã heraha-vy enterove Jerusalém tetã-rupi oiko va'e-pe. Omano va'ekwe ha-py ha'e ae onhe'ẽ-py ohenói Aceldama. Upéa he'ise, Tugwy reheve yvy va'e oĩ ha-py.*

20 Ha Judas rehewa omoi uka va'ekwe Nhandejáry kwatia-rehe. Upe kwatia nhambohéry Salmo. A-rami hesegwarã omotenonde va'ekwe:

“Topyta nandi hekwagwe. Ani oiko teĩ avave upe-py. Hekoviare ae tojapo hembiapokwe.”*

Upéixa voi omoi uka va'ekwe kwatia-rehe Nhandejáry, he'i Pedro imombe'u-vy.

21 Upéi he'i jevy íxupe kwéry Pedro:

—Upéa-rehe ae tanhane moirũ hekoviare japyta jevy hagwã doze, he'i. —Jaiporavo katu Hesu nhe'ẽ renduha va'e voi, nhane ndive oiko va'ety.

22 Hesu ndive oiko va'ekwe, João oporomongarai joty ramo. Ojereroyvate peve Hesu ndive oiko meme va'e. Upeixagwa nhande jaipota nhane moirũ

* **1:19** Mt 27.6-8 * **1:20** Sl 69.25; 109.8

omombe'u hagwā nhane ndive Hesu oikove jevymaha, he'i íxupe kwéry Pedro.

²³ Upéa he'i rire mokōi oiporavo hikwái. Omohembo'y ha'e kwéry gwovái imoī-vy. Oiporavo mokōi kwimba'e. Peteī héry va'e José Justo. Héry joapy Barsabás. Oiporavo ave Matias.

²⁴ Upe ramo ombojeupi onhe'ẽ Nhandejáry-pe hikwái:

—Nde ko opamba'e ereikwaa va'e, ore Járy. Ore py'a-py ndaipóri okanhya va'e ndéhegwí. Kiva'e po ne rembiporavo ehexa uka ore-vy oroikwaa hagwā ore irurā, he'i.

²⁵ —Ha Judas katu ne remimondokwe ave. Ha oheja va'ekwe gwembia-porāgwe. Oheja oho hagwā anháy ndive oiko, he'i Nhandejáry-pe hikwái.

²⁶ Upéixa ramo mokōi téry omoī hyru-py. Omboveve peteī ho'a hagwā. Ho'a ramo peteī, ohexa ojohu héry:

—Matias ra'e, he'i ojóupe.

Upéa-gwi omoirū íxupe kwéry opyta hagwā doze jevy.

2

Nhe'ẽ Marangatu tee va'e ipy'a omohynyhẽ joa Hesu nhe'ẽ renduha-pe gwive (At 4.31; 8.15; 10.44; 19.2)

¹ Oiko-ma aretegwasu héry va'e Pentecostes. Upéa áry-py Hesu nhe'ẽ renduha gwive peteī henda-py ojogweroaty okwa-vy.*

² Upe-ma ramo áry gwigwa ogwejy ou-vy. Yvytugwasu-rami ou: “Tyryryry” he'i ou-vy. Oike koty-py ogwapy okwa-vy ha-py. Ojohupa koty.

³ Peteī teī va'e akā ári ohexa tata rendy po'i ramigwa.

⁴ Upe-ma ramo ipy'a omohynyhẽ joa íxupe kwéry Nhe'ẽ Marangatu tee va'e. Omohynyhẽmba rire nhe'ẽ ambue-py onhe'ẽ-ma hikwái. Omohembo'y ha'e kwéry Nhe'ẽ Marangatu tee va'e. Upéa-gwi nhe'ẽ ambue-py onhe'ẽ peteī teī hikwái.

⁵ Upe ramo heta judeu kwéry oĩ Jerusalém tetã-my. Opa opa-rupigwi ou va'ekwe oĩ upe-py. Nhandejáry-pe omboete hagwā ou va'ekwe.

⁶ Yvytugwasu ramigwa ohendu ramo ojogweroatypa hikwái:

—Xe nhe'ẽ-py voi onhe'ẽ aipo va'e. Xe nhe'ẽ voi aipo va'e, he'i peteī teī hendoха. —Mba'éixa po onhe'ẽ xe nhe'ẽ-py? Mba'éixa po oikwaa hagwā? oporandu randu-vy ojóupe hikwái.

⁷ Upéa-gwi opondera joa hese hikwái:

—Ma'erā tipo gwĩ-rami? Galiléia pygwa meme gwĩ va'e ra'e, onhe'ẽ okwa-vy va'e, he'i.

⁸ —Mba'éixa oikwaa nhane nhe'ẽ? Peteī teī nhane nhe'ẽ-py onhe'ẽ hikwái ra'e, he'i ojóupe opondera-vy hese.

⁹ —Nhande jaju va'ekwe a-py opa-rupigwi jaju va'ekwe. Nhande ko Pártia yvy pygwa, Média yvy pygwa, Elão yvy pygwa, Mésopotâmia yvy pygwa, Judéia yvy pygwa, Capadócia yvy pygwa, Ponto yvy pygwa, Ásia yvy pygwa,

¹⁰ Frígia yvy pygwa, Panfília yvy pygwa, Egito yvy pygwa. Cirene de Líbia yvy pygwa ave. Nhande ko Roma tetã mygwa,

¹¹ judeu va'e, judeu reko-rupi jaikose va'e ave. Nhande Creta yvy pygwa, Arábia yvy pygwa ave. Opa-rupigwi voi jaju va'ekwe nhande kwéry. Ha peteī teī nhane nhe'ẽ-py katu onhe'ẽ ramo, nhahendu-ma. Nhandejáry rembiapo porã porã ipu'aka reheve omombe'u ramo, nhahendu, he'i judeu kwéry opa-rupigwi ou va'ekwe.

* ^{2:1} Lv 23.15-21; Dt 16.9-11

¹² Upéixa ramo opondera ndera Hesu nhe'ẽ renduha va'e-rehe gwive. Ha nainhe'ẽ jojái judeu kwéry:

—Mbava'e po oiko-ta? Mbava'e po oiko-ta? oĩ he'i va'e ojóupe.

¹³ —Oka'u randai upe va'e, oĩ he'i va'e mo'ã opuka-vy hese.

Pedro omombe'u judeu kwéry-pe Nhandejáry rehewa nhe'ẽ porã

¹⁴ Upéixa ramo Pedro opu'ã onhembo'y oĩ-vy. Onze inhirũ ijave opu'ã. Hatã onhe'ẽ enterove ohendu hagwã:

—Pejeapysaka katu pehendu porã hagwã xe nhe'ẽ, xe re'ýi kwéry, Jerusalém-my oiko va'e gwive ave. Upeixagwa ore nhe'ẽ va'e voi.

¹⁵ Ndoroka'úiry teĩ, he'i íxupe kwéry. —“Oka'u” ere mo'ã kuri ore-rehe. Ndayvate etéi vyteri kwarahy. A-rami ha-py ndajaka'uhá órai vyteri, he'i íxupe kwéry. —Avave voi ndoka'úiry kóá óra.

¹⁶ Ha ãy ojehu va'e katu amombe'u-ta peẽ-my. Aipo va'e rehewa yma omoĩ va'ekwe kватia-rehe. Nhandejáry nhe'ẽ-py omombe'u va'ety héry va'e Joel omoĩ va'ekwe. Yma omohenonde va'ekwe ãy oiko hagwã:

¹⁷ “He'i Nhandejáry: Enterove va'e pegwarã ambogwejy-ta ime'ẽ-vy Nhe'ẽ Marangatu tee va'e. Haimete opa-tama ko yvy oiko-ta, he'i. Xe nhe'ẽ-py nde ra'y kwéry xe mombe'u va'erã, nde rajy kwéry xe mombe'u ave va'erã. Peẽ karia'y kwéry va'e, peteĩ va'e upéte ajehexa uka-ta. Xe rehewa ohex-a-ta ikéra-py peẽ tuja kwéry va'e.

¹⁸ Xe rembigwái kwéry-pe kwimba'e va'e, kunha va'e ave ambogwejy-ta ime'ẽ-vy Nhe'ẽ Marangatu tee va'e. Xe nhe'ẽ-py xe mombe'u va'erã.

¹⁹ Hexapyrã-rupi xe rembiapo-ta áry-rehe. Yvy-py ave xe rembiapo-ta enterove opondera hagwã ahexa uka-ta, he'i. Ambojekwaa-ta ko yvy-rehe tugwy. Tata ambojekwaa-ta ave. Yvytu-rupi oho jave tatafí ahexa uka-ta.

²⁰ Ha kwarahy katu onhepytú-ta. Hugwy-ta jasy. Upe rire ae agwejy jevy-ta aju-vy ko yvy-py, he'i Nhandejáry. Xe pu'akaha rehewe aju va'erã upe áry-py. Ndaipóri avave xe rexá e'ý va'erã. Entéro va'e oĩ va'e gwive ko yvy ári xe rexata aju ramo, he'i.

²¹ Upéixa ramo opa-rupi xe réry renoiha gwive onheresende-ta. Aresende-ta íxupe, he'i Nhandejáry.”*

Upéixa voi Nhandejáry nhe'ẽ kватia-rehe oĩ va'e, he'i Pedro omombe'u-vy.

²² Upe rire he'i jevy íxupe kwéry:

—Pejeapysaka porã katu ko xe nhe'ẽ-rehe, xe re'ýi kwéry. Amombe'u-ta peẽ-my Hesu rehewa nhe'ẽ. Hesu Nazaré pygwa va'e ko Nhandejáry rembiporavopyre voi, hemimbojekwaa ave. Hexapyrã-rupi hembiapo porã hagwã he'i va'ekwe íxupe Nhandejáry. Ojapo uka va'ekwe íxupe hembiaporã. Nhane rembiexa e'ý ave ojapo uka va'ekwe íxupe. Upéixa ojapo uka va'ekwe íxupe pene pa'ü-my. Enterove hexapyrã-rupi hembiapo ojapo uka. He'i hese kente kwéry: “Hesu ko Nhandejáry rembiporavo nipo ra'e” he'i heko rexá-vy. Upéa peẽ peikwaa voi.

²³ —Ha peẽ katu pehupi uka va'ekwe kurusugwasu-rehe imoĩ-vy pejuka hagwã Hesu-pe. Iporayhu e'ý va'e po-py pejuka uka va'ekwe íxupe. Ha Nhandejáry omohenonde voi va'ekwe Hesu rekora. Ojehu va'erã oikwaa voi va'ekwe. Hembiayhu ramo jepe, oipota voi omano. Upéa-gwi oheja omoĩ íxupe kurusugwasu-rehe.

²⁴ Ha ojekuka rire, omoingove jevy íxupe Nhandejáry. Ha'e ae katu omano ete jepe ndikatúi omano are oĩ-vy onhemoĩ asy rehewe. Ndaipu'akái hese manoha. Upéa-gwi pya'e omoingove jevy íxupe Nhandejáry.

* ^{2:21} Jl 2.28-32

25 Yma ete myamyrī Davi omohenonde va'ekwe Hesu rekorā hese. Hesegwarā omoī va'ekwe kватia-rehe kóá he'i-vy:

“Ahexa Nhandejáry-pe xe yke-rehe meme oī ramo. Xe akatúa-koty meme oī xe mbopy'a ryryí e'ŷ hagwā.

26 Upéa-gwi avy'a xe py'agwapy-gwi. Avy'a etereiha amombe'u. Ndaxe rete kyhyje mo'âvái-ma aiko-vy. Naxe mytu'e'ŷ mo'âvái-ma.

27 Amano ramo, ndereheja mo'âiry xe nhe'ëgwe oiko hagwā onhemondo hatypy. Ndereheja mo'âiry ine nde ra'y marangatu va'e retekwe.

28 Erehexa uka voi xe-vy tape porā amano e'ŷ hagwā. Xe mbovy'a eterei-ta ne ndive aime meme ramo.”*

Upéixa voi omoī va'ekwe kватia-rehe myamyrī Davi, he'i Pedro omombe'u-vy.

29 Upéi he'i jevy íxupe kwéry:

—Pejeapysaka porā katu xe nhe'ë-rehe, xe re'ýi kwéry. Nhane ramói Davi katu omano va'ekwe. Hetekwe omoī va'ekwe itakwa-py. Ha ãy ete peve oī ijyta.

30 —Nhandejáry nhe'ë-py omombe'u va'ekwe oiko-vy. Ko va'e jaikwaa voi. Yma ete he'i va'ekwe Davi-pe Nhandejáry: “Amombe'u-ta nde-vy hupigwa va'e. Ndaxe apu mo'âi nde-vy” he'i. “Peteñ ne remiarirō amoingo-ta mburuvixarā nde rekoviá ramo” he'i íxupe Nhandejáry. Ohendu ramo: “Hupigwa va'e voi Nhandejáry nhe'ë” he'i va'ekwe Davi.*

31 —Ogwerovia-gwi Hesu rekorā omotenonde va'ekwe: “Amano ramo, ndereheja mo'âiry ine xe retekwe” he'i ramo, omotenonde va'ekwe Hesu rekorā. Hesu Cristo oikove jevymaha va'e rehewa nhe'ë omombe'u va'ekwe. Hesu rekorā omohenonde va'ekwe Davi, he'i Pedro imombe'u-vy.

32 Upéi he'i jevy íxupe kwéry:

—Pehendu katu. Ko va'e Hesu, omoingove jevy kuri íxupe Nhandejáry. Ore kwéry katu hexahare. Orohexa voi oikove jevy rire íxupe.

33 Onhemoingove jevy rire, onhemomba'egwasu ete-ma Nhandejáry yke-rehe. Are-ma he'i va'ekwe Hesu-pe Túvy: “Ambogwejy uka-ta nde-vy Nhe'ë Marangatu tee va'e” he'i íxupe Nhandejáry, he'i Pedro imombe'u-vy.

Upéi he'i jevy judeu kwéry-pe:

—Ãy ae ombogwejy-ma kuri Nhe'ë Marangatu tee va'e-pe. Ha peñ katu pehexa-ma. Hemimbogwejy va'e pehendu-ma ave. Pene rembiexa gwive, pene remiendu gwive ave Nhandejáry remimbogwejy voi, he'i.

34 —Ha myamyrī Davi katu ndojereroyvatéi voi va'ekwe yváy-py. A-rami ae he'i va'ekwe Davi:

“Nhandejáry he'i xe Járy-pe: Egwapy katu xe yke-rehe.

35 Xe orombopu'aka-ta ne a'e'ŷha-rehe. Orombopu'akapa peve eregwapy-ta ereñ-vy xe akatúa koty, he'i.”*

Upéixa Davi omombe'u va'ekwe Hesu rekorā, he'i Pedro imombe'u-vy.

36 Upéi he'i jevy judeu kwéry-pe:

—Davi he'i va'ekwe gwive anhetegwa voi. Toikwaapa katu Israel remiarirõre judeu kwéry va'e. Upe va'e Hesu pehupi uka va'ekwe kurusugwasu-rehe pejuka uka hagwā, omomba'egwasu ete-ma joty íxupe Nhandejáry. Omomba'egwasu joty íxupe, nhane ruvixarā omoingo-vy. “Xe rembiporavo va'e joty voi katu” he'i Hesu-rehe Nhandejáry, he'i Pedro judeu kwéry-pe Nhandejáry nhe'ë omombe'u-vy.

37 Upéa nhe'ë ohendu ramo ojepy'ajopy joa hikwái:

* **2:28** Sl 16.8-11 * **2:30** Sl 89.3-4; 132.11 * **2:35** Sl 110.1

—Mbava'e po orojapo-ta ãy, ore re'yi kwéry? he'i Pedro-pe. Outro Hesu remimondo va'e kwéry-pe oporandu ave gwembiaporã-rehe.

Upe ramo he'i íxupe kwéry Pedro:

³⁸—Perova katu pende rekoha, he'i. —Penhemongarai peteĩ teĩ Hesu Cristo réry-py, omboyke hagwã pendéhegwí pene rembiapo vai va'ekwe. Upe rire ae ombogwejy-ta ime'ë-vy peë-my Nhe'ë Marangatu tee va'e.

³⁹ Yma Nhandejáry he'i va'ekwe: “Ambogwejy-ta ime'ë-vy peë-my pende ra'y kwéry-pe ave. Mombyry rupigwa-pe gwive ave ambogwejy-ta Nhe'ë marangatu tee va'e. Entero xe remienói-pe gwive ou hagwã xe ha-py ambogwejy-ta ime'ë-vy” he'i va'ekwe Nhandejáry, he'i Pedro imombe'u-vy.

⁴⁰ Upéi onhemonhe'ëve ëve íxupe kwéry:

—Tekoha-rami e'ë pende rekoha. Perova katu pende rekoha, he'i. —Ani pemoirû teĩ pende rapixa hekoha vai va'e, he'iri iri judeu kwéry-pe Pedro. Oï hetave tave omombe'u va'e.

⁴¹ Upe ramo inhe'ë renduha va'e onhemongarai-ma. Upe va'e áry-py heta-ma oï inhe'ë renduha. Mbohapy mil-rupi oï. Ha Pedro kwéry-pe omoirû-ma hikwái.

⁴² Hesu remimondo kwéry ndive oiko meme ohendu hagwã inhe'ë. Onhemoirû meme. Hendiye mante oiko. Onhondive okaru. Onhondive omundo mondo Nhandejáry-pe onhe'ë.

⁴³ Upe-py oï va'e gwive opondera hese:

—Mbava'e tipo ko va'e? Mbava'e tipo ko va'e? he'i ojóupe.

Ha hemimondo kwéry heta hembiapo porã hexapyrã-rupi. Heta ojapo nhane rembiexa e'ë. Upéa-gwi enterove va'e opondera hese.

Hesu reroviaha gwive onhondive oiko

(At 4.32-35)

⁴⁴ Ha Hesu reroviaha gwive onhondive oiko: “Kóva ko va'e xe mba'e” peteĩ teĩ nde'ivéi-ma ojóupe.

⁴⁵ Ogweroko va'e ovende ome'ë hagwã hepykwe. Peteĩ teĩ va'e-pe ome'ë hemikotevë.

⁴⁶ Ko'ëmba ëmba oho meme oje'ói-vy Nhandejáry róga kakwaa-py. Peteĩ teĩ va'e róga-py omboja'o ja'o ojóupe onhondive okaru hagwã. Ovy'a joa okaru-vy. Naima'e rakate'ëiry.

⁴⁷ Nhandejáry-pe omboete ete oiko-vy va'e. Upéixa ramo ogwerovy'a joa íxupe kwéry kente kwéry. Ha'e kwéry hetave tave oho-vy. Ogwerovia rovia va'e omoirû íxupe kwéry. Nhandejáry nhe'ë-py ogwerovia.

3

Ogwata e'ë va'e ogwata jevy-ma

¹ Peteĩ áry-py ka'arugwasu-ma ramo, Pedro João ndive, Hesu remimondo va'e, ogwata oho-vy. Nhandejáry róga kakwaa-py oho. Upéa óra-py oraçao jajapo va'e upe-py.

² Ha óga kakwaa renonde-py oï ogwata e'ë va'e. Imitã gwive ãy peve ndogwatái. Ogweraha meme omoï íxupe upe-py okëgwasu renonde-py, héry okëndusu porã. Oike va'e-pe gwive ojerure hagwã omoï upe-py.

³ Ha upéi katu oho upe-py Pedro João ndive. Oho oike hagwã upe-py. Ha ogwata e'ë va'e katu ohexá íxupe. Oike ramo Pedro João ndive, ojerure íxupe imba'erã-rehe.

⁴ Ha'e kwéry, mokõive va'e, ohexá katu íxupe. Ogwata e'ë va'e-pe ohexá katu:

—Ema'ë katu ore-rehe, he'i íxupe.

⁵ Upe ramo oma'ë mokõive va'e-rehe: “Om̄ba'e me'ë-tama xe-vy” he'i mo'ä ojéupe.

6 —Ndaxe pirapiréi ame'ẽ hagwã nde-vy. Ndaxe platavéi, he'i íxupe Pedro. —Ko va'e areko va'e ame'ẽ-ta nde-vy. Epu'ã katu egwata Hesu Cristo Nazaré pygwa réry-py. Epu'ã katu egwata, he'i íxupe Pedro.

7 Upe rire ijakatúa-rehe oipopyhy imopu'ã-vy íxupe. Upe-ma ramo ipynhu'ã ipy rehevē imbaraete-ma voi íxupe.

8 Opo voi opu'ã-ma. Ogwata-ma. Ogwata rehevē-ma voi oike óga kakwaa-py. Onhondive oike. Opo opo omboete eterei-vy Nhandejáry-pe.

9 Enterove ohexá íxupe ogwata-ma ramo, omboete-ma ramo Nhandejáry-pe:

10 —Imba'e jerure va'evy ko upe va'e, he'i ohexá-vy íxupe. —Okẽndusu porã renonde-py ogwapy va'evy ko upe va'e, he'i. —Mbava'e po ojehu upe va'e-pe? he'i oporandu randu-vy ojóupe hikwái.

Ohexá ramo ogwata-ma ramo, opondera eterei hese,

—Mba'éixa po ombogwata rei hajy jeapa va'e-pe, he'i opondera-vy hese.

Pedro omombe'u judeu kwéry-pe Nhandejáry rehewa nhe'ẽ

11 Ha upe ogwata e'ỹ tuja va'e ãy katu ogwata-ma. Omoirũ-ma Pedro João ndive. Mokõive va'e-pe oipyhy jovái ramo, oriparapa ou-vy upe-py oĩ va'e gwive ohexá hagwã íxupe. Opondera eterei hese hikwái. Oupa Nhandejáry róga kakwaa mopekwã pekwãpyre-py hikwái. Upéa imopekwãpyre ohenóí Salomão. Upe-py oupa hikwái.

12 Ohexá ramo, onhe'ẽ íxupe kwéry Pedro:

—Ma'erã tipo pepondera hese, xe re'yí kwéry? he'i Israel remiarirõre judeu kwéry-pe. —Ma'erã tipo ore rexá katu katu pekwa-vy? oporandu íxupe kwéry. —Ore nhe'ẽ-py katu norombogwatáiry íxupe. Noromopu'ãiry imbogwata-vy íxupe ore rekoha porã-gwi: “Pedro ombogwata” peje mo'ã hese. Upéa-gwi ore rexá katu katu pekwa-vy, he'i íxupe kwéry.

13 —Hesu nhe'ẽ-py ae voi ogwata. Ha'e Nhandejáry remimomba'egwasu voi. Nhandejáry Abraão Járy, Isaque Járy, Jacó Járy, nhane ramói kwéry Járy ave. ãy omomba'egwasu voi gwembigwái Hesu-pe. Ha peẽ katu pembojevy asy voi va'ekwe: “Iporã ojejuka” peje va'ekwe hese mburuvixagwasu Pilatos-pe. Ha mburuvixa opoise jeyv mo'ã íxugwi.

14 Upe ramo pembojevy íxupe. Ha'e heko marangatu ramo jepe, ojejavy e'ỹ ramo jepe ave, pembojevy asy joty voi íxupe. Pejerure mburuvixa-pe opoi hagwã imondo-vy peteĩ oporojuka va'ekwe-gwi.

15 Ha nhane moingove va'ety katu pejuka. Ha Nhandejáry omopu'ã jeyv íxupe. Oikove jeyv ramo, ore kwéry hexahare.

16 Ko va'e kwimba'e peẽ pehexa va'e, peikwaa va'e ave, ogwata e'ỹ tuja va'e, ãy katu Hesu réry-py imbaraete jeyv. Hesu-rehe ojerovia-gwi okwerapa-ma voi. Upéa rexaha peẽ, he'i íxupe kwéry.

17 —Peikwaa e'ỹ rehevē pene rembiapo vai va'ekwe, peẽ, xe re'yí kwéry. Oikwaa e'ỹ rehevē pende ruvixa kwéry rembiapo vai va'ekwe ave. Upéa aikwaa voi xe, he'i Pedro imombe'u-vy.

18 Upéi he'i jeyv judeu kwéry-pe:

—Yma ete Hesu rekorã omoī va'ekwe kwaitia-rehe Nhandejáry nhe'ẽ-py omombe'u va'ety gwive: “Nhandejáry rembiporavo va'e oiko asy va'erã” he'i va'ekwe, imohenonde-vy hekorã. ãy katu oiko-ma voi Nhandejáry nhe'ẽ-py, he'i.

19-20 —Upéa-gwi pemboasy katu pene rembiapo vaikwe. Perova katu pende rekoha peiko hagwã Nhandejáry reko-rupi, omboyke hagwã pendéhegwí pene rembiapo vaikwe, pene mbopy'agwapy jeyv hagwã, ombou hagwã ime'ẽ-vy peẽ-my hembiporavo va'e Hesu Cristo.

²¹ Ha'e oiko va'erã Nhandejáry ndive yváy-py. Upe-py Hesu Cristo oiko va'erã entéro Nhandejáry nhe'ẽ-py omombe'u va'ety imarangatu va'e he'i va'ekwe gwive oiko hagwã: "Nhandejáry omoatyrõmba ranhe va'erã voi" he'i va'ekwe. "Omoatyrõmba rire ae, ombou jevy va'erã Hesu-pe" he'i va'ekwe, he'i Pedro imombe'u-vy.

²² Upéi he'i jevy judeu kwéry-pe:

—Ha myamyrĩ Moisés omombe'u va'ekwe Hesu rekorã:

"Xe ramigwa omoingo va'erã Nhandejáry inhe'ẽ-py omombe'u va'erã. Pene pa'ũ-gwi omoingo va'erã peteĩ va'e omombe'u va'erã Nhandejáry nhe'ẽ-py. Xe moingo hagwe-rami omoingo va'erã. Pehendupa ete va'erã hemimombe'urã gwive peẽ-my.*

²³ Entéro íxupe ohendu e'ŷ va'e gwive, omboyke va'erã Nhandejáry gwe'ýi kwéry-gwi, opa hagwã-pyma imondo-vy** he'i va'ekwe Moisés, he'i Pedro omombe'u-vy.

²⁴ Upéi he'i jevy Pedro:

—Upéixa ave Nhandejáry nhe'ẽ-py omombe'u va'ety gwive omombe'u va'ekwe Hesu rekorã. Samuel amyrĩ omombe'u va'ekwe. Upéi Samuel amyrĩ nhe'ẽgwe omombe'u mbe'u joto ãy peve. Peteĩxa omombe'u va'ekwe. Ogwerojoja joa onhe'ẽ ãy oiko va'erã mombe'u-vy, Hesu rekorã mombe'u-vy.

²⁵ Upe va'e Nhandejáry nhe'ẽ-py omombe'u va'ety pende re'ýi kwéry va'e voi. Upéa-gwi inhe'ẽ peẽ-my gwarã voi ave. Yma ete onhe'ẽ va'ekwe Nhandejáry myamyrĩ pene ramói kwéry-pe:

"Peteĩ ne remiarirõ joapyri pyri-rehe ha-py ahovasa va'erã enterove ko yvy ári oĩ va'e-pe gwive"*

he'i va'ekwe Abraão amyrĩ-pe, Hesu rekorã mombe'u-vy. Ohendu ramo upe inhe'ẽ, omoporã. Abraão pegwarã voi inhe'ẽ. Ha Abraão pene ramói voi. Upéa-gwi upe inhe'ẽ peẽ-my gwarã voi ave, he'i imombe'u-vy Pedro.

²⁶ Upéi he'ive Pedro:

—Ha ko'ângá katu oiporavo Nhandejáry gwembigwairã Hesu-pe. Omoin-gove jevy-ma rire íxupe, peẽ-my ranhe ombou pende rovasa hagwã, omboyke hagwã peteĩ teĩ pendéhegwi pene rembiapo vai va'ekwe, he'i judeu kwéry-pe Pedro.

4

Pedro João ndive onhemoï preso

¹ Ha upéi katu Pedro João ndive onhe'ẽ oĩ-vy Nhandejáry róga py-py, óga kakwaa va'e py-py. Ne'írã omombe'upa vyteri ramo, ogwahẽ ou-vy pa'i ruvixa kwéry. Ogwahẽ ave polícia ruvixa. Upe va'e polícia onhangareko va'e Nhandejáry róga kakwaa-rehe. Ogwahẽ ave saduceu kwéry.

² Mokõive va'e nhe'ẽ ogweropoxy: "Hesu oikove jevy-gwi, nhande kwéry jaikove jevy va'erã voi ave" he'i ra'e omombe'u-vy kente kwéry-pe gwive Pedro João ndive. Upéa nhe'ẽ ombopoxy saduceu kwéry-pe.

³ Upéa-gwi mokõive va'e-pe oipyhy hikwái oapresa hagwã íxupe. Ka'aru etema. Ko'ëmba peve oapresa imoĩ-vy.

⁴ Ha heta voi oĩ inhe'ẽ reroviahá. Cinco mil kwimba'e va'e-rupi oĩ inhe'ẽ renduha.

⁵ Ko'ëmba-ma ojogweroaty Jerusalém-my judeu ruvixa kwéry. Ojogweroaty ave gwí judeu kwéry remimboete. Judeu rekombo'ehaty kwéry ojogweroatypa ave.

* 3:22 Dt 18.15-16 * 3:23 Dt 18.19 * 3:25 Gn 22.18

6 Hendive kwéry oĩ pa'i ruvixagwasu héry va'e Anás. He'ýi oĩ ave, héry va'e Caifás, João, Alexandre. He'ýi gwive oĩ ave.

7 Upe ramo ohenói uka onhemoĩ preso va'ekwe ou hagwã. Ou ramo gwovagwy-py omونhembo'y imoĩ-vy íxupe kwéry. Upéi omonhe'ẽ íxupe:

—Kiva'e nhe'ẽ-py tipo pejapo koixagwa ra'e? Kiva'e réry-py pejapo koixagwa ra'e? he'i íxupe kwéry oporandu randu-vy.

8 Upe-ma ramo ipy'a omohynyhëmba íxupe onhe'ẽ hagwã Nhe'ẽ Marangatu tee va'e. Upéi omombe'u judeu ruvixa kwéry-pe Pedro:

9 —Ãy katu xe monhe'ẽ voi ogwata e'ý va'e-rehe. Okwera porãmaha-rehe xe monhe'ẽ: "Mba'éixa tipo okwera?" ere kuri xe-vy ereporandu-vy.

10 Néi, amombe'u-ta peẽ-my peikwaa hagwã, peẽ kwéry mburuvixa kwéry va'e. Entéro Israel remiarirõre judeu ruvixa kwéry-pe amombe'u-ta ave. Ko va'e kwimba'e, Hesu Cristo Nazaré pygwa réry-py voíte opu'ã okwera porã. Ha peẽ katu pehupi va'ekwe Hesu-pe imoĩ-vy kurusugwasu-rehe ijuka-vy. Ha pene rembiupikwe-pe katu omoingove jevy-ma voi Nhandejáry. Ha'e héry-py voi onhembo'y jevy-ma ko va'e kwimba'e, ogwata e'ý tuja va'e. Pende rovagwy-py opu'ã-ma oĩ-vy.

11 Yma omoĩ va'ekwe kwaitia-rehe he'i-vy:
"Ndovaléi, he'i ogapoha ita-rehe. Ha upé ita katu ojeporu ojepyta hoha ramo.

Óga jepyta hoha voi ita"
he'i va'ekwe, he'i Pedro omombe'u-vy.

Upéi he'i jevy Pedro:
—"Ita" he'i ramo, Hesu rekorã omombe'u. "Ogapoha" he'i ramo, pene rekorã omombe'u va'ekwe.

12 Æy katu ko yvy-rupi ndaipóri ha'e héry ramigwa. Ambue va'e réry nomoïry nhande-vy Nhandejáry nhane resende hagwã. Hesu réry mante ae nhahenói ramo, nhane resende va'erã, he'i judeu ruvixa kwéry-pe Pedro.

13 Upe ramo mburuvixa kwéry ohendu joa inhe'ẽ. Onhembopy'agwasu rehevê mokôive va'e remimombe'u ohendu joa hikwái. He'i ojóupe:

—Ndoikéi ramo jepe escola-py, oikwaa porã voi onhe'ẽrã. Imbo'eháry ndoikói ramo jepe, hi'arandu porã voi, he'i ojóupe hese kwéry. Oikwaa porã onhe'ẽrã-gwi, opondera hese hikwái: —Hesu ndivegwa voíte ra'e upé va'e, he'i ojóupe hese hikwái.

14 Upéi oma'ẽ upé ogwata e'ý tuja va'e-rehe Pedro yke-rehe onhembo'y oĩ-vy ramo. Okwera porã-gwi nonhe'ẽ mbojevy mo'ãí íxupe hikwái. Mba'eve nde'íry íxupe.

15 Upéixa ramo, ombojevy imondo-vy opa'ü-gwi hikwái.

16 Osẽ rire he'i ojóupe:
—Mbava'e tipo jajapo-ta hese? he'i oporandu randu-vy ojóupe hikwái. —Hexapyrã-rupi voi hembiapo porã, he'i hese. —A pygwa, Jerusalém-my oiko va'e gwive oikwaapa voi. Upéa-gwi ndikatúi nhande apu hese.

17 Ha ndajaipotavéi herakwã oho mombyry-rupi: "Anive katu erenhe'ẽve teĩ Hesu réry-py ereiko-vy. Upéixa erejapo ramo orogwereko asy arã" ja'e katu mokôive va'e-pe, he'i ojóupe judeu ruvixa kwéry.

18 Upéi ohenói jevy oike hagwã. Oike rire, he'i íxupe:
—Anive katu erenhe'ẽve teĩ ereiko-vy Hesu réry-py. Ani ereporombo'eve teĩ heko-rupi, he'i onhe'ẽ poxy-vy íxupe onhemonhe'ẽ-vy.

19 Ohendu ramo inhe'ẽ, he'i mburuvixa kwéry-pe Pedro João ndive:

* **4:11** Sl 118.22

—Iporā tipo orohendu pene nhe'ẽ orohendu e'ŷ hagwā Nhandejáry nhe'ẽ? he'i. —Aipo ramo mbava'e tipo he'i-ta Nhandejáry orohendu ramo pene nhe'ẽ? Pemombe'u katu ore-vy, he'i íxupe.

20 —Ore rembiexagwe, ore remiendukwe oromombe'u meme va'erā. Norokirirī mo'ãiry voi, he'i mburuvixa kwéry-pe.

21 Upe rire he'i íxupe:

—Anive eremombe'u Hesu réry-py. Upéixa erejapo ramo orogwereko asy arā, he'iri iri onhe'ẽ poxy-vy íxupe hikwái.

Upéi katu opoi íxugwi oho hagwā:

—Tereho katu, he'i íxupe ombohasa asyse mo'ã rire íxupe.

Nombohasa asy jepéiry íxupe. Ha upe pygwa onhomboaty va'e gwive omboete okwa-vy va'e Nhandejáry-pe. Ojehu va'ekwe-rehe omboete. Upéa-gwi mburuvixa kwéry omosē rei imondo-vy.

22 Ha ogwata e'ŷ tuja va'e katu hexapyrā-rupi okwera va'e ituja-ma va'e voi. Quarenta-gwi ogwerekove va'e ro'y. Upéa-gwi kente kwéry omboete tee voi Nhandejáry-pe.

Hesu reroviaha gwive peteĩxa omondo Nhandejáry-pe onhe'ẽ

23 Upe-ma ramo Pedro João ndive oho jevy gwe'yi kwéry ha-py. Pa'i ruvixa he'i va'ekwe omombe'u. Judeu ruvixa he'i va'ekwe omombe'u ave.

24 Ohendu ramo, peteĩxa omondo mondo joa hikwái Nhandejáry-pe onhe'ẽ:

—Nde ko, ore Járy, nde pu'aka va'e voi enterove va'e-rehe, he'i omboete-vy. —Nde áry yvy ygwasu ave apoha. Hesegwa gwive ijapoha voi nde, he'i omboete-vy.*

25 —Yma ete nhane ramói Davi amyrī-pe ne rembigwái-pe ereme'ẽ va'ekwe inhe'ẽrā. Ombo'e va'ekwe íxupe onhe'ẽ hagwā Nhe'ẽ Marangatu tee va'e:

“He'i Nhandejáry: Mba'e-gwi po judeu re'yi e'ŷ kwéry ipoxypa hikwái? Ma'erā po he'i mo'ã xe-rehe: Nhande kwéry nhande pu'aka va'e voi Nhandejáry-rehe, he'i.

26 Ha yvypóry ruvixagwasu kwéry ojogweroatypa hikwái. Onhesyrū syrū okwa-vy. Ou orairō xe-vy, xe rembiporavo-pe ave, he'i Nhandejáry.”*

Yma upéixa he'i va'ekwe Davi.

27 Ha ko'ângā katu a-py voi ojogweroaty-ma mburuvixagwasu orairō hagwā ne rembigwái marangatu-pe, ne rembiporavo Hesu-pe. Upéa mburuvixa héry Herodes, upéa mburuvixagwasu héry Pôncio Pilatos ave, Israel remiarirõre judeu kwéry, judeu re'yi e'ŷ kwéry ave ojogweroatypa orairō hagwā ne rembiporavo Hesu-pe.*

28 Ne nhe'ẽ-rupi ojapo hagwā hese yma ere va'ekwe gwive ojapo va'erā.

29 Ây katu onhe'ẽ poxy hikwái. Eheda katu ipoxyha, ore Járy. Ore ne rembigwái va'e. Ore mbopy'agwasu katu ore kyhyje e'ŷ hagwā ne nhe'ẽ mombe'u-vy.

30 Eheda uka katu nde pu'akaha erembogwera hagwā hasy va'e-pe. Mba'asy-rehe nde pu'aka va'e. Ne rembigwái marangatu Hesu réry-py ejapo uka katu nhane rembiexa e'ŷ. Eheda uka katu ne rembiapo porā. Hexapyrā-rupi ejapo uka katu, he'i joa hikwái.

31 Upéixa omondo mundo Nhandejáry-pe onhe'ẽ. Upe-ma ramo ojogweroaty haty-py oryrí-ma. Ipy'a omohynyhëmba-ma íxupe kwéry Nhe'ẽ Marangatu tee va'e. Upéixa ramo okyhyje e'ŷ reheve peteĩ teĩ omombe'u Nhandejáry nhe'ẽ.

Peteĩ teĩ va'e-pe ome'ẽ me'ẽ hemikotevē

* **4:24** Gn 1.1-2.22; Ex 20.11; Sl 146.6 * **4:26** Sl 2.1-2 * **4:27** Lc 23.7-11; Mt 27.1-2; Mc 15.1; Lc 23.1; Jo 18.28-29

³² Upe ramo Hesu reroviaha gwive ogwerojoja okyre'ŷ oiko-vy hikwái: “Kóá xe mba'e, kóá xe mba'e” he'i va'e ndoikói. “Nhane mba'e meme voi ko'ã va'e” he'i omба'e kwéry-rehe ojóupe.

³³ Ha upe doze Hesu remimondo va'e heroviapyrã-rupi omombe'u mbe'u oiko-vy Hesu oikove jevymaha rehewga nhe'ẽ. Nhandejáry ipytygwõ-vy íxupe omombaraete omombe'u hagwã. Upéa-gwi ohendu va'e gwive inhe'ẽ ojohu porã voi.

³⁴ Ogwerohory joa hikwái. Ha ndaiporivéi-ma ipa'û kwéry-py oikotevẽ va'e. Heta ijvy va'e, heta óga ogwerekva'e ave ovende oiko-vy.

³⁵ Upéi ovende va'ekwe repykwe ogweru, ome'ẽ hagwã Hesu remimondo kwéry-pe, omboja'o ja'o va'erã-pe. Upéixa ramo omboja'o ja'o ime'ẽ me'ẽ-vy oikotevẽ va'e-pe, peteĩ teĩ va'e-pe ome'ẽ hagwã hemikotevẽ.

³⁶ Upe ramo oĩ Hesu nhe'ẽ renduha héry va'e José. Ha Hesu remimondo kwéry ombohéry jo'a Barnabé. Barnabé réry he'ise: “Nhane mongyre'ŷ va'ety”. Barnabé Levita va'e, Chipre yvy pygwa va'e ave.

³⁷ Ha'e oho peteĩ oyvy ovende. Ogweru hepykwe Hesu remimondo kwéry-pe ome'ẽ hagwã.

5

Ananias rehewga nhe'ẽ

¹ Oĩ ave kwimba'e héry va'e Ananias, hembireko héry Safira. Barnabé rekoha-rami teĩ oiko va'e.

² Ha'e oho ovende ave oyvy. Ha hepykwe ndogwerahapái ime'ẽ-vy Hesu remimondo kwéry-pe. Omohemby joty ojéupe gwarã ndogwerahapaséiry. Ogweraha va'erãte ogweraha. Ha hembireko oikwaa porã upéa.

³ Upéa-rehe Pedro he'i Ananias-pe:

—Ma'erã anháy ruvíxa Satanás nde rekome'ẽ nde apu hagwã Nhe'ẽ Marangatu tee va'e-pe? he'i. —Ma'erã nde rekome'ẽ ndererupáiry hagwã, Ananias? he'i oporandu-vy íxupe.

⁴ —Kwehe ne'írã erevende vyteri ramo ne mba'e vyteri. Upéa yvy ne mba'e voi ra'e. Ha upéi erevende rire, hepykwe ne mba'e ete vyteri voi. Ereme'ẽse ramo, ereme'ẽmba arã voi ra'e. Nereme'ëséi ramo, nereme'ëi arã ave ra'e. Upéixa iporã arã ra'e nde-vy. Ha ko'ângá katu nde apu ereiko-vy. Ma'erã nde apu? he'i íxupe. —Ma'erã nde apu hagwã erenhemongeta ereiko-vy nde py'a-py? Teko rei-pe mante nande apúi. Nhandejáry-pe voi nde apu ereiko-vy, he'i íxupe Pedro.

⁵ Ohendu-ma ramo inhe'ẽ, ho'a omano-ma. Ha henduhare gwive onhemondiyipa-ma hikwái.

⁶ Upe rire ou karia'y ojaho'i ho'i heraha-vy hetekwe. Ogwenohë koty-gwi ogweraha ojaty hagwã.

⁷ Ndahi'are etéiry ogwahë hembireko oike koty-py. Iména-pe ojehu va'ekwe ndoikwaáiry.

⁸ Ha Pedro katu oporandu íxupe:

—Ko va'e-rehe anho tipo ereme'ẽ ra'e nde yvy? he'i íxupe.

—Ha'e voi, he'i. —Ko va'e-rehema ngatu orome'ẽ ore yvy, he'i Pedro-pe ijapu-vy.

⁹ —Ma'erã tipo erenhombo'e mbo'e ne ména ndive nde apu hagwã Nhe'ẽ Marangatu tee va'e-pe, he'i íxupe. —Nde apu ramo, nande apúi xe-vy. Nhe'ẽ Marangatu tee va'e-pe ae nde apu, he'i íxupe. —Ma'erã tipo erenhem-bopy'agwasu teĩ nde apu hagwã íxupe? Ma'erã ere mo'ã kuri, “Nhandejáry nopenai arã xe apuha-rehe?” he'i. —Ejeapysaka katu ogwata ou-vy va'e-rehe.

Ne ména atyhare ogwahē jevy-ma ou-vy, he'i íxupe. —Nde reraha-ta nde ave, he'i íxupe Pedro.

¹⁰ Upe-ma ramo Pedro rovagwy-rupi ho'a omano ete reheve-ma ave hem-birekokwe. Ha karia'y ogwahē-vy oike. Oike ramo otopa-ma ave he'ōgwe. Ogweraha he'ōgwe ijaty-vy. Ombojoyvy imoī-vy yvykwa-py iména retekwe ndive.

¹¹ Upe-ma ramo onhemondýi joa-ma Hesu reroviaha gwive. Herakwā renduhare gwive onhemondyipa-ma hikwái.

Hesu remimondo ombogwera hasy va'e-pe

¹² Ha hemimondo kwéry heta hembiapo porã porã. Upe tetã mygwa pa'ū-my hexapyrã-rupi hembiapo, heroviapyrã-rupi hembiapo ave. Nhandejáry róga mopekwā pekwāpyre-py opyta joa hikwái. Upe va'e imopekwāpyre ohenói Salomão.

¹³ Ha Hesu-rehe ojerovia e'ŷ va'e gwive ndaipy'agwasúi imoirū-vy íxupe kwéry. Omoirū e'ŷ ramo jepe, omboete tee joty íxupe.

¹⁴ Upe ramo onhembohetave tave oho-vy Hesu reroviaha kwéry. Onhem-boheta kwimba'e. Kunha va'e ave onhembohetave tave oho-vy hikwái.

¹⁵ Upéixa ramo hasy va'e ogwenohē óga-gwi omoī tape yke-rehe. Hasy va'e ogwenohē hupa reheve. Hupa reheve ogwenohē. Pedro ohasa hagwā-rupi omoī, hi'āygwe rei jepe ho'a hagwā hese hasy va'e-rehe.

¹⁶ Ogwahē ou-vy ave Jerusalém jerekwe-rehe okwa va'e. Ojereru hasy va'e. Anháy rerekoha va'e gwive ogweru íxupe. Ojereru va'e gwive okwerapa-ma voi.

Judeu ruvixa kwéry ombohasa asy Hesu remimondo kwéry-pe

¹⁷ Ha Hesu remimondo kwéry enterove kente kwéry remimboete. Upéa-gwi ndaija'éiry eterei hese kwéry pa'i ruvixagwasu ijavegwa kwéry ave:

—Ma'erā kente kwéry nhane mboyke ojererova hagwā Hesu remimondo kwéry-rehe. Nanhane mboetevéiry, he'i ojóupe.

Ndaija'evéi ete voi hese.

¹⁸ Upéa-gwi pa'i ruvixagwasu hendiavegwa kwéry, saduceu kwéry va'e ave oho oipyhy íxupe kwéry oapresa hagwā. Hembiapo vai va'e rendaty-py omoī íxupe.

¹⁹ Ha upéi katu pyhare pyte-ma ramo yváy-gwi ogwejy ou-vy Nhandejáry rembigwái. Oipe'a okē ogwenohē hagwā.

²⁰ Ogwenohē rire:

—Tereho katu, he'i íxupe. —Tereho enhembo'y Nhandejáry róga kakwaa gwy-py erenhe'ē hagwā ohendu va'erā-pe gwive, he'i íxupe. —Ko va'e teko porã pyahu rehegwa nhe'ē emombe'upa katu, he'i íxupe Nhandejáry rembigwái.

²¹ Ohendu ramo inhe'ē oje'ói. Ko'ẽmba-ma jave Nhandejáry koty-py oike omombe'u hagwā Nhandejáry nhe'ē.

Upe jave pa'i ruvixagwasu hendiavegwa ave ojogweroaty ou-vy. Ojoavis-apa ojogweroaty hagwā Israel remiarirõre judeu kwéry ruvixa. Entéro judeu kwéry ruvixa va'e gwive ombojogweroatypa. Ogwahē-ma henda-py. Upéi onmondo hembiapresakwe ogweru hagwā.

²² Upéixa ramo oho polícia kwéry heru-vy mo'ã. Ogwahē ramo preso onhemoī haty-py, ndojohuvéi-ma íxupe. Oho-ma ra'e. Ha upéi ou jevy imombe'u-vy:

²³ —Orotopa onhembotypa typa ramo okē. Onhangareko va'e oĩ okē-my. Ha oroipe'a ramo okē, ndorotopavéi-ma preso oĩ va'e-pe. Ndorojohuvéi-ma koty-py. Osẽ-ma ra'e, he'i mburuvinha kwéry-pe imombe'u-vy.

24 Ohendu ramo inhe'ẽ:

—Mba'e-rami po osẽ oho-vy ra'e? Mbava'e po oiko-ta ãy, ndajaikwaáiry, he'i ojóupe pa'i ruvixa kwéry, polícia ruvixa ave.

25 Upéixa ramo ou imombe'u-vy:

—Upe pene remimoõgwe preso katu onhembo'y oĩ-vy Nhandejáry róga gwy-py. Oporombo'e mbo'e oĩ-vy, he'i mburuvixa kwéry-pe.

26 Ohendu ramo inhe'ẽ oho heru-vy polícia kwéry huvixa ndive. Ha ndoipyhy poxýiry íxupe kwéry. Enterovéa resa-py oipyhy porã rei íxupe heraha-vy. Ikyhyje-gwi kente kwéry-gwi oipyhy porã rei íxupe:

—Poxy reheve jaipyhy ramo íxupe, nhande api va'erã ita-py, he'i ojóupe polícia kwéry.

27 Ogweru rire omoõ hovagwy-py. Mburuvixa rovagwy-py omoõ omonhe'ẽ hagwã. Ha pa'i ruvixagwasu katu he'i imonhe'ẽ-vy:

28 —Ore oro'eri eri kuri nde-vy: “Anive erenhe'ẽ kuri Hesu réry-py” oro'e. Ha oro'e ramo jepe, nderejapói voi kuri ore nhe'ẽ, he'i íxupe. —Ópa-rupi oho ne nhe'ẽ. Jerusalém pygwa gwive ohendu hagwã eremosarambi kuri ne nhe'ẽ imombe'u-vy. Upéixa ramo ereipota enterove va'e he'i ore-rehe: “Gwĩ va'e ojuka kuri Hesu-pe. Hepy-vy jajuka katu íxupe kwéry” ereipota he'i ore-rehe, he'i imonhe'ẽ-vy pa'i ruvixagwasu.

29 Ha upéi katu he'i íxupe Pedro Hesu remimondo kwéry ndive:

—Nhandejáry nhe'ẽ ndaijojái ramo teko rei nhe'ẽ ndive, iporãve jajapo Nhandejáry nhe'ẽ, he'i.

30 —Nhandejáry, nhane ramoigwasu Járy omoingove jevy va'ekwe Hesu-pe. Yvra-rehe ne rembijukakwe ombotekove jevy va'ekwe.

31 Upéi omomba'egwasu ete-ma voi íxupe. Oyke-rehe imoõ-vy omomba'egwasu. Omoõ íxupe nhane ruvixarã. Nhane resendeharã ave omoõ. Israel remiarirõre judeu kwéry oheja ramo gwekoha vai, ha'e omboyke-ta íxugwi hembiapo vaikwe.

32 Ko'ã va'e ore oromombe'u voi orohexa-gwi. Ko'ã va'e Nhe'ẽ Marangatu tee va'e remimombe'u ave. Ha'e katu inhe'ẽ renduha-pe Nhandejáry remime'ẽgwe, he'i íxupe kwéry Pedro.

33 Ohendu ramo Pedro nhe'ẽ, ipoxy eterei voi hese. Ojukase voi íxupe hikwái: “Jajuka katu íxupe, jajuka katu íxupe” he'i joa hese hikwái.

34 Ha peteõ oĩndaipoxýi va'e. Opu'ã-ma onhembo'y. He'i omosẽ hagwã Hesu remimondo kwéry-pe pono ojuka:

—Emosẽ sapy'a ete imondo-vy oka-py, he'i.
Héry Gamaliel, fariseu va'e, judeu ruvixa va'e, Moisés amyrí he'i va'ekwe-py imbo'eha. Omboete joa íxupe.

35 Ha'e he'i mburuvixa kwéry-pe:

—Xáke, xe rapixa kwéry, he'i, —Ma'erã pene rembiapo vai-ta Hesu remimondo kwéry-rehe?

36 Are-ma ojekwaa va'ekwe kwimba'e héry va'e Teudas. Onhembotuvixase ra'anga rei oiko-vy va'e. Quatrocentos oiko imoirûha íxupe. Upéi ojuka íxupe. Ojuka rire ohasãimba íxugwi inhirû gwéry. Nonhemboatyvéi-ma.

37 Upe rire hapykwerigwa ojekwaa va'ekwe Galiléia pygwa, kwimba'e héry va'e Judas. Yma mburuvixagwasu nhe'ẽ-py kente kwéry omoõ moõ va'ekwe héry kwatia-rehe. Omoõ jave ojekwaa va'ekwe Judas. Oiko va'ekwe imoirûháry. Upéi soldado kwéry ojuka íxupe Judas-pe. Ojuka rire, opa isarambipa íxugwi inhirû gwéry.

38 Upéa-gwi ha'e-ta peẽ-my: Ani erepenave hese Hesu remimondo kwéry-rehe. Eheja katu toiko ha'e oikoseha-rami, he'i íxupe. —Teko rei omombe'u ramo hembiaporã, nosẽ porã mo'ãi, opa rei arã.

39 Ha Nhandejáry ae omombe'u ramo hembiaporã, napende pu'aka mo'ãi hese kwéry Nhandejáry nhe'ẽ pokatu-gwi, he'i íxupe kwéry. —Peẽ pemboyke ramo ha'e kwéry inhe'ẽ, Nhandejáry-pe pemboyke-ta para'e ave, he'i íxupe kwéry Gamaliel. Teudas-pe Judas-pe ave ojehu va'ekwe omombe'u íxupe kwéry pono ojuka Hesu remimondo kwéry-pe.

40 Ha upéi katu ohendu inhe'ẽ hikwái. Gamaliel nhe'ẽ ohendu-gwi, ndojukasev i Hesu remimondo kw ry-pe. Upe ramo omoingepa jevy gwemimos gwe-pe koty-py. Ndaipoxy etev i-ma. Oinup p  nup  rei-ma íxupe kw ry. Ojuka hagw -rami noinup v iry. Up i oinup  rire, he'iri iri íxupe onhemonhe' -vy:

—Anive ereiporu Hesu rehewa nhe' . Hesu r  -py anive erenhe' , he'i hemimondo kw ry-pe.

41 Upe rire opoi íxugwi imondo-vy. Ha up i katu ojoat ra-gwi os  oho-vy. Oinup  ramo jepe íxupe, ndojohu va y voi. Ogwerovy'a joty os -vy hikw i:

—Hesu rerek  asy hagwe-rami nhande rerek  asy ave. Hesu-pe omboete e'  hagwe-rami, nhande-vy nanhane mboet i ave, he'i oj upe.

Up ixa ramo Hesu reko-py oiko-gwi, ov a joty os -vy hikw i.

42 Iko'  ko' mba Nhandej ry nhe'  omombe'u meme oiko-vy va'e Nhandej ry r  ga kakw a-py.  ga   -rupi omombe'u oiko-vy va'e ave:

—Hesu ko Nhandej ry remimboupr  va'ekwe voi, he'i omombe'u-vy.

6

Oiporavo sete kwimba'e-pe Hesu remimondo pytygw har 

1 Upe ramo onhembohetave tave oho-vy Hesu rehewa nhe'  renduha. Ha iko'  ko' mba ome'  me'  oiko-vy tembirekokwe-pe hemi'ur . Ha greg  nhe' -py onhe'  va'e ima'eandu-gwi he'i oj upe:

—Nhande-vy mix  ome' . Up a-pe, hebreu nhe' -py onhe'  va'e-pe katu hetave ome' , he'i. —Ome'  joavy avypa ime' -vy, he'i oj upe ndojohu por i-gwi.

2 Upe-ma ramo gw  doze hemimondo kw ry va'e ohen i uka ojog-weroatypa hagw  Hesu nhe'  renduha gwive. He'i íxupe kw ry:

—Gw  ome'  me'  va'e tembirekokwe-pe hemi'ur , ome'  joavy avypa nipo ra'e ime' -vy, he'i. —Ha ore katu oromboja'o ja'o ramo ime' -vy hemi'ur , ndikatuv i-ma ar  oromombe'u Nhandej ry nhe' . Naipor i va'er  k ixa.

3 Up a-gwi, ore re' i kw ry, peiporavo katu sete kwimba'e. Ore nhe' -py onhangareko hagw  ome'  va'e-rehe peiporavo nome'  joavy avy i hagw . Nhe'  Marangatu tee va'e ipy'a omohyny  va'e íxupe, hi'arandu por  va'e, nhane mandu'a por  hese va'e, up a rehewa peiporavo katu.

4 Ha ore katu oromondo meme-ta Nhandej ry-pe ore nhe' . Hesu rehewa nhe'  oromombe'u meme-ta. Gw  va'e apo-vy nore ate' iry. Ndaij i outro tembiapo ore-vy orojapo va'er , he'i íxupe kw ry Hesu remimondo.

5 Ha ojohu por  joa inhe'  ijaty va'e gwive. Upe ramo oiporavo pete  kwimba'e-pe hikw i, Hesu-rehe ojerovia tee va'e, Nhe'  Marangatu tee va'e ipy'a omohyny  va'e íxupe, h ry va'e Est v o. Up i oiporavove ave seis kwimba'e, h ry va'e Filipe, Pr coro, Nicanor, Tim o, P rmenas, Nicolau ave. Nicolau Antioquia pygwa judeu e'  va'e upe va'e. Ne' r  vyteri ojerovia ramo Hesu-rehe, judeu kw ry reko-rupi oiko va'ekwe.

⁶ Upéa sete va'e oiporavo onhangareko hagwā ome'ē va'e-rehe. Oiporavo rire, ogweru henda-py Hesu remimondo renda-py. Upéi hemimondo ombojeupi Nhandejáry-pe onhe'ē, inhakā akā-rehe omoī opo, inhe'ē-py ome'ē me'ē porā hagwā tembirekokwe-pe hemi'urā.

⁷ Mombyryve ryve ogweraha imombe'u-vy Nhandejáry nhe'ē. Onhembohetave tave oho-vy Hesu nhe'ē renduha, Jerusalém tetā mygwa. Ha pa'i kwéry, Hesu nhe'ē apoha, heta eterei oī.

Judeu ruvixa kwéry ndaija'éi Estêvão-rehe

⁸ Ha Estêvão katu, imbaraete inhe'ē, opa va'e rembiayhu. Kente kwéry pa'ū-my hembiapo porā hexapyrā-rupi.

⁹ Oī ave hese ija'e'ŷ va'e, judeu porahéi haty-gwi ou va'e. Upe-py ojeporahéi haty-py oī Cireneu tetā mygwa, oī Alexandria tetā mygwa, oī Cilícia yvy pygwa, oī Ásia yvy pygwa ave. Upe-py ojogweroaty va'e gwive héry Liberto kwéry. Upéi ogwahē ou-vy Estêvão renda-py onhe'ē mbojevy hagwā íxupe hikwái.

¹⁰ Ha ndikatúi onhe'ē mbojevy íxupe arandu rehewa omombe'u-gwi, Nhe'ē Marangatu tee va'e oipy'a mohynyhē-gwi íxupe.

¹¹ Upéi oho jevy nhemi ha-py opaga hagwā ijapu japus va'erā-pe Estêvão-rehe. Ome'ē íxupe inhe'ērā. Upe ramo:

—Orohendu voi Estêvão-pe onhe'ē vai vai ramo Moisés-rehe. Nhandejáry-rehe onhe'ē vai vai ramo orohendu ave, he'i mo'ā hese enterove va'e-pe.

¹² Upéixa he'i ramo, ombopoxy enterove va'e-pe gwive. Judeu ruvixa kwéry, judeu rekombo'ehaty-pe ave ombopoxypa. Upéa-gwi oupa jevy henda-py oipyhy hagwā íxupe. Mburuvixa kwéry ojogweroaty haty-py oipyhy heraha-vy.

¹³ Ha gwī ijapu hese va'erā-pe ohenói ogwahē hagwā. Ogwahē ramo, he'i ijapu apu-vy hese:

—Upe va'e onhe'ē vai vai meme va'e voi ko va'e Nhandejáry róga kakwaa marangatu-rehe. Moisés amyrī remimombe'ukwe jajapo va'erā-rehe onhe'ē vai.

¹⁴ “Upe Hesu Nazaré pygwa omohāimba-ta ko va'e Nhandejáry róga kakwaa. Ohekoviariō-ta nhande reko Moisés remimombe'ukwe” he'i Estêvão, he'i omombe'u ijapu va'e. —Ore henduháry voi, he'i mo'ā hese ijapu-vy.

¹⁵ Ha ojogweroaty va'e gwive ohexa katu katu íxupe. Oma'ē Estêvão rova-rehe oma'ē:

—Hendypa voi hova ra'e, he'i ojóupe. —Ojogwa ete Nhandejáry rembigwái rova-pe, he'i ojóupe judeu ruvixa kwéry.

7

Estêvão omombe'u judeu ruvixa kwéry-pe Abraão rehewa nhe'ē

¹ Ha pa'i ruvixagwasu katu ohendu ijapu va'e nhe'ē. Ohendu ramo oporandu Estêvão-pe:

—Upéixa voi pa? he'i íxupe.

² Upe ramo Estêvão onhe'ē judeu ruvixa kwéry-pe:

—Xe re'yí kwéry, xe ruvixa kwéry ave, pejeapysaka porā katu xe nhe'ē-rehe. Yma ete ojehexa uka va'ekwe nhane ramoigwasu myamyrī Abraão-pe. Nhandejáry onhemomba'egwasu ete va'e ojehexa uka va'ekwe íxupe. Mesopotâmia yvy-py gwtā tee-my joty oiko ramo, ojehexa uka-ma voi va'ekwe íxupe. Ndovái joty Harā tetā-my.

³ He'i Abraão-pe Nhandejáry: "Eva katu ne retã-gwi" he'i. "Ehejapa nde re'ýi kwéry eho-vy. Tereho nde-vy ahexa uka va'erã nde yvyrã hagwã-py tereho" he'i íxupe Nhandejáry.

⁴ Upe-ma ramo Nhandejáry nhe'ẽ-py osẽ gwtã-gwi oho-vy. Caldeu yvy-gwi oho. Tetã ambue-py ae oiko jevy hagwã osẽ oho-vy. Harã tetã-my ogwahẽ ramo, oiko va'ekwe upe-py. Hi'are rire omano túvy. Upéi túvy omano rire ome'ẽ ogwata puku jevy. "Tereho katu nde yvyrã-py" he'i ogwerova uka-vy ta'ýry-pe Nhandejáry. Upéixa voi ogweru va'ekwe íxupe ko'a-py. Áy peiko ha-py ogweru íxupe.

⁵ Ha ogweru rire ae, nome'ẽséi voi íxupe ijyvyrã, ni hóga renagwã jepe nome'ẽséiry íxupe. Ni mixõmi nome'ẽséi voi. Ndata'yryiry ramo jepe, he'i íxupe Nhandejáry: "Áy name'ẽséi vyteri nde-vy nde yvyrã. Ha ne remiarirõ kwéry pegwarã katu ame'ẽ va'erã ko yvy ijyvyrã" he'i íxupe Nhandejáry.

⁶ —Upe rire a-rami he'i Nhandejáry: "Ne remiarirõ kwéry katu yvy ambue-py oiko va'erã, gwe'ýi e'ý ha-py oiko-ta va'erã. Upe va'e yvy pygwa omomba'apo eterei va'erã voi íxupe kwéry. Hi'are eterei va'erã voi ombohasa asy. Quatrocentos ro'y omongo asy va'erã íxupe kwéry.

⁷ Upe rire ae ahepy va'erã íxupe kwéry. Imoingo asyhare-pe areko asy va'erã ave. Ahepy rire, yvy akéno-gwi osẽmba va'erã oje'ói-vy ne remiarirõ kwéry. Xe mboete hagwã a-py osẽmba va'erã" he'i Abraão-pe Nhandejáry.

⁸ Ha upéi katu he'i jevy íxupe Nhandejáry: "Eipirekytĩ uka mixĩ katu kwimba'e gwive. Upéa erejapo ramo, erepyta va'erã xe re'ýi tee va'erã voi" he'i Abraão-pe. Upe rire oiko-ma ta'ýry. Isaquerã oiko-ma. Upe rire, oito áry rire mixĩ oikytĩ ipire, gwa'ýry pire. Ha Isaque okakwaa rire, omenda. Upe rire, Isaque omenda rire, ta'ýry-ma oiko-ma Jacorã. Upéi okakwaa ave Jacó. Ta'ýry-ma ave Jacó. Oiko-ma doze ta'ýry nhane ramoigwasu va'e, tetã ambue mbue-py oiko va'erã, he'i Estêvão omombe'u-vy.*

Estêvão omombe'u myamyri José rehewa nhe'ẽ

⁹ Upéi Estêvão omombe'u jevy judeu ruvixa kwéry-pe:

—Ha Jacó ra'y kwéry doze oĩ va'e. Oĩ tyvýry héry va'e José, túvy rembiayhu tee va'e José. Upéa-gwi ndaija'éiry va'ekwe hese tyke'y kwéry. Ndaija'éi-gwi hese, tembigwairã ovende va'ekwe gwyvýry ojereraha hagwã Egito yvy-py. Ha Nhandejáry omoirũ joty íxupe, ndohejái íxupe ha'e anho.

¹⁰ Ohasa asy reheve oresende sende íxupe. Ome'ẽ ave íxupe inharandurã. Upéa-gwi ohayhu íxupe mburuvixagwasu, héry va'e Faraó, Egito yvy pygwa ruvixa va'e. Ohayhu-gwi íxupe, omonhangareko uka íxupe mburuvixa. Egito yvy-py oĩ va'e-rehe gwive, hóga-py oĩ va'e-rehe gwive ave omonhangareko uka.

¹¹ —Ha upéi katu ndoikovéi hi'upy Egito yvy-py gwive. Canaã yvy-py gwive ave opa hi'upy. Upéa-gwi upe pygwa kwéry oiko asy eterei hikwái. Ha nhane ramoigwasu kwéry katu ndotopavéi gwemi'urã.

¹² Ha nhane ramoigwasu ru ohendu oimeha trigo rope. Egito-py oimeha ohendu. Upéi omundo gwa'ýry kwéry tembi'u-rehe. Nhane ramoigwasu omundo.

¹³ Upe rire omundo jevy tembi'u-rehe ogweru hagwã. Ogwahẽ jevy ramo upe-py tyvýry oĩ ha-py, ojekwaa uka gwyke'yry-pe: "Nde ko ore ryvy nipo ra'e" he'i gwyvýry-pe hikwái. Ha mburuvixa oikwaa-ma José ryke'y rekoha, he'ýi rekoha ave.

¹⁴ Upéi José ohenói uka ou hagwã túvy. He'ýi kwéry ohenói uka ave. He'ýi kwéry reta va'e setenta e cinco voí oĩ.

* ^{7:8} Gn 11; 12; 17

15 Ha upéi ova ou-vy Egito-py túvy gwe'ýi ndive. Upe-py omano túvy. Omano ave he'ýi kwéry, nhane ramoigwasu va'e.

16 Upe rire ogweraha jevy Siquém tetã-my hetekwe. Omoõ hagwã yvykwa py-py ogweraha. Upéa yvykwa Abraão rembijogware, Emor ra'y kwéry ovende va'ekwe íxupe plata-rehe.

17 —Ha upéi katu oiko-tama voi Nhandejáry he'i va'ekwe, Abraão-pe he'i va'ekwe. Ipokatu-ta inhe'ë. Oiko-ta he'i va'ekwe ha ndoikói vyteri. Upe ramo nhane ramoigwasu kwéry katu onhembohetave tave hikwái.

18 Upe rire oiko hekoviare mburuvixagwasu pyahu Egito pygwa kwéry ruvixa ramo. Ha mburuvixa pyahu katu nohenduvéi-ma nhane ramoigwasu rerakwã, José rerakwã.

19 Upéixa ramo mburuvixa ogwereko asy nhande re'ýi kwéry myamyrí-pe. Ipy'a vai reheve ogwereko: “Anive erehupi oiko ramo mitã. Omano hagwã-py eheja” he'i íxupe kwéry mburuvixa omanda-vy, he'i Estêvão omombe'u-vy.*

Estêvão omombe'u myamyrí Moisés rehegwa nhe'ë

20 Upéi Estêvão omombe'u jevy judeu ruvixa kwéry-pe:

—Upe ramo, mburuvixa ogwereko asy ramo va'ekwe nhande re'ýi kwéry, oiko-ma va'ekwe Moisés Nhandejáry rembierohory voi. Iporã ete voi oiko-vy. Mbohapy jasy ombouvixa íxupe isy. Túvy róga-py ombouvixa.

21 Upe rire mburuvixa nhe'ë-py oheja rei ha'e anho omemby. Ha mburuvixa rajy katu ohupi heraha-vy ombouvixa hagwã: “Ajohu-ma xe membyrã araha-ta xe” he'i hese. Upéi ogweraha íxupe.

22 Oarandu-pyombo'e íxupe. Egito pygwa arandu-pyombo'e hereko-vy. Hi'arandu porã-ma Moisés onhe'ë-vy. Hembiapo porã-ma ave inharandu-gwi.

23 Okakwaa rire, omboty rire quarenta ro'y, imandu'a gwe'ýi kwéry-rehe: “Aha-ta aipohu xe re'ýi kwéry, Israel amyrí remiarirõre kwéry” he'i ojéupe Moisés.

24 —Upéi oho gwe'ýi kwéry ha-py. Upe-py ohexa peteõ gwe'ýi. Oinupã-ma íxupe Egito pygwa: “Xe re'ýi upéa onhenupã va'e” he'i Moisés ojéupe. Upéa-gwi oresende íxupe. Ha Egito pygwa oinupã va'e-pe, ojuka voi gwe'ýi repy-vy:

25 “Nhandejáry nhe'ë-py aresende-ta íxupe” he'i ojéupe ra'e. Upéa-gwi: “Xe hepyhare, xe kwaa-ta” he'i mo'ã Moisés ójehe. Ha avave joty íxupe ndoikwaáiry.

26 Ko'ëmba ramo ojehexa uka jevy Moisés gwe'ýi kwéry-pe. Ohexa mokõi gwe'ýi onhorairõ ramo. Ndoipotái onhorairõve: “Ma'erã po pejogwereko asy, xe re'ýi?” he'i. “Peẽ ko ojoe'ýi voi” he'i. “Ma'erã po penhorairõ?” he'i mokõive va'e-pe.

27 —Ha gwapixa-pe ogwereko asy va'e ombojevy Moisés-pe imondo-vy: “Kiva'e po ne moingo ore-vy ore ruvixarã” he'i. “Kiva'e po he'i nde-vy ore reko johu hagwã?

28 Nde para'e xe jukase. Upe Egito pygwa-pe erejuka hagwe-rami ave xe jukase” he'i Moisés-pe.

29 Ohendu-ma ramo inhe'ë: “Xe ajapo va'ekwe oikwaa-ma ra'e” he'i ojéupe Moisés. Upéa-gwi okanhyma oho-vy. Tetã ambue-py oho oiko hagwã. Midia yvy-py oiko. Upe-py mokõi-ma ta'ýry.

30 —Hi'are voi oiko upé-py Moisés. Quarenta ro'y rire ojehexa uka íxupe Nhandejáry rembigwái yváy gwigwa. Ojehexa uka íxupe tekwat y'e'ý-my oiko ramo yvyaty gwy-py héry va'e Sinai. Upe-py ohexa yvyra'i rete-rehe tata rendy. Hendy pa'ü-my ojehexa uka íxupe Nhandejáry rembigwái.

* **7:19** Gn 39-50; Ex 1.1-11

³¹ Opu'ã ramo hese tata, ndopáiry. Ohexa ramo, opondera hese Moisés. Onhemoagwí íxugwi ohexa porâve hagwã. Onhemoagwí jave ohendu-ma Nhandejáry nhe'ẽ:

³² “Ne ramojusu Járy voi xe” he'i íxupe. “Xe ko Abraão Járy, Isaque Járy, Jacó Járy. Xe ijáry meme” he'i Moisés-pe Nhandejáry. Ohendu ramo inhe'ẽ, onhemondýi ndaipy'agwasúi oma'ẽ-vy.

³³ —Upéi he'i íxupe Nhandejáry: “Upe erenhembo'y ha-py imarangatu voi yvy. Upéa-gwi eipe'a katu nde py-gwi nde pyryru xe mboete-vy” he'i íxupe.

³⁴ “Xe re'ýi kwéry Egito-py oiko va'e, ohasa asy va'e. Ogwereko asy ramo ahexa voi. Ipyahẽ joa oĩ-vy ramo ahendu. Upéa-gwi agwejy-ma aju-vy aresende hagwã íxupe kwéry” he'i íxupe. “Upe ramo tereho katu” he'i. “Egito yvy-py oromondo-ta” he'i Moisés-pe Nhandejáry.

³⁵ —Upe Moisés he'ýi kwéry ombojevy va'ekwe íxupe. Yma oho ramo gwe'ýi kwéry ha-py, ombojevy íxupe va'ekwe: “Kiva'e po ne moingo ore-vy ore ruvixarã. Kiva'e po he'i araka'e nde-vy ore reko johu hagwã ore rembiapokwe-rehe” he'i araka'e Moisés-pe. Upe rire ae Nhandejáry omondo jevy íxupe upe he'ýi kwéry remimbojevykwe. Mburuvixarã, heresendeharã ave omondo. Hembigwái nhe'ẽ-py omondo íxupe. Upe tata rendy-rami yvyra'i rete-rehe ojehexa uka íxupe va'ekwe nhe'ẽ-py omondo-vy íxupe. Upe-ma ramo Moisés oho Egito-py.

³⁶ Upe-py hembiapo porã hexapyrã-rupi. Upéi ogwenohẽ heraha-vy upé-gwi gwe'ýi kwéry. Ogwahẽ oje'óyi-ygwasu-py, héry Y pytã. Oja'o y yvytu jave tape ojekwaa hagwã. Upéi quarenta ro'y hexapyrã-rupi Moisés hembiapo porã oiko-vy. Tekwat y'e'ý-my hembiapo porã porã, he'i Estêvão omombe'u-vy.

Upéi Estêvão omombe'u jevy judeu ruvixa kwéry-pe:

³⁷ —He'i va'ekwe Moisés Israel kwéry-pe: “Pene pa'ũ-gwi oipe'a va'erã Nhandejáry hi'arandu va'e. Inhe'ẽ-py omombe'u va'ety oipe'a va'erã. Xe pe'a hagwe-rami oipe'a va'erã” he'i íxupe kwéry Moisés.

³⁸ Ha upéi katu ha'e omoirũ irũ gwe'ýi kwéry-pe. Ojogweroaty ha-py, tekwat y'e'ý-my omoirũ íxupe kwéry, nhane ramoigwasu-pe. Upéi ojeupi oho-vy yvyatyrusu ári, héry Sinai va'e ári. Onhomoneta hagwã Nhandejáry rembigwái yváy gwigwa ndive oho. Ohendu hagwã inhe'ẽ ojeupi. Nhane moingove va'e nhe'ẽ ohendu Nhandejáry rembigwái-gwi ome'ẽ hagwã nhande-vy.

³⁹ —Ha nhane ramoigwasu kwéry katu nohenduséi voi Moisés nhe'ẽ. Om-boyke imondo-vy. Ohose-vy ohexanga'u Egito yvy hikwái.

⁴⁰ Upéa-rehe he'i Moisés ryke'y-pe hikwái. Héry va'e Arão: “Ejapo katu ore-vy tupã ra'anga ore renonderã oho hagwã” he'i. “Nde ryvy katu okanhy ra'e oréhegwi. Upe ore reru va'ekwe Egito yvy-gwi okanhy ra'e. Ndoroikwaavéi ki-koty po oho” he'i Moisés ryke'y Arão-pe.

⁴¹ —Upéi ojapo gwemimboete ra'anga angarã hikwái. Vaka ra'y ra'anga-rami ojapo tupã ra'anga. Ojapo rire omoka'ẽ mymba ijukapy tupã ra'anga ramigwa imboete-vy. Gwembiapokwe ogwerovy'a hikwái: “Iporã poku” he'i mo'ã herovy'a-vy.

⁴² Ha upéi Nhandejáry ojere íxugwi kwéry. Oheja íxupe kwéry anho. Omundo íxupe kwéry tape porã y'e'ý-rupi omboete hagwã kwarahy-pe, jasy, jasytata-pe gwive hekovía. A-rami ohai va'ekwe Nhandejáry nhe'ẽ-py omombe'u va'ety:

“Tekwat y'e'ý-my ereiko ramo, xe re'ýi kwéry, nereme'ẽi xe-vy mymba ijukapyre. Quarenta ro'y eremoka'ẽ ka'ẽ ereiko-vy xe mboete-vy mo'ã.

43 Xe mboete e'ŷ-vy katu eremoka'ẽ. Ha tupā ambue ra'anga héry Moloque eremboete voi ereiko-vy. Hyru ao gwigwa óga erehupi meme heraha-vy. Erehupi ave jasytata ra'anga erejapo va'ekwe. Tupā ambue mboete-vy héry va'e Renfā erehupi heraha-vy jasytata ra'anga. Upéa ra'anga gwive erejapo va'ekwe imboete-vy erehupi heraha-vy. Naxe mboetevéi-ma. Upéa-gwi orogwerova-ta orogweraha-vy mombyry. Pende yvy-gwi orogwerova-ta. Tetā ambue kupe-py, Babilônia kupe-py jevy orogwerova-ta”* he'i va'ekwe Nhandejáry nhe'ẽ-py, he'i Estêvão imombe'u-vy.

44 Upéi he'i jevy judeu ruvixa kwéry-pe:

—Ha nhane ramoigwasu kwéry katu oiko va'ekwe tekwat y e'ŷ-my. Upépy oiko jave oĩ hendive kwéry upe ao gwigwa óga. Upe óga ohexa ramo: “Nhandejáry kwaaha” he'i. Oikwaa-ma Nhandejáryha: “Nhandejáry nhane ndive oime” he'i ohexa ramo. Upe ao gwigwa óga Nhandejáry ohexa uka ranhe va'ekwe íxupe. Moisés-pe ha'anga rei ohexa uka. Ohexa uka rire: “Ejapo katu ha'e ramigwa” he'i íxupe. Upéi ojapo.*

45 —Ha upéi katu opyta are upe ao gwigwa óga. Hemiarirō kwéry-pe opyta. Ha upéi ohupi jevy heraha-vy. Gwetārā ambue reka-vy oje'ói hikwái. Huvixa ndive, Josué ndive oho. Ogwahē ramo outro tetā-my, omosẽ imondo-vy upe-py oĩ va'e, gwetārā-my oiko va'e. Henonde-gwi Nhandejáry omosẽ rire, gwekwagwā-pyma ogwahē. Omosẽ va'ekwe yvy-py opyta hikwái. Upe-py opyta upe Nhandejáry róga ao gwigwa. Opyta oiko peve mburuvixa ramo héry va'e Davi, he'i Estêvão omombe'u-vy.”**

“Nhandejáry teko rei rembiapokwe-py ndoikói” he'i Estêvão imombe'u-vy

46 Upéi omombe'u jevy judeu ruvixa kwéry-pe:

—Ha Nhandejáry ogwerovy'a va'ekwe myamyrī Davi-pe. Upéixa ramo Davi ojerure Nhandejáry-pe: “Iporā tipo ajapo nde-vy nde rogarā” he'i Nhandejáry Jacó Járy-pe.*

47 Ha nome'ẽi ojapo hagwā. Ha ta'ýry katu ojapo, héry Salomão. Nhandejáry rogarā ojapo.*

48 Ha Nhandejáry katu, Tupāgwasu va'e, teko rei rembiapokwe-py ndoikói. A-rami ohai va'ekwe Nhandejáry nhe'ẽ-py omombe'u va'ety:

49 “He'i Nhandejáry: Yváy-py xe gwapy haty oĩ. Yvy xe pyrū haty, he'i. Mba'eixagwa óga erejapo-ta xe-vy? Kipy eremoĩ-ta xe pytu'u haty? Xe-vy gwarā ndikatúi erejapo.

50 Entero mba'e ae xe rembiapokwe. Áry yvy ave xe ajapo voi va'ekwe, he'i Nhandejáry.”*

Upéixa ohai va'ekwe Nhandejáry nhe'ẽ-py omombe'u va'ety, he'i Estêvão imombe'u-vy.

51 Upe rire he'i jevy mburuvixa kwéry-pe:

—Pene akā hatā voi peiko-vy peẽ, he'i. —Pehendusere'ŷ va'e Nhandejáry nhe'ẽ. Napene akā porāi voi. Pembojevy meme peiko-vy Nhe'ẽ Marangatu tee va'e. Myamyrī pene ramoigwasu kwéry rembiapokwe-rami pene rembiapo ave.*

52 Hembiapo vai va'ekwe pene ramoigwasu kwéry. Nhandejáry nhe'ẽ-py omombe'u va'ety peteĩ teĩ va'e-pe omoingo asypa va'ekwe hikwái. Ndaipóri ojererekoy asy e'ŷ va'ekwe. Gwī, “Ou-ta Nhandejáry rembigwái imarangatu va'e” he'i va'ekwe-pe ojuka ave hikwái. Nhandejáry nhe'ẽ-py omombe'u

* **7:43** Am 5.25-27 * **7:44** Êx 25.9-40 * **7:45** Êx 2.2-32.6; Nm 14.33; Dt 18.15-18; 5.1-33; Js 3.14-17

* **7:45** Js 3.14-17 * **7:46** 2 Sm 7.1-16; 1 Cr 17.1-14 * **7:47** 1 Rs 6.1-38; 2 Cr 3.1-17 * **7:50** Is 66.1-2

* **7:51** Is 63.10

va'ekwe-pe ojuka va'ekwe. Ha ko'ánga katu upe yma gware remimombe'u Nhandejáry rembigwái Hesu ou ramo jepe, pemombe'u nhemi joty kuri hese ija'eýha-pe. Pemombe'u rire, pejuka uka íxupe.

⁵³ Nhandejáry rembigwái yváy gwigwa ome'ẽ va'ekwe peẽ-my pende rekorã. Ha ndapejapóí voíte inhe'ẽ, he'i judeu ruvixa kwéry-pe Estêvão.

⁵⁴ Upéa nhe'ẽ ohendu rire gwí mburuvixa kwéry ipoxy hikwái. Onhemoháimbiri jagwa-rami opoxy-vy Estêvão-rehe.

⁵⁵ Ha'e-ma ngatu Nhe'ẽ Marangatu tee va'e ipy'a omohynyhẽ-gwi íxupe, oma'ẽ áry-rehe. Ohexa hendy ete va'e Nhandejáry oĩ ha-py. Hesu-pe ohexa yváy-py. Nhandejáry yke-rehe onhembo'y ramo oĩ-vy ohexa. Hendy reheve onhemomba'egwasu ramo ohexa íxupe:

⁵⁶ —Pema'ẽ katu, he'i. —Ojepe'a ramo áry ahexa voíte. Ahexa Nhande Ryke'y tee va'e-pe. Nhandejáry yke-rehe onhembo'y oĩ-vy ramo ahexa íxupe, he'i mburuvixa kwéry-pe.

⁵⁷ Ha ha'e kwéry katu osapukái hatã opoxy-vy. Omboty oapysa ohendusere'ý-gwi. Onhemooí hagwã hese oriparapa ogwa'ẽ ou-vy hikwái.

⁵⁸ Upe rire ogwenohẽ imondo-vy tetã-gwi. Ita-py ojapi japi hagwã íxupe ojuka hagwã ogwenohẽ hikwái. Ha ijukaharã oao jo'a omboi. Omboi rire oheja karia'y-pe onhangareko hagwã hese. Upéa karia'y héry va'e Saulo. Ha upéi katu ojapi japi ita-py omano peve.

⁵⁹ Ha ojapi jave íxupe hikwái, ha'e omondo onhe'ẽ Nhandejáry-pe:

—Togwahẽ katu nde ha-py, xe Járy Hesu, xe nhe'ẽgwe, he'i.

⁶⁰ Upe rire onhesú gwetypy'ã-rehe oĩ-vy hatã onhe'ẽ:

—A-rami xe-rehe hembiapo vai rire, ani erembohasa asy uka teĩ hembiapo vaikwe-rehe, ore Járy. Eiporiahuvereko katu íxupe kwéry, he'i. Upe va'e he'ipa-vy, omano-ma.

8

¹ Ojuka ramo íxupe hikwái, ojohu porã Saulo onhembyssaraiha: “Iporã voi pejuka íxupe” he'i.

Ohasa asy voi Hesu reroviaha va'e gwive

Upe áry-py mburuvixa kwéry ombohasa asyse voi hereko-vy Hesu reroviaha va'e-pe gwive. Jerusalém-my oĩ va'e-pe gwive ogwereco asy eterei. Upéa-gwi osarambipa oje'ói-vy Judéia yvy-rupi. Samaria yvy-rupi ave osarambipa oje'ói-vy. Ndohopa etéiry. Opyta joty Jerusalém-my Hesu remimondo. Oje'ói e'ý va'e doze joty oĩ.

² Ha gwí Nhandejáry-pe omboete oiko-vy va'e ogweraha ijaty-vy Estêvão retekwe. Hetekwe ogweraha. Omboasy eterei íxupe. Ojahe'o hatã ohapirõ pirõ-vy íxupe.

³ Ha Saulo katu ogwereco asy asy Hesu reroviaha gwive. Onhembosarai hese kwéry. Oike ike koty akéno-rupi. Ogwenohẽ vai kwimba'e-pe, kunha-pe ave oapresa uka hagwã. Omoatã heraha-vy omoõ uka hagwã preso.

⁴ Upéa-gwi oje'oipa osarambi-vy. Nhandejáry nhe'ẽ omombe'u joty oje'ói-vy hikwái.

Filipe oho omombe'u-vy Cristo rehewa nhe'ẽ

⁵ Ha Filipe katu oho tetã ambue-py héry va'e Samaria-py. Cristo rehewa nhe'ẽ oho omombe'u hagwã: “Hesu ko Cristo, Nhandejáry remimbou voi” he'i omombe'u-vy.

⁶ Ha upe pygwa ojogweroatypa hendu-vy hikwái. Ijoja hendu-vy. Filipe rembiapo porã hexapyrã-rupi heroviapyrã-rupi ave ohexa ramo hikwái, ohendu ramo inhe'ẽ porã, ojeapysaka porã porã joa inhe'ẽ-rehe hikwái.

⁷ Heta oĩ upe-py anháy rerekoha. Anháy rerekoha-gwi omosẽ mosẽ imondo-vy. Osẽ jave hatã osapukái. Heta oĩ hajy jeapa va'e, heta oĩ ogwata e'ŷ va'e. Okwerapa-ma ogwata porã-ma.

⁸ Upéixa ramo gwĩ tetã mygwa ov'y'joa-ma voi hikwái.

⁹ Ha upe-py oĩ kwimba'e héry va'e Simão, anháy arandu-rupi hi'arandu va'e. Pedro-rami teĩ héry va'e. Hexapyrã-rupi mo'ã hembiapo oiko-vy ramo, omopondera uka ójehe entéro Samaria pygwa kwéry-pe gwive. "Opamba'e-rehe xe pu'akave xe" he'i mo'ã ójehe.

¹⁰ Upéa-gwi ohendupa inhe'ẽ hikwái. Mburuvixa kwéry ohendupa íxupe. Heko'ive va'e kwéry ohendu ave íxupe. Upe-py oĩ va'e gwive ohendupa íxupe: —Nhandejáry ko omombaraeteve ra'e íxupe, he'i joa mo'ã hese.

¹¹ Are-ma hembiapo mo'ã oiko-vy ramo hexapyrã-rupi, omopondera ukapa ójehe. Upéa-rehe ojeapysaka porã joa hese.

¹² Ha upéi katu Filipe ou omombe'u. Nhandejáry rehewa nhe'ẽ porã ou omombe'u-vy: "Nhandejáry nhande ruvixarã voi. Pemoirũ katu íxupe" he'i omombe'u-vy. Hesu Cristo réry rehewa nhe'ẽ omombe'u ave. Ohendu ramo ogwerovia-ma hemimombe'u hikwái onhemongarai uka ave. Kwimba'e kwéry kunhagwe ave onhemongarai uka.

¹³ Ha Simão katu ogwerovia ave hemimombe'u. Onhemongarai uka ave. Onhemongarai uka rire, omoirũ-ma Filipe-pe. Ohexa heta hembiapo porã ramo hexapyrã-rupi. Tuvixa mba'egwasu ohexa. Ohexa ramo, opondera hembiapo-rehe.

Pedro João ave ogwahẽ ou-vy Samaria tetã-my

¹⁴ Oho omombe'u: "Samaria pygwa gwive ohendupa Nhandejáry nhe'ẽ" he'i imombe'uháry oho-vy Jerusalém tetã-my. Ha Hesu remimondo upe-py oĩ va'e ohendu ramo, ombou mokõi imborepara-vy. Pedro João ave ombou.

¹⁵ Mokõive ogwahẽ ou-vy Samaria tetã-my. Ogwahẽ rire omondo onhe'ẽ Nhandejáry-pe ombogwejy hagwã Nhe'ẽ Marangatu tee va'e ipy'apy-py kwéry.

¹⁶ Ne'írã ogwejy ou-vy Nhe'ẽ Marangatu tee va'e Samaria pygwa-pe. Hesu Cristo réry-py ae onhemongarai uka hikwái.

¹⁷ Ha upéi katu upe mokõi hemimondo omoõ opo inhakã akã ári ogwejy-ma hagwã Nhe'ẽ Marangatu tee va'e. Ogwejy-ma ou-vy optya hagwã Samaria pygwa py'apy-py.

¹⁸ Ha Simão katu ohexa Nhe'ẽ Marangatu tee va'e ogwejy ou-vy ramo, omoõ ramo mokõi hemimondo opo inhakã akã ári. Ohexa ramo, ome'ëse pirapire íxupe mokõive va'e-pe:

¹⁹ —Xe mbopu'aka katu xe-vy ave ambogwejy hagwã Nhe'ẽ Marangatu tee va'e, amoõ ramo xe po xe rapixa akã akã ári, he'i mokõive va'e-pe.

²⁰ Ha Pedro katu he'i:

—Ndaipotái nde pirapire, he'i. —"Nhandejáry xe mbopu'aka-ta ame'ẽ ramo pirapire" ere mo'ã kuri, he'i íxupe. —Eheja. Tove terenhehundi. Tonhehundi nde pirapire ave.

²¹ Nde ko nane akã porãiry. Nane akã porãi-gwi, ndikatúi erejapo Nhandejáry rembiapo. Nhandejáry rembiapo e'ŷ-rami ae nde ne rembiapo va'e, he'i íxupe.

²² —Erova katu nde py'a vaiha. Emondo ne nhe'ẽ Nhandejáry-pe ikatu hagwãixa omboyke ndéhegwi nde py'a vaiha, he'i íxupe.

²³ —Ahexa voi nde py'a vaiha. Hái vai va'e-rami nde py'a vaiha. Ndikatúi erejere tape vai-gwi, he'i íxupe Pedro.

²⁴ —Emondo katu Nhandejáry-pe ne nhe'ẽ pono ojehu xe-vy upe ere va'ekwe, he'i íxupe Simão ikyhyje-gwi.

²⁵ Upéixa ramo, Pedro João ndive omombe'u Nhandejáry nhe'ẽ. Hesu rembiapokwe ohexa va'ekwe omombe'u ave. Upe rire ojevy oho-vy Jerusalém tetã-my. Samaria pygwa-pe tetã mirĩ mirĩ rupigwa-pe omombe'u. Hesu rehewa nhe'ẽ porã omombe'u oho-vy.

Filipe omongarai mburuvixa-pe

²⁶ Ha Filipe katu oime oiko-vy Samaria tetã-my. Ha upéi katu ojekwaa ou-vy Nhandejáry rembigwái yváy gwigwa:

—Ekwa tereho, peteĩ arapopy-koty jevy ekwa, he'i. —Tereho katu eregwahẽ hagwã tapegwasu-py, Jerusalém-gwi Gaza-py oho va'e-py, he'i Filipe-pe. Nhrupi oho va'e upe va'e tape.

²⁷ Ohendu ramo inhe'ẽ, opu'ã ogwata oho-vy. Ogwata jave: “Mburuvixa nipo ra'e kúi ou-ma ra'e tapegwasu-rupi” he'i ojéupe. Upéa mburuvixa Etiópia pygwa, eunuco va'e omenda e'ŷ va'e. Ha'e Candace rembigwái. Ha Candace katu mburuvixagwasu kunha va'e. Etiópia pygwa-rehe gwive omanda oiko-vy. Heta mba'e ogwerekva'e. Ha upéa hembigwái onhangareko va'e imba'e reta-rehe. Ha'e ou va'ekwe Jerusalém tetã-my Nhandejáry-pe imboete-vy. Áy katu oho jevy-ma.

²⁸ Omba'e ndururu-py oho jevy. Kavaju ogweroripara heraha-vy íxupe. Ohokwe-vy ogwapy ha-py omonhe'ẽ oho-vy kwatia nhe'ẽ marangatu va'e. Isaías remimoigwe kwatia-rehe, Nhandejáry nhe'ẽ-py omombe'u va'ekwe omonhe'ẽ.

²⁹ Ha upéi katu he'i Filipe-pe Nhe'ẽ Marangatu tee va'e:

—Ekwa katu imba'e ndururu-py eremoirũ hagwã ereho-vy, he'i íxupe.

³⁰ Ha upéi onha oho-vy ogwahẽ hagwã ha'e-py. Ogwahẽ ramo, ohendu-ma omonhe'ẽ ramo kwatia nhe'ẽ, Isaías omoñ va'ekwe kwatia-rehe:

—Ereikwaa tipo mbava'e-pe po he'i ko va'e nhe'ẽ kwatia-rehe oĩ va'e, he'i oporandu-vy mburuvixa-pe.

³¹ Ha mburuvixa katu he'i íxupe:

—Mbava'e-pe po he'i ko va'e nhe'ẽ, he'i. —Xe-vy omombe'u e'ŷ reheve xe ndaikwaái, he'i.

Upe-ma ramo:

—Ejeipi egwapy katu xe yke-rehe, he'i Filipe-pe.

³² A-rami joty omonhe'ẽ heraha-vy upéa mburuvixa:

“Ijuka hagwã-my heraha-vy nonhe'ẽi joty ovexa. Onhapí-tama ramo ovexa ra'y ragwe nonhe'ẽi joty ave. Upéixa voi ogwerekva'e asy ramo Nhandejáry rembigwái-pe, nonhe'ẽi ete voi. Okirirí ete voi oiko-vy. Ovexa hasẽ e'ŷ va'e-rami ave Nhandejáry rembigwái nahasẽiry voi.

³³ Ogwerekva'e asy ramo íxupe, onhembyasarái ramo hese, ndaipóri hepyha. Ojapose va'e mante ojapo hese hikwái. Ko yvy-gwi omokanhingatu íxupe. Ndaipóri omombe'u va'erã he'ýi kwéry rehewa.”*

Upéixa voi Isaías remimoigwe kwatia-rehe Hesu rehewa nhe'ẽ.

³⁴ Ha upéi katu he'i íxupe upe mburuvixa:

—Kiva'e-rehe po omombe'u araka'e Isaías? he'i. —Ojehegwaa para'e omombe'u, hapixa rehewa para'e omombe'u, he'i. —Emombe'u katu xe-vy, he'i Filipe-pe.

³⁵ Upe-ma ramo omombe'u mburuvixa-pe. Oikwaa uka ranhe íxupe ovexa rehewa nhe'ẽ ramigwa. Hesu rehewa nhe'ẽ porã omombe'u ave.

³⁶ Upéi mokõive oje'óí-ma tape-rupi hikwái. Ogwahẽ-ma y-py ramo:

* **8:33 Is 53.7-8**

—Y ko ra'e, he'i íxupe mburuvixa, —Iporã tipo xe mongarai ko'ay, he'i íxupe mburuvixa.

³⁷ —Nde ko erejerovia tee-ma ramo ae Hesu-rehe, iporã-ma va'erã eren-hemongarai uka, he'i mburuvixa-pe.

—Ajerovia tee-ma voi ko xe, he'i joty. —Hesu Cristo katu Nhandejáry ra'y tee va'e voi. Upéa arovia voi, he'i íxupe.

³⁸ Upéi mburuvixa he'i omombyta hagwã ombo'e ndururu. Ogwejy mokõive imba'e ndururu-gwi. Ogwejy oĩ-vy y-py. Omongarai íxupe mburuvixa-pe.

³⁹ Upe-ma ramo ogwerokanhy-ma heraha-vy Filipe-pe Nhe'ẽ Marangatu tee va'e. Ha mburuvixa katu oma'ẽ jevy mo'ã hese, ha ndohexavéiry-ma. Oho-ma ra'e. Upe-ma ramo oho jevy-ma mburuvixa tape-rupi. Ovy'a eterei oho-vy.

⁴⁰ Ha Filipe ojererokanhy rire ojehexa uka jevy outro tetã-my héry va'e Azoto-py. Ohasa hasa ohokwe-vyte omombe'u mbe'u Hesu rehewa oho-vy. Tetã ambue mbue-py omombe'u mbe'u oho-vy. Cesaréia tetã-my ogwahẽ-ma ramo, opyta upe-py.

9

Saulo ogwerova gwekoha (At 22.3,6-16; 26.9,12-18)

¹ Ha Saulo katu ipy'agwasu voi joty. Ipoxy eterei joty Hesu nhe'ẽ renduha kwéry-rehe: “Ajuka-ta íxupe kwéry” he'iri iri opy'a-py. Upéa-gwi oho pa'i ruvixagwasu renda-py ojerure hagwã kwaitia nhe'ẽ-rehe:

² —Emoĩ katu ne nhe'ẽ kwaitia-rehe xe araha hagwã Damasco tetã-my. Judeu kwéry oporahéi haty haty-rupi arahase, he'i. —Upe-py atopa ramo Hesu rape pyhyha, ajohu va'e gwive kwimba'e kunha va'e gwive aru-ta ko'a-py. Ne nhe'ẽ-rupi aru-ta. Nde kwaitia nhe'ẽ-rupi aru-ta ijokwaha rehewe, he'i pa'i ruvixagwasu-pe.

³ Upéi ogwata oho-vy. Ogwata ramo hi'agwĩ opyta íxugwi Damasco tetã. Ogwahẽ pota-ma jave, upe-ma ramo sapy'a hendy mbaraete eterei íxupe. Áry-gwi omohendy ijerekwe-rehe.

⁴ Omordýi-gwi ho'a-ma oho-vy yvy-py. Ohendu onhe'ẽ va'e íxupe. Héry ohenóí ramo:

—Saulo, Saulo, he'i henóí-vy. —Ma'erã po xe rerekoso asy? he'i íxupe oporandu-vy.

⁵ —Kiva'e tipo nde erenhe'ẽ va'e xe-vy, xe Járy, he'i íxupe Saulo.

—Xe voi Hesu ne rembiereko asy voi xe, he'i íxupe.

⁶ —Ha epu'ã katu upe tetã-my tereho. Upe-py omombe'u-ta nde-vy ne rembiaporã, he'i íxupe Hesu.

⁷ Ha hendifegwa opyta okiririmbá ete ikyhyje-gwi. Inhe'ẽ rei ohendu ha avave-pe ndohexáiry. Upéa-gwi opyta okiririmbá ete hikwái.

⁸ Upéi ha'e onhembo'y jevy-ma oipe'a gwesa osareko jevy-ma ha mba'eve ndohexáiry. Upéa-gwi ojepopyhy uka ojereraha uka-vy Damasco-py.

⁹ Mbohapy áry mba'eve ndohexáiry. Mbohapy áry ndokarúi ave oiko-vy. Mbohapy áry ndoy'úi ave oiko-vy.

¹⁰ Upe-py oĩ Hesu nhe'ẽ renduha héry va'e Ananias. Ikepe'ỹ ojehexa uka ixupéte Nhandejáry Hesu:

—Ananias, he'i Hesu ohenóí-vy íxupe.

—Mbava'e tipo ere-ta xe-vy? he'i Ananias Nhandejáry Hesu-pe.

¹¹ He'i íxupe Hesu:

—Ekwa tereho ko tetā mbyte-rupi oho va'e tape-rupi, tape karē e'ŷ héry va'e-rupi. Eheka katu Tarso pygwa héry va'e Saulo. Judas róga-py eheka íxupe. Upe-py oiko va'e. Áy voi ko ombojeupi xe-vy onhe'ẽ oiko-vy.

¹² Ikéry pygwa vérami nde rexa kuri. He'i nde-rehe: "Ahexa-ma kwimba'e héry va'e Ananias. Oike ramo xe koto-py, omoī ramo opo xe-rehe xe resapysō jevy hagwā ahexa" he'i kuri nde-rehe Saulo ikéra-py, he'i Ananias-pe Nhandejáry Hesu imombe'u-vy.

¹³ Ha upéi katu he'i Ananias Nhandejáry Hesu-pe:

—Ha ore rerekko asy va'ety niko upéa, xe Járy, he'i íxupe. —Ahendu hendu herakwā aiko-vy. Heta-ma ogwereko asy nde re'yi kwéry-pe, Jerusalém-my oiko va'e-pe.

¹⁴ Áy ogwahē Saulo ou-vy ko'a-py. Pa'i ruvixa kwéry nhe'ẽ-rupi ou. Nde réry renoiha gwive onhapytī hagwā ou, he'i Hesu-pe.

¹⁵ Ha Hesu katu he'i íxupe:

—Ekwa katu tereho joty henda-py, he'i. —Saulo ko xe rembiporavo xe mombe'u mbe'u hagwā judeu e'ŷ va'e kwéry-pe, huvixagwasu-pe ave. Israel remiarirõre judeu kwéry-pe ave xe mombe'u hagwā aiporavo-ma íxupe.

¹⁶ Tereho ere íxupe "Heta erehasa asy-ta xéhegwí. Nde ko xe mombe'u-tagwi nde rerekko asy-ta" ere íxupe, he'i Ananias-pe Nhandejáry Hesu.

¹⁷ Upe ramo oho oike Judas róga gwy-py Saulo oī ha-py. Opo omoī hese:

—Aju-ma ngatu áy, xe ryvy, Saulo, he'i íxupe. —Áy katu xe mbou Nhandejáry Hesu, upe ojehexa uka va'ekwe kuri nde-vy ereju jave tape-rupi. Orombohesapysō jevy hagwā xe mbou kuri áy, he'i. —Nde py'a omohynyhē hagwā Nhe'ẽ Marangatu tee va'e xe mbou ave, he'i íxupe Ananias.

¹⁸ Upe-ma ramo ho'a hesa-gwi pira pekwe ramigwa. Hesapysō jevy-ma Saulo. Upe rire onhembo'y onhemongarai uka hagwā.

¹⁹ Okaru-ma. Okaru ramo, omombaraete jevy-ma íxupe tembi'u.

Ha Saulo katu ndahi'aréiry oiko Hesu nhe'ẽ renduha upe tetā-my oiko va'e ndive.

Saulo omombe'u Hesu rehégwa

²⁰ Upe-ma ramo omombe'u judeu oporahéi haty haty-rupi. Hesu rehégwa omombe'u:

—Hesu ko Nhandejáry ra'y tee voi, he'i omombe'u-vy.

²¹ Henduha gwive opondera hese. Mbava'e po ojehu íxupe ha'e kwéry ndoikwaáiry:

—Upe va'e voi ogwereko asy va'ekwe Hesu réry renoiha-pe gwive. Jerusalém-my oiko va'e ogwereko asy va'ekwe, he'i ojóupe. —Áy kuri upe va'e ou a-py. Gwī Hesu réry renoiha-pe oipyhy hagwā mo'ã heraha-vy ou. Ou kuri onhapytī reheve ogweraha hagwā pa'i ruvixa kwéry renda-py. Ma'erā po ndogwerahái íxupe kwéry, he'i ojóupe.

²² Upéa-gwi opondera hese hikwái. Ha ha'e katu ipy'agwasuve suve oho-vy. Omongiririmbá judeu kwéry upe pygwa-pe: "Hesu ko Cristo, Nhandejáry remimbou tee voi" he'i oikwaa uka-vy íxupe kwéry.

²³ Are-ma omombe'u oiko-vy. Upe rire judeu kwéry onhombo'e mbo'e hese ijuka hagwā.

—Jajuka katu Saulo-pe, he'i ojóupe.

²⁴ Áry ramo oha'arō oī-vy. Pyhare ave oha'arō oī-vy upe tetā rokē. Osē jave ojuka hagwā mo'ã íxupe oha'arō arō voi oī-vy. Onhombo'e mbo'e ramo hese hikwái oī omomarandu va'e Saulo-pe.

²⁵ Upe ramo peteī pyhare oresende íxupe inhe'ē renduha. Koty-gwi ohupi ombogwejy hagwā okupe-koty. Hi'ári-gwi ombogwejy íxupe. Yvate-gwi ombogwejy yvy-py. Ajakagwasu-py ombogwejy íxupe.*

Saulo ogwahē oho-vy Jerusalém tetā-my

²⁶ Ha upéi katu Saulo oho jevy Jerusalém tetā-my. Ogwahē rire omoirūse mo'ā Hesu nhe'ē renduha-pe gwive. Ha ikyhyje joa íxugwi hikwái: "Saulo ko ndaha'ei Hesu nhe'ē renduha va'e" he'i mo'ā hese herovia e'ŷha.

²⁷ Upe ramo Hesu nhe'ē renduha va'e héry va'e Barnabé oho ogweru oheja oike Hesu remimondo renda-py. Ogwerovia uka íxupe kwéry Saulo rehewga nhe'ē. He'i Barnabé:

—Saulo ko ohexa ra'e Nhandejáry Hesu-pe tape-rupi, he'i omombe'u-vy. — Onhe'ē ra'e íxupe Nhandejáry Hesu. Upe rire Saulo ogwahē Damasco tetā-my. Upe-py ipy'agwasu omombe'u-vy Hesu réry-py, he'i hese omombe'u-vy.

²⁸ Upéixa ramo Saulo omoirū-ma Hesu nhe'ē renduha-pe. Hendive ogwata oiko-vy Jerusalém tetā-rupi. Ipy'agwasu omombe'u-vy Nhandejáry Hesu réry-py.

²⁹ Omombe'u ramo gwī judeu kwéry-pe, grego-py onhe'ē va'e-pe, onhe'ē mbojevy jevy oiko-vy inhe'ē. Ojukase mo'ā íxupe oiko-vy.

³⁰ Upéa ohendu ramo,iresende-vy ogwerova íxupe he'ýi kwéry. Cesáeria tetā-my ogwerova íxupe:

—Iporâve ereho Tarso tetā-my nde re'ýi renda-py, he'i íxupe hikwái.

³¹ Ha Hesu reroviahä gwive ipy'agwapy oiko-vy. Judéia yvy rupigwa gwive, Galiléia yvy rupigwa gwive, Samaria yvy rupigwa gwive ave oiko porā meme-ma, ndoiko asyvéri-ma. Hi'aranduve nduve oiko-vy herovia-vy. Omboete meme oiko-vy Nhandejáry Hesu-pe. Ha Nhe'ē Marangatu tee va'e oipytygwō mbaraete íxupe kwéry. Upéa-gwi onhembohetave tave oho-vy hikwái.

Pedro ogwahē oho-vy Lida tetā-my

³² Ha Pedro katu ogwata oho-vy. Opa-rupi oho. Tetā tetā-rupi Hesu reroviahä gwive pohu-vy oho. Lida tetā mygwa-pe ave oho oipohu-vy.

³³ Upe-py oho otopa hasy va'e héry va'e Enéias. Ha Enéias onheno mante oiko-vy va'e. Hajy jeapa va'e voi. Hajy jeapa-gwi oito ro'y-ma onheno oĩ-vy gwupa-py.

³⁴ Ha upéi katu he'i hasy va'e-pe:

—Ay voi katu Hesu Cristo ne mbogwera-tama, Enéias. Epu'ā katu, he'i íxupe.
—Emboapu'a nde rupa ereraha hagwā, he'i hasy va'ekwe-pe. Upe-ma ramo pya'e opu'ā okwera-ma.

³⁵ Ha Lida pygwa gwive, Sarona pygwa gwive ave ojeroviapa-ma Nhandejáry Hesu-rehe. Ohexa-ma nga'u íxupe ogwata ramo. Upéa-gwi ogwerovapa gwekoha Hesu-rehe. Ha naimombyrýi oĩ ojóhugwi outro tetā héry va'e Jope.

³⁶ Upe-py oiko ave Hesu nhe'ē renduha kunha va'e héry va'e Tabita. Ha grego nhe'ē-py héry va'e Dorcas. Upéa hembiapo porā porā meme-ma voi oiko-vy. Iporiahu va'e-pe ome'ē va'erā ojapo oiko-vy.

³⁷ Upe ramo hasy omano reheve-ma. Ombojahu hetekwe omoĩ koty yvate-py.

³⁸ Upéi onhemombe'u Pedro oimeha:

—Pedro ko oime Lida-py, he'i hese.

Ha Lida hi'agwī oĩ Jope-gwi. Upéa-gwi Pedro piári omondo mokōi kente. Oho omombe'u íxupe omano va'ekwe. Ojapura pura íxupe ou pya'e hagwā:

—Ejapura pura katu eju-vy, he'i íxupe.

* 9:25 At 11.32-33

³⁹ Upéa-gwi opu'ã ou-vy hendive. Ogwahē rire ou-vy, ogwerojeupi herahavy íxupe kota yvate-py. Upe-py tembirekokwe gwive onhembo'y Dorcas retekwe yke-rehe ohapirō-vy. Ohexa uka Pedro-pe hembiapokwe, oiko joto ramogware onhondive. Hembiapokwe kamisa ao ro'y pygwa ave ohexa uka íxupe.

⁴⁰ Ha Pedro katu omosẽmba imondo-vy íxupe kwéry. Ha upéi ha'e gwe-typy'ã-rehe onhesũ omondo onhe'ẽ Nhandejáry-pe. Upe rire ojerova oma'ẽ hetekwe-rehe:

—Epu'ã katu, Tabita, he'i.

Omanoha-gwi upe kunha oipe'a gwesa ohexa íxupe. Ohexa ramo ovyma oīvy.

⁴¹ Upéi oipopyhy imopu'ã-vy kunha-pe. Upe rire ohenói omoingepa jevy hagwā kota-py gwī Hesu rerviaha. Tembirekokwe omoingepa jevy ave. Oike jevy rire ohexa uka íxupe kwéry oikove jevyha:

—Nugwī oikove jevy-ma, he'i.

⁴² Ha Jope pygwa gwive ohendu herakwā. Heta-ma ojerovia Nhandejáry Hesu-rehe.

⁴³ Ha Pedro opyta upe-py. Simão róga-py opyta. Upe Simão vakapi-gwi ojapo opaixagwa. Ha Pedro katu are opyta hendive oiko-vy hóga-py.

10

Pedro omombe'u judeu e'ŷ kwéry-pe Hesu rehewa nhe'ẽ

(At 11.5-17)

¹ Oĩ va'ekwe Cesaréia tetã-my capitão héry va'e Cornélio judeu e'ŷ va'e. Cem soldado ruvíxa va'e. Gwī va'e soldado kwéry Itália yvy pygwa.

² Upe va'e capitão Nhandejáry remimbota ojapose pose va'e voi. Nhandejáry-pe omboete va'e hóga pygwa ndive omboete. He'ýi e'ŷ remikotevẽ ome'ẽ me'ẽ va'e. Omondo mundo va'e Nhandejáry-pe onhe'ẽ.

³ Ha upéi katu peteĩ áry ka'arugwasu-ma ramo, íxupe mante ojehexa uka jahexá e'ŷ va'e. Ojehexá uka íxupe Nhandejáry rembigwái yváy gwigwa va'e. Oike ramo ou-vy kota-py ohexá:

—Cornélio, he'i íxupe.

⁴ Onhemondýi voi. Upéa-gwi ohexá katu katu íxupe:

—Ma'erã po ereju a-py, xe Járy? he'i oporandu-vy Nhandejáry rembigwái-pe.

Upéi he'i íxupe Nhandejáry rembigwái:

—Nhandejáry ko imandu'a porã va'e nde-rehe. Ne nhe'ẽ eremondo-gwi íxupe, nane ma'e rakate'ŷi-gwi ave imandu'a porã nde-rehe, he'i íxupe. —Nde johu porã Nhandejáry.

⁵ Áy katu emondo ne rembigwái Simão piári. Pedro-py ohenói va'e ave. Emondo Jope tetã-my.

⁶ Upe-py oiko Simão héry va'e ndive. Upe Simão vakapi-rehe omba'apo. Simão róga oĩ ygwasu rembe-rehe, he'i íxupe Nhandejáry rembigwái.

⁷ Upe rire ojeupi jevy oho-vy yvate-kota Nhandejáry rembigwái yváy gwigwa. Upe ramo upe capitão heta hembigwái va'e, mokõi va'e-pe ohenói ou hagwā. Peteĩ soldado Nhandejáry-pe omboete va'e ohenói ave.

⁸ Upéi omombe'upa ete mbohapygwa-pe gwembiebagwe. Upe rire mbohapyve va'e-pe omondo Jope tetã-my. Pedro piári omondo. Upéi ogwata oho-vy.

⁹ Iko'ẽ-my omoagwī-ma Jope ojéupe oho-vy ha ne'írã ogwahē oho-vy upe-py.

Upe-ma ramo ogwahē e'ŷ jave, áry pyte-rupi, ojeupi-ma yvate Pedro. Hóga apotaha apesŷi va'e ári ojeupi oĩ-vy onhomongeta hagwā Nhandejáry ndive.

¹⁰ Ivare'a okaruse-ma. Gwemi'urā ra'arō-vy íxupe mante ojehexa uka jahexa e'ŷ va'e.

¹¹ Ohexa ojekwaa pya'e yváy-gwi. Ohexa ogwejy tupa arigwa ramigwa. Tuvixa va'e voi. Irundy joapy joja reheve oipyhy joja imbogwejy-vy. Yvate-gwi yvy-py ombogwejy.

¹² Hye py-py oĩ opaixagwa mymba gwive, opaixagwa mbói gwive ave, gwye-rehe osyryry va'e gwive, opaixagwa gwyra gwive ave.

¹³ Upe-ma ramo ohendu íxupe onhe'ẽ va'e:

—Epu'ã katu, Pedro. Ejuka ere'u va'erā, he'i íxupe.

¹⁴—Ndajuka mo'ãiry, xe Járy, he'i. —Nda'u mo'ãiry. Ây peve ne'írā vyteri ha'u so'o vai. Hi'upy e'ŷ nda'úi vyteri voi yma gware nhe'ẽgwe-rupi aiko-gwi, he'i Nhandejáry-pe.

¹⁵ Upe rire ohendu jevy íxupe onhe'ẽ va'e:

—Nhandejáry he'i-ma ramo, “Iporā ja'u”, “Hi'upy e'ŷ” ani ere teĩ, he'i íxupe.

¹⁶ Mbohapy vése ohexa hemimbogwejy. Mbohapy vése ohendu íxupe onhe'ẽ va'e. Upe rire ogwerojeipi jevy áry-rehe heraha-vy.

¹⁷ Ha Pedro omundo oiko-vy gwesa gwembiebagwe-rehe. “Ma'erā po ahexa ra'e upéa” he'i ojéupe. Upe ramo capitão remimbou ko ogwahē-ma ou-vy.

—Kipy tipo oime Simão róga? aje'i-ma oporandu ra'e.

¹⁸ Ây onhembo'y oĩ-vy okẽ rovái. Oporandu hese:

—Oiko tipo a-py upe Simão héry va'e Pedro? he'i onhe'ẽ hatā-vy.

¹⁹ Ha Pedro omundo joty oiko-vy gwesa gwembiebagwe-rehe. Upe ramo ogwahē-ma ou-vy capitão remimbou. Ogwahē-ma ramo, he'i íxupe Pedro-pe Nhe'ẽ Marangatu tee va'e:

—Mbohapyve ko'ay ogwahē-ma ou-vy nde reka-vy.

²⁰ Ekwa katu egwejy, he'i íxupe. —Ani ne ate'ŷ teĩ, he'i íxupe. —Tereho katu hendive. Gwī mbohapy ou va'e xe remimbou voi, he'i íxupe Nhe'ẽ Marangatu tee va'e.

²¹ Upéi ogwejy ou-vy:

—Xe ko ne rembieka, he'i. —Mbava'e-rehe tipo ereju ra'e? he'i mbohapyve ou va'e-pe.

²² —Ore ko capitão Cornélio remimbou, he'i íxupe. —Ha'e heko porā ete va'e. Nhandejáry-pe omboete oiko-vy va'e. Judeu kwéry gwive imandu'a porā hese. Kwehe he'i íxupe nde-rehe Nhandejáry rembigwái imarangatu va'e yváy gwigwa: “Ere kuri Pedro-pe tou nde róga-py erenhendu hagwā hemimombe'urā” he'i Nhandejáry rembigwái, he'i íxupe omombe'u-vy.

Ha Pedro katu:

²³ —Néi, he'i. —Peike katu peju-vy. Iporā peke a-py, he'i mbohapyve va'e-pe.

Iko'ẽ-my osẽ oho-vy oho-ma hendive. Oĩ oho va'e Pedro ndive Jope pygwa Hesu reroviah. Omoirū íxupe oho-vy.

²⁴ Upéi iko'ẽ-my jevy ae katu ogwahē-ma oje'óí-vy hikwái Cesaréia tetā-my. Ha capitão oha'arō oĩ-vy íxupe kwéry. Oha'arō ave capitão ndive hemienói. He'ýi kwéry hembiayhu va'e ave oha'arō hendive.

²⁵ Ha Pedro oike-tama ramo capitão róga-py ohogwaití ou-vy íxupe capitão. Ojeity imboete-vy yvy-rupi.

²⁶ Ha Pedro omohembo'y jevy íxupe:

—Epu'ã katu, he'i. —Xe ko ne ramigwa voi. Xe ndaha'éi Nhandejáry. Teko rei ave xe, he'i Pedro capitão-pe.

²⁷ Upéixa onhomongeta-vy hendive oike koty-py. Upe-py oike ramo, heta-ma oĩ ojogweroaty va'e.

²⁸ Upe ramo he'i íxupe kwéry imombe'u-vy:

—Judeu kwéry ko yma gware nhe'ẽgwe-rupi oiko ramo, ndoipotái omoirũ judeu e'ŷ kwéry-pe. Ndoipotái ni oipohu íxupe. Ko va'e peikwaa voi peẽ, he'i. —Ãy ae katu he'i xe-vy oikwaa uka-vy Nhandejáry: “Oĩ nhamoirũ e'ŷ va'e, oĩ jaipohu e'ŷ va'e ave, ani ere tei” he'i xe-vy.

²⁹ Upéa-gwi erembou ramo xe piári, naxe ate'ŷiry aju-vy. Mbava'e-rehe tipo erembou xe piári ra'e? he'i íxupe kwéry Pedro.

³⁰ Upéi he'i íxupe capitão:

—Kwehe ojapo-ma mbohapy áry ka'arugwasu-ma ramo a-rami, amondo xe nhe'ẽ Nhandejáry-pe aiko-vy. Amondo jave xe nhe'ẽ, ojehexá uka xe-vyte. Xe-vyte ojehexá uka sapy'a ijao rendypa va'e. Onhembo'y oĩ-vy xe rovái.

³¹ He'i xe-vy: “Nhandejáry ohendu-ma ra'e ne nhe'ẽ, capitão Cornélio. Nane ma'e rakate'ŷi va'evy-gwi imandu'a porã nde-rehe” he'i xe-vy.

³² “Ãy katu emondo Jope tetã-my Simão piári, héry va'e ave Pedro. Oĩ pe vakapi-rehe omba'apo va'ety róga-py. Héry ave Simão upe va'e. Ygwasu rembe-rehe oiko va'e” he'i xe-vy ojehexá uka va'ekwe.

³³ Upéa-gwi naxe ate'ŷiry amondo-vy nde piári. Ha nde nane ate'ŷiry voi oromomarandu ramo. Ereju voi. Ha ãy katu ore kwéry oronhomboheta ko'a-py. Nhandejáry resa-py ne nhe'ẽ rendu-vy oroha'arõ. Nhandejáry nde-vy he'i va'ekwe, emombe'u katu ore-vy. Orohenduse voi, he'i íxupe capitão Cornélio.

³⁴⁻³⁵ Ha upéi Pedro he'i íxupe kwéry omombe'u-vy:

—Nhandejáry ko nhande rayhu va'e. Enterovéa-pe yvypóry gwive kente kwéry peteixa ohayhu va'e. Nipo anhei ete voi katu ra'e, he'i. —Íxupe omboete va'e-pe gwive ojohu porã Nhandejáry. Nombojevýi oĩ-vy. Ojohu porã ave tape porã pyhyha gwive. “Ore kwéry anho mante judeu kwéry va'e Nhandejáry rembiayhu” oro'e mo'ã ha ndaupéixairy ra'e. Yvypóry va'e gwive Nhandejáry rembiayhu.

³⁶ Are-ma va'ekwe Nhandejáry ombou va'ekwe ore-vy Israel kwéry va'e-pe onhe'ẽ porã: “Hesu Cristo ko pene mbopy'agwapy va'erã, pende kwéry Járy ave” he'i Nhandejáry omombe'u-vy, he'i Pedro imombe'u-vy.

Upéi he'i jevy íxupe kwéry:

³⁷ —Ha João Batista katu omombe'u ranhe oiko-vy Nhandejáry nhe'ẽ oporomongarai ave. Upe rire Hesu onhepyrũ omombe'u. Galiléia yvy-rupi oho omombe'u. Upe rire Judéia yvy-rupi gwive oho omombe'u oiko-vy Nhandejáry nhe'ẽ. Upe va'e peikwaa voi, he'i

³⁸ —Upe Nazaré pygwa Hesu rehewa nhe'ẽ ave peikwaa voi ave. Nhandejáry nhe'ẽ-py oipy'apyhy mbaraete íxupe Nhe'ẽ Marangatu tee va'e. Ha upéi katu opa-rupi oho oiko-vy Hesu. Hembiapo porã porã meme. Oipytygwô mbaraete íxupe Nhandejáry. Upéa-gwi anháy rerekoha gwive ombogwera.

³⁹ Ha ore ko Hesu rembiapo apo rexahare. Upéa-gwi judeu kwéry yvy-py tetã mirí mirí-rupi, Jerusalém tetã-my ave ojapo oiko-vy va'ekwe oromombe'u oroiko-vy. Ha gwí judeu kwéry katu ojuka íxupe va'ekwe. Kurusugwasu-rehe ohupi va'ekwe ojuka-vy.

⁴⁰ Ha Nhandejáry omopu'ã jevy íxupe. Mbohapy áry rire, omoingove jevy-ma íxupe. Ombojekwaa jevy íxupe ave.

⁴¹ Ha enterovéa nikó ndohexáiry. Ore ae orohexá uka. Are-ma va'ekwe ore poravo Nhandejáry hexaharã. Upéa-gwi oikove jevy rire, ore-vyte ojehexá uka. Orokuru hendive. Oroy'u ave hendive.

⁴² Upéi he'i ore-vy Hesu: “Pemombe'u katu entéro va'e-pe xe rehewa nhe'ẽ porã. Peje katu íxupe kwéry: Omoi voi ra'e Nhandejáry gwa'ýry Hesu ogwereko hagwâ hembiapokwe pokwe-rami oikove va'e gwive omano va'ekwe-pe gwive ave, peje katu xe mombe'u-vy. Ha hembiapo porã va'e katu

Hesu omogwahē va'erā oha-py ha hembiapo vai va'e katu omboyke va'erā imondo-vy, peje íxupe kwéry" he'i ore-vy Hesu, he'i Pedro imombe'u-vy.

Upéi he'i jevy íxupe kwéry:

⁴³ —Ha Nhandejáry nhe'ẽ-py omombe'u va'ety gwive omombe'u va'ekwe Hesu rehewarā nhe'ẽ: "Ojekwaa va'erā ou-vy" he'i. "Ha ojerovia hese va'e gwive omboyke va'erā íxugwi hembiapo vaikwe Nhandejáry. Hesu-rehe, Hesu réry-rehe ojerovia va'e-gwi omboyke va'erā hembiapo vai va'ekwe" he'i va'ekwe hese hikwái, he'i íxupe kwéry Pedro omombe'u-vy.

⁴⁴ Onhe'ẽ jave, ogwahē ou-vy Nhe'ẽ Marangatu tee va'e. Omohynyhẽmba ipy'a upe pygwa kwéry-pe ogwejy-vy. Entéro ohendu va'e-pe gwive inhe'ẽ, ogwerekó.

⁴⁵⁻⁴⁶ Upéa rexá-vy opondera hese kwéry gwī judeu va'e, Hesu reroviahá Jope-gwi ou va'ekwe Pedro ndive. Ohendu nhe'ẽ ambue-py oikwaa e'ŷ rehewe onhe'ẽ ramo judeu e'ŷ va'e, Nhandejáry-pe ombotuvixa mba'e ramo, ohendu inhe'ẽ ave. Upéa-gwi he'i ojóupe:

—Ma'erā ogwahē íxupe Nhe'ẽ Marangatu tee va'e? he'i opondera-vy hese. —Nugwī judeu e'ŷ kwéry-pe ave ohexakwaa rei nipo ra'e Nhandejáry inhe'ẽrā-my. Ome'ẽ rei nipo ra'e íxupe Nhe'ẽ Marangatu tee va'e oiko hagwā ipy'a-py kwéry, he'i ojóupe opondera-vy hese.

Upe-ma ramo he'i Pedro gwe'ýi kwéry-pe:

⁴⁷ —Ãy katu omohynyhẽmba-ma ipy'a kwéry judeu e'ŷ va'e-pe Nhe'ẽ Marangatu tee va'e, nhande py'a omohynyhẽmba va'ekwe-rami, he'i. —Upéixa ramo nhamongarai íxupe. "Nhamongarai e'ŷ teĩ íxupe kwéry" ani ja'e teĩ íxupe kwéry, he'i gwe'ýi kwéry-pe Pedro.

⁴⁸ Upéixa ramo Pedro he'i omongarai hagwā Hesu Cristo réry-py. Ha upéi katu he'i íxupe judeu e'ŷ va'e:

—Nderepyta mo'ãi tipo ra'e ore ndive. Epyta katu kuri ore ndive, he'i íxupe.

11

Pedro omombe'u Cornélio rehewa nhe'ẽ

(At 10.9-48)

¹ Ha upéi katu Cornélio kwéry rerakwā osarambi oho-vy. Ha Hesu remimondo, Judéia yvy rupigwa oĩ va'e gwive ave Hesu reroviahá va'e, ohendu herakwā:

—Judeu e'ŷ kwéry ko ohendu ra'e Nhandejáry nhe'ẽ nhande kwéry-rami, he'i ojóupe imombe'u-vy.

² Upéixa ramo Pedro ogwata ou-vy Jerusalém tetã-my. Upe-py ogwahē ramo, onhe'ẽ poxy íxupe upe pygwa judeu va'e:

³ —Judeu e'ŷ kwéry ko ndojapói va'e Moisés amyrī he'i va'ekwe gwive. Tojapo katu, he'i. —Gwī judeu e'ŷ va'e katu onhektyī uka e'ŷ va'e voi. Nanhande reko ramíry oiko. Upéa-gwi ma'erā ereho ereiko ra'e hendive? Ma'erā po erekaru ra'e hendive? he'i oporandu poxy-vy íxupe.

⁴ Ha Pedro katu ojeapysaka porā ranhe inhe'ẽ-rehe. Upe rire ae omombe'upa íxupe kwéry. Ojehu va'ekwe gwive omombe'u:

⁵ —Kweheve kuri aime Jope tetã-my. Nhandejáry ndive anhomongeta jave ojehexa uka xe-vy. Xe-vyte ojehexa uka, he'i. —Ahexa ombogwejy ramo tupa arigwa ramigwa tuvixa va'e. Irundy joapy joja rehewe oipyhy joja imbogwejy-vy. Yvate-gwi ombogwejy. Opyta oĩ-vy xe yke-rehe.

⁶ Ama'ẽ hese. Ipy-rehe ama'ẽ aĩ-vy. Upe-py ahexa mymba gwive, ka'agwy rupigwa mymba gwive ave. Gwyre-rehe osyryry va'e gwive, gwyra gwive ave ahexa.

⁷ Upéi ahendu xe-vy onhe'ẽ va'e: “Ekwa katu, Pedro. Ejuka ere'u va'erã” he'i xe-vy.

⁸ “Nda'u mo'ãi, xe Járy” ha'e íxupe. “Ãy peve ne'írã vyteri ha'u so'o vai. Yma gware nhe'ëgwe-rupi nda'úi hi'upy e'ÿ” ha'e íxupe.

⁹ He'i jevy xe-vy yváy-gwi onhe'ẽ va'e: “Nhandejáry ko he'i-ma ramo, Iporã ja'u, Hi'upy e'ÿ, ani ere teñ” he'i xe-vy.

¹⁰ Mbohapy vése ahendu xe-vy onhe'ẽ va'e. Upe rire ogwerojeupi jevy yváy-koty heraha-vy, he'i Pedro omombe'u-vy.

¹¹ —Upe-ma ramo katu ogwahẽ ou-vy mbohapyve va'e, Cesaréia-gwi xe piári ombou va'ekwe. Xe aime ha-py ogwahẽ ou-vy.

¹² Upéi he'i xe-vy Nhe'ẽ Marangatu tee va'e: “Ani ne ate'ÿ teñ ereho hagwã” he'i. “Tereho katu henville” he'i xe-vy. Upe-ma ramo xe aha-ma. Ko va'e xe jave oho va'e ave, seis Hesu renduha va'e. Orogwahẽ ramo upe-py orookepa oroho-vy capitão Cornélio róga-py.

¹³ He'i ore-vy: “Ahexa kuri Nhandejáry rembigwái yváy gwigwa. A-py xe róga-py onhembo'y oï-vy ramo ahexa voi. Upéi he'i xe-vy Nhandejáry rembigwái: Emundo katu Jope-py Simão piári héry va'e ave Pedro.

¹⁴ Upe va'e omombe'u-ta nde-vy nhe'ẽ porã. Upéa nhe'ẽ ererovia ramo, ne resende-ta Nhandejáry. Nde re'ýi kwéry ave oresende-ta, he'i xe-vy Nhandejáry rembigwái” he'i ore-vy omombe'u-vy. Upe ramo anhe'ẽ capitão Cornélio-pe henvillegwá-pe ave anhe'ẽ.

¹⁵ Ne'írã vyteri anhe'ẽ heta, omohynyhëmba-ma ipy'a kwéry ogwejy-vy Nhe'ẽ Marangatu tee va'e. Yma-ma nhande py'a omohynyhëmba va'ekwe-rami voi omohynyhë ipy'a íxupe.

¹⁶ Upe ramo xe mandu'a Nhandejáry Hesu he'i va'ekwe-rehe: “João ko y-py oporomongarai va'ety. Ha ndaha'ei y pygwa va'e-rami pene mongarai va'erã Nhandejáry. Nhe'ẽ Marangatu tee va'e ae pende py'a omohynyhëmba va'erã ne mongarai-vy” he'i va'ekwe nhande-vy Hesu, he'i Pedro omombe'u-vy.

¹⁷ —Upéixa ramo Nhandejáry ome'ẽ-ma voi ra'e judeu e'ÿ kwéry-pe Nhe'ẽ Marangatu tee va'e. Yma jajerovia-ma ramo Nhandejáry Hesu Cristo-rehe nhande-vy ome'ẽ va'ekwe-rami, ko'ãy íxupe kwéry háma ave ome'ẽ. Upéa-rehe, “Aníke erejapo upéa” xe nda'e mo'ãi voi Nhandejáry-pe, he'i íxupe kwéry Pedro omombe'u-vy.

¹⁸ Ohendu rire inhe'ẽ, nainhe'ẽ poxyvéi-ma. Omomba'egwasu-ma Nhandejáry-pe:

—Nipo anhei ete voi katu ra'e: “Perova katu pende rekoha, peipyhy katu tape porã” he'i judeu e'ÿ kwéry-pe ra'e. Nhande-vy he'i hagwe-rami, he'i voi nhande re'ýi e'ÿ-pe ave ra'e Nhandejáry, he'i ojóupe hikwái.

Judeu e'ÿ va'e-pe omombe'u Hesu rehewa nhe'ẽ

¹⁹ Ko'ângá katu Hesu reroviahä gwive ndoikovéiry peteñ henda-py. Osaram-bipa va'ekwe oje'óí-vy hikwái. Ha mburuvixa kwéry katu ojuka va'ekwe Hesu reroviahä héry va'e Estêvão-pe. Ojuka rire, ipy'agwasuve suve ogwereko asy hagwã Hesu reroviahä-pe gwive. Ojerereko asy-gwi opa isarambipa oje'óí-vy. Oï oho va'ekwe Fenícia yvy-py peve, Chipre ykõi meve ave, Antioquia tetã meve ave. Upe va'e nomombe'u jojái Nhandejáry nhe'ẽ. Judeu kwéry anhópe mante omombe'u mbe'u. Judeu e'ÿ va'e-pe ae nomombe'úi Nhandejáry nhe'ẽ.

²⁰ Oï ave Chipre pygwa, Cirene pygwa ave. Gwĩ va'e oho va'ekwe Antioquia tetã-my, Nhandejáry nhe'ẽ omombe'u-vy. Ogwerojoja imombe'u-vy íxupe kwéry. Judeu e'ÿ va'e grego va'e-pe ave, omombe'u va'ekwe Nhandejáry Hesu rehewa nhe'ẽ porã.

²¹ Ha Nhandejáry oipytygwō mbaraete íxupe kwéry omombe'u hagwā. Upéa-gwi ohendu ramo inhe'ẽ, heta-ma ojerovia-ma Hesu-rehe. Ogwerova-ma gwekoha hese.

²² Ha upéi katu ohendu-ma herakwā Hesu reroviahia Jerusalém pygwa va'e. Upéa-rehe ipa'ū-gwi kwéry omondo kwimba'e héry va'e Barnabé. Antioquia-py omondo.

²³ Upe-py ogwahē ramo, ohexa voi Nhandejáry rembihovasa. Ohexa ramo ov'y'a:

—Peipyhy katu tape porā, he'i íxupe kwéry. —Upe va'e-rupi meme tapeho. Peteixa peraha pene renonde-rupi pene arandu. Anive teĩ peva Nhandejáry Hesu rape-gwi, he'i íxupe kwéry Barnabé.

²⁴ Hekoha porā va'e Barnabé. Nhe'ẽ Marangatu tee va'e ipy'a omohynyhēmba íxupe va'e, ojerovia tee va'e Hesu-rehe. Upéa-rupi onhembo-hetave tave oho-vy Nhandejáry Hesu reroviahia.

²⁵ Ha upéi katu Barnabé oho Tarso tetā-my. Saulo reka-vy oho.

²⁶ Otopa ramo ogweru. Peteĩ ro'y optyta upe-py Antioquia-py. Omboheta hagwā Hesu reroviahia-pe optyta. Ombo'e mbo'e oiko-vy mokōi va'e. Heta voi hemimbo'e. Upe pygwa ombohéry ranhe va'e Hesu nhe'ẽ renduha-pe: “Cristo kwéry va'e” he'i ombohéry-vy.

²⁷ Upe-py ombo'e mbo'e jave ogwahē ou-vy Nhandejáry nhe'ẽ-py omombe'u va'ety Jerusalém-gwi ou va'ekwe.

²⁸ Ogwahē rire onhembo'y-ma héry va'e Ágabo:

—Yvy apy gwive-rehe opa va'erā tembi'u, he'i. —Ohasa asy eterei va'erā yvypór ywive, he'i henonderā omombe'u-vy.

Upéa oikwaa, Nhe'ẽ Marangatu tee va'e ome'ẽ íxupe-gwi inhe'ẽrā. Ha upéa áry-py ndojehúiry. Cláudio oiko ramo mburuvixagwasu ramo ae, ojehu-ma he'i va'ekwe.

²⁹ Upéa-rehe Ágabo nhe'ẽ rendu-vy, Hesu nhe'ẽ renduha he'i ojóupe:

—Nhamboaty aty katu plata jaraha uka hagwā, he'i, —nhaipytygwō hagwā nhande re'yi kwéry, Judéia yvy rupigwa va'e. Jareko rekomi va'ete nhame'ẽ, he'i ojóupe.

³⁰ Upe rire ogweraha uka Barnabé-pe Saulo ndive plata ome'ẽ hagwā Hesu reroviahia rerekwa-pe.

12

Mburuvixagwasu Herodes omoī preso Pedro-pe

¹ Upe ramo mburuvixagwasu héry va'e Herodes ogwereko asy-ma Hesu reroviahia-pe.

² Ogwereko asy héry va'e Tiago-pe. Upéa João ryke'y va'e. Ojuka uka kysepuku hāi jováí va'e-py.

³ Upéa ohexa ramo, ov'y'a joa-ma judeu kwéry. Upéa-gwi mburuvixagwasu ipy'agwasuve suve oho-vy. He'i omoī hagwā preso Pedro-pe ave. Aretegwasu-py omoī preso íxupe. Upe va'e áry-py mbojape onhembovu e'ỹ va'ekwe ho'u judeu kwéry.

⁴ Ha upéi oipyhy rire, omoī íxupe preso. Omonhangareko uka hese dezesseis soldado-pe. Irundy rundy omonhangareko uka oī-vy hese. Ha mburuvixagwasu he'i opy'a-py: “Aretegwasu opa rire, anohē-ta judeu kwéry ohexa hagwā íxupe ajuka hagwā íxupe anohē-ta” he'i mo'ã hese.

⁵ Upéixa ramo optyta preso Pedro. Ha Hesu reroviahia kwéry nainhate'ỹiry omondo meme hagwā Nhandejáry-pe onhe'ẽ hese.

6 Ha mburuvixagwasu he'i: “Ko'ẽ ramo anohẽ-ta enterove va'e ohexa hagwã íxupe” he'i mo'ã ojéupe. Pyhare ramo oke oĩ-vy Pedro, mokõi soldado pa'ũgwe-rupi oke. Ojepokwa oĩ-vy mokõi isã-rehe. Oĩ soldado ave okẽ ra'arõha.

7 Upe-ma ramo pya'e ojehexa uka onhembo'y-vy Nhandejáry rembigwái yváy gwigwa. Hendy ramo koty-py, omohembipepa. Omokanái íxupe ijati'y-rehe omombáy hagwã. Opáy jave he'i íxupe:

—Epu'ã pya'e ereho hagwã, he'i íxupe.

Upéixa he'i-ma ramo, pya'e ojerapa rei isã íxugwi. Ho'a rei ipoapy-gwi isã.

8 Upe rire he'i íxupe Nhandejáry rembigwái:

—Emonde katu nde ku'a jopyha. Emoĩ ave nde pyryru nde py-rehe, he'i íxupe.

Omonde-ma. Omoĩ-ma opyryru opy-rehe. Upéi he'i jevy íxupe:

—Emonde katu nde ao ro'y-py eremonde va'ety ereho hagwã xe rupive, he'i Pedro-pe.

9 Upe-ma ramo Pedro osẽ koty-gwi oho hagwã hupive. Mbava'e po ojehu ra'e, ha'e ndoikwaáiry: “Xe páy-py pa ahexa ra'e Nhandejáry rembigwái. Xe kéra-py pa ahexa ra'e” he'i ojéupe, ndoikwaáiry-gwi.

10 Upéi mokõi okẽ-rupi osẽ ha ndohexái íxupe soldado okẽ ra'arõha. Upe rire ogwahẽ oho-vy okẽ pahagwe-py, kwarepoti-gwi ojejapo va'ekwe. Upe-py oime tape tetã-my oho va'e. Upéa okẽ onhembotypa voi. Ha ogwahẽ ramo ha'e-py ojepe'a rei íxupe oho-vy. Upe rire osẽmba oho-vy. Henonde-rupi oho tape-rupi oje'óí-vy. Upe-ma ramo pya'e onhemo'ã-ma íxugwi Nhandejáry rembigwái.

11 Onhemo'ã-ma rire oikwaa-ma osẽha. He'i ojéupe: “Nipo anhei ete voi katu ra'e” he'i. “Ndojehexa uka reíry voi ra'e xe-vy. Ombou nipo ra'e Nhandejáry gwembigwái xe renohẽ-vy. Áy katu ndaipu'akavéi-ta xe-rehe mburuvixagwasu” he'i. “Gwĩ judeu kwéry naxe rexa mo'ãi xe juka ramo hikwái. Xe resende nipo ra'e Nhandejáry” he'i ojéupe.

12 Inharandu porã rire, oho gwe'ýi kwéry róga-py, Maria róga-py oho. Upéa Maria João Marcos sy va'e. Upe-py aje'i-ma kuri heta ojogweroaty ombojeupi upi hagwã Nhandejáry-pe onhe'ë.

13 Ha upéi katu ogwahẽ oho-vy ramo, ombota mbota okẽ-rehe. Ohendu ramo, ou ohexa tembigwái héry va'e Rode kunha va'e.

14 Inhe'ë ohendu ramo, oikwaa-ma: “Ou-ma ra'e Pedro” he'i ojéupe. Ovy'a eterei. Ovy'a eterei-gwi hesarái-vy ndoipe'ái okẽ. Oripara jevy koty-py oho-vy omombe'u hagwã:

—Pedro ko okẽ rovái onhembo'y-ma oĩ-vy, he'i omombe'u-vy.

15 Ha ndogweroviái voi he'ýi kwéry:

—Nde tavy, he'i hembigwái-pe hikwái.

—Anhetegwa tegwa tee va'e, he'iri iri íxupe kwéry. Ha ndogwerovia etéi voi:

—Ndaha'éi Pedro, he'i. —Nhandejáry rembigwái hese onhangareko va'e ra'e ae. Oheko a'ã rei ra'e Pedro-pe, he'i rei hembigwái-pe.

16 Onhomongeta hikwái jave koty-py, ombota mbota jevy-ma oiko-vy. Ipaha-py oho onhokendavo okẽ ohexa-ma íxupe. Ohexa ramo: “Mba'éixa ereju ra'e” he'i Pedro-rehe opondera-vy.

—Ereju-ma ra'e. Eregwahẽ-ma nipo ra'e, he'i íxupe.

17 Upéi omopu'ã opo omongiririmbä koty pygwa-pe gwive he'i hagwã:

—Aje'i-ma kuri xe renohẽ Nhandejáry rembigwái preso aĩ ha-gwi, he'i Pedro omombe'u-vy. —Emombe'u katu xe rerakwã Hesu reroviah-a-pe gwive, huvíxa Tiago-pe emombe'u ave, he'i íxupe kwéry Pedro.

Upe rire ndopytái upe-py osẽ oho-vy.

¹⁸ Ko'ẽmba ramo ojapura eterei soldado kwéry hese:
—Okanhy-ma nipo ra'e Pedro, he'i joa hikwái. —Mamo-ngoty po oho Pedro?
he'i ojóupe.

¹⁹ —Eheka heka katu íxupe, he'i soldado-pe mburuvixagwasu.
Ha ndotopái íxupe. Upe-ma ramo mburuvixagwasu ohenói soldado-pe okẽ
ra'arõha-pe ou hagwã hovagwy-py. Omonhe'ẽ íxupe oporandu-vy:
—Mba'éixa tipo Pedro pemokanhy uka hagwã ra'e? he'i.
—Ndoroikwaái ore, he'i.
Ndoikwaái-gwi Pedro okanhy hagwe, he'i ojuka hagwã okẽ ra'arohare-pe.
Upe rire mburuvixagwasu Herodes osẽ oho-vy Judéia yvy-gwi. Opyta are
Cesaréia tetã-my.

Mburuvixagwasu Herodes omano

²⁰ Ha upéi katu Herodes ipoxy eterei-ma Tiro tetã mygwa-pe. Sidom tetã
mygwa-pe ave ipoxy. He'i ojóupe upe pygwa:

—Ipoxy-ma ra'e nhande-vy mburuvixagwasu. Áy katu nombou mo'ãvái
nhande-vy nhane remi'urã. Mba'eve novendevéi arã nhande-vy, he'i ojóupe.
Upéa-gwi onhomono'õ no'õ ou-vy Herodes renda-py hikwái. Ou ranhe hem-
bigwái renda-py. Hembigwái héry va'e Blasto. Herodes róga kakwaa-rehe
onhangareko va'e. Upéi he'i:

—Oroipota ereraha ore nhe'ẽ eremombe'u hagwã mburuvixa-pe, he'i hem-
bigwái-pe.

Upe rire ohopa mburuvixa renda-py. Ojerure íxupe omoporã hagwã inhe'ẽ
kwéry ndaipoxiyéiry hagwã ójehe kwéry.

²¹ Ha upéi katu ogwahẽ-ma ou-vy mburuvixa onhemonhe'ẽ hagwã áry
ijatýra va'e-pe. Upe pygwa kwéry va'e-pe onhemonhe'ẽ. Omonde ao porã
va'e. Mburuvixa remimonde va'e omonde. Onhe'ẽ hagwã-ma mburuvixa
gwapy haty-rehe ogwapy. Upe ramo onhe'ẽ-ma.

²² Onhe'ẽ ramo íxupe kwéry:

—Ndaha'ei teko rei onhe'ẽ va'e. Tupã ae onhe'ẽ, he'i hese onhe'ẽ hatã-vy
hikwái.

²³ Ha mburuvixa katu ohendu rei. Omotupã ramo íxupe hikwái, ojohu
porã voi: “Xe ko ndaha'ei tupã” nde'íry. Onhemotupã ra'anga anga rei
voi. Nhandedjáry tee-pe ae nomboetéiry. Upéa-gwi pya'e omoĩ mba'erasy
hese Nhandedjáry rembigwái yváy gwigwa. Heta mba'eraso ho'u-ma hyekwe.
Ho'u-gwi omano.

²⁴ Ha Hesu reroviahha onhembohetave tave joty oho-vy.

²⁵ Ha Barnabé Saulo ndive oheja Jerusalém-my upe plata ombojehe'a he'a
va'ekwe heru-vy. Hembieru oheja upe-py. Oheja rire oho jevy-ma. João
Marcos ogweraha ave ondive.

13

Barnabé Saulo ndive osẽ oho-vy omombe'u hagwã Nhandedjáry nhe'ẽ

¹ Oĩ va'ekwe Antioquia tetã-my Hesu reroviahha onhomboaty aty va'e.
Ipa'ũ-my oĩ ave Nhandedjáry nhe'ẽ-py omombe'u va'ety, imbo'eháry ave. Oĩ
Barnabé, oĩ Simeão héry va'e Kamba ave. Upéi Cirene pygwa héry va'e Lúcio.
Upéi Manaém mburuvixagwasu Herodes tyvyranga. Upéi Saulo ave. Entéro
imbo'e mbo'eha kwéry.

² Ha upéi ojogweroaty hikwái Nhandedjáry mboete-vy. Ohasa ave okaru e'ŷ
reheve hikwái. Upe-ma ramo he'i íxupe kwéry Nhe'ẽ Marangatu tee va'e:

—Eipe'a katu xe-vy Barnabé Saulo ndive, he'i. —Upéa xe rembiporavo ojapo hagwā xe remimbota. Eipe'a katu ojapo va'erā xe aipota va'e, he'i Nhe'ē Marangatu tee va'e.

³ Upe rire ohasa rire hikwái okaru e'ŷ reheve, omondo rire Nhandejáry-pe onhe'ē hikwái, omoñ inhakā ári opo imondo-vy gwekovía.

⁴ Upéixa ramo osẽ oho-vy. Nhe'ē Marangatu tee va'e omundo ha-rupi oho. Oho ygwasu rembe'y-py, Selêucia tetā-my oho. Ogwahē ramo upépy kanoagwasu-py ogwejy onhemboyrú oho-vy. Oho kanóa-py ogwahē ykōigwasu-py héry va'e Chipre.

⁵ Upe-py ogwahē rire, ogwahē tetā-my. Tetā héry va'e Salamina. Upépy judeu kwéry porahéi haty haty-rupi omombe'u meme Nhandejáry nhe'ē. Omoirū íxupe oiko-vy karia'y héry va'e João Marcos oipytygwō hagwā íxupe.

Oje'opa-ma Elimas resa

⁶ Ha upéi katu ohasa oho-vy Chipre ykōi-rupi. Yvy-rupi oho. Ykōi apy peve oho. Pafos tetā-my ogwahē oho-vy. Upe-py otopa anháy arandu-py hi'arandu va'e, judeu va'e héry va'e Barjesus: “Xe ko Nhandejáry nhe'ē-py amombe'u tee va'ety” he'i rei ójehe. Ha Nhandejáry nhe'ē mombe'uga ra'anga anga rei va'e voi upé va'e. Mburuvixa irū voi upé va'e.

⁷ Ha mburuvixa ykōi járy va'e, hi'arandu va'e voi, héry va'e Sérgio Paulo. Nhandejáry nhe'ē ohenduse va'e. Upéa-gwi Barnabé-pe Saulo ndive ohenói ou hagwā omombe'u hagwā Nhandejáry nhe'ē.

⁸ Ha upé va'e anháy arandu-py ojapo va'e, ombojevyse mo'ã imondo-vy inhe'ē. Elimas-py ave ombohéry va'e íxupe grego nhe'ē-py. He'i Elimas mburuvixa-pe:

—Hesu rehewa nhe'ē-rehe ko ani erejeapysaka teĩ. Ani ererovia teĩ Hesupe, he'i mo'ã mburuvixa-pe.

⁹ Upe-ma ramo Nhe'ē Marangatu tee va'e omohynyhëmba-ma ipy'a íxupe Saulo-pe. Paulo-py ave ombohéry va'e íxupe. Áy peteĩ optyta heryrā. Saulo-py ndaheryvéiry. Upéi ohexa katu Elimas-pe Paulo:

¹⁰ —Anháy rerekoha ko nde, he'i íxupe. —Hekoha porā va'e gwive erembojevy jevy meme va'e imondo-vy. Nde apu ereiko-vy va'e. Nde py'a vai va'e ereiko-vy. Tape porā-rupi oho va'e erejoko. Tape vai-rupi ae eremondose mo'ã íxupe kwéry.

¹¹ Ma'erā erejapo upéixa? Ángä ete-ma katu Nhandejáry ne mbohasa asy-ta he'i íxupe. Nande resapysovéi-ma arā. Kwarahy rendy nderehexavéi-ma arā. Are'i voi upéixa ereiko va'erā, he'i Elimas-pe Paulo.

Upe-ma ramo oje'opa-ma hesa. Omohatatímba-ma hesa. Pytumba rei íxupe. Ogwata oheka-vy ipopyhyharā.

¹² Ha mburuvixa he'i: “Anhei nipo ra'e” he'i. Ogwerovia tee voi, ohexa ramo ojehu va'ekwe. Nhandejáry rehewa nhe'ē-rehe opondera eterei-ma oiko-vy.

Paulo omombe'u Nhandejáry nhe'ē Antioquia pygwa-pe

¹³ Ha upéi katu Paulo inhirū gwéry ave osẽ Pafos-gwi oje'ói-vy. Oike jevy kanoagwasu-py oje'ói jevy. Oho kanóa-py ogwahē Perge tetā-my. Perge Panfília yvy-py oĩ. Upe-py João Marcos oheja íxupe kwéry. Ojevy ou-vy Jerusalém tetā-my ou.

¹⁴ Ha'e kwéry ae ohasa oje'ói-vy. Ogwahē outro tetā héry va'e Antioquia-py. Pisidia yvy rembe'y-rehe oĩ. Upe-py pytu'uga áry-py oho judeu porahéi haty-py. Oike ogwapy.

15 Upéi upé pygwa hatã okwatia omonhe'ẽ oĩ-vy ramo, enterove ojeapysaka inhe'ẽ-rehe. Moisés amyrĩ remimombe'ukwe, Nhandejáry nhe'ẽ-py omombe'u va'ety remimombe'ukwe ave omonhe'ẽ nhe'ẽ. Omonhe'ẽmba rire, omanha Barnabé ndive Paulo-rehe gwĩ ojeporahéi haty pygwa ruvixa. Oma'ẽ ramo hese, onhe'ẽ ogweruruka íxupe. He'i:

—Erenhemonhe'ẽse ramo, enhemonhe'ẽ katu ore kwéry-pe, ore re'ýi, he'i Barnabé ndive Paulo-pe.

16 Upe ramo Paulo onhembo'y-ma. Omokirirĩ hagwã omopu'ã opo ojeapysaka porã hagwã inhe'ẽ-rehe. Upéi he'i judeu kwéry-pe:

—Pejeapysaka joa katu, xe re'ýi kwéry, Israel remiarirõre kwéry. Xe re'ýi e'ý va'e gwive ave Nhandejáry pemboete va'e, pejeapysaka porã katu pehendu porã hagwã xe nhe'ẽ.

17 —Nhandejáry ko, nhande re'ýi Járy oiporavo va'ekwe nhane ramói amyrĩ-pe. Entero yvypyöry oĩ va'e gwive ojoavyte-gwi oipe'a va'ekwe nhane ramói amyrĩ-pe. Upe rire oiko oyvy e'ý-my nhane ramói kwéry. Egito yvypy oiko hikwái. Upe-py onhemboe'ýi eterei, ohoasa íxupe-gwi Nhandejáry. Upe rire ogwenohé heraha-vy íxupe kwéry upe yvypy-gwi. Upe pygwa ndoipotáí mo'ã ogweraha. Ha Nhandejáry oresendepa joty heraha-vy. Imbaraete voi Nhandejáry.*

18 Ha upéi katu quarenta ro'y onhangareko hese kwéry heraha-vy tekwaty e'ý-rupi. Nohenduséi ramo jepe inhe'ẽ, onhangareko porã joty hese kwéry.*

19 Gwa'ýry-rami joty ogwereko íxupe kwéry. Ogwahé ramo oyvyrã héry va'e Canaã-py, upé pygwa heta-ma oĩ. Hetæ tâe va'e. Sete ijyvye vye va'e. Gwĩa kwéry-pe ohundipa Nhandejáry. Nhane ramói kwéry-pe ae ogweroike jevy hekovía. Ome'ê ijyvyrã íxupe kwéry, omano ramo hikwái opyta hagwã ta'yrepé.*

20 —Upe rire quatrocentos e cinqüenta ro'y-rupi Nhandejáry ombopyahu ahu nhane ramói kwéry ruvixa. Heta ombopyahu rire omoingo jevy inhe'ẽ-py omombe'u va'ety-pe héry va'e Samuel.*

21 Upe rire ndoipotavéi gwuvixarã yma gware ramigwa hikwái. Mburuvixagwasu ete ramigwa ae oipota. Upéa-gwi Nhandejáry ome'ẽ íxupe kwéry huvixagwasu eterã héry va'e Saul. Túvy ko héry va'e Quis. Tamoigwasu ko héry va'e Benjamim. Upe ramo oiko-ma Saul mburuvixa ramo. Quarenta ro'y rire ae omosẽ íxupe Nhandejáry.*

22 Mburuvixagwasu ramo oikoha-gwi omosẽ imondo-vy. Opyta hekovía Davi huvixagwasurã. Nhandejáry nhe'ẽ-py opyta. Mburuvixa Davi-rehe Nhandejáry onhe'ẽ va'ekwe a-rami: “Ko va'e kwimba'e Jessé ra'y héry va'e Davi xe arovya'íxupe va'e. Xe remimbota gwive ojapopa va'erã” he'i va'ekwe hese, he'i Paulo imombe'u-vy.*

23 Upéi he'i jevy judeu kwéry-pe:

—Ãy katu ogwahé-ma ou-vy Hesu, Davi amyrĩ remiarirõre va'e, Israel remiarirõre voi. Hesu ko Nhandejáry remimbou nhande-vy. Nhane resende hagwã ou, he'i. —Upe he'i hagwe-rami ombou.

24 Ha Hesu ne'írã vyteri onhepyrũ omombe'u mbe'u. Upe ramo oĩ héry va'e João Batista. Onhemonhe'ẽ oiko-vy nhande kwéry va'e-pe: “Peheja katu pene rembiapo vaikwe. Penhemongarai uka katu” he'i nhande-vy João onhemonhe'ẽ-vy.

* **13:17** Ex 12.51 * **13:18** Nm 14.34; Dt 1.31 * **13:19** Dt 7.1; Js 14.1 * **13:20** Jz 2.16; 1 Sm 3.20
* **13:21** 1 Sm 8.5; 10.21 * **13:22** 1 Sm 16.12; Sl 89.20

25 —Upéi mixī vyteri oī hembiaporā. Onhemonhe'ē apy-ma. Upe ramo he'i nhande kwéry-pe: “Ha'e ko Cristo, nhane remiha'arō va'e, ere mo'ā kuri xerehe. Xe ndaha'ei voi upe Cristo” he'i. “Nhane remiha'arō arō va'e ndaha'ei xe. Xe rapykwerigwa ae ou-ta kuri. Heko porāve va'e xéhegwi. Upéa-gwi amboete-gwi íxupe xe atī voi amoirū hagwā íxupe. Ni hembigwái ramo jepe aiko” he'i Hesu-rehe João Batista, he'i Paulo imombe'u-vy.

26 Upéi he'i jevy judeu kwéry-pe:

—Ay katu amombe'u-ta peē-my, xe re'yi kwéry, Abraão remiarirõre kwéry. Nhandejáry-pe pemboete peiko-vy va'e, xe re'yi kwéry e'ŷ va'e-pe, amombe'u-ta ave. Ombou ra'e nhande-vy Nhandejáry ko va'e nhe'ē. Nhane resendeha rehegwa nhe'ē ombou.

27 Ha Jerusalém-my oiko va'e gwive huvixa kwéry ave ndoikwaái íxupe. Oha'arō arō ramo jepe Hesu-pe hikwái, ndoikwaái íxupe ogwahē ramo. Ndoikwaái ave Nhandejáry nhe'ē-py omombe'u va'ety he'i va'ekwe. Upe va'e omonhe'ē meme ojeporahéi haty haty-rupi. Pytu'u tu'uga áry-py omonhe'ē ha ndoikwaáiry voi hikwái. Upéi ogwahē-ma Hesu-rehe yma gware remimombe'ukwe-py. Hesu rehegwarā omoī kватia-rehe va'ekwe-py ogwahē-ma: “Iporā katu jajuka Hesu-pe” he'i jave hese mburuvixa kwéry, ogwahē-ma voi yma gware remimombe'ukwe-py.

28 Ha upéi katu ndikatúi omboja hese ivai va'e. Hembiapo vai e'ŷ reheve ojerure joty voi mburuvixa-pe héry va'e Pilatos ojuka hagwā íxupe.

29 Upéixa ogwahēmba-ma voi yma gware remimombe'ukwe-py. He'i va'ekwe gwive ojapopa-ma voi hese. Ohupi uka kurusugwasu-rehe imoī-vy ojuka hagwā íxupe. Upe rire, omano rire, ombogwejy kurusugwasu-gwi tetekwe omoī hetekwe rendaty-py itakwagwasu-py optya hagwā mo'ā.

30 Ha Nhandejáry katu omoingove jevy íxupe.

31 Are-ma ojehexa uka uka oiko-vy oirūgwe, Galiléia-gwi Jerusalém peve hendive ou va'ekwe-pe. Ay katu upe va'e hexahare va'e omombe'u mbe'u Hesu rekoha nhande kwéry-pe.

32 —Upéixa ramo ore ave oroju kuri ko'a-py oromombe'u hagwā peē-my nhe'ē porā. Hesu ko Nhandejáry remimoingove jevy va'e. Yma ete voi Nhandejáry omombe'u va'ekwe nhane ramoigwasu amyrī kwéry-pe gwembiaporā.

33 Ay katu ogwahēmba-ma hemimombe'ukwe-py. Aygwa-pe hemiarirõ kwéry-pe ojapopa-ma. He'i va'ekwe gwive ojapopa ay. Yma Nhandejáry remimoīgwe va'ekwe kватia-rehe héry va'e Salmo inúmero mokõi va'e. A-rami hemimoīgwe:

“Nde ko xe ra'y tee voi. Ko'ay katu amombe'u-ta enterovéa-pe: Ko va'e xe ra'y tee voi”*

he'i va'ekwe Nhandejáry Hesu oikove jevytamaha va'erā-rehe.

34 Upe rire Nhandejáry omoī uka jevy va'ekwe hese kватia-rehe onhe'ē. A-rami hemimoīgwe:

“Orohovasa va'erā ime'ē-vy nde-vy gwī iporā marangatu va'e gwive ha'e tee va'ekwe ame'ē va'erā va'ekwe Davi-pe”

he'i Nhandejáry. Omotenonde Hesu-rehe omoingove jevytaha, hetekwe ine e'ŷtaha ave.*

35 Upéi Davi omoī jevy va'ekwe hese kватia-rehe onhe'ē. A-rami hemimoīgwe:

“Ndereheja mo'āi teī ijyta-py nde ra'y imarangatu va'e ine hagwā hetekwe”*

* 13:33 Sl 2.7 * 13:34 Is 55.3 * 13:35 Sl 16.10

he'i omoī-vy kwatia-rehe inhe'ē. Kwatia héry va'e Salmo. Upéixa voi Davi he'i va'ekwe Hesu-rehe, Nhandejáry omoingove jevy-tagwi íxupe pono ine hetekwe, he'i Paulo imombe'u-vy.

36 Upéi he'i jevy judeu kwéry-pe:

—Ha myamyrí Davi katu ojapo oiko-vy va'ekwe Nhandejáry remimbo-ta oikove rehewe. Upe rire, ojapopa rire omano va'ekwe. He'ýi kwéry retekwe pa'ú-my omoī va'ekwe itakwagwasu-py. Upéi inemba Davi retekwe. Ojeroaigwepa-ma.

37 Áy katu nainembáiry voi Hesu retekwe. Nhandejáry ae omoingove jevy-ma íxupe. Upéa-gwi nainemba jepéiry hetekwe. Oikove jevy-ma voi Hesu.

38-39 —Upéixa ramo amombe'u-ta peẽ-my, xe re'ýi kwéry, peikwaa porã hagwã. Hesu ko omano rire oikove jevy-gwi, Nhandejáry omboyke-ma pendéhegwi pene rembiapo vaikwe. Pejerovia tee ramo hese, Hesu-rehe, napene mbohasa asy mo'ãiry. Pende reja rei-ta. Ha pejerovia e'ý ramo katu hese, pepyta va'erã pende py'a ky'a rehewe joty. Gwĩa Moisés he'i va'ekwe erehendu ramo jepe, nane mbopy'a potĩ mo'ãi voíte. Nde py'a ky'a joty va'erã, he'i Paulo imombe'u-vy.

Upéi he'i jevy judeu kwéry-pe:

40-41 —Yma ete omoī va'ekwe kwatia-rehe onhe'ē Nhandejáry nhe'ē-py omombe'u va'ety. A-rami hemimoígwe:

“Pejeapysaka katu peẽ Nhandejáry nhe'ē-rehe, penhembohory peiko-vy va'e. Peiko rehewe xe rembiapo porã-ta. Pene rembiexapyrã-rupi ajapo-ta. Ha peẽ katu ndaperoviái arã voi. Onhemombe'u ramo jepe, ndaperovia mo'ãi voíte. Upéa-gwi pepondera rei va'erã peiko-vy Nhandejáry rembiapo-rehe perovia e'ý-vy. Upe rire pemanomba va'erã”* he'i Nhandejáry nhe'ē-py omombe'u va'ety. Upéixa voi omoī va'ekwe kwatia-rehe onhe'ē. Áy katu xáke. Ani pepyrū Nhandejáry nhe'ē-rehe. Ho'a arã pende-rehe myamyrí he'i va'ekwe, he'i Paulo imombe'u-vy judeu kwéry-pe.

“Ore katu orojere-ta pendéhegwi” he'i judeu kwéry-pe Paulo

42 Omombe'upa rire, osẽ oho-vy Paulo Barnabé ndive. Osẽ jave ojerure íxupe ou jevy hagwã:

—Áy pytu'uga óra oiko jevy ramo, eju jevy katu, he'i. —Emombe'u mbe'uve katu ore-vy ko'ã va'e rehewa nhe'ē, he'i íxupe.

43 Ha upéi katu osẽmba oje'ó-vy ojeporahéi haty-gwi. Heta-ma oĩ imoirúháry. Heta judeu omoirū va'e íxupe. Heta judeu reko-rupi oiko va'e omoirū va'e ave. Upe va'e-pe he'i onhemonhe'ē-vy:

—Pende rexakwaa rei-ma kuri Nhandejáry. Tape porã-rupi ereho meme ramo, pende rexakwaa porãve rei-ta vyteri. Upéa-gwi anive ereva teĩ tape porã-gwi, he'i íxupe kwéry.

44 Upéi ogwahé jevy ramo pytu'uga áry, ouparágwe voi hikwái. Ojogweroatyparágwe voi upe tetã mygwa gwive ohendu hagwã Nhandejáry nhe'ē.

45 Ha judeu kwéry katu ohexa ramo ojogweroatypa ramo, upéa mokõigwarehe ndaija'evéi-ma: “Ijapu Paulo” he'i hese. Onhe'ē vai rei hese hikwái.

46 Ha Paulo Barnabé ndive ndaikyhyjéi voi onhe'ē-vy. Nokiriríry voi. Ipy'agwasu voi he'i-vy:

—“Emombe'u ranhe katu judeu kwéry-pe xe nhe'ē” he'i kuri ore-vy Nhandejáry. Ha peẽ katu Nhandejáry nhe'ē pehenduse e'ý va'e. Pembojevy va'e voi. Nhandejáry ndive ndapeikoséi nipo ra'e opa e'ý rehewe. Aipo ramo peikoseha-rami katu peiko katu, he'i íxupe kwéry. —Ore katu orojere-ta

* **13:40-41** Hc 1.5

pendéhegwí. Nhande re'ýi e'ý ha-py oroho-ta Nhandejáry nhe'ẽ oromombe'u hagwã.

⁴⁷ —Upe va'e orojapo va'erã, he'i kuri ore-vy Nhandejáry: “Nde ko xe rembiporavo eremo'arandu hagwã judeu e'ý-pe pytú mygwa-rami rei oiko va'e-pe, arakatu pygwa-rami ae oiko hagwã. Ko yvy apy gwive oiko va'e gwive, emo'arandu katu onheresende hagwã” he'i kuri ore-vy Nhandejáry. Upéixa omoõ uka va'ekwe kwatia-rehe onhe'ẽ Nhandejáry, he'i judeu kwéry-pe Paulo imombe'u-vy.*

⁴⁸ Ohendu ramo inhe'ẽ ov'y'a eterei judeu e'ý kwéry:

—Iporã ete voi Nhandejáry nhe'ẽ, he'i omomba'egwasu-vy íxupe. Gwĩa ojave opa e'ý reheve gwarã voi Nhandejáry oiporavo va'ekwe ogwerovia-ma inhe'ẽ.

⁴⁹ Hesu reroviahha ramo oiko-ma. Opa-rupi ohasa Nhandejáry nhe'ẽ. Entéro upe yvy pygwa gwive ohendupa inhe'ẽ.

⁵⁰ Ha judeu kwéry katu ndojohu porãi upéa nhe'ẽ. Upéa-gwi onhe'ẽ apo eterei mokõi va'e-pe hikwái. Ombopoxy-ma hese hereko-vy gwĩ onhembotuvixa mba'e va'e-pe, Nhandejáry-pe omboete va'e, onhembotuvixa kunha va'e. Upe tetã mygwa ruvixa kwéry-pe ave ombopoxy: “Pemosõ katu imondo-vy Paulo Barnabé ndive” he'i onhe'ẽ apo-vy hese. Ndoipotavéi ojerovia hese. Ogwerovia apu-gwi omosõ imondo-vy íxupe kwéry gwtã-gwi hikwái.

⁵¹ Ha Hesu remimondo mokõi va'e katu ombovava opy ho'apa hagwã yvy ipy-gwi. Upéixa omombe'u enterovéa-pe mburuvixa rembiapo vaikwe.

⁵² Upe rire oho ete. Ha upe pygwa Hesu nhe'ẽ renduha va'e ov'y'a eterei. Omohynyhẽmba oiko-vy ipy'apy íxupe kwéry Nhe'ẽ Marangatu tee va'e.

14

Paulo Barnabé ndive oho Icônio tetã-my

¹ Ha upéi katu Paulo Barnabé ndive oho outro tetã-my. Icônio-py ogwahẽ oho-vy. Upe-py ojehu jevy íxupe Antioquia tetã-my ojehu va'ekwe. Ogwahẽ rire oike judeu porahéi haty-py. Nhandejáry nhe'ẽ omombe'u hagwã oike. Ohendu ramo inhe'ẽ heta eterei ogwerovia va'e. Omombe'u tee rei voi ra'e. Oĩ judeu ogwerovia va'e, oĩ judeu e'ý va'e ogwerovia va'e ave.

² Ha judeu ogwerovia e'ý va'e katu ombopoxy judeu e'ý-pe inhe'ẽ apo-vy Hesu reroviahha-rehe. Onhe'ẽ vai rei Cristo kwéry-rehe. Upéa-gwi upe pygwa ndaija'evéi-ma Cristo kwéry-rehe.

³ Ha Hesu remimondo mokõi va'e are joto opyta upe-py oiko-vy. Ipy'agwasu reheve omombe'u Nhandejáry nhe'ẽ oiko-vy. Nhandejáry-rehe ojerovia-gwi ndaikyhyjéiry voi: “Nhandejáry ko nhande rexakwaa rei va'e” he'i ikyhyje e'ý reheve. Ha Nhandejáry oipytygwõ voi íxupe. Nhandejáry nhe'ẽ-py hembiapo porã hexapyrã-rupi. Inhe'ẽ-py nhane rembiexa e'ý va'e ojapo. Upéa-gwi:

—Anhetegwa nipo ra'e inhe'ẽ, he'i upe pygwa.

⁴ Ha upe tetã mygwa napeteixairy ipy'a kwéry. Ipy'a ambue mbue voi hikwái. Oĩ judeu-pe omoirû va'e, oĩ Hesu remimondo-pe omoirû va'e ave. Napeteixairy omoirû va'e.

⁵ Upéi ogwereko asy-ta mo'ã Hesu remimondo-pe judeu e'ý kwéry. Judeu kwéry huvixa kwéry ndive ogwereko asy-ta mo'ã íxupe ave. Ojapi-ta mo'ã íxupe ita-py ojuka hagwã.

* **13:47** Is 42.6; 49.6

6 Upe-ma ramo oikwaa-ma ojehegwa. Osẽmba oho-vy. Outro tetã-my okanhy oho-vy íxugwi. Licaõnia yvy-py oho. Upe-py Listra tetã-my, Derbe tetã-my ave oho. Tetã jerekwe-rupi oho ave.

7 Upe-py omombe'u mbe'u oho-vy Hesu rehewa nhe'ẽ porã.

Paulo ombogwera ogwata e'ŷ va'e-pe

8 Ha upéi katu ogwahẽ oho-vy Listra tetã-my. Upe-py oĩ kwimba'e ogwapy oĩ-vy va'e, ndogwatái va'e. Imitã gwive voi ndogwatái va'e. Ogwata e'ŷ tuja va'e voi.

9 Onhe'ẽ ramo Paulo, ojeapysaka inhe'ẽ-rehe. Upe jave oma'ẽ porã ogwata e'ŷ va'e-rehe: "Ko va'e ojerovia porã-ma Nhandejáry-rehe okwera hagwã" he'i ojéupe.

10 Upe ramo:

—Enhemb'o'y katu, he'i íxupe onhe'ẽ hatã-vy.

Inhe'ẽ-py opo voi. Opu'ã-ma, ogwata-ma voi.

11 Ha upe pygwa ohexa joa ramo Paulo rembiapo:

—Ogwejy-ma ra'e tupã, he'i. —Heko-py ndoúi. Nhande rete-rami rei ae ogwejy ou-vy, he'i mo'ã onhe'ẽ hatã-vy. Upe tetã mygwa nhe'ẽ-py onhe'ẽ va'e.

12 Ha Barnabé-pe ombohéry hikwái Júpiter-py. Ha Paulo-pe katu ombohéry Mercúrio-py. Upéixa ombohéry Paulo-pe heta inhe'ẽ ogwereco-gwi.

13 Ha upéi katu ogwahẽ ou-vy tupã héry va'e Júpiter rembigwái, ipa'i va'e. Upe tetã renonde-py oĩ Júpiter róga kakwaa va'e. Upe-gwi ogweru vaka. Tetã rokẽ-my ogweru. Onhemboyvotypa rehewe ogweru. Omoka'ẽ-ta mo'ã hereko-vy omboete hagwã Barnabé ndive Paulo-pe ave. Upe pygwa ndive omoka'ẽ-ta mo'ã imboete-vy:

—Upe va'e, mokõive va'e tupã, he'i mo'ã hese.

14 Upe va'e ohendu ramo, Hesu remimondo, mokõi va'e, onhemondýi. Omondoro ndoropa okamisa py'a. Kente mbyte-rupi oripara oho-vy. Onhe'ẽ hatã oje'óí-vy:

15 —Ani pejapo teĩ upéixa, ore rapixa kwéry, he'i Paulo íxupe kwéry. —Ore ko ndaha'ei teĩ tupã. Teko rei ae ore, he'i. —Peẽ ramigwa katu ave ore, he'i Paulo Barnabé ndive onhe'ẽ hatã-vy íxupe kwéry. —A-rami pejapo ramo, pejapo rei-ta. Ha oromombe'u-ta pee-my nhe'ẽ porã heru-vy. Pene rembiapo rei va'ekwe rekoviá, perova katu pende rekoha Nhandejáry-rehe, he'i íxupe kwéry. —Nhandejáry ko oikove va'e. Ha'e áry apohare, yvy apohare ave, ygwasu apohare ave. Entéro mba'e apohare voi ko Nhandejáry, he'i íxupe kwéry.

16 —Entéro myamyrí yma gware-pe gwive oheja oiko rei araka'e Nhandejáry. Áry porukwe-py rei oiko araka'e.

17 Ha nhande kwéry-pe katu hembiapo porã porã-ma oiko-vy. Omongy nhande-vy, ombohi'a porã hi'óra-py. Nhane mohygwyatãmba Nhandejáry. Nhane mbopy'a rory ave. Upéixa voi Nhandejáry ohexa uka va'ekwe nhande kwéry-pe nhande rayhuha, he'i omombe'u-vy Paulo.

18 Upéixa onhe'ẽ ramo jepe, omoka'ẽse joty imboete-vy íxupe hikwái. Hasy-py ojoko íxupe kwéry.

19 Ha upéi katu ogwahẽ ou-vy judeu kwéry. Antioquia pygwa ou, Icônio pygwa ou ave. Ogwahẽ rire, onhe'ẽ apo Paulo-pe hikwái. Ombopoxy uka upe pygwa hese. Upe ramo ojapi japi ita-py íxupe hereko-vy ojuka hagwã mo'ã. Upéi: "Omano-ma" he'i mo'ã hese hikwái. Upéa-gwi ombotyryry heraha-vy íxupe. Tetã pa'ũ-gwi ogwenohẽ heraha-vy.

²⁰ Upéi ogwahẽmba Hesu nhe'ẽ renduha ogweroajere íxupe. Oma'ẽ ma'ẽ ójehe jave, opu'ã jevy-ma. Oike jevy upéa tetã-my. Iko'ẽ-my ohasave oho-vy outro tetã-my. Barnabé ndive oho. Derbe-py ogwahẽ oho-vy.

²¹ Upéa tetã mygwa-pe omombe'u Hesu rehewa nhe'ẽ porã. Ohendu-gwi inhe'ẽ, heta-ma oiko Hesu rehewa nhe'ẽ renduharã.

Paulo Barnabé ndive ojevy jevy ou-vy gwekwa-py

Upe rire ojevy jevy ou-vy Paulo Barnabé ndive. Ogwahẽ jevy Listra tetã-my. Icônio tetã-my ogwahẽ jevy ave. Antioquia Pisídia yvy jave oĩ va'e-py ogwahẽ jevy ave ou-vy.

²² Upe tetã tetã-rupi onhemonhe'ẽ jevy Hesu rehewa nhe'ẽ renduha-pe:

—Peiko meme katu tape porã-rupi. Ani pejere teĩ Hesu rekoha-gwi. Nhan-dejáry nhande ruvixa oiko haty-py nhagwahẽ peve, heta jajererekasy va'erã. Nhagwahẽ-ma rire ae ndajahasa asy mo'ãvái-ma, he'i Paulo Barnabé ndive onhemonhe'ẽ-vy.

²³ Upéi Hesu reroviaha onhomboaty aty ha-rupi oiporavo onhopa'ũ-gwi. Herekwárā kwarã oiporavo onhangareko hagwã hese kwéry. Okaru e'ŷ reheve, heta ombojeupi Nhandejáry-pe onhe'ẽ. Upe rire he'i íxupe kwéry:

—Ãy Nhandejáry-rehe pejerovia va'e. Tonhangareko katu Nhandejáry peteĩ teĩ va'e-rehe pende-rehe kwéry, he'i íxupe kwéry Paulo Barnabé ndive.

²⁴ Ha upéi katu ohasa jevy ou-vy Pisídia yvy-rupi. Ogwahẽ ou-vy Panfília yvy-py.

²⁵ Nhandejáry nhe'ẽ omombe'u rire Perge tetã-my, ou jevy-ma Atália tetã-my.

²⁶ Upe-py ogwejy jevy onhemboyrú kanoagwasu-py ou hagwã. Y-rupima ou. Antioquia tetã-my jevy ogwahẽ ou-vy. Hemimondo mokõi va'e ogwahẽ jevy-ma ou-vy. Are-ma he'i va'ekwe íxupe upe pygwa oho hagwã: “Nhan-dejáry ko nhande rovasa va'e nhande rexakwaa rei-vy. Tande rovasa katu ne rembiaporã erejapo porã hagwã” he'i va'ekwe íxupe imondo-vy. Ãy ojapopa rire ogwahẽ jevy-ma ou-vy.

²⁷ Upe-py ogwahẽ ramo, ombojogweroatypa Hesu reroviaha gwive. Ombo-boaty omombe'upa hagwã gwembiapokwe. Nhandejáry oipytygwôha íxupe omombe'u:

—Ãy ogwerovia-ma judeu e'ŷ kwéry ave Nhandejáry nhe'ẽ. Ogwerovia uka-gwi íxupe Nhandejáry, ogwerovia-ma, he'i omombe'u-vy.

²⁸ Upe-py are-ma optya. Hesu nhe'ẽ renduha ndive optya.

15

“Naiporãi nhanhemonhe'ẽ hatã hatã judeu e'ŷ kwéry-pe” he'i Hesu reroviaha rerekwa

¹ Ha upéi katu ogwahẽ ou-vy, Judéia yvy-gwi ou va'e. Ombo'e mbo'e oiko-vy Hesu reroviaha-pe:

—Iporã katu erenhepirekytĩ uka upe Moisés amyrã he'i hagwe-rupi. Neren-hepirekytĩ ukái ramo, nane resende mo'ãi Nhandejáry, he'i mo'ã imbo'e-vy.

² Ohendu ramo inhe'ẽ Paulo Barnabé ndive:

—Ndaha'éiry upéixa, he'i.

—Upéixa voínte nhande reko, he'i Paulo-pe onhe'ẽ mbojevy jevy-vy.

—Ndaupéixairy, he'iri iri onhonhe'ẽ mbojevy jevy-vy.

Omombe'u joavy avy-gwi, he'i ojóupe:

—Nhamondo katu Paulo Barnabé ndive. A pygwa ave nhamondo Jerusalém tetã-my jaikwaa porãve hagwã, he'i. —Upe-py oĩ Hesu remimondo,

Hesu reroviahha rerekwa ave. Nhamondo katu upe-py, “Iporã-ta pa judeu e'ŷ kwéry onhepirekytĩ uka, tapa naiporãi” oporandu hagwã, he'i.

³ Upéa-gwi omundo íxupe Hesu reroviahha upe-py oĩ va'e. Upéi oho. Ohasa oho-vy Fenícia yvy-rupi, Samaria yvy-rupi ave:

—Gwĩ judeu e'ŷ kwéry ko ogwerova-ma gwekoha Nhandejáry-rehe, he'i omombe'u mbe'u oiko-vy.

Upéa omombe'u ramo, ombovy'a eterei entéro Hesu reroviahha gwive.

⁴ Ogwahẽ ramo Jerusalém-my ogwerohory íxupe Hesu reroviahha, herekwa kwéry ave, Hesu remimondo ave. Nhandejáry ojapo uka uka íxupe va'ekwe omombe'upa íxupe kwéry.

⁵ Ha oĩ ave Hesu reroviahha, fariseu kwéry moirũhaty. Mokõi va'e reko-rupi oikose va'e. Ohendu ramo Paulo nhe'ẽ, onhembo'y-ma inhe'ẽ mbojevy hagwã:

—Tonhepirekytĩ uka voi katu judeu e'ŷ kwéry. Tohendu katu ave myamyrĩ Moisés he'i va'ekwe nhande rekorã, he'i mo'ã imombe'u-vy.

⁶ Upéixa-gwi ojogweroaty onhomoneta-vy Hesu remimondo, Hesu reroviahha rerekwa ave. Ojogweroaty ojohu hagwã mbava'e tipo Nhandejáry oipota jajapo jaiko porã hagwã.

⁷ Heta omombe'u joavy avy rire, opu'ã-ma oĩ-vy Pedro. He'i Hesu reroviahha kwéry-pe omombe'u-vy:

—Are-ma voi xe poravo va'ekwe pene pa'ũ-gwi Nhandejáry, xe re'ýi kwéry. Xe poravo va'ekwe amombe'u hagwã Hesu rehewa nhe'ẽ porã. Xe nhe'ẽ ohendu ramo, judeu e'ŷ kwéry ogwerovia hagwã hikwái, xe poravo.

⁸ Ha Nhandejáry nhande py'a pygwa va'e rexaha voi. Judeu e'ŷ kwéry ogwerovia tee ramo, ojohu porã. Upéa-gwi nhande py'a omohynyhẽmba hagwe-rami ipy'a omohynyhẽmba ave íxupe kwéry. Ome'ẽ íxupe kwéry ave Nhe'ẽ Marangatu tee va'e ipy'apyhyharã íxupe.

⁹ Peteíxa ogwereco va'ekwe enterove va'e gwive imopotĩ-vy. Nhande py'a mopotĩ hagwe-rami, omopotĩ ave judeu e'ŷ kwéry py'a ogwerovia-gwi íxupe.

¹⁰ —Ma'erã peje íxupe kwéry ojapo hagwã Nhandejáry remimbota e'ŷ? Ma'erã pembopoxy-ta teĩ Nhandejáry-pe? Judeu reko-rupi jaiko ramo, ipohýi va'e oatúa-rehe ogwerahaha-rami jaiko. Upe va'e reko-rupi ndikatúi jaiko. Nhane ramói amyrĩ ave ndikatúi oiko araka'e upéa reko-rupi. Ñy katu ma'erã penhemonhe'ẽ hatã hatã íxupe kwéry oiko hagwã judeu reko-rupi? Ani pejapo teĩ upéixa. Judeu reko-rupi anho ngatu rei peiko meme ramo jepe, napene resende mo'ãi joty Nhandejáry.

¹¹ Jajerovia-ma ramo ae Nhandejáry Hesu-rehe, nhane resende-ta. Nhane resendese-gwi, nhane resende-ta. Nhane resendeha-rami ave, oresende-ta judeu e'ŷ va'e-pe, he'i Hesu reroviahha kwéry-pe Pedro imombe'u-vy.

¹² Onhe'ẽ rire okiririmba hikwái. Upéi Paulo, Barnabé ndive omombe'upa Nhandejáry ojapo uka uka va'ekwe íxupe. Omombe'u hexapyrã-rupi ojapo uka va'ekwe. Judeu e'ŷ remiexarã ojapo uka va'ekwe omombe'upa:

—Nhandejáry rembiapo porã-rehe oponderapa joa hikwái ojohu porã-vy, he'i omombe'u-vy.

Omombe'u javé, ndoikwaái onhe'ẽ mbojevy hagwã.

¹³ Omombe'upa rire, onhe'ẽ-ma Hesu reroviahha rerekwa héry va'e Tiago:

—Pejeapysaka porã xe-rehe, xe re'ýi kwéry.

¹⁴ Simão Pedro ko omombe'upa kuri nhande-vy judeu e'ŷ kwéry rehewa nhe'ẽ: “Yma Nhandejáry ndohovasái va'ekwe íxupe kwéry, judeu kwéry-rami. Upe rire ae ohovasa va'ekwe íxupe kwéry. Oipe'a va'ekwe onhopa'ũ-gwi hese ojerovia va'e gwe'yirã” he'i nhande-vy Pedro omombe'u-vy.

¹⁵ Yma ete Nhandejáry nhe'ẽ-py omombe'u va'ety omoĩ va'ekwe kwaitia-rehe onhe'ẽ. Yma hemimoõgwe-rami kwaitia-rehe ãy katu onhe'ẽ Pedro. Ijoja inhe'ẽ. No'ã-rami hemimoõgwe:

¹⁶ "Heta mba'e ojehu va'ekwe myamyrĩ Davi ra'yre-pe. Heta mba'e ojehu ramo íxupe, ndopytavéi mburuvixa ramo. Upéi he'i Nhandejáry: Ánga ete-ma ae aheja jevy-ta Davi remiarirõre-pe mburuvixagwasurã.

¹⁷ Aheja jevy-ta xe reka reka hagwã entéro yvypóry kente kwéry gwive. Xe reka-ta xe moirũ hagwã. Judeu e'ŷ kwéry, xe re'yirã gwive xe reka-ta gwuvixarã, he'i.

¹⁸ Yma gwive ãy peve aikwaa uka peẽ-my ko va'e nhe'ẽ, he'i Nhandejáry** he'i Tiago imombe'u-vy. Upéi omombe'u jevy upe Hesu rereviahia rerekwa:
—Upéixa hemimoõgwe kwaitia-rehe. Upéixa voi judeu e'ŷ kwéry katu Nhandejáry re'ýi ave.

¹⁹ Upéa-gwi ha'e-ta peẽ-my: Xe-vy naiporãi nhanhemonhe'ẽ hatã hatã judeu e'ŷ kwéry-pe. Ogwerova ramo gwekoha Nhandejáry-rehe naiporãi nhamoakãrasy íxupe kwéry. “Entéro Moisés he'i va'ekwe gwive ejapo katu” naiporãi ja'e íxupe.

²⁰ Nhamondo katu íxupe kwéry nhande kwaitia nhe'ẽ no'ã-rami: “Ani penhemongy'a teĩ pe'u-vy upe tembi'u tupã ra'anga rovagwy-py onhemoĩ va'e hemi'urã. Pemenda e'ŷ rehev, ani ae peiko rei onhondive. Ani pe'u teĩ ijukavy ohumbiri va'ekwe. Ani pe'u teĩ so'o rugwykwe.” Ko va'e nhe'ẽ mante nhamondo íxupe kwéry. Ko va'e nhe'ẽ ojapo va'e judeu kwéry.*

²¹ Yma gwive ãy peve oiko enterove tetã-my meme myamyrĩ Moisés he'i va'ekwe mombe'aha. Pytu'u tu'uha áry-py meme omonhe'ẽ nhe'ẽ he'i va'ekwe. Judeu kwéry porahéi haty haty-rupi omonhe'ẽ. Oĩ joty judeu reko-py oiko va'e. Upéa-gwi naiporãi nhambopoxy rei íxupe kwéry, he'i onhemonhe'ẽ-vy Tiago.

Upéixa onhonhe'ẽ mbojevy jevy rire, onhonhe'ẽ mbohory jevy oiko-vy.

Hesu rereviahia rerekwa kwéry omondo onhe'ẽ kwaitia-rehe entéro Hesu rereviahia-pe gwive

²² Ohendu ramo inhe'ẽ, ogwerovy'a hikwái. Upéa-gwi he'i Hesu remimondo, Hesu rereviahia gwive ave, herekwa kwéry ave:

—Nhane pa'ũ-gwi jaiporavo katu nhane remimondorã. Antioquia tetã-my nhamondo katu. Paulo Barnabé ave nhamondo katu inhirürã, he'i ojóupe hikwái.

Ko va'e nhe'ẽ ojohu porã hikwái. Upéa-gwi mokõi omundo. Judas ombohéry va'e Barsabás Silas ndive omundo. Ko mokõi Hesu rereviahia rerekwa va'e.

²³ Upe oho jave voi ogweraha uka ipo-py íxupe kwéry kwaitia nhe'ẽ. No'ã-rami he'i hembieraha va'e kwaitia nhe'ẽ. “Ore kwéry, Hesu remimondo va'e, Hesu rereviahia rerekwa va'e, pende re'ýi ave oromondo-ta ore nhe'ẽ peẽ-my, Hesu rereviahia va'e, judeu e'ŷ va'e, Antioquia tetã mygwa va'e, Síria yvy pygwa va'e, Cilícia yvy pygwa va'e ave. Peẽ kwéry va'e-pe oromondo-ta ore kwaitia nhe'ẽ. Mba'éixa tipo peiko? Peiko porã pa?

²⁴ “Pene moakãrasy jeko ra'e ko'a gwigwa. Omombe'u ambue ramo peẽ-my pene moakãrasy. Oromombe'u uka e'ŷ rehev, omombe'u.

²⁵ Upéa-gwi orojogweroaty rire oro'e: Iporã katu jaiporavo nhane remimondorã, oro'e. Hendive oho-ta Barnabé Paulo ave, nhane rembiayhu va'e, naimytu'e'ŷ etéiry ójehe va'e.

* 15:18 Am 9.11-12 * 15:20 Ex 34.15-17; Lv 18.6-23; 17.10-16

²⁶ Hapixa kwéry ojukase ramo jepe íxupe, ha'e ojapo joty va'e Nhandejáry Hesu Cristo remimbota, oro'e kuri orejéupe Barnabé ndive Paulo-rehe.

²⁷ Upéa-gwi oromondo-ta Judas Silas ndive omombe'u hagwā ore remi-moīgwe kватia-rehe, peikwaapa porā hagwā omombe'u va'e.

²⁸ Ha oro'e, Íxupe kwéry katu naiporāiry nhanhemonhe'ē hatā hatā, oro'e kuri orejéupe pende-rehe kwéry. Tekoha porā ae nhamombe'u va'erā kватia nhe'ē-rupi Íxupe kwéry, oro'e kuri pende-rehe kwéry. Koixagwa nhe'ē ojohu porā ave Nhe'ē Marangatu tee va'e.

²⁹ Upéa-gwi ani penhemongy'a teĩ pe'u-vy tembi'u tupā ra'anga rovagwy-py onhemoī va'ekwe. Ani pe'u teĩ so'o hugwy reheve. Ani pe'u teĩ ijuka-vy ohumbiri va'ekwe. Pemenda e'ŷ reheve, ani ae peiko rei onhondive. Upéa ndapejapói ramo peiko porā va'erā. Nhandejáry tapende rovasa katu. Opa-ma oronhe'ēmba."

Upéixa voi omoī kватia-rehe onhe'ē omondo va'erā.

Hesu reroviaha gwive ogwerovy'a kватia nhe'ē

³⁰ Ha upéi katu hemimondo osē oho-vy. Antioquia tetā-my ogwahē oho-vy. Upe-py ogwahē ramo, ombojogweroatypa Hesu reroviaha gwive. Omboaty ome'ē hagwā Hesu reroviaha-pe upéa kватia nhe'ē.

³¹ Omonhe'ēmba rire, upe pygwa ogwerovy'a eterei inhe'ē hikwái:

—Onhemonhe'ē porā nipo ra'e, he'i ojóupe.

³² Upéi Judas Silas ndive Nhandejáry nhe'ē-py omombe'u va'ety, heta-ma onhe'ē onhemonhe'ē-vy:

—Eiko meme katu tape porā-rupi, he'i Hesu reroviaha-pe.

³³ Upe-py are-ma optya. Upe rire:

—Oroho jevy-tama ore mbouhare ha-py, he'i Hesu reroviaha-pe.

—Néi, tapeho porā katu Nhandejáry ndive, he'i Íxupe.

³⁴ Ha Silas katu ndohóiry. Optya joty upe-py.

³⁵ Ha Paulo Barnabé ndive optya upe-py ombo'e mbo'e-vy. Nhandejáry nhe'ē omombe'u oī-vy. Heta-ma omoirū Íxupe ave Nhandejáry nhe'ē omombe'u-vy.

Paulo oiporavo Silas-pe omoirū hagwā Íxupe

Heta omombe'u Nhandejáry nhe'ē Paulo Barnabé ndive oiko-vy.

³⁶ Upe rire he'i Barnabé-pe Paulo:

—Jaha jahexa jevy Nhandejáry nhe'ē nhamombe'u mbe'u hagwe-rupi. Tetā tetā-rupi jaha, he'i. —Jaha jaikwaa hagwā mba'éixa pa oiko Hesu reroviaha, he'i Íxupe Paulo.

³⁷ —Jaraha katu nhane ndive João Marcos, he'i Íxupe Barnabé.

³⁸ —Naiporāi jaraha Íxupe, he'i. —Nhande reja-ma va'ekwe oho-vy upe va'e. Panfilia yvy-py nhande reja va'ekwe oho-vy. Nanhane moirūvēiry, jaha ramo nhamombe'u Nhandejáry nhe'ē. Naiporāvēi-ma jaraha Íxupe, he'i Íxupe Paulo.*

³⁹ Upéixa ramo mokōive va'e onhonhe'ē mbojevy jevy hikwái. Ndaijoja etéiry voi inhe'ē kwéry. Upéa-gwi ojoheja-ma. Barnabé oho, Marcos rerahaha ramo oho. Onhemboyrū kanoagwasu-py oho hagwā Chipre ykōi-my.

⁴⁰ Ha Paulo katu oiporavo Silas-pe omoirū hagwā Íxupe:

—Nhandejáry ko nhande rexakwaa rei va'e. Tande rovasa katu, he'i Íxupe imondo-vy Hesu reroviaha.

⁴¹ Upe rire osē oho-vy. Síria yvy-rupi, Cilícia yvy-rupi ave oho onhemonhe'ē-vy:

* 15:38 At 13.13

—Ani erejere teĩ Hesu rekoha-gwi, he'i Hesu reroviaha-pe onhomboaty aty ha-rupi.

16

Heta oinupã rire, omoĩ preso Paulo-pe Silas ndive

¹ Upéixa ramo Paulo Silas ndive ogwahẽ oho-vy Derbe tetã-my. Listra tetã-my ogwahẽ ave oho-vy. Upe-py oiko Hesu rehewa nhe'ẽ renduha, héry va'e Timóteo. Isy judeu va'e voi, Hesu reroviaha va'e. Ha túvy katu ndaha'ei judeu va'e. Grego kwéry va'e ae ha'e.

² “Timóteo ko hekoha porã va'e” he'i hese upe pygwa Hesu reroviaha va'e. Imandu'a porã hese.

³ Upéa-gwi Paulo oipota omoirũ íxupe. Ha heta oĩ upe-py judeu kwéry: “Timóteo ru ndaha'ei judeu va'e. Grego kwéry va'e ae ha'e” he'i hese hikwái. Upéa-gwi Paulo oho ojapo judeu remimbota. Ogweraha oipirekytĩ hagwã íxupe judeu kwéry-rami. Hekoha-rami ojapo íxupe pono ipoxy hikwái.

⁴ Upéi omoirũ íxupe, oho upe tetã tetã-rupi. Hesu reroviaha onhomboaty aty ha-rupi oho. Omombe'u mbe'u oho-vy hembiaporã. Hesu remimondo he'i va'ekwe, Hesu reroviaha rerekwa va'e, Jerusalém pygwa va'e he'i va'ekwe ave, ombojoja rire inhe'ẽ hikwái, kwatia-rehe omoĩ va'ekwe, omombe'u.

⁵ Hembiaporã omombe'u. Upéixa-gwi ojerovia porãve rãve Nhandejáry Hesu-rehe hikwái. Onhembohetave tave oho-vy Hesu reroviaha kwéry.

⁶ Ha upéi katu Paulo inhirũ ndive ohasa hasa oiko-vy Frígia yvy-rupi. Galácia yvy-rupi ave ohasa. Ogwahẽ ramo Ásia yvy-py nomombe'u ukáí íxupe: “Ani eremombe'u teĩ Ásia pygwa-pe Nhandejáry nhe'ẽ ani eremombe'u” he'i íxupe Nhe'ẽ Marangatu tee va'e.

⁷ Upéi ogwahẽ ramo Mísia yvy rovái, oho-ta mo'ã Bitínia yvy-py. Ha ndohejáí oho Hesu Nhe'ẽ Marangatu.

⁸ Upéixa ramo Mísia yvy yke-rehe ohasa rei oho-vy. Ohasa rire ogwahẽ oho-vy Trôade tetã-my.

⁹ Ha upéi katu pyhare ojehexa uka sapy'a Paulo-pe. Ixupéte ojehexa uka Macedônia pygwa. Onhembo'y ramo ohexa. Onhe'ẽ ramo ohendu:

—Eju katu y rovái. Eju katu. Xe yvy héry va'e Macedônia-py eju katu ore pytygwõ hagwã, he'i ojapura-vy.

¹⁰ Ojehexa uka rire-ma orohasase oroho-vy Macedônia yvy-py. Upe-py Trôade tetã-my xe Lucas amoirũ-ma íxupe. Ha upéi katu:

—Nhandejáry ko nhane renói kuri nhamombe'u hagwã Macedônia pygwa-pe, Hesu rehewa nhe'ẽ porã, oro'e ojóupe.

¹¹ Upéa-gwi oronhemboyrú kanoagwasu-py y-rupi oroho hagwã. Oroheja Trôade tetã oroho-vy. Oroho pya'e a'e Samotrácia ykõi-my. Iko'ẽ-my orohasa jevy yvy yke-rehe. Orohasa orogwahẽ Neápolis tetã-my. Upe-py yvy ete-py orosẽ kanóa-gwi.

¹² Upe-gwi yvy-rupi oroho jevy orogwahẽ Filipes tetã-my, Macedônia yvy-py oĩ va'e-py orogwahẽ. Ha Filipes tetã tuvixa. Ndaipóri upe tetã jerekwe-rehe íxugwi tuvixave va'e. Yma Roma pygwa onhemomba'e hese va'ekwe. Ha upéi katu orogwahẽ ramo upe-py, are oropyta.

¹³ Upéi pytu'uha áry-py orosẽ tetã rokẽ-rupi. Ysyry rembe-py oroho: “Upe-py oime ra'e jajapo oraçao haty” oro'e orejéupe. Upéa-gwi oroho upe-py orogwapy. Oronhe'ẽ kunha kwéry-pe, ojogweroaty okwa va'e-pe.

¹⁴ Ore nhe'ẽ ohendu va'e apyte-py oĩ kunha héry va'e Lídia, Tiatira tetã mygwa. Upe kunha aorã pytã porã va'e vendeha. Nhandejáry-pe omboeteha

ave. Ha upéi katu Paulo onhe'ẽ ramo, Nhandejáry oikwaa uka íxupe Paulo nhe'ẽ ohendu porã hagwã.

¹⁵ Ohendu rire, oromongarai íxupe. Hóga pygwa oromongarai ave. Upe jave:

—Peju katu peiko xe róga-py. Peikwaa ramo xe ajerovia teeha Nhandejáry-rehe, peju katu, he'iri iri ore-vy. Upe-ma ramo oroho. Oipota hagwe-rami oroho.

¹⁶ Upéi ore oroho jave jajapo oração haty-py, ore rogowaití hembigwái kunhataí. Upe kunhataí anháy rerekoha. Upe anháy arandu-rupi oikwaa-ma oikotaha. Oikwaa va'e oikwaa uka imombe'u-vy. Omombe'u ramo, heta ome'ẽ ijáry-pe ohendu va'e. Ogana porã ijáry.

¹⁷ Upe kunhataí oho Paulo rapykwéri. Ore rapykwéri oho ave. Hatã onhe'ẽ oho-vy:

—Kóa kwimba'e Tupãgwasu rembigwái omombe'u va'e peẽ-my tape porã Nhandejáry pene resende hagwã, he'i omombe'u-vy.

¹⁸ Ko'ẽmba ēmba oho va'e ore rupive. Upéa-gwi ipoxy íxupe Paulo. Ojeapa hese. He'i anháy-pe:

—Ekwa katu íxugwi. Hesu Cristo réry-py esẽ katu íxugwi, he'i anháy-pe.

Upe-ma ramo anháy osẽ-ma oho-vy íxugwi.

¹⁹ Ha ijáry katu ohexa ramo, he'i:

—Upe kunhataí ko ndoikwaa uka mo'ãvéi-ma oiko-ta va'e nhande-vy, he'i.

—Nome'ẽ mo'ãvéi-ma nhande-vy hemimombe'u repy.

Upéa-gwi oipyhy Paulo-pe Silas ndive oipyhy heraha-vy. Ipotí ha-my ogwer-aha íxupe. Ombotyryry heraha-vy. Ogweraha mburuvixa oĩ ha-py.

²⁰ Ogweraha rire polícia ruvixa renonde-py, he'i:

—Ko va'e kwimba'e ko judeu va'e, he'i. —Ko tetã mygwa kwéry-peombopoxy va'e, he'i hese.

²¹ —Teko ambue omombe'u mbe'u va'e. Ha nhande katu ndaha'ẽi judeu va'e. Romano kwéry va'e ae nhande, he'i. —Upéa-gwi teko ambue va'e nhe'ẽ nanhahendu mo'ãi, he'i mburuvixa-pe hikwái.

²² Ha ojogweroaty va'e gwive ohendu ramo inhe'ẽ, ipoxy íxupe. Oinupãse ave. Ha upéi mburuvixa kwéry oipe'a uka íxugwi ijaõ oinupã uka hagwã yvyra-py.

²³ Heta oinupã rire, omoõ preso:

—Enhangareko porã katu hese pono okanhy, he'i preso-rehe onhangareko va'e-pe.

²⁴ Ohendu rire inhe'ẽ, omoõ koty mbyte-py omoõ. Omoõ yvyra pa'ũ-my ipy pono ogwata.

²⁵ Haimete-ma ramo pyhare pyte Paulo Silas ndive omondo oiko-vy Nhandejáry-pe onhe'ẽ. Oporahéi oiko-vy ave. Ha ijypy-rupi oĩ va'e gwive preso va'e, ohendu oporahéi ramo.

²⁶ Upe-ma ramo hi'apý apý eterei yvy. Oku'e óga rokyta. Pya'e ojepe'a okẽ oĩ va'e gwive. Upéixa-gwi ojei ramo inhapytíha, nonhenhapytíviry preso oĩ va'e gwive.

²⁷ Upe-ma ramo opáy preso-rehe onhangareko va'e. Ohexa okẽ ojepe'a ramo. Ohexa ramo,

—Onhemoõ preso va'e osẽmba ra'e, he'i mo'ã.

Upéa-gwi ohekýi kyse ojekutu hagwã mo'ã.

²⁸ Ha Paulo onhe'ẽ hatã íxupe:

—Ani erejejuka tei. Ore kwéry oroõ vyteri a-py, he'i íxupe.

²⁹ —Perúke tataendy, he'i preso-rehe onhangareko va'e.

Oripara oho-vy oike hagwā koty-py. Ipy'a ryrýi ramo ojeity ha'e kwéry hovagwy-py imboete-vy.

30 Upéi ogwenohē heru-vy koty-gwi:

—Mba'éixa xe aiko-ta, mbo'eháry, Nhandejáry xe resende hagwā, he'i íxupe oporandu-vy preso-rehe onhangareko va'e.

31 —Ejerovia katu Nhandejáry Hesu-rehe. Ne resende-ta. Oresende-ta nde róga pygwa ave, he'i preso-rehe onhangareko va'e-pe hikwái.

32 Upéi omombe'u íxupe, preso-rehe onhangareko va'e-pe Nhandejáry re-hegwa nhe'ë. Hóga pygwa-pe omombe'u ave.

33 Upéixa ramo ogweraha ombojahu preso onhemoï va'ekwe-pe. Oipire joka hagwe-gwi oipe'a hugwy. Upe-ma ramo omongarai íxupe preso-rehe onhangareko va'e-pe, hóga pygwa-pe omongarai ave.

34 Upe rire upe onhemongarai va'e ogwenogwahē heru-vy gwóga-py omongarai íxupe kwéry. Nhandejáry-rehe ojerovia-gwi ov'y'a eterei-ma. Hóga pygwa ov'y'a ave.

35 Ko'ëmba ramo mburuvixa kwéry ombou polícia he'i hagwā: “Tove toho upéa kwimba'e” he'i Paulo-rehe, Silas-rehe ave.

36 Upéi omombe'u Paulo-pe inhe'ëgwe preso-rehe onhangareko va'e:

—“Tove toho upéa kwimba'e” ombou he'i hagwā mburuvixa kwéry. Upéa-gwi esë, he'i. —Tereho katu. Nande rerekö asy mo'âvémavave ãy, he'i íxupe.

37 Ha Paulo katu:

—Ndaha mo'âi, he'i. —Ore ko romano va'e. Nanhainupãi romano va'e nhamonhe'ë e'ë rehev, he'i. —Ha ore nupã kuri enterovéa rovagwy-py hikwái. Ore monhe'ë e'ë rehev, ore-vy oporandu e'ë rehev ore nupã nupã kuri, he'i. Upe rire ore moanha ore mondo koty mbyte-py ore moï hagwā preso. ãy katu ore mosë nhemise ore mondo-vy. Ha ndaha mo'âi. Tou katu mburuvixa ore renohē hagwā, he'i polícia kwéry-pe.

38 Upéi Paulo nhe'ë omombe'u mburuvixa-pe. Ohendu ramo inhe'ë, ikyhyje íxugwi:

—Paulo ko romano va'e nipo ra'e, he'i ojóupe hese.

Upéa-gwi ikyhyje voi.

39 Upéixa-gwi ou iha-py mburuvixa:

—Ore oroporonupã uka-gwi oronhemboasy, he'i íxupe.

Upéi ogwenohē heraha-vy preso oï ha-gwi:

—Iporã katu ereho a-gwi ko tetã-gwi, he'i íxupe mburuvixa.

40 Upéa-gwi osë oho-vy onhemoï preso ha-gwi. Oho Lídia róga-py. Upe-py ohexa Hesu reroviah. Ohexa ramo onhemonhe'ë íxupe kwéry:

—Peiko meme katu tape porã-rupi, he'i Hesu reroviah-pe.

Upe rire osë oho-vy upe-gwi hikwái.

17

Paulo Silas ndive oho Tessalônica tetã-my

1 Ha upéi tetã tetã-rupi ohasa oho-vy Paulo Silas ndive. Ohasa Anfípolis tetã-rupi, Apolônia tetã-rupi ohasa ave hikwái. Ohasa rire, ogwahē oho-vy Tessalônica tetã-my. Upe-py oï judeu oporahéi haty.

2 Tetã tetã-my ogwahē-vy oike ike judeu oporahéi haty haty-rupi. Upéixa ramo ogwahē-ma ramo Tessalônica tetã-my, oike ojeporahéi haty-py. Upe-py mbohapy pytu'uga áry-py onhombo'e mbo'e oikwaa uka porã-vy Nhandejáry rehewa nhe'ë kwatia-rehe oï va'e.

3 He'i íxupe kwéry:

—Yma va'ekwe Nhandejáry omoī uka kwaitia-rehe Hesu rehewarā: “Cristo, Nhandejáry rembiporavo va'e ojerereko asy va'erā. Omano rire, oikove jevy va'erā” he'i kwaitia nhe'ẽ-rupi. Yma Nhandejáry he'i hese va'ekwe-gwi ojehu íxupe. Omano hagwā-ma ou va'ekwe. Ha ko'āngā ha'e-ta peē-my: Ko Hesu xe remimombe'u va'e Cristo voi, Nhandejáry rembiporavo va'e voi, nhane remiha'arō va'e ave, he'i íxupe kwéry Paulo.

⁴ Oĩ ohendu va'e inhe'ẽ. Omoirū mokōive va'e-pe. Heta eterei grego va'e, Nhandejáry mboeteha omoirū ave íxupe. Heta kunha onhemboete va'e omoirū ave íxupe.

⁵ Ha judeu kwéry katu ndaija'ei mokōive-rehe. Silas-rehe, Paulo-rehe ave ndaija'ei hikwái. Oho ojogweroaty oporombopoxy-vy heta ndovaléi va'e. Hekoha vai va'e kwéry, tape-rehe oiko rei va'e kwéry ndive oporombopoxy poxy. Oje'ói ija'e'ŷha reraha-vy. Opoxy rehewe ogwerahapa upe tetā mygwa Jasom róga-py. Ogwenohẽse mo'ã upe Hesu reroviaha róga-gwi mokōive va'e.

⁶ Ha ndotopái Paulo-pe upe-py. Ndotoapái-gwi ombotyryry heraha-vy Jasom-pe hikwái. Hesu reroviaha upe-py oĩ va'e ogweraha ave. Mburuvixa kwéry renonde-py ogweraha. Ogwahẽ rire, omombe'u hesegwa hikwái:

—Ko va'e kwimba'e opa-rupi onhemonhe'ẽ nhe'ẽ oiko-vy va'e enterove va'e ndaijoja porāvēi hagwā. Ou ra'e a-py ave onhemonhe'ẽ-vy.

⁷ Ogwahẽ ramo, omogwahẽ ra'e íxupe kwéry Jasom. Ko kwimba'e nohendúi va'e voi nhande ruvixagwasu nhe'ẽ. No'ã-rami he'i: “César katu ndaha'ei nhande ruvixagwasu tee. Hesu ae nhande ruvixagwasu tee” he'i Paulo kwéry, he'i mo'ã omombe'u-vy.

⁸ Ohendu ramo inhe'ẽ, onhemondýi-ma mburuvixa kwéry. Kente kwéry upe tetā-my oĩ va'e onhemondýi ave. Oipota Paulo oho upe-gwi hikwái.

⁹ Upéixa ramo Jasom-pe indive kwéry-pe ave oheja uka plata hikwái. Oirū kwéry rekoviá oheja plata mburuvixa-pe, Paulo-gwi opoi hagwā imondo-vy. Oheja rire:

—Toho katu, he'i íxupe mburuvixa.
Opoi íxugwi oho hagwā.

¹⁰ Upe-ma ramo Hesu reroviaha kwéry omundo Paulo-pe Silas ndive. Pytū ramo omundo. Outro tetā-my pya'e omundo. Upéixa ramo oho Beréia tetā-my. Ogwahẽ ramo upe-py oike judeu oporahéi haty-py.

¹¹ Ha upe pygwa, Beréia pygwa va'e hi'arandu porā va'e. Ha gwī judeu kwéry Tessalônica pygwa va'e nahi'arandu porāi. Ha Beréia pygwa katu hi'aranduve va'e voi. Ha upéi nainhate'ŷi ohendu hagwā Paulo nhe'ẽ. Ohenduse voi hikwái:

—Anhetegwa para'e, tapa ndaha'éiry anhetegwa, he'i ojóupe.
Upéa-gwi omonhe'ẽri ēri Nhandejáry nhe'ẽ oĩ va'ekwe kwaitia-rehe. Peteĩ teĩ áry-py omonhe'ẽ oikwaa hagwā. Oikwaa rire:

—Anhetegwa voi ra'e Paulo nhe'ẽ, he'i ojóupe.

¹² Upéa-gwi heta oĩ ogwerovia va'e. Ogwerovia ave heta kunha, grego va'e, nhambeteva ave, imandu'a porā hese va'e.

¹³ Heta kwimba'e ogwerovia ave. Ha gwī judeu kwéry Tessalônica pygwa va'e ohendu ramo herakwā osẽ ogwa'ẽ-vy. Beréia tetā-my ogwahẽ ou-vy. Upe-py ombopoxy ojogweroaty va'e-pe:

—Ou-ma Paulo nhane moakārasy-vy, he'i mo'ã. —Perekó asy katu íxupe, he'i oporombopoxy-vy.

¹⁴ Upe-ma ramo Hesu reroviaha omundo pya'e íxupe. Ygwasu-koty omundo. Ha Silas Timóteo ndive ndohói. Opyta upe-py.

¹⁵ Ha Paulo irū ogweraha íxupe. Atenas tetā-my ogweraha íxupe. Ogwahẽ ramo upe-py:

—Pya'e tou xe ha-py Silas Timóteo ndive, he'i oirũ-pe.
Inhe'ẽ ohendu rire, oho jevy. Ojevy-ma oje'oi-vy.

Ipy'a reraha oiko-vy Paulo Atenas tetã-my

¹⁶ Ha upéi Paulo oha'arõ oiko-vy oirũ ou hagwã. Oha'arõ jave heta eterei ohexa tupã ra'anga. Upe pygwa Atenas pygwa va'e gwive nomboetéiry va'e Nhandejáry-pe. Tupã ra'anga anga rei ae omboete va'e hikwái. Upéa ohexa ramo, ipy'areraha oiko-vy Paulo.

¹⁷ Upéa-gwi oike judeu oporahéi haty-py onhombo'e mbo'e hagwã oikwaa uka porã-vy judeu kwéry. Judeu e'ŷ va'e-pe Nhandejáry mboeteha va'e ave onhemonhe'ẽ onhombo'e mbo'e-vy. Ko'ẽmba ēmba onhombo'e ave ipotĩ hamy praça-py ojogweroaty haty-py oĩ va'e ndive.

¹⁸ Ha upe-py ohogwaití íxupe hi'arandu va'e. Gwĩ Epicuro remimombe'u renduha, gwĩ Estóico remimombe'u renduha ave ohogwaití íxupe:

—Upéa ko onhe'ẽ eterei va'e. Mbava'e po omombe'use, oĩ he'i va'e hese.

—Oiméne omombe'u tupã pyahu rehewa, oĩ he'i va'e mo'ã hese. Ohendu hikwái Paulo omombe'u ramo Hesu rehewa. Oikove jevymaha rehewa ave ohendu hikwái. Ohendu ramo:

—Paulo ko omombe'u para'e tupã pyahu rehewa, oĩ he'i va'e hese.

¹⁹ Upe ramo ogwerojeupi heraha-vy íxupe yvyaty-rehe, héry va'e Areópago. Mburuvixa kwéry ojogweroaty haty-py ogwerojeupi heraha-vy. Upéi he'i íxupe:

—Mba'e pyahu-py ore mbo'e ramo ndoroikwaái, he'i.

²⁰ —Ha oroikwaase. Oroikwaa e'ŷ va'e ne remimombe'u. Upéa-gwi emombe'u katu ore-vy erese va'e, he'i íxupe gwĩ hi'arandu va'e.

²¹ Ha Atenas pygwa gwive, outro tetã gwigwa upe-py oiko va'e ave, mba'eve ndojapói va'e. Imba'e pyahu ohendu-ma ramo, omombe'u mbe'u va'e ojóupe. Mba'evete ndojapói.

Paulo omombe'u Nhandejáry nhe'ẽ Atenas tetã mygwa-pe

²² Upéixa ramo Paulo onhembo'y oĩ-vy Areópago yvyaty ári. Atenas tetã mygwa mbyte-py opu'ã oĩ-vy. Onhe'ẽ hagwã onhembo'y:

—Pejeapsaka katu, xe rapixa kwéry, xe nhe'ẽ-rehe. Peẽ ko pemboete eterei va'e ra'e tupã kwéry, he'i Atenas tetã mygwa-pe.

²³ —Ahexa kuri ahasa-vy pene remimboete. Tupã ra'anga apyka ahexa ave ha ndaipóri tupã ra'anga. Apyka anho rei oĩ. Nandi rei oĩ. Tupã ra'anga rekoviá, ahexa imombe'uha rei: “A-py nhambete tupã jaikwaa e'ŷ va'e” he'i ita-rehe ohai va'e. Ha ko'ângá katu amombe'u-ta, kiva'e tupã po upe va'e, xe amombe'u-ta peẽ-my. Pemboete va'e peikwaa e'ŷ rehewe, amombe'u-ta peẽ-my.

²⁴ —Upe va'e Nhandejáry voi. Ha'e ko yvy apohare, ko yvy-py oĩ va'e gwive apohare ave. Ha'e yváy Járy, yvy Járy ave. Teko rei ojapo va'ekwe-py ndoikóiry va'e.

²⁵ Nhane moingopa va'e ae, nhane mopytuhêhare. Opamba'e ome'ẽ va'ety nhande-vy. Upéa-gwi ndikatúi nhaipytygwõ íxupe. Mba'eve-rehe noikotêvéiry nhandéhegwi.*

²⁶ —Yma ete va'ekwe ojapo va'ekwe peteĩ kwimba'e ypy-pe. Íxupe ranhe ojapo va'ekwe. Upe kwimba'e-gwi enterove va'e onhepyrû hagwã. Ojapo oiko hagwã íxugwi entéro yvy-py oĩ va'e gwive oiko hagwã he'ýi he'ýi e'ŷ ave. Oiko e'ŷ jave yvypóry, Nhandejáry omoĩ va'ekwe peteĩ áry peteĩ teĩ oiko hagwã. Nhandejáry omombe'uha áry-py oiko va'ekwe. Upéi peteĩ teĩ-pe omombe'u va'ekwe hekwagwã kwéry.

* **17:25** Is 42:5

²⁷ Oipota va'ekwe jaheka heka íxupe jaikwaa hagwā íxupe, jaiko hagwā hendive. Ha mombyry oiko e'ŷ va'e nhandéhegwi. Peteĩ teĩ va'e-gwi ae hi'agwī oiko.

²⁸ Nhandejáry e'ŷ ramo ndikatúi jaiko, ndikatúi jagwata, nanhande rekoháiry voi. No'ã-rami he'i araka'e pende re'ýi ikwaaháry va'e. Kwatia-rehe omoõ araka'e: "Nhande ko Nhandejáry re'ýi voi" he'i araka'e.

²⁹ —Upéa-gwi naiporāi ja'e: "Nhandejáry ko tupā ra'anga ramigwa, ouro-gwi jajapo va'e". Naiporāi ja'e upéixa hese. Nhandejáry ndaha'éi teko rei rembiapokwe, nhane rembiapokwe. "Kóixa Nhandejáry" he'i mo'ã teko rei tupā ra'anga apo-vy.

³⁰⁻³¹ Ha ndaha'éiry voi upéixa. Yma jaikwaa e'ŷ javé íxupe, Nhandejáry nhande reja rei va'ekwe. Nanhane mbohasa asýiry jajejavý ramo. Ha ko'ângá katu omoõ-ma peteĩ áry. Nhande kwéry nhanhembo'y hagwā Nhandejáry renonde-py peteĩ áry omoõ. Omoõ-ma ave kwimba'e héry va'e Hesu-pe nhane monhe'ẽ hagwā. Hesu ko anhetegwa mante omombe'u va'e. Oikwaa va'e nhane rembiapo vaikwe. Nhane rembiapo vai e'ŷ ramo oikwaa ave. Upéa-gwi omoõ-ma íxupe Nhandejáry nhande rerekohagwā nhane rembiapo apokwe-rehe. Upéa peikwaa hagwā omombe'u nhande kwéry-pe Hesu oikove jevymaha. Omano rire Hesu omoingove jevy íxupe va'ekwe Nhandejáry. Upéixa ramo, omoingove jevy-gwi íxupe, nhande kwéry jaikwaa upe áry-py nhane monhembo'ytaha gwenonconde-py. Upéa-gwi ko'ângá he'i nhande-vy: "Perova katu pende rekoha" he'i Nhandejáry, he'i Paulo omombe'u-vy.

Oĩ omoirū va'e Paulo-pe

³² Jaikove jevyha rehewa nhe'ẽ ohendu ramo hikwái, oĩ onhembohory va'e hese. Oĩ ohendu va'e ave. Ndogwerojojái hendi-vy:

—Ko'ẽ ramo, ko'ẽ mbue ramo eremombe'u jevy ramo ko va'e nhe'ẽ, orohendu jevy-ta, he'i.

³³⁻³⁴ Upe ramo ha'e osẽ imbyte kwéry-gwi. Ha oĩ omoirū va'e íxupe. Ogwerovia inhe'ẽ Dionísio, mburuvixa va'e. Upe va'e inhomboatyhaty outro mburuvixa ndive Areópago yvyaty ári. Ogwerovia ave kunha héry va'e Dâmaris. Oĩ ambue va'e ave ogwerovia va'e.

18

Paulo ogwahē oho-vy Corinto tetã-my

¹ Upe rire Paulo osẽ oho-vy Atenas tetã-gwi. Corinto tetã-my ogwahē oho-vy.

² Upe-py otopa judeu héry va'e Áqüila, Ponto yvy gwigwa. Kwehe ambue ou va'ekwe Itália yvy-gwi. Omosẽ-gwi íxupe, ou. Roma pygwa ruvixagwasu héry va'e Cláudio omosẽ va'ekwe judeu va'e gwive. Roma tetã-gwi omosẽ. Omosẽ ramo, ou upé tetã-gwi Áqüila hembireko ave, héry va'e Priscila. Ha upéi katu Paulo oho ohexa mokõive va'e-pe opyta hóga-py.

³ Upe kwimba'e héry va'e Áqüila hembireko ave ao gwigwa óga apoha ave. Upéa-gwi hendi-vy opyta ijave omoba'apo.

⁴ Pytu'u tu'uga áry-py oike judeu oporahéi haty-py. Oike rire omombe'u mbe'u íxupe kwéry oikwaa uka porâve râve hagwā judeu-pe. Judeu reko-rupi oikose va'e-pe ave oikwaa uka porâve omombe'u-vy:

—Anhetegwa voi ko va'e nhe'ẽ, he'iri iri íxupe kwéry.

⁵ Ha upéi ogwahē ou-vy Silas Timóteo ndive. Macedônia-gwi ou. Ogwahē ramo hikwái, Paulo ndopytu'u-vy voi omombe'u-vy. Omombe'u meme ete voi Nhandejáry nhe'ẽ:

—Hesu ko Cristo voi, Nhandejáry rembiporavopyre voi, nhane remiha'arõ va'e voi. Upéa xe aikwaa voi, he'i judeu kwéry-pe.

⁶ Ha gwí judeu kwéry katu onhe'ẽ mbojevy jevy íxupe. Onhe'ẽ rei rei hese. Upe ramo Paulo omotygwõ tygwõ oao oikwaa uka-vy íxupe kwéry hekoha vaiha. He'i íxupe kwéry:

—Aipota mo'ã kuri perova pende rekoha. Amombe'u-ma peẽ-my pende py'a ky'aha. Ha napehendúi voi xe nhe'ẽ. Upéa-gwi pendejéhegwi voi pemano va'erã. Áy aha-ta pendéhegwi. Judeu e'ŷ va'e-pe ae aha-ta Nhandejáry nhe'ẽ amombe'u-vy, he'i judeu kwéry-pe.

⁷ Ha upéi upe-gwi osẽ oho-vy. Oike óga-py ijáry héry va'e Tício Justo, Nhandejáry mboeteha. Judeu oporahéi haty ypy-py oĩ hóga.

⁸ Ha upéi ojeporahéi va'e ruvixa héry va'e Crispo ojerovia-ma voi Nhandejáry Hesu-rehe. Hóga pygwa ojerovia-ma ave. Ohendu ramo Paulo nhe'ẽ, heta upe tetã mygwa ogwerovia-ma. Onhemongarai uka ave íxupe.

⁹⁻¹⁰ Ha upéi pyhare ramo Paulo ohendu Nhandejáry Hesu nhe'ẽ. Ikepe'ŷ ohendu:

—Heta oĩ ko tetã mygwa xe rerovia va'erã. Upéa-gwi aníke erekhyhyje. Erekirirí e'ŷ reheve ere katu íxupe kwéry. Ndou mo'ãi avave nde rerekoyasyvy. Ne ndive xe aiko voi. Upéa-gwi emombe'u katu xe nhe'ẽ eiko-vy, he'i íxupe Nhandejáry Hesu.

¹¹ Upéixa ramo opyta upe-py peteĩ ro'y. Peteĩ ro'y rire seis jasy jevy opyta. Ombo'e mbo'e Nhandejáry nhe'ẽ omombe'u-vy hendive kwéry opyta ramo.

¹² Ha upéi katu oiko mburuvixa ramo héry va'e Gálio, Acaia yvy pygwa-rehe omanda va'erã. Oiko jave, judeu kwéry onhombo'e mbo'e Paulo-pe oipyhy hagwã hikwái. Upéi oipyhy heraha-vy mburuvixa renonde-py omoĩ hagwã íxupe.

¹³ Ogwahẽ rire, inhe'ẽgwe omombe'u:

—“Ani pemboete teĩ Nhandejáry-pe nhane ramói kwéry he'i hagwe-rami. Ani pejapo teĩ Moisés amyrí remimombe'ukwe” he'i Paulo. Orehendu-ma omombe'u ramo upéa, he'i mo'ã Paulo-rehe omombe'u-vy hikwái.

¹⁴ Ha ha'e katu omombe'use mo'ã mburuvixa-pe anhetegwa va'e. Ne'írã onhepyrũ onhe'ẽ ramo, he'i judeu kwéry-pe mburuvixa:

—Xe ko nahenduséi, judeu kwéry, pene nhe'ẽ. Paulo ojejavy ramo ae, hembiapo vai eterei ramo, ahendu arã pene nhe'ẽ.

¹⁵ Ha Paulo katu nahembiapo vaíry ra'e. Ha peẽ katu hemimombe'ukwe-rehe rei pende poxy. Pende re'ýi he'i va'ekwe katu, pende re'ýi réry, pende re'ýi rekorã-rehe nomombe'u porãiry voi ra'e Paulo. Ambue va'e réry ae omombe'u. Upéa-gwi nipo ra'e pende poxy ra'e hese. Xe nahendu mo'ãi pene nhe'ẽ. Anive Peru xe-vy a ramigwa nhe'ẽ. Iporã para'e pende re'ýi he'i va'ekwe, tapa naiporãi. Ndaikwaáiry xe. Upéa nhe'ẽ peẽ-my gwarã. Aipo ramo peẽ katu pepena ae katu hese peiko-vy. Xe katu napena mo'ãi voi pende re'ýi he'i va'ekwe-rehe, he'i íxupe kwéry mburuvixa.

¹⁶ Upéi henonde-gwi omosẽ imondo-vy íxupe kwéry ombopoxy-vy.

¹⁷ Upe ramo onhembopoxy va'e oipyhy judeu ruvixa-pe. Gwí judeu oporahéi haty va'e ruvixa héry va'e Sóstenes-pe oipyhy. Oinupã nupã íxupe hikwái. Mburuvixa renonde-py oinupã íxupe. Ha mburuvixa katu ohexa katu rei oĩ-vy íxupe. Nopenái hese onhenupã va'e-rehe.

¹⁸ Upe rire Paulo hi'are-ma opyta-vy upe-py.

Paulo ogwahẽ jevy Antioquia tetã-my

Opyta are rire, he'i Hesu reroviah-a-pe:

—Aha jevy-tama xe, he'i.

Hendive oho ave Priscila iména ave. Ogwahē ramo Cencréia tetā-my, oakāmoperō uka Paulo. Oity ukapa ho'ávy judeu reko poru-vy. He'i va'ekwe-rami Nhandejáry-pe oakāmoperō uka. Upe rire onhembooru kanoagwasu-py oho hagwā y-rupi, Síria yvy-koty.

¹⁹ Upéi ogwahē oho-vy Éfeso tetā-my. Upe-py oheja oirū-pe. Oheja rire Paulo oike judeu oporahéi haty-py. Omombe'u mbe'u oikwaa uka porāve rāve hagwā.

²⁰ —Epyta areve ore ndive, he'i íxupe hikwái.

—Ndapyta mo'āi, he'i íxupe kwéry.

²¹ Upéi:

—Aha jevy-tama xe, he'i. —Nhandejáry oipota ramo xe aju jevy a-py, aju jevy va'erā, he'i Éfeso tetā mygwa-pe.

Upéi onhembooru jevy kanoagwasu-py oho jevy upe-gwi y-rupi.

²² Ogwahē oho-vy Cesaréia tetā-my. Y rembe-py omboja kanoagwasu osē hagwā yvy ete-py oho-vy. Oho Jerusalém tetā-my. Upe-py ogwahē ramo Hesu reroviahā ha-py ojogwerovy'a. Upe-gwi osē jevy oho-vy. Ogwahē Antioquia tetā-my.

²³ Upe-py optya are oiko-vy. Upe rire osē jevy oho-vy. Ohasa hasa oho-vy Galácia yvy-rupi, Frígia yvy-rupi ave. Hesu nhe'ẽ renduha ojogweroaty haty haty-rupi onhemonhe'ẽ nhe'ẽ íxupe kwéry ojerovia porāve rāve hagwā.

Apolo rehewa nhe'ẽ

²⁴ Ha upéi katu peteī judeu héry va'e Apolo, Alexandria gwigwa ogwahē ou-vy Éfeso tetā-my. Ha'e inhe'ẽ porā porā va'e voi. Nhandejáry kwatia nhe'ẽ kwaa porāha voi ha'e.

²⁵ Nainhate'yi omombe'u hagwā Hesu rehewa nhe'ẽ. Omombe'u porā voi. Ndojavýiry imombe'u-vy. Anhetegwa meme voi he'i. Omombe'u porā íxupe ra'e Nhandejáry Hesu rape ha nomombe'ui íxupe Hesu reroviahā onhemongarai va'ekwe. João omongarai va'ekwe rerakwā ohendu mante.

²⁶ Ha upéi katu oike judeu oporahéi haty-py onhe'ẽ hagwā. Ikyhyje e'ŷ rehewe onhe'ẽ. Ha Priscila iména ndive, ohendu ramo inhe'ẽ, ogwenohē heraha-vy atýra-gwi íxupe. Upéi íxupe anho omombe'u oikwaa porāve rāve hagwā Nhandejáry Hesu rape.

²⁷ Ha upéi katu ohose y rovái. Acaia yvy-py ohose y-rupi. Ohose ramo:

—Iporā katu ereho, he'i íxupe Hesu reroviahā.

Upéixa ramo ome'ẽ íxupe kwatia nhe'ẽ ogweraha hagwā, amo etegwa Hesu reroviahā va'e omonhe'ẽ rire, omogwahē hagwā íxupe. Upéi osē oho-vy. Ohasa oho-vy. Upéi ogwahē oho-vy Acaia yvy-py. Ogwahē ramo, omoirū-ma upé pygwa, Hesu reroviahā va'e-pe. Nhandejáry ohexakwaa rei-gwi íxupe kwéry, ojerovia-ma ra'e hese upé pygwa. Upéa-gwi Apolo ogwerovia uka porāve rāve upé pygwa Hesu reroviahā va'e-pe gwive.

²⁸ Ha gwī judeu kwéry-pe katu ha'e onhe'ẽ mbojevy jevy atýra-py ohendu hagwā:

—Hesu ko Cristo voi, Nhandejáry rembiporavopyre voi, he'i. —Nhane remiha'arō arō va'e ogwahē-ma ra'e, he'i.

Upéa ohexa uka íxupe kwéry. Nhandejáry kwatia nhe'ẽ-rupi oikwaa uka íxupe kwéry.

1 Ha Apolo katu opyta Corinto tetā-my. Oime jave upe-py, ohasa hasa Paulo. Yvyaty aty pa'ū-rupi, tetā mirī-rupi, ohasa oho-vy. Upe rire ogwahē oho-vy Éfeso tetā-my. Upe-py oī Hesu nhe'ẽ renduha.

2 Ogwahē ramo, otopa íxupe kwéry. Upéi oporandu íxupe kwéry Paulo:

—Peroviamaha áry-py, upéa áry-py ogwahē-ma tipo peě-my Nhe'ẽ Marangatu tee va'e? he'i íxupe kwéry.
Ha'e kwéry he'i:

—Nogwahēi vyteri, he'i. —Gwī Nhe'ẽ Marangatu tee va'e rehewa nhe'ẽ norohendúi vyteri voi, he'i íxupe hikwái.

3 —Kiva'e réry-py penhemongarai uka va'ekwe, he'i jevy oporandu-vy íxupe kwéry.

—Oronhemongarai va'ekwe João Batista oporomongarai hagwe-rami, he'i íxupe hikwái.

4 Upe ramo he'i íxupe kwéry Paulo:

—Ha João Batista katu, ogwerova rova gwekoha va'e-pe omongarai. Omongarai jave, he'i va'ekwe henda-py ou va'ekwe-pe: “Xe ranhe ko aju tenondererupi. Ha xe rapykwerigwa katu ou-ta ave. Ou ramo, pejerovia katu hese” he'i íxupe kwéry João Batista, he'i. —Hapykwerigwa ko Hesu voi, he'i Paulo imombe'u-vy.

5 Ohendu ramo inhe'ẽ, onhemongarai uka-ma Nhandejáry Hesu réry-py.

6 Upéi omoī inhakā akā ári opo. Omoī-ma ramo, omohynyhēmba ipy'a kwéry Nhe'ẽ Marangatu tee va'e. Omohynyhēmba-gwi, onhe'ẽ nhe'ẽ ambue-py hikwái. Nhandejáry rehewa omombe'u ave. Ha'e oikwaa e'ŷ va'e oikwaa uka imombe'u-vy íxupe.

7 Upe ramo doze kwimba'e-rupi ipy'a rynyhēmba Nhe'ẽ Marangatu tee va'e-gwi.

8 Ha upéi katu Paulo oike judeu oporahéi haty-py. Mbohapy jasy-rupi onhemonhe'ẽ nhe'ẽ oiko-vy. Notíry omombe'u hagwā Nhandejáry rehewa nhe'ẽ: “Pemoirū katu Hesu Nhandejáry nhande ruvixarā-pe” he'i omombe'u mbe'u-vy oikwaa uka porāve rāve hagwā.

9 Ha upe-py oī nohenduséi va'e. Gwī ogwerovia e'ŷ va'e, onhe'ẽ rei rei va'e Nhandejáry Hesu-rehe enterovéa rovagwy-py. Upéixa ramo Paulo osē oho-vy. Kente kwéry pa'ū-gwi osē oho-vy. Ogweraha ojave Hesu nhe'ẽ renduha. Oike oho-vy imbo'eháry nhe'ẽrendu haty-py. Imbo'eháry héry va'e Tirano. Ha upéi oike rire upe-py, peteī teī áry-py omombe'u mbe'u oikwaa uka porāve rāve hagwā Nhandejáry rehewa nhe'ẽ.

10 Mokōi ro'y omombe'u oiko-vy upe-py. Upéixa-gwi ohendupa Nhandejáry Hesu rehewa nhe'ẽ hikwái. Ásia yvy pygwa gwive, judeu va'e, judeu e'ŷ va'e ave ohendupa inhe'ẽ.

11 Ha Nhandejáry ojapo uka íxupe hexapyrā-rupi, heroviapyrā-rupi ave ojapo uka. Upéixa ramo jahexa e'ŷ va'e ohexa hikwái.

12 Ou Paulo renda-py. Ogweraha íxugwi inhakā jokwaha oiporu va'ekwe. Hambeo oiporu va'ekwe oipe'a ave íxugwi heraha-vy. Hasy va'e ha-py ogweraha. Omboja ramo hese okwera-ma hasy va'e. Osē-ma anháy oho-vy íxugwi kwéry.

13 Upe-py oī ave judeu ogwata oiko-vy va'e. He'i onhemombe'u-vy: “Ore oromosē kwaa va'e imondo-vy anháy” he'i rei onhemombe'u-vy. Ha upéi katu Hesu réry oiporu rei omosē hagwā mo'ā anháy rerekoha-gwi:

—Esē katu Hesu réry-py. Upe Paulo remimombe'u va'e réry-py esē katu, he'i mo'ā anháy rerekoha-pe.

¹⁴ Upéixa voi hembiapo sete kwimba'e, Ceva ra'y kwéry. Ha Ceva judeu va'e, pa'i ruvixa va'e ave. Ta'y kwéry oiporu rei va'e Hesu réry imosẽ-vy.

¹⁵ Ha anháy katu he'i íxupe kwéry:

—Hesu ko aikwaa xe. Paulo ave aikwaa. Ha peẽ katu ndapokwaáiry voi, he'i íxupe kwéry anháy.

¹⁶ Upe-ma ramo upe anháy rerekoha opo hese. Ipu'aka hese kwéry oinupã nupã-vy. Upéa-gwi osẽ oho-vy hóga-gwi. Opi-vy oripara oho-vy. Onhemaxukapa ave oho-vy hikwái.

¹⁷ Ha upéi katu opa tetã-rupi oho herakwã. Gwĩ Éfeso pygwa gwive, judeu va'e, judeu e'ŷ va'e ave ohendupa herakwã. Ohendu ramo ikyhyje eterei voi. Ipy'amirimbã upe-py oĩ va'e gwive. Ha Nhandejáry Hesu réry katu: “Iporãmba ete voi” he'i imboete-vy hikwái.

¹⁸ Upéixa ramo ogwahẽ ou-vy heta ogwerovia va'e. Hembiapo vaikwe ne'írã ogwerovia reheve ojapo va'ekwe omombe'u atýra-py.

¹⁹ Yma oiko va'ekwe imoháy va'e. Oiko ave va'ekwe onhembo'e va'eombo-hasy hagwã gwapixa-pe. Oiko ave va'ekwe omoheonde vai va'e ojéupe. Upéa rehewa kwatia nhe'ẽ ha'e kwéry hembiporukwe ogweru gweru omboaty aty hagwã. Omboaty ramo ohapypa pono oiporu jevy ivai va'e. Enterovéa rovagwy-py ohapy voi. Upéi mbovy repy po oĩ upéa kwatia oipapa oikwaa hagwã. Oipapa rire:

—Heta eterei ra'e. Cinquenta mil moeda tuvixa va'e repy ra'e, he'i.

²⁰ Upéixa ramo opa-rupi oho Nhandejáry nhe'ẽ imbaraeteve teve oho-vy.

²¹ Upe rire Paulo he'i ojéupe: “Ahasa hasa-ta Macedônia yvy-rupi. Hesu reroviahva va'e rexa-vy aha-ta” he'i. “Acaia yvy-rupi ave ahasa-ta agwahẽ hagwã Jerusalém tetã-my. Upe-py naxe are mo'ãi. Upe rire aha-ta Roma tetã-my. Xe kyre'ŷ eterei aha hagwã upe-py” he'i ojéupe.

²² Upéi gwenonderã omundo mokõi oirũ. Timóteo Erasto ndive omundo. Macedônia yvy-py omundo íxupe. Ha'e katu opyta joty Ásia yvy-py.

Ojogwerooty Éfeso tetã mygwa onhombopoxy-vy

²³ Upe ramo Éfeso tetã mygwa ipoxy voi Nhandejáry Hesu nhe'ẽ rendusere'ŷ-vy. Peteñ henda-py ojogwerooty onhombopoxy-vy hikwái.

²⁴ Oĩ kwimba'e héry va'e Demétrio. Prata-gwi opaixagwa apoha. Ha'e ranhe ipoxy. Upe tetã-my oĩ óga kakwaa. Upe óga gwy-py onhemboete tupã ra'anga héry va'e Diana. Ha'e ramigwa teñ óga ra'anga ojapo Demétrio. Diana róga ramigwa teñ óga ra'anga mixã va'e ojapo ovende va'erã. Upéa-rehe ogana porã oiko-vy. Ipytygwöháry ogana porã ave.

²⁵ Upe va'e ombojogwerooty oha-py. Ha'e-rami omba'apo va'e ohenói ave ogwahẽ hagwã oha-py. Upéi he'i íxupe kwéry:

—Xe irũ gwéry, he'i, —kóixa nhane rembiapo ramo, nhavende ramo, nhagana porã voi. Mba'éixa nhagana peẽ peikwaa voi, he'i.

²⁶ —Ha upe Paulo no'ã-rami he'i va'e: “Gwĩ tupã ra'anga erejapo va'e ndaha'ei tupã” he'i. Upéa-gwi Paulo nhe'ẽ-rupi ndogweroviavéi tupã ra'anga-pe. Inhe'ẽ-rupi heta-ma oĩ ogwerovia e'ŷ va'e. Oĩ a pygwa, mombyry rupigwa ave ndogweroviavéiry va'e. Ásia yvy-rupi heta-ma ogwerovia e'ŷ va'e oĩ. Ha upe va'e katu pehexa-ma, pehendu-ma ave, he'i.

²⁷ —Naiporãi upéa. Ivai voi. Oiméne nogwahëvái-ma ijogwaharã. Nogwahëvái ramo, nanhagana porã mo'ãvái-ma arã, he'i. —Oiméne nogwahëvái-ma óga kakwaa-py imboete-vy. Upéa gwy-py oĩ Diana ra'anga, nhane remimboete va'e. Tuvixa mba'e voi Diana, he'i. —Ha Ásia pygwa gwive, opa rupigwa gwive ave omboete ete íxupe va'e. Ha nogwahëvái ramo katu

inha-py, nomboete mo'āvei-ma íxupe hikwái. Nomomba'egwasu mo'āvéri-ma. Naimandu'avéri arã hese, he'i íxupe kwéry Demétrio.

²⁸ Inhe'ẽ ohendu ramo, ipoxypa hikwái Paulo-rehe. Nogana porã mo'āvéri-gwi ipoxypa Diana-rehe hakate'ŷ-vy.

—Tuvixa mba'e Diana, nhande kwéry Éfeso pygwa va'e járy, he'i onhe'ẽ hatã hatã-vy.

²⁹ Ha upe tetã mygwa ndaipy'agwapyvéi-ma. Osẽmba ohendu-vy oripara oho-vy ojogweroaty heta heta haty-py. Omoatã heraha-vy mokõi Macedônia pygwa héry va'e Gaio Aristarco ave. Paulo ogwata ramo, omoirũ va'e íxupe. Upe mokõi oipyhy heraha-vy hikwái.

³⁰ Ha upéi katu Paulo osẽ-ta mo'ā ijayvu va'e kwéry pa'ū-my onhe'ẽ hagwã. Ha Hesu nhe'ẽ renduha ndohejái osẽ.

³¹ Oĩ Ásia pygwa ruvixa va'e Paulo-pe ohayhu va'e. Ndohejái ave osẽ. Ombou íxupe onhe'ẽ ani hagwã osẽ teĩ: “Ani erenhembopy'agwasu teĩ eresẽ hagwã” he'i uka íxupe.

³² Ha upe pygwa oikwaa e'ŷ rehevê mba'eve ijayvu yvu rei voi okwa-vy ojogweroaty heta heta haty-py.

—Ma'erã po jaju rei a-py ndajaikwaaí, heta oĩ he'i va'e ojóupe.

³³ Omombe'u joavy avypa rei hikwái. Ha judeu kwéry ogwenohẽ heraha-vy kwimba'e-pe héry va'e Alexandre. Kente kwéry pa'ū-gwi ogwenohẽ íxupe. Omoanha anha gwenonde-rupi onhe'ẽ hagwã íxupe kwéry. Ombovava íxupe kwéry opo. Omongiririmbasse mo'ā. Onhe'ẽse mo'ā ani hagwã omboja rei judeu kwéry-rehe hikwái: “Ore ko judeu kwéry va'e ndaha'éi Paulo rehewa” he'ise mo'ā.

³⁴ Ha ohexa ramo íxupe hikwái:

—Upe va'e ndaha'éi nhande re'yí, he'i. —Judeu kwéry va'e rehewa voi upe va'e, he'i hikwái.

Nokiririséi voi. Are are eterei ijayvu okwa-vy. Ára pyte-py ka'arugwasu peve onhe'ẽ hatã hatã. Peteixa onhe'ẽ hatã okwa-vy:

—Tuvixa mba'e Diana, nhande kwéry Éfeso pygwa va'e járy, he'i.

³⁵ Ha upéi katu mburuvixa Éfeso pygwa ruvixa va'e opu'ā-ma omongirirí hagwã ijayvu va'e kwéry-pe. Omongiririmbá rire, onhemonhe'ẽ íxupe kwéry:

—Xe rapixa kwéry, Éfeso pygwa va'e, he'i. —Nhande kwéry ko Diana róga kakwaa-rehe nhanhangareko va'e. Tuvixa mba'e Diana, nhande kwéry Éfeso pygwa járy voi, he'i. —Yvate-gwi ho'a araka'e ha'anga ita-gwi ijapopyre. Upe ita marangatu-rehe nhanhangareko va'e ave. Ndaipóri avave oikwaa e'ŷ va'e nhande nhanhangarekoha.

³⁶ Upéixa ja'e ramo, enterove oikwaa anhetegwaha, he'i. —Ndaipóri “Nde apu” he'i va'erã nhande-vy. Upéa-gwi pekirirí katu. Peikwaa porã e'ŷ rehevê, ani mba'eve pejapo teĩ, he'i íxupe kwéry.

³⁷ —Ko va'e kwimba'e ndoikéiry va'e jepe Diana róga-py imba'e marangatu omonda-vy, nonhe'ẽ rei reíry va'e jepe Diana-rehe nhande kwéry járy-rehe, Peru joto ko'a-py. Ma'erã tipo Peru rei joto íxupe? he'i.

³⁸ —Ha'e-ta peẽ-my: Oime mburuvixa nhane monhe'ẽhaty va'e. Nhane monhe'ẽ va'e oikwaa hagwã nhane rembiapokwe. “Iporã para'e, tapa naiporã” he'i nhane monhe'ẽ-vy. Upéixa ramo oĩ ramo omombe'use va'e Paulo-rehe hembiapo vai va'ekwe, toho katu imombe'u-vy mburuvixa renda-py. Toho katu imombe'u-vy Demétrio, ha'e-rami ombo'apo va'e ave. Oime ave mburuvixagwasu imbaraeteve va'e. Petei teĩ tomombe'u íxupe hese hembiapo vai va'ekwe.

39 Neremombe'uséi ramo mburuvixa-pe, emombe'u katu kente kwéry-pe. Mburuvixa nhe'ẽ-py ombojogweroatypa rire-ma, emombe'u katu íxupe kwéry kuri.

40 Oiméne mburuvixa kwéry he'i va'erã nhande-vy: "Ma'erã po pende ayvu rei etería? Ma'erã penhombopoxy rei ave?" Upéixa he'i ramo nhande-vy, ndaipóri nhane remimombe'urã. Nhanhomboaty rei-gwi, ndajarekói nhane remimombe'urã. Nhande poxy rei voi kuri, he'i íxupe kwéry mburuvixa.

41 Upéa he'i rire:

—Tapeho jevy katu, he'i íxupe kwéry.

20

Paulo ojapura oho-vy ogwahẽ pya'e hagwã Jerusalém-my

1 Upe ramo gwí ijayvu va'e kwéry osarambipa jevy ohopa gwóga gwóga-rupi hikwái. Upe rire Paulo ohenói uka íxupe ogwahẽmba jevy hagwã gwóga-py. Hesu nhe'ẽ renduha va'e kwéry gwive ohenói. Ogwahẽ ramo:

—Peiko meme katu Hesu rape-rupi, he'i íxupe kwéry.

Upéa rire:

—Aha jevy-tama xe, he'i.

Upéi oho jevy Macedônia yvy-py.

2 Ohasa hasa amo ete rupigwa-rupi. Hesu reroviaha va'e oĩ ha-rupi onhemonhe'ẽ nhe'ẽ imombaraete-vy. Upe rire ogwahẽ oho-vy Grécia yvy-py.

3 Upe-py mbohapy jasy opyta. Ha upéi katu onhemboyrú-ta mo'ã kanoagwasu-py ogwejy hagwã y-rupi oho-vy Síria yvy-koty. Ha ohendu ramo ojukaseha íxupe judeu kwéry, nonhemboyrú jepéiry.

—Aha jevy-ta Macedônia yvy-rupi, he'i.

4 Upéi oho. Omoirú íxupe Beréia pygwa héry va'e Sópatro, Pirro ra'y oho hagwã Ásia yvy-py. Omoirú íxupe ave Tessalônica pygwa héry va'e Aristarco Secundo ndive. Omoirú ave íxupe Derbe-py oiko va'e héry va'e Gaio. Omoirú ave íxupe Timóteo. Ásia yvy pygwa héry va'e Tíquico Trófimo ndive omoirú ave íxupe. Upe va'e kwéry omoirú íxupe. Ogwahẽ oho-vy Filipos tetã-my. Upe-py opyta xe ndive Paulo xe rekwa-py opyta.

5 Ha inhirú kwéry katu ohasa meme oho-vy. Ore renonderã oho Trôade tetã-my.

6 Upe-py opyta ore ra'arõ-vy. Ha ore katu oropyta Filipos tetã-my. Oiko-ma aretegwasu. Upe aretegwasu-py ja'u meme va'e mbojape ovu e'ŷ va'e. Aretegwasu opa rire mante oroho jevy. Upe-gwi ygwasu rembe-py orog-wahẽ ramo, oronhemboyrú kanoagwasu-py oroho hagwã y-rupi. Upéi cinco áry jave orogwahẽ oroho-vy Trôade tetã-my. Upe-py peteĩ semana oropyta.

7 Domingo-py orojogweroaty onhondive orokaru hagwã. Orokaru jave ore mandu'a Hesu-rehe omano va'ekwe-rehe. Ha Paulo omondo mondo gwesa ko'ẽ ramogwarã-rehe, gwaperã-rehe. Upéa-gwi onhemonhe'ẽ ijaty va'e-pe. Pyhare mbyte peve onhemonhe'ẽ nhe'ẽ oiko-vy.

8 Koty joapy apy-py orojogweroaty haty-py heta oĩ tataendy.

9 Upe-py oĩ karia'y héry va'e Éutico. Ogwapy oĩ-vy okẽ'i-my. Gwenda-py oke-ma oĩ-vy gwapehýi ramo. Paulo nhe'ẽ omonge íxupe, onhe'ẽ joty oĩ-vy ramo. Upéixa-gwi oke oke oĩ ha-gwi ho'a oho-vy. Yvate-gwi mbohapy koty oĩ ha-gwi ho'a. Ogwejy hese ohupi he'õgwe reraha-vy hikwái.

—Omano ete-ma voi nipo ra'e, he'i mo'ã hese hikwái.

10 Ha upéi katu ogwejy ave Paulo henda-py ojeayvy upe karia'y-rehe oikwavã he'õgwe-pe:

—Ani penhemondýí teĩ. Nomano etéi ko ra'e. Oikove joty ko ra'e, he'i íxupe kwéry. Oikove jevy voi.

¹¹ Upe rire ojeupi jevy oho-vy. Omboja'o ja'o ojóupe onhondive okaru. Okaru rire omongeta jevy íxupe kwéry. Ko'ẽmba peve ombo'e mbo'e. Ko'ẽmba-ma ramo oho jevy-ma.

¹² Ha upe pygwa ogweraha hóga-py upe karia'y onhemoingove jevy va'ekwe-pe. Oikove jevy-gwi, ov'y'a eterei voi hikwái.

Paulo oho y-rupi. Ogwahē oho-vy Mileto tetā-my

¹³ Ha upéi katu:

—Aha-ta yvy-rupi, Assôs tetā-my aha-ta, he'i. —Upe-py anhemboyruta xe kanoagwasu-py, he'i ha'e ore-vy.

Upéa-gwi xe Lucas Paulo irũ ave oroho henonderã. Oronhemboyruta kanoagwasu-py oroho hagwã y-rupi. Henonderã oroho. Assôs tetā-my oroho y-rupi.

¹⁴ Orogwahē ramo upe-py, Paulo oĩ-ma upe-py ra'e. Orogweroike kanoagwasu-py oromboyruta íxupe. Upe-gwi oroho Mitilene tetā-my.

¹⁵ Upe-gwi orosẽ jevy y-rupi oroho-vy. Iko'ẽ-my orohasa Quios ykõi yke-rehe. Iko'ẽ-my jevy orogwahē Samos ykõi-my. Iko'ẽ-my jevy orogwahē oroho Mileto tetā-my.

¹⁶ Ndorohói Éfeso tetā-my orohasa rei oroho-vy. Paulo are ndopytaséi Ásia yvy-py. Upéa-gwi orohasa meme oroho-vy. Ojapura oho-vy ogwahē pya'e hagwã Jerusalém tetā-my, aretegwasu áry-py ogwahē hagwã oho-vy. Upéa aretegwasu héry va'e Pentecostes.

Paulo onhemonhe'ẽ Éfeso tetā mygwa, Hesu reroviaha rerekwa-pe

¹⁷ Ha upéi katu orogwahē oroho-vy Mileto tetā-my. Orogwahē ramo upe-py, Paulo omomarandu uka Éfeso pygwa-pe ou hagwã ore ha-py. Upe Hesu nhe'ẽ renduha rerekwa-pe ohenói uka ou hagwã.

¹⁸ Ogwahē ou-vy ramo, gwemienoigwe-pe he'i onhemonhe'ẽ-vy:

—Peẽ katu xe reko rexapa-ma va'e. Xe agwahē gwive xe asẽha peve Ásia yvy-gwi ndajapo nhemíry mba'eve. Mba'éixa po aiko va'ekwe pene pa'ũ-rupi peikwaa voi peẽ.

¹⁹ Ha Nhandejáry Hesu remimbota ajapo meme va'ekwe aiko-vy. Onhe'ẽ rei rei ramo jepe xe-rehe aiko kirirí joty va'ekwe. Nanhembotuvixa mba'éiry voi joty. Hi'arandu e'ŷ va'e ahekomboasy eterei ahapirõ-vy. Ha gwĩ judeu kwéry xe jukase mo'ã ramo jepe, xe mbohasa asy ramo jepe va'ekwe, xe ajapo meme joty va'ekwe Nhandejáry Hesu remimbota anhemonhe'ẽ-vy.

²⁰ Ha xe mbohasa asy jepe va'ekwe naxe py'amiríry joty va'ekwe Nhandejáry nhe'ẽ amombe'u-vy. Mba'e porã gwive amombe'u peẽ-my. Anhemonhe'ẽ peẽ-my enterove va'e ohendu hagwã. Peteĩ teĩ pende róga-rupi anhemonhe'ẽ ave.

²¹ Judeu kwéry-pe, judeu e'ŷ va'e-pe ave anhemonhe'ẽ aiko-vy: “Perova katu pende rekoha. Peiko katu Nhandejáry reko-rupi. Pejerovia katu Nhandejáry Hesu-rehe. Anhetegwa voi ko nhe'ẽ” ha'e va'ekwe peẽ-my. Mba'éixa po va'ekwe pene pa'ũ-my xe rekoha peikwaa voi peẽ, he'i.

²² —Ha ko'ánga katu aha-ta Jerusalém tetā-my. Ndahaitaha-gwi ae aha-ta. Nhe'ẽ Marangatu tee va'e ae xe reraha-ta, he'i. —Mbava'e po ojehu-ta xe-vy upe-py xe ndaikwaáiry.

²³ Ahasa asy va'erã ae aikwaa. Ha Nhe'ẽ Marangatu tee va'e katu oikwaa uka va'e xe-vy xe moĩ ukataha preso, xe rerekoso asytaha ave. Peteĩ teĩ tetā-my oikwaa uka xe-vy.

²⁴ Ha naxe rakate'ŷiry voi xéjehe. Xéjehe anho rei ndaiko pukuséi. Xe rembiaporã Nhandejáry remime'ẽ ae ajapopase aiko-vy. Amombe'use joty Nhandejáry Hesu rehewa nhe'ẽ. Mba'éixa nhande rexakwaa rei nhande-vy Nhandejáry, amombe'u joty va'erã aiko-vy, he'i. —Xe rembiaporã xe ajapopa peve, xe aikose. Ajapopa rire, tamano jepe xe, he'i.

²⁵ —Are-ma xe aiko va'ekwe pene pa'ũ-rupi Nhandejáry nhe'ẽ amombe'u-vy. Nhandejáry nhande ruvixarã rehewa nhe'ẽ amombe'u mbe'u peẽ-my. Ha ko'ângá katu ndaxe rexaa mo'âvéiry ko yvy-rupi. Upéa xe aikwaa voi.

²⁶⁻²⁷ Ha Nhandejáry remimbota rehewa nhe'ẽ gwive amombe'upa va'ekwe. Peẽ-my gwarã va'e amombe'upa. Mba'eve nanhomíry imombe'u-vy pendéhegwi. Amombe'upa voi. Napehenduséi ramo jepe, amombe'u joty va'ekwe peẽ-my. Upéa-gwi pemanoo ramo pende py'a ky'a rehewe, pendejéhegwi rei pemanoo va'erã. Ndaxe reroviái-gwi, eremano-ta. "Nomombe'úiry ra'e xe-vy Paulo" ndaipóri he'i va'erã xe-rehe.

²⁸ Upéa-gwi penhangareko porã katu pendéjehe ani hagwã pejere teĩ peẽ Nhandejáry rape-gwi. Penhangareko porã katu ave Hesu reroviaha va'e-rehe gwive. Pemombaraeteve teve peho-vy íxupe. Nhe'ẽ Marangatu tee va'e ko omonhangareko uka va'e peẽ-my hese kwéry. Ha'e kwéry Nhandejáry Hesu re'yí tee-ma voi. Hekovía omanoo ramo gwugwy rehewe, opyta hé'yirã Hesu-pe hikwái, he'i.

²⁹ —Ãy aha-tama xe. Aha rire, ogwahẽ va'erã ijapu va'e ou-vy pende happy. Ogwahétaha aikwaa voi xe. Ogwahẽ va'erã pende rerova hagwã. Ou jagwarete ogweraha hagwã ovexa. Upéixa ete voi ijapu va'e ou va'erã pene pa'ũ-my, pende rerova hagwã Hesu rape-gwi ou va'erã.

³⁰ Ha pene pa'ũ-gwi katu ojekwaa va'erã inhe'ẽ rei rei va'e omoingo hagwã gweko-rupi Hesu nhe'ẽ renduha.

³¹ Upéa-rehe pesareko reko katu peiko-vy ani hagwã pene mbotavy rei. Pene mandu'a meme katu xe rekoke-rehe. Mbohappy ro'y-ma anhemonhe'ẽ nhe'ẽ aiko-vy va'ekwe peẽ-my. Pytã ramo, áry ramo ave anhemonhe'ẽ. Peteĩ teĩ va'e-pe anhemonhe'ẽ. Orioiporiahuvereko-gwi xe rasã anhemonhe'ẽ-vy va'ekwe, he'i.

³² —Ha ko'ângá katu tonhangareko porã katu Nhandejáry pende-rehe. Inhe'ẽ rendu-vy peiko meme katu. Iporã ete inhe'ẽ, pende rexakwaa rei va'erã he'i va'e. Inhe'ẽ rendu-vy peiko ramo, pene mombaraeteve teve va'erã voi Nhandejáry. Pende reraha va'erã ave oha-py. Ojepy'a mopotã va'e gwive oñ ha-py pende reraha va'erã peẽ-my ave, he'i.

³³ —Ha xe katu namondo reíry xe rapixa mba'e-rehe rei xe resa. Ipirapire-rehe, iiao-rehe ave namondo reíry xe resa.

³⁴ Ko xe po-rehe amba'apo. Aipota va'e-rehe xe amba'apo. Xe irã oipota va'e-rehe amba'apo ave. Pene rembierekorehe katu ndajeruréiry. Xe amba'apoha peikwaa voi.

³⁵ Iporã katu nhamba'apo nhaipytygwõ hagwã gwí ogwerekó e'ŷ va'e-pe. Upéixa ete voi xe amba'apo va'ekwe xe amba'apo hagwe-rami peẽ pemba'apo hagwã ave. Iporã katu nhane mandu'a Nhandejáry Hesu nhe'ẽ-rehe: "Nhande-vy ome'ẽ ramo, javy'a va'e. Ha nhame'ẽ ramo katu nhande rapixa-pe, javy'a eteve voi" he'i va'ekwe Hesu, he'i omombe'u-vy Paulo. Upéixa voi he'i Éfeso pygwa-pe onhemonhe'ẽ-vy.

³⁶ Onhe'ẽ rire, onhesã gwetypy'ã-rehe. Hendive kwéry ombojeupi Nhandejáry-pe onhe'ẽ.

³⁷ Upéi ohapirõ íxupe hikwái, oho-ta ramo. Oikwavã kwavã íxupe hereko-vy. Ohovapyte ave íxupe:

38 “Ndaxe rexā mo'āvēi-ma” he'i-gwi, ohapirō eterei íxupe hikwái. Omboasy eterei ohoha. Upe ramo omboyu íxupe heraha-vy kanoagwasu-py.

21

Paulo ogwahē oho-vy Tiro tetā-my

1 Ha upéi katu:

—Oroho jevy-tama, oro'e íxupe kwéry, Éfeso pygwa-pe.

Upéi oronhemboyu kanoagwasu-py y-rupi oroho hagwā. Pya'e oroho ykōi-my orogwahē hagwā, ykōi héry va'e Cós-py. Iko'ẽ-my oroho ramo orogwahē jevy oroho-vy ykōi ambue héry va'e Rodes-py. Upe-gwi oroho jevy yvy ete-py, Pátara tetā-my.

2 Upe-py orogwahē ramo, orotopa outro kanoagwasu. Oho va'erā voi Fenícia yvy-py orotopa. Orohekoviārō ore ryru oroho jevy-ma.

3 Oroho jave ojekwaa ykōi renda héry va'e Chipre. Ore asu-koty opyta ha orohasa meme joty oroho-vy, orogwahē hagwā oroho-vy Síria yvy-py. Tiro tetā-my orogwahē. Yvy ete-rehema oroho. Upe-py ogwenohēmba gwembierahakwe.

4 Ogwenohēmba jave, oroheka upe tetā-rupi Hesu nhe'ẽ renduha va'e-pe. Orotopa ramo, oropyta sapy'a hendive kwéry. Peteī semana oropyta: “Ani ereho teī Jerusalém-my” he'i Paulo-pe. Oiko asytamaha ohendu uka íxupe kwéry Nhe'ẽ Marangatu tee va'e. Upéa-gwi omombe'u íxupe ani hagwā oho.

5 Peteī semana rire, oroho jevy joty-ma. Ha Hesu nhe'ẽ renduha gwive ore reraha hagwā osēmba upe tetā-gwi. Hembireko kwéry reheve, mitāgwe reheve osēmba ore reraha hagwā. Orogwahē ramo ygwasu rembe-py, ore kwéry oronhesū ore retypy'ã-rehe. Orombojeupi Nhandejáry-pe ore nhe'ẽ.

6 Upe rire:

—Oroho jevy-ma, oro'e íxupe kwéry.

—Tapeho katu Nhandejáry ndive, he'i ore-vy.

Ha upe rire ha'e kwéry oje'óí jevy-ma gwóga-py hikwái.

Paulo ogwahē oho-vy Cesaréia tetā-my

Upéi ore oronhemboyu jevy-ma kanoagwasu-py.

7 Oroho jevy-ma orogwahē jevy oroho-vy Ptolemaida tetā-my. Upe-py oroho orohexa Hesu reroviahā. Peteī áry-py oropyta hendive.

8 Iko'ẽ-my oroho jevy-ma. Orogwahē jevy-ma oroho-vy Cesaréia tetā-my. Upe-py orogwahē oroho-vy héry Filipe va'e róga-py. Oropyta hendive. Filipe ko Hesu rehewa nhe'ẽ porā mombe'uhaty. Ha'e seis kwimba'e Jerusalém pygwa ndive oiko va'ekwe Hesu remimondo nhe'ẽ-py tembi'u me'ẽha ramo. Ome'ẽ me'ẽ va'ekwe Hesu reroviahā-pe hemi'urā.

9 Ây irundy tajýry va'e, omenda e'ŷ va'e. Nhandejáry nhe'ẽ-py omombe'u va'ety voi.

10 Upe-py oropyta jave, ogwahē ou-vy Nhandejáry nhe'ẽ-py omombe'u va'ety, Judéia yvy gwigwa, héry va'e Ágabo.

11 Ogwahē ramo ore ha-py, Paulo xumbe oipyhy. Upe rire Paulo xumbe-py ojepokwa, ojepykwā ave. Upe rire omombe'u ore-vy Nhe'ẽ Marangatu tee va'e nhe'ẽ:

—A-rami oipokwa-ta hereko-vy ko xumbe járy-pe. Judeu kwéry, Jerusalém pygwa va'e oipokwa-ta hereko-vy íxupe, he'i. —Oipokwa rire, judeu e'ŷ va'e po-py ome'ẽ-ta, he'i ore-vy omombe'u-vy.

12 Inhe'ẽ orohendu ramo, oro'eri eri íxupe:

—Ani ani ereho teĩ Jerusalém tetã-my, oro'e Paulo-pe. Ha upe-py oĩ va'e ave he'iri iri íxupe ani hagwã oho.

¹³ Ha'e katu he'i ore-vy:

—Ma'erã peje upéixa xe-vy? Aha-ta joty xe. Ma'erã tipo xe rapirõ? Pene rasẽ ramo, naxe py'a ratãvéi-ma va'erã. Xe rasëse-ma ave xe ave. Ndaxe pu'akavéi-ma va'erã xéjehe. Xe py'a-py pekwa va'e voi. Upe Jerusalém pygwa kwéry xe pokwase ramo, xe pykwase ramo ave, taxe jokwa katu, he'i. —Upe-py Nhandejáry Hesu ahayhu-gwi xe jukase ramo, taxe juka katu ave, he'i. —Ojapose va'e, tojapo katu xe-rehe, he'i ore-vy.

¹⁴ Upéixa ramo, ndikatúi orojoko íxupe. Noronhe'ëngivéi-ma íxupe:

—Tereho katu. Ejapo katu Nhandejáry remimbota eiko-vy, oro'e rei-ma íxupe.

Paulo ogwahẽ oho-vy Jerusalém tetã-my

¹⁵ Upe rire oromboaty aty ore ma'etirõ oronhembosako'i oroho hagwã. Upéi oroho-ma Jerusalém tetã-my.

¹⁶ Oroho-ma javé, ore moirũ-ma ave ore-vy Cesaréia pygwa, Hesu nhe'ẽ renduha kwéry. Orogwahẽ oroho-vy Jerusalém-my. Ore moirũ ave peteĩ Hesu reroviaha héry va'e Menasom. Ha'e are etereive-ma ojerovia va'e. Chipre pygwa va'e. Ha'e gwóga-py ore renogwahẽ ore reraha-vy oropyta hagwã upépy hendive.

¹⁷ Upe-py orogwahẽ oroho-vy ramo, ore rerovy'a Hesu reroviaha kwéry ore rexã ramo.

¹⁸ Ha iko'ẽ-my Paulo ndive oroho herekwa héry va'e Tiago va'e renda-py. Upe-py orogwahẽ javé ra'e ojogweroaty ra'e Hesu reroviaha rerekwa kwéry.

¹⁹ Ha Paulo katu oporandu íxupe kwéry oiko porãha-rehe. Upéi omombe'u íxupe kwéry. Peteĩ teĩ omombe'u gwembiapokwe judeu e'ŷ va'e pa'ũ-my ojapo va'ekwe. Nhandejáry nhe'ẽ-py ojapo japo va'ekwe gwive omombe'upa.

²⁰ Inhe'ẽ ohendu ramo, omomba'egwasu Nhandejáry-pe hikwái. Upéi he'i íxupe Hesu reroviaha rerekwa va'e:

—Ore ko orojohu porã voi mombyry-gwi ne rembiapokwe. Ha a pygwa katu judeu kwéry va'e, ojerovia va'e, nde rapykwe pygwa ndojohu porã. Ojohu porã e'ŷha ereikwaa voi, ore ryvy. Heta eterei judeu ojerovia va'e oĩ. Moisés he'i va'ekwe nhane rekora ojapose joty voi hikwái. Ikyre'ŷha ereikwaa voi.

²¹ Ha oĩ he'i va'e nde-rehe: “Upe Paulo he'i judeu kwéry-pe, judeu e'ŷ va'e pa'ũ-my oiko va'e-pe: Anive pejapo Moisés he'i va'ekwe. Anive peipirekytĩ pene mitã kwimba'e-pe. Anive pehendu pene ramói he'i va'ekwe, he'i voi ko Paulo” he'i íxupe mo'ã nde-rehe, he'i íxupe omombe'u-vy.

²² —Ha ko'ângä katu ojogweroaty-ta judeu ojerovia va'e gwive. Ohendu ramo erégwahêha, ojogweroaty-ta voi.

²³ Upéixa-gwi iporã katu erejapo a-rami, he'i íxupe. Irundy kwimba'e oĩ ore javé. Judeu reko-rupi oiko va'e. Oho-tama Nhandejáry róga kakwaa-py onhemopotĩ uka hagwã Moisés he'i va'ekwe-rami. Upéi onheapiperõ uka-ta hemimombe'ukwe-rupi omboete hagwã Nhandejáry-pe.

²⁴ Ha ko'ângä katu emoirũ íxupe. Ha'e-rami enhemopotĩ ave ijave ereikovy. Eme'ẽ katu íxupe pirapire onheapiperõ hagwã. Upéixa erejapo ramo, gwĩ judeu kwéry nde rexã-ta. Nde rexã ramo he'i-ta: “Ijapu nipo ra'e Paulo-rehe onhe'ẽ va'e” he'i-ta nde-rehe. “Ha'e katu judeu kwéry reko-rupi oiko ave. Ojapo voi nhande-vy Moisés he'i va'ekwe” he'i-ta nde-rehe hikwái, he'i íxupe omombe'u-vy.

25 —Ha judeu e'ŷ va'e ojerovia va'e katu, are-ma voi oromondo va'ekwe íxupe kwéry ore kватia nhe'ẽ: “Ani penhemongy'a teĩ pe'u-vy tembi'u tupã ra'anga rovagwy-py onhemoī va'ekwe. Ani peiko rei teĩ kunha kwimba'e ndive. Ani pe'u teĩ ijuka-vy ohumbiri va'ekwe. Ani pe'u teĩ so'o hugwy rehev.” Kóá nhe'ẽ oromondo va'ekwe íxupe kwéry, he'i íxupe Hesu rерoviahа rerekwa va'e omombe'u-vy.

26 Ha upéi katu Paulo oho. Upe irundy kwimba'e jave oho. Iko'ẽ-my ojapo myamyrí Moisés he'i va'ekwe. Onhemopotí oiko-vy óga kakwaa-py hikwái. Upéi Nhandejáry róga kakwaa-py oike jevy omombe'u hagwã mbovy áry po ohasa-ta onhemopotí porãmba peve. Upéi he'i pa'i-pe: —Oronhemopotimba rire, peteĩ teĩ orome'ẽ-ta nde-vy ne rembijukapyrã, he'i íxupe omombe'u-vy.

Coronel oipyhy Paulo-pe

27 Paulo onhemopotí hagwe peteĩ semana ojapo. Ndopái vyteri ramo, gwí judeu kwéry, Ásia gwigwa va'e ohexá íxupe Nhandejáry róga kakwaa-py. Ohexá ramo ombopoxypa kente kwéry oipyhy hagwã íxupe:

28 —Nhande re'ýi kwéry, Israel remiarirõre kwéry, ore pytygwõ katu, he'i onhe'ẽ hatã-vy judeu kwéry. —Ko va'e kwimba'e ko nhane moakãrasý va'e. Opa va'e rupigwa-pe he'i va'e nhane rendu e'ŷ hagwã. Inhe'ẽ rei rei va'e nhande kwéry-rehe. Moisés he'i va'ekwe nhane rekorã-rehe onhe'ẽ rei rei. Inhe'ẽ rei rei ave Nhandejáry róga kakwaa-rehe. Ha ko'ângá katu judeu e'ŷ va'e-pe ogwenogwahẽ-ma Nhandejáry róga-py. Ogwenogwahẽ-vy omongy'a koty marangatu kuri, he'i mo'ã hese onhe'ẽ hatã-vy.

29 Ohexá ra'e hikwái Éfeso gwigwa héry va'e Trófimo, judeu e'ŷ va'e. Paulo ndive ohexá ogwata ramo upe tetã-rupi. Ohexá ramo: “Ogwenogwahẽ nipo ra'e Nhandejáry róga-py” he'i mo'ã hese. Upéa-gwi: “Omongy'a koty marangatu” he'i mo'ã hese hikwái.

30 Inhe'ẽ ohendu ramo, ipoxypa hikwái. Upe tetã mygwa gwive ojog-weroaty aty hikwái oipyhy hagwã Paulo-pe ombotyryry-vy. Koty-gwi og-wenohẽ heraha-vy. Upe-ma ramo omboty-ma Nhandejáry róga rokẽ. Hapyk-were okẽ omboty-ma.

31 Ojukase mo'ã íxupe hikwái. Ojukase jave, coronel-pe ogwahẽ ipoxyha rerakwã:

—Ipoxy okwa-vy Jerusalém pygwa gwive, he'i omombe'u-vy.

32 Upe-ma ramo oripara ogwejy ou-vy. Ojave ogweru soldado kwéry, capitão ave. Ohexá ramo coronel-pe soldado-pe ave hikwái, noinupãvéiry-ma íxupe.

33 Upe rire coronel ogwahẽ ou-vy oipyhy Paulo-pe. He'i oipokwa hagwã íxupe mokõi ipo-rehe. Upéi oporandu upe-py oĩ va'e kwéry-pe:

—Kiva'e tipo kóá? Mba'éixa tipo héry? Mbava'e tipo ojapo ko va'e? he'i upe pygwa-pe.

34 Ha omombe'u joavy avypa hikwái. Upéa-gwi ndoikwaáiry voi soldado ruvixa. Ijayvu eterei voi hikwái. Upéa-gwi nohendúi mba'eve. Upéixa ramo he'i ogweraha hagwã koty-py, soldado kwéry renda-py.

35 Ogwahẽ ramo ijeupi haty-py, ogwerojeupi íxupe heraha-vy ani hagwã ojuka íxupe, Paulo-pe ipoxy va'e:

36 —Peraha katu pejuka. Peraha katu pejuka, he'i onhe'ẽ hatã hatã-vy Paulo-rehe gwí hupive kwéry ogwa'ẽ va'e.

37 Ha upéi katu nogwenogwahẽi vyteri íxupe koty-py. Oĩ joty ijeupi haty-py:

—Amombe'use voi nde-vy peteĩ mba'e, he'i Paulo coronel-pe.

Onhe'ẽ ramo, ohexá katu íxupe. He'i íxupe:

—Erenhe'ẽ kwaa nipo ra'e grego nhe'ẽ-py, he'i.

38 —Aipo ramo ndaha'éi nipo nde ra'e upe Egito gwigwa erembopoxy va'ekwe kente kwéry-pe. Ndererahái nipo tekwat y e'ŷ-my irundy mil kwimba'e oporojuka va'ekwe, he'i Paulo-pe coronel.

39 Upéi he'i coronel-pe:

—Ndaha'éiry xe upe va'e, he'i. —Xe ae judeu kwéry va'e, Tarso tetã mygwa xe, he'i. —Tarso tetâgwasu voi. Cilícia yvy-py oĩ va'e. Ây anhe'ëse voi hendive kwéry, eheja katu tanhe'ë hendive kwéry, he'i coronel-pe.

40 —Aipo ramo, enhe'ë katu, he'i íxupe coronel.

Upéixa ramo onhembo'y oĩ-vy ijeupi haty-rehe. Ombovava opo íxupe kwéry omokirirí hagwã. Okiririmbá rire-ma onhe'ë íxupe kwéry. Hebreu nhe'ë-py onhe'ë íxupe kwéry.

22

“Anhe'ë-ta xéjehe” he'i Paulo Judeu kwéry-pe

1 Ha Paulo he'i judeu kwéry-pe:

—Xe ryvy kwéry, xe ru kwéry ave, pehendu katu xe rehewa nhe'ë. Anhe'ëta xéjehe, he'i.

2 Ohendu ramo inhe'ë hikwái:

—Nhane nhe'ë-py onhe'ë ra'e, he'i ojóupe hikwái.

Upéa-rehe ni peteñ jepe nonhe'ëiry. Okiririmbáte voi ojeapysaka-vy hese.

3 Ha ha'e katu he'i íxupe kwéry:

—Xe voi judeu kwéry va'e, Tarso tetã mygwa. Upe tetã Cilícia yvy pygwa. Ha ko'a-py xe mbo'e mbo'e oiko-vy va'ekwe. Xe mbo'eháry héry Gamaliel.

Nhande ru kwéry he'i va'ekwe gwive, upéa ahendu porãmba va'ekwe voi, he'i. —Aikwaapa porã peve xe aiko va'ekwe. Ko'ẽmba ëmba ajapose voi Nhandejáry remimbota gwive. Ây pejaposeha-rami voi Nhandejáry remimbota, ajapose mo'ã voi va'ekwe xe ave. Peteñ teñ áry-py ajapo aiko-vy, he'i íxupe kwéry.

4 —Yma va'ekwe areko asy aiko-vy Hesu rape pyhyha ajuka uka hagwã. Aha va'ekwe aipokwa-vy amoï uka hagwã preso. Kunha kwimba'e ave amoï uka va'ekwe preso, he'i.

5 —Anhetegwa voi xe amombe'u xe rembiapokwe. Ndaxe apúi ramo, oikwaa voi pa'i ruvixagwasu. Judeu ruvixa kwéry gwive oikwaa ave. Gwĩ mburuvixa kwéry ome'ë xe-vy va'ekwe kwatia nhe'ë xe araha hagwã nhande ryvy kwéry, Damasco tetã-my oiko va'e-pe. Upéixa ramo ndaxe ae reíry aha. Pa'i ruvixagwasu nhe'ë-rupi ae aha amoingo asy hagwã Hesu reroviahá-pe. Ha upéi katu aha Damasco tetã-my. Upe-py aipyhy-ta mo'ã aipokwa hagwã heru-vy. Ko'a-py aru jevy-ta mo'ã ambohasa asy uka hagwã.

6 —Upéi laróse-rupima agwata jave aha-vy, namombyry etevéi-ma xe ag-wahẽ hagwã upe-py. Upe-ma ramo ho'a-ma xe-rehe hendy mbaraete va'e. Yvate-gwi hendy va'e.

7 Ha'a-ma aha-vy yvy-py. Ahendu-ma he'i va'e xe-vy: “Saulo, Saulo” he'i xe-vy xe renói ramo. “Ma'erã tipo xe mbohasa asy?” he'i xe-vy.

8 “Kiva'e tipo nde, xe Járy” ha'e íxupe. “Xe ko Hesu Nazaré pygwa. Xe-vy voi xe mbohasa asy” he'i xe-vy, he'i omombe'u-vy.

9 —Ha xe ndivegwa hendy mbaraete ramo ohexa ha xe-vy onhe'ë va'e nhe'ë katu nohendúiry.

10 “Mbava'e tipo xe ajapo-ta ãy, xe Járy” aporandu íxupe. “Epu'ã katu tereho Damasco tetã-my. Upe-py omombe'u-ta nde-vy opaixagwa ne rembiaporã, Nhandejáry remimbota” he'i xe-vy Hesu.

11 Ha xe nama'ẽvái-ma. Xe resaka eterei-gwi nama'ẽvái-ma. Upéa-gwi xe popyhy rei-ma xe reraha-vy xe ndivegwa. Upe rire orogwahé ore oroho hapy.

12 —Ha upéi katu ogwahé ou-vy xe ha-py kwimba'e héry va'e Ananias. Moisés he'i va'ekwe apoha va'e: “Upe va'e hekoha porã va'e” he'i hese upepy oiko va'e judeu va'e gwive. Imandu'a porã hese.

13 Ha upéi katu ogwahé ramo ou-vy, onhembo'y xe ypy-py oĩ-vy: “Ema'ẽ jevy mani katu, xe ryvy Saulo” he'i xe-vy. Upe-ma ramo xe resa jevy-ma ahexa-ma íxupe.

14 —Ha he'i xe-vy: “Nhandejáry ko, nhande ramoigwasu kwéry Járy va'e, nde poravo araka'e ereikwaa hagwã hemimbota. Erehexá hagwã upe hekoha porã va'e Hesu-pe nde poravo araka'e” he'i xe-vy. “Ha ko'ângá katu erehexá-ma íxupe kuri. Áy kuri erenhomongeta hagwã hendive nde poravo araka'e. Áy katu erenhomongeta-ma kuri hendive” he'i xe-vy.

15 “Upéixa ramo eremombe'u mbe'u-ta kente kwéry va'e-pe gwive Hesu rehewa nhe'ẽ. Ne rembiexakwe, ne remiendukwe ave eremombe'u-ta imosarambi-vy.

16 Áy voi epu'ã mani katu enhemongarai uka Nhandejáry Hesu réry renóivy”, he'i xe-vy. “Ere katu: Xe ajerovia-ma Nhandejáry Hesu-rehe, ere katu. Upéixa ramo omopotí-ta nde py'a iky'a va'e Nhandejáry” he'i xe-vy Ananias.*

17 —Upe rire aha jevy Jerusalém teta-my aike Nhandejáry róga kakwaa-py. Upe-py ambojeupi Nhandejáry-pe xe nhe'ẽ aĩ-vy. Upe javé, ojehexá uka xe-vy Nhandejáry Hesu. Xe-vy anhóte ojehexá uka.

18 Ahexa íxupe xe-vy onhe'ẽ ramo: “Tereho katu ejapura pura ekwa-vy, ko tetã-gwi ereho-vy. Xe rehewa eremombe'u ramo jepe nohendu mo'âiry voi” he'i xe-vy Hesu.

19 Upe ramo ha'e íxupe: “Ojeporahéi haty haty-rupi aike ike va'ekwe, Xe Járy. Xe amoï uka va'ekwe preso nde-rehe ojerovia va'e.

20 Ainupã uka va'ekwe ave. Ojuka javé hikwái nde rehewa mombe'uhare héry va'e Estêvão, ijave ave xe aime va'ekwe. Hembiapokwe ajoju porã va'ekwe. Ijukaharã ao-rehe xe anhangareko hese va'ekwe. Upe va'e xe rembiapokwe gwive oikwaapa judeu kwéry. Xe kwaapa voi, xe Járy” ha'e íxupe.*

21 —Ha he'i joto xe-vy Nhandejáry Hesu: “Tereho katu. Oromondo-ta mombyry judeu e'ŷ va'e oiko ha-py oromondo-ta nde-vy” he'i xe-vy Hesu, he'i íxupe kwéry omombe'u-vy Paulo.

Coronel he'i ombopi hagwã Paulo-pe

22 Ha ha'e kwéry ohendu porã meme inhe'ẽ. Ha, “Aha-ta judeu e'ŷ va'e oiko ha-py” he'i-ma ramo katu, ojohu vai. Upe va'e nhe'ẽ ombopoxypa íxupe kwéry. Hatã hatã voi onhe'ẽ:

—Upéa kwimba'e pejuka katu. Iporãve ndoikovéiry nhane pa'ũ rupi, he'i Paulo-rehe.

23 Onhe'ẽ hatã javé, oipe'a ojéhegwí ao ombovava hagwã. Ojara yvy ku'i opo-py omombo hagwã yvate-koty. Omotimbo yvy ku'i opoxy-gwi.

24 Upéixa ramo coronel he'i ogweroike hagwã Paulo-pe koty-py:

—Embopi mbopi íxupe eremonhe'ẽ hagwã, he'i. —Omombo'u ramo jaikwaa hagwã, Mbava'e po ojapo ra'e, mbava'e-gwi ijayvupa hese ra'e ipoxy-vy hikwái. Embopi íxupe omombo u hagwã gwembiapokwe, he'i soldado-pe.

* 22:16 At 9.1-19; 26.12-18; Fp 3.4-6 * 22:20 At 7.58

²⁵ Upéi ou oipokwa-vy íxupe okyta-rehe imoī-vy. Upéa-gwi Paulo he'i capitão-pe ijyke-rehe onhembo'y oī-vy ramo:

—Xe mbopi rei-ta. Xe ko romano kwéry va'e. Ne'írã xe monhe'ẽ, ne'írã ereikwaa vyteri xe rembiapokwe. Nanhambopíry va'e romano kwéry-pe nhamonhe'ẽ e'ŷ reheve, he'i. —Upéixa ramo ivai va'erã xe mbopi rei ramo, he'i capitão-pe.

²⁶ Ohendu ramo inhe'ẽ oho omombe'u coronel-pe:

—Ma'erã tipo erembopi uka-ta ko kwimba'e? Ha'e katu romano kwéry va'e voi. Xáke, erembopi ramo, ne rembiapo vai-ta, he'i coronel-pe.

²⁷ Upe ramo ou coronel. Paulo renda-py ou oporandu-vy íxupe:

—Nde tipo romano kwéry va'e. Emombe'u katu xe-vy, he'i oporandu-vy íxupe.

—Xe voi, he'i coronel-pe.

²⁸ Upéi he'i íxupe:

—Heta va'ekwe xe ame'ẽ pirapire apyta hagwã romano ramo, he'i Paulo-pe.

Upe ramo he'i coronel-pe:

—Romano kwéry va'e teĩ xe. Ndapagáiry. Name'ẽi mba'eve. Xe ru katu romano kwéry va'e. Ha'e hesegwa teĩ ave xe. Name'ẽi mba'eve, he'i coronel-pe.

²⁹ Upe-ma ramo opa osẽmba oje'óí-vy imbopiharãgwe mo'ã ikyhyje-gwi. Ikyhyje ave coronel. “Paulo romano kwéry va'e ae nipo ra'e” he'i ojéupe hikwái. Onhe'ẽ-py rei oipokwa-gwi, ikyhyje.

³⁰ Iko'ẽ-my he'i coronel: “Mbava'e-gwi tipo ipoxy Paulo-rehe judeu kwéry?” he'i ojéupe. Upéa-gwi he'i ojogweroaty hagwã iha-py pa'i ruvixa kwéry, judeu ruvixa kwéry gwive ave. He'i ave opoi hagwã Paulo-gwi. Upéi ogwerogwejy heraha-vy. Hovagwy-py kwéry omonhembo'y íxupe imoī-vy.

23

Paulo onhe'ẽ judeu ruvixa kwéry-pe

¹ Upe ramo Paulo ohexa katu katu ojogweroaty va'e-pe, judeu ruvixa gwive. He'i íxupe kwéry:

—Yma gwive ko'ângá ete peve, xe re'ýi kwéry, aiko meme Nhandejáry ndive. Ajapose meme va'e Nhandejáry remimbota. Upéa oikwaa Nhandejáry. Xe apu ramo, ha'e oikwaa, he'i. —Hesa-gwi nokanhýi mba'eve. Oikwaapa voi, he'i íxupe kwéry Paulo.

² Ha upéa nhe'ẽ ohendu-ma ramo ogweropoxy pa'i ruvixagwasu héry va'e Ananias. He'i Paulo yke rehewa-pe ojurupete hagwã íxupe.

³ Ha ha'e he'i pa'i ruvixagwasu-pe:

—Nde rova-py ipotĩ. Nde py'apy-py katu iky'a. Nde rerekosasy-ta ave Nhandejáry, he'i íxupe. —Eregwapy ereĩ-vy xe monhe'ẽ hagwã. Moisés he'i va'ekwe-rami xe monhe'ẽ hagwã ereiko. Ma'erã xe nupã uka xe monhe'ẽ e'ŷ reheve? he'i. —Upéixa nde'íry va'ekwe Moisés nhande-vy va'ekwe, he'i pa'i ruvixagwasu-pe.

⁴ Upe ramo ijyke-rehe onhembo'y oī va'e:

—Ani erenhe'ẽ vai teĩ pa'i ruvixagwasu, Nhandejáry rembigwái va'e-rehe, he'i íxupe hikwái.

⁵ Ha'e katu he'i:

—Néi, he'i. —Naiporãi teĩ nhanhe'ẽ vai teĩ pa'i ruvixagwasu-rehe. “Ani erenhe'ẽ vai teĩ nde re'ýi ruvixa-rehe.” Upéixa omoī va'ekwe kwatia-rehe Nhandejáry nhe'ẽ, he'i omombe'u-vy. —Ha ndaikwaáiry voi xe íxupe, xe re'ýi

kwéry. Pa'i ruvixagwasu oĩ ramo ndaikwaáiry xe íxupe, he'i upe-py oĩ va'e-pe.*

⁶ Upe rire oma'ẽ katu katu judeu ruvixa kwéry-rehe. Oma'ẽ ramo, ohexa jopara katu. Oĩ saduceu va'e, oĩ fariseu va'e ave. Ohexa ramo ambue mbue, onhe'ẽ hatã:

—Xe re'yí kwéry, xe ko fariseu kwéry va'e, fariseu ra'y ave. “Omano va'ekwe gwive oikove jevy va'erã” xe ha'e va'e amombe'u-vy. Upéa nhe'ẽ-gwi xe reru a-py xe monhe'ẽ, he'i huvixa kwéry-pe.

⁷ Upéa he'i-ma ramo, onhonhe'ẽ mbojevy jevypa hikwái, ndogwerojojáiry onhonhe'ẽ.

⁸ Ha saduceu kwéry he'i va'e no'ã-rami: “Ndoikove jevyí va'erã omano va'ekwe. Nhamano rire, nhane nhe'ẽ ndoikovéi-ma va'erã” he'i mo'ã. “Ndoikói va'e Nhandedjáry rembigwái yváy pygwa” he'i mo'ã ave.

Ha fariseu kwéry katu ndogweroviáiry inhe'ẽ: “Oĩ voi Nhandedjáry rembigwái yváy pygwa. Oikove jevy-ma va'erã ave omano va'ekwe. Oikove jevy-ma va'erã voi ko nhane nhe'ẽgwe” he'i va'e.

⁹ Upéixa ramo ijayvu eterei. Upe rire onhembo'y-ma gwí judeu rekombo'ehaty va'e, fariseu va'e. Onhe'ẽ hese:

—Nahembiapo vaíry nipo ra'e. “Orojohu porã hembiapokwe. Nhe'ẽte ohendu para'e. Nhandedjáry rembigwái nhe'ẽ ohendu para'e. Koixagwa nhe'ẽ Paulo ohendu ramo, ndikatúi nhapyrũ Nhandedjáry nhe'ẽ-rehe” he'i judeu ruvixa kwéry-pe.

¹⁰ Upéixa ramo onhonhe'ẽ mbojevy jevy hikwái. Hatãve tãve onhe'ẽ. Ipoxyve xyve voi hikwái. Ha coronel katu oma'ẽ ma'ẽ rei hese kwéry: “Ojukatama Paulo-pe hereko-vy hikwái” he'i ojéupe coronel ikyhyje-vy. Upéa-gwi he'i soldado-pe ogwejy hagwã oipe'a heru-vy ojóhugwi kwéry:

—Eru ne renda-py, he'i.

Upéi oho ogweru íxupe.

Nhandedjáry Hesu ojehexa uka Paulo-pe

¹¹ Ha upéi katu pyhare Nhandedjáry Hesu onhembo'y ijyke-rehe. Ikéra-py onhembo'y oĩ-vy ijyke-rehe:

—Ani erekhyje teĩ, he'i. —Enhembopy'agwasu katu. A-py xe mombe'u mbe'uga-rami, xe mombe'u va'erã ave Roma tetã-my, he'i íxupe Nhandedjáry Hesu.

Judeu kwéry onhombo'e mbo'e Paulo-rehe ojuka hagwã

¹² Ko'ẽmba-ma ramo ojogweroaty judeu kwéry:

—Jajuka Paulo, he'i onhombo'e mbo'e okwa-vy hese. Omoporã porã onhonhe'ẽ hikwái: —Ndajakaru mo'ãvái, ndajay'u mo'ãvái ave. Jajuka rire ae Paulo-pe, jakaru jevy va'erã, jay'u jevy va'erã, he'i hikwái ojóupe. —Tanhane mbohasa asy Nhandedjáry jajuka e'ỹ mboyve jakaru ramo, he'i omoporã porã-vy ojóupe onhonhe'ẽ.

¹³⁻¹⁴ Upéa he'i va'e quarenta-gwi oïve vyteri. Upéi oho pa'i ruvixa kwéry renda-py, judeu ruvixa renda-py ave. Oho omombe'u-vy:

—“Ndikatu mo'ãvái orokaru Paulo orojuka e'ỹ mboyve” oro'e kuri aje'i Nhandedjáry-pe. Ore apu ramo oikwaa arã Nhandedjáry, he'i.

¹⁵ —Ãy katu pemondo mani coronel-pe pene nhe'ẽ mombe'u uka-vy. Tomondo ave onhe'ẽ judeu ruvixa kwéry gwive: “Togwejy katu Paulo touvy ore renda-py. Oromonhe'ẽse íxupe orohendu hagwã inhe'ẽ, oroikwaa porãve hagwã hembiapokwe” peje mo'ã íxupe imbotavy-vy, he'i. —Ogwahẽ

* 23:5 Ex 22.28

e'ŷ mbove Paulo, oroha'arõ-ta íxupe orojuka hagwã, he'i mburuvixa kwéry-pe.

¹⁶ Ha Paulo reindy memby kwimba'e katu ohendupa hesegwa nhe'ẽ. Oha'arõ oĩ-vy va'e nhe'ẽ ohendu. Upéa-gwi oho omombe'u. Paulo renda-py oike omombe'u hagwã íxupe.

¹⁷ Ha Paulo katu he'i capitão-pe:

—Ko va'e eraha katu coronel-pe. Oĩ hemimombe'urã, he'i capitão-pe.

¹⁸ Upéixa ramo ogweraha íxupe coronel renda-py. Ogwahẽ ramo henda-py, he'i coronel-pe:

—Upe onhemoĩ va'e preso héry va'e Paulo xe renói-ma kuri: “Eraha katu ko karia'y coronel renda-py. Oĩ hemimombe'urã” he'i xe-vy imombe'u-vy, he'i coronel-pe.

¹⁹ Ohendu ramo inhe'ẽ, oipopyhy-ma heraha-vy upe karia'y-pe. Ogwenohẽ ha'e anho heraha-vy. Oporandu íxupe ha'e anho ha-py:

—Mbava'e tipo eremombe'use? he'i íxupe.

²⁰ Ha Paulo reindy memby omombe'u coronel-pe judeu nhe'ẽgwe:

—He'i kuri judeu kwéry: “Ja'e-ta coronel-pe: Togwejy katu ko'ẽ ramo Paulo tou-vy. Togwejy orojogweroaty haty-py. Oromonhe'ẽse íxupe orohendu hagwã inhe'ẽ oroikwaa porãve hagwã hembiapokwe, ja'e-ta coronel-pe” he'i judeu kwéry.

²¹ Ha nde ani erejapo teĩ kuri inhe'ẽ. Ijapu voi hikwái. Áy ohapera'arõ arõ-ta íxupe okwa-vy ojuka hagwã. Heta oĩ oha'arõháry quarenta-gwi oĩve vyteri. “Ndorokaru mo'ãvéi, ndoroy'u mo'ãvéi ave Paulo orojuka e'ŷ mboyve” he'i kuri Nhandejáry-pe. Ánga ete-ma voi oha'arõ íxupe ne nhe'ẽ-rupi ogwejy ramo, ojuka hagwã íxupe. Ogwejy-ma ramo, oha'arõmba-ma ijukaharã, he'i coronel-pe imombe'u-vy.

²² Ohendu ramo inhe'ẽ:

—Ani avave-pe eremombe'u mbe'u teĩ xe aikwaaha, he'i. —Xe aikwaah ramo hembiaporã, ani xe mombe'u mbe'u. Tereho katu, he'i íxupe coronel.

²³ Upe-ma ramo mokõi capitão-me ohenói ou hagwã. Ou ramo, he'i íxupe upe coronel omanda-vy:

—Pyhare pytûmba-ma ramo, emonhembosako'i uka katu duzentos soldado, setenta kavaju arigwa reheve, he'i. —Emoangekóí uka mani katu oje'õi hagwã mombyry Cesaréia tetã-my, he'i. —Outro soldado mba'e jukaha hu'y puku joa ogwereko va'e duzentos oĩ va'e, emonhembosako'i uka ave.

²⁴ Eiporu uka katu ave Paulo renagwã, he'i. —Eraha íxupe ojehu e'ŷ reheve mba'eve íxupe. Mburuvixagwasu héry va'e Félix renda-py eraha íxupe, he'i capitão-pe coronel.

Coronel omoĩ kwatia-rehe onhe'ẽ

²⁵ Upéi coronel ogweraha uka ave kwatia-rehe onhe'ẽ mburuvixagwasupe.

²⁶ No'ã-rami omoĩ kwatia-rehe: “Xe Cláudio Lísias amondo-ta xe nhe'ẽ ndevy xe ruvixa Félix. Enterovete va'e ne mboete va'e. Mba'éixa tipo ereiko? Ne resãi ave pa ereiko-vy?

²⁷ Ko'ângá oromondo-ta ko kwimba'e héry va'e Paulo. Kwehe aresende íxupe ijukaharãgwe-gwi. Judeu kwéry oipopyhy rire íxupe, ojuka-tama ra'e ogwereko íxupe. Upe jave xe agwahẽ soldado kwéry ndive aresende íxupe. Ha'e romano kwéry. Ha aikwaah ramo íxupe romano gwigwa voi aresende íxupe heraha-vy.

²⁸ Upéi araha jevy íxupe judeu ruvixa kwéry ojogweroaty haty-py. Upe-py aporandu hembiapo vaikwe-rehe: Mbava'e tipo ojapo ra'e ko kwimba'e Paulo? ha'e aporandu-vy.

²⁹ Ha mba'eve nomombe'úi xe-vy. MBA'eve ndojapóiry ra'e. Ipoxy rei ra'e judeu kwéry hese. Paulo nohenduí ramo judeu he'i va'e, ipoxy hese hikwái. Judeu reko-rupi mate ndogwatái ra'e Paulo. Upéa-rehe rei ndaikatúi amoĩ preso, ndaikatúi ave ajuka uka íxupe.

³⁰ Preso oĩ vyteri jave ogwahẽ xe-vy imombe'uháry: Oĩ judeu Paulo ra'arõha, he'i xe-vy. Áy voi oha'arõ ojuka hagwã íxupe, he'i kuri xe-vy omombe'u-vy. Aipo ramo ha'e xejeupe: Amondo-ta mburuvixagwasu ha-py Paulo, ha'e. Upéi ha'e judeu kwéry-pe: Tapeho katu mburuvixagwasu rendapy. Pemombe'u íxupe Paulo rembiapokwe. Paulo ko hembiapo vai, peje hese. Upéa-gwi tapeho katu pemombe'u, ha'e íxupe kwéry." Upéixa voi coronel omoĩ kwatia-rehe onhe'ẽ.

Paulo ogwahẽ oho-vy Cesaréia tetã-my

³¹ Upéixa ramo soldado kwéry ojapo inhe'ẽ. Coronel he'i va'ekwe ojapo. Ogweraha oho-vy Paulo-pe. Pyhare ogweraha íxupe Antipátride tetã-my.

³² Ko'ẽmba-ma ramo, oheja íxupe soldado yvy rupigwa. Oheja-ma ramo, ou jevy íxugwi henda-py. Ha kavaju arigwa katu oho mombyryve joty hendive hikwái.

³³ Ogwenogwahẽ heraha-vy Cesaréia tetã-my. Upe-py ogwahẽ ramo oho-vy, ome'ẽ kwatia nhe'ẽ mburuvixagwasu-pe:

—Ko va'e Paulo, he'i mburuvixa-pe hexa uka-vy.

³⁴ Omonhe'ẽ rire kwatia nhe'ẽ:

—Kiva'e yvy pygwa tipo nde? he'i Paulo-pe oporandu-vy.

—Cilícia yvy pygwa xe, he'i Paulo.

³⁵ Ohendu ramo inhe'ẽ:

—Néi, he'i. —Ne rembiapokwe mombe'uharã ogwahẽ ramo, oromonhe'ẽ-ta ave ahendu hagwã ndejehegwigwa nhe'ẽ, he'i íxupe.

Upe rire he'i soldado-pe:

—Enhangareko katu hese Herodes róga kakwaa-py, he'i.

24

Judeu kwéry omombe'u Paulo rembiapokwe

¹ Cinco áry rire ogwahẽ ou-vy Cesaréia tetã-my pa'i ruvixagwasu héry va'e Ananias. Indive ou ave ndahetáí judeu ruvixa. Ogwahẽ ave ou-vy onhe'ẽ kwaa va'e héry va'e Tértulo. Ogwahẽ ramo omombe'u mburuvixagwasu-pe héry va'e Félix, Paulo rembiapokwe.

²⁻³ Upéi mburuvixagwasu he'i ogweru hagwã Paulo. Ou ramo, onhembo'y Tértulo omombe'u hagwã Paulo rembiapokwe:

—Ore ko oromomba'egwasu ete voi nde-vy, Félix. Orotima porã nde-vy erejapo japo va'ekwe-rehe ore-vy. Nde erei-gwi ore jojapa enterove va'e oroiko-vy. Ore kwéry-rehe erenhangareko porã porã. Upéa-gwi ore kwéry oroiko porãve rãve. Upéa-rehe orotima porã nde-vy.

⁴ —Noromoakãrasyséi-gwi nanhe'ẽ hetaséiry. Ndahetáí ramo jepe xe nhe'ẽ, xe mboete joty katu. Ejeapysaka katu xe nhe'ẽ-rehe.

⁵ Upéa kwimba'e héry va'e Paulo ndorojohu porãí íxupe. Upe va'e ko nhane moakãrasys va'e. Judeu kwéry-pe opa-rupi oiko va'e-pe gwive ombopoxy poxy va'evy voi upéa, he'i. —Hesu Nazaré pygwa nhe'ẽ renduha ruvixa upé va'e, he'i.

6 —Kweheve omongy'a-ta mo'ã Nhandejáry róga kakwaa kqty marangatu omongy'a-ta mo'ã. Ha orojoko íxupe oroipyhy-vy. Orogwereko-ta mo'ã íxupe judeu kwéry he'i hagwe-rami.

7 Upe-ma ramo ogwahé ou-vy coronel héry va'e Lísias. Ore moanha anha ramo, hatã eterei oipe'a íxupe oréhegwí heraha-vy.

8 Upéi he'i ore-vy: “Paulo rembiapokwe omombe'use va'e toho katu mburuvixagwasu renda-py” he'i ore-vy. Ore remimombe'u va'e hese anhetegwa voi. Nde eremonhe'ẽ ramo ave íxupe, ereikwaa ave va'erã anhete va'e, he'i mburuvixagwasu-pe Tértulo.

9 —Upéixa voi, he'i joa judeu kwéry, omoporã-vy onhonhe'ẽ. —Anhetegwa voi Paulo-rehe hemimombe'ukwe, he'i joa hese.

Paulo omombe'u mburuvixagwasu-pe ojehegwigwa nhe'ẽ

10 Ha upéi katu mburuvixagwasu opo-py omombe'u íxupe onhe'ẽ hagwã. Upe-ma ramo, Paulo he'i mburuvixagwasu-pe:

—Judeu kwéry onhonhe'ẽ mbojevy jevy okwa-vy ramo, are-ma erembohory íxupe kwéry. Upéa-gwi iporã amombe'u-ta nde-vy xe rembiapokwe. Xejehegwigwa nhe'ẽ amombe'u-ta nde-vy.

11 —Ojapo doze áry mante xe aha hagwe Jerusalém tetã-my, he'i. —Upe-py aha amboete-vy Nhandejáry-pe. Oĩ xe rexahare. Ereikwaa porãse ramo, omombe'u va'erã nde-vy xe rexa ramo.

12 Avave-pe nanhe'ẽ mbojevy jevýiry. Xe rexa e'ŷ reheve xe mombe'u rei. Nambopoxýiry xe rapixa kwéry-pe. Xe rexa e'ŷ reheve xe mombe'u rei judeu kwéry. Naxe rembiapo vaíry aiko-vy Nhandejáry róga kakwaa-py. Ojeporahéi haty haty-rupi, upe tetã-rupi ave naxe rembiapo vaíry aiko-vy.

13 Áy katu ndaipóri a-py xe rexahare eremonhe'ẽ hagwã ereikwaa porãve hagwã hemimombe'u kwéry.

14 Ha peteĩ va'e hemimombe'u ndaijapúi va'e. “Hesu rape Paulo oipyhy voi” he'i xe-rehe, he'i omombe'u-vy. —Xe ko amboete aiko-vy va'e voíte Nhandejáry-pe, ore ramói Járy va'e. Ha judeu kwéry he'i mo'ã xe-rehe: “Hesu rape oipyhy ramo Paulo, ndoikovéi Nhandejáry reko-rupi. Ojere-ma íxugwi” he'i mo'ã xe-rehe hikwái, he'i omombe'u-vy. —Ha ndaha'ei upéixa. Amboete aiko-vy va'e Nhandejáry-pe. Hesu nhe'ẽ ahendu ramo, amboete aiko-vy Nhandejáry-pe. Ha'e kwéry-rami ave xe arovia Moisés ohai va'ekwe kwaitia-rehe gwive. Nhandejáry nhe'ẽ-py omombe'u va'ety ohai va'ekwe kwaitia-rehe ave arovía voi.

15 Ha'e kwéry-rami ajerovia Nhandejáry-rehe. Upe omoingove jevy va'erã-rehe ajerovia. Entéro omano va'ekwe gwive omoingove jevy va'erã. Hekoha porã va'e gwive, hekoha vai va'e gwive ave opu'ã jevy va'erã. Upéa nhe'ẽ xe arovia.

16 Upéa nhe'ẽ ha'e kwéry ogwerovia ave. Xe rekoha oikwaa porã Nhandejáry. Hesa-gwi nokanhýi mba'eve. Teko rei-rupi aiko ramo xe rexa ave. Upéa-gwi ndajejavyséiry. Xe py'a potí porãse meme voi aiko-vy, he'i.

17 —Are-ma aha va'ekwe mombyry. Áy ae aju jevy ramo. Xe re'ýi kwéry-pe agwahé aju-vy. Aru aju-vy iporiahu va'e kwéry-pe amboja'o ja'o va'erã ime'ẽ-vy pirapire. Nhandejáry-pe xe remime'ẽrã aru aju-vy ave.

18 Upéa ame'ẽ javé, Nhandejáry róga kakwaa-py xe topa hikwái. Anhemopotí Moisés remimombe'ukwe-rupi aí-vy ramo xe topa. Xe topa ramo, ndaipóri ijaty va'e. Onhombopoxy va'e ndoikói ave.

19 Ásia pygwa judeu va'e mante xe topa va'ekwe. Ma'erã ndoúi ne renda-py xe mombe'u hagwã? “Paulo hembiapo vai voi oiko-vy” he'i hagwã xe-rehe, ndoúiry nde ha-py. Ma'erã ndoúi xe mombe'u porã hagwã nde-vy?

²⁰ Ha ndoúi va'e rekoviá ou va'e, taxe mombe'u katu. A-py ou va'e taxe mombe'u kuri, he'i. —Kwehe xe monhembo'y xe monhe'ẽ uka-vy. Judeu ruvixa kwéry rovagwy-py xe monhe'ẽ kuri. Upéixa ramo xe rembiapo vai ramo, taxe mombe'u katu.

²¹ Anhembo'y jave hovagwy-py kwéry, mba'eve ndajapóiry. A-rami ae voi anhe'ẽ hatã kuri: "Etería peẽ xe monhe'ẽ voi. Xe arovía voi jaikove jevymaha rehewa nhe'ẽ. O mano va'ekwe oikove jevy va'erã va'e rehewa nhe'ẽ xe arovia voi. Upéa-gwi xe monhe'ẽ etería" ha'e xe monhe'ẽháry-pe, he'i mburuvixagwasu-pe Paulo onhemombe'u-vy.

Mburuvixagwasu oheja preso Paulo-pe

²² Ha mburuvixagwasu katu ohendu ramo inhe'ẽ, hembiapokwe-rehe mba'eve nde'íry íxupe. Hesu rape pyhyháry rekoha oikwaa porã va'e. Upéi he'i:

—Ãy nda'e mo'ãiry ne rembiapokwe-rehe. Kóa ndaha'éi etería gwarã, he'i. —Ko'ẽ ramogwarã jaheja-ta nhane nhe'ẽrã. Ogwahẽ ou-vy ramo ae coronel Lísias ha'e-ta ne rembiapokwe-rehe, he'i íxupe mburuvixagwasu.

²³ Upéi he'i capitão-me:

—Emoï katu íxupe preso. Ani ererekoo asy teĩ íxupe, he'i. —Ogwahẽ ramo hemikotevã reruha, ani erejoko teĩ. "Egwahẽ katu" ere íxupe, he'i omanda-vy.

²⁴ Ndahtái áry rire, ogwahẽ jevy ou-vy mburuvixagwasu héry va'e Félix hembireko ndive. Hembireko judeu kwéry va'e héry Drusila. Ogwahẽ rire:

—Eru xe ha-py tamonhe'ẽ Paulo aikwaa porã hagwã inhe'ẽ, he'i.

Upéi ou ogwahẽ ha'e-py. Omombe'u Hesu rehewa nhe'ẽ. Hesu Cristo-rehe jajeroviaha va'e rehewa omombe'u:

²⁵ —Nhandejáry kohekohaa porã va'e, he'i. —Nhane mbotavy e'ŷ va'e. Hekohaa-rupi oipota jaiko. Oipota nhande pu'aka nhandéjehe. Ivai va'erã erejapo-ta ramo, ani ne mandu'a ne rembiapo vairã-rehe. Ne rembiapo porãha-rehe ae katu ne mandu'a. Ombopapa ramo, Nhandejáry ombojog-weroaty va'erã oha-py kente kwéry gwive omombe'u hagwã peteĩ teĩ-pe hembiapokwe. Hembiapo porã para'e, hembiapo vai para'e. Gwí hembiapo vai va'e ombohasa asy va'erã íxupe Nhandejáry, he'i onhemonhe'ẽ-vy mburuvixagwasu-pe.

Ohendu ramo inhe'ẽ, onhemondýi tee-ma:

—Ãy tereho katu, he'i. —Ko'ẽ ramo, ko'ẽ mbue ramo ija ramo, orombovia uka-ta ereju jevy hagwã nhanhomongeta hagwã, he'i íxupe mburuvixagwasu.

²⁶ Ha ipy'a-py katu oipota Paulo ome'ẽ gwepy opoi hagwã íxugwi. Upéa-gwi ogweruruka ruka onhomongeta jevy hagwã.

²⁷ Ha upéi katu mokõi ro'y rire onhehekoviárõ mburuvixagwasu. Ogwahẽ mburuvixagwasu pyahu héry va'e Pórcio Festo. Ha Félix osẽ oho. Oho ramo, oheja preso Paulo-pe. Judeu kwéry-pe ombov'yase voi. Oipota-gwi imandu'a porã hese, ohejave joty íxupe preso.

25

"Aipota xe monhe'ẽ mburuvixagwasu César" he'i Paulo

¹ Ha upéi katu Festo mburuvixagwasu pyahu va'e, ogwahẽ ou-vy Cesaráea tetã-my. Upe-py oiko mburuvixagwasu ramo. Mbohapy áry rire upe-gwi oho. Ogwahẽ oho-vy Jerusalém tetã-my.

² Upe-py ogwahẽ ramo ou henda-py pa'i ruvixa kwéry judeu ruvixa kwéry ave. Omombe'u íxupe Paulo rehewa nhe'ẽ. Upéi he'i íxupe hikwái:

3 —Oroipota eterei ou Paulo ko'a-py. Ne nhe'ẽ-rupi tou katu Paulo ore mbovy'a hagwã, he'i mburuvixagwasu-pe.

Ha ojukase mo'ã Paulo-pe judeu kwéry: “Ou ramo ko'a-py, nhaha'arõ nhemi katu Paulo tape-rehe jajuka hagwã” he'i ojóupe ra'e hese hikwái.

4 Ha mburuvixagwasu ndojohu porãi inhe'ẽ:

—Paulo onhemoō preso oĩ-vy Cesaréia-py. Aha-ta upe-py, he'i. —Ko'ẽ mbue ramo xe aha-ta upe-py, he'i.

5 —Upéixa ramo toho ave xe ndive pende ruvixa kwéry. Oĩ ramo Paulo rembiapo vaikwe, tomombe'u katu xe-vy upe-py, he'i judeu kwéry-pe.

6 Upéi opyta indive kwéry petēi semana, mokõi semanarãgwe-rupi. Upe rire oho jevy Cesaréia tetã-my. Iko'ẽ-my oho ojogweroaty haty-py. Mburuvixa gwapy haty-py ogwapy. He'i ogweru hagwã Paulo-pe.

7 Ou ramo, onhembo'y ijere-rehe judeu kwéry Jerusalém-gwi ou va'ekwe. Omombe'u hagwã hembiapokwe onhembo'y. Heta oĩ hembiapo vaikwe mombe'uhā ha hexahare katu ndogwerúi.

8 Omombe'upa rire hesegwa, Paulo omombe'u ave ojehegwigwa:

—Judeu kwéry reko-rupi aiko joty. Nhandejáry róga kakwaa namongy'ái joty. Mburuvixagwasu César nhe'ẽ-rupi aiko joty ave, he'i ojehegwaa omombe'u-vy.

9 Ha upéi katu oporandu íxupe mburuvixagwasu Festo:

—Nderehoséi tipo Jerusalém-my xe oromonhe'ẽ hagwã. Upe-py oromonhe'ẽ-ta nde-rehe he'i va'ekwe-rehe, he'i íxupe.

Upe va'e he'i ombovy'a hagwã mo'ã judeu kwéry-pe.

10 Ha Paulo katu he'i:

—Ndaha mo'ãi, he'i. —Iporã katu xe monhe'ẽ a-py. A-py César rembigwái oromonhe'ẽ haty-py. Iporã katu xe monhe'ẽ a-py voi ave, he'i. —Ha judeu kwéry-pe naxe rembiapo vaíry. Upéa ereikwaa voi.

11 Hembiapo vai va'e jajuka va'e. Upéixa ramo xe rembiapo vai ramo, iporã ave hembiapo vai va'e-rami xe juka, he'i. —Ha xe rembiapo vai e'ŷ ramo katu, avave ndikatúi xe me'ẽ judeu kwéry-pe, he'i. —Aipota xe monhe'ẽ mburuvixagwasu César, he'i mburuvixa Festo-pe.

12 Upe ramo mburuvixa onhomongeta oirũ ndive oikwaa hagwã hembiaporã. Oikwaa ramo, he'i:

—“Aipota xe monhe'ẽ mburuvixagwasu César” ere kuri xe-vy. Néi, oromondo-ta César renda-py, he'i íxupe mburuvixa.

Mburuvixagwasu Agripa ohenduse Paulo nhe'ẽ

13 Upe rire ndahetáí áry rire outro mburuvixagwasu héry va'e Agripa ogwahẽ ou-vy Cesaréia tetã-my. Indive ou ave heindýry héry va'e Berenice. Ou ohexa mburuvixa Festo-pe. Ogwahẽ ramo va'e-pe ohexa.

14 Upe-py opyta are. Upéa-gwi omombe'u íxupe Paulo rehewa nhe'ẽ:

—A-py oĩ kwimba'e ojeheja va'ekwe preso, he'i. —Osẽ ramo Félix oheja íxupe va'ekwe preso.

15 Xe aime ramo Jerusalém-my ou xe renda-py pa'i ruvixa kwéry, judeu ruvixa kwéry ave. Ou omombe'u hesegwa: “Ejuka katu íxupe” he'i xe-vy.

16 —Upe ramo ha'e judeu kwéry-pe: “Ore katu romano kwéry va'e a-rami ndorojapóiry va'e voi. Onhombováke e'ŷ rehevê hembiapokwe mombe'uhā ndive, avave-pe ndorogwerekói va'e katu ore orojuka hagwã-rami voi. Oromonhe'ẽ e'ŷ rehevê, omombe'u e'ŷ rehevê ojehegwaa nhe'ẽ, ndorojukáiry. Oroikwaa porã hembiapokwe rire ae, hembiapo vai tee rei ramo ae, orojuka va'erã” ha'e judeu kwéry-pe, he'i omombe'u-vy.

¹⁷ —Ha upéi katu ko'a-py onhomboaty hikwái. Upéa-gwi ko'ëmba-ma ramo pya'e agwapy mburuvixa gwapy haty-py. Preso onhemoingo va'e ha'e-ma ogweru hagwã.

¹⁸ Xe nhe'ë-py ou. Upéi onhembo'y hikwái hembiapokwe mombe'uharã: “Paulo ko hembiapo vai eterei ra'e” he'i mo'ã hese. Ha ha'e katu nahembiapo vaíry ra'e.

¹⁹ Ha gwí judeu kwéry ndojohu porãi ra'e inhe'ë: “Paulo ko omombe'u ramo nhane ramói nhe'ëgwe, nomombe'u porãi myamyrí Moisés omombe'u hagwe-rami” he'i hese. Ha Paulo ohendu ramo inhe'ë: “Ndaha'éiry upéixa” he'i hese hikwái. Ha ha'e kwéry ndojohu porãi ra'e ave Hesu rehewa nhe'ë hikwái. “Hesu ko omano va'ekwe” he'i judeu kwéry. Ha Paulo katu he'i: “Hesu oikove jevy-ma” he'i. Upéixa onhonhe'ë mbojevy jevy ramo, ndikatuvéi ombohory onhonhe'ë.

²⁰ —Upéixa onhe'ë ramo hikwái, ndaikwaavéi-ma xe nhe'ërã ha'e va'erã íxupe kwéry. Upéa-gwi: “Nderehoséi Jerusalém-my?” ha'e aporandu-vy íxupe. “Upe-py hemimombe'ukwe-rehe aporandu-ta nde-vy” ha'e íxupe.

²¹ “Ndahaséi” he'i xe-vy. “Ndaha mo'äi upe-py” he'i. “A-py apyta-ta vyteri preso. Enhangareko katu xe-rehe a-py. Mburuvixagwasu héry va'e César ndive anhe'ëse. Aipota xe monhe'ë César. Aha'arõ-ta íxupe xe monhe'ë hagwã” he'i xe-vy. Upéixa ramo aha'arõ herahaharã araha uka hagwã César renda-py: “Epyta vyteri preso” ha'e íxupe. “Ogwahẽ ramo nde rerahaharã, oromondo-ta” ha'e íxupe, he'i Agripa-pe mburuvixa Festo.

²² Ha upéi katu Agripa ohenduse Paulo nhe'ë:

—Ahenduse inhe'ë, he'i Festo-pe.

—Néi, ko'ë ramo erehendu-ta, he'i íxupe.

Mburuvixagwasu Festo he'i ogwenogwahẽ hagwã heru-vy Paulo

²³ Ha upéi katu ko'ëmba-ma ramo ogwahẽ jevy ou-vy Agripa heindýry ndive. Hemimonde porã reheve, gwembigwái kwéry pa'ü-my ogwahẽ ou-vy. Oike ojogweroaty haty va'e koty-py coronel kwéry ndive. Upe tetã mygwa ruvixa ndive ave oike. Upe ramo Festo he'i ogwenogwahẽ hagwã heru-vy Paulo. Inhe'ë-py ogwahẽ ou-vy.

²⁴ Upe-ma ramo he'i Festo mburuvixa Agripa-pe:

—Erepara katu ko ou va'e-rehe, he'i. —Peẽ pegwahẽ ramo va'e pehexa katu ave. Ko kwimba'e-rehe judeu kwéry ou meme va'e xe-vy inhe'ëgwe apo-vy. Ojerure rure va'e xe-vy ajuka hagwã íxupe. “Naiporãi oikove joty” he'i xe-vy hatã hatã onhe'ë-vy enterovéa judeu kwéry va'e gwive, Jerusalém pygwa, a pygwa ave.

²⁵ —Ha ndikatúiry xe ajuka rei íxupe. Ndajohúi hembiapo vaikwe. Ndajohúiry-gwi hembiapo vaikwe, ndikatúi ajuka rei íxupe, he'i. —Upéixa ramo: “Xe aipota xe monhe'ë mburuvixagwasu César” he'i ramo xe-vy, “Néi, oromondo-ta” ha'e íxupe, he'i omombe'u-vy.

²⁶⁻²⁷ —Ha ndaipóri xe amoï va'erã kватia-rehe hembiapokwe. Ndajohúiry voi hembiapo vaikwe. “Naiporãi nhamondo César renda-py preso oĩ va'e nhamoï e'ŷ reheve kватia-rehe hembiapo vaikwe” ha'e xejéupe. Upéa-gwi aruruka kuri nde rovagwy-py, Agripa. Pene renonde-py ave aruruka nhamonhe'ë ranhe hagwã íxupe, he'i. —Upe rire, nhaporandu rire ae, jareko-ma va'erã kватia-rehe nhamoï va'erã, he'i íxupe kwéry Festo.

26

“Amombe'u-ta xejehegwigwa nhe'ë” he'i Paulo Agripa-pe

¹ Ha upéi katu he'i Paulo-pe mburuvixagwasu héry va'e Agripa:

—Ãy eremombe'use ramo, emombe'u katu ore-vy ndejehegwigwa nhe'ẽ, he'i íxupe.

Aipo he'i-ma ramo, omopu'ã Paulo opo íxupe omboete-vy omombe'u hagwã. No'ã-rami he'i ha'e omombe'u-vy:

² —Xe avy'a aiko-vy, xe ruvixa Agripa. Heta omombe'u mbe'u mo'ã xe rehewa nhe'ẽ judeu kwéry. Xe renohẽ vaise mo'ã xe-rehe ijapu-gwi. Ha etería nde xe monhe'ẽ-ta. Amombe'u-ta xejehegwigwa nhe'ẽ, he'i. —Xe monhe'ẽ ramo, ereikwaa porã-ta xe-rehe ijapu reiha. Upéa-gwi xe avy'a.

³ Ha nde ereikwaa porã katu judeu kwéry rekoha gwive. Ndorogweroviáí oronhonhe'ẽha ereikwaa porã ave. Upe va'e nhe'ẽ ereikwaa porã-gwi xe avy'a. Ajerure nde-vy erejeapysaka porã hagwã xe nhe'ẽ-rehe, he'i mburuvixagwasu-pe.

⁴ —Xe mitã ramogware ãy peve xe rekokwe oikwaa porãmba judeu kwéry gwive. Ni peteĩ ndoikwaa e'ŷiry. Xe mitã ramo aiko va'ekwe xe re'ýi kwéry pa'ũ-rupi. Upe-py Jerusalém-my aiko ave va'ekwe.

⁵ Nhandejáry he'i va'ekwe gwive ahendu porãmba va'ekwe voi. Ndaipóri mba'e okanhy va'e xéhegwi. Fariseu kwéry ohendu porãve va'e outro judeu kwéry-gwi. Fariseu-rami aiko va'ekwe. Ahendupa porã ete. Are gware-ma voi oikwaa judeu kwéry xe rekokwe. “Upéixa voi Paulo rekoha” he'ise ramo, he'i arã xe-rehe.

⁶ —Yma ete-ma ore ramói kwéry-pe he'i va'ekwe Nhandejáry: “Oikove jevy va'erã omano va'ekwe gwive” he'i. Upéa he'i va'ekwe arovia voi aiko-vy.

⁷ Ogwerovia ave ore re'ýi kwéry gwive peteĩ teĩ tetã-rupi oiko va'e, doze tetã-rupi oiko va'e. Áry ramo, pyhare ave omboete Nhandejáry-pe hikwái. Oha'arõ arõ imboete-vy omoingove jevy hagwã Nhandejáry he'ýi kwéry omano va'ekwe. Xe aha'arõ ave oikove jevy hagwã. Upéixa ramo jepe: “Hembia poí voi Paulo” he'i joty mo'ã xe-rehe gwí judeu kwéry. Ma'erã he'i joty upéixa xe-rehe hikwái? he'i mburuvixagwasu-pe.

⁸ —“Nhandejáry nomoingove kwaái omano va'ekwe” ma'erã peje Nhandejáry-rehe upéixa? he'i upe pygwa-pe.

⁹ Upéi he'i jevy mburuvixagwasu-pe:

—Yma va'ekwe heta xe ambohasa asy Hesu Nazaré pygwa réry-py oiko va'e-pe. Heta nipo areko asy ra'e íxupe kwéry. Iporã mo'ã xejéupe, he'i.

¹⁰ —Jerusalém tetã mygwa ambohasa asy voi va'ekwe. Pa'i ruvixa kwéry nhe'ẽ-py heta amoĩ preso va'ekwe gwí Hesu re'ýi kwéry-pe. Upe rire ojuka-ta ramo, arovya va'ekwe. Ajohu porã-gwi: “Tojuka katu” ha'e va'ekwe.

¹¹ Areko asy asy va'ekwe íxupe kwéry. Ojeporahéi haty haty-rupi amoingo asy va'ekwe íxupe kwéry. Xe pu'aka hese areko asy-vy ojererova hagwã mo'ã Hesu-gwi. Xe poxy eterei voi. Xe poxy-gwi aha va'ekwe ipiári. Mombyry outro tetã-my aha va'ekwe, he'i.

¹² —Upéixa ramo agwata aha-vy Damasco tetã-my. Aha pa'i ruvixa réry-py. Inhe'ẽ-rupi aha.

¹³ Áry mbyte-py oĩ javé kwarahy, xe ruvixa, agwata aha-vy. Agwata ramo tape-rupi, aheda-ma áry-gwi hendy va'e, kwarahy rendy ramigwa. Hendy mbaraeteve va'e kwarahy-gwi. Hendy xe-rehe, xendive ogwata va'e-rehe ave hendy.

¹⁴ Oro'apa-ma oroho-vy yvy-py. Upe-ma ramo ahendu onhe'ẽ va'e. Hebreu nhe'ẽ-py onhe'ẽ: “Saulo, Saulo” he'i, “Ma'erã xe mbohasa asy?” he'i onhe'ẽ-py. “Gwéi opy voi ramo, ogwerokwa ojekutu ave. Gwéi-rami ererekó asy nde rekove. Ma'erã po nde ererekó asy nde rekove? Nde poxy ramo xe-rehe, nde rekove ae ererekó asy” he'i xe-vy onhe'ẽ va'e, he'i omombe'u-vy.

¹⁵ —“Kiva'e nde, xe Járy” aporandu íxupe. “Xe ko Hesu” he'i xe-vy. “Xe ko nde a'e'ýha ave xe. Xe rerekó asy va'e ave nde.

¹⁶ Ha epu'ã katu, enhembo'y jevy. Ánga ete ajehexa uka-ma nde-vy oromoï hagwā xe pytygwōharā. Aipota eremombe'u mbe'u xe-rehe erehexa va'e. Ajehexa uka jevy ramo nde-vy, erehexa va'erā aipota eremombe'u mbe'u.

¹⁷ Ororesende-ta heru-vy judeu kwéry-gwi. Ipo-gwi kwéry oroipe'a-ta heru-vy. Judeu e'ý va'e ave ororesende-ta ave íxugwi kwéry. Oromondo-ta judeu e'ý va'e kwéry-pe.

¹⁸ Oromondo-ta xe rehewa nhe'ẽ eremombe'u mbe'u hagwā hi'arandu porā hagwā. Pytū-my rei oiko va'e-pe oromondo-ta arakatu-py eremoingo hagwā. Oromondo-ta ereipe'a hagwā heru-vy anháy ruvíxa Satanás-gwi, Nhandejáry ndive oiko porā-ma hagwā. Oromondo-ta ave xe-rehe ojerovia hagwā, omboyke hagwā Nhandejáry íxugwi kwéry hembiapo vaikwe, ipy'a omopotí hagwā, xe irū gwéry-pe omoirū-ma hagwā oromondo-ta” he'i xe-vy Hesu ojehexa uka-vy, he'i omombe'u-vy.*

¹⁹ —Upéa nhe'ẽ xe ahendu voi, xe ruvíxa Agripa, he'i Paulo íxupe. —Xe moï inhe'ẽ mombe'uga ramo, ahendu voi inhe'ẽ.

²⁰ Amombe'u ranhe Damasco tetā mygwa-pe Nhandejáry nhe'ẽ. Upe rire ae amombe'u mbe'u Jerusalém tetā mygwa-pe. Judéia yvy rupigwa-pe gwive ave amombe'u mbe'u imosarambi-vy Nhandejáry nhe'ẽ. Amombe'u ave judeu e'ý va'e-pe: “Perova katu pende rekoha. Pejere katu Nhandejáry hakoty ojehexa porā hagwā pene rembiapo porāha” ha'e imombe'u-vy judeu e'ý va'e-pe.*

²¹ —Ha judeu kwéry katu xe juka-ta mo'ã ramo, xe pyhy. Xe aime ramo Nhandejáry róga kakwaa-py, xe pyhy. Judeu e'ý va'e-pe amombe'u-gwi, xe pyhy hikwái.

²² Are-ma ãy ete peve xe pytygwō tygwō Nhandejáry. Upéa-gwi ko'a-py anhembo'y imombe'u-vy. Mburuvixa-pe, mburuvixa e'ý va'e-pe gwive amombe'u mbe'u. Moisés he'i va'ekwe oiko hagwā xe amombe'u va'e. Nhandejáry nhe'ẽ-py omombe'u va'ety he'i va'ekwe oiko hagwā xe amombe'u va'e ave. Nanhe'ẽ pyahúiry amombe'u. Yma gware nhe'ẽ mante amombe'u.

²³ Yma gware nhe'ẽ no'ã-rami: “Ohasa asy va'erā Cristo, Nhandejáry rembiporavo va'e. Upe rire ha'e katu ranhe oikove jevy va'erā. Upéa-gwi ha'e ranhe omombe'u va'erā arandu judeu kwéry-pe, judeu e'ý va'e-pe ave oikwaa hagwā omano va'ekwe oikove jevymaha” he'i. Upéixa voi he'i va'ekwe yma gware nhe'ẽ, he'i mburuvixagwasu-pe Paulo imombe'u-vy.*

²⁴ Upéixa voi omombe'u ojehewa nhe'ẽ. Omombe'u jave upéixa, Festo onhe'ẽ hatā íxupe:

—Nde tavy ra'e, Paulo, he'i. —Heta eterei eremonhe'ẽ-gwi kwatia, nde tavy-ma ra'e, he'i mo'ã íxupe.

²⁵ Ha'e katu he'i:

—Naháni, naxe tavýi voi katu, xe ruvíxa Festo, he'i joto Paulo. —Anhetegwa meme amombe'u.

²⁶ Upéi he'i jevy mburuvixagwasu Agripa-pe:

—Ko va'e rehewa Hesu rehewa ereikwaa porā voi, xe ruvíxa Agripa. Oiko ramo, nokanhýiry ndéhegwí ni peteĩ ra'e. Erehendupa voi ra'e, he'i. —Nanhemíry-py oiko va'ekwe. Ereikwaa voi nipo ra'e. Upéa-gwi natíry voi, he'i. —Anhembopy'agwasu anhe'ẽ hagwā nde-vy, xe ruvíxa.

²⁷ Ma'erā ndereroviáí Nhandejáry nhe'ẽ kwatia-rehe oĩ va'e? Ererovia nipo ra'e. Aikwaa voi ereroviaha, he'i mburuvixagwasu-pe.

* ^{26:18} At 9.1-19; 22.6-16 * ^{26:20} At 9.20-22,28-29 * ^{26:23} Is 42.6; 49.6

²⁸ Upe-ma ramo he'i íxupe:

—Ereipota pya'e xe aiko Hesu reroviah ramo. Ha ndaiko pya'e mo'ái, he'i.

²⁹ Upe ramo he'i mburuvixagwasu-pe:

—Ây erepytase ramo Hesu reroviah va'e ramo, iporã. Are rire erepytase ramo, iporã ave va'erã. Tane mbojerovia katu ójehe Nhandejáry xe-rami ave, he'i. —Etería xe rendu va'e gwive tombojeroviapa katu ójehe Nhandejáry. Aipota erejerovia xe-rami ha ndaiptái erepyta ipokwaha reheve optya va'e-rami, he'i Paulo mburuvixagwasu-pe.

“Naiporāi nhamoī preso” he'i Paulo-rehe

³⁰ Upe ramo mburuvixagwasu opu'ã onhembo'y. Opu'ã ave heindýry. Opu'ã ave Festo.

³¹ Indive ogwapy va'e opu'ã ave. Oho ha'e anho oĩ ha-py onhomongeta-vy:

—Ko kwimba'e nahembiapo vaíry va'e nipo ra'e. Naiporāi nhamoī preso, naiporāi jajuka ave íxupe, he'i ojóupe.

³² Upéi mburuvixagwasu he'i Festo-pe:

—“Aipota xe monhe'ẽ César” he'i kuri nde-vy Paulo. Upe va'e nde'íry ramo ra'e, jaheja arã íxupe toho ra'e. Japoi jevy arã ra'e íxugwi, he'i Festo-pe mburuvixagwasu.

27

Paulo oho y-rupi ogwahē hagwā Roma tetā-my hikwái

¹ Upe rire he'i mburuvixa kwéry:

—Jaha nhamondo íxupe Itália yvy-py, he'i Paulo-rehe.

Upe-ma ramo ome'ẽ capitão-pe héry va'e Júlio mburuvixagwasu rembigwái va'e, onhangareko hagwā hese. Oĩ va'e preso va'e ave oho hendive. Xe Lucas aha ave hendive.

² Upéixa ramo oronhemboyrú oroho-vy kanoagwasu-py. Adramítio tetā mygwa-py oronhemboyrú oroho-vy. Upe kanóá oho-tama Ásia yvy retā retā-rupi. Ore moirū ave Tessalônica tetā mygwa, héry va'e Aristarco, Macedônia yvy pygwa va'e. Ha upéi katu oroho-ma y-rupi. Ndorohói y mbyte-rupi. Hembe'y-rupi ae orohasa oroho-vy.

³ Iko'ẽ-my orogwahē oroho-vy Sidon tetā-my. Orogwahē rire, he'i Paulo-pe ore capitão:

—Tereho katu erehexa hagwā ne irūgwe-pe. Tome'ẽ nde-vy ne remi'urã, he'i íxupe ore capitão ogwereko porã hagwā.

Upéa-gwi oho ohexa oirūgwe-pe.

⁴ Upe rire orohasa jevy oroho-vy y-rupi. Henonde-gwi ou ramo yvytu, ojejapi japi kanoagwasu-rehe y. Upéa-gwi orogweroajere ykõi yvytu ete e'ŷ ha-rupi oroho. Upe va'e ykõi héry Chipre.

⁵ Upe rire orohasa meme oroho-vy Cílícia yvy, Panfília yvy ave orohasa. Upe rire orogwahē oroho-vy Mirra tetā-my, Lícia yvy pygwa.

⁶ Upe-py ore capitão otopa kanoagwasu mombyry oho va'ety, Alexandria tetā mygwa, Itália yvy-py oho va'erã. Upéixa ramo ore rerova upéa kanóá-py. Orosẽmba ore ryru-gwi orova hagwā upéa kanóá-py.

⁷ Upe rire oroho jevy y-rupi. Ndaheta áry jepéi mbegwe oroho. Hasy-py orogwahē Cnido rovái. Norogwahē jepéi. Ndohejái orohove yvytu. Upéa-gwi ykõi orogweroajere oroho-vy. Yvytu ete e'ŷ ha-rupi oroho. Upe va'e ykõi héry Creta. Salmona ypy-rupi orohasa.

⁸ Hasy-py hembe'y reheve oroho. Mbegwe mbegwe oroho orogwahē tetā-my héry Kanóá Opyta Porã Haty-py. Upe-gwi hi'agwī-ma oĩ tetā héry va'e Laséia.

⁹ Upéixa ramo ore are-ma orogwahē hagwā upe-py. Nome'ēi orohove hagwā. Judeu kwéry aretegwasu ohasa-ma. Upéa jasy-rehe ama yvytu reheve. Upéa-gwi ore mytu'e'ŷ orohove hagwā. He'i Paulo:

¹⁰ —Anive ereho teĩ, xe irū. Erehove joty ramo, ojehu va'erā nhande-vy mba'e. Onhehundi va'erā voi randai kanóa. Hye py pygwa ave onhehundipa-ta randai ave. Nhanheapymi-ta randai ko nhande ave, he'i Paulo capitão-pe hendivegwa-pe ave.

¹¹ Ha ore capitão katu nohendúi inhe'ē. “Jahave katu” he'i ramo kanóa ombogwataha kanóá járy ave, ohendu upe mokōi va'e nhe'ē.

¹² Ha Paulo nhe'ē katu nohendúi. Ha he'i hetave ohoseve va'e:

—A-py nome'ēi japyta are, he'i. —Ama yvytu reheve eterei, he'i. —Jaha vytteve y-rupi ikatu hagwāixa jatopa yvytu e'ŷ ha-py, japyta are hagwā upe-py, ro'y jave japyta hagwā. Oiméne nhagwahē-tama Fenice tetā-my, kanóá opyta porā haty-py, Creta yvy pygwa. Upe-py ojapyraha yvytu. Ndo'ái hese. Kwarahy resē gwigwa ndo'ái yvytu, he'i hetave ohoseve va'e.

¹³ Ha upéi katu ryete-gwi ou va'e yvytu. Yvytu porā ha-rupi rei nahatā etéi yvytu. Mbegwe nunga yvytu oī:

—Ome'ē-ma jaha vyteri, he'i ojóupe hikwái.

Upéixa ramo omboyrú jevy heraha-vy inhapytīha kanóá-py oroho jevy hagwā y-rupi. Hembe'y-rehe ete orohasa oroho-vy.

¹⁴ Ykōi rembe'y-rehe ete oroho. Ndoroho mombyrýi vyteri. Upe-ma ramo ou yvytugwasu. Kanóá-rehe ojejapi. Yvy ete-gwi ou va'e yvytu. Upe yvytugwasu héry Nordeste.

¹⁵ Ha kanóá ndogwatavéi-ma henonde-gwi ou-gwi yvytu. Upéa-gwi orog-werova yvytu rupive oho hagwā kanóá.

¹⁶ Oripara ore ryru ykōi'i yke-rehe. Upe-py ojapyraha yvytu ore ári-rupi. Ykōi héry Cluda. Orohasa jave kanoagwasu ári orohupi kanoa'i. Hasy-py orohupi.

¹⁷ Upéi gwī imbogwataha kwéry omoī igwy-rupi ojokwa hagwā. Pono ojepe'a yvyra, kanóá rehewa, omoī. Ikyhyje ave itaypa-gwi. Ikyhyje ojeka ramogwarā ikanóá itaypa-rupi. Itaypa héry Sirte. Upéa-gwi ombogwejypa lóna. Lóna kanóá rerahaha oipe'a kanóá ári-gwi.

¹⁸ Yvytugwasu ramo omoapý apý kanóá-pe. Upéa-gwi iko'ē-my omombo y-py omboyrú va'ekwe iveauive hagwā kanóá. Ko'ē ko'ēmba omombo. Omombo ranhe y-py omboyrú va'ekwe.

¹⁹ Iko'ē-my oipyhy opo-py omombo jevy hagwā y-py kanoagwasu rehewa.

²⁰ Ou ramo marány yvytugwasu reheve, ndopái yvytugwasu. Are ndojek-waa voíry kwarahy jasytata ave. Upéixa ramo:

—Ndaiporivéi-ma nhane resendeharā, he'i joa ojóupe.

²¹ Are-ma ndokaruvéi ave. Upe-ma ramo oho Paulo kanóá pygwa oī ha-py. He'i íxupe kwéry:

—Ma'erā nerehendúi ra'e xe nhe'ē, xe irū kwéry? he'i. —Ma'erā peju joty kwehe ra'e Creta ykōi-gwi? Ndapejúi ramo ndojehúiry arā nhande-vy mba'e, he'i. —Nanhamombo reíry arā ra'e nhamboyrú va'ekwe, he'i íxupe kwéry.

²² Aŷ penhembopy'agwapy joa katu. Ojere-ta kanoagwasu. Ha nhande kwéry katu ni peteñ nanhanheapymi mo'âiry, he'i.

²³ Ko pyhare xe yke-rehe onhembo'y-ma kuri Tupā Nhandejáry rembigwái. Tupā Nhandejáry xe Járy voi.

²⁴ Amboete íxupe va'ety. “Ani ne mytu'e'ŷ, Paulo” he'i xe-vy. “Nerenheapymi mo'ái. Eregwahē-ta yvy ete-py erenhembo'y hagwā César rovagwy-py. Ha ne ndive oho va'e gwive katu aresendepa-ta ave” he'i kuri xe-vy, he'i omombe'u-vy.

²⁵ —Upéixa ramo penhembopy'agwapy katu peẽ, xe irū kwéry, he'i Paulo. —Ha'e he'i ha-rami oiko-ta.

²⁶ Xe arovía oikotaha he'i ha-rami. Ha omoanha-ta kanoagwasu nhande reheve yvytugwasu. Peteī ykōi-koty omoanha-ta imondo-vy, he'i kanóa pygwa-pe gwive Paulo.

²⁷ Ha upéi katu oho rei kanóa. Ojererosyry uka oiko-vy y-pe. Ygwasu héry Ádria. Mokōi semana rire, pyhare mbyte-py, ojererosyry uka ramo:

—Nhagwahē-tama para'e yvy ete-py, he'i ojóupe imbogwataha kwéry.

²⁸ Upéa-gwi oikutu y rye py imbogwejy-vy oikwaa hagwā hypyha: Trinta e sete metro nipo ra'e, he'i oikwaa ramo. Oho vyteve. Otantea jevy hypyha: Vinte e oito metro nipo ra'e, he'i oikwaa jevy ramo.

²⁹ —Jaha vyteve ramo, oiméne ojejapi-ta ita-rehe kanóa, he'i ojóupe hikwái.

Upéa-gwi kanóa revi-gwi omombo y-py imbogwejy-vy irundy kanóa mombytaha. Oha'arō oiko-vy ko'ě. Ojapura ko'ěmba voi hagwā.

³⁰ Ha upéi katu imbogwataha kwéry okanhysse mo'ā kanoagwasu-gwi. Ombogwejy kanoa'i y-py:

—Oromombo-ta itī-gwi kanóa mombytaha, he'i mo'ā.

³¹ Okanhysse-vy ae ra'e. Upe-ma ramo Paulo he'i ore capitão-pe, soldado kwéry-pe ave:

—Ko va'e ndopytái ramo kanoagwasu-py, nanhane resende mo'āiry, he'i. —Nhamanomba-ta para'e, he'i capitão-pe.

³² Ohendu ramo inhe'ě, soldado kwéry omondohóy ikytī-vy opoi hagwā oho-vy y-rehe, ogwerosyry hagwā heraha-vy kanoa'i-pe y.

³³ Hembipe jave ko'ě, he'i íxupe kwéry Paulo:

—Pekaru mani katu. Mokōi semana ne mytu'e'ŷ reheve ereiko ra'e, mba'eve ere'u e'ŷ reheve.

³⁴ Pekaru mani katu, pekaru mani katu, he'i. —Pekaru ramo, pene mbaraete jevy-ta. Ani erejapura teī, he'i. —Ni peteī va'e-pe ndojehu mo'āi mba'eve nhande-vy, he'i íxupe kwéry Paulo.

³⁵ He'i rire oipyhy mbojape omboete Nhandejáry-pe. Enterove pa'ū-my otima porā. Ombopóy-ma hi'u-vy.

³⁶ Ohexa okaru ramo ipy'agwapy-ma hikwái. Ipy'agwapypa rire, okaru ave.

³⁷ Ha ore kwéry, kanóa pygwa gwive ko duzentos e setenta e seis.

³⁸ Okaru porā rire, omombo y-py gwembyre kwéry trigo ombovevúi porāve hagwā kanoagwasu.

³⁹ Ko'ěmba-ma ramo ndoikwaái yvy. Ohexa hembe'y-py yugwa porā. Upe-py ndaipoxýi y. Hembe'y-rehe oĩ vvyku'i morotī:

—Jaha katu upe-py. Nhatantea. Jaha-ta para'e upe-py, he'i ojóupe hikwái.

⁴⁰ Upéa-rehe nomboyruvéi inhapytīha. Oheja y-py oho-vy. Upéi ojora isã kanóa mbogwata porāha ojokwa va'ekwe. Upéi itī arigwa lóna omoī jevy yvyra-rehe kanóa tī ári yvytu omoanha hagwā heraha-vy yvy ete-py.

⁴¹ Ha ogweraha itaypa-rupi kanóa-pe yvytugwasu. Ndaysyry jojái-gwi itakuruvi ári oho opyta kanóa tī. Ndogwatavéi. Ha kanóa revi-rehe katu ojejapi japi y. Upéixa ramo ojoka voi kanóa-pe y.

He'i soldado kwéry:

⁴² —Preso oĩ va'e gwive ranhe jajukapa, he'i. —Pono o'hta okanhy oje'ó-i-vy, he'i. —Okanhy e'ŷ rehewe jajuka mani, he'i ojóupe soldado kwéry.

⁴³ Ha ore capitão ndohejái ojuka. Oresendese íxupe, Paulo-pe. Upéa-gwi ndohejái ojuka. He'i ore capitão:

—Pepo ranhe katu y-py. He'hta ranhe katu eresē hagwā yvy ete-py, he'i o'hta kwaa va'e-pe.

⁴⁴ Ha o'hta kwaa e'ŷ va'e-pe katu he'i:

—Tapeho katu, he'i. —Ejepyhy katu yvyrá ojeka va'ekwe-rehe ereho-vy eresē hagwā. Kanóá ojeka va'ekwe pehēgwe-rehe ejepyhy ereho-vy, he'i íxupe kwéry.

Ha upéixa ramo osē va'ekwe gwive yvy ete-py onheresendepa-ma voi hikwái.

28

Paulo ogwahē oho-vy Malta ykōi-my

¹ Oronheresendepa rire, omombe'u ore-vy ykōi réry. Malta héry.

² Upéi oky-ma. Ama ramo ho'ysā eterei. Ha upe pygwa ore rerekō porā-vy ou ohatapy ore-vy:

—Pegwahē katu. Orohatapy-ta peẽ-my, he'i ore-vy.

³ Íxupe kwéry gwarā oho jape'a-rehe Paulo. Omboaty heru-vy omoñ hagwā tata-py. Ijape'a pa'ũ-my ou mbói. Omoñ tata-py. "Syryry" he'i osē-vy mbói. Opo-ma ipo apy-rehe mbói. Osagwygyu oĩ-vy ipo-rehe mbói.

⁴ Ha upe pygwa ohexa ramo, he'i ojóupe:

—Upe va'e kwimba'e oporojuka nipo araka'e, he'i hese. —Ygwasu-gwi onheresende kuri. Ha mbói-gwi katu nonheresendevéi-ma. Tupā ojuka ukatama mbói-py, he'i hese. —Hembiapo vai-gwi ndohejáiry oikove puku íxupe, he'i mo'ã hese hikwái.

⁵ Ha'e ae katu ojéhegwi ombovava rei heity-vy mbói tata-py. Mba'eve ndojejhúiry íxupe.

⁶ Ha ha'e kwéry katu ohexa katu katu íxupe: "Irurupa-ta ipo" he'i mo'ã ojéupe. "Ho'a-tama hetekwe" he'i mo'ã ojéupe. Ohexa katu katu are rire íxupe:

—Mba'eve teiñ ndojehúi ra'e íxupe. Ndaipu'akái hese ra'e mbói rāi. Tupā voi ra'e upéa, he'i jevy mo'ã hese.

⁷ Pepete oĩ ykōi mygwa ruvixa yvy. Huvixa héry Públío. Upe va'e ore rerekō porā ore mogwahē-vy. Mbohapy áry ore mongaru porā ojave.

⁸ Ha mburuvixa ru oime hasy. Nopu'ãvái voi. Gwupa-py voi oĩ. Gwyerasy-gwi heteraku. Ha Paulo oho ohexa hasy va'e ha-py. Omondo mondo Nhandejáry-pe onhe'ẽ okwera hagwā. Upéi omoñ hete ári opo ombogwera hasy va'e-pe.

⁹ Upéi ojekwaa-ma herakwā. Upéa-gwi ykōi mygwa, hasy va'e gwive ou ihaspy. Ha ha'e ombogwerapa-ma.

¹⁰⁻¹¹ Heta ore mboete ore rexakwaa kwaa rei-vy hikwái. Oroikotevē-ma ramo ome'ẽ me'ẽ ore-vy.

Paulo ogwahē oho-vy Roma tetā-my

Mbohapy jasy rire orohopa jevy-ta y-rupi. Oroho jevy-tama ramo, omboyeru kanoagwasu ohekoviárō va'ekwe-py ore rembiporurā va'e gwive. Upe kanoagwasu opyta va'ekwe upe-py ho'a ramo ro'y. Ro'ypa rire, ykōi-my orogwahē va'ekwe gwive orohopa jevy. Upe kanóá Alexandria tetā mygwa. Hi'ári oĩ mokōi ta'anga, tyvýry mokōi va'e. Oroike jevy oroho-vy kanoagwasu-py.

¹² Orogwahē oroho-vy outro tetā-my héry va'e Siracusa. Upe-py oropyta mbohapy áry. Upe rire oroho jevy y-rupi.

¹³ Yry akwā akwā-rupi oroho. Orogwahē oroho-vy Régio tetā-my. Peteī áry-py ndajerekwái yvytu. Iko'ẽ-my ore rapykwe-gwi ae ou yvytu. Ou-ma ramo yvytu katu oroho jevy-ma y-rupi. Iko'ẽ-my orogwahē oroho-vy outro tetā-my héry Potéoli. Upe-py orosēmba kanóa-gwi orogwata oroho-vy yvy ete-rupi.

¹⁴ Upe-py orojotopa Hesu nhe'ẽ renduha ndive.

—Pepyta ranhe a-py, he'i ore-vy.

Upéixa ramo peteī semana oroiko upe-py. Upe rire oroho jevy. Orogwata oroho-vy Roma tetā-koty.

¹⁵ Ha Hesu nhe'ẽ renduha Roma pygwa va'e ohendu-ma ramo ore rerakwā, ou ore rogwaiti. Ou voi ore rape ra'arõha ore rogwaiti-vy. Oĩ ou va'e ore rape ra'arõha Praça de Ápio-py. Oĩ ave ou va'e Três Vendas peve. Orehogwaiti-ma ore rape ra'arõha-pe. Ha Paulo ohexa ramo:

—Atima porā nde-vy, xe Járy, he'i imboete-vy. Ipy'agwapy jevy-ma.

¹⁶ Upe rire oroike oroho-vy Roma tetāgwasu-py. Upe-py preso rerekoha e'ŷ-rami ogwereco Paulo-pe ore capitão. Oiko hóga pygwa-rami. Peteī soldado mante oiko hendive.

¹⁷ Mbohapy áry rire, ombovia uka upe pygwa judeu ruvixa va'e onhom-boaty hagwā hese. Onhomboaty rire he'i íxupe kwéry:

—Naxe rembiapo vaíry va'ekwe, xe re'ýi kwéry, he'i Paulo. —Ndajapo vaíry va'ekwe nhande re'ýi kwéry-rehe. Judeu amyri reko-rupi aiko meme va'ekwe. Ndajapo vaíry jepe xe moĩ rei preso joto. Jerusalém tetā-my xe moĩ preso. Upe rire xe me'ẽ va'ekwe romano kwéry-pe.

¹⁸ Ha romano kwéry xe monhe'ẽ rire hikwái: “Ndaipóri hembiapo vaikwe” he'i xe-rehe. “Upéixa ramo naiporãi jajuka íxupe. Japoi íxugwi toho” he'i xe-rehe hikwái.

¹⁹ Ha judeu kwéry katu ndojohu porāi upe va'e nhe'ẽ: “Ani erepoi íxugwi. Ejuka ranhe katu” he'i va'ekwe xe-rehe. Upéixa he'i-ma ramo, ha'e-ma xe mburuvixa-pe: “Aipota xe monhe'ẽ mburuvixagwasu César” ha'e mburuvixa-pe, he'i omombe'u-vy. —Ha namombe'u mo'ãi mburuvixagwasu-pe judeu kwéry hembiapo vaikwe. Xejehegwa mante amombe'u-ta, he'i.

²⁰ —Ha ko'ângá katu amombe'u-ta peẽ-my Nhandejáry nhe'ẽ. Yma va'ekwe nhane ramói kwéry-pe he'i va'ekwe Nhandejáry. “Oikove jevy va'erã omano va'ekwe gwive” he'i va'ekwe, he'i. —Upéa he'i va'ekwe ogwerovia va'ekwe hikwái. Ha xe arovia ave. Upéa nhe'ẽ arovia-gwi, xe pokwaha-rehe xe rerekó. Upéa-gwi xe apombovia uka kuri anhomongoeta hagwā pene ndive, he'i ou va'ekwe-pe.

²¹ Upe rire he'i íxupe ou va'e:

—Nogwahēi vyteri ore-vy nde rehewa kwatia nhe'ẽ. Judéia yvy-gwi ndoui vyteri. Nhande re'ýi kwéry ko'a-py ou va'e nane mombe'úiry. Nomombe'u vaíry nde rehewa.

²² Ha gwí opa-rupi oiko va'e onhe'ẽ vai vai Hesu nhe'ẽ-rehe. Upéa oroikwaa. Upéa-gwi orohenduse voi ndehegwigwa, he'i. —Mba'eixagwa ne nhe'ẽ pa orohenduse ndéhegwi, he'i íxupe judeu kwéry.

²³ Ha upéi katu omopeteī áry ou jevy hagwā hikwái.

Upe áry-py ou jevy henda-py. Hóga-py ou heta eterei. Pyharevete ka'aru ete peve oikwaa uka íxupe kwéry Hesu rehewa nhe'ẽ. He'i íxupe kwéry:

—Anhetegwa voi Nhandejáry nhande ruvixarã rehewa nhe'ẽ. Anhetegwa voi Hesu rehewa nhe'ẽ, he'i ogwerovia uka etese-vy. —Hesu renonde

rupigwa ndaijapúi voi. Upéixa he'i va'ekwe myamyrí Moisés, Nhandejáry nhe'ẽ-py omombe'u va'ety kwéry ave, he'i omombe'u-vy ou va'ekwe-pe.

²⁴ Ohendu ramo inhe'ẽ, oĩ ogwerovia va'e, oĩ ndogweroviái va'e ave.

²⁵ Upéixa ramo oje'oipa jevy-ma hikwái. Onhonhe'ẽ mbojevy jevy oje'óiy. Oje'ói e'ŷ mboyve omombe'u íxupe kwéry Nhandejáry nhe'ẽ-py omombe'u va'ety he'i va'ekwe. Héry va'e Isaías.

—Ndojavýi nipo ra'e onhe'ẽ Nhe'ẽ Marangatu tee va'e ome'ẽ-vy Isaías-pe inhe'ẽrã. Pene ramói amyrí kwéry pegwarã ome'ẽ íxupe. Anhetegwa voi ra'e onhe'ẽ omombe'u. A-rami he'i va'ekwe Isaías:

²⁶ “Tereho katu judeu kwéry renda-py. A-rami emombe'u ko va'e nhe'ẽ: Erehendu-ta voi ha erehendu va'e ndopytáiry va'erã nde apysa-py. Erehexxa-ta voi ha erhexxa va'e nderekwaáiry va'erã. Aipo-rami ere kuri íxupe kwéry.

²⁷ Nainhakã porãvéi-ma judeu kwéry. Ohendu e'ŷ va'e-rami ohendu. Ohexa e'ŷ va'e-rami ave, ohexa. Upéa-gwi ndohexaséi voi, nohenduséi voi. Ndopytáiry ipy'a-py hemiendukwe hi'arandu porã hagwã. Ndogwerovaséi gweko Nhandejáry omopotí hagwã ipy'a iky'a va'e”*

he'i va'ekwe Isaías judeu kwéry-rehe, he'i Paulo imombe'u-vy.

²⁸ —Pejeapysaka porã katu ko va'e nhe'ẽ-rehe. Are-ma ne'írã joty omosarambi ranhe. Kwehe nomosarambíry judeu e'ŷ va'e-pe. Judeu kwéry-pe mante omosarambi. Ñay ae omosarambi-ta Nhandejáry íxupe kwéry judeu e'ŷ va'e-pe nhane resendeharã rehewga nhe'ẽ. Ohendu va'erã voíte hikwái, he'i ou va'ekwe-pe Paulo.

²⁹ Ohendu ramo inhe'ẽ, oje'oipa judeu kwéry. Onhonhe'ẽ mbojevy jevy oje'óiy-vy.

³⁰ Ha ha'e katu oppta upe-py. Oiko mokõi ro'y opaga-vy ójehe. Oiporu hagwe-py joty oiko. Ou va'e-pe gwive omogwahẽ meme: “Nhagwahẽ katu jagwapy” he'i meme.

³¹ Omombe'u mbe'u Nhandejáry nhande ruvixarã rehewga nhe'ẽ. Hesu Cristo rehewga nhe'ẽ-py oporombo'e mbo'e. Ndaipóri ojoko va'erã íxupe. Notíry imombe'u-vy.

* ^{28:27} Is 6.9-10

Roma tetā mygwa pegwarā

epistola de Paulo aos romanos

1 (v1,7) Nhandejáry rembiayhu peiko va'e, hemienói he'yirā, Roma tetā-my peiko va'e. Xe Paulo amondo-ta peē-my xe nhe'ẽ. Tapende rovasa katu Nhandejáry, Nhande Ru va'e pende rexakwaa rei-vy. Tapende rexakwaa katu Nhandejáry Hesu Cristo ave. Tapene mbopy'agwapy katu ave. Xe Paulo Hesu Cristo rembigwái voi. Ha Nhandejáry xe renói va'ekwe gwemimondorā. Inhe'ẽ porā mombe'uharā xe poravo va'ekwe.

2-4 Yma va'ekwe Nhandejáry omombe'u nhe'ẽ porā. Hesu ne'írā ojekwaa ramo va'ekwe, hesegwa nhe'ẽ porā omombe'u-ma. Inhe'ẽ-py omombe'u va'ety-pe omombe'u. Ohai uka íxupe kwéry kwateria marangatu-rehe omoī hagwā inhe'ẽ porā. Kwateria nhe'ẽ-py omombe'u Nhandejáry ra'y rekora. Ha'e Nhandejáry Hesu Cristo voi. Upéi ogwejy ou-vy ko yvy-rehe oikoma hagwā kwimba'e ramo. Myamyrī Davi remiarirō voi upéa. Ha upéa ojejuka rire oikove jevy va'erā voi, ojekwaa hagwā hese Nhandejáry ra'y teeha hese, inhe'ẽ marangatu-gwi enterove va'e-rehe ipu'akaha ojehexa uka hagwā hese.

5 Ha'e katu xe rexakwaa rei va'ekwe. Xe moī va'ekwe gwemimondorā xe arovia uka hagwā inhe'ẽ entero tetā tetā mygwa kente kwéry-pe. Ha'e oipota gwéry-py enterove va'e omboete íxupe.

6 Ha peē ave Roma-py peiko va'e, Nhandejáry pende pe'a Hesu Cristo re'yirā.

7 (-)

Paulo otima porā Nhandejáry-pe Roma tetā mygwa-rehe

8 Ko'ánga atima porā ranhe-ta Nhandejáry-pe pende-rehe kwéry. Hesu Cristo réry-py atima porā-ta. Nhandejáry perovia tee-magwi peiko-vy, pene rerakwā porā opa-rupi oho. Upéa-gwi atima porā Nhandejáry-pe.

9-10 Oração ajapo javé, xe mandu'a meme pende-rehe. Oikwaa Nhandejáry xe mandu'a ndu'aha pende-rehe. Oikwaa xe apu e'ŷha voi xe. Xe py'a ete gwive amba'apo va'e íxupe, ta'ýry Hesu Cristo rehewa nhe'ẽ porā amombe'u-vy. Are-ma ahase mo'ã pende ha-py. Ajerure rure Nhandejáry-pe ãy aha hagwā apopohu. Xe aha va'erā ha'e oipotaha áry-py aha va'erā.

11 Apohexase eterei amombe'u hagwā peē-my Nhe'ẽ Marangatu tee va'e remime'égwe rehewa nhe'ẽ pejehesa rerova e'ŷ hagwā Hesu-gwi, perovia porāvē râve hagwā íxupe.

12 Upéixa ramo nhanhopytygwō va'erā. Xe arovia teeha xe-rehe pehexa kwaa ramo, perovy'a va'erā. Ha perovia teeha pende-rehe ahexa kwaa ramo katu, arovy'a ave va'erā.

13 Ahase rei aiko-vy, xe re'ýi kwéry, apopohu-vy. Ha xe jokoha katu ndohejáiry aha. Nhande kwéry e'ŷ va'e, judeu e'ŷ va'e outro tetā tetā-rupi oiko va'e-pe namombe'u reíry hagwe-rami, peē aipota katu pehendu ave nhe'ẽ porā.

14 Xe areko amombe'u va'erā voi. Tekotevē amombe'u voi Hesu Cristo rehewa nhe'ẽ porā enterovéa-pe. Aha-ta katu amombe'u karai-pe, karai e'ŷ-pe ave. Aha-ta katu amombe'u imbo'epyre va'e-pe, imbo'epyre e'ŷ va'e-pe ave.

15 Upéixa ramo amombe'uséte voi peē-my hesegwa nhe'ẽ porā Roma-py peiko va'e-pe.

Nainhe'ẽ reíry va'e Nhandejáry. Nhane resende kwaa voi

¹⁶ Xe natíry Hesu rehewa nhe'ẽ porã amombe'u-vy. Xe arovia voi inhe'ẽ. Xe natíry voi hesegwa amombe'u hagwã. Nainhe'ẽ reíry va'e Nhandejáry. Onhe'ẽ reroviaha gwive oresende kwaa va'erã íxupe Nhandejáry. Nhande kwéry, judeu va'e-pe oresendese ranhe. Upéi oresendese ave nhande kwéry e'ŷ va'e-pe, judeu e'ŷ va'e-pe. Upéa-gwi xe natíry voi, nhe'ẽ porã mombe'u-vy.*

¹⁷ Upéa nhahendu ramo, oikwaa uka nhande-vy Nhandejáry mba'éixa pa nhane mopotã. Jarovia-ma ramo íxupe, omopotã nhande py'a. Nhane rembiapo porã-rehe rei nanhane mopotã. Jarovia-gwi íxupe ae nhane mopotã. "Ogwerovia-gwi íxupe, Nhandejáry remimopotã oikove va'erã Nhandejáry ndive."*

Upéixa voi he'i Nhandejáry kwatia nhe'ẽ.

Ndoikóiry ko yvy-rupi ipy'a ky'a e'ŷ va'e

¹⁸ Ha upéi katu Nhandejáry oikwaa uka-ma oiko-vy gwembiaporã. Ogewereko asy va'erã gwĩ ojéupe omboete e'ŷ va'e-pe gwive. Hembiaapo vai va'e-pe gwive ogwereco asy va'erã. Hembiaapo vai meme-gwi, Nhandejáry ndohejái ojekwaa hese anhetegwa va'e rekoha.

¹⁹ Ha Nhandejáry rekoha opa-rupi ojekwaa porã yvypóry-pe. Oikwaa uka íxupe kwéry gwekoha porã. Ha ndoikwaaséi-gwi íxupe ogwereco asy joty va'erã íxupe kwéry.

²⁰ Yma va'ekwe omoingo ko yvy Nhandejáry. Ha upe rire katu Nhandejáry rexa e'ŷ ramo jepe, gwĩ yma gware ohexa kwaa joty hese hekoha: "Opa e'ŷ reheve ipu'akaha va'e nipo ra'e" he'i hese. "Heko marangatu va'e voi nipo ra'e" he'i Nhandejáry-rehe hikwá. Nhandejáry rembiapokwe rexa-vy ohexa kwaa porã tee voi hese. Oikwaa tei jepe, ndojapóry heko-rupi. Upéa-gwi ndikatúiry he'i "Xe ndaikwaáiry íxupe. Xe ndaheko kwaáiry vyteri íxupe. Ndaheko kwaái-gwi, ajapose va'e rei-ma xe ajapo" ndikatúiry he'i. Ohexa kwaa voi hekoha. Oikwaa tei jepe ndojapóry heko-rupi.

²¹ Nhandejáry-pe oikwaa ramo jepe: "Nde ko Nhandejáry voi ra'e" nde'íry joty íxupe. Nomboeteséi íxupe, notima porãí íxupe. Nomboeteséi-gwi íxupe, onhembotavy-ma oiko-vy hikwá. Opy'apy-py onhe'ẽ rei rei oiko-vy. Nahi'arandúi-gwi pytã-my rei oiko va'e-rami oiko hikwá.

²² "Ore ore arandu voi" he'i mo'ã ójehe kwéry. Ha nahi'arandúiry voi hikwá.

²³ Nomboeteséi-ma Nhandejáry omano e'ŷ va'e-pe. Hekovia omboete ta'anga anga Nhandejáry e'ŷ va'e-pe rei. Omboete e'ŷ va'erãgwe-pe katu omboete hikwá. Teko rei-pe ae omonhandejáry imboete-vy. Omboete gwyra ra'anga-pe, víxu ra'anga-pe ave. Gwyre-rehe oiko va'e ra'anga-pe ave omboete hikwá.

²⁴ Nahi'aranduvéi-magwi, ta-pe porã e'ŷ-rupi Nhandejáry oheja íxupe kwéry oho: "Tojapo katu oiko-vy ha'e ae gwembiapo" he'i hese kwéry. "Gweko ky'a-rupi ae toiko katu" he'i hese. Oheja íxupe kwéry oho onhomongy'a hagwã-rupi, otã kwaa e'ŷ reheve ae oiko hagwã.

²⁵ Ombohekovia anhetegwa va'e Nhandejáry rehewa. Ijapu va'e-pe katu ogwerovia. Nomboeteséi-ma nhane moingohare-pe. Hekovia ombotuvixa mba'e Nhandejáry rembiapokwe imboete-vy. Íxupe ae katu nomboete teéiry. Ha'e ae katu tonhemboete opa e'ŷ reheve. Amém.

²⁶ Nomboetéi-gwi íxupe, oheja íxupe kwéry Nhandejáry tape vai-rupi oho hagwã. "Toiko otã kwaa e'ŷ reheve" he'i hese kwéry. Upéixa kunha notívéi-ma. Ohasa verei-ma oiko-vy tekoha. Teko ky'a-rupi oiko.

* 1:16 2 Tm 1.8-9 * 1:17 Hc 2.4

²⁷ Ha kwimba'e ave ohasa verei-ma ave oiko-vy tekoha. Nonhenotĩ kwaavéi-ma oiko-vy. Upéa-gwi omoingo íxupe kwéry tape vai-rupi Nhandejáry hembiapo apokwe-rehe hereko-vy.

²⁸ Upéixa ramo anhetegwa va'e Nhandejáry rehewa ndoikwaasevéi. Upéa-gwi omoakã vai íxupe kwéry Nhandejáry. Upéixa ramo ivai ramo jepe, ojohu porã joty hikwái: "Tohasa katu tekoha" he'i hese. Omohembiapo vai joty íxupe kwéry.

²⁹ Upéa-gwi opaixagwa ojapo. Hembiapo vai, opamba'e rei oipota ojéupe gwarã, ipy'a vai. Gwapixa oiko porãha ave ndojohu porãi. Ha ha'e kwéry oporojuka, onhorairõ, oporombotavy ave. Gwapixa-pe ndohayhúi. Onhe'ẽ rei rei oiko-vy ojóehe.

³⁰ Onhogwenohẽ vai vai rei ave. Ndaija'éiry Nhandejáry-rehe. Nonhom-boetéiry-gwi onhe'ẽgwasu gwasu rei ojóehe. Onhembotuvixaseve mo'ã hikwái. "Xe tuvixa mba'e, xe tuvixa mba'e" he'i mo'ã oiko-vy ójehe. Ha imandu'a ndu'a gwembiapo vairã-rehe ojapo vaive ive hagwã. Gwu nhe'ẽ-rehe opyrû. Osy nhe'ẽ-rehe ave opyrû.

³¹ Hi'arandu e'ŷ va'e, hese ndojeroviáí va'e. Gwe'yí-pe ndohayhúi, ndojohayhúi va'e. He'i hagwe-rami ndojapói va'e. Ndoporoporiahuverekóiry ave.

³² Upeixagwa apoha "Mombry amondo va'erã íxupe xejéhegwi" he'i Nhandejáry kwtia nhe'ẽ. Ogwereko va'erã hembiapo vaikwe-rami. Omano hagwã-py oho va'erã. Upéa oikwaa ramo jepe, ojaposéte katu oiko-vy. Ha outro kwéry katu upeixagwa ojapo va'e ogwerohory joty hembiapo. "Iporã" he'i mo'ã joty hembiapo vai rexava-y.

2

Nhandejáry ogwerekó enterovéa-pe hembiapo apokwe-rehe

¹ Ma'erã po, xe re'yí, "Ne rembiapo vai-ma" peje rei pende rapixa-rehe? Nde rapixa rembiapo nderejohu porãi ramo jepe, ha'e-rami ave nde. Upéixa ramo ojekwaa nde-rehe nde rekoha vai. Upéa-gwi nhande kwéry ramo jepe, nhande kwéry e'ŷ ramo jepe, "Xe ko xe py'a potĩ aiko-vy" ndikatúi ere ndéjehe.*

² Upeixagwa apoha-pe ogwerekó va'erã Nhandejáry hembiapo apokwe-rehe imoingo asy-vy. Oheko kwaapa voi Nhandejáry.

³ Nde rapixa rembiapo nderejohu porãi va'e, ne rembiapo hembiapo ramigwa voi ave. Ma'erã po, xe re'yí, "Nhandejáry ndaxe mbohasa asy mo'ãi xe rembiapo apokwe-rehe" ere rei ndéjehe?

⁴ Nerepenáí para'e Nhandejáry rekoha-rehe. Ha'e nhande poriahuvereko reko va'e. Nanhane mbohasa asy pya'ei va'e nhane rembiapo vaikwe-rehe. Ipoxy rei rei e'ŷ va'e ha'e. Hekoha porã-gwi, nerepenáí para'e hese. Ha Nhandejáry oipota ererova nde rekoha. Upéa-gwi nde poriahuvereko reko oiko-vy ererova hagwã hese nde rekoha. Upe va'e peikwaa teĩ voi peiko-vy.*

⁵⁻⁶ Ha peẽ katu pende apysa e'ŷ va'e-rami joty peiko. Penhembopy'a ratã-gwi, napehenduséi voi inhe'ẽ. Pepyrû inhe'ẽ-rehe. Upéa-gwi Nhandejáry ojehexa uka jevyha áry-py, ogwerekó asy va'erã yvypórý-pe. Hembiapo apokwe-rami ojapo va'erã hese. Inhe'ẽ-rehe pepyrû-gwi, pene moingo asyve syve va'erã. Upe áry-py ojohu tee va'erã enterovéa-rehe hembiapo apokwe.*

⁷ Oĩ hembiapo porã meme va'e. Oipota ojéupe omomba'egwasu Nhandejáry. Oipota ojéupe omboete. Onhemoingove ukase Nhandejáry-pe. Upe va'e-pe omoingove va'erã ondice Nhandejáry opa e'ŷ reheve.

* **2:1** Mt 7.1-2; Lc 6.37; Mt 6.14 * **2:4** Èx 34.6-7; 1 Pe 3.20 * **2:5-6** Sl 62.12; Mt 16.27; 1 Co 3.8; Ap 22.12

⁸ Ha hembiapo porã e'ŷ va'e katu ójehe anhóte oiko. Tekoha-rupi ndoikoséi-gwi, ojeheko rerova ivai va'e-rehe. Upe va'e-pe ogwereko asy va'erã voi Nhandejáry.

⁹ Hembiapo vai va'e-pe gwive omoingo asy va'erã Nhandejáry. Ombohasa asy ranhe va'erã nhande kwéry judeu va'e-pe. Upéi nhande kwéry e'ŷ va'e judeu e'ŷ va'e-pe ave omoingo asy va'erã.

¹⁰ Ha hembiapo porã va'e-pe gwive omomba'egwasu va'erã Nhandejáry. Omboete va'erã íxupe kwéry. Ombopy'agwapy va'erã ave. Ohovasa ranhe va'erã nhande kwéry va'e-pe. Upéi nhande kwéry e'ŷ va'e-pe ave ohovasa va'erã.

¹¹ Enterove va'e-pe peteĩxa ogwereko Nhandejáry. Judeu kwéry, judeu e'ŷ kwéry ave hembiapo apokwe-rehe peteĩxa ogwereko.*

¹² Ha nhande kwéry e'ŷ va'e katu ndoikói myamyrí Moisés remimombe'ukwe-rupi. Hemimombe'ukwe tekoha porã-rupi ndoikóiry. Ha'e ae gweko-rupi joto oiko. Moisés remimombe'ukwe-rupi ndoikói-gwi ojejavy. Ojejavy-gwi, oheja íxupe Nhandejáry. Ha nhande kwéry katu jaikose mo'ã Moisés remimombe'ukwe-rupi. Upe tekoha porã omombe'u va'ekwe nhande-vy teko porã-rupi jaiko hagwã. Ha jajejavy joto jaiko-vy ramo, Moisés nhe'ëgwe-rupi ndajaikói ramo, ndojohu porãi nhane rembiapokwe Nhandejáry.

¹³ Upe tekoha porã ohendu rei va'e-pe, "Nde py'a potã-ma nde" nde'íry va'erã íxupe Nhandejáry. Ohendu tee va'e-pe ae katu, "Nde py'a potã-ma nde" he'i va'erã íxupe Nhandejáry.

¹⁴ Upe tekoha porã-rupi ndoikói nhande kwéry e'ŷ va'e. Moisés nhe'ëgwe ndoikwaái voi. Ha oikwaa e'ŷ ramo jepe, Nhandejáry remimbota-rupi joto oiko. Ojéhegwi rei vérami oikwaa hemimbota.

¹⁵ Nhandejáry remimbota ojapo-gwi, oĩ vérami joto he'i va'e íxupe ipy'apy, oikwaa uka va'e íxupe. Hembiapo porã ramo, oĩ vérami joto he'i va'e íxupe, "Iporã erejapo upe va'e" he'i va'e. Ha hembiapo vai ramo katu, oĩ vérami joto íxupe, "Ne rembiapo vai-ma" he'i vérami joto voi ave íxupe. Ojéhegwi rei vérami oikwaa ra'e Nhandejáry remimbota.

¹⁶ Upéixa ete oiko va'erã. Nhandejáry ojehexa uka jevyha áry-py oiko va'erã. Xe remimombe'ukwe-rami oiko va'erã. Upe áry-py enterovéa-pe omonhe'ë va'erã Nhandejáry hembiapo apokwe-rehe. Inhe'ë-py Cristo omombe'u va'erã íxupe kwéry ipy'a-py onhemi oĩ va'e. "Iporã" he'i va'erã para'e, "Ivai" he'i va'erã para'e peteĩ teĩ-pe.

Moisés remimombe'ukwe tekoha porã-rupi ndajaiko porã teéiry nhande kwéry

¹⁷ Ha ko'ângá katu amondo-ta xe nhe'ë peẽ-my, xe re'ýi kwéry. Nhande kwéry va'e-pema amonda-ta xe nhe'ë. "Xe ko judeu kwéry va'e" peje pendéjehe. Tekoha porã Moisés remimombe'ukwe perovia va'e. "Nhandejáry ko ore Jaryve voi" peje pendéjehe gwĩ nhande kwéry e'ŷ va'e-pe penhemboete uka reise-vy. "Ndaha'éiry pende Jary tee" peje íxupe onhomba'ejáry-rehe pepondera-vy.

¹⁸ Nhandejáry remimbota peikwaa va'e voi. Upe tekoha porã-py pene mbo'e va'ekwe peikwaa porã hagwã jajapo va'erã, jajapo e'ŷ va'erã ave.

¹⁹ "Xe ko gwaperã oikwaa e'ŷ va'e-pe aheda uka va'e voi" peje rei pendéjehe. "Xe ko pytû-my rei oiko va'e-pe ahesape va'e voi" peje pendéjehe.

²⁰ "Xe ko hi'arandu e'ŷ va'e-pe amo'arandu va'e. Oikwaa e'ŷ va'e-pe ahekombo'e va'e" peje pendéjehe. "Upe tekoha porã-rupi aiko-gwi, xe

* ^{2:11 Dt 10.17; At 10.34-35}

arandupa voi xe. Anhetegwa va'e gwive aikwaapa xe" peje rei mo'ā pendéjehe.

²¹ Kente mbo'eháry voi nde. Ma'erā po ndapejéi ojóupe "Aníke eremonda teī" peje hagwā pende rapixa-pe penhemonhe'ē-vy. Aipo ramo, ma'erā nde voi gwī-rami ne monda?

²² "Aníke peiko teī nde rapixa rembireko ndive penhomongy'a-vy" peje penhemonhe'ē-vy. Aipo ramo, ma'erā nde voi ereiko nde rapixa rembireko ndive. Tupā kwéry ra'anga pejohu vai voi. "Aníke peike teī ha'e kwéry oī hapy" peje ojóupe. Aipo ramo, ma'erā nde voi ereho upe-py pemonda hagwā.

²³ "Nhandejáry remimombe'u ukakwe nhande rekoharā voi ore rekoha" peje mo'ā pendéjehe peponderase-vy ojóehe. Penhemboeteseve mo'ā. Aipo ramo ma'erā pemotī Nhandejáry-pe hemimombe'ukwe pejapo e'ŷ-vy?

²⁴ "Nhandejáry rekoha vérami mo'ā perekogwi, xe re'yi kwéry, nhande kwéry e'ŷ va'e nomboetéi Nhandejáry-pe. Onhe'ē rei rei hese"** he'i Nhandejáry kватia nhe'ē.

²⁵ Gwī Moisés remimombe'ukwe tekoha porā va'e gwive rendu-vy, peē kwéry penhepirekytī uka va'ekwe. Ha upe tekoha-rupi peiko e'ŷ ramo katu penhepirekytī uka rei araka'e. Penhepirekytī uka hagwe ndovaléi peē-my.

²⁶ Ha nhande kwéry e'ŷ va'e, judeu e'ŷ va'e katu onhepirekytī uka e'ŷ va'e voi. Ha upe tekoha-rupi oiko-ma ramo, "Xe re'yi e'ŷ ramo jepe, onhepirekytī uka e'ŷ ramo jepe, xe re'yi tee-rami joty oiko" he'i va'erā Nhandejáry nhande kwéry e'ŷ va'e-rehe.

²⁷ Aipo ramo, "Gwī nhande kwéry e'ŷ va'e hekoha porāve pendéhegwī" he'i va'erā Nhandejáry peē-my. Ha peē katu upe tekoha porā-rupi ndapeikói voi. Upe tekoha pende rehewa nhe'ē kватia-rehe onhemoī va'ekwe. Penhepirekytī uka va'ekwe. Ha upe tekoha-rupi katu ndapeiko teéiry voi. Ha nhande kwéry e'ŷ va'e katu onhepirekytī uka e'ŷ ramo jepe, upe tekoha-rupi joty voi oiko. Upéa-gwi "Judeu kwéry e'ŷ va'e hekoha porāve pendéhegwī" he'i va'erā peē-my Nhandejáry.

²⁸ Aipo ramo, entéro judeu kwéry he'i va'e, oipirekytī va'e gwive, ndaha'éiry ha'e tee meme. Judeu kwéry oipirekytī-gwi mante ndokióiry judeu tee ramo.

²⁹ Ndaha'éiry upéixa. Ha judeu tee va'e katu ipy'a potī va'e, Nhandejáry remimopotī ipy'a. "Xe re'yi tee voi nde" he'i íxupe va'e Nhandejáry. "Upe tekoha porā kватia-rehe nhe'ē nhamonhe'ē-gwi, jaiko judeu tee ramo" ja'e mo'ā nhandéjehe. Nhe'ē Marangatu tee va'e oī-ma ramo ae nhande py'a-py, jaiko judeu tee ramo. "Xe pirekytī-gwi, aiko judeu tee va'e-rami" ja'e mo'ā nhandéjehe. Ndaha'éi upéa-gwi. Nhande py'a potī-gwi ae jaiko Nhandejáry re'yi ramo judeu tee va'e-rami. Judeu tee va'e katu nomboetéi íxupe teko rei. Nhandejáry ae omboete íxupe.*

3

¹ Upéixa ramo, "Nhande pe'a rei araka'e nhande kwéry e'ŷ va'e pa'ū-gwi" oī he'i va'e mo'ā upéixa. "Nhanhepirekytī rei araka'e" oī upéixa he'i va'e mo'ā. "Judeu kwéry va'e teī nhande kwéry" oī upéixa he'i va'e mo'ā.

² Nahániry. Nanhande pe'a reíry va'ekwe Nhandejáry. Nanhanhepirekytī uka reíry va'ekwe. Ñy amombe'u ranhe-ta peē-my mba'éixa Nhandejáry nhande rovasa va'ekwe. Nhande kwéry-pete omohangareko uka nhe'ē porā-rehe omombe'u hagwā.

³ Ha oī va'ekwe nhande kwéry judeu va'e ndojapói inhe'ēgwe-rupi: Aipo ramo he'i va'ekwe ndojapóiry voi para'e Nhandejáry, he'i va'e oī.

* 2:24 Is 52.5 * 2:29 Fp 3.3

⁴ Ndaha'éiry upéixa. Ndaijapu mo'āi Nhandejáry. Onhe'ē-gwi ova e'ŷ va'e voi ko ha'e. Enterovéa va'e teko rei va'e ijapu ramo jepe, ojapo va'erā katu onhe'ēgwe-rupi Nhandejáry. Ndikatúiry ha'e ijapu ójehe. Upéa-rehe he'i Nhandejáry kwatia nhe'ē:

"Erenhe'ē jave, ojekwaa-ta katu nde-rehe nde apu e'ŷha. Ne monhe'ē uka ramo, Ojejavý e'ŷ va'e voi, he'i va'erā katu nde-rehe. Mba'eve ndojapóiry, he'i joty va'erā nde-rehe."*

Upéixa he'i voi Nhandejáry-rehe Nhandejáry kwatia nhe'ē.

⁵ Oĩ he'i va'e mo'ā: "Nhane rembiapo vai ramo, ojekwaa porāve Nhandejáry-rehe ijapu e'ŷha" he'i mo'ā. "Upéixa ramo, nhane rembiapo vaikwe repy-rehe nhane moingo asy ramo, ndaha'éi hembiapo porā va'e Nhandejáry" oĩ onhe'ē va'e mo'ā Nhandejáry rekoha-rehe. Upéixa he'i mo'ā teko rei, ijapu rei-vy hese.

⁶ Ha ndaha'éiry voi upéixa. Ha Nhandejáry katu ndaheko porāi ramo ra'e, ndikatúi ogwereko arā ra'e enterovéa-pe hembiapo apokwe-rehe. Ha hekoha porā meme va'e voi ha'e. Ijapu e'ŷ va'e voi ha'e.

⁷ Oĩ he'i va'e mo'ā: "Xe nhe'ēgwe-rupi ndajapói ramo, ojekwaa porāve rāve Nhandejáry-rehe hekoha apu e'ŷha. Ha'e anho mante tuvixa mba'e, he'i va'erā Nhandejáry-rehe omboeteve-vy. Onhemboete ukave Nhandejáry. Onhemboete ukave-gwi, Mbava'e-rehe po xe moingo asy rei va'erā. Mbava'e-rehe po xe rereko rei va'erā xe rembiapokwe repy-rehe?" oĩ he'i va'e mo'ā.

⁸ "Jajapo vai katu onhemomba'egwasuve hagwā Nhandejáry" he'i mo'ā. "Upe va'e Paulo nhe'ēgwe voi" he'i mo'ā xe-rehe. Xe renohē vai uka rei xe-rehe onhe'ē rei rei-vy. Upéixa xe-rehe ijapu-gwi, iporā katu Nhandejáry omoingo asy íxupe hembiapo vai va'ekwe repy-rehe.

Ndoikói ojejavý e'ŷ va'e

(Rm 3.23; Gl 3.22)

⁹ Upe ramo, "Nhande kwéry rekoha ojohu porāve para'e Nhandejáry nhande kwéry e'ŷ rekoha-gwi" oĩ he'i va'e. Nahániry. Enterovéa-rehe peteīxa ojohu hese. Xe ha'e hagwe-rami, nhande judeu kwéry va'e, judeu kwéry e'ŷ va'e ave nanhande pu'akavéi-ma nhandéjehe jajejavý-vy. Ipu'akave nhande kwéry-rehe mba'evai nhane mohembiapo vai uka hagwā.

¹⁰ Upéixa he'i Nhandejáry kwatia nhe'ē:

"Ndaipóri ni peteī va'e ojejavý e'ŷ va'e.

¹¹ Hi'arandu va'e ndoikóiry. Nhandejáry-pe omoirüse va'e ndoikói ave.

¹² Enterovéa tekoha vai-rupi rei-ma oiko ramo, omboyke-ma Nhandejáry-pe oho-vy. Ndoikovéi-ma ni peteī va'e hembiapo porā va'e.*

¹³ Hetekwe ojejaty e'ŷ va'e ivai ine ramo. Nanhaghawahéséiry ha'e-py. Upéixa ete ijuru vai vai-gwi, nanhamoirüséi íxupe. Oporombotavy tavy onhe'ē vai-vy. Onhe'ē-py oporomomytu'e'ŷ rei nhande jukase-vy. Mbói nhande su'u-ta va'e-rami, ivai nhande-vy.*

¹⁴ Naiporāi voi inhe'ē. Tomano mani, he'i nhande-rehe. Onhe'ēgwasu gwasu vai rei ojóehe.*

¹⁵ Pya'e a'e voi oiko ojapo vai hagwā gwapixa-rehe. Ndojejokóiry voi íxupe ojuka hagwā-rehe.

¹⁶ Oho ha-rupi ojohu va'e-pe ogwereko asy asy, hese ndaija'éi-gwi.

¹⁷ Tape porā-rupi ndohóiry. Gwapixa kwéry-pe nombopy'agwapy kwaáiry. Ogwereko asyséte.*

* 3:4 Sl 51.4 * 3:12 Sl 14.1-3; 53.1-3 * 3:13 Sl 5.9; 140.3 * 3:14 Sl 10.7 * 3:17 Is 59.7-8

18 Nomboetéi voi Nhandejáry-pe oiko-vygwi, upeixa hembiapo.”*
Upéixa he'i Nhandejáry kwatia nhe'ẽ.

19 Entéro Nhandejáry kwatia nhe'ẽ gwive gwī Moisés nhe'ẽgwe-rupi oikose va'e pegwarā. Upéa jaikwaa voi. Nhandejáry remimombe'ukwe-gwi hembiaporā enterove oikwaa. Upéa-gwi Nhandejáry ojohu va'erā enterovéa-rehe hembi-apokwe. Hovagwy-py oĩ va'e ndojohúi va'erā onhe'ẽrā.

20 Gwī Moisés nhe'ẽgwe renduha-pe, “Nde py'a potī-ma nde” nde'íry joty Nhandejáry. Ndojapopái-gwi inhe'ẽgwe nomopotīry joty íxupe Nhandejáry. Upéa nhe'ẽ jajapose ramo mo'ã, oikwaa uka nhande-vy nhane rembiapo vaikwe.*

*“Kiva'e-pe Nhandejáry, Nde py'a potī-ma nde, he'i?” oĩ oporandu va'e
(Gl 2.15-16; 3.11; Fp 3.9)*

21 Yma va'ekwe Nhandejáry kwatia nhe'ẽ omombe'u nhande-vy va'ekwe Nhandejáry rembiaporā. Ha ko'ánga katu oikwaa uka-ma nhande-vy mbava'e-rehe “Nde py'a potī-ma nde” he'i nhande-vy. Nhande nhanhemopotī uka reise ramo upe tekoha porā-rupi rei jaiko-vy, nanhane mopotīry voi Nhandejáry.

22 Hesu Cristo-rehe jajerovia-gwi ae, “Nde py'a potī-ma” he'i nhande-vy. Entéro Hesu Cristo reroviah-a-pe gwive, nhande kwéry va'e, nhande kwéry e'ŷ va'e ave, peteĩxa ogwereko Nhandejáry. Peteĩxa ójehe ojerovia va'e-pe omopotī.

23 Ndoikói ojejavy e'ŷ va'e. Enterove ojejavy. Nhandejáry-ramindoikóiry. Ha'e-rami oikose jepe, ha'e-rami ndikatúi oiko hikwái.

24 Ha jajejavvy ramo jepe, nhande rexakwaa rei-ma oiko-vy Nhandejáry. “Ne resende-ma nde Hesu Cristo. Héry-py nde py'a potī-ma nde” he'i nhande-vy Nhandejáry.

25 Omoingo va'ekwe íxupe nhane ressendeharā. Nhande-rehe ojejuka-gwi, omboykese va'ekwe nhandéhegwihane rembiapo vaikwe. Hesu Cristo-rehe jajerovia-ma ramo ae, omboyke va'erā nhandéhegwihane rembiapo vaikwe nhande rereko poxy e'ŷ rehev. Upéa ojapo Nhandejáry ojekwaa hagwā hese hekoha apu e'ŷha. Yma araka'e kente kwéry hembiapo vai ramo jepe, oha'arō joty íxupe. Ndogwereko asy pya'éiry.

26 Ha ko'ánga katu ojohupa oiko-vy enterovéa-rehe hembiapo vai va'ekwe, ojekwaa hagwā hese hekoha apu e'ŷha, hekoha porā teeha ojekwaa hagwā hese. Upéixa voi ojekwaa voi hese hekoha potīha. Mbava'e-rehe Hesu reroviah-a-pe gwive omopotī ojekwaa-ma ave hese.

27 Ha ko'ánga katu ndikatuvéi-ma nhapondera ojóehe: “Tekoha-rupi aiko-gwi aiko porāve ndéhegwihada'evéi-ma ojóupe, tekoha-rupi rei jaiko ramo. “Ne potī-ma nde” nde'íry nhande-vy Nhandejáry tekoha-rupi jaiko-gwi. Jarovia-ma ramo Hesu Cristo-pe ae, aipo he'i nhande-rehe.

28 “Jarovia-ma íxupe. Upéa-gwi nhane mopotī nipo ra'e” ja'e nhandéjehe. “Nhande nhanhemopotī uka reise ramo upe tekoha porā-rupi rei jaiko-vy, nanhane mopotīry voi Nhandejáry” ja'e nhandéjehe.

29 Nhandejáry ndaha'ei judeu kwéry Járy mate. Ha'e ae enterove va'e Járy. Ha'e judeu kwéry Járy, judeu e'ŷ Járy ave.

30 Enterove va'e-pe nhande rereko peteĩxa Nhandejáry. Nhane mopotī nhande kwéry va'e-pe jajerovia-gwi hese. Ogwerovia-gwi íxupe, omopotī ave nhande kwéry e'ŷ va'e-pe.

* 3:18 Sl 36.1 * 3:20 Sl 143.2; Gl 2.16

31 Upe ramo oĩ he'i va'e mo'ã: "Hesu Cristo-pe jarovia-gwi, ndajaikovéi-ma Moisés remimombe'ukwe tekoha porã-rupi" he'i mo'ã ójehe kwéry. Upéixa ave he'i mo'ã nhande-rehe kwéry. Ha upe tekoha porã-rupi ae katu jaiko joty.*

4

Nhandejáry reroviaha Abraão amyrī rehewa nhe'ẽ (Gl 3.6-18; Tg 2.23)

1 Ko'ánga amombe'u-ta peẽ-my myamyrī nhane ramoigwasu Abraão re-hegwa nhe'ẽ. Mba'éixa araka'e ipy'a onhemopotī va'ekwe amombe'u-ta.

2 Hembiaapo porã-gwi onhemopotī ramo ra'e, "Xejéhegwi rei anhemopotī-ma" he'i arã araka'e ójehe. Ha Nhandejáry rovagwy-py katu ndikatúiry he'i upéixa.

3 Ha Nhandejáry kватia nhe'ẽ he'i:
"Ogwerovia-ma va'ekwe Nhandejáry-pe Abraão. Upéa-gwi Nde py'a potī-ma nde, he'i íxupe va'ekwe Nhandejáry"*

Upéixa he'i Nhandejáry kватia nhe'ẽ. Upéa-gwi, "Xejéhegwi rei anhemopotī-ma" ndikatúiry he'i. Ogwerovia-gwi íxupe ae omopotī-ma araka'e íxupe ipy'a.

4 Om̄ba'apo va'e-pe hembiapokwe repy nhame'ẽ íxupe. Nanhame'ẽ reíry íxupe. Hemigana ae nhame'ẽ íxupe. Ha hembiapo porã-rehe rei nomopotīry Abraão-pe Nhandejáry. Ha teko rei katu gwembiapo porã-rehe rei on-hemopotī ukase mo'ã Nhandejáry-pe.

5 Ha Nhandejáry reroviaha katu nonhemopotī ukaséiry gwembiapo porã-rehe rei. Ndoipotái Nhandejáry nhamba'apo nhanhemopotī hagwā-rehe. Ha ipy'a ky'a va'e-pe, onhe'ẽ reroviaha-pe katu, "Ne potī-ma nde" he'i íxupe Nhandejáry. Onhe'ẽ reroviaha-pe ojohu porã-gwi, omopotī-ma íxupe Nhandejáry gweko irūrā.

6 Upéixa voi he'i araka'e myamyrī Davi gwī Nhandejáry remimobovy'a-rehe: "Nhandejáry remimopotī ov'y'a oiko-vy. Nonhemopotīr ojehégwíntē hembiapo porã-gwi. Nhandejáry ae omopotī íxupe" he'i araka'e Nhandejáry remimopotī-rehe.

7 "Hembiaapo vai va'ekwe-rehe ndogwerekói íxupe Nhandejáry. Upe va'e-rehe ov'y'a eterei oiko-vy. Hembiaapo vaikwe omboyke íxugwi va'e-rehe ov'y'a oiko-vy.

8 Hembiaapo vai va'ekwe-rehe naimandu'avéi-ma Nhandejáry. Omboyke-ma voi íxugwi. Upéa va'e-rehe ov'y'a ete voi oiko-vy"*

Upéixa he'i Nhandejáry kватia nhe'ẽ Davi amyrī remimombe'ukwe.

9 Gwī yma gware reko-rupi ojepirekytī va'ekwe, judeu kwéry ov'y'aha anho para'e omombe'u Davi upéixa. Nahániry. Gwī ojepirekytī e'ŷ va'ekwe, judeu e'ŷ kwéry ov'y'aha ave omombe'u upéixa. Amombe'u kuri peẽ-my Nhandejáry kватia nhe'ẽ:

"Ogwerovia-gwi íxupe Abraão amyrī: Nde py'a potī-ma nde, he'i íxupe va'ekwe Nhandejáry"*

Upéixa he'i Nhandejáry kватia nhe'ẽ.

10 Araka'e po Nhandejáry he'i upéixa? Abraão ojepirekytī rire-ma para'e he'i araka'e íxupe Nhandejáry. Nahániry. Upéa he'i ramo íxupe, ndojepirekytīry vyteri va'ekwe.

11 Onhemopotī rire-ma ojepirekytī va'ekwe. Ha ojepirekytī e'ŷ ramo ogwerovia rei-gwi Nhandejáry-pe, omopotī-ma va'ekwe íxupe. Ha upe rire katu Nhandejáry ojepirekytī uka íxupe ojekwaa hagwā hese ogwerovia-gwi

Nhandejáry-pe. Omopotī-ma araka'e íxupe. "Ogwerovia-gwi Nhandejáry-pe omboheko potī-ma íxupe" he'i arā Abraão-rehe. Upéixa-gwi Nhandejáry reroviahva va'e gwive, "Myamyrī Abraão nhane ramoigwasu voi ra'e" he'i hese hikwái. Ojepirekytī e'ŷ ramo jepe, Nhandejáry omopotī joty íxupe ya'ekwe.*

¹² Ha gwī ojepirekytī va'e judeu kwéry va'e gwive katu túvy kwéry-rami ave voi ra'e Abraão. Ojepirekytī ramo jepe, oiko ave Abraão reko-rupi hikwái. Ha'e ojepirekytī e'ŷ ramo vyteri Nhandejáry-pe ogwerovia-ma voi araka'e oiko-vy. Ha'e ogwerovia hagwe-rami ãy ogwerovia-ma ave Nhandejáry-pe oiko-vy hikwái. Abraão reko-rupima oiko ave hikwái. Upéixa-gwi túvy kwéry-rami voi ave Abraão.

Nhandejáry he'i tee va'ekwe Abraão-pe gwembiaporā mombe'u-vy

¹³ He'i tee araka'e Nhandejáry: "Norombotavy mo'āi xe rembiaporā-rehe" he'i. "Ko yvy ame'ẽ va'erā nde-vy ne ma'erā" he'i. "Ne remiarirō kwéry onhemomba'e ave va'erā hese" he'i tee Abraão amyrī-pe gwembiaporā-rehe.*

Upéixa he'i tee ramo íxupe Nhandejáry, Moisés amyrī remimombe'ukwe tekoha porā-rupi anho ndoikói araka'e Abraão onhemopotī hagwā mo'ā. Upe tekoha-rupi rei-vyte oiko ramo, nde'íry íxupe. Ogwerovia-gwi íxupe ae araka'e, Nhandejáry omopotī-gwi íxupe ae araka'e, he'i tee araka'e íxupe upéixa.

¹⁴ Nhandejáry reroviahva e'ŷ rehev Moisés remimombe'ukwe tekoha-rupi rei-vyte oiko va'e-pe, "Penhemomba'e va'erā ko yvy-rehe" he'i ramo Nhandejáry ra'e, jarovia rei arā ra'e íxupe. Onhe'ẽ rei arā araka'e Abraão amyrī-pe.*

¹⁵ Ha upe tekoha-rupi oiko va'e gwive, upe tekoha-rupi ndoikovéi-ma ramo, upe tekoha ohasa-ma ramo, ogwereko asy va'erā íxupe Nhandejáry. Ha upe tekoha kwaa e'ŷ va'e-pe katu ja'e rei arā: "Petekoha rasa-ma peiko-vy. Peiko katu upe tekoha-rupi" ja'e rei arā íxupe.*

¹⁶⁻¹⁷ Upe ramo ogwerovia-magwi íxupe omombe'u araka'e Abraão amyrī-pe hekoharā he'i tee-vy araka'e íxupe. Hemiarirō kwéry-pe gwive ave he'i tee araka'e Nhandejáry. Ohexakwaase rei íxupe kwéry. Entero heroviahape ohovasa va'erā. Gwī Moisés amyrī remimombe'ukwe tekoha-rupi oiko va'e-pe, upe tekoha kwaa e'ŷ va'e-pe ave ohovasa va'erā. Abraão ogwerovia hagwe-rami ave ogwerovia-gwi, ohovasa va'erā ohexakwaa rei-vy hemiarirō joapyri pyri-pe gwive. Upéa-rehe he'i Nhandejáry kwatia nhe'ẽ:*

"Heta tetā tetā-rupi oiko va'e, Nhane ramói, he'i va'erā nde-rehe. Erejerovia hagwe-rami ave, ojerovia-ma va'erā xe-rehe, he'i Abraão-pe Nhandejáry."*

Upéixa he'i Nhandejáry kwatia nhe'ẽ. Upéa-gwi nhande ramói-rami ave voi ra'e Abraão. Nhandejáry rekoha apu e'ŷ va'e-gwi, hese ojerovia-gwi, omoangeri ngeri inhe'ẽgwe Abraão. Ha Nhandejáry, Abraão ojerovia hese va'e katu, omano va'ekwe-pe omoingove jevy va'e voi. Gwī oiko e'ŷ va'e-pe mba'eve-gwi omoingo joty onhe'ẽ-rupi.

¹⁸ Ha Abraão katu: "Oiko-ta nde ra'y" he'i ojéupe ramo, ogwerovia-ma Nhandejáry-pe. Ituja ramo jepe oha'arō arō ojéupe omombe'u va'ekwe Nhandejáry. Upéa-gwi onhemboheta-ma onhemboe'yi-vy hemiarirō tetā tetā-rupi oiko va'e. Upéixa voi oiko va'ekwe Nhandejáry kwatia nhe'ẽ he'i hagwe-rami:

* **4:11** Gn 17.10 * **4:13** Gn 17.4-6; 18.18; 22.17-18 * **4:14** Gl 3.18 * **4:15** Rm 7.7,10-25 * **4:16-17** Gl 3.16,29 * **4:16-17** Gn 17.5

“Upéixa onhemboe'ýi e'ýi va'erã ne remiarirõ kwéry”*
he'i araka'e Nhandejáry kватia nhe'ë Abraão-rehe.

¹⁹ Ha'e omboty-tama cem ándo. Ituja eterei ramo jepe ndogwerovia ku'a ku'ái ojéupe he'i va'ekwe Nhandejáry. Gwete-rehe imandu'a oiko-vy. Haimete-ma ndaipu'akavéi gwete-rehe. O mano hagwā-ramima oiko. Ójehe ndaipu'akavéima. Igwaigwī-ma hembireko Sara. Naimembýi va'e voi ha'e oiko-vy. Ogwenogwaigwī-ma omemby e'ýha. Upéa-rehe imandu'a javé, ndogwerovia ku'a ku'áiry joty ojéupe he'i va'ekwe Nhandejáry. “Áy ndahexa mo'ávéri-ma xe ra'yra” nde'íry joty ójehe. Ogwerovia tee joty.*

²⁰ “Mba'éixa po oiko-ta xe ra'y?” nde'íry joty. Ojéupe he'i va'ekwe Nhandejáry ndogwerovia ku'a ku'ái joty. Ogwerovia tee-gwi, ojerovia teeve eve joty hese. “Nde ko nde tuvixa mba'e va'e voi” he'i Nhandejáry-pe omboete-vy.

²¹ “Nhandejáry he'i tee ramo, ojapo nhande-vy” he'i. “He'i hagwe-ramima ojapo va'e voi nhande-vy. Ojapo kwa'a voi xe-vy gwarā. Hekoha apu e'ýha aikwaa voi xe” he'i Nhandejáry-rehe ogwerovia tee-vy.

²² Upéixa-gwi ogwerovia tee-gwi, “Ha'e ipy'a potí-ma” he'i hese Nhandejáry.

²³ Upéa Nhandejáry kватia nhe'ë he'i ranhe Abraão-rehe.

²⁴ Ha upe rire katu he'i-ma nhande-rehe ave. Nhandejáry Hesu moin-gove jevyha-rehe jajerovia-ma ramo “Nde py'a potí-ma nde” he'i ave va'erã nhande-vy Nhandejáry. Upéixa voi upéa Nhandejáry kватia nhe'ë he'i-ma nhande-rehe ave.*

²⁵ Nhandejáry nhe'ë-py ojejuka va'ekwe Hesu. Jajejavgy-gwi omano. Upéi omoingove jevy va'ekwe íxupe, nhande py'a potí reheve onhemoirū uka hagwā nhande-vy.

5

Nhande py'a omopotí-ma Nhandejáry

¹ Upe ramo Nhandejáry-pe jarovia-magwi, nhande py'a potí reheve jaiko. Nanhande rerekoy asyvéri-ma va'erã Nhandejáry. Nhane mbojoja va'e ojéupe Nhandejáry Hesu Cristo. Heko-rupi mante jaiko.

² Hese jajerovia-gwi, Cristo nhande reru va'e, nhande rovasa nhande rex-akwaa rei-vy hagwā-py nhande reru. Ha ko'ángá Nhandejáry reko irū ramo-ma jaiko. Ojehexa uka ramo Nhandejáry reko porā teeha, onhembotuvixa mba'e ramo ave, jaiko va'erã katu heko-rupi. Upéa jaikwaa voi. Upéa-rehe javy'a ete voi jaiko-vy.*

³ Gwī nhande rerekoy asyha-pe ae nanhanheme'ëi. Nhande rerekoy asy jave, javy'a joty nhande, nhane mbaraeteve teve joty jaiko-vy, jajehesa rerova e'ý hagwā Nhandejáry-gwi. Upéa jaikwaa-gwi, javy'a joty jaiko-vy.

⁴ Jajehesa rerova e'ý ramo íxugwi, “Xe rerovia tee nipo ra'e” he'i arā nhande-rehe Nhandejáry nhande johu porā-vy.

⁵ Nhande johu porā-gwi, jaikwaa voi jaiko porā hagwā Nhandejáry ndive. “Nhandejáry ndive jaiko porā va'erã” ndaja'e reíry voi nhandéjehe. Ha Nhe'ë Marangatu tee va'e, nhande-vy Nhandejáry remime'ëgwe, oikwaa uka nhande-vy Nhandejáry nhande rayhu tee reiha nhande py'a ete gwive jajohayhu hagwā. Upéixa-gwi, “Nhandejáry ndive jaiko porā va'erã” ndaja'e reíry voi nhandéjehe.*

* ^{4:18} Gn 15.5 * ^{4:19} Gn 17.17; Hb 11.12 * ^{4:24} Rm 15.4; 1 Co 9.10; 10.11 * ^{5:2} Mt 5.11-12

* ^{5:5} Tg 1.2-3,12; 1 Pe 1.5-7; 4.13

⁶ Nhandéjehe nanhande pu'akái vyteri ramo, nhande rekoha vai ramo, upe jave Cristo ojejuka-ma va'ekwe nhande-rehe. Nhandejáry omboypy hagwe-py omano.*

⁷ Ojejavy e'ŷ va'e-rehe hasy peve voi nhamano va'e, nhande rekove-rehe nhane rakate'ŷ-gwi. Ha nhande poriahuverekó reko va'e-rehe katu, "Naxe rakate'ŷiry xe rekove-rehe. Hese amano hagwā-rami aĩ" oĩ para'e upéixa he'i hese. "Hese amano hagwā-rami joty" he'i para'e hese.

⁸ Ha Nhandejáry katu oikwaa uka-ma va'ekwe oiko-vy nhande rayhu tee reiharã oikwaa uka-ma va'ekwe nhande-vy. Jajejavy vyteri jaiko-vy ramo, Cristo nahakate'ŷiry gwekove-rehe. Nhande rekovia omano va'ekwe nhande-rehe.

⁹ Nhande rekovia gwugwy avyte-py ojejuka-gwi va'ekwe, ãy ipotĩ-ma Nhandejáry-pe nhande py'a. Upéa-gwi Cristo nhane resende va'erã voi. Ogwahẽ va'erã Nhandejáry áry enterove-pe ohekojohupa hagwā, hembiapo vaikwe-rehe ogwereko asy hagwā íxupe kwéry. Upéha áry-py nhane resende va'erã katu Cristo. Nanhane mondóí va'erã nhane mbohasa asy hagwā-py.

¹⁰ Yma va'ekwe nanhande a'éiry va'ekwe Nhandejáry-rehe. Ha Ta'ýry nhande-rehe omano-gwi gweko irürã nhane moingo va'ekwe Nhandejáry. Ñy Nhandejáry nhamoirū-ma jaiko-vy. Ha Cristo nomanovéi hagwā-ma oikove jevy-gwi, nhane resende sende meme va'erã katu oiko-vy.

¹¹ Areko joty amombe'uve va'erã peẽ-my. Ñy Nhandejáry Hesu Cristo nhane moingo-ma Nhandejáry irũ ramo nhande rerekó asy e'ŷ rehewe. Upéa-gwi nhane mbovy'a vy'a oiko-vy Nhandejáry.

*Adão amyrī rembiapokwe ndaha'ei Cristo rembiapo-rami
(1 Co 15.21-22)*

¹² Yma va'ekwe ojejavy-ma nhande ypy héry va'e Adão. Ha'e ojejavy ranhe-gwi, ombojejavy va'ekwe yma gware yvypórý kwéry-pe. Ojejavy-gwi mombyrypa oiko Nhandejáry-gwi omano hagwā-rami voi hikwái. Upéa-gwi ojejavy-ma va'ekwe entéro yvypórý gwive. Upéa-gwi mombyrypa oiko Nhandejáry-gwi omano hagwā-rami voi oiko hikwái.*

¹³ Ne'írã omombe'u va'ekwe Nhandejáry yvypórý kwéry-pe tekoha porãrã. Áry porukwe-rupi rei oiko hikwái. Ha'e kwéry hekorã ne'írã omombe'u ramo jepe, ojejavy joty oiko-vy hikwái. Ha gweko hagwā oikwaa e'ŷ va'e oiko ha-py, "Amoingo asy va'erã íxupe" nde'íry Nhandejáry. Hembiapo vai va'ekwe-rehe ne'írã imandu'a hese Nhandejáry.

¹⁴ Ha hembiapokwe-rehe ne'írã imandu'a ramo jepe Nhandejáry, ojejavy joty oiko-vy va'ekwe hikwái. Adão amyrī rire Moisés amyrī oiko peve, Nhandejáry nomombe'úi íxupe ha'e kwéry hekorã. Tekoha porã ndoikwaái-gwi, "Nohendúi voi xe remimombe'ukwe" nde'íry hese Nhandejáry. Ha ndoikói-gwi Nhandejáry reko-rupi, ojejavy joty oiko-vy va'ekwe. Ójehe ndaipu'akavéima. Mombyrypa oiko Nhandejáry-gwi omano va'erã-rami rei hikwái. Ha Adão katu nohendúi-ma va'ekwe ojéupe he'i va'ekwe Nhandejáry. Ha he'ýi kwéry-pe katu nomombe'úi Nhandejáry hekorã kwéry. Upéa-gwi Adão ojejavy hagwe-ramima ha'e kwéry ndojejavýiry. Ha'e-rami ojejavy e'ŷ ramo jepe, mombyrypa oiko araka'e Nhandejáry-gwi. Omano va'erã-rami rei oiko hikwái.

Adão rehewa nhe'ẽ he'i Cristo ou va'erã-rehe.

¹⁵ Ha Cristo rembiapo ndaha'ei Adão rembiapokwe-rami. Nhande ypy Adão gwī ojejavy va'e gwive ypy voi. Ha Cristo katu enterovéa-pe omopotí hagwā oikwaa. Ojejavy-ma va'ekwe Adão. Ha Nhandejáry katu nhande

* 5:6 1 Tm 1.15; 1 Pe 3.18 * 5:12 Gn 2.17; 3.6,19

rovasa va'ekwe nhande rexakwaa rei-vy. Adão ojejav-y-magwi, mombyrypa oiko araka'e Nhandejáry-gwi hikwái. O mano va'erã-rami rei oiko yma gware yvypóry kwéry. Ha Nhandejáry katu nhande rexakwaa porã rei voi va'ekwe. Nhande kwéry gwive nhande rovasa vasa va'ekwe peteñ héry va'e Cristo, ha'e ramigwa ndoikóiry va'e. Upéa-gwi opamba'e-py nhande rexakwaa porãve râve katu Nhandejáry.

¹⁶ Ha ndaha'éi Adão rembiapokwe-rami Nhandejáry rembiapo. Nhande ypy Adão ojejav-y rire-ma, "Ha'e onhembopy'a ky'a-ma" he'i hese Nhandejáry. Upéixa he'i ave nhande-rehe Nhandejáry. Ha nhande kwéry katu heta jajejav-y javy rire-ma jepe "Nde py'a potã-ma nde" he'i joty nhande-vy nhande rexakwaa rei-vy.

¹⁷ Oí peteñ va'e nhande ypy ojejav-y va'ekwe. Peteñ jepe ojejav-y ramo, ndaipu'akavéi-ma ójehe enterovéa. O mano va'erã-rami rei hikwái. Ha outro peteñ va'e, Hesu Cristo jaroviah ypy va'e rembiapo iporã eteve voi. Nhandejáry rembiexakwaa rei va'e gwive, "Nde py'a potã-ma nde" he'i íxupe va'e gwive, upeixagwa Nhandejáry rekoha-rupita ae oiko, peteñ oiko va'e Cristo omoingove íxupe-gwi.

¹⁸ Upéixa ramo peteñ va'e ojejav-y-gwi iky'a-ma nhande py'a. Ha upe rire katu peteñ va'e ojejav-y e'ý-gwi, "Nde py'a potã-ma nde" he'i nhande kwéry-pe Nhandejáry nhane moingove-vy.

¹⁹ Nhandejáry nhe'ẽ peteñ va'e nhande ypy nohendúi va'ekwe. Upéa-gwi nhande kwéry gwive jajejav-y va'ekwe. Ha upe rire katu peteñ va'e ohendu va'ekwe ojéupe he'i va'ekwe Nhandejáry. Upéa-gwi, "Nde py'a potã-ma nde" he'i va'erã heta heta va'e-pe Nhandejáry.

²⁰ Upe ramo omombe'u va'ekwe Nhandejáry nhande rekoha porãrã re-hegwa nhe'ẽ. Upéixa teko rei ndoikóramo upe tekoha porã-rupi, Nhandejáry oipota ojekwaapave hese upe tekoha-rupi oikose e'ý etereiha. Ha teko rei ivaive ive va'e ojapo-ma ramo, upe jave nhande rexakwaa porãve râve joty Nhandejáry nhande rovasa-vy.

²¹ Yma va'ekwe jajejav-y-gwi, ipu'aka nhande-rehe tekoha vai. Nanhande pu'akavéi-ma nhandéjehe. Nhamano va'erã va'e-rami jaiko rei va'ekwe jajejav-y-gwi. Ha upe rire katu nhande rovasa-ma va'ekwe nhande rexakwaa rei-vy ndaipu'akavéi-ma hagwã nhande-rehe tekoha vai. Nhandejáry Hesu Cristo omano-gwi nhande-rehe, nhane mopotã-ma va'ekwe Nhandejáry. Nhande py'a potã-gwi, nhane moingove opa e'ý reheve jaiko hagwã he'yí tee ramo.

6

*Cristo-pe peteñxa nhamoirû ramo, jaiko voi nhande
(2 Co 5.17; Gl 2.20; 5.24)*

¹ Oí he'i va'e mo'ã oiko-vy: "Jajejav-y ramo jepe, nhande poriahuvereko reko joty arã Nhandejáry" he'i mo'ã. "Aipo ramo, iporã jajejav-y ve, nhande poriahuverekove hagwã" he'i mo'ã.

² Ndaha'éi upéa-rehe. Nhande-rehe ndaipu'akavéi-ma ae tekoha vai. Mba'e vai-rupi ndajaikovéi-ma nhande. Nhamano va'e-ramima jaiko íxupe. O mano va'ekwe-rami jaiko mba'evai-pe. Upéixa-gwi ndikatuvéi-ma jajejav-y jaiko-vy.

³ Nhanhemongarai ramo va'ekwe, jajehexa uka va'ekwe Cristo Hesu-pe peteñxa nhamoirûmaha íxupe. Ha'e omano va'ekwe. Peteñxa nhamoirû-ma ramo íxupe, omano va'ekwe-rami ave jaiko-ma indive. Upéa peikwaa voi.

⁴ Nhane mongarai ramo va'ekwe, peteñxa nhamoirûmaha íxupe jahexa uka va'ekwe. Ha'e omano va'ekwe. Peteñxa nhamoirû-ma ramo íxupe, omano va'ekwe-rami ave jaiko hendive. Ndajajevyvéi-ma voi. Upéi Cristo-pe

omoingove jevy ramo Nhande Ru, ojekwaa voi hese heko mbaraeteha. Cristo oikove jevy hagwe-rami oipota nhande ave nhande rekoha pyahu jaiko-vy. Oipota nhambopyahu nhande reko jaiko-vy.*

⁵ Cristo omano va'ekwe. Peteīxa nhamoirū-ma ramo íxupe va'ekwe, omano va'ekwe vérāmi jaiko indive. Upéixa ete ha'e vérāmi nhane moingove jevy ramo, peteīxa nhamoirū va'erā íxupe.

⁶ Nhandejáry rembiaporā jaikwaa voi. Kurusugwasu-rehe omano ramo va'ekwe Cristo, hendive nhande reko tujakwe ave omano va'ekwe. Oipe'ase nhandéhegwí nhande rekoha vaikwe nhande jajapose va'e rei ndajajapovéima hagwā, ndaipu'akavéi-ma hagwā nhande-rehe tekoha vai.

⁷ Nhamano ramo ndaipu'akavéi-ma nhande-rehe tekoha vai. Upéa jaikwaa voi.

⁸ “Cristo ndive omano va'ekwe-rami jaiko-ma ramo, indive gwarā nipo ra'e nhande” ja'e nhandéjehe jarovia-vy íxupe.

⁹ Cristo omano rire oikove jevymaha jaikwaa voi. Nomanovéi-ma va'erā. Ójehe ipu'aka-magwi, nomano hagwāvéi-ma voi ha'e oiko-vy.

¹⁰ Ojejuka-ma ramo, omano va'ekwe nhande-rehe ndaipu'akavéi-ma hagwā tekoha vai nhande-rehe. Peteīgwe mante omano va'ekwe. Ha upē rire katu nomano manovéi-ma va'ekwe oiko-vy. Ko'ángā katu oikove jevy-gwi Nhandejáry pegwarā-ma voi ha'e oiko.

¹¹ Upéixa ete iporā katu: “Ndaipu'akavéi-ma xe-rehe tekoha vai. Amano va'ekwe-rami aĩ joty. Cristo Hesu-pe peteīxa amoirū-gwi, ãy Nhandejáry pegwarā-ma voi aiko” ja'e nhandéjehe. Nanhanheme'ẽvéi-ma tekoha vai-pe.*

¹² Anive penheme'ẽ tekoha vai-pe ipu'aka hagwā pende py'a-rehe, pejapose va'e rei pejapo hagwā.

¹³ Naiporāi katu penheme'ẽ íxupe. Pende rete poru-ma ramo, ojapo vai uka va'erā peẽ-my. Hekovia Nhandejáry-pe ae katu penheme'ẽ. Pemano va'ekwe-rami pene moingove jevy va'ekwe. Upéa-gwi peheja katu Nhandejáry po-py pende py'a gwive pende rete gwive pende rete poru hagwā pene moembia porā uka hagwā.*

¹⁴ Naiporāi katu pende-rehe ipu'aka tekoha vai. Yma va'ekwe Moisés remimombe'ukwe tekoha porā-rupi peikose mo'ã. Pendejéhegwí peiko va'ekwe. Ha ko'ángā katu Nhandejáry pende rovasa vasa va'e-rupi peiko. Pende rexakwaa kwaa rei-gwi peiko porā voi. Upéa-gwi naiporāi katu pende-rehe ipu'aka tekoha vai.

Peiko-ma Nhandejáry rembigwái ramo pejejavy e'ý hagwā

¹⁵ Oĩ he'i va'e mo'ã oiko-vy: “Iporā para'e jajejavý” he'i. “Yma Moisés remimombe'ukwe tekoha-rupi mo'ã jaikose va'ekwe nhanhemopotí hagwā mo'ã. Ha ko'ángā katu Nhandejáry rembiporiahuvereko ramo jaiko-gwi, nhane potí-ma jaiko-vy. Upéa-gwi jajejavý ramo jepe, nanhane moingo asy mo'ãi para'e Nhandejáry” he'i mo'ã oiko-vy hikwái. Ndaha'éi voi upéixa.

¹⁶ Erenheme'ẽ ramo ijokwaiha-pe inhe'ẽ rendu ramo, nde ruvixa ramo oiko arā nde-vy. Hembigwái ramo ereiko va'erā íxupe. Mba'e vai-pe erenheme'ẽ ramo, eremano va'erā. Aipo ramo mombyry erepyta arā Nhandejáry-gwi. Ha Nhandejáry po-py katu erenheme'ẽ ramo, inhe'ẽ erehendu ramo, “Nde py'a potí-ta nde” he'i va'erā nde-vy. Upéa peikwaa voi.

* **6:4** Cl 2.12 * **6:11** 2 Co 5.15; Gl 2.19-20 * **6:13** Cl 3.5; 2 Co 5.14-15

¹⁷ Ha atima porā katu Nhandejáry-pe pende-rehe. Yma mba'e vai ipu'aka araka'e pende-rehe. Ha upe rire katu pehendu-ma va'ekwe peē-my hemimombe'ukwe heko-rupi peiko hagwā. Pende py'a gwive pehendu-ma va'ekwe inhe'ẽ.

¹⁸ Pende-rehe ndaipu'akavéi-ma mba'e vai. Peiko-ma Nhandejáry rembigwái ramo pejejavyve e'ŷ hagwā.*

¹⁹ Napene arandupáiry vyteri. Upéixa-gwi apomo'arandu-ta tembigwái rehewa nhe'ẽ-rami. Yma penheme'ẽmba va'ekwe pende py'a gwive mba'e vai-pe hembigwairā penhemongy'a hagwā pejapo vaive ive hagwā. Ha ko'ánga iporā katu penheme'ẽmba Nhandejáry-pe hembigwairā pejejavyve e'ŷ hagwā, peiko marangatu hagwā peiko-vy.

²⁰ Yma araka'e peiko mba'evai rembigwái ramo peiko. "Pejapo katu Nhandejáry remimbota" nde'íry araka'e peē-my nde rerekwa.

²¹ Áy katu petī pene rembiapokwe-gwi. Yma pene rembiapo vai jave, pene rembiapokwe ndovaléi araka'e. Napende rovasái voi araka'e Nhandejáry. Upéixa pejapo ramo, mombyry rei pemano arā Nhandejáry-gwi.

²² Ha ko'ánga katu pende-rehe ndaipu'akavéi-ma mba'e vai, Nhandejáry rembigwái ramo peiko-magwi. Penheme'ẽ-ma íxupe peiko marangatu hagwā hendive peikove opa e'ŷ rehewe hagwā. Upéixa íxupe penheme'ẽ ramo, entéro ne rembiapo ovale voi.

²³ Ha jajejavy ramo nhande rembiapo apokwe-rami nhande rereko arā. Mombyry rei nhamano arā Nhandejáry-gwi. Ha Nhandejáry Cristo Hesu-pe peteĩxa nhamoirū ramo, ondice nhane moingove meme va'erā voi Nhandejáry nhande rexakwaa rei-vy.*

7

Omenda va'e rehewa nhe'ẽ

¹ Peē xe re'ýi kwéry, tekoha rehewa nhe'ẽ kwaaha voi. Upéixa-gwi peē-my amombe'u-tama va'e peikwaa voi. Tekoha rehewa nhe'ẽ jaikove va'e pegwarā. Ndaha'ei nhamano va'ekwe pegwarā tekoha.

² Upéixa voi kunha ime va'e tekoha-rupi oiko jave, oikove vyteri ramo iména, ndikatúi oheja oho-vy. Ha omano ramo katu ndaipu'akavéi hese imenakwe.

³ Upéixa ramo iména oikove vyteri ramo, outro kwimba'e ndive oiko ramo, "Teko ky'a-rupi oiko" ja'e arā hese. Ha iména omano ramo katu ndaipu'akavéi hese. Omenda pyahu jevy ramo outro kwimba'e-rehe, tekoha-rupi joty oiko va'erā. Omano va'ekwe rereko asyhaty e'ŷ upéa. Ndoikovéi omano va'ekwe pogwy-py, ojei-ma íxugwi. Ndaixupe gwarāi inhe'ẽ.

⁴ Upéixa ete pende rekoha, xe re'ýi kwéry. Cristo omano va'ekwe. Cristo-pe peteĩxa pemoirū-gwi, omano va'ekwe-rami ave peiko va'ekwe. Yma va'ekwe he'i va'ekwe Moisés: "Nderejapái ramo upe tekoha porā nhe'ẽ gwive, eremano arā mombyry Nhandejáry-gwi ereiko hagwā" he'i va'ekwe Moisés Nhandejáry nhe'ẽ ohai-vy. Áy jajerovia-magwi Cristo-rehe, upéa nhe'ẽ ndaha'evéi nhande-vy gwarā. Ha'e kuri peē-my: Imenakwe nomandavéi-ma gwembirekokwe-rehe. Ndoikovéi-ma omano va'ekwe pogwy-py, ojei-ma íxugwi. Upéixa ete Hesu Cristo-pe nhamoirū-gwi, omano va'ekwe-rami jaikogwi, ndaha'ei nhande-vy gwarā Moisés rembihaike. Ha Cristo omano rire, omoingove jevy íxupe Nhandejáry. Upéa-gwi áy peiko-ma he'ýi ramo yva'a porā va'e-rami, pene rembiapo porā porā hagwā íxupe.

* **6:18 Gl 5.1** * **6:23 Gl 6.7-8**

⁵ Yma jajapose va'e rei jajapo va'ekwe. Upe-ma ramo, "Ani erejapo teĩ upéa" he'i ramo Moisés remimombe'ukwe nhande rekoharã, ivaive ive va'e joty jajapose va'ekwe. Yvyra hi'upy e'ŷ vaive va'e-rami nhane rembiapo vai vai jaiko-vy va'ekwe. Nhane rembiapo vai vyteri ramo ra'e, mombyry Nhandejáry-gwi jaiko arã ra'e. Nhamano hagwãixa jaiko va'ekwe.

⁶ Upéa yma gware tekoha porã nhe'ẽ ipokatu joty. Ha peteĩxa nhamoirũ-ma ramo Cristo-pe, ãy upéa kwatia nhe'ẽ ndaha'evéi nhande-vy gwarã. ãy omano va'ekwe-rami jaiko íxupe. Ndaipokatuvéi-ma nhande-rehe upéa yma gware nhe'ẽ. Nhe'ẽ Marangatu tee va'e reko-rupi ae nhamba'apo Nhandejáry-pe jaiko-vy.

*Upe tekoha porã nhe'ẽ amonhe'ẽ ramo, aikwaa-ma xe rekoha vai
(Rm 3.20)*

⁷ Oĩ he'i va'erã para'e: "Naiporãi ra'e Moisés amyrã remimombe'ukwe tekoha" he'i mo'ã. Ndaha'éiry upéixa. Upe tekoha rehewa nhe'ẽ ahendu-ma ramo, xe rembiapo vaikwe aikwaa-ma voi. "Aníke peipota teĩ pende rapixa mba'e" nde'íry ramo ra'e upe tekoha rehewa nhe'ẽ, ndaikwaái arã ra'e xe rekoha vai.*

⁸ "Ani ne mba'e jerure rure teĩ" he'i Moisés amyrã rembihaikwe tekoha porã mombe'u-vy. Upéa nhe'ẽ amonhe'ẽ ramo jepe, ajejavý joty. Aipota eterei xe rapixa mba'e. Upéa-gwi ajejavýve vyve aiko-vy. Upe tekoha ndaikwaái ramo ra'e, ndaikwaái arã ra'e xe rekoha vai. Naxe mbojejavýi arã ra'e.

⁹ Yma upe tekoha rehewa nhe'ẽ kwaa e'ŷ-vy aiko va'ekwe. Ha upe rire katu: "Ani erejapo teĩ upeixagwa" he'i pykatu upe tekoha rehewa nhe'ẽ, ajaposeve seve joty.

¹⁰ Upéi mombyry aiko va'ekwe Nhandejáry-gwi amano va'ekwe-rami. Upe tekoha porã-rupi meme mo'ã oipota va'ekwe xe aiko hendive Nhandejáry. Ha xe katu mombyry-ma aha va'ekwe aiko-vy Nhandejáry-gwi. Aiko teĩ. Omano va'ekwe-rami aiko va'ekwe íxugwi.

¹¹ Upe tekoha nhe'ẽ amonhe'ẽ ramo jepe "Aníke erejapo teĩ upeixagwa" he'i pykatu, xe ajaposeve seve joty. Upe tekoha-rupi aikose mo'ã ramo jepe, anhembotavy-ma joty. Upe tekoha nhe'ẽ xe mbojejavýve joty. Ajejavýseve joty. Upéixa ramo ajejavý javy-gwi, omano va'ekwe-rami aiko va'ekwe.

¹² Upéixa ramo Nhandejáry rekoha marangatu voi upe tekoha. Nhande rekorã rehewa nhe'ẽ, Nhandejáry rekoha marangatu voi ave. Nhandejáry remimbota omombe'u upéa nhe'ẽ. Nhane mo'arandu porã, nhane moingo tape porã-rupi ave.

¹³ Oĩ he'i va'erã para'e: "Upe tekoha Nhandejáry rembijohu porã va'e xe mbojejavý ra'e. Xe jukaharã vérami" he'i mo'ã. Ndaha'éiry upéixa. "Ani erejapo teĩ upeixagwa" he'i va'e-rehe xe mandu'a ramo, ajejavýseve joty aiko-vy. Omano va'ekwe-rami aiko. Upéixa ramo ojekwaa xe-rehe xe rekoha vaiha. Jajejavý e'ŷ hagwã pe tekoha he'i-gwi, ojekwaa porãve nhande-rehe nhande rekoha vaiha. "Ivai eterei voi" ja'e nhandejáhe.

"Aikose e'ŷha-rupi aiko joty" he'i Paulo

¹⁴ Nhane nhe'ẽ marangatu pegwarã voi Moisés remimombe'ukwe tekoha porã. Ha ndaxe reko marangatu meméiry. Xe-rehe ipu'aka joty tekoha vai va'e.

¹⁵ Xe aikose ha-rupi ndaikói. Ndajaposéi va'e ajapo joty. Upéixa-gwi xe ndaikwaavéi-ma voi xe rekoha.

¹⁶ Xe remimbota e'ŷ-rupi aiko ramo, upe tekoha-rupi aikose ramo mo'ã, "Anhetegwa voi ra'e" ha'e joty upe tekoha-rehe.

* 7:7 Ex 20.17; Dt 5.21

¹⁷ Upéixa-gwi xejéhegwi ndajapo vaíry. Xe py'a-py oĩ va'e, mba'e vai xe mbojejavy ukaha ae ojapo uka xe-vy.

¹⁸ Xejéhegwi ndajapo porã kwaái. Ajapose va'e rei ajapo. Ajapose ramo mo'ã iporã va'e, ndajapóiry joty.

¹⁹ Xe remimbota-rupi ndaikói joty. Iporã va'e ndajapói. Hekovia ajapo ae ivai va'e joty. Ndajapo mo'ã ramo jepe, ajapo joty.

²⁰ Xe remimbota e'ŷ-rupi joty aiko. Ajapo vai ramo vyteri, xejéhegwi katu ndajapo vaíry joty. Xe aiko porãse mo'ã. Oĩ ave xe mbojejavy ukaseha, pe tekoha vai va'e, xe py'a-py oĩ va'e. Xe-rehe ipu'aka joty.

²¹ Upéixa-gwi xe-vy ojehu va'ekwe ãy aikwaa-ma. Ajapo porãse ramo mo'ã, nome'ẽi xe-vy ajapo porã hagwã. Ivai va'e mante ajapo joty aiko-vy.

²² Xe ae xejehegwíte arov'y'a Nhandejáry remimombe'u ukakwe nhande rekoharã.

²³ Ha xe py'a-py oĩ ave pe tekoha vai va'e vyteri. Ha xe remimbota, xe ajohu porã va'e, ndaijojái pe tekoha vai va'e ndive. Ndaijojái ramo, ndaxe pu'akavéi-ma xéjehe xe mbojejavy uka-gwi pe tekoha vai va'e.*

²⁴ Upéixa ramo, xe py'a-py ijoja e'ŷ-gwi, xe poriahu ete voi, ndavy'avéi-ma. Kiva'e-pa xe resendeharã. Omano-tama va'e-rami aiko pe tekoha vai va'e-gwi.

²⁵ Xe resende-ta katu Nhandejáry. Upéa-rehe atima porã íxupe. Xe resenda ave Nhandejáry Hesu Cristo.

Upéixa amombe'u jevy-ta peẽ-my xe rekoha. Xe katu Nhandejáry rembigwái ramo jepe, xe rekoha ku'a ku'a joty. Xe py'a rekoha-rupi aiko ramo, upe javé Nhandejáry remimombe'ukwe-rupi aiko. Ha pe tekoha vai nhe'ẽ-rupi aiko ramo, ndaxe pu'akáí xéjehe. Ojapo vai ukase joty xe-vy.*

8

*Nhe'ẽ Marangatu tee va'e nhande py'a-py oiko ramo, jaiko porã voi
(Gl 5.16-18)*

¹ Upe ramo Cristo Hesu-pe peteĩxa nhamoirũ va'e gwive, “Ojejavy-ma” ãy nde'i mo'ãi nhande-rehe Nhandejáry.

² Nhe'ẽ Marangatu tee va'e reko-rupi jaiko ramo, nhane moingove. Jaikove meme voi Cristo Hesu-pe peteĩxa nhamoirũ va'e. Upéixa ete xe jukaharã jepe, ndaipu'akavéi-ma xe-rehe tekoha vai. Ndaikovéi igwy-py, asẽ-ma íxugwi. Hi'arive-ma xe aiko. Cristo nhane moingove-gwi, “Ojejavy-ma” nde'i mo'ãvéi nhande-rehe Nhandejáry.

³ Yma jajapose va'e rei jajapo va'ekwe. Upéa-gwi Moisés remimombe'ukwe tekoha-rupi ndajaikóiry va'ekwe. Nhande rekoha vai imbaraeteve va'ekwe nhande-rehe. Ha Nhandejáry katu ipu'akave-ma nhande-rehe. Oikwaa uka ranhe nhande-vy nhande rekoha tujakwe. “Pejejavy-ma” he'i nhande-vy. Upe ramo nhande-rehe ombou va'ekwe gwa'ýry. Nhande rekoha-rami ave ha'e hekoha. Nhande rekoha-rami ave ou va'ekwe oipe'a hagwã nhandéhegwi nhane rembiapo vaikwe.

⁴ Upéixa upe tekoha porã-rupi gwive Nhandejáry oipota jaiko. ãy ndajajapovéi-ma jajapose rei va'e. Nhe'ẽ Marangatu tee va'e reko-rupi ae jaiko. Upéixa ramo upe tekoha, Iporã katu pejapo upéa, he'i va'e gwive oipota voi nhahendu.

⁵ Ha nhande jajapose rei va'e jajapo va'e mate nanhande pu'akáí nhandéhe. Jajapose va'e rei-rehe mate nhane mandu'a jaiko-vy jajapo hagwã-rehe. Ha nhande Nhe'ẽ Marangatu tee va'e reko-rupi jaiko va'e

* 7:23 Gl 5.17 * 7:25 Gl 5.16-26

katu nhande pu'aka nhandéjehe. Nhe'ẽ Marangatu tee va'e remimbota-rehe nhane mandu'a jaiko-vy va'e nhande pu'aka voi nhandéjehe.*

⁶ Erejapose va'e anho-rehe rei ne mandu'a meme ramo, mombyry ereiko arã Nhandejáry-gwi. Omano va'ekwe-rami rei ereiko va'erã. Ha Nhe'ẽ Marangatu tee va'e remimbota anho-rehe ne mandu'a meme ramo katu, ereikove arã nde py'agwapy reheve ereikove va'erã.

⁷ Upéixa erejapose va'e anho-rehe rei ne mandu'a ereiko-vy ramo, Nhandejáry nhe'ẽ-rehe erepyrũ meme ereiko-vy. Nhandejáry remimombe'u ukakwe nhande rekoharã-rupi ndereikói voi. Ereikose teĩ. Nande pu'akáiry ereiko hagwã.

⁸ Erejapose va'e anho rei erejapo ramo, Nhandejáry remimbota apo e'ŷha voi nde. Nerembovy'ái voi íxupe.

⁹ Ha ko'ánga pejapose va'e anho rei ndapejapovéi-ma. Oiko ramo pende py'a-py Nhe'ẽ Marangatu tee va'e, heko-rupima peiko. Ha ndoikóiry ramo ra'e katu pende py'a-py Cristo nhe'ẽ marangatu, Cristo re'ýi ramo ndapeikói ave arã ra'e.

¹⁰ Cristo pene moirũ ramo, pene moingove va'erã Nhe'ẽ Marangatu tee va'e. Pejejavy-gwi pemano va'erã. Omano va'erã voi pende rete. Ha omano ramo jepe, peikove jevy joty va'erã. Pende py'a potí-gwi, Cristo nhane moingove jevy va'erã Nhandejáry ndive opa e'ŷ reheve jaiko hagwã.

¹¹ Ha Nhandejáry katu omoingove jevy va'ekwe Hesu-pe. Omano rire omoingove jevy va'ekwe íxupe. Hemimoingove jevy voi Cristo. Upéa-gwi pende py'a-py oiko ramo Nhandejáry Nhe'ẽ Marangatu, pene moingove jevy va'erã ave. Omano va'erã pende rete. Ha omano ramo jepe pende retekwe, omoingove jevy va'erã peẽ-my pende rete. Pene ndive oiko-gwi inhe'ẽ Marangatu pene moingove jevy va'erã voi Nhandejáry ndive peiko meme hagwã.

¹² Upéixa-gwi, xe re'ýi kwéry, iporã katu jaiko Nhe'ẽ Marangatu tee va'e rekorumpi. Ha nhande reko tujakwe-rupi rei katu ndikatúiry jaiko.

¹³ Pende reko tujakwe remimbota-rupi peiko ramo, mombyry peiko arã Nhandejáry-gwi. Omano va'ekwe-rami rei peiko arã. Ha Nhe'ẽ Marangatu tee va'e remimbota-rupi peiko ramo katu, anive peiko teĩ pende reko tujakwe-rupi. Ereheja-ma va'erã nde rekoha tujakwe. Ani penheme'ẽve teĩ pende reko tujakwe-pe. Yma gware pende reko-rupi ani peikove teĩ. Upéixa ramo peikove va'erã Nhandejáry ndive.

¹⁴ Nhandejáry Nhe'ẽ Marangatu tee va'e-rupi jaiko-ma ramo, Nhandejáry ra'y ramo-ma jaiko voi.

¹⁵ Peẽ-my Nhandejáry remime'ẽgwe Nhe'ẽ Marangatu tee va'e voi. Ha'e ndoúi voi pene mopy'amirí hagwã, ndoúi ave pende jokwáí hagwã. Napene mytu'e'ŷvéri-ma hagwã pendéjehe ae ou. Áy katu Nhe'ẽ Marangatu tee va'e oiko-gwi pende py'a-py, Nhandejáry ra'y ramo-ma peiko. Nhanhemopeteĩ teĩ, "Xe Ru" ja'e-vy. Jarovy'a ja'e-vy Nhandejáry-pe.

¹⁶ Nhande py'a-py, "Nhandejáry ra'y voi xe" peteĩ teĩ ja'e nhandéjehe nhanhemombe'u-vy. Upéixa ave he'i nhande py'a-py Nhe'ẽ Marangatu tee va'e.

¹⁷ Nhande ta'ýry-gwi, gwe'ýi pegwarã iporã va'e ome'ẽ ave va'erã nhande-vy. Cristo re'ýi pegwarã iporã va'e ome'ẽ ave va'erã nhande-vy. Cristo rerekoso asy hagwe-rami, nhande rerekoso asy ave va'erã. Ha upe rire katu Cristo-rehe heko porã teeha ojekwaa ramo, hekoha-ramima nhanheheko viarõ va'erã.**

* 8:5 Gl 5.19-25 * 8:17 Gl 4.1-7 * 8:17 Gl 3.29; 4.6-7; 2 Tm 2.11-12

Nhandejáry nhane mopotī rire, nhane moingo va'ekwe gweko porā tee-rupi, ha'e-rami nhane momba'egwasu hagwā

¹⁸ Ây jahasa asy voi jaiko-vy. Ha ojehexa uka ramo hese Nhandejáry reko porā tee-ha, nhande rerekō asy hagwe-rehe nanhane mandu'avéi-ma va'erā. Nhane momba'egwasu porāve rāve va'erā.

¹⁹ Ây entéro Nhandejáry rembiapokwe gwive ojapura oha'arō-vy Nhandejáry ra'y kwéry ojekwaa hagwā. "Araka'e po ou-ta ojehexa uka-vy" he'i ojapura-vy hese.

²⁰ Yma entéro Nhandejáry rembiapokwe gwive oiko teī araka'e. Omano hagwāixa oiko araka'e hikwái. Ojéhegwí rei ndoikóiry araka'e. Nhandejáry nhe'ẽ-py teī oiko araka'e. Nhandejáry remimbota-rupi oiko upéixa.

²¹ "Ha ndojehu meméi va'erā íxupe kwéry upéixa" he'i ojéupe Nhandejáry. "Ây entéro va'e ndaipu'akái ójehe. Upéa-gwi enterovéa-pe amoatyrōmba va'erā itujave jave e'ŷ hagwā, omano mano e'ŷ hagwā, xe ra'y kwéry ndive ipu'aka jevy hagwā ójehe, Cristo Hesu ndive onhemomb'aegwasu hagwā hikwái" he'i ojéupe Nhandejáry.

²² Ko'ángá ete peve entéro Nhandejáry rembiapokwe va'e gwive hasy va'e-rami hasē. Ne'írā onhemoatyrō enterove va'e. Upéa-gwi hasē. Kunha imemby-tama va'e-rami ave hasē. Upéa jaikwaa voi.

²³ Na Nhandejáry rembiapokwe anhóiry hasē. Nhande ave, nhane rasē. Nhande py'a-py oiko Nhe'ẽ Marangatu tee va'e. Nhandejáry remime'ẽgwe ranhe peẽ-my ha'e. Upéa-gwi nhande py'a-py nhane rasē nhande Nhandejáry ra'arō-vy. Ha upe rire katu gwa'ýry tee-rami nhande rerekō va'erā, nhane resendepa va'erā. Nhande rete gwive nhane resende va'erā.

²⁴ "Jajerovia ypyha áry gwive nhane resende-ma va'ekwe. Ha upe rire katu ou jevy ramo, nhande rete gwive-ma nhane resendepa ete-ma va'erā" ja'e nhandéjehe jarovia-vy. Nhaha'arō va'e jahexa ramo, ogwahē-ma ramo, nanhaha'arōvái-ma. Jahexa va'e nanhaha'arōi joty jaiko-vy.

²⁵ Ha jahexa e'ŷ vyteri va'e katu nhaha'arō ramo, "Ndoiko mo'ái para'e" ndaja'éi joty hese. Nanhaha'arō ku'a ku'ái jaiko-vy va'e. Nhaha'arō tee ae jaiko-vy va'e. Upéixa Cristo ou jevytaha áry-rehe nhaha'arō tee voi nhanhemoatyrōmba hagwā.

²⁶ Ha Nhe'ẽ Marangatu tee va'e nhane pytygwōharā voi ave. Nanhane mbaraetéi ramo nhane pytygwō-vy ou. Nhandejéhegwí rei ndajajapo porā kwaáiry oração. Ha Nhe'ẽ Marangatu tee va'e ae katu nhande réry-py ojerure Nhandejáry-pe nhande-rehe. Nhane nhe'ẽ e'ŷ-my hasē va'e-rami onhe'ẽ ojerure asy-vy.*

²⁷ Ha Nhandejáry-gwi ndaipóri okanhy va'e. Nhande py'apygwa jepe oikwaapa voi ha'e. Upéa-gwi Nhe'ẽ Marangatu tee va'e he'ise va'e oikwaapa voi. Ha Nhe'ẽ Marangatu tee va'e ojerure asy Nhandejáry-pe he'ýi kwéry-rehe. Héry-py ojerure rure hese. Nhandejáry remimbota-rupi ojerure hese. Upéa-gwi he'ise va'e oikwaapa voi.

²⁸ Nhande, Nhandejáry oipota pota ojéupe nhamoirū va'e, hemienói voi. Nhandejáry-pe jahayhu ramo, opamba'e oiko va'erā nhande-vy nhande rerekō porā hagwā. Mba'e ojehu ramo nhande-vy, ombo'apo porā joty nhande-rehe Nhandejáry. Upe va'e jaikwaa voi.

²⁹ Yma va'ekwe nhande-rehe he'i va'ekwe Nhandejáry: "Xe rembiporavorā voi aipe'a va'erā íxupe xe ra'y Hesu reko-rupi oiko hagwā" he'i. "Xe ra'y Hesu aipota oiko tyke'yrusu ramo, tyvýry reta va'e-rami oiko hagwā Hesu" he'i va'ekwe nhande-rehe Nhandejáry.

* **8:26** Jo 14.16

³⁰ Ha upé rire katu, nhande pe'a rire, nhane renói va'ekwe ave. Upéi nhane renói rire, "Ha'e ipy'a potí-ma" he'i va'ekwe nhande-rehe. Upéi nhane mopotí rire, nhane moingo va'ekwe gweko porã tee-rupi, ha'e gweko-rami nhane momba'egwasu hagwã.

Cristo po pyte pygwa voi nhande. Ndaipóri ipo pyte-gwi nhande pe'a va'erã

³¹ Nhande rovasa vasa-gwi Nhandejáry, amombe'u-ta peẽ-my hekoha porã. Ha'e nhane ptytgwõ tygwõ-gwi, ndaipóri nhande-rehe ipu'aka va'erã.

³² Peteĩ oiko va'e gwa'ýry-rehe jepe nahakate'ýiry va'ekwe. Nhande kwéry rekovia ijukaharã-pe ome'ẽ va'ekwe nhande-rehe. Gwa'ýry-rehe nahakate'ýiry-gwi ome'ẽ va'ekwe nhande-rehe ijukaharã-pe, opamba'e-py nhande rexakwaa rei va'erã voi katu.

³³ Nhandejáry rembiporavo va'e-rehe, "Ojejavy-ma ra'e" he'i va'erã ndoikói va'erã. "Ha'e ipy'a potí-ma" he'i hese Nhandejáry.

³⁴ Upéa-gwi, "Ha'e ipy'a ky'a-ma" he'i va'erã hese ndaipóri. Nhande-rehe happy omamo va'ekwe Hesu Cristo. Omamo rire katu ha'e onhemoingove jevyma va'ekwe. Ha ko'ánga nhande réry-py ojerure Nhandejáry-pe nhande-rehe ijyke-rehe oiko-vy.

³⁵ Cristo po pyte-gwi ndaipóri nhande pe'a va'erã. Jahasa asy ramo jepe, jajepy'apy jaiko-vy ramo jepe, nhande rerekoso asy ramo jepe, nhande vare'a ramo jepe, nhande ao e'ý ramo jepe, nhane monghyje ramo jepe, nhande juka ramo jepe, Cristo po pyte-gwi nanhande pe'ái va'erã voi.

³⁶ Upéixa he'i Nhandejáry kwtia nhe'ẽ:
"Nde réry-py oroiko va'e. Upéa-gwi ore jukase meme va'e-rami oroiko. Ore rerekoso asy voi. Ovexa ijukapyrã-rami ore rerekoso"*

he'i Nhandejáry kwtia nhe'ẽ.
³⁷ Mba'e ojehu ramo jepe, nanhane mytu'e'ýiry joty nhandéjehe. Cristo nhande rayhu-magwi, nanhanheme'ẽ mo'ái nhande jukase va'e-pe. Cristo rembiayhu voi nhande. Ndaipu'akavéi-ma voíte nhande-rehe nhande rerekoso asyharã. Nhande py'agwasu joty jaiko-vy.

³⁸ Hembiyahu voi nhande. Upéa-gwi ipo pyte-gwi ndaipóri nhande pe'a va'erã. Nhamano va'erã para'e, jaikove va'erã para'e. Ipo pyte pygwa meme joty nhande. Oĩ yváy pygwa, Nhandejáry rembigwái va'e para'e, mburuvixa va'e para'e, imbaraeteve va'e para'e. Upeixagwa jepe ndikatúiry nhande pe'a ipo pyte-gwi. Ndaipóri Nhandejáry jokoharã nhande rayhu e'ý hagwã. Áy ojehu va'e gwive, ko'ẽ mbue ramo ojehu va'erã gwive ndaipóri ipo pyte-gwi nhande pe'a va'erã.

³⁹ Ipo pyte-gwi nanhande pe'ái va'erã yvate rupigwa, yvygwy rupigwa ave. Áry-rupi oiko va'e, okwa rei va'e ave, aragwy-rupi oiko va'e gwive nanhande pe'ái va'erã voíte íxugwi. Ndaipóri Nhandejáry ojokoharã nhande rayhu e'ý hagwã. Nanhande rayhu ku'a ku'a reíry va'e. Ndopoi reíry nhandéhegwi. Nhandejáry po pyte pygwa-ramoma jaiko va'erã voi Nhandejáry Hesu Cristo nhande rayhu-gwi. Ndaipóri voíte íxugwi nhande pe'aharã.

9

Nhandejáry rembiporavokwe gwe'yirã rehewa nhe'ẽ

¹ Amombe'u-ta peẽ-my anhetegwa va'e. Cristo irũ voi xe. Upéa-gwi naxe apu mo'ái voi xe. Ha Nhe'ẽ Marangatu tee va'e xe mbo'e-gwi, xe py'a-py oĩ he'i va'e xe-vy "Anhetegwa va'e" he'i va'e xe-vy. Upéa-gwi aikwaa voi xe apu e'ýha.

* 8:36 SI 44.22

2-3 Amombe'u-ta peẽ-my xe vy'are'ŷ. Xe ndavy'aveiha amombe'u-ta peẽ-my. Xe mbopy'a rasy meme xe re'ŷi kwéry Israel re'ŷi va'e. Ha'e kwéry xe rugwy re'ŷi voi. Aipota eterei mo'ã ha'e kwéry ogwerovia ave. Hekovia jepe tamano xe, ha'e-ta para'e Nhandejáry-pe. Tove taiko Nhandejáry ojuka va'erã-rami xe ave. Xe kente kwéry-rehe ha-py tove jepe taxe mondo Cristoojéhegwimombyry, ha'e-ta para'e Nhandejáry-pe.

4 Ha'e kwéry katu Nhandejáry rembiporavokwe gwe'yirã. Gwa'yryrã ave oiporavo va'ekwe. Ohexa uka uka va'ekwe íxupe kwéry Nhandejáry gwekoha tee. Ha'e tuvixa mba'e ohexa uka va'ekwe gwekoha. "Xe reko-rupi peiko ramo, xe orohovasa meme va'erã" he'iri iri íxupe kwéry va'ekwe Nhandejáry. Ohendu ramo, ojohu porã onhonhe'ẽ. Hekorã omombe'u va'ekwe íxupe Nhandejáry. Íxupe kwéry anho omombe'u mba'éixa pa va'erã ojapo omboete hagwã ojéupe. Íxupe kwéry anho: "Peẽ-my katu orohovasa va'erã voi" he'iri iri Nhandejáry.

5 Yma myamyrí Jacó ra'y kwéry-rehe imandu'a porã meme. Ha'e kwéry judeu kwéry rembypy. Ha Cristo katu nhande-rami oiko ramo kuri, ha'e kwéry rugwy re'ŷi ave. Isy judeu kwéry va'e voi. Ha'e ko Nhandejáry voi. Enterove va'e ruvixa voi. Ndaipóri ha'e ramigwa. Ha'e ko tuvixa mba'e opa e'ŷ reheve oiko va'e voi. Amém.

6 Oĩ he'i va'e mo'ã: "Nhandejáry he'i hagwe-rami ndojapóiry" he'i mo'ã. Ndaha'éiry upéa-gwi. Israel re'ŷi judeu kwéry Nhandejáry rembiporavokwe va'e voi. Ha hese ojerovia va'e ndahetáiry oĩ. Upéa-gwi entéro judeu kwéry va'e-pe ndoiporavói va'ekwe Nhandejáry gwe'yirã.

7 Ha Abraão remiarirõ kwéry katu, oĩ Nhandejáry ra'y, oĩ Nhandejáry ra'y e'ŷ ave. "Nde ra'y Isaque ra'y kwéry ne remiarirõ kwéry tee voi" he'i va'ekwe Abraão amyrí-pe Nhandejáry.*

8 Upéixa ramo entéro Abraão remiarirõ kwéry ndaha'éi Nhandejáry ra'y ave. "Upe va'e xe ra'y voi" he'i hese va'e katu, Nhandejáry ra'y kwéry voi. Ndoiporavopái.

9 Nhandejáry he'i va'ekwe a-rami: "Anhetegwa amombe'u-ta nde-vy. Outro ro'y-py hi'áry-py aju jevy-ta" he'i. "Ne rembireko Sara héry va'e imemby-ta" he'i Abraão-pe. Upéixa voi, "Upe va'e xe ra'y voi" he'i hese va'e, Nhandejáry re'ŷi voi.*

10 Áy amombe'u-ta peẽ-my outro nhe'ẽ peikwaa hagwã mba'éixa Nhandejáry oiporavo gwe'yirã. Mokõi mitã rehewa nhe'ẽ amombe'u-ta. Isy héry Rebeca. Mokõi omembyrã-gwi hyegwasu. Ha nhane rembypy Isaque mokõi mitã va'e ru voi.*

11-12 Mokõi mitã ne'írã oiko ramo, peteĩ-pe oiporavo Nhandejáry, outro-pe ndoiporavói. Gwembiporavose-pe ae oiporavo Nhandejáry. Upéa-gwi he'i va'ekwe isyrã-pe: "Tyvýry rembigwairã voi tyke'ýry" he'i. Ne'írã hembiapo porã, ne'írã hembiapo vai ave, ne'írã vyteri oiko ave. Upe-ma ramo: "Tyvýry rembigwairã voi tyke'ýry" he'i isyrã-pe. Upéixa ramo, mba'eve ojapo e'ŷ reheve, mba'eve oikwaa e'ŷ reheve, oiporavo araka'e tyvýry-pe Nhandejáry.*

13 Upéixa voi he'i Nhandejáry kwtia nhe'ẽ:
"Ha Jacó katu xe rembiayhu va'e. Ha tyke'ýry katu xe rembiayhu e'ŷ va'e"**
he'i Nhandejáry kwtia nhe'ẽ.

14 Upéixa ramo oĩ he'i va'e mo'ã: "Ndaheko porãi Nhandejáry. Peteĩ va'e-rami ndogwerekóiry. Peteĩ ohayhu outro ndohayhúi" he'i mo'ã. Ha ndaupéixairy.

* 9:7 Gn 21.12; Hb 11.18 * 9:9 Gn 18.10 * 9:10 Gn 25.21 * 9:11-12 Gn 25.23 * 9:13 Ml 1.2-3

¹⁵ Moisés-pe Nhandejáry remimombe'ukwe amombe'u-ta:
“Xe rembiporiahuverekose aéte aiporiahuvereko va'erā. Xe rembiereko
porāse aéte areko porā va'erā”*

¹⁶ Upéixa ramo, ndaipóri nhane rembiaporā-rehe nhande poriahuvereko arā.
Nhande ae jajehovasa ukase mo'ā ramo jepe, nanhande rovasái joty upéa-
gwi. Ha'e ae nhande poriahuverekose va'e-pe gwive nhande poriahuvereko.
¹⁷ Upe va'e peikwaa hagwā he'i Nhandejáry kватia nhe'ē mburuvixa Faraó-
pe:

“Xe oromoingo va'ekwe mburuvixagwasu ramo ojekwaa kwaagwā opa-
rupi xe pu'akaha. Yvy apy gwive xe réry ojekwaa hagwā oromoingo
va'ekwe. Xe nhe'ē rendu e'ŷ ramo jepe, xe mbojevy ramo jepe,
ndéhegwi ojehexxa uka va'ekwe xe pu'akaha”*

he'i Nhandejáry kватia nhe'ē.

¹⁸ Upéixa ramo, gwembiporiahuverekose va'e-pe gwive oiporiahuvereko
Nhandejáry. Ha gwī gwerovia e'ŷha onhembopy'a ratāse va'e gwive, omoingo
íxupe Nhandejáry ijapysa e'ŷ va'e-rami.

Oī Nhandejáry rembiereko asyrā, oī ave hembiporiahuverekorā

¹⁹ Upéixa-gwi oī pene pa'ū-my he'i va'e mo'ā: “Xe mbopy'a ratā ramo
Nhandejáry, ma'erā po xe monhe'ē va'erā? Ma'erā po, Erejejavy-ma, he'i
va'erā xe-vy?” he'i mo'ā. “Kiva'e po ojoko-ta oipota va'e. Avave ndikatúi ojoko
Nhandejáry ojapose va'e” he'i mo'ā Nhandejáry-rehe.

²⁰ Naiporāi upéa. Nde ndaha'éi Nhandejáry. Nde, teko rei voi. “Nde ae
erenhemonhe'ēse joty xe-vy” ma'erā ere Nhandejáry-pe? Amombe'u-ta peē-
my peteī nhe'ē. Oī tuju gwigwa nha'ē. “Ma'erā tipo a-rami xe apo nde?”
naiporāi he'i oapohare-pe.*

²¹ Ha tuju-gwi mba'e ryru apohaty ojaposeha-rami ojapo. Peteī tuju-
gwi ojapo mokōi mba'e ryrurā. Peteī katu sapy'a rei oiporu va'erā ojapo.
Ojehexase hagwā-rami ojapo porā voi. Outro katu pya'e a'e oiporu va'erā
ojapo. Upe va'e imombopyrā ojeka rire.

²² Upéixa voi nhande rerekos Nhandejáry. Oikwaa ukase va'ekwe nhande
rerekos asyha. Opu'akaha oikwaa ukase ave. Gwī gwembiereko asyrā
oha'arō joty. Ndaipoxy pya'éi. Āy ndogwereko poxýiry vyteri hekoha vai va'e-
pe. Oha'arō joty oiko-vy.

²³ Ha gwekoha porā ete voi katu ohexa ukase va'ekwe ave. Nhande kwéry
hembiporiahuvereko va'e nhande rexakwaa rei-ma voi. Gweko-rami ete-ma
jaiko hagwā nhande poravo-ma.

²⁴ Nhandejáry remimbovia voi nhande kwéry. Ndaha'éi judeu kwéry anho.
Judeu kwéry e'ŷ ave Nhandejáry remimbovia.

²⁵ Ha Nhandejáry kватia nhe'ē ohai va'ekwe héry va'e Oséias he'i a-rami:
“Ha xe re'yí e'ŷ-pe, Xe re'yí, ha'e joty va'erā. Xe rembiayhu e'ŷ va'e-pe, Xe
rembiayhu, ha'e joty va'erā.”*

²⁶ Peē ko xe re'yí e'ŷ voi, Nhandejáry he'i hagwe-py, upe-py ete ohenói va'erā
íxupe kwéry gwa'ýry Nhandejáry nhane moingovehaty.”*
Upéixa voi he'i Nhandejáry kватia nhe'ē oikwaa uka-vy nhande-vy mba'éixa
Nhandejáry oiporavo gwe'yirā, judeu kwéry va'e, judeu kwéry e'ŷ va'e ave.

²⁷ Ha upéi he'i jevy Nhandejáry kватia nhe'ē ohai va'ekwe héry va'e Isaías.
Nhane mbotee tee he'i-vy a-rami:

* 9:15 Ex 33.19 * 9:17 Ex 9.16 * 9:20 Is 45.9 * 9:25 Os 2.23 * 9:26 Os 1.10

"Ygwasu apy e'ŷ rembe'y-rehe heta eterei oĩ yvy ku'itĩ. Yvy ku'itĩgwasu-rami onhembohetave tave rei ramo Israel kwéry, hembiepyrã ndahetáiry joty va'erã.

²⁸ Nhandejáry ha'e he'i hagwe-ramima pya'e ojapo-ta yvy apy gwive oĩ va'e-rehe. Noha'arõ mo'âvái-ma. Enterove va'e rembiapokwe-rami ojapo-tama hese kwéry"*

he'i Isaías Israel kwéry-rehe omombe'u-vy.

²⁹ Upéixa ete omombe'u jevy va'ekwe Isaías judeu kwéry oikotaha. He'i va'ekwe a-rami:

"Entéro mba'e-rehe ipu'akave va'e Nhandejáry. Ndopytái ramo ra'e inhe'ẽ-py nhane remiarirõ kwéry, japa va'erã ra'e. Myamyrã Sodoma pygwa-rami japyta va'erã ra'e. Myamyrã Gomorra pygwa-rami nhamanomba va'erã ra'e".*

Upéixa voi omombe'u va'ekwe Isaías kватia-rehe nhande-vy oikwaa uka-vy ndahetáí judeu kwéry onheresende va'e.

"Aipota nga'u Nhandejáry oresende xe rugwy re'ýi kwéry-pe" he'i Paulo

³⁰ "Ha mba'éixa po ojapo Nhandejáry?" oĩ he'i va'e onhomongeta opy'a ndive. Amombe'u-ta nde-vy ereikwaa hagwã. Ha nhande kwéry e'ŷ va'e katu ndoikói araka'e Nhandejáry reko-rupi, "Ipy'a potã-ma" he'i hese hagwã-rami ndoikóiry araka'e. Ha upéi katu Nhandejáry-rehe ojerovia-ma ramo, ombopy'a potã-ma va'ekwe íxupe.

³¹ Ha nhande kwéry va'e, Israel remiarirõre va'e, judeu va'e katu Nhandejáry rembiporavo va'e voi, oikose mo'ã va'ekwe Nhandejáry reko-rupi. "Ipy'a potã-ma" he'i hagwã mo'ã hese va'ekwe oiko. Ha nombopy'a potãiry joty íxupe.

³² "Ma'erã po nombopy'a potãiry íxupe" oĩ onhomongeta va'e opy'a ndive. Ojerovia e'ŷ reheve ojapose mo'ã Nhandejáry nhe'ẽ. Upéa-gwi, "Ipy'a potã-ma" nde'íry hese kwéry. Ogwerovia e'ŷ-gwi ita-rehe onhepysanga sanga va'e-rami oiko va'ekwe.

³³ Upéixa ete voi he'i Nhandejáry kватia nhe'ẽ:

"Pejeapysaka katu. Sião tetã-my, judeu kwéry pa'û-my amoõ-ta onhepysanga hagwã voi heity hagwã voi amoõ-ta henonde. Onhepysanga va'e-rami amoingo asy va'erã íxupe. Heityharã omoõ henonde va'e-rami, amoingo va'erã íxupe. Ha hese ojerovia va'e gwive, ndojerovia reíry va'erã hese. Nomotãiry va'erã ogweroviahape."*

Upéixa he'i Nhandejáry kватia nhe'ẽ heroviahare-rehe herovia e'ŷha-rehe ave.

10

¹ Ha'e-ta peẽ-my, xe re'ýi kwéry, Hesus-rehe pejerovia va'e. Aipota nga'u Nhandejáry oresende xe rugwy re'ýi kwéry-pe, Israel remiarirõre kwéry-pe. Xe py'a gwive aipota nga'u oresende. Amboete ete Nhandejáry-pe hese kwéry oraçao apo-vy.

² Nhandejáry-pe omboetese eterei ave mo'ã hikwái. Xe hexahare-gwi xe aikwaa omboeteha. Ha ndoikwaa teéi-gwi Nhandejáry rekoha, omboete va'e-rami mo'ã oiko.

³ Ha Nhandejáry katu ojerovia hese va'e-pe, "Nde py'a potã-ma" he'i íxupe. Ha Nhandejáry reko kwalla e'ŷha onhemopotise mo'ã ha'e ae gweko-rupi oiko va'e. Upéixa ndoikói voi Nhandejáry reko-rupi onhemopotí hagwã. Heko-pe nonheme'ëi voi va'ekwe heko-rupi oiko hagwã.

* 9:28 Is 10.22-23 * 9:29 Is 1.9 * 9:33 Is 28.16

⁴ Ha ko'ánga katu ojekwaa ou-vy Cristo. Upéa-gwi ijapy-ma voi Moisés amyrī remimombe'ukwe judeu kwéry ha'e kwéry hekoha. Ay ogweroviaha gwive: "Ha'e kwéry ipy'a potī-ma" he'i hese Nhandejáry.

Nhandejáry réry renoiha gwive oresende-ta íxupe kwéry Nhandejáry

⁵ "Gwī onhemopotī uka hagwā mo'ā upe tekoha-rupi oiko va'e gwive, Nhandejáry he'i va'e gwive ojapopa ramo omopotī va'erā íxupe Nhandejáry"*

he'i omombe'u-vy Moisés amyrī kватia-rehe.

⁶ Ha gwī onhemopotī uka hagwā ojerovia-ma voi oiko-vy va'e hese, Nhandejáry kватia nhe'ē a-rami he'i hese:

"Kiva'e po ojeupi-ta yváy-py, ani upéixa erenhomongeta teī nde py'a ndive."* Upéixa ere ramo, nde ko erembogwejyse va'e mo'ā yváy-gwi Cristo. Ani ere teī upéa.

⁷ "Kiva'e po ogwejy-ta ko yvygwy-py, ani upéixa erenhomongeta teī nde py'a ndive."

Upéixa ere ramo, nde eremoingoseve jevy va'erā Cristo-pe omano rire. Ani ere teī upéa.

⁸ Ha Nhandejáry kватia nhe'ē he'i a-rami:

"Ha Nhandejáry remimombe'u noīry mombyry ndéhegwī. Hi'agwī ae oī ndéhegwī. Upéa ereikwaa voi. Upéa eremombe'u-ta ramo, oī-ma Nhandejáry nhe'ērā nde juru-py. Ererovia-ma ramo, oī-ma ave nde py'a-py"

he'i Nhandejáry kватia nhe'ē. Upeixagwa nhe'ē ore remimombe'u voi ave. Perovia hagwā oromombe'u peē-my.

⁹ "Hesu Nhandejáry voi" ere eremombe'u-vy ramo, "Nhandejáry omoingove jevy íxupe nipo ra'e" erenhomongeta ramo nde py'a ndive, ne resende-ta voi Nhandejáry.

¹⁰ Nhande py'a gwive jajerovia-ma ramo hese, nhane mopotī-ma va'erā. "Hesu Nhandejáry voi" ja'e ramo nhamombe'u-vy, nhane resende-ma va'erā Nhandejáry.

¹¹ He'i ave Nhandejáry kватia nhe'ē:

"Ha hese ojerovia va'e gwive, ndogwerovia reíry va'erā. Nomotīry va'erā ogweroviaha-pe"*

he'i Nhandejáry kватia nhe'ē.

¹² Ha judeu va'e, judeu e'ŷ va'e ave katu enterove ogwereko peteīxa Nhandejáry. Upéa-gwi peteīva'e pegwarā anho e'ŷ va'e voi Nhandejáry kватia nhe'ē he'i va'e. Nhandejáry ko enterove va'e Járy voi. Gwenóiha gwive ohovasa porā va'e íxupe ohexakwaa rei-vy.

¹³ Upéixa ete he'i Nhandejáry kватia nhe'ē:

"Nhandejáry réry renoiha gwive oresende-ta íxupe kwéry Nhandejáry"*

he'i Nhandejáry kватia nhe'ē.

¹⁴ Mba'éixa po ojerure-ta Nhandejáry-pe ne'írā vyteri ojerovia ramo hese reheve. Mba'éixa po ojerovia-ta hese ne'írā ohendu reheve Nhandejáry remimombe'u. Mba'éixa po ohendu-ta ndaipóri ramo imombe'uharā.

¹⁵ Mba'éixa po omombe'u-ta íxupe, omondo e'ŷ reheve imombe'uharā: "Jarovy'a Nhandejáry nhe'ē porā mombe'uharā ogwahē ou-vy ramo. Og-wahē ou-vy ramo jarohory voi íxupe jarovy'a-vy"*

he'i Nhandejáry kватia nhe'ē.

16 Ha nohendu jojái inhe'ẽ porã. Upéixa voi omombe'u Isaías kватia-rehe: "Kiva'e-pe rei po anhe'ẽ kuri. Avave nohenduséiry nhane remimombe'u.

Anhe'ẽ ramo íxupe, íxupe kwéry e'ŷ vérami anhe'ẽ"^{*}
he'i va'ekwe Isaías Nhandejáry kватia-rehe.

17 Upéixa-gwi Cristo rehewa nhe'ẽ nhamombe'u ramo, nhahendu Nhandejáry remimombe'u. Hemimombe'u nhahendu ramo, jarovia-ma voi íxupe.

18 Oĩ he'i va'e mo'ã: "Nanhahendú va'ekwe Nhandejáry remimombe'u" he'i mo'ã. Ha ijapu voi. Oĩ nhahendu va'e:

"Omombe'u mbe'u ojóupe hikwái. Inhe'ẽgwe opa-rupi oho. Yvy apy gwive ohupity inhe'ẽgwe"^{*}

he'i Nhandejáry remimombe'u-rehe Nhandejáry kватia nhe'ẽ.

19 Oĩ he'i jevy va'e mo'ã: "Ndoikwaái voi Israel remiarirõre judeu kwéry Nhandejáry remimombe'u" he'i mo'ã hese. "Oikwaa" he'i ranhe hese Moisés. Upéi he'i judeu kwéry-rehe:

"Teko rei-pe ahovasa-ma ramo, oromohakate'ŷ uka va'erã xéjehe. Orom-bopoxy uka va'erã, inharandu e'ŷ ete va'e-pe ahovasa-ma ramo, he'i Nhandejáry".^{*}

Upéixa he'i va'ekwe Moisés kватia-rehe oĩ va'e.

20 Upéi Isaías omoĩ jevy va'ekwe kватia-rehe onhe'ẽ. Ipy'agwasuve imombe'u-vy judeu kwéry-pe:

"Xe reka e'ŷ va'e xe johu voi. Xe-rehe oporandu e'ŷ va'e-pe ajehexa uka íxupe" he'i va'ekwe nhande kwéry e'ŷ va'e-rehe.

21 Ha Israel remiarirõre judeu kwéry rehewa nhe'ẽ omombe'u va'ekwe arami:

"Ko'ẽmba ramo meme ome'ẽ opo va'e-rami, xe aha'arõ íxupe, xe nhe'ẽ renduse e'ŷha-pe. Xe nhe'ẽ mbojevyha-pe ave aha'arõ, he'i Nhandejáry judeu kwéry-rehe"^{*}

he'i Nhandejáry kватia nhe'ẽ Isaías ohai va'ekwe.

11

Ohovasa va'ekwe ohexakwaa rei-vy Israel re'ýi kwéry-pe Nhandejáry

1 Ha'e-ta peẽ-my: Judeu kwéry Nhandejáry re'ýi katu ndaha'éiry hemim-boyke. Gwe'ýi e'ŷ ramo, ojapo e'ŷ va'e. Gwe'ýi ramo meme ogwereko. Xe ave Israel rugwy re'ýi kwéry va'e. Myamyrí Abraão katu xe rembypy voi. Myamyrí Benjamim remiarirõ kwéry va'e voi katu xe.*

2 Yma ete va'ekwe oiporavo va'ekwe Israel rugwy re'ýi kwéry va'e gwe'yirã. Ay katu nhande kwéry, Israel re'ýi kwéry va'e, Nhandejáry remimboyke e'ŷ va'e voi. Nhande rereko joty gwe'ýi ramo. Yma va'ekwe myamyrí Elias ombotée va'ekwe oiko-vy Nhandejáry-pe ohendu hagwã íxupe. He'i Nhandejáry-pe:

3 "Ha gwí ne nhe'ẽ-py omombe'u va'ety-pe katu ojuka-ma voi hikwái, he'i. Ne mboete haty apyka ramigwa ita-gwi ijapopyre altar héry va'e, omohaimba-ma voi oity-vy hikwái, he'i. Ha xe katu xe anho rei aiko, he'i. Xe jukase voi okwa-vy,"

he'i ójehe Nhandejáry-pe.

4 Upéi he'i íxupe Nhandejáry:

* **10:16** Is 53.1 * **10:18** Sl 19.4 * **10:19** Dt 32.21 * **10:21** Is 65.1-2 * **11:1** Fp 3.5 * **11:3** 1 Rs 19.10,14

Nane anho reíry erepyta, he'i íxupe. Oĩ joty sete mil kwimba'e. Nomboetéi vyteri tupã ra'anga-pe héry va'e Baal. Upéa kwéry xe ndahejái ojehesa * rerova outro-rehe. Xe rakate'ýha voi upéa, he'i Elias-pe Nhandejáry.* Upéixa voi he'i va'ekwe Nhandejáry kватia nhe'ẽ. Peikwaa-ma voi upéa nhe'ẽ. Peikwaa ramo jepe, amombe'u jevy-ta joty nde-vy.

⁵ Yma Nhandejáry ojapo hagwe-ramima, ãy ojapo-ma ave. Enterove va'e-pe ndoiporavói va'e. Nhande poriahuverekó-gwi oĩ hembiporavo va'e. Ndahetáiry joty.

⁶ Hembiaapo-rehe rei ndoiporavói íxupe. Oiporiahuvereko-gwi ae oiporavo íxupe araka'e. Hembiaapo-rehe rei oiporavo ramo ra'e, ndoiporiahuvereko teevéi arã ra'e íxupe Nhandejáry. Hembiaapo porã va'e-pe oiporavo arã ra'e.

⁷ Mba'eixagwa nhe'ẽ-pa xe amombe'u-ta. Israel re'ýi kwéry katu ndohupityí va'ekwe gwembieka onhemopotí uka hagwã. Ha Nhandejáry rembiporavo katu ndahetáiry oheka ojohu-ma. Nhandejáry ogwerovy'a-ma íxupe. Ha outro kwéry katu heta oĩ va'e Nhandejáry gwenói ramo, nohenduséi-ma. Ijapysa e'ý va'e-rami oiko-ma hikwái.

⁸ Upéixa he'i va'ekwe Nhandejáry kватia nhe'ẽ:
“Ha gwí ohenduse e'ý va'e katu Nhandejáry omoingo araka'e íxupe kwéry ijapysa e'ý va'e-rami. Ko'ánga ete peve ndikatuvéi-ma mba'e oikwaa, ndikatuvéi-ma mba'e ohendu. Hesa pyso e'ý va'e-rami oiko. Ndajapysái va'e-rami ave oiko hikwái”*

he'i Nhandejáry kватia nhe'ẽ.

⁹ Oĩ ave Nhandejáry kватia nhe'ẽ Davi amyrí ohai va'ekwe:
“Karugwasu-py ou ramo, tonhembotavy toipyhy íxupe. Monde gwy-py ho'a va'e-rami, tove to'a katu. Tove toiko onhepysanga va'e-rami ave. Tomoingo asy íxupe kwéry Nhandejáry.

¹⁰ Tove tonhemboty katu hesa ohexa e'ý hagwã. Tojeayvy rei oiko-vy oiko asy-gwi”*

he'i Nhandejáry kватia nhe'ẽ.

¹¹ Ha'e-ta peẽ-my: He'ýi tee judeu kwéry va'e onhepysanga sanga va'e-rami rei oiko va'ekwe ojejavy-gwi. Ho'a tee va'erã-rami teñ oiko. Ha he'ýi kwéry ndo'a teéiry. Ojejavy-gwi Nhandejáry nhe'ẽ nohenduséi-gwi, ãy hekvia gwí he'ýi e'ý va'e oikwaa-ma voi Nhandejáry-pe. Hesendeharã oikwaa-ma. Upéa-gwi ójeho omohakate'ý uka hagwã-pyma oheja gwe'ýi tee Nhandejáry.

¹² Ojejavy javy rire he'ýi tee, ohovasa vasa va'ekwe outro gwe'ýi e'ý va'e Nhandejáry ohexakwaa rei-vy. Gwe'ýi tee-pe nomogwahëi íxupe gwarrã. Upéa-gwi outro-pe ohovasa vasa va'ekwe Nhandejáry. Gwe'ýi e'ý va'e-pe ohexakwaa kwa rei. Ha gwe'ýi tee omogwahëmba jevy joty va'erã ojéupe. Omogwahëmba rire nhande kwéry-pe nhande rovasa porâve râve va'erã voi Nhandejáry.

Gwe'ýi e'ý-pe oresende Nhandejáry

¹³ Æy ha'e-ta peẽ-my, judeu e'ý va'e, he'ýi e'ý va'e kwéry-pe. Hesu remimondo voi xe ojehegwa amombe'u hagwã peẽ-my. Upéa-gwi tuvixa mba'e xe-vy xe rembiapo.

¹⁴ Heta xe rembiapo pene pa'û-my amohakate'ý uka hagwã mo'ã xejéhegwí xe rugwy re'ýi tee va'e kwéry-pe. Ohexa ramo outro kwéry ojeroviahá: “Hesu nipo ra'e Nhandejáry ave” upéixa xe aipota xe rugwy re'ýi he'i. Upéa-gwi ikatu arã oĩ va'erã xe jave oresende hagwã íxupe.

* **11:4** 1 Rs 19.18 * **11:8** Is 29.10 * **11:10** Sl 69.22-23

¹⁵ Ha he'ýi tee onhemboyke íxugwi va'ekwe. Upe-ma ramo outro kwéry-pe oirũ tee-ramima ogwereko Nhandejáry. He'ýi tee-rami Nhandejáry-pe hikwái. Ogwerokoja íxupe gwekoha hikwái. Ha gwe'ýi tee katu omogwahé jevy-ma ramo íxupe kwéry ojéupe, iporã tee rei va'erã voi nhande-vy. Onhemoingove uka jevy va'e-rami oiko porã jevy va'erã hikwái.

Ha Nhandejáry re'ýi tee, judeu kwéry va'e hembiporavo meme joty

¹⁶ Nhambopóy ramo mbojape Nhandejáry pegwarã, hembi'u re'ýi Nhandejáry mba'e joty. Yvyra máta rapo Nhandejáry mba'e ramo, hakágwe gwive imba'e meme. Upéixa he'i Nhandejáry kwatia nhe'ẽ gwe'ýi tee ojéupe omogwahé jevytaha omombe'u-vy.

¹⁷ Amombe'u-ta ave peẽ-my oliveira máta rehewa nhe'ẽ. Oĩ va'ekwe oliveira máta imbo'a porã ukapyre. Upéi ojepe'a va'ekwe hakã. Upéi hakágwe rendagwe-py omoõ outro rakágwe. Oliveira máta opu'ã rei va'e rakágwe omoõ hese. Yvyra máta opu'ã rei va'ekwe-rami voi pende rekoha, peẽ judeu kwéry e'ý va'e. Opu'ã rei va'e rakágwe onhemoõ imbo'a porã ukapyre rakã rendagwe-py. Upéixa peiko porã ãy. Ohovasa porã hagwe-rami Nhandejáry gwe'ýi tee judeu kwéry-pe, ohexakwaa kwa rei-vy, ãy pende rovasa porã-ma ave. Hapo e'ý reheve ndahete'yvéi-ma hakã. Hapo-gwi ae ou hokyrã. Upéixa voi nhande kwéry judeu kwéry va'e-gwima peiko porã-ma ãy.

¹⁸ Upéixa ani penhembohory teĩ hese, Nhandejáry re'ýi tee-rehe. Yvyra rakágwe-rami ojepe'a va'ekwe ha'e kwéry. Ani penhemomba'egwasu teĩ peẽ peiko-vy. Mba'eixagwa tipo peẽ. Yvyra máta rakágwe-rami rei peẽ. Hakã-gwi ndoúi haporã. Hapo-gwi ae ou hokyrã. Upéa-gwi ani penhembohory teĩ hese kwéry.

¹⁹ Pene pa'ü-my oĩ para'e he'i va'erã: “Ore moõ hagwã-ma hendagwe-py ojepe'a va'ekwe ha'e hakã” he'i va'erã.

²⁰ Ha'e voi. Ojepe'a va'ekwe upéa-gwi. Ha'e kwéry ndogweroviái-gwi ojepe'a va'ekwe. Ha peẽ katu pepyta peiko-vy hendagwe-py perovia-gwi. Upéa-gwi ani penhemomba'egwasu teĩ peẽ. Ani pejeapo teĩ hakã teeve ramo. Peiko arandu ae katu.

²¹ Ha he'ýi tee judeu kwéry va'e ha'e hakã-rami voi ha omopẽ va'ekwe ojéhegwi. Ma'erã, “Nanhande pe'a mo'ãi Nhandejáry” peje pendéjeh. Upeix-agwa ani peje teĩ. Peiko arandu ae katu.

²² Pejeapysaka porã katu xe nhe'ẽ-rehe. Nhande rovasa porã ramo jepe, nhane mbohasa asy joty ave Nhandejáry. Gwĩ ojejavý va'ekwe-pe ogwereko asy voi. Ha peẽ katu pende rerekó porã voi. Pemoirũ irũ íxupe ramo, pende rerekó porã va'erã. Ha pemoirũ e'ý ramo katu íxupe, gwakã ojéhegwi oipe'a va'ekwe-rami pende pe'a jevy va'erã.

²³ Ha'e kwéry katu ogwerova ramo gwekoha ogwerovia jevy hagwã íxupe, ha'e hendagwe-py omoõ jevy va'erã íxupe Nhandejáry. Hakã roky-rami jevy oĩ hagwã. Omoõ jevy kwa va'e voi Nhandejáry íxupe kwéry.

²⁴ Ha peẽ he'ýi e'ý va'e katu yvyra máta opu'ã rei va'e rakã-rami. Ojepe'a va'ekwe hakã. Upéi heko e'ý-rupi onhemoõ outro rakã rendagwe-py. Ha he'ýi tee judeu kwéry va'e katu imbo'a porã ukapyre-rami voi. Ndaheko rasýiry Nhandejáry-pe omoõ jevy íxupe ha'ekwe-py. Ha ha'e hagwe-py onhemoõ jevy va'ekwe katu ha'e heko-rupima oiko jevy voi. Upéixa ramo ndaheko rasýi Nhandejáry-pe omogwahé jevy hagwã íxupe kwéry ójehe.

Enterove va'e-pe ohayhu Nhandejáry

²⁵ Aipota peikwaa porã xe ha'e-ta va'e, xe re'ýi kwéry. Oĩ Nhandejáry anhetegwa nhe'ẽ. Ore-vyte Nhandejáry remimbojekwaa uka ojekwaa kuri. Upéa nhe'ẽ aipota peikwaa porã. Peikwaa porã ramo, “Nhandejéhegwi nhane

aranduve voi nhande” ndapejéi va'erā pendéjehe. Ore-vy ohexa uka kuri Nhandejáry onhe'ẽ a-rami: “Ndoiko meméi va'erā heta xe re'ýi kwéry xe nhe'ẽ rendu e'ý-vy. Ijapysa e'ý va'e-rami ndoiko meméiry va'erā. Ha xe re'ýi e'ý va'e, judeu e'ý va'e katu xe aipota ou va'e gwive amogwahēmba ranhe va'erā xejéupe. Ha upéixa rire katu ndoikovéi va'erā xe re'ýi, judeu kwéry va'e ijapysa e'ý va'e-rami.

²⁶ Ha Israel re'ýi kwéry, xe re'ýi tee va'e, peteñ teñ xe aipota ogwahē ou-vy va'e gwive aresendepa va'erā” he'i Nhandejáry gwembiaporā rexā uka-vy. Upéixa voi he'i Nhandejáry kватia nhe'ẽ:

“Jerusalém tetā-gwi ou va'erā nhane resendeharā. Ha Jacó remiarirō joapyri pyri kwéry-gwi katu omboyke va'erā hembiapo vaikwe gwive.”*

²⁷ Ha upéixa rire katu amboyke rire hembiapo vaikwe, Nhandejáry he'i ete hagwe-rami, ojapo-ma voi hese kwéry, he'i va'erā xe-rehe, he'i Nhandejáry ójehe”.*

Upéixa voi he'i Nhandejáry kватia nhe'ẽ.

²⁸ Ha he'ýi tee, judeu kwéry va'e katu Hesu rehewa nhe'ẽ porā nohen-duséi-gwi, ogwereko íxupe kwéry Nhandejáry gwembiayhu e'ý ramo. Ha upéixa ojapo ramo gwe'ýi kwéry-rehe, iporā joty peẽ, he'ýi e'ý va'e-pe. Ây gwembiayhu e'ý-rami jepe ogwereko ramo, ohayhu joty íxupe kwéry. Ha'e kwéry hembiporavo joty. “Ahovasa va'erā íxupe” he'i ete va'ekwe ore rembypy-pe gwe'yirā-rehe. Upéa-gwi ohayhu joty íxupe oiko-vy.

²⁹ Nhandejáry rembiporavo hembihovasa vasa meme voi judeu kwéry. “Aiporavo va'ekwe xe re'ýi-pe. Ahovasa porā va'erā íxupe” nde'i reíry Nhandejáry gwemienói-rehe. Ogwerova rova e'ý va'e onhe'ẽ Nhandejáry.

³⁰ Ha peẽ he'ýi e'ý va'e katu napehendúi araka'e Nhandejáry nhe'ẽ. Ha ko'ánga katu he'ýi tee nohenduséi-gwi inhe'ẽ, pende rayhu-ma Nhandejáry pende poriahuvareko-vy.

³¹ Upéixa ây pende rayhu jave Nhandejáry, ha'e kwéry nohendusevéima inhe'ẽ. Upéa-gwi nohenduséi-gwi inhe'ẽ, iporiahu Nhandejáry-pe. “Aiporiahuvereko-ta joty íxupe kwéry” he'i joty hese kwéry.

³² Nhandejáry nhe'ẽ ojapo meme va'e ndaipóri. Upéa-gwi ko yvy apyrehe oiko va'e-pe gwive ogwereko inhe'ẽ renduse e'ý va'e-rami. Preso onhemoi va'e-rami ogwereko enterovéa-pe. Upéixa ojapo hese kwéry peteñ teñ oiporiahuvereko hagwā joty íxupe kwéry.

Paulo omomba'egwasu Nhandejáry-pe

³³ Ha Nhandejáry katu hekoha porâve tee rei va'e voi katu. Ha'e heko-rami oiko va'e ndoikóiry. Ha'e hi'arandu tee va'e. Opamba'e oheko kwaave va'e. Heta ipy'apóry jaikwaa e'ý ete va'e. Mbava'e-gwi nipo he'i ko va'e, Ma'erā nipo he'i upéa, avave ndoikwaái. Mba'e-gwi nipo ojapo ko va'e, ma'erā nipo ojapo upéa, teko rei va'e ndoikwaái voi ipy'a. Imbaraeteve va'e voi ha'e.

³⁴ Ha Nhandejáry kватia nhe'ẽ he'i a-rami:

“Nhandejáry imandu'a ramo, ndoikwaáiry voi avave. Ndaipóri ombo'e va'erā íxupe hembiaporā-rehe.”*

³⁵ Avave nome'ëi mba'eve Nhandejáry-pe ha'e hemime'ëgwe rekovia ome'ë jevy hagwā. Avave-pe ndorevéi”.*

Upéixa he'i Nhandejáry kватia nhe'ẽ.

³⁶ Ha entéro mba'e moingohaty voi ha'e. Ha'e entéro nhangarekoha voi. Ha'e ojéupe gwarā ave omoingo va'ekwe entéro mba'e. Tonhemomba'e

* ^{11:26} Is 59.20-21 * ^{11:27} Jr 31.33-34 * ^{11:34} Is 40.13 * ^{11:35} Jó 41.11

tuvixa meme ete katu. Opa e'ŷ reheve tonhemboete ete. Upéa aipota voi. Amém.

12

Nhandejáry reroviaha onheme'ẽ íxupe hembigwairã
(1 Co 6.20; 1 Ts 4.1)

¹ Nhande porahuvereko-ma oiko-vy Nhandejáry, xe re'ýi kwéry. Upéa-gwi aipota eterei penheme'ẽ pende py'a gwive íxupe imba'erã. Peiko jave imba'e voi peẽ. Penheme'ẽ katu íxupe hembigwairã pende rorohory porã hagwã. Penheme'ẽ tee ramo íxupe, napemboete ra'anga anga rei mo'ãi íxupe. Pemboete tee va'erã íxupe.

² Teko rei rekoha-rami ani peiko teĩ peẽ. Peheja katu Nhandejáry tapene moatyrm̄ba pene akã porã hagwã ogwerova hagwã pende rekoha pende py'a gwive. Upe-ma ramo Nhandejáry remimbota peikwaa va'erã. Mbava'e tipo oipota Nhandejáry? Oipota iporã va'e. Ojéupe ombovy'aharã oipota. Imarã e'ŷ va'e, ndaipóri ha'eixagwa iporãve va'e oipota.

³ Nhandejáry rembihovasa voi xe. Xe rexakwaa rei voi. Upéa-gwi inhe'ẽ-py aporandu-ta peẽ kwéry-pe: Ani erenhemomba'egwasu teĩ nde. Ani erejeapo tuvixave va'e ramo mo'ã. Ani nde rapixa reko-rupi ereiko teĩ. Nde ae nde reko-rupi voi eiko. Peẽ-my ogwerovia uka hagwe-rami Nhandejáry, peiko. Ani penhemomba'egwasu teĩ peẽ peiko-vy.

⁴ Heta nhande rete-rehe oĩ va'e. Hekoha ambue ambue jepe ijoja joty oiko-vy.

⁵ Upéixa ete nhande reta. Nhande reta jepe, Cristo nhamoirũ-gwi peteixa joty jaiko. Nhande rekoha ambue mbue ramo jepe, nhande joja joty. Nhande rete ijojaha-rami joty jaiko.

⁶ Peteĩ teĩ va'e-pe nhande rovasa-gwi Nhandejáry nhande rexakwaa rei-vy, nhanhypetygwõ rei katu. Ome'ẽ me'ẽ nhande-vy nhande rekoha ambue mbuerã. Peteĩ teĩ va'e-pe hemime'ẽgwe ũgwe-py nhanhypetygwõ tygwõ rei ojóupe. Nhande reko me'ẽ ramo onhe'ẽ-py om̄ba'e kwaa uka ramo nhande-vy nhamombe'u hagwã, nhane kyre'ŷre'ŷ katu imombe'u-vy. Jarovia porãháixa jarosapuka pukái katu inhe'ẽ jaiko-vy.

⁷ Nhande reko me'ẽ ramo nhaipytygwõ hagwã nhande rapixa-pe, iporã katu nhaipytygwõ voi íxupe. Nhande reko me'ẽ ramo nhambo'e hagwã nhande rapixa-pe, iporã katu nhambo'e ave íxupe.

⁸ Nhande reko me'ẽ ramo nhamokyre'ŷ hagwã nhande rapixa-pe, iporã katu nhamokyre'ŷ voi íxupe. Nhame'ẽ-taramo nhane mba'e, iporã katu nhane rakate'ŷ e'ŷ reheve nhame'ẽ. Nhande, Hesu reroviaha rerekwa va'e, nhanhangareko porã katu nhande re'ýi kwéry-rehe. Nhande rapixa-pe jaiporiahuvereko-ta ramo, nhane kyre'ŷ ramo nhaipytygwõ íxupe.*

⁹ Ani pejohayhu ra'anga anga rei teĩ. Pejohayhu tee katu. Ivai va'e pemboyke katu pendéhegwi. Ha iporã va'e-gwi katu ani pepoi teĩ. Eraha ne renonde-rupi joty. Pesegi porã joty katu.

¹⁰ Pejohayhu katu pejogwerovy'a rei-vy pende ryvy-rami pejogwereko hagwã. Ani pene ate'ŷ penhomboete-vy.*

¹¹ Ipituba va'e-rami ani peiko teĩ. Pemba'apo mbaraete ae katu peiko-vy. Pene kyre'ŷ pende py'a ete gwive pejapo Nhandejáry nhe'ẽ.

¹² Peha'arõ tee Nhandejáry pende reraha hagwã. Upéa-gwi pevy'a meme joty peiko-vy. Peiko asy ramo jepe ani pejapura. Ani pejapo ku'a ku'a rei oração. Pembojeupi meme katu Nhandejáry-pe pene nhe'ẽ.

* **12:8** 1 Co 12.7-31, Ef 4.11-12,16; 1 Pe 4.10-11 * **12:10** Hb 13.1; 1 Pe 1.22

¹³ Ha Hesu reroviaha katu pende ryvy-rami. Iporiahu va'e-pe ehexakwaa katu ereme'ë-vy. Ani pene rakate'ë pene mba'e-rehe peme'ë hagwā íxupe. Ehexakwaa joty íxupe. Ne mba'e eiporu uka meme joty íxupe. Ogwahē ou-vy ramo pende ha-py peikwaa e'ë va'e pemogwahē katu íxupe pene ndive opyta hagwā.

¹⁴ Peoporandu Nhandejáry-pe ohoasa hagwā pende rerekoyasyha-pe. "Ehovasa katu íxupe" peje. "Ehundi mani íxupe" ani peje teñ Nhandejáry-pe hese.*

¹⁵ Ovy'a ramo nde rapixa evy'a joty indive. Ha hasē ramo katu ne rasē joty ave hendive.

¹⁶ Peteñxa pejogwereko. Pende joja katu peiko-vy onhondive. Ani penhemomba'egwasu rei teñ. Nomomba'e gwasúi va'e-pe pemoirū joty. Ani, "Xe aranduve ko" peje rei pendéjehe.*

¹⁷ Aníke pejapo vai peñ-my ojapo vai va'e-pe. Pejapo porā meme. Ani, "Hembiaipo vai-ma" he'i pende-rehe hagwā-rami peiko.*

¹⁸ Ani katu pene a'e'ë ojóehe. Ikatu ramo, pejoporiahuvureko rei enterovéa ndive.

¹⁹ Ani erejepy teñ nde rapixa-rehe. Nhandejáry ae nde repy arā! Ombohasa asy va'erā íxupe.

"Xe ae orohepy va'erā. Nde-rehe hembiapo vaikwe-rehe xe ae orohepy va'erā, he'i Nhandejáry." Upéixa he'i Nhandejáry kwaitia nhe'ë.*

²⁰ Pende rerekoyasyha-pe perekoyorā joty:

"Ivare'a ramo pemongaru joty íxupe. Ijy'uhéi ramo, pembo'y'u joty íxupe.

Upéixa perekoyorā ramo íxupe, pemotī va'erā íxupe. Perekoyorā ramo íxupe, pejehexa uka porā joty va'erā íxupe onhemotī hagwā".*

Upéixa he'i Nhandejáry kwaitia nhe'ë.

²¹ Ani peheja ivai va'e ipu'akave pende-rehe. Pejapo katu iporā va'e penheme'ë e'ë hagwā ivai va'e-pe, pende pu'akave hagwā ivai va'e-rehe.

13

Iporā katu jajapo nhande ruvixa nhe'ë

(Mt 22.21; Mc 12.17; Lc 20.25; Tt 3.1; 1 Pe 2.13-17)

¹ Enterove tojapo nhande ruvixa nhe'ë. Ojéhegwí rei ndoikói nhande ruvixarā. Nhandejáry nhe'ë-py ae nhande ruvixa ramo oiko. Oiko ramo nhande ruvixa ramo, Nhandejáry remimoingo upe va'e.

² Nhande ruvixa nhe'ë ojapo e'ë va'e gwive, Nhandejáry nhe'ë ndojapói ave va'erā. Upéa ojapo e'ë va'e-pe gwive ombohasa asy uka va'erā Nhandejáry.

³ Hembiapo porā va'e gwive ndaikyhyjéiry voi katu nhane ruvixa-gwi. Ha hembiapo vai va'e katu ikyhyje. Nhande ruvixa-gwi pende kyhyje e'ë rehevē peiko porāse tipo? Pejapo porā. Upéa-rehe pende rerohory va'erā.

⁴ Nhandedejáry rembigwái voi nhande ruvixa. Pende-rehe omba'apo va'e voi. Ha ne rembiapo vai ramo katu, pene mytu'e'ë pendéjehe. Ndogwereko asy uka reíry nhande ruvixa-pe Nhandejáry. Nhandedejáry rembigwái voi nhande ruvixa. Inhe'ë-py hembiapo vai va'e-pe gwive ogwereko poxy va'erā.

⁵ Upéa-gwi aníke erhasa tekoha nhande ruvixa nhe'ë rendu e'ë-vy. Pehasa ramo tekoha pende rerekoyorā poxy arā. "Pehendu katu" he'i ave nde py'a-py onhe'ë va'e. Upéa-gwi pejapo katu nhande ruvixa nhe'ë.

⁶ Nhande ruvixa kwéry Nhandedejáry remimomba'apo voi. Nainhate'ë omba'apo-vy. Upéa-gwi imposto okovra ramo, eme'ë íxupe ojerure va'e.

* **12:14** Lc 6.28 * **12:16** Pv 3.7 * **12:17** 1 Pe 3.9 * **12:19** Dt 32.35 * **12:20** Pv 25.21-22; Mt 5.44; Lc 6.27-28

⁷ Peme'ẽmba porã katu pereve va'e-pe. Oime raẽ va'e imposto okovra va'e, taxa okovra va'e peme'ẽ katu ave íxupe. Nhamboete va'erã gwive pemboete katu. Peteĩ teĩ va'e-pe pemomba'egwasúke pemboete-vy.*

*Jajogwereko porã jaiko-vy
(Mt 22.39-40; Gl 5.14; 1 Jo 3.11)*

⁸ Pereve va'e gwive pepaga mani katu íxupe. Iporã "Jajohayhu voi" peje katu pendéjehe. Ha ha'e-ta ave peẽ-my, Pejohayhu porãve rãve katu peiko-vy. Ne'írã pejohayhu porã tee rei. Gwapixa rayhuha oiko Moisés amyrã remimombe'ukwe tekoha-rupi.

⁹ Upe tekoha a-rami he'i:
"Ani peiko onhoembireko ndive onhome ndive ave. Ani peporojuka. Ani pemonda. Ani pene mba'e pota pota rei teĩ peiko-vy".
Upéixa voi upe tekoha.

Oĩ ave tuvixave va'e. Ha upe tekoha he'i va'e gwive peteĩ nhe'ẽ-py og-wenohẽmba:
"Ehayhu katu nde rapixa-pe nde rekove erehayhuha-rami"
he'i. Upe va'e nhe'ẽ-py omombe'upa Moisés amyrã he'ise va'ekwe.

¹⁰ Gwapixa rayhuha ndojapo vaíry hese. Upéa-gwi jajohayhu ramo, upe tekoha tee va'e gwive-rupi jaiko.*

¹¹ Áy peikwaa voi ogwahẽma ou-vy pende óra, oke va'ekwe opáy jevyma va'e-rami peiko hagwã. Upéa-gwi peiko katu tekoha-rupi. Hesu-rehe jajerovia ypy hagwe are-ma voi. Áy hi'agwĩve-ma oĩ nhandéhegwi nhane resendeharã áry. Upéa-gwi ogwahẽ-ma ou-vy pende óra anive peiko hagwã oke va'e-rami. Oke va'e-rami peikove teĩ. Áy tapeiko porã katu. Opáy porã va'e-rami jevy katu tapeiko.

¹² Pytũ-rupi oiko va'e-rami peẽ. Ha ko'ângä katu pyhare-rupi rei ereiko va'ekwe nde-vy opa-tama. Ko'ẽ ou va'e-rami nde-vy ereiko porã-tama. Upéa-rehe anive peiko pytũ-my oiko va'e reko-rupi. Arakatu-py oiko va'e reko-rupi ae peiko. Pono pende reity gweko-rupi anháy, nhande rete jokoha jaiporu vérami peiporu porã katu pene arandu arakatu pygwa peiko porã hagwã.

¹³ Arakatu pygwa-rami jaiko. Ani nhanhemotã hagwã-rami jaiko teĩ. Anive peka'u teĩ. Ani ave pemoirũ oka'u va'e-pe. Peiko ae katu arakatu pygwa-rami. Pejohu va'e rei-pe ani ave pemoirũ teĩ. Ani otã kwaa e'ý va'e-rami peiko teĩ. Arakatu pygwa-rami ae katu peiko. Ani ave pejoteta teĩ. Ani ave pejohu vai teĩ pende rapixa oiko porãha.

¹⁴ Ha pemoirũ katu peteĩxa Nhandejáry Hesu Cristo. Penhembojáry katu hese peiko hagwã hekoha-rupi. Anive peiko pendejéhegwi anho rei pejapose va'e rei-ma pejapo hagwã.

14

*Ani "Tekoha-rupi ndoikóiry" peje mo'ã Hesu reroviahva va'e-rehe
(Mt 7.1-2; Rm 2.1-3; 15.7; 1 Co 10.25-33)*

¹ Oĩ pene pa'ũ-my ne'írã ogwerovia tee va'e. Perohory joty íxupe pemogwahẽ-vy. Ha pemogwahẽ rire íxupe katu, ani pembovyte teĩ íxupe penhombo'e vai-vy. Ani "Ndatekoháiry nde rekoha. A-rami ae tekoha" peje rei teĩ íxupe.

² Ogwerovia porã va'e, ojohu va'e ho'u. Ha ogwerovia miximi va'e katu ndo'u katúi so'o.

* ^{13:7} Mt 22.21; Mc 12.17; Lc 20.25; Tt 3.1; 1 Pe 2.13-17 * ^{13:10} Ex 20.13-17; Dt 5.17-21; Lv 19.18; Mt 22.39-40; Gl 5.14; 1 Jo 3.11

³ Ha ojohu va'e ho'u va'e, tonhe'ẽ rei e'ŷ katu ndo'u katúi va'e-rehe. Ha so'o ho'u katu e'ŷ va'e katu, Ani "Ndikatúi ere'u so'o" he'i teĩ gwapixa-pe, ojohu va'e ho'u va'e-pe. Hembia po ojohu porã ave Nhandejáry. Upéa-gwi, Ani "Tekoha e'ŷ-rupi ereiko" he'i hese.

⁴ Ndikatúiry ere rei nde rapixa rembigwái-rehe, "Upéa ndoikói tekoharupi". Ani eremombe'u teĩ hembia po. Ijáry ae omombe'u va'erã íxupe hembiapo-rehe. Ojohu porã para'e, ojohu vai para'e. Ijáry ae omombe'u va'erã íxupe. Ha Nhandejáry katu ojohu porã voi hembiapo. Upéa-gwi ojohu porã va'erã hese Nhandejáry. Cristo rape-gwi ndovái va'erã.

⁵ Ha arete rehewa katu pemombe'u joavy avy. "Oĩ nhamboeteve va'e áry" oĩ he'i va'e. "Áry meme peteĩxa" oĩ he'i va'e. Ani, "Mba'eixagwa po tekoha" ere teĩ ndejéupe. "A-rami voi xe rekoha" peteĩ teĩ he'i ae ojéupe. Peteĩ teĩ toikwaa porã ha'e ae gwekoha hapixa rembiapo ojohu vai e'ŷ rehewe. Ojoekoha ojohu vai e'ŷ rehewe, peteĩ teĩ tojapo ipy'a oipotaha-rupi.

⁶ Pejeapysaka porã katu xe nhe'ẽ-rehe. "Etería arete tuvixave va'e" oĩ he'i va'e, Nhandejáry-pe omboeteha-rami omboete ave arete-pe. Ha so'o ho'u va'e katu Nhandejáry-pe omboeteha-rami ho'u ave so'o. So'o ho'ua-rehe otima porã ave Nhandejáry-pe. Ha so'o ho'u e'ŷ va'e katu Nhandejáry omboeteha-rami, ndo'úi ave so'o. Ndo'úi ramo jepe, otima porã jotsy Nhandejáry-pe.

⁷ Nhandéjehe anho rei ndajaikóiry. Nhandéjehe anho rei nanhamanói ave.

⁸ Jaiko jave Nhandejáry mba'e voi nhande. Ha nhamano rire Nhandejáry mba'e teerã voi jaha arã. Upéixa ramo jaikove ramo jepe, nhamano ramo jepe imba'e tee voi nhande.

⁹ Upéa-rehe omano-ma va'ekwe Cristo. Upéi oikove jevy-ma va'ekwe nhande jaiko va'e jaryrã nhamano va'ekwe jaryrã ave.

¹⁰ Upéixa ramo, nde ko ma'erã tipo nde erejohu vai Hesu reroviaha va'e rembiapo? Ma'erã tipo erenhe'ẽ mbojevy nde rapixa-pe, nde reko-rupi ndoikói-gwi. Nde katu ma'erã erenhe'ẽ rei ereiko-vy nde rapixa-rehe? Ha nhande kwéry katu nhanhembo'y-ma va'erã nhaĩ-vy Nhandejáry rovagwy-py omombe'u hagwã nhande-vy nhane rembiapokwe. Iporã para'e, naiporã para'e he'i va'erã nhande-vy.*

¹¹ A-rami he'i Nhandejáry kwatia nhe'ẽ:

"Ha'e ete-ma peẽ-my. Xe rekoha apu e'ŷ va'e xe. Xe rovagwy-py enterove onhesũ va'erã peteĩxa. Peteĩxa ogwerosapukái va'erã xe Nhandejáry voiha".*

Upéixa he'i Nhandejáry kwatia nhe'ẽ.

¹² Upéa-gwi peteĩ teĩ nhanhemombe'u va'erã Nhandejáry-pe nhane rembiapo apokwe-rehe.

Aníke erembojejavy uka nde rapixa-pe (1 Co 8.9-13)

¹³ Ja'u ramo so'o, ndaja'u katúi ramo so'o ave, peteĩxa. Upéixa ramo, Anive "Tekoha e'ŷ-rupi ereiko" ja'e nhande rapixa-pe. Anive nhanhombo'e vai hese. Ja'e ae katu nhande re'ýi-rehe "Xe re'ýi-pe ambojejavy uka ramo, hesa-py ndaiko mo'ãi xe rekoha-rupi. Ndajapo mo'ãi xe ajaposeha-rami. Nambojejavy ukaséi íxupe" ja'e nhande-jéupe.

¹⁴ Tekoha xe aikwaa porã voi Cristo xe mo'arandu-gwi. Oĩ he'i va'e mo'ã "Koa ja'u va'erã, upéa ja'u e'ŷ va'erã" he'i mo'ã. Ha upe va'e-rehe "Ja'u e'ŷ va'erã" nde'íry Nhandejáry. Ha "Ja'u e'ŷ va'erã nipo ra'e upéa" he'i va'e katu ndoikwaáiry tekoha. Ha'e ae gwekoha-rupi oiko. Upéixa ho'u ramo gwembi'u e'ŷ, "Ajejavy-ma" he'i va'erã ójehe.

* 14:10 2 Co 5.10 * 14:11 Is 45.23

¹⁵ Ha, “Ne rembi'u e'ŷ katu iporā ja'u” ere ramo nde rapixa-pe, nerembovy'avéi-ma va'erā íxupe. Nderehayhuvéi-ma va'erā hereko-vy. Nde rapixa-rehe omano-ma va'ekwe Cristo. Tuvixa mba'e nde rapixa Cristo-pe upéa-gwi. Upéa-gwi ani pe'u teĩ hembi'u e'ŷ nde rapixa resa-py. Erembojejavy uka arā íxupe. Ojehesa rerova arā Cristo-gwi.

¹⁶ Peiko arandu katu. Ani ojohu vai teĩ pene remimoporā.

¹⁷ Nhande ruvixa ramo oiko ramo Nhandejáry, “Kóá nhane rembi'u, upéa nhane rembi'u e'ŷ” nde'íry nhande-vy. He'i ae nhande-vy: “Pene potī-ma” he'i. “Tekoha-rupi peiko. Pejejavy e'ŷ rehevē peiko” he'i. “Pende joja porā katu onhondive” he'i. “Tapene mbovy'a katu Nhe'ẽ Marangatu tee va'e” he'i ae nhande-vy.

¹⁸ Upéixa Cristo rembigwái va'e ombovy'a ave Nhandejáry-pe. Imandu'a porā ave hese teko rei.

¹⁹ Upéixa-gwi nhane renonde-rupi meme jaraha katu nhande joja hagwā. Nhanhomombaraete katu jaiko porā hagwā.

²⁰ Aníke erembyai teĩ Nhandejáry remimoingo hembi'u e'ŷ ere'u-gwi nhande rapixa resa-py. Hi'upy gwive iporā ja'u ramo jepe, naiporāi joty nhambojejavy uka nhande rapixa-pe. Hembi'u e'ŷ ja'u-vy nhambojejavy uka ramo ave íxupe, naiporāi katu ojehesa rerova va'erā Cristo-gwi.

²¹ Hembi'u e'ŷ ere'u-vy erembojejavy uka ramo ave nde rapixa-pe, anive ere'u so'o, anive ere'u uva rykwere ave. Oime raẽ va'e-py erembojejavy uka va'erā íxupe, anive erejapo teĩ.

²² Upéixa-gwi ne rembijohu porā ani eremombe'u teĩ avave-pe. Nhandejáry anhóte toikwaa. Ha gwembijohu porā ojapo va'e katu, “Iporā para'e xe rembiapo, naiporāi para'e xe rembiapo” he'i rei ramo ójehe, ndovy'áiry. Ndogwerovy'apái gwembiaapo. Ha ojerovia tee ramo ójehe, ogwerovy'a gwembiaapo.

²³ Ha ndojeroviapáiry va'e ho'u va'erā-rehe katu gwembijohu e'ŷ ho'u ramo, gwembijohu vai ho'u joty ramo, ndojohu porāi íxupe Nhandejáry. Jajerovia ku'a ku'a nhandejeheha ndojohu porāi voi Nhandejáry. Ha'e-ta peẽ-my. Nhane rembiaporā-rehe ndajajeroviapáiry ramo, jajejavy joty voi jajapo-vy.

15

*Ani nhandéjehe anho rei jaiko. Nhande rapixa-pe nhambovy'a ave
(1 Co 10.24; Fp 2.3-5; 2 Tm 3.15-17)*

¹ Ha nhande nhandéjehe jajeroviapa va'e katu ani jajere teĩ gwī ogwerovia mixī mixī va'e kwéry-gwi. Túvy-rami ae jareko íxupe. Ani nhambovy'are'ŷ íxupe nhandéjehe anho rei jaiko-vy.

² Nhande kwéry nhambovy'a ae katu nhande rapixa-pe oiko porāve hagwā ogwerovia porāve hagwā.

³ Ha Cristo katu ha'e jepe ójehe anho rei ndoikói va'ekwe. Hekovia ohasa asy va'ekwe. Upéixa he'i hese Nhandejáry kwatia nhe'ẽ:

“Nde-rehe onhe'ẽ rei rei hagwe-rami, ãy onhe'ẽ rei rei-ma xe-rehe ave”.^{*}
Upéixa he'i Nhandejáry kwatia nhe'ẽ Cristo-rehe.

⁴ Yma va'ekwe entéro Nhandejáry kwatia nhe'ẽ gwive ohai va'ekwe nhane renonderā nhane mbo'e hagwā. Upe va'e nhe'ẽ-py gwive nhane mbo'e jajapura e'ŷ hagwā, nhane kyre'ŷ hagwā pono jajehesa rerova íxugwi, nhaha'arō tee hagwā Nhandejáry-pe, jaiko meme hagwā hendive nhande reraha hagwā.

* 15:3 Sl 69.9

5-6 Ojéhegwi nanhande rerova ukái va'e Nhandejáry. Nhane mbopy'agwasu ae ojéupe, nhane mokyre'ŷ ave ojéupe. Tapene moingo Cristo rekorupi penhe'ẽ joavy avy e'ŷ hagwā ojóupe, pende joja hagwā, peteīxa pemomba'egwasu joa hagwā íxupe ojojurupypa penhe'ẽ-vy. Ha'e ko Nhandejáry Hesu Cristo Ru voi.

Hesu Cristo rehegwa nhe'ẽ porã nhande kwéry e'ŷ pegwarã nhe'ẽ ave

7 Upéixa-gwi pende rerohory hagwe-rami Cristo, peē ave pejogwerohory porã katu ojóupe, Nhandejáry-pe pemomba'egwasu hagwā.

8 Are-ma oiko va'ekwe Cristo judeu kwéry pytygwōharā, “He'i hagwerupima ojapo” ja'e hagwā Nhandejáry-rehe. “Jahex-a-ma katu ãy nhane rembypy-pe hemimombe'ukwe” ja'e hagwā hese.

9 Cristo oiko-ma va'ekwe nhande kwéry e'ŷ va'e ave, judeu e'ŷ va'e, omomba'egwasu hagwā Nhandejáry-pe, “Nhande reko poriahuvereko-ma” he'i hagwā hese. Upéixa he'i Nhandejáry kwatia nhe'ẽ:

“Upéixa-gwi nhande kwéry e'ŷ pa'ũ-my atima porã-ta nde-vy. Nde réry-pe amomba'egwasu-ta aporahéi-vy nde-vy.”*

Upéixa he'i Nhandejáry kwatia nhe'ẽ Nhandejáry-pe omboeteha-rehe Cristo.

10 “He'ýi e'ŷ tovy'a katu Nhandejáry re'ýi ndive”*

he'i jevy Nhandejáry kwatia nhe'ẽ judeu kwéry e'ŷ va'e-rehe.

11 “Entéro nhande kwéry e'ŷ va'e gwive tomomba'egwasu Nhandejáry-pe.

Judeu kwéry e'ŷ va'e gwive peteīxa tomboete ave íxupe”*
he'i jevy Nhandejáry kwatia nhe'ẽ judeu kwéry e'ŷ-rehe.

12 “Ojekwaa va'erã ou-vy myamyrí Jessé remiarirõ joapyri pyrirā. Omoingo va'erã íxupe nhande kwéry e'ŷ ruvixarā. Oha'arõ tee va'erã íxupe hikwái.”*

Upéixa he'i Cristo-rehe Nhandejáry kwatia nhe'ẽ Isaías rembihaikwe.

13 Ha Nhandejáry onheha'arõ tee uka va'e nhande-vy voi. Perovia-gwi íxupe, tapene mbovy'a vy'apa katu. Tapene mbopy'agwapy gwapypa katu ave. Upéixa-gwi pene mombaraete ete-gwi Nhe'ẽ Marangatu tee va'e peha'arõ teeve eve va'erã Nhandejáry-pe.

Amondo-vy peē-my xe kwatia nhe'ẽ, ha'ese va'e gwive ati e'ŷ rehewe ha'epa ete-ma voi peē-my

14 Ha xe katu, xe re'ýi kwéry, pende rekoha porãha aikwaa porã voi xe. Pene arandu porãha xe aikwaa voi. Penhomo'arandu porã kwa voi. Pende rekoha kwaahaa voi xe.

15-16 Ha oĩ Nhandejáry nhe'ẽ aipota pende resarái e'ŷ va'e íxugwi. Upéa rehegwa amombe'upa-ma peē-my. Natíry amombe'u-vy. Are-ma xe rexakwaa rei-ma va'ekwe Nhandejáry. Xe moĩ-ma va'ekwe Hesu Cristo rembigwairā amba'apo hagwā judeu kwéry e'ŷ va'e-rehe. Upéixa-gwi natíry Nhandejáry rehegwa nhe'ẽ amombe'upa-vy peē-my. Ha pa'i kwéry katu ome'ẽ me'ẽ Nhandejáry-pe oipota va'e ombovy'a hagwā íxupe. Upéixa pa'i-rami xe ave ambovy'ase Nhandejáry-pe. Upéixa-gwi amombe'u mbe'u Nhandejáry gwigwa nhe'ẽ porã. Aipota Nhe'ẽ Marangatu tee va'e omomarangatu judeu kwéry e'ŷ va'e-pe. Aipota Nhandejáry ogwerovy'a íxupe kwéry, aipota omogwahē íxupe kwéry oha-py.

17 Cristo Hesu xe rerekha-py amba'apo-gwi Nhandejáry-pe, xe rembiapo ambotuvixa mba'e.

18 Outro-pe Cristo rembiapo uka namombe'u mo'ãi. Xe-vy hembiapo uka mante amombe'u-ta, natíry amombe'u-vy. Cristo rekoria ahendu uka-ma

* **15:9** 2 Sm 22.50; Sl 18.49 * **15:10** Dt 32.43 * **15:11** Sl 117.1 * **15:12** Is 11.10

va'ekwe judeu kwéry e'ŷ va'e-pe Nhandejáry nhe'ẽ. Amombe'u ramo, xe rembiapo porã ramo ave, ahendu uka íxupe kwéry inhe'ẽ.

¹⁹ Xe mombaraete-ma va'ekwe Nhe'ẽ Marangatu tee va'e hexapyrã-rupi xe rembiapo porã hagwã xe ajapo hagwã jahexa e'ŷ va'e. Upéixa-gwi Cristo rehewa nhe'ẽ porã arosapukaipa. Jerusalém tetã-my amombe'upa va'ekwe. Upe-gwi aroajere jere aha-vy va'ekwe. Ilíria yvy peve aha va'ekwe amombe'u-vy. Opa-rupi amombe'upa va'ekwe nhe'ẽ porã.

²⁰ Peteĩxa xe ajapose. Cristo réry rendu e'ŷha-rupi arosapukaise nhe'ẽ porã imombe'u-vy. Cristo réry rendu ha-rupi ndarosapukaiséi. Outro kwéry hembiapo ranhe ha-rupi ndahaséiry xe ave xe rembiapo hagwã upe-rupi. Ndahaséiry outro nhe'ẽ rapykwéri anhe'ẽ-vy. Nambojo'aséi outro rembi-apokwe ári xe rembiapo.

²¹ Upéixa voi he'i Nhandejáry kwatia nhe'ẽ:
“Gwĩ ohendu e'ŷ va'e hesegwa nhe'ẽ ohexa kwaa va'erã hese hekoha. Gwĩ herakwã rendu e'ŷ va'e oikwaa va'erã íxupe”*
he'i Nhandejáry-rehe.

“Ahase Roma tetã-my” he'i Paulo kwatia-rehe

²² Are-ma ahase rei aiko-vy pene renda-py. Outro tetã tetã-rupi nhe'ẽ porã amombe'u-vy aiko. Upéixa-gwi ndahái pende ha-py.”*

²³ Ha ko'ângá katu xe aiko ha-rupi opa-ma xe rembiaporã. Heta ro'y-ma ojapo orohexase hagwe.

²⁴ Áy katu ikatu ramo, orohexata. Aha ramo Espanha yvy-koty nde ha-rupi ahasa-ta aha-vy pende ha-py. Ha ndaxe are mo'âi pene ndive apyta-vy. Ha upe rire katu, xe mbovy'a rire, aipota xe pytygwõ ahave hagwã mombyryve Espanha yvy-py.

²⁵ Áy ete katu aha ranhe-ta Jerusalém tetã-my Nhandejáry re'ýi pegwarã araha va'erã.

²⁶⁻²⁷ Ha Hesu reroviaha gwive Macedônia yvy-rupi, Grécia yvy-rupi ave onhomboaty aty va'e he'i kuri Nhandejáry re'ýi-rehe Jerusalém pygwa-rehe. Ha'e ae onhe'ẽ-py he'i: “Nhamono'õ jaraha uka va'erã nhame'ẽ va'erã upe-py iporiahu va'e pegwarã” he'i Nhandejáry re'ýi-rehe.* “Nhamboaty jaraha uka va'erã” he'i ojéhegwi rei. Ha ha'e-ta peẽ-my: Oreveha ome'ẽ gwĩ iporiahu va'e-pe. Nhande-vy ime'ëpyre nhame'ẽ jevy ave va'ekwe judeu kwéry e'ŷ va'e-pe hi'arandurã. Upéixa-gwi nhame'ẽ va'ekwe rekovia iporã ome'ẽ jevy nhande-vy nhane remikotevẽ.”*

²⁸ Ha upe rire katu ajapopa rire ame'ëmba rire íxupe omono'õ va'ekwe, Espanha yvy-koty aha-ta. Tape ku'a-gwi agwahẽ arã nde ha-py.

²⁹ Pende ha-py agwahẽ aha-vy ramo, apohovasa uka porã va'erã Cristo-pe. Cristo remime'érã gwive ame'ëmba va'erã peẽ-my. Anhetegwa voi amombe'u peẽ-my.

³⁰ Áy xe re'ýi kwéry, Nhandejáry Hesu Cristo-rehe jajerovia-gwi, nhane mbojohayhu uka-gwi Nhe'ẽ Marangatu, aporandu-ta peẽ-my: Ani pene ate'ŷ tei oraçao apo-vy xe-rehe. Xe ndive katu pembojeupi upi pene nhe'ẽ Nhandejáry-pe.

³¹ Peje Nhandejáry-pe: “Eresende katu Paulo-pe Judéia pygwa po-gwi heroviaha e'ŷ va'e-gwi eresende íxupe” peje. “Ani omotí tei Paulo-pe ome'ẽ-ta va'e-rehe Nhandejáry re'ýi Jerusalém pygwa-pe” peje Nhandejáry-pe xe-rehe oraçao apo-vy.

* ^{15:21} Is 52.15 * ^{15:22} Rm 1.13 * ^{15:26-27} 1 Co 16.1-4 * ^{15:26-27} 1 Co 9.11

³² Upéixa ramo Nhandejáry xe mogwahē-ta ramo, xe py'a rory-gwi rei agwahē-ma va'erā pende ha-py. Xa avy'a-ma va'erā atongea-ma va'erā apytu'u-vy pende ha-py.

³³ Nhane mbopy'agwapy va'e voi Nhandejáry. Tapene moirū oiko-vy. Amém.

16

Paulo omombe'u Hesu reroviaha Roma pygwa-rehe omandu'a porāha

¹ Amombe'u-ta peẽ-my nhande re'yi Febe héry va'e rehewa nhe'ẽ. Hekoha porā pe kunha. Hesu reroviaha Cencréia tetā-my onhomboaty va'e pytygwōha voi pe kunha.

² Ha'e Cristo irū voi. Upéa-gwi pemogwahē katu íxupe. Nhande kwéry jarovia va'e nhanhomogwahē porā katu. Upéa-gwi pemogwahē porā katu íxupe ave. Heta oĩ hemipytygwō. Ha xe-vy xe pytygwō ave. Upéa-gwi, pendéhegwi ha'e oikotevē ramo, peme'ẽ katu íxupe.

³ Amombe'u-ta xe mandu'a porāha ave Priscila-pe Áqüila ndive. Xe ndive omba'apo Hesu Cristo-pe.

⁴ Xe-rehe ha-py nahakate'ŷiry va'ekwe gwekove-rehe. Xe-rehe ha-py ojejuka hagwā-rami joto oiko va'ekwe. Xe rayhu tee hagwe-rehe, xe atima porā íxupe. Naxe anhóiry atima porā íxupe. Entéro Hesu reroviaha gwive judeu kwéry e'ŷ va'e, onhomboaty aty ha-rupi, otima porā ave íxupe.

⁵ Ha'e uka-ta ave xe mandu'a porāha Hesu reroviaha-pe gwive upe mokõi va'e róga-py onhomboaty va'e. Ha'e uka-ta ave xe mandu'a porāha Epêneto-pe. Ha'e xe rembiayhu voi. Ásia yvy-py ha'e anho ranhe ojerovia ypy-ma va'ekwe Cristo-rehe.

⁶ Ha'e uka-ta ave Maria-pe xe mandu'a porāha. Heta omba'apo pende-rehe.

⁷ Amombe'u uka-ta ave Andrônico-pe Júnias ndive. Ha'e xe rugwy re'yi tee voi. Preso aĩ ramo xe moirū-ma va'ekwe upe-py. Hesu remimondo upéa. Enterove mandu'a porāha. Voive ogwerovia-ma va'ekwe Cristo-pe xe renonde-py. Hapykwéri-ma xe ajerovia va'ekwe Hesu-rehe.

⁸ Ha'e uka-ta ave Amplíato-pe. Xe rembiayhu voi. Cristo irū va'e.

⁹ Ha'e uka-ta ave Urbano-pe. Cristo-pe oromba'apo ramo ore irū voi. Xe rembiayhu Estáquis-pe ave ha'e uka-ta xe mandu'a porāha.

¹⁰ Ha'e uka-ta ave Apeles-pe. "Cristo-rehe ojerovia tee-ma nipo ra'e" he'i hese imandu'a porā-vy. Aristóbulo róga pygwa-pe ave ha'e uka-ta.

¹¹ Ha'e uka-ta ave Herodião-pe. Ha'e xe rugwy re'yi tee voi. Hesu reroviaha Narciso róga pygwa-pe ha'e uka-ta ave.

¹² Amondo-ta ave xe mandu'a porāha Trifena-pe Trifosa ndive. Pe kunha omba'apo Cristo-pe. Pérsida-pe amondo-ta ave. Pe kunha ave heta omba'apo Cristo-pe.

¹³ Amondo-ta Rufo-pe xe mandu'a porāha. Cristo-pe omba'apo ramo imandu'a porā hese. Isy-pe ave amondo-ta. Omemby-rami hembiereko ave xe.

¹⁴ Amondo-ta Asíncrito-pe, Flegonte-pe ave xe mandu'aha. Amondo-ta ave Hermes-pe, Páetrobas ndive Hermas-pe ave. Indive kwéry Hesu reroviaha-pe gwive ha'e uka-ta.

¹⁵ Ha'e uka-ta Filólogo-pe Júlia ndive. Heindýry ndive Nereu-pe, Olimpas-pe ave, indive kwéry Nhandejáry re'yi oĩ va'e-pe gwive ha'e uka-ta xe mandu'a porāha.

¹⁶ Pejohayhu-gwi, penhokwavā kwavā katu peiko-vy onhondive. Entéro Cristo reroviaha gwive onhomboaty aty ha-rupi omondo-ta peē-my omandu'a porāha.

"Ani pene mitā arandu teī. Peiko arandúke" he'i Paulo

(Mt 7.15-20; Ef 5.6-7; Cl 2.8; 1 Jo 4.1-6)

¹⁷ Oĩ onhe'ẽ rei rei va'erā nhande joja e'ŷ hagwā. Nhande rerovase Cristo-gwi. Aporandu randu-ta peē-my, xe re'yi kwéry: Perepara kena hese hekoha rexava-vy. Peiko arandu kena. Ani pemoirū teī íxupe. Orombo'e hagwe-rami, napene mbo'ei va'erā. Pende rerovase-vy omombe'u a'ã a'ã va'erā peē-my Cristo nhe'ẽ.

¹⁸ Upéa rehewa apoha Nhandejáry Hesu Cristo-pe noipytygwōiry. Ójeho anho rei omba'apo oiko va'e. Cristo pytygwōha e'ŷ voi gwīa. Ojapose va'e reima ojapo. Onhe'ẽ porā va'e vérami rei-ma oiko-vy. Onhe'ẽ-py oporombotavy. Inhe'ẽ reroviaha-pe, mitā arandu-rami itavy rei rei va'e-pe ave ombotavy. Ndohexa kwaái ha nohendu kwaáiry. Upéa-gwi ogwerovia mo'ã.

¹⁹ Pende-rehe ae enterove imandu'a porā: "Ogwerovia tee voi íxupe, Cristo-gwi ojehesa rerova e'ŷ va'e" he'i pende-rehe. Upéa-gwi avy'a pende-rehe. Aipota pene arandu. Pejapo porā kwaai katu. Ani erejapo vai kwaai teī.

²⁰ Ha Nhandejáry nhane mbopy'agwapy voi ani hagwā nhande joja e'ŷ teī onhondive. Ndahi'are mo'ãi, pene pytygwō-ta kuri. Mbói ijukapyre-rehe nhapyrūha-ramima, pene mbopu'aka uka-ta kuri anháy ruvixa Satanás-rehe.

Tapende rovasa katu Nhandejáry Hesu pende rexakwaa rei-vy

²¹ Ha Timóteo katu xe rembiapoha irū va'e omundo-ta peē-my omandu'aha. Omundo-ta ave xe rugwy re'yi Lúcio, Jasão, Sosípatro ave.

²² Ha xe Tércio, Paulo nhe'ẽ raiha, Hesu reroviaha va'e ave, amondo-ta ave peē-my xe mandu'aha.

²³ Omundo-ta ave omandu'aha Gaio. Hóga-py aime. A-py ave ojogweroaty haty Hesu reroviaha. Omundo-ta ave omandu'aha Erasto, ko tetā mygwa ome'ẽ va'ekwe pirapire nhongatuha. Quarto, nhande re'yi omundo-ta ave omandu'aha.

²⁴ Tapende rovasa vasa Nhandejáry Hesu Cristo pende rexakwaa rei-vy. Amém.

Ipaha-ma omboete Nhandejáry-pe Paulo

²⁵ Nhamomba'egwasúke Nhandejáry-pe. Hesu rehewa nhe'ẽ porā xe remimombe'u pehendu ramo, pene moingo kwaai Nhandejáry tape porā-rupi pejehesa rerova e'ŷ rehewe. Yma gwembiaporā nhongatu araka'e avave-pe nomombe'úi araka'e gwembiaporā. Ha upe rire katu nhande-vy omombe'u oikwaa uka-vy gweminhongatugwe. Anhetegwa va'e omombe'u va'e. Upéa rehewa nhe'ẽ pehendu ramo, pene moingo kwaai Nhandejáry tape porā-rupi pejehesa rerova e'ŷ rehewe.

²⁶ Ha ko'ângá katu heminhongatu omombe'u atýra-py Nhandejáry nhe'ẽ omombe'uhaty kwtia-rehe oikwaa uka-vy nhande-vy. Ha Nhandejáry opa e'ŷ va'e ha'e ae ave oikwaa uka. Nhandejáry nhe'ẽ-py ojekwaa-ma entéro tetā tetā mygwa-pe gwive, hembiaporā enterove va'e ogwerovia ramo ojapo hagwā inhe'ẽ.

²⁷ Nhande rexakwaa porā rei va'ekwe Hesu Cristo. Upéa-gwi tomomba'egwasu meme katu Nhandejáry-pe. Ha'eixagwa hi'aranduve va'e ndoikóiry. Upéa-gwi tomboete katu íxupe opa e'ŷ rehewe. Amém.

Paulo remimombe'ukwe Corinto tetā mygwa pegwarā 1 primeira epístola de Paulo aos coríntios

Paulo ohai kwatia nhe'ẽ Corinto tetā mygwa kwéry-pe

¹⁻³ Hesu Cristo reroviahā, Nhandejáry remienói gwe'ýi kweryrā, gwemimo-marangaturā, Corinto tetā-my peiko va'e, opa-rupi Hesu Cristo réry renoiha gwive va'e ave. Xe, Paulo amondo uka-ta peẽ-my xe nhe'ẽ. Xe, nhande re'ýi Sóstenes ndive, oromondo uka-ta ore nhe'ẽ peẽ-my gwarā. Kwatia-rehe oromoimba-ta ore nhe'ẽ peẽ-my. Tapende rovasa katu Nhandejáry Nhande Ru va'e pende rexakwaa rei hagwā, pene mbopy'agwapy hagwā. Tapende rexakwaa katu Nhandejáry Hesu Cristo ave. Xe, Paulo, Hesu Cristo remimondo voi xe. Nhandejáry xe renói va'ekwe aiko hagwā hemimondorā. Hemimbota-rupi aiko Hesu Cristo remimondorā.

⁴ Ha xe mandu'a meme pende-rehe anhomoneta jave Nhandejáry ndive. “Atima porā nde-vy” ha'e Nhandejáry-pe. “Erehovasa porā-ma Corinto pygwa kwéry-pe. Upéa-rehe atima porā nde-vy” ha'e Nhandejáry-pe pende-rehe.

Hesu reroviahā va'e-rehe Nhandejáry onhangareko porā

⁵ Peẽ peteĩ teĩ pejerovia-ma Hesu Cristo-rehe. Upéa-gwi onhangareko porā porā pende-rehe Nhandejáry. Peiko-ma peteĩxa Hesu Cristo ndive. Indive meme-ma peiko. Upéa-gwi ome'ẽ meme-ma peẽ-my opa pene remikotevé. Pene mbopy'a kyre'ý. Peteĩ teĩ-pe pene arandurā ome'ẽ-ma peẽ-my, pene nhe'ẽ ngatu porārā ave ome'ẽ peẽ-my pemombe'u porā hagwā anhetegwa nhe'ẽ, Nhandejáry Hesu Cristo rehewa nhe'ẽ pemombe'u porāve rāve hagwā.

⁶ Peikwaa porā-ma Cristo rehewa nhe'ẽ. Pejerovia-ma hese-gwi inhe'ẽ-rupi peiko-ma ra'e.

⁷ Upéa-gwi Nhandejáry Nhe'ẽ Marangatu tee va'e ome'ẽ-ma peẽ-my entero mba'e ha'e ogwerekō ome'ẽ hagwā nhande-vy. Perekopa-ma ra'e hemime'ẽgwe kwéry. Ha upe jave peha'arō Nhandejáry Hesu Cristo ou jevy hagwā óra.

⁸ Upe va'e áry-py peha'arō jave pene mombaraete meme va'erā Nhandejáry. Upéa-gwi Hesu Cristo ogwahē-ma ramo ojehexā uka-vy “Nde py'a potī-ma” he'i va'erā peteĩ teĩ-pe peẽ-my.

⁹ He'i hagwe meme Nhandejáry ojapo. Onhe'ẽ-gwi ova e'ý va'e voi Nhandejáry. Ha'e pene renói va'ekwe peiko hagwā peteĩ heko porā-rupi ta'ýry Hesu Cristo ndive. Nhandejáry tee voi Hesu Cristo.

Peteĩxa tapeiko (Rm 15.5; Ef 4.3)

¹⁰⁻¹¹ Tapehendu porā mani xe nhe'ẽ, xe re'ýi kwéry Hesu reroviahā va'e kwéry. Pene rerakwā vai nipo ra'e. Ogwahē-ma xe-vy pene mombe'uhā. Pejoavy avy-ma nipo ra'e onhondive. Cloe re'ýi kwéry omombe'u kuri xe-vy: “Corinto tetā-my oiko va'e kwéry Hesu reroviahā va'e ndoiko porāiry onhondive”. Aipo he'i kuri pene rerakwā mombe'u-vy. Pene rerakwā ahendu-gwi ajerure-ta peẽ-my pejohayhu rei hagwā peiko porā meme hagwā onhondive. Nhandejáry Hesu Cristo réry-py ajerure peẽ-my anive hagwā penhonhe'ẽ mbojevy jevy. Taperojoja kena onhondive pene nhe'ẽ. Peteĩxa perekō porā

kena pende reko porã onhondive. Penhomongeta ramo ojojurupypa kena peñi. Peteñ-rupi meme perekó kena pene nhe'ẽ porã.

¹² Amombe'u jevy-ta peñ-my pene rerakwã ahendu kuri. Penhe'ẽ rei ra'e pene mbo'eha kwéry-rehe. Gwĩ onhe'ẽ rei va'e xe-rehe he'i "Ore orohen-duse Paulo remimombe'u mante" he'i. Gwĩ outro "Ore orohenduse Apolo remimombe'u mante" he'i Apolo-rehe. Gwĩ outro "Ore orohenduse Pedro remimombe'u mante" he'i Pedro-rehe. Gwĩ outro "Ore orohenduse Cristo remimombe'u mante" he'i Cristo-rehe. Upéixa penhonhe'ẽ mbojevy jevy rei ra'e ore-rehe.

¹³ Naiporãi voi upe pene nhe'ẽ pene mbo'eha kwéry-rehe. Pemopeteñ katu pene nhe'ẽ peiko porã hagwã.

Okurusu-rehe omano va'e ndaha'ei xe. Hesu Cristo mate omano okurusu-rehe nhande resende hagwã. Ndaha'ei xe réry-py araka'e penhemongarai uka. Hesu Cristo réry-py ae araka'e penhemongarai uka. Anive inhe'ẽ mombe'uhu-rehe aipo-rami peje. Niporãi penhe'ẽ ore-rehe.

¹⁴⁻¹⁵ "Paulo xe mongarai va'ekwe ajerovia hagwã hese." Ani upéixa peje xe-rehe. Ndahetái xe remimongarai va'e oĩ pene pa'ũ-my. Upéa-rehe avy'a ndaikatúi avave he'i "Xe Paulo rehewa". Crispo-pe amongarai va'ekwe, Gaio-pe ave amongarai va'ekwe.

¹⁶ Xe mandu'a ave Estéfanos-rehe. Amongarai va'ekwe íxupe, hóga pygwa ndive. Upe rire ndaipóri para'e ambue amongarai va'ekwe. Naxe mandu'avéiry mbovy nipo amongarai va'ekwe.

¹⁷ Ndaha'ei aporomongarai hagwã xe mondo va'ekwe Hesu Cristo. "Inharandu eterei va'e nhe'ẽ xe rehewa nhe'ẽ ani ereiporu rei teñ xe mombe'u-vy" he'i xe-vy. "Iporâve kóixa ere arã xe-rehe: Hesu Cristo omano okurusugwasu-rehe nhane resende hagwã. Upéixa ere-ta xe mombe'u-vy enterove-pe" he'i xe-vy. "Ha inharandu eterei va'e nhe'ẽ ereiporu ramo ne rendu va'e kwéry naimandu'avéi arã ne nhe'ëgwe-rehe. He'i joty arã nde-rehe, ha'e inharanduve voi, he'i arã nde-rehe, ha xe rehewa nhe'ẽ-rehe naimandu'avéi arã." Upéixa he'i xe mondo-vy Hesu Cristo.

Paulo omombe'u ma'erã-gwi Hesu omano va'ekwe

¹⁸ Nhahendu-ma ramo Hesu Cristo rehewa nhe'ẽ, ja'e nhande py'apy-py: "Hesu Cristo omano xe resende hagwã. Nhandejáry omboyke-ma xéhegwí xe rembiapo vaikwe. Ta'yry Hesu Cristo ombou-ma omano hagwã xe resende hagwã." Aipo niko hese jajerovia va'e ja'e. Ipu'aka voi nhande-vy Hesu rehewa nhe'ẽ.

Oĩ ae heta Hesu rehewa nhe'ẽ nohendu kwaái va'e. Umi ohasa asy va'e renda-py oho va'erã. Ohendu-ma ramo Hesu Cristo rehewa nhe'ẽ, ndopo he'i: "Ma'erã-gwi omano? Omano rei nipo ra'e. Ndoikovéi voi" he'i mo'ã va'erã Hesu Cristo-rehe.

¹⁹ Nhandejáry ohai uka va'ekwe:
"Inhakã porã-gwi inharandu va'e, nahi'arandu teéi voi. Amokanhy-ta íxugwi hi'arandukwe. Ha yvy arigwa-rehe oikwaa porã va'e, nahi'arandu teéi vyteri. Hembigwaakwe ambohesarái-ta íxupe. Ndovaléi arã íxupe."*
Upéixa he'i Nhandejáry.

²⁰ Nhane arandu mbyky nhande kwéry. Ndaha'ei Nhandejáry-rami. Nhandejáry arandu ipukuve nhane arandu-gwi. Ha nhane arandu mbyky-rehe ndajeheko arupitýi Nhandejáry-pe. Ko'a pygwa hekomombe'uhaty ndikatúi omombe'u Nhandejáry-pe ha'e oikwaave hagwã mo'ã. Ndaipóri Nhandejáry

* ^{1:19} Is 29.14

yke-rehe hi'aranduve va'e. Inharandu mbyky va'e meme mate oĩ. Ndaipóri ave Nhandedjáry renonde-py nhe'ẽ oiporu porã va'e.*

²¹ Ha'e anho mate voi inharandu tee va'e. Hi'arandu tee-gwi ndohejái ko yvy arigwa arandu anho ogwereko va'e ohekoarupity hagwã íxupe. Ha'e ojekwaa ukase mate onhe'ẽ mombe'uha renduhaty kwéry-pe. Omombe'u uka ramo, itavy va'e nhe'ẽ-rami ramo jepe, heroviahá kwéry-pe mate ore-sende va'erã Nhandedjáry.

²²⁻²³ Ha ore ae katu oromombe'u meme inhe'ẽ. Oĩ umi ohendu va'e ogwerovia va'e ave íxupe. Oĩ ave umi ndogweroviáí va'e inhe'ẽ. "Itavy voi" he'i mo'ã ore-rehe.

Upéixa voi judeu kwéry ndogweroviaséi voi íxupe. "Yváy-gwi hexapyrã-rupi eremba'apo ramo arovia-ma voi" he'i rei. Ha umi judeu e'ỹ kwéry ave ndogweroviaséi ave. Ho'arandurã oikwaa seve seve hikwái.

Ha ore katu, Hesu rehewa nhe'ẽ mate oromombe'u. "Hesu Cristo omano va'ekwe kurusugwasu-rehe nhane rembiapo vaikwe omboyke hagwã nhandéhegwi" ore oro'e meme oromombe'u-vy.

Ohendu-ma ramo judeu kwéry umi ndogweroviáí va'e he'i ore-vy: "Penhemonhandejáry rei Hesu Cristo-rehe. Ndovaléi ne nhe'ẽ" he'i mo'ã ore-vy.

Ha ohendu-ma ramo judeu e'ỹ va'e umi ndogweroviáí va'e he'i rei ave ore-vy: "Peẽ ko ndapeikwaáiry voi mba'eve" he'i rei ave ore-vy.

²⁴ Nhandedjáry rembiporavo va'e ae ohendu kwa inhe'ẽ. Judeu kwéry gwigwa oĩ gwĩ oiporavo va'e. Judeu e'ỹ va'e kwéry gwigwa ave oĩ gwĩ oiporavo va'e. Hembiporavo va'e ohendu ramo ogwerovia. "Anhetegwa voi nipo ra'e" he'i ogwerovia-vy. Ha upéixa, Cristo reko-rupi Nhandedjáry ohexa uka gwembiporavo va'e kwéry-pe ha'e huvixaha voi. Ha'e oaranduha ave ohexa uka Hesu Cristo reko-rupi. Ha'e opu'akaha ave ohexa uka Hesu Cristo reko-rupi hese ojerovia va'e-pe.

²⁵ Ha ogwerovia e'ỹ va'e aipo he'i rei hese: "Ko'ánga ikangy Nhandedjáry" onhe'ẽ rei hese. Ha'e ae imbaraeteve yvypóry kwéry-gwi. Ipu'aka tee va'e voi ko Nhandedjáry. Ha ogwerovia e'ỹ va'e ae onhe'ẽ rei hese. "Nhandedjáry ndoikwaái" aipo he'i onhe'ẽ rei-vy hese. Oikwaave ha'e yvypóry kwéry-gwi. Oikwaa paete va'e voi Nhandedjáry.

²⁶ Tapene mandu'a porã kena xe re'ýi kwéry, Hesu reroviahá va'e kwéry, pende rekohakwe-rehe, Nhandedjáry pene renói hagwe-rehe. Ndahetái pene pa'ũ mygwa-pe omomba'egwasu araka'e yvypóry kwéry. Ndahetái-rehe he'i araka'e "Inharandu porã upe va'e." Ndahetái-rehe ave he'i araka'e "Oiporu kwa porã omaba'e reta reta upe va'e." Ndahetái ave oĩ yvypóry ruvixa re'ýi pene pa'ũ-my. "Iporã voi" nonhe'ẽiry pende-rehe hikwái Nhandedjáry pene renói e'ỹ mboyve.

²⁷ Ha upéixa meme Nhandedjáry rembiporavo kwéry. Ha'e oiporavo araka'e inharandu e'ỹ va'e-pe gwe'ýi kwéryrã araka'e. Ha upéa-rehe ombohekog-wypyve va'erã inharanduve va'e-pe. Oiporavo ave araka'e ikangy va'e-pe gwe'ýi kwéryrã. Ha upéa-rehe otĩ va'erã optya-vy imbaraete va'e.

²⁸ Oiporavo ave yvypóry nopenái-rehe va'e-pe gwe'ýi kwéryrã. Oiporavo ave onhe'ẽ rei rei-rehe va'e-pe gwe'ýi kwéryrã ave. Oiporavo ave iporiahu va'e-pe gwe'ýi kwéryrã. "Ndovaléi voi upe va'e" he'i meme kente kwéry Nhandedjáry rembiporavo va'ekwe-rehe. Ha upéixa-gwi oiporavo íxupe kwéry gwe'ýi kwéryrã omotã hagwã onhemooaranduve va'e kwéry-pe. Upéixa oikwaa uka enterovéa-pe avave ojéhegwi rei ndovaléi voi.

²⁹ Ndaikatúi avave onhemomba'egwasu Nhandedjáry renonde-py.*

* ^{1:20} Is 44.25 * ^{1:29} Gl 6.14

³⁰ Ha peē katu, Nhandejáry pene mopeți araka'e Hesu Cristo ndive. Ha'e oiko jepe-ma nhane arandu me'ëha. Hesu Cristo-rehe nhane mopotimbä Nhandejáry. Hesu-rehe nhane resende voi ko Nhandejáry. Ijavegwa voi nhande. Upéa-gwi nhane momarangatu.

³¹ Nanhande py'agwasuvéiry nhandejéhegwí Nhandejáry yke-rehe nhañ-vy. Upéa-rehe he'i:
“Oime ramo onhemomba'egwasuse va'e, tonhemomba'egwasu Nhandejáry
Hesu Cristo-rehe”*
he'i Nhandejáry nhe'ë kwatia-rehe oĩ va'e.

2

Hesu omano ramogware rehewa nhe'ë

¹⁻⁵ “Hesu Cristo rehewa nhe'ë anho mante amombe'u-ta íxupe kwéry” ha'e va'ekwe xejéupe pende-rehe. “Mba'eve-rehe namombe'u mo'äiry upe-py” ha'e ave. “Nhande-rehe ha-py Hesu Cristo omamo va'ekwe okurusugwasu-rehe. Hesegwa nhe'ë meme mante xe amombe'use íxupe kwéry.” Aipo ha'e-vy xejéupe agwahë va'ekwe pene renda-py.

Ha pene ndive aime jave anhemomirïve va'ekwe pejeroviave hagwã Hesu Cristo-rehe. Aime ramo upe-py anhemokangy ajepy'apy-vy pende-rehe. Napombojerovia ukaséi xe arandu-rupi rei. Hesu Cristo anho-rehe mate apombojerovia ukase. Upéixa-gwi ndaiporúi ko'äygwa arandu nhe'ë amombe'u hagwã Hesu rehewa nhe'ë peē-my.

Ha hesegwa nhe'ë amombe'u jave Nhandejáry Nhe'ë Marangatu tee va'e oiko ave xe ndive. Ohexa uka peē-my opu'akaha. Ha upéixa ipu'akaha-rupi peteĩ teĩ pejerovia-ma Hesu Cristo-rehe. Ndaha'ëi ko'äy rupigwa arandu-rupi erejerovia hese. Nhandejáry Nhe'ë Marangatu tee va'e pu'akaha-rupi erejerovia-ma hese.

Nhandejáry ojekwaa uka va'erã nhande-vy Nhe'ë Marangatu tee va'e-rupi (Jo 14.26; 16.13)

⁶⁻⁹ Ha Nhe'ë Marangatu tee va'e reko-rupi oiko porã va'e-pe ambo'e ramo ae aiporu arã hi'arandu tee va'e nhe'ë. Upéa ndaha'ëi ko'äygwa arandu. Ndaiporu mo'äi peē-my upéa arandu. Ndaiporu mo'äi ave mburuvixa arandukwe. Ha'e kwéry opa-tama. Hi'arandu rehewe opa va'erã. Ha ndovaléi arã ko'äygwa-pe mburuvixa-pe ave hi'arandu hagwe. Ha'e kwéry ndoikwaái ave Nhandejáry arandu. Oikwaa e'ë-gwi ohupi uka va'ekwe kurusugwasu-rehe imoñ-vy ojuka Hesu-pe. Ha'eixagwa ndaipóri. Ipu'aka marangatu tee va'e voi Hesu.

Ha xe katu Nhandejáry arandu-rupi amombe'u aiko-vy.

Yma araka'e Nhandejáry onhongatu araka'e hi'arandu. Nomombe'úi gwembiaporã avave-pe. Äy ae katu gwembiporavo-pe omombe'u oaran-duha Nhandejáry. Ko yvy nhेपरु e'ë mboyve Nhandejáry oikwaa ukase araka'e nhande-vy.

“Kurusu-rehe omamo-ta xe ra'y. Hese ojerovia va'e-pe aresenda-ta xe. Xe ra'y Hesu-rami opyta hagwã ipotí. Upe xe rembiporavorã-me aikwaa uka-ta xe arandu.”

Upéixa he'i araka'e Nhandejáry gwemimombe'urã-rehe. Upéa-rehe omoñ uka ave va'ekwe kwatia-rehe ko nhe'ë:

“Avave ndohexái va'ekwe, nohendúi va'ekwe, mba'e ndojepy'a mongetái vyteri joty ave Nhandejáry rembiapo porã íxupe ohayhu va'e kwéry pegwarã.”*

* 1:31 Jr 9.24 * 2:6-9 Is 64.4

¹⁰ Upe Nhandejáry oarandu onhongatu va'ekwe ko'āy nhande jaikwaa-ma. Nhandejáry Nhe'ē Marangatu tee va'e oikwaa uka-ma nhande-vy. Ha'e oikwaapa-ma Nhandejáry py'apy ete-py oī va'e jepe ave Nhe'ē Marangatu tee va'e oikwaapa-ma joty.

¹¹ Nhande yvypóry, nhande py'apy pygwa avave ndoikwaáiry. Nhande ae petei tei jaikwaa mba'e-rehe nhande py'apy-py nhanhemoneta. Avave ndoikwaáiry. Upéixa ave Nhandejáry. Avave ndoikwaái mba'e oī ipy'apy ete-py. Nhe'ē Marangatu tee va'e mante oikwaa.

¹² Ha Nhandejáry ome'ē-ma nhande-vy Nhe'ē Marangatu tee va'e opyta hagwā nhande py'apy-py. Ha'e katu oikwaa uka nhande-vy mba'eixagwa pa gwemime'ēgwe. Ndaha'ei teko rei nhe'ē ko'āygwa ome'ē nhande-vy. Nhe'ē Marangatu tee va'e katu Nhandejáry ome'ē-ma nhande-vy nhane mbo'e hagwā.

¹³⁻¹⁵ Ore ae rei orejéhegwí ore arandu noromombe'úiry. Nhe'ē Marangatu tee va'e ore mbo'e va'ekwe mante oromombe'u jevy. Oromombe'u ramo oī ohendu kwaa va'e. Oī ave ohendu kwaa e'ŷ va'e. Ohendu kwaa va'e ogwereko-ma Nhe'ē Marangatu tee va'e opy'apy-py. Ha'e oikwaa uka íxupe hi'arandurā ohendu porā hagwā, oikwaa hagwā ave anhetegwa nhe'ē. "Iporā voi kóá" he'i hagwā. "Mixí mate ovale upéa" he'i ave hagwā. "Niporāi voi upéa" he'i ave hagwā ipy'apy-py Nhe'ē Marangatu tee va'e omoarandu va'erā íxupe.

Nhandejáry rehewa nhe'ē nohendu kwaái va'e katu ndogwerékoi joty Nhe'ē Marangatu tee va'e opy'apy-py. Ndogwerékoi ave hemime'ēgwe kwéry. Ndaixupe gwarāi, ndoikwaái ave mba'eixagwa pa upe va'e. Upéixa-gwi Nhe'ē Marangatu tee va'e ogwereko e'ŷ va'e ndohekojohu kwaáiry Hesu reroviaha rembiapo-rehe. Nhe'ē Marangatu tee va'e ogwereko va'e ae ohekojohu kwaa opaixagwa.

¹⁶ A-rami he'i Nhandejáry kwatia nhe'ē:
"Avave ndoikwaáiry Nhandejáry py'a-py oī va'e. Ndaipóri ombo'e va'erā íxupe mba'eve-rehe."*
Upéixa he'i kwatia-rehe. Ha nhande katu, Nhe'ē Marangatu tee va'e oime-ma nhande py'apy-py. Oiko-ma Cristo py'a nhande py'apy-py.

3

*"Nhandejáry remimbota erejapo ku'a ku'a-gwi nerehendu kwaái inhe'ē" he'i
Paulo onhemonhe'ē-vy
(Hb 5.11-13)*

¹ Nhandejáry arandu nhe'ē aiporuse mo'ā va'ekwe pene ndive, xe re'ýi kwéry. Ha ndaikatúi. Napehendu kwaái vyteri inharandu ete va'e. Nhe'ē Marangatu tee va'e ndogwerékoi va'e-rami peiko. Erejapose va'e rei erejapo. Nerehendu kwaái vyteri inharandu tee va'e nhe'ē.

² Are-ma erejerovia Cristo-rehe ereiko-vy ha mitā okambu ramo va'e vérámi ereiko vyteri. Nderekwaáiry vyteri Nhe'ē Marangatu tee va'e nhe'ē. Upéixa-gwi ndikatúi amombe'u porā va'ekwe peē-my Nhandejáry nhe'ē. Nhandejáry remimbota erejapo ku'a ku'a-gwi nerehendu kwaáiry inhe'ē. Ndaikatúi amombe'u vyteri peē-my heta hesegwa nhe'ē.

³ Pejapose va'e rei pejapo meme vyteri. Pene rakate'ŷ eterei peē-my gwarā-rehe, ha pende rapixa oiko porāha-rehe pevy'are'ŷ. Pende a'e e'ŷ ojóehe. Pejoja'o ja'o rei peiko-vy. Upéixa peiko-gwi oroikwaa nde rekoha vai. Erejapose va'e rei erejapo-gwi.

* ^{2:16} Is 40.13

4 Ha pene mbo'eha kwéry-rehe ndaperojojáiry pene nhe'ẽ. Oĩ xe-rehe onhe'ẽ rei va'e "Paulo nhe'ẽ mante ahenduse" he'i rei. Oĩ ave Apolo-rehe onhe'ẽ rei va'e. "Xe Apolo nhe'ẽ mante ahenduse" he'i rei jevy. Upéixa penhe'ẽ rei-gwi pejapose va'e rei pejapo peiko-vy.

5-6 Ore remimombe'u-rupi ae pejerovia-ma Nhandejáry-rehe. Inhe'ẽ oromombe'u va'ekwe peẽ-my. Xe, Paulo, Apolo ave, oroiko Nhandejáry rembigwái ramo. Áy aiporu-ta kokwe rehewa nhe'ẽ ne moarandu hagwã mba'éixa pa oroiko.

Nhandejáry kokwe járy-rami onhangareko okokwe-rehe. Omohe'õ gwemitȳ onhotȳ va'ekwe. Peẽ peiko ikokwe-rami. Ore oroiko hembigwái ramo. Ikokwe-py vérami ore oromba'apo oromombe'u peẽ-my Hesu Cristo rehewa nhe'ẽ. Temitȳ onhenhotȳ va'ekwe-rami ave amombe'u va'ekwe Hesu Cristo rehewa nhe'ẽ peẽ-my. Temitȳgwe omohe'õ va'ekwe-rami ave Apolo omombe'u araka'e Hesu Cristo rehewa nhe'ẽ peẽ-my. Ha Tupã Nhandejáry katu omongakwaa temitȳgwe. Upeixagwa ave peẽ. Nhandejáry ae katu pene moarandu araka'e pejerovia hagwã Hesu Cristo-rehe.

7 Upéixa-rupi jaikwaa-ma onhotȳ va'e ndaha'ei mba'eve. Omohe'õ va'e ave ndaha'ei mba'eve. Tupã Nhandejáry mante omoingo kwaa va'e.

8 Onhotȳ va'e, omohe'õ va'e ndive oiko peteixa. Hembigwái meme. Hepyrã-rehe mate omba'apo. Ha peteĩ teĩ-pe ome'ẽ arã hembiapo repykwe. Omba'apo porã va'e-pe hetave ome'ẽ arã hembiapo repykwe. Ha omba'apo ate'ŷ va'e-pe mix̄mi mate ome'ẽ arã hembiapo repykwe.

9 Ore niko "Xe irû" oro'e ojóehe. Nhandejáry rembigwái meme ko ore. Ha peẽ peiko ikokwe-rami. Hóga-rami ave peiko íxupe. Ha'e nhande rerekoporã.

10-11 Óga omopu'ã va'erã rehewa nhe'ẽ aiporu-ta apohekombo'e hagwã peẽ-my, peikwaa hagwã mba'eixagwa pa nhande.

Óga omopu'ã kwaa va'e onhepyrû hembiapo. Upéixa ijekoha hagwã okyta. Ha'e-rami anhepyrû va'ekwe Nhandejáry rogarã amombe'u ramo peẽ-my Hesu Cristo rehewa nhe'ẽ. Amombe'u ramo va'ekwe pejerovia-ma hesse. Nhandejáry xe moarandu-gwi apombojerovia uka va'ekwe Hesu Cristo-rehe. Óga jepytaoha-rami Hesu Cristo opyta. Ha'e mate Nhandejáry omoi uka va'ekwe nhande resendeharã. Outro-rehe jajerovia ramo nanhane resende mo'ai. Hesu Cristo mate nhane resende tee va'erã.

Okyta omoi rire outro kwéry omopu'ãmba.

12 Mbava'e oiporu-ta omoi hagwã óga omopu'ã va'e oiporavo. Oĩ opa e'ŷ va'erã oiporu meme óga omopu'ã-vy. Oĩ ouro ramigwa oiporu va'e. Oĩ prata ramigwa oiporu va'e. Oĩ ita hepy va'e oiporu va'e. Opa e'ŷ va'e meme oiporu óga porãrã omopu'ã hagwã.

Oĩ ave pya'e ogweru va'e oiporu va'e. Pya'e opa jevy va'e oiporu meme óga omopu'ã-vy. Oĩ yvyra oiporu va'e. Oĩ ave hogwe piru va'e oiporu va'e. Oĩ ave kapi'i oiporu va'e. Pya'e opa jevy va'e meme oiporu óga hi'are e'ŷ va'e omopu'ã-vy.

13 Tatagwasu ou ramo ojekwaa arã óga omopu'ã va'e rembiapokwe. Ohapy va'erã para'e tapa ndohapýi va'erã para'e gwoga ojapo va'ekwe araka'e. Upéixa ave Hesu ou jevyha áry-py ojekwaa arã peteĩ teĩ-pe mba'eixagwa voi pa ojapo araka'e gwembiapokwe.

14 Tata ombogwe rire upé óga ohapy e'ŷ va'e ndoká-gwi opyta va'erã ijáry-pe. Upéixa ave entéro Hesu Cristo remimbota ojapo porã porã va'e. Nhandejáry ome'ẽ-ta íxupe hembiapokwe repy.

15 Ha ombogwe rire tata, ndaiporivéi-ma ramo ógakwe, okaipa-ma ramo hembiapokwe, ijáry mba'eve ndogwerekovéi-ma va'erã. Upéixa ave Hesu

Cristo remimbota ojapo ku'a ku'a va'e. Tata-rupi ohasa va'e-rami okanhymba va'erā íxugwi hembiapo repyrāgwe. Íxupe mate oresende va'erā.

¹⁶ Pene mandu'a kena pende reko-rehe. Peē, Hesu reroviaha kwéry reko-rehe pene mandu'a kena. Oiko-ma pende py'apy-py Nhe'ẽ Marangatu tee va'e. Upéixa-gwi he'i pende-rehe "Nhandejáry róga upe va'e" he'i. Imarangatu voi Nhandejáry róga. Upéixa-gwi Nhandejáry róga pende rekoha-rehe tapenhangareko porā katu pendéjehe.

¹⁷ Nhandejáry ombohasa asy arā gwóga omongy'a va'e-pe, gwóga ohundi va'e-pe. Ha peē peiko-ma Nhandejáry róga-rami. Ha Nhandejáry róga ipotī marangatu va'e voi.*

Nhane arandu mbyky eterei ramogware

¹⁸⁻¹⁹ Ani teī erenhembotavy ndejéupe. Ani erenhembotuvixa rei teī. Oĩ ramo pene pa'ũ-my he'i va'e "Xe xe arandu voi, aikwaa porā opaixagwa", gwí-rami oiko va'e-ma onhemoarandu tee ra'anga rei oiko-vy. Teko rei reko-rupi anho hi'arandu. Upéixa-gwi omomba'egwasu rei oaranduha. Iporāve íxupe nopenái oaranduha-rehe oheka hagwā Nhandejáry remime'égwe arandu. Teko rei arandu mate ogwereko va'e-rehe "Nahi'arandu porāi" he'i Nhandejáry. Yma omoñ araka'e kwatia-rehe he'i-vy:

"Teko rei arandu ogwereko-gwima onhemombā'egwasu eterei mo'ã onhembotavy rei. Oarandu-rehe ojerovia eterei-gwi hi'arandu omokanhy arā íxugwi Nhandejáry."*

²⁰ He'i ave araka'e kwatia-rehe:

"Nhandejáry oikwaa inharandu va'e ipy'apyete pygwa. Omomba'egwasu rei oarandu, he'i hese."**

²¹⁻²³ Upéixa-gwi ani penhemombā'egwasu teī avave-rehe. Oiko-ma opamba'e nhane pytygwō hagwā. Ani teī penhemombā'egwasu mba'eve kente kwéry rembiapokwe-rehe. Nhandejáry onhangareko porā hagwā nhande-rehe ojapo araka'e opamba'e nhane pytygwōharā. Héry-py aiko-ma xe ave pene pytygwōharā voi ave niko xe. Apolo ave, Pedro ave oiko-ma ave pene pytygwōharā. Onhangareko porā meme pende-rehe Nhandejáry. Peikove va'erā para'e pemano va'erā para'e ha'e onhangareko porā ave pende-rehe. Pende reko renonderā-py ave onhangareko porā ave pende-rehe. Ha'e omoingo opaixagwa pende reko porārā-rehe. Ha Cristo pende rerekopogwy-py. Ha Nhandejáry ogwereko jevy Cristo-pe opogwy-py.

4

Nhandejáry rembigwái porā nosē mo'ãi inhe'ẽ-gwi

¹ Pene mandu'a ramo ore-rehe, peje ae katu kuri: "Ha'e Cristo rembigwái. Omombe'u va'ekwe nhande-vy Nhandejáry nhe'ẽ. Cristo rehewa nhe'ẽ Nhandejáry reminhongatukwe ojekwaa-ma nhande-vy. Upéa omombe'u-vy oiko tembigwái ramo" peje ae katu kuri ore-rehe. Cristo rembigwái voi ore.

² Ha tembigwái katu tekotevē oiko ojáry nhe'ẽ-py. Tembigwái porā ramo nosē mo'ãi inhe'ẽ-gwi. Oiko meme gwerekoha ojohu porā hagwā hembiapokwe-rehe. Ijáry anho mante ojohu kwaai hese.

³⁻⁴ Upéixa-gwi oĩ ramo kente "Ma'erā ojapo upéixa? Niporāi para'e" he'i va'e xe rembiapokwe-rehe, ndajepy'apy mo'ãi upe va'e-rehe. Peē, "Ma'erā Paulo ojapo upéixa? Hembiapo porā e'ŷ para'e" peje ramo, mburuvixa kente rembiapokwe-rehe omonhe'ẽ va'ety jepe aipo-rami oikwaase ramo xe-rehe, ndajepy'apy mo'ãiry. Kente kwéry ndaxe johu kwaai arā. Xe-ma, xe py'apy-py

* 3:17 1 Co 6.19; 2 Co 6.16 * 3:18-19 Jó 5.13 * 3:20 Sl 94.11

ahendu kwaa jepe, ndaikwaái joty arā xe py'a ete pygwa. Ndaikwaa teéiry xe rembiapo-rehe "Iporā tee" "Naiporāi para'e" ha'e hagwā hese. Nhandedjáry anho mante ojohu kwaa xe py'apy ete pygwa-rehe xe reko rehewarā. Hese anho mante xe mandu'a va'erā.

⁵ Upéixa ramo ani peporandu rei avave rembiapokwe-rehe pejohu hagwā hembiapo vaikwe. Nhandedjáry ogwejy jevy e'ŷ peve ani peporandu rei upe va'e-rehe. Ha'e mante ou-vy ombojekwaa va'erā nhande py'a ete-py oĩ va'e gwive, nhande py'a pota va'e gwive, nanhane mandu'avéi va'e gwive, pytū gwy-py nhande rembiapo nhanhomi va'ekwe gwive, nhande py'a-py onhemi oĩ va'e gwive ombojekwaa-ma va'erā Nhandedjáry. Upe áry-py enterovéa-pe omombe'u arā hekokwe-rehe hembiapokwe-rehe. Cristo reko-rupi oiko porā va'ekwe-pe he'i arā Nhandedjáry: "Ereiko porā xe renonde-py" he'i arā upe va'e-pe.

Eiko katu Nhandedjáry nhe'ẽ-rupi

⁶ Ahai kuri xéjehe, Apolo-rehe ave. Upéa ajapo, xe re'ýi kwéry, pene pytygwō hagwā. Tapene mandu'a katu ko xe nhe'ẽ-rehe anive hagwā pene mbo'eháry-rehe penhe'ẽ rei. Ha'ese nde-vy, Ani erehasa Nhandedjáry nhe'ẽ. Eiko meme katu inhe'ẽ-rupi. Upe ohai uka va'ekwe nhe'ẽ-rupi eiko katu. Inhe'ẽ-rupi peiko ramo napenhembotuvixavéiry avave-pe. Ani peje avave-rehe "Iporāve ko va'e xe-vy". Ani ave peje outro-rehe "Ndovaléi upe va'e". Ani pembojoavy teĩ pene nhe'ẽ íxupe. Naiporāi voi upéa pende rekoha. Pembojoja katu peteíxa pene nhe'ẽ.

⁷ Nhande kwéry jaiko Nhandedjáry renonde-py. Hemimoingokwe meme nhande. Ha peẽ, penhembotuvixa rei meme pene mba'e-rehe, pende rekoha-rehe. Ma'erā-gwi tipo? Niporāi voi upéixa. Nhandedjáry remime'ẽgwe meme perekó. Ma'erā-gwi penhembotuvixa rei hemime'ẽgwe-rehe? Anive teĩ upéixa peiko.

⁸ "Nhandedjáry nhe'ẽ mombe'uga-rehe nanhaikotevẽi-ma nhande" peje rei ojóupe. "Jaikwaapa-ma hesegwa jaiko porā hagwā" peje rei. "Nhandedjáry remime'ẽ heta heta voi jareko-ma" peje rei ave. "Nanhaikotevẽi-ma Paulo-rehe" peje rei-ma peẽ. "Nanhaikotevẽi-ma" peje rei-ma ave Apolo-rehe. "Nhandedjáry nhande Ruvixagwasu ndive nhande jaiko-ma mburuvinagwasu ramo" peje rei ave. Ma'erā-gwi tipo upéixa penhembotuvixa? Ore, pene mbo'eha jepe, ne'írā vyteri oroiko mburuvinagwasu ramo, ore ave oroiko-ma arā ra'e. Upéixa ramo ra'e ore orovy'a voi arā ra'e.

⁹ Pende rekoha niporāi rehewe penhembotuvixase mo'ã: "Cristo réry-py oroiko-gwi oroiko porāve enterovéa-gwi" peje rei jave pendéjehe, ore katu oroiko asy Cristo réry-py oroiko-gwi. Ore rereko asy meme Hesu rerviaha e'ŷ va'e kwéry. Nhandedjáry remimbota-rupi para'e ore mbohasa asy ha'e kwéry. Nhandedjáry ore moingo enterovéa rekogwypyve. Enterovéa oma'ẽ ma'ẽ ore-rehe. "Mbava'e nipo ojehu arā íxupe kwéry?" he'i-vy ohexase va'e oma'ẽ ma'ẽ ore-rehe. Kente kwéry oma'ẽ ore-rehe ore rexha hagwā. Yváy gwigwa Nhandedjáry rembigwái kwéry ave oma'ẽ ore-rehe. Heko vai eterei va'e ojuka hagwā hexaharā omboaty hikwái. Upéixa ave randai oroiko enterove ohexase mbava'e nipo ojehu arā ore-vy.

¹⁰ "Cristo-rehe orojerovia-gwi ore arandu porā" peje rei jave "Itavy voi" he'i meme ore-rehe. "Nahi'aranuvéi-gwi ogwerova gwekoha Cristo-rehe. Itavy voi" he'i ore-rehe. "Naimbaraetéi" he'i ave ore-rehe ore rereko asy-vy. Ha peẽ katu "Ore mombaraete porā Nhandedjáry opamba'e-rehe" peje rei pendéjehe.

¹¹ Ore ae yma ete gwive orohasa asy voi. Ore vare'a meme. Ore y'uhéi ave. Ituja-ma ave ore ao. Ore nupā nupā oroiko-vy. Orova rova va'e ore. Ore róga e'ý va'e voi ore.

¹² Ore mokane'õ ne'õ ore rembiapo ore rembi'urā-rehe. Onhe'ẽ rei rei ore-rehe ore joko-vy. "Tapenderovasa katu Nhandejáry" oro'e jepe ore joko va'e-pe. Ore mbohasa asy ramo jepe ore orokirirī oroiko-vy.*

¹³ Ore rogwaitī va'e onhe'ẽ vai vai rei ramo ore-vy, nhe'ẽ porā jepe oroiporu oronhomongeta hagwā hendive. Hesu reroviaha e'ý va'e ndaija'éi ore-rehe. Ore rereko mba'e rembyre ky'akwe ramo. Ore rereko mba'e yty ramo upe va'e kwéry. Ha peē katu pene mbotuvixase rei. Niporāi voi upe pende rekoha.

Túvy-rami Paulo onhemonhe'ẽ

¹⁴ Kóa ahai-ma peē-my peē xe ra'y kwéry ramigwa-gwi. Anhemonhe'ẽ-ta peē-my. Xe a'e voi pende-rehe. Upéixa-gwi napomotíséiry. Anhemonhe'ẽse peē-my peiko porāve hagwā.

¹⁵ Pehendu arā para'e heta eta Cristo rape rexahukaha va'e pene mbo'eha kwéry. Oime joti peē-my peteī anho pende ru ramigwa pene mbo'eha. Xe apyta peē-my pende ru-rami pene mbo'eha. Yma va'ekwe amombe'u-ma ramo peē-my Hesu Cristo rehewa nhe'ẽ pejerovia nipo Hesu-rehe ra'e. Upéixa-gwi apyta pende ru-rami peē-my. Ha pende ru-rami anhemonhe'ẽ-ta peē-my.

¹⁶ Tekoha porā-rupi, xe-rami, tapeiko.*

¹⁷ Pende rekoha porārā hagwā amondo kuri Timóteo oiko hagwā pene pa'ū-my. Ha'e opyta xe-vy xe ra'y vérami Nhandejáry Hesu Cristo reko-rupi oiko porā-gwi. Ahayhu voi íxupe. Ogwahē-ma ramo pene renda-py omombe'u va'erā peē-my xe rekoha-rehe mba'éixa pa aiko Hesu Cristo reko-rupi. No'ā he'i arā xe-rehe: "Anhetegwa voi omombe'u meme Paulo" he'i arā xe-rehe. "Opa-rupi oho-vy Paulo omombe'u meme Hesu Cristo rehewa nhe'ẽ" he'i arā xe-rehe.

¹⁸ Anive penhembotuvixa teī. "A-py ete ndou mo'āi Paulo" peje rei.

¹⁹ Aha'arō mixī aha hagwā pene renda-py. Hi'agwī-ma agwahē hagwā pende ha-py. Nhandejáry oipota ha'áry agwahē-ta upe-py. Ndaxe aréi-ta.

Ogwahē-ma a-py onhembotuvixa va'e rerakwā. Agwahē-ma ramo pende ha-py ahexa va'erā teko rei-rupi oiko para'e terā Nhandejáry omombaraete íxupe para'e.

²⁰ Oiko-ma ramo Nhandejáry nhande ruyixa ndaha'éiry va'erā nhande juru-rupi rei nhanhe'ẽ jaiko-vy. Nhandejáry ae nhane mombaraete va'erā gwekoha-rupi nhande ave jaiko hagwā.

²¹ Ndaxe rexaséi-ry para'e. Ma'erā tipo? Petī tipo xéhegwi? Peiporavo katu mba'éixa katu anhe'ẽ-ta pene ndive. Ndaperova mo'āi ramo pende rekoha anhemonhe'ẽ pohýi va'erā peē-my. Ha perova ramo pende rekoha agwahē va'erā pende ha-py xe reko kirirī rehewe apohayhu-vy. Peiporavo katu mba'éixa katu anhe'ẽ-ta. Perova katu pende rekoha.

5

Hembiapovai eterei kwimba'e ramogware (2 Co 2.5-11)

¹ Ahendu kuri pende rerakwā vai. "Teko vai-gwi onhomongy'a rei peteī Corinto pygwa" he'i. "Hesu reroviaha va'e jepe omenda ambue mbue joti

* ^{4:12} At 18.3 * ^{4:16} 1 Co 11.1; Fp 3.17

oiko-vy gwu rembirekokwe-rehe" he'i omombe'u-vy. Ivai eterei voi upéa. Nhandejáry-rehe ojerovia e'ŷ va'e kwéry jepe upéixa ndojapo mo'āi.*

² Ha peẽ katu, ma'erā-gwi penhembotuvixa ra'anga rei? Iporâve penhemboasy pende rapixa rekoha vai-rehe. Tapemboyke pene pa'ū-gwi upe hembiapo vai eterei va'e anive ojogweroaty hagwā Hesu reroviahä kwéry ndive, anive hagwā pemoirū íxupe.

³ Hesu Cristo réry-py ha'e peẽ-my "Pemosē katu upe va'e pene pa'ū-gwi. Hembiaapo vai eterei. Ndikatuvéi opyta Hesu rerovia va'e kwéry pa'ū-my" ha'e-ma hese ko'a-gwi.

⁴ Hesu réry-rupi pejogweroaty ramo upe-py, Hesu oiko pene ndive, ipu'akaha reheve oiko pene ndive. Xe ave amondo xe resa pejogweroaty ha-py peime ramo upe-py.

⁵ Pemosē katu imondo-vy upe hembiapo vai ete va'e pene pa'ū-gwi. "Satánás anhaygwasu nde rerekoseha-rami tandem rerekō" peje katu íxupe. "Ha'e nde rete ogweroasy va'erā para'e terā nde juka va'erā para'e ne rembiapo vai eterei-rehe" peje pemondo-vy. Hekove onheresende hagwā upe Hesu Cristo ou jevyha áry-py.

⁶⁻⁷ Ha peẽ katu naporāi voi penhembotuvixaseha. Mba'e tipo? Napene mandu'ái tipo nhande re'ýi kwéry he'i va'ekwe-rehe? "Miximi ramo jepe mbojape mbovuha, pya'e joto ojehe'apa hese." Upe mbojape mbovuha-rami oiko hembiapo vai va'e pene pa'ū-my. Upéixa ramo pene rembiapo vai ave va'erā. Tapenhemopotī katu. Tapemopotī katu pende rekoha. Upeixa ramo aretegwasu mbojape pyahu imbovuha e'ŷpyre-rami peiko arā. Ndaipóri arā nde py'a-py ne mongy'aharā. Pende rekoha porā reheve mate peiko va'erā. Hesu-rehe pejerovia-magwi pende rekoha pyahu-ma. Yma aretegwasu ypy páscoa-py ovexa ra'y omanoha-rami Hesu omano-ma okurusu-rehe. Nhane rekovia omano nhane rembiapo vaikwe omboyke hagwā nhandéhegwi.*

⁸ Upéixa ramo nhane rembiapo vaikwe e'ŷ reheve tekotevē nhane mandu'a hese. Nhande py'a porā reheve mante ja'u va'erā mbojape'i uva rykwere ndive nhane mandu'a hagwā Hesu-rehe. Upéixa-gwi ani pene mandu'a teĩ Hesu-rehe pende poxy reheve pende rapixa-rehe. Ani ave pende py'a vai teĩ ojóehe. Anhetegwa nhe'ẽ mate perekō ave. Tapende py'a potī rei katu peiko-vy.*

⁹ Kwatia-rehe ahai va'ekwe xe remimondo peẽ-my. Upe-py amombe'u peẽ-my ani hagwā pemoirū teko vai-rupi oiko va'e-pe.

¹⁰ Ndaha'éi Hesu rerovia e'ŷha va'e kwéry-rehe ahai va'ekwe. Hesu reroviaha va'ekwe-rehe ae ahai va'ekwe anive pemoirū íxupe. Hesu-rehe ndojeroviái va'e kwéry pa'ū-rupi oĩ opáixa rei oiko va'e. Oĩ teko vai-rupi oiko va'e. Oĩ ave imba'e reta reta ojéupe gwarā oipotave tave eterei va'e kwéry, oĩ ave oporomonda rei va'e, tupā ra'anga anga-rehe ojerovia va'e kwéry ave. Ndaha'éi upe va'e kwéry-rehe ha'e va'ekwe ani hagwā peiko indive. Hesu rerovia e'ŷha va'e pa'ū-gwi pesēse ramo tekotevē pesē ko yvy-gwi.

¹¹ Hesu reroviahä-rehe Hesu re'ýi-rehe ae ahai va'ekwe teko vai-rupi oiko ramo ani eremoirū íxupe. Oĩ ramo pene pa'ū-my hembiapo vai va'e, ani teĩ pemoirū íxupe. Oĩ para'e teko vai-rupi oiko va'e. Anive teĩ pemoirū íxupe. Oĩ para'e imba'e reta reta oipota eterei va'e. Oĩ para'e tupā ra'anga-pe omboete vyteri va'e. Oĩ para'e onhe'ẽ vai va'e gwapixa-pe ojoko va'e ave. Oĩ para'e oka'u va'e ave. Oĩ para'e omonda va'e ave. Anive teĩ pemoirū íxupe kwéry. Anive ave pekaru teĩ indive.*

* 5:1 Dt 22.30 * 5:6-7 Ex 12.19 * 5:8 Ex 13.7; Dt 16.3 * 5:11 2 Ts 3.6

12-13 Namonhe'ẽ mo'ãi Hesu reroviahā e'ŷ va'e-pe hembiapo vaikwe-rehe. Niporãi voi upéa jajapo ramo. Nhandejáry ae ojohu arã hese. Ha'e ae oikwaa "Ne rembiapo vai eterei" he'i hagwã nhande-vy. Iporã voi katu nhande yke-rehe oĩ va'e-pe nhamonhe'ẽ ramo. Hesu reroviahā va'e, nhane ndive ojogweroaty ramo omboete hagwã Nhandejáry-pe va'e-pe, iporã ja'e ramo "Niporãi voi upéa ne rembiapo vaikwe. Anive tei erejapo" ja'e nhamonhe'ẽ-vy. Kwatia-rehe Nhandejáry omoi uka va'ekwe he'i-vy: "Emosẽ katu pene pa'ũ-gwi hembiapo vai va'ekwe". Iporã jajapo upéa Nhandejáry nhe'ẽ.

6

Pene vy'are'ŷha-rehe ani pejohu uka Hesu reroviahā e'ŷ va'e-pe

1-2 Nhande kwéry Hesu reroviahā va'e. Upéa-rehe Hesu re'yi kwéry jaikoma. Ojoe'yi meme nhande. Tekotevē jajohayhupa rei jaiko-vy. Ha peẽ katu ndapejohayhúiry peiko-vy. Oĩ ramo pene pa'ũ mygwa ojoavy gwapixa ndive va'e peraha íxupe mburuvixa kente rembiapokwe-rehe oporandu va'ety-pe pemombe'u hagwã hembiapo vaikwe. Mburuvixa renda-py peraha íxupe. Niporãi voi upéa pejapo. Hesu reroviahā e'ŷ va'e-pe anive pemombe'u tei pene rembiapo vaikwe. Hesu reroviahā va'e-pe ae peporandu ojohu hagwã pende-rehe "Iporã para'e, ivai para'e" he'i hagwã pende johu-vy. Nhandejáry pegwa voi ko nhande. Jaikwaa uka va'erã Hesu rerovia e'ŷha va'e-pe hembiapo porã va'ekwe para'e tapa hembiapo vai va'ekwe para'e. Upéixa ramo ndahasýiry va'erã nhande re'yi Hesu reroviahā va'e-pe jaikwaa uka hagwã ojeavyha.

3 Ko yvy opa-ma ramo jaikwaa uka va'erã Nhandejáry rembigwái yváy pygwa-pe hembiapo porã para'e tapa hembiapo vai para'e. Tapene mandu'a porã kena upéa-rehe. Nhandejáry rembigwái-pe jepe jaikwaa uka va'erã. Upéixa ramo ndahasyive arã nhande re'yi Hesu reroviahā va'e-pe jaikwaa uka hagwã.

4 Oĩ ramo ojoavy gwapixa ndive va'e, ani peho pemombe'u pene pa'ũ-my oĩ e'ŷ va'e-pe nde rapixa-pe erehepy hagwã. Ani peho Hesu rerovia e'ŷha-pe.

5 Peti katu pemombe'u hagwã. Anive tei pejapo upéa. Oĩ ra'e pene pa'ũ mygwa inharandu porã va'e. Oikwaa porã hembiapokwe-rehe ohepy hagwã. Iporãve upéa-pe pemombe'u pene vy'are'ŷha. Ne vy'are'ŷ ramo nde rapixa-rehe emombe'u Hesu reroviahā va'e-pe.

6 Peẽ ae, peho Hesu rerovia e'ŷ ha-py oikwaa hagwã Hesu reroviahā va'e rembiapo vaikwe. Niporãi voi upéa.

7 Ndapeiko porãi, xe re'yi kwéry Hesu reroviahā kwéry. Peho jave pemombe'u hagwã mburuvixa kente rembiapokwe-rehe oporandu va'ety-pe nde rapixa Hesu reroviahā va'e rembiapokwe-rehe, peiko teko rei-rupi. Niporãi voi. Iporãve pekiriri peiko-vy. Ani ne mandu'ave tei hembiapo hagwe-rehe nde-rehe. Ani ave ne mandu'ave ne mba'e monda hagwe-rehe.

8 Ha'e-rami ave peẽ. Peẽ penhomonda peiko-vy. Ha Hesu re'yi-rehe pene rembiapo vai. Naiporãi voi pende rekoha.

9 Pehendu porã-ma para'e nhande rekora-rehe. Oiko-ma ramo Nhandejáry nhande ruvixa ramo, hembiapo vai va'ekwe kwéry ndoikói arã hendive. Aníke penhembotavy tei upéa-rehe. Teko vai-rupi oiko va'e ndoikói arã Nhandejáry ndive. Tupã ra'anga-pe omboete va'e ave, omenda menda rei rei va'e ave, onhemotí e'ŷ gwapixa-pe va'e ave,

10 omonda va'e ave, imba'e reta reta ojéupe gwarã oipota eterei va'e ave, oka'u va'e ave, onhe'ẽ vai vai gwapixa-rehe oiko-vy va'e ave, oporosakea va'e ave ndoikói arã Nhandejáry nhande ruvixa ndive.

11 Ha peẽ katu oĩ pene pa'ũ-my upeixagware. Nhandejáry omboyke-ma ae pendéhegwí pene rembiapo vaikwe Nhandejáry Hesu Cristo-rehe pejerovia-magwi. Pene mbopy'a potĩ-ma pene momarangatu-ma ave. He'i ave pende-rehe "Ipy'a potĩ-ma." Upéa ojapo Nhandejáry Hesu Cristo réry-rupi peikogwi. Pejerovia-ma Hesu Cristo-rehe. Upéixa-gwi ome'ẽ-ma peẽ-my Nhe'ẽ Marangatu tee va'e.

*Nhande rete Nhandejáry mba'e
(Rm 13.13-14; Ef 5.3)*

12 Nhande Hesu Cristo re'ýi tee va'e. Upéixa-gwi ndaipóri ikatu e'ý va'e nhande-vy. Oĩ ae heta mba'e nhane pytygwõ e'ý va'e. Ha upe nhane pytygwõ e'ý va'e pogwy-py xe, Paulo, ndaiko mo'ãi.*

13 Oĩ ave gwĩ oiko rei va'e he'i va'e: "Temb'i'u nhande rye pegwarã voi" he'i mo'ã. "Nhande rye oiko voi tembi'u pegwarã" he'i mo'ã ave. Tapene mandu'a joto opa-ma ramo ko yvy, tye, tembi'u ave opa va'erã. Ndaha'ei teko vai-rupi jaiko hagwã Nhandejáry nhane moingo araka'e. Nhe'ẽ Marangatu tee va'e oiko hagwã nhande py'apy ete-py nhane moingo araka'e.

14 Ha Hesu Cristo omano ete rire Nhandejáry omoingove jevy va'ekwe íxupe. Upéixa ave nhamano ete rire nhane moingove jevy va'erã Nhandejáry. Ipu'akaha-rupi nhane moingove jevy va'erã.

15 Ndapeikwaáiry tipo mba'eixagwa nhande rete? Hesu-rehe jajerovia-gwi nhande rete kwéry oiko-ma Hesu rete mboojaha ramo. Niporãi voi jaipe'a ramo Hesu rete rehewa oiko hagwã teko vai-rupi kunha ndive. Ani upéixa pejapo tei.

16 Pereko jave kunha ikwimba'ese va'e-pe, nde rete, hete ndive oiko ave peteĩ. Oĩ kwatia-rehe Nhandejáry nhe'ẽ:

"Mokõi oiko va'e peteĩ mate oiko va'erã. Ndoikovéi va'erã mokõi. Peteĩ va'e-rami ha'e oiko-ma."*

Ani upéixa-gwi pereko tei kunha ikwimba'ese va'e-pe.

17 Jaiko ramo Hesu Cristo reko-rupi, peteixa jaiko-ma indive. Nhande py'apy peteixa ipy'apy ndive. Nhe'ẽ Marangatu tee va'e oĩ nhande py'apy-py.

18 Ani tei peikove teko vai-rupi. Upéixa pejapo ramo pembiyai pende rete. Heta nhane rembiapo vai ndaha'ei nhande rete-rehe. Teko vai-rupi jaiko ramo ae nhambayai nhande rete. Ivai eterei upéa.

19-20 Nhande rete oiko-ma Nhandejáry róga ramo. Ha'e ome'ẽ va'ekwe nhande-vy Nhe'ẽ Marangatu tee va'e. Oiko-ma nhande py'apy-py. Upe-ma ramo nhande rete oiko-ma Nhandejáry róga ramo. Nhandéjehe anho ndoikovéi-ma nhande rete. Hesu rete ramo-ma oiko. Ha'e omano nhane mopotĩ hagwã nhane rembiapo vai-gwi. Tupã Nhandejáry oiko-ma nhande ruvixa. Ha'e omboyke-ma nhandéhegwí nhane rembiapo vaikwe teko porã-rupi jaiko hagwã. Upéa-gwi tapembotuvixa kena Nhandejáry-pe. Tapeiko teko porã-rupi nde reko rexva'e omboete hagwã Nhandejáry-pe.*

7

Iporã arã tipo nhamenda ramo?

1 Pene nhe'ẽ pemondo va'ekwe kwatia-rehe xe-vy. Upe kwatia nhe'ẽ-rehe peporandu va'ekwe xe-vy "Iporã arã tipo nhamenda ramo?" peporandu xe-vy. Áy katu amombe'u-ta upéa-rehe peẽ-my.

Kwimba'e omenda e'ý ramo oiko porã.

* 6:12 1 Co 10.23 * 6:16 Gn 2.24 * 6:19-20 1 Co 3.16; 2 Co 6.16

² Oĩ jepe omenda e'ŷ va'e teko vai-rupi rei oiko joty. Ani upéixa rei rei ereiko teĩ. Emenda katu. Peẽ, kwimba'e pene rembireko tee ae perekō katu. Ha peẽ kunha kwéry pene ména tee ae perekō.

³⁻⁴ Kwimba'e, ne rembireko pejogwerekose ramo pejogwereko-ta hendive. Kunha, ne ména pejogwerekose ramo pejogwereko-ta hendive. Nde rete ndaha'ei ne mba'e ete. Tembireko ndaha'ei gwete járy, iména mba'e. Upéixa ave iména ndaha'ei ave gwete járy, hembireko mba'e tee.

⁵ Nderejogwerekoséi ramo ani erejejoko teĩ íxugwi. Ani erejoko joko ojóupe teĩ. Ere ramo ojóupe "Iporâve ndajajogwerekóiry nhaha'arõ nhambojeupi upi hagwã nhane nhe'ẽ Nhandejáry-pe." Aipo ere ramo ndapejogwerekóí hagwã, ani nde are teĩ penhoha'arõ-vy. Are eterei ramo anhaygwasu Satanás ne momba'e avy va'erã nde reity-vy. Iporâve pejogwereko tee jevy ne ména tee ndive jevy, ne rembireko tee ndive jevy.

⁶ Ko nhe'ẽ xe remimombe'u ndaha'ei amanda hagwã pende-rehe. Iporâve peiko ko'ã-rami ha'e-ta ae peẽ-my.

⁷ Amenda e'ŷ va'e voi ko xe. Avave nomendái ramo, "Iporã" ha'e arã ra'e hese. Nhandejáry oipytygwõ gwĩ omenda e'ŷ va'e-pe ani hagwã ojejavý. Gwĩ ambue kwéry ndikatúi oiko omenda e'ŷ rehevé. Ojejavýse. Ani hagwã ojejavý ha'e kwéry tomenda. Nhandejáry remimbota-rupi omenda. Nhandejáry nhe'ẽ-py oĩ omenda va'e, oĩ ave omenda e'ŷ va'e. Ome'ẽ peteĩ teĩ-pe hekoharã. Ombopu'aka ave íxupe pono ojejavý.

⁸ Iporâve neremendái ha'e-se omenda e'ŷ va'e-pe. Xe-rami erepyta. Ha tembirekokwe-pe katu ha'e-se Iporâve neremenda jevýi.

⁹ Eremendase eterei ramo, emenda katu. Iporâve eremenda. Naiporãi voi nde reko vai-rupi rei ereiko.

¹⁰⁻¹¹ Ha omenda va'e-pe ha'e-ta: Ani teĩ erepoi ojóhugwi. Kwimba'e katu, ani teĩ erepoi ne rembireko-gwi. Ani ave eremoĩ kwatia-rehe erepoi ete hagwã ne rembireko-gwi. Ha kunha katu, ani ereheja teĩ ne ména. Íxupe ereheja ramo jepe, ani teĩ eremenda ambue-rehe. Eiko omenda e'ŷ va'e-rami. Iporâve ereiko porã jevy ne menakwe ndive. Nhandejáry réry-py kóá amanda peẽ-my. Ndaha'ei xéhegwi rei nhe'ẽ. Namombe'u reíry peẽ-my. Héry-py ha'e upéixa.*

¹² Áy katu ha'e-ta xe ae xe arandu-gwi. Nahániry. Ndaha'ei xe ha'e rei va'e. Nhandejáry manda-rupi ae amombe'u kóá peẽ-my, peẽ Hesu reroviaha va'e kwéry-pe. Iporã voi pejapo ko va'e. Ne rembireko Hesu reroviaha e'ŷ jepe, ani ereheja teĩ íxupe. Oikose vyteri ramo ne ndive, ani erepoi íxugwi.

¹³ Nde, ne ména Hesu reroviaha e'ŷ jepe, ani ereheja rei teĩ íxupe. Oikose ramo ne ndive, ani joty erepoi íxugwi.

¹⁴ Ereiko javé ne ména ndive, Nhandejáry ohovasa va'erã íxupe. Hesu-rehe ojerovia e'ŷ va'e jepe Nhandejáry ohovasa joty arã íxupe. Hese ojerovia va'e ndive oiko-gwi gwembireko tee ndive oiko-gwi ohovasa arã ave íxupe.

Upéixa ave kwimba'e kwéry. Nderepoíry ramo ne rembireko-gwi Nhandejáry ohovasa arã íxupe. Hese ojerovia e'ŷ va'e-pe jepe Nhandejáry ohovasa joty arã íxupe. Hesu reroviaha ndive oiko-gwi, oména tee ndive oiko-gwi, ohovasa ave íxupe. Ani hagwã nde ra'y kwéry, nde rajy kwéry, ne memby kwéry oiko Hesu reroviaha e'ŷ ra'y-rami ohovasa arã íxupe. Hesu reroviaha ndive oiko va'e-pe Nhandejáry ohovasa ave arã íxupe.

¹⁵ Hesu reroviaha e'ŷ va'e opoise ramo jepe ndéhegwi eheja katu toho. Ndéhegwi opoi-ta ramo jepe ne ména, ne rembireko tekoha porã-py jepe

* ^{7:10-11} Mt 5.31-32; 19.1-9; Mc 10.2-12; Lc 16.18

ereiko. Ani erenhembyasy eterei. Nhandejáry katu nhande poravo nhande py'agwapy hagwā ojóehe.

¹⁶ Nderekwaái, kunha, mba'exa-rami ne ména erembojerovia hagwā Hesu-rehe onheresende hagwā. Nderekwaái ave, kwimba'e, mba'exa-rami ne rembireko erembojerovia hagwā ave Hesu-rehe onheresende hagwā.

¹⁷ Nhandejáry-pe omboete va'erā-pe meme anhemonhe'ẽ peẽ-my. Nhandejáry remimbota-rupi ejapo katu ne rembiapo. Ha'e nhane mombaraete nhamba'apo hagwā. Hembiapo ambue mbue peteĩ teĩ pejapose va'e pejapo katu. Nhandejáry-rehe erejerovia-ma ramo eremba'apo joty va'ekwe. Ani erepoi ne rembiapo porākwe-gwi. Upe eremba'apo hagwe-rami eremba'apo joty. Upéixa ha'e xe Hesu reroviahā kwéry-pe peteĩ teĩ tetā-rupi oĩ va'e-pe.

¹⁸ Nde judeu ra'y-gwi ne pirekytī rire ne renói ramo Nhandejáry, ani ereipe'ase ne kytī hagwe. Nde rete ereheja judeu rete-rami. Ha judeu e'ŷ-rami nane pirekytīry vyteri ramo ne renói ramo Nhandejáry, ani ereheja ne pirekytī uka teĩ.

¹⁹ Ipirekytī uka va'e, ipirekytī uka e'ŷ va'e peteĩxa oiko Nhandejáry renonde-py. Ndaha'ei nhane pirekytī-rehe Nhandejáry opena. Hemimbota-rupi jaiko mate oipota.

²⁰ Ne renói hagwe-rami epyta katu. Eremba'apo joty ereiko-vy va'ekwe erejerovia-ma ramo Hesu-rehe. Upe eremba'apo hagwe-rami emba'apo katu.

²¹ Nde, ne rembiapo repy e'ŷ-rehe nde jokwaiha pogwy-py ereiko va'e, erejerovia ramo Hesu Cristo-rehe ereiko joty nde jokwaiha pogwy-py. Ani erejapura eterei erepoi hagwā íxugwi. Ome'ẽ ramo erejei nde rerekoha-gwi eheja porā íxupe nde rerekohare-pe.

²² Nde jokwaiha pogwy-py ereiko vyteri va'e ojejokwái e'ŷ va'e-rami ereikoma nde py'apy ete-py. Nde jokwái teeha Nhandejáry voi. Ha nde ndejehénte eremba'apo va'e, ereiko jave ne renói ramo Nhandejáry, erepyta va'erā Cristo rembigwái ramo.

²³ Nhande repy-vy Cristo omano va'ekwe. Upéixa-gwi anive erejerovia teĩ teko rei-rehe. Anive erembopu'aka teĩ ndéjehe.

²⁴ Ne renói ramo eremba'apo hagwe-rami ereiko joty Cristo rekoha-rupi, xe re'ŷi kwéry, Hesu reroviahā va'e kwéry. Nhandejáry ne pytygwō va'erā ereiko hagwā upéixa.

Omenda e'ŷ va'e-pe, tembirekokwe va'e-pe ave hekoharā omombe'u Paulo

²⁵ Ha kwatia-rehe peporandu va'ekwe xe-vy "Mbava'e tipo oro'e-ta kunhataĩ omenda e'ŷ va'e kwéry-pe oromanda-vy?" peporandu-ma xe-vy. Nhandejáry naxe mombe'úi vyteri upéa-rehe. Ha'e xe porahuvereko meme xe arandurā ome'ẽ-vy. Upéixa-gwi iporā peiko ramo ko xe nhe'ẽ-rupi.

²⁶ Áy katu nhande, Hesu reroviahā va'e, jahasa asy asy jaiko-vy. Upéa-gwi ha'e-ta xe, iporāve neremendái ramo. Ereppta nde rekoha áygwa-rupi.

²⁷ Oĩ ramo ne rembireko ani erepoi teĩ íxugwi. Neremendái vyteri ramo ani ereheka ne rembirekorā.

²⁸ Eremenda ramo jepe, iporā. Upéixa ramo nderejejavýiry. Kunhataĩ omenda ramo jepe iporā ave. Upéixa ramo ndojejavýiry.

Omenda va'e ojapura eterei gwemikotevē-rehe. Ko'a pygwa-rehe imandu'a ndu'a. Ha xe-vy iporāve erejapura e'ŷ reheve ereiko ramo.

²⁹⁻³¹ Xe re'ŷi kwéry, niporāi nhane mandu'a eterei ramo ko yvy arigwa-rehe. Hi'agwī para'e Hesu ou jevy hagwā áry. Ko áygwa ohasa-tama oho-vy. Upéixa-gwi iporāve peẽ pemenda va'e kwéry tapeiko omenda e'ŷ va'e reko-rami. Peẽ pejahe'o va'e kwéry tapeiko ov'y'a va'e reko-rami. Peẽ pevy'a

va'e kwéry, tapeiko imytu'e'ŷ va'e reko-rami. Peẽ pene mba'erã pejogwa va'e ojogwa e'ŷ va'e reko-rami peẽ tapeiko. Peẽ pene mba'e reta reta va'e mba'eve ndogwerekói va'e-rami joty tapeiko.

³² Xe-vy iporãve ndojapurái va'e-rami jaiko hagwã nanhane mandu'ái eterei ko yvy arigwa-rehe rei, jajapurave'ŷ hagwã.

Omenda e'ŷ va'e imandu'a ndu'a Nhandejáry-rehe hemimbota-rupi oiko hagwã.

³³ Kwidiba'e omenda va'e ae imandu'a ndu'a ko'âygwa-rehe, ombovy'ase gwembireko-pe.

³⁴ Upéa-gwi mokõi va'e remimbota-rehe imandu'a meme. Nhandejáry nhe'ẽ ohenduse jave gwembireko nhe'ẽ ohenduse ave.

Kunha ave, kunhatai, tembirekokwe ave, naiménairy-gwi imandu'a ndu'a Nhandejáry anho-rehe íxupe gwarã mate oiko hagwã. Kunha omenda va'e ae imandu'a ndu'a mokõi va'e-rehe. Nhandejáry-rehe imandu'a jave, imandu'a ave oména-pe ombovy'a hagwã-rehe.

³⁵ Upéa ha'e-ta peẽ-my pene pytygwõ hagwã Nhandejáry reko tee-rupi peiko hagwã. Nda'ese mo'âiry nde-vy, Ani eremenda tei. Nda'e mo'âi upéixa peẽ-my. Eiko katu Nhandejáry remimbota-rupi. Inhe'ẽ rendu-vy eregwata. Tapene mandu'a ndu'a meme katu hese, upéa ha'ese peẽ-my.

³⁶ Oi ramo pene pa'û-my túvy tajýry omenda e'ŷ va'e, ha'e-ta ko nhe'ẽ peẽ-my: Ere para'e nde rajy-rehe "Namomenda mo'âi xe rajy. Omenda e'ŷ-rehe opyta arã imandu'a meme hagwã Nhandejáry-rehe". Ha ãy katu nderevy'avéi para'e ne nhe'ëgwe-rehe. "Kunhatai rei-tama. Tekotevã amomenda xe rajy-pe." "Mba'e tipo ajapo-ta?" ere tipo ra'e. "Amomenda-ta para'e, namomenda mo'âi para'e" ere tipo ra'e. Upéixa erenhemoneta ramo nde py'apy-py, ani erejapurave upéa-rehe. Erejapo nde-vy iporãve va'e. Emomenda katu nde rajy. Upéa ndaha'ei hembiapo vai.

³⁷ Erejapo nde-vy iporãve va'e. Ereikwaa nde py'apy ete nhe'ẽ. Nde-vy iporãve nomendái ramo nde rajy, natekotevã omenda ramo, ejapo katu upéixa. Neremomenda mo'âi íxupe. Erejapo porã. Opyta-ta kunhatai omenda e'ŷ va'e.

³⁸ Upe gwajýry omomenda va'e hembiapo porã. Ha upéa gwajýry nomendái va'e hembiapo porãve.

³⁹ ãy katu anhemonhe'ẽ-ta kunha omenda va'e-pe. Oikove vyteri ramo ne ména epyta indive. Ani erepoi tei íxugwi. Eiko porã rei katu. Ereheja ramo íxupe níporã voi. Omano rire jepe ne menakwe ipogwy-py ndereikovéi va'erã. Eremenda jevy arã. Hesu reroviaha va'e-rehe mate iporã eremenda.

⁴⁰ Ha neremendavéi ramo iporã ave. Xe-vy iporãve nomendavéiry. Ovy'ave arã para'e nomenda jevyí va'e omenda jevy va'e-gwi.

Pejeapysaka porã ko xe nhe'ẽ-rehe. Nhe'ẽ Marangatu tee va'e xe py'a mohynyhẽ-ma xe moarandu hagwã. Upéa-gwi pehendu porã katu kóa xe nhe'ẽ.

8

Tupã ra'anga rovagwy-py gware so'o rehewa nhe'ẽ

¹ "Iporã para'e naiporã para'e ja'u ramo tupã ra'anga rovagwy-py gware so'o?" Upéixa peporandu va'ekwe xe-vy. ãy upéa-rehe amombe'u-ta peẽ-my.

Pejohayhu porã rei katu. Pene mandu'a katu pejohayhu hagwã-rehe penhopytygwõ hagwã rei-rehe ave. Ani erejapo tei penhopytygwõ e'ŷ va'e. "Nhane arandu-ma. Anhetegwa jaikwaa-ma tupã-rehe" peje pendejéupe. Níporãi upéixa penhemomba'egwasu ani hagwã penhopytygwõ peiko-vy.

"Nhane arandu-ma" ja'e ramo nhandéjeho nhanhemomba'egwasu uka rei. Nanhaipytygwō mo'āi avave-pe. Upéixa naiporāiry. Ha jajohayhu rei ramo ae nhanhopytygwō porā va'erā.

² Oĩ nipo ra'e pene pa'ū-my onhembotuvixase rei va'e mo'ā. "Xe aranduve ko xe" he'i mo'ā ójehe. "Napopytygwō mo'āiry xe" he'i rei ójehe. Hi'aranduse mo'ā va'e. Ne'írā oikwaa porā. Ja'e ramo nhandéjeho "Xe aikwaapa" nhane aranduseve mo'ā nhandejéupe. Ndajaikwaa porāi vyteri.

³ Tupā Nhandejáry-pe jahayhu tee ramo, ha'e nhande kwaa porā voi. He'ýi tee ramo jaiko.

⁴ Āy katu amombe'u-ta peẽ-my tupā ra'anga rovagwy-py gware-rehe. Jaikwaa-ma tupā ra'anga ndaha'éi Tupā tee. Anhetegwa e'ý nipo ra'e. Oiko e'ý va'e voi. Tupā tee peteī anho Nhandejáry mate. Upéa jaikwaa-ma.

⁵ Oĩ tupā kwéry áry-rehe oiko va'e he'i mo'ā ave. Ijapu rei voi upéa-rehe. Ndoikwaái mba'eve tupā tee-rehe. Upéixa-gwi omombe'u rei rei tupā-rehe.

⁶ Nhandejáry ae peteī anho mate Tupā. Nhande Ru tee va'e upe va'e. Ha'e ohekokwaa va'e-rupi ae oiko entéro mba'e. Íxupe gwarā nhande ave jaiko. Ha'e ojéupe gwarā voi opamba'e omoingo va'ekwe. Peteī anho mate Nhandejáry Hesu Cristo. Ha'e omoingo va'ekwe opamba'e. Nhane moingo ave ha'e.

⁷ Oĩ ave Hesu-rehe gwī ojerovia mixī mixī va'e ave. Tupā kwéry oiko e'ý va'e-rehe ojerovia araka'e. Ha ne'írā oikwaa porā Tupā Nhandejáry peteī anho mate oikoha. Tupā ra'anga rovagwy-py gware so'o ho'u meme araka'e íxupe omboete-vy. Ha ãy katu, ho'u-ma ramo, imandu'a va'erā vyteri tupā ra'anga ogwerovia hagwe-rehe. Imboete ha-py vérami ho'u joty arā. Upéa-rehe ojejavý rei arā nahi'arandúi-gwi. Nhandejáry rehewa ndoikwaa porāiry. Ipy'a porāse mo'ā omongy'aharā rei ho'u. "Peteī anho mate Tupā Nhandejáry" nde'ikwaái vyteri hese.

⁸ Peteī anho katu Tupā Nhandejáry. Ndaha'éi nhane rembi'u ja'u va'e-rehe ja'u e'ý va'e-rehe jaiko porā hendive.

⁹ Upéa jaikwaa-ma. Oĩ ave nipo ra'e upéa oikwaa e'ý va'e pene pa'ū-my. Ani pende rapixa-pe pembojejavy tei. Ha'e ne'írā ogwerovia porā. Ha'e he'i ramo "Ndikatúi ha'u tupā ra'anga rovagwy-py oĩ va'ekwe" he'i ramo, pemoirū katu íxupe.

¹⁰⁻¹¹ "Xe, aikwaa-ma, ndaipóri tupā ambue. Tupā ra'anga oiko e'ý va'e voi aikwaa-ma xe" peje. Ha upéa peje jave peho tupā ra'anga omboete va'e renda-py, pekaru rei upe-py. "Ndaha'éi tupā" peje jave pekaru henonde-py. Ha Hesu-rehe ne'írā oikwaa porā va'e pende rexama ramo no'ā-rami he'i arā opy'apy-py: "Iporā nipo ra'e nhamboete tupā ra'anga-pe ave" he'i arā avei. "Upe Hesu-rehe ojerovia tee va'e okaru ko'a-py tupā ra'anga nipo omboete ra'e. Xe ave amboete-ta íxupe" he'i rei arā ra'e. Ha upéa-rehe pembojejavy arā pende rapixa-pe. Upe va'e ndoikwaa porāi vyteri tupā rehewa nhe'ē. Upéa-gwi ndikatúi ho'u tupā ra'anga rovagwy-py omoī va'ekwe. Ha pende rexama-gwi ho'u ave va'erā ojejavý-vy. Upéixa-gwi pembojejavy arā íxupe. Hesu omano va'ekwe ipy'a omopotí hagwā. Ha ãy katu pembojejavy jevy íxupe ojepy'a mongy'a jevy-vy. Naiporāi voi upéa.

¹² Upéixa pende rekoha-rupi pembojejavy ramo pende rapixa kwéry, Cristo-rehe ndojeroviapa gwasúiry va'e, peẽ ave pejejavy. Upéa-rehe pene rembiapo vai voi Hesu-pe.

¹³ Xe katu upéixa naxe rembiapo vaiséiry xe rapixa-rehe. No'ā-rami he'i ramo tupā ra'anga rovagwy-py omoī ramogware-rehe "Ja'u e'ý va'e kóa. Nhanhemongy'a arā ja'u ramo." Aipo he'i ramo xe-vy xe rapixa, xe ave nda'u

mo'āi ani hagwā ambojejavy rei íxupe. Aipytygwōse íxupe. Ahayhu rei íxupe. Upéixa-gwi nda'u mo'āi ho'u e'ŷ va'e.*

9

Hesu remimondo rekoha rehewa nhe'ē

¹ Xe ko Nhandejáry Hesu remimondo va'e voi. Upéa-gwi avave yvypóry nomombe'úiry xe rekora xe-vy. Hesu remimondo voi ko xe. Ahexa-ma va'ekwe íxupe. Ahexa rire amombe'u-ma peẽ-my hesegwa nhe'ē. Upéixa-gwi voi pejerovia-ma Hesu Cristo-rehe. Upéa-gwi peikwaa-ma voi xe-rehe xe ko Hesu remimondo va'e voi.

² Oĩ para'e xe-rehe he'i rei va'e "Ndaha'ei Hesu remimondo va'e Paulo". Oĩ ramo upéixa he'i rei va'e, ndaha'ei nipo pende Corinto pygwa kwéry ra'e. Peẽ niko ndaikatúi peje upéixa. Peikwaa porã-ma xe rekoha. Hesu remimondo va'e voi ko xe. Oĩ-ma heta he'i pende-rehe "Corinto pygwa kwéry ojerovia-ma nipo Hesu Cristo-rehe ra'e. Paulo nhe'ē ohendu-gwi nipo ra'e oiko-ma Hesu rape-rupi. Hesu remimondo va'e nipo ra'e Paulo" pende rexá va'ekwe he'i xe-rehe.

³ Ha xe-rehe onhe'ē rei va'e-pe ha'e-se voi xe "Hesu Cristo remimondo va'e voi ko xe" ha'e-se íxupe kwéry.

⁴ Upéa-gwi "Iporã voi xe remimbo'e kwéry ome'ē xe-vy xe remikotevã akaru hagwā hay'u ave hagwā. Iporã voi ome'ē xe-vy xe remi'urã xe remimbo'e repy rekoria" ha'e-se íxupe kwéry.

⁵ Ha'e-se ave "Kwimba'e ambue, Hesu remimondo va'e, ogweraha meme gwembireko ondice, Hesu rervoviaha va'e hembireko. Hesu ryvy kwéry ogweraha meme ave gwembireko. Pedro ave ogweraha gwembireko hendive. Ovale ave xe ajapo ha'e ramigwa" ha'e-se ave.

⁶ Hesu remimondo ambue kwéry opoi-ma gwembiapokwe-gwi ombo'e mbo'e hagwā Hesu rehewa nhe'ē. Aipo ramo, ma'erã-gwi peje ore-rehe "Iporãve omba'apo Barnabé, Paulo ave opo-rupi." Naiporã voi upéa pene nhe'ē. Ore ave Hesu remimondo va'e.

⁷ Pene mandu'a katu soldado kwéry-rehe. Ndojogwái gwemi'urã, ndojogwái ave oaorã. Hepyrã-rehe oiko soldado ramo. Pene mandu'a ave onhoty va'e-rehe. Ndojogwái gwemi'urã. Okokwe-gwi ho'u hi'akwe. Gwembiapokwe-rehe ae ha'e okaru. Pene mandu'a ave hymba va'e omon-gakwaa va'ekwe-rehe. Gwemimbokakwaa repy okamby'u porã upe va'e. Ha'e ramigwa ave ore. Iporã ave orohekombo'e ramo ore remikotevã-rehe. Ore rembiapo repy-vy oroiko va'erã upéixa.

⁸ Ko xe nhe'ē ndaha'ei xejéhegwi reíte. Ymagware myamyrí Moisés ave omombe'u ave araka'e gwembiapo repy-rehe okaru va'e rekoha rehewa nhe'ē ave.

⁹ Yma araka'e Moisés ohai Nhandejáry nhe'ē kwaitia-rehe. He'i ohai-vy: "Ereiporu ramo ne rymba erejykýi ramo nde trigo ra'ŷi, ani erejuru jokwa íxupe. Eheja katu to'u omba'apo javé."*

Nhande rehewa nhe'ē voi upe va'e. Ndaha'ei hymba anho-rehe opena araka'e Nhandejáry ohai uka hagwā onhe'ē.

¹⁰ Nhande-rehe ave ha'e opena araka'e ohai uka-vy. Nhane rembiapo-rehe jakaru hagwā omombe'u upéa araka'e Nhandejáry. Onhemity va'e omba'apo kokwe-py gwemitygwe ha'arõ-vy. "Anhemity-ta ha'u hagwā xe remitygwe" he'i ojéupe onhemity-vy. Onhembiso va'e he'i ave omba'apo-vy "Ajoso-ta xe remi'urã" he'i ojéupe onhembiso javé. Enterove omba'apo hepyrã ra'aro-vy.

* **8:13** Rm 14.13-23 * **9:9** Dt 25.4

¹¹ Ore ave, orombo'e mbo'e oroiko-vy peikwaa hagwā Nhandejáry nhe'ẽ. Inhe'ẽ pehendu-gwi peiko porā-ma hendive. Pende rovasa-ma Nhandejáry ore remimbo'e-gwi. Iporā voi upéa. Ore remimbo'e rekoviārā iporā ave peme'ẽ ore-vy ore remikotevē. Iporā voi peje ramo pendejéupe “Paulo Barnabé ave omombe'u va'ekwe Nhandejáry nhe'ẽ xe-vy. Upéixa-gwi ame'ẽta íxupe hemikotevē”.*

¹² Ambue kwéry-pe pehexakwaa peme'ẽ hagwā íxupe imba'erā hemikotevē. Iporā upéa. Ha ore tipo? Íxugwi oromombe'uve peẽ-my Nhandejáry nhe'ẽ. Hetave ore remimombe'u pehendu-ma. Iporāve ore-vy ore rexakwaa ave peme'ẽ hagwā ore remikotevē. Upe jave jepe ore orojerure e'ŷ-vy oroiko pende ha-py orohekombo'e-vy. Upéixa oroiko ani hagwā avave onhe'ẽ rei ore-rehe. Orohasa asy voi upe-py orombo'e oroiko-vy ramo. Ore rembiapo repy-rehe orojogwa va'ekwe ore remikotevē. “Xe mba'erā aipota ereme'ẽ xe-vy gwarā” nda'e mo'ãi avave-pe. Upéa-gwi ndaiatúi avave he'i xe-rehe “Nahenduséi Paulo nhe'ẽ. Omba'erā-rehe mate ombo'e Nhandejáry nhe'ẽ Paulo” ndikatúi ave xe-rehe.

¹³ Pene mandu'a katu Nhandejáry róga kakwaa-py omba'apo va'e-rehe. Ome'ẽ meme íxupe kwéry hemi'urā hembiapo repy-rehe. Nhandejáry-pe hymba ohapy va'e ndohapypáiry. Oheja gwemi'urā.”*

¹⁴ Upéixa ave Nhandejáry he'i va'ekwe

“Hesu Cristo rehewa nhe'ẽ porā omombe'u mbe'u va'e-pe pembohekovia porā katu hemikotevē peme'ẽ-vy”.*

¹⁵ Upéixa ramo xe remimombe'ukwe-rehe jepe pereve heta-ma xe-vy. Xe ae katu ndaiotái xe remimombe'u repykwe. Ndaha'ei hepy-rehe amombe'u Nhandejáry nhe'ẽ. Ndahaíry ave ko kwatia peme'ẽ hagwā xe-vy xe mba'erā. Xe remimombe'u repyrā-rehe napena mo'ãi pono avave he'i xe-rehe “Omba'erā oipota eterei-gwi nipo Paulo omombe'u ra'e Nhandejáry nhe'ẽ ore-vy”. Xe-vy iporāve joty amano upéa-gwi.

¹⁶ Nhandejáry katu xe mondo va'ekwe. He'i xe-vy “Tereho Hesu Cristo rehewa nhe'ẽ porā eremombe'u hagwā. Emoherakwā hesegwa nhe'ẽ” he'i va'ekwe xe-vy. Hemimondo-rupi aiko ramo, Hesu Cristo rehewa amombe'u. Ndikatúiry anhemomba'egwasu amombe'u va'e-rehe. Amombe'u mbe'u inhe'ẽ imondo-vy. Ha namombe'úiry ramo ra'e amosarambi-vy inhe'ẽ xe vy'are'ŷ eterei arā ra'e.

¹⁷ Xe remimombe'use amombe'u-gwi avy'a. Xe remimombe'u repy rekoviārōha oiko xe mbovy'aha. Ha xe mbovy'a rei hagwā-rehe namombe'úi ramo jepe hesegwa nhe'ẽ amombe'u joty va'erā. Ndaha'ei xejéhegwi rei amombe'u. Nhandejáry ae katu he'i va'ekwe xe-vy “Emombe'u katu Hesu Cristo rehewa nhe'ẽ”. Upéa-gwi apombo'e. Apombo'e va'e-rehe xe avy'a.

¹⁸ Xe remimombe'u repy ndaiotáiry. “Eme'ẽ xe-vy xe remimombe'u repy” nda'e mo'ãi avave-pe. Amombe'u jave Nhandejáry nhe'ẽ avy'a eterei. Upéa-rehe ha'e xejéupe “Nhandejáry xe mbovy'a-ma. Inhe'ẽ amombe'u-gwi xe mbovy'a-ma. Xe remimombe'u repykwe ombohekovia-ma xe-vy Nhandejáry.”

¹⁹ Xe ko ajejokwái e'ŷ va'e voi. Xe-vy ae katu nomombe'úiry voi avave ko vyv pygwa mba'éixa po amombe'u va'erā Nhandejáry nhe'ẽ. Inharandu-rupi amombe'u inhe'ẽ. Ndaipóri jepe xe jokwaiha anheme'ẽ-ma joty xe enterovéa rembigwairā ramo hetave ojerovia hagwā Hesu Cristo-rehe.

* ^{9:11} Rm 15.27 * ^{9:13} Dt 18.1 * ^{9:14} Mt 10.10; Lc 10.7; 1 Tm 5.17-18

20 Upéixa ramo aiko ymagware myamyrī Moisés remimombe'ukwe-rupi ha Hesu Cristo remimombe'ukwe-rupi ave.

Aime jave judeu kwéry apyte-py anhemoingo ha'e kwéry-rami ave. Ndaikói jepe myamyrī Moisés remimombe'ukwe-rupi, hemimombe'ukwe-rupi oiko va'e apyte-py aime jave heko-ramima aiko, ha'e kwéry ohenduse hagwā Hesu Cristo rehewa nhe'ẽ ojerovia hagwā hese.

21 Aime jave judeu e'ỹ apyte-py anhemoī ha'e kwéry-rami ave xe. Ndaikói myamyrī Moisés remimombe'ukwe-rupi ani hagwā ajoko íxupe kwéry Hesu Cristo-gwi. Ijapte-py aiko voi Nhandejáry remimombe'ukwe-rupi, Hesu Cristo remimbota ajapo-vy ha'e kwéry ohenduse hagwā Hesu Cristo rehewa nhe'ẽ ojerovia hagwā hese.

22 Aime ramo Hesu Cristo-rehe ojerovia kangy vyteri va'e apyte-py anhemoī hemimbota-rehe. Aipytygwōõe íxupe kwéry ojerovia ete hagwā Hesu-rehe. Upéixa anhemoī meme xe ndive oiko va'e yke-rehe amombe'u mbe'u hagwā Hesu Cristo rehewa nhe'ẽ enterove va'e-pe. Upéixa ikatu oĩ va'erā hetave onheresende va'erā.

23 Upeixagwa ambo'e ramo inhe'ẽ, aiko porā arā hendive xe rovasa meme hagwā Nhandejáry.*

24-27 Peikwaa-ma nipo ra'e oripara va'e-rehe. Heta heta oĩ oripara va'e kwéry. Enterove hatā jepe oripara, peteī mate ogwahē henonde-rupi. Upe va'e-pe mate ome'ẽ arā imba'erā. Oripara va'ety hembiapo kwaa voi. Oripara para hatāve tāve oho-vy. Ndopoi mo'āi tape oripara oho ha-gwi. Ohupityse imba'erā. Ojegwakarā yvyla rogwe gwigwa organase-vy. Upéa peteī áry-rupi iporā. Upe rire ipirupa-ma.

Oripara va'ety va'e vérami tajaiko jahupity hagwā nhande rekoha porārā. Upéa ndaha'ei peteī áry-py opa va'erā. Opa e'ỹ va'e gwive iporā va'erā jaiko ramo Nhandejáry ndive.

Ha ohuga ramo ojosokea va'e peteī va'e ndo'ái. Ohuga kwaave va'e ndo'airy.

Upe hembiapo kwaave va'e-rami aikose ave xe. Nhandejáry rape pok-waaha ramo aikose pono mba'eve xe mbojeavy. Ndaxe rembiapo vaiséiry. Anhemonhe'ẽ nhe'ẽ ambue kwéry-pe “Egwata porā Hesu rape-rupi” ha'e anhemonhe'ẽ-vy. Naiporāi voi arā xe-vy ajejavy ramo upéixa anhemonhe'ẽ rire. Xe atī eterei xe rembiapo vairā ajapo hagwā. Upéa-gwi tembiapo vai ajoko xejéhegwi aiko porā hagwā Hesu renonde-py. Xe rembiapo vaise ajoko xejéhegwi ani hagwā Hesu he'i xe-vy “Ne rembiapo vaikwe-rehe xe ndavy'ái ne ndive. Ani ereju xe renda-py” pono he'i xe-vy Hesu.*

10

Anijajapo nhane ramoigwasu rembiapo vaikwe ramigwa

1 Xe re'yi kwéry, Hesu reroviahva va'e kwéry, tapene mandu'a kena, myamyrī nhane ramoigwasu kwéry-rehe. Yma araka'e ha'e kwéry ojerovia nhane ramoigwasu Moisés-rehe. Hendive tekwat y e'ỹ-rupi oiko va'ekwe hikwái araka'e. Upe-py oje'óí jave peteī araigwegwasu oho henonderā-rupi kwéry haperā rexu uka-vy íxupe kwéry. Ygwasu Pytā pa'ū-rupi ave ohasapa oje'óí-vy hikwái. Inhaký e'ỹ rehewe voi ohasapa hikwái y pa'ū-rupi oje'óí-vy.*

2 Ha oĩ jave íxupe kwéry upe araigwegwasu, ha'e kwéry ohasa jave ygwasu mbyte-rupi onhemopeteī Moisés ndive. “Oroiko-ta ne nhe'ẽ-rupi” he'i ra'e Moisés-pe hikwái.

* 9:23 1 Co 10.32-33

* 9:24-27 Fp 3.14; 2 Tm 4.7; Hb 12.1-2

* 10:1 Ex 13.21-22; 14.22-29

3 Ha tekwaty e'ŷ-rupi oiko jave araka'e enterove ho'u meme tembi'u yváy-gwi ombou va'e.*

4 Hoy'u ave yváy gwigwa y hikwái. Nhandejáry réry-py Moisés oinupā peteĩ ita íxugwi osẽ hagwã y íxupe kwéry. Upe ita omombe'use Cristo-rehe. Upéa-rehe ja'e "Cristo omoirū íxupe kwéry araka'e". Nhandejáry ohovasa meme íxupe kwéry.*

5 Ohovasa ramo jepe ndahetáí oĩ ombovy'a va'e araka'e Nhandejáry-pe. Hetave tave oĩ ombovy'are'ŷ va'e Nhandejáry-pe. Hembiapo vaikwe-rehe omano va'ekwe araka'e ha'e kwéry. Tekwaty e'ŷ-gwi nosẽ mo'ãi araka'e hikwái. Nhandejáry ndovy'ái hendive kwéry. Upéixa-gwi nomogwahëi íxupe kwéry ijyvyrã-my.*

6 Upéa Nhandejáry ojapo araka'e nhane moarandu hagwã, nhane ramoigwasu amyrï-rami ani hagwã jaiko. "Xe rembiapo vairã ajapose va'e ndajapo mo'ãi" ja'e hagwã nhane mandu'a ramo hembiapo vaikwe-rehe. Nhande katu, naporãi jajapo ha'e kwéry-rami.*

7 Oĩ araka'e umi ipa'ũ mygwa omboete araka'e Nhandejáry e'ŷ va'e-pe, tupã ra'anga anga ojapo va'ekwe-pe. Upéa-rehe Nhandejáry ndovy'ái. Ohai uka araka'e kwatia-rehe:

"Okaru ogwapy-vy tupã ra'anga renonde-py. Oka'u ave upe-py. Okotyhu ave upe-py. Ojeroky ave tupã ra'anga renonde-py."*

Ha nhande ave naporãi jajerovia ramo Nhandejáry e'ŷ va'e-rehe. Ndovy'ái arã Nhandejáry upéa jajapo ramo.

8 Oĩ ave araka'e gwï ipa'ũ mygwa teko ky'a-rupi okwa va'e. Ani ha'e-rami ereiko teĩ. Hembiapo vai eterei-rehe omano vinte e três mil kente peteĩ áry-py. Upéixa oiko-gwi Nhandejáry ombohosa asy íxupe kwéry omano hagwã hikwái. Ani ha'e-rami ereiko teĩ.*

9 Oĩ ave araka'e gwï ipa'ũ mygwa he'i rei va'e "Nhandejáry oheja rei arã xe rembiapo vaikwe" he'i rei va'e ójehe. Ani teĩ erejapo ha'e-rami. Upéixa ojapo va'e-pe araka'e mbói oisu'u. Nhandejáry-pe ombovyte vyte-gwi omano va'ekwe hikwái. Mbói oisu'u-gwi omano.*

10 Oĩ ave araka'e gwï ipa'ũ mygwa Nhandejáry-pe onhe'ẽ vai gwekoharehe. "Ndavy'ái kóá ndive" he'i. "Kóá naporãi xe-vy" he'i. "Mba'e ambue aipota" he'i ave. "Ma'erã-gwi nome'ẽi xe-vy xe mba'erã iporâve va'e?" he'i ave. Upéixa ndovy'ái Nhandejáry remime'ẽgwe-rehe. Nhandejáry indive ndovy'ái-gwi omondo ijukaharã íxupe kwéry ohundipa hagwã. Ani erejapo teĩ ha'e kwéry-rami. Ani erenhe'ẽ vai teĩ Nhandejáry-pe nde rekoha-rehe.*

11 Nhandejáry ombohosa asy va'ekwe myamyrï nhane ramoigwasu kwéry-pe hendive oiko va'e omoarandu hagwã. "Hembiapo vai-rehe nipo ogwerekó asy ra'e Nhandejáry" he'i hagwã ójehe ombohosa asy íxupe kwéry. Ha upéa-rehe nhane moarandu ave Nhandejáry. Kwatia-rehe ohai uka va'ekwe nhande-vy gwarã nhane renonde nhane mbo'e hagwã. Jaikwaa-ma ramo mba'éixa pa ojohu vai nhane ramói amyrï kwéry, gwï hembiapo vai va'e jaikwaa-ma arã ave "Ani erejapo teĩ upéixa" omombe'use nhande-vy. Hi'agwï-ma yvy opa hagwã óra. Upéa-rehe naporãi voi jaiko upe myamyrï hembiapo vai va'e kwéry-rami.

12 Ani ere teĩ nde rekorã-rehe "Xe naxe rembiapo vaíry va'e xe. Xe mbaraete-gwi ndajejavýi" aníke ere teĩ. Tekotevë jajerure Nhandejáry-pe nhane pytygwõ hagwã anive hagwã jajapo vai.

* **10:3** Ex 16.35 * **10:4** Ex 17.6; Nm 20.11 * **10:5** Nm 14.29-30 * **10:6** Nm 11.4 * **10:7** Ex 32.6
* **10:8** Nm 25.1-18 * **10:9** Nm 21.5-6 * **10:10** Nm 16.41,49

¹³ Nhane mbojejavyse va'e oiko nhande yke-rehe nhane mbotavy hagwā. Enterovéa-pe oity ukase. Nhandejáry ae katu onhe'ẽ-gwi ova e'ŷ va'e, onhe'ẽ-gwi ova e'ŷ va'e voi Nhandejáry. He'i hagwe-rami ojapo va'e voi. “Oropytygwō-ta” he'i nhande-vy. “Ou ramo ne mbojejavyseha oromombaraete-ta, oromo'arandu-ta ave ereikwaa hagwā mba'éixa pa ereiko hagwā ani hagwā ipu'aka nde-rehe” he'i nhande-vy.*

¹⁴ Xe re'ýi kwéry Hesu reroviaha va'e ani eremotupā ra'anga Nhandejáry e'ŷ va'e-pe.

¹⁵ Peẽ pekakwaa-ma nipo ra'e, pene arandu-ma nipo ra'e. Tapejeapysaka porā katu xe nhe'ẽ-rehe. Tapenhemongeta pende py'a-py xe nhe'ẽgwe-rehe “Anhetegwa nhe'ẽ para'e, teko rei nhe'ẽ para'e” peje katu peporandu-vy pende py'a-py. Anhetegwa voi xe nhe'ẽ. Tapejeapysaka porā katu ko xe nhe'ẽrā-rehe.

¹⁶ Hesu mano hagwe-rehe nhane mandu'a ramo Nhandejáry renonde-py ha'e nhande rovasa-ma ave. Jay'u jave nhane momandu'a uka Hesu rugwykwe-rehe. Nhaime-ma Hesu ndive peteīxa. Mbojape nhambopóy ja'u va'erā. Ja'u jave nhane momandu'a uka Hesu retekwe-rehe. Nhaime-ma Hesu ndive peteīxa.*

¹⁷ Peteī mbojape-gwi enterove ho'u. Nhande reta reta va'e jaiko peteīxa peteī va'e-rehe nhane mandu'a-gwi.

¹⁸ Tapene mandu'a ave Israel re'ýi judeu kwéry reko-rehe. Pa'i kwéry ohapy meme hemime'ẽrā Nhandejáry-pe. Nhandejáry omboete haty-py ohapy. Ha ohapy e'ŷ va'e ho'u pa'i kwéry. Ho'u jave imandu'a “Xe katu Nhandejáry re'ýi voi ko xe” he'i ojéupe.*

¹⁹ Kóa-rehe amombe'u peikwaa porāve hagwā. Tembi'u-rehe, Nhandejáry e'ŷ va'e-rehe ave amombe'u-ta peẽ-my. Tupā ra'anga oiko e'ŷ va'e voi. Jaikwaa-ma voi ha'e kwéry ndoikoiryha. Anhetegwa ave ko xe nhe'ẽ.

²⁰ Gwī tupā ra'anga-rehe ojerovia va'e omoõ rei so'o hovagwy-py. “Xe járy rovagwy-py amoõ hemi'urā” he'i rei hese. Oiko e'ŷ va'e-rehe he'i upéa. Ha ha'e ko xe, omoõ ramo so'o tupā ra'anga rovagwy-py, ome'ẽ upe so'o anháy kwéry-pe. Anháy réry-py omoõ upe-py. Ani eremoirū teĩ anháy-pe.*

²¹ Nhane mandu'a hagwā Hesu omano hagwe-rehe ja'u uva rykwere Nhandejáry renonde-py. “Nhande katu Nhandejáry re'ýi tee voi” ja'e nhane mandu'a-vy hese. Upéa-gwi naiporāi jay'u anháy pegwarāgwe. Nhandejáry renonde-py ja'u mbojape nhane mandu'a hagwā Hesu retekwe-rehe. “Nhande katu Nhandejáry re'ýi tee” ja'e nhane mandu'a-vy hese. Upéa-gwi naiporāi ja'u ave so'o anháy pegwarāgwe. Anháy réry-py ome'ẽ va'ekwe naiporāi ja'u nhande.

²² Hakate'ŷ voi nhande-rehe Nhandejáry. Ani erembovy'are'ŷ teĩ íxupe. Na pene mbaraeteve íxugwi. Ani erembovy'are'ŷ teĩ íxupe.*

Cristo reroviaha va'e tekotevē ojohayhu

(Rm 15.1-3; Fp 2.4)

²³ Nhande Hesu Cristo re'ýi tee va'e nhande. Upéa-gwi ndaipóri ikatu e'ŷ va'e nhande-vy. Heta mba'e oĩ jepe nanhane pytygwōi va'e. Ndaha'ei nhane moporā hagwā-rehe jajapo upe va'e.*

²⁴ Ani peteī teĩ pendejéupe gwarā mate pepena teĩ. “Mba'e tipo iporāve ambue kwéry-pe” tere ndejéupe erejapose va'e-rehe. Pejohayhu-rupi erepena ambue kwéry-rehe.

* **10:13** 2 Pe 2.9 * **10:16** Mt 26.27-28; Mc 14.22-24; Lc 22.19-20 * **10:18** Lv 7.6 * **10:20** Dt 32.17

* **10:22** Dt 32.21 * **10:23** 1 Co 6.12

25-26 “Tupā Nhandejáry ko yvy járy voi. Upéixa-gwi entéro oiko ve'e gwive járy ave”

he'i Nhandejáry nhe'ẽ kwatia-rehe oĩ va'e. Upéixa-gwi ndoikói ikatu e'ŷ va'e jakaru hagwā. Ome'ẽ pejogwa hagwā so'o pene remi'urā. Erejogwa mboyve natekotevēi ereporandu upe so'o-rehe. “Tupā ra'anga rovagwy-py gware tipo ko so'o? Ha'u ramo upe so'o ajejavý para'e?” ani ereporandu nde py'a-py. He'u rei katu. Nhandejáry remimoingokwe voi upe so'o.*

27 Nhandejáry-rehe ojerovia e'ŷ va'e ne renói ramo indive erekaru hagwā, iporā. Erehose ramo, tereho katu. Ne remi'urā ome'ẽ ramo he'u rei joty. Ani ereporandu ne rembi'u me'ẽ ha-pe “Ko va'e tipo tupā ra'anga rovagwy-py gware?” Ani upéixa ere.

28-30 Oĩ ramo imombe'uga “Ko va'e so'o tupā ra'anga rovagwy-py gware” he'i ramo, ani ere'u pono erembovy'are'ŷ íxupe peteixa pevy'a hagwā. Jaik-waa upe so'o ikatu porā ere'u va'erā jepe ndere'u mo'ai joty. Upe Nhandejáry-rehe ojerovia mirī va'e he'i ra'e “Niporāi nhande Nhandejáry-rehe jajerovia va'e ja'u ramo so'o tupā ra'anga-pe gware.” Upe so'o ndere'úi ramo “Iporā” he'i arā nde-rehe. Ha erejejohu porā ave arā. Pevy'a arā onhondive. Gwī ndovy'ái va'e he'i arā “Xe-vy iporā ha'u. Ma'erā-gwi he'i apena hagwā xe rapixa-rehe? Akarū e'ŷ mboyve amboete Nhandejáry-pe. Atima íxupe xe remi'urā-rehe. Xe ndaikwaái ma'erā he'i xe-vy pono ha'u upe so'o” he'i arā ndory'airy.

31 Ha'e-ta voi peẽ-my teko porā-rupi katu peiko. Penhopytygwō katu. Pekaru ramo, pey'u ramo, tapeiko porā. Tembiapo porā mate pejapo penhopytygwō-vy. Upéixa iporā ramo pende rekoha pemomba'egwasu arā Nhandejáry-pe. “Iporā voi Tupā Nhandejáry” he'i arā nde rekoha rexā va'e.

32 Judeu kwéry renonde-py judeu e'ŷ renonde-py ave, Tupā Nhandejáry-rehe ojerovia va'e renonde-py ave tapeiko porā katu ani hagwā avave he'i nde causa-gwi “Xe ndajeroviaséi Hesu Cristo-rehe.”

33 Xe rekoha-rami katu peẽ peiko katu. Xe aiko meme teko porā-rupi ambojerovia hagwā enterove va'e-pe Hesu-rehe. Xéjeho anho rei ndajekóiry. “Mba'e tipo iporāve ambue kwéry-pe?” ha'e xejéupe ajapose va'e-rehe. Upéa ajapo ha'e kwéry ojerovia hagwā Hesu-rehe onheresende-vy.*

11

1 Cristo reko-rupi aiko. Upéa-gwi iporā peiko ramo xe reko-rupi.*

Mba'eixagwa pa kunhagwe rekoha Nhandejáry-pe ojeporahéi haty-py

2 Pene mandu'a meme nipo xe-rehe ra'e. Xe remimombe'u-rupi nipo peiko meme va'e ra'e. Xe mbovy'a voi upe va'e.

3 Oĩve xe nhe'ẽ amombe'uve va'erā peẽ-my. Pejeapysaka porā katu peikwaa porāve hagwā Hesu rehewa nhe'ẽ. Cristo pogwy-py oiko kwimba'e. Ha kunha oiko jevy kwimba'e pogwy-py. Ha Cristo katu oiko joty Nhandejáry pogwy-py.

4-5 Pene mandu'a katu upéa-rehe peiko porā hagwā Nhandejáry-pe omboete ojogweroaty haty-py. Peẽ, Nhandejáry nhe'ẽ-py omombe'u va'ety, peẽ Nhandejáry-pe ombojeupi onhe'ẽ va'e ave pejogweroaty ramo Nhandejáry-pe pemboete hagwā tapeiko porā katu.

Niporāi voi kwimba'e inhakā rehewa rehewe oime upe-py. Upéixa oime ramo nomboete teéiry Cristo-pe. Niporāi ave kunha inhakā rehewa e'ŷ rehewe oime upe-py. Upéixa inhakā rehewa nomondéi ramo nomboete teéiry oména-pe. Onhemoakāperõ uka va'e ramigwa omotí arā oména-pe.

* 10:25-26 Sl 24.1 * 10:33 1 Co 9.19-23; Fp 2.4 * 11:1 1 Co 4.16; Fp 3.17

6 Ha nomondeséi ramo inhakā rehewa, peje íxupe “Eikytī uka ne akā ragwe”. Ha otī eterei-gwi noikytiséi inhakā ragwe ramo nonhemoakāperō ukaséi ramo ave, tomonde oakā rehewa.

7 Kwimba'e katu Tupā Nhandejáry omoingo va'ekwe ha'e ramigwarā. Inhe'ẽ-rupi oiko hagwā omoingo va'ekwe. Ohexa uka mba'eixagwa Nhandejáry remimoingo porā ipu'aka marangatu tee-gwi kwimba'e-pe ojapo va'ekwe. Upéixa-gwi naporāi voi oime ramo oakā rehewa reheve Nhandejáry-pe omboete haty-py. Ha kunha katu ohexa uka mba'éixa pa Nhandejáry rembiapo porāgwe ojapo-ma ramo kwimba'e kāgwe-gwi kunha ypyrā.*

8 Kwimba'e ypy omoingose ramo, Nhandejáry ndojapo mo'āi kunha-gwi kwimba'e ypyrā. Kwimba'e ypy-gwi ae jepe oipe'a va'ekwe upe kunha ypyrā.

9 Kwimba'e ypyrā nomoingói ave va'ekwe kunha ypy-rehe ha-py. Kunha ypyrā ae ojapo va'ekwe kwimba'e ypy-rehe ha-py.*

10 Upéa-rehe onhomboaty ramo Hesu reroviaha va'e kwéry, kunha kwéry omonde oakā rehewa va'e. Upéa omonde jave ohexa uka arā omboete teeha oména-pe. Nhandejáry rembigwái yváy pygwa va'e kwéry ave oikwaa hagwā omboete oména-pe oiko-vy.

11 Hesu reko-rupi jaiko-ma ramo nhane akā-gwi rei ndikatúi jajapo. Kunha kwéry oikotevē kwimba'e kwéry-rehe ha kwimba'e kwéry oikotevē kunha kwéry-rehe ave.

12 Yma va'ekwe Nhandejáry ojapo kunha kwimba'e kāgwe-gwi. Āy katu kwimba'e oiko kunha-gwi. Ha Nhandejáry katu omoingo enterovéte.

13 Pene mandu'a katu Nhandejáry-pe ombojeupi ramo onhe'ẽ va'e-rehe. Kunha oakā nandi reheve ombojeupi ramo onhe'ẽ pene pa'ū-my ndapejohu porāiry.

14 Nhane akā gwigwa rei arandu oikwaa uka kwimba'e rekoha nhande-vy. Inhakā ragwe puku rei ramo naiporāi voi nhande-vy. Otī arā oiko hagwā nhane pa'ū-my.

15 Kunha ae katu, inhakā ragwe puku va'e iporā voi nhande-vy. Nhandejáry ome'ẽ íxupe omoī porā rei hagwā.

16 Upéa-rehe ha'e se jevy peē-my naporāi voi kunha oakā nandi reheve ombojeupi onhe'ẽ Nhandejáry-pe nhane pa'ū-my.

Ha oī-ma ramo pene pa'ū mygwa onhonhe'ẽ mbojevy jevyse va'e, kóa mate ha'e-ta íxupe. Opa-rupi Nhandejáry-pe omboete hagwā ojogweroaty va'e hekoha upéixa.

Mba'eixagwa pa nhane mandu'a Hesu omano hagwe-rehe?

17 Avy'are'ỹ katu pende rekoha-rehe. Pejogweroaty ramo ojeporahéi haty-py napende rekoha porāiry ra'e upe-py. Upéixa-gwi ndavy'airy.

Jajogweroaty ramo Nhandejáry réry-py tekotevē nhanhopytygwō enterove oiko porāve hagwā Nhandejáry rape-rupi. Ha peē katu, napenhopytygwōiry ra'e. Ndapeikói nipo ra'e tape porā-rupi.

18 Pejogweroaty ramo Hesu réry-py ndapeiko porāi nipo ra'e onhondive. “Ojogweroaty ramo Corinto pygwa kwéry Hesu reroviaha va'e ndogwero-jojái onhe'ẽ. Ndoikói peteīxa upe va'e kwéry.” Aipo pene rerakwā ahendu kuri. Haimete kuri arovia. Upéixa peiko vai nipo ra'e.

19 Oī va'erā pene pa'ū-my ambue mbue ndive ndogwerojojaséi va'e. Upéixa peteīxa ndapejogwerekói ramo ae ojekwaa arā voi ra'e kiva'e pa oiko tekoha porā-my.

* **11:7** Gn 1.26 * **11:9** Gn 2.18-23

²⁰ Pejogweroaty Nhandejáry réry-py pekaru hagwā ramo ndaha'evéi-ma Hesu Cristo omano hagwe-rehe pene mandu'a hagwā nipo ra'e. Pekaru rei hagwā nipo ra'e.

²¹ Peteĩ teĩ nipo ra'e pekaru upe-py. Onhemotenonde va'e kwéry heta voi ho'u. Nonhoha'arōiry. Ḧapykwéri ou va'e tembyre mate ho'u. Upéixa pekaru-gwi oĩ vyteri ivare'a va'e, oĩ jave hygwŷatā va'e, oĩ ave oka'u va'e.

²² Niporāi voi upe pende rekoha. Pekaruse ramo pende róga tee-py pekaru. Anive peraha heta pene remi'urā Hesu reroviaha va'e ojogweroaty haty-py pe'u va'erā. Anive upéixa pemotĩ iporiahu va'e-pe. Ndavy'ái upe pende rekoha vaikwe-rehe. Anive teĩ upéixa pende rekoha vai pejogweroaty porahéi haty-py.

²³ Apombo'e va'ekwe mba'éixa pa jajapo-ta Hesu omano hagwe-rehe nhane mandu'a hagwā. Nhandejáry oikwaa uka va'ekwe xe-vy onhe'ẽ porā. Ha upe inhe'ẽgwe porā-rehe apombo'e jevy va'ekwe. Āy apombo'e jevy-ta upe inhe'e porā-rehe jevy. Nhandejáry oikwaa uka va'ekwe xe-vy nhane mandu'a hagwā Hesu omano hagwe-rehe. Upe apombo'e jevy-ta. Hesu omano e'ỹ mboyve, inhirūgwerā omombe'u nhemi-tama jave ipyhy ukaharā-pe, a-rami ojapo Hesu. Pyhare ramo Hesu oipyhy mbojape,

²⁴ otima Nhandejáry-pe, ha upe rire ombopo mbopóy ome'ẽ-vy gwemimbo'e kwéry-pe. "Ko mbojape-rehe ha'e-ta xe rete tee va'e" he'i. "Pende-rehe ha-py anheme'ẽ va'erā ajejuka uka va'erā pene resende hagwā" he'i. "Kóa ere'u ramo ne mandu'a kena xe-rehe" he'i.

²⁵ Upéixa ave okaru rire oipyhy uva rykwere ryru. "Ko uva rykwere-rupi Tupā Nhandejáry oikwaa uka arā yvypóry-pe xe manoha rehewa nhe'ẽ" he'i. "Kente kwéry-rehe ha-py onheresende hagwā osyry va'erā xe rugwy. Pe'u jave pene mandu'a kena xe-rehe" he'i. "Omano xe resende hagwā, peje pene mandu'a-vy xe-rehe" he'i va'ekwe Hesu gwemimbo'e kwéry-pe.*

²⁶ Ha upéixa-gwi ja'u ramo upe mbojape, upe uva rykwere ave, jahexa uka enterove-pe Hesu omanoha. Úpéa tekotevē jajapo Hesu ou jevytaha ra'arō-vy.*

²⁷ Upéa-gwi nhande reko porā e'ỹ rehewe ja'u ramo pe mbojape pe uva rykwere ave, Nhandejáry-pe niporāi voi. Nhande reko porā e'ỹ rehewe ja'u ramo upe uva rykwere mbojape ave jajuka uka rei vérami Cristo-pe. Naiporāi voi upéa.

²⁸ Upéa-rehe tanhanhemongeta nhandejéupe nhande reko ete-rehe. "Iporā tipo xe reko Nhandejáry rovagwy-py?" tanhaporandu nhandéjehe. "Aiko porā para'e terā aiko ku'a ku'a para'e Nhandejáry reko-rupi?" Upéixa ramo iporā nhaporandu randu nhandejéupe ja'u hagwā.

²⁹ Ho'u rei va'e onhembohasa asy uka ojóehe. Naimandu'ái Hesu omano hagwe rehe-gwi ho'u rei. Ha upéa-rehe Nhandejáry ombohasa asy va'erā íxupe.

³⁰ Heta pene pa'ũ-my oĩ va'e ho'u rei nipo araka'e. Upéa-rehe ra'e oime heta ikangy va'e, hasy va'e ave. Ha upe va'e-rehe ave heta omano va'ekwe.

³¹ Ja'u-tama ramo mbojape nhane mandu'a hagwā Hesu mano hagwe-rehe tanhaporandu katu nhandéjehe nhande rekoha-rehe, nhane rembiapokwe-rehe. "Iporā para'e niporāi para'e Nhandejáry rovagwy-py xe rekoha?" nhaporandu katu nhande py'apy-py nhandejéupe nhamboyke uka hagwā nhane rembiapo porā e'ỹkwe nhandejéhegwi "Ipy'a potĩ-ma" he'i hagwā Nhandejáry nhande-rehe. Nanhane mbohasa asyvéi-ma hagwā.

* ^{11:25} Jr 31.31-34; ^{Êx 24.6-8} * ^{11:26} Mt 26.26-28; Mc 14.22-24; Lc 22.19-20

³² Ha nanhaporandúi ramo upéixa nhande py'apy pygwa-rehe nhane moingo porã jevy hagwã Nhandejáry rape-rupi, ha'e ae "Ipy'a ky'a rehevē ho'u Hesu-rehe oporomomandu'aha" he'i arã nhande-rehe. Ha upéa-rehe katu nhane mbohasa asy arã nhanhemboasy kwaa hagwã nhane rembiapo vaikwe-rehe ani hagwã nhande ave ko'ágwa hekoha vai va'e hese ojerovia e'ý va'e ndive nhande ave jaha ombohasa asy ha-py.

³³ Upéa-rehe, xe re'ýi kwéry, Hesu reroviaha va'e kwéry, penhoha'arõ katu pe'u ramo Hesu mandu'aha rembi'u.

³⁴ Ani peju pene rygwýatã hagwã-rami. Ivare'a va'e tokaru katu gwóga-py pono Nhandejáry pene mbohasa asy hagwã.

Oíve pene remiporandum kiatia-rehe pemoï va'ekwe. Áy katu namombe'u mo'ái upe va'e-rehe. Agwahé ramo pende ha-py amombe'u arã peẽ-my upéa-rehe.

12

Nhe'ë Marangatu tee va'e remime'ëgwe nhande-vy gwarã

(Rm 12.6-8; 1 Pe 4.10-11)

¹ "Mba'e tipo Nhe'ë Marangatu tee va'e ome'ë nhande-vy, nhande Hesu reroviaha va'e-pe?" peporandu va'ekwe kiatia-rehe. Upéa-rehe apombo'e-ta, xe re'ýi kwéry.

Peteĩ teĩ-pe ome'ë gwemime'ëgwe.

² Tapene mandu'a porã peiko hagwe-rehe. Yma pejerovia e'ý rehevē Hesu-rehe, heta tupã ra'anga-rehe pejerovia ra'e. Ta'anga rei upe va'e. Nonhe'ëi, ojehexa uka e'ý va'e, hekove e'ý va'e. Pene mbotavy tavy voi araka'e.

³ Upéixa-gwi amombe'u-ta peẽ-my mba'eixagwa pa peikwaa-ta anhetegwa nhe'ë. "Hesu Tupã tee" he'i va'e anhetegwa he'i. Nhe'ë Marangatu tee va'e oí ipy'apy-py. Upéixa-gwi onhe'ë porã Hesu-rehe. Ha Hesu-rehe "Tomano katu" he'i va'e ndogwerékoi Nhe'ë Marangatu tee va'e opy'apy-py. Upéixa-gwi onhe'ë rei rei Hesu-rehe.

⁴ Nhe'ë Marangatu tee va'e peteĩ anho mate. Hemime'ëgwe nhande-vy gwarã jepe heta.

⁵ Nhande rerekwa tee va'e Tupã Nhandejáry. Ha'e omombe'u peteĩ teĩ-pe hembiapo ambue mbuerã nhande-vy gwarã.

⁶ Heta nhane rembiaporã jajapo kwaa va'e. Peteĩ teĩ va'e-pe ae katu Nhandejáry nhane moarandu nhamba'apo hagwã hembigwairã.

⁷ Nhe'ë Marangatu tee va'e nhande rexakwaa rei, peteĩ teĩ va'e-pe ome'ë me'ë gwemime'ë. Hemime'ërã ome'ë nhande-vy nhanhypetygwõ rei hagwã.

⁸ Upéixa oí Nhandejáry omoarandu va'e kwéry. Arandu nhe'ë oiporu va'erã. Nhe'ë Marangatu tee va'e remime'ëgwe-rupi arandu nhe'ë oiporu va'erã. Ha ambue va'e kwéry-pe oikwaa uka onhe'ë rei mo'ã hagwã nhande-vy oikwaa vérami voi nhande py'apóry. Nhe'ë Marangatu tee va'e oikwaa ukaha-rupi voi ha'e onhe'ë rei mo'ã anhetegwa voi upe-va'e.

⁹ Ha ambue kwéry-pe Nhe'ë Marangatu tee va'e oikwaa uka ogwerovia tee hagwã Hesu-rehe. Ha ambue kwéry-pe ome'ë ombogwera hagwã hasy va'e-pe. Nhe'ë Marangatu tee va'e remime'ëgwe-rupi ombogwera íxupe kwéry.

¹⁰ Ha ambue kwéry-pe ome'ë hexapyrã-rupi ombo'apo hagwã. Nhe'ë Marangatu tee va'e remime'ëgwe-rupi nhande-vy ikatu e'ý va'e hexapyrã-rupi ojapo. Ha ambue kwéry-pe Nhe'ë Marangatu tee va'e oikwaa uka oiko hagwã Nhandejáry nhe'ë mombe'uhaty ramo. Hembigwaa e'ýgwe oikwaa uka íxupe onhe'ë hagwã. Ha ambue kwéry-pe omo'arandu Nhe'ë Marangatu tee va'e ojohu hagwã kiva'e nhe'ë-py po omombe'u ambue kwéry, Nhe'ë

Marangatu tee va'e remimo'arandu tipo ambue va'e remimo'arandu tipo ojohu kwaa hagwā. Ha ambue kwéry-pe omonhe'ẽ Nhe'ẽ Marangatu tee va'e. Upéa-gwi nhe'ẽ ambue mbue-py oiporu kwaa e'ŷ rehewe onhe'ẽ. Ha ambue kwéry-pe omo'arandu Nhe'ẽ Marangatu tee va'e omombe'u jevy hagwā upe nhe'ẽ ambue. Nhe'ẽ Marangatu tee va'e remime'ẽgwe-rupi ohendu upe nhe'ẽ ambue omombe'u jevy hagwā onhe'ẽ-py. Oiporu kwaa e'ŷ rehewe jepe omombe'u jevy onhe'ẽ-py.

¹¹ Nhe'ẽ Marangatu tee va'e peteĩ anho tee. Hemime'ẽgwe nhande-vy gwarã ae katu heta. Ome'ëse-gwi ome'ë peteĩ teĩ-pe gwemime'ërã.

*Cristo reroviahha va'e kwéry ndive ha'e peteĩ oiko
(Rm 12.4-5; Ef 1.22-23; 4.15-16)*

¹² Nhande rete katu peteĩ mate, heta ae hesegwa oĩ va'e. Ha nhande rete rehewa, heta oĩ ramo jepe ave, peteĩ anho joty oĩ hete. Upéixa ave Cristo gweroviahha kwéry ndive oiko peteĩ mante.

¹³ Oĩ-ma heta Hesu reroviahha va'e. Opaixagwa va'e ojerovia-ma hese. Oĩ judeu va'e, oĩ ave judeu e'ŷ va'e. Oĩ onhemomba'apo va'e. Oĩ ave ojejokwái e'ŷ va'e. Heta-ma voi ojerovia-ma Cristo-rehe. Ha peteĩxa nhane mongarai va'ekwe. Peteĩxa onhemoingo nhande py'apy-py Nhe'ẽ Marangatu tee va'e. Nhande reta reta-gwi ha'e nhane moingo peteĩxa mate ondice.

¹⁴ Upéixa ave nhande rete rehewa heta oĩ. Ndaha'ëi peteĩ anho mate hesegwa oĩ. Oĩ nhande po, oĩ nhande py, oĩ nhande jyva, oĩ ave nhane kwã. Upe va'e nhande rete rehewa voi. Peteĩ teĩ nhane rembiporu nhande rete-rehe oĩ va'e.

Upéixa ave nhande, Hesu reroviahha va'e kwéry. Peteĩ teĩ nhane rembiapo jajapo. Heta voi nhamba'apo va'e. Peteĩ réry-rupi ae nhamba'apo. Hesu réry-py mate voi jaiko peteĩxa.

¹⁵ Ha nhande rete rehewa katu onhe'ẽ kwaa ramo ra'e onhe'ẽ rei arã mo'ã ra'e nhande rete-pe. Onhe'ẽ rei arã nhande py "Xe ndaha'ëi po-gwi ndaikói tete-rehe" he'i arã mo'ã. Oiko joty nhande rete rehewa ramo.

¹⁶ Ha nhande apysa katu onhe'ẽ rei ramo ra'e nhande rete-pe: "Xe, ndaha'ëi tesa, upéa-gwi ndaikói tete rehewa ramo" onhe'ẽ rei arã ra'e. Ha onhe'ẽ ramo jepe oiko joty nhande rete rehewa ramo.

¹⁷ Nhande resa anho noíry. Upéixa ramo ra'e nanhahendúi arã ra'e. Ha nhande apysa anho noíry ave. Upéixa ramo ra'e nanhahetüi arã ra'e mba'eve. Peteĩ anho noíry nhande rete rehewa.

¹⁸ Yma araka'e Nhandejáry omoõ nhande rete rehewarã voi araka'e. Peteĩ teĩ omoõ meme nhande rete-rehe. Gwemimbota-rupi omoõ nhande rete rehewarã araka'e.

¹⁹ Peteĩ ramigwa meme nomoõ ukáí Nhandejáry. Upéixa ramo ra'e nanhande retéiry arã ra'e.

²⁰ Nhande rete rehewa heta oĩ. Heta oĩ ramo jepe peteĩ joty nhande rete.

Upéixa ave nhande. Jaiko peteĩxa Hesu-rehe jajerovia-gwi. Peteĩ reko-rupi jaikopa.

²¹ Ndaipóri nhande rete-py oĩ rei va'e. Nhaikotevẽ entéro nhande rete rehewa-rehe. Jaiporu íxupe kwéry. Nhande resa-rupi jahexa. Nhande porupi nhamba'apo. Nhande py-rehe jagwata. Onhopytygwõ nhande rete rehewa. Upéixa ave Hesu Cristo reroviahha va'e gwive nhanhopytygwõ va'erã jaiko-vy.

²² Nhandejáry katu nhane moingo va'ekwe. Nhande rete omoingo va'ekwe. Nhande rete-rehe oĩ jaiporuva va'e nhaikotevẽ tee va'e. Upéa ndoikói ramo ra'e nhamano rei arã ra'e.

²³ Nhande rete-rehe oĩ ave nhane rembihexa uka rei rei e'ŷ va'e. Upéa-rehe nhanhangareko porã. Oĩ ave nhanotĩ va'e nhanhangareko porãve va'e-rehe.

²⁴ Oĩ ave nanhanotĩy va'e iporãve nhande-vy. Nhanhapanáiry hese. Upéixa oiko nhande-vy nhande rete. Nhandejáry katu omoingopa va'ekwe. Ha'e omomba'egwasuve upe nhanotĩ va'e-pe.

²⁵ Upéixa-gwi ndaipóri iporãve va'e ojohugwi. Onhopytygwõ va'erã meme omoingo Nhandejáry nhande rete-rehe.

²⁶ Hasy ramo peteĩ nhande rete-rehe oĩ va'e nhahendu kwaa nhande rete-rehe. Okwera jevy ramo iporãmba nhande rete-py. Nhamboete ramo nhande rete rehewa, nhande rete tee nhamboete ave.

²⁷ Upéixa jaiko-ma nhande, Hesu rervoviaha va'e kwéry. Cristo rete ramigwa nhande. Upéixa-gwi jaiko peteĩ teĩ hete rehewa-rami.

²⁸ Nhandejáry remimbota-rupi katu nhanhopytygwõ jaiko-vy. Oĩ va'e nhane pa'ũ-gwi oiporavo araka'e gwembigwairã. Ha'e kwéry oiko nhande-vy nhande pytygwõharã. Tenonde va'e oiporavo gwemimondorã. Upe rire oiporavo onhe'ẽ-py omombe'u va'erã. Upe rire oiporavo oporombo'e va'erã onhe'ẽ omombe'u mbe'uharã. Oiporavo ave hexapyrã-rupi omba'apo va'erã. Oiporavo ave hasy va'e-pe ombogwera va'erã. Oiporavo ave oporopytygwõ va'erã. Oiporavo ave Hesu rervoviaha nhangarekoharã. Oiporavo ave nhe'ẽ ambue mbue-py oiporu kwaa e'ŷ rehewe onhe'ẽ va'erã.*

²⁹ Ndoiporavói oime raẽ va'e-pe oiko hagwã gwemimondo ramo. Ndoiporavói ave opavave oiko hagwã onhe'ẽ mombe'uhaty ramo kente hembigwaa e'ŷgwe omombe'u hagwã. Ndoiporavói ave opavave oiko hagwã oporombo'e va'erã. Ndaha'ei enterove va'e omba'apo hexapyrã-rupi.

³⁰ Ndaha'ei enterove va'e ombogwera hasy va'e-pe hemime'ẽgwe-rupi. Ndaha'ei enterove va'e nhe'ẽ ambue oiporu kwaa e'ŷ rehewe onhe'ẽ va'erã. Ndaha'ei enterove va'e gwemihendukwe nhe'ẽ ambue ohendu kwaa e'ŷ rehewe va'e omombe'u jevy onhe'ẽ-py.

³¹ Peẽ katu pejerure katu Nhandejáry-pe ome'ẽ hagwã peẽ-my gwemime'ẽrã iporãve rãve va'e. Xe ae ahexa uka-ta peẽ-my pene rekora iporãve va'e.

13

Jajohayhu-rupi nhambovy'a Nhandejáry-pe

¹ Tajajohayhu rei katu jaiko-vy. Ndaha'ei nhane nhe'ẽ-rehe nhambovy'a Nhandejáry-pe. Jajohayhu rei-rehe ae nhambovy'a íxupe. Nhanhe'ẽ ramo opa nhe'ẽ, ko yvy pygwa ambue mbue va'e nhe'ẽ, Nhandejáry rembigwái yváy pygwa va'e nhe'ẽ ave nhanhe'ẽ ramo jajohayhu e'ŷ rehewe, nanhambovy'ái arã Nhandejáry-pe. No'ã ra'e he'i arã nhane nhe'ẽ-rehe: "Mba'e ombopu rei va'e-rami voi" he'i arã ndajajohayhú-gwi.

² Ndaha'ei ave nhane arandu-rehe nhambovy'a Nhandejáry-pe. Jajohayhu rei ramo ae nhambovy'a íxupe. Inhe'ẽ-py nhamombe'u jevy ramo ha'e omba'e kwaa ukaha nhande-vy, Nhandejáry reminhongatukwe jaikwaa-ma ramo, opaixagwa-rehe jaikwaa porã ramo ndajajohayhú rehewe, ndovaléi arã nhande-vy nhane arandu. Nanhambovy'ái arã Nhandejáry-pe. Hesu-rehe jajerovia tee-gwi héry-py nhambova uka yvyatygwasu-pe jajohayhu e'ŷ rehewe, ndovaléi arã nhande-vy. Nanhambovy'ái arã Nhandejáry-pe.

³ Ndaha'ei ave nhane rakate'ŷ e'ŷ mba'e-rehe jaiko-vy nhambovy'a Nhandejáry-pe. Jajohayhu ramo ae nhambovy'a íxupe. Nhame'ẽmba ramo nhane mba'e iporahu va'e pegwarã jajohayhu e'ŷ rehewe, ndovaléi arã nhande-vy

* 12:28 Ef 4.11

nhane rakate'ŷ e'ŷha. Nanhambovy'ái arā Nhandejáry-pe. Hesu Cristo-rehe jajerovia-gwi kente kwéry nhane mbohasa asy ete ramo jepe, nhande rete rapy ramo jepe jajohayhu e'ŷ reheve, ndovaléi joty arā nhande-vy upéixa jahasa asy ramo. Nanhambovy'ái arā Nhandejáry-pe upéa-rupi. Jajohayhu ramo ae nhambovy'a va'erā íxupe.

⁴ Jajohayhu ramo jaiporiahuvereko rei nhande rapixa-pe, nhande py'a porā íxupe. Jajohayhu ramo nhanhoha'arō kwaa. Nhande py'a porā nhande rapixa ndive. Nanhane a'e e'ŷiry nhande rapixa rembiapo porā-rehe. Nanhanhemomba'egwasúiry. Nanhanhemboete reíry.

⁵ Jajohayhu ramo ndajaiko hatā hatāiry. Nanhane rakate'ŷ e'ŷ rei mba'eve-rehe nhane mba'erā nhande-vy gwarā mate ndajahekáiry. Nhande rapixa reko porārā-rehe ave nhane mandu'a. Nanhande rova asy kwaáiry nhande rapixa ndive. Nanhane mandu'ái tembiapo porā e'ŷgwe-rehe nharoyrō-vy.

⁶ Nhande py'a rory ae ojóehe. Anhetegwa-rehe mate nhambovy'a. Nhande rapixa rekoha porā e'ŷ-rehe nhane mbovy'are'ŷ, nhane mboasy.

⁷ Jajohayhu ramo nhaha'arō joty. Nhane mbovy'a e'ŷ va'e ndive jajogwerekirī joty. Nhande py'agwapy reheve nhaha'arō Nhandejáry rembiapo porārā nhande-vy gwarā-rehe. "Nhandejáry ipokatu va'e voi nhande rex-akwaa nhane poriahuverekave" ja'e meme nhande py'apy-py nhaha'arō-vy.*

⁸ Mborayhu opa e'ŷ va'e. Oiko-ma ramo Nhandejáry nhande ruvixa, yváypy nhaime-ma ramo avave nomombe'uvéi va'erā inhe'ẽ-py ha'e ombe'e kwaa ukaha nhande-vy, avave nonhe'ẽvéi va'erā nhe'ẽ oiporu kwaa e'ŷ reheve. Ko'a-py arandu ndoiporuvéi va'erā ave.

⁹ Jaikwaapa va'erā. Áy ndajaikwaapái voi mba'eve-rehe. Nhandejáry nhe'ẽ-py nhamombe'u hagwā mba'e ha'e oikwaa uka nhande-vy ndajaikwaapáiry.

¹⁰ Oiko ramo Nhandejáry nhande ruvixa, nhagwahē ramo ae henda-py jaikwaapa va'erā opamba'e, enterove va'e-rehe ave. Ndaiporivéi-ma va'erā oikwaa ku'a ku'a va'e. Ndaipóri va'erā oikwaa e'ŷ va'e mba'eve-rehe. Jaikwaapa va'erā.

¹¹ Yma xe mitā ramo, mitāixa aiko va'ekwe, mitāixa anhe'ẽ va'ekwe. Xe py'apy-py anhemongeta ramo, mitāixa ave aiko. Opáixa aiko va'ekwe xe mitā ramo. Áy ae katu akakwaapa-ma. Ndaiko mo'āvéi-ma mitā reko-rami.

¹² Ha upéixa ave ko yvy-py jaiko ramo jaikwaa mirī mirī Nhandejáry rekoha. Espéko tuja-py jahexaha-rami nhande rova ko'āy nhane arandu Nhandejáry-rehe. Ndajaikwaa porāi. Ha'e ae oikwaapa nhande rehewa. Jaiko ramo indive, yváypy nhaime ramo jajohexa va'erā, jaikwaapa va'erā ave hesegwa ave. Ha'e nhande kwaaháixa jaikwaa arā íxupe.

¹³ Ha ko'āngā mbohapy jajapo va'e opa e'ŷ reheve ovale va'erā nhande-vy. Hesu-rehe jajerovia, nhaha'arō Nhandejáry-pe he'i hagwe-rami ojapopa hagwā, jajohayhu rei ave jaiko-vy. Upe mbohapy jajapo va'e-rehe Nhandejáry ov'y'a-ma voi oiko-vy. Ha jajohayhu rei ramo nhambovy'ave arā Nhandejáry-pe.

14

Mba'éixa pa jaiporu va'erā Nhe'ẽ Marangatu tee va'e remime'ẽgwe

¹ Tapejohayhu katu peiko-vy. Pejerure katu Nhandejáry-pe ome'ẽ hagwā peẽ-my Nhe'ẽ Marangatu tee va'e hemime'ẽrā iporäve räve va'e. No'ā-rami

* ^{13:7 Gl 5.22}

pejerure íxupe: “Eme'ẽ xe-vy ne remime'ẽrã nde re'ýi pegwarã. Aipota eterei ne nhe'ẽ-py amombe'u jevy nde eremba'e kwaa uka xe-vy.”

² Oiporu kwaa e'ỹ va'e onhe'ẽ va'e onhomongeta Nhandejáry ndive mante. Nonhe'ẽ ko yvy rehewga ndive. Nohendu kwaái inhe'ẽ. Nhe'ẽ Marangatu tee va'e reko-rupi onhe'ẽ oiporu kwaa e'ỹ va'e. Anhetegwa he'i. Hapixa kwéry ae nohendu kwaáiry inhe'ẽ.

³ Nhandejáry nhe'ẽ-py omombe'u va'e ae katu onhe'ẽ enterovéa ohendu hagwã. Nhane pytygwõ jaroviave hagwã Hesu-pe, nhande reko porãrã omombe'u nhande-vy, nhane mbopy'agwapy Hesu rape-rupi jaiko porã hagwã.

⁴ Ha upe oiporu kwaa e'ỹ va'e onhe'ẽ va'e ae onhepytygwõ ojéupe. Nhandejáry nhe'ẽ-py omombe'u va'e ae oipytygwõ Hesu reroviaha kwéry-pe.

⁵ Nhandejáry tane mbopu'aka erenhe'ẽ hagwã ereiporu kwaa e'ỹ va'e. Upéixa erenhe'ẽ ramo xe mbovy'a arã. Nhandejáry tane mbopu'aka ave eremombe'u mbe'u hagwã inhe'ẽ. Upéa eremombe'u ramo avy'ave arã. Oiporu kwaa e'ỹ va'e onhe'ẽ nhe'ẽ va'e ojapo porã. Nhandejáry rembiaprupi onhe'ẽ. Nhandejáry nhe'ẽ-py omombe'u va'e ha'e oikwaa uka va'e ojapo porãve íxugwi henuha-pe oipytygwõ-gwi. Ha ndaipóri ramo imombe'u jevyha henu hárí nhe'ẽ-py noipytygwõi arã Hesu reroviaha kwéry-pe upe oiporu kwaa e'ỹ nhe'ẽ-py onhe'ẽ va'e.

⁶ Agwahẽ-tama upe-py, xe re'ýi kwéry. Agwahẽ rire anhemonhe'ẽ ramo ereiporu kwaa e'ỹ nhe'ẽ-py napopytygwõi arã. Napehendu kwaái-gwi napopytygwõi arã. Jaiporu kwaa nhe'ẽ-py ae amombe'u ramo Nhandejáry rehewga nhe'ẽ peẽ-my apopytygwõ arã. Nhandejáry nhe'ẽ jaikwaa e'ỹ va'ekwe ha'e oikwaa uka xe-vy amombe'u jevy ramo peẽ-my apopytygwõ ave arã. Arandu nhe'ẽ amombe'u ramo peẽ-my apopytygwõ ave arã. Nhandejáry nhe'ẽ-py amombe'u ramo peẽ-my apopytygywõ ave arã. Anhe'ẽ ramo ae jaiporu kwaa e'ỹ va'e xejéupe mate anhepytygwõ arã.

⁷ Nhande rekove va'e nhanhe'ẽ voi. Nhambopu va'e kwéry hekove e'ỹ va'e ipu ave. Upéixa mimby onhe'ẽ, harpa ipu ave. Nombopu kwaái va'e ae ombopu rei ramo naporãi arã nhande-vy. Nanhahendu kwaái arã.

⁸ Ha upéixa ave capitão rembigwái nomonhe'ẽ porãi ramo gwemimbyg-wasu, soldado kwéry nohendu kwaái va'erã. Nohendu kwaái-gwi ndoikwaái arã ave onhorairõ hagwã óra.

⁹ Upéixa ave pende kwéry. Erenhe'ẽ ramo ereiporu kwaa e'ỹ va'e avave nohendu kwaái arã. Nhandejáry mate ohendu kwaa va'erã. A pygwa erenhe'ẽ e'ỹ va'e-rami oiko va'erã ne renduha kwéry.

¹⁰ Oĩ heta eta nhe'ẽ ko yvy pygwa onhe'ẽ va'e. Nhe'ẽ ambue mbue kente kwéry oiporu. Upe nhe'ẽ oiporu va'e ohendu kwaa ave onhe'ẽ.

¹¹ Ha oiporu e'ỹ va'e nohendu kwaái. Nhahendu ramo nhe'ẽ ambue, nanhahendu kwaái voi. “Nhande re'ýi e'ỹ nipo ra'e” ja'e ojóehe. “Nanhahendu kwaái ete inhe'ẽ” ja'e ojóehe.

¹² Ha peẽ katu, aikwaa-ma ra'e pende rekoha. Pejerure rure ra'e peikovy Nhandejáry-pe Nhe'ẽ Marangatu tee va'e remime'ẽrã peipota eterei-gwi ra'e. Upéa-rehe ha'e-ta peẽ-my, tapejerure katu hemime'ẽrã iporãve va'e ome'ẽ hagwã peẽ-my peipytygwõ porã hagwã Hesu reroviaha va'e kwéry-pe.

¹³ Upéixa ave nde, nhe'ẽ ereiporu kwaa e'ỹ erenhe'ẽ va'e, ejerure katu Nhandejáry-pe eremombe'u jevy hagwã upe ne nhe'ẽgwe ne renduha nhe'ẽ-py ave eremombe'u hagwã.

¹⁴ Xe ambojeupi upi xe nhe'ẽ Nhandejáry-pe. Aiporu kwaa e'ỹ nhe'ẽ-py ambojeupi jave xe nhe'ẽ xe py'apy-py mate aikwaa Nhandejáry ndive

anhomongetaha, xe arandu reheve nanhe'ẽiry. Ndaikwaái xe upe anhe'ẽ va'e.

¹⁵ “Mbava'e tipo ajapo-ta upéixa ramo?” aporandu xejéupe. Tanhomoneta Nhandedjáry ndive xe py'apy ete anho reheve, tanhomoneta ave xe arandu reheve ave. Taporahéi Nhandedjáry-pe. Xe py'apy ete anho reheve taporahéi íxupe nhe'ẽ aiporu kwaa e'ŷ reheve. Taporahéi ave íxupe xe arandu reheve ave nhe'ẽ aiporu kwaa reheve.

¹⁶ Eremomba'egwasu ramo Nhandedjáry-pe nde py'apy ete reheve nhe'ẽ ereiporu kwaa e'ŷ reheve erenhe'ẽ ramo nohendu kwaái va'e nomoõ porã peteĩ kwaái va'erã onhe'ẽ ne nhe'ẽ ndive. No'ã-rami ndikatúi arã he'i: “Upéixa voi xe ave atimase ave nde-vy oromomba'egwasu hagwã” nde'íry va'erã Nhandedjáry-pe. Nohendu kwaái-gwi nomopeteíry onhe'ẽ ne ndive.

¹⁷ Nhe'ẽ ereiporu kwaa e'ŷ-py erenhe'ẽ ramo eremomba'egwasu porã Nhandedjáry-pe. Nde rapixa-pe ae nderepytygwõiry, ne ndive ojogweroaty va'e kwéry-pe nderepytygwõi arã. Nohendu kwaáiry upe va'e nhe'ẽ-gwi ne ndive nomomba'egwasu joái arã Nhandedjáry-pe.

¹⁸ Xe katu aiporu kwaa e'ŷ va'e-py anhe'ẽ nhe'ẽ voi. Hetave tave pendéhegwi anhe'ẽ upéixa. Upéa-rehe atima porã Nhandedjáry-pe.

¹⁹ Upéixa anhe'ẽ ramo jepe Hesu reroviaha va'e kwéry ojeporahéi haty-py ohendu kwaa nhe'ẽ aiporuse joty amombe'u hagwã íxupe Nhandedjáry nhe'ẽ. Anhe'ẽ mbuku ramo aiporu kwaa e'ŷ va'e nhe'ẽ-py nohendu kwaái arã xe nhe'ẽ. Iporâve anhe'ẽ mixïve ohendu kwaa nhe'ẽ-py oikwaa porã hagwã xe remimombe'ukwe.

²⁰ Xe re'ýi kwéry, ani peiko mitã reko-rami penhemoneta ramo pende py'apy-py. Pekakwaapa-ma. Pene arandupa-ma. Arandu porã-rupi peiko katu. Hembiapo vai ndojapo kwaái mitã-rami, peẽ ave, ani erejapo vai kwaa tei. Pejapo porã kwaa ae katu.

²¹ Yma omoõ araka'e Nhandedjáry nhe'ẽ kwatia-rehe judeu kwéry rehewa. “Amombe'u-ta ko tetã mygwa-pe, he'i Nhandedjáry. He'ýi e'ŷ va'e ave ambou-ta omombe'u hagwã íxupe kwéry. Nhe'ẽ ambue-py omombe'u-ta. Ha nohendu mo'ãi va'erã nohenduséi-gwi. Na xe renduséiry ha'e kwéry, he'i Nhandedjáry.”*

²² Upéixa-gwi nhanhe'ẽ ramo jaiporu kwaa e'ŷ nhe'ẽ-py heroviaha e'ŷ va'e oikwaa hagwã Nhandedjáry pu'aka-rupi nhanhe'ẽ. Ndaha'éi ohendu hagwã nhane nhe'ẽ Hesu reroviaha va'e. Nhamombe'u ramo ae Nhandedjáry nhe'ẽ-py ha'e ombe'e kwaa ukaha nhande-vy, heroviaha kwéry oikwaa porã hagwã joty nhamombe'u upéa. Ndaha'éi heroviaha e'ŷ va'e pegwarã.

²³ Tapene mandu'a porã kena Hesu reroviaha kwéry ojogweroaty ramorehe. Penhe'ëmba joa ramo peiporu kwaa e'ŷ va'e ambue mbue-py, mbava'e tipo he'i arã pende-rehe umi upeixagwa nohendukwáai va'e? Umi Hesu-rehe ojerovia va'e, umi Hesu-rehe ndojeroviái va'e? Mbava'e tipo he'i va'erã pende-rehe? “Itavy nipo ra'e” he'i va'erã para'e pende-rehe.

²⁴⁻²⁵ Ha Nhandedjáry nhe'ẽ-py peteĩ tei omombe'u ramo mba'e ha'e oikwaa uka íxupe, ou ramo nhe'ẽ ambue-rehe ndoikwaái va'e, umi Hesu-rehe ojerovia va'e, umi Hesu-rehe ndojeroviái va'e, ohendu kwaa arã pene remimombe'u. Ipy'a ete-py onhemi oĩ va'e gwive Nhandedjáry ombojekwaa arã para'e íxupe. “Xe py'apy pygwa oikwaapa nipo Nhandedjáry ra'e. Ne'írã aikwaa porã hesegwa nhe'ẽ” he'i va'erã para'e pene rendu-vy. Upe he'i-vy onhesü arã para'e omomba'egwasu hagwã Nhandedjáry-pe “Nhandedjáry oiko nipo ko pene pa'ü-my ra'e” he'i arã para'e ojogweroaty va'e kwéry-pe.

* ^{14:21} Is 28.11-12

Mba'éixa pa jaiko jajogweroaty ramo Nhandejáry réry-py

²⁶ Amombe'u-ta peẽ-my, xe re'yi kwéry, mba'éixa peiko hagwã pejogweroaty ramo Nhandejáry réry-py. Tapenhopytygwõ kena peiko porâve hagwã Nhandejáry reko-rupi. Oĩ va'erã porahéi ogwereko va'e oporahéi va'erã omboete hagwã Nhandejáry-pe. Oĩ va'erã ombo'e va'e, oĩ va'erã mba'e Nhandejáry oikwaa uka íxupe, gwembigwaa e'ÿge omombe'u va'e. Oĩ va'erã oiporu kwaa e'ÿ reheve onhe'ë va'e. Oĩ va'erã omombe'u kwaa va'e upéixa oiporu kwaa e'ÿ va'e nhe'ë-py pehendu hagwe omombe'u jevy va'erã. Upéixa pejogweroaty ramo penhopytygwõ kena peiko-vy.

²⁷⁻²⁸ Oĩ ramo oiporu kwaa e'ÿ va'e nhe'ë-py onhe'ëse va'e, tonhe'ë mokõi mate, terã mbohapy. Peteĩ teĩ tonhe'ë. Ha peteĩ onhe'ë rire peha'arõ omombe'u kwaa va'e omombe'u jevy hagwã upéixa nhe'ë. Omombe'u rire ae tonhe'ë ambue va'e oiporu kwaa e'ÿ va'e nhe'ë-py. Ha ndaipóri ramo omombe'u kwaa va'e, nde, erenhe'ëse va'e ekirirí eiko-vy pejogweroaty haty-py. Nde py'apy-py mate erenhe'ë, Nhandejáry ndive mate erenhe'ë upéixa nhe'ë ambue-py.

²⁹ Oĩ ramo mba'e Nhandejáry oikwaa uka íxupe omombe'use va'e, tomombe'u mokõi va'e mate, terã mbohapy. Peteĩ teĩ tonhe'ë. Omombe'u jave tapejeapysaka porã tapeporandu randu pende py'apy-py hemimombe'ukwe-rehe: "Anhetegwa para'e terã nainhetegwái para'e" peporandu pehendu jave. Tapejeapysaka porã anhetegwa nhe'ë-rehe mate perovia hagwã.

³⁰ Nhandejáry oikwaa uka ramo onhe'ë ambue va'e-pe tokirirí henonde va'e gwapixa omombe'u hagwã.

³¹ Heta va'e-pe Nhandejáry oikwaa uka va'erã onhe'ë-py omombe'u hagwã. Upéixa ramo peteĩ teĩ tomombe'u enterove ohendu hagwã. Upéixa penhopytygwõ va'erã penhomokyre'ÿ va'erã peikwaa porâve hagwã Nhandejáry rehegwa nhe'ë.

³² Nhandejáry nhe'ë-py omombe'u va'ety oha'arõ kwaa va'e. Onhe'ëse ramo onhe'ë, nonhe'ëséi ramo, nonhe'ëi ave. Oha'arõ kwaa.

³³ Nhandejáry nhane renói jaiko porã hagwã. Héry-py jajogweroaty ramo upéixa oipota ave. Ndaha'ëi jajogweroaty nhanhe'ëmba rei hagwã héry-py. Jaiko porã hagwã nhane renói va'ekwe.

³⁴ Hesu reroviahva va'e ojogweroaty ramo tokirirí katu kunha kwéry. Ani penhe'ëmba rei teĩ. Opa tetã-rupi oiko upéixa. Upéixa voi ave Moisés amyrí remimombe'ukwe judeu kwéry rekoharã. Niporãi kunha onhemonhe'ë ojogweroaty haty-py.

³⁵ Oikwaase va'e toporandu oména-pe. Gwóga-py ae oporandu íxupe. Niporãi oporandu ojogweroaty ha-py ijayvu hagwã.

³⁶ Ndapevy'ái para'e ko xe remimombe'ukwe-rehe. Ndaha'ëi pendehegwigwa oiko Nhandejáry nhe'ë. Ixugwigwa voi oiko. Ndaha'ëi ave peẽ-my gwarã mate omombe'u uka onhe'ë. Opa-rupi oiko va'e kwéry pegwarã ave Nhandejáry nhe'ë.

³⁷ Oĩ ramo hi'arandu porã va'e, Nhe'ë Marangatu tee va'e nhe'ë-rupi oiko meme va'e pene pa'ü-my no'ã-rami he'i arã xe-rehe: "Nhandejáry nhe'ë tee voi omombe'u Paulo. Nhandejáry réry-py voi ohai araka'e ko kwatia jaiko hagwã Nhandejáry remimbota-rupi" he'i arã xe-rehe. Oĩ ave Nhandejáry nhe'ë-py omombe'u va'ety upéixa ave he'i arã xe-rehe, ko kwatia-rehe ave.

³⁸ Oĩ ramo gwí a-rami he'i va'e "Xe-vy niporãi upéixa he'i ramo xe nhe'ë-rehe ani teĩ pejerovia hese. Ani ave pepena teĩ hese.

39 Xe re'yi kwéry, Hesu reroviaha va'e kwéry, tapejerure katu Nhandejáry-pe hemime'érā peẽ-my gwarã-rehe pemombe'u hagwã inhe'ẽ-py mba'e ha'e oikwaa uka peẽ-my. Ha ani teĩ peje avave-pe pejoko-vy "Ani erenhe'ẽ ereiporu kwaa e'ŷ va'e nhe'ẽ-py". Upéixa ani teĩ peje ojóupe.

40 Pejogwerroaty ramo Nhandejáry réry-py, peiko porã heko-rupi. Ani teĩ pende ayvu rei rei upe-py.

15

Cristo oikove jevy va'ekwe

1-2 Tapene mandu'a katu, xe re'yi kwéry, Hesu reroviaha va'e, Hesu Cristo rehewa nhe'ẽ porã amombe'u va'ekwe-rehe. Pehendu-ma va'ekwe, pejerovia-ma Hesu-rehe. Pene mbopy'a potũ-ma araka'e. Hesu Cristo rehewa nhe'ẽ perovia-magwi omboyke-ma pendéhegwi pene rembiapo vaikwe Nhandejáry. Pejerovia rei ramo napene resendéi arã araka'e. Áy peve ndapeikói arã ra'e inhe'ẽ-py.

3 Ko nhe'ẽ Nhandejáry omombe'u va'ekwe xe-vy, amombe'u jevy va'ekwe peẽ-my ha ãy katu amombe'u jevy-ta peẽ-my. Amombe'u ranhe-ma va'ekwe Cristo rehewa nhe'ẽ porã. Ha'e omano va'ekwe omboyke hagwã nhandéhegwi nhane rembiapo vaikwe. Yma araka'e Nhandejáry omotenonde Hesu rehewa nhe'ẽ kватia-rehe oĩ va'e. Omombe'u hagwéixa Hesu omano.*

4 Omano rire omoi itakwa-py hetekwe. Ita-gwi ojo'o va'ekwe-py omoi rire hetekwe onhomboaty itakwa rokë. Upéi mokõi pyhare rire omopu'ã jevy íxupe Nhandejáry omoingove jevy íxupe. Tenonde-rupi inhe'ẽ kватia-rehe oĩ va'e oiko hagwã omoingove jevy íxupe Nhandejáry.*

5 Ha oikove jevy-ma ramo ojehexa uka jevy Pedro-pe. Upe rire ojehexa uka jevy doze gwemimondo kwéry-pe.

6 Upe rire katu ojehexa uka jevy gweroviaha va'e kwéry-pe. Quinhentos onhomboaty jave ojehexa uka jevy íxupe kwéry. Áy peve heta vyteri oĩ hexahare. Ha heta ave hexahare omano-ma va'e ave.

7 Ha upe quinhentos-pe ojehexa uka jevy rire, ojehexa uka jevy Tiago-pe. Upéi gwemimondo kwéry onhomboaty-ma jave ojehexa uka jevy íxupe kwéry.

8 Ha ipaha ete-py ojehexa uka jevy xe-vy ave. Are oikove jevy rire ojehexa uka jevy xe-vy. Upéa-gwi mitã ohasa hi'áry oiko hagwã va'e-rami xe anhembopyahu.

9 Upéixa-gwi ave Hesu remimondo ambue kwéry imba'egwasuve voi xéhegwi. Yma va'ekwe xe areko asy asy Hesu Nhandejáry reroviaha va'e kwéry-pe. Upéa-rehe ãy peve apyta atí. "Xe ave Hesu remimondo va'e" ha'e ramo xe mandu'a jevy xe rekokwe-rehe ha xe motí jevy.

10 Nhandejáry ae xe poriahuverekha xe rexakwaa rei-ma. Héry-py xe aiko Hesu remimondo ramo. Ha ndareíry xe poriahuverekha Nhandejáry. Hemimondo tee voi ko xe. Amba'apo hetave tave enterovéa-gwi. Hemimondo va'e ambue kwéry-gwi amba'apove xe. Ndaha'éiry xe ae rei xejéhegwi xe mbaraete amba'apove. Cristo xe mombaraete xe momba'apo hagwã. Upéixa-gwi xe rapixa kwéry-gwi xe amba'apove.

11 Hesu Cristo rehewa nhe'ẽ porã mate amombe'u mbe'u peẽ-my va'ekwe. Hesu remimondo va'e kwéry ave hesegwa nhe'ẽ mate omombe'u araka'e ave peẽ-my. Upéixa voi ore, Hesu remimondo va'e kwéry hesegwa nhe'ẽ tee mate oromombe'u. Ha peẽ katu Hesu-rehe pejerovia araka'e. Ore remimombe'u-rupi pejerovia hese.

* **15:3** Is 53.5-12 * **15:4** Sl 16.8-10; Os 6.2

Cristo oikove jevy-gwi kente kwéry oikove jevy ave va'erã

12 “Cristo omano ete rire Nhandejáry omoingove jevy íxupe” oro'e meme oromombe'u-vy. Upe oro'e javé oí umi pene pa'ú mygwa outro nhe'ẽ omombe'u rei. He'i “Ndoikove jevýi omano hagwe rire” he'i rei. Anhetegwa e'ŷ omombe'u peẽ-my.

13-15 Tapene mandu'a porã katu. “Omano va'ekwe ndoikove jevýi” peje rei ramo “Ndoikove jevýi nipo ra'e Hesu” peje va'erã mo'ã Hesu-rehe. Ha pemombe'u joavy avypa hesegwa nhe'ẽ. Hesu Cristo ko oikove jevy-ma voi katu. Pende tavy-ma voi. Peje ramo ra'e “Ndoikove jevýi nipo ra'e Hesu” pende tavy voi. “Nhandejáry omoingove jevy-ma Cristo-pe” oromombe'u meme katu peẽ-my. Omano va'ekwe oikove jevy e'ŷ ramo ra'e, Cristo ndoikove jevýi-ma va'ekwe ra'e. Upéixa ramo ra'e Nhandejáry nomoingove jevýi-ma va'ekwe íxupe ra'e. Ha ore remimombe'u Cristo rehewa nhe'ẽ anhetegwa e'ŷ ra'e. Nhandejáry-rehe oro'e rei rei ra'e ore apu ra'e hese. Ore ko ndore apuí va'e voi. Anhetegwa nhe'ẽ voi oromombe'u peẽ-my Hesu rehewa nhe'ẽ. Nhandejáry ko omoingove jevy joty-ma íxupe. Anhetegwa voi upéa.

16-18 Omano va'ekwe ndoikove jevýi ramo ra'e Cristo ave ndoikove jevýi va'ekwe ave ra'e. Ha ha'e-ta peẽ-my Cristo ndoikove jevýi ramo ra'e pejerovia rei araka'e Hesu-rehe ra'e. Peiko vyteri ra'e pene rembiapo vai rehewe, pende py'a ky'a vyteri ra'e peiko-vy. Ha upe Hesu reroviaha kwéry omano araka'e va'e onhehundipa-ma ave ra'e.

19 Ko yvy-py mate ovale ramo ra'e nhande-vy Hesu-rehe jajeroviaha, javy'are'ŷve va'erã ra'e enterovéa-gwi. Ndoikove jevýi ramo ra'e Cristo, nhamano ramo oikove jevy e'ŷ-gwi ra'e, nanhande poriahuverekói arã voi ra'e Cristo. Upéixa ramo ra'e ko yvy-py mate javy'a arã jaiko-vy ra'e. Nhande tavy tee-ma arã ra'e jaiko-vy. Nhande vy'are'ŷ eterei-gwi ra'e avave nanhande poriahuverekó kwaái arã ra'e.

20 Oikove jevy-ma joty Hesu. Anhetegwa voi hesegwa nhe'ẽ. Nhandejáry omoingove jevy va'ekwe íxupe. Nhane renonde va'e voi oiko-ma Hesu Cristo. Nhandejáry omoingove jevy va'ekwe íxupe. Ha upéa-rehe oikwaa uka nhande rekorã nhande-vy. Hesu reroviaha va'e omano va'ekwe omoingove jevy-ta ave Nhandejáry.*

21 Enterove ko yvy pygwa omano-ta peteĩ kwimba'e rembiapo vaikwerupi. Upéixa ave enterove oikove jevy-ta peteĩ kwimba'e rembiapo porãkwerupi.

22 Nhande ko yvy arigwa myamyrí Adão remiarirõre kwéry voi nhande. Upéa-gwi ha'éixa nhamano jevy va'erã. Upéixa ave Cristo-rami jaikove jevy va'erã. Hese jajerovia-gwi nhane moingove jevy-ta Nhandejáry.

23 Peteĩ teĩ omoingove jevy-ta Nhandejáry ipy'a potĩ va'e kwéry-pe. Tenonde-rupi omoingove va'ekwe Hesu Cristo-pe. Hesu ogwejy jevy ou-vy ramo omoingove jevy-ta gweroviaha kwéry-pe.

24-25 Upéi katu Hesu-rehe ndaija'ei va'ekwe mbaraetekwe Nhandejáry oipe'apa jevy-ta íxugwi kwéry. Ndaipu'akavéi-ma va'erã teko vai rehewa járy, pytumbóry járy ave, yvy arigwa járy ave, áry járy ave, ko mundo járy ave, mburuvixa kwéry ave. Ndaipu'akavéi-ma upéixa ramo ha'e kwéry. Mba'eve-rehe ndaipu'akavéi-ma va'erã hikwái. Oimbaraetepe'apa-ma va'erã íxugwi kwéry. Avave ndoikovéi-ma va'erã ipogwy-py. Hesu nhe'ẽ-py mate oiko va'erã hikwái. Ha upéi katu Hesu omoĩ mbaete va'erã Nhandejáry pogwy-py. Mburuvixa tee ramo-ma oiko va'erã Nhandejáry. “Nde ae Tupã Nhandejáry

* **15:20** 2 Co 4.14

tee" enterove he'i va'erā íxupe. "Ne nhe'ẽ-rupi mate oroiko-ta" he'i va'erā ave íxupe. Ha upe mboye Nhandejáry omoĩ ranhe va'erā opaixagwa Hesu pogwy-py, ipu'aka-rupi omanda hagwā hese kwéry. Hese ija'e'ŷ va'ekwe gwive jepe, íxupe ohayhu e'ŷ va'ekwe jepe ipogwy-py joty oiko va'erā. Inhe'ẽ-py joty voi oiko va'erā.*

²⁶ Ha nhande katu, yvy arigwa kwéry jakyhyje hyje jaiko-vy nhemano-gwi. Nhande jukaharā-gwi jakyhyje voi. Nhandejáry mburuvixa tee ramo oĩ ramo opa-tama nhandéhegwí nhemano. Hesu oiko ramo mburuvixa ramo avave nomano mo'ãvēj-ma ya'erā.

²⁷ Upéa-rehe Nhandejáry nhe'ẽ kwaitia-rehe oĩ va'e he'i:
"Hesu pogwy-py Nhandejáry omoĩ-ma opaixagwa ko yvy pygwa, yváy pygwa,
yvy arigwa ave, pytūgwy pygwa járy gwive optya Hesu pogwy-py.
Nhandejáry oipe'a-ta ipu'akakwe íxugwi kwéry enterove oiko hagwā
Hesu nhe'ẽ-py"*

he'i Nhandejáry nhe'ẽ kwaitia-rehe. Tupā Nhandejáry ae katu nonhemoingói arā Hesu pogwy-py.

²⁸ Tupā Nhandejáry omoingo-ma rire enterove Hesu pogwy-py, Hesu nhe'ẽ-py oiko-ma rire enterovéa, Hesu onhemoingo jevy va'erā Tupā Nhandejáry pogwy-py. Tupā Nhandejáry omoĩ ranhe-ta enterove Hesu pogwy-py. Upe rire Hesu he'i arā gwu-pe "Xe aiko-ta nde pogwy-py. Eremoĩ-ma enterove xe pogwy-py. Ha xe katu anhemoĩ jevy nde pogwy-py". Upe-ma ramo Tupā Nhandejáry oiko va'erā mburuvixa ete ramo. Inhe'ẽ tee-rupi ipu'aka tee-rupi oiko va'erā enterove. Tupā Nhandejáry tee mburuvixa-ma va'erā. Opa e'ŷ va'erā Tupā Nhandejáry mburuvixa teeha.

²⁹ Gwī pene pa'ũ mygwa onhemongarai uka gwe'ýi omano va'ekwe rekoria. Upe jave oĩ ave pene pa'ũ-my "Omano va'ekwe nomoingove mo'ãi Nhandejáry" he'i rei va'e. Ma'erā napembojojáiry pende reko pene nhe'ẽ-rehe? Ndoikove jevýi ramo ra'e omano va'ekwe onhemongarai uka rei arā araka'e omano va'ekwe rekoria.

³⁰⁻³¹ Ha ore katu, orohasa asy meme katu. "Hesu oikove jevy-ma" oromombe'u-gwi ore mbohasa asy hikwái. Ndoikove jevýi ramo ra'e omano va'ekwe, ahasa asy rei arā ra'e aiko-vy. Omano va'ekwe omoingove jevy joty Nhandejáry. Upéixa-gwi ndahasa asy reíry aiko-vy. Cada ko'ẽ ko'ẽ xe mbohasa asy. "Xe juka-tama" ha'e jave xe py'agwapy-ma, avy'a vyteri. Xe re'ýi kwéry, Hesu reroviahā va'e, pejerovia-gwi xe remimombe'ukwe-rehe xe mandu'a ramo pende-rehe xe avy'a voi. Peteíxa jajerovia Nhandejáry Hesu Cristo-rehe upéa xe mbovy'a joty ahasa asy jave.

³² Ha ko'a-py ave Éfeso tetā-my haimete-ma xe juka va'ekwe hikwái. Mymba poxy nhande jukaharā-gwi nhane renohē va'e-rami aiko ko'a-py. Xe ndive onhe'ẽ poxy poxy va'e pa'ũ-my aiko ramo "Xe juka-tama" ha'e mo'ã jevy xéjehe. Tekoha rei-rupi aiko ramo ra'e upéixa, xe tavy rei arā ra'e. Hesu oikoveha-rupi ae aiko katu. Omano va'ekwe ndoikove jevýi ramo ra'e iporāve arā ra'e jaiko ramo ra'e teko rei nhe'ẽ-rupi. "Ko'ẽ ramo nhamano-ta para'e. Jakaru katu, jaka'u katu" he'i rei Hesu reroviahā e'ŷha. Ha omano va'ekwe ndoikove jevýi ramo ra'e anhetegwa ra'e inhe'ẽ.*

³³ Ani pejejavy tei. Ani ereheja avave pene mbotavy rei tei. "Hapixa tavy ndive oiko va'e oipe'a gwapixa rekoha ha'e ave" jaikwaa meme. Ani penhembotavy rei tei.

³⁴ Taperova katu pende rekoha. Anive pene rembiapo vai reheve peiko tei. Oĩ pene pa'ũ mygwa Nhandejáry reko kwaa e'ŷ va'e. Pemombe'u e'ŷ va'e

* 15:24-25 Sl 110.1 * 15:27 Sl 8.6 * 15:32 Is 22.13

íxupe. Ma'erã-gwi napetíry upéa-rehe? Pende rekoha porã ramo pembojerovia va'erã Hesu-rehe pene pa'ũ mygwa kwéry-pe. Taperova katu pende rekoha.

Mba'eixagwa pa oikove jevy va'e rekorã?
(Rm 8.10-11; Fp 3.21)

³⁵ Gwĩ pene pa'u mygwa a-rami oporandu va'erã “Mba'éixa oikove jevy-ta? Mba'eixagwa oiko va'erã heterã omoingove jevy ramo?” oporandu va'erã.

³⁶ Upéixa peporandu ramo, napene arandu porãi, xe re'yí kwéry. Mba'e ra'ŷi nhanhoty. Ndaha'ei mba'e ra'ŷi jevy jahexa va'erã. Ojeka ranhe arã henhói hagwã.

³⁷ Tuvixa va'e nanhanhoty mo'âiry. Mba'e ra'ŷi meme nhanhoty. Ha ndaha'ei peteixa mba'e ra'ŷi. Oĩ trigo ra'ŷi. Oĩ kumanda ra'ŷi. Ha'ŷi ambue mbue va'e nhanhoty.

³⁸ Nhandejáry ae katu omohenhói kwaa mba'e ra'ŷi-gwi temitýrã henhói hagwã. Hemimbota-rupi peteĩ teĩ-pe ome'ẽ imáta teerã.

³⁹ Ndapeteĩxai ave to'o. Oĩ nhande ro'o. Oĩ ave mymba ro'o, gwyra ro'o, pira ro'o. Opamba'e ro'o oĩ.

⁴⁰ Upéixa ave ndaha'ei peteixa oiko va'e oikove va'e ndive. Oĩ yváy pygwa va'e. Oĩ ave ko yvy arigwa va'e ave.

⁴¹ Ndapeteĩxairy ave hembipe va'e kwéry. Oĩ kwarahy resakã. Oĩ jasy rembipe. Oĩ ave jasytata rembipe. Peteĩ teĩ jasytata rendy oiko ambue mbue onhoendy-gwi.

⁴²⁻⁴³ Upéixa ave Nhandejáry omoingove va'erã omano va'ekwe-pe. Nhamano ramo nhane retekwe inemba va'erã voi. Nhane moingove jevy-ma ramo nhande reterã ine e'ŷ va'erã. Jahexase e'ŷ va'e voi nhande retekwe, nhanhoty va'e íxupe. Ndovallevéi va'e. Hu'ũmba-ma nhande retekwe. “Ivai eterei” ja'e-ma hese. Jaikove jevy-ma ramo iporã va'erã nhande reterã. Nhandejáry opu'akaha reheve nhane moingove-gwi iporã porã va'erã nhande reterã.

⁴⁴ Yvy pygwa voi nhande retekwe. Nhanhoty íxupe. Oikove jevy-ma ramo yváy pygwa oiko jepe nhande reterã. Nhaime jave ko yvy-py, nhande rete yvy arigwa voi. Nhane moingove jevy-ma ramo Nhandejáry, Nhe'ẽ Marangatu tee va'e omoingo-ta nhande-vy nhande reterã yváy pygwarã.

⁴⁵ Nhandejáry kwtia nhe'ẽ ko'a-rami he'i:
“Nhandejáry ojapo va'ekwe kwimba'e ypyrã. Hekove va'e kwimba'e ypy.

Héry va'e Adão.”* Ko'âygwa kwimba'e héry va'e Hesu ndaha'ei Adão-rami. Imarangatu ete va'e. Omoĩ uka kwaa va'e opamba'e. Ou va'ekwe kwimba'e reko oiporu-vy. Yváy pygwa voi Hesu.

⁴⁶ Upe mokõi kwimba'eixagwa ave nhande. Oiko ranhe nhande rete ko yvy arigwa. Upe rire ae katu oiko arã nhande reterã yváy pygwarã.

⁴⁷ Ha kwimba'e ypy ko yvy ári gware voi. Yvy ku'i-gwi Nhandejáry ojapo íxupe araka'e. Ko'âygwa kwimba'e ae, Hesu yváy pygwa voi.

⁴⁸ Ha'e-ta ave peẽ-my entéro ko yvy arigwa va'e kwimba'e ypy oiko hagwe-rami. Hete yvy ku'i rei. Hesu reroviah Hesu-rami voi oiko va'erã. Yváy pygwarã meme. Hesu rete-rami yváy pygwa meme heterã.

⁴⁹ Ko'ây nhande rete kwimba'e ypy rete-rami. Yvy ku'i gwigwa ave nhande rete. Upéixa ave nhane moingove jevy ramo Hesu rete-rami nhande reterã oiko va'erã. Yváy pygwa voi jaiko va'erã.

⁵⁰ Pene mandu'a porã kena ko xe remimombe'u-rehe, xe re'yí kwéry, Hesu reroviah va'e kwéry. Tupã Nhandejáry renda-py nhande ruvixa va'e oĩ

* 15:45 Gn 2.7

ha-py nogwahē mo'āi ine va'erā. Upéixa-gwi nhande rete ko yvy arigwa, nhande ro'o, nhande rugwy gwive nogwahē mo'āi henda-py. Ine e'ŷ va'e mate ogwahē va'erā upe-py. Onhembopyahu jevy-ta nhande-vy nhande rete.

⁵¹ Pejeapysaka porā katu xe nhe'ẽ-rehe. Nhandejáry reminhongatukwe-rehe apombo'e-ta kuri. Nhande, Hesu reroviaha kwéry Nhandejáry ohekoviārō jevy va'erā nhande rete kwéry. Oĩ arā Hesu reroviaha va'e ndohupityí va'erā jepe omanoha. Hete ohekoviārō va'erā ave íxupe kwéry.

⁵² Sapy'a ete, nhande rekoviārō-ta. Tesa pirī-rami ndahi'are mo'āiry. Hemimbygwasu paha omonhe'ẽ jave nhande rekoviārō-ta Nhandejáry. Omonhe'ẽ-ta hemimbygwasu. Ha upéi katu entéro Hesu reroviaha omano va'ekwe gwive oikove jevy va'erā. Omoingove jevy-ta Nhandejáry íxupe kwéry. Omoingove jevy-gwi Hesu reroviaha rete gwive ine e'ŷ va'erā. Ha upe jave jaikove vyteri ramo, nhande rete rekoviārō-ta. Nanhamanovéi-ma va'erā. Ine e'ŷ-ma va'erā nhande reterā.

⁵³ Upéixa voi tekotevē ohekoviārō ko nhande rete ine va'erā. Nhande reterā yváy pygwa ine e'ŷ va'erā ome'ẽ-ta nhande-vy Nhandejáry. Ko nhande reko yvy arigwa ohekoviārō-ta ave nhande-vy. Yváy pygwa reko nhande rekora opa e'ŷ va'e ome'ẽ-ta nhande-vy Nhandejáry.*

⁵⁴ "Nhande rete ine va'erā oiko-ma arā ine e'ŷ va'erā, ha nhande reko yvy arigwa oiko-ma arā yváy pygwarā. Upe jave oiko va'erā Nhandejáry kwatia nhe'ẽ he'i va'ekwe: Tupā Nhandejáry oiko-ma ramo nhande ruvixa enterove omanove e'ŷ va'erā. Ojoko-ta nhandéhegwi nhane manoharāgwe. Nanhane mbohasa asyvéi va'erā nhane manoharāgwe."*

⁵⁵ "Nhande jopi va'e-rami oiko nhande-vy nhemano. Nhandejáry ae nhane moingove jevy va'erā. Upe ramo opa va'erā nhandéhegwi nhemano."*

⁵⁶ Ñy ae katu nhane rembiapo vaikwe-rehe nhemano oiko nhande-vy. Nhandejáry nhe'ẽ Moisés remimombe'ukwe nhahendu-gwi jaikwaa upe va'e.

⁵⁷ Nhandejáry ae omboyke-ma nhandéhegwi nhane rembiapo vaikwe. Nhane mombaraete pono jakyhyje nhemano-gwi. Tanhatima porā porā katu íxupe. Hesu Cristo oiko-ma nhane resendeha-gwi nhane mbopu'aka nhane mombaraete-gwi heko porā-rupi jaiko porā hagwā.

⁵⁸ Ha'e-ta jevy peē-my xe re'yí kwéry, Hesu reroviaha va'e kwéry, xe rembiayhu va'e kwéry, tapeiko porā katu. Pepyta katu Hesu rape-rupi. Ani pejere tape porā-gwi. Tapende kyre'ŷ Nhandejáry rembiapo apo-vy. Ani pene ate'ŷ Nhandejáry rembiapo pejapo hagwā. Opa hembiapo pejapo va'e gwive ndaha'ei pejapo rei va'e. Íxupe gwarā ae pejapo. Upéa nipo peikwaa porā ra'e.**

16

*Pemono'o plata peipytygwō hagwā Hesu reroviaha va'e kwéry, judeu yvy rupigwa kwéry
(2 Co 8.1-5)*

¹ Ha kwatia-rehe pehai va'ekwe xe-vy no'ā peje xe-vy: "Ore ave oroipytygwōse Hesu reroviaha va'e kwéry, Judéia yvy rupigwa kwéry. Upéa-rehe oromono'ōse ore plata hesegwarā" peje xe-vy kwatia-rehe. Iporā, pemono'ō katu. Galácia yvy pygwa, Hesu reroviaha va'e-pe amombe'u va'ekwe omono'ō kwaagwā oplata. Upéixa ave pejapo.

* 15:53 1 Co 15.24-26 * 15:54 Is 25.8 * 15:55 Os 13.14 * 15:58 1 Ts 4.13-18 * 15:58 Gl 6.9

² Domingo meme, pemono'õ plata. Heta ogwereko va'e tomono'õ heta. Ha mixĩ ogwereko va'e mixĩ mate tomono'õ. Upéixa pejapo pono aju-ma ramo peheka heka pene remime'ẽrã.

³ Agwahẽ rire amondo-ta pene remime'ẽgwe kwéry Jerusalém tetã-my. Peiporavo pene pa'ũ mygwa ogweraha hagwã. Ahai-ta ave ikwatiarã ondive ogweraha hagwã.

⁴ Ha pejohu porã ramo, xe ave aha arã pene remime'ẽrã heraha-vy. Xe ndive oho arã pene rembiporavokwe.

Mbava'e tipo ojapo-ta Paulo

⁵ Ahasa-ta aha-vy Macedônia yvy-rupi. Upe rire ae apyta-ta pene ndive.

⁶ Xe arese pene ndive. Ikatu ramo apyta va'erã arapyahu ahasa hagwã pene ndive. Upe rire xe pytygwõ va'erã ahasave hagwã mamo ahase ha-py mombyryve aha hagwã.

⁷ Nagwahẽ mo'ãi vyteri pende ha-py pya'e aha hagwã. Ajukwe-vy katu xe are-ta pende ha-py. Upéa-gwi aha'arõ aha hagwã upe-py. Nhandejáry oipota ramo xe are-ta pene ndive.

⁸ Áy ae katu aha'arõ-ta ko'a-py, Éfeso tetã-my. Aretegwasu pentecostes ahasase ko'a-py.

⁹ Oĩ heta ko'a pygwa Nhandejáry nhe'ẽ ohenduse va'e. Amombe'u mbe'u íxupe kwéry aiko-vy. Aikwaa uka porãve rãve íxupe Nhandejáry Hesu rehewa nhe'ẽ. Oĩ ave heta xe-rehe ija'e'ý va'e, "Hesu nhe'ẽ pene mbotavy va'erã" he'i ipoxy-vy xe remimombe'u-rehe hikwái.

"Pemogwahẽ porã kena Timóteo, Apolo ave" he'i Paulo

¹⁰ Xe ramigwa Timóteo ave omombe'u mbe'u Hesu rehewa nhe'ẽ. Upéixa-gwi ogwahẽ-ma ramo pende ha-py Timóteo, pepytygwõ katu íxupe. Pembovy'a íxupe opyta porã hagwã pene ndive.

¹¹ "Ipyahu eterei-gwi nahendu mo'ãi inhe'ẽ" ani peje teĩ hese. Ani pepyrû teĩ inhe'ẽ-rehe. Pepytygwõ íxupe ave pembopy'agwapy íxupe ogwahẽ jevy porã hagwã ko xe ha-py. Ahexa nga'u íxupe. Nhande re'ýi kwéry ndive ou va'erã. Aha'arõ aiko-vy íxupe kwéry ko'a-py.

¹² Ha nhande ryke'y ramigwa Apolo ave. Ajerure meme íxupe oho hagwã pende ha-py. "Tereho katu Corinto tetã-my, Hesu reroviahva va'e kwéry erehexa hagwã. Tereho nhande ryvy kwéry ndive" ha'e meme íxupe. Ha "Ko'ãy ndikatúi aha upe-py" he'i xe-vy. Ome'ëha óra-py oho-ta pende ha-py.

Kwatia nhe'ëpaharã ohai Paulo

¹³ Penhangareko katu pendéjehe pono pene mbojere Cristo rape-gwi. Pejepyhy katu Nhandejáry-rehe. Tapenhembopy'agwasu katu. Tapenhemombaraeeteve katu peiko porã hagwã Hesu reko-rupi.

¹⁴ Tapejohayhu porã rei katu peiko-vy.

¹⁵ Ha Estéfanas, Grécia pygwa peikwaa ave para'e. Hesu-rehe ha'e ojerovia rire ae, hetã mygwa kwéry ave ojerovia ave. Hóga pygwa ave peikwaa para'e. Hesu reroviahva va'e kwéry-pe oipytygwõ tygwõ oiko-vy hikwái.

¹⁶ Pehendu kena Estéfanas nhe'ẽ, xe re'ýi kwéry, Hesu reroviahva va'e kwéry. Indive oĩ va'e nhe'ẽ ave pehendu katu. Ha'e kwéry omombe'u porã Hesu rehewa nhe'ẽ. Tapeiko ave inhe'ẽ-py.

¹⁷ Ogewahẽ-ma xe renda-py Estéfanas. Ogewahẽ-ma ave Fortunato, Acaico ave ogwahẽ-ma. Upe mbohapy va'e rexa-vy avy'a eterei. Ha'e kwéry xe pytygwõ porã ko'a-py. Peẽ peime mombyry eterei xéhegwi xe pytygwõ hagwã. Ha'e kwéry pende rekoria oĩ ko'a-py xe pytygwõ va'e.

¹⁸ Xe mbovy'a xe mokyre'ŷ eterei aiko porâve hagwâ Nhandejáry rape-rupi. Peẽ ave pene mokyre'ŷ ave araka'e ha'e kwéry peiko porâve hagwâ Hesu rape-rupi. Pehexakwaa reikatu íxupe kwéry hemikotevê-rehe. Tapejeapysaka katu ave inhe'ẽ-rehe.

¹⁹ Hesu reroviaha va'e kwéry Ásia pygwa imandu'a va'ety omondo uka pende ha-py. Áqüila, hembireko Priscila ave imandu'a va'ety omondo uka-ta ave pende ha-py. Áqüila róga-py ojogweroaty va'e Hesu reroviaha imandu'a va'ety omondo uka-ta ave pende ha-py. Hesu réry-py omondo uka peẽ-my.

²⁰ Hesu reroviaha ko'a-py oĩ va'e ave omondo uka-ta peẽ-my imandu'a va'ety. Penhoanhukwawâ kwavâ rei katu pehexa uka hagwâ pene mandu'aha Hesu reroviaha va'e-rehe.

²¹ Ây xe ave xe mandu'a va'ety amondo-ta ave pende ha-py. Xe voi ajapo xe réry xe po-rupi.

²² Oĩ ramo Nhandejáry Hesu Cristo-pe ndohayhúi va'e tombohasa asy katu íxupe mombyry ojéhegwí omondo-vy Nhandejáry. Ha Hesu-pe ae xe ha'e "Eju kena, xe Járy."

²³ Nhandejáry Hesu Cristo tapende rovasa porã katu pende rexakwaa rei-vy.

²⁴ Apohayhu voi Hesu Cristo réry-py. Amém. Opa xe nhe'ẽ.

Paulo remimombe'ukwe Coríntio tetā mygwa pegwarā 2 segunda epistola de Paulo aos coríntios

¹ Xe Paulo Hesu Cristo remimondo va'e. Nhandejáry remimbota-rupi aikoma hemimondo ramo. Xe nhande re'yí Timóteo ndive oromondo-ta kwatia-rehe ore nhe'ẽ peẽ-my gwarā. Peẽ Corinto tetā mygwa Nhandejáry nhe'ẽ-rupi penhomboaty aty va'e pegwarā orohai peẽ-my. Hesu-rehe ojerovia va'e gwive opa Grécia yvy rupigwa pegwarā orohai ave peẽ-my.

² Tapende rovasa porā katu Nhandejáry Nhande Ru tee va'e. Tapene mbopy'agwapy porā ave pende rexakwaa rei-vy. Hesegwa voi nhande. Nhandejáry Hesu Cristo rehewa voi ave nhande.

Paulo ombotuvixa mba'e imboete-vy Tupā Nhandejáry-pe

³ Tupā Nhandejáry Hesu Cristo Ru-pe tanhambotuvixa mba'e voi katu. Nhande Rugwasu voi ha'e. Nhande poriahuverekoi voi va'e ha'e. Nhande rexakwaa rei va'e voi ha'e. Nhane mbopy'agwapy va'e voi ha'e.

⁴ Jahasa asy asy ramo jepe nhane mbopy'agwapy ave va'e voi ha'e. Ha nhane mbopy'agwapy meme-gwi nhande ave jaikwaa nhande rapixa-pe ohasa asy va'e-pe nhambopy'agwapy jevy hagwā. "Xe upéixa voi ave ahasa asy va'ekwe" ja'e arā nhande rapixa-pe ohasa asy ramo imbopy'agwapy jevy hagwā íxupe. "Upe jave voi va'ekwe Nhandejáry xe mbopy'agwapy-ma va'ekwe. Xe mbopy'agwapy hagwe-rami ne mbopy'agwapy ave va'erā Nhandejáry" ja'e arā íxupe imbopy'agwapy-vy.

⁵ Cristo oiko hagwe-ramima ore ave oroiko-ma. Ohasa asy asy hagwe-rami ave orohasa asy ko'ánga ore oroiko-vy. Upe jave ore mbopy'agwapy jote Cristo. Ore mbopy'agwapy hagwe-rami ave oronhombopy'agwapy ave oroiko-vy.

⁶ Ore mbohasa asy ore momytu'e'ỹ hagwā mo'ã. Nhandejáry ae ore pytygwō meme ore py'a mombaraete jevy hagwā. Upéixa oroiko ramo peikwaa va'erā penhembopy'agwapy hagwā. Ore-rami pehasa asy ramo penhembopy'agwasu kwaa arā. "Paulo-rami ahasa asy ra'e" peje arā pendejéupe pendéjehe. "Upe jave Nhandejáry oipytygwō íxupe ra'e, ombopy'agwapy-ma ave íxupe ra'e. Nhandejáry aipo ramo xe pytygwō arā xe mbopy'agwasu hagwā ave" peje arā. "Aha'arõ-ta xe resende hagwā Nhandejáry" peje kwaa va'erā penhembopy'agwapy-vy.

⁷ Aikwaa-ma voi ra'e pejeroviah Hesu-rehe. Oroiko hagwe-rami upéixa ave peẽ peiko arā. Hesu-pe ogwerovia e'ỹ va'e pene mbohasa asy ave va'erā. Upe jave pejeroviave arā Hesu-rehe ha pene mbopy'agwapy va'erā Nhandejáry. Upe pende reko porārā-rehe orojerovia-ma.

⁸ Xe re'yí kwéry, Hesu reroviah va'e kwéry, amombe'u porāse peẽ-my, mba'e ojehu va'ekwe ore-vy. Ásia yvy-py oroiko ramo ojehu va'ekwe ore-vy. Oroiko asyha ipohýi eterei va'ekwe ore-vy. Haimete va'ekwe ndore pu'akavéi oréjehe. "Nasévéi-ma va'erā ko'a-gwi" ha'e mo'ã va'ekwe. "Amano-tama xe" ha'e mo'ã va'ekwe xéjehe.

⁹ Orojejuka uka hagwā-ramima oroiko va'ekwe Nhandejáry-rehe anho mante orojerovia hagwā. O mano va'ekwe gwive omoingove jevy va'e voi Nhandejáry Hesu Cristo. Ore orejéhegwi rei nore mbaraetéiry. Ha'e anho mate ore mombaraeteha.

10 Ha'e ore resende ore pytygwō-vy va'ekwe. Ndohejái va'ekwe oromano. Ahasa asy jevy ramo jepe, Hesundohejái voi va'erā amano hagwā ha'e va'erā xejeupe. Xe resendehaty voi Hesu. Xe ajerovia tee-ma hese.

11 Peē ave pembojeupi kuri pene nhe'ẽ ore-rehe Nhandejáry-pe ore pytygwō hagwā. Upéixa ramo heta va'e ombojeupi ramo onhe'ẽ Nhandejáry-pe ohendu va'erā ore rovasa hagwā. Upe va'e-rehe onhangareko porā va'erā ore-rehe. Ore rovasa rire petima porā kuri Nhandejáry-pe. Upéixa ramo he'i va'erā "Heta voi nipo ra'e xe mboeteha" he'i va'erā Nhandejáry.

Paulo omombe'u mbava'e-gwi po hi'are oho hagwā Corinto tetā-my

12 Ko va'e xe mbovy'a voi. Xe py'apy gwive aikwaa xe reko porāha. Hesu reroviaha e'ŷ mbyte-py, pende apyte-py, mombyrykwe-py, hi'āgwikwe-py ave peteīxa voi xe aiko Nhandejáry nhe'ẽ marangatu-rupi. Ndaha'éi yvypóry arandukwe-rupi aiko upéixa. Nhandejáry ae xe rexakwaa rei-magwi xe mo'arandu-vy, upéixa aiko. Íxupe amoete-vy apogwereko porāse.

13 Ndaha'éi apombotavy hagwā xe nhe'ẽ amoī kwatia-rehe. Amombe'u porā hagwā ae peē-my amoī kwatia-rehe pemonhe'ẽ hagwā. Xe ko peteīxa voi xe nhe'ẽ. Aipota peikwaa porā voi xe rehewa nhe'ẽ.

14 Ore rekoha rehewa peikwaa ku'a ku'a rei joty. Apombojerovia ukaseve-gwi aipota peikwaa xe rehewa nhe'ẽ. Nhandejáry Hesu ou jevy hagwā áry-py, avy'a arā pende-rehe. Upe áry-py peē ave aipota pevy'a ave arā ore-rehe.

15-16 "Ovy'a arā xe rexa-vy" ha'e mo'ã-ma xe pende-rehe. Macedônia rape-rehe aha ramo agwahēse ranhe mo'ã pende ha-py. "Upéi agwahē jevy-ta ajukwe-vy iha-py" ha'e xejeupe. "Upéixa ramo imokōiha agwahē jevy va'erā ambovy'ave hagwā íxupe kwéry" ha'e mo'ã va'ekwe pende-rehe. "Xe pytygwō hagwā ahave hagwā mombyryve Judéia yvy-py aha hagwā" ha'e mo'ã ave va'ekwe pende-rehe.

17 Ajapose va'ekwe ndajapói vyteri-gwi pene nhe'ẽ rei rei ra'e xe-rehe. "Nonhemongeta porāiry nipo ra'e opy'a ndive" peje mo'ã araka'e xe-rehe. "Ojéhegwi rei nipo ojapo araka'e" peje mo'ã araka'e xe-rehe. "Teko rei rekorupi voi nipo ra'e oiko Paulo" peje mo'ã xe-rehe. "Ajapo-ta he'i mo'ã ójeho Paulo, upéi ndojapói he'i hagwe-rami" peje mo'ã araka'e xe-rehe.

18 Heroviapyrā voi xe remimombe'u. Nhandejáry onhe'ẽ-gwi ova e'ŷ teeháixa peteī-rupi voi xe remimombe'u.

19 Ore katu, Silvano, Timóteo, xe ave, ore oromombe'u mbe'u peē-my va'ekwe Hesu Cristo rehewa nhe'ẽ. Ha'e Tupā Nhandejáry ra'y tee voi. Petēixa voi inhe'ẽ. Anhetegwa meme voi hemimombe'u. He'i hagwe-rami oiko meme-ta voi.

20 Tupā Nhandejáry omombe'u mbe'u va'ekwe gwemime'ẽrā kwéry-rehe. "Apohovasa va'erā. Nde re'yi kwéry gwive ave ahovasa va'erā" he'i voi meme va'ekwe Nhandejáry nhane ramoigwasu kwéry-pe. Hesu Cristo-rehe jajerovia tee ramo, Nhandejáry he'i hagwe-rami nhande rovasa voi va'erā. Ha'e he'i va'ekwe gwive ojapopa-ma va'erā Cristo. Upéa-rehe ja'e "Amém. Upéixa ete toiko" ja'e nhamomba'egwasu-vy Nhandejáry-pe.

21 Nhandejáry voi ore mombaraete, peē-my ave pene mombaraete pono jajere eterei Cristo-gwi. Nhande poravo va'ekwe gwe'yirā.

22 Omoī-ma nhande-vy Nhe'ẽ Marangatu tee va'e nhande py'apy pygwarā kwéry. Oime-magwi nhande py'apy-py jaikwaa-ma, nhande rerekoma-gwe'yirā Nhandejáry. Hemime'ẽrā-rehe nhaha'arõ kwaa-ma ave.*

* 1:22 Rm 8.14-15; Ef 1.13-14

²³ Mbava'e-gwi po ndahái va'ekwe pende ha-py. Nhandejáry oikwaa porã voi. Pono apombovy'are'ý rei ndaháiry. Nhandejáry oikwaa xe apu e'ý va'e voi xe.

²⁴ Ndaha'éiry voi pende-rehe amanda hagwã ahase pende ha-py. Perovia hagwã ae agwahëse upe-py. Aikwaa porã-ma Hesu-rehe pejerovia porãmaha. Upéixa apopytygwõse ae pevy'a hagwã. Kwehe ae aha ramo ra'e pende ha-py, orombovy'are'ý arã ra'e. Upéa-gwi ndahái va'ekwe pende ha-py.

2

¹ Upéa-rehe ha'e xejéupe: “Ndaha mo'ãvéri-ma xe vy'are'ý reheve pono ambovy'are'ý rei íxupe kwéry” ha'e xejéupe pende-rehe.

² Apombovy'are'ý ramo kiva'e po xe mbovy'a jevy arã. Peẽ mate xe mbovy'a jevy va'erã apombovy'are'ý rire.

³ Upéixa-gwi ahai va'ekwe peẽ-my kватia ani hagwã agwahë ramo pende ha-py xe mbovy'are'ý jevy. Aipota xe rerohory voi xe agwahë ramo pende ha-py. Ajerovia-ma voi xe pende-rehe kwéry. Xe avy'a ramo peẽ ave pevy'a arã.

⁴ Ahai ramo va'ekwe upéa kватia peẽ-my gwarã xe anhemboasy eterei ajahe'o ahai-vy avy'are'ý-gwi. Ndaha'éi pene mbovy'are'ý hagwã ahai va'ekwe peẽ-my kватia-rehe. Xe apohayhu etereiha aikwaa ukase peẽ-my.

*Mba'eixa jareko hembiapo vai va'e imytu'e'ý va'e ójehe
(Lc 17.3; Gl 6.1)*

⁵ Gwînhane mbovy'are'ý va'e oĩ ra'e pene pa'û-my. Pono xe nhe'ë asy eterei peẽ-my ha'e-ta: Xe naxe anhóiry avy'are'ý va'ekwe hese. Peẽ ave nipo perekó ave nhembyasy ra'e xe-rami ave.

⁶ Ko'ângâ ha'e-ta peẽ-my: Ha'eve-ma. Anive perekó asy íxupe hembiapo vaikwe-rehe.

⁷ Peiporahuvereko rei ae katu kuri íxupe. Pemohembiapo porã uka ae katu íxupe. Pembohory hory joty íxupe. Ani pemomytu'e'ý teĩ íxupe pono ojeahéi rei ójehe.

⁸ Upéa pejapo hagwã ajerure peẽ-my pene rembihayhu-rami joty perekó hagwã íxupe. Anive pemomandu'a teĩ íxupe hembiapo vaikwe-rehe.

⁹ Ndaha'éi ae upéa-rehe mante ahai va'ekwe peẽ-my upéa kватia. Aikwaase va'ekwe ave pende rekorã-rehe. Pejapopa-ta para'e ndapejapo mo'ãi para'e xe nhe'ë, xe remimombe'u gwive peẽ-my, xe ndaikwaáiry joty va'ekwe. Upéa-rehe ahai va'ekwe peẽ-my aikwaase-gwi.

¹⁰ Peiporahuvereko ramo íxupe aiporahuvereko ave arã xe anive hagwã nhane mandu'a hembiapo vaikwe-rehe. Oĩ-ma ramo va'ekwe xe aiporahuvereko hagwã, Hesu Cristo réry-py aiporahuvereko-ma voi íxupe. Nhandejáry Hesu Cristo oikwaa voi xe apohayhuha enterovéa-pe.

¹¹ Aiporahuvereko-ma íxupe nhande joja jevy hagwã ani hagwã anhaygwasu Satanás ipu'aka nhande-rehe. Jaikwaa-ma voi nhane mbotavy va'e anhaygwasu.

Otopase mo'ã oĩru Tito-pe Paulo

¹² Agwahë-ma ramo va'ekwe Trôade tetã-my amombe'u mbe'use mo'ã va'ekwe Hesu rehewa nhe'ë upe pygwa kwéry-pe. Xe renduharã Nhandejáry omoĩ porã-ma jepe ndaxe py'agwapýi joty xe are hagwã upe-py.

¹³ Ndaxe py'agwapýi ndatopái-gwi xe irũ Tito-pe. “Ma'erã po nogwahëi a-py” ha'e xejéupe hese. “Aha-ta Macedônia yvy-py. Upe-py para'e atopa va'erã Tito-pe” ha'e xe renduharãgwe-pe. Upéi aha jevy mombyryve Tito piari.

Cristo nhane mombaraete meme

14-15 Atima porā-ta Nhandejáry-pe. Ha'e nhane moingo-ma peteixa Cristo ndive. Opa-rupi nhane moirū nhande reraha-vy. Nhane mombaraete jaiko porā meme hagwā. "Ipu'aka voi ra'e Nhandejáry ra'e" he'i hagwā nhande rexaháry. Opa-rupi omohyakwā porā va'e-rami omoherakwā uka porā nhande-vy nhande rexaháry oikwaa porā hagwā Cristo rehewa. Upéixa ramo nhane rerakwā oiko va'erā hyakwā porā va'e-rami Nhandejáry Hesu Ru-pe. Cristo nhane mbohekoha porā. Upéi nhande rekoha pyahu rerakwā mombyry-rupi oho va'erā enterove oikwaa hagwā hesegwa nhe'ē. Nhandejáry ndive oiko va'erā, Nhandejáry ndive oiko e'ŷ va'erā ave oikwaa arā Hesu Cristo rehewa nhe'ē.

16 Ohenduse e'ŷ va'eojere arā Cristo-gwi. Nhande jegwaru va'e nan-hahetūseiha-rami, nohenduséi va'erā Nhandejáry rerakwā. Oikwaa Nhandejáry omondo hagwā mombyry ojéhegwi. Upéa-rehe ndogwerovy'airy inhe'ē. Ha gwī Hesu-rehe ojerovia va'e, hyakwā porā jarovy'aha-rami, ohenduse va'erā Nhandejáry rerakwā. Ogwerovy'a va'erā inhe'ē. Onhemboheko pyahuve huve va'erā oho-vy. Kiva'e po omoherakwā porā kwaa Cristo rehewa nhe'ē? Ojéhegwi rei ndoikóiry voi omoherakwā porā kwaa va'e Cristo nhe'ē.

17 Nhandejáry réry-py omombe'u va'e mate omoherakwā porā kwaa va'erā. Ore niko Nhandejáry remimondo va'e voi ore. Anhete teegwa voi ore remimombe'u. Oĩ ojéupe gwarā-rehe ombojopara rei gwemimombe'u Nhandejáry nhe'ē mo'ā. Ore ae katu ndaha'éi upeixagwa inhe'ē va'e. Ore ore py'a porā rehewe ae Cristo réry-py ore oroiko va'e. Hesegwa nhe'ē tee voi ore oromombe'u va'ekwe oroiko-vy.

3

Iporāve rāve Hesu rehewa nhe'ē Moisés amyrī remimombe'ukwe-gwi

1 Oĩ nipo ra'e gwī va'e ogwahē ramo pende ha-py perovia hagwā íxupe ogweraha kwatia opo-py ojekwaa hagwā hese. Ore ae katu natekotevēiry voi orogweru kwatia. Peikwaa voi peẽ ore rehewa. Ha ore rehewa peikwaa porā ramo jepe oĩ joto nipo ra'e ore-rehe onhe'ē rei va'e ra'e. "Kwatia nhe'ē-rehe Paulo ogwerovia ukase mo'ā ójehe" he'i rei voi ra'e xe-rehe. Anive upéixa erenhe'ē rei xe-rehe.

2 Ore rembihayhu voi ko peẽ. Kwatia rekoviá peẽ peiko. Ore nhe'ē renduhaty kwéry peẽ. Pende rekoha pyahu porā rexaha oikwaa va'erā ore rekoha. "Aipo ramo Nhandejáry réry-py voi nipo ra'e omombe'u inhe'ē Paulo kwéry" he'i va'erā voi ore-rehe pende rexaha kwéry.

3 Ojehai va'ekwe-rami voi omoĩ pende py'a-py onhe'ē. Pende py'a potī porā-ma enterovéa-pe peẽ. Kwatia-rehe jahai ramo tinta-py, pya'e opa va'erā. Hierro-py ojo'o ramo ita-rehe ohai-vy, upe ave pya'e opa va'erā. Nde py'a-py oĩ-ma ramo katu Nhandejáry nhe'ē, nde rekoha pyahu ndopái va'erā. Cristo rehewa nhe'ē amombe'u peẽ-my va'ekwe-gwi Nhe'ē Marangatu tee va'e pene mo'arandu-ma va'ekwe. Upe Tupā Nhandejáry oikove va'e pene mo'arandu-gwi pejerovia-ma va'ekwe hese. Pende rekoha pyahu opa e'ŷ va'e omombe'u va'erā nde rexaha-pe ore reko porāha.*

4 Ndaha'éiry voi-ma xejehegwi rei aipo ha'e peẽ-my. Cristo rembiapo apo oroikwaa porā-gwi ae aipo ha'e peẽ-my.

5 Ndaha'éiry orejéhegwi rei ore ore mbaraeote oromombe'u mbe'u hagwā Hesu rehewa nhe'ē ore renduháry ogwerovia hagwā Hesu-rehe. Ndaha'éi ave ore ae rei orejéhegwi rei ore arandu-gwi oromombe'u mbe'u hesegwa

* 3:3 Ex 24.12

nhe'ẽ. Nhandejáry ae voi ore mombaraeteha-rupi oromombe'u mbe'u hesegwa nhe'ẽ.

⁶ Ha'e ae ore mo'arandu-ma va'ekwe ore mombaraete-ma va'ekwe inhe'ẽ mombe'uharã ore oroiko hagwã íxupe. Hesu Cristo rehewa nhe'ẽ mombe'uharã ore moingo-ma va'ekwe. Nhane rembypy Moisés amyrĩ remimombe'ukwe rehewa katu ore noromombe'úi va'e ore. Nhe'ẽ Marangatu tee va'e ae ore mo'arandu Hesu Cristo rehewa oromombe'u mbe'u hagwã. "Moisés amyrĩ remimombe'ukwe ndojapói va'e nogwahẽ mo'ãi Nhandejáry renda-py" noromombe'uvéi. Iporãve ore remimombe'u. "Nhe'ẽ Marangatu tee va'e pende py'apyhy ete-ma ramo pejerovia va'erã Hesu Cristo-rehe. Peiko meme va'erã Nhandejáry ndive" oro'e meme oromombe'u-vy.*

⁷ Nhandejáry ohai uka va'ekwe Moisés amyrĩ-pe hemimombe'urã tekoha porã jareko hagwã. Ita-rehe ojo'o ohai-vy va'ekwe. Upéi Moisés ogweraha upe ita Israel re'yí kwéry-pe. Ohexa uka-ma ramo íxupe kwéry tekoha rehewa nhe'ẽ Nhandejáry nhe'ẽ ita-rehe oĩ va'e, Moisés rova ohesakapa íxupe kwéry. Upéa-gwi ndikatúi omanha va'ekwe Moisés rova-rehe hikwái. Ogwe hagwã-ramima jepe hendy mbarae tevérami jaty íxupe kwéry ohesakavy. Upéa-rupi Nhandejáry ohexa uka va'ekwe nhande-vy omba'egwasu marangatuha ombou jave nhande-vy tekoha porã rehewa nhe'ẽ ita-rehe oĩ va'e. Ha avave ndojapopáiry hemimombe'ukwe. Upe tekoha tuja-rupi ndajaiko meméiry voi. Upéixa-gwi nhane mogwahẽ ukase mo'ã Nhandejáry oĩ ha-py Moisés remimombe'ukwe tekoha.*

⁸ Ko'ãy katu Nhandejáry ombou uka Nhe'ẽ Marangatu tee va'e nhane mo'arandu hagwã nhane moagwí uka hagwã ojéhegwí nhande rekoverã opa e'ý va'e ome'ẽ-vy nhande-vy. Aipo ramo upéa-rupi Nhe'ẽ Marangatu tee va'e rembiapo-rupi onhemomba'egwasuve va'erã voi Nhandejáry.

⁹ Iporã teĩ voi-ma Moisés amyrĩ remimombe'ukwe. Nhande reko porã va'erãha ohexa uka teĩ va'ekwe nhande-vy. Ndajajapo porãi-gwi ae omopotí ukase mo'ã nhande py'a. Iporãve íxugwi Hesu Cristo rehewa nhe'ẽ. Nhande py'a omopotí va'e ohexa porã uka nhande-vy. Omboyke nhandéhegwí nhande py'a vaikwe. Iporã ete voi hesegwa nhe'ẽ.

¹⁰ Upéa-rehe nhande jaikwaa porãve Nhandejáry ipu'akaha. Upéixa ramo Hesu rehewa nhe'ẽ yke-rehe oĩ ramo Moisés remimombe'ukwe tekoha, iporãve rãve vérami teĩ íxugwi.

¹¹ Upe nhe'ẽ tuja omomba'egwasu porã voi jepe "Ijapy rei va'erã kóa nhe'ẽ peẽ-my" he'i va'ekwe Nhandejáry nhande-vy. Ha "Hesu Cristo rehewa nhe'ẽ katu ndopái va'erã peẽ-my" he'i ae hesegwa nhe'ẽ porã-rehe omomba'egwasuve-vy.

Nhe'ẽ Marangatu tee va'e oĩ ha-py mba'eve ndaipu'akavéi-ma va'erã nhande-rehe

¹² Upéixa-gwi ore oronhembopy'agwasu oromombe'u mbe'u hagwã Nhandejáry Hesu Cristo rehewa nhe'ẽ. "Nhandejáry ndive jaiko va'erã voi. Cristo-rehe ha-py omboyke nhandéhegwí nhane rembiapo vaikwe" oro'e orejéupe. Oroha'arõ tee voi arã indive oroiko hagwã.

¹³ Ndorojapói Moisés amyrĩ ojapo hagwe-rami. Ha'e omonde va'ekwe oakã rehewa ojehovaomi-vy. Ndoipotái-gwi he'yí kwéry, Israel remiarirõre oikwaa nahendyveimaha hova.*

¹⁴ Ha'e kwéry ndoikwaaí va'ekwe mba'e po he'ise upe va'e. Nhandu kyha-py ojeavoaha-rami voi oĩ va'ekwe inhakã-rehe ojopia va'e. Ohendu teĩ. Ko'ãy

* **3:6** Jr 31.31-34 * **3:7** Ex 34.29 * **3:13** Ex 34.32

peve nhandu kyha-py ojeavoapa va'e-rami voi jotoy okwa hikwái. Oarandu porãrã-rehe ndoikwaáiry vyteri hikwái. Oikwaa jokupepa rei. Yma gware Nhandejáry nhe'ẽ omonhe'ẽ ramo ohendu tei. Ha ohendu e'ŷ va'e-rami jotoy voi oiko hikwái. Ndoikwaái mba'e pa he'ise. Peteixa oiko-ma ramo Hesu Cristo ndive rire ae oikwaa-ma va'erã.

¹⁵ Ay peve Moisés amyrí remimombe'ukwe omonhe'ẽ jave oĩ ipy'a jeav-oaha va'e. Ndoikwaa porãi anhetegwa va'e-gwi ipy'a jeavoaha vyteri hikwái.

¹⁶ Hesu Cristo-rehe ojerovia ramo ae katu ojepe'a paete arã íxugwi ipy'a jeavoaha vérami oĩ va'e.

¹⁷ Upe kwatia-py "Nhandejáry" he'i ramo, "Nhe'ẽ Marangatu tee va'e" he'ise. Ha Nhe'ẽ Marangatu tee va'e oĩ ha-py mba'eve ndaipu'akavéi-ma va'erã nhande-rehe. Nhane mo'arandu meme arã jaiko meme hagwã inhe'ẽ-py.

¹⁸ Cristo-rehe jajerovia-magwi peteĩ tei nhande rova avoaha e'ŷ va'e-ramima jaiko. Ndaiporivéi-ma nhande-vy nhandu kyha ramigwa nhande py'a jeav-oaha. Espéko-py jajehexaha-rami Nhandejáry mba'egwasuha ipu'akaha ave ohexa uka nhande-rehe. Ojehexa jave, nhande reko ojehe'ave ave oho-vy Cristo-rehe. Hekoha-ramima jaiko porãve rãve jaha-vy. Nhandejáry Nhe'ẽ Marangatu tee va'e rembiapo voi upe nhande reko pyahu-ma.*

4

Hetea'e reheve Paulo omombe'u Hesu Cristo rehewa nhe'ẽ

¹ Nhandejáry ore poriahuverek-magwi Hesu rehewa nhe'ẽ mombe'uhu ramo ore moingo-ma va'ekwe. Upéa-gwi ore retea'e reheve oromombe'u Hesu Cristo rehewa nhe'ẽ.

² Nore rembiapo vaíry. Norogwenotíry ore rembiapokwe. Nhandejáry nhe'ẽ ra'anga noromombe'u mo'âi. Norombojopara reíry va'ekwe imombe'u-vy inhe'ẽgwe. Oporombotavy e'ŷ va'e voi ore. Nhandejáry oikwaa voi ore rekoha. Nokanhýi mba'eve íxugwi. Anhetegwa mante ore remimombe'u va'e voi. Upéixa orojekwaa uka enterove va'e-upe.

³ Hesu Cristo rehewa nhe'ẽ enterove ohendu hagwã oromombe'u mbe'u oroiko-vy. Ohenduse e'ŷ va'e-gwi mate onhemí rei oiko-vy ore remimombe'u. Ipy'a jeavoaha va'e-rami voi oiko gwí Nhandejáry-gwi mombyry oikose va'e kwéry. Ohasa asy hagwã-py oho va'erã hikwái.

⁴ Anhaygwasu-pe ae ogwerekó gweko járy ramo hikwái. Ha'e omopytúmba íxupe kwéry pono ojerovia Hesu-rehe. Omohesakãmba porã mo'ã íxupe kwéry Cristo rehewa nhe'ẽ. Nhane remimomba'egwasu va'e voi Cristo. Ha'e hekoha peteixa Nhandejáry rekoha ndive.

⁵ Ha ore katu hesegwa nhe'ẽ meme ore remimombe'u. Noromombe'úi ore orejéhegwi rei. Hesu Cristo Nhandejáry voiha mante ore remimombe'u. Ore nikó oroiko pene rembigwá-rami rei Hesu Cristo nhande rayhuha-gwi.

⁶ "Tahembipe" he'i va'ekwe Nhandejáry. Pytú rei va'ekwe omohembipe hagwe-rami, ay omohembipe ave Nhandejáry nhande py'apy-py nhane mo'arandu hagwã ójehe. Hesu Cristo-rehe hekoha porã tee jahexakwaa ramo jaikwaa-ma ave Nhandejáry imba'egwasuha.*

Nhandejáry mate oĩ Paulo mombaraeteha

⁷ Upéixa voi hyru yvyjygwe gwigwa-py omoĩ iporãve va'e. Upéixa ete ave mba'e ryru-rami rei ore oroiko. Nhandejáry omoĩ va'ekwe ore py'apy-py onhe'ẽ marangatu porã ete va'e. Upéa-rehe oroikwaa-ma voi Hesu Cristo

* ^{3:18} Rm 8.29; 1 Jo 3.2-3 * ^{4:6} Gn 1.3

Nhandejáry tee voiha. Ipu'aka teeveha oroikwaa-ma voi. Ore mo'arandu porā enterove oikwaa hagwā. Ndaha'éiry voi orejéhegwí rei ore mbaraeteha. Nhandejáry ore mombaraeteha va'e ae ojekwaa hagwā ore reko-rehe.

⁸ Ore-vy katu, gwī Hesu rehewa nhe'ē nohenduséi va'e ore jopyve pyve va'ekwe ore moingo asy-vy. Ore rerekó asy vai ramo jepe oronherenohē jevy joty íxugwi. Ndorojepy'apýiry voi oroiko-vy oréjehe. Ore py'a rerovase va'e oī ramo jepe ore-vy ndorojepy'a rerova ukáiry joty íxupe. Akói joty voi ore orojerovia Hesu-rehe.

⁹ Oī heta voi ore-rehe ija'e'ŷ va'e ore rerekó asy va'e. Nhandejáry ae ore pytygwō voi. Ore-rehe ija'e'ŷ va'e ore reity jepe teī oropu'ā jevy joty oroho-vy orojerovia-gwi Nhandejáry-rehe.

¹⁰ Ore jukase meme ore-rehe ija'e'ŷ va'e. Hesu rerekó hagwe-rami ave ore rerekose mo'ā. Hesu ae ore mombaraete. Upéa-gwi ore rexaháry ohexa kwaa ore-rehe he'i hagwā "Hesu nipo oikove tee va'e voi ra'e" he'i hagwā.

¹¹ Oroikove peve gwive ore mbohasa asy meme ore jukase-vy oroiko-gwi Hesu rembigwái ramo. Upéixa oroiko jave ojehexa uka ore reko-rehe Hesu oikove jevymaha. "Hesu voi nipo ra'e oipytygwō Paulo kwéry-pe. Hesu voi nipo ra'e oikove jevy-ma" he'i hagwā ore rexaháry.

¹² Hesegwa nhe'ē oromombe'u-gwi oromano va'erā-ramima ore oroiko. Ha peē ae katu inhe'ē oromombe'u-gwi pene moingove porā-ma Hesu.

¹³ Yma va'ekwe hese ojerovia va'e ohai Nhandejáry nhe'ē kwatia-rehe "Arovia-gwi amombe'u" he'i. Ore ave, orogwerovia-gwi oromombe'u mbe'u ave Nhandejáry rehewa nhe'ē.*

¹⁴ Omano rire Hesu Cristo, Nhandejáry omoingove jevy íxupe. Oroikwaa-ma ave nhamano rire Nhandejáry nhane moingove jevy va'erā Hesu ndive. Pene ndive ore reraha va'erā gwenda-py.

¹⁵ Orohasa asy pende-rehe ha-py oroikwaa uka hagwā peē-my Hesu Cristo rehewa nhe'ē pende retave tave hagwā pejerovia-vy Hesu-rehe. Upéixa ramo oī arā hetave tave ojerovia va'e Hesu-rehe. "Atima xe Járy" he'i meme arā hikwái. Hetave tave oī va'erā omomba'egwasu va'e Nhandejáry-pe.

Nhande rerekó asy ramo jepe nhamoto mondo nhande resa yváy-py oī va'e-rehe

(Rm 8,17-18)

¹⁶ Upéixa-gwi ndore py'a rerahái oroiko asy ramo jepe. Ore rete-pe ore mokāgwe rasypa jepe, ore py'a katu onhemoatyrōve rōve oho-vy.

¹⁷ Ore-rehe ija'e'ŷ va'e ore rerekó asy tee jepe ndorojohu vaíry joty ore. "Ndahi'are etéiry" oro'e joty orejéupe. Yváy-py ore momba'egwasu porāve râve va'erā ore rerekó porā-vy opa e'ŷ rehewe.

¹⁸ Upéixa-gwi ndaha'éi niko jahexa va'e-rehe oromondo ore resa oroiko-vy. Jahexa e'ŷ va'e-rehe ae oromondo mondo ore resa. Jahexa va'e ndahi'aréi va'erā. Jahexa e'ŷ va'e katu opa e'ŷ va'erā.

5

Nhandejáry ndive jaiko va'erā-rehe javy'a ha'arō-vy

¹ Ko nhande rete nhande tapýi rei voi. Ho'a rei arā nhamano ramo. Jaikwaa-ma niko ho'a-ma ramo, ombohekivia arā nhande-vy yváy-py Nhandejáry Hesu Cristo renda-py. Ndaha'éi nhane rembiaporā upé nhande róga teerā. Nhandejáry rembiapo ae ijapopyre opa e'ŷ va'e ome'ē arā nhande-vy nhande rete pyahurā jevy.

* **4:13 Sl 116.10**

² Ore ao pyahu-py oronhemondese etereiha-ramima oroiko-ma ore. Ore rete pyahurā oroiporuse eterei ore. Ndaha'éi ore py'a kane'ō-gwi, iporāve va'e orohexaséi-gwi ae.

³ Nhane nhe'ē reko katukwe ombohete jevy ave va'erā yváy-py. Ndoiko reivéi-ma va'erā nhane nhe'ēgwe upe-py. Nhanhemonde va'erā-rami nhande rete pyahupa-ma va'erā upe-py.

⁴ Nhande tapýi rei vérámi jaiporu va'e nhande rete rasypa rei nhahendu. Ha ore katu haimete noroha'arō kwaáiry ore rete resakā-rehe. Ndaha'éi teī jepe oromanose-gwi. Oronhemondese eterei-ma ae ore rete pyahurā-py. Iporā eterei ore-vy omano e'ŷ va'erā.

⁵ Nhandedjáry voi ojapo va'ekwe nhande reterā. Omoingo-ma nhande py'apy-py Nhe'ē Marangatu tee va'e. Pe Nhe'ē Marangatu tee va'e ome'ē ranhe va'ekwe nhande-vy Nhandedjáry yváy pygwarā-rehe nhaha'arō kwaa hagwā.

⁶ Upéa-rehe ore mbaraete reheve oroiko ko'a-py. Nhande rete jaiporu ramo ae mombyry jaiko joty Nhandedjáry renda-gwi. Índive jaiko va'erā-rehe javy'a ha'arō-vy.

⁷ Ndaha'éiry jahexá va'e-rehe orovy'a. Orogwerovia-gwi ae orovy'a ha'arō-vy orogwahē hagwā íxupe.

⁸ Ore py'agwapy porā oroiko-vy. Ndorokyhyjéi oromano hagwā-rehe. Ore-vy iporāve ore retekwe oroheja Nhandedjáry róga pygwa ramo oroiko hagwā.

⁹ Upéa-rehe orombovy'ase eterei Nhandedjáry-pe hemimbota orojapo-vy. Ore rete-py oroime reheve, oroime e'ŷ ramo ave, íxupe mate orombovy'ase oroiko-vy.

¹⁰ Nhande kwéry enterove gwive jajehexá uka-ma va'erā Hesu Cristo-pe. Imburuvixagwasu ramo nhaí-ma va'erā hovagwy-py. Nhande rete jaiporu aja ramo iporā para'e naiporāi para'e nhane rembiapo oikwaa uka va'erā peteī teī-pe. Ome'ē va'erā nhande-vy peteī teī-pe nhane rembiapokwe repy.

Hesu remimbota mante ojapose Paulo rehewa nhe'ē

¹¹ Upe va'e oroikwaa-gwi, Cristo rovagwy-py nhane monhembo'ytaha oroikwaa-gwi, orojapo japo inhe'ē oroiko-vy. Oromombe'u anhetegwa nhe'ē enterovéa-pe, hetave tave va'e orombojerovia tee uka hagwā hese. Ore rekoha ore py'a gwive oikwaapa voi Nhandedjáry. Ha peē ave aipota peikwaa pende py'a gwive ore ore rekoha porāha. Anhetegwa mate voi ore remimombe'u.

¹² Upéa ha'e ramo ndaha'éi anhemboete-gwi rei. "Xe reko porā" nda'éiry xe anhembotuvixa mba'e hagwā. Aipota peikwaa xe rekoha pejoko kwaa hagwā ore-rehe onhe'ē rei rei va'e. Ha'e kwéry onhembotuvixase rei nipo ra'e peē-my. Hekoha porā vérámi ojehexá uka porāse rei peē-my. Nopenáiry voi nipo ra'e opy'apygwa-rehe ra'e. Ore ae anhei tee-rupi mante oroiko.

¹³ Ndopo ha'e-gwi "Itavy rei-ma Paulo" peje arā para'e xe-rehe. Aipo ramo itavy va'e-rami jepe xe taiko, Nhandedjáry-pe katu xe amomba'egwasu aiko-vy. "Hi'arandu voi Paulo" peje arā para'e xe-rehe. Aipo ramo pejerovia porāve rāve hagwā Hesu-rehe, xe ae taiko xe arandu ramo.

¹⁴ Hesu xe rayhu eterei-gwi ndajaposéi xe ae xe remimbota. Hemimbota ae mante ajapose. Xe retea'e reheve ajapose Hesu remimbota. Aikwaa-ma peteī va'e omano va'ekwe enterove rekoviá. Upéixa-gwi enterove opyta-ma omano va'ekwe-rami.

¹⁵ Hesu omano va'ekwe nhande-rehe ha-py. Ndaha'éi nhandéjehe anho rei jaiko hagwā omano va'ekwe. Hese mante jaiko hagwā yma omano va'ekwe

ha'e nhande-rehe ha-py. O mano ete rire oikove jeyva'ekwe hese ha-py ae ãy jaiko porã hagwã ponove jajapose va'e rei jajapo.

¹⁶ Upéa-gwi ko'ângä gwive xe akã gwigwa rei nanhe'ẽ reisevéri avave-rehe. Yma va'ekwe xe akã-gwi rei anhe'ẽ va'ekwe Hesu-rehe. ãy katu xe nanhe'ẽ reivéri-ma arã upéixa hese. Ahexa kwaa-ma hese hekoha-rehe.

¹⁷ Upéixa-gwi jajerovia-ma ramo Hesu-rehe nhane mbohekoha pyahupa-ma peteixa ondive gwarã voi. Nhande rekoha tujakwe jahejapa-ma. ãy katu nhanhypyrü-ma nhande rekoha pyahu rehevememe hagwã inhe'ẽ.

Nhandejáry nhane mbojerovia ukase Cristo-rehe

(Rm 5.10; Ef 6.20; Cl 1.20)

¹⁸ Nhande rekoviá Cristo omano va'ekwe. Upéa-rupi Nhandejáry ombopyahu-ma va'ekwe nhande py'a nhande-vy. Yma va'ekwe nanhande a'ëi Nhandejáry-rehe. Nhande a'e e'ýha ramo jepe jareko va'ekwe íxupe, ha'e ae joty nhane mboheko pyahu va'ekwe jaiko hagwã he'ýi ramo jaroja hagwã íxupe nhande rekoha. Nhane rembiaporã ome'ẽ-ma ave nhande-vy enterove-pe nhambojerovia uka hagwã hese he'ýi kwéry ramo oiko hagwã ogwerojoja hagwã íxupe gwekoha hikwái.

¹⁹ "Nhande rekoviá Cristo omano va'ekwe nhande repy-vy. Omboyke voi va'ekwe nhandéhegwi nhane rembiapo vaikwe. Upéixa-gwi Nhandejáry naimandu'avéi nhane rembiapo vaikwe-rehe. Hese ojerovia va'e Nhandejáry ogwereko gwe'ýi tee ramo. Oa'e e'ýha ramo rei ndogwerekovéiry." Arami voi ore mbo'e uka va'ekwe ore remimombe'urã ome'ẽ-vy ore-vy. Oipota enterove va'e oikwaa upe va'e.

²⁰ Upéixa-gwi Cristo réry-py apomo'arandu peẽ-my. Nhandejáry ore mbou uka va'ekwe peẽ-my oromombe'u hagwã inhe'ẽ. Cristo réry-py, hekovía, orojerure meme peẽ-my apombojerovia tee ukase Cristo-rehe. Penhemoi uka katu Nhandejáry-pe he'ýi ramo pejeheko mbojoja-vy.

²¹ Ojejavy e'ý va'e tee jepe Cristo, nhane rembiapo vaikwe omoimba joty va'ekwe hese Nhandejáry. Nhande rekoviá ojuka va'ekwe íxupe. Upéa-rupi nhane mopotíse Nhandejáry hekoha porã-ramima jaiko hagwã, Cristo ndive peteixa jaiko hagwã.

6

¹ Ore katu Nhandejáry rembigwái ramo oroiko hembiapo orojapo-vy. Upéixa-gwi ore orojerure peẽ-my ani hagwã pende resarái Nhandejáry-gwi. Ha'e pende rexakwaa rei araka'e pende rovasa-vy. Pende rovasa rire ani pejere tei íxugwi. Perova tee katu pende rekoha hekoha-rupi.

² Nhandejáry kusatia-rehe oĩ va'e nhe'ẽ kóixa he'i:
"Orohendu-ma va'ekwe aporohovasaseha óra-py orohendu-ma va'ekwe
oroipytygwõ hagwã. Oioresendeseha óra-py oroipytygwõ-ma
va'ekwe"*. he'i Nhandejáry kusatia-rehe oĩ va'e. ãy nhande rexakwaa reiha óra voi, nhane resende hagwã óra voi ko'ângä.

Gweko-rehe Paulo ojehexa uka Nhandejáry rembigwaiha

³ Enterovéa-pe orombojerovia ukase oroiko-vy Hesu-rehe. Ore reko porã meme voi ore "Paulo-rehe ha-py rei ndajeroviaséi Hesu-rehe" pono he'i ore-rehe.

⁴ Ore ae katu ore reko jejavy e'ý-rupi orojehexa ukase ore Nhandejáry rembigwái tee-ha. Upéa-rehe ore rerekoso asy ramo jepe Hesu-rehe ija'e'ý va'e kwéry, noronhe'ëi joty voi ore. Oroikotevë eterei ramo jepe, ndorojerure

* 6:2 Is 49.8

ruréi joty oroiko-vy. Oronhemboasy ramo jepe, norogweronhe'ëi joty ore ore nhemboasyha orokirirí rei oroiko-vy.

⁵ Ore nupã nupã va'ekwe, ore moõ moõ va'ekwe preso. Ore-rehe ipoxypagwi ojogweroaty aty va'ekwe ore-rehe. Ore kane'o tei-ma ore rembiapo eterei-gwi. Oroke e'ÿ reheve, ore rembi'u e'ÿ reheve ave oroiko oromba'apo apo oroiko-vy. Upéixa jepe ore reko orokirirí rei joty ore orojehexa uka porã hagwã Nhandejáry rembigwái voiha ramo ore.

⁶ Ore reko poti va'e voi ore. Oroikwaa porã Hesu rehewa nhe'ë oromombe'u mbe'u jevy hagwã. Ore re'yi e'ÿ va'e-pe gwive túvy-rami orogwerekro enterove va'e-pe. Oroporohayhu va'e voi ave ore. Upéixa ore reko porã-rehe orojehexa uka ore Nhandejáry rembigwaiha. Nhe'ë Marangatu tee va'e ore py'apyhy paite-ma. Oromombe'u jave Nhandejáry rehewa nhe'ë Inhe'ë Marangatu tee va'e omo'arandu-ma henduháry-pe.

⁷ Anhete voi ore nhe'ë. Nhandejáry remimbopu'aka voi ore. Heko porã tee-rupi oroiko-gwi oromokirirí uka ore-rehe ija'e'ÿ va'e-pe. Ore reko porãrã ome'ë me'ë ore-vy Nhandejáry. Hembigwái voi ko ore.

⁸ Oï ore mboete ore momba'egwasu va'e. Oï ave ore momba'e rei rei va'e. Oï ore moherakwã vaise mo'ã va'e. Oï ave ore moherakwã porã porã va'e. Oï ave "Ijapu eterei Paulo oirû ndive" he'i rei va'e ave ore-rehe. Ore ae katu anhei teegwa voi ore remimombe'u.

⁹ Ndahexa pytýiry-rami po ore. Heta-ma jepe ore kwaa porãha ore. Oromano mano hagwã-rami jepe oroĩ ramo, ãy peve joty oroiko. Ore rerekoso asy meme va'ekwe, ndore jukáiry joty.

¹⁰ Ore mbovy'are'ÿ ramo jepe, orovy'a meme joty oroiko-vy. Ore poriahu ete jepe, orombohekoha porã joty heta va'e-pe oromo'arandu-vy íxupe kwéry Hesu rehewa nhe'ë-py. Ore renduha kwéry oiko porã katu Hesu rehewa nhe'ë rendu-vy. Mba'eve ndorogwerekói ramo jepe, ore niko opamba'e orogwereko va'e voi Nhandejáry renonde-py.

¹¹⁻¹³ Xe py'apy gwive anhemombe'u kuri peẽ-my, peẽ Corinto tetã mygwa kwéry-pe. Mba'eve nanhomí nhomíry pendéhegwí. Ndapeikói jepe xe rekoramí. Xe apohayhu voi joty. Peẽ ae naxe rayhúiry. Gwa'y kwéry-pe túvy ojerureha-rami xe ave ajerure peẽ-my xe apogwerekoha-rami xe rerekoso hagwã ave peẽ.

*Ndikatúi Hesu reroviaha omoirû rei herovia e'ÿha-pe
(1 Co 10.20-21; 1 Jo 1.6)*

¹⁴ Ani eremoirû eterei tei ereiko-vy Hesu rerovia e'ÿha-pe pono pene mbojehe'a jevy ójehe. Peteixa ani pembojehe'a tei pende rekoha hekoha kwéry-rehe. Mba'éixa po ojopohu pohu-ta hekoha porã va'e hekoha vai va'eha-rupi? Pytû hesakã va'e jaikwaa voi, ndojehéairy voi ojóehe. Upéixa ave ndikatúi Hesu reroviaha omoirû meme herovia e'ÿha-pe. Ani eremoirû eterei tei Hesu-rehe ojerovia e'ÿ va'e-pe.

¹⁵ Mba'éixa po oiko porã va'erã anhaygwasu Cristo ndive? Ndikatúi voi. Ndaha'éiry hesegwa-gwi. Upéixa ave ndikatúi Hesu reroviaha omoirû meme herovia e'ÿha-pe. Ani eremoirû irû tei Hesu-rehe ojerovia e'ÿ va'e-pe.

¹⁶ Mba'éixa po opyta-ta Nhandejáry róga-py tupã ra'anga rei? Naiporã vóiry oiko upé-py. Nhande, Hesu Cristo-rehe jajerovia va'e kwéry, jaikoma Nhandejáry róga tee ramo. Ha'e Tupã tee. Hekove porã tee va'e voi Nhandejáry. Ha opyta nhande py'apy-py, nhande koty-py oiko. Ha'e he'i va'ekwe:

“Xe aiko-ta ipy'apy-py. Ijapyte-rupi agwata-ta. Aiko-ta íxupe kwéry heko járy ramo. Ha'e kwéry oiko-ta xe re'yi kwéry ramo.”*

¹⁷ Upéixa-gwi ani erepena anho ngatu rei ivai va'e-rehe. Ndikatúi ererekone irū tee-rami xe-rehe ojerovia e'ŷ va'e kwéry-pe. Erenhemomombury ae arā mba'e ky'a-gwi. Upéixa erejapo ramo oromogwahē porā va'erā xe ha-py.”*

¹⁸ Aiko arā nde ru ramo. Nde ave ereiko arā xe ra'y ramo, xe rajy ramo ave”*
he'i va'ekwe Nhandejáry ipu'aka tee va'e.

7

¹ Upe nhe'ẽ jaikwaa-gwi xe rembihayhu kwéry, tanhanhemopotī kena opa ivai va'e-gwi. Nhande rete-py ivai va'e-gwi, nhande py'apy-py ivai va'e-gwi tanhanhemopotī katu jaiko porā hagwā Nhandejáry-pe, ha'e he'i hagwā peteĩ teĩ nhande-rehe: “Onhemomarangatu xe mboete-vy. Opy'apy gwive onhemopotī xe-rehe ojerovia ete-gwi” he'i hagwā nhande-rehe Nhandejáry.

“Xe rembiayhu va'e voi peẽ” he'i Paulo Corinto pygwa kwéry-pe

² Ha xe ko ajerure-ta peẽ-my ore rayhu hagwā-rehe. Pende py'a gwive pehendu hagwā xe nhe'ẽ. Xe py'a gwive xe rembiayhu va'e voi peẽ. Naxe rembiapo vaíry avave-pe xe. Oĩ onhembohekoha vai va'e. Xe ae avave-pe nambohekoha vaíry. Xe ko nambotavýiry voi avave-pe.

³ Upéixa ha'e ramo jepe, “Pene rembiapo vai ko” nda'ei jaty va'erā peẽ-my. Ha'e jevy-ta jaty peẽ-my “Peẽ ko xe py'a gwive xe rembiayhu va'e voi peẽ. Jaiko gwive onhondive nhamano peve onhondive xe py'a ete gwive apohayhu. Xe re'yi ramigwa voi peẽ.”

⁴ Ajerovia porā pende-rehe. Apomoherakwā porā opa-rupi. Xe py'agwapy jevy-ma pende-rehe. Opamba'e ahasa asy ramo jepe pende reko arov'y'a jaty.

Tito omoirū jevy-ma Paulo-pe

⁵ Macedônia yvy-py orogwahē ramo va'ekwe ndikatúi oropytu'u porā. Ndore py'agwapýi voi va'ekwe oropytu'u e'ŷ-vy. Ore jerekwe-rupi ore mbo-hasa asy va'ekwe-gwi ore py'a kyhyje va'ekwe voi oroiko-vy.

⁶ Nhandejáry ae katu ore mbopy'agwapy jevy-ma. Ojepy'apy va'e-pe ombopy'agwapy kwaa voi Nhandejáry. Ha ore mbopy'agwapy-ma. Tito ogwahē ore-vygwi ore mbopy'agwapy jevy-ma Nhandejáry.

⁷ Ndaha'éiry igwahēha-rehe rei ore py'agwapy. Omombe'u kuri xe-vy pende rekoha: “Corinto pygwa kwéry nde rexa nga'u voi kuri. Ojepy'apy nipo ra'e nde-rehe” he'i pende-rehe. “Ha'e kwéry omboasy gwembiapokwe ra'e” he'i. “Nde ereipota va'e ojapose voi” he'i xe-vy pende reko mombe'u-vy. Upéa ahendu ramo xe mbovy'a jevy-ma.

⁸ Perovy'are'ŷ voi ra'e xe nhe'ẽ araha uka va'ekwe peẽ-my kwatia-rehe. Upéa-rehe “Ma'erā po ra'e araha uka íxupe kwéry upe kwatia?” nda'ei ramo jepe, haimete aipo-rami ha'e va'ekwe pende vy'are'ŷha rerakwā rendu-vy. “Corinto pygwa ndovy'avéi ne rembihaikwe-rehe” omombe'u jevy-ma ramo xe-vy, ndahi'aréi upéixa peiko ramo jepe, haimete-ma anhemboasy peẽ-my ahai hagwe-rehe.

⁹ Áy ae avy'a jevy. Ndaha'éi pevy'are'ŷ hagwe-rehe avy'a. “Iporā jarova nhande rekoha” peje ra'e-gwi ae xe mbovy'a jevy peẽ. Nhandejáry pene mbovy'are'ŷ uka va'ekwe pene mo'arandu hagwā. Pevy'a e'ŷ-rupi ojapo porā pende-rehe Nhandejáry. Upéa-rehe ndorojapo vaíry va'ekwe jaty pende-rehe.

* ^{6:16} Lv 26.12; Ez 37.27 * ^{6:17} Is 52.11 * ^{6:18} 2 Sm 7.14; 1 Cr 17.13

10 Nhandejáry nhane mbovy'are'ŷ uka jarova hagwā nhande rekoha nhane rembiapo vaikwe omboyke hagwā nhandéhégwi. Teko rei reko rupi oiko va'e ae ndaha'éi upéixa. Ivy'are'ŷ ramo jepe nonhemohi'agwíry Nhandejáry-gwi. Onhemomombyryve ryve joty íxugwi.

11 Pemondo porā katu pende resa pende rekokwe-rehe pene mandu'a porā hagwā mba'éixa pa Nhandejáry pende rovasa pene mbovy'are'ŷ-gwi. Pene vy'are'ŷha-gwi pene mboetea'e nipo ra'e pejapo hagwā hemimbota. Pene mokyre'ŷ ra'e pende reko porāha pehexa uka hagwā xe-vy ra'e. Hembiaapo vai va'ekwe-pe perekoso asy nipo ra'e. Peē pekyhyje nipo ra'e. Xe rexa nga'u voi nipo ra'e. Pene rakate'ŷ ave nipo ra'e xe-rehe. Pya'e perekoso asy nipo upe mba'e vai apohare-pe ra'e. Upéixa peiko-gwi, ojekwaa pende-rehe xe nhe'ẽ pehenduha. Ndapeikói voi ra'e upe va'e reko-rupi.

12 Araha uka-ma ramo va'ekwe peē-my upe kватia nhe'ẽ ndaha'éiry hembiapo vai va'ekwe-rehe mate ahai va'ekwe peē-my. Ndaha'éiry ave hese hembiapo vai va'ekwe-rehe ave. Pende rehewa voi upe va'e kватia. Aipota eterei voi pene momandu'a xe-rehe Nhandejáry "Nhane rembihayhu voi Paulo" peje hagwā xe-rehe. Upéixa-rehe voi ahai va'ekwe peē-my upéixa kватia.

13 Upéixa ramo aikwaa-ma xe rayhu teeha voi ra'e. Upéixa-rehe xe py'agwapy jevy-ma ãy arovya'jevy-ma. Tito ave xe mbovy'a-ma ave. Ha'e ovya'eterei-gwi xe avy'a ave. "Corinto pygwa xe mogwahē porā kuri" he'i Tito pende rekoha omombe'u-vy xe-vy. "Omoro'ysã jevy-ma xe py'apy-py" he'i ave Tito pende-rehe. Upéixa-gwi avy'a jevy xe ave.

14 Yma va'ekwe apomoherakwā porā va'ekwe Tito-pe. "Ne mogwahē porā arā Corinto pygwa kwéry" ha'e va'ekwe íxupe pende-rehe. "Oromondo-gwi ohendu arā ne nhe'ẽ" ha'e ave pende-rehe. Ha nanhemotíry xe ha'e hagwe-rehe. Anhetegwa meme mate ha'e peē-my. Upéixa ave apomoherakwā porā ramo va'ekwe Tito-pe anhete tee voi upe xe nhe'ẽ.

15 Ha'e pende rayhuve huve ra'e imandu'a ramo pende-rehe. "Xe mogwahē porā kuri. Xe nhe'ẽ ohendu porā" he'i pende-rehe. Pene kyre'ŷ nipo ra'e hemimombe'u pejapo-vy. Xe remimondo va'e-gwi para'e penhemoñ nipo ra'e ipogwy-py xe mboete-vy nipo ra'e. Upéixa araka'e perohory íxupe imogwahē-vy.

16 Xe katu avy'a pende-rehe. Ajerovia pende reko-rehe xe.

8

Nhame'ẽ katu opamba'e nhane rakate'ŷ e'ŷ reheve (At 11.29; Rm 15.25-27; 2 Co 9.7-8)

1 Xe re'ýi kwéry, Hesu reroviah kwéry, amombe'use peē-my mba'éixa pa Nhandejáry oheko mbo'e Macedônia pygwa-pe, ójehe ojerovia va'e-pe. Oheko mbo'e íxupe kwéry ohexakwaa porā rei hagwā gwapixa kwéry-pe.

2 Ha'e kwéry ohasa asy eterei ramo jepe ovya'joty. Iporiahu ramo jepe ha'e kwéry ome'ẽ heta voi iporiahuve va'e-pe. Ndahetái jepe ogwereko nahakate'ŷiry gwemime'érã-rehe.

3-5 "Ore ave orome'ëse Judéia pygwa kwéry Hesu reroviah va'e kwéry-pe. Orome'ë-ta nde-vy ore pirapire ereraha hagwā íxupe kwéry ipirapirerā" he'i va'ekwe ore-vy. Oikotevē jepe ohexakwaa rei joty gwapixa-pe. "Hetave tave orogweraha ukase nde-vy íxupe kwéry, iporiahu va'e kwéry pegwarā" he'i ore-vy. "Ndaha'éiry eremanda-gwi ore-vy orome'ë. Ore ae voi orome'ëse-gwi orome'ë" he'i va'ekwe ome'ë-vy. Ore ae oro'e: "Iporiahu-gwi ra'e ndahetái

opirapire ogweraha uka va'erā" oro'e rei va'ekwe hese kwéry. Heta voi ore-
vy ogweraha uka opirapire. Onheme'ẽ ete ranhe ra'e Nhandejáry-pe. Upéi
ojapose eterei voi ra'e inhe'ẽ. Xe nhe'ẽ ave ojapose voi ave ra'e.

⁶ Upéixa ha'e kwéry ojapo ramo xe mandu'a jevy pende-rehe peẽ Corinto
tetã mygwa kwéry-rehe. Úpe jave anhomongeta Tito ndive. "Ereime ramo
araka'e Corinto tetã-my eremombe'u íxupe para'e pirapire omboaty hagwã
iporiahu va'e-pe ome'ẽ hagwã. Upéixa-gwi iporã ereho jevy Corinto tetã-my"
ha'e kuri Tito-pe. "Ereime jave araka'e onhypyrũ-ma ra'e omboaty hagwã
gwemime'ẽ me'ẽrã. Aipo ramo tereho jevy teremokyre'ỹ jevy íxupe kwéry
heta heta omono'õ hagwã gwemime'ẽrã. Upéixa ramo ha'e kwéry ohexa uka
va'erã Hesu re'ýi ojohayhuha gwembiapo porã ojapo-vy" ha'e ave íxupe oho
hagwã pende ha-py.

⁷ Peẽ pende rekoha porãve rãve ra'e ambue kwéry reko-gwi. Pejerovia
teeve ra'e Nhandejáry Hesu-rehe. Hesegwa nhe'ẽ pemombe'u porãve ra'e,
peikwaa porãve ave ra'e. Ambue kwéry-gwi pene kyre'ỹve ra'e ambue kwéry-
pe peipytygwõ-vy. Ore rayhuve ave voi ra'e. Aipo ramo ha'e-ta peẽ-my
"Enterove va'e reko pehasave-gwi tapeme'ẽve katu pende pirapire iporiahu
va'e kwéry pegwarã. Oporohayhu va'e rembiapo voi upe va'e".

⁸ Namandáiry peẽ-my peme'ẽ hagwã pende pirapire íxupe kwéry.
Amombe'u ramo peẽ-my Macedônia pygwa kyre'ỹha aipota ojekwaa ave
pende-rehe pejohayhuha. Heta voi pende pirapire peme'ẽ ramo "Corinto
pygwa ore rayhu voi ra'e" he'i va'erã pende-rehe.

⁹ Pene mandu'a katu Nhandejáry Hesu Cristo nhande rayhuha-rehe. Yma
va'ekwe opamba'e ogwereko yváy-py. Ha upéi ogwejy ou-vy ko yvy-rehe jave
katu iporiahu-ma optya-vy. Upéixa onhemboheko poriahu va'ekwe pende-
rehe ha-py pende rovasa porã porã hagwã.*

¹⁰ Amombe'u-tama peẽ-my pene remime'ẽrã-rehe. "Nhamboaty-ta ipo-
riahu va'e pegwarã" peje araka'e. Ojapo-ma peteĩ ro'y aipo peje hagwe.
Yma tenonderã penhypyrũ-ma peme'ẽ. Pevy'a reheve pehayhu eterei-
gwi peme'ẽse íxupe kwéry araka'e. "Nhame'ẽ-ta jaiporiahuvereko-gwi íxupe
kwéry" peje araka'e penhypyrũ-vy araka'e hese kwéry.

¹¹ Ko'ânga katu iporã pejapopa upe pene rembiapo porã. Ani peha'arõve
peme'ẽ me'ẽ va'erã-rehe. Peteĩ teĩ perekó va'e-gwi pemono'õ peme'ẽ va'erã
íxupe kwéry. Pevy'a reheve pene kyre'ỹ reheve pende aja-rupi peme'ẽ
iporiahu va'e kwéry-pe.

¹² Anhete voi ome'ẽse va'e ogwereko háixa ome'ẽ ramo ombovy'a arã
Nhandejáry-pe. Ndahetáí ramo jepe Nhandejáry-pe ombovy'a joty ome'ẽ-vy.
Ha'e ndojeruréiry jareko e'ỹ va'e-rehe.

¹³⁻¹⁴ Nda'éiry peẽ-my peme'ẽ me'ẽ hagwã íxupe kwéry peikotevẽ jevy hagwã.
Ãy heta pene mba'e. Iporiahu joty ha'e kwéry. Aipo ramo iporã pemboja'o
ime'ẽ-vy íxupe kwéry. Ogwahẽ ramo ndaperekoiha óra pende rexakwaa jevy
va'erã ave ha'e kwéry peẽ-my. Upéixa ramo ha'e-rami ave meme penhyp-
tygwõ arã onhondive avave ndoikói hagwã iporiahu va'e-rami. Ndoikói
ave arã imba'e retave va'e-rami ojóhugwi. Pejogwereko rei arã peteĩxa
penhypetygwõ-vy.

¹⁵ Nhandejáry nhe'ẽ kwatia-rehe oĩ va'e he'i:
"Hetave omono'õ va'e nahembýi joty íxupe."

Mixí jepe omono'õ va'e omohygwyatã joty íxupe"**
he'i Nhandejáry kwatia nhe'ẽ peteĩxa ogwereko íxupe kwéry-gwi.

* 8:9 Fp 2.4-8 * 8:15 Ex 16.18

Tito, oirū kwéry ndive oho oipytygwō hagwā Corinto tetā mygwa Hesu reroviaha kwéry-pe

¹⁶⁻¹⁷ Ore-rami ave pene pytygwōse ave Tito. Ikyre'ŷ xe nhe'ẽ rendu-vy oho hagwā. Pende rereko opy'apy-py. Nhandejáry voi omoĩ ipy'a-py ohose hagwā pene pytygwō-vy. Upéa-rehe atima porā Nhandejáry-pe hese.

¹⁸ Indive oromondo ave peteĩ nhande re'ŷi va'e. Opa rupigwa Hesu réry-py onhomboaty va'e kwéry remimboete upe xe remimondo. Omombe'u porā kwaa Hesu rehewa nhe'ẽ. Upéixa-gwi omboete íxupe hendiha kwéry.

¹⁹ Ha'e Hesu reroviaha va'e, ha Hesu reroviaha kwéry oiporavo va'ekwe íxupe ore irūrā ore ndive ogweraha hagwā pirapire Judéia tetā-my gwarā. Jahexakwaa rei ramo upe pygwa kwéry oikwaa arā jahayhuha íxupe kwéry. "Hesu-rehe ojerovia va'e onhopytygwō voi ra'e okwa-vy" he'i arā nhandrehe hikwái nhande rexaháry. "Nhandejáry nipo omboheko pyahu ra'e íxupe kwéry" he'i ave arā omomba'egwasu-vy Nhandejáry-pe nhande rexaháry kwéry.

²⁰ Heta voi pirapire orogweraha va'erā. Pono onhe'ẽ rei xe-rehe, heta oho va'e ndive orogweraha va'erā pirapire. Upéixa ramo "Oiporu rei nipo ra'e ojéupe gwarā oipe'a" ndikatúi he'i va'erā ore-rehe.

²¹ Nhandejáry oikwaa ore rekoha porā tee voi. Entéro va'e renonde-py ave ore rekoha porā ore rembiapo ave oroipota ojekwaa porā ore-rehe.*

²² Upéixa-gwi peteĩ jevy oho-ta Tito ndive inhírurā ave imbohapyha ramo oromondo-ta. Aheko rexa meme va'ekwe íxupe. Hesu reroviaha va'e ha'e. Ikyre'ŷ voi ha'e onhopytygwō hagwā. Ha ko'ângā ojerovia-ma ave penderhe pene pytygwōse ave peme'ẽ porā hagwā pende pirapire iporiahu va'e kwéry-pe. Upéixa-gwi oromondo-ta imbohapyha ramo pende ha-py.

²³ Tito xe irū voi. Xe ndive omiba'apo va'e voi pene pytygwō-vy. Oho-ta xe rekoviá. Oho ave arā gwī Cristo-pe omomba'egwasu gwasu va'e. Hesu réry-py onhomboaty aty va'e rembigwái ramo ha'e kwéry hekvia oho va'erā upe inhírurā kwéry.

²⁴ Upéixa-gwi pemogwahē porā katu íxupe kwéry igwahē ihovy-ramo. Hesu réry-py onhomboaty aty va'e-kwéry opa rupigwa oikwaa hagwā pende reko porāha. "Omogwahē ohayhu porā reheve Hesu reroviaha va'e Corinto pygwa" he'i va'erā pende-rehe. Upéa-rupi ojekwaa porā va'erā pende rekoha. "Ndaha'e ae reíry omoherakwā porā-ma va'ekwe Corinto pygwa rekoha-rehe" he'i va'erā xe-rehe.

9

Paulo omombe'u mba'eixagwa omboaty gwemime'ẽrā Hesu reroviaha kwéry pegwarā

¹ Judéia yvy pygwa Hesu reroviaha va'e kwéry iporiahu va'e kwéry pegwarā-rehe natekotevévé ahaive peẽ-my kwatia-rehe nhane remime'ẽrā-rehe.

² Aikwaa-ma voi xe peipytygwōse voi íxupe kwéry. "Ojapo-ma peteĩ ro'y Grécia yvy pygwa onhypyrū va'ekwe omboaty-vy gwemime'ẽrā. Oipytygwō-ta nhande re'ŷi Judéia yvy pygwa kwéry-pe. Upéixa-gwi omono'õ gwemime'ẽrā íxupe kwéry" ha'e va'ekwe pende reko-rehe amombe'u-vy va'ekwe Macedônia yvy pygwa kwéry-pe. Upéa-rehe heta upe pygwa onhemokyre'ŷ ave pejapoharami ha'e kwéry ave ojapo hagwā.

³ "Omboaty aty voi opirapire Corinto pygwa kwéry ogweraha uka hagwā ore-vy Judéia yvy pygwa kwéry pegwarā" ha'e meme pende-rehe. Aipo ramo

* 8:21 Pv 3.4

pemboaty e'ŷ ramo, xe mboapu rei arā. Pono upéixa xe mboapu, amondo-tama xe renonde-rupi nhane irū pene mongyre'ŷharā.

⁴ Xe ndive ogwahē ramo Macedônia pygwa pende ha-py nhatī va'erā napemboatyí joty ramo iporiahu va'e pegwarā. Apomoherakwā porā rire katu anhemotī arā xe. Peē ave penhemotīve arā pejapo e'ŷ va'ekwe-gwi orojerovia rei-gwi pende-rehe.

⁵ Upéixa-gwi amondo xe renonderā-rupi nhane irū kwéry pene pytygwō hagwā pemboaty-vy pene remime'ērā. Peje hagwe-rami pejapo hagwā amotenonde-ta íxupe agwahē e'ŷ ngatu pemboaty hagwā pende pirapire iporiahu va'e kwéry pegwarā. Upéixa ramo pende rexaháry "Ome'ëse voi ra'e" he'i arā pende-rehe. "Ndaha'éi Paulo ojerure-gwi ome'ë. Ome'ëse eterei-gwi ome'ë ra'e" he'i arā pende-rehe kwéry.

⁶ Pene mandu'a katu kokwe járy-rehe. Ojaty mixī va'e mixī ave omono'ō. Ojaty heta va'e, heta voi ave omono'ō. Upéixa ave nhane rembiapo porā.

⁷ Kokwe járy-rehe pene mandu'a jave, peme'ëse ëse va'e peteī teī tapeme'ë íxupe kwéry. Ani ereme'ë nde py'a vy'a e'ŷ reheve. Nereme'ëséi ramo ani ereme'ë. Nde py'a ovya' ete reheve ae ereme'ë va'erā ereme'ëse va'e. Nhandejáry ohayhu voi ipy'a kyre'ŷ reheve ombo'e me'ë me'ë va'e-pe.

⁸ Ha'e meme-ma ome'ë opa iporā va'e nde-vy. Ne remikotevē-gwi hetave tave ome'ë me'ë va'erā nde-vy. Ne remimbota-gwi ave hetave tave ome'ë meme va'erā nde-vy. Ne ryvyatā eterei va'eha-rami heta voi ererekva'erā ne rembiapo porārā erejapo hagwā.

⁹ Nhandejáry nhe'ë kwatia-rehe oī va'e he'i:
"Ipy'a porā voi ombo'e me'ë meme hagwā iporiahu va'e-pe" he'i. "Hembia
porā opa e'ŷ va'erā"
he'i Nhandejáry nhe'ë.

¹⁰ Temitȳ ra'ŷi ambue mbue va'e ome'ë va'ekwe nhande-vy Nhandejáry, omohenhói hetave tave ave hagwā nhande-vy nhane remi'urā. Upéixa ave heta pende rexakwaa reiha-rami ave, oipota peē peme'ëve ëve peiko-vy iporiahu va'e kwéry-pe. Upéixa ave peē, peme'ë me'ë ramo pehexakwaa rei-vy iporiahu va'e kwéry-pe, hetave tave Nhandejáry ome'ë va'erā peē-my pene remime'ëgwe rekoviá.*

¹¹ Pende-rehe onhangareko porā voi Nhandejáry. Ha'e pende rexakwaa rei-gwi heta voi perekva'erā pene remime'ērā jevy. "Atima porā nde-vy" he'i arā iporiahu va'ekwe pene remime'ëgwe-rehe ovya'-gwi. "Heta voi ore remikotevē repyrā ogweruruka Paulo-pe" he'i arā ave. "Corinto pygwa kwéry ogweruruka ore-vy" he'i va'erā Nhandejáry-pe omboete-vy.

¹²⁻¹³ Iporiahua'e Hesu reroviaha va'e-pe peme'ë ramo hemikotevē ha'e kwéry otima porā va'erā omboete-vy Nhandejáry-pe. Peipytygwō jave íxupe kwéry pemboete uka ave va'erā íxupe kwéry Nhandejáry. "Atima porā xe Jary" he'i va'erā Nhandejáry-pe hikwái. "Erembopy'a porā nipo ra'e Corinto pygwa kwéry-pe" he'i va'erā. "Upéixa-gwi ome'ë kuri ore-vy ore pirapirerā" he'i va'erā pende reko porā-rehe. "Ambue kwéry-pe ave ra'e ohexakwaa rei ave nipo ra'e Hesu-rehe ojerovia-gwi ra'e. Erembopy'a porā íxupe kwéry nipo ra'e" he'i va'erā Nhandejáry-pe omboete-vy.

¹⁴ Upéa-rehe ombojeupi meme ave arā onhe'ë Nhandejáry-pe hikwái. Pende rayhu-gwi ojerure rure arā íxupe pende rovasa hagwā. "Ehovasa katu íxupe kwéry ne rembihayhu ave" he'i va'erā pende-rehe. "Erehexakwaa rei araka'e

* 9:9 Sl 112.9 * 9:10 Is 55.10

íxupe kwéry. Upéa-rehe ra'e ha'e kwéry ave ore rexakwaa rei ave" omombe'u va'erã gwexakwaa hagwe Nhandejáry nhande rayhuha-pe.

¹⁵ Nhamboete tee anhetegwa-rupi voi Nhandejáry. Nhatima porã voi íxupe. Avave ohayhu e'ÿha-rami nhande rayhu eterei Nhandejáry. Nhande rayhu tee-gwi nhande rexakwaa rei va'ekwe ome'ë-vy va'ekwe gwa'ýry nhane resendeharã.

10

"Xe katu Nhandejáry remimondo va'e voi" he'i Paulo

¹ Ha xe katu, xe Paulo Hesu remimondo va'e xe. Cristo nhande rayhu-gwi nhande ru-rami nhande rerekop a porã reheve. Xe ave, Cristo-rami ave apogwerekose xe ra'y-rami, xe rajy-rami ave. Aime ramo va'ekwe pene ndive apogwerekose kirirí meme. Mombyry aime ramo, upéixa joty apogwerekose mo'ã. Xe py'agwasu reheve ae aiporu ko kwatia nhe'ë ipohýi va'e peë-my gwarã.

² Nanhemonhe'ësei jepe peë-my, tekotevë ramo ae anhembopy'agwasu tee va'erã anhemonhe'ë pohýi hagwã ahovaití-vy xe-rehe onhe'ë rei rei va'e kwéry-pe. "Teko rei-rupi oiko va'e-rami Paulo kwéry. Oakã-gwi rei ojapo va'e Paulo" he'i rei rei ra'e ore-rehe ore moherakwã vai rei-vy peë-my.

³⁻⁵ Ko yvy-rupi oroiko jepe, ndoroikóiry voi yvy rupigwa reko-rupi. Mba'e vai-gwi orojejoko hagwã teko rei rembiporu ndoroiporúiry. Soldado kwéry rembiporu ave ndoroiporúiry. Nhandejáry pu'akaha reheve ae ore oroiko. Ha'e ome'ë ore-vy ore arandurã opu'akaha ave orojejoko joko kwaa hagwã, orejéhegwi opa ivai vai va'e-gwi orojejoko hagwã. Gwí Nhandejáry-rehe ijapu va'e-pe gwive, gwí onhembotuvixaseve va'e-pe, gwí Nhandejáry nhe'ë nohenduséi va'e-pe gwive oromokirirí katu íxupe inhe'ë mbojevy-vy Nhandejáry-pe oroikwaa-gwi. Opa ore py'a ndive oronhemongeta va'e oromoï ave Cristo pogwy-py. Ipogwy-py opyta ramo, iporãmba va'erã voi.

⁶ Upéixa oroiko-gwi oroiporu Nhandejáry pu'aka apombohekoha porã hagwã penhemoï tee hagwã Hesu Cristo pogwy-py. Ipogwy-py penhemoï tee rire, inhe'ë napehenduséi ramo vyteri, apogwerekoso asy joty arã.*

⁷ Hova pygwa rei jahexá ipy'apygwa jaikwaa e'ÿ reheve. Ani pejerovia tee teñ ojehexá va'e anho-rehe. Ndajaikwaaí voi ojopy'apóry. Oí ae ra'e pene pa'ü-my: "Cristo réry-py ae xe aikove Paulo-gwi" he'i mo'ã va'e ójehe. "Paulo kwéry-gwi amombe'u porãve Hesu nhe'ë-py" he'i mo'ã va'e ójehe peë-my. Xe katu, xe Paulo, ha'e-ta upe va'e-pe: Terejepy'amongeta jevy katu. Nde-rami ore ave oroiko Cristo réry-py, ha'e-ta íxupe.

⁸ Ojehexá va'e peikwaase ra'e. Aipo ramo nanhembotuvixaséi jepe xeje-hegwa amombe'uve-ta joty peë-my. Ha'e va'ekwe peë-my: "Nhandejáry ore poravo va'ekwe oromombe'u hagwã peë-my Hesu Cristo rehewa nhe'ë". Áy katu aipo ha'e jevy-ta peë-my xe reko amombe'u-vy. Xe katu Nhandejáry remimondo va'e voi. Héry-py aiko peë-my inhe'ë mombe'u-vy. Ndaha'ei pende reity uka rei hagwã xe poravo va'ekwe. Pene pytygwô hagwã peikwaa porãve hagwã inhe'ë xe poravo va'ekwe xe mondo-vy.

⁹ Ndaipotái peje xe-rehe, "Paulo ombou nhande-vy kwatia nhe'ë nhane monghyje hagwã". Niporãi upéixa peje xe-rehe.

¹⁰ Xe-rehe ija'e'ÿ va'e he'i rei araka'e xe rekoha-rehe. "Ani pepena Paulo nhe'ë-rehe" he'i rei araka'e. "Onhemonhe'ë hatã hatã nhande-vy okwatia ohai-vy. Nhane ndive oime ramo ae ipy'amirí va'erã. Nonhe'ë kwaái arã" he'i rei xe rekoha oikwaa e'ÿ va'e.

* **10:6** 2 Co 6.7; Ef 6.10-13

¹¹ Upe he'i va'ekwe toikwaa katu: Mombyry aime ramo pendéhegwi araha uka arā xe kwatia nhe'ē. Upe xe kwatia nhe'ē-rami joty agwahē ramo pende ha-py apogwereko arā.

¹² Gwekoha porā ete mo'ā-rehe onhembotuvixa uka rei va'e kwéry ojéhegwi rei onhemombe'u porāse mo'ā va'e. Ndaxe py'agwasu mo'āiry ikyke-rehe an-hemoī hagwā anhemboete-vy. Ha'e kwéry onhembotavy voi. Onhemboheko porā ra'anga anga rei okwa-vy. Gwapixa reko-rupi rei oiko "Heko-rami ave xe reko porā" he'i mo'ā. Hekoha porā tee va'e reko-rehe ha'e kwéry nopenáiry hikwái. Ha'e kwéry ae ho'arandu-rupi hikwái. Nhandejáry rekoha-rupi e'ŷ okwa hikwái. Onhembotavy rei okwa-vy.

Hesu rehewa nhe'ē nohendúiry vyteri va'e-pe oho-ta omombe'u Paulo

¹³ "Nhandejáry ore mbou oromombe'u hagwā inhe'ē" oro'e ramo ndaha'ēi oronhembotuvixase rei-vy. Anhetegwa voi ore nhe'ē. Ha'e ore mondo e'ŷ ha-py ndorohói ave. Nhandejáry réry-py voi orogwahē va'ekwe pende ha-py. Héry-py voi oromombe'u mbe'u va'ekwe peē-my inhe'ē.

¹⁴ Ore mundo e'ŷ ha-py ndorohói voi ore. Ha'e ore mundo va'ekwe peiko ha-py. Upéixa-gwi hemimbota-rupi Hesu Cristo rehewa nhe'ē mombe'u-vy orogwahē va'ekwe upe-py. Ore ranhe voi va'ekwe oromombe'u hesegwa peē-my.

¹⁵ Oĩ ave ambue kwéry hesegwa nhe'ē omombe'u mbe'u va'e. Hembiapokwe-rehe ore noronhembotuvixa mo'āi. "Xe remimombe'ukwe ohendu-gwi ojerovia-ma Hesu-rehe" ndoro'e mo'āi hemiendukwe kwéry-rehe. Ore ae Hesu rehewa nhe'ē ne'írā vyteri ohendu va'e ha-py meme oroho. Upéa orojapo-gwi peē ave pehendu oréhegwi hesegwa nhe'ē. Ha upéa-rehe oroha'arō pejerovia porāve rāve hagwā-rehe. Upéa-rehe oroho jevy va'erā pende ha-py hetave tave hagwā Nhandejáry nhe'ē oromombe'u hagwā peē-my. Nhandejáry ore mondo ha-py ae mate ore oroho va'erā.

¹⁶ Peē-my oromombe'u heta rire oroho jevy-ta mombyryve. Mombyryve ryve tetā ambue mbue-py ore orohose jevy. Hesu rehewa nhe'ē porā nohendúiry vyteri va'e ha-py oroho jevy-ta oromombe'u hagwā hesegwa nhe'ē. Upéixa ramo ndikatúi avave he'i ore-rehe "Hesu rehewa nhe'ē oikwaa va'e-pe omombe'u jevy Paulo heta gwenduhare-rehe rei onhemomba'egwasu hagwā" ndikatúi he'i ore-rehe hikwái.

¹⁷ Nhandejáry nhe'ē kwatia-rehe oĩ va'e he'i:
"Oime ramo onhemomba'egwasuse va'e, tonhemomba'egwasu Nhandejáry Hesu Cristo-rehe"*

he'i Nhandejáry nhe'ē kwatia-rehe oĩ va'e.

¹⁸ Nhanhemboete ramo, nhane rembiapo-rehe nhanhemomba'egwasu ramo, nhane akā-gwi rei ae nhanhemboete rei jaiko-vy. Ha "Hekoha porā-ma voi" he'i ramo katu nhande-rehe Nhandejáry, nhande rekoha porā-ma voi.

11

Paulo ndaha'ēi gwī Nhandejáry nhe'ē omombe'u ra'anga va'e kwéry-rami

¹ Itavy va'e-rami voi para'e aiko peē-my anhemonhe'ē eterei-gwi. Ndapotoriyaséi jepe aipota peikwaa porāve xe reko-rehe.

² Ajepy'apy voi pende-rehe kwéry. Nhandejáry hakate'ŷ nhande-rehe harami ave xe rakate'ŷ voi pende-rehe kwéry. Pende ru-rami ave ajepy'apy pende-rehe. Túvy gwajýry kunhataï ime e'ŷ va'e-rehe hakate'ŷ-vy, oipe'a íxupe gwarā imerā. Upéixa ramo ha'e ae omerā gwembiahayhu-pe anho ohayhu

* **10:17 Jr 9.24**

hagwā. Upéixa ave xe apogwereko xe rajy-rami. Pene rembiayhurā aipe'ama peē-my héry va'e Cristo. Aipota eterei peha'arō íxupe pende ky'a e'ŷ reheve. Upéa-gwi xe rakate'ŷ pende-rehe.

³ Pejerovia porā va'ekwe Cristo-rehe. Pende py'apyhy-ma Cristo. Pende py'apy gwive pegwata-ma va'ekwe indive. Āy ae ajepy'apy pende-rehe Cristo-gwi pene mbojere jevyse va'e-rehe. Oĩ-ma pene mbotavyse va'e, pene monhomongeta rei va'e pende py'apy-py ogwerova uka-vy pende resa Nhandejáry-gwi. Upéixa-gwi ajepy'apy-ma pende-rehe. Ouse va'erā pende resa rerova ukase jevy va'e pene mbotavyse va'erā. Ani penhembotavy uka íxupe. Ani Eva amyrī-rami penhembotavy uka teĩ íxupe. Eva oikwaa teĩ jepe va'ekwe. Onhembotavy uka joty va'ekwe onhemombói ou-vy va'e-pe. Gweko-rupima oity va'ekwe Eva-pe anhaygwasu. Ani penhembotavy uka avave-pe. Ani pejehesa rerova Hesu-gwi hese.*

⁴ Amombe'u porā-ma va'ekwe peē-my Hesu rehewa nhe'ẽ tee. Ha'e anho voi nhane resende teeharā. Nhe'ẽ Marangatu tee va'e-rehe amombe'u porā-ma ave va'ekwe peē-my. Upe anhete nhe'ẽ pehendu va'ekwe jepe, perohory joty gwī arandu rehewa nhe'ẽ ra'anga omombe'u va'e kwéry-pe. Ogwahē ramo pende ha-py, pehenduse voi hemimombe'u. Ha'e kwéry katu pene mbotavy jevy va'erā voi. Hesu aikwaa e'ŷ va'e rehewa nhe'ẽ omombe'u ramo peē-my pejeapysaka teese voi hese. Nhe'ẽ Marangatu tee e'ŷ va'e aikwaa e'ŷ va'e rehewa nhe'ẽ omombe'u ramo peē-my pejeapysaka teese ave hese. Pende rervase jevy Cristo tee-gwi. Ha peē katu pembov'y'ase íxupe kwéry. Niporāi voi upe pende rekoha.*

⁵ “Ore katu Hesu remimbo'e hemimondo tee va'e” he'i mo'ã ójehe peē-my. “Ore ramigwa ndaipóri oikwaa va'e” he'i mo'ã ave peē-my onhembotuvixasevy. Xe ae katu nda'éiry upeixagwa. Nanhembotuvixaséi ramo jepe ndaha'éi hekoha porāve va'e xéhegwi ha'e kwéry. Ha peē katu Hesu rembigwái e'ŷ-rehe pejeroviaseve.

⁶ “Inhe'ẽ ngatu porāve va'e-rami nomombe'úi nhande-vy Paulo” peje para'e xe-rehe. Naxe nhe'ẽ ngatu kwaái ramo jepe ndaijapýi voi xe remimombe'urā. Aikwaa porāve rāve xe nhe'ẽrā. Anhetegwa mate voi xe remimombe'u. Hesu Cristo rehewa aikwaa porā tee voi xe. Upéa ahexa uka meme va'ekwe peē-my. Hesu rehewa nhe'ẽ amosarambi va'ekwe amombe'u-vy peē-my.

⁷ Ndaxe reko johu porāi voi nipo araka'e. Hepy e'ŷ reheve voi amombe'u va'ekwe peē-my Nhandejáry nhe'ẽ. “Hembigwaa tee ramo ra'e hepy-rehe mante ra'e oporomo'arandu arā ra'e” peje rei nipo ra'e xe-rehe ndaxe reko johu porāi-vy. Apohexakwaa rei-gwi ae aiko va'ekwe pene pa'ũ-rupi amombe'u mbe'u peē-my Hesu Cristo rehewa nhe'ẽ. Upéa-rehe anhemomirīve va'ekwe peē-my pejeroviave hagwā Hesu Cristo-rehe peiko porā hagwā indive. Upe xe rembiapo porākwe-rehe “Hembia po vai” peje rei joty xe-rehe ra'e. Ndapejohu porāi nipo ra'e xe reko.

⁸ Amombe'u javé va'ekwe peē-my Hesu rehewa nhe'ẽ, tetā ambue-gwi Hesu rerviaha ombou va'ekwe xe-vy xe mba'e repyrā. Mombyry jepe aiko ramo íxugwi kwéry íxupe amba'apo va'e-rami xe rerekha'e kwéry. Upéixa oroiko va'ekwe pehendu porā hagwā Hesu rehewa nhe'ẽ.

⁹ Pene pa'ũ-rupi aime ramo va'ekwe xe mba'e repyrā ndarekói jepe pendéhegwigwa-rehe ndajeruréi joty va'ekwe peē-my. Upéixa aikotevē jepe aĩ-vy va'ekwe javé ou-ma Macedônia yvy-gwi Hesu rerviaha va'ekwe. Ome'ẽmba xe-vy xe remikotevē repyrā. Peē-my ndajeruréiry voi va'ekwe xe

* **11:3** Gn 3.4-13 * **11:4** Mt 7.15; Rm 16.17; Gl 1.8; Ef 5.6-7; Cl 2.8; 2 Pe 2.1-2; 1 Jo 4.1

remikotevē. Mba'eve-rehe voi katu ndajerure mo'āi ave peē-my pono peē-my ipohyí xe remikotevē repyrā-rehe.

¹⁰ Acaia yvy jerekwe-rupi aiko ramo hepyrā nda'éiry joty aiko-vy Hesu rehewa nhe'ē mombe'u-vy. Anhete voi upe xe nhe'ē. Hesu-rehe ajerovia-gwi naxe nhe'ē apúi va'e voi xe.

¹¹ “Ma'erā-gwi gwemimombe'u repyrā-rehe noporandúiry” peje araka'e peporandu-vy araka'e xe-rehe. “Nanhande rayhúi-gwi para'e nopenái nhande-rehe oporandu hagwā nhande-vy opirapirerā-rehe” peje nipo araka'e xe-rehe. Ma'erā-gwi upéixa peje araka'e xe-rehe? Xe katu apohayhu voi. Tupā Nhandejáry oikwaa voi xe apohayhuha.

¹² Oī gwī “Paulo reko-rami ave xe reko porā” he'i ra'anga rei va'e ójehe. Xe katu hepyrā e'ŷ-rehe amombe'u Hesu rehewa nhe'ē. Ha'e kwéry ae katu hepyrā-rehe mante omombe'u ra'anga anga rei oiko-vy. Upéixa-gwi “Paulo reko-rami ave xe reko” he'i mo'ā ójehe. Ha'e gwekoha ombojose mo'ā oiko-vy xe rekoha-rehe ha xe katu xe remimombe'ukwe repy-rehe ndajeruréi peē-my.

¹³ Nhandejáry remimondo tee-rami ojehexa ukase mo'ā hikwái. Onhem-boheko porā ra'anga mo'ā oiko-vy. “Cristo réry-py oromombe'u inhe'ē” he'i rei rei ójehe ijapu-vy. Oporombotavy va'e voi ha'e kwéry oiko-vy.

¹⁴ Upéixa voi anhaygwasu Satanás ave oiko. Oporoheko a'ā kwaa ou-vy. Nhandejáry rembigwái yváy pygwa tee ramo mo'ā ojehexa uka ou-vy. Onhembohesakā a'ā anhaygwasu. “Nhandejáry rembigwái tee voi nipo xe mo'arandu ra'e” nhane mbo'e ukase voi ójehe.

¹⁵ Ha'e-rami ave inharandu-rupi oiko va'e oporoheko a'ā kwaa voi. Heko porā va'e-rami ojehexa uka nhande-vy. Nhane mbotavyse-gwi omombe'u ra'anga anga rei Nhandejáry nhe'ē nhande-vy. Opa-ma ramo ko yvy hem-biapo apokwe-rehe ombohosa asy va'erā íxupe kwéry Nhandejáry.

¹⁶ Xe Paulo ha'e jevy-ta peē-my. Ani xe rerekó teĩ itavy rei va'e-rami. Oī ramo jepe “Itavy rei ko Paulo” he'i va'e xe-rehe, tojeapysaka katu xe nhe'ē-rehe. Gwī Nhandejáry nhe'ē omombe'u ra'anga va'e kwéry onhembo-tuvixa hagwe-rami, xe ave anhembotuvixa-ta peē-my. Itavy va'e-rami jevy anhemombe'u-ta peē-my.

¹⁷ Nhandejáry nde'íry jepe xe-vy aipo ha'e hagwā peē-my anhemombe'u-ta itavy va'e-rami. Upéixa anhemombe'u jepe xe reko porā-rehe mate joty aikwaa uka va'erā kuri peē-my.

¹⁸ Oī heta va'e ojéhege rei onhembotuvixa ukase peē-my. Xe ave anhem-boetesva'e-rami aiko-ta kuri ave peē-my.

¹⁹ “Nhane arandu porā ra'e” peje rei pendéjehe. Pene arandu porā ramo ma'erā po pemogwahē porā upe oakā-gwi rei inharandu va'e pene mbotavyha kwéry?

²⁰ Pende-rehe omanda rei va'e-rehe pejerovia tee ra'e. Gwembigwái ramo pende rerekó rei ramo jepe pemboete joty ra'e íxupe. Pene rembiporu oipe'a rei pendéhegwí ramo jepe, pene mboporiahú ramo jepe pemboete joty ra'e íxupe. Pene mbotavy ramo jepe, pene momirí ramo jepe onhembotuvixa ete-vy peē-my, pende rova pete ramo jepe pemboete joty ra'e íxupe. “Xe arandu voi” peje rei joty pendéjehe.

²¹ “Ndaipy'agwasúi Paulo” peje ra'e xe-rehe. Peje porā voi. Néi. Ndaxe py'agwasúi apogwereko asy hagwā. Gwī onhembotuvixa rei va'e ipy'agwasu he'i hagwā “Kóxa aiko-gwi xe reko porā”. Upe va'e reko porā-gwi xe ae xe reko porāve katu. Xe ave, xe Paulo, itavy va'e reko vérámi aiporu-ta peē-my. Anhembopy'agwasu xe reko porāha amombe'u hagwā peē-my.

²² “Xe rugwy re'ýi voi hebreu kwéry. Hebreu tee va'e voi ko xe” he'i ójehe upe Hesu remimondo ra'anga va'e kwéry pene mboa'e'ý uka hagwā rei xe-rehe. Xe katu hebreu tee ave xe. “Myamyrī Israel remiarirō Nhandejáry rembiporavokwe voi ko xe” upéixa ave ha'e kwéry he'i ave ójehe. Upéixa ave xe. “Abraão amyrī xe ramoigwasu tee voi” he'i ave ójehe onhemomba'egwasu rei-vy. Xe ave, xe ramoigwasu tee Abraão amyrī ave xe.

²³ “Ore Hesu rembigwái” he'i onhemombe'u mo'ã penhemboa'e'ý uka hagwā xe-rehe. Xe hembigwái porāve voi íxugwi kwéry. Amba'apo porāve íxugwi kwéry xe. Itavy va'e vérami tanhemombe'u jevy peẽ-my xejehegwigwa. Hesu-rehe ija'e'ý va'e ogwereco asy meme Hesu nhe'ẽ mombe'uhaty kwéry-pe. Upéixa-gwi xe-vy ave xe rereko asy. Xe rereko asyve syve upe pene mbo'e a'ã a'ã rei va'e kwéry-gwi. Xe moĩ moĩ va'ekwe preso. Hetave xe moĩ preso íxugwi kwéry. Ha hetave va'ekwe xe nupā ave. Xe nupā nupā meme voi va'ekwe. Haimete mete xe juka ave va'ekwe. Ahasa asyve voi íxugwi kwéry.

²⁴ Hesu rehewa nhe'ẽ amombe'u mbe'u-gwi va'ekwe xe nupā uka vakapi ojepogwā va'ekwe-py. Cinco vése xe nupā uka upéixa judeu kwéry mburuvixa va'e. Xe nupā jave, xe nupā jevy jevy. Trinta e nove vése peve xe nupā jevy jevy voi va'ekwe.

²⁵ Mbohapykwe jevy xe nupā va'ekwe yvyra-py Roma yvy pygwa kwéry. Oĩ ave ojogweroaty voi va'ekwe xe-rehe xe api api-vy ita-py. Mbohapykwe onheapymī pymī va'ekwe xe ryru kanoagwasu ygwasu mbyte-rupi ahasa mo'ã ramo. Ygwasu mbyte-py rei ajepyhy rei va'ekwe aĩ-vy. Xe ryru kanoagwasu ho'ypy-ma ramo ygwasu mbyte-py rei apyta va'ekwe aĩ-vy. Peteĩ áry pyhare peve aĩ va'ekwe upe-py amano hagwā mo'ã.*

²⁶ Hesu rehewa nhe'ẽ amombe'u hagwā agwata puku puku meme voi aiko-vy. Upéixa-gwi heta-ma xe jukaharāgwe-gwi aha jepe jepe aiko-vy. Ysyry-rupi agwata jave haimete xe juka va'ekwe. Mondaha oiko va'e haimete ave xe juka va'ekwe. Xe ra'arō porā va'ekwe xe re'ýi kwéry judeu kwéry xe juka hagwā mo'ã. Judeu kwéry e'ý va'e gwive xe jukase mo'ã. Tetā-rupi agwata ramo, tekwat y e'ý-rupi ahasa ramo, yugwarusu rovái-rehe ahasa ramo heta jevy ahasa asy haimete amano hagwā mo'ã. Hesu rerovia ra'angaha xe rereko asy meme. Áy peve xe rereko asy. Hesu rehewa nhe'ẽ amombe'u-gwi xe rereko asy meme joty voi.*

²⁷ Tetā tetā-rupi amombe'u hagwā Hesu rehewa nhe'ẽ aha meme. Aha jave amba'apo aha-vy. Xe rembiapo eterei-gwi xe mokane'õ ne'õ. Heta ndakéiry. Heta ave xe vare'a va'ekwe aha-vy. Xe y'uhéi jepe va'ekwe aha joty. Akaru e'ý e'ý rehewe aha ave va'ekwe. Peteĩmi ao rehewe aha va'ekwe.*

²⁸ Hesu reroviaha kwéry opa rupigwa-rehe ajepy'apy aiko-vy va'ekwe, áy peve. “Oiko porā para'e tapa ndoiko porāi Hesu ndive” ha'e voi aiko-vy.

²⁹ Oĩ ramo oiko porā hagwā-rehe ikangy va'e ijyke-rehe aĩse aipytygwō hagwā íxupe. Oĩ ramo íxupe oity ramo gweko-rupi hekoha vai va'e, avy'are'ý-ma voi hese ajepy'apy-vy.

³⁰ Nanhembotuvixaséi teĩ jepe, tekotevē ramo, anhembotuvixa va'erā peẽ-my. Xe mbaraete tee e'ý rehewa mate ae tanhemombe'u peẽ-my anhembotuvixa-vy.

³¹ Ndaxe apúi peẽ-my. Nhandejáry Hesu Cristo Ru, upe onhemboete opa e'ý rehewe va'e, oikwaa nda xe apúi va'e voi ko xe.

³²⁻³³ Aime ramo va'ekwe Damasco tetā-my xe pyhy ukase mo'ã va'ekwe mburuvixa. Aretas mburuvixave réry-py oiko pe mburuvixa upe-py. Tetā

* ^{11:25} At 16.22; 14.19 * ^{11:26} At 9.23; 14.5 * ^{11:27} 1 Co 4.11-13; 2 Co 4.8-10; 6.4-5

jere jokoha-rupi omoñ heta soldado xe pyhy uka hagwā mo'ā. Xe irū kwéry xe resende joty. Ajakagwasu-py xe moñ xe monhemi-vy. Okē'i-rupi xe mosē va'ekwe. Xe mbogwejy xe reraha-vy xe pyhyharāgwe-gwi, aha jepe joty íxugwi kwéry. Upéixa-gwi Damasco tetā mygwa mburuvixagwasu xe pyhy uka mo'ā va'ekwe.*

12

Nhandejáry ojehexa uka va'ekwe Paulo-pe ikéry-py e'ŷ va'ekwe

¹ Naiporāi nhanhembotuvixase rei ramo jepe, tanhemombe'u xe reko porā-rehe peẽ-my. Jahexa e'ŷ va'e xe kéry-py e'ŷ ahexa va'ekwe. Upéa-rehe amombe'u-ta peẽ-my. Xe-vy voi va'ekwe ojehexa uka porā Nhandejáry ohendu uka porā ave xe-vy onhe'ē va'ekwe. Upe xe voi aikwaa va'e-rehe amombe'u-ta peẽ-my peikwaa porāve hagwā peẽ.

² Yma va'ekwe Cristo-rehe ajerovia rire xe reko nandi jepe Nhandejáry xe rerojeupi rei xe reraha-vy gwenda-py. Yváy mbohapyha peve gwenda iporā ete va'e-py xe renogwahē va'ekwe xe reraha-vy. Ojapo-ma quatorze ro'y xe reraha hagwe. Ndaikwaái xe rete reheve para'e xe rete e'ŷ reheve para'e xe reraha-ma va'ekwe oha-py. Nhandejáry ae katu oikwaa.

³ Aikwaa joty xe reraha hagwe. Xe rerojeupi va'ekwe xe reraha-vy. Xe reko nandi reheve tapa xe rete e'ŷ reheve ndaikwaa porāi. Nhandejáry ae oikwaa.

⁴ Upe-py yváy-py ahendu nhe'ē porā eterei. Ndikatúiry nhande yvy pygwa nhamombe'u jevy upéa nhe'ē. Iporā eterei-gwi nhande ndajaiporu kwaái upéa nhe'ē.

⁵ Upe xe reko iporā eterei hagwe-rehe anhemomba'egwasuse ramo ra'e iporā arā ra'e. Xe reko porā-rehe ajehexa ukase porā ramo ra'e anhemomba'egwasu va'erā ra'e peẽ-my. Xéjehé katu nanhemomba'egwasuséiry. Xe mbaraete e'ŷ rehewa nhe'ē mante aikwaa uka va'erā peẽ-my.

⁶ “Cristo reko-rupi aiko porā” ha'e ramo ra'e hupigwa-rupi voi amombe'u arā ra'e jepe xéjehé, naxe arandu porāi arā ra'e joty upéixa anhemomba'egwasu ramo ra'e. Iporāve namombe'úiry peẽ-my. Xe reko peikwaa-ma voi. Xe remimombe'u peikwaa-ma ave. Ko'ángá xe rerekō porāve hagwā ndajekwaa ukaséi peẽ-my. Iporāve akirirí tee aiko-vy.

⁷ “Iporā eterei va'e avave ndohexái va'e xe ae ahexa-ma” nipořai amombe'u anhemomba'egwasu-vy. Upéa-gwi Nhandejáry omoñ va'ekwe xe-rehe ju ramigwa xe mbohasa asy hagwā. Nhande rete kutu kutuha vériami, anhaygwasu rembigwái ramigwa Nhandejáry ombou xe-vy. Pono anhemomba'egwasu upéa omoñ xe-rehe.

⁸ “Ko xe mbohasa asyha eipe'a emboyke xéhegwí” ha'e va'ekwe Nhandejáry-pe ajerure-vy. Mbohapy jevy ajerure va'ekwe oipe'apa hagwā mo'ā xéhegwí.

⁹ Ha ndoipe'a mo'āi voi va'ekwe xéhegwí. “Oroporiahuverekó reko-ta, oromombaraete meme va'erā ereikotevě jave” he'i va'ekwe xe-vy. “Naimbaraeeti va'e-pe amombaraete porā tee joty” he'i va'ekwe xe-vy. Xe mombaraete hagwā he'i ramo xe-vy xe mbov'y'a. Áy peve naxe mbaraetéi ramo jave avy'a. Aipota Cristo pu'aka ojehexa uka xe-rehe xe mombaraete jevy hagwā.

¹⁰ Naxe mbaraetéi ramo jepe avy'a joty aiko-vy. Xe-rehe ija'e'ŷ va'e onhe'ē rei rei ramo jepe xe-rehe, aikotevě eterei ramo jepe, Hesu-rehe ojerovia e'ŷ va'e xe rerekō asy ramo jepe, Cristo rape-rupi aiko-gwi anhemboasy ramo jepe, avy'a joty aiko xe. Naxe mbaraetéi jave Nhandejáry ae xe mombaraete jevy.

* 11:32-33 At 9.23-25

Corinto tetā mygwa Hesu-rehe ojerovia va'e-rehe Paulo ojepy'apy

¹¹ Itavy va'e vérəmi voi anhemomba'egwasu kuri ahai-vy. Pende-rehe happy voi itavy va'e vérəmi anhe'ẽ porã porã xéjehe. Peẽ napepenáiry xe-rehe. Nhandejáry remimondo a'ã a'ã-rehe mate pepena peiko-vy. Mbava'e-py tipo ha'e kwéry hembiapo porãve xéhegwi? Mba'eve-py. Xe xe rembiapo porãve même íxugwi kwéry. Xe reko mirí javé jepe, xe xe rekoha porã teeve íxugwi kwéry.

¹² Aime javé va'ekwe pene pa'ũ-my ohexa uka peẽ-my opu'aka teeħa Nhandejáry. Hemimbo'e hemimondo tee aiko-gwi amombe'u javé va'ekwe inhe'ẽ ha'e ojehexa uka va'ekwe hexapyrã-rupi peẽ-my. Gwembiapo porã ojapo Nhandejáry. Nhane rembiexa e'ŷ va'e ojapo même ave hesegwa nhe'ẽ amombe'u javé va'ekwe peẽ-my. Xe hemimbou tee ajekwaa même-ma va'ekwe pene pa'ũ-my.

¹³ Tetā tetā-rupi Hesu réry-py onhomboaty aty va'e-pe areko va'ekwe-rami apogwereko ave va'ekwe. Peteĩ mba'emi mate ndajapói ndapogwerekói peteĩxa tetā ambue pygwa ndive. Upe pygwa kwéry ome'ẽ même va'ekwe xe-vy ãy peve xe remikotevē. Ha peẽ katu mba'eve napeme'ẽiry xe-vy. Ndajeruréi va'ekwe peẽ-my xe remikotevē-rehe. Upéa-rehe "Hembiapo vai nhande-vy Paulo" peje rei nipo ra'e xe-rehe. Aipo ramo ajerure kuri peẽ-my xe poriahuverekō rei hagwã. Peẽ-my pende rerekō asy va'e-rami apogwereko-ma ramo ra'e, xe poriahuverekō rei va'e-rami joty taxe moingo mani, ha'e-ta peẽ-my.

¹⁴ Mokõi jevy aha va'ekwe pende ha-py apopohu-vy. Ko'ãy ahase jevy pende ha-py. Aiko hagwe-rami aiko hagwã pende ha-rupi jevy. Naporandu mo'ãi peẽ-my xe rekotevē-rehe. Ndaha'ei pene mba'e-rehe apena-gwi ahase pende ha-rupi. Aipota ae peẽ xe rerovia nhande joja porã hagwã onhondive. Mitãygwe nome'ẽi omongakwaahare-pe mba'eve hemikotevē. Túvy ae ome'ẽ me'ẽ hemikotevē gwa'y kwéry-pe gwajy kwéry-pe ave. Ha xe katu pende rurami aiko peẽ-my. Apombojerovia va'ekwe Hesu-rehe. Xe ra'y kwéry, xe rajy kwéry-rami peiko xe-vy.

¹⁵ Upéa-rehe xe py'a gwive apopytygwõse aiko-vy. Opa xe mba'e kwéry ame'ẽ va'erã pende-rehe ha-py. Amano hagwã-rami aĩ arã ave peiko porã tee hagwã Cristo reko-rupi. Ha peẽ nipo naxe rayhu porã voi ra'e apohayhu eterei-gwi.

¹⁶ "Upéixa voi Paulo" peje para'e. "Gwemikotevē-rehe ndojeruréi jepe nhane mbotavy rei nipo ra'e" peje mo'ã nipo ra'e xe-rehe.

¹⁷ Mba'eixagwa pa xe apombotavy va'e? Xe irũ amondo ramo pende ha-py apombotavy tipo? Nahániry. Xe aporombotavy e'ŷ va'e voi xe.

¹⁸ Ajerure rure va'ekwe Tito-pe oho hagwã va'ekwe pende ha-py. Peteĩ nhande re'ýi Cristo-rehe ojerovia va'e ave amondo ave Tito ndive oho hagwã va'ekwe pende ha-py. Pene mbotavy para'e Tito? Napene mbotavýi mba'eve-rehe upé xe remimondo kwéry. Peteĩxa oroiko indive. Peteĩxa ore py'a. Ore reko porã tee va'e voi ore. Oporombotavy e'ŷ va'e voi ore.

¹⁹ "Ojehexa uka porãse jevy nhande-vy Paulo" are-ma peje rei araka'e xe-rehe. Ndaha'ei upéa-rehe anhemonhe'ẽ peẽ-my. Nhandejáry oikwaa Cristo réry-py ae anhemonhe'ẽ peẽ-my. Peẽ xe rembihayhu kwéry voi. Apopytygwõha ramo xe aiko peẽ-my.

²⁰ Ajepy'apy voi pende-rehe. Agwahẽ ramo pende ha-py ndajohu porãi arã voi para'e pende rekoha, Nhandejáry rape-rehe ndapeiko porãi-gwi. Ha peẽ ave ndapejohu porãi arã para'e ave xe rekoha, apogwereko asy va'e-rami,

apogwereko ramo. Upe va'e-rehe ajepy'apy pende-rehe. Oĩ para'e pene pa'ũ-my onhonhe'ẽ mbojevy jevy oiko va'e. Oĩ ave para'e gwapixa oiko porãha ndojohu porãi va'e ave. Oĩ ave para'e onhemoyrõ rei rei va'e ojóupe. Oĩ ave para'e ojéupe gwarã anho rei oipota va'e. Oĩ ave para'e ndoiko porãi va'e gwapixa ndive. Oĩ ave para'e onhe'ẽ rei va'e gwapixa-rehe. Oĩ ave para'e onhembotuvixase rei va'e. Peteïxa voi nipo ra'e ndapeikovéi ra'e pende rapixa kwéry ndive. Pende reko porã e'ŷ ajohu ramo pende-rehe amboasy va'erã pende rekoha. Anhemonhe'ẽ pohýi arã peẽ-my. Pende rekoha vai-rehe anhemonhe'ẽ ramo pemboasy ave arã.

²¹ Ajepy'apy pende rekoha-rehe, xe re'ýi kwéry. Agwahẽ ramo pende happy anhemboasy va'erã para'e pende reko vaikwe-rehe. Nhandejáry xe motí arã voi pene pa'ũ-my aime jave naphehendu porãi-gwi xe remimombe'ukwe perova hagwã pende rekoha vaikwe peiko porã hagwã indive. Gwĩ onhemboasy e'ŷ va'e gwembiapo vaikwe-rehe xe monhemboasy arã ave. Oĩ nipo heta pene pa'ũ mygwa gwembiapo vaikwe-rehe onhemboasy e'ŷ va'e ra'e. Teko vai-rupi oiko jepe, menda'ŷ-rehe ojogwereko jepe, inhakã vai jepe, nonhemboasýiry joty okwa-vy. Nogwenotíry joty gwekoha-gwi ndogwerovái gwekoha vaikwe. Upéa-rehe atí va'erã Nhandejáry-gwi pendehegwi ave atí va'erã, pehendu rei-gwi xe remimombe'ukwe.

13

Agwahẽ ramo pende ha-py apomonhe'ẽ va'erã pene rembiapo vaikwe-rehe

¹ Agwahẽ-tama pende ha-py. Mokõi jevy agwahẽ va'ekwe upe-py. Aha jevy ramo amombohapy-ma va'erã xe ho hagwe pende ha-py. Agwahẽ ramo upe-py apomonhe'ẽ va'erã pene rembiapo vaikwe-rehe. “Hembiaapo vai-ma upe va'e” omombe'u ramo xe-vy mokõi, mbohapy-ma imombe'uháry arovia-ma va'erã areko asy-ma hagwã upe hembiapo vai va'e-pe.

² Aime jave upe-py mokõiha hatã-ma voi va'ekwe xe anhemonhe'ẽ va'ekwe hembiapo vai va'ety-pe, ambue kwéry-pe ave anhemonhe'ẽ va'ekwe. Ko'ângá katu mombyry aime ramo jepe ha'e jevy-ta xe: Ndaiporiahuvereko mo'âiry avave-pe ajohu ramo hembiapo vaikwe hese kwéry, areko asy-ta voi íxupe kwéry.

³ Oĩ ra'e gwĩ “Tojehexa uka porã katu nhande-vy Cristo Paulo omombe'u ramo” he'i rei ra'e xe-rehe. Pehexase para'e Cristo pu'akaha anhemonhe'ẽ ramo peẽ-my. Agwahẽ jevy ramo peikwaa voi arã “Paulo Cristo remimondo va'e voi” peje hagwã xe-rehe. Ohexa uka marangatu ete voi Cristo pene pa'ũ-my imbaraeteha.

⁴ Ha'e ae yma va'ekwe okurusugwasu-rehe omano ramo ndaipu'akáí vérampi ójehe. Áy ae katu Nhandejáry pu'akaha-rupi oikove jevy-ma. Ore ave Cristo ndive peteïxa oroiko-gwi heko-rami oroiko. Ore rete kangy hete-rami ave. Nhandejáry pu'akaha-rupi ae ore mombaraete jevy, Cristo reko-rami ave oroikove hagwã.

⁵ Peẽ katu, peteï tei penhemongeta katu pende py'apy-py peikwaa porã hagwã pende jeroviah-rehe. “Ajerovia rei para'e ajerovia porã-ma para'e Hesu Cristo-rehe” peje ae katu pendéjehe penhemongeta-vy pende py'a ndive. Peẽ ae peikwaa pende py'apóry. Pejerovia tee ramo Hesu-rehe, inhe'ẽ marangatu onhemoi pende py'apy-py pende py'apóry kwaaha pejerovia teemaha hese peikwaa hagwã. Ha ndapejerovia teéi ramo hese nomoíry. Penhemongeta katu pende py'apy-py peikwaa porã hagwã pende jeroviah-rehe.

6 Aipota voi peikwaa porā ore rekoha ore-rehe peje hagwā “Ói ave nipo ra'e Paulo py'apy-py ipy'apóry kwaaha ave” peje hagwā xe-rehe. Aipota voi peikwaa porā upe va'e.

7 Orombojeupi ore nhe'ẽ Nhandejáry-pe pende reko porārā-rehe: “Enhangareko porā Corinto pygwa kwéry-rehe ponove ojejavy” oro'e pende reko porārā-rehe orojerure-vy Nhandejáry-pe. Upéixa ajerure ramo íxupe ndaha'éiry xe rerekō porā hagwā-rehe. Pende reko porārā-rehe ae xe ajerure. Ndaha'éi ave he'i hagwā pende rexaháry: “Paulo renduhare oikwaa porā nipo Cristo rape rehewa nhe'ẽ. Omombe'u porā nipo ra'e Paulo” nde'i ukaséi avave-pe. Pende reko porārā Cristo reko-rami hagwā-rehe mate ajerure Nhandejáry-pe pende-rehe. Oĩ ramo jepe ore momba'e rei rei va'e, xe ae katu aipota pende reko porā meme ae joty peiko-vy.

8 Anhetegwa va'e meme amombe'u-ta. Ajehexa uka porāse-vy rei, ndikatúi xe apu. Anhetegwa va'e ndikatúi xe amboyke.

9 Upéa-gwi pene mbaraete ramo Hesu-rehe pejerovia tee-gwi orovy'a-ma va'erā pende-rehe kwéry. Nore mbaraetéi ramo jepe orovy'a arā joty pende-rehe. Orojerure rure Nhandejáry-pe pene mombaraeteve teve hagwā peiko hagwā heko tee-rupi.

10 Upe va'e-rehe ahai peẽ-my kwaitia. Agwahē e'ỹ mboyve anhemonhe'ẽ teese peẽ-my arova uka hagwā pende reko peẽ-my. Upéixa ramo ndapogwereko asýi va'erā pende ha-py aime jave. Nhandejáry réry-py inhe'ẽ mombe'uga ramo aiko peẽ-my. Ndaha'éi anhemonhe'ẽ asyse-gwi rei aiko upéixa peẽ-my. Pene pytygwō hagwā peikwaa porāve hagwā inhe'ẽ aiko peẽ-my inhe'ẽ mombe'u-vy.

Paulo omondo omandu'aha

11 Opa-tama xe nhe'ẽ ahaise va'e. Mixīve mate ahai-ta peẽ-my xe re'yi kwéry. Tapeiko katu Cristo reko tee-rupi. Tapehendu porā katu xe remimombe'ukwe. Tapeiko petēixa onhondive. Pende py'agwapy rehevē tapeiko onhondive. Upéixa peiko ramo Nhandejáry oĩ arā pene ndive. Ha'e nhanderayhuha, nhane mbopy'agwapy va'e voi ave.

12 Pejotopa ramo, penhoanhuvā nhuvā pejohayhupa rei-vy.

Hesu reroviaha ko'a pygwa omandu'aha omondo uka-ta kwaitia peẽ-my.

13-14 Nhandejáry Hesu Cristo tapende rovasa porā katu pende rexakwaa rei-vy. Tapene mandu'a meme katu Tupā Nhandejáry pende rayhuha-rehe. Tapene moirū irū katu Nhe'ẽ Marangatu tee va'e.

Paulo remimombe'ukwe Galácia yvy pygwa pegwarā epístola de Paulo aos gálatas

Paulo omondo Galácia yvy pygwa-pe onhe'ẽ. Kwatia-rehe omondo

¹⁻² Hesu reroviaha Galácia yvy-py oiko va'e onhomboaty aty ha-rupi. Xe Paulo amondo-ta peẽ-my xe nhe'ẽ. Xe katu Hesu Cristo remimondo va'e. Ndaikói va'ekwe Hesu Cristo remimondo ramo teko rei nhe'ẽ-py. Ndoikói xe moingo va'ekwe Hesu Cristo remimondo ramo. Hesu Cristo ae xe moingo va'ekwe gwemimondorā. Xe moingo va'ekwe Nhandejáry ave Nhande ru gwemimondorā. Gwa'ýry Hesu Cristo omano rire, túvy omoingove jevy va'ekwe íxupe. Ha ko'ánga xe re'ýi kwéry, Hesu reroviaha va'e, entéro xe ndive oiko va'e gwive omondo-ta peẽ-my omandu'aha.

³ Tapende rovasa katu Nhandejáry Nhande Ru va'e pende rexakwaa rei-vy. Tapende rexakwaa rei katu Nhandejáry Hesu Cristo ave. Tapene mbopy'agwapy ave.

⁴ Ha Hesu Cristo onheme'ẽ va'ekwe ijukaharā-pe. Ojejuka uka rei va'ekwe omboyke hagwā nhandéhegwí nhane rembiapo vaikwe, nhane resende hagwā, ndajaikovéi-ma hagwā ãygwa hekoha vai va'e reko-rupi. Nhandejáry Nhande Ru va'e remimbota-rupi ojapo upéa.

⁵ Upéa-gwi hembiapo porā-gwi, tonhemomba'egwasu meme ete katu Nhandejáry opa e'ý reheve. Aipota upéa. Amém.

Cristo rehewa nhe'ẽ porā peteñxa

(Mt 7.15; Rm 16.17; 2 Co 11.2-4; Ef 5.6; Cl 2.8; 1 Ts 2.4; 2 Pe 2.1-3; 1 Jo 4.1)

⁶ Pene renói va'ekwe Nhandejáry pemoirū hagwā íxupe, Cristo pende rexakwaa rei hagwā. Ha ko'ánga katu oĩ he'i va'e pende-rehe: "Sapy'a ojerovia-ma Nhandejáry-rehe. Ha ko'ánga katu pya'e oheja jevy-tama Nhandejáry-pe. Ojehesa rerova-tama outro kwéry-rehe, Cristo rehewa nhe'ẽ porā omombe'u ambue va'e-rehe" he'i pende-rehe.

Upéa ahendu ramo, xe mondýi voi.

⁷ Upe va'e peẽ-my omombe'u ambue va'e: "Cristo rehewa nhe'ẽ porā voi ore remimombe'u" he'i mo'ã omombe'u-vy. Ha ndaha'éi inhe'ẽ tee omombe'u va'e peẽ-my. Omombe'u joavy avy peẽ-my pene akã ombotarova rei-vy. Inhe'ẽ porā tee va'e ohekoviäröse mo'ã peẽ-my.

⁸ Ha pejeapysaka katu xe nhe'ẽ-rehe. Cristo rehewa nhe'ẽ porā peteñxa. Oromombe'u va'ekwe peẽ-my Cristo rehewa nhe'ẽ porā. Ha ko'ánga katu: "Ijapu ra'e ore remimombe'ukwe" oro'e jevy ramo peẽ-my, ivai arã. Oromombe'u ambue ramo peẽ-my, tore mondo katu ojéhegwí Nhandejáry ore mbohasa asy hagwā-py. Nhandejáry rembigwái yváy pygwa ave omombe'u ambue ramo peẽ-my, ivai arã. Omombe'u ambue ramo peẽ-my, tomondo katu íxupe ojéhegwí Nhandejáry ombohasa asy hagwā-py.

⁹ Oro'e hagwe-rami, ko'ánga ha'e jevy-ta peẽ-my. Oime ramo Cristo rehewa nhe'ẽ porā pehendu e'ý hagwe-rami omombe'u va'e, tomondo katu íxupe ojéhegwí Nhandejáry ombohasa asy hagwā-py.

¹⁰ Upéixa anhe'ẽ pohýi ramo, ma'erã he'i xe-rehe: "Paulo he'i upéa oipota hapixa kwéry omboete íxupe-gwi" he'i mo'ã xe-rehe. Ha anhetegwa va'e katu nomombe'úi. Anhemboete ukase ae Nhandejáry-pe. "Teko rei remimbota-rupi oiko Paulo" he'i mo'ã xe-rehe. Nomombe'u porãi xe rehewa. Teko rei

remimbota-rupi aiko vyteri ramo ra'e, ndaikói arã Cristo remimbota-rupi ra'e. Ndaikói arã ra'e a-rami Cristo rembigwái ramo.

*Paulo oiko-ma Hesu Cristo remimondo ramo
(1 Ts 2.4)*

¹¹ Xe re'ýi kwéry ha'e-ta peẽ-my. Cristo rehewga nhe'ẽ porã, xe remimombe'u va'e, ndaha'ei voi teko rei akã gwigwa rei. Aipota peikwaa upéa.

¹² Cristo rehewga nhe'ẽ porã ndoikóiry xe-vy omombe'u va'ekwe. Inhe'ẽ-py xe mbo'e va'ekwe ndoikóiry. Hesu Cristo ae oikwaa uka xe-vy va'ekwe onhe'ẽ porã omombe'u va'ekwe xe-vy. Upéa-gwi xe nhe'ẽ ndaha'ei teko rei akã gwigwa rei amombe'u.

¹³ Ha peẽ peikwaa voi xe rekowwe. Judeu kwéry xe rugwy re'ýi voi. Xe rekowwe judeu reko-rupi aiko ramo va'ekwe peikwaa voi. Xe ko areko asy va'ekwe aiko-vy Hesu reroviaha kwéry-pe, Nhandedjáry rembiporavo va'e-pe. Xe poxy-vy voi areko asy va'ekwe íxupe kwéry. Ajukase mo'ã va'ekwe aiko-vy íxupe kwéry.*

¹⁴ Ha ore rembypy ore ramói kwéry remimombe'ukwe gwive, ore rekoha, upéa ahendu porãmbaseve seve va'ekwe. Upéa-gwi heta xe re'ýi rugwy kwéry, xe jave ikaria'y va'e ohendu porã ramo ore ru he'i va'ekwe gwive, xe katu ahendu porãve voi. Judeu reko-rupi aikose voi va'ekwe.

¹⁵ Ha Nhandedjáry katu omoõ va'ekwe xe-vy xe rembiaporã xe reko e'ý ramo. Ha upéi katu xe renói va'ekwe xe rexakwaa rei-vy amoirũ hagwã íxupe.

¹⁶ Hemimbota-rupi ohexa uka va'ekwe xe-vy gwa'ýry amombe'u hagwã ta'ýry rehewga nhe'ẽ judeu e'ý pa'ü-rupi. Upe-ma ramo nanhombo'e mbo'ei xe rapixa kwéry ndive.*

¹⁷ Ndaħáí va'ekwe Jerusalém tetã-my anhombo'e hagwã Hesu remimondo va'e ndive. Upe-py Pedro oirũ ndive Hesu remimondo ramo oiko-ma xe renonderã. Ha ndaħáí joto va'ekwe anhombo'e hagwã hendive kwéry. Ha upéi katu aha pya'e ae íxugwi kwéry yvy akéno-py. Arábia yvy-py aha va'ekwe. Upe-gwi aju jevy ramo aha Damasco tetã-my. Upéa-gwi xe nhe'ẽ ndaha'ei teko rei akã gwigwa rei amombe'u.

¹⁸ Upe rire mbohapy ro'y rire aha Jerusalém-my. Pedro pohu-vy aha. Upe-py apyta. Quinze áry apyta hendive.

¹⁹ Ha outro kwéry Hesu remimondo va'e, avave-pe ndahexái. Tiago Nhandedjáry Hesu ryvy mante ahexa.

²⁰ Ko va'e kwatia-rehe amoõ va'e anhetegwa voi. Nhandedjáry resa-py amoõ anhetegwa voi. Ndaxe apúi voi.

²¹ Ha upéi katu asẽ Jerusalém-gwi. Aha Síria yvy-rupi. Cilícia yvy-rupi aha ave.

²² Ha Judéia yvy-rupi katu Hesu reroviaha onhomboaty aty va'e ndaxe rexái voi.

²³ Ndaxe rexái ramo jepe, ohendu xe rerakwã: “Nhande kwéry Hesu reroviaha va'e gwive, Paulo nhane moingo asy va'ekwe jajehesa rerova e'ý hagwã mo'ã Hesu-gwi, jarovia e'ý hagwã mo'ã Hesu rehewga nhe'ẽ porã. Ha ko'ángä katu ha'e ae Hesu rehewga nhe'ẽ porã tee omombe'u oiko-vy” he'i xe mombe'u-vy hikwái.

²⁴ Upéixa ramo xe rerakwã rendu-vy omomba'egwasu Nhandedjáry-pe hikwái.

2

Paulo oho Hesu reroviaha ruvixa ha-py

* **1:13** At 8.3; 26.9-11 * **1:16** At 9.3-6

¹ Upe rire, quatorze ro'y rire aha jevy va'ekwe Jerusalém tetā-my. Barnabé ndive aha va'ekwe. Ha Tito katu oho ave xe ndive.*

² Ha Nhandejáry xe-vyte oikwaa uka ra'e xe raperã. Upéa-gwi aha va'ekwe Jerusalém tetā-my. Orogwahé-ma ramo upe-py, aha Hesu reroviaha ruvixa ha-py. Ha'e kwéry anho ha-py aha amombe'u-vy. Hesu rehewa nhe'ẽ xe remimombe'u judeu e'ỹ kwéry pegwarã, amombe'upa porã íxupe kwéry alk-waa uka-vy: "Ndopo-rami amombe'u judeu e'ỹ kwéry-pe" ha'e Hesu reroviaha ruvixa-pe. Ndaipotái he'i xe remimombe'u-rehe, xe remimombe'urã-rehe ave: "Ndaha'éi Hesu rehewa nhe'ẽ tee va'e Paulo remimombe'u" ndaipotáiry he'i mo'ã xe-rehe upéa.

³ Oime ave xe ndive Tito xe ndive ou va'ekwe. Upéa ndaha'éi judeu kwéry va'e ore kwéry-rami. Grego va'e ae ha'e. Ha: "Iporã ereiko ore reko-rupi judeu kwéry reko-rupi. Iporã erenhepirekytĩ uka ore kwéry-rami" nde'íry joto íxupe.

⁴ Ha ndaipóri va'ekwe ore pa'ũ-rupi upéa he'i va'erã. Oike nhemi voi ra'e ore pa'ũ-my upéa he'i va'e. Upéa he'i va'e ndaha'éi Hesu reroviaha tee va'e. Omombe'u ra'anga anga rei va'e ae Hesu rehewa nhe'ẽ porombotavyse-vy. Oike nhemi voi ra'e ore rekoha rexha hagwã-rehe: "Hesu Cristo-rehe pejerovia-magwi, ma'erã ndapeikovéi-ma judeu kwéry reko-rupi?" he'ise ore-vy. "Judeu kwéry reko Nhandejáry rekoha voi" he'i ore-vy. "Ipokatu joto voi judeu kwéry nhe'ẽ nhande-vy. Ndaijapýiry, anhetegwa joto" he'i. "Naiporã peheja judeu kwéry rekoha peiko hagwã Hesu reko-rupi. Iporã katu Hesu reroviaha ohendu joto entero yma gware Moisés remimombe'ukwe onhemopotí hagwã" he'i mo'ã ore-vy.

⁵ Upe-ma ramo pya'e oronhe'ẽ joko upéa he'i va'e-pe: "Iporã para'e ne nhe'ẽ" ndoro'éi voi íxupe kwéry. Oroipota pehendu meme Cristo rehewa nhe'ẽ tee va'e penhemopotí tee hagwã. Onhe'ẽ ambue va'e peẽ-my ndoroipotáiry.

⁶ Ha Hesu reroviaha ruvixa va'e imandu'a porã hese va'e, ohendu xe nhe'ẽ. Ohendu-ma rire nonhemonhe'ẽi xe-vy: "A-rami ko erejapo va'erã. Upéixa ani erejapo teř" nde'íry xe-vy. Upe va'e huvinha oñ hese imandu'a porã va'e. Oñ omomba'egwasu va'e íxupe. Ha namomba'egwasuvéi íxupe ambue va'e kwéry-gwi. Nhandejáry-pe peteňxa nhande rekoha.*

⁷⁻⁸ Ha upe va'e huvinha nonhemonhe'ẽi voi xe-vy. Okirirí rei ae oikovy. Mba'eve nde'íry xe-vy. He'i xe rembiapo-rehe: "Yma ome'ẽ va'ekwe Pedro-pe Nhandejáry hembiaporã. Judeu kwéry-pe mante oipota omombe'u Hesu Cristo rehewa nhe'ẽ porã" he'i. "Ha ko'ângá katu Pedro-pe ome'ẽ hagwe-rami hembiaporã, ome'ẽ-ma ave kuri Paulo-pe nipo ra'e. Judeu e'ỹ kwéry-pe mante ae oipota omombe'u upe nhe'ẽ porã tee" he'i xe-rehe ojóupe. "Yma omombaraete va'ekwe Pedro-pe Nhandejáry imondo-vy judeu kwéry-pe Hesu remimondo ramo" he'i. "Ha ko'ângá katu Pedro-pe omombaraete hagwe-rami, omombaraete-ma nipo ra'e Paulo-pe ave imondo-vy judeu e'ỹ kwéry-pe Hesu remimondo ramo" he'i xe-rehe ojóupe.

⁹ Upe ramo Hesu reroviaha ruvixa va'e he'i xe-vy xe moneta-vy. Upe va'e nhande ru-rami, nhande jekoha voi. Héry va'e Tiago, héry va'e Pedro ave, héry va'e João ave. Upe va'e he'i xe-vy: "Ne mondo hagwã nde poravo nipo ra'e Nhandejáry. Nde poravo ne mondo hagwã nhande kwéry e'ỹ va'e ha-py" he'i xe-vy. "Ore moirũ katu" he'i xe-vy Barnabé-pe ave. Upéi xe pophy. Barnabé-pe oipophy ave. Oronhomoirũ-ma. He'i ore-vy: "Jarojoja katu nhane nhe'ẽ jaha hagwã" he'i. "Ore oroho va'erã nhande kwéry-pe

* 2:1 At 15 * 2:6 Dt 10.17

nhe'ẽ mombe'u-vy. Ha peẽ katu peho va'erã nhande kwéry e'ŷ-pe Hesu Cristo rehewga nhe'ẽ porã pemombe'u-vy" he'i ore-vy Hesu reroviaha ruvixa va'e.

¹⁰ Upéixa ramo nonhemonhe'ei voi ore-vy. Peteĩ mba'e mante omombe'u ore-vy: "A-py oĩ iporiahu va'e ore pa'ũ-my. Ani nde resarái hese kwéry-gwi" he'i ore-vy. "Upe iporiahu va'e-pe ame'ëse meme va'e hemikotevë" ha'e íxupe kwéry.

Paulo ndojohu porãi Pedro rembiapo

¹¹ Ha upéi katu Pedro ou Antioquia tetã-my. Ogwahẽ ramo upe-py, nahembiapo porãi. Upéa-gwi ha'e íxupe: "Naiporãi ne rembiapo" ha'e íxupe.

¹² Pedro ogwahẽ ramo upe-py, okaru oĩ-vy Hesu reroviaha judeu e'ŷ va'e ndive. Ha upéi katu ogwahẽ ou-vy gwĩ Hesu reroviaha Tiago remimbou judeu kwéry va'e. Upe-ma ramo ndokarusevéi-ma Pedro judeu e'ŷ va'e ndive. Judeu kwéry va'e ndive mante okaruse. Ndoipotái Tiago remimbou judeu va'e he'i íxupe: "Ne'írã oiko ramo judeu e'ŷ va'e judeu reko-rupi, naiporãi jakaru onhondive" he'i upéa ndoipotái. Pono he'i upéa, ndokaruvéi-ma onhondive Pedro. Onhomboja'o ja'o-ma okaru hagwã. Ikyhyje-gwi inhe'ërã-gwi onhondive ndokarusevéi-ma.

¹³ Ha nahembiapo porãi voi Pedro. "Iporã jakaru onhondive" he'i ramo jepe, ha'e ae katu ndokaruséiry onhondive. Okaru va'e-pe ombotavy. Upéa-gwi upe-py oĩ va'e judeu kwéry va'e, Pedro reko-ramima ave oiko. Ndokaruvéi-ma judeu e'ŷ va'e ndive. Upe ramo Barnabé jepe oipe'a-mahekoha. Ojoeko rupipa-ma ho'a hikwái.

¹⁴ Upe-ma ramo aheda hekoha: "Ndohovéi-ma nipo ra'e tape porã-rupi. Cristo rehewga nhe'ẽ porã tee va'e nohendu porãvéi-ma nipo ra'e" ha'e xe jéupe. Upéa-gwi ha'e Pedro-upé. Atýra-py ha'e íxupe: "Nde ko judeu kwéry va'e. Nde judeu jepe, judeu e'ŷ reko-rupi ereiko ave. Ndereikovéi-ma voi judeu reko-rupi anho. Upéixa ramo, ma'erã po eremoingose judeu reko-rupi judeu e'ŷ va'e-pe" ha'e íxupe. "Nde ko ndereikovéi-ma voi judeu reko-rupi" xe ha'e Pedro-pe.

Hesu Cristo-rehe jajerovia-ma ramo, "Nde py'a potã-ma" he'i va'erã nhande-vy Nhandejáry

(Mt 16.24; Rm 3.21-31; 6.6-7)

¹⁵⁻¹⁶ Ore ramói kwéry ko judeu kwéry voi. Moisés amyrã remimombe'ukwe tekoha kwaaha voi ore. Ndoroikói voi judeu e'ŷ rekoha-rupi. Ha ore arandu ramo jepe, Moisés amyrã he'i va'ekwe orojapo ramo jepe, "Nde py'a potã-ma" nde'íry joto va'erã ore-vy Nhandejáry. Hesu Cristo-rehe orojerovia-ma ramo ae, "Nde py'a potã-ma" he'i va'erã ore-vy. Upéixa ramo ore orojerovia-ma va'ekwe Hesu Cristo-rehe, "Pende py'a potã-ma" he'i hagwã ore-vy Nhandejáry.

Jajerovia-ma ramo hese, nhande py'a omopotã-ma va'erã. Ha nhande nhanhemopotã uka reise ramo Moisés amyrã remimombe'ukwe gwive rei nhahendu-vy, nanhane mopotãry va'erã joto. Upéa he'i voi Nhandejáry nhe'ẽ: "Gwĩ Moisés amyrã remimombe'ukwe gwive jajapo ramo jepe, Ipy'a potã-ma, nde'íry va'erã joto nhande-rehe Nhandejáry" he'i.

Upéixa he'i Nhandejáry nhe'ẽ kwtia-rehe omoĩ va'ekwe.

¹⁷ Pejeapysaka katu xe nhe'ẽ-rehe. Orojerovia-ma ramo Hesu Cristo-rehe, "Ipy'a potã-ma" oroipta va'ekwe Nhandejáry he'i ore-rehe. Upe ramo oronhemopotã hagwã mo'ã, ndorojapovéi-ma va'ekwe Moisés remimombe'ukwe gwive. Judeu rekoha-rupi ndoroikovéi-ma va'ekwe. Judeu e'ŷ va'e-ramima oroiko. Upe tekoha kwaõ e'ŷ va'e-ramima oroiko va'ekwe. Upéixa ramo oĩ

ore-rehe he'i va'erā mo'ā: "Hesu Cristo-rehe ojerovia-gwi, ndojapovéi yma gware reko. Ojejavy nipo ra'e. Hesu Cristo para'e ombojejavy va'e íxupe" he'i va'erā mo'ā ore-rehe. Ha nomombe'u porāi ojóupe. Hesu Cristo ko ndaha'éi voi ore mbojejavyharā.

¹⁸ Xe ko anhemopotī ukase-vy mo'ā ndajapovéi-ma va'ekwe Moisés remimombe'ukwe. Aikose joty Hesu reko-rupi. Ha ko'ánga katu xe ha'e ramo: "Ajapo jevy-ta Moisés he'i va'ekwe gwive Nhandejáry he'i hagwā xe-vy, nde py'a potī-ma". Upe va'e ha'e ramo, ndaikovéi-ma va'erā Hesu reko-rupi. Ajejavy tee-ma va'erā.

¹⁹ Yma ajapose ramo jepe Moisés remimombe'ukwe tekoha, ndajapopái joty. Xe py'a ky'a joty. He'i va'ekwe upe tekoha nhe'ē:

"Peteī teī upe tekoha nhe'ē gwive nderejapopái ramo, nde py'a ky'a reheve joty eremano va'erā"

he'i. Ha ko'ánga katu amano va'ekwe-rami amoírū-ma Cristo-pe. Upéa-gwi ndaipokatuvéi-ma xe-rehe upéa yma gware nhe'ē. Xe-vy yma gware nhe'ē ijapy-ma. Ndaha'evéi-ma xe-vy gwarā. Ndaikovéi-ma upe tekoha anho-rupi. Nhandejáry nhe'ē ahendu porā hagwā upe va'e tekoha nhe'ē anho nahenduvéi-ma. Ha Cristo katu omano va'ekwe kurusugwasu-rehe. Upéi peteīxa amoírū-gwi íxupe, amano va'ekwe-rami aiko hendive ãy.

²⁰ Upéixa xe aiko. Xe ae xe arandu-rupi rei katu ndaikovéi-ma. Cristo xe moingove va'ekwe-rupi ae aiko. Xe py'a-py oī inhe'ē. Ha'e xe rayhu-gwi xe-rehe ijukaharā-pe onheme'ē va'ekwe. Ajerovia-gwi hese, Nhandejáry ra'y-rehe, aiko porā ko'ánga ko yvy-rupi.

²¹ Upéixa ramo xe mopotīse ramo Nhandejáry, "Xe ndaipotái voi xe-vy hemime'ēse" nda'e mo'āiry íxupe. "Upe tekoha-rupi anho jaiko rei ramo, nhanhemopotī porā-ma va'erā" ndaja'ēiry arā nhandéjehe. Ja'e ae ramo nhandéjehe, "Upe tekoha-rupi anho jaiko rei ramo, nhanhemopotī porā-ma va'erā" ja'e ramo, omano rei arā ra'e Cristo.

3

*Gwī Moisés remimombe'ukwe tekoha renduha onhemopotī ukase rei mo'ā
(Rm 4.1-3; Gl 2.16; 5.2-4; Fp 3.9)*

¹ Pejeapysaka katu xe nhe'ē-rehe, xe re'ýi kwéry, Galácia pygwa va'e. Peẽ pene arandu e'ý va'e. Kiva'e po pene mbotavy ra'e? Oromombe'u porā va'ekwe peẽ-my Hesu Cristo kurusugwasu-rehe omano hagwe. Upéa-gwi peẽ-my oromombe'u va'e pehexa vérami. Pehexá vérami Hesu ojejuka ramo nhande rovasa hagwā. Ha ko'ánga kiva'e po pene mbotavy ra'e pehendu e'ý hagwā anhetegwa va'e.

² Pemombe'u katu xe-vy Nhe'ē Marangatu tee va'e omboumaha peẽ-my. Moisés remimombe'ukwe-rupi peikose mo'ā javé, Nhandejáry ombou tipo peẽ-my araka'e Nhe'ē Marangatu tee va'e-pe? Nomboúi voi araka'e peẽ-my. Perovia-magwi ae Hesu Cristo rehewa nhe'ē porā ombou-ma va'ekwe peẽ-my.

³ Pende tavy voi nipo ra'e. Ha Nhe'ē Marangatu tee va'e katu pende py'apy-py oiko rire, tape porā-rupima peho peiko-vy. Ha ko'ánga katu peẽ ae pene arandu-rupi napende reko agwyje mo'āvēi-ma. Moisés amyri remimombe'ukwe tekoha-rupi peikose ramo mo'ā, napegwahē mo'āi Nhandejáry oiko ha-py. Nhe'ē Marangatu tee va'e e'ý reheve napegwahē mo'āi upe-py. Napende reko agwyje mo'āvēi-ma. Upéa-gwi pende tavy voi peiko-vy.

⁴ Upe tekoha-rupi peikose ramo mo'ã penhemopotĩ hagwã mo'ã, oiko rei arã pende py'a-py Nhe'ẽ Marangatu tee va'e ra'e, pejerovia rei arã Hesu-rehe ra'e.

⁵ Ha Nhandejáry katu pene rexakwaa rei va'ekwe ime'ẽ-vy Nhe'ẽ Marangatu tee va'e. Ojapo porã uka peẽ-my va'ekwe jahexa e'ŷ va'e. Hexapyrã-rupi nahembiapo porãi pene pa'ũ-my upe tekoha-rupi anho peikose ramo mo'ã. Perovia-magwi ae Hesu Cristo rehewa nhe'ẽ porã, hembiapo porã peẽ-my va'ekwe.

⁶ Upéixa voi he'i Nhandejáry nhe'ẽ kватia-rehe hemimoїgwe:
“Ha Abraão katu ogwerovia-ma Nhandejáry-pe. Upéa-gwi Ipy'a potĩ-ma, he'i hese Nhandejáry.”*

Upéixa he'i Nhandejáry nhe'ẽ.

⁷ Upéixa ete Abraão amyrĩ reko-rupi jaiko ãy nhande jarovia va'e. Ikente e'ŷ ramo jepe, Abraão rekoha-rupi joty peiko ramo, ta'ýry-rami joty pepyta. “Ta'ýry tee voi peẽ. Judeu e'ŷ ramo jepe, ta'ýry tee voi peẽ” he'i Nhandejáry nhande-rehe. Aipota peikwaa upéa.

⁸ Yma ete va'ekwe opy'a-py he'i Nhandejáry judeu kwéry e'ŷ-rehe: “Ojerovia-ma ramo xe ra'y-rehe, xe remimondorã-rehe, Pende py'a potĩ-ma, ha'e va'erã íxupe” he'i Nhandejáry. Upéixa voi he'i Nhandejáry kватia nhe'ẽ. Ha upéi katu he'i va'ekwe Abraão-pe Nhandejáry:

“Entéro ko yvy-py oĩ va'e-pe gwive ahovasa va'erã. Xe reroviah gwive hikwái nde xe rerovia hagwe-rami ahovasa va'erã íxupe kwéry”*

he'i Abraão-pe Nhandejáry. Upéixa ohexa uka va'ekwe Abraão-pe gwembia-porã. Hesu Cristo renonderã ave omombe'u íxupe va'ekwe. Upéixa voi he'i Nhandejáry nhe'ẽ. Ha upéi katu Abraão ogwerovia-ma va'ekwe Nhandejáry-pe. Upéa-gwi ohovasa íxupe Nhandejáry.

⁹ Upéixa ramo ãygwa entéro heroviah gwive, Abraão rovasa hagwe-rami, ohovasa va'erã íxupe kwéry ave.

¹⁰ Ha Moisés remimombe'ukwe tekoha-rupi rei oikose mo'ã va'e-pe gwive ndohovasa mo'ãi Nhandejáry. A-rami he'i Nhandejáry nhe'ẽ:

“Ohendu e'ŷ va'e entéro Moisés omoĩ va'ekwe gwive kватia-rehe, mombyry omondo va'erã íxupe ojéhegwí Nhandejáry”*

he'i. Upéa-gwi entéro he'i va'e gwive: “Pende py'a potĩ-ma, he'i va'erã nhande-rehe Nhandejáry upe tekoha-rupi anho rei jaiko ramo” he'i mo'ã. Upe va'e-pe katu mombyry omondo va'erã Nhandejáry ojéhegwí.

¹¹ He'i ave Nhandejáry nhe'ẽ:

“Xe rerovia-gwi, nde py'a potĩ-ma, he'i hese va'e Nhandejáry, upe va'e Nhandejáry ndive oiko va'erã”*

he'i. Upéa-gwi gwĩ upe tekoha-rupi anho rei oikose va'e: “Nde py'a potĩ-ma” nde'íry nipo hese ra'e Nhandejáry.

¹² Gwĩ upe tekoha-rupi anho rei oikose va'e nde'íry: “Jarovia katu Nhandejáry-pe nhane resende hagwã” nde'íry voi. Oipota mo'ã Nhandejáry ore-sende íxupe, Moisés he'i va'ekwe gwive ohendupase-gwi mo'ã. Ha upéa nde'íry Nhandejáry nhe'ẽ. He'i ae:

“Upe peteĩ teĩ Moisés he'i va'ekwe gwive rendupa ete va'e katu oiko va'erã Nhandejáry ndive”*

he'i. Ha ojejavý e'ŷ va'e ndoikói voi gwembiaapo-rehe anho onhemopotĩ hagwã.

¹³⁻¹⁴ He'i jevy Nhandejáry nhe'ẽ:

* 3:6 Gn 15.6 * 3:8 Gn 12.3 * 3:10 Dt 27.26 * 3:11 Hc 2.4 * 3:12 Lv 18.5

“Jahexa ramo yvyra-rehe ojejuka va'ekwe, ndaija'ei voi nipo hese ra'e Nhandejáry. Upe va'e Nhandejáry remimbojevy va'e voi, ja'e omano va'ekwe-rehe”*

he'i Nhandejáry nhe'ẽ hekoha vai va'e-rehe, yvyra-rehe ojejuka va'e. Yma nhande ave jaiko vai va'ekwe. Entéro Moisés he'i va'ekwe gwive jajapose ramo mo'ã, Nhandejáry remimbojevy va'ekwe-rami jaiko va'ekwe. Upé-gwi Cristo nhane resende va'ekwe ani hagwã: “Moisés amyrĩ he'i va'ekwe gwive rendupa e'ŷ va'e voi upe va'e” he'i nhande-rehe. “Upe va'e Nhandejáry remimbojevy va'e voi upe va'e” nde'íry hagwã nhande-rehe, nhane resende va'ekwe Cristo. Ha'e katu Nhandejáry remimbojevykwe-rami omano va'ekwe kurusu-rehe. Nhande rekoria omano. Nhande kwéry e'ŷ-pe jepe ohovasa hagwã omano va'ekwe. Abraão rovasa hagwe-rami ohovasase ave judeu e'ŷ va'e-pe, Cristo reroviaha-pe gwive. Nhande-rehe omano va'ekwe ou hagwã nhande-vy Nhe'ẽ Marangatu tee va'e. “Ou va'erã” nde'i reíry va'ekwe hese Nhandejáry.

He'i tee va'ekwe nokambia mo'ãi voi Nhandejáry

15 Ko'ângä xe re'ýi kwéry, Hesu reroviaha va'e, aikwaa uka-ta peẽ-my arandu rehewa nhe'ẽ, yvypóry rehewa nhe'ẽ-rami. Nhamoporã ramo nhane nhe'ẽ ojóupe, nhamoï va'e kwatia-rehe nhane nhe'ẽ nhande apu e'ŷ hagwã ojóupe. Upe rire nhamoporã va'ekwe ndikatúi nhakambia jevy. Nhamoporãmba rire ndikatúi nhamoïve va'e kwatia-rehe nhakambia hagwã mo'ã nhamoporã va'ekwe.

16 Upéixa ete okambia e'ŷ va'erã omoï va'ekwe Nhandejáry. Nde'i reíry va'ekwe Abraão amyrĩ-pe. He'i tee va'ekwe, nokambia mo'airy. Ha Nhandejáry katu he'i tee va'ekwe Abraão amyrĩ-pe: “Xe orohovasa va'erã” he'i. “Ne remiarirõ joapyri pyri-pe” he'i. “Ahovasa va'erã” nde'i reíry Abraão-pe, omoï porã-vy íxupe onhe'ẽ. Hemiarirõ kwéry-pe nde'íry. Peteñ hemiarirõ-pe mante “Orohovasa va'erã” he'i ae. Cristo-pe he'i voi.*

17 Ha ãy katu pejeapysaka katu xe nhe'ẽ-rehe. Omoporã va'ekwe katu okambia e'ŷ va'e Nhandejáry. Yma ete va'ekwe Nhandejáry omoporã-ma ramo onhe'ẽ Abraão amyrĩ-pe: “Naxe apu mo'ãi” he'i, “Ahovasa va'erã íxupe” he'i Abraão amyrĩ-pe. Yma ete voi he'i va'ekwe upéa. Ha upe rire katu, heta eterei ro'y rire, quatrocentos e trinta ro'y rire, ore ramói kwéry Moisés remimombe'ukwe-rupi oiko va'ekwe. Upéa-gwi: “Okambia nipo ra'e Nhandejáry gwembiaporã. Ijapu nipo Abraão-pe ra'e. Ojapo va'erã he'i va'ekwe, ndojapo mo'ãiry” oĩ he'i va'e mo'ã. Ha omombe'u mo'ã upéa. Hemikambia e'ŷ va'erã voi Nhandejáry rembiaporã. Ndaijapúi va'e voi ko Nhandejáry.*

18 Ha'e katu: “Ha Moisés amyrĩ remimombe'ukwe-rupi ereiko-gwi, ame'ẽ va'erã nde-vy nde-vy gwarã” nde'íry voi nhande-vy. Upéa-rehe yma he'i va'ekwe Abraão amyrĩ-pe: “Ame'ẽ rei va'erã nde-vy nde-vy gwarã. Xe orohexa kwaa rei va'erã” nde'i reíry va'ekwe íxupe Nhandejáry. Ha “Moisés amyrĩ nhe'ẽ gwive katu erejapopa-gwi, ame'ẽ va'erã nde-vy nde-vy gwarã” nde'íry voi íxupe. “Ame'ẽ rei va'erã” he'i ae íxupe Nhandejáry.

Ko'ângä amombe'u-ta peẽ-my Moisés amyrĩ he'i hagwe rehewa nhe'ẽ (Rm 3.20; 5.20-21)

19-20 Oĩ he'i va'e mo'ã: “Nome'ẽi ramo nhande-vy Nhandejáry nhande-vy gwarã Moisés amyrĩ nhe'ẽ nhahendu ramo ra'e, nhane ramói kwéry oiko rei arã voi ra'e Moisés remimombe'ukwe tekoha-rupi oiko rire” oĩ he'i va'e mo'ã. Ha ndaha'ei upéixa.

* 3:13-14 Dt 21.23 * 3:16 Gn 12.7 * 3:17 Ex 12.40

Yma araka'e Nhandejáry oipota nhane ramói kwéry upe tekoha-rupi oiko. Oipota he'i ójehe tekoha e'ŷ-rupi oiko ramo: "Ndajaikovéi-ma voi upe tekoha porã-rupi. Jajejavy eterei-ma nipo ra'e jaiko-vy" he'i ójehe. Oipota Nhandejáry nhane ramói kwéry upe tekoha-rupi oiko Cristo peve. Upéi Cristo oiko va'ekwe ko yvy-py. Ha'e-ma Abraão remiarirõ voi. Hesegwa nhe'ẽ Nhandejáry nde'i reíry va'ekwe Abraão amyrĩ-pe. Cristo oiko rire, Nhandejáry ndoipotavéiry oiko upe tekoha-rupi onhemopotĩ hagwã mo'ã hikwái. Cristo oiko rire, ijapy-ma voi upe tekoha. Ha Nhandejáry katu nombo'e ranhéi voi va'ekwe upe tekoha-py ore ramói kwéry-pe. Ombo'e ypy araka'e yváy pygwapé ranhe. Upéi upe yváy pygwa ombo'e Moisés amyrĩ-pe. Upéi Moisés ombo'e va'ekwe ore ramói kwéry-pe. Ha Abraão amyrĩ-pe katu nomombe'úi upéixa. Ndaipóri va'ekwe ohendu uka va'e. Ha'e ae ohendu va'ekwe Nhandejáry nhe'ẽ. Ha Nhandejáry katu nde'íry yváy pygwa-pe. Outro yvypóry-pe nde'íry. Íxupe anhóte ae he'i: "Xe orohovasa va'erã" he'i Abraão-pe araka'e.

21-22 Ha oĩ he'i va'e mo'ã katu: "Nhandejáry omoingo va'ekwe nhane ramói kwéry-pe Moisés he'i hagwe-rami. Aipo ramo naimbaraetevéi-ma Abraão-rehe he'i tee íxupe va'ekwe. Ndaipokatuvéi-ma hese he'i íxupe va'ekwe. Ogwerova rova para'e gwemimombe'u Nhandejáry" he'i mo'ã hese. Ndaha'éiry upeixagwa. Ogwerova rova e'ŷ va'e gwemimombe'u. Pejeapysaka katu xe nhe'ẽ-rehe. Nhandejáry nde'íry nhande-vy: "Moisés remimombe'ukwe-rupi peiko-gwi, pende py'a potĩ-ma" nde'íry voi. Upéa-gwi hendive nhane moingove meme hagwã, nanhane moingóiry upe tekoha-rupi. Upéa-rehe oipota nhande jarovia he'i va'ekwe nhanhemopotĩ uka tee hagwã. "Cristo reroviaha gwive aresende va'erã tekoha vai-gwi" he'i Nhandejáry. He'i ave Nhandejáry kватia nhe'ẽ:

"Upe tekoha vai, he'i, entéro ko yvy-rupi jaiko va'e-rehe gwive ipu'aka nhane moembia po vai hagwã"

he'i Nhandejáry kватia nhe'ẽ. Upéa-rehe oipota jarovia he'i va'ekwe jajejavy va'gwive.

Moisés remimombe'ukwe-rupi

nhande-rehe onhangareko va'e-rami jaiko va'ekwe,

Cristo ojekwaa peve

23 Yma va'ekwe jaiko Moisés remimombe'ukwe tekoha-rupi. Jajapose va'e rei ndajajapóiry va'ekwe. Upe yma gware rekoha-rupi jaiko vyteri ramo, nhande-rehe onhangareko va'e-rami jaiko va'ekwe. Ha upe rire katu Nhandejáry oikwaa uka nhande-vy jarovia-gwi jaikoveha.

24 Upéixa ramo, yma Moisés remimombe'ukwe-rupi jaiko rei ramo, tekoha porã-py nhane mbo'e va'e-rami jaiko va'ekwe. Nhande reko-rehe onhangareko va'e-rami jaiko va'ekwe. Upéixa jaiko va'ekwe Cristo ojekwaa peve he'i hagwã nhande-vy: "Pende py'a potĩ-ma Cristo-rehe pejerovia-gwi" he'i hagwã Nhandejáry nhande-vy.

25 Ha ko'ánga katu jajerovia jaiko-vy Cristo-rehe. Moisés nhe'ẽgwe-rupi anho nhanhemopotĩ hagwã mo'ã ndajaikovéiry va'e. Upe tekoha-rupi, nhande-rehe onhangareko rei va'e-rami, ndajaikovéiry.

Peteĩxa pemoirũ-gwi Cristo-pe, peiko Abraão remiarirõ-rami (Jo 1.12-13; Ef 1.5)

26 Ha ko'ánga katu Cristo Hesu-rehe pejerovia-gwi, peiko-ma Nhandejáry re'ýi ramo. Pemoirũ-ma peteĩxa íxupe.

²⁷ Peteīxa pemoirū hagwā íxupe, pene mongarai va'ekwe. Pemoirū-gwi íxupe peiko ãy ha'e-rami.

²⁸ Upéixa ramo enterove va'e-pe Nhandejáry ogwereko peteīxa. Oĩ judeu kwéry va'e. Oĩ judeu kwéry e'ŷ va'e ave. Oĩ onhemomba'apo va'e ogwerekoseha-rami ogwereko íxupe va'e-rami oiko. Oĩ omba'apo va'e oje-hente ave. Oĩ kwimba'e, oĩ kunha ave. Ha Nhandejáry katu nhande kwéry-pe nhande rerekō peteīxa. Peteīxa pemoirū-magwi Cristo Hesu, peiko ãy peteīxa onhondive.

²⁹ Cristo-pe pemoirū-gwi, peiko ãy Abraão remiarirō-rami. Upéa-gwi, perovia-gwi, peē-my ave ome'ẽ va'erã Nhandejáry Abraão remiarirō peg-warã.

4

Nhane mitā-rami jaiko va'ekwe (Rm 8.14-17)

¹ Ko'ângā amombe'u jevy-ta peē-my arandu rehewa nhe'ẽ mitā rehewa nhe'ẽ-rami. Nhande ra'y nhane mba'e jaryrã voi. Íxupe gwarã nhame'ẽ va'erã íxupe. Ha imitā vyteri ramo katu nanhame'ẽi va'e íxupe íxupe gwarã. Mixi vyteri jave nhane rembigwái rei ramo oiko.

² Imitā ramo oĩ hese onhangareko va'e. Oĩ ave ima'erã-rehe onhangareko va'e. Ha ogwahẽ-ma ramo ima'erã ome'ẽ ixupeha áry, túvy omboypy íxupe áry hagwe-py ogwahẽ-ma ramo, nhame'ẽ va'e íxupe íxupe gwarã.

³ Upéixa ete nhande ave nhane mitā-rami jaiko va'ekwe. Nhandejáry kwaa e'ŷha voi nhande. Ipu'aka va'ekwe nhande-rehe ko yvy járy kwéry, Nhandejáry e'ŷ va'e, gwī onhembojáry rei va'e ko yvy-rehe.

⁴⁻⁵ Ha upéi katu ogwahẽ ramo Hesu áry ojekwaa hagwā, ombou va'ekwe Nhandejáry nhande-vy. Gwa'ýry ombou va'ekwe. Isyrã-pe ombou va'ekwe íxupe. Judeu rekoha-rupi oiko hagwā nhane pa'û-rupi ombou. Upéixa omoingo íxupe judeu rekoha-rupi. Gwī onhemopotí ukase-vy mo'ã judeu rekoha-rupi rei oiko va'e katu, hesendeharã voi katu ha'e. Ou e'ŷ mboyve upe tekoha nhe'ẽ ipokatu joty nhande-rehe. Ha ko'ângā katu ipogwy-py ndajaikovéi hagwā ha'e nhane resende va'ekwe Nhandejáry ra'y ramo jaiko hagwā.

⁶ Upéixa ramo Nhandejáry ra'y ramo jaiko. Ha Nhandejáry katu ombou va'ekwe Hesu Nhe'ẽ Marangatu oiko hagwā nhande py'apy-py. Upéa-gwi Nhandejáry re'yí ramo jaiko: "Jaiko-ma voi Nhandejáry ra'y ramo" ja'e nhandejéupe. "Xe Ru" ja'e nhahenói-vy íxupe, nhane monhe'ẽ-gwi Nhe'ẽ Marangatu tee va'e.

⁷ Upéa-gwi ndereikovéi-ma ójehe ipu'aka e'ŷ va'e-rami. Ne mbo'e-gwi Nhe'ẽ Marangatu tee va'e, nde pu'aka ndéjehe. Nhandejáry ra'y ramo ae ereikoma. Nhandejáry ra'y kwéry ramo ereiko-gwi, gwa'ýry pegwarã nde-vy ome'ẽ va'erã ave.

Paulo ojapura Galácia yvy pygwa-rehe (2 Co 11.3-4; 1 Pe 1.14)

⁸ Yma araka'e ndapeikwaái voi Nhandejáry-pe. Upéa-gwi Nhandejáry e'ŷ va'e ae perekō araka'e pende reko járy ramo.

⁹ Ha ko'ângā katu: "Peikwaa-ma Nhandejáry-pe" ja'e. "Pende kwaa-ma Nhandejáry" ja'e katu ave. ãy pende kwaa-ma voi Nhandejáry. Ma'erã pejehesa rerovase jevy ko yvy járy kwéry héry va'e-rehe? Gwī va'e nomandái va'e pende-rehe. Omanda rei va'e pende-rehe. Upéa-gwi ma'erã pejehesa

rerovase jevy rei hese? Ma'erā po peipota omanda jevy mo'ā pende-rehe hikwái?

¹⁰ Ha peē ae pene remimboetese ae pemboete. Ko'ánga peje a-rami: “Oī áry nhane remimboete va'e, oī jasy nhamboete va'e, oī arete nhamboete va'e, oī ro'y nhamboete va'e” peje rei. Upéa rehewa-rehe pepena eterei. Ma'erā po pepena hese? Penhemopotí ukase mo'ā para'e. Pepena ramo, pejehesa rerova ukase para'e Nhandejáry-gwi. Upéa pejapo ramo, ndapeikovéi-ma Nhandejáry remimbota-rupi. Peipota para'e omanda jevy pende-rehe ko yvy járy kwéry.

¹¹ Upéa-gwi xe ajapura pende-rehe. Amombe'u rei voi nipo ra'e peē-my Hesu Cristo rehewa nhe'ē porā.

¹² Xe re'ýi kwéry, xe ndaikovéi judeu reko-rupi va'ekwe nde reko-rupi aiko hagwā. Ko'ánga xe ndaiotái peiko jevy xe rekowke-rupi. Ndapejapo vaíry xe-vy va'ekwe. Xe rerekó porā katu ae va'ekwe.

¹³⁻¹⁴ Xe rasy va'ekwe. Xe rasy-gwi apyta pene pa'ū-my. Upéa-gwi xe ranhe amombe'u peē-my va'ekwe Hesu rehewa nhe'ē porā. Upéa peikwaa voi. Xe rasy voi. Xe rete rasy ndapejohu porāi. Xe rasy ramo jepe: “Omombe'u ra'anga anga rei Paulo” ndapejéi xe-rehe. Naxe mbojevýi va'ekwe. Xe rerohory katu va'ekwe agwahē ramo. Nhandejáry rembigwái, yváy pygwa va'e-rami xe rerohory katu. Cristo Hesu pemboeteha-rami ave xe mboete. Napenhembohorýiry xe-rehe.

¹⁵ Pene pa'ū-my xe aime ramo: “Iporā porā nhande-vy” peje va'ekwe. Pevy'a eterei voi va'ekwe xe-rehe. Pene pa'ū-my xe aime ramo, pende resa jepe peme'ëse va'ekwe xe-vy xe resarā. Pende pu'aka hagwāixa mo'ā xe-vy peme'ëse va'ekwe. Xe remikotevē gwive peme'ëse xe-vy. Upéixa ahendu voi va'ekwe xe rayhu teeħa. Upéa-gwi amombe'u peē-my pende rekoharā.

¹⁶ Ha ãy katu ma'erā ndapev'yavéi-ma? Anhetegwa va'e mante amombe'u peē-my va'ekwe. Upe ramo, ma'erā peje xe-rehe: “Paulo ndaija'evéi-ma nhande-rehe”.

¹⁷ Ha gwī Hesu rehewa nhe'ē porā omombe'u ambue va'e katu pene mboete ra'anga anga rei va'e. Ndopotavéi peē xe moirū. Oipota pene mandu'a porā hese. Onhemboete ukase peē-my.

¹⁸ Ha naiporāi pende rekombo'e rei xe moirū e'ý hagwā. Iporā ae nhanhomboete meme onhondive jaiko porā meme hagwā. Pene pa'ū-my xe aime ramo, iporā nhanhomboete. Xe aime e'ý ramo jepe, iporā nhanhomboete meme joto.

¹⁹⁻²⁰ Amombe'u-ta peē-my, xe re'ýi kwéry, peteñ nhe'ë. Kunha imemby-tama ramo, ohendu-ma gwasy oiko hagwā mitā'i. Upéixa voi xe ave ahasa asy kunha-rami. Ajapura kunha-rami. Aipota eterei Cristo rekoha-rupi peiko porāve rāve hagwā, peteñxa pemoirū hagwā íxupe. Ko'ánga ajapura pende-rehe. Pene pa'ū-my ãy aimese mo'ā. ãy anhomongetase mo'ā pene ndive. Ajapura verei pende-rehe. Mba'éixa po agwahē-ta apombo'e hagwā?*

Mokōi kunha rehewa nhe'ē héry va'e Agar, Sara ave

²¹ Ha peē katu penhemopotí hagwā mo'ā Moisés he'i va'ekwe-rupi peikose jevy-ma. Pemombe'u katu xe-vy. Ma'erā po ndapeikwaái voi he'ise va'ekwe.

²² Yma omoñ va'ekwe kwatia-rehe a-rami:
“Ha Abraão katu mokōi oiko ta'ýry. Tyke'ýry Abraão rembigwái memby. Ha tyvýry katu Abraão rembireko tee memby. Hembigwái e'ý va'e memby voi”*
he'i.

* 4:19-20 Cl 2.8-23 * 4:22 Gn 16.15; 21.2

²³ Tyke'ýry hembigwái memby va'e oiko túvy oipota ha-rupi oiko. Ha tyvýry katu Nhandejáry he'i hagwe-rami voi oiko. Hemimbota-rupi oiko.

²⁴⁻²⁵ Upe mokõi kunha, Abraão ra'y sy va'e, héry va'e Agar, Sara ave. Upe mokõi kunha rehewa nhe'ẽ-rami oikwaa uka nhande-vy Nhandejáry jaikoha. Nhande rekoha oikwaa uka ta'ýry-rami jaiko ramo. Tembigwái-rami jaiko ramo ave oikwaa uka nhande rekoha. Nhande tembigwái-rami jaiko va'e jaiko Agar nhande sy voi va'e-rami. Ha imemby kwéry katu ndaipu'akái ójehe. Tembigwái-rami voi oiko. Upe kunha héry va'e Agar he'ise Sinai yvyaty-pe. Upe yvyaty oĩ Arábia yvy-py. Upe-py ore ramói ohendu ypy va'ekwe Moisés remimombe'ukwe. Upéi ndaipu'akái ójehe. Tembigwái-rami oiko hikwái. Upe kunha Agar héry he'ise ave ãygwa-pe, Jerusalém tetã mygwa-pe. Ha'e isy kwéry ramigwa. Upe tetã mygwa imemby ramigwa. Ndaipu'akái ójehe. Onhemopotí ukase mo'ã Moisés remimombe'ukwe-rupi oiko-gwi. Upéa-gwi iky'a joty ipy'a.

²⁶ Ha upé kunha ambue va'e héry va'e Sara he'ise nhande-vy. Jerusalém yvategwa pegwarã-pe he'i. Hesus reroviaha isy ramigwa oiko Sara. Nhande kwéry imemby ramigwa voi. Upe yvate gwarã-rehe ndaipu'akáiry tekoha vai.

²⁷ Upe mokõi kunha rehewa nhe'ẽ jaikwaa porã hagwã omoĩ va'ekwe kwaitia-rehe Nhandejáry. A-rami omoĩ va'ekwe:

"Nde ko ne memby e'ý va'e, evy'a katu eiko-vy. Ne'írã vyteri erehendu mba'asy ne memby hagwã jave, evy'a katu. Esapukái ave katu erevy'a-gwi. Iména va'e remiarirõ heta va'erã. Ha iména rembieja, oména ndive oiko jevy ramo, hetave tave va'erã hemiarirõ".*

Upéixa voi he'i Nhandejáry nhe'ẽ.

²⁸ Ha Sara memby, héry va'e Isaque, oiko-ma va'ekwe Nhandejáry he'i hagwe-rupi. Ha ko'ánga, xe re'ýi kwéry, nhande ave jaiko ha'e-rami. Nhandejáry he'i hagwe-rupi jaiko.

²⁹ Yma va'ekwe tyke'ýry, túvy oipota ha-rupi oiko va'ekwe, omoingo asy va'ekwe gwyvýry-pe Nhandejáry nhe'ẽ marangatu-rupi oiko va'ekwe. Yma ko'ánga ete peve ojehu ko'ã va'e. Omoingo asy joty Nhandejáry nhe'ẽ marangatu-rupi oiko va'e-pe.

³⁰ Pejeapysaka katu Nhandejáry nhe'ẽ-rehe kwaitia-rehe omoĩ va'e-rehe: "He'i Sara oména-pe, Emosé katu ne rembigwái kunha va'e. Imemby rehewe emondo. Ne rembireko tee voi xe. Xe memby pegwarã katu ani ereme'ẽ ne rembigwái memby-pe, he'i Abraão-pe hembireko".*

Upéixa he'i Nhandejáry nhe'ẽ.

³¹ Upéixa ramo xe ha'e-ta peẽ-my, xe re'ýi kwéry. Nhande kwéry Hesus reroviaha va'e katu ndaha'éi tembigwái memby-rami. Nhane rembypy nhande sy-rami oiko va'e ndaha'éi tembigwái-rami. Tembigwái e'ý va'e voi.

5

Ani pejehesa rerova katu Hesu reko-gwi

¹ Jaiko porã hagwã nhane resende va'ekwe Cristo. Nhasẽ hagwã judeu reko-gwi nhane resende va'ekwe. Peiko meme katu Hesu reko-rupi. Ani pejehesa rerova jevy katu judeu reko-rupi pene moingose ramo jepe.

²⁻³ Pejeapysaka katu xe nhe'ẽ-rehe. Xe Paulo ha'e-ta peẽ-my. Judeu kwéry-rami ani penhepirekytí uka tei, "Nde py'a potí-ma" he'i hagwã mo'ã Nhandejáry pende-rehe. Pende-rehe Cristo nopenavéi-ma arã ra'e. Ha'e jevy-ta peẽ-my. Aníke penhepirekytí uka tei judeu kwéry-rami: "Ko'ánga pehendu katu entéro Moisés he'i hagwe gwive jajapo hagwã. Inhe'ẽ imbaraete voi

* **4:27** Is 54.1 * **4:30** Gn 21.9-10

joty peē-my" he'i arā peē-my. Upéixa ramo Cristo ndoikovéi arā peē-my pene resendeharā.

⁴ Ani peiko teī judeu rekoha-rupi "Nde py'a potī-ma" he'i hagwā mo'ā Nhandejáry. Napemoirūvéi-ma arā Cristo-pe. Peheja-ma arā Nhandejáry-pe nhande rexakwaa reihaty-pe.

⁵ Upe va'e jajapo e'ŷ va'e. Jajerovia tee ae Nhandejáry-rehe. Nhaha'arō íxupe "Nde py'a potī-ma" he'i hagwā nhande-vy. Nhe'ẽ Marangatu tee va'e oiko-gwi nhande py'apy-py, Cristo-rehe jajerovia tee-gwi, nhaha'arō arō katu íxupe.

⁶ Oĩ judeu kwéry va'e, oĩ judeu kwéry e'ŷ va'e ave. Ha Cristo-pe nhamoirū ramo peteīxa katu, enterove va'e-pe peteīxa jareko: "Jarovia-gwi jajohayhu porāve rāve katu" ja'e meme katu ojóupe.

⁷⁻⁸ Ha peē katu peho kuri tape porā-rupi. Kiva'e po pene moingo tape porā e'ŷ-rupi ijapu va'e peē-my pehendu hagwā. Upe va'e tape-rupi napene moingói kuri Nhandejáry. Nhandejáry ae pene renói va'ekwe pemoirū hagwā íxupe: "Peho katu upe va'e tape-rupi" nde'íry kuri peē-my.

⁹ Pejeapysaka katu xe nhe'ẽ-rehe. Nhande kwéry ja'e: "Mix̄imi hagw̄no jepe ramo, pya'e onhomoagw̄nomba-ma" ja'e. Upe ramo xáke. Peho-ma ramo tape vai-rupi, pende reko vaipa-ma va'erā.

¹⁰ Ha pende-rehe xe ajerovia vyteri. Nhandejáry Hesu-rehe jajerovia-gwi "Iporā jajere Hesu rape-gwi" ndapejéi va'erā. Upéa ha'e ramo, ndaxe apúi voi. Ha oĩ peē-my omombe'u joavy avy va'e pene moakā tarova hagwā rei. Upe va'e, oime raẽ va'e oĩ va'e, ogwereko asy va'erā íxupe Nhandejáry.

¹¹⁻¹² Ha'e-ta peē-my xe re'ýi kwéry. Xe ko namombe'uvéi judeu reko-rupi jaikoha. Judeu kwéry-rami iporā nhanhepirekytī uka, nda'evéi voi xe. Ha gw̄i pene moakā tarova rei va'e xe-rehe ijapu voi: "Paulo omombe'u joty judeu reko-rupi jaikoha nhanhemopotī hagwā" he'i mo'ā xe-rehe. Ha ijapu voi. Oipota va'e amombe'u vyteri ramo xe ra'e, naxe rerekō asyí arā ra'e. Ha xe rerekō asy joty. Hemimbota amombe'u vyteri ramo xe: "Naiporāi jajerovia Hesu Cristo-rehe anho, kurusugwasu-rehe ojejuka va'ekwe-rehe. Jajerovia-ma ramo hese, iporā judeu reko-rupi joty jaiko nhanhemopotī hagwā" xe ha'e joty ramo ra'e, naxe rerekō asyí arā ra'e hikwái. Ha xe rerekō asy joty katu. Gw̄i pene moakā tarova va'e aipota nopenavéi pende-rehe. Aipota ójehe ae tojapo vai onhekylī-vy.

¹³ Xe re'ýi kwéry, peiko porā hagwā pene renói va'ekwe Nhandejáry. Pendéjehé pende pu'aka hagwā pene renói va'ekwe. Oipota pejepē'a gw̄i judeu reko-rupi pene moingose va'e po-gwi. Ha'e kwéry oipota mo'ā pehendu entérō Moisés he'i hagwe gwive. Ha ko'ángā katu ani peje teī pendéjéupe: "Ãy ndajaikovéi-ma upe tekoha-rupi. Upéa-gwi iporā jajapo jajapose va'e rei" ani peje upéa. Peje ae "Iporā jajohayhu katu jaiko-vy" peje ae ojóupe. "Nanhopytygwō porā katu" peje katu ojóupe.

¹⁴ Ha upe tekoha katu, entérō Moisés amyři he'i hagwe gwive peteī nhe'ẽ-py ogwenohémba: "Ehayhu katu nde rapixa-pe, nde rekove erehayhuha-rami ave" he'i. Upe va'e nhe'ẽ-py omombe'upa Moisés amyři he'ise va'ekwe. Jahayhu ramo nhande rapixa-pe, entérō Moisés amyři he'i va'ekwe gwive jajapo voi.*

¹⁵ Ha vixu kwéry katu onhorairõmba ramo, ojosu'upa ramo, ojojuka-ma hikwái. Upéixa ete ani penhe'ẽ vai teī ojóehe. Ani penhe'ẽ rei rei ojóehe. Ndapeiko porāvéi arā onhondive. Vixu-rami rei peiko ramo, ndapejohay-huvéi-ma va'erā.

* ^{5:14} Lv 19.18; Mt 22.39; Jo 13.34-35; 15.12; 1 Pe 1.22; 1 Jo 3.11; 4.7-8

*Nhe'ẽ Marangatu tee va'e oiko e'ŷ rehevē pende py'apy-py, pejapose va'e rei pejapo va'erā
(Rm 7.7-25; 8.5-6)*

¹⁶⁻¹⁷ Ha jajapose va'e rei katu ndaha'ei Nhe'ẽ Marangatu tee va'e remimbota. Ha'e ndojohu porāi voi jajapose va'e rei. Ha'e katu oiko e'ŷ rehevē pende py'apy-py, pejapose va'e rei mante pejapo va'erā. Upéa-gwi ha'e-ta peē-my: Tapene py'apyhy pyhy katu Nhe'ẽ Marangatu tee va'e. Toiko porāve rāve katu pende py'apy-py, peho meme hagwā tape porā-rupi. Ndapejapovéi arā pejapose va'e rei.

¹⁸ Ha Nhe'ẽ Marangatu tee va'e katu pene moingo ramo tape porā-rupi, ndikatuvéi-ma pene moingo judeu reko-rupi penhemopotī hagwā mo'ā.

¹⁹ Ha jajapose va'e rei mante jajapo ramo, ojekwaa voi nhande-rehe. Teko ky'a-py rei jaiko va'e. Jajohu va'e rei ndive jaiko. Nhande rekoha ky'a. Nhatī kwaa e'ŷ va'e.

²⁰ Nhamboete va'e Nhandedjáry e'ŷ va'e-pe. Mohāy-py nhanhopohano va'e. Nanhande a'ei va'e ojōehe. Jajoteta. Nhane rakate'ŷ va'e. Opaix-agwa jaipota rei nhandedjéupe gwarā. Nhande poxy poxy rei va'e. Nhanhemomba'egwasuse mo'ā va'e. Ndajarojojái nhane nhe'ẽ. Ndajajogwerekovéi-ma peteīxa.

²¹ Nhande py'a vai va'e voi ojōehe. Jaka'u va'e. Jaka'u hagwā nhanhomoirūma. Upéixa ete jaiko. Jajapose va'e rei-ma jajapo. Upéixa ramo ha'e jevy-ta peē-my xe ha'e hagwe-rami. Upeixagwa jajapo jaiko-vy ramo, nanhamoirū mo'āi Nhandedjáry-pe ojekwaa ramo nhande ruvixarā.

²² Ha Nhe'ẽ Marangatu tee va'e katu oiko jave nhande py'apy-py, jaiko porā voi. Hi'a porā porā va'e-rami nhande rekoha porā va'e. Jajohayhu va'e. Javy'a porā va'e voi jaiko-vy. Nhande py'agwapy va'e jaiko-vy. Jajogwereko kirirī va'e. Jajogwereko porā va'e. Nanhane ma'e rakate'yi va'e ojōupe. Nhande ko nhande-rehe ojerovia va'e voi.

²³ Ndajajotetái va'e. Jajapose va'e mante katu ndajajapói voi. Upéixa jaiko ramo "Ani peiko tei upéixa" nde'iry va'erā nhande-vy onhemonhe'ẽ va'e. Tekoha-rupi ae jaiko.

²⁴ Yma va'ekwe jajapose va'e rei mante jajapo va'ekwe. Opaixagwa jaipota va'ekwe mo'ā. Ha ko'āngā katu nhande Cristo Hesu re'yi va'e, ndajajapovéi-ma jajapose va'e rei mante. Ha "Cristo katu omano jave kurusu-rehe, hendive omano ave xe reko tujakwe" ja'e nhandéjehe. "Hendive omano ave xe reko vaikwe omboyke hagwā xéhegwi xe rekoha vai xe ajapose va'e rei" ja'e nhandéjehe.

²⁵⁻²⁶ Ko'āngā Nhe'ẽ Marangatu tee va'e ndive jaiko. Upéa-gwi tanhane moingo meme katu tape porā-rupi. Ndikatuvéi-ma jaiko nhanhembotuvixase mba'e va'e-rami. Ndikatuvéi-ma jajoteta. Ndikatuvéi-ma nhande py'a vai va'e ojōehe.

6

*Penhopptygwō katu peiko-vy
(At 20.35; 1 Co 15.58; Tt 3.14; Hb 13.16)*

¹ Xe re'yi kwéry, oime ramo pene pa'ū-my ojejavy va'e, ojekwaa ramo hembiapo vaikwe, penhemonhe'ẽ katu íxupe: "Anive ereho tape porā e'ŷ-rupi. Tereho ae katu tape porā-rupi" peje íxupe. Pene pa'ū-my hi'arandu porā va'e, Nhe'ẽ Marangatu tee va'e nhe'ẽ-rupi oiko meme va'e, tonhemonhe'ẽ porā rei katu ojejavy va'ekwe-pe. Túvy-rami tonhe'ẽ porā katu íxupe. Ha tonhangareko porā katu ójehe pono ha'e-rami ave ojejavy.

² Penhopytygwō katu peiko-vy. Upéixa peiko va'erā Cristo rekoha-rupi.

³ Pene pa'ū-my oī ramo onhemomba'egwasu ukase mo'ā va'e: "Xe ko xe tuvixave va'e xe. Naipytygwō mo'āi xe rapixa kwéry-pe" he'i rei voi ójehe. Ijapu rei ójehe. Upéa-gwi penhopytygwō katu peiko-vy.

⁴⁻⁵ Iporā voi jajapo peteī teī nhane rembiapo. Upéa-gwi nhane rembiapo-rehete nhapena va'erā. Jajapo katu peteī teī nhane rembiapo nhapondera e'ŷ rehevē ojóehe, nhanhembohory e'ŷ rehevē nhande rapixa-rehe. Upéixa iporā ramo nhane rembiapo, ov'y'a-ma va'erā nhane rembiapokwe-rehe Nhandejáry.

⁶ Ha Cristo nhe'ē-py ombo'e íxupe va'e katu, ani hakate'ŷ teī ogwereko va'e-rehe ombo'eháry-pe. Tome'ē me'ē ombo'eháry-pe hemikotevē.

⁷⁻⁸ Pejeapysaka katu xe nhe'ē-rehe: "Jajaty ja'u va'erā" ja'e. Upéixa ete ereho-ma ramo tape vai-rupi, erehasa asy arā ereiko-vy. Upéa-gwi: "Ambotavy-ta Nhandejáry-pe" ani ere teī ndejéupe. Imbotavypyre'ŷ voi ko ha'e. Ereho ramo tape vai-rupi, erehasa asy va'erā ereiko-vy. Nerenhotŷ porāi ramo, okakwaa arā nde kokwe-py hi'upy e'ŷ va'e. Upéixa ete jajapose va'e rei jajapo ramo, jaha vai arā, nhanhehundi rei va'erā. Ha erenhotŷ porā ramo katu, ere'u va'erā erejaty va'ekwe. Upéixa ete Nhe'ē Marangatu tee va'e oiko tee ramo nde py'a-py, ereiko porā porā va'erā. Nhandejáry ndive ereiko va'erā opa e'ŷ rehevē.

⁹ Upéixa ramo aníke ere: "Xe kwerái-ma xe rembiapo porā porā ramo" ani ere upéa. Nhane rembiapo porā meme ramo nhande kaigwe e'ŷ rehevē, nhande-vy gwarā ome'ētaha áry-py ome'ē va'erā nhande-vy Nhandejáry.

¹⁰ Upéa-gwi nhande pu'aka hagwā-rami jareko porā rei enterovéa-pe. Ha Nhandejáry rervoviaha gwive katu jareko porāve rāve katu íxupe kwéry.

Cristo mba'e kurusu-rehe apena xe aiko-vy

¹¹ Pehexa katu. Ko'ángā xe amoī-ta kwatia-rehe xe nhe'ē. Xe po-rupi amoī-ta. Tuvixa vixa amoī kwatia-rehe imonhe'ē hagwā.

¹² Ha gwī omombe'u ambue va'e Hesu Cristo rehewa nhe'ē porā katu oipota judeu kwéry imandu'a porā hese. Upéa-gwi he'i peē-my: "Judeu rekohupi peiko joto katu, penhepirekytī uka-vy" he'i peē-my omanda-vy. Oipota peiko judeu reko-rupi. He'i ramo ra'e: "Cristo-rehe, kurusu-rehe ojejuka va'ekwe-rehe, hese anho mante jajerovia-ma ramo, omopotī va'erā nhande py'a Nhandejáry judeu reko-rupi jaiko e'ŷ rehevē" he'i ramo ra'e, omoingo asy arā ra'e íxupe judeu kwéry. Upéa-gwi he'i peē-my: "Penhepirekytī uka katu" he'i peē-my omanda-vy.

¹³ Ha nonhe'ē porāi hikwái. Gwī judeu reko-rupi oikose va'e mo'ā nohendúi entéro Moisés he'i hagwe gwive. Ma'erā oipota penhepirekytī uka? Ma'erā oipota peiko judeu reko-rupi? Oipota voi imandu'a porā hese judeu kwéry. Onhemboete ukase mo'ā judeu reko-rupi peiko-gwi.

¹⁴ Ha xe katu napenái voi judeu remimbota-rehe. Hemimbota ndajapói va'e imandu'a porā hagwā mo'ā xe-rehe. Cristo rehewa nhe'ē, ikurusugwasu rehewa nhe'ē ave, upéa nhe'ē amomba'egwasu voi amombe'u memevy. Cristo upe kurusugwasu-rehe omano-gwi, napenavéi-ma ãygwa nhe'ē-rehe. Omano va'ekwe-rami ndarohoryvéi-ma íxupe, ãygwa-pe. Ha ãygwa katu ndaxe rerohoryvéi-ma ave. Omano va'ekwe-rami ndaxe rerohoryvéi-ma ave. Ikurusugwasu-rehe apena aiko-vy va'e mante xe mopotī va'erā.

¹⁵ Ha judeu kwéry va'e, judeu e'ŷ va'e ave, ogwereko peteī va'e-rami íxupe Nhandejáry. Tape pyahu porā-rupi jaiko hagwā, nhane moatyrōmba va'e, nhane mohekoviārō pyahu va'e Nhandejáry voi. Upéa-gwi judeu rekoha-rehe napenavéi-ma. Cristo mba'e kurusugwasu-rehe ae apena xe aiko-vy.

16 Upe va'e tape pyahu porã-rupi peho va'e-pe gwive, tapene mbopy'agwapy katu Nhandejáry. Tapene poriahuvereko katu ave. Entero gwe'ýi gwive tohovasa porã katu Nhandejáry.

17 Xe ko Hesu remimondo tee va'e. Hemimondo tee ramo aiko-gwi, xe mbohasa asy va'ekwe. Ha ko'ánga katu xe rete-rupi ojekwaapa voi xe pire joka joka hagwe. Pehexapa-ma voi xe-rehe. Xe mbopere pere va'e-rami ojekwaa voi xe-rehe oho-vy enterove oikwaa hagwã Hesu rembigwái ramo xe aikoha. Upéa-gwi xe-rehe ijapu ramo avave ndaipotái xe moakã tarova.

18 Tapende rovasa porã porã katu Nhandejáry Hesu Cristo pende rexakwaa rei-vy, xe re'ýi kwéry. Pende py'a gwive tapende rovasa. Amém.

Paulo remimombe'ukwe Éfeso tetā mygwa pegwarā epístola de Paulo aos efésios

Paulo omondo Éfeso tetā mygwa-pe onhe'ē kватia-rehe

¹ Xe Paulo Nhandejáry oipotaha-rami aiko Hesu Cristo remimondo ramo. Ñy amondo-ta peē-my xe nhe'ē kватia-rehe. Peē Nhandejáry re'ýi kwéry Éfeso tetā-my peiko va'e. Hesu Cristo-pe pehendu-gwi, peteixa pemoirū-ma íxupe peiko-vy.

² Tapene rexakwaa rei katu Nhandejáry Nhande Ru va'e. Tapene mbopy'agwapy katu ave. Tapende rovasa porā katu Nhandejáry Hesu Cristo ave.

*Cristo irū-gwi nhande, nhande rovasa porā porā jaiko porā hagwā
(Rm 8.29; 2 Co 1.21-22; 1 Pe 1.2-3)*

³ Tonhemomba'egwasu katu Nhandejáry, Nhandejáry Hesu Cristo Ru va'e. Cristo irū-gwi nhande, Nhandejáry yváy pygwa va'e re'ýi nhande. Upéa-gwi nhande rovasa porā porā va'ekwe yváy pygwa-rami jaiko porā hagwā.

⁴⁻⁶ Nhande apo e'ý ngatu, nhande kwaa-ma voi. Ne'írā vyteri ko yvy oiko jave, nhande pe'a-ma voi araka'e gwe'yirā nhande reko marangatu hagwā, nhande reko jejavy e'ý reheve gwesa-py. Hesu Cristo irū voi nhande. Nhande rayhu-gwi, "Oiko va'erā xe ra'y ramo, xe rajy ramo ave" he'i araka'e nhande-rehe ojéupe ae nhane mogwahē ukase-vy. "Upéixa xe rembiapo va'erā" he'i araka'e nhane renonderā mombe'u-vy. Nhande kwéry gwa'ýry Hesu Cristo gwembiyahu irūrā-gwi, nhande rexakwaa porā eterei araka'e opamba'e ome'ē rei-vy nhande-vy. Upéa-rehe tojehexa porā ete katu Nhandejáry. Tomboete ete katu íxupe.

⁷⁻⁹ Ta'ýry Hesu gwugwy avyte-py omano-gwi, nhane resende-ma va'ekwe nhande repy-vy. Omboyke-ma nhandéhegwi nhane rembiapo vaikwe. Tuvixa mba'e Nhandejáry. Tuvixa ete nhande rexakwaa porā rei va'ekwe nhane mo'arandu-vy, oikwaa uka-vy nhande-vy ave. Outro kwéry-pe nomombe'úi araka'e ojapo va'erā. Ha nhande-vy katu oikwaa uka-ma voi va'ekwe. Yma araka'e, "Xe ra'y Cristo ojapopa va'erā xe remimbota gwive" he'i ojéupe araka'e.*

¹⁰ Hi'óra-py ojapo-ma va'erā. Hemimoingo gwive ombojoja va'erā. Yváy pygwa gwive, yvy pygwa gwive ave ombojojapa va'erā. Cristo irūrā ojapopa va'erā. "Enterove va'e ruvixarā amoingo va'erā Cristo" he'i araka'e gwa'ýry-rehe.

¹¹ Nhandejáry nhe'ē-py hemimbota-rupi opamba'e oiko. Ne'írā vyteri ko yvy oiko jave, he'i araka'e ojéupe ojapo va'erā. Upéa-gwi nhande poravo araka'e gwe'yirā. Nhande poravo peteixa nhamoirū hagwā ta'ýry.

¹² Ore kwéry katu orojerovia ypy va'ekwe Cristo-rehe. Upéa-gwi toromomba'e gwasu katu Nhandejáry-pe. "Iporãete va'e hekoha" toro'e hese.

¹³ Ore-vy oiko hagwe-rami, ojehu ave peē-my. Pehendu ramo pe anhetegwa nhe'ē, Hesu Cristo pene resendeharā rehegwa nhe'ē porā pehendu ramo, pejerovia-ma va'ekwe Cristo-rehe. Upéi Nhandejáry ombou va'ekwe peē-my Nhe'ē Marangatu tee va'e upe he'i va'ekwe "Ame'ē va'erā". "Xe mba'e voi upe

* **1:7-9 Cl 1.14**

va'e, xe reminhongatu voi upe va'e" he'i pende-rehe, Nhe'ẽ Marangatu tee va'e ome'ẽ-vy.

¹⁴ Nhe'ẽ Marangatu tee va'e ome'ẽ ranhe-gwi nhande-vy, jaikwaa porã nhande-vy gwarã. Entéro he'i va'ekwe gwive, "Ame'ẽ va'erã xe re'yi kwéry-pe" ome'ẽ va'erã nhande-vy Nhandejáry, nhane resendepa-vy ojéupe gwarã. "Tuvixa mba'e Nhandejáry rekoha, iporã ete voi" ja'e hese nhamboete-vy.

*Paulo omondo Nhandejáry-pe onhe'ẽ Hesu reroviaha-rehe
(Ef 4.15-16; Cl 1.9-10; Hb 13.20-21)*

¹⁵⁻¹⁶ Upéixa ramo, atima porã Nhandejáry-pe pende-rehe. Ahendu kuri pene rerakwã. "Ojerovia oiko-vy Nhandejáry Hesu-rehe. Nhandejáry re'yi gwive hembiayhu" he'i pene mombe'u-vy. Upéa-gwi atima tima Nhandejáry-pe aiko-vy pende-rehe. Oraçao ajapo jave, xe mandu'a pende-rehe.

¹⁷ Ajerure Nhandejáry Hesu Cristo Ru-pe. Nhande Ru tuvixa mba'e hekoha va'e-pe ajerure pende-rehe. Aipota ha'e ome'ẽ peẽ-my Nhe'ẽ Marangatu tee va'e pene arandu porã hagwã, ojekwaa porã hagwã peẽ-my Nhandejáry, peikwaa porãve hagwã íxupe.

¹⁸ Aipota pende resape pende py'a-py peikwaa porã hagwã peẽ-my gwarã iporã va'e. Upéa-rehe pene renói va'ekwe. Upe va'e-pe pendejéupe gwarã peha'arõ peiko-vy perovia ku'a ku'a e'ŷ reheve. Aipota peikwaa porã Nhandejáry tuvixa ete nhande rovasa porãha. "Xe re'yi-pe gwive ahovasa va'erã" he'i hagwe-rami pende rovasa va'erã.

¹⁹⁻²⁰ Aipota peikwaa ave Nhandejáry opamba'e-rehe ipu'akaveha. Jajerovia ramo hese, nhane mbopu'aka. Oha'e-rami ave nhane mombaraete. Ha'e ipu'aka va'ekwe omano va'ekwe-rehe. Cristo-pe omopu'ã jevy va'ekwe. Upéi ombotuvixa íxupe yváy-py. Oakatúa-koty ombogwapy oyke-rehe. Cristo-pe omopu'ã hagwe-rami, nhane mombaraete ave nhande pu'akave hagwã.*

²¹ Áy Cristo oiko upe-py enterove va'e ruvixa ramo. Ipu'akave yváy pygwarehe gwive. Mburuvixa-rehe gwive ipu'aka. Oĩ ramo omanda va'e, oĩ ramo ipu'aka va'e, oĩ ramo yvy járy ave, ipu'akave hese kwéry. Ko yvy-rehe ndaipóri tuvixave va'e réry. Opamba'e-rehe ipu'akave Cristo. Heko apy rei e'ŷ reheve oiko va'erã.

²² Ipogwy-py entéro mba'e omoĩ va'ekwe Nhandejáry. Hesu-rehe ojerovia va'e-pe gwive onhomboaty aty ha-rupi, enterove jaryrã omoĩ va'ekwe.*

²³ Nhane akã omoaranduha-rami nhande rete, upéixa Cristo omoarandu entéro gweroviaha gwive. Hete-rami oiko hese ojerovia va'e. Hese e'ŷ reheve ndoiko porã porãiry. Nhane akã omoaranduha-rami nhande rete, upéixa Cristo omoarandu entéro gweroviaha gwive. Hese e'ŷ reheve ndoiko porã porãiry. Omohynyhẽmba ramo ae katu, oiko porãmba-ma hikwái. Entéro mba'e omohynyhẽmba onhe'ẽ-py.

2

*Ne rembiapo porã-rehe rei nane resendéiry voi
(Rm 3.24; 5.6-11; Cl 3.5-7; Tt 3.3-7)*

¹ Ha peẽ katu omano va'ekwe-rami, ijapysape va'e-rami peiko araka'e. Pejejavy-gwi, pene rembiapo vai-gwi ave, ójehe ipu'aka e'ŷ va'e-rami peiko araka'e.

² Áygwa reko rei-rupi peiko araka'e. Yvy járy áry-rehe rei oiko va'e ruvixa nhe'ẽ-py peiko araka'e. Nhandejáry nhe'ẽ renduse e'ŷha-rehe ipu'aka va'e nhe'ẽ-py peiko araka'e.

* 1:19-20 Sl 110.1 * 1:22 Sl 8.6

³ Upéixa ave nhande kwéry jaiko va'ekwe. Teko rei reko-rupi jaiko va'ekwe. Jajapose va'e rei jajapo va'ekwe. Yvypóry kwéry ojerereko asy va'erā-rami ave, nhande kwéry jaiko va'ekwe Nhandejáry-pe.

⁴ Ha Nhandejáry katu oporoporiahuvereko verei va'e voi, nhande rayhu tee rei va'e voi.

⁵ Jajejavý meme-gwi, omano va'ekwe-rami jaiko va'ekwe. Upe-ma ramo nhane moingove jevy va'ekwe. Cristo nhamoirū-magwi, nhane moingove jevy va'ekwe. Ne resende rei va'ekwe. Ne rembiapo porā-rehe rei nane resendéi va'ekwe.

⁶ Cristo nhamoirū-magwi ae, Cristo ndive nhane moingove jevy vérami va'ekwe. Cristo yke-rehe nhane mbogwapy-ma vérami yváy pygwa-rami jaiko hagwā. Jagwapy-ma vérami ave nhaime-vy ijyke-rehe.

⁷ Upéa ojapo ohendu hagwā ave herakwā kente kwéry ndoikói vyteri va'e, oiko e'ŷ va'e, "Gwa'ýry Hesu-pe ohayhu eterei-gwi, nhande rayhu tee rei va'ekwe. Nhande rovasa porā porā va'ekwe nhande rexakwaa rei-vy" he'i hagwā hese.

⁸ Pejerovia-magwi Cristo-rehe, pene resende va'ekwe pende rexakwaa rei-vy. Pendejéhegwi napenheresendéi va'ekwe. Pende rexakwaa rei-gwi pene resende rei va'ekwe.

⁹ Pene rembiapo porā-rehe rei, napene resendéi voi. Pene rembiapo porā-rehe rei pene resende ramo ra'e, "Xe rembiapo porā-gwi rei, xe resende va'ekwe Nhandejáry" peje rei arā ra'e.

¹⁰ Nhande apoha Nhandejáry. Hesu Cristo-pe nhamoirū-ma ramo, nhane moingove porā va'ekwe nhane rembiapo porā porā hagwā, yma jaiko e'ŷ ngatu he'i hagwe-ramima jajapo hagwā.

Nhande kwéry nhamoirū ramo Cristo-pe, peteīxa jaiko onhondive (Gl 3.28)

¹¹ Upéixa ramo pene mandu'a katu pende rekokwe-rehe. Yma ore kwéry e'ŷ va'e peē, judeu e'ŷ va'e peē. Ore kwéry oronhepirekytī va'e. Ha peē katu, "Onhepirekytī e'ŷ va'e" he'i pende-rehe judeu kwéry pene mboete e'ŷ-vy. Upéixa Nhandejáry nhe'ě-py ogwereco gwete, upéixa ojapo ójehe judeu kwéry. Áy pene mandu'a katu pende rekokwe-rehe, pene mboete e'ŷ javé.

¹² Upe javé Cristo e'ŷ rehevē peiko araka'e. Yvy akéno-py oiko va'e-rami peiko araka'e. Nhandejáry rembiporavo e'ŷ gwe'yirā e'ŷ araka'e peē. Peē-my "Xe rendu ramo, apohovasa va'erā" nde'íry araka'e Nhandejáry. Gwe'ýi-pe he'i tee va'ekwe, nde'i reíry va'ekwe, upéa nde'íry araka'e peē-my. "Ndaipóri nhande-vy iporā va'erā" he'i va'e-rami ojóupe, peiko araka'e. Nhandejáry oiko e'ŷ va'e-rami peiko araka'e áry porukwe-rupi peiko-vy.

¹³ Áy katu Cristo Hesu-pe pemoirū-gwi, ndapeikovéi-ma mombyry íxugwi. Gwugwy avyte-py omano-gwi pende-rehe, Cristo irū ramo-ma peiko. Pen-hemoagwī-ma íxugwi peiko-vy.

¹⁴ Judeu kwéry, judeu e'ŷ va'e-pe ave, onhondive imbojoja-vy ou Cristo va'ekwe, peteīxa ogwereco hagwā onhondive. Upéixa nhande kwéry nhamoirū ramo íxupe, peteīxa jaiko arā onhondive. Ojejuka uka ramo, peteīxa ombojoja va'ekwe judeu, judeu e'ŷ va'e ndive. Ijokoha oipe'a va'e-ramima, ombojoja anive hagwā ija'e'ŷ ojóhe, oiko porā hagwā onhondive.

¹⁵ Judeu rekoha-rehe, Moisés amyrī remimombe'ukwe-rehe ave, "Ijapy-ma" he'i hese. "Ndaipokatuvéi-ma, naimbaraetevéi-ma" he'i. Omopeteīse judeu judeu e'ŷ va'e ndive. Oipota omoirū ojéupe peteīxa ombojehe'a hagwā íxupe kwéry, onhemboheko pyahu va'e-rami oiko hagwā. Upéixa ombojoja porā judeu judeu e'ŷ va'e ndive.

¹⁶ Kurusugwasu-rehe omano va'ekwe Cristo, omoingo porā hagwā íxupe kwéry ani hagwā ojóehe ija'e'ŷ tei. Omano-gwi kurusugwasu-rehe, Nhandejáry re'ŷi ramo nhane moingo. Ombojoja ojóehe ija'e'ŷ va'ekwe-pe onhem-boeko pyahu va'e-rami oiko hagwā peteīxa.

¹⁷ Upéixa ramo ogwahē ou-vy va'ekwe Cristo nhe'ē porā omombe'u-vy. Peē-my mombyry íxugwi peiko va'e-pe, "Pembojoja katu pende reko xe reko-rehe pende py'agwapy hagwā" he'i. Ore-vy agwī íxugwi oroiko va'e-pe, upéixa ave he'i.*

¹⁸ Nhande kwéry, judeu va'e, judeu e'ŷ va'e ave, nhandejéhegwi rei ndaha'ēi peteīxa. Ha Cristo omano-gwi nhande-rehe katu, upéa-gwi ae peteīxa nhande rerekō Nhe'ē Marangatu tee va'e. Nhane nhe'ē peteīxa ogweraha Nhandejáry-pe.

¹⁹ Upéa-gwi peē kwéry judeu e'ŷ va'e ndaha'evéi-ma ore kwéry e'ŷ va'e. Ndapeikovéi-ma ha'e oyvy e'ŷ-py oiko va'e-rami. Áy Nhandejáry re'ŷi irū ramo peiko-ma. Áy peteī óga pygwa-rami peiko. Nhandejáry róga pygwa peē.

²⁰ Pejeapysaka katu xe nhe'ē-rehe. Amombe'u-ta Nhandejáry re'ŷi rekoha ogagwasu rehewa nhe'ē-rami. Nhandejáry re'ŷi gwive Nhandejáry róga-rami oiko. Yma gware Nhandejáry nhe'ē-py omombe'u va'ety-pe Hesu remimondo va'e kwéry-pe ave he'i Nhandejáry róga nhepyrūha. Óga renagwā he'i Hesu remimondo-pe. Peē-my he'i hembiaporā omopu'ā hagwā óga. Ha Cristo-pe katu he'i okytagwasu.

²¹ Opamba'e jekoka voi ha'e. Íxugwi tuvixave xave oho-vy Nhandejáry renagwā, imarangatu va'e voi ha'e.

²² Ha peē kwéry ave Cristo pemoirū-gwi, peiko va'erā Nhandejáry re'ŷi gwive ndive. Hesepa ombojoja omoī-vy va'e-rami ogagwasu apo-vy, pene mbojoja ave va'erā peteīxa Nhandejáry re'ŷi ndive pene mbojehe'a-vy. Hen-dive kwéry oiko va'erā Nhandejáry. Nhe'ē Marangatu tee va'e-rupi oiko va'erā.*

3

Yma oikoe koe va'ekwe áy peteīxa-ma onhomboaty

(Cl 1.24-29)

¹ Upe va'e-rehe ajapo-ta oraçāo Nhandejáry-pe pende-rehe. Xe Paulo Cristo-rehe ha-py anhemoī ave va'e preso. Peē ore kwéry e'ŷ-rehe ha-py, anhemoī va'e preso. Anhemoī ramo jepe, ajapo-ta joto oraçāo Nhandejáry-pe pende-rehe.

² Pehendu nipo ra'e xe rerakwā. Nhandejáry omombe'u va'ekwe xe-vy xe rembiaporā pende-rehe xe rexakwaa rei-vy.

³ Xe-vyte oikwaa uka Nhandejáry ojapo va'erā. Xe-vyte ohexa uka va'ekwe. Hembiaporā-rehe ndahetái xe nhe'ē ahai kuri ko kwatia-rehe.

⁴ Pemonhe'ē ramo xe ahai va'ekwe, peikwaa va'erā xe Cristo rembiaporā oikwaa-ma va'e.

⁵ Yma araka'e avave-pe nomombe'úi ojapo va'erā Nhandejáry. Ha ko'ângā katu gwe'ŷi ete-pete oikwaa uka. Gwemimondo va'e-pe, onhe'ē-py omombe'u va'ety-pe ave oikwaa uka. Nhe'ē Marangatu tee va'e-rupi oikwaa uka ore-vy.

⁶ Mbava'e tipo he'i ojapo va'erā? A-rami he'i: "Nhe'ē porā renduha gwive ahovasa va'erā" he'i Nhandejáry. "Yma judeu pegwarā mante áy ambojoja-ta judeu e'ŷ-pe ave ime'ē-vy" he'i. Judeu kwéry-pe, "Aporesende va'erā" he'i tee va'ekwe, nde'i reíry voi. Upe he'i va'ekwe, he'i ave judeu e'ŷ va'e-pe judeu

* 2:17 Is 57.19 * 2:22 Cl 1.15-23

pegwarā gwive ãyombojoja ime'ẽ-vy judeu e'ŷ-pe ave. Cristo-pe omoirū-ma ramo nhe'ẽ porā rendu-vy, ombojoja ime'ẽ-vy judeu e'ŷ-pe ave. Cristo-pe omoirū irū-gwi, oikoe koe va'e peteĩ va'e rete-rami oiko-ma ãy. Judeu judeu e'ŷ ndive oiko-ma onhondive.

⁷ Upéa nhe'ẽ porā amombe'u hagwā Nhandejáry rembigwái ramo aiko-ma. Hembigwái ramo xe moingo-ma xe rexakwaa rei-vy, Hesu rehewa nhe'ẽ porā amosarambi hagwā. Xe mombaraeteha-rupi amombe'u mbe'u aiko-vy.

⁸ Xe nanhembotuvixái. Anhembohekomirīve va'e aiko-vy. Oime raẽ va'e Nhandejáry re'ýi gwive heko porāve xéhegwi. Ha xe-vy katu omombe'u xe rembiaporā va'ekwe Nhandejáry xe rexakwaa rei-vy, araha hagwā amombe'u-vy judeu e'ŷ va'e kw'ery-pe Hesu rehewa nhe'ẽ porā, "Tuvixa mba'e Cristo. Ha'eixagwa ndaipóri. Ndikatúi jahexaa kwa porā tee hekoha hese. Oĩ meme nhande-vy oikwaa uka porāve hagwā." Upeixagwa oipota xe amombe'u.

⁹ Oipota xe amo'arandu entéro va'e-pe amombe'u-vy mba'éixa ojekwaa-ta Nhandejáry rembiaporā. Ha Nhandejáry katu opamba'e apoha voi. Opamba'e reko járy voi ha'e. Upéixa araka'e nomombe'úi araka'e avave-pe. Yma gwive ãy peve nomombe'úi avave-pe gwembiaporā.

¹⁰ Æy katu Nhandejáry oikwaa uka-ma gwī yváy pygwa omanda va'e kwéry-pe. Ipu'aka va'e kwéry-pe oikwaa uka-ma ave gwembiapo. Entéro Hesu reroviaha gwive, yma oikoe koe va'ekwe ãy peteĩxa-ma onhomboaty aty okwa-vy ohexa ramo, oikwaa-ma Nhandejáry arandu, ombojojapa ramo. Mba'eixagwa xagwa pa hembiapo porā va'erā oikwaa-ma va'erā.

¹¹ Ne'írā oiko ramo vyteri araka'e ko yvy, yma gwive he'i hagwe-ramima, ãy kóa ojapo-ma Nhandejáry. Nhandejáry Hesu Cristo rembiapo voi.

¹² Íxupe nhamoirū-gwi, hese jajerovia-gwi, Nhandejáry ndive nhanhomon-getase ramo, ndaiporivéi nhande jokoharā. Nhatĩ e'ŷ reheve ae nhan-hemoagwī íxugwi. Nhatĩ e'ŷ reheve nhande rete nhanogwahē-ma íxupe oraçāo apo-vy.*

¹³ Upéa-rehe ani pevy'are'ŷ xe-rehe. Pende-rehe ha-py ajerereko asy ramo jefe, pende rovasa porā joto va'erā Nhandejáry.

Aipota peikwaa Cristo heko porayhu tee rei va'e-pe

¹⁴ Upéa-gwi anhesũ xe retypy'ã-rehe Nhandejáry renonde-py oraçāo apo-vy.

¹⁵ Nhandejáry Nhande Ru voi. Ha'e Nhande Ru tee-gwi, "Nhande re'ýi" ja'e yváy pygwa-rehe yvypóry-rehe ave.

¹⁶ Ha'e hekoha porā tee rei va'e. Upéa-gwi ajerure íxupe pene mombaraete hagwā, Nhe'ẽ Marangatu tee va'e oiko hagwā pende py'apy-py.*

¹⁷ Hese pejerovia-gwi, aipota Cristo oiko pende py'apy-py. "Hope porā ramo, hapo porā ave" ja'e. "Óga porā ramo, okyta porā ave" ja'e. Upéixa ete Cristo oiko-gwi pende py'a-py, peiko porā va'erā pejohayhu-vy.

¹⁸ Ajerure meme Nhandejáry-pe he'ýi gwive ndive pene mombaraete hagwā. Aipota pene mo'arandu porā peikwaa hagwā Cristo, heko porayhu tee rei va'e-pe. Enterove va'e voi hembiayhu. Oporohayhu ku'a ku'a e'ŷ va'e voi ha'e. Oporohayhu meme va'e. Ohayhu okanhy va'e. Mombyrygwaa hembiayhu. Yváy pygwa gwive ohayhu. Yvygwy pygwa jepe ave ohayhu. Ndaipóri voi hembiayhu e'ŷ va'e.

¹⁹ Cristo reko porayhu kwaapa va'e ndoikói ramo jepe, heko porayhu ndajaikwaa porā etéi vyteri ramo jepe, aipota peikwaa porāve râve joto pende rayhu tee vereiha. Aipota pemboatyve tyve Nhandejáry remime'ẽ

* 3:12 Hb 4.16; 10.19-22 * 3:16 Rm 5.5

me'ẽ pendejéupe. Ha'e hekoha tee-rehe aipota pene mohynyhẽ nyhẽve katu hemime'ẽgwe rerekovy.

²⁰ Ha'e ko jajerureha-rami íxupe ome'ẽ nhande-vy nhande rovasa porã kwaa-vy. Oĩ jajerure e'ŷ hese va'e, oĩ nhane mandu'a e'ŷ hese va'e. Ha'e katu hetave tave kwaa voi ome'ẽ joty nhande-vy, nhane mombaraete oiko-vygwi.

²¹ Tonhemomba'egwasu meme katu Hesu reroviaha onhomboaty atyharupi. Cristo oikoha-rupi tonhemboete ete voi opa e'ŷ-rehe. Amém.*

4

Nhane akã-rami oiko Cristo

(Rm 12.6-8; 1 Co 1.10; 12.8-11; Cl 3.12-15; 1 Pe 3.8; 4.10-11)

¹ Nhandejáry Hesu Cristo rembigwái ramo xe aiko-gwi, xe moĩ kuri preso. Upéa-gwi anhemonhe'ẽ-ta peẽ-my. Pene mboheko marangatu hagwã pene renói va'ekwe Nhandejáry. Pende reko marangatu e'ŷ ramo, pemotĩ arã íxupe.

² “Xe katu xe tuvixave” ani peje rei ojóupe peiko-vy. Penhembohekomiríve ae joty peiko-vy. Pejogwereko porã katu kirirí po-py. Ani peropoxy pya'e a'e teĩ ojoekoha. Pejoporahuvereko rei katu pejohayhu-vy. Ani pejoteta teĩ.

³ Penhangareko porã pendéjehe peteĩxa peiko hagwã onhondive. Nhe'ẽ Marangatu tee va'e pene mbo'eha-rami peiko hagwã pende joja porãve rãve hagwã.

⁴ Cristo rete-rehe oĩ va'e-rami peteĩxa peiko. Peteĩxa oiko nhande py'a-py Nhe'ẽ Marangatu tee va'e. Peteĩxa nhande pe'a va'ekwe gwe'yirã. Peteĩxa nhande kwéry nhaha'arõ Hesu ogwahẽ jevytaha áry.

⁵ Peteĩxa nhande kwéry Járy va'e voi Nhandejáry. Peteĩxa jajerovia hese. Peteĩxa nhane mongarai va'ekwe.

⁶ Nhande kwéry va'e Járy, nhande kwéry va'e Ru ave Nhandejáry voi. Ha'e anho peteĩ oiko va'e. Ha'eixagwa ndaipóri. Nhande kwéry Ruvixa va'e. Nhane moingoha. Nhane mombaraeteha imomba'apo uka-vy. Nhande py'a-apu oiko va'e Nhandejáry voi.

⁷ Nhande kwéry peteĩ teĩ va'e-pe nhande reko me'ẽ me'ẽ. Ojoha'e ha'e ramigwa e'ŷ-py nhande reko me'ẽ Cristo. Peteĩ teĩ nhande rexakwaa rei-gwi, nhande reko me'ẽ me'ẽ nhande-vy.

⁸ Upéixa he'i Nhandejáry kватia nhe'ẽ Cristo-rehe:
“Yváy-py ojeupi oho-vy. Oho jave, ogweraha omoĩ hagwã preso anháy nhe'ẽ-py okwa va'e-pe. Ha kente kwéry-pe heta gwemime'ẽ ome'ẽ me'ẽ”*
he'i Nhandejáry kватia nhe'ẽ Cristo-rehe.

⁹ “Ojeupi” he'i ramo, mbava'e-pe he'i, oĩ oporandu va'e. A-rami he'i omombe'u-vy. Ogwejy ranhe va'ekwe Cristo ko yvy-py yváy-gwi. Ha upéi katu ojeupi jevy va'ekwe oho-vy.

¹⁰ Upéixa upe ogwejy va'ekwe, upe ojeupi jevy va'ekwe oho-vy peteĩxa. Ojeupi va'ekwe Cristo yvate áry paha-py oho-vy opa-rupi omohynyhẽ hagwã ojéhegwi.

¹¹ Ha'e katu nhande rekorã ome'ẽ me'ẽ va'e. Peteĩ teĩ nhande-vy ome'ẽ me'ẽ nhande rekorã. Peteĩ va'e-pe oheko me'ẽ gwemimondorã ramo. Outro-pe oheko me'ẽ inhe'ẽ-py mba'e kwaa ukaharã. Outro-pe oheko me'ẽ Hesu rehegwa nhe'ẽ porã mombe'uharã. Outro-pe oheko me'ẽ heroviahnahangarekoharã.

¹² Oipota nhande kwéry heroviahnahangarekoharã. Oipota nhanhombarae nhanhopytygwõ kwaa. Oipota nhanhombarae nhanhopytygwõ-vy, Cristo rete-rehe oĩ va'e-rami jaiko hagwã.

* 3:21 Jd 24-25 * 4:8 Sl 68.18

13 Oipota peteīxa jarovia porāve rāve Nhandejáry ra'y-pe. Jaikwaa porāve rāve íxupe oipota nhande agwyje porā hagwā. Kakwaa va'e reko-rami oipota jaiko. Mitā reko-rami ndoipotáiry jaiko. Cristo reko jejavy e'ŷ porā-rupi oipota jaiko jaheko arupitypa hagwā íxupe.

14 Upe ramo ndajaikovéi-ma mitā reko-rami. Ojererova rova va'e-rami ndajaikovéi-ma. Kanóa-rami y-pe ojererosyry uka oho-vy va'e-rami, ndajaikovéi-ma nhande resa rerova uka hagwā mo'ā. Upe ramo nanhahenduvéi-ma va'erā ijapu va'e nhe'ē, nhahendu e'ŷ va'erā-py nhane mbo'ese va'e nhe'ē nanhahenduvéi-ma. Nhane mbotavyse nhande resa rerova hagwā mo'ā. Tape ijapu rei va'e-rupi oipota mo'ā jaha va'e.

15 Ani nhahendu teī aipo va'e nhe'ē. Anhetegwa va'e ae nhamombe'u mbe'u ojóupe jajohayhu-vy. Aipo ramo, okakwaa va'e-rami peteīxa nhamoirū porāve rāve va'erā Hesu Cristo-pe. Nhane akā-rami oiko Cristo.

16 Nhane akā katu nhande rete mo'aranduha voi, imbojojapa porāha voi. Nhane mo'arandu-gwi ojepota potapa ojóehe onhomombaraete-vy nhande rete. Heko heko-rupi peteī teī oiko ramo, okakwaa porā nhande rete. Upéixa nhande kwéry Hesu-rehe jajerovia va'e gwive nhande mbaraeteve teve jajohayhu-vy. Cristo nhane mo'arandu-gwi, nhanhomombaraete ete jaikovy, nhande reko agwyjeve jeve va'erā jaha-vy. Nhanhomombaraeteve teve va'erā jaha-vy.*

*Iporā perova pende rekoha tujakwe pene mboheko pyahu jevy hagwā
(Cl 3.5-14)*

17 Upéixa ramo anhemonhe'ē-ta peē-my Nhandejáry réry-py ha'e-vy: Anive peiko rei teī judeu e'ŷ va'e-rami. Ha'e kwéry tekoha e'ŷ-rupi rei oiko. Ojéupe he'i va'e rei ha'e ojapo, oikwaa va'e rei ojapo. Ani ereiko ha'e-rami.

18 Inhakā hatā-gwi mba'eve ndoikwaái. Tekoha-rupi ndoikói-gwi ndoikwaái gwekoha. Upéa-gwi pytū-my rei oiko va'e-rami ndoikwaáiry hikwái gwaperā. Upéa-gwi mombyry oiko Nhandejáry-gwi.

19 Notī kwaavéiry-ma hikwái. Tekoha vai-rupima voi ivaive ive-ma oho-vy. Upeixagwa ojapo rire, ojaposeve seve-ma hikwái.

20 Ha Cristo rekoha omombe'u jave peē-my, upeixagwa nhe'ē nomombe'úi va'ekwe peē-my.

21 Anhetegwa va'e ae oikwaa uka va'ekwe peē-my Hesu rehewa. Hemimombe'u peē-my pehendu va'ekwe.

22 He'i va'ekwe peē-my pende rekoha tujakwe-rehe: "Perova katu pende rekoha. Pejapose va'e rei pejapo-gwi, omano va'erā-rami peiko va'ekwe. Ivaive ive oho-vy pende reko tujakwe."

23 Ñy iporā katu penhemoatyrōmba pene akā porā jevy hagwā.

24 Iporā perova pende rekoha tujakwe pene mboheko pyahu jevy hagwā Nhandejáry. Pende reko me'ē va'erā Nhandejáry ha'e heko-rupima peiko hagwā, pende reko jejavy e'ŷ reheve pende reko marangatu tee hagwā" he'i va'ekwe peē-my.**

25 Upéa-rehe perova katu pende reko apukwe. Nhande kwéry akā-rami oiko Cristo. Peteī hete vérampi jaiko íxupe. Upéixa-gwi peteīxa nhande jojaha-rami jaiko. Nhandéjehe anho rei ndajaikovéi-ma. Upéa-gwi anive pende apu pende rapixa-pe. Anhetegwa ae pemombe'u ojóupe.*

26 Nde poxy ramo jepe, ani erejejavy hagwā-rami ereiko. Ani pyhare peve nde poxy. Epoi mani nde reko poxy-gwi.*

* 4:16 Cl 2.19 * 4:24 Rm 12.2 * 4:24 Gn 1.26 * 4:25 Zc 8.16 * 4:26 Sl 4.4

²⁷ Nde poxy jave, ereheja-ma ipu'aka nde-rehe anháy ruvixa. Upéa-gwi ani erenhemē'ẽ íxupe nde-rehe ipu'aka hagwā-rami.

²⁸ Taimonda e'ŷve katu oiko-vy imonda va'e. Tomba'apo ae katu ojéupe gwarā-rehe oiko-vy. Opo-rupi togana oiko-vy ome'ẽ hagwā gwapixa remikotevē.

²⁹ Ani penhe'ẽ rei rei ojóehe. Penhe'ẽ porā ae katu ojóupe penhom-bopy'agwapy jevy hagwā. Pende rapixa pemo'arandu hagwā-rami pemombe'u íxupe. Upéixa ramo ae ogwerovy'a arā pene nhe'ẽ henduháry.

³⁰ He'i va'ekwe pende-rehe Nhe'ẽ Marangatu tee va'e: "Xe mba'e" he'i, "Xe reminhongatu" he'i pende-rehe. "Cristo ogwahēha óra peve pende reraha hagwā, anhangareko-ta pende-rehe aiko-vy" he'i pende-rehe. Upéa-gwi ani peme'ẽ íxupe vy'are'ŷ. Pejapo vai ramo katu, pembovy'are'ŷ arā íxupe.

³¹ Anive pende a'e e'ŷ teĩ ojóehe. Pejohayhu rei katu. Anive pende poxy pya'e rei ojóupe. Pehexa uka katu pende reko kirirī ae katu pende rapixa-pe. Anive pejogwereko poxy teĩ. Pejogwereko rayhu ae katu. Penhonhe'ẽ mbojevy jevy-vy, anive penhe'ẽ hatā hatā ojóupe. Pejogwereko kirirī ae katu. Anive penhe'ẽ vai rei ojóehe. Penhe'ẽ porā porā ae katu ojóupe. Anive pejohayhu e'ŷ teĩ. Pejohayhu ae katu peiko-vy. Upe tekoha tujakwe-gwi pepoi katu.

³² Pende py'a porā katu ae ojóehe. Pejoporahuvereko katu. Nde-rehe hembiapo vai va'e-pe, ani nde poxy íxupe. Peiporahuvereko rei joty íxupe, Cristo-rehe ha-py Nhandejáry pende poriahuvareko rei hagwe-rami.

5

Peẽ Nhandejáry ra'y-gwi, tapeiko heko-rupi

¹ Peẽ Nhandejáry ra'y voi. Hembiahu va'e voi peẽ. Upéa-gwi tapeiko heko-rupi. Peheko ra'ã íxupe.

² Ha Cristo pende rayhu-gwi va'ekwe, nahakate'ŷi gwekove-rehe. Ojejuka uka rei va'ekwe ae. Ijukaharā-pe onheme'ẽ-ma ramo, gwu remimbota ojapo-ma ramo, ogwerovy'a íxupe Nhandejáry. Nhande rayhu hagwe-rami, pejohayhu yhu tee rei katu peiko-vy.*

³ Peẽ Nhandejáry re'ŷi heko marangatu va'e voi. Toiko e'ŷ pene pa'ũ-my tekoha vai-rupi oiko va'e. Heko ky'a va'e toiko e'ŷ katu. Ojapose va'e rei ojapo va'e toiko e'ŷ katu pene pa'ũ-my.

⁴ Otĩ kwaa e'ŷ va'e nhe'ẽ ani perovy'a teĩ. Ani penhe'ẽ rei, ani penhe'ẽ vai ojóehe penhembohory-vy. Hekovía petima porā ae katu Nhandejáry-pe.

⁵ Oĩ ramo tekoha vai-rupi oiko va'e, heko ky'a rei va'e, ojapose va'e rei ojapo va'e. Upéa Nhandejáry e'ŷ-pe omboete voi. Heko ramigwa íxupe gwarā ndaipóri. Nhandejáry ndive Cristo oiko ha-py nhane ruvixarā ndaipóri íxupe gwarā.*

⁶ Ani pene mbotavy teĩ avave: "Upeixagwa apoha oiko va'erā Nhandejáry ndive" he'i rei va'erā peẽ-my. Upeixagwa apoha-pe ogwereko asy va'erā Nhandejáry onhe'ẽ renduse e'ŷ-gwi.

⁷ Upéa-gwi heko ky'a va'e-pe ani pemoirū teĩ peiko-vy.

⁸⁻⁹ Yma pytū-my rei oiko va'e-rami peiko araka'e. Áy katu Nhandejáry-pe pemoirū-magwi peteĩxa, arakatu-py oiko va'e-rami peiko-ma, osẽ-ma ipotĩ ha-my va'e-rami peiko-ma. Ipotĩ ha-my osẽ va'e-rami oiko va'e, opaixagwa iporā va'erā ojapo. Heko jejavy e'ŷ oiko-vy. Heko apu e'ŷ va'e oiko-vy. Upéa-gwi arakatu pygwa-rami peiko katu. Anive peiko pytū pygwa-rami.*

* 5:2 Ex 29.18 * 5:5 Tg 4.4; 1 Jo 2.15-16 * 5:8-9 Jo 8.12; 12.35-36; 1 Ts 5.5-6; 1 Jo 1.5-7

- ¹⁰ Peheka katu pejohu hagwā Nhandejáry remimbota.
- ¹¹ Ani pemoirū gwī hekoha vai nhemi va'e-pe. Peho ae katu tape porā-rupi. Ohesape va'e-rami peiko, ojekwaa porāve hekoha vai hese.
- ¹² Nhemi ha-py ha'e kwéry hembiapo ky'aha nhamombe'u mbe'u ramo katu ojóupe, nhane motī voi hembiapokwe.
- ¹³ Okanhy va'e oho ramo ghesapeharā-py, jaikwaa-ma hese hekoha. Ojekwaa porā rire, osē-ma ipotī ha-my. Arakatu-pyma oho.
- ¹⁴ Upéa-gwi gwī oke va'e-rami va'e-pe, ja'e:
“Epáy katu. Ani erepyta gwī omano va'ekwe-rami. Evy katu. Ombovy jevy va'e-rami eiko. Tape porā-rupima eiko. Nde resape arā Cristo” ja'e.
- ¹⁵ Penhangareko porā katu pendéjehe peiko porā hagwā. Hi'arandu e'ŷ va'e-rami ani peiko. Ne arandu katu ereiko-vy.
- ¹⁶ Āygwa hekoha vai voi. Upéa-gwi pene rembiapo porā meme katu. Mamo peime ha-rupi, pejapo porā katu.*
- ¹⁷ Ani oikwaa e'ŷ va'e-rami peiko teī. Nhandejáry remimbota oikwaa va'e ramo ae peiko.
- ¹⁸ Ani peka'u teī. Ipu'aka arā tekoha vai pende-rehe. Tapende py'a mohynyhē ae katu Nhe'ẽ Marangatu tee va'e.
- ¹⁹ Peporahéi katu ojóupe gwarā. Nhandejáry nhe'ẽ héry va'e Salmo-py eporahéi. Eporahéi hino-py. Mborahéi-py eporahéi ave. Pende py'a gwive peporahéi Nhandejáry-pe.
- ²⁰ Nhandejáry Hesu Cristo réry-py petima porā meme opamba'e-rehe. Opamba'e Nhandejáry Nhande Ru remime'ẽ-rehe petima porā katu íxupe.*
- Nhane ména nhane rembireko rehewa nhe'ẽ*
(1 Pe 3.1-7; 1 Co 7)
- ²¹ Peē kwéry-pe ha'e-ta. Pehendu katu onhonhe'ẽ kwéry Cristo-pe pemboete-gwi. Enterove tainhe'ẽngendu katu.
- ²² Ko'ānga anhe'ẽ-ta pene rembireko kwéry-pe. Pehendu katu pene ména nhe'ẽ kwéry. Nhandejáry nhe'ẽ pehenduha-rami ave, pehendu pene ména nhe'ẽ.
- ²³ Entéro Hesu reroviaha gwive huvixagwasu Hesu. Nhande kwéry Hesu rete-rami. Nhane akā-rami ha'e. Nhane arandu-rami ha'e ave. Hete-ramigwi, nhane resendehaty ave. Upéixa nhane rembireko kwéry ruvixa nhande kwimba'e.
- ²⁴ Hesu nhe'ẽ nhahenduha-rami, tohendu katu nhane nhe'ẽ gwive nhane rembireko kwéry.
- ²⁵ Ko'ānga pene ména kwéry-pe peha-ma anhe'ẽ-ta. Pehayhu tee katu pene rembireko kwéry-pe. Ha Cristo katu, nhande kwéry, he'ŷi va'e-pe, hese jajerovia va'e-pe, nhande rayhu tee va'ekwe. Ojejuka uka rei va'ekwe nhande-rehe. Ojukaharā-pe onheme'ẽ va'ekwe. Cristo nhande rayhuha-rami pehayhu pene rembireko kwéry-pe.
- ²⁶ Ha'e oipota nhande reko ipotī, oipota nhande rete marangatu.*
- ²⁷ Onhemoirū ukase nhande-vy. Nhande py'a hesakā va'e-rami oipota. Nhande py'a potī porā oipota imarā e'ŷ reheve. Ipisŷi porā va'e-rami oipota. Ikuru kuru e'ŷ va'e-rami oipota nhande py'a ipotī marangatu porā, ivai e'ŷ reheve. Upéixa nhande rayhu tee Hesu nhande rekove-rehe hakate'ŷ-gwi.
- ²⁸ Upéixa ete voi tohayhu gwembireko kwéry-pe. Gwete ohayhuha-rami ave tohayhu gwembireko kwéry-pe. Nhande rembireko-pe jahayhu ramo, jahayhu nhande rekove-pe ave.

* 5:16 Cl 4.5 * 5:20 Cl 3.16-17 * 5:26 Cl 3.18-4.1

²⁹ Gwekove rayhuha e'ŷ ndoikói. Enterove ohayhu gwekove. Nhane rakate'ŷ katu nhande rete-rehe, nhanhangareko porã katu hese. Cristo nhande-rehe onhangarekoha-rami voi nhanhangareko nhande rete-rehe.

³⁰ Nhande kwéry hese jajerovia va'e Cristo rete-rami. Gwete-ramigwi, onhangareko nhande-rehe. Upéixa ete nhane rembireko nhande rete-rami. Nhandéjehe nhanhangarekoha-rami ave, peteĩ teĩ nhanhangareko nhane rembireko-rehe.

³¹ Upéa-rehe he'i Nhandejáry nhe'ẽ:
"Kwimba'e oheja gwu-pe, osy-pe oheja ave, peteĩxa oiko hagwã gwembireko ndive. Omenda rire, mokõi-rami e'ŷ oiko. Peteĩxa oho onhondive. Onho'arandu-py meme oho"*

he'i Nhandejáry kwaitia nhe'ẽ.

³² Jahexa ramo omenda va'ekwe peteĩxa oiko ramo onhondive, Nhandejáry oikwaa ukave ukave nhande-vy nhande rekorã. Omenda va'e reko jahexa ramo mba'éixa nhande heroviahva va'e jaiko-ta Cristo reko irûrã oikwaa uka nhande-vy.

³³ Aipo ramo peteĩ teĩ peẽ-my amombe'u-ta pehendu porã hagwã. Pende rekove pehayhuha-rami ave, pehayhu pene rembireko kwéry-pe. Ha'e-ta ave peẽ kunhagwe-pe, pemboete hagwã pene ména kwéry-pe.

6

Nhane mitã nhande ru nhande sy rehewa nhe'ẽ (Cl 3.20-21)

¹ Ăy ne mitã va'e anhemonhe'ẽ-ta peẽ-my. Peẽ Hesu reroviahva va'e voi. Upéa-gwi iporã katu pehendu meme pende ru, pende sy nhe'ẽ.

²⁻³ Nhandejáry remimombe'ukwe a-rami:
"Pemboete pende ru pende sy ave peiko porã hagwã. Peiko pukuve arã ko yvy-rehe"*

he'i. Upéixa voi hemimanda ypy nhande-vy gwarã mombe'u-vy.

⁴ Ăy túvy kwéry-pe anhemonhe'ẽ-ta. Ani pehekoteta teĩ nde ra'y kwéry-pe, nde rajy kwéry-pe pembopoxy-vy. Pemongakwaa porã ae katu. Nhandejáry onhemonhe'ẽha-rami nhande-vy nhane mbo'eha-rami ave, penhemonhe'ẽ katu íxupe pembo'e-vy.

Nhande nhanhemomba'apo rei va'e, nhande nhaporomomba'apo va'e rehewa nhe'ẽ

(Cl 3.22; 1 Tm 6.1-2; Tt 2.9-10; 1 Pe 2.18)

⁵ Ăy penhemomba'apo rei va'e anhemonhe'ẽ peẽ-my. Pehendu meme katu nde járy yvy pygwa nhe'ẽ. Cristo pehenduha-rami, pemboete nde járy nhe'ẽ nde py'a gwive.

⁶ Oï oipota va'e ijáry imandu'a porã hese. Ijáry resa-py ohendu voi inhe'ẽ. Ndoikovéi ramo katu, nohenduvéi-ma inhe'ẽ. Ani peiko upé va'e reko-rupi. Pehendu ae katu inhe'ẽ. Cristo rembigwái-rami pehendu joty inhe'ẽ. "Cristope ae katu xe amba'apo" peje joty pendejéupe. Nde py'a gwive pehendu joty inhe'ẽ Nhandejáry remimbota apo-vy.

⁷ Nde py'a gwive emba'apo. Nhandejáry-pe vérami eremba'apo. "Ambarapo teko rei anho-pete" ani ere ndejéupe.

⁸ Nde ne momba'apo rei va'e nde rerekoseha-rami rei nde rerekoso. Nde ereporomomba'apo va'e ave. Pene rembiapo porã porâkwe-rami Nhandejáry pende rerekoso joty va'erã. Upéa peikwaa voi.

* 5:31 Gn 2.24 * 6:2-3 Ex 20.12; Dt 5.16

⁹ Oĩ pene pa'ũ-my oporomomba'apo va'e. Nde ereporomomba'apo va'e anhemonhe'ẽ-ta nde-vy. Ereko porã katu ne rembigwái-pe. Ani erereko poxy-py íxupe. Oime ko Nhandejáry yváy-py. Nde járy ijáry ave. Enterove va'e-pe ogwereco peteixa. Upéa-gwi ereko porã katu ne rembigwái-pe.*

Tapene mombaraete katu Nhandejáry, anháy ruvixa nhe'ẽ oike e'ŷ hagwã nhande-rehe

(1 Ts 5.8; 1 Pe 5.8-9)

¹⁰ Ko'ánga ojoaky kwéry amombe'uve-ta peikwaa porã hagwã pene rembiaporã. Penhemombaraete ete katu Nhandejáry-pe pemoirũ-vy peteixa. Ha'e tuvixa mba'e, pene mbopu'akaha voi.

¹¹ Tapene mombaraete katu Nhandejáry. Soldado omondeha-rami gwete-rehe hatã va'e, upéixa pemonde ave pende rete gwive jokoha ramigwa, anháy ruvixa nhe'ẽ oike e'ŷ hagwã pende py'a-py pono ho'arandu-py pende reity gweko-rupi.

¹² Teko rei ndive anho mante nanhanhorairõ vaíry jajoityse-vy. anháy ruvixa ndive ae katu nhanhorairõ pono jajeity uka íxupe. Oĩ ave áry pygwa jepe Nhandejáry e'ŷ va'e, hekoha vaive va'e nhanhorairõ va'e ndive. Oĩ anháy ruvixa kwéry arygwy rupigwa nhande-rehe omandase va'e, nhande-rehe ipu'akase va'e jajoko va'e íxupe. Oĩ entéro pytû-my rei oiko va'e-rami oiko va'e ruvixa

¹³ Upéa-gwi Nhandejáry gwigwa-py ae pejavoa katu pende rete pono oike anháy nhe'ẽ pende py'apy-py pono pende reity gweko-rupi, ipu'akaseha áry-py ou-vy pende-rehe. Pemonde ranhe-rami katu, napende reityíry arã. Opú'a oĩ-vy va'e-rami joty ndape'ái arã. Are penhorairõ rire, are pejoko joko rire peiko-vy, ndape'ái joty arã.

¹⁴ Pejoko katu anháy-pe. Ani erejeity uka íxupe. Pemonde ranhe katu nde ku'a kwaha. Nhande ku'a kwaha, nhande reko apu e'ŷ va'e-rehe ae he'i nhande-vy. Upéi pemonde pene kamisa ramigwa hatã va'e. Nhande kamisa hatã va'e, nhande rekoha jejavy e'ŷ va'e-rehe ae he'i nhande-vy.*

¹⁵ Upéi pemonde pende py rehewa pende py syry e'ŷ hagwã. Nhande py rehewa, Hesu rehewa nhe'ẽ porã nhane mbopy'agwapy va'e, nhamombe'u va'erã-rehe ae he'i nhande-vy.*

¹⁶ Upe rire, perekó pende rete jokoha ramo pono pende rapy vérami anháy ruvixa pende api ramo, pembogwe hagwã ae hemimombo. Nhande rete jokoha, Hesu-rehe jajeroviaha-rehe ae he'i nhande-vy.

¹⁷ Upéi emonde ne akã ryru hatã va'e. Nhane akã ryru, nhane resendeharã-rehe ae he'i nhande-vy. Upéi eipyhy katu nde kysepuku haimbe jováy va'e, Nhe'ẽ Marangatu tee va'e remime'ẽgwe. Kysepuku, Nhandejáry kwatia nhe'ẽ marangatu-rehe ae he'i nhande-vy. Upe va'e kysepuku ramigwa-py pejoko katu anháy-pe, Nhandejáry nhe'ẽ-py pembojevy-vy íxupe.*

¹⁸ Pemondo mondo katu pene nhe'ẽ Nhandejáry-pe pene mbo'eha-rami Nhe'ẽ Marangatu tee va'e. Opaixagwa pene nhe'ẽ pembojeupi upi pejerurevy Nhandejáry-pe. Ani ne ate'ŷ tei. Pene kyre'ŷ ae oraçao apo-vy entero Nhandejáry re'yí-rehe gwive pemondo mondo Nhandejáry-pe pene nhe'ẽ.

¹⁹ Xe-rehe ave pejapo oraçao anhe'ẽ javé ou rei hagwã xe juru-py xe nhe'ẽrã, ati e'ŷ reheve amoherakwã Hesu rehewa nhe'ẽ porã hembieha uka ramo va'e.

²⁰ Upe va'e-rehe apyta preso. Ajepokwa ramo jepe xe sã-rehe aĩ-vy, amombe'u joty inhe'ẽ. Hesu Cristo réry-py amombe'u mbe'u inhe'ẽ. Ejapo

* 6:9 Cl 4.1; Dt 10.17 * 6:14 Is 11.5; 59.17 * 6:15 Is 52.7 * 6:17 Is 59.17

oracão xe-rehe atī e'ŷ reheve amombe'u joty hagwā, Cristo ombou gwekovía onhe'ẽ mombe'u hagwā va'e-rami joty amombe'u hagwā.

Tíquico oho-ta pende ha-py xe mombe'u-vy

²¹ A-py oiko xe ndive nhande re'ŷi va'e, nhane rembiayhu va'e Tíquico héry va'e. Ha'e Nhandejáry rembigwái va'e, hese jajerovia va'e. Ha'e oho-ta pende ha-py xe mombe'u-vy, xe-vy ojehu va'ekwe gwive oikwaa ukapa-vy. Mba'éixa pa xe aiko va'e oikwaa ukapa va'erã peẽ-my.

²² Upéa-rehe xe remimondo va'e amondo-ta omombe'u hagwā peikwaapa hagwā ore rekoha. Amondo-ta pene mbopy'agwapy hagwā pono pene mytu'e'ŷ hagwā xe-rehe.

²³ Tapene mbopy'agwapy katu Nhandejáry Nhande Ru, Nhandejáry Hesu Cristo ave. Tapene mbojohayhu. Tapene mbojerovia uka porâve ójehe. Peẽ kwéry Nhandejáry re'ŷi va'e peẽ. Tapende rovasa katu.

²⁴ Pende reko porayhu reheve pene mbyai e'ŷ reheve, pehayhu tee meme voi Nhandejáry Hesu Cristo-pe peiko-vy. Tapende rexakwaa rei katu Nhandejáry.

Paulo remimombe'ukwe Filipos tetā mygwa pegwarā epístola de Paulo aos filipenses

Paulo omondo Filipos tetā mygwa-pe onhe'ẽ kwatia-rehe

¹ Xe Paulo Timóteo ndive, Hesu Cristo rembigwái va'e voi, oromondo-ta peẽ-my ore nhe'ẽ kwatia-rehe. Peẽ Nhandejáry re'yi Filipos tetā-my peiko va'e kwéry, Cristo-pe peteixa pemoirū va'e voi. Oromondo-ta ore nhe'ẽ peẽ-my gwarā. Penhomboaty aty ha-rupi peẽ Hesu reroviaha nhangarekoha va'e, ipytygwōha va'e ave oromondo-ta ave peẽ-my ore nhe'ẽ.

² Tapende rexakwaa rei katu Nhandejáry, Nhande Ru. Tapene mbopy'agwapy katu. Tapende rovasa katu Nhandejáry Hesu Cristo.

Paulo ojapo oração

(Ef 1.15-16; Cl 1.9-10; 1 Ts 5.23; 2 Ts 2.16)

³ Xe mandu'a pende-rehe jave, atima porā meme Nhandejáry-pe pende-rehe kwéry.

⁴⁻⁵ Yma gwive pehendu ypy va'ekwe ãy peve peẽ xe pytygwō tygwō amosarambi porā hagwā Hesu rehewa nhe'ẽ porā. Upéa-gwi avy'a meme aiko-vy pende-rehe. Ajapo jave oração ajerure rure pende-rehe Nhandejáry-pe, atima ave íxupe pende-rehe.

⁶ Apogwerovia voi pende rekoha-rehe. Are-ma onhepyrū Nhandejáry pene mboheko porā hagwā. ãy gwarā peve pendéhegwi ndopoi reíry voi. Pene mboheko porāve rāve pene moingo-vy. Ha Hesu ou jevytaha áry-py katu pende reko moatyrō tee-ta katu ojéupe gwarā. Upéa-gwi ajerovia pende-rehe.

⁷ Peẽ xe po pyte pygwa, xe apohayhu voi. Upéa-gwi iporā katu xe ajerovia pende-rehe. Óme'ẽ va'ekwe xe-vy Nhandejáry xe rembiaporā xe rexakwaa rei-vy. Ha peẽ kwéry xe pytygwō va'e. Preso anhemoi jave xe pytygwō joty. Hesu rehewa nhe'ẽ porā aikwaa uka jave gwī xe remimombe'u ombojevyse va'e-pe, xe pytygwō joty. Hesu rehewa nhe'ẽ porā, “Anhetegwa va'e voi inhe'ẽ” ha'e jave amombe'u-vy, xe pytygwō ave.

⁸ Peẽ xe rembiexa nga'u voi. Cristo pende rayhuha-rami, apohayhu ave. Anhete ha-py voi apohayhu. Xe apu e'ŷha oikwaa voi Nhandejáry.

⁹⁻¹⁰ Ajapo oração pende-rehe. Aipota pejohayhu porāve rāve voi peiko-vy, pene aranduve hagwā, pejapo va'erā, pejapo e'ŷ va'erā peikwaa porā hagwā, tape iporāve va'e-rupi peho hagwā. Cristo ou jevytaha áry-py, aipota pende reko poti, “Erejejavy-ma” pono he'i pende-rehe kwéry.

¹¹ Aipota Hesu Cristo pene mboheko porā porā, pende reko porā ku'a ku'a e'ŷ hagwā, ojekwaa porā hagwā Nhandejáry rekoha, entéro ohexa kwaa hagwā hese hekoha, “Ha'e tuvixa mba'e” he'i hagwā hese.

Cristo-rehe anho mante aiko

(Ef 6.20)

¹² ãy xe re'yi kwéry, aipota xe rehewa peikwaa. Heta mba'e xe-vy ojehu ramo jepe, osarambive mbive joty oho-vy xe remimombe'ukwe Hesu rehewa nhe'ẽ porā.

¹³ Cristo-rehe ha-py xe xe moŷha preso opa-rupi ojekwaa. Ojehexa uka porā entéro soldado mburuvixagwasu nhangarekoha-pe.

¹⁴ Ajepokwa-gwi jepe, heta eterei nhande re'ýi Hesu-rehe ojerovia va'e, notívéi-ma. Ipy'agwasuve-ma Nhandejáry nhe'ẽ mombe'u-vy ójehe imytu'e'ý e'ý reheve.

¹⁵ Oĩ xe-rehe ndaija'éi-gwi omombe'u va'e. Onhemboete ukase-vy omombe'u Cristo rehewa. Oĩ ave ipy'a porã reheve omombe'u va'e.

¹⁶ He'i xe-rehe, "Nhandejáry remimbota-rupi Paulo-pe omoõ preso. Oikwaa uka porã ete hagwã gwĩ hemimombe'u ombojeyse va'e-pe, oĩ joty preso" he'i xe-rehe. Upéa-gwi omombe'u Cristo rehewa nhe'ẽ. Xe rayhu-gwi omombe'u.

¹⁷ Ha upe onhembotuvixa ukase va'e katu, xe moakãrasyse mo'ã. Cristo rehewa mombe'u-vy ojehexa uka porãseve mo'ã oiko-vy. Ójehe rei oiko. Xe xe moõ javé preso, xe moakãrasyse voi mo'ã.

¹⁸ Xe mbopoxyse mo'ã ha ndaxe poxy mo'ãi joty. Onhemboete ukase-vy omombe'u ramo jepe, Cristo rehewa joty omombe'u. Oĩ ipy'a porã reheve omombe'u va'e ave. Upéixa entero omombe'u Cristo rehewa. Upéa-rehe avy'a joty aiko-vy. Ndaipóri xe mbovy'are'ý va'e. Avy'a joty va'erã aiko-vy.

¹⁹ Heta mba'e xe-vy ojehu ramo jepe, xe arov'y a joty, iporã va'erã joty xe-vy. Xe-rehe oraçao pejapo ramo, iporã va'erã joty xe-vy. Xe-rehe pene mandu'a va'e-rehe ajerovia tee joty pende-rehe. Hesu Cristo nhe'ẽ marangatu-rehe xe pytygwôharã-rehe ajerovia joty. Upéa-gwi xe-vy ojehu va'erã, iporã joty xe-vy. Naxe mbopy'amiriry va'erã.

²⁰ Xe kyre'ý aha'arõ-vy xe-vy ojehu va'erã. Xéjehe ajerovia voi xe motõ e'ý hagwã, xe py'agwasuve hagwã ae katu Cristo-pe amomba'egwasu-vy. Amano-ta para'e. Mba'e ojehu ramo xe rete-pe ambotuvixaseve joty katu Cristo-pe.

²¹ Xéjehe anho rei ndaikóiry. Cristo-rehe anho mante aiko. Amano ramo ae, iporãve-ma va'erã xe-vy.

²² Ha xe aiko pukuve ramo katu ko yvy-py, ndaiko reíry va'erã, xe rembiapo porã vyteri va'erã. Upéixa xe ndaikwaái xe renonderã.

²³⁻²⁴ Ajeupise aha-vy amoirû hagwã Cristo-pe. Iporãve-ma voi arã xe-vy. Ha xe apytave ramo katu ko yvy-py, iporãve arã peẽ-my. Pene remikotevõ voi xe-rehe. Kiva'e xe rembiaporã po ajapo-ta, ndaikwaáiry. Ndaikwaavéiry xe renonderã.

²⁵ Ha peẽ katu peikotevõ vyteri xe-rehe. Pene remikotevõ xe-rehe aikwaa-gwi xe apytave-ta ko yvy-py ha-rehe ajerovia. Pene ndive apyta va'erã perovia porãve rãve hagwã nhe'ẽ porã, perov'yave ave hagwã íxupe oho-vy.

²⁶ Pene ndive aiko jevy ramo, xe rerov'yagwasu ave va'erã peiko-vy. "Hesu Cristo hembiapo porã voi Paulo-rehe" peje va'erã xe-rehe imomba'egwasu-vy.

*Oĩ nhe'ẽ porã ombojeyse va'e. Penhe'ẽ joko íxugwi
(Hb 12.3-4; Tg 5.7-11)*

²⁷ Aikove-ta para'e, amano-ta para'e. Xe ndaikwaái. Mba'e ojehu ramo xe-vy, ani pemotõ tei Cristo-pe inhe'ẽ rendu e'ý-vy peiko-vy. Upéixa ramo, agwahé aha-vy ramo pende ha-py para'e, pene rerakwã ahendu rei ramo para'e, ajerovia va'erã pende-rehe. Pene monghyjese va'e-pe napenheme'ẽ mo'ãi. Peteïxa pene mbaraete va'erã. Peteïxa pembojeyva'erã gwĩ nhe'ẽ porã rendu e'ýseha-pe gwive.

²⁸ Penhemonghyje e'ý reheve penhe'ẽ joko va'erã pende-rehe ija'e'ý va'e-pe. Ha'e kwéry pende rexo ramo pende py'agwapy reheve, pene mytu'e'ý e'ý reheve, "Ore, Nhandejáry remihundirã voi ra'e" he'i va'erã ójehe kwéry. "Peẽ Nhandejáry remiresenderã voi ra'e" he'i va'erã peẽ-my. Nhandejáry ha'e katu pene mbopu'aka va'erã.

29 Pende rexakwaa rei va'ekwe Nhandejáry pende poravo-vy. Pende poravo va'ekwe pejerovia-ma hagwā Cristo-rehe. Oipota ave Cristo-rehe happy pejererekoy asy peiko-vy.

30 Áy nhande kwéry peteīxa nhande-rehe ija'e'ý va'e-pe nhanhe'ẽ joko joko va'erā nhandéhegwi. Are xe rexa va'ekwe anhe'ẽ joko joko aĩ-vy ramo xejéhegwi xe-rehe ija'e'ý va'e-pe. Upéixa xe anhe'ẽ joko joto aiko-vy. Áy katu pehendu-ma ra'e xe rerakwā.*

2

Cristo-ramima peiko katu

(Jo 13.12-17; 2 Co 8.9; Ef 1.20-22; 4.1-3)

1 Peteīxa pemoirū-magwi Cristo-pe, hemimombaraete voi peē. Pende rayhu-gwi, hemimbopy'agwapy voi peē. Pende py'a-py kwéry oiko-gwi Nhe'ẽ Marangatu tee va'e, peē kwéry ojoe'yi. Pejoporiahuverekoy rei katu. Pende py'a porā rei katu ojóupe peiko-vy.

2 Upéa-gwi peteī akā-rami tapeiko katu onhondive. Peteīxa tapejohayhu peiko-vy. Peteīxa tapeipyhy pende raperā. Onho'arandu-rami meme tapene arandu. Upéixa ramo xe mbovy'agwasu va'erā.

3 Ani pende seve rei-gwi pene rembiapo teī peiko-vy. Ani penhembotuvixaseve rei teī peiko-vy. Penhemboete ukase-vy rei ani peiko. Penhembohekomirīve ae katu peiko-vy. Ani penhembotuvixave pende rapixa-gwi. "Xéhegwi heko porāve" peje ae pende rapixa kwéry-rehe imboete-vy.

4 Ani pendéjehe anho rei peiko meme teī. Pende rapixa-rehe ave peiko. Penē mandu'a meme hese.

5 Ójeho opena e'ý va'e-rami oiko Cristo. Ha'e-ramima peiko katu.

6 Ne'írā oiko vyteri jave ko yvy, Cristo oiko-ma voi araka'e. Nhandejáry-ramima oiko araka'e. Nhandejáry voi ha'e araka'e. Upéixa oiko ramo jepe, nahakate'yi gweko-rehe Nhandejáry reko-rami e'ý ou hagwā ko yvy-py oiko araka'e.

7 Nhande resaka va'erā ohejapa rei va'ekwe ou-vy. Nandi ete ou va'ekwe. Oma'etirō ohejapa va'e-rami, ohejapa rei va'ekwe ou-vy. Imboetepyrā-rami e'ý ou va'ekwe. Tembigwái-rami rei ou va'ekwe. Nhande-rami ojehexa uka ou-vy. Nhandejáry reko-rami oiko rire nhande rete poru ou-vy.*

8 Onhembohekogwypyve ou-vy. Nhandejáry nhe'ẽ renduha voi. Ndojehako rayhúi voi ojejuka uka hagwā, kurusugwasu-rehe omano hagwā.

9 Upéa-gwi Nhandejáry ombotuvixa jevy va'ekwe íxupe. Ogwerojeupi jevy íxupe heraha-vy yváy-py. Ndaipóri onhembotuvixave va'e íxugwi. Ndaipóri tuvixave va'e íxugwi. Ha'e anho mante tuvixave va'e. Ombotuvixa voi íxupe héry. Ndaipóri imbaraeleteva va'e héry-gwi. Ha'e anho mante héry tuvixave va'e oiko.*

10 Hesu réry-py oipota enterove va'e onhesū íxupe gwetypy'ã-rehe. Oipota onhesū íxupe yváy pygwa gwive, yvypór ywive, yvy pypia anháy gwive ave. Entéro yvygwy-py oí va'e gwive ave héry omboete-vy onhesū va'erā.

11 Oipota entérove omombe'u atýra-py Hesu Cristo Nhandejáry voiha, Nhandejáry Nhande Ru-pe omomba'egwasu-vy.*

Jasytata nhande-vy ohesape vérami peiko va'erā

12-13 Upéa-gwi xe rembiayhu va'e, pehendu katu xe nhe'ẽ. Pene ndive xe aime ramo, pehendu meme va'ekwe xe nhe'ẽ. Xe nhe'ẽ rendu hagwe-rami áy peve gwarā aipota voi xe nhe'ẽ pehendu, pene ndive naiméi-ma ramo. Pende

* **1:30** At 16.19-40 * **2:7** Hb 2.17 * **2:9** Hb 2.9 * **2:11** Is 45.23

py'a-py omoñ Nhandejáry pene mokyre'ýharã pejapo hagwã gwemimbota peiko-vy. Upéa-gwi, penhangareko porã katu pendéjehe, pejererekoo poxy e'ý hagwã-rami peiko-vy. Ndojapo vaiséi-gwi ikyhyje va'e-rami peiko katu. Pene resendeha remimbota pene kyre'ý voi pejapo-vy peheko arupity hagwã íxupe.

¹⁴ **Pene rembiaporã pejapo katu. Pejohu vai e'ý reheve, penhonhe'ẽ mbojevy e'ý reheve pejapo katu.**

¹⁵ Aipota pende reko jejavy e'ý reheve, aipota pende reko potí, Nhandejáry ra'y-rami peiko hagwã pejejavy e'ý-vy. Áygwa tape porã-gwi ojere va'e, hekoha vai voi. Ipa'ü-gwi ohesape va'e-rami peiko-ma va'erã. Jasytata nhande-vy ohesape va'e vérami peiko va'erã pehexa uka hagwã haperã íxupe kwéry.*

¹⁶ Nhane moingove va'e nhe'ẽ porã-py pemo'arandu va'erã íxupe. Upéa pejapo ramo, Hesu Cristo ou jevytaha áry-py, naxe motíry va'erã peẽ kwéry. Avy'a ae va'erã pende-rehe kwéry. "Ogwerovia tee-ma voi" ha'e va'erã pende-rehe apomboete-vy. "Paulo nomosarambi reíry inhe'ẽ mombe'u-vy omokyre'ý-vy. Nahembiaapo porã reíry voi" he'i va'erã xe-rehe.

¹⁷ Xe juka-tama para'e. Amano ramo pende-rehe ha-py, Nhandejáry xe rerovy'a va'erã. Ha peẽ katu pejerovia tee Nhandejáry-rehe peiko-vy. Pejerovia ramo, penheme'ẽ tee kuri íxupe. Penheme'ẽ-gwi íxupe, pende rerovy'a. Áy nhande kwéry nhanheme'ẽ-gwi íxupe, nhande rerovy'a ave va'erã Nhandejáry.

¹⁸ Ajejuka-ta va'e-rami aĩ ramo jepe, avy'a joty xe. Nhanhombovy'a joty katu. Upéixa ramo aipota pevy'a xe-rehe. Nhanhombohory katu ave.

Timóteo Epafroditu ndive rehewa nhe'ẽ

¹⁹ Ko'ẽ ramo, ko'ẽ mbue ramo, amondose pende ha-py Timóteo-pe. Oipota ramo oho Nhandejáry Hesu, amondo va'erã íxupe. Ha upé rire katu ou jevy ramo pende ha-gwi pene mombe'u-vy, xe mbovy'a arã.

²⁰ Ha'e pende-rehe opena tee va'e voi. Mba'éixa peiko ojapura pende-rehe. Xe ndive ndaipóri ha'eixagwa.

²¹ Outro kwéry ójehe anho mante opena oiko-vy. Hesu-rehe nopenái oiko-vy.

²² Ha Timóteo katu ombo'apo oiko-vy xe ndive. Gwu ndive ombo'apo ta'ýry va'e-rami, oiko ombo'apo-vy xe ndive. Peteíxa oromba'apo nhe'ẽ porã oromosarambi-vy. "Hekoha porã nipo ra'e" he'i hese. Enterove ohexa kwaa hekoha-rehe.

²³ Upéa-rehe xe-vy ojehu va'erã aikwaa-ma ramo, amondose Timóteo.

²⁴ Nhandejáry-rehe ajerovia pende ha-py aha jevy hagwã. Ajerovia hese xe are e'ý hagwã preso apyta ha-gwi xe renohẽ hagwã pya'e.

²⁵ Ha Epafroditu katu xe reko irũ jepe, amondo jevy-ta joty pende ha-py. Ogwahẽ-ma oho jevyha áry. Ha'e nhande re'ýi, xe ndive ombo'apo va'e, xe ndive onhe'ẽ joko joko va'e ore-rehe ija'e'ý va'e-pe. Pene remimboukwe ave. Xe remikotevẽ xe-vy ome'ẽ hagwã pembou íxupe va'ekwe.

²⁶ Pende kwéry-pe pende rexo nga'u oiko-vy. Hasy ete va'ekwe Epafroditu. Herakwã pehendu ramo, pejepy'apy-ma ra'e hese. Upéi pevy'are'ý-gwi ha'e ave pende reko-rami ndovy'avéima.

²⁷ Hasy ete va'ekwe voi. Omano hagwã-rami oĩ va'ekwe. Ha Nhandejáry katu oiporahuvereko-ma va'ekwe íxupe imbogwera-vy. Xe poriahuvereko-ma ave. Heta oĩ xe mbovy'are'ý va'e. Omano ramo ra'e, xe mbovy'are'ýve arã voi ra'e.

* ^{2:15 Dt 32:5}

²⁸ Upéa-rehe xe kyre'ŷ amondo hagwā íxupe. Pehexa jevy ramo íxupe, pene mbovy'a jevy-ma va'erā. Pene mbovy'a jevy ramo, xe ahasa asy ramo jepe, avy'ave va'erā. Pene mbovy'aha-rami, xe mbovy'a ave va'erā.

²⁹ Ha'e Nhandejáry irū-gwi, nhande ojoe'ŷi voi. Upéa-gwi perohory katu íxupe pemogwahē-vy. Ha'eixagwa gwive pemboete.

³⁰ Ha'e nahakate'ŷiry gwekove-rehe. Haimete ojejuka Cristo-pe om̄ba'apo-gwi xe pytygwō-vy. Napeimēi ramo, ndikatúiry xe pytygwō peē. Ha'e ae katu pende rekoria xe pytygwō oiko-vy xe ndive.

3

Cristo reko aikwaa porāseve-gwi, xe rembiereko-rehe napenavéi-ma

¹ Ko'ângā ojoapykwéri ha'e jevy-ta peē-my, xe re'ŷi kwéry. Penhombovy'a katu. Tapene mbovy'a katu Nhandejáry. Ñy ndahasýi xe-vy amoī jevy hagwā kwatia-rehe amoī va'ekwe-rami. Upéa nhe'ē-rehe pene mandu'a meme ramo, ndapevái arā tape porā-gwi.

² Xáke oĩ oporohekombō'e vai va'e, jagwa ipoxy va'e reko-rupi oiko va'e, gwemimbo'e va'e-pe oipirekytī ukase va'e. Nohendu kwaái Nhandejáry nhe'ē hikwái. Xáke íxugwi kwéry.

³ Ha nhande kwéry ae katu Hesu-rehe jajerovia va'e. Yma gware onhepirekytī oiko-vy Nhandejáry re'ŷi ramo oiko hagwā. Ha ãy katu nanhanhepirekytīvēi-ma he'ŷi tee ramo jaiko hagwā nhande. Nhande py'a-py oiko-gwi Nhe'ē Marangatu tee va'e ae nhamboete tee Nhandejáry jaiko-vy. Nhane resende hagwā mo'ā, nhane rembiapo porā rei-rehe ndajajeroviavéi-ma. Hesu Cristo-rehe anho mante jajerovia jaiko-vy. Nhande he'ŷi tee voi. Yma onhepirekytī hagwe-rami nhande rerekō ãy.

⁴ Are-ma ajerovia-ma mo'ā va'ekwe xe reko porā mo'ā-rehe. Ñy oĩ ramo gweko porā-rehe anho ojerovia mo'ā va'e, ndaha'ēi arā xe rekockwe-rami voi oiko. Xe rekockwe iporāve va'ekwe ha'e kwéry heko-gwi.

⁵ Xe rekockwe a-rami: Ohasa rire peteī semana xe aiko hagwe áry rire, xe pirekytī judeu reko-rupi xe rerekō-vy. Israel amyrī remiarirō joapyri pyri va'e xe. Xe ramói jete amyrī Benjamim. Xe ru xe sy ndive ojoehegwa hebreu va'e, Nhandejáry rembiporavokwe voi. Upéa-gwi hebreu tee va'e xe. Judeu kwéry rekoha gwive ajapopa va'ekwe xe. Gwī fariseu kwéry ohendu porāve va'e pe tekoha outro judeu kwéry-gwi. Xe ae katu fariseu kwéry va'e voi va'ekwe. Judeu rekoha ojapose nga'u fariseu kwéry.

⁶ Ha xe ae katu ajaposeve seve va'ekwe. Hesu reroviahā onhomboaty atyha-rupi ndaiptái ova judeu rekoha-gwi. Upéa-gwi xe areko asy voi va'ekwe aiko-vy Hesu reroviahā kwéry-pe. "Nhandejáry remimbota ajapo" ha'e mo'ā xejéupe va'ekwe. Judeu rekoha-rupima aiko va'ekwe. "Paulo ojapo ku'a ku'a Moisés amyrī remimombe'ukwe" nde'íry xe-rehe va'ekwe. Imandu'a porā va'ekwe ae xe-rehe judeu kwéry.

⁷ Upe xe rekockwe fariseu rembierovy'a va'ekwe-gwi, apoi-ma upe tekohagwi. "Ndvalevēi-ma" ha'e hese, Cristo rekoha aikwaa porā-magwi. Ambotuvixave Cristo reko kwaa ukaha-pe.

⁸ Upéa-gwi Cristo-rehe ha-py mba'eve ete-rehe napenáí. Cristo xe Járy reko aikwaa porāseve seve íxupe amoirū-vy. Cristo-rehe ha-py opa xe rembiereko gwive ahejapa-ma voi. Yty nhamombo va'ekwe-rami rei areko íxupe, Cristo reko irū-rupi aiko porāve hagwā.

⁹ Peteīxa amoirūse íxupe. Ndaipotái he'i xe-rehe "Paulo ojapopa Moisés amyrī remimombe'ukwe. Upéa-gwi heko-rehe rei heko jejavy e'ŷ va'e mo'ā" ndaiptái he'i xe-rehe. Aipota ae he'i xe-rehe, "Cristo-rehe ojerovia-magwi

ae katu, onhemopotī-ma Paulo” he'i xe-rehe. “Ipy'a potī-ma” aipota Nhandejáry he'i xe-rehe.

¹⁰ Cristo reko aikwaa porāseve seve. Ha'e onhembotekove jevy va'ekwe ipu'akaha reheve. Peteīxa ha'e-rami aikose ave. Aipota xe mbopu'aka ave. Ha'e ohasa asy va'ekwe. Ha'e oiko asy hagwe-rami aikose ave. Ha'e omano va'ekwe. Peteīxa ha'e heko-rupi tee-ma aiko hagwā, omano va'ekwe-rami, ijukapyrā-rami ave xe aikose.

¹¹ Íxupe peteīxa amoirū teese voi aiko-vy, amano rire anhemoingove jevy hagwā ave. Upéixa nhane mbotekove jevyha áry-py agwahē ete-ma arā aha-vy.

*Oripara hatā meme va'e-rami aiko
(1 Co 15.46-49; 2 Co 5.1-5; Jd 12-13)*

¹² Cristo reko-rupi tee-ma aiko, nda'éiry xéjehe. Ne'írā vyteri aheko arupity íxupe. Ogwahēse ha-py pya'eve oripara va'e-rami, aiko joty. Ne'írā joty agwahē aha-vy upe-py. Yma va'ekwe xe johu Hesu Cristo. Xe mbopu'aka uka voi va'ekwe, aheko arupity hagwā íxupe.

¹³ Xe re'ýi kwéry, aheko arupity-ma, nda'éiry joty xéjehe. Oripara hatā va'e ikyre'ý eterei ogwahē hagwā ogwahēse ha-py. Upéixa ete xe ave xe kyré'ý agwahē hagwā-rehe. Peteīxa xe renonde-py amoī xe raperā. Xe rapykwere-rehe ndajeapavéi-ma, napenavéi-ma. Xe resarái-ma íxugwi. Ha xe agwahē hagwā-rehe ae xe resa amoī. Pya'e agwahēse-vy ajapura voi aha-vy.

¹⁴ Upéixa ndopi ndopiáiry va'e-rami, ogwahēse ha-py oripara oho-vy va'e-rami aiko. Ogwahē ranhe hagwā oho pya'ese va'e-rami aiko. Aipota xe-vy gwarā ome'ë voi xe-vy yváy-py aiko hagwā. Upe-py aha hagwā xe renói va'ekwe Nhandejáry. Amoirū hagwā Hesu Cristo-pe xe renói va'ekwe.

¹⁵ Upéixa ha'e-ta peē-my iporā katu nhambojoja nhane nhe'ë nhande nhane arandu va'e. Oĩ ramo “Ndaha'ëi upéixa” peje va'e, oikwaa uka porā va'erā peē-my Nhandejáry.

¹⁶ Yma gwive ãy peve peteī nhande raperā jaipyhy-ma. Peteīxa joty jaha upe va'e-rupi. Nhane arandu-ma. Upe nhane arandu-py joty jaiko.

¹⁷ Xe re'ýi kwéry, xe reko ra'ä katu pende joja-vy. Ore oroikwaa uka va'ekwe peē-my peiko porā hagwā. Gwī ore reko-rupi oiko va'e katu pemanha porā joty hese peheko ra'ä ave hagwā ave íxupe.

¹⁸ Xe ha'e ha'e hagwe-rami ha'e jevy-ta peē-my ajahe'o-vy. Oĩ pene pa'ü-my ojapose va'e rei ojapo va'e. Cristo kurusugwasu-rehe omano va'ekwe remimbota ojapo e'ý va'e, ha'e jevy-ta hekoha kwéry-rehe amboasy-vy.

¹⁹ Mombyry Nhandejáry-gwi onhemondo va'erā. Gwyvyatā hagwā-rehe anho rei oiko va'e-rami, ojéupe gwarā rei oipota va'e-rehe anho rei oiko va'e. Notívéi-ma oiko-vy. “Nhande rekoha porā va'e nhande” he'i mo'ã joty ójehe onhemombe'u-vy mo'ã ko yvy pygwa anho rei-rehe oiko va'e.

²⁰ Ha nhande Hesu rape-rupi jaiko va'e kwéry-pe oĩ va'erā yváy-py nhande rekoha teerā. Upe-gwi nhaha'arō nhane resende teeharā ou va'erā. Nhane kyré'ý reheve nhaha'arō jaiko-vy ou va'erā Nhandejáry Hesu Cristo.

²¹ Ha'e entéro mba'e-rehe ipu'akave voi. Ha'e gwete hesakāha-rami ave ohekoviariō arā nhande rete iporahu va'e. Ha'e ipu'akaha-rupi voi ohekoviariō arā nhande rete.

4

¹ Upéa-rehe, xe re'ýi kwéry, peipyhy katu Nhandejáry rape peva e'ý reheve. Peē xe rembiayhu va'e voi. Xe rembiexha nga'u voi peē. Xe mbovy'a

va'e. Pejere e'ŷ reheve pegwahē-ma ramo peho-vy Nhandejáry renda-py apogwerovy'a va'erā. Pende-rehe avy'a tee va'erā voi.

*Penhombovy'a katu
(Cl 3.15)*

² Ây mokōi kunha-pe anhemonhe'ẽ-ta. Anhemonhe'ẽ-ta Evódia-pe. Síntique-pe anhemonhe'ẽ-ta ave. Peē ojoe'ŷi voi Nhandejáry-pe pemoirū-gwi. Penhombojoja katu ojóehe peiko-vy.

³ Ây ha'e-ta xe irū-pe. Enhemonhe'ẽ katu pe mokōi kunha-pe peteĩxa oiko hagwā onhondive. Xe ndive oiko ramo, xe pytygwō va'ekwe voi upe mokōi kunha. Xe ndive onhe'ẽ joko joko gwī nhe'ẽ porā ohenduse e'ŷ va'e-pe. Xe pytygwō ave Clemente xe irū gwive ave. Héry kwéry oĩ ra'e yváy pygwa kwatia-rehe. Tekove ijapyre'ŷ reheve oiko hagwā omoĩ ra'e Nhandejáry.

⁴ Peē Nhandejáry irū-gwi, penhombovy'a meme katu peiko-vy. Ha'e jevy-ta peẽ-my, Penhombovy'a katu.

⁵ Pejogwereko porā katu pende poxy e'ŷ reheve ojóupe. Tojekwaa porā katu pende py'a porāha opa-rupi oho-vy. Ndahi'are mo'ãi Nhandejáry ogwahē jevy hagwā óra.

⁶ Ani pejapura teĩ mba'eve-rehe. Opamba'e-rehe ae katu pejapo japo oração. Pejerure katu Nhandejáry-pe pene remikotevē-rehe. Peporandu ramo íxupe, petima porā meme íxupe.

⁷ Nhane mbopy'agwapy va'erā Nhandejáry. Peẽ-my ojehu va'e-rehe peikwaa e'ŷ ramo jepe, pene mbopy'agwapy joty arā Nhandejáry. Peteĩxa pemoirū-gwi íxupe, pendéhegwi ivai va'e ojoko va'e-rami, pende py'a ombogwapy va'erā peẽ-my. Pene akā omombaraete ave va'erā.

⁸ Ojoapykwéri ha'e jevy-ta peẽ-my, xe re'ŷi kwéry. Pene mandu'a meme katu iporā porā va'e-rehe. Mamo iporā porā va'e petopa ha-rupi, mamo imandu'a porā hese va'e petopa ha-rupi, perovy'a joty. Oĩ anhetegwa va'e, oĩ nhamoporā va'e, oĩ ojapo joavy e'ŷ va'e, oĩ ipotĩ va'e, oĩ jajohu porā va'e, oĩ nhamboete va'e. Upeixagwa-rehe pene mandu'a meme katu perovy'a ete hagwā.

⁹ Xe apombo'e hagwe-rami peiko. Pemboypy hagwe-rami ave pejapo katu. Peẽ-my ha'e hagwe-rami pejapo. Xe reko rexha hagwe-rami, peiko katu. Upéixa ramo pene ndive oiko va'erā Nhandejáry nhane mbopy'agwapy va'ety.

Nhandejáry xe mombaraete ramo, mba'eve ndaipu'akáiry xe-rehe

¹⁰ Are rire pene mandu'a jevy-ma xe-rehe xe remikotevē mbou-vy. Upéagwi avy'a eterei Nhandejáry xe mbovy'a-gwi. Arov'y'a pene remimbou-rehe. Are-ma voi pene mandu'a rei va'ekwe xe-rehe peiko-vy. Perurukase mo'ã xe-vy xe remikotevē ha ndikatúiry peruruka va'ekwe xe-vy.

¹¹ Pene rembieruruka-rehe naikotevē etéiry. Heta xe areko ramo, ndahetáí xe areko ramo, aipokwaa-ma xe rekoha xéjehe anho ajeko-vy.

¹² Xe remikotevē ndarekói ramo, xe poriahu ramo, aipokwaa-ma xe rekoha. Heta xe areko ramo, aipokwaa joty ave. Mba'e ojehu ramo jepe xe-vy, avy'a joty xe. Akaru porā ramo para'e, xe vare'a ramo para'e, avy'a joty xe. Heta xe areko ramo para'e, xe poriahu ramo para'e, arov'y'a vy'a joty xe rekoha. Aipokwaa-ma voi xe reko.

¹³ Nhandejáry xe mombaraete ramo, opamba'e-rehe xe pu'aka. Mba'eve-pe nanheme'ëi. Mba'eve ndaipu'akáiry xe-rehe.

¹⁴ Mba'eve-rehe naikotevëi ramo jepe, iporā joty xe pytygwō. Xe ajererekoyasy jave, iporā xe mbovy'a.

¹⁵ Are-ma amombe'u mbe'u va'ekwe nhe'ẽ porã aiko-vy Macedônia yvy-rupi va'ekwe. Upéi ahasave hagwã aha-vy asẽ ramo upe va'e yvy-gwi, naxe pytygwõiry va'ekwe avave. Peẽ anho mante xe pytygwõ xe remikotevẽ-rehe. Peẽ-my ame'ẽ va'ekwe-rami jevy xe pytygwõ va'ekwe.

¹⁶ Upéi Tessalônica tetã-my mombyry pendéhegwi aime ramo jepe, peruruka va'ekwe xe-vy xe remikotevẽ. Ha upe rire katu peruruka jevy va'ekwe.

¹⁷ Ome'ẽ ojéupe oipota eterei va'e-rami ndaikóiry. Aipota ae hetave tave peẽ-my gwarã Nhandejáry remihekoviatarõrã.

¹⁸ Oreveha-rehe opagapa rire ome'ẽve va'e-rami, peme'ẽmba voi xe-vy. Epafroditu ogweru kuri xe-vy pene remime'ẽgwe xe-vy pene rembieruruka. Áy katu xe remikotevẽ gwive arekopa-ma. Nhandejáry-pe omohyakwã porã-vy ome'ẽ va'e-rami, hemimbota íxupe ome'ẽ va'e-rami, ogwerovy'a Nhandejáry xe-vy pene remime'ẽgwe.*

¹⁹ Ha Nhandejáry, xe Járy katu ohekoviatarõ va'erã ime'ẽ rei-vy peẽ-my entéro pene remikotevẽ gwive. Cristo Hesu-pe pemoirũ-gwi, gweko katurã ndive ome'ẽ va'erã. Ndaijapy reíry Nhandejáry remime'ẽ.

²⁰ Tomomba'egwasu meme katu Nhandejáry Nhande Ru-pe opa e'ŷ reheve.

Paulo omundo omandu'aha

²¹ Peteĩ teĩ Nhandejáry re'ýi gwive Hesu Cristo reko irũ va'e-pe emombe'u mbe'u xe mandu'aha. Nhande re'ýi, xe ndive oĩ va'e omundo uka-ta peẽ-my omandu'aha ave.

²² Entéro Nhandejáry re'ýi gwive a-py oiko va'e omundo uka-ta ave omandu'aha. Ha mburuvixagwasu César róga pygwa katu ikyre'ŷve voi omandu'aha omundo uka hagwã.

²³ Tapende rexakwaa rei katu Nhandejáry Hesu Cristo pende py'apy-py oĩ va'erã-rehe.

* ^{4:18} 2 Co 11.9

Paulo remimombe'ukwe Colossos tetā mygwa pegwarā epístola de Paulo aos colossenses

Paulo omondo Colossos tetā mygwa-pe onhe'ẽ kwatia-rehe

¹ Xe Paulo Hesu Cristo remimondo va'e. Nhandejáry remimbota-rupi xe pota gwemimondorā. Xe, nhande ryvy Timóteo ndive, oromondo-ta kwatia-rehe ore nhe'ẽ peẽ-my gwarā.

² Peẽ Colossos tetā mygwa va'e, Nhandejáry javegwa va'e voi peẽ. Pejerovia-ma peiko-vy ra'e Hesu Cristo-rehe. Pejererova tee-ma ra'e hese he'yirā. Nhandejáry Nhande Ru tee va'e voi. Tapende rovasáke kuri pende rexakwaa rei-vy. Tapene mbopy'agwapýke kuri.

Paulo Timóteo ndive ojapo oração Colossos tetā mygwa-rehe

(Ef 1.15-23; 3.14-19; 1 Ts 5.23-24)

³ Orojapo ramo oração pende-rehe, ore mandu'a ramo pende-rehe, orovy'a eterei. Pende-rehe voi orotima porā porā Nhandejáry-pe. Nhandejáry Hesu Cristo Ru-pe orotima pende-rehe.

⁴ “Ojerovia tee-ma Hesu Cristo-rehe” he'i pene mombe'u-vy. “Nhandejáry re'yi kwéry gwive ojohayhu hikwái” he'i pene mombe'u-vy. Upéa-gwi orotima porā Nhandejáry-pe pende-rehe.

⁵ Are-ma omombe'u va'ekwe peẽ-my anhetegwa nhe'ẽ, Hesu Cristo re-hegwa nhe'ẽ. Omombe'u-ma ramo peẽ-my, perovia-ma inhe'ẽ. Perovia-gwi inhe'ẽ, peha'arõ tee Hesu ou jevy ramo nhande reraha hagwā. Yváy-py pene renonderā peha'arõ. Upe va'e ra'arõ-vy, pejerovia tee Hesu-rehe pejohayhu ave.

⁶ Inhe'ẽ porā oho opa-rupi osarambi. Mamo jaha ha-py nhahendu nhe'ẽ porā. Hetave tave oĩ hembiapo porā va'e. Hetave tave oĩ ogwerovia va'e. Upéixa ramo ogwenogwahē-ma ramo heraha-vy peẽ-my nhe'ẽ porā, pehendu-ma ave, pene rembiapo porā-ma ave. He'i va'ekwe imombe'u-vy peẽ-my: “Nhandejáry pende rovasa-ma kuri oiko-vy. Pende rexakwaa rei-ma ave” he'i imombe'u-vy peẽ-my Hesu rehewa nhe'ẽ. Inhe'ẽ pehendu ramo: “Anhetegwa tee nipo ra'e. Jaikwaapa-ma nipo inhe'ẽ ra'e” peje araka'e.

⁷ Ha Epafras katu pene mbo'eháry voi. Ha'e ore irū. Nhane rembiayhu ave. Cristo rembigwái ha'e. Cristo nhe'ẽ omombe'u va'e peẽ-my. Ojavy e'ŷ va'e mombe'uhā peẽ-my. Ore rekoviá oho va'ety pende ha-py.

⁸ Ha upéi katu upe ore irū ogwahē jevy-ma ou-vy. He'i omombe'u-vy: “Upe pygwa ojohayhupa hikwái. Ombovy'apa íxupe kwéry Nhandejáry Nhe'ẽ Marangatu tee va'e-rupi ojohayhupa hagwā” he'i imombe'u-vy ore-vy pende-rehe kwéry.

⁹ Orohendu-ma ramo pejerovia porā teeha, orovy'a-ma. Orojapo-ma ave oração pende-rehe. Ndore resaráiry voi orojapo meme hagwā oração. Orojerure meme Nhandejáry-pe peikwaa porāve rāve hagwā entéro hemimbota gwive. Ome'ẽ hagwā peẽ-my pene arandurā meme orojerure íxupe ave. Ha Nhe'ẽ Marangatu tee va'e oikwaa uka va'e peẽ-my hemimbota va'e gwive.

¹⁰ Upéixa ramo peiko va'erā Nhandejáry remimbota-rupi. Heko-rupi peiko va'erā ave ani hagwā pemotí íxupe. Pende reko porā va'erā, opaixagwa pene rembiapo porā porā meme va'erā. Peẽ peikwaa porāve rāve va'erā peho-vy Nhandejáry-pe.

¹¹ Nhandejáry ko onhemomba'egwasu opave'ŷ va'e. Imbaraete va'e voi. Tapene mombaraeteve teve. Upéixa ramo, peiko asy ramo jepe, akói joty pevy'a va'erã.

¹² Nhandejáry Nhande Ru pende poravo va'ekwe ome'ẽ hagwã peẽ-my onhongatu va'ekwe. Arakatu-py oiko va'e pegwarã, Nhandejáry javegwa va'e pegwarã ave, ome'ẽ va'erã peẽ-my ave. Upéa-rehe petima porã katu Nhandejáry-pe pende py'a gwive.

¹³ Yma pytū-my rei jaiko va'ekwe. Ha Nhandejáry katu nhane resende va'ekwe anháy ruvixa Satanás po-gwi. Nhane renogwahẽ nhande rerahavy va'ekwe nhamoirũ hagwã ta'ýry, hembiayhu va'e, Hesu Cristo-pe, nhane ruvixarã.

¹⁴ Hesu Cristo katu onheme'ẽ va'ekwe nhande rekove-rehe, jaiko rei hagwã japaga e'ŷ reheve. Ha'e omboyke va'e nhandéhegwi nhane rembiapo vaikwe.

*Nhandejáry Hesu Cristo ha'eixagwa ndaipóri
(Jo 1.1-3; Ef 2.11-22; Hb 1.2-14)*

¹⁵ Hesu Cristo ojehexa uka ramo nhande-vy ohexa uka nhande-vy mba'eixagwa po Nhandejáry reko. Nhandejáry ndaha'ei jahexa va'e. Hexapyre'ŷ va'e voi ha'e. Ha Hesu Cristo ohexa uka nhande-vy mba'eixagwa po heko. Ha'e Nhandejáry ra'y voi. Ta'ýry tee voi. Ndoikói vyteri ramo mba'eve va'ekwe oiko-ma va'ekwe ha'e Túvy ndive. Ha'e entéro onhemoingo va'ekwe gwive va'e Járy.

¹⁶ Yma araka'e ojapo uka araka'e íxupe gwa'ýry-pe Nhandejáry. Nhandejáry nhe'ẽ-py voi opamba'e ojapo araka'e. Ojapo áry rupigwa gwive, yváy pygwa gwive ave, yvy arigwa gwive ave. Inhe'ẽ-py opamba'e ojapo uka gwa'ýry-pe. Ojapo araka'e jahexa va'erã gwive. Jahexa e'ŷ va'erã gwive ojapo ave araka'e. Ojapo araka'e Gwu rembigwairã yváy pygwa, jahexa e'ŷ va'e. Ojapo ave Gwu rembigwairã gwĩ anháy reko-rupi ho'a va'erã. Mburuvixarã ojapo. Ojapo ipu'aka va'erã. Ojapo omanda va'erã. Gwu nhe'ẽ-py hembiapo va'erã ojapo. Entéro va'e Gwu rembigwairã ha'e ojapo. Opaixagwa ojapo uka araka'e íxupe Nhandejáry gwa'ýry pegwarã. Upéa-gwi entéro onhemoingove va'ekwe gwive va'e Járy Hesu.

¹⁷ Yma araka'e ndoikói vyteri ramo mba'eve, oiko Cristo. Ha'e anho vyte oiko araka'e Nhandejáry ndive. Mba'eve ndoikói ha'e e'ŷ reheve. Ndo'a reíry entéro mba'e. Oheko kwaa va'e-rupi meme ae oiko enterovéa.

¹⁸ Ha'e jajerovia hese va'e gwive Járy. Nhane akã katu nhande rete mo'aranduha voi. Nhane akã-rami oiko Cristo nhande-vy. Upéixa voi ha'e nhane mo'arandu entéro jajerovia hese va'e-pe gwive. Ha'e nhane moingove va'ety voi, nhane arandurã ome'ẽ nhande-vy. Omano rire-ma ha'e onhemoingove jevy ranhe va'ekwe onhypyrũ hagwã nhane moingove jevyha enterove-pe. Onhemoingove jevy-gwi ha'e opyta opaixagwa jaryrã.

¹⁹ Nhandejáry oipota araka'e Hesu reko gweko-rupi voíte. Heko ambue va'e ndoipotái. Oipota tuvixa mba'e ha'e-rami. Upéa-gwi ha'e jajerovia hese va'e gwive Járy. Opaixagwa va'e Járy ha'e.

²⁰ Nhandejáry oipota ave omoatyrõ ijoja hagwã íxupe opamba'e. Ha'e nhande repy-vyma voi omnano. Ojejuka uka-gwi kurusugwasu-rehe, entéro mba'e omoatyrõmba va'ekwe Nhandejáry. Omoatyrõmba yvy arigwa gwive, áry rupigwa gwive ave, yváy pygwa gwive ave. Ijoja hagwã íxupe omoatyrõmba va'ekwe Nhandejáry.

²¹ Yma va'ekwe peiko va'ekwe mombyry Nhandejáry-gwi. Ndapejererovái hese. Pende py'a vai peẽ peiko va'e gwive va'ekwe. Pene rembiapo vai va'ekwe. Upéa-gwi napende a'ei Nhandejáry-rehe.

²² Ha ko'ánga katu napende a'éi ramo jepe hese, pende rekoha kwéry ogwerova ójehe. Pende rekove-rehe ta'ýry ojejuka uka-gwi, pene ndive jevy-ma oiko Nhandejáry. Ijavepa-ma peiko ãy. Ha'e omano va'ekwe pene renogwahē hagwā peiko hagwā Nhandejáry ndive, pende py'a marangatu potī reheve, pejejavý e'ý reheve. Pejere e'ý reheve íxugwi, pene renogwahē va'erā pende reraha-vy.

²³ Æy peiko katu pejere e'ý reheve Hesu rape-gwi. Ijekoha tee va'e ndo'ái. Upéixa ramo perovia porā meme katu ndape'ái hagwā. Perovia-ma ramo Hesu rehewa nhe'ẽ porā, Hesu rembieraharā peiko-ma va'erā peẽ. Ani pejererova ukave teñ upe va'e nhe'ẽ pehendu va'ekwe-gwi. Upe va'e nhe'ẽ porā opa-rupi omombe'u va'ekwe enterovéa pegwarā. Upe va'e nhe'ẽ mombe'uhā aiko-ma xe ave va'ekwe. Aiko-ma xe va'ekwe Hesu Cristo rehewa nhe'ẽ porā mombe'uhā.

*Paulo omombe'u oiko-vy entéró va'e-pe Cristo rehewa nhe'ẽ
(Ef 3:1-13)*

²⁴ Pende-rehe ha-py ahasa asy. Ahasa asy ramo jepe, avy'a joty. He'i kuri xe-vy Hesu Cristo: "Xe-rehe ha-py xe nhe'ẽ-rupi ereiko-gwi ne mbohasa asy-ta. Ereipytygwō-gwi xe reroviaha-pe gwive, ne mbohasa asy-ta. Nhande rete-rehe katu nhane rakate'ý. Upéixa voi xe rakate'ý ave xe reroviaha kwéry-rehe" he'i xe-vy Hesu. Upéixa ramo, ko'ánga ahasa asy jevy-ta pendéhegwi. Ne'írā ahasa asypa vyteri.

²⁵ Ha Nhandejáry xe moingo kuri hembigwái ramo heroviaha pytygwō hagwā. Ome'ẽ kuri xe-vy xe rembiaporā amombe'u hagwā inhe'ẽ peẽ-my, apopytygwō hagwā ave. He'i xe-vy amombe'u porā hagwā amombe'upa ete peve.

²⁶ He'i xe-vy amoherakwā hagwā inhe'ẽ. Ha ko va'e nhe'ẽ katu ni mix̄imi jepe nomombe'úiry va'ekwe avave-pe. Yma va'ekwe ãy peve nomombe'úiry. Ojéupe voi onhongatu gwembiaporā Nhandejáry. Ko'ãy katu oikwaa uka-ma gwe'ýi kwéry-pe ojapo va'erā.

²⁷ Yma araka'e Nhandejáry he'i ojéupe: "Æy anhongatu xe rembiaporā. Hi'áry ogwahē-ma ramo katu amombe'u-ta xe re'ýi kwéry-pe. Enterove va'e rehewa, judeu va'e, judeu e'ý va'e-pe gwive amombe'u-ta" he'i. "Iporā porā-ta voi xe remimombe'u. Ndaha'éi enterovéa pegwarā. Xe re'ýi kwéry pegwarā ae" he'i araka'e Nhandejáry. No'ã-rami Nhandejáry remimombe'u: "Cristo inhe'ẽ marangatu rehewe oiko-ta pende py'apy-py. Yma peẽ kwéry ndapeikói xe ndive va'ekwe. Ha ko'ánga katu peiko-ma xe ndive. Upéa-gwi Cristo onhembotuvixa mba'e teeħa áry-py pene mbotuvixa mba'e ave va'erā" he'i-ma peẽ-my Nhandejáry.

²⁸ Upéa-rehe oromombe'u oroiko-vy entéró va'e-pe Cristo rehewa nhe'ẽ. Oronhemonhe'ẽ peteñ teñ va'e-pe. Orombo'e íxupe ave. Nhandejáry arandu-rupi orombo'e. Cristo ipy'a-py ogwerekó va'e gwive, amba'apo hi'arandu porāve hagwā.

²⁹ Amba'apo eterei hese kwéry. Cristo xe mombaraete-gwi amba'apo voi hese kwéry.

2

¹ Ko'ãy amombe'use peẽ-my xe rembiapo hatāha. Peẽ-my gwarā ajapoha amombe'use. Laodicéia tetā mygwa pegwarā ajapoha, xe rexā e'ý va'e gwive pegwarā ajapoha ave amombe'use ave.

² Amba'apo hatā voi peẽ-my gwarā-rehe penhembopy'a mbaraete hagwā, pejohayhu hagwā pende joja hagwā ojóupe. Amba'apo hatā pende-rehe pene

arandu tee hagwā, "Hupigwa meme voi" peje hagwā Nhandejáry nhe'ẽ-rehe. Upéixa ramo peikwaa porāmba voi va'erā Nhandejáry remimombe'use peē-my. Hemimombe'u Cristo rehewa nhe'ẽ voi.

³ Ha Cristo katu ha'e anho mante oikwaa uka va'e nhande-vy. Nhandejáry arandu jaikwaa e'ŷ va'e gwive oikwaa uka va'e voi nhande-vy jaikwaa porāmba hagwā. Ha'e nhane mo'arandu Nhandejáry arandu porā porā ete-rupi jaikwaa porāmba hagwā.

⁴ Upe ramo ha'e-ta peē-my: Ani pene mbotavy rei teī Cristo arandu e'ŷ mombe'u-vy. Oĩ imandu'a porā va'e hemimombe'u-rehe. Ha nomombe'u porāi. Omombe'u ra'anga anga rei ae oiko-vy. Ani pene mbotavy rei teī, ha'e peē-my.

⁵ A-py xe aĩ ramo jepe, xe resa katu amondo meme joty pende ha-py. Xe mandu'a ramo mba'éixa pa peiko, xe avy'a. Peteīxa perovia porā Cristo-pe. Peteīxa ndapevái tape porā-gwi. Upe va'e-rehe xe mandu'a ramo, avy'a eterei voi.

*Pemoirū meme katu Cristo-pe
(Gl 4.8-20; Ef 2.1-10)*

⁶ Ha peē peje kuri Hesu Cristo-pe: "Nde ko xe ruvixa" peje kuri íxupe. Upéa-gwi pemoirū meme katu íxupe. Ani peheja teī.

⁷ Íjekokaha tee va'e ndo'ái va'e. Upéixa voi Cristo-pe perovia porā ramo, pende jekokaharā voi ha'e. Ndape'a rei reíry arā. Pende jekokaharā voi ha'e. Upéixa ramo pemoirū meme katu íxupe pene mombaraeteve teve hagwā peho-vy, perovia porāve rāve hagwā íxupe. Orombo'e hagwe-rami, perovia katu íxupe. Petima porā porā katu ave Nhandejáry-pe peiko-vy.

⁸ Xáke, oĩ ko pene mbotavyharā. Ani pene mbotavy teī. Cristo nhe'ẽ nomombe'úi va'e. Ha'e ae oarandu omombe'u arā. Omombe'u ra'anga anga rei va'erā peē-my. Oapuha rei-ma va'erā omombe'u peē-my. Teko rei nhe'ẽgwe omombe'u va'erā peē-my. Ko mundo járy Nhandejáry e'ŷ va'e kwéry nhe'ẽgwe rei omombe'u. Hekoha-rupi katu ani pejererova teī.

⁹ Ha Cristo katu heko Nhandejáry reko-rami. Ha'e ramigwa voi. Oheteporu ramo jepe, ha'e-rami joty oĩ. Ndaha'ei hekoha ambue va'e. Ha'e ramigwa joty voi.

¹⁰ Opaixagwa mburuvixa va'e-rehe gwive ipu'aka va'e. Gwī yváy pygwa va'e-rehe, gwī yvy arigwa va'e-rehe ave ipu'aka va'e voi ha'e. Omanda va'e gwive Járy ha'e. Enterove va'e ipo pygwa meme oĩ. Ha peē katu peiko-ma ramo hendive, pene moingo-ma voi gwekoha-rupi. Pene remikotevē gwive ome'ẽ-ma peē-my.

¹¹ Peē Nhandejáry javegwa voi. Yma va'ekwe judeu kwéry ha'e kwéry anho mante Nhandejáry re'yí. Cristo-pe pemoirū-gwi, peiko-ma Nhandejáry javegwa ramo. Ndapeikói ramo jepe judeu kwéry reko-rupi, peiko-ma Nhandejáry javegwa ramo. Yma va'ekwe pejapo peiko-vy pejapose va'e. Pene rembiapo porā-ta mo'ã va'ekwe. Pene rembiapo vai joty peiko-vy. Pejapose va'ekwe pejapo joty ra'e. Ha ko'ánga katu Cristo pene mombaraete-ma voi pene rembiapo porā meme hagwā.

¹² Cristo va'ekwe omano rire, hetekwe renda-py omoĩ hetekwe. Upe rire, oikove jevy. Ha peē penhemongarai uka kuri Hesu Cristo réry-py. Penhemongarai rire-ma peiko-ma peteīxa hendive. Áy katu peiko-ma Cristo ndive pemano va'ekwe vérami. Peikove jevy va'ekwe vérami peiko. Hesu omano rire va'ekwe, omoingove jevy íxupe Nhandejáry. Upe va'e nhe'ẽ pehendu ramo: "Imbaraete voi Nhandejáry" peje hese. Pejerovia-ma hese.*

* 2:12 Rm 6.3-4

13 Yma va'ekwe napeẽ-myi vérami va'ekwe onhe'ẽ. Heta pene rembiapo vai-gwi, napehendúiry voi va'ekwe. Nhandejáry he'i va'ekwe peikwaa e'ỹ va'ekwe. Napende jáyi va'ekwe peẽ. Ha ko'ánga katu pene moingove-ma Cristo ndive peteĩxa peiko hagwã hendive. Nhane rembiapo vai va'ekwe gwive Nhandejáry omboykepa-ma nhandéhegwí.

14 Yma va'ekwe Nhandejáry omoõ va'ekwe kwatia-rehe nhane rembiaporã. Upe va'e nhe'ẽ ndajajapói ramo va'ekwe jepe, nanhane moingo asýiry joty. Cristo omano-gwi pe kurusugwasu-rehe, nanhane moingo asy mo'ãvéima. Nhande reveha-rami omoõ kurusu-rehe. Kurusu-rehe omano jave, omboykepa voi nhandéhegwí nhande reveha. Nanhane mbopaga ukáiry.

15 Ha'e omano ramo kurusu-rehe, omosõ opaixagwa ko mundo járy kwéry, yváy pygwa, yvy arigwa ave yvy'ãgwypóry, jaigwypóry ave. Gwĩ omanda va'e-pe gwive omosẽmba. Hexapyrã-rupi voi ohexa uka enterovéape opu'akaveha-gwi nomandavéi gwĩ mburuvixa kwéry. Opyta otĩmba ete hikwái entero mburuvixa gwive yváy pygwa, yvy arigwa ave, yvy'ãgwypóry, jaigwypóry ave. Hekovía omanda mbaraeteve hese.

16 Upéa-gwi anive pehendu teĩ gwĩ peẽ-my he'i va'e: "Upe va'e hi'upy e'ỹ" he'i "Naiporãi pemboete e'ỹ arete. Naiporãi pemboete e'ỹ jasy ra'y áry ptytu'uhá áry ave" he'i peẽ-my. Upe va'e nhe'ẽ anive pehendu teĩ upe va'e nhe'ẽ.

17 Ha upe va'e nhe'ẽ gwive ndaha'ei Nhandejáry remimbota tee. Ndaha'ei ãy pegwarã. Upe va'e nhe'ẽ ranhe ogwahẽ nhande-vy. Ogwahẽ Cristo renonde rupigwa-rami. Imandu'aha ranhe ogwahẽ. Ha upe rire ae ogwahẽ ou-vy ha'e tee va'e ohexa uka hagwã nhande-vy anhetegwa va'e gwive. Upéa-gwi upe va'e nhe'ẽ ndaipokatuvéi-ma nhande-vy.

18 Ani pehendu teĩ peẽ-my he'i va'e: "Peẽ ko ndapeikói va'e tekoharupi. Iporãve ereiko xe rekoha-rupi" he'i mo'ã. "Xe py'amirĩ voi. Xe kyhyje Nhandejáry-gwi. Upéa-gwi nanhemopeteíry Nhandejáry-pe imboete-vy. Nhandejáry rembigwái kwéry-pe yváy pygwa va'e ae amboete ave" he'i mo'ã. Ani pehendu teĩ inhe'ẽ. Ixupéte ojehexa uka va'e omombe'u mbe'upa rei hikwái. Ikéra-py ohexa va'e omombe'u rei. Omombe'upa peẽ-my onhembotuvixa mba'ese-gwi mo'ã. Ha nonhembotuvixa mba'e teéiry. Ha'e ae oakã gwigwa omombe'u rei arã peẽ-my. Nhandejáry-pe oikwaa e'ỹ-gwi, Nhandejáry arandu katu nomombe'úi.

19 Upe va'e nomoirũ teevéi-ma Hesu Cristo-pe. Upéa-gwi ha'e ae oarandu omombe'u. Cristo gwigwa arandu katu nomombe'úi. Nhane akã katu nhande rete mo'arandu va'e. Nhande rete omongakwaa va'e ave. Upéixa voi Cristo nhane mo'arandu va'e nhande rerekoy. Nhande rete ojepota potapa ojóehe ombaraete hagwã. Upéixa ete voi Nhandejáry oipota nhande joja nhanhopytygwõ-vy nhane mbaraete hagwã.**

Pemoõ katu pende resa yváy pygwa-rehe (Gl 3.3-5)

20-21 Ha Hesu Cristo katu omano va'ekwe kurusu-rehe. Peteĩxa pemoirũ-gwi íxupe, peiko ãy pemanova'ekwe-rami ave. Upéa-gwi ndaipu'akavéi penderhe ko mundo járy Nhandejáry e'ỹ va'e kwéry va'e, yváy pygwa. Upéixa ramo, ani vyteri pehendu teĩ gwĩ omanda rei va'e nhe'ẽ, Cristo ndive peiko e'ỹ va'e-rami. No'ã-rami he'i va'e ko mundo járy kwéry omanda-vy: "Oĩ ja'u va'e. Oĩ ja'u e'ỹ va'e ave. Ani erehupi teĩ ja'u e'ỹ va'e. Ani eremboja jepe ne apekũ-rehe. Ani erepoko teĩ hese" he'i mo'ã. Ma'erã po pehendu upe va'e nhe'ẽ.

* 2:19 Mt 7.15-20; 2 Co 11.1-4; Gl 1.8; Ef 5.6; 2 Pe 2.1-3 * 2:19 Ef 4.16

Upéa rehogwa ja'u ramo, ndaiporivéi-ma, opa voi. Opa va'erā-rehe naiporāi nhamañda.

²² Upéa rehogwa nde'íry Nhandejáry va'ekwe. Teko rei nhe'ẽ ae upéa nhe'ẽ. Upéa-py rei nhane mbo'e va'ekwe teko rei.

²³ Gwī pende-rehe omanda va'e hi'arandu porā vérami mo'ã. Ha nahi'arandu porāi: "Iporā katu ereiko ore rekoha-rupi" he'i mo'ã. "Ore py'amirī voi. Ore kyhyje Nhandejáry-gwi. Upéa-gwi noromopeteíry imboete-vy Nhandejáry-pe. Nhandejáry rembigwái kwéry-pe yváy pygwa va'e ae oromboete meme ave" he'i mo'ã. "Iporā ore rekoha-rupi peiko" he'i mo'ã peē-my. "Iporā katu jareko asy nhande rete nhumboeteve hagwā Nhandejáry-pe" he'i mo'ã peē-my. Ani pehendu teĩ inhe'ẽ. Pene mbo'e ramo jepe, nahi'arandu porāi joty voi pene mbo'eháry. Inhe'ẽ nhahendu ramo katu, ndaipóiry joty inhe'ẽ. Ijapu voi. Inhe'ẽ nhahendu ramo ndajaiko porāi arā joty. Nanhane mombaraetéiry va'e inhe'ẽ nhane rembiapo vai e'ŷ hagwā, jajapo porā meme hagwā. Nainhe'ẽ pokatúiry voi. Inhe'ẽ rei va'e hikwái. Ani errehendu teĩ inhe'ẽ.

3

¹ Omano rire oikove jevy-ma Cristo va'ekwe. Peteixa pemoirū-gwi íxupe, peikove jevy-ma vérami peiko. Upéa-gwi pemoñ katu pende resa yváy pygwa-rehe. Upe-py oĩ Cristo Nhandejáry yke-rehe ogwapy oĩ-vy. Nhandejáry ombopu'aka íxupe ha-py oĩ.*

² Upe pygwa rehéte pemondo meme katu pende resa. Ani pepena teĩ ko yvy pygwa-rehe peipota va'e-rehe.

³ Áy peẽ peiko voi pemanu va'ekwe-rami hendive. Napepenavéiry ko yvy pygwa-rehe. Peteixa pemoirū-gwi Cristo-pe, onhangareko va'e pene nhe'ẽ marangatu-rehe. Ha'e Nhandejáry ndive oĩ. Ha ko'ánga katu Nhandejáry ndive onhangareko va'e pene nhe'ẽ marangatu-rehe.

⁴ Ha peẽ hendive peiko va'e. Ha'e pene nhe'ẽ marangatu-rehe onhangareko va'e voi. Ha'e ojehexa uka jevy ou-vy ramo, pende rexu uka va'erā hendive ave. Ha enterove va'e katu ombotuvixa mba'e íxupe va'erā. Pene mbotuvixa mba'e va'erā ave hendive.

Anive pejapo pejapo vai va'ekwe-rami (Ef 4.17-25)

⁵ Upéa-gwi xe anhemonhe'ẽ-ta peẽ-my. Anive pejapo vai teĩ. Anive pene mandu'a teĩ pene rembiapo vai va'erā-rehe. Anive penhemotí e'ŷ teĩ avave-pe. Teko rei reko-rupi ani pejogwereko teĩ. Ani pemondo pende resa pene rembiapo vairā-rehe. Ani peipota rei teĩ pende rapixa mba'e. Peipota va'e-rehete ani pepena eterei teĩ. Upéixa peiko ramo, Nhandejáry e'ŷ va'e pemboete peiko-vy. Naiporāi eremboete nde ereipota va'éte.

⁶ Upéa rehogwa apoha gwive, Nhandejáry nhe'ẽ rendu e'ŷ va'e gwive, ogwereco asy va'erā íxupe kwéry Nhandejáry.

⁷ Yma va'ekwe upéixa voi peiko va'ekwe. Upéa rehogwa pejapo japo peiko-vy va'ekwe.

⁸ Ha ko'ánga katu anive pejapo pejapo vai va'ekwe-rami. Ani pende poxy teĩ. Ani ne mandu'a poxy teĩ nde rapixa-rehe. Ani erenhe'ẽ poxy íxupe. Ani nde py'a vai teĩ nde rapixa-rehe. Ani nde apu rei teĩ nde rapixa-rehe. Ani erenhe'ẽ rei rei hese.

⁹ Perova-ma kuri pende rekoha vai peiko-vy napene rembiapo vaivéi-ma hagwā. Upéa-gwi ani pende apu ojóupe.

* **3:1** SI 110.1

¹⁰ Ko'āy pene mboheko porā-gwi Nhandejáry, peē pende rekoha pyahu porā-ma voi. Oipota gweko rupive pive peiko peikwaa porāve rāve hagwā īxupe.*

¹¹ Nhande nhande rekoha pyahu porā-ma voi. Upéa-gwi nhandejéupe va'e gwive nhande jareko peteīxa: "Ko va'e judeu e'ŷ va'e, upéa judeu kwéry va'e" ndaja'evéiry. "Ko va'e judeu reko-rupi oiko va'e. Upe va'e judeu reko e'ŷ-rupi oiko" ndaja'evéi-ma. "Ko va'e nhande re'yí e'ŷ va'e. Upéa nhande reko kwaa e'ŷ" ndaja'evéi-ma. "Ko va'e om̄ba'apo va'e ijáry-pe mante. Upe va'e om̄ba'apo va'e ojehénte" ndaja'evéi-ma. Ha Cristo katu nhande py'apy-py kwéry oiko va'e. Upéa-gwi nhande, nhande rekoha pyahu porā va'e, aŷgwa peteīxa jareko nhandejéupe.*

¹² Ha peē katu Nhandejáry re'yí. Pende rayhu va'ekwe. Pende poravo va'ekwe ojéupe gwarā. Upéa-gwi perova katu pende rekoha. Peiporiahuverekō katu pende rapixa-pe. Ani pene mba'e rakate'ŷ teī īxupe. Eme'ē ae katu īxupe hemikotevē va'e. Ani penhembotuvixa mba'ese eterei. Ani pende poxy pya'e teī pende rapixa-pe. Pereko kirirī rei ae katu īxupe.

¹³ Túvy-rami pejogwereko porā katu. Ipoxy ramo jepe nde rapixa, túvy-rami joty peiko katu īxupe. Ani pereko poxy īxupe. Pende poriahuverekō Nhandejáry. Upéa-gwi pejoporiahuverekō reko katu peiko-vy ave. Ha nde rapixa katu nde rereko asy ramo jepe, eiporiahverekō reko meme joty katu īxupe.

¹⁴ Pejohayhu porā porā katu. Pejohayhu ramo, pende joja porā porā tee joa va'erā.

¹⁵ Ha pene mbopy'agwapy va'e katu Cristo voi peiko hagwā pende py'agwapy rehewe. Pende pe'a va'ekwe Nhandejáry peteīxa peiko hagwā onhondive pende joja meme hagwā pende py'agwapy rehewe. Upéixa ramo petima porā katu Nhandejáry-pe pemboete-vy.*

¹⁶ Topyta meme katu nde py'apy-py Cristo nhe'ē porā gwive. Pehendu porā porā katu inhe'ē. Penhombo'e mbo'e katu arandu-rupi. Penhemonhe'ē ojóupe arandu-rupi. Peporahéi katu. Nhandejáry nhe'ē héry va'e Salmo-py eporahéi. Eporahéi mborahéi-py ave. Nhandejáry mboete-vy peporahéi katu. Petima porā katu īxupe pende py'a gwive.

¹⁷ Ha ne rembiapo va'e gwive ejapo katu Nhandejáry Hesu réry-py. Ere va'e gwive, ere katu Hesu rekovía. Hesu réry-rupi petima porā katu Nhandejáry Nhande Ru va'e-pe.*

*Opáixa pene rembiaporā pejapo katu nde py'a gwive
(Ef 5.21-6.9; 1 Pe 3.1)*

¹⁸ Āy peē kunha eremenda va'ekwe-pe anhemonhe'ē-ta. Pehendu katu peteī teī pene ména nhe'ē. Peē Hesu reroviaha voi. Upéa-gwi iporā katu pehendu pene ména nhe'ē.

¹⁹ Āy peē kwimba'e eremenda va'ekwe-pe anhemonhe'ē-ta. Ehayhu tee katu ne rembireko-pe. Ani erereko asy teī īxupe.

²⁰ Āy peē mitā kwéry-pe anhemonhe'ē-ta. Peē Hesu reroviaha va'e voi. Upéa-gwi pehendu meme katu pende ru, pende sy nhe'ē. Upéixa pejapo arā Nhandejáry remimbota.

²¹ Āy peē mitā ru va'e-pe, mitā sy va'e-pe anhemonhe'ē-ta pono pemandā pohýi pende ra'y kwéry-pe, pende rajy kwéry-pe ave. Ani nde poxy rehewe eremanda nde ra'y kwéry-pe. Upéixa ramo mba'eve ndojaposevēi arā hikwái.

* 3:10 Gn 1.26 * 3:11 Ef 4.17-32 * 3:15 Ef 4.1-16 * 3:17 Ef 5.15-20

²² Ìy penhemomba'apo va'e anhemonhe'ẽ-ta peẽ-my. Pehendu meme katu ne mba'ejáry nhe'ẽ. Oĩ oipota va'e imba'ejáry imandu'a porã hese. Imba'ejáry resa-pý om̄ba'apo. Ndoikovéi ramo katu nom̄ba'apói. Ani peiko upe va'e reko-rupi. Ndoikovéi ramo ne mba'ejáry, oĩ vérami joty ne ndive, emba'apo joty. Nde py'a gwive emba'apo katu eremboete-gwi Nhandejáry-pe.

²³ Opáixa pene rembiaporã pejapo katu nde py'a gwive. Ne momba'apo ramo, ani ere: "Amba'apo teko rei-pete". Ere ae "Nhandejáry-pe ave amba'apo" ere.

²⁴ Eremba'apo porã ramo, ome'ẽ va'erã nde-vy Nhandejáry ne rembi-apokwe repy. Ne mandu'a katu upe va'erã-rehe. Nhandejáry re'yi pegwarã ome'ẽ va'erã nde-vy. Ndaha'éi teko rei nde Járy tee. Cristo ae katu nde Járy tee.

²⁵ Entéro hembiapo vai va'e-pe gwive Nhandejáry petēxa ogwerekva'erã. Ombohosa asy va'erã íxupe kwéry hembiapo vai va'ekwe-gwi. Mburuvixa ramo jepe, hembigwái ramo jepe, petēxa ombohosa asy va'erã íxupe kwéry.

4

¹ Oĩ pene pa'ũ-my oporomomba'apo va'e. Nde eremomba'apo va'e anhemonhe'ẽ-ta nde-vy. Eme'ẽ katu ne rembigwái kwéry-pe hemikotevẽ kwéry. Ani ne mba'e rakate'yi tei íxupe kwéry. Oime ko nde Járy ave yváy-py. Ne mandu'a katu nde Járy yváy pygwa-rehe.

Paulo onhemonhe'ẽ íxupe kwéry

(Lc 18.1-8; Ef 5.15-16; 6.18-20; 1 Ts 5.17; 1 Pe 3.15-17)

² Ani pejapo e'yi tei oraçao. Ani ne mandu'a Nhandejáry rehewa e'yi-rehe, pejapo jave oraçao. Petima porã Nhandejáry-pe imboete-vy.

³ Pejapo jave oraçao, pemondo katu pene nhe'ẽ Nhandejáry-pe ore-rehe ave omombe'u uka porã hagwã ore-vy. Oromombe'useve Nhandejáry nhe'ẽ. Hesu Cristo nhe'ẽ oromombe'useve ave. Cristo rehewa ojehexa uka ramo va'e nhande-vy oromombe'use. Ko'anga Cristo rehewa nhe'ẽ amombe'u-ma aiko-vygwi, xe moĩ-ma kuri preso.

⁴ Upéa-gwi pejapo katu oraçao xe-rehe xe aikwaa uka porãve hagwã inhe'ẽ amombe'u-vy. Amombe'u porã hagwã Nhandejáry oipotaha-rami amombe'u hagwã, pembojeupi katu Nhandejáry-pe pene nhe'ẽ xe-rehe.

⁵ Ha gwí Hesu reroviaha e'yi va'e katu ereko arandu katu íxupe. Mamo eretopa ha-rupi, ereko reko arandu katu íxupe.*

⁶ Pende poxy-pype ani penhe'ẽ tei íxupe. Penhe'ẽ porã ae katu enterove va'e pene nhe'ẽ ohenduse hagwãixa. Upéixa ramo petei tei va'e oporandu ramo nde-vy, ohendu hagwãixa eremombe'u va'erã íxupe kwéry.

Paulo irú he'i uka íxupe omandu'a porãha

⁷ Ìy amondo-ta nde-vy xe irú Tíquico héry va'e. Ogwahé ramo nde ha-py omombe'upa va'erã xe aikoha upéixa. Ha'e nhande ryvy voi jajohayhu va'e. Nhane pytygwõ va'e nhane mbotavy e'yi rehewe. Nhandejáry rembiapo ojapo japo va'evy. Ore ndive oiko va'evy Nhandejáry rembiapo orojapo ramo.

⁸ Upe va'e amondo-ta kuri peẽ-my ore moherakwã porã hagwã pene mbopy'agwasu hagwã.

⁹ Indive oho-ta kuri nhande ryvy Onésimo nhane rembiayhu va'e, Hesu rape-gwi ojere e'yi va'e. Ha'e nde re'yi voi, ne irú va'e ave. A-py ojehu va'ekwe gwive omombe'u-ta peẽ-my.

¹⁰ Ha Aristarco katu xe ndive oĩ preso va'e he'i uka-ta peẽ-my omandu'a porãha. He'i uka-ta ave peẽ-my omandu'a porãha Barnabé ryvy Marco. Oho

* 4:5 Ef 5.16

jevy ramo peẽ-my erohory katu íxupe Marco-pe. Amondo kuri hesegwa xe nhe'ẽ perohory hagwã íxupe.

¹¹ Ha Josué Justo katu he'i uka-ta peẽ-my omandu'a porãha. Upe mbo-hapygwa Aristarco, Marco, Josué Justo ave, judeu kwéry va'e, ha'e kwéry anho xe pytygwõ va'e. Outro kwéry Hesu-rehe ojerovia va'e, judeu kwéry va'e, naxe pytygwôdiry. Ha upe mbohapygwa ae katu xe pytygwõ. Xe pytygwõ amombe'u hagwã nhande ruvixa rehewa nhe'ẽ. Xe mbopy'agwasu ave xe pytygwõ-gwi.

¹² Ha Epafras katu ne irũ va'e, Hesu Cristo rembigwái va'e ave, he'i uka-ta ave peẽ-my omandu'a porãha. Ha'e ojereure meme Nhandejáry-pe penderrehe. Ojereure mbaraete tee íxupe pene mbopy'agwasu hagwã, onhembo-hetave tave peẽ-my pene rembigwaa, pepyta e'ŷ hagwã mitã reko-rami, pejapopa hagwã Nhandejáry remimbota gwive.

¹³ Ha'e ombo'apo va'e voi. Ndopytavéi oração apo-vy. Penderrehe meme ojapo oração. Laodicéia tetã mygwa-rehe, Hierápolis tetã mygwa-rehe ave ojapo meme oraçaõ. Xe resa-rupi ahewa va'ekwe amombe'u.

¹⁴ Ha Lucas katu nhane mbogwerahaty nhane rembiayhu va'e ave, he'i uka-ta ave omandu'a porãha. Demas ave he'i uka-ta omandu'a porãha.

¹⁵ Xe rekoviá peraha katu xe mandu'a porãha xe ryvy kwéry-pe Laodicéia tetã mygwa-pe. Peraha katu kunha héry va'e Ninfa-pe ave. Hóga-py onhom-boaty va'e Hesu reroviah kwéry. Upe-py onhomboaty va'e-pe gwive, peraha katu xe mandu'a porãha.

¹⁶ Eremonhe'ẽmba rire ko kwatia nhe'ẽ atýra-py, embohasa outro po-py. Embohasa gwĩ Hesu reroviah-pe Laodicéia tetã mygwa-pe. Emonhe'ẽ uka xe kwatia upe-py. Upe-gwi ombohasa-ta ave peẽ-my outro xe kwatia nhe'ẽ ave. Ogwahê ramo, pemonhe'ẽ katu ave pe outro xe kwatia nhe'ẽ.

¹⁷ Ha ere katu kuri xe ryvy Arquipo-pe: “Ne rembiaporã Nhandejáry remime'ẽgwe. Hesu reroviah-pe ereipytygwõ hagwã he'i nde-vy Nhandejáry. Upe va'e gwive ejapopa katu” ere íxupe.

¹⁸ Áy amondo-ta peẽ-my xe mandu'a porãha. Xe voi ajapo xe réry xe porupi. Pene mandu'a meme katu preso aimeha-rehe. Tapende rovasa katu Nhandejáry pende rexakwaa rei-vy. Opa xe nhe'ẽ.

Paulo remimombe'ukwe Tessalônica tetã mygwa pegwarã 1 primeira epístola de Paulo aos tessalonicense

Paulo inhirũ ave omondo Tessalônica tetã mygwa-pe onhe'ẽ kwaitia-rehe

¹ Hesu reroviah Tessalônica tetã-my oiko va'e kwéry. Ore Paulo, Silvano, Timóteo ave oromondo-ta peẽ-my ore nhe'ẽ. Kwaitia-rehe oromondo-ta peẽ-my. Nhandejáry ko Nhande Ru. Peẽ katu ijave etegwa voi, Nhandejáry Hesu Cristo jave etegwa ave. Tapende rexakwaa rei katu Nhandejáry pende rovasa porã-vy. Tapene mbopy'agwapy ave.

Paulo otima porã Nhandejáry-pe Tessalônica tetã mygwa-rehe

²⁻³ Ha ore ore mandu'a meme va'e pende-rehe kwéry oronhomongeta jave Nhandejáry Nhande Ru ndive. Perovia tee va'e Nhandejáry-pe. Pehayhu tee va'e íxupe ave. Upéa-gwi pene kane'õ ramo jepe pene rembiapo porã porã joto. Napeha'arõ ku'a ku'ái va'e Nhandejáry Hesu Cristo-pe. Peha'arõ tee ae íxupe peiko-vy ou hagwã nhane resende hagwã. Gwĩa-rehe ore mandu'a ramo, orotima porã porã oroiko-vy Nhandejáry-pe pende-rehe. Nhandejáry ndive oronhomongeta jave ore mandu'a pende-rehe.

⁴ Ha peẽ katu, ore re'ýi kwéry, Nhandejáry rembiporavo voi nipo ra'e. "Hembiajhu nipo ra'e ave" oro'e ro'e pende-rehe. Oroikwaa voi. Orohexa-gwi pende rekoha porã, oroikwaa voi.

⁵ Heta oronhemonhe'ẽ nhe'ẽ va'ekwe peẽ-my. Oronhemonhe'ẽ jave naphe-hendu reíry va'ekwe. Perovia tee-ma voi va'ekwe. Ipu'aka Hesu rehewa nhe'ẽ pende-rehe. Upéa-gwi perovia tee voi va'ekwe íxupe. "Anheï nipo ra'e kóa nhe'ẽ" peje va'ekwe, oikwaa uka peẽ-mygwi Nhe'ẽ Marangatu tee va'e. Upéixa ramo pende rekoha oroikwaa ramo, orotima porã Nhandejáry-pe. Ha ore rekoha peikwaa voi. Pehendu porã hagwã mba'e-rami orogwereko va'ekwe oronhemonhe'ẽ-vy peẽ-my peikwaa voi.

⁶ Ha peẽ katu peikose va'ekwe ore reko-rupi. Nhandejáry Hesu reko-rupi peikose ave. Oronhemonhe'ẽ ramo pehendu va'ekwe Hesu nhe'ẽ. Ha pende rapixa pene moingo asy voi. Pehendu-gwi Nhandejáry Hesu nhe'ẽ, pene moingo asy. Upéixa pende rerekoye asy ramo jepe, pene mbovy'a joto Nhe'ẽ Marangatu tee va'e.*

⁷ Pende rekoha porã ete voi. Upéa-gwi Macedônia yvy pygwa Acaia yvy pygwa ave, Hesu nhe'ẽ renduha va'e oikose pende rekoha-rupi.

⁸ Pendéhegwi onhemombe'u va'ekwe nhe'ẽ porã. Opa-rupi onhehendu. Macedônia yvy-rupi, Acaia yvy-rupi ave ohendu pene rerakwã. Nhandejáry perovia tee-gwi opa-rupi oho pene rerakwã porã. Upéa-gwi, ojekwaa-gwi opa-rupi, ore noromombe'úi pene rerakwã.

⁹ Oromombe'u rekoria íxupe kwéry, he'i ore-vy Hesu reroviah omombe'u-vy: "Ohendu porã nipo ra'e pene nhe'ẽ Tessalônica tetã mygwa kwéry" he'i. "Upéa-gwi nipo ra'e omboyke tupã ra'anga anga rei ogwerova-ma hagwã gweko Nhandejáry-rehe. Tupã tee oikove va'e rekoha-rupi oiko hagwã ogwerova-ma gwekoha" he'i ore-vy.

¹⁰ "Ha ko'ángä katu oha'arõ oiko-vy Nhandejáry ra'y Hesu-pe, hemimoingove jevy va'ekwe, ogwejy jevy hagwã yváy-gwi. Oha'arõ voi oiko-vy Hesu nhane resendeharã" he'i ore-vy pene mombe'u-vy. Ha Nhandejáry omoingo

* **1:6** At 17.5-10

asy-ta ramo entéro hekoha vai va'e kwéry gwive, imytu'e'ŷ eterei ramo Nhandejáry-gwi hikwái, upe áry-py voi nhane resendeharã voi Hesu.

2

Mitā isy ogwerekoha va'e-rami Paulo ohayhu pe tetā mygwa-pe

¹⁻² Are-ma oroho va'ekwe Filipos tetā-my. Orogwahē ramo upe-py ore moingo asy voi. Upe pygwa kwéry ore rerekō asy va'ekwe onhembosarái-vy ore-rehe. Upe va'e peikwaa voi, xe re'yí kwéry. Upe rire orohasa asy rire, oroho pende ha-py. Orohasa asy rire, ore mbopy'agwasu joty Nhandejáry oromombe'u hagwā peẽ-my hesegwa nhe'ẽ porā. Pende rapixa kwéry ore nhe'ẽ omboyke ramo jepe, oromombe'u joty nhe'ẽ porā. Ndoroho reíry oronhemonhe'ẽ-vy peẽ-my. Pehendu voi ore nhe'ẽ.*

³ Oronhemonhe'ẽ ramo peẽ-my, ndaha'éi voi imombe'u jevypyre ore-vy. Ore ko anhetegwa voi oromombe'u va'ekwe peẽ-my. Ore reko ky'a e'ŷ rehevē oronhemonhe'ẽ va'ekwe. Ndaha'éiry voi orombotavyse-vy rei oronhemonhe'ẽ va'ekwe. Anhetegwa tee va'e meme voi oromombe'u oronhemonhe'ẽ-vy peẽ-my.

⁴ Ha Nhandejáry katu ojohu porā-gwi ore reko ojerovia ore-rehe. Upe ramo he'i ore-vy oromombe'u hagwā Hesu rehewa nhe'ẽ porā. Upéa-gwi mate orojapo hemimbota oronhemonhe'ẽ-vy. Teko rei remimbota katu ndorojapói. Nhandejáry remimbota ae mate orojapo. Nhande py'apy gwive oikwaa va'e Nhandejáry. Iporā para'e, ivai para'e? Upéa Nhandejáry oikwaa voi. Ndaipóri mba'eve onhemi va'e íxugwi.

⁵ Aipo ramo noromboete reíry va'ekwe orombotavy hagwā. Upéa peikwaa voi. Noronhe'ẽ ra'anga anga reíry oropotave-gwi orejéupe gwarā. Ore apu ramo oikwaa ave arā Nhandejáry.

⁶ Ore Cristo remimondo voi. Ha noronhemboete reiséiry. Noronhemboete rei ukaséiry peẽ-my. Noronhemboete rei ukaséiry avave-pe.

⁷ Upéa-rupi: "Jaha jajerure nhane ma'erā-rehe" ndoro'éi joty. Nhandejáry he'i ramo jepe nhande-vy: "Iporā xe remimondo okaru rei" he'i ramo, oromba'apo joty ore rembi'u repyrā-rehe. Ndorojerure ruréiry joty ore remi'urā-rehe. Oroiko ramo pene pa'ū-my, orogwerekō porā porā rei peẽ-my. Mitā isy ogwerekoha va'e-rami orohayhu oroiko-vy peẽ-my.

⁸ Orohayhu eterei-gwi oromombe'u va'ekwe peẽ-my Nhandejáry nhe'ẽ porā. Upe rire orome'ëse ave peẽ-my ore rekove. Orohayhu eterei-gwi oroiko-vy, nore rakate'ŷiry ore rekove-rehe ime'ẽ-vy. Orome'ëse voi ore rekove. Orejéupe katu ndoroikói. Peẽ-my gwarā mante ore oroiko.

⁹ Ha ko'ángā pene mandu'a va'e voi ore rembiapo hatā hagwe-rehe, ore re'yí kwéry. Ore mokane'õ ne'õ hagwe-rehe pene mandu'a va'e. Oromombe'u ramo nhe'ẽ porā, ndoroipotái va'ekwe peme'ẽ rei ore-vy ore remi'urā. Upéa-gwi ndoropytái oromba'apo e'ŷ rehevē va'ekwe. Áry-py pyhare ave oromba'apo oroiko-vy.

¹⁰ Apogwerekō porā va'ekwe peẽ-my, Hesu reroviahva va'e kwéry-pe. Ore reko marangatu oroiko-vy. Ndorohejáiry voi tape porā. Ore reko jejavy e'ŷ rehevē ore oroiko va'ekwe. Ha peẽ katu upéa rexahare voi. Ndore apuí voi. Ore apu ramo oikwaa arā Nhandejáry.

¹¹ Oronhemonhe'ẽ peẽ-my túvy onhemonhe'ëha-rami gwa'ýry-pe. Nde rúixa peteñ teñ-pe oronhemonhe'ë: "Eiko katu Nhandejáry rekoha-rupi. He'i hagwe-rami eiko" oro'e ro'e peẽ-my.

* ^{2:1-2} At 16.12-24; 17.1-9; 2 Co 1.12

12 “Ha Nhandejáry katu ha'e pene mogwahē va'erā pende ruvixa ramo oiko ha-py, hendy-rupi onhemomba'egwasu ete ha-py. Aníke pemboyke teī íxupe. Peipyhy katu tape porā pono pemonhemotī íxupe” oro'e va'ekwe peē-my.

Ohasa asy hagwe-rami Nhandejáry re'yi, ohasa asy ave pe tetā mygwa

13 Upéixa ramo oromombe'u ramo nde-vy Nhandejáry nhe'ẽ, pehendu va'ekwe. Pehendu ramo: “Ko va'e nhe'ẽ Nhandejáry nhe'ẽ tee voi ra'e. Ndaha'ei teko rei nhe'ẽ. Nhandejáry nhe'ẽ tee ae voi ra'e” peje va'ekwe ojóupe. Peje porā voi. Kóa nhe'ẽ Nhandejáry nhe'ẽ tee voi. Kóa nhe'ẽ pene mo'arandu va'e perovia ramo. Kóa nhe'ẽ pene mbopy'apyhy pyhy va'e perovia-gwi. Upéa-gwi orotima porā porā pende-rehe Nhandejáry-pe.

14 Perovia rire, ore re'yi kwéry, pehasa asy va'ekwe. Ohasa asy hagwe-rami Nhandejáry re'yi mamo ojogweroaty aty ha-rupi, pehasa asy ave. Ohasa asy hagwe-rami Judéia vvy rupigwa Hesu Cristo reroviaha kwéry, peē ave pehasa asy. Peha'ã-ma íxupe kwéry. Ha judeu kwéry ogwereko asy va'ekwe gwe'yi kwéry. Upéixa voi ãy pene moingo asy ave pende re'yi kwéry. Upéixa peikoma heko-rupi, Hesu reroviaha reko-rupi, Judéia pygwa reko-rupi.

15 Ha judeu kwéry katu hekoha vai va'e. Yma ojuka juka va'ekwe Nhandejáry nhe'ẽ-py omombe'u va'ety kwéry-pe. Ojuka rire, ojuka va'ekwe Nhandejáry Hesu-pe ojuka hikwái. Upe rire ore mosē kuri ore mondo-vy. Ha Nhandejáry ndojohu porāi hembiapo. Ndojapóiry hemimbota hikwái. Entéro kente kwéry-rehe gwive ndaija'éiry hikwái.

16 Ndoipotái oromombe'u Nhandejáry nhe'ẽ judeu e'ŷ kwéry-pe. Nhandejáry oresende judeu e'ŷ-pe ndoipotái voi hikwái. Ndoipotái teī jepe, ore oromombe'u joto. Upéixa ramo hembiapo vaive ive voi oho-vy. Ha ãy katu Nhandejáry nhe'ẽ-py ogwahē-ma ombohasa asy hagwā áry. Angaete-ma Nhandejáry ombohasa asy-ta íxupe kwéry.

Paulo oho-ta mo'ã Tossalônica tetā-my

17 Orohexa nga'u eterei va'ekwe, ore re'yi kwéry. Sapy'a ete ndorohexái peē-my. Orohexa nga'u eterei-gwi tyre'ŷ-rami oroiko. Ndorohexavéi ramo jepe, oronhesamondo mundo rei joto oroiko-vy pende-rehe kwéry. Upéixa ramo orohexa nga'u eterei-gwi, orohexaseve seve pende rova. Orojapura ave. Orohexase-ma voi pende rova.

18 Upe-ma ramo oroho-ta mo'ã pende ha-py. Xe Paulo ahase hase rei aikovy pende ha-py. Ha Satanás anháy ruvixa katu ore joko joko, ndohejái oroho hagwā pende ha-py. Upéa-gwi orohose ramo teī jepe, ndorohói joto.

19 Ha ogwejy jevy ou-vy ramo Nhandejáry Hesu, ndaipóri voi ne ramigwa ore mbovy'a va'erā. Hesu yke-rehe nhaĩ ramo, upe-py apohexa ramo, orovy'a-ta. Pende-rehe kwéry voi ore orovy'a-ta. Upe-py oro'e-ta pende-rehe: “Nhane remimombe'u ndareíry” oro'e-ta pende-rehe.

20 Pende-rehe ore oronhemomba'egwasu-ta. Pende-rehe kwéry orovy'a eterei-ta.

3

Timóteo ogwahē jevy. Herakwā porā ogweru

1-2 Upe ramo heta orohexa nga'u va'ekwe. Ajapura voi aikwaa hagwā mba'éixa po peiko. Xe ajapura-gwi amondo kuri pende rexava-vy xe irū Timóteo. Ha'e Nhandejáry nhe'ẽ apoha Hesu nhe'ẽ mombe'uhatty. Ha upéi xe anho apyta a-py Atenas tetā-my. Xe irū e'ŷ reheve apyta. Naxe rakate'ŷi xe irū-rehe: “Iporâve xe apyta xe anho” ha'e xejéupe. Ndapytaséi ha-gwi apyta joto xe anho, ajapura-gwi aikwaa hagwā mba'éixa po peiko. Upéa-gwi

amondo kuri Timóteo onhemonhe'ẽ hagwā peẽ-my: "Perovia tee katu Hesupe. Peiko meme katu tape porã-rupi."^{*}

³ Aníke pejere tape porã-gwi erekasa asy jave." Upéa he'i hagwā peẽ-my amondo kuri íxupe. Nhande kwéry, Hesu reroviaha va'e jahasa asy va'erã voi. Upeixagwa nhande-vy gwarã voi. Upéa peikwaa voi.

⁴ Oroime ramo pene ndive va'ekwe oromombe'u va'ekwe nhane renonderã: "Jahasa asy-ta" oro'e va'ekwe peẽ-my. Ha ko'ánga katu oro'e hagwe-rami jahasa asy-ma jaiko-vy. Upéa peikwaa voi.

⁵ Upéa-rehe ajapura eterei-gwi, amondo kuri aikwaa hagwā perovia porã-ma para'e, perovia ku'a ku'a rei para'e. Pende reko mbo'e vai-ma para'e anháy ruvixa Satanás. Pende reko rerova-ma para'e Satanás. Upéa nhande reko mbo'e vaise va'ety voi. Pende reko rerova-ma para'e gwekoha-rupi ra'e. Aipo ramo oronhemonhe'ẽ rei voi arã araka'e peẽ-my.

⁶ Ha ko'ãy ogwahẽ jevy-ma ou-vy pende ha-gwi. O gwahẽ jevy-ma ou-vy ore ha-py Timóteo. Pene rerakwā porã ogweru imombe'u-vy ore-vy. He'i ore-vy pende-rehe: "Ogwerovia tee-ma hikwái Nhandejáry-pe. Ojohayhu tee hikwái. Nde-rehe imandu'a porã meme hikwái. Erehexa nga'uha-rami íxupe kwéry nde rexha nga'u ave hikwái" he'i ore-vy pende-rehe.*

⁷ Upéa-rehe ore orohasa asy jave, orojepy'a jopy jave, orohendu-ma voi perovia tee ramo. O rohendu-ma ramo, ndapogwerokyhyjevéi-ma peẽ-my perovia tee-magwi. Ore mbopy'agwapy jevy-ma katu.

⁸ Eremboyke e'ŷ ramo Nhandejáry-pe, ereipyhy joty ramo tape porã, oroiko porã jevy ore ave. Ore pytuhẽ jevy-ma ore ave.

⁹ Ore mbovy'a-gwi Nhandejáry, orovy'a eterei pende-rehe. Upéa-gwi orotima porã Nhandejáry-pe. Orotima porãseve íxupe pende-rehe kwéry. Ha norotima porã kwaái íxupe. Mba'e-rami tamo ra'e orotima porãve hagwā íxupe.

¹⁰ Oromondo mondo oroiko-vy Nhandejáry-pe ore nhe'ẽ. Pyhare áry-py ave ore kyre'ŷ voi orojerure rure-vy íxupe jajohexa jevy hagwā. Upéi katu jajohexa jevy ramo, nderejerovia porã teéi ramo Hesu-rehe, orombojerovia porã arã hese. Ndereho porã teéi ramo, orombo'e arã ereho porãve hagwā tape porã-rupi.

Paulo ojapo oraçao

(Cl 1.9; 2 Ts 2.16-17)

¹¹ Tohexa uka ore-vy tape porã Nhandejáry, Nhande Ru, orogwahẽ hagwā oroho-vy pende ha-py. Tore reraha katu ave pende ha-py Nhandejáry Hesu.

¹² Nhandejáry nhe'ẽ-rupi tapejohayhu porãve rãve katu. Enterovéa-pe pehayhu porãve katu. Ore orohayhu tee-ha-rami ave peẽ-my, pejohayhu katu.

¹³ Upéixa ramo pene mbopy'apyhy pyhy-ta Nhandejáry ndapejejavývéi hagwā, ndapejeréi hagwā tape marangatu-gwi. Upéixa ramo, ogwejy jevy ou-vy ramo Nhandejáry Hesu imarangatu va'e kwéry ndive, penhembo'y va'erã Nhandejáry rovagwy-py peẽ-vy. Pejejavý e'ŷ reheve, pende py'a potí reheve, penhembo'y va'erã Nhande Ru rovagwy-py.

4

Oipota Nhandejáry heko marangatu

(Rm 13.13-14; Ef 5.3-8)

¹ Ko'ánga oromombe'u jevy-ta pende rekora, ore re'ýi kwéry. Oromombe'u va'ekwe pende rekora. Mba'éixa po pejapo-ta Nhandejáry remimbota

* 3:1-2 At 17.15 * 3:6 At 18.5

orombo'e va'ekwe. Ko'ánga pejapo voi Nhandejáry remimbota orombo'e hagwe-rami. Upéa-gwi oronhemonhe'ẽ jevy peẽ-my Nhandejáry Hesu réry-py: "Pejapo porâve râve katu hemimbota" oro'e peẽ-my. Nhane moirû-gwi nhande-vy Hesu oronhemonhe'ẽ.

² Nhandejáry Hesu réry-py oronhemonhe'ẽ peẽ-my va'ekwe. Mba'e-py orombo'e va'ekwe peikwaa voi.

³ Oipota Nhandejáry pende reko marangatu. Ndoipotái teko ky'a-rupi peiko rei-vy.

⁴ Emenda katu peteĩ teĩ pekwa va'e erereko kwaa hagwã ne rembireko erenhomongy'a e'ŷ rehewe. Pejogwereko enterovéa ne mboete hagwã.

⁵ Teko ky'a-rupi rei ani ereiko teĩ judeu e'ŷ va'e-rami. Gwĩ Nhandejáry-pe oikwaa e'ŷ va'e-rami ani ereiko teĩ.

⁶ Nhandejáry ndoipotái erejejav. Ndoipotái erejapo vai nde rapixa-rehe. Ha erejapo vai ramo ae nde rapixa-rehe, ne rembiapo vaikwe-rehe ne mbohasa asy va'erã Nhandejáry nde rapixa repy-vy. Úpéa-gwi oro'eri eri va'ekwe peẽ-my: "Anive erejapo upéa."

⁷ Nhande poravo va'ekwe Nhandejáry jaiko hagwã teko ky'a e'ŷ rehewe. Jaiko marangatu hagwã nhande poravo va'ekwe. Nanhande poravói voi va'ekwe teko ky'a-rupi jaiko hagwã.

⁸ Ko va'e nhe'ẽ ndaha'ei teko rei nhe'ẽ. Nhandejáry nhe'ẽ ae. Upéa-gwi ohendu e'ŷ va'e kente kwéry omboyke voíte Nhandejáry-pe. Nhandejáry ome'ẽ va'ety peẽ-my Nhe'ẽ Marangatu tee va'e. Upéa-gwi ndikatúi eremboyke íxupe.

Pejohayhuve huve katu, he'i Paulo

(Jo 13.34; 15.12; 1 Jo 3.11; 4.11; 1 Co 4.12; Ef 4.28-29; 2 Ts 3.6-12)

⁹⁻¹⁰ Oromombe'u va'ekwe peẽ-my pejohayhu hagwã. Ha ko'ánga upéixa jevy oromombe'u ramo, oromombe'u rei arã. Pene mbo'e va'ekwe Nhandejáry pejohayhu hagwã. Upéa-gwi Hesu nhe'ẽ reroviaha-pe gwive, Macedônia yvyrupi oiko va'e, pehayhu voi pekwa-vy. Upéa-gwi natekotevẽi avave ohai peẽ-my penhemonhe'ẽ-vy pejohayhu hagwã. Ko'ãy ae katu "Pejohayhuve huve rei katu" oro'e ae-ta peẽ-my.

¹¹⁻¹² Ani pejotoryva teĩ. Ani ne mba'e avyky ereiko-vy ne akã hatã rehewe. Ani erema'ẽ teĩ nde rapixa mba'e-rehe. Ne mba'e-rehe ae enhangareko katu. Oro'e jevy-ma oro'e hagwe-rami: "Emba'apo katu ne mboete hagwã Hesu rendu e'ŷha. Ani ereiko ipituva va'e-rami. Embarapo katu mba'eve-rehe ereikotevẽ e'ŷ hagwã. Anive teĩ ne mba'e jerure" oro'e meme peẽ-my.

Paulo omombe'u omano va'ekwe rehewa

(Mt 24.30-31; 1 Co 15.51-58)

¹³ Ko'ánga, ore re'yí kwéry, oromombe'u-ta peikwaa hagwã omano va'ekwe rehewa. Heta oĩ ohapirõ va'e: "Ãy ae ndajahexavéi-ma voíte omano va'ekwe. Opa ma ngatu" he'i mo'ã. Ndoroipotái erehapirõ gwĩ va'e-rami.

¹⁴ Ha Hesu katu omano rire, oikove jevy-ma. Upéa nhe'ẽ jarovia voi. Upéixa voi Hesu oikove jevy-gwi omoingove-ta Nhandejáry heru-vy. Hesu reroviaha omano va'ekwe-pe ogweru-ta Nhandejáry. Upéa-gwi ani pehapirõ teĩ.

¹⁵⁻¹⁶ Kóá nhe'ẽ Nhandejáry-gwi orohendu va'ekwe oromombe'u-ma peẽ-my. Hesu ogwejy jevy ou-vy ramo, entéro hese ojerovia va'e gwive ojeupi va'erã yváy-py. Omano va'ekwe ranhe oje'oi va'erã ojeupi-vy nhane renonde-rupi. Ha nhande jaikove va'e, ko yváy-py japyta va'e, nhande rerojeupi arã hapykwéri. Ha Nhandejáry Hesu ogwejy-ta ou-vy yváy-gwi. Hatã onhe'ẽ-ta omanda-vy. Ha hembigwái yváy pygwa onhemomba'egwasu ete va'e

nhane renói-ta. Nhane renói-vy omonhe'ẽ-ta Nhandejáry remimbygwasu. Nhandejáry mba'e tee va'e voi. Ha upéi katu oikove jevy ranhe-ta gwĩ omano va'ekwe, Hesu onhangareko hese va'e.

¹⁷ Upe rire nhande jaikove va'e, nhamano e'ŷ va'e, nhande rerojeupi va'erã nhande reraha-vy arai-rupi. Onhemingoove va'ekwe ndive nhande rerojeupi va'erã. Upe-py áry-rupi nhande nhanhogwaití va'erã jaha-vy Nhandejáry Hesu ndive jaiko hagwã. Upéixa ramo mante jaiko meme ete-ta voi Nhandejáry Hesu ndive.

¹⁸ Upéa-gwi kóá nhe'ẽ pemombe'u mbe'u ojóupe naphehapirõvái hagwã, penhombopy'agwapypa hagwã.

5

Jaikwaa e'ŷ va'e óra-py ogwejy-ta ou-vy Nhandejáry Hesu (Lc 12.39-40; 2 Pe 3.10)

¹ Oromombe'u va'ekwe peẽ-my Nhandejáry Hesu áry rehewa nhe'ẽ igwejy hagwã. Ore remimombe'ukwe peikwaa voi nga'u. Upéa-gwi, natekotevéi voi oromombe'u jevy peẽ-my kwatia-rehe, ore re'ýi kwéry. Ko va'e ahai va'erã peẽ-my peikwaa porã para'e.

² Ogewahé va'erã Nhandejáry áry igwejy hagwã. Jaikwaa e'ŷha áry-py ae ogwahé va'erã nhande-vy Nhandejáry. Nhamo'ã e'ŷ reheve ou imonda va'e pyhare. Upéixa ou va'erã Nhandejáry Hesu. Jaikwaa e'ŷ va'e óra-py ogwejy va'erã ou-vy Nhandejáry Hesu. Upéa peikwaa voi.

³ Ha he'i va'erã kente kwéry: "Jaiko porã nhande. Ndojehu mo'ãi mba'eve nhande-vy" he'i va'erã mo'ã yvypóry kente kwéry. Upe-ma ramo, "Jaiko porã meme-ta" he'i jave, pya'e omanomba-ta hikwái. Ndoikwaa mo'ãiry omanotamaha, oikwaa e'ŷha-rami imembytamaha kunha. Onhenhandu e'ŷ reheve ohendu-ma gwasy. Upéixa voi kente kwéry ndoikwaa mo'ãiry omanotamaha hikwái. Ndaipóri peteñ va'e voi onheresende va'erã. Onhehundipa va'erã voi.

Nhanhangareko porã katu nhandéjehe he'i Paulo (Mt 24.42-44; Lc 21.34-36)

⁴ Ha peẽ katu, ore re'ýi kwéry, ndapeikóiry pytú-my oiko va'e-rami. Upéa-gwi peha'arõ katu peiko-vy pono ogwahé ou-vy upe áry imonda va'e-rami, pono peha'arõ e'ŷ jave ogwahé ou-vy peẽ-my.

⁵ Pene arandu-ma va'e peẽ. Arakatu pygwa-rami peiko. Ndajaikóiry pytú mygwa-rami. Hi'arandu e'ŷ va'e-rami ndajaikói voíte.

⁶ Upéa-gwi ani jaiko teñ nhande opáy e'ŷ va'e-rami. Heta oĩ opáy e'ŷ va'e. Ani jaiko teñ ha'e-rami. Japáy voi katu jaiko-vy. Nhanhangareko porã katu nhandéjehe.

⁷ Pyhare oke okese va'e. Oka'use va'e pyhare oka'u. Upe pyharegwa-rami voi Hesu rerovia e'ŷha.

⁸ Ha nhande katu arakatu pygwa nhande. Upéa-gwi nhanhangareko porã katu nhandéjehe. Jarovia porã ete katu. Jajohayhu porã rei katu ave. Jarovia porã ramo, jajohayhu porã ramo ave, nhamonde nhande py'a jokoha ramigwa pono nhande reity gweko-rupi anháy ruvixa Satanás. "Nhandejáry Hesu nhane resende-ta" ja'e meme katu. Upéa ja'e ramo nhamonde nhane akã jokoha ramigwa pono nhande reity gweko-rupi.

⁹ Nanhande pe'áiry Nhandejáry nhande reropoxy hagwã nhande rerekoso asy ete-vy. Nhande pe'a ae jarovia hagwã Nhandejáry Hesu Cristo-pe nhane resendeharã-pe.

¹⁰ Ha'e omano va'ekwe nhande-rehe ha-py. Jaiko hagwã voi hendive omano ha'e. Nhamano va'e, nhamano e'ŷ va'e ave jaiko va'erã hendive.

¹¹ Upéa-rehe penhomongyre'ŷ katu penhombopy'agwapy-vy. Penhomombaraete kwaa voi ojóupe. Āy penhemonhe'ẽ nhe'ẽ ojóupe perovia porāve rāve hagwā Nhandejáry Hesu-pe.

Paulo onhemonhe'ẽ Tessalônica tetā mygwa-pe

(1 Tm 5.17-19; Ef 4.1-3; Cl 1.10)

¹² Oroipota eterei pemboete Hesu reroviah nhangarekoha-pe. Pene pa'ũ-my om̄ba'apo-vy ndopytáiry va'e pemboete katu. Pende-rehe onhangareko oĩ-vy. Peẽ-my onhemonhe'ẽ oiko-vy. Pemboete katu íxupe kwéry, ore re'ýi kwéry. Omonhangareko uka íxupe va'e pende-rehe Nhandejáry Hesu.

¹³ Hembiapo porā-gwi pehayhu tee íxupe imboete-vy. Pemomba'egwasu ete katu íxupe. Pende py'agwapy rehevē peiko porā rei onhondive. Ani penhorairō teĩ.

¹⁴ Oro'e-ta peẽ-my, ore re'ýi kwéry: "Penhemonhe'ẽ katu gwī ipituva va'e-pe. Ha gwī ipy'amirī va'e-pe katu pemombaraete imbopy'agwapy-vy. Ha gwī ogwerovia porā e'ŷ va'e-pe pembopy'a jekoha jevy katu. Eipytygwō katu íxupe kwéry. Ani ereheja ha'e anho. Ne moakā rasy ramo hikwái, ani ereja'o ja'o teĩ íxupe. Eiporiahuvereko rei ae katu íxupe" oro'e pene mongyre'ŷ hagwā.

¹⁵ Xáke ore re'ýi. Hembiapo vai ramo jepe nde-vy nde rapixa, ani joty nde poxy íxupe. Ani nde katu ne rembiapo vai hese. Eiporiahuvereko rei ae katu íxupe. Peje meme katu ojóupe: "Jajohayhu rei katu jaiko-vy" peje ojóupe. "Enterovéa-pe ave jahayhu katu" peje.

¹⁶ Pevy'a joa meme katu. Ereiko porā ramo, ereiko porā e'ŷ ramo ave evy'a joty ereiko-vy.

¹⁷ Pemondo mondo katu Nhandejáry-pe pene nhe'ẽ.

¹⁸ Petima porā meme katu Nhandejáry-pe. Ereiko asy ramo jepe, etima porā joty íxupe. Ha Nhandejáry oipota erejapo upéa gwive. Hesu Cristo pende py'a-py oĩ-gwi, evy'a joty. Hasy rehevē evy'a joty kuri eiko-vy.

¹⁹ Ha Nhe'ẽ Marangatu tee va'e ani eremboyke teĩ.

²⁰ "Nhandejáry nhe'ẽ-py xe remimombe'u" he'i va'e-rehe gwive, ani "Onhe'ẽ rei rei" ere teĩ. Ani erepyrū teĩ inhe'ẽ-rehe.

²¹ Pejeapysaka porā katu gwī omombe'u va'e nhe'ẽ-rehe peikwaa porā hagwā Nhandejáry nhe'ẽ para'e, teko rei nhe'ẽ para'e. Upéa, Nhandejáry nhe'ẽ va'e, pehendu katu. Peipyhy mbarae tape porā.

²² Tape vai-gwi ae esẽ. Oime raẽ va'e mba'evai-gwi epoi katu.

²³ Nhandejáry ko nhane mbopy'agwapyha voi. Ha'e nga'u tapene mopotīmba katu. Pende py'a tomoatyrō porā porā katu. Tonhangareko porā katu Nhandejáry pene nhe'ẽ-rehe, pende py'a-rehe, pende rete-rehe ave penhemongy'a e'ŷ hagwā. Pejejavy e'ŷ rehevē tonhangareko. Ogwejy jevy ou-vy peve Nhandejáry Hesu Cristo tonhangareko porā katu pende-rehe.

²⁴ Nhandejáry ndaha'éi okambi kambía va'e onhe'ẽ. Ohekoviärō e'ŷ va'e voi onhe'ẽ. Pende poravo rire, ojapo-ta voi pende-rehe he'i hagwe-rami.

²⁵ Pembojeupi katu pene nhe'ẽ Nhandejáry-pe ore-rehe, ore re'ýi kwéry.

²⁶ Xe rekoviá peikwawā kwavā katu Hesu reroviah gwive.

²⁷ Emonhe'ẽ katu kóa kwatia nhe'ẽ entéro Hesu reroviah-pe gwive. Xe Paulo Nhandejáry nhe'ẽ-py ha'e-ta peẽ-my eremonhe'ẽ hagwā íxupe kwéry. Neremonhe'ẽi ramo Hesu renduha-pe gwive, oikwaa arã Nhandejáry, ojohu vai arã.

²⁸ Tapende rexakwaa rei katu Nhandejáry Hesu Cristo pende rovasa porāvy.

Paulo remimombe'ukwe Tessalônica tetā mygwa pegwarā 2 segunda epístola de Paulo aos tessalonicense

Paulo inhirū ave oromondo jevy Tessalônica tetā mygwa-pe onhe'ẽ kwatia-rehe

¹ Hesu reroviah Tessalônica tetā-my oiko va'e. Ore Paulo, Silvano, Timóteo ave oromondo-ta peẽ-my ore nhe'ẽ. Kwatia-rehe oromondo-ta. Peẽ katu Nhandedjáry Nhanded Ru tee va'e rehewa, Nhandedjáry Hesu Cristo re'yi ave.

² Tapende rovasa katu pende rexakwaa rei-vy Nhandedjáry Nhanded Ru tee va'e. Tapende rexakwaa rei katu Nhandedjáry Hesu Cristo ave. Tapene mbopy'agwapy katu ave.

Ojehexa uka jevy va'erā Nhandedjáry Hesu

³ Ha peẽ katu, ore re'yi kwéry, perovia porāve rāve katu peho-vy Nhandedjáry-pe. Pejohayhu porāve rāve katu pekwa-vy ave. Pende rovasa porā-gwi orotima Nhandedjáry-pe pende-rehe kwéry. Naiporāi orotima e'ŷ ramo Nhandedjáry-pe. "Nhatima porā meme katu Nhandedjáry-pe hese kwéry" oro'e ro'e pende-rehe kwéry.

⁴ Perovia porā-gwi, pejohayhu porā-gwi ave, heta oronhe'ẽ porā pende-rehe. Hesu reroviah ojogwerooty haty haty-rupi gwive heta oronhe'ẽ porā meme pende-rehe oromboete-vy. "Hekoha porā porā voi" oro'e pende-rehe kwéry. "Ojererekasy ramo jepe, ohasa asy ramo jepe, Nhandedjáry rape-gwi katu ndoyeréi voi. Ogwerovia jaty kuri" oro'e pende-rehe oromboete-vy.

⁵ Ąy peiko asy Nhandedjáry ra'arō-vy. Ha Nhandedjáry oipota peiko asy ramo, perovia tee jaty íxupe. Upe rire pegwahē ramo Nhandedjáry oiko happy, pende ruvixa oiko ha-py pegwahē ramo, napemonhemotī motīry va'erā íxupe perovia tee-gwi. Upéixa voi Nhandedjáry ohexa uka-ta gwekoha porā.

⁶ Ojehexa uka jevy ramo Nhandedjáry Hesu, nde repy va'erā voi Nhandedjáry. Ne moingo asyhare-pe katu omoingo asy ave va'erā. Upéixa voi Nhandedjáry ohexa uka va'erā gwekoha porā.

⁷ Erehasa asy rire, nane mbohasa asy ukavéi-ma va'erā. Ha ore-vy ave nore mbohasa asy ukavéi-ma va'erā. Áry-rehe ojehexa uka ramo Nhandedjáry Hesu, nanhane mbohasa asy ukavéi va'erā. Nhandedjáry Hesu ojehexa uka va'erā gwembigwái mbaraete va'e ndive.

⁸ Hendy mbaraete tee rehewe ojehexa uka va'erā. Ogwahē ramo, ombohasa asy va'erā Nhandedjáry kwaa e'ŷha-pe. Hesegwa nhe'ẽ porā rendu e'ŷha-pe ombohasa asy va'erā ave.

⁹ Omboyke va'erā mombyry imondo-vy ojéhegwi. Opa hagwā-pyma oromondo va'erā inhe'ẽ rendu e'ŷha gwive. Ndou mo'āvéi-ma Hesu rexavy. Opu'aka teehee rehewe mburuvixagwasu tee-rami ojehexa uka ramo, ndohexa mo'āvéi-ma íxupe hikwái.

¹⁰ Ha upéva'e áry-py ogwahē ramo Nhandedjáry Hesu, omboete va'erā íxupe he'yi kwéry. Ojerovia va'e gwive hese, "Nde tuvixa mba'e va'e voi nde" he'i va'erā Nhandedjáry Hesu-pe imomba'egwasu-vy. Ha peẽ ave hese ojerovia va'e gwive pa'ū-my peẽ va'erā. Ore remimombe'u perovia-gwi peẽ va'erā upepy, he'yi kwéry pa'ū-rupi.

¹¹ Upéa-rehe oromondo meme va'e Nhandejáry-pe ore nhe'ẽ. Pende-rehe oromondo. Pende pe'a va'ekwe Nhandejáry peiko hagwā heko-rupi. Upéa-gwi orojerure rure íxupe pene mombaraete hagwā peiko hagwā heko-rupi onhemotí e'ý hagwā pendéhegwi. Ha pende rekoha porāse ko peē. Tapene mombaraete katu pende rekoha porāve rāve hagwā, perovia porāve rāve hagwā, pene rembiapo porā porā meme hagwā.

¹² Pene rembiapo porā ohexa ramo, omomba'egwasu va'erā Nhandejáry Hesu-pe héry mboete-vy. "Hesu réry iporā ete" he'i va'erā. Pene mboete va'erā ave. Héry-py peñ va'e tuvixa mba'e ko Nhandejáry-pe. Nhandejáry ko pende rovasa va'e voi. Pende rexakwaa rei va'e voi ave Nhandejáry Hesu Cristo. Upéa-gwi pene mboete va'erā. Nhandejáry-pe pemboete va'erā ave. Upéa-rehe tapende rovasa vasa katu Nhandejáry.

2

Pehekohavaiveetereivaeojekwaa ranheva'erā

¹⁻² Áy oromombe'u-ta peñ-my, xe re'ýi kwéry, kwateria-rehe Nhandejáry Hesu Cristo ou jevytaha rehewa nhe'ẽ. Gwupive nhanda rerahapa hagwā outaha rehewa nhe'ẽ oromombe'u-ta. Oĩ pene pa'ũ-my omombe'u va'e mo'ã peñ-my. Ani penhemoakã rasy uka rei teñ íxupe. "Ma'erā ereha'arõ jaty Hesu outaha áry? Ogwahē-ma voi" he'i mo'ã va'erā peñ-my. Xe ndaipotái voi perovia inhe'ẽ, ore re'ýi kwéry. Ani pene mbopy'a reraha rei, omombe'u-vy mo'ã peñ-my upéa nhe'ẽ. Oĩ he'i va'e, "Nhe'ẽ Marangatu tee va'e ko omombe'u nhanda-vy upéa nhe'ẽ" he'i mo'ã. Oĩ he'i va'e, "Kóixa voi Paulo remimombe'u" he'i mo'ã. Oĩ he'i va'e, "Upéa nhe'ẽ Paulo omoñ va'ekwe kwateria-rehe" he'i mo'ã.*

³ Upéixa omombe'u ramo, ani pene mbotavy uka rei va'erā. Áy ete katu nogwahē mo'ãi Nhandejáry áry igwejy hagwā. Kente kwéry yvypóry va'e gwive ojere ranhe va'erā Nhandejáry rekoha-gwi. Ojekwaa ranhe va'erā pe hekoha vaive eterei va'e, anháy ruvixa Satanás rembieraharā. Upe rire ae katu ogwejy va'erā ou-vy Nhandejáry Hesu.

⁴ Ha pe hekoha vaive eterei va'e voi ojekwaa ranhe va'erā. Opaixagwa tupā tee-pe, tupā ra'anga-pe ave ndoipotavéi omboeteve íxupe. Enterovéa remimboete gwive ndoipotavéi omboeteve. "Xe-vy mante xe mboete katu. Anive eremboete teñ tupāve" he'i va'erā. Oipota va'erā ojeupéte omboeteve. Oike va'erā Nhandejáry róga kakwaa-py ogwapy hagwā onhemonhandejáry ra'anga anga-vy. "Xe katu Nhandejáry" he'i mo'ã va'erā ójeho.*

⁵ Ma'erā po nde resarái nde-vy amombe'u va'ekwe-gwi. Pene pa'ũ-my xe aiko ramo amombe'upa porā-ma va'ekwe peñ-my.*

⁶ Ha pe hekoha vaive eterei va'e katu ne'írā ojekwaa. Hi'áry-py ae ogwahē va'erā. Anga ete ndojekwaa mo'ãi. Oĩ ijokoha. Mba'eixagwa po upe va'e peikwaa voi. Amombe'u va'ekwe-gwi peñ peikwaa voi. Peikwaa-ma voi-gwi peñ, namombe'u mo'ãvái-ma peñ-my.

⁷ Áy nhemi nhemi ha-py hembiapo vai. Oĩ ijokoha. Nombojekwaa ukái pe hekoha vai va'e. Upe rire oipe'a va'erā ijokoha Nhandejáry.

⁸ Oipe'a rire ae ojehexa uka porā va'erā ivai va'e. Upe va'e hekoha vai va'e ojekwaa ramo, ombarate rehewe ou va'erā Nhandejáry Hesu. Ojehexa uka porā arā ou-vy. Ou-ma ramo ojuka va'erā pe hekoha vai va'e-pe. Pytu-py ojuka va'erā íxupe.*

* **2:1-2** 1 Jo 2.18-19 * **2:4** Dn 11.36 * **2:5** Rm 1.21-25 * **2:8** Is 11.4

⁹ Upe va'e hekoha vai va'e ojekwaa va'erā anháy ruvixa Satanás nhe'ẽ-rupi. Nhandejáry Hesu ou e'ŷ mboyve, Nhandejáry rembiapo porā oha'ã a'ã oiko-vy va'erā. Hembiapo porā ra'anga anga rei va'erā oiko-vy. Opaixagwa nhane rembiexa e'ŷ va'e ojapo va'erā. Oipota, "Nhandejáry" he'i mo'ã hese kente kwéry. Omopondera uka uka va'erā ójehe iporombotavy-vy.

¹⁰ Nainheresendehái va'e-pe ombotavy va'erā. Opaixagwa ivai va'e ojapo va'erā ombotavy-vy. Upéa, Hesu-rehe ojerovia e'ŷ va'e, ohendu ramo anhetegwa nhe'ẽ, nohenduséi voi. "Iporā upéa nhe'ẽ. Nhahendu katu" nde'íry. Ndoipotái oresende íxupe Nhandejáry. Upéa-gwi noresende mo'ãi íxupe kwéry Nhandejáry.*

¹¹ Nohenduséi-gwi nhe'ẽ porā, pytū-my oiko hagwā Nhandejáry remimondo voi. Ombojejavy uka íxupe ijapu va'e ogwerovia hagwā.

¹² Upéixa ramo Nhandejáry ombohosa asy va'erā anhetegwa nhe'ẽ ogwerovia e'ŷ va'e-pe gwive. Entéro ojejavysse va'e gwive, ombohosa asy va'erā íxupe imondo-vy anháy renda-py.

Pende pe'a ranhe va'ekwe Nhandejáry pene resende hagwā

¹³ Ha peẽ katu, ore re'ýi kwéry, Nhandejáry Hesu rembihayhu va'e voi. Pende pe'a ranhe va'ekwe kente kwéry pa'ũ-gwi Nhandejáry pene resende hagwā. Omopotímba-ma ramo pende py'a Nhe'ẽ Marangatu tee va'e, perovia-ma ramo inhe'ẽ anhetegwa va'e, pene resende voi va'ekwe Nhandejáry. Upéa-gwi orotima porā porā meme Nhandejáry-pe pende-rehe. Naiporāi voi orotima e'ŷ íxupe.

¹⁴ Pende poravo va'ekwe ojave gwarā peiko hagwā, perovia-ma ramo Hesu rehewa nhe'ẽ porā, ore remimombe'ukwe peẽ-my. Pende poravo va'ekwe penhemomba'e hagwā peẽ-my gwarā, Nhandejáry Hesu Cristo ome'ẽ peẽ-my va'erā-rehe hendive peiko ramo. Iporāmba meme voi Nhandejáry Hesu onhemomba'egwasu ete ha-py. Upe-py peẽ pemoirū va'erā íxupe.

¹⁵ Upéa-gwi peẽ, ore re'ýi kwéry, anike pejere teĩ Nhandejáry rekoha-gwi. Perovia tee meme katu upe va'e nhe'ẽ anhetegwa va'e. Ani katu pemboyke teĩ pendéhegwi ore remimombe'ukwe. Anhemonhe'ẽ va'ekwe peẽ-my pene pa'ũ-my aime ramo va'ekwe. Kwatia ahai va'ekwe peẽ-my ave. Upéa nhe'ẽ-rupi gwive peiko meme katu peẽ.

¹⁶ Ha Nhandejáry Hesu Cristo katu, Nhandejáry Nhande Ru tee va'e ave tapende rovasa porā katu. Ha'e nhande rayhu va'ekwe, nhande rexakwaa rei va'ekwe ave, nhane mbopy'agwasu meme voi va'ekwe. "Xe ra'arō tee katu. Xe katu napombotavy mo'ãiry" he'i va'ekwe nhande-vy.

¹⁷ Tapene mbopy'agwasu katu Nhandejáry. Tapene mombaraete katu Nhandejáry pene mbopy'agwapy-vy iporā va'e gwive pejapo hagwā, nhe'ẽ porā porā va'e gwive pemombe'u hagwā.

3

Pejapo katu oração Nhandejáry-pe ore-rehe

¹ Ne'írā opa ore nhe'ẽ. Oromombe'u-ta vyteri, ore re'ýi kwéry. Áy orojerureta peẽ-my: "Pejapo katu oração Nhandejáry-pe ore-rehe, opa-rupi pya'e osarambi hagwā Nhandejáry Hesu rehewa nhe'ẽ, enterove omboete hagwā inhe'ẽ". Upéixa voi ogwahē va'ekwe peẽ-my inhe'ẽ.

² Ha inhe'ẽ renduha gwive ndogwerojojái herovia-vy. Oí tekoha-rupi e'ŷ oiko va'e, hekoha vai va'e ave. Upéa-rehe pejerure Nhandejáry-pe íxugwi ore resende hagwā.

* **2:10** Mt 24.24

³ Ha Nhandejáry Hesu katu nhane mbotavy e'ŷ va'e. He'i va'e gwive anhetegwa meme voi. Pene mombaraete va'erā. Upéa anháy ruvixa-gwi pene resende va'erā.

⁴ Ha'e katu ore mbojerovia va'e pende-rehe kwéry. Penhepyrū porā heraha-vy. Ore remimombe'u peẽ-my ndapeheja reíry va'erā. Pejapo meme joty va'erā. Orojerovia-ma voi pende-rehe. Hendive peiko jave orojerovia-ma pende-rehe.

⁵ Tapene mbopy'apyhy katu Nhandejáry Hesu peikwaa porā hagwā Nhandejáry pende rayhuha, pejere e'ŷ hagwā íxugwi. Hesu Cristo ojere e'ŷ hagwe-rami joty, ani pejere.

Tomba'apo ogana hagwā ójehe

(1 Ts 4.11-12; Ef 4.28-29)

⁶ Hesu reroviaha jepe oĩ ipituva va'e. Ndojaposéi mba'eve. Nohendúiry oro'e va'ekwe. Oromanda peẽ-my, ore re'ýi kwéry. Nhandejáry Hesu Cristo réry-py oromanda. Ani pemoirū íxupe kwéry.

⁷⁻⁸ Ha oroiko ramo pene ndive va'ekwe ndore pituváiry va'ekwe ore. Iporā peiko ore oroiko hagwe-rami. Upe va'e peikwaa voi. Oropaga paga va'e ore remi'urā-rehe. Ndorokaru reíry. Ha oromba'apo hatā hatā ae katu oroikovy ore mbaraeete reheve. Ore kane'õ ramo jepe oromba'apo joty. Áry pyhare ave oromba'apo oroiko-vy ponóike ipohýi eterei avave-pe ore remi'urā ome'ẽ ramo.

⁹ Upéixa ramo oromba'apo ore oroiko hagwe-rami peiko hagwā. "Xe nhe'ẽ mombe'uháry-pe iporā ereme'ẽ rei ho'u va'erā" he'i va'ekwe Nhandejáry. Ha ore ae katu oromba'apo joty orokaru hagwā, ore oroiko hagwe-rami ave peẽ peiko hagwā.

¹⁰ Oroiko ramo pene ndive va'ekwe, "Gwī om̄ba'apose e'ŷ va'e gwive tokaru e'ŷ jepe" oro'e kuri peẽ-my.

¹¹ Onhemombe'u ore-vy: "Ipa'ũ-my oĩ om̄ba'apo e'ŷ va'e, ipituva va'e. Oĩ omoakārasy rei va'e gwapixa-pe" he'i pende-rehe. Upe va'e-pe oromondo-ta ore nhe'ẽ, "Toiko tekoha-rupi. Tomba'apo ogana hagwā ójehe" oro'e.

¹² Nhandejáry Hesu Cristo réry-py oronhemonhe'ẽ íxupe om̄ba'apo hagwā. Tekoha-rupi oiko hagwā, gwembi'u repyrā-rehe om̄ba'apo hagwā oromanda íxupe.

¹³ Ha peẽ katu, ore re'ýi kwéry, ani peje teĩ, "Xe kwerái-ma, naxe retea'evéima xe rembiapo porā porā-gwi" ani peje teĩ. Ha peje ae, "Xe rapixa nopenáí ramo jepe, ajapo porā porā-ta joty íxupe" peje ae.

¹⁴ Oĩ para'e pene pa'ũ-my ohendu e'ŷ va'erā xe nhe'ẽ, xe remimondo peẽ-my ko kwatia-rehe amoĩ va'e. Upe va'e ohendu e'ŷ va'e, ani teĩ pemoirū íxupe. Peje Hesu reroviaha-pe: "Eheja ha'e anho ranhe toiko onhemotí hagwā" peje.

¹⁵ Ha nde a'e'ŷha-rami ani ererekko. Nde ryvy-rami ae ereko íxupe. Enhemonhe'ẽ porā katu íxupe ohendu hagwā xe nhe'ẽ.

¹⁶ Ha Nhandejáry Hesu nhane mbopy'agwapy va'e voi. Tapene mbopy'agwapy joa meme kena. Ojehu ramo jepe mba'e, tapene mbopy'agwapy porā joty. Toiko meme pene ndive kwéry Nhandejáry Hesu.

¹⁷ Áy xe tee-ma a-rami ahai: "Xe Paulo xe resāi. Peẽ pene resāi tipo ave?" ha'e-ta peẽ-my. Upéixa meme ahai amoĩ-vy kwatia tia-rehe xe réry pehexa ramo, "Paulo nhe'ẽ tee voi nipo ra'e upe va'e" peje va'erā.

¹⁸ Tapende rexakwaa rei katu Nhandejáry Hesu Cristo pende rovasa porā-vy.

Paulo remimombe'ukwe Timóteo pegwarã 1 primeira epístola de Paulo a Timóteo

1 Xe Paulo amondo-ta nde-vy Timóteo, xe nhe'ẽ. Xe Paulo Cristo Hesu remimondo va'e voi. Ha'e-ma nhane remiha'arõ va'e voi. Inhe'ẽ-py aha hemimondo ramo. Nhandejáry nhane resendeharã nhe'ẽ-py ave aiko-vy hemimondo ramo.

2 Úy amondo-ta nde-vy, Timóteo, xe nhe'ẽ. Xe remimombe'ukwe-rupi ereiko-magwi, nde erejerovia-ma Hesu-rehe. Upéa-gwi nde xe ra'y ete ramigwa voi ereiko-ma nde xe-vy. Tande rexakwaa rei katu Nhandejáry Nhande Ru, Nhandejáry Cristo Hesu ave nde rovasa porã-vy. Toity katu gwesa nde-rehe nde poriahuvvereko-vy. Tane mbopy'agwapy katu.

Enhemonhe'ẽ katu gwĩ omombe'u joavy avypa va'e-pe

(Rm 16.17; 1 Tm 6.3-4; 2 Tm 2.23; Tt 1.10-16; 3.9)

3 Macedônia yvy-py aha jave, amombe'u va'ekwe nde-vy ne rembiaporã. Úy amombe'u jevy-ta: Epyta katu Éfeso tetã-my, erenhemonhe'ẽ hagwã gwĩ oporombotavy rei okwa va'e-pe, “Anive eremombe'u joavy avy teĩ Cristo rehewa nhe'ẽ” ere hagwã íxupe kwéry.

4 “Ani eremboyke teĩ nhe'ẽ porã. Inhe'ẽ rei rei va'e nhe'ẽ ani erehendu teĩ. Hembypykwe réry-rehe ani erepena meme teĩ. Ijapy e'ŷ va'e upéa rehewa nhe'ẽ. Upéa rehewa nhe'ẽ-rehe erepenase ramo, nerehenduséi va'erã nhe'ẽ porã” ere katu upe oporombotavy rei va'e-pe. Upeixagwa nhe'ẽ-rehe opena ramo, onhonhe'ẽ mbojevy jevy rei va'erã hese okwa-vy. Nhandejáry rembiapose ndojapói. Nhandejáry re'yi-rehe nonhangarekói ave. Niporã voi hekoha. Jarovia tee ramo ae katu Nhandejáry nhe'ẽ, jajapo arã hembiapose, nhanhangareko porã arã voi ave he'yi kwéry-rehe.

5 Aipo ramo enhemonhe'ẽ katu íxupe kwéry ojohayhu rei hagwã okwa-vy. Ha nhande py'a porã ramo ae katu oĩ vérani nhande py'a-py, “Ne rembiapo porã ra'e” he'i va'e nhande-vy. Upe jave jarovia tee ramo anhetegwa va'e katu, jajohayhu porã tee rei va'erã. Upéa-gwi enhemonhe'ẽ katu íxupe kwéry opena e'ŷ hagwã nhe'ẽ rei-rehe hikwái. Ojohayhu rei hagwã ae okwa-vy.

6 Ha ha'e kwéry ndaiipy'a porãiry, nahembiapo porãiry, ndogwerovia teéiry. Upéa-gwi ojehesa rerova uka nhe'ẽ rei-rehe onhombo'e mbo'e rei okwa-vy.

7 Oporombo'ese mo'ã hikwái. “Orohekombo'e porã porã voi” he'i ójeho ramo jepe, “A-rami ae teko porã Nhandejáry remimbota” he'i ramo jepe, ndoikwaái joty he'i va'erã. Hi'arandu porã va'e-rami mo'ã oporombo'e oiko-vy. “Ore oroikwaa voi” he'i mo'ã ójeho ha gwemimombe'u porãrãgwe katu ndoikwaáiry omombe'u va'erã.

Hekoha vai va'e-pe ae katu, “A-rami tekoha e'ŷ-rupi ereiko” ja'e íxupe

8 Nhahekombo'e porã ramo, iporã voi nhande-vy Moisés amyrí he'i va'ekwe nhane rekorã me'ẽ-vy va'ekwe.

9 Hekoha porã va'e-pe, “Ani erejapo vai teĩ” nde'íry. Ha heko vai va'e-pe ae katu, “Tekoha e'ŷ voi ko ko'ã va'e” ja'e íxupe. Upéixa hekoha porã va'e nanhahekombo'éiry. Ha heko vai va'e ae katu nhahekombo'e porã tekoha porã-rupi ave oiko hagwã. Oĩ hekoha porã-rupi e'ŷ oiko va'e, oĩ ohenduse e'ŷ va'e ave. Oĩ Nhandejáry-pe omboete e'ŷ va'e, oĩ ojejavý va'e ave. Oĩ ipy'a ky'a

va'e, oĩ Nhandejáry-rehe opuka va'e ave. Oĩ oporojuka va'e, oĩ gwu ojuka va'e, oĩ osy ojuka va'e ave.

¹⁰ Oĩ otĩ kwaa e'ŷ reheve gweko ky'a-rupi rei oiko va'e. Ohasa verei-ma tekoha. Oĩ oporovende va'e, oĩ ijapu va'e, oĩ, "Nhandejáry réry-py amombe'u-ta anhetegwa va'e" he'i ramo jepe ójehe, ijapu joty oiko-vy. Upéixa oiko va'e-pe nhahekombo'e porã tekoha porã-rupi oiko hagwã. Hesu Cristo rehewa nhe'ẽ ombojevyse va'e-pe gwive, nhahekombo'e mbo'e joty jaiko-vy. Entero upéixa okwa va'e ndatekoháiry ave ogwereko.

¹¹ Upéa oikwaa uka nhande-vy Nhandejáry onhe'ẽ mombe'u-vy. Hesu Cristo rehewa nhe'ẽ nhahendu ramo, "Tuvixa mba'e nipo ra'e Nhandejáry. Hekoha porã ete va'e nipo ra'e. Nhande rovasa vasa va'e nipo ra'e" ja'e hese. Upéa nhe'ẽ porã, "Emombe'u katu, Paulo" he'i xe-vy va'ekwe Nhandejáry.

"Xe poriahuvereko eterei-ma va'ekwe" he'i ójehe Paulo otima porã-vy Hesupe

¹² Xe atima porã Nhandejáry Hesu Cristo-pe. Xe-rehe ojerovia-gwi ome'ẽ xe-vy xe rembiaporã aporopytygwõ hagwã. Xe mombaraete ave ajapopa hagwã xe-vy hemimombe'u.

¹³ Yma anhe'ẽ rei rei hese aiko-vy va'ekwe. He'ŷi-pe gwive areko asy va'ekwe. Xe seve seve aiko ramo va'ekwe, he'ŷi-pe areko poxy va'ekwe areko asy-vy. Upéixa voi xe rekokeva va'ekwe. Upéixa jepe xe aiko va'ekwe, ome'ẽ joty va'ekwe xe-vy xe rembiaporã, xe poriahuvereko rei joty va'ekwe Cristo. Ndaroviái joty va'ekwe íxupe. Gwaperã oikwaa e'ŷ va'e-rami xe py'agwasu va'ekwe. Ndaikwaáiry vyteri íxupe jave ha'e katu oity joty gwesa xe-rehe. Upéa-gwi xe poriahuvereko joty va'ekwe xe-vy.

¹⁴ Xe rexakwaa porã rei va'ekwe xe rovasa-vy Hesu Cristo. Áy katu peteixa amoirũ-ma íxupe, xe mboherovia uka ójehe, xe mbohekorayhu-ma ave.

¹⁵ Anhetegwa voi ko Hesu rehewa nhe'ẽ jarovia ku'a ku'a e'ŷ hagwã. Ogwahé ou-vy va'ekwe Hesu Cristo ko yvy-py. Gwí heko jejavy va'e kwéry resende-vy ou va'ekwe. Ha xe katu xe reko jejavyve voi va'ekwe enterovéa-gwi.

¹⁶ Ha Hesu Cristo oity joty va'ekwe xe-rehe gwesa xe poriahuvereko-vy. Ohexa ukase nhande-vy gweko kiriríha. Xe ajejavy eterei ramo jepe, hekopytu'u joty oiko-vy xe-vy. Upéixa ohexa uka nhande kwéry-pe gweko kiriríha. Xe rekokeva rexaha, "Heko kirirí voi oiko-vy Paulo-pe Hesu Cristo" he'i va'erã xe-rehe. Oĩ xe renondegwa ogwerovia ave va'erã Cristo-pe ijapy e'ŷ reheve oiko hagwã Nhandejáry ndive. Xe rekokeva rerakwã rendu-vy, "Nhande-rehe oity voi gwesa Cristo Hesu nhande poriahuvereko-vy" he'i va'erã.

¹⁷ Tomboete katu Nhandejáry Nhande ruvixagwasu-pe. Opa e'ŷ reheve nhande ruvixa ramo oiko va'e. Opa e'ŷ reheve tomomba'egwasu íxupe. Ha'e omano e'ŷ va'e, jahexa e'ŷ va'e. Ha'e tuvixa mba'e, ha'eixagwa ndoikói va'e. Tonhemboete katu Nhandejáry-pe enterove va'e. Amém.

Soldado ojeity uka e'ŷ-vy íxupe onhemombaraete va'e reko-rami, eiko

¹⁸ Áy xe Paulo amombe'u-ta nde-vy ne rembiaporã: Enhemonhe'ẽ katu upe pygwa-pe. Xe ha'e hagwe-rami, enhemonhe'ẽ katu íxupe kwéry. Nde xe ra'y-rami ereiko va'e Timóteo. Ne mandu'a katu he'i va'ekwe-rehe Nhandejáry nhe'ẽ-py omombe'u va'ety ne mombe'u-vy. Topyta inhe'ẽ nde py'a-py ne mombaraeteve hagwã. Soldado ojeity uka e'ŷ-vy íxupe onhemombaraete va'e reko-rami, eiko erenhemombaraete-vy íxupe. Tape porã-gwi ani ereva. Ijapu va'e nhe'ẽ embojevy jevy katu.

¹⁹ Upéixa ereiko jave, erovia porã porã katu ereiko-vy anhetegwa va'e. Nde py'a-py, "Iporã upéa" oĩ vér ami joty nde-vy he'i va'e. Upe he'i va'e ae ejapo meme katu. Oĩ gwĩ he'i vér ami íxupe ipy'a-py ndojaposéiry va'e. Ojapose va'e rei mate ojapo. Kanoa ojejapi va'e pya'e oyere ovapy-py oho y gwy-py. Upéixa ete voi ipy'a-py oĩ va'e nohendusevái va'e pya'e oyere oho-vy Hesu rape-gwi onhehundi hagwã.

²⁰ Upeixagwa voi Himeneu, Alexandre ave, nohendusevái ra'e. Sapy'a ame'ẽ kuri íxupe kwéry anháy ruvixagwasu Satanás po-py, Hesu reroviah onhomboaty aty haty-gwi amosẽ-vy. Ponove onhe'ẽ nhe'ẽmba rei Nhandejáry-rehe amosẽ. "Nanhe'ẽ rei rei mo'ãvái-ma hese" aipota he'i ójehe-gwi amosẽ-ma kuri íxupe kwéry. Aipota Nhandejáry ohekorerova jevy íxupe kwéry.

2

Enterove va'e-rehe tombojeupi Nhandejáry-pe onhe'ẽ (Ef 6.18; Cl 4.2-4)

¹ Aipota eterei Cristo reroviah ojapo oração. Tojapo oração ojóehe kwéry. Opaixagwa kente kwéry-rehe tojapo oração. Tojerure gwemikotevẽ-rehe, tojerure gwapixa pegwarã-rehe, totima porã Nhandejáry-pe ave.

² Ha mburuvixa kwéry-rehe entero omanda va'e kwéry ndive-rehe tojapo ranhe katu oração jaiko porã hagwã nhande py'agwapy rehewe, ojehu e'ŷ hagwã nhande-vy mba'eve, tekoha-rupi ae jaiko hagwã Nhandejáry mboete-vy. Upéa-rehe tojapo voi katu oração mburuvixagwasu kwéry-rehe omanda porã hagwã nhande-rehe.

³ Enterove va'e-rehe jajapo ramo oração ojohu porã voi Nhandejáry nhane resendehaty.

⁴ Oipota enterove onheresende. Oipota enterove oikwaa anhetegwa va'e. Upéa-gwi enterove va'e-rehe jajapo ramo oração, nhande rerovy'a tee voi Nhandejáry.

⁵ Ha Nhandejáry Nhande Ru peteĩ ha'e anho oiko va'e. Ta'ýry Cristo Hesu, nhande-rami ou va'ekwe peteĩ ha'e anho oiko va'e ave. Ha'e anho nhane mbojoja va'e Nhandejáry ndive.

⁶ Ha'e anho va'ekwe ho'áry-py ojejuka uka va'ekwe enterove va'e-rehe happy oresendepa hagwã. Ho'áry-py omano va'ekwe. Upéa jaikwaa ramo, "Aipo ramo Nhandejáry oipota enterove onheresende nipo ra'e" ja'e arã jaikwaa-vy.

⁷ Upéa nhe'ẽ amombe'u hagwã xe mondo va'ekwe Nhandejáry. Ndaxe apúiry. Anhetegwa va'e ae amombe'u. Xe mondo va'ekwe judeu e'ŷ kwéry-pe arovia uka hagwã íxupe kwéry anhetegwa va'e nhe'ẽ.

Hesu reroviah onhomboaty aty ramo, kwimba'e rekoha, kunha rekoha a-rami

⁸ Upéixa aipota kwimba'e kwéry ojapo oração opa-rupi. Entero ojogweroaty aty haty-rupi tojapo oração. Oĩ ramo ojejaví va'e, ani katu ojapo oração enterove resa-py. Opy'a poti rehewe ae katu tojapo oração. Opoxy e'ŷ rehewe, onhonhe'ẽ mbojevy jevy e'ŷ rehewe tojapo katu oração.

⁹ Áy ahai-ta kunha kwéry-rehe. Aipota onhemonde ójehe imandu'a porã hagwã-rami. Ndaipotáí nonhenotí kwaáiry. Ojehexa uka vai hagwã-rami oiko hagwã ndaipotáí. Aipota tekoha-rupi onhemonde oiko-vy. Topena e'ŷ katu ójehe onhemomorã e'ŷ hagwã-rehe. Ani katu oakã anho-rehe opena omborepara ukase-vy ójehe. Tomonde e'ŷ katu opaixagwa rei ójehe. Ouro pérola ave tomonde e'ŷ katu. Mba'e hepy hepy rei va'e ndaipotáí onmonde ójehe ijaorã onhemboete ukase-vy mo'ã.

¹⁰ Tahembiapo porā ae katu ojehexa uka porā hagwā. Gwī, “Oromboete Nhandejáry-pe oroiko-vy” he'i va'e ójehe, tahembiapo porā porā katu oiko-vy.

¹¹ Tohendu katu kunha onhe'ẽ e'ỹ reeve. Gwī Hesu reroviaha-rehe onhangarekoha nhe'ẽ tohendu katu.

¹² Ndahejái kunha kwimba'e-pe ohekombo'e. Tomanda e'ỹ kwimba'e-rehe kunha. Onhe'ẽ e'ỹ reeve tohendu ae katu inhe'ẽ.

¹³ Yma va'ekwe kwimba'e ypy Adão onhemoingo ranhe va'ekwe. Ha upe rire katu onhemoingo ave va'ekwe hembirekorā Eva.*

¹⁴ Ha kwimba'e ypy Adão katu nombotavýi va'ekwe íxupe anháy ruvixa Satanás. Ha hembireko katu onhembotavy uka rei va'ekwe. Upéi ohasa-ma Nhandejáry nhe'ẽ. Upéa-gwi ndahejái kunha kwimba'e-pe ohekombo'e.*

¹⁵ Ha kunha katu onheresende-ma va'erā. Nhandejáry-rehe ojerovia oiko-vy ramo, ojohayhu oiko-vy ramo, Nhandejáry remimbota ojapo-ma oiko-vy ramo, tekoha-rupi oiko-ramo ave, onheresende-ma va'erā voi. Imemby hagwā ohasa asy ramo jepe, onheresende-ma va'erā.

3

Hesu reroviaha nhangarekoha mba'éixa pa oiko va'erā

(Tt 1.6-9)

¹ “Gwī Hesu reroviaha nhangarekoha ramo oikose va'e, iporā va'e voi ha'e ojapose” ja'e. Upéa jaikwaa voi.

² Ha Hesu reroviaha nhangarekoha ramo oikose va'e katu, toiko porā pono, “Ojejavy-ma ra'e” he'i hese. Peteĩ kwimba'e peteĩ kunha ndive mate toiko. Hesu reroviaha-pe tomogwahē porā, toporombo'e porā ave. Tojejoko kwaa taipu'aka ójehe, taimandu'a porā hese. Upéixa heroviaha nhangarekoha rekoha.

³ Toka'u e'ỹ oiko-vy, toporonupā e'ỹ oiko-vy. Taheko kirirī ae oiko-vy, tonhorairō e'ỹ ave oiko-vy. Toiko e'ỹ pirapire momba'egwasuha ramo.

⁴ Tonhangareko porā gwóga pygwa-rehe. Tohendu voi katu inhe'ẽ ta'ýry tajýry omboete-vy íxupe.

⁵ Gwóga pygwa-rehe nonhangareko kwaái ramo mba'éixa po onhangarekota Hesu reroviaha onhomboaty va'e-rehe?

⁶ Ogwerovia ramo va'e toiko e'ỹ katu Hesu reroviaha nhangarekoha ramo. Onhembotuvixaseve mo'ã arā oiko-vy. Aipo ramo anhaygwasu-pe ogwereko asy hagwā-rami ave, ogwereko asy arā íxupe Nhandejáry.

⁷ Hesu reroviaha nhangarekoha taimandu'a porā hese Hesu-rehe ojerovia e'ỹ va'e. Tape iporā e'ỹ va'e-rupi oho ramo, ojehexa uka vai ramo ae, onhe'ẽ vai-ta ave hese. Anháy nhuhā-py ho'a va'e-rami oiko, ipu'aka arā hese anhaygwasu gweko-rupima oity va'erā íxupe.

Hesu reroviaha pytygwōha reko a-rami

⁸ Upéixa voi heroviaha nhangarekoha rekoha. Ha ha'e kwéry hekoharamima ave oiko heroviaha pytygwōha. Tomboete íxupe. Gwī op'y'a ky'a omo'ã kwaa va'e-rami toiko e'ỹ katu. Toka'u e'ỹ katu. Pirapire momba'egwasuha-rami rei toiko e'ỹ katu ave.

⁹ Togwerovia tee katu op'y'a potī reeve Nhandejáry rembigwaa uka nhande-vy nhande rekora.

¹⁰ Enterove va'e resa-py toiko ranhe ojekwaa porā hagwā hekoha. Upéi ojekwaa porā rire mante, toiko jepe Hesu reroviaha pytygwōha ramo.

* 2:13 Gn 2.7,21-22 * 2:14 Gn 3.1-6

¹¹ Upéixa toiko ave hembireko kwéry. Tomboete ave íxupe. Tonhe'ẽ rei rei e'ŷ gwapixa-rehe. Toka'u e'ŷ ave hembireko kwéry. Ojeroviapa hese va'e-rami ae katu toiko katu.

¹² Peteĩ kunha ndive oiko va'erã heroviaha pytygwõha. Tonhangareko porã gwa'ýry-rehe gwajýry-rehe ave. Entéro gwóga pygwa-rehe tonhangareko porã katu.

¹³ Hembiapo porã ramo omboete va'erã íxupe. Nonhembohorýi arã hese. Imandu'a porã va'erã hese. Aipo ramo, otĩ e'ŷ reheve, ojoehe onhombohory e'ŷ reheve omombe'u va'erã Cristo rehewa nhe'ẽ.

Nhandejáry re'ýi rekoharã amombe'u-ta nde-vy

¹⁴ Pya'e agwahẽse aha-vy nde ha-py. Agwahẽse ramo jepe nde ha-py, amondo-ta joty xe nhe'ẽ kwaitia-rehe.

¹⁵ Oĩ para'e xe jokoharã. Upéa-rehe ahai-ta nde-vy gwarã kwaitia ereikwaa hagwã mba'éixa pa Nhandejáry re'ýi rekoha. Nhandejáry re'ýi ja'e entéro heroviaha onhomboaty aty va'e kwéry-rehe. Nhandejáry oikove meme va'e, heroviaha kwéry imba'e ete voi. Ha'e kwéry onhangareko anhetegwa nhe'ẽ-rehe pono ijapu va'e omombe'u joavy avypa. Oĩ ramo ijkoha, opyta porã óga. Ndo'a reíry, ndoity reíry. Upéixa ete ndoity reíry va'erã anhetegwa nhe'ẽ oĩ ramo hese onhangareko va'e.

¹⁶ Tuvixa mba'e voi nipo ra'e Nhandejáry rembiexa uka nhande-vy. Tekoha porã ohexa uka va'ekwe nhande-vy. Hesu rehewa ohexa uka va'ekwe. Ha'e nhande-rami ojehexa uka va'ekwe. Nhande rete-rami ave hete. "Ipy'a potí-ma" he'i va'ekwe hese Nhe'ẽ Marangatu tee va'e, hekoha porãha rexu uka-vy. Nhandejáry rembigwái yváy pygwa oma'ẽ va'ekwe hese. Judeu e'ŷ va'e retã retã pa'ũ-rupi onhemombe'u mbe'u va'ekwe. Ko yvy-rupi ogwerovia-ma va'ekwe íxupe. Nhandejáry onhemomba'egwasu ha-py ogwerojeupi íxupe heraha-vy.*

4

Oporohekombo'e vai va'e ojekwaa va'erã

(Cl 2.16-17)

¹ Ko'a-rami Nhe'ẽ Marangatu tee va'e remimombe'u porã: "Hesu ogwahẽ jevyha áry renonde ojekwaa va'erã oporohekombo'e vai va'e. Oporombo-tavy va'e nhe'ẽ anháy remimombe'u ohendu va'erã. Anháy arandu-rupi oiko va'erã" he'i Nhe'ẽ Marangatu tee va'e.

² Oporombo'e joavy avy rei va'erã. Opy'a ky'a ombojekwaa e'ŷ ramo jepe, ijapu joty va'erã. Ipy'a ky'a ramo jepe, "Ndajapo vaíry" he'i rei joty va'erã ojéupe. Gwĩ imba'e raku-py ombopere va'e-rami ombopere opy'a. Gwasy ohendu e'ŷ va'e-rami oiko. Ndoikwaái gwekoha vai.

³ "Anive eremenda tei. Omenda e'ŷ va'e mante ojapo Nhandejáry remimbota" he'i mo'ã va'erã upe hekoha vai va'e. "Oĩ ja'u e'ŷ va'erã. Anive ere'u tei" he'i mo'ã va'erã anháy arandu-rupi oporombo'e rei-vy. "Ndaja'úi" he'i ramo jepe, Nhandejáry remimoingokwe joty nhande-vy gwarã. Nhandejáry oipota ojéupe otima porã Hesu reroviaha anhetegwa oikwaa va'e tembi'u hemimoingokwe-rehe.

⁴ Entéro Nhandejáry remimoingokwe iporã meme voi. Ndoikói ja'u e'ŷ va'erã. Nhatima porã ramo íxupe ja'u hagwã-rehe, ja'u joty va'erã. Ndaipóri voi ja'u e'ŷ va'erã.

⁵ Upéa Nhandejáry rembijohu porã. "Iporã ere'u" he'i nhande-vy. Jajapo oraçao hese ave. Upéa-gwi ndaipóri ja'u e'ŷ va'erã.

* ^{3:16} Jo 1.14; Rm 16.25-26

*Erepara porā katu ndéjehe pono eremombe'u joavy avy
(2 Tm 1.13-14; Tt 2.7-8)*

6 Orohekombo'e hagwe-rami ave ehekombo'e nde re'yi kwéry-pe. Upéixa Hesu Cristo nhe'ẽ-py ereipytygwō va'erā íxupe kwéry. Upéixa hesegwa nhe'ẽ porā ererovia tee ramo, ne mbo'eháry nhe'ẽ erekendu ramo, ne mbaraeteve teve va'erā ereho-vy.

7 Ani erepena teĩ onhe'ẽ rei va'e-rehe. Hi'arandu e'ŷ va'e nhe'ẽ emboyke katu. Imombe'uharâgwe embojevy katu imondo-vy. Nde retea'e reheve ejapo katu Nhandejáry remimbota.

8 Jaripara puku ramo, nhanhemombaraete-vy jaripara. Upéixa iporã nhande rete-pe jaripara. Ha nhande retea'e reheve Nhandejáry remimbota jajapo ramo ae katu, nhanhemombaraeteve voi jaiko-vy. Áy ko yvy-rupi jaiko ramo, "Nhandejáry ndive jaikove meme va'erā" ja'e. Ha upe rire katu nhagwahē ramo Nhandejáry oiko ha-py ave, jaiko meme va'erā Nhandejáry ndive.

9 Upéa nhe'ẽ anhetegwa voi. Iporã jarovia íxupe.

10 Upéa-rehe hatã hatã nhamba'apo Nhandejáry nhe'ẽ nhamombe'u-vy. Jajerovia-ma Nhandejáry oikove va'e-rehe jaiko-vy. Ha'e enterove va'e resendeharã. Hesu reroviaha-pe oresende voi. Upéa-gwi nhamba'apo hatã inhe'ẽ mombe'u-vy.

11 Upéa nhe'ẽ, "Pejapo katu" ere erehekombo'e porã-vy íxupe kwéry.

12 Enhemoete uka katu íxupe, ani he'i hagwã nde-rehe, "Ikaria'y vyteri nipo ra'e Timóteo". Nde ae eiko porã katu Hesu reroviaha rekorã rexu uka-vy. Enhe'ẽ porã katu. Tekoha-rupi eiko íxupe kwéry. Eporohayhu, ejerovia Nhandejáry-rehe, otĩ kwaa va'e-rami eiko. Ójehe ha'e ae omombe'u va'e-rami eiko. Ohexa kwaa ramo nde-rehe, ohendu va'erā ne remimombe'u.

13 Agwahē va'erā aha-vy nde ha-py. Aha e'ŷ jave, emonhe'ẽ nhe'ẽ katu Nhandejáry kwtia nhe'ẽ onhomboaty va'e-pe. "Jajapo katu Nhandejáry nhe'ẽ" ere íxupe kwéry erehekombo'e porã-vy.

14 Omombe'u va'ekwe nde-vy Nhandejáry ne rembiaporã nde rexakwaa rei-vy. Upe va'e apo-vy ne kyre'ŷ ae katu. Are-ma omotenonde va'ekwe nde-rehe ne rembiaporã-rehe Nhandejáry nhe'ẽ-py omombe'u va'ety. Omoi va'ekwe ne akã-rehe opo heroviaha rerekwa kwéry. Upe jave ne mombaraete voi va'ekwe Nhandejáry ne rembiapo porãrã-rehe. Upéa-gwi ne kyre'ŷ katu ne rembiaporã apo-vy.

15 Ne renonde-py emoi meme katu ne rembiaporã omotenonde va'ekwe nde-vy. Enheme'ẽ íxupe upéa nhe'ẽ-rupi ereko hagwã. Aipo ramo upéa nhe'ẽ-rupi ereko porãve rãve ramo, ojekwaa porã va'erā nde rekoha porã.

16 Erepara porã katu ndéjehe. Ne remimombe'urã-rehe enhangareko katu ave, pono eremombe'u joavy avy. Upéixa ereko ramo erenheresende va'erā. Ne nhe'ẽ-rupi onheresende va'erā ave ne renduháry.

5

Hesu reroviaha gwive nde re'yi-rami ereko íxupe kwéry

1 Ani ereja'o teĩ ituja va'e-pe. Nde ru-rami ae katu ereko íxupe erenhemonehe'ẽ-vy. Ipyahu va'e-pe nde ryvy-rami ae ereko íxupe.

2 Ha igwaigwî va'e-pe nde sy-rami ae katu ereko íxupe. Ha kunha ipyahu va'e-pe katu ne reindy-rami ae ereko íxupe. Eremotí e'ŷ reheve ereko porã íxupe. Tekoha porã-rupi eiko íxupe kwéry.

Tembirekokwe he'yi e'ŷ va'e rehewa nhe'ẽ

³ Ìy amombe'u-ta nde-vy tembirekokwe kwéry he'ýi e'ý va'e rehewa nhe'ë. Oĩ tembirekokwe tee, ijekoha e'ýi va'e. Emboete íxupe hemikotevë me'ë-vy. Enhangareko katu hese imboete-vy.

⁴ Oĩ ave tembirekokwe imemby va'e hemiarirõ va'e ave. Tome'ë ranhe katu osy-pe, tome'ë ranhe katu ojari-pe hemikotevë tekoha-rupi oiko-vy. Omongakwaa hagwe-rehe tombohekoria katu íxupe. Upéixa ojapo ramo, ogwerovy'a arã íxupe Nhandejáry.

⁵ Ha upe tembirekokwe ijekoha e'ýi va'e katu ojerovia Nhandejáry-rehe oiko-vy. Pyhare ojapo oraçao oiko-vy, áry ramo ojapo ave: "Xe pytygwõ katu, xe pytygwõ katu" he'i Nhandejáry-pe ojerure-vy.

⁶ Ha tembirekokwe ojapose va'e rei ojapo va'e katu oikove vyteri ramo jepe omano-ma va'ekwe-rami oiko joty.

⁷ Gwí va'e ramigwa-pe ani onhembojekoha pende-rehe. "Peme'ë katu peteï teï pende sy-pe peteï teï pende jari-pe ave hemikotevë" ere tembirekokwe memby kwéry-pe, hemiarirõ kwéry-pe ave. Aipo ramo, "Gwe'ýi-pe nome'ëséiry. Hakate'ý" nde'íry arã hese.

⁸ Ha oĩ ramo gwe'ýi-pe nome'ëséi va'e, ha'e ae gwóga pygwa-pe nome'ëséi va'e ave, inhe'ë rendusere'ý va'e-rami oiko. Ogwerovia e'ýi va'e-gwi ha'e ojapo vaive.

⁹ Tembirekokwe iporahu va'e réry erehai kwaitia-rehe Hesu reroviaharehe ojeko hagwã. Entero tembirekokwe réry gwive ani erehai kwaitia-rehe. Gwí heroviaharehe ojeko va'erã gwive kwaitia-rehe emoï héry. Ha sessenta ro'y ogwereko va'e, nomenda mendái va'ekwe katu ha'e héry anho emoï kwaitia-rehe.

¹⁰ Hembiapo porã-gwi imandu'a porã hese va'e, omemby omongakwaa porã va'ekwe, gwóga-py gwe'ýi e'ý va'e omogwahë porã va'ekwe, Nhandejáry re'ýi-pe oipyhéi va'ekwe, ohasa asy va'e-pe oipytygwõ va'ekwe, opamba'e hembiapo porã porã hagwã ikyre'ý va'ekwe, upe va'e réry gwive emoï kwaitia-rehe Hesu-rehe ojerovia va'e-rehe ojeko hagwã.

¹¹⁻¹² Ha tembirekokwe ipyahu va'e réry katu ani eremoï teï kwaitia-rehe. Omendase ramo, pya'e jevy omenda va'erã. Omenda pyahu jevy ramo, Cristo-pe he'i hagwe-rami ndojapo mo'âvéi-ma va'erã. Íxupe ijapu-gwi nomboete mo'âvéi-ma íxupe.

¹³ Heroviaharehe ojeko ramo, inhate'ý-ma oiko-vy, óga óga-rupi ojopohu oho-vy. Inhate'ý-gwi imara'ë rei ojóhe. Gwapixa-rehe onhe'ë rei oiko-vy. Niporãi ja'e va'e-rehe onhomongoeta ngeta rei oiko-vy. Upéixa he'i va'e ndatekoháiry ogwereko.

¹⁴ Upéa-gwi aipota tembirekokwe ipyahu va'e omenda pyahu jevy onhembohóy jevy hagwã, imemby jevy hagwã. Aipota oiko porã meme pono nhande-rehe ija'e'ýha onhe'ë vai nhande-rehe. Nhande kwaa uka rei va'erã.

¹⁵ Oĩ tembirekokwe ipyahu va'e ojehesa rerova va'ekwe anhaygwasu Satanás-rehe. Upéa-gwi aipota omenda jevy.

¹⁶ Oĩ ramo kunha heroviaharehe ojehesa rerova va'ekwe anhaygwasu Satanás-rehe. Upéa-gwi aipota omenda jevy.

Heroviaharehe ojehesa rerova va'ekwe anhaygwasu Satanás-rehe.

¹⁷ Oĩ heroviaharehe ojehesa rerova va'ekwe anhaygwasu Satanás-rehe Nhandejáry nhe'ë omombe'u mbe'u-vy, oporombo'e mbo'e-vy ave. Nhamboete tee íxupe upéa-rehe.*

* 5:17 1 Ts 5.12-13

- 18** Upéixa he'i Nhandejáry kwátia nhe'ẽ:
 “Vaka trigo-rehe eremopyrũ ramo, omoha'yi hagwā ani erejoko katu ijuru.
 Eheja katu to'u”
 he'i. Pono ovare'a reheve omba'apo, pono omba'apo rei omba'apo va'e, he'i upéixa. He'i ave,
 “Omba'apo va'e-pe nhame'ẽ íxupe imba'apo repy”*
 he'i Nhandejáry kwatia nhe'ẽ. Upéixa ave voi Nhandejáry reroviaha rerekwa omba'apo porã Nhandejáry rembiapo apo-vy heroviaha kwéry pa'ū-my. Hembiapokwe repy nhame'ẽ porã ave íxupe, nhamboete tee-vy íxupe.
19 Ha oĩ ramo heroviaha rerekwa-pe oity vaise va'e, ani erepena inhe'ẽ-rehe.
 Ha oĩ ramo mokõi, mbohapy hexaháry ae katu, erovia inhe'ẽ.
20 Oĩ ramo ojejavy va'e, enterove resa-py, “Anive pejejavy teĩ” ere íxupe atýra-py. Aipo ramo henduháry ndojejavyséi va'erã, omongyhyje uka va'erã íxupe kwéry. Otĩ-ma va'erã.
21 Ha'e-ta nde-vy Nhandejáry resa-py, Cristo Hesu resa-py, Nhandejáry rembigwái yváy pygwa hembiporavo resa-py ave ha'e-ta nde-vy oromokyre'ỹ uka-vy. Ehendu katu xe nhe'ẽ. Ereikwaa porã e'ỹ ngatu, “Erejejavy-ma” ani ere teĩ heroviaha rerekwa-pe. Ani ereheja rei teĩ ojejavy va'ekwe ererovy'a-gwi íxupe. Enhemonhe'ẽ ae katu íxupe atýra-py, íxupe ere va'e gwive enterove ohendu hagwā.
22 Erepara porã ranhe heroviaha rerekwarã-rehe. “Eiko katu heroviaha rerekwa ramo” ani ere pya'e rei teĩ íxupe. Ani pya'e rei teĩ eremoĩ nde po hi'ári eremoingo-vy heroviaha rerekwa ramo. Emanha porã ranhe katu hese ereikwaa porã hagwā hekoha. Ojejavy oiko-vy va'e akã-rehe eremoĩ ramo nde po, “Ma'erã po Timóteo omoingo kuri ojejavy va'e-pe Hesu Cristo reroviaha rerekwa ramo? Ha'e ave ojejavy-ma nipo ra'e” he'i ave va'erã nde-rehe hikwái. Upéa-gwi ani pya'e rei eremoĩ teĩ nde po inhakã-rehe erehexa kwaa e'ỹ reheve.
23 Anive erey'u meme y rei. Nde rye hasy meme va'erã. He'u ave uva rykwere mixí va'e okwera hagwā nde rye.
24 Oĩ atýra-py ojejavy va'e. Ojekwaa porã hese hembiapo vaiha. Ne'írã vyteri omonhe'ẽ ramo, ojehexá-ma hese. Oĩ ave ojejavy nhemi va'e. Nombojekwaáiry voi ójehe hembiapo vai. Ha upé rire katu nhane monhesyrũha óra-py, ojekwaa porã-ma arã hese hembiapo vaikwe.
25 Upéixa ete oĩ atýra-py hembiapo porã va'e. Ojekwaa porã hese hekoha porã. Oĩ ave hembiapo porã nhemi va'e. Ha nonhomí meméi va'erã gwembiapo porã. Ojekwaa porã va'erã ae hese hembiapo porã porákwe. Oĩ ojejavy nhemi va'e, oĩ hembiapo porã nhemi va'e ave, Upéa-gwi ani pya'e rei eremoĩ teĩ nde po hese ereikwaa e'ỹ reheve, heroviaha rerekwa ramo eremoingo hagwā.

6

Heroviaha onhemomba'apo va'e rehewa nhe'ẽ

¹ Ìy amombe'u-ta nde-vy onhemomba'apo va'e rehewa nhe'ẽ. “Iporã katu amboete xe járy-pe” te'i ojéupe ojokwaiha pogwy-py oiko va'e. Nomboetéi ramo, Nhandejáry réry-rehe onhe'ẽ vai arã. Tomboete katu teko rei onhe'ẽ vai e'ỹ hagwā Nhandejáry réry-rehe. Nomboetéi ramo nhane remimombe'u-rehe onhe'ẽ rei arã.

* **5:18** Dt 25.4; Mt 10.10; Lc 10.7

² Oĩ ramo ijáry Hesu-rehe ojerovia oiko-vy va'e, tomboete joty íxupe. Ojoe'yi-gwi ndaiapotái omboete mixíve íxupe. Tomba'apo retea'e katu ojáry-pe. Heroviahá-pe ombo'apo, Nhandejáry rembiayhu va'e-pe ombo'apo. Tomba'apo retea'e katu upéa-gwi. Upéa nhe'ẽ-py eporombo'e. "Ejapo katu" ere íxupe.

Oĩ onhe'ẽ rei oiko-vy va'e

³ Oĩ omombe'ue ue va'e, Nhandejáry Hesu Cristo rehewa anhetegwa nhe'ẽ va'e rendusere'ŷha, ohekombo'e va'e-pe nohenduí va'e.

⁴ Upe va'e onhemboete ukase rei voi. Onhemboete ukase ramo jepe, mba'eve ndoikwaái joty. Onhe'ẽ rei oiko-vy. Hapixa nhe'ẽ rendusere'ŷ-vy oiko. Onhonhe'ẽ mbojevy jevy rei-vy oiko. Ha henduháry katu ndaija'ei ojóehe, onhorairõ, gwapixa-rehe ijapu. "Ipy'a vai xe ndive" he'i mo'ã hese.

⁵ Ipy'a vai-gwi, anhetegwa va'e-gwi ova. Onhonhe'ẽ mbojevy jevy oiko-vy. "Tajapo katu Nhandejáry remimbota hetave tave xe ma'erã ome'ẽ hagwã xe-vy" he'i rei rei ójehe oiko-vy.

Oĩ nhande-vy gwarã nhane remikotevẽ, javy'a jaiko-vy (Mt 19.23; Lc 12.15-21; Tg 5.1-6)

⁶ Oĩ imba'e reta va'e jepe, ndogwerovy'ái mba'e reta. Oĩ Nhandejáry remimbota ojapo va'e, ndahetáiry ogwereko ramo jepe, ogwerovy'a joty. Upéixa imba'e reta va'e-gwi ov'yave oiko-vy.

⁷ Nhande sy-gwi jaiko ramo va'ekwe, mba'eve ndajarúiry nhandejéupe gwarã. Ha upe rire katu nhamano ramo, mba'eve ndajarahá mo'ãiry jevy ko yvy-gwi.

⁸ Upéa-gwi oĩ ramo nhande-vy gwarã tembi'u, oĩ ramo nhande-vy gwarã ao, javy'a jaiko-vy katu. Nhane remikotevẽ jareko-ma.

⁹⁻¹⁰ Ha oĩ imba'e retase va'e. Ombo'e íxupe anháy gweko-rupi oity-vy. Onuhu'py oity-ma va'e-rami ogwereko ave íxupe anháy. Nainharanduí-gwi ivai va'e ojéupe gwarã oipota. Pirapire oipota eterei ojéupe gwarã ramo, opaixagwa rei ojehu íxupe. Ndoiko porãvéi-ma, onhehundi hagwã-pyma oiko. Oĩ pirapire mate omomba'egwasuve va'e. Anhetegwa va'e-gwi ojehesa rerova. Ova nhe'ẽ porã-gwi gwembiapokwe katu omboasy eterei.

Ne kyre'ŷ katu ererovia tee hagwã ereiko-vy

¹¹ Upeixagwa ani erejapo teĩ, Timóteo. Nde Nhandejáry-pe erenheme'ẽ va'ekwe voi. Ne renonde-py emoī meme iporã va'e. Emboete tee Nhandejáry-pe ereiko-vy. Ejerovia hese ejohayhupa rei ereiko-vy. Nde rerekoy asy ramo jepe, eipyhy joty katu Hesu rape. Nde reko kirirĩ rehevē ejogwereko.

¹² Oripara hatãse va'e ikyre'ŷ oripara hagwã. Upéixa ete ne kyre'ŷ katu ererovia tee hagwã ereiko-vy. Ogwahê pya'e hagwã ogwahêse ha-py oripara hatã oho-vy oripara va'e. Upéixa ete ave nde ave ne kyre'ŷ katu eregwahê hagwã Nhandejáry oiko haty-py. Ome'ẽ va'erã nde-vy nde rekoverã. Upe va'e Nhandejáry remime'ẽrã voi nde-vy. Upéa-rehe ne renói va'ekwe onhemoirũ uka-vy nde-vy. "Arovia-ma Nhandejáry Hesu Cristo-pe" atýra-py ere jave, ne renói-ma va'ekwe. Heta henduhare pa'ũ-my eremombe'u porã ramo, ne renói va'ekwe onhemoirũ uka-vy nde-vy.

¹³ Áy oromongyre'ŷ-ta Nhandejáry resa-py, Cristo Hesu resa-py ave oromongyre'ŷ-ta. Nhandejáry omoingove entéro va'e-pe. Ha Hesu Cristo ijukaharã mburuvixagwasu Pôncio Pilatos rovake-py jepe, omombe'u porã joty anhetegwa va'e. Hesa-py voi ha'e-ta nde-vy.

¹⁴ Xe ha'e hagwe-rami nde-vy ejapo katu. Xe nhe'ẽ gwive ehendupa. Eiko tekoha-rupi nde-rehe imandu'a porã hagwã. Nhandejáry Hesu Cristo ojehexa uka jevyha áry peve, ejapo upéa.

¹⁵ Ojekwaa hagwã áry-py Nhandejáry ombojekwaa va'erã íxupe. Nhandejáry heko vy'a va'e. Ha'eixagwa ndoikóiry mburuvixagwasu. Entéro mburuvixagwasu gwive ruvixave voi ha'e. Ipu'aka va'e kwéry gwive, ha'e ipu'akave va'e voi hese kwéry.

¹⁶ Ojéhegwí rei oikove opa e'ŷ reheve va'e. Ha'e oiko haty-py hendy mbaraete va'e voi. Upe-py nogwahéi va'erã teko rei. Avave ndohexáiry íxupe. Ohesa mbojevy-gwi, ndikatúi avave ohexa íxupe. Tonhemboete opa e'ŷ reheve enterove va'e-rehe taipu'aka meme katu oiko-vy. Amém.

Imba'e reta va'e ndikatúi ojerovia imba'e reta-rehe

¹⁷ “Ani penhembotuvixave xave teĩ peiko-vy” ere ko yvy-py imba'e reta reta va'e kwéry-pe. “Aníke pejerovia rei teĩ pene mba'e reta-rehe. Ojepe'a arã para'e pendéhegwí. Nhandejáry-rehe ae pejerovia. Ha'e opamba'e ome'ẽ me'ẽ nhande-vy nhande rexakwaa rei-vy jarovy'a hagwã hemime'ẽ me'ẽ nhande-vy” ere ae joty íxupe.

¹⁸ “Pene rembiapo porã porã katu. Heta perekoha-rami, ejapo porã katu. Ani pene rakate'ŷ teĩ pene mba'e-rehe. Pene kyre'ŷ ae katu peme'ẽ me'ẽ-vy ojóupe” ere katu íxupe kwéry.

¹⁹ “Upéixa ramo ae oĩ va'erã peẽ-my gwarã hekoviarã. Yváy-py penhon-gatu uka va'erã pendejéupe gwarã. Upearã-rehe ndapejerovia reíry va'erã. Peikove meme va'erã opa e'ŷ reheve. Pende rekoverã tee ome'ẽ va'erã peẽ-my Nhandejáry” ere imba'e reta va'e kwéry-pe.

“Ore arandu voi” he'i mo'ã va'e-pe ani eremoirũ

²⁰⁻²¹ Enhangareko porã katu, Timóteo, ne rembiaporã-rehe, nde-vy Nhandejáry remimombe'ukwe-rehe. Ha onhe'ẽ rei va'e-pe ani eremoirũ teĩ. Emboyke katu íxupe. Oĩ onhombo'e mbo'e rei va'e. “Ore arandu voi ore ra'e” he'i mo'ã ójehe kwéry. Ha nahi'arandu porã voi ra'e. Ojehesa rerova-ma oiko-vy nhe'ẽ porã-gwi hikwái. Upeixagwa-pe katu ani teĩ eremoirũ ereikový. Ijapy-ma xe nhe'ẽ. Tapende rexakwaa rei katu Nhandejáry pende rovasavy.

Paulo remimombe'ukwe Timóteo pegwarã 2 segunda epístola de Paulo a Timóteo

¹ Xe Paulo Cristo Hesu remimondo va'e. Nhandejáry remimbota-rupi inhe'ẽ-rupi aiko. Oipota xe amombe'u Cristo Hesu rehewa nhe'ẽ. "Cristo irũ va'e gwive oikove meme va'erã xe ndive" nde'i reíry va'ekwe Nhandejáry.

² Áy amondo-ta nde-vy, Timóteo, xe nhe'ẽ. Nde xe ra'y-rami ereiko va'e, xe rembihayhu va'e voi nde. Tande rexakwaa rei katu Nhandejáry Nhande Ru, Nhandejáry Cristo Hesu ave nde rovasa porã-vy. Toity katu gwesa nde-rehe nde poriahuvereko-vy. Tane mbopy'agwapy katu.

Paulo otima porã Nhandejáry-pe Timóteo-rehe

³ Atima porã nde-rehe Nhandejáry-pe. Xe rembypy omboete íxupe hagwe-rami ave, ha'e xe remimboete voi ave. Xe py'a potĩ rehevemboete íxupe. Oĩ vérámi xe py'a-py xe mombe'uha va'e-rami. Ndaipóri voi nipo ra'e xe rembiapo vaikwe xe py'apy pygwa omombe'u hagwã. Áry ramo pytû ramo ave ajapo meme oração. Ajapo jave, xe mandu'a meme nde-rehe.

⁴ Nde jahe'o-rehe xe mandu'a nde-rehe. Upéa-gwi orohexa nga'u eterei xe avy'apa jevy hagwã.

⁵ Xe mandu'a nde-rehe. Yma va'ekwe nde jari Lóide, nde sy Eunice ndive ogwerovia tee-ma Cristo Hesu-pe. "Áy he'ýi ogwerovia hagwe-rami ave Timóteo ogwerovia tee Cristo Hesu-pe oiko-vy" ha'e xejeupe nde-rehe. Upéa-rehe xe mandu'a ramo, atima porã Nhandejáry-pe nde-rehe.

Paulo oipota Timóteo ikyre'ý ojapo hagwã gwembiaporã

⁶ Ererovia tee-gwi, ha'e jevy-ta nde-vy: Ne kyre'ý katu erejapo hagwã ne rembiaporã. Amoï jave xe po ne akã-rehe, ome'ẽ va'ekwe nde-vy Nhandejáry ne rembiaporã ne mombaraete-vy.

⁷ Nomboúi va'ekwe Nhandejáry nhande-vy Nhe'ẽ Marangatu tee va'e nhane monghyuje-vy. Nhane mombaraete hagwã ae katu ome'ẽ va'ekwe nhande-vy. Jajohayhu hagwã, nhande pu'aka hagwã nhandéjehe ave ombou va'ekwe nhande-vy Nhe'ẽ Marangatu tee va'e.

Paulo oipota Timóteo ojerovia tee Nhandejáry-rehe ova e'ý rehevemboete íxugwi

⁸ Nhane mombaraete-gwi ani erenotĩ teĩ Nhandejáry Hesu Cristo rehewa nhe'ẽ eremombe'u-vy. Ha xe katu hese ha-py aĩ ramo jepe preso, ani joty xe renotĩ. Xe ndive ae katu ejererekoyu uka Hesu rehewa nhe'ẽ ohenduse e'ý va'e-pe. Nhandejáry ne mombaraete jave nde rerekoyu asyharã-gwi ani nde py'a mirĩ teĩ.

⁹ Ha Nhandejáry katu nhane resende va'ekwe. Nhande py'a potĩ rehevemboete jaiko hagwã gwe'ýi ramo nhane renói va'ekwe onhemoirũ uka-vy nhande-vy. Nhane rembiapo porã-rehe rei nanhane resende'i va'ekwe. "Ahexakwaa rei va'erã íxupe ahovasa-vy" he'i-gwi va'ekwe ojéupe nhane resende va'ekwe. Yma ete ne'írã vyteri oiko jave ko yvy va'ekwe he'i va'ekwe upéa nhande Cristo irürã-rehe.

¹⁰ Áy ae ojekwaa-ma he'i va'ekwe. Ojehexa uka-ma ou-vy nhane resende harã Cristo Hesu. Omano-gwi ndaipu'akavéi-ma nhande-rehe anháy nhande jukaharãgwe. Nhahendu ramo hesegwa nhe'ẽ porã, opa e'ý rehevemboete nhane moingove va'erã Nhandejáry ndive.

¹¹ Upéa nhe'ẽ porã mombe'uharã xe moĩ-ma va'ekwe. Hemimondorã xe moĩ-ma va'ekwe ave. Upéa nhe'ẽ-py aporombo'e hagwã xe moĩ-ma va'ekwe.

¹² Upéa-gwi xe rerekoy asy inhe'ẽ renduse e'ŷ va'e. Preso xe moĩ ramo jepe, nanotĩ mo'ãi joto xe jokwaha. Cristo Hesu ajerovia hese va'e ahekokwaa voi xe. “Onhongatu porã va'erã ae katu nhe'ẽ porã xe-vy gwemime'ẽgwe. Ou jevyha áry peve onhongatu va'erã” ha'e xejéupe arovia ku'a ku'a e'ŷ reheve.

¹³ Anhetegwa nhe'ẽ nde-vy amombe'u hagwe-rami ave, emombe'u mbe'u katu. Cristo-pe peteixa eremoirũ-gwi, anive ereva teĩ íxugwi. Ejerovia katu hese, ejohayhu ave.

¹⁴ Upe anhetegwa va'e nhe'ẽ ani ereheja teĩ avave omombe'u joavy avy jevy. Ojéupe ime'ëpyre onhongatu porã va'e-rami, enhangareko katu hese. Nhe'ẽ Marangatu tee va'e nhande py'a-py oiko va'e ne mombaraete va'erã.

¹⁵ Xe rerakwã erehendu ra'e. Gwĩ heroviaha Ásia yvy-py oiko va'e opa ojehesa rerovapa xéhegwí. Naxe moirũvái-ma Figelo, Hermógenes ave.

¹⁶ Tohexakwaa porã rei Nhandedjáry Hesu Cristo Onesíforo róga pygwa-pe. Xe preso aĩ ramo jepe, Onesíforo ou meme joto xe pohu-vy xe mbopy'agwapy hagwã va'ekwe. Ha'e nogwenotíry gwekoha xe pohu hagwã xe pokwaharehe aĩ ramo. Ogwahẽ joto xe rexav-y.

¹⁷ Ogwahẽ ramo Roma tetã-my, ikyre'ŷ joto xe reka reka-vy, xe johu hagwã.

¹⁸ Nhandedjáry ojehexa uka jevyha áry-py, nhane rembiapo apokwe-rehe nhande rerekoy ramo, togwereko porã katu íxupe oiporiahuvereko-vy. Hembiapo porãgwe rãgwe Éfeso tetã-my oiko jave xe pytygwõ-vy ereikwaa porã voi.

2

Ani ereva teĩ Cristo Hesu rape-gwi. Soldado hekoha porã va'e reko-rami ae katu eiko

¹ Heta oĩ xéhegwí ojehesa rerova oiko-vy va'e. Upéa-gwi tane mombaraete katu Nhandedjáry, xe ra'y Timóteo. Nde, xe ra'y-rami orogwereko va'e. Peteixa Cristo Hesu-pe eremoirũ-magwi, tande rexakwaa rei katu nde py'a-py ne mombaraete hagwã erejehesa rerova e'ŷ hagwã.

² Xe remimombe'u nde-vy anhetegwa voi. Amombe'u jave heta oĩ henudua. “Anhetegwa voi ko Paulo nhe'ẽ” he'i xe remimombe'u rendu-vy. Upe anhetegwa nhe'ẽ omombe'u jevy uka hese ojerovia va'erã-pe. Ha upe rire katu ne remimombe'ukwe hemimombe'urã jevy. Upe va'e nhe'ẽ-py oporomo'arandu jevy va'erã oikwaa e'ŷ va'e-pe.

³ Ani ereva teĩ Cristo rape-gwi. Soldado hekoha porã va'e oiko asy ramo jepe ohendu joto gwuvixa nhe'ẽ. Upéixa ete ave nhande jaiko asy ramo jepe nhanhembojere ukase va'e, ndajajeréi joto arã íxupe Nhandedjáry-gwi. Soldado oikoha-rami nde ave eiko joto Hesu Cristo-pe.

⁴ Upe soldado oservi porã jave ombovy'ase ójehe omanda va'e gwuvixa-pe. Upéa-gwi gwekohakwe-rehe nopenavéiry. Gweko oheja gwuvixa nhe'ẽ-py meme oiko hagwã. Ombovy'ase gwuvixa-pe oiko-vy. Upe soldado oikoha-rami nde ave eiko katu, Cristo nhe'ẽ-py anho ereiko hagwã.

⁵ Oĩ ogwahẽ ha-py oripara hatã va'e oho-vy. Ha ojéhegwí rei oripara va'e-pe katu ogwahẽ ranhe ramo jepe, nome'ëi va'erã mba'eve. Imboriparaha nhe'ẽ-rupi oripara ramo ae katu ome'ẽ arã íxupe. Upéixa ete imboriparaha nhe'ẽ-rupi oripara hatã va'e reko-rupi eiko katu nde ave. Entéro Cristo nde-vy he'i va'ekwe gwive ejapo katu ombohekovicia hagwã nde-vy.

⁶ Oĩ hetea'e va'e omoatyrõ-vy gwemitygwe ojéupe gwarã-rehe. “To'u ranhe gwemitygwe ijagwyje va'e” ja'e joto hese. Upéixa ete nde retea'e eremba'apo hatã-vy Cristo-pe nde-vy hemimbohekoviariã-rehe.

⁷ Ne mandu'a meme katu ereiko-vy xe nhe'ẽ-rehe. Upe jave xe ha'ese va'e oikwaa ukapa arã nde-vy Nhandejáry.

⁸ Ani ereva teĩ Hesu rape-gwi. Ne mandu'a ae katu ereiko-vy Hesu Cristo-rehe. Ha'e onhemoingove jevy va'ekwe. Yma gware mburuvixagwasu Davi hembypy voi. Upéa rehegwa nhe'ẽ porã amombe'u mbe'u aiko-vy.

⁹ Ha oĩ upéa nhe'ẽ mbojevyha xe rerekoy asy va'e. Hembiaipo vai va'e-rami xe moĩ preso xe pokwaha reheve. Ha xe joko ramo jepe, Nhandejáry nhe'ẽ ae katu ndojejokóiry. Oĩ joty imombe'uharã. Opa-rupi joty oho inhe'ẽ. Upéa-gwi eipyhy joty katu Hesu rape.

¹⁰ Upéa-gwi opaixagwa-gwi aiko asy ramo jepe, ndajere mo'ãi joty Hesugwi. Nhandejáry rembiporavo-rehe ha-py aipyhy joty va'erã upe tape. Aipota ha'e kwéry ave omoirũ peteixa Cristo Hesu-pe onheresende hagwã, oikove opa e'ŷ reheve hagwã Nhandejáry ndive yváy-py Nhandejáry onhemomba'egwasu ha-py, hendy resakã ha-py.

¹¹ Ko'a-rami ae oĩ nhe'ẽ jajerovia hese va'e: Omano va'ekwe Cristo. Peteixa nhamoirũ ramo íxupe, omano va'ekwe-rami jaiko. Upéixa jaiko ramo, ha'e oikove jevy hagwe-rami ave hendive jaikove va'erã opa e'ŷ reheve.

¹² Ndajajeréi ramo íxugwi, nhamoirũ va'erã íxupe enterove va'e-rehe omanda-vy onhembogwapy jave. "Xe ndaha'ei he'ýi" ja'e ramo hese nhatívy, "Peẽ ndaha'ei xe re'ýi" he'i ave va'erã nhande-vy.

¹³ Ndajaroviáí ramo jepe, he'i hagwe-rami ojapo joty va'erã voi. "Ha'e hagwe-rami ndajapo mo'ãi" nde'i mo'ãi ójehe Nhandejáry. Upéa nhe'ẽ-rehe jajerovia-gwi, ani ereva teĩ Hesu rape-gwi. Eipyhy ae katu Hesu rape porã ereiko-vy.

Gwembiaipo renotîha e'ŷ-rami eiko eremba'apo-vy

¹⁴ "Ani nde resarái Paulo remimombe'ukwe-gwi. Ani eremokanhy inhe'ẽ" ere oporombo'eháry-pe. "Nhandejáry renonde-py va'e-rami ani erenhonhe'ẽ mbojevy jevy teĩ. Oarandurágwe ndoikwaaavéi va'erã henuharã. Ojehesa rerova arã inhe'ẽ porã-gwi" ere íxupe kwéry.

¹⁵ Ne kyre'ŷ ae katu, "Upéa xe rembijohu porã voi" he'i hagwã nde-rehe Nhandejáry. Gwembiaipo renotîha e'ŷ-rami eiko eremba'apo-vy. Tape rexa ukaha ova e'ŷ va'e-rami, eiko eremombe'u porã porã-vy anhetegwa va'e nhe'ẽ.

¹⁶ Gwĩ onhe'ẽ rei va'e Nhandejáry mboete e'ŷ-vy, ani erepena teĩ hese kwéry eremoirũ hagwã. Emboyke ae katu íxupe kwéry ndejéhegwi. Ha'e kwéry mombyryve ryve oho va'erã Nhandejáry-gwi.

¹⁷ Ivaive ive oho-vy hasy va'e, ojeporu ohetehu oho-vy, ja'e. Upéixa ete mba'asy-rami inhe'ẽ rei. Oiko vaive ive oho-vy upéa nhe'ẽ renduha. Indive kwéry oime Himeneu Fileto ndive.

¹⁸ Anhetegwa va'e nhe'ẽ nomombe'úi. Onhe'ẽ avy mante íxupe: "Nombotekove jeví va'erã omano va'ekwe-pe" he'i mo'ã, ijapu. Upéa-gwi henuharã, "Mba'eixagwa nhe'ẽ po arovia-ta? Xe ndaikwaaavéi-ma inhe'ẽ kwéry" he'i hemimombe'u kwéry joavy avy va'e-rehe.

¹⁹ Ha Nhandejáry nhe'ẽ katu anhetegwa va'e. Onhehekoviariõ arõ e'ŷ va'e. Okytagwasu-rami voi Nhandejáry nhe'ẽ imbaraete. Upe okyta omýi e'ŷ va'e imbaraete-gwi. Upe okyta-rami Nhandejáry nhe'ẽ imbaraete va'e. Ko'a-rami ae ohai hese:

Gwekoirũ oikwaa Nhandejáry,
he'i.

Xe Cristo re'ýi voi, he'i ójehe va'e gwive, tomboyke ojéhegwi mba'e vai,

he'i ave. Omýi e'ŷ va'e Nhandejáry rokyta imbaraete voi. Oku'e ku'e rei e'ŷ va'e. Upéixa okambia e'ŷ va'e Nhandejáry nhe'ẽ, naikangýiry. Upéixa ndikatúi nhahekoviarõ Nhandejáry remimombe'u. Ndikatúi hendagwe-py nhamoï hekivia. Anhetegwa meme ae katu Nhandejáry remimombe'u. Enterove va'e jekoha ramo, jareko íxupe.

²⁰ Imba'e reta va'e róga-py heta oĩ jaiporu va'erã. Oĩ ouro gwigwa nha'ẽ, prata gwigwa nha'ẽ ave. Upéa nhane rembihayhu tee voi. Karugwasu jave ae jaiporu upe va'e. Ha oĩ ave vyvra gwigwa nha'ẽ, tuju gwigwa nha'ẽ ave. Upéa pya'e a'e ojeporu va'erã. Nhande rembihayhu ete e'ŷ upe va'e. Ojeka ramo upe va'e imombopyrã voi.

²¹ Upéixa oĩ jaiporu va'erã jahayhu va'e. Upéa ijáry rembiporurã, heminhon-gatu, ha'e ae hembiporurã voi. Upéixa ete voi nhande, jaiko Nhandejáry-pe nhanhemootyrõ porã-vy, ha'e ae hembiporurã. Nhanhemopotí-vy jaiko íxupe nhane rembiapo porã porã-vy.

²² Upéa-gwi ani ereiko rei teĩ. Oĩ karia'y va'e ojapose va'e rei ojapo. Ani ereiko teĩ upe karia'y rekoha-rami. Ne kyre'ŷ ae katu erejapo porã hagwã erejejavý e'ŷ reheve. Erovia katu anhetegwa va'e nhe'ẽ, ejohayhu-vy. Upe Nhandejáry-pe ipy'a potí reheve oração ojapo va'e, peteĩxa eiko indive. Ipy'a potí va'e kwéry aipota ombojoja onhondive gwekoha.

Nhandejáry rembigwái rekoha

²³ Oikwaa seve seve rei va'e-rehe ani erepena teĩ. Hi'arandu e'ŷ va'e voi-ma upe va'e. Mba'eve ndoikwaái. Emboyke ae katu ndejéhegwi inhe'ẽ rei va'e kwéry-pe. Onhe'ẽ rei ramo pya'e onhonhe'ẽ mbojevy jevy arã.

²⁴ Ha Nhandejáry rembigwái va'e katu nonhonhe'ẽ mbojevy jevýiry. Opoxy e'ŷ reheve tonhomongoeta porã katu entérovea ndive. Túvy-rami togwereko íxupe kwéry. Toporombo'e porã. Taheko kirirí ave oiko-vy.

²⁵ Taheko kirirí onhemonhe'ẽ porã-vy. Onhe'ẽ mbojevy va'e-pe opoxy e'ŷ reheve tonhemonhe'ẽ porã. Togwereko porã ikatu hagwãixa Nhandejáry oikwaa uka íxupe anhetegwa va'e ójehe imbohesa rerova uka-vy.

²⁶ Áy katu onhuhã-my oity va'e-rami ogwereco íxupe anháy. Ipu'aka hese anháy ombotavy-vy. Ojapo uka íxupe gwemimbota. Upéa-gwi oipota hi'arandu porã jevy anháy po-gwi ojepe'a uka jevy-vy.

3

Paulo omombe'u ojehu va'erã

(1 Tm 4:1-2; Jd 18-19)

¹ Aipota ereikwaa ojehu va'erã Cristo ou jevyha áry ogwahé e'ŷ ngatu. Ojekwaa va'erã heta hekoha vai va'e Cristo reko-rupi oiko va'e moakãrasyharã.

² Oporohayhu e'ŷ-vy ha'e ae ojehayhu ukase mo'ã va'erã. Pirapire mante omomba'egwasu va'erã. Onhemboete ukase mo'ã rei va'erã. Ha'e seve seve oiko-vy va'erã. Gwapixa-rehe onhe'ẽ rei rei va'erã. Gwu nhe'ẽ, osy nhe'ẽ omomba'e rei va'erã. Heko otima porã e'ŷ va'e gwapixa-pe ojekwaa va'erã. Ojekwaa va'erã Nhandejáry mboete e'ŷharã.

³ Heko porayhu e'ŷ va'erã, ojoporiahuvereko e'ŷ va'erã. Oapu-vy rei oiko va'erã gwapixa kwéry-rehe. Ójehe ndaipu'akáí va'e. Heko poxy-vy rei oiko va'erã. Iporã va'erã gwive íxupe ndojohu porãiry.

⁴ Gwapixa oikwaa uka rei va'erã ija'e'ŷha-pe. Ipy'agwasu va'erã. Onhemomba'egwasu ukase rei va'erã. Nhandejáry-pe ohayhu e'ŷ va'erã. Onhembsaraiha omomba'egwasu va'erã Nhandejáry-pe omboyke-vy.

5 “Xe heroviahā tee va'e” he'i mo'ā va'erā ójehe. Ha ipy'a-py katu noíry Nhandejáry remimoī imombaraete hagwā. Upeixagwa-pe gwive emboyke katu. Ani erepena teī hese kwéry.

6 Ây oiko-ma voi ave upeixagwa hekoha vai va'e. “Xe aporombo'ehaty va'e” he'i mo'ā ójehe. “Xe aiko-ta voi nde róga gwy-py” he'i gwapixa-pe oporombotavy-vy. Omogwahē rire íxupe ombotavy oiko-vy hóga pygwa. Kunha hi'arandu e'ŷ va'e-pe ombotavy ohesa rerova uka-vy ójehe. Upeixagwa kunha ojejavy va'ety. Ojapose va'e rei-ma ojapo.

7 Hi'aranduse teī. Inhe'ē porā rendu-vy, “Anhetegwa voi nipo ra'e” nde'íry hese. Hi'arandu va'erāgwe, inhe'ē rei ohendu-gwi.

8 Yma va'ekwe oiko va'ekwe hi'arandu va'erāgwe héry va'e Janes, Jambres ave. Moisés amyrī nhe'ē ombojevyse mo'ā va'ekwe. Yma onhonhe'ē mbojevy jevy hagwe-rami, ây ave upéixa oiko upe hekoha vai va'e kwéry. Onhe'ēmbojevy jevyse ave anhetegwa va'e omboyke jevy hagwā. Hi'arandu va'erāgwe jepe, pytū-my rei oiko va'e-rami joty oiko. Ndogwerovia teéi-gwi, Nhandejáry remimboyke voi upe va'e.

9 Pya'e noporombotavyvái-ma va'erā. Yma va'ekwe ojekwaa-ma myamyrī rekoha vai. Ohexa kwaa va'ekwe hekoha-rehe. Upéixa ete ây ohexa kwaa ave va'erā hese hekoha-rehe. Oikwaa arā íxupe. Ha upe rire katu noporombotavyvái-ma va'erā oiko-vy.

Paulo omombe'u Nhandejáry kwatia nhe'ē rehewa nhe'ē
(Rm 15.4; Tt 1.9; Tg 1.21; 2 Pe 1.19-21)

10 Ha nde ae katu xe reko kwaa-ma. Xe aporombo'e jave, xe moirū-ma va'ekwe. Xe reko rexā-ma. Xe rembiapo porā xe renonde-py xe remimoī ereikwaa-ma. Ereikwaa voi Nhandejáry-rehe ajeroviahā. Xe reko kirirīha ereikwaa-ma ave. Xe ajobayhuha, xe ava e'ŷha ave ereikwaa-ma voi.

11 Xe aiko jave Antioquia tetā-my, Icônio tetā-my, Listra tetā-my ave, xe mbohasa asy voi va'ekwe xe rerekō asy-vy. Xe rerekō asy ramo jepe, ndajeréi joty va'ekwe Hesu rape-gwi. Xe rerekō asy asy jave, xe resende sende joty va'ekwe Nhandejáry. Upéa xe-vy ojehu va'ekwe gwive ereikwaa voi.*

12 Ha entéro ogwerovia tee va'e peteīxa omoirūse va'e katu Cristo Hesu-pe ojerereko asy va'erā.

13 Ha hekoha vai va'e, “Hekoha porā nipo ra'e” oipota mo'ā he'i ójehe. Onhemboete ukase mo'ā. Upéa ivaive ive va'erā hekoha oho-vy. Oporombotavy rei va'erā oiko-vy. Ha'e ae onhembotavy va'erā ave oiko-vy.

14 Ha nde ae katu erovia joty katu nde-vy hemimombe'ukwe. Hemimbojerovia uka nde-vy erovia katu inhe'ē. “Anhete teegwa nipo ra'e” ere va'ekwe hese. Are-ma hembiherovia uka nde-vy erovia joty inhe'ē. Ne mbo'eháry rekoporāha ereikwaa-ma voi ereiko-vy.

15 Ne mitā ramogware ây peve ereikwaa-ma voi va'ekwe ereiko-vy Nhandejáry kwatia nhe'ē marangatu. Ây peve erenhendu ereiko-vy. Upéa nhe'ē ne mo'arandu va'e voi erejerovia hagwā Nhandejáry Hesu Cristo-rehe ne resendecharā-rehe. Upeixagwa nhe'ē erovia joty ereiko-vy.

16 Entéro Nhandejáry kwatia nhe'ē Nhandejáry rembihai ukakwe va'ekwe. Onhe'ē-rupi oikwaa uka ihaiharā-pe imo'arandu-vy. Upe va'e nhe'ē-py nhanhombo'e. Upéa nhe'ē rendu-vy jaikwaa jajejavhyha. Upéa nhe'ē rendu-vy tape porā-rupi nhassē jaiko hagwā. Upéa nhe'ē rendu-vy tekoha-rupi jaiko va'erā nhande py'a potī rehevē.

* 3:11 At 13.14-52; 14.1-20

¹⁷ Oipota Nhandejáry jaiko hembigwái ramo íxupe. Oipota nhahendu upe va'e nhe'ẽ nhane arandupa hagwã, nhane rembiapo porã porã hagwã íxupe jaiko-vy.

4

*Paulo oipota Timóteo gwetea'e reheve omombe'u Nhandejáry nhe'ẽ porã
(Ef 5.15-16; 2 Pe 1.14)*

¹ Nhandejáry resa-py, Cristo Hesu resa-py ave amombe'u-ta nde-vy ne rembiaporã. Ha'e ae hovagwy-py onhembo'y-ma va'erã entero omano va'ekwe oikove vyteri va'erã gwive ave. Peteĩ teĩ hembiapo apokwe-rami ogwerekva'era íxupe kwéry. Ha'e ojekwaa jevy ou-vy va'erã ko yvy-py enterove oĩ va'e gwive ruvixarã.

² Upéa-gwi ha'e ae hesa-py amombe'u-ta nde-vy ne rembiaporã. Emombe'u katu nhe'ẽ porã. Nde retea'e reheve emombe'u katu. Ne nhe'ẽ renduse ramo, ne nhe'ẽ nohenduséi ramo jepe, emombe'u meme joto íxupe. Ojejavý va'e-pe eikwaa uka íxupe hembiapokwe. Enhemonhe'ẽ katu íxupe emokyre'ỹ íxupe eremohembiapo porã-vy. Ereprombo'e mbo'e jave, ani erenhe'ẽ asy teĩ ne nhe'ẽ rendusere'ỹ va'e-pe.

³ Ogwahẽ va'erã Nhandejáry nhe'ẽ rendusere'ỹha áry. Upe ramo nohen-dusevái va'erã nhe'ẽ porã. Ojapose va'e rei ojapo va'erã. Heta omombe'u joavy avy va'erã omogwahẽ ojéupe. "Orohendu va'erãte ore-vy oromota pemombe'u" he'i va'erã gwemimogwahẽ porã-pe. "Ore remihenduse e'ỹ ani pemombe'u teĩ" he'i va'erã nhe'ẽ porã rendusere'ỹ-vy.

⁴ Anhetegwa va'e nhe'ẽ nohenduséiry va'erã voi. Inhe'ẽ rei va'e-pe ae katu ohenduse va'erã hikwái. "Anhetegwa" he'i mo'ã va'erã hese. Upéa-gwi ãy voi katu emombe'u nhe'ẽ porã. Ohendusere'ỹha áry ne'írã vyteri ogwahẽ jave, nde retea'e reheve emombe'u mbe'u joto íxupe kwéry.

⁵ Inhe'ẽ rei va'e ha'e kwéry ohendu va'erã. Nde ae katu nde pu'aka meme katu ndéjehe. Nde rerekoy asy ramo jepe, ani ereva teĩ joto Hesu rape-gwi. Emba'apo katu Nhandejáry-pe Hesu rehewa nhe'ẽ porã eremosarambi hagwã. Ne rembiaporã gwive ejapopa katu ereiko-vy.

⁶ Xe rekoria ejapo. ãy ijukapyrã-rami xe aime. Ogwahẽ-tama xe-vy xe mano hagwã áry.

⁷ Oĩ oripara hatã va'e. Ikyre'ỹ oripara hagwã oho-vy ogwahẽse ha-py ogwahẽ hagwã. Upéixa ete yma gwive xe kyre'ỹ aiko-vy nhe'ẽ porã mombe'u-vy ãy peve. Ha ko'ângä katu ogwahẽse ha-py ogwahẽ-ma va'e-rami oriparavý, xe ajapo japo va'erã apy-py agwahẽ-ma. Cristo Hesu-rehe ajerovia tee-ma aiko-vy ajehesa rerova uka e'ỹ reheve.

⁸ Oripara va'e ogwahẽ ranheve va'e-pe ombohekoria. Upéixa ete xe-vy ave ombohekoria va'erã. Hemimbota ajapopa-gwi, oĩ xe-vy imarangatu ete va'e ome'ẽ va'erã xe-vy Cristo. Enterove va'e ha'e hembierekorã hembiapo apokwe-rehe. Upe áry-py naxe anhóiry hemimbohekoviárã. Entero oha'arõ va'e-pe gwive ombohekoria va'erã íxupe.

Paulo omombe'u ojehegwigwa

⁹ Ne kyre'ỹ reheve eiko katu pya'e eregwahẽ hagwã xe ha-py.

¹⁰⁻¹² Xe irũ kwéry xe rejapa-ma oje'óí-vy xe anho xe reja. Demas xe reja teko rei remimbojohu porã omomba'egwasuve-gwi. Tessalônia tetã-my oho xe reja-vy. Ha Crescente katu oho Galácia yvy-koty. Dalmácia yvy-koty oho Tito. Ha Tíquico amondo kuri íxupe Éfeso tetã-my. Lucas anho mante opyta xe ndive. Xe anho eterei. Upéa-gwi ne kyre'ỹ eregwahẽ hagwã xe ha-py. Ereju

ramo, eju Marcos ndive. Amba'apo jave Nhandejáry-pe, ha'e xe pytygwō voi oiko-vy.

¹³ Ereju ramo eru katu xe-vy xe ao jo'avý Trôade tetã-my aheja va'ekwe, Carpo róga-py aheja va'ekwe. Eru ave xe-vy xe kwatia. Vaka pire-rehe oĩ va'e nhe'ẽ aipota eterei ereru.

¹⁴ Oĩ Alexandre kwarepoti-rehe omiba'apo va'ety. Ha'e ojapo vai xe-rehe. Hembiapokwe-rami ogwerekva'era íxupe Nhandejáry.

¹⁵ Nhane nhe'ẽ ombojevy jevy upe va'e. Ema'ẽ katu hese. Háke upe va'e kwimba'e. Ejoko katu íxupe. Ojapo vai va'era nde-rehe ave.

¹⁶ Mburuvixa xe rekoha-rehe oporandu ypy ramo xe-vy, “Nahembiapovaíry ra'e Paulo” he'i va'era ndoúiry xe yke-rehe onhembo'y-vy. Xe rejapama xe anho oje'oi-vy hikwái. Ha'e kwéry hembiapo vai e'ý va'ekwe-rami togwerekva'era íxupe Nhandejáry.

¹⁷ Ha xe ndive onhembo'y oĩ-vy va'e-rami, onhembo'y-ma oĩ-vy Nhandejáry xe yke-rehe xe mombaraete-vy xe monhe'ẽ hagwã. Upéa-gwi arosapukái voi imombe'u-vy judeu e'ý kwéry-pe. Entero Hesu rehewa nhe'ẽ gwive amombe'u. Heta tetã-gwi ou va'e hendi uka-vy amombe'u íxupe. Jagwarete juru-py aha vérami, xe repy jevy va'ekwe Nhandejáry. Ijuru-gwi xe pe'a vérami xe resende va'ekwe.

¹⁸ Áy jagwarete juru-py vérami aha jevy ramo, xe-rehe ojapo vai ramo, xe repy jevy jevy joto arã Nhandejáry. Xe resende va'ekwe-gwi aikwaa voi íxupe. Xe resende jevy voi arã ave ãy. Mba'eve ojehu e'ý rehewe xe-vy xe reraha va'era voi yváy-py. Upe-py ha'e anho mburuvixa va'era voi upe-py. Tanhamomba'egwasu meme va'era íxupe opa e'ý rehewe. Amém.

¹⁹ Emombe'u katu Áqüila-pe Priscila-pe ave xe mandu'aha hese. Onesíforo re'yi-pe ave emombe'u xe mandu'aha hese.

²⁰ Erasto opyta Corinto tetã-my. Trófimo hasy-gwi aheja va'ekwe íxupe Mileto tetã-my.

²¹ Ne kyre'ý katu eregwahé hagwã xe ha-py ro'y e'ý-py. Nhande re'yi Éubulo, Prudente, Lino, Cláudia ndive omombe'u uka nde-vy omandu'aha nde-rehe. Ambue kwéry, nhande re'yi va'e omombe'u uka ave.

²² Toiko Nhandejáry nde rekoirú ramo, Timóteo. Tapende rexakwaa porã rei Nhandejáry pende rovasa-vy.

Paulo remimombe'ukwe Tito pegwarā epístola de Paulo a Tito

Paulo omondo kwatia Tito pegwarā

1-4 Nde katu Tito, xe ra'y tee-rami, ereiko xe-vy. Hesu Cristo-rehe peteixa jajerovia-gwi ojoe'ýi voi nhande. Xe Paulo amondo-ta nde-vy xe nhe'ẽ kwatia-rehe. Xe Nhandedjáry rembigwái va'e, Hesu Cristo remimondo va'e ave. Aipota ojeroviave hese he'yirā Nhandedjáry oiporavo va'ekwe gwive. Aipota oikwaa porāve anhetegwa va'e Nhandedjáry re'ýi rekora. Nhandedjáry nhane moingove meme va'e ondive. Upe va'e nhe'ẽ-rehe ajerovia voi. Upéa-gwi ajapo inhe'ẽ.

Yma va'ekwe, “Amoingove va'erā íxupe oiko hagwā xe ndive opa e'ý reheve” he'i va'ekwe nhande-rehe Nhandedjáry. Ha'e ijapu e'ý reheve he'i upéixa. Nde'i reíry voi. Áy oikwaa uka-ma katu nhande-vy yma he'i va'ekwe nhane renonderā mombe'u-vy. Hi'óra-py oikwaa uka-ma nhande-vy. Ombou va'ekwe inhe'ẽ oikwaa uka-vy nhande-vy. Ko'ã nhe'ẽ, “Emombe'u katu, Paulo” he'i va'ekwe xe-vy Nhandedjáry. Omombe'u uka va'ekwe xe-vy xe remimombe'urā Nhandedjáry nhane resendehaty. Upéa-gwi ajapo joty inhe'ẽ.

Amondo-ta nde-vy Tito xe nhe'ẽ kwatia-rehe. Tande rexakwaa rei katu Nhandedjáry Nhande Ru, Nhandedjáry Hesu Cristo ave. Tane mbopy'agwapy ave katu.

Paulo oipota Tito omoingo Hesu reroviahā rerekwarā (1 Tm 3.1-7)

5 Aipota erejapo áy xe ajapo e'ý va'ekwe. Upéa-rehe oroheja kuri Creta yvy y mbyte-py oĩ va'e-py. Emoingo tetā tetā-rupi Hesu reroviahā rerekwarā. Emoingo ingo katu íxupe xe nde-vy ha'e hagwe-rami.

6 Heko porā va'e emoingo herekwarā. Imandu'a porā meme hese va'e emoingo herekwarā. Hembireko reta e'ý va'e peteĩ voi hembireko va'e. Ta'y kwéry, tajýry kwéry ave ojerovia-ma ave Hesu Cristo-rehe va'e. Upeix-agwa mante emoingo herekwarā. Oĩ gwembireko ndive e'ý oiko va'e. Oĩ naimba'ereroviáiry va'e ta'ýry. Oĩ ta'ýry nohendúi va'e inhe'ẽ, ojapose va'e rei ojapo va'e. Oĩ heta imandu'a vai va'e ta'ýry-rehe. Ani upeixagwa eremoingo teĩ Hesu reroviahā rerekwarā ramo.

7 Ha herekwa Nhandedjáry nhe'ẽ-py ae onhangareko Hesu reroviahā-rehe. Upéa-gwi imandu'a porā hese va'e ae katu emoingo herekwarā. Oĩ ha'e seve oiko va'e, ipoxy pya'e a'e va'e, oka'u va'e, oporonupā va'e, oipotave tave rei ojéupe gwarā pirapire va'e. Ani upeixagwa eremoingo teĩ Hesu reroviahā rerekwarā ramo.

8 Onhomogwahē uka porā rei va'e-pe ae katu emoingo herekwarā. Oĩ ave gwī enterove va'e ndive ipy'a porā va'e, inhakā porā va'e, tekoha-rupi oiko va'e, Nhandedjáry-pe omboete va'e, ójehe ipu'aka va'e. Upeixagwa heko porā va'e-pe ae katu emoingo herekwarā.

9 Togwerovia porā anhetegwa va'e nhe'ẽ ojehesa rerova e'ý reheve. Nhambo'e hagwe-rami, togwerovia joty omombe'u hagwā anhetegwa va'e Hesu reroviahā-pe omokyre'ý hagwā. Onhe'ẽ mbojevy va'e-pe, “Nremombe'u porāi” he'i va'erā. Upeixagwa ogwerovia tee va'e emoingo katu herekwarā.

¹⁰ Oĩ heta inhe'ẽngendu e'ŷ va'e. Onhe'ẽ rei oporombotavy-vy. Upéixa heta oĩ judeu reko-rupi oiko vyteri va'e, "Penhepirekyf uka katu" he'i va'e.

¹¹ Upeixagwa-pe, "Anive erehekombo'e rei teĩ ereiko-vy" ere ae katu íxupe. Omokirirĩ hagwã inhe'ẽ rei rei va'e-pe emoingo katu Hesu reroviahā rerekwarã. Gwĩ oporombotavy va'e ohesa rerova uka oiko-vy ójehe hóga-py oĩ va'e gwive. Ohekombo'e rei-vy ohesa rerova uka ójehe. Oipota ójehe gwarã pirapire oporombotavy-vy. Upeixagwa-pe tomokirirĩ katu íxupe.

¹² He'i araka'e hese hi'arandu va'e Creta yvy pygwa: "Ijapu meme Creta yvy pygwa" he'i. "Mymba poxy-rami oiko va'e. Ipituvu ramo jepe, okaruse joty"

he'i araka'e oyvy pygwa-rehe Creta yvy pygwa-rehe.

¹³ Anhetegwa voi upe hi'arandu va'e remimombe'ukwe. Upéa-gwi emandari ndari katu oporombo'e rei va'e-pe: "Anive erembo'e vai rei teĩ" ere ae íxupe. "Togwerovia porã ae anhetegwa va'e nhe'ẽ porã" ere íxupe.

¹⁴ "Tapehendu e'ŷ katu judeu kwéry remimombe'u rei. Teko rei remimombe'u ave tapehendu e'ŷ katu. Anhetegwa nhe'ẽ porã ae katu pehendu" ere íxupe kwéry.

¹⁵ Oĩ ipy'a potĩ va'e. Ndaipóri imongy'aharã. Oĩ ave ipy'a ky'a va'e, Nhandejáry-rehe ojerovia e'ŷ va'e. Hembiapo porãse mo'ã oiko-vy, ha ojejavy joty oiko-vy, onhemongy'a rei joty oiko-vy. Ipy'a ky'a vaive ive oho-vy. Upéa-gwi, "Anive erehekombo'e rei teĩ" ere oporombo'e rei va'e-pe. Ha'e kwéry ipy'a vai. Hembiapo vai ramo jepe, noti kwaái joty okwa-vy.

¹⁶ "Oroheko kwaama Nhandejáry-pe" he'i rei ójehe hikwái. Ha jahexa kwaam ramo katu hese, jaikwaa voi hekoha. "Ndohekokwaáiry nipo ra'e Nhandejáry-pe" ja'e hese. Nhandejáry rembijohu vai ojapo, nohenduséiry inhe'ẽ. Ha iporã va'e katu ndojaposéi voi. Upéa-gwi, "Anive erehekombo'e rei" ere íxupe.

2

Paulo oipota Tito ohekombo'e porã Hesu reroviahā-pe

¹ Ha nde ae katu ehekombo'e porã Hesu reroviahā kwéry-pe. "Pehendu katu anhetegwa nhe'ẽ tekoha-rupi peiko-vy" ere íxupe.

² Ha ituja va'e kwéry katu: "Ani peka'u teĩ peiko-vy" ere íxupe kwéry. "Penhemboete uka pende rapixa kwéry-pe. Ójehe ipu'aka va'e-rami peiko katu. Perovia porã katu anhetegwa nhe'ẽ. Pejohayhu tee katu peiko-vy. Pejerereko asy jave pekirirĩ joty katu peiko-vy" ere íxupe kwéry erenhemonhe'ẽ-vy.

³ Upéixa ave igwaigwĩ va'e kwéry-pe enhemonhe'ẽ katu: "Nhandejáry irũ reko-rupima peiko katu" ere íxupe. "Ani erenhe'ẽ rei rei teĩ nde rapixa-rehe. Ani ereka'u teĩ. Ereka'u ramo, ipu'aka va'erã opaixagwa rei nde-rehe. Ehekombo'e porã ae katu nde rapixa-pe" ere igwaigwĩ va'e kwéry-pe.

⁴ "Tekoha-rupi peiko pehekombo'e porã hagwã kunha omenda ramo va'e-pe. Kunha omenda ramo va'e tohayhu oména kwéry-pe. Tohayhu ave omemby kwéry-pe ave.

⁵ Toiko ójehe ipu'aka va'e-rami. Ojoeko-rupi porã toiko ome ndive hekopotĩ-vy. Topyta gwóga-py, tonhangareko om̄ba'apo-vy. Taipy'a porã. Ome nhe'ẽ-rupi toiko. Tekoha-rupi toiko kunhagwe pono omonhe'ẽ vai uka Nhandejáry nhe'ẽ-rehe gwapixa kwéry" ere gwaigwĩ kwéry-pe.

⁶ Upéixa ete kwimba'e kwéry ipyahu va'e-pe ave enhemonhe'ẽ katu: "Ójehe ipu'aka va'e-rami, peiko katu" ere íxupe.

⁷ Ha nde ejehexa uka porā íxupe, nde reko-rami oiko hagwā kwimba'e kwéry ipyahu va'e. Erehekombō'e jave, ani erehekombō'e rei teī. Enhembōete uka katu íxupe kwéry.

⁸ Anhetegwa va'e emombe'u íxupe. Peteīxa emombe'u porā meme katu. Aipo ramo ne nhe'ē ombojevy va'erāgwe nane nhe'ē mbojevýi va'erā. Otī va'erā ne nhe'ē mbojevy-ta mo'ā va'ekwe.

⁹ Ha onhemomba'apo uka va'e-pe enhemonhe'ē katu: "Pehendu meme katu nde járy nhe'ē" ere íxupe. "Oipota va'e gwive ejapo katu íxupe. Imbovy'a-vy ejapo íxupe. Ani erembohovái teī íxupe eremboete e'ŷ-vy.

¹⁰ Ani eremonda íxugwi. Ejehexa uka porā ae katu íxupe. Embojerovia uka katu íxupe ndéjehe. Aipo ramo peteīxa peiko meme katu ojehexa uka porā hagwā Nhandejáry rekoha, ojohu porā hagwā pende rexaháry Nhandejáry nhane resendehaty rehewa nhe'ē" ere íxupe.

¹¹ Nhandejáry nhande rexakwaa reihaty oikwaa uka-ma nhande-vy gwekoha nhande kwéry kente kwéry-pe nhane resende hagwā. Upéa-gwi, "Enterove va'e resa-py peiko porā katu Nhandejáry-pe pemboete-vy" ere upe pygwa-pe.

¹²⁻¹³ Upéixa nhande resendeha ramo oiko-gwi, "Anive erejapo xe aipota e'ŷ va'e, ani erejapo nde erejapose va'e rei" he'i nhande-vy Nhandejáry nhande poriahuverekohaty. Ko yvy-py jaiko jave, iporā ae nhande pu'aka nhandéjehe. Iporā jaiko nhande rekoha jajejavý e'ŷ rehewe Nhandejáry mbovy'a-vy, nhaha'arō-vy íxupe. Nhandejáry Hesu Cristo ou tee jevy va'erā nhande rovasaharā. Nhane remiha'arō ou tee jevy va'erā. Ha'e tuvixa mba'e, nhane resendeharā voi ha'e. Hendy mbaraete rehewe, opu'aka rehewe ou jevy va'erā.

¹⁴ Yma va'ekwe ojejuka uka nhande-rehe ha-py omboyke hagwā nhandéhegwí nhane rembiapo vaikwe, nhande py'a omopotī hagwā gwe'yí marangaturā, nhane mokyre'ŷ hagwā jajapo porā hagwā.

¹⁵ Upeixagwa nhe'ē-py ehekombō'e mbo'e íxupe. Emokyre'ŷ upe pygwa-pe ojapo hagwā upéa nhe'ē. Ha henduse e'ŷha-pe katu enhemonhe'ē katu ojapo jevy hagwā. Nhandejáry nhe'ē-py enhe'ē. "Ha'e ae onhe'ē-py rei onhemonhe'ē" ani ereheja he'i nde-rehe. Ani ereheja nde-rehe onhe'ē vai.

3

Paulo omombe'u Hesu reroviahā rekora

¹ Aipota eremombe'u ko nhe'ē Hesu reroviahā-pe:

"Ani nde resarái mburuvixa kwéry-gwi. Gwī omanda va'e nhande-rehe, ani nde resarái" ere íxupe. "Pene mandu'a meme katu hese pehendu hagwā inhe'ē" ere íxupe. "Pejapo katu inhe'ē. Pene kyre'ŷ katu iporā va'e apo-vy.*

² Ani erenhe'ē rei rei teī avave-rehe. Ani penhorairō teī penhonhe'ē mbojevy jevy-vy. Pende reko kirirī ae katu ojóupe. Pende py'a porā rehewe ae katu ave pejogwereco" ere Hesu reroviahā-pe.

³ Are va'ekwe nhande kwéry ave jaiko vai va'ekwe. Nhane arandu e'ŷ va'ekwe jaiko-vy. Inhe'ē rendu e'ŷ-vy ave jaiko va'ekwe. Inhe'ē rei va'ekwe nhane mbotavy. Nanhande pu'akái nhandéjehe va'ekwe opaixagwa ivai va'e teko rei ojapose va'e rei ojapo va'ekwe jajapo hagwā. Nhande py'a pohýi va'ekwe jaiko-vy. Nhane mandu'a meme va'ekwe nhane rembiapo vairā-rehe. Nhande rapixa mba'e jaipota rei nga'u va'ekwe. Ndaija'éiry rei nhande-rehe nhande rapixa. Nanhande a'éiry ojóehe.

* **3:1** Rm 13.1; 1 Pe 2.13-14

⁴ Ha Nhandejáry nhane resendeha ae katu, jajejavy ramo jepe ojehexa uka porã joty nhande-vy va'ekwe. Nhande poriahuverekoha voi, nhande rayhuha voi Nhandejáry.

⁵ Ha'e nhane resende va'ekwe. Ndaha'éi nhane rembiapo porãkwe-rehe nhane resende va'ekwe. Nhande poriahuverekogwi ae nhane resende va'ekwe. Upéi oiko-ma nhande py'a-py Nhe'ë Marangatu tee va'e, nhanhemopotí hagwã, nhande reko tujakwe oipe'a hagwã nhandéhegwi, nhanhembopyahu jevy hagwã jaiko-vy.*

⁶ Nhande py'a omohynyhë hagwã ombou va'ekwe nhande-vy Nhe'ë Marangatu tee va'e-pe ome'ë rei-vy. Hesu Cristo nhane resendeha nhande rayhu-gwi, ou va'ekwe Nhe'ë Marangatu tee va'e. Upéixa nhane resende va'ekwe.

⁷ Nhane resende va'ekwe nhande-vy gwarã nhaha'arõ va'e ome'ë hagwã nhande-vy. "Ipy'a potí" he'i-gwi nhande-rehe nhande poriahuverekoy, oipota jaikove meme indive. Upéa-gwi, "Peiko porã katu" ere meme Hesu rervoviaha-pe.

⁸ Anhetegwa voi ko nhe'ë ha'e va'e nde-vy. Iporã erejerovia ko nhe'ë-rehe. Upéa-gwi ani ne ate'ë tei erenhemonhe'ë-vy. Ne kyre'ë ae katu eremombe'u mbe'u-vy, Nhandejáry rervoviaha imongyre'ë-vy imohembiapo porã hagwã. Upéixa hembiapo porã ramo, iporã voi katu. Enterove rembijohu porã hembiapo. Upéa-gwi enhemonhe'ë nhe'ë katu ereiko-vy ereporombo'e-vy.*

⁹ Oï onhonhe'ë-rehe rei onhonhe'ë mbojevy jevy va'e. Ani erepena tei inhe'ë rei va'e-rehe. Heta ijypykwe pykwe réry-rehe ani erepena tei. Judeu rekoha rehewga nhe'ë-rehe, ani erenhonhe'ë mbojevy jevy tei. Ani nde poxy erenhonhe'ë mbojevy-vy hese. Upeixagwa inhe'ë rei nanhane mombaraetéiry. Upéa-gwi ani erepena tei hese. Ani ne nhe'ëngendu tei hese.

¹⁰ Oï ramo ndaijojaséiry va'e Hesu rervoviaha ndive, "Anive erejapo upéa" ere íxupe. Nane rendui ramo, "Ani erejapo upéa" ere jevy íxupe. Mokôigwe ere íxupe. Upéi nane rendui joty ramo, anive eremoiru íxupe.

¹¹ Upeixagwa oheja ra'e Nhandejáry rape. Ojejavy va'ety rei oiko-vy. Ojekwaa porã hese, ojehexa porã ave hekoha vaiha. Upéa-gwi ani eremoiru tei íxupe kwéry.

Paulo omombe'u omandu'aha onhe'ë apy-vy

¹² Amondo-ta nde-vy Ártemas para'e, Tíquico para'e. Ogwahë ramo oho-vy nde ha-py, ne kyre'ë katu xe topa hagwã ereho-vy Nicópolis tetã-my. "Upe-py apyta-ta aha-vy ro'y jave" ha'e kuri xe py'apy-py xejéupe.

¹³ Ha Zenas preso oheja va'e mosë ukaha katu Apolo ndive oho-tama oyvwy-gwi. Oho-tama jave, ne kyre'ë katu ave ipytygwô-vy íxupe. Eme'ë íxupe hemikotevõ oho mombyryve hagwã.

¹⁴ Taikyre'ë ave entéro Hesu rervoviaha gwive hembiapo porã hagwã, gwapixa remikotevõ me'ë-vy, oiko rei e'ë hagwã oporopytygwô hagwã oiko-vy.

¹⁵ Opa-ta xe nhe'ë. Entéro Hesu rervoviaha a-py oiko va'e omombe'u uka-ta peë-my omandu'aha. Ore ave oromombe'u uka-ta ore mandu'aha penderhe. Entéro Hesu rervoviaha ne ndive oiko va'e ore rayhu va'e, oromombe'u uka-ta ave íxupe ore mandu'aha. Peë kwéry-pe tapende rexakwaa rei katu Nhandejáry pende rovasa-vy. Amém.

* ^{3:5} Ef 2.8-10; 1 Pe 1.3 * ^{3:8} 1 Tm 1.3-4; 2 Tm 2.14

Paulo remimombe'ukwe Filemom pegwarā epístola de Paulo a Filemom

¹ Xe, Paulo, Hesu rehegwa nhe'ẽ amombe'u meme-gwi ko'ãy aime ko'a-py preso. Timóteo opyta xe ndive xe moirū hagwā rei. Ko'ãy araha uka-ta peteĩ kwaitia-py nhe'ẽ nde-vy gwarā. Nde, Filemom, ore irū tee voi, ore rembihayhu va'e voi nde. Ore ramigwa ave nde eremombe'u mbe'u Hesu Cristo rehegwa nhe'ẽ ereiko-vy. Ko va'e nhe'ẽ ahai-ta nde-vy gwarā.

² Ne ndive oime va'e kwéry pegwarā ave. Oime nipo ra'e Hesu reroviah kwéry ne ndivegwa. Oime ra'e Áfia ne ndive. Ha'e ojerovia tee-ma ave Hesu-rehegwi opyta-ma xe-vy xe reindy-rami. Oime ra'e Arquipo. Ha'e ore irū oiko-vy omombe'u meme-gwi Hesu Cristo nhe'ẽ. Oime ave ra'e gwī nde happy onhomboaty aty meme va'e Hesu Cristo-pe omboete hagwā. Íxupe kwéry gwarā ave ahai-ta ko va'e kwaitia.

³ Nhandedjáry Tupā Nhandedjáry Ru katu tapende rexakwaa rei. Tapene mbopy'agwapy ave. Nhandedjáry Hesu Cristo ave tapende rexakwaa rei. Tapene mbopy'agwapy ave.

Filemom oporohayhu ojerovia-gwi Hesu-rehe

⁴⁻⁵ Xe atimā meme voi Nhandedjáry-pe nde-rehe Filemom. Nhandedjáry-pe ajapo ramo oraçāo, xe mandu'a meme va'e voi nde-rehe. Xe ahendu nhe'ẽ porā ne rerakwā. Nde, erahayhu tee voi Nhandedjáry Hesu-rehe ojerovia va'e kwéry-pe. Xe ne rerakwā porā ahendu ramo avy'a voi. Upéixa avy'a aikwaa ramo nde erejerovia porā Nhandedjáry Hesu Cristo-rehe. Ambojeupi ramo Nhandedjáry-pe xe nhe'ẽ xe mandu'a meme voi nde-rehe.

⁶ Ajerure íxupe nhane pavē-gwi nhane mo'arandu porāve rāve hagwā Hesu Cristo remime'ēgwe-rehe. Ore, nde ave jajerovia Hesu Cristo-rehe. Peteĩxa nhaime-gwi indive, Nhandedjáry ohovasa vasa nhande-vy nhande rekove. Upe jeovasa Nhandedjáry nhande-vy ome'ẽ va'ekwe jaikwaa porāve rāve hagwā ajerure íxupe.

⁷ Xe ryvy-rami voi xe-vy ereiko, Filemom. Xe aikwaa-ma ramo ne rerakwā porā xe mongyre'ŷ-ma voi xe ave xe mbovy'a tee-vy eremongyre'ŷ-gwi gwī Nhandedjáry-rehe ojerovia va'e kwéry-pe. Upéa-gwi xe avy'a voi.

Paulo ojerure Filemom-pe omogwahē porā jevy hagwā gwembigwái Onésimo-pe

⁸ Xe, Paulo, Cristo nhe'ẽ aikwaa porā-gwi ome'ẽ arā ne rembiaporā amombe'u hagwā nde-vy. Ha xe katu nda'e mo'ãi joty ne rembiapo porārā-rehe. Erejerovia porā-gwi Nhandedjáry-rehe, xe ndajepy'apýi voi nde-rehe.

⁹ Nhandedjáry Hesu Cristo rembigwái voi xe. Inhe'ẽ amombe'u-gwi aime preso ko'ãy. Aikwaa erejapo arā xe remimbota. Orohayhu eterei-gwi ae xe ndorojokwaiséiry voi.

¹⁰ Ajerurese mate nde-vy ne rembigwaikwe Onésimo-rehe. Ha'e-ma preso aime ramo amombe'u va'ekwe íxupe Nhandedjáry Hesu Cristo nhe'ẽ. Ñy ha'e ojerovia-ma ave Hesu Cristo-rehe. Upéa-gwi ko'ãy xe ra'y-rami voi areko íxupe.

¹¹ Yma nipo araka'e ha'e natembigwái porāi voi nipo araka'e nde-vy. Ko'ãy katu xe pytygwō porā voi oiko-vy. Xe-vy xe pytygwō porāha-rami ave ha'e ne pytygwō porā arā nde-vy.

¹² Amondo jevy-ta íxupe nde róga-py ãy. Xe rembiayhu voi Onésimo. Ogwahē ramo nde róga-py ani ae ne mandu'a teĩ hembiapo vaikwe-rehe. Xe-vy xe mogwahē porâha-rami ave emogwahē porã katu íxupe igwahē iho ramo.*

¹³ Ha'e jepe kuri xe xejéupe Onésimo oiko meme hagwā xe ndive. Upéixa ramo ae ne rembiaporāgwe ha'e ojapo va'erā xe ndive ko'a-py. Nhandejáry Hesu Cristo rehewa nhe'ẽ amombe'u meme-gwi xe moĩ-ma a-py preso. Onésimo optya ave preso-gwi xe moirū a-py.

¹⁴ Aipota peve rei optya xe ndive Onésimo. Nde ae xe rexakwaa ramo ereme'ẽ arā xe-vy. Aikwaa voi xe nde naxe nhe'ẽ mbojevýi arā ha upéa-gwi xe ndajerureséiry. Nde py'a gwive ae ereme'ẽse ramo ereme'ẽ arā xe-vy.

¹⁵ Xe ha'e-ta nde-vy: Ikatu arā ja'e Onésimo-rehe. Ha'e sapy'a ete osẽ araka'e nde róy-gwi. Ko'ãy oike jevy nde róy-py oiko meme jevy hagwā ne ndive.

¹⁶ Ko'ãy oho ramo nde róy-py ha'e, ndaha'evéi-ma tembigwái ramo anho mate oiko hagwā. Nhande-rami ave-ma oiko-gwi, ko'ãy Hesu Cristo-rehe ojerovia-gwi, nhande ryvy mirī-ramima jahayhu tee arā íxupe. Xe ahayhu tee voi íxupe. Nde katu xéhegwi erehayhuve va'erā íxupe. Ne ndive oiko-gwi, Hesu-rehe ojerovia-gwi ave erehayhuve va'erā íxupe.

¹⁷ Xe-rehe ere ramo "Paulo xe irū voi", xe rerekoha-rami ave ereko Onésimo-pe. Xe-vy xe mogwahēha-rami joty emogwahē porã katu íxupe.

¹⁸ Sapy'a osẽ ramo araka'e oho-vy nde róy-gwi. Ojapo vai nipo araka'e nde-rehe. Oreve para'e nde-vy. Oreve ramo nde-vy, xe ae apaga arā nde-vy ireveha.

¹⁹ Xe Paulo, xe po-rupi ahai nde-vy amondo hagwā ko xe nhe'ẽ. Oreve ramo nde-vy Onésimo, apaga arā nde-vy ireveha. Xe natekotevēi oromomandu'a gwī va'e-rehe: nde erereve va'e-rami erepyta xe-vy. Xe-rehe ha-py ereiko-ma nde Hesu reroviaha ramo.

²⁰ Opa xe rembijerure erejapo ramo xe-vy, upéixa ramo xe mbovy'a va'erā. Aipota xe rembijerure erejapo xe-vy, Hesu Cristo-rehe erejerovia-magwi xe-ramima ave ereiko. Upéixa ramo xe mbovy'a arā, peteixa Hesu-rehe jajerovia-gwi.

²¹ Ko'a-rami ahai nde-vy xe nhe'ẽ. Aikwaa porã voi xe ne nhe'ẽngendu voi nde. Upéa-gwi xe rembijerure-gwi erejapove va'erā voi xe-vy.

²² Ko'ãy katu ajerure ambue va'e-rehe nde-vy erembosako'i hagwā xe-vy nde róga-py aha ramo upe-py ake hagwā. Aikwaa voi pembojeupi meme ramo Nhandejáry-pe pene nhe'ẽ xe-rehe, voi asẽ jevy arā ko'a-gwi aha jevy hagwā pende ha-py.

Paulo, inhirū kwéry ndive, omundo omandu'aha

²³ Epafras, Hesu-rehe ojerovia-gwi ha'e ave oĩ preso xe ndive ko'a-py. Ha'e ave omondo-ta nde-vy omarandu.

²⁴ Xe irū kwéry, Marcos, Aristarco, ha Demas, Lucas, ha'e kwéry xe moirū rei va'e voi. Ha'e kwéry ave omondo-ta nde-vy omarandu.

²⁵ Tapende rovasa porã porã katu Nhandejáry Hesu Cristo pende rexakwaa rei-vy. Pende py'a gwive tapende rovasa.

* ^{1:12 Cl 4.9}

Hebreu kwéry pegwarā

epístola aos hebreus

Tuvixave mba'e Cristo Nhandejáry ra'y Nhandejáry rembigwái kwéry-gwi

1-3 Nhandejáry omombe'u uka meme nhande-vy ojehegwa nhe'ẽ. Yma va'ekwe gwembigwái kwéry-pe omombe'u uka nhane mo'arandu hagwã. Ko'ãy ae katu omombe'u gwa'ýry tee-pe nhane mo'arandu hagwã ta'ýry. Yma, yma va'ekwe heta eterei oiko inhe'ẽ-py omombe'u va'ety. Ha Nhandejáry omombe'u uka va'ekwe íxupe kwéry. Upéi ha'e kwéry omombe'u jevy nhane rembypy-pe inhe'ẽ. Nomombe'upáiry Nhandejáry nhe'ẽ. Íxupe omombe'u uka hagwe-rami ae, ha'e kwéry omombe'u jevy nhane rembypy-pe. Nhandejáry ohexa uka íxupe kwéry hembiexagwe omombe'u jevy hagwã. Ohendu uka ave íxupe kwéry hemiendukwe ndukwe omombe'u jevy hagwã. Gwembigwái meme oiporu va'ekwe nhane mo'arandu hagwã. Ha ãy katu gwa'ýry tee-pe omombe'u ukapa nhane mo'arandu hagwã. ãy ta'ýry tee omombe'u va'ety ramo opyta. Gwu-gwi ohendu va'ekwe omombe'u. Ha'e Nhandejáry rembiporavo opamba'e jaryrã voi. Íxupe ae Nhandejáry ojapo uka ko yvy, áry, ygwasu ave. Gwa'ýry reko-reheombojekwaa-ma gweko porã teeha. Gwu rekoha-ramima voi ave oiko ta'ýry. Heko ambue e'ý va'e voi-ma ha'e. Onhe'ẽ-py entéro mba'e omoingo meme ta'ýry. Imbaraete tee voi inhe'ẽ. Ha'e omopotí va'ekwe nhande py'a jajejavý rire. Ha upé rire katu oho jevy yváy-py ogwapy hagwã. Nhandejáry, upé Tupágwasu tee tuvixave va'e yke-rehe ijakatúa-koty ogwapy-ma oĩ-vy.

4 “Xe rembigwái” nde'íry íxupe Nhandejáry. “Xe ra'y” he'i ae íxupe. Upéixa ramo ombotuvixave mba'e íxupe. Ha gwembigwái kwéry yváy pygwa-pe katu, nombotuvixa mba'e etéiry Nhandejáry. Upéa-gwi Nhandejáry rembigwái pa'ü-my ndogwapýi voi ha'e. Nhandejáry yke-rehe ae ogwapy oĩ-vy.

5 Ha Nhandejáry gwembigwái kwéry-pe katu nde'íry:

“Nde ko xe ra'y tee voi”

nde'íry íxupe kwéry.

“Ko'ãy katu amombe'u-ta enterovéa-pe. Ko va'e xe ra'y tee voiha”

nde'íry ave gwembigwái kwéry-rehe.

“Areko va'erã íxupe túvy-rami. Xe ra'y ramo oiko va'erã”*

nde'íry ave araka'e Nhandejáry gwembigwái kwéry-rehe. Upéa-gwi tuvixave mba'e Nhandejáry ra'y Nhandejáry rembigwái kwéry-gwi.

6 Upéi he'i ave araka'e Nhandejáry:

“Tomboete katu íxupe entéro xe rembigwái gwive”*

he'i araka'e Nhandejáry gwa'ýry-rehe ko yvy-py imbou-vy.

7 Ha hembigwái kwéry-rehe katu he'i Nhandejáry kwatia nhe'ẽ a-rami:

“Hemimondo va'e, omundo íxupe Nhandejáry yvytu ramo. Tata rendy-rami
rei voi hembigwái oiko”*

he'i Nhandejáry kwatia nhe'ẽ.

8 Ha Nhandejáry ra'y-rehe katu he'i:

“Ore Járy, ereiko meme va'erã ore ruvixa ramo. Erepa e'ý reheve ereiko
meme va'erã” he'i. “Eremanda porã meme va'erã ore-rehe kwéry. Ore
rembiapo apokwe-rehe ore rerekva'erã” he'i.

* 1:5 Sl 2.7; 2 Sm 7.14 * 1:6 Dt 32.43 * 1:7 Sl 104.4

9 “Hembiapo porā va'e erejohu porā íxupe. Ha hembiapo vai va'e katu nande a'éiry hese. Upéa-gwi Nhandejáry nde Járy nde poravo-ma. Ne mbovy'a verei hagwā ne irū gwéry-gwi nde poravo-ma. Ne irū ovy'a ramo jepe, nome'ēiry joty íxupe nde vy'aha-rami Nhandejáry”*
he'i Nhandejáry kватia nhe'ē Nhandejáry ra'y-rehe.

10 Upéi he'i jevy Nhandejáry kватia nhe'ē:

“Yma va'ekwe, ore Járy, erejapo va'ekwe ko yvy. Áry ave ne rembiapokwe voi.
11-12 Onhehundi va'erā ne rembiapokwe ha nde katu nerenhundíry va'erā voi. Erepa e'ŷ rehevē ereikove va'erā. Nhande ao osorove rove. Upéi nhamboyke íxupe. Upe rire nhahekoviarō va'erā íxupe. Upéixa ete nhande ao tuja-rami ko yvy áry ndive itujave jave va'erā” he'i. “Upéi hekoviarō-vy eremboyke-ma va'erā erejapo va'ekwe. Ha nde katu erenhehekoviarō e'ŷ va'erā voi. Eremanotaha áry nogwahē mo'āvēi-ma va'erā nde-vy” he'i.
“Ereikove meme va'erā”*
he'i Nhandejáry kватia nhe'ē Nhandejáry ra'y Hesu-rehe.

13 Ha ndaha'ēi gwembigwái kwéry-pe ha'e he'i:

“Egwapy katu xe yke-rehe, xe akatúa-koty. Xe orombopu'aka va'erā nde a'e'ŷha-rehe. Orombopu'aka peve erekwapy va'erā ereī-vy xe yke-rehe”*

he'i ramo Nhandejáry ndaha'ēi hembigwái pegwarā. Gwa'ýry tee pegwarā nhe'ē ae upe va'e.

14 Ha Nhandejáry rembigwái yváy pygwa, jahexā e'ŷ va'e katu, hemimbou nhane pytygwō hagwā voi ombou. Gwemiresende senderā-rehe ombou.*

2

Ndaipóri Cristo-rami nhane resendeharā

1 Ndoikóiry Cristo-rami nhane resendeharā. Upéa-gwi ma'erā nerehendu porāiry nhe'ē porā nde-vy omombe'u va'ekwe. Iporā katu nhahendu meme upe nhe'ē jajehesa rerova e'ŷ hagwā íxugwi, pono nhakanhy kanóa-rami y-rupi ojererosy uka oho-vy va'e-rami.

2 Yma araka'e yváy pygwa omombe'u araka'e nhane ramói amyrī-pe. Nhandejáry nhe'ē omombe'u araka'e. Imbaraete he'i va'ekwe. Upéa-gwi inhe'ē-rehe opyrū va'e gwive, inhe'ē renduse e'ŷha va'e gwive, ogwereko asy va'ekwe íxupe Nhandejáry hembiapokwe-rehe.

3 Ha upe rire katu ojekwaa-ma oī-vy va'ekwe nhane resendeharā. Ha'eixagwa ndaipóri. Upéa-gwi nhapena e'ŷ ramo hese, ndoikói ni peteī nhane resendeharā. Heseve'ŷ ndaipóri nhane resende va'erā. Aipo ramo, mbava'e-rami po nhane resende va'erā. Nhanhehundipa-ma va'erā voi nhande kwéry. Ha Nhandejáry Hesu ha'e ae onhe'ē ojéhegwí omombe'u ranhe va'ekwe nhande-vy nhane resende hagwā. Ha henduhare he'i, “Anhetegwa tee voi” he'i va'ekwe nhande-vy inhe'ē-rehe.

4 Upe ramo Nhandejáry oikwaa uka ave nhande-vy inhe'ē anhetegwa voiha. Heroviapyrā-rupi hembiapo porā va'ekwe. Jahexā e'ŷ va'e ohexā uka nhande-vy. Hexapyrā-rupi hembiapo porā porā va'ekwe. Ha Nhe'ē Marangatu tee va'e katu peteī teī nhande rekora ome'ē me'ē va'ekwe nhande-vy. Hemimbota-rupi ome'ē nhande-vy nhande rekora jaikwaa hagwā inhe'ē anhetegwa voiha.

Nhande rekoha-rami oiko va'ekwe Hesu Cristo nhande rape járy ramo (Fp 2.5-9)

* 1:9 Sl 45.6-7 * 1:11-12 Sl 102.25-27 * 1:13 Sl 110.1 * 1:14 Ef 2.11-22; Cl 1.15-23

⁵ Ìy oromombe'u-ta peẽ-my ko yvy rehewa, Nhandejáry remimoatyrõmba va'erã. He'i ramo:

“Pende pu'aka va'erã xe amoatyrõmba va'erã-rehe”
ndaha'éi gwembigwái-pe he'i upéa. Kente kwéry-pe ae he'i va'ekwe:
“Nde pu'aka va'erã hese”
he'i va'ekwe yvy ipyahu va'erã-rehe.

⁶ Upéixa he'i Nhandejáry kwaitia nhe'ẽ a-rami:

“Ore Járy, ore kwéry ndaha'éi ore tuvixave va'e. Ha ne mandu'a porã joty ore-rehe. Teko rei ramo jepe ore, erepena joty ore-rehe.

⁷ Sapy'a ete eremboeteve ne rembigwái kwéry yváy pygwa-pe. Ha upe rire katu ore momba'egwasu-ma va'ekwe, ore mbotuvixa mba'e ete voi va'ekwe.

⁸ Entéro mba'e jaryrã ore moingo-ma va'ekwe, he'i Nhandejáry-pe.”

Upéixa he'i Nhandejáry kwaitia nhe'ẽ kente kwéry-rehe. Pejeapysaka katu upe Nhandejáry kwaitia nhe'ẽ-rehe:

“Opamba'e jaryrã ore moingo-ma”

he'i voi Nhandejáry kwaitia nhe'ẽ. Ha opamba'e katu entéro mba'e-pe gwive he'ise. Ha ko'ánga katu ne'írá ojekwaa hexapyrã-rupi nhande entéro mba'e járy ramo jaikomaha.

⁹ Ha upe nhande ramigwa Hesu katu, jahexa kwaा voi hese hekoha porã tee voiha. Sapy'a ete-ma Nhandejáry hakate'ýve gwembigwái yváy pygwa kwéry-rehe. Oipota ohasa asy Hesu nhande-rehe ha-py. Nhande rovasase voi Nhandejáry nhande rexakwaa rei-vy. Upéa-rehe ojejuka uka va'ekwe Hesu nhande-rehe ha-py. Nhande rekovía omano va'ekwe. Upéa-gwi ãy omomba'egwasu jevy-ma íxupe Nhandejáry. “Nde ko tuvixave mba'e va'e voi” he'i Hesu-pe. Mburuvixagwasu-ramo ogwereko íxupe.*

¹⁰ Iporã katu Nhandejáry ogwereko upéixa gwa'ýry. Entéro mba'e moingohaty voi Nhandejáry. Ojéupe gwarã omoingopa va'ekwe. Ogwenogwahëse heru-vy ojéupe gwe'ýi kwéry hendive oiko porã hagwã heko tee-rupi. Upéa-gwi: “Iporã katu” he'i, “Erehasa asy nde eremboagwyje hagwã xe nhe'ẽ, ereiko hagwã kente kwéry resende teeha ramo, hape járy ramo ave, ereru hagwã xe-vy xe re'ýi kwéry-pe gwive” he'i Hesu-pe Nhandejáry.

¹¹ Ha nhane mopotí va'e Hesu Ru, ha'e Nhandejáry voi. Nhane mopotí rire nhande Ru ramo oiko ave Nhandejáry. Hesu Ru nhande Ru voi ave. Upéa-gwi Hesu Nhandejáry ra'y tee ramo jepe, “Xe ryvy kwéry, xe reindy kwéry” he'i joty va'erã nhande-rehe kwéry. Nanhamotíry nhande Ryke'y-pe. Nahakate'ýiry ójehe. “Xe ryvy kwéry, xe reindy kwéry” he'i ramo nhande-vy, ndojehekorenotíry nhandéhegwi.

¹² Upéixa he'i Hesu nhe'ẽ kwaitia-rehe onhemoi va'ekwe:

“Amombe'u-ta nde rehewa xe ryvy kwéry-pe. Atýra-py aporahéi-ta oromboete-vy”*

he'i ójehe Hesu Nhandejáry-pe.

¹³ Upéi he'i jevy:

“Ajerovia-ma aĩ-vy va'erã hese”

he'i Nhandejáry-rehe Hesu. Upéi he'i jevy:

“Nhandejáry ra'y kwéry, gwí omonhangareko uka xe-vy va'e katu amoirũ-ma xe”*

he'i va'ekwe ohai-vy Hesu nhe'ẽ kwaitia-rehe.

¹⁴ Ha nhande kwéry katu, Nhandejáry reko rupi e'ý jaiko. Nhandejáry reko e'ý nhande jareko. Teko rei voi nhande. Ha, “Xe ryvy” he'i joty nhande-vy Hesu. He'ýi kwéry voi nhande. Upéa-gwi ha'e katu oiko-ma ave nhande rugwy re'ýi

* 2:9 Sl 8.4-6 * 2:12 Sl 22.22 * 2:13 Is 8.17-18

ramo. Ojejuka ukase omosē hagwā anháy ruvixa pono anháy ipu'aka gwī omano va'erā-rehe, imonghyje-vy íxupe kwéry.

¹⁵ Oresendese katu gwī ójehe imytu'e'ŷ va'e-pe gwive. Imitā gwive ndaipu'akáiry ójehe ojei hagwā anháy ruvixa po-gwi. Upeixagwa kente-pe oresendese voi.

¹⁶ Pejeapysaka katu xe nhe'ẽ-rehe. Gwī ójehe ipu'aka e'ŷ va'e-pe, Hesu oipytygwō voi. Ndaha'éi yváy pygwa hemipytygwō va'e. Nhande kwéry, Abraão remiarirō joapyri pyri va'e-pe ae oipytygwō.

¹⁷ Nhane pytygwōse-gwi, nhande rekoha-ramima oiko va'ekwe. Nhande reko ra'ãmba voi va'ekwe. Jaikoha-ramima ha'e oiko ave voi va'ekwe. Nhande-vy ojehu va'e gwive, ojehu ave íxupe. Nhande-rami oiko. Tyvýry kwéry-rami, heindy kwéry-rami ha'e oiko-ma va'ekwe. Oikose va'ekwe nhande-vy gwarā pa'i ruvixagwasu-rami, nhande poriahuverekoharā. Hese jajerovia va'erā oiko va'ekwe pa'i ruvixagwasu-rami. Oipota-gwi Nhandejáry nhane renogwahē íxupe oiko va'ekwe pa'i ruvixagwasu-rami. Ha'e omboykese nhandéhegwi nhane rembiapo vai va'ekwe Nhandejáry ndive nhande joja hagwā jaiko-vy.

¹⁸ Ha'e katu nhande-rami ojerereko asy va'ekwe ombojejavys mo'ã íxupe-gwi anháy ruvixa. Upéa-gwi ãy ha'e nhane pytygwō kwaa voi. Ha'e-rami ramo, nhane mbojejavys jevy ramo anháy, ha'e nhane pytygwō kwaa voi pono jajejavys.

3

Hesu onhemboeteve va'e Moisés amyrī-gwi

¹ Ñay, xe re'yi kwéry, Nhandejáry re'yi voi peẽ. Pende reko marangatu va'e. Hemienói voi peẽ yváy-py peiko hagwā. Pene arandu kena peikwaa hagwā Hesu rehewa nhe'ẽ. Ha'e Nhandejáry remimbou pa'i ruvixagwasu-rami. Upéa rehewa nhamombe'u jaiko-vy.

² Hembiaporā Nhandejáry remime'ẽgwe ojapopa voi. Ndaipóri ojapopa e'ŷ va'e. Ha'e-rami Moisés amyrī ave hembiapo gwive ojapopa, Nhandejáry re'yi-rehe ombo'apo-vy.*

³ Ha, "Nhane moingovehare nhamboeteve voi hemimoingove-gwi" ja'e. Upéixa ramo, iporā katu nhamboete Moisés-pe. Ha Hesu katu iporā nham-botuvixa eteve íxupe.

⁴ Ndoikói hemimoingove va'e omoingovehaty e'ŷ rehewe. Ha enterove va'e moingovehaty va'e voi Nhandejáry.

⁵ Ha Moisés Nhandejáry rembigwái ramo rei oiko va'ekwe. Ojapopa va'ekwe ha'e gwembiaporā Nhandejáry re'yi-rehe ombo'apo-vy. "Emombe'u katu atýra-py eremombe'u hagwā ha'e va'erā" he'i va'ekwe íxupe Nhandejáry.

⁶ Ha Cristo katu ta'ýry tee voi. Ojapopa íxupe he'i va'ekwe Nhandejáry, Nhandejáry re'yi kwéry-rehe onhangareko-vy. Nhandejáry re'yi tee voi nhande kwéry ave. Nhande kyhyje e'ŷ ramo, Hesu ogwahē jevytaha javy'a meme ramo nhaha'arō tee-vy, he'yi tee voi nhande.

Aníke pejehesa rerova teĩ Cristo-gwi

⁷ Pejeapysaka katu Nhandejáry kwatia nhe'ẽ-rehe, Nhe'ẽ Marangatu tee va'e he'i va'ekwe-rehe pejeapysaka. Yma he'i va'ekwe a-rami voi:

"Ko'ãy Nhandejáry nhe'ẽ pehendu ramo,

⁸ ani ijapysa e'ŷ va'e-rami peiko teĩ. Yma va'ekwe pene ramoigwasu kwéry yma gware nohenduséiry va'ekwe Nhandejáry nhe'ẽ. Tekwaty e'ŷ-my oiko

* [3:2 Nm 12.7](#)

jave, ombovyte vyte va'ekwe Nhandejáry-pe. Ani peiko teĩ ha'e kwéry hekorupi"
he'i myamyrí pene ramoigwasu kwéry-rehe.

⁹ "Upe-py tekwat y e'ŷ-my xe mbovyte vte va'ekwe pene ramói nhagwe
va'ekwe: Nhahendu e'ŷ ramo jepe, ndogweropoxý arã nhane rembiapo Nhandejáry, he'i mo'ã xe-rehe hikwái" he'i. "Quarenta ro'y
xe rembiapo porã porã rexahare voi pene ramói. Hexapyrã-rupi xe
rembiapo porã ramo jepe, xe mbovyte vte xe rendu e'ŷ-vy.

¹⁰ Upéa-rehe ha'e xejéupe, Areko asy va'erã íxupe kwéry hembiapokwe-rehe.
Xéhegwí ojehesa rerova meme oiko-vy. Ndohoséi tape porã-rupi. Tekoha
porã-rehe, Tekoha porã, nde'íry. Aipo ramo, amoingo asy va'erã íxupe kwéry
hembiapo-rehe.

¹¹ Upéixa ramo ha'e ete-ma xejéupe, Ndopytavéi-ma va'erã xe aime ha-py xe
ndive optyu'u hagwã. Areko asy va'erã íxupe kwéry hembiapo-rehe, ha'e
xejéupe, he'i Nhandejáry nhane ramói amyrí kwéry-rehe."*

Upéixa he'i Nhandejáry kватia nhe'ẽ nhane ramoigwasu-rehe.*

¹² Upéixa ramo, xe re'ýi kwéry, "Xáke" peje katu pendéjehe. Ndaipotái pene
pa'û-my hekoha vai va'e, herovia e'ŷha pene pa'û-my ndaipotái. Upe va'e
ojehesa rerova arã Nhandejáry hekove tee va'e-gwi. Nhande reko irũ-gwi
ojehesa rerova va'erã.

¹³ Aipota ae penhemonhe'ẽ nhe'ẽ meme ojóupe: "Ani peiko teĩ ijapysa e'ŷ va'e-rami.
Ani pene mbotavy teĩ anháy pene mbojejavu uka hagwã" peje katu
ojóupe. Ko'ẽ ko'ẽ penhemonhe'ẽ ojóupe peiko-vy. Onhe'ẽ vyteri jave nhande-
vy Nhandejáry, "Ãy voi" peje. "Ãy voi pehendu katu ko'ãy omombe'u va'e"
peje katu ojóupe.

¹⁴ Ãy Cristo re'ýi voi nhande. Are-ma jajerovia tee jaiko-vy hese. Ha
ndajajerevái ramo íxugwi nhamano peve, he'ýi teerã voi jaiko íxupe nhande.
Ndajajehesa rerova ukái ramo íxugwi, jatopa peve íxupe, he'ýi teerã voi jaiko
íxupe nhande. Upéa-gwi aníke penhemonhe'ẽ e'ŷ teĩ ojóupe.

¹⁵ A-rami he'i Nhandejáry kватia nhe'ẽ:

"Ko'ãy, Nhandejáry nhe'ẽ pehendu ramo, ani kena erenhembohesae sae teĩ
inhe'ẽ rendusere'ŷ-vy. Yma va'ekwe myamyrí pene ramói nohen-
duséiry va'ekwe Nhandejáry nhe'ẽ. Ani peẽ peiko teĩ heko kwéry-rupi"**
he'i Nhandejáry kватia nhe'ẽ.

¹⁶ Upéa kватia nhe'ẽ-rehe pejeapysaka katu. Kiva'e po yma gware Nhan-
dejáry nhe'ẽ renduse e'ŷha, amombe'u-ta peẽ-my. Gwí Egito yvy-gwi Moisés
rembierahakwe gwive voi.

¹⁷ Upéi kiva'e rembiapo yma gware po Nhandejáry rembiereko asy quarenta
ro'y va'e amombe'u-ta peẽ-my. Gwí ojejavu va'ekwe voi. Omano hagwe-py
upe-py rei optya va'ekwe hetekwe tekwat y e'ŷ-my.

¹⁸ Upéi kiva'e-pe po, "Ndapeikovéi-ma va'erã xe aime ha-py xe ndive petongea
hagwã" nde'i reíry, amombe'u-ta peẽ-my. Inhe'ẽ renduse e'ŷha-pe he'i upéa.

¹⁹ Upéixa ramo ma'erã po ndoikovéi-ma Nhandejáry ndive, jaikwaa-ma voi.
Ndogweroviái-gwi íxupe ndoikoiry hendive.*

4

¹ Upéa-gwi nhanhangareko porã katu nhandéjehe. Nhahendu katu Nhan-
dejáry nhe'ẽ:

"Peiko va'erã xe aime ha-py xe ndive pepytu'u hagwã"

* 3:11 Nm 14.22-23; Jd 5 * 3:11 Sl 95.7-11 * 3:15 Sl 95.7-8 * 3:19 Nm 14.1-35

he'i ete va'ekwe nhande-vy Nhandejáry. Upéa nhe'ẽ imbaraete joty. Upéa-gwi xáke, ani erejere teĩ íxugwi. Nhanhangareko porã katu nhandéjehe jarovia tee hagwã. Ndoroipotái he'i para'e pende-rehe: "Kóá ndoikovéi-ma va'erã Nhandejáry ndive hendive opytu'u hagwã. Upéa ndoiko mo'ãvéi-ma va'erã hendive" upéa ndoroipotái he'i pende-rehe kwéry.

² Yma gware-pe omombe'u va'ekwe upe nhe'ẽ porã. Áy omombe'u hagwera-mi íxupe, omombe'u nhande-vy ave. Yma gware-pe omombe'u rei nipo ra'e. Ndogweroviá araka'e hemimombe'u.

³ Ha nhande kwéry jarovia va'e katu jaiko-ma va'erã Nhandejáry ndive japytu'u hagwã hendive. Upéixa he'i Nhandejáry kватia nhe'ẽ inhe'ẽ rendu e'ŷhare-rehe:

"Ha'e ete-ma xejéupe. Ha'e kwéry ndopytái va'erã xe aime ha-py xe ndive otongea hagwã. Areko asy va'erã íxupe, ha'e xejéupe."*

Upéixa he'i Nhandejáry kватia nhe'ẽ yma gware-rehe. Yma ete araka'e japytu'u hagwã ojapopa ramo jepe Nhandejáry, he'i joty upéa. Ojapo rire ko mundo, ojapopa-ma voi. Ndaiporivéi-ma ojapo va'erã.

⁴ Oĩ Nhandejáry kватia nhe'ẽ he'i va'e a-rami sete aryha-rehe:

"Sete aryha-py opytu'u-ma Nhandejáry ombo'apoha-gwi"*

he'i Nhandejáry kватia nhe'ẽ.

⁵ Upéi he'i jevy Nhandejáry kватia nhe'ẽ:

"Ha'e kwéry naxe moirũi va'erã voi xe ndive otongea hagwã"*

he'i onhe'ẽ rendu e'ŷhare-rehe.

⁶ Upéixa gwĩ upe nhe'ẽ porã rendu ranhehare rei katu, nomoirũi-ma Nhandejáry-pe opytu'u hagwã hendive. Ndogweroviá-gwi araka'e nomoirüiry íxupe. Ha oĩ joty inhírurã, "Iporã pepytu'u Nhandejáry ndive" he'i va'erã íxupe oĩ joty. Upéa jaikwaa voi.

⁷ Nhandejáry omoĩ jevy-ma nhande-vy japytu'uha óra. "Ko'ãy" he'i-gwi Davi amyrí Nhandejáry nhe'ẽ-py, jaikwaa voi. Upéa-gwi oĩ joty opytu'uharã. Ha Nhandejáry nhe'ẽ renduse e'ŷhare omano are rire katu, omombe'u va'ekwe nhande-vy Davi amyrí Nhandejáry nhe'ẽ-py, kватia-rehe omoĩ-vy onhe'ẽ:

"Ko'ãy inhe'ẽ pehendu ramo, ani ijapysa e'ŷ va'e-rami peiko teĩ."*

Upéixa he'i va'ekwe Davi Nhandejáry nhe'ẽ-py. Upéa nhe'ẽ amombe'u kuri peẽ-my.

⁸ Áy oĩ he'i va'erã mo'ã: "Josué amyrí ko omombytu'u-ma va'ekwe nhane ramoigwasu kwéry-pe" he'i va'erã mo'ã. Ha nomombytu'úiry íxupe kwéry va'ekwe. Josué omombytu'u ramo íxupe kwéry ra'e, "Amoĩ jevy-ta pepytu'u hagwã óra" nde'íry arã ra'e Nhandejáry.*

⁹ Upéa-gwi oĩ joty nhande Nhandejáry re'ýi pegwarã japytu'u hagwã ha'óra nhamoirû hagwã Nhandejáry-pe japytu'u meme hagwã.

¹⁰ Nhandejáry-pe nhamoirû va'e gwive japytu'u hagwã nanhamba'apovéi-ma va'erã. Nhandejáry opytu'u hagwe-rami ave japytu'u-ma va'erã nhande.

¹¹ Aníke nhande kaigwe teĩ. Nhamoirû katu Nhandejáry-pe nhane kyre'ý reheve, japytu'u hagwã hendive. Aníke nhande nhaheko ra'ã teĩ ni peteĩ yma gware inhe'ẽ renduse e'ŷ va'e-pe. Ha'e kwéry heko-rupi jarovia e'ŷ ramo katu, ndikatúi nhamoirû Nhandejáry-pe japytu'u hagwã hendive. Nhan-hehundi arã.

¹² Ha Nhandejáry nhe'ẽ tekove oikoha-rami oiko. Opa-rupi oho. Okanhy va'e gwive ombojekwaa uka. Ha kyse hãi joja va'e katu, nhande kutupa voi. Nhande kutu nhande rete gwive, nhande py'a gwive jepe nhande kutu ave.

* 4:3 Sl 95.11 * 4:4 Gn 2.2 * 4:5 Sl 95.11 * 4:7 Sl 95.7-8 * 4:8 Dt 31.7; Js 22.4

Upéixa upe kyse-rami Nhandejáry nhe'ẽ. Ombojekwaa ukave kave entéro nhande py'apy-py oĩ va'e gwive. Ndaipóri nhande py'a-py, nhande rete-rehe ave okanhy va'e íxugwi. Ojohupa nhande rete-rehe nhande py'a-rehe ave. Pya'e ohexa kwaa nhande-rehe nhande rekoha. Jajapose va'e ave oikwaapa voi. Ndikatúi mba'eve okanhy íxugwi.

¹³ Hemimoingove gwive ojekwaapa Nhandejáry resa-py. Ha'e katu nhane monhe'ẽ uka va'erã gwovagwy-py, nhane monhe'ẽ uka va'erã peteĩ teĩ nhande kwéry-pe. Upéa-gwi nhanhangareko porã katu nhandéjehe ani hagwã nhahenduse e'ŷ inhe'ẽ. Jarovia tee joty inhe'ẽ.

Pa'i ruvixagwasu-rami voi Hesu

¹⁴ Ha Hesu katu Nhandejáry ra'y tee voi. Ha'e ohasa va'ekwe oho-vy yváy-py. Nhande-rehe koty imarangatu ete va'e-py oikeha-rami pa'i ruvixagwasu, oike ave yváy-py Hesu. Nhande-rehe oho upe-py pa'i ruvixagwasu-rami. Upéa-gwi ani pemombe'u e'ŷ teĩ atýra-py Hesu rehewa nhe'ẽ. Perovia porã tee katu íxupe.

¹⁵ Ha'e onhangareko porã nhande-rehe pa'i ruvixagwasu-rami. Oiko ramo va'ekwe ko yvy-py, nhande-rami oiko va'ekwe. Nhande mbojejavysaha-rami ave, ombojejavys mo'ã va'ekwe oiko-vy íxupe Satanás. Nhande-rami jepe oiko va'ekwe, ndojejavýi joty voi oiko-vy va'ekwe. Upéa-gwi hape-gwi nhande resa rerova ukase ramo, nhande poriahuverekoo kwaa voi ha'e. Jahasa asy jave, nhande, ha'e imandu'a gwekokwe-rehe nhande poriahuverekoo-vy.

¹⁶ Upéa-gwi nhamoirũ katu Hesu-pe. Ha'e ogwapy haty-py ogwapy oĩ-vy. Nhatí e'ŷ rehewe nhamoirũ íxupe nhande rexakwaa reihaty-pe. Nhande poriahuverekoo va'erã. Nhaikotevë ramo, ha'e nhane pytygwõ va'e voi.

5

¹ Ko'ánga amombe'u-ta peẽ-my pa'i ruvixagwasu rehewa nhe'ẽ Hesu-pe pemoirũ hagwã petí e'ŷ rehewe. Nhane pa'ũ-gwi ojeporavo pa'i ruvixagwasurã. Upéi nhamoï íxupe nhande rekoviá om̄ba'apo hagwã Nhandejáry-pe. Jaipota ome'ẽ Nhandejáry-pe hemimbota. Jaipota ome'ẽ íxupe ijukapyrã pono nhande rerekoo asy, hekovía omboyke hagwã nhandéhegwi nhane rembiapo vaikwe.

² Upe pa'i ruvixagwasu ko yvy pygwa nhande-rami ojejavys va'e. Ohekombo'ese íxupe ave anháy ohesa rerova uka hagwã ójehe. Nhande kwéry-rami oiko-gwi, oiporiahuverekoo kwaa ojejavys va'e-pe. Hi'arandu e'ŷ va'e-pe ae ogwerekoo porã.

³ Upéixa ramo ome'ẽ-ta ramo Nhandejáry-pe nhane rembiapo vaikwe-rehe ijukapyrã, tome'ẽ ranhe ave ójehe ójehe gwarã.

⁴ Ndoikói avave pa'i ruvixagwasu ramo ojéhegwi rei. Onhemboete ukase-gwi rei ndoikói. Ohenói ae íxupe Nhandejáry pa'i ruvixagwasu ramo oiko hagwã. Upéixa voi ohenói va'ekwe myamyrí Arão pa'i ruvixagwasu oiko hagwã.*

⁵ Upéixa ete Cristo ave katu Nhandejáry remienói voi. Ndoikói pa'i ruvixagwasu-rami onhemboete ukase-gwi. Nhandejáry remimoingo ae voi ha'e. Upéixa he'i Cristo-rehe Nhandejáry kwatia nhe'ẽ:

"Nde ko xe ra'y tee voi. Ko'ãy katu amombe'u-ta enterovéa-pe: Ko va'e xe ra'y
tee voi"*

he'i Nhandejáry kwatia nhe'ẽ.

⁶ Upéixa he'i jevy Nhandejáry kwatia nhe'ẽ:

* 5:4 Èx 28.1 * 5:5 Sl 2.7

“Nde ko ereiko meme va'erā pa'i ruvixagwasu-rami. Myamyrī Melquisedeque reko-rupi ereiko va'erā opa e'ŷ reheve”*

he'i Nhandejáry kwatia nhe'ē. Upéixa ramo onhe'ē-py mante ndoikóiry voi pa'i ruvixagwasu-rami. Nhandejáry remimoingo ae.

⁷ Oiko jave va'ekwe nhande-rami ko yvy ári, ojerure rure Nhandejáry-pe onhe'ē omondo mondo-vy. Hasē jave ojerure íxupe. Nomanoséi-gwi ojahe'o-vy ojerure ojéupe oresende kwaa va'e-pe. Oraçāo ojapo ramo, ohendu inhe'ē Túvy. Gwu remimbota ojapose-gwi, ohendu voi gwa'yry nhe'ē ave Túvy. Nomanoséi jepe, ojapose joty Gwu-pe hemimbota.

⁸ Ta'yry jepe, ohasa asy oiko-vy. Ohasa asy jave Gwu reko rupive pive-ma oiko, Gwu remimbota gwive ojapopa ete-ma oiko-vy.

⁹ Ha upe rire katu Nhandejáry he'i va'ekwe íxupe onhemboagwyje rire, oiko-ma inhe'ē renduha gwive resendeharā. Nhane moingoveharā oiko, hendive jaiko meme ete hagwā.

¹⁰ Ha'e Nhandejáry remimoī pa'i ruvixagwasu-rami oiko hagwā, Melquisedeque reko-rupi oiko hagwā hemimoī voi.

*Penhangareko katu pendéjehe pono pejehesa rerova uka
(1 Co 3.1-2; 14.20; Ef 4.14-15)*

¹¹ Heta oĩ Melquisedeque rehewa nhe'ē oromombe'u va'erā. Ha ko'ánga katu hasy xe-vy aikwaa uka hagwā peẽ-my Melquisedeque rehewa nhe'ē, napene arandu porāvéiry-gwi.

¹²⁻¹⁴ Are-ma aikwaa uka uka mo'ā peẽ-my aiko-vy. Ma'erā ndapeikwaái araka'e. Ma'erā ndapeikwaa ukái araka'e pende re'yí kwéry-pe. Ha ko'ánga katu onhembo'e e'ŷ va'e-rami peiko-ma joty. Peẽ, peikotevě jevy pene mbo'eharā-rehe onhepyrū jevy pene mbo'e-vy Nhandejáry rehewa nhe'ē-py. Nhane mitā'i ho'u va'e kamby. Kakwaa va'e remi'urā ndo'úi. Upéixa mitā'i reko-rupi oiko va'e, kamby ho'u va'e-rami voi oiko. Ndoikwaái vyteri tekoha porā, ivai para'e iporā para'e nde'íry oiko-vy voi ha'e. Ha okakwaa va'e katu kakwaa va'e rembi'u ho'u kwaa voi. Upéixa ete hi'arandu va'e kakwaa va'e rembi'u ho'u va'e-rami oiko. Areve-ma oiko-gwi arandu-rupi, inharandu porāve-ma oikwaa hagwā tekoha porā, iporā para'e, ivai para'e oikwaa porāmba voi ha'e. Ha peẽ katu kamby ho'u verei va'e vérami joty peiko. Mitā hi'arandu e'ŷ va'e-rami joty peiko.*

6

¹⁻² Upéa-gwi anive nhanhombo'e mbo'e gwī ojerovia ramo va'e pegwarā nhe'ē-rehe. Nhambo'e mbo'e hagwe-rami jevy nome'ēiry voi nhanhombo'e jevy. Penhombo'eve eve ae katu jaikwaa porāve rāve rei hagwā nhande-vy gwarā nhane arandu porāve hagwā. Ne'írā ogwerovia tee va'e-pe: “Pejerovia katu Nhandejáry-rehe” ja'e. “Perova katu pende rekoha tujakwe” ja'e íxupe kwéry. Jaikwaa uka íxupe nhanhemongaraiha. Inhakā ári nhande po nhamoīha jaikwaa uka ave íxupe. “Oikove jevy va'erā omano va'ekwe” ja'e ave íxupe. “Ojapo japo va'ekwe-rehe ogwerekva' erā enterovéa-pe Nhandejáry” ja'e ne'írā ogwerovia tee va'e-pe.

³ Āy jaikwaa porāve rāve ae katu nhande-vy gwarā nhe'ē nhane arandu porāve hagwā nhande. Ha Nhandejáry nhane mo'aranduse ramo katu, nhahendu va'erā upéa nhe'ē.

⁴⁻⁶ Pejeapysaka porā katu xe nhe'ē-rehe. Oĩ omo'arandu va'e íxupe mo'ā, arakatu-py oiko va'e-rami mo'ā oiko. Nhandejáry remime'ē ome'ē va'ekwe

* 5:6 Sl 110.4 * 5:12-14 Gn 22.16-17

íxupe. Ipy'a-py Nhe'ẽ Marangatu tee va'e oiko-ma va'ekwe. Æygwa avave ohexa e'ŷ va'e Cristo rembiapo porã rexahare voi. "Iporã porã nipo ra'e Nhandejáry nhe'ẽ" he'i ojohu porã-vy. Upéa rehewa Cristo rape-gwi ova ramo, ndikatuvéi-ma jarova uka jevy íxupe hekoha. Ojere-ma ramo Nhandejáry ra'y-gwi, yma ogwerekohagwe-rami jevy ogwerekohagwe-Cristo-pe. Okurusugwasu-rehe ojuka íxupe va'ekwe-rami oiko íxupe upe íxugwi ojere va'e. Ojapose va'e ojapo jevy Cristo-rehe. Atýra-py omotí íxupe onhembohoryvy hese.

⁷ Ay amombe'u-ta peẽ-my arandu rehewa nhe'ẽ temitý rehewa nhe'ẽ-rami. Oime vvy. Upe-py oky oky rire omohu'ũ porã íxupe. Upéi omohenhói porã temitý ijáry-pe. Upéa vvy Nhandejáry omoporãve rãve upe gwembiapokwe.

⁸ Ha omohenhói e'ŷ ramo katu ijáry-pe, okakwaa henhói-vy ramo jai nhuatí rehewe, onhemitý rei ra'e. Ojaty hagwe-rehe rei optya. "Anive erembohoky teĩ" he'i-ta para'e íxupe Nhandejáry. Ndoipotavéi henhói. "Tata-py ohapy va'erã" he'i-ta para'e íxupe Nhandejáry.

⁹ Upéa nhe'ẽ amombe'u-ma peẽ-my penhangareko porã hagwã pendéjehe tape porã-gwi pejehesa rerova e'ŷ hagwã. Ha xe re'yi kwéry, ahexa kwaa porã-ma pende-rehe pende rekoha porã: "Ndovaléi ojáry-pe" nda'e mo'ãi joto pende-rehe. "Ohovasa porã-ma va'erã íxupe Nhandejáry" ha'e-ta ae joto pende-rehe. "Ohepy-vy oresende-ma va'erã íxupe" ha'e-ta xe pende-rehe.

¹⁰ Hekoha porã voi Nhandejáry. Ndahesaráí mo'ãi voi pene rembiapo porã-gwi. Pehayhu íxupe peiko-vy. Pehayhu-gwi peipytygwõ va'ekwe heroviahawéry-pe. Ko'ánga ete peve peipytygwõ peiko-vy íxupe kwéry. Upe pene rembiapo-gwi ndahesaráiry va'erã Nhandejáry.

¹¹ Aipota peteĩ teĩ pene kyre'ŷ peipyhy hagwã tape porã Hesu ou jevytaha áry peve. Ndapejeréi ramo íxugwi, pehexa va'erã pene remiha'arõ Hesu ou jevy ramo.

¹² Ndaipotáí pene ate'ŷ. Oĩ ogwerovia ku'a ku'a e'ŷ va'e. Ojere e'ŷ rehewe ogwerovia tee oiko-vy. Ome'ẽ va'erã íxupe Nhandejáry, "Ame'ẽ va'erã peẽ-my" nde'i reíry va'ekwe. Upe va'e rehewa tapehekora'ã katu íxupe. Upeixagwa reko-rupi ae tapeiko katu.

He'i ete hagwe-ramima ojapo voi Nhandejáry

¹³ Yma va'ekwe Nhandejáry, "Orohovasa va'erã" nde'i reíry va'ekwe Abraão-pe. "Xe ha'e hagwe-ramima ajapo va'erã" he'i ete va'ekwe. Ha Nhandejáry-gwi ndaipóri tuvixave va'e. Upéa-gwi ha'e ae gwéry-py "Orohovasa va'erã" he'i ete va'ekwe Abraão-pe.

¹⁴ "Nda'e reíry-ta nde-vy"
he'i.

"Orohovasa va'erã. Ne remiarirõ joapyri pyri ambohe'yi va'erã"
he'i ete Abraão-pe.

¹⁵ Upéi oha'arõ tee tee va'ekwe Nhandejáry nhe'ẽ. Oha'arõ rire oiko va'ekwe íxupe Nhandejáry he'i hagwe-rami.

¹⁶ Ha nhande kwéry katu, "Ajapo va'erã katu xe ha'e hagwe-rami" ja'e ramo, imbaraeteve va'e réry ae jaiporu. "Héry-py ajapo va'erã voi xe ha'e hagwe-rami" ja'e. Upéixa ja'e ramo, nanhamombe'u mbe'u reíry ojoupe.

¹⁷ Upéixa ete, "Peẽ-my gwarã ame'ẽ va'erã peẽ-my" he'i ramo Nhandejáry, oikwaa uka porãseve nhande-vy okambia e'ŷha onhe'ẽ. Upéa oikwaa uka porãve rãve hagwã nhande-vy, "Naxe nhe'ẽ reíry, imbaraete voi xe nhe'ẽ. Xe réry-py xe ajapo va'erã xe ha'e hagwe-rami" he'i.

18 Upéixa ramo Nhandejáry, “Xe ha'e hagwe-rami ajapo va'erā” he'i ramo “Xe réry-py ajapo va'erā” he'i ramo ave ha'e, ndaijapúiry voi. Inhe'ẽ apu e'ŷ va'e ha'e. Nhande mbopy'agwapy-ma Nhandejáry. Hesendeharā oĩ ha-py pya'e oripara hagwā oho-vy ojapura va'ekwe-rami voi nhande. “He'i hagwe-rami ojapo va'erā” ja'e kwaa ojóupe nhamoirū-gwi íxupe. Upéixa ja'e omombaraete-gwi nhande py'a.

19-20 Inhe'ẽ nhaha'arō tee jave, imbaraete voi nhande kyhyje e'ŷ rehevē. Nhande py'amirī e'ŷ rehevē nhaha'arō inhe'ẽ. Ndajajehesa rerova ukái inhe'ẽ-gwi. Ipokatu voi ha'e inhe'ẽ, ijapu e'ŷ va'e voi ha'e. Nonhekambiáiry voi inhe'ẽ. Ko yvy-py oĩ va'ekwe Nhandejáry koto py-py ao-py ijopiapyre. Tuvixa ijopiahā nhande jokoharā pono jaike rei koto imarangatu ete va'e onhegwahē e'ŷ ha-py. Āy katu nhagwahē va'erā jahavy Nhandejáry ae oiko ha-py. Ndaiporivéi-ma nhande jokoharā. Upe pete ogwahē ranhe va'ekwe Hesu oho-vy nhande-rehe ha-py. Upe pete oho-ma oiko hagwā pa'i ruvixagwasu-rami. Melquisedequ reko-rupi oiko meme va'erā pa'i-rami nhande-rehe ha-py.

7

Melquisedequ amyrī rehewa nhe'ẽ

1 Āy amombe'u-ta peẽ-my Melquisedequ amyrī rehewa nhe'ẽ. Oiko araka'e Salém tetā ruvixagwasu ramo. Pa'i ramo oiko araka'e. Nhandejáry Tupāgwasu rembigwairā oiko araka'e. Ha'e ohogwaitī va'ekwe Abraão amyrī-pe. Abraão ojuka ra'e gwī mburuvixagwasu ipoxy va'e-pe. Ha upéi katu ojuka rire upe mburuvixa ipoxy va'e-pe, ou jevy-ma gwóga-py. Upe-ma ramo gwóga-koto ou jevy-ma ramo, ou ohogwaitī íxupe va'ekwe Melquisedequ. Upéi he'i íxupe: “Nhandejáry tandem rovasa” he'i Abraão-pe.

2 Upe ramo Abraão omboja'o ja'o mburuvixa ijukapyre mba'ekwe gwive ome'ẽ hagwā Melquisedequ-pe íxupe gwarā. Décima parte ome'ẽ íxupe. Cada dez-gwi oipe'a pete'ẽ-vy íxupe nueve oheja hagwā ojéupe. Upéixa décima parte he'i va'e ome'ẽ íxupe. Upe íxupe ome'ẽ ranhe va'e héry ranhe voi Melquisedequ. Melquisedequ he'ise nhande ruvixagwasu hekoha porā va'e. Melquisedequ oiko araka'e Salém tetā ruvixagwasu ramo. Nhande ruvixagwasu nhane mbopy'agwapyhaty voi-pe he'ise upéa héry.

3 Ndajaikwaái kiva'e po araka'e túvy isy ave. Kiva'e po araka'e hembypy nomombe'uí Nhandejáry kwatia nhe'ẽ. Ndajaikwaái ave mba'e óra po oiko araka'e, araka'e po omano ave ndajaikwaái voi. Ha'e oiko meme pa'i ramo, opa e'ŷ rehevē oiko ha'e. Nhandejáry ra'y tee Cristo rekoha-rupi oiko voi.

4 Pejeapysaka porā katu xe nhe'ẽ-rehe. Gwembieraha va'e omboja'o Abraão heraha-vy mburuvixa amyrī mba'ekwe rehewa ome'ẽ hagwā íxupe. Décima parte ome'ẽ íxupe gwarā. Nhandejáry pegwarā-ma ome'ẽ íxupe. Ha Abraão nhane rembypy voi, ha'e tuvixa mba'e voi. Ha Melquisedequ-pe katu ome'ẽ joto íxupe gwarā hembieraha-gwi. Upéa-gwi Melquisedequ tuvixave va'e nipo ra'e íxugwi.

5 Āy amombe'u-ta peẽ-my Levi amyrī remiarirō joapyri pyri rehewa nhe'ẽ. Ha'e kwéry ave Abraão amyrī remiarirō joapyri pyri voi. Ha'e kwéry pa'i ramo oiko-ma va'ekwe. He'i va'ekwe gwe'ýi kwéry-pe: “Moisés amyrī nhe'ẽgwe pejapo katu. Peiko katu hemimombe'ukwe-rupi. Peme'ẽ katu ore-vy pene remimboja'okwe ore-vy gwarā” he'i gwe'ýi kwéry-pe. He'ýi Abraão remiarirō joapyri pyri ramo jepe, he'i joto gwe'ýi-pe upe nhe'ẽ.

6 Ha Melquisedequ katu ndaha'éi upe pa'i kwéry re'ýi, ndaha'éi Levi remiarirō kwéry va'e. Ndaha'éi, “Xe orohovasa va'erā” he'i Nhandejáry

íxupe va'e Abraão-rami. Pa'i kwéry re'ýi ndaha'éi ramo jepe, Moisés amyrí nhe'ë-py gwemimboja'o ome'ë íxupe va'e e'ý ramo jepe, ome'ë joty íxupe Abraão gwemimboja'o. Décima parte he'i va'e ime'ë-vy omboja'o joty íxupe. "Nhandejáry tandem rovasa katu" he'i ave Abraão-pe.

⁷ Ha "Nhandejáry tandem rovasa" he'i va'e tuvixave va'e gwembihovasa-gwi. Gwembihovasa va'e-gwi tuvixave va'e ohovala va'e. Upéa nhe'ë ndaipóri "Ijapu" he'i va'erã hese. Anhetegwa voi upéa nhe'ë. Upéa-gwi upe myamyrí Melquisedeque tuvixave va'e voi Abraão amyrí-gwi.

⁸ Pejeapysaka porã jevy katu xe nhe'ë-rehe. Upe "Peme'ë katu ore-vy pene remimboja'o ore-vy gwarã" he'i va'ekwe, nhande-rami oiko va'ekwe omano va'erã voi. Ha upe mburuvixagwasu katu, Abraão ome'ë va'ekwe íxupe va'e hemimboja'okwe, upe va'e oikove voi. "Omano-ma va'ekwe" nde'íry hese Nhandejáry kwaitia nhe'ë.

⁹⁻¹⁰ Ha myamyrí pa'i Levi-pe, hemiarirõ-pe ave katu ome'ë me'ë íxupe va'ekwe he'ýi gwemimboja'okwe. Ha Levi katu, upe mburuvixagwasu-pe ome'ë va'e-rami ave. Tamoiwasu Abraão ohogwaití ramo upe mburuvixa Melquisedeque, ome'ë va'ekwe Melquisedeque-pe gwemimboja'okwe. Upéixa ramo ne'írã vyteri oiko ramo jepe, hemiarirõ Levi ome'ë joty mburuvixa-pe. "Tamói ome'ë ramo, ome'ë va'e-rami ave" ja'e Levi-rehe.*

¹¹ Ha Nhandejáry omoingo va'ekwe Levi amyrí hemiarirõ kwéry-pe ave pa'i kwéry ramo, judeu rembypy oiko porã hagwã ha'e gwekoha-rupi. Upe pa'i kwéry oipytygwõ tygwõ rei judeu rembypy-pe. Ha nonhemboagwyjéi va'ekwe Nhandejáry he'i va'ekwe íxupe. Moisés remimombe'ukwe tekoha-rupi rei oiko ramo, nomboagwyjéi va'ekwe Nhandejáry nhe'ë oiko-vy. Heroagwyeharágwe. Omboagwyje ramo ra'e, ndojekwaavéi arã ra'e pa'i ambue Melquisedeque rekoha-rupi oiko-vy ra'e. Oiko meme arã ra'e gwí pa'i kwéry Levi remiarirõ Arão amyrí rekoha-rupi.*

¹² Ha gwí pa'i kwéry omba'apo rei va'ekwe judeu kwéry omboagwyje hagwã mo'ã Nhandejáry nhe'ë. Upéa-gwi Nhandejáry ohekoviárõse ramo pa'i rekoha, ohekoviárõ ave Moisés remimombe'ukwe tekoha. Ndaipokatuvéima upe tekoha rehewa nhe'ë pa'i ramo nhane moingo hagwã. Ijapy-ma voi nhande-vy upe tekoha.

¹³ Ha Nhandejáry Hesu-rehe katu he'i:

"Nde ko ereiko meme va'erã pa'i-rami"
he'i Nhandejáry kwaitia nhe'ë. Myamyrí Levi ndaha'éiry tamói, Hesu ramói. Hesu re'ýi nomba'apói Nhandejáry róga-py. Omoka'ë-vy Nhandejáry-pe nomba'apói he'ýive.

¹⁴ Ha myamyrí Judá katu Nhandejáry Hesu ramói voi. Judá remiarirõ joapyri pyri-pe "Peiko katu pa'i ramo" nde'íry Moisés amyrí. Upéa-gwi Nhandejáry Hesu ndoikói gwí Levi amyrí remiarirõ pa'i kwéry reko-rupi. Pa'i ambue-rami ae ha'e oiko-ma va'ekwe.

Hesu oiko va'ekwe peteï pa'i ambue-rami. Melquisedeque rekoko-we-rupi oiko va'ekwe

¹⁵ Amombe'uve-ta peë-my peikwaa porâve hagwã pa'i ambue rehewa nhe'ë. Ojehexa uka-ma va'ekwe peteï Melquisedeque ramigwa. Pa'i ambue-rami ojehexa uka.

¹⁶ Pa'i Levi remiarirõ e'ý voi ha'e. Upéa-gwi ndoikói outro pa'i kwéry-rami. Oiko ha'e ae pa'i ruvixagwasu-rami nomanovéi hagwã oikove jevy-gwi.

¹⁷ Upéa-rehe he'i Nhandejáry kwaitia nhe'ë:

* 7:9-10 Gn 14.17-20 * 7:11 Sl 110.4

“Nde ko ereiko meme va'erā pa'i-rami. Melquisedeque amyrī rekoviá ereiko
va'erā”
he'i íxupe.

¹⁸⁻¹⁹ Ha ãy katu ndaipokatuvéi-ma yma gware remimombe'ukwe tekoha. Yma Moisés remimombe'ukwe-rupi oikose va'ekwe mo'ã. Nomboagwyjéima va'ekwe Nhandejáry nhe'ẽ. Upéa-gwi oiko rei va'ekwe upe tekoha-rupi. Naimbaraetevéi yma gware he'i va'ekwe. Ha ko'ângá katu iporâve nhande-vy gwarã nhande nhaha'arõ tee va'e-pe. Upe pa'i ambue Nhandejáry irũ ramo nhane moingo va'e-rehe ãy katu jajerovia voi.

²⁰ Outro kwéry onhemoingo va'ekwe-rami nomoingói pa'i-rami Hesu-pe Nhandejáry: “Xe réry-py ha'e ete-ta peẽ-my. Peiko katu pa'i-rami” nde'íry outro kwéry-pe.

²¹ Ha Hesu-pe katu he'i:

“Xe ae xe réry-py nda'e reíry-ta nde-vy. Eiko katu pa'i-rami”
he'i ete íxupe.

Upéixa he'i Nhandejáry kватia nhe'ẽ:

“Xe ha'e hagwe-rami voi ajapo va'erā, he'i. Xe réry-pyma ajapo va'erā,
he'i onhe'ẽ-vy. Nakambiáiry va'erā voi katu xe xe nhe'ẽ, he'i ójehe
Nhandejáry. Ereiko meme va'erā pa'i-rami erepa e'ŷ reheve” he'i Hesu-
pe Nhandejáry.

Upéixa he'i Nhandejáry kватia nhe'ẽ.

²² Yma va'ekwe, “Xe nhe'ẽ renduha-pe ahovasa va'erā” he'i ramo nhande-
vy, nhamoporã voi va'ekwe onhonhe'ẽ va'ekwe. Ha ko'ângá katu, iporâve
voi nhande-vy inhe'ẽ. “Omano-gwi xe ra'y, orohovasa vasa-ma va'erā” he'i
nhande-vy. Upéa nhe'ẽ iporâve nhande-vy.

²³ Gwĩ outro kwéry onhemoingo va'ekwe pa'i ramo. Upéi omano va'ekwe.
Upéi hekovía onhemoingo jevy va'ekwe. Ohekoviárõ arõ meme va'ekwe
oiko-vy. Upéa-gwi heta oĩ va'ekwe.

²⁴ Ha Hesu katu nomanovéi-ma. Upéa-gwi ha'e oiko meme va'erā pa'i
ruvixagwasu-rami. Ohekoviárõ e'ŷ va'erā voi íxupe Nhandejáry.

²⁵ Upéa-gwi héry-py Nhandejáry-gwi nhanhemoagwĩ va'e gwive jaju-vy nhane
resende kwaapa voi Hesu indive jaiko porã meme hagwã. Nhande-rehe
ojerure rure va'erā Nhandejáry-pe oiko meme-vy. Nomanovéi-ma va'erā voi
ha'e opa e'ŷ reheve.

²⁶ Upéixa ramo, pa'i ruvixagwasu-rami oiko Hesu. Nhane rekotevěha tee voi
ha'e. Ha'e ko heko marangatu tee va'e. Ojejavy e'ŷ va'e voi ha'e, onhemongy'a
e'ŷ va'e voi ha'e. Ogwerajeipi-ma va'ekwe íxupe Nhandejáry yvate yváy-py
oiko hagwã ondice, “Ojejavy e'ŷ va'e voi ko ha'e” he'i hagwã hese.

²⁷ Outro kwéry pa'i ruvixagwasu kwéry-rami e'ŷ katu ha'e. Ha'e kwéry ome'ẽ
me'ẽ Nhandejáry-pe ójehe ijukapyrã omboyke uka ranhe hagwã ojéhegwí
gwembiaipo vaikwe. Upéi gwe'ýi kwéry-rehe ave ome'ẽ me'ẽ jevy Nhandejáry-
pe ijukapyrã. Ha ha'e kwéry hembiapokwe ndaha'ei Hesu rembiapo-rami.
Ha'e nonheme'ẽ py'í py'íry va'ekwe. Peteigwe mante onheme'ẽ-ma va'ekwe
peteigwe ojejuka uka hagwã, Nhandejáry omboyke hagwã enterovéa-gwi
hembiapo vaikwe. Peteigwe anho mante ha'e onheme'ẽ. Ha upe rire katu
nonheme'ẽvéi-ma.

²⁸ Yma gwĩ outro kwéry onhemoingo va'ekwe pa'i ruvixagwasu ramo Moisés
remimombe'ukwe-rupi. Pa'i ruvixagwasu ramo jepe, ojejavy joty va'ekwe.
Ha upe rire katu:

“Xe ha'e hagwe-rami oromoingo va'erā pa'i-rami. Xe réry-py ereiko va'erā”
he'i gwa'ýry-pe Nhandejáry.

Ha'e ojejavy e'ŷ va'e. Āy oiko meme va'erā Nhandejáry ndive omboag-wyjepa rire inhe'ē.

8

*Nhande-vy onhemoingo va'ekwe Hesu pa'i ruvixagwasu-rami
(2 Co 3.6)*

¹ Peẽ-my ha'ese va'e a-rami. Oĩ nhande-vy pa'i ruvixagwasu-rami onhemoingo va'ekwe. Melquisedeque rekovía onhemoingo va'ekwe. Āy ha'e ogwapy-ma oĩ-vy Nhandejáry Tupāgwasu tuvixave va'e ogwapy haty yke-rehe ijakatúa-koty.*

² Nhande rekovía omba'apo pa'i ruvixagwasu-rami. Nhandejáry ojapo uka íxupe va'e ojapo. Koty imarangatu ete onhegwahē e'ŷ ha-py omba'apo. Upe-py ha'e omba'apo haty-py ndaha'éi ao gwigwa koty ramigwa tembiapokwe rei. Nhandejáry rembiapokwe voi upe koty oĩ va'e. Upe-py ha'e ojapo Nhandejáry he'i va'e gwive íxupe ojapo hagwā.

³ Gwī outro kwéry pa'i ruvixagwasu gwive onhemoingo va'ekwe ome'ē hagwā Nhandejáry-pe ime'ēpyrā ijukapyrā ave. Upéixa ete Hesu ndoikói arā pa'i ruvixagwasu-rami ra'e, mba'eve ndogwerekói ramo ra'e Nhandejáry pegwarā ome'ē va'erā.

⁴ Ko yvy-py ha'e oiko vyteri ramo ra'e, ndoikói arā ra'e pa'i-rami. Upéixa nanhaikotevēi arā ra'e hese. A-py ko yvy-py heta oĩ pa'i ime'ēpyrā Nhandejáry-pe ome'ē va'erā. Judeu rekoha-rupi ome'ē me'ē hikwái.

⁵ Yváy pygwa koty tee-py nomba'apói hikwái. Yvy-py ae omba'apo hikwái. Ao gwigwa koty-py omba'apo va'ekwe. Upe ao gwigwa koty ndaha'éi koty tee. Upe koty tee ra'anga mante voi upe yvy pygwa koty. Upéixa ave he'i myamyrī Moisés rehewa nhe'ē. Yma va'ekwe upe ao gwigwa koty omopu'ã-ta ramo, oha'anga íxupe Nhandejáry:

“Yvyaty ári nhaima ramo, ahexa uka kuri nde-vy ha'anga. Āy ejapo katu ha'e ramigwa ao gwigwa koty xe aha'anga hagwe-rami nde-vy”*
he'i íxupe va'ekwe Nhandejáry.

⁶ Ha āy katu Hesu-pe nomomba'apo ukái koty tee ra'anga-py. Koty tee-py voi oike ha'e. Upéixa ave iporāve voi nhande-rehe Hesu rembiapo ha'e kwéry hembiapo-gwi. “Orohovasa porāve rāve va'erā” he'i ramo Nhandejáry nde'i reíry nhande-vy. Iporāve Hesu rembiapo yma gware rembiapo-gwi. Ha'e kwéry nanhane moingo teéiry va'ekwe Nhandejáry irūrā. Hesu ae katu nhane moingo tee-ma Gwu irūrā.

⁷ Yma gware nhane moingo kwaa ramo ra'e Nhandejáry irūrā, nanhaikotevē jeyví arā ra'e inhirūrā nhane moingoharā ambue-rehe.

⁸ Ha yma gware rembiapo katu ndojohu porāi Nhandejáry. Upéixa he'i Nhandejáry kwatia nhe'ē:

“Ogwahē va'erā ou-vy xe amombe'u jevytaha áry, he'i Nhandejáry. Israel re'yí kwéry-pe amombe'u jevy va'erā hembiapo pyahurā. Judá re'yí kwéry-pe ave amombe'u va'erā. Xe nhe'ē ojapo ramo katu, túvy-rami areko va'erā íxupe kwéry, he'i Nhandejáry.

⁹ Yma va'ekwe amombe'u va'ekwe tamoiwasu kwéry-pe hembiaporā. Túvy ohupi heraha-vy va'e-rami gwa'ýry, anohē heraha-vy va'ekwe. Egito yvy-gwi anohē va'ekwe íxupe kwéry heraha-vy. Upe-ma ramo amombe'u va'ekwe íxupe kwéry hekorā kwéry. Ha ha'e kwéry katu ndojapóiry va'ekwe xe ha'e hagwe-rami. Upéa-gwi napenavéi rei-ma hese kwéry va'ekwe, he'i Nhandejáry.

* 8:1 Sl 110.1 * 8:5 Ex 25.40

10 Ha ko'ánga ae katu xe namombe'u jevy jevy mo'ávái-ma íxupe kwéry amombe'u hagwe-rami hekorã, he'i. Ha'e kwéry heko pyahurã íxupe amombe'u va'erã a-rami, he'i Nhandejáry. Amo'arandu va'erã íxupe, he'i. Amomandu'a meme hagwã íxupe xe rembihaikwe oĩ vérami arã ipy'apy-py. Upéixa-gwi ojapose va'erã xe nhe'ẽ, he'i. Ijaryrã voi xe. Xe re'yirã voi ave ha'e kwéry.

11 Entéro va'e gwive xe kwaas va'erã. Mitã gwive ituja va'e gwive, igwaigwí va'e gwive ave xe kwaas va'erã voi. Upéa-gwi, Pemboopy katu Nhandejáry rekoha, ndaiporivéi he'i va'erã. Gwapixa mbo'eháry, gwe'yí mbo'eháry ndaiporivéi-ma va'erã.

12 Ojejavý rire, hembiapo vai rire, aiporiahuvereko va'erã íxupe. Naxe mandu'avái-ma va'erã hembiapo vaikwe-rehe"
he'i Nhandejáry kwatia nhe'ẽ.*

13 "Heko pyahurã amombe'u va'erã" he'i Nhandejáry. Upéixa ramo, ijapy-ma nipo ra'e upe tekoha yma he'i ojapo hagwã va'ekwe. Ha ijapy rei va'e-pe katu pya'e omokanhy va'erã Nhandejáry.

9

Yma gware pa'i kwéry hembiapo porãjepe pa'i ruvixagwasu-rami hembiapo porãve nhande-vy Hesu

1 Ha yma gware Moisés remimombe'ukwe-rupi omboete Nhandejáry-pe. Koty omboete haty tembiapokwe rei-py omboete íxupe.

2 Omopu'ã va'ekwe lona gwigwa koty mokõi va'e. Jaike ypy ha-py héry va'e koty marangatu. Upe-py oĩ va'ekwe tataendy'y. Oĩ va'ekwe ave apyka. Apyka ári omoi mbojape imomarangatupyre Nhandejáry-pe omboete-vy.

3 Upéi koty imarangatu va'e kupe-py joty oĩ va'ekwe ao-py ijopiapyre tuvixa va'e. Ao tuvixa va'e-py ijopiapyre jahasa ramo ave, jaike-ma koty imarangatu ete va'e-py, nhegwahé e'ŷ ha-py.

4 Upe-py koty imarangatu ete va'e onhegwahé e'ŷ ha-py oĩ va'ekwe ouro-gwi ijapopyre apyka ramigwa "altar" he'i héry va'e. Hi'ári pa'i ohapy va'ekwe omotimbo hagwã Nhandejáry-pe hyakwã iporã va'e imohyakwã porãve hagwã. Upe-py oĩ ave va'ekwe yvyra-gwi ijapopyre mba'e ryru ouropyp ijapeugwãpyre, "arca do acordo" he'i héry va'e. Hye py-py onhemoi va'ekwe mba'e ryru mixi va'e ouro gwigwa ijapopyre. Ha'e hye py-py katu oĩ "maná" héry va'e. "Arca do acordo" rye py-py onhemoi va'ekwe ave Arão amyrí pykokakwe omoi. Upe yvyra ipiru va'ekwe. Nhandejáry nhe'ẽ-py ae hoky jevy-ma katu va'ekwe. Omoi va'ekwe ave "arca do acordo" rye py-py mokõi ita pehégwe. Nhandejáry remimombe'ukwe omoi hese.*

5 Upe imba'e ryru ári oĩ va'ekwe Nhandejáry rembigwái ra'anga ouro-gwi ijapopyre ipepo va'e héry va'e "querubim". Upe-py, "Nhandejáry kwaas ukaha" he'i "Jaikwaa-ma katu Nhandejaryha" he'i hese. Hi'ári oipysó va'ekwe oepo. Ipepogwy-py onhohé va'ekwe nhande-rehe ijukapyre rugwy. Ha upéixa rire katu Nhandejáry omboyke va'ekwe nhandéhegwi nhane rembiapo vaikwe, nanhane mbohasa asyvái-ma hagwã. Petei tei upéa re-hegwa nhe'ẽ namombe'u mo'ávái ãy.

6 Upéixa ramo va'ekwe pa'i kwéry oike ike koty imarangatu va'e gwembia-porã ojapo hagwã.

7 Ha ikupe-py koty imarangatu eteve va'e-py katu ndoikéiry voi pa'i kwéry. Pa'i ruvixagwasu anho mante oike upéa. Ndaipóri outro oike va'e. Ha'e

* 8:12 Jr 31.31-34; Hb 10.16-17 * 9:4 Ex 16.33; Nm 17.8-10

ndoike meméiry. Peteīgwéte oike peteī ro'y-py. Ha'e ndoike reíry. Ijukapyre rugwy reraha-vy mante ha'e oike upe-py Nhandejáry-pe ome'ẽ hagwā. Oje-hegwa ome'ẽ, he'yi kwéry rehewa ave ome'ẽ omboyke ukapa hagwā íxugwi hembiapo vaikwe. Oikwaa e'ý reheve hembiapo vaikwe gwive omboyke uka ave íxugwi.

8-9 Upéa-py nhane mbo'e Nhe'ẽ Marangatu tee va'e oikwaa uka hagwā nhande-vy yma gware he'ise va'e. Opu'ã joto jave upe lona gwigwa koto va'ekwe ndojepe'ái vyteri va'ekwe ijopiapyre upe koto imarangatu ete va'e-py jaike hagwā. Upe lona gwigwa koto he'i yma gware-pe ojapo hagwā. Yma gware remimopu'ákwe ãygwa-pe gwive oikwaa uka hagwā ave mba'éixa jaike-ta jaha-vy Nhandejáry ha-py. Upe koto omopu'ã va'ekwe jaikwaa porā hagwā Nhandejáry rembiapokwe ãygwa pegwarā ave. Yma gware ome'ẽ me'ẽ Nhandejáry-pe hemime'ẽ me'ẽ ijukapyrā ave. Ha ome'ẽ rire katu nonhemopotimbáiry voi ipy'a.

10 Yma gware rekoha-rupi oiko va'e hi'upy e'ý va'e-rehe opena eterei. Ojahuha-rehe, onhemopotih-a-rehe opena. Upe tekoha nhande rete pegwarā mante iporā, ndaha'éi nhande py'a pegwarā. Anhetegwa-ma va'ekwe upe tekoha rehewa nhe'ẽ. Omoatyrõmba peve enterovéa-pe Nhandejáry, ipokatu joto. Ha upéi katu ijapy-ma ave katu upe tekoha.*

11 Ha ko'ángá katu ojekwaa-ma ou-vy Cristo. Nhande rovasa porā-vy pa'i ruvixagwasu rekoke oiporu. Nhande-vy pa'i ruvixagwasu-rami iporāve va'e Cristo. Koto tee-py ojapo oiko-vy gwembiaporā. Ko yvy-py tembiapokwe rei gwy-py nomba'apói. Yváy pygwa koto tee-py ae ombo'apo oiko-vy. Koto tee yvy pygwa e'ý-rami, lona gwigwa e'ý-rami yváy-py koto.

12 Upéixa Cristo oike-ma va'ekwe yváy pygwa koto imarangatu ete va'e-py. Peteīwe oike va'ekwe ha upe rire katu noséiry oike jevy hagwā koto-py. Upe-py ndoikéi kavara rugwy, vaka ra'y rugwy ave reraha-vy ome'ẽ hagwā Nhandejáry-pe nhane rembiapo vaikwe-rehe. Ha'e ae gwugwy avyte-py oĩ rire, ojejuka uka-vy, gwugwy ogweraha va'e-rami oike koto-py oho-vy, nhane resende hagwā, jaiko meme hagwā Nhandejáry ndive.

13 Ha yma gware katu ha'e ae gweko-rupi oiko-gwi, oipyhy pyhy va'ekwe kavara rugwy vaka rugwy ave. Upéi vaka ra'y ohappy rire, oipyhy tanimbu. Upéi gwī ou va'e onhemopotí hagwā omoí hembipyhy hete-rehe. Gwī hete onhemongy'a va'e-rehe omopotí hagwā omoí. Hembipyhykwe omoí hese.*

14 Upe yma gware rekoha anhetegwa tee voi va'ekwe ha ko'ángá katu iporāve voi Cristo rembiapo. Mymba rugwy ndogwerahái koto-py. Gwugwy avyte-py ae omano Nhandejáry-pe gweko marane'ý me'ẽ-vy. Nhe'ẽ Marangatu tee va'e-rupi onheme'ẽ íxupe ijukapyre vérámi. Upéa-gwi gwugwy-py omopotí nhande py'a nhandéhegwi oipe'a hagwā nhande reko tujakwe jaiko hagwā Nhandejáry hekove tee va'e rekoha-rupi. Upéa-gwi nhande rerekó porā porā voi Cristo. Ha'e ojejuka uka-gwi nhande Nhandejáry remienói va'e jaiko. Nhande py'a-py gwive jajapose hemimbota Nhandejáry-pe.*

15 Yma va'ekwe, "Ahovasa porā meme va'erā xe remienói-pe" nde'i reíry voi araka'e nhande-rehe. Æ Cristo nhe'ẽ-py, hese ha-py ave, he'i hagwe-rami ome'ẽ va'erā nhande-vy nhande-vy gwarā. Moisés amyrí remimombe'ukwe-rupi jaiko ramo jepe, jajejavý joto va'ekwe jaiko-vy. Ndajajapopáiry joto va'ekwe yma he'i hagwe-rami. Ha ãy katu nhande-rehe Cristo omano-gwi, oipe'a-ma nhandéhegwi nhande reko tujakwe. Nhane rembiapo vaikwe

* **9:10** Ex 25.8-26.35

* **9:13** Lv 16.15-16; Nm 19.9,17-19

* **9:14** 1 Pe 1.18-19

omboyke nhandéhegwi. Upéixa ramo Cristo-rehe ha-py ae nhande-vy gwarã opa e'ŷ va'erã ome'ẽ arã nhande-vy.*

¹⁶⁻¹⁷ Jaikove vyteri ramo, nhamoï kwatia-rehe nhane nhe'ẽ. Kiva'e va'e-pe pa opyta-ta xe mba'e mba'ekwe ja'e jahai-vy kwatia-rehe. Upe kwatia nhe'ẽ ne'írã vyteri ovale nhande jaiko jave. Ha nhamano rire katu, ipokatu-ma va'erã voi. Upéa-gwi kwatia upeixagwa ndovaléi ndajaikwaái ramo ihaihare omanoha. Jaikwaa tee-ma ramo ae, ovale voi.

¹⁸ Upéa-gwi yma va'ekwe, "Xe nhe'ẽ renduha-pe gwive ahovasa va'erã" he'i va'ekwe Nhandejáry. He'i jave, ne'írã ipokatu va'ekwe. Ha upe rire katu vaka ra'y ojuka uka rire katu, ipokatu-ma va'ekwe nhande-vy. Anhetegwa voiha jaikwaa-ma.

¹⁹ Ha Moisés amyrĩ katu omombe'u ypy va'ekwe yma gware-pe tekoha porã. Nhandejáry remimombe'ukwe gwive omombe'u. Upéi ogweru va'ekwe vaka ra'y rugwy y ndive. Upéi oipyhy yvyra'i hissopo héry va'e. Ovexa ragwekwe pytã va'e oipyhy ave. Upéi ha'e-py ombohayvi hugwy Nhandejáry kwatia nhe'ẽ-rehe. Kente kwéry-rehe ombohayvi ave. Mba'e rugwy ombohayvi hese.

²⁰ Ombohayvi jave he'i upe pygwa-pe: "Nde'i reíry voi ko va'e nhe'ẽ. Hugwy-py ipokatu-ma peẽ-my. Nhandejáry remimombe'ukwe anhetegwama voi" he'i Nhandejáry kwatia nhe'ẽ-rehe.*

²¹ Hugwy hese ombohayvi hagwe-rami, ombohayvi jevy Moisés upe ao gwigwa koty-rehe. Nhandejáry mboete-vy nhane rembiporu-rehe gwive ombohayvi hugwy.*

²² Judeu reko Moisés remimombe'ukwe-rupi oiko va'e-pe haimete ndaipóri ijukapyre rugwy e'ŷ reheve onhemopotí va'e. Nomboykéi Nhandejáry nhandéhegwi nhane rembiapo vaikwe ijukapyre rugwy onhehẽ e'ŷ reheve. Nonhehẽiry nomopotíry.

Cristo ojejuka uka-gwi omboyke-ma nhandéhegwi nhane rembiapo vaikwe

²³ Ijukapyre rugwy e'ŷ reheve nonhemopotíry va'ekwe upe ao gwigwa koty pygwa gwive. Yváy pygwa koty tee va'e ra'anga voi upe koty. Yváy pygwa koty tee ra'anga rei ramo jepe, nonhemopotíry hugwy e'ŷ reheve. Ha yváy pygwa onhemopotí iporâve va'e-py.

²⁴ Ha Cristo katu ndoikéiry va'ekwe upe koty teko rei remimopu'ákwe-py. Upe koty yváy pygwa koty tee ra'anga mante upe koty. Upe-py ndoikéiry voi va'ekwe ha'e. Oike ae oho-vy yváy-py ãy ojehexa uka hagwã Nhandejáry-pe nhande-rehe ha-py. Nhandejáry rovagwy-py oĩ nhande-rehe.

²⁵ Yma gware pa'i ruvixagwasu oike ike koty imarangatu onhegwahẽ e'ŷ ha-py. Peteigwe peteĩ ro'y-py oike. Ijukapyre rugwy reraha-vy oike koty-py. Ha Cristo katu ndohóiry voi upe-py onheme'ẽ jevy jevy hagwã Nhandejáry-pe.

²⁶ Onheme'ẽ jevy jevy ramo ra'e, ohasa asy jevy jevy arã ra'e. Yvy nhepyru gwive ko'ângä ete peve omano mano joty arã ra'e oïko-vy. Heta ohasa asy asy hagwe rekoviá, ãy ojekwaa-ma. Yma gware rekoha gwive ijapy rei-tama ramo va'ekwe, upe-ma ramo hi'óra-py ojehexa uka-ma va'ekwe omboyke hagwã nhandéhegwi nhane rembiapo vaikwe nhande-rehe ojejuka uka-vy.

²⁷ Nhandejáry nhe'ẽ-py nhande kwéry nhamano hagwã áry-py nhamano va'erã. Ha upe rire katu nhande rerekva'erã Nhandejáry nhane rembiapo apokwe-rehe.

²⁸ Upéixa ete peteigwe ojejuka uka-ma va'ekwe nhande kwéry rembiapo vaikwe omboyke hagwã. Ha upe rire katu ndojehexa ukavéi-ma va'erã ha'e

* 9:15 Hb 8.6; 12.24 * 9:20 Èx 24.6-8 * 9:21 Lv 8.15

kwéry hembiapo vaikwe-rehe omano hagwā. Ojéupe oha'arō tee va'e-pe katu ojehexa uka jevy va'erā oresende hagwā.

10

¹ Judeu rekoha Moisés remimombe'ukwe ndaha'éi Nhandejáry rekoha teerā-rami. Gwembiaporā renonderā oikwaa uka yma gware-pe Nhandejáry. Iporā ete va'erā rehewa nhe'ẽ ne'írā vyteri omombe'upa porā íxupe. Oikwaa hagwe-rami omombe'u íxupe. Tenonderā oikwaa uka rei íxupe. Oha'anga rei ojéupe hagwe-rami ha'e kwéry hikwái. Ha'e kwéry ome'ẽ me'ẽ Nhandejáry-pe ijukapyrā ome'ẽ me'ẽ íxupe. Peteī ro'y rire, ome'ẽ jevy íxupe. Peteī ro'y ohasa rire ome'ẽ jevy íxupe. Upe Nhandejáry mboeteha judeu reko-rupi oiko va'e ndikatúiry onhemopotī tee.

² Onhemopotī tee ramo ra'e, "Xe py'a ky'a joty" nde'íry ramo ra'e, nome'ẽvēi arā Nhandejáry-pe ijukapyrā ra'e.

³ Ha ome'ẽ me'ẽ joty Nhandejáry-pe ijukapyrā. Ha hexahare imandu'a ndu'a joty opy'a ky'aha-rehe hikwái.

⁴ Vaka rugwy-py rei nhanhemopotī ukase ramo, "Xe py'a potī-ma" ndaja'éiry voi arā nhandéjehe kwéry. Kavara rugwy-py rei nhamboyke ukase mo'ã ramo nhane rembiapo vaikwe, nomboykéiry voi nhandéhegwi Nhandejáry.

⁵ Upéa-rehe Cristo ko yvy-py ojehexa uka-tama ramo gwete omano va'erā reheve ou-vy, he'i va'ekwe Nhandejáry-pe a-rami he'i:

"Gwī nde-vy ijukapyrā ime'ẽpyrā ave ndereipotavéi-ma. Ijukapyrā rekovía eremoĩ xe reterā."

⁶ Ijukapyrā ome'ẽ ramo nde-vy pa'i kwéry hembiapo vaikwe-rehe, hembihapykwe ome'ẽ ramo ave, ndererohoryvéi-ma hembiapokwe, hembihapykwe ave.

⁷ Upe-ma ramo, ha'e nde-vy. Xe renonderā ahexa jepe, aju-ma, xe Járy. Aime-ma ne remimbota apo hagwā, ha'e joty. Xe rekorā-rehe nde kватia nhe'ẽ he'ihā-rami ajapo va'erā"*

he'i Nhandejáry kватia nhe'ẽ Hesu nhe'ẽ mombe'u-vy.

⁸ He'i ypy Nhandejáry kватia nhe'ẽ:

"Ndereipotái gwī ijukapyre ime'ẽpyre ave. Gwī hembihapykwe, hembiapo vaikwe repy mo'ã ave ndererohorýiry voi"

he'i. Hembihapykwe jepe ndogwerohorýiry. Upe va'e Moisés remimombe'ukwe-rupi oiko va'e remime'ẽ voi. Nomopotī teéiry-gwi ndogwerovy'airy. Yma gware rekoha jepe, ndogwerohorýi hembiapo.

⁹ Upéi he'i jevy:

"Aju-ma, xe Járy, aime-ma ne remimbota ajapo hagwā"

he'i Nhandejáry kватia nhe'ẽ Hesu nhe'ẽ mombe'u-vy. Upéixa yma gware remime'ẽgwe-rehe, "Ijapy-ma" he'i. "Ipy'a kwéry nomopotīry voi ra'e" he'i hese Nhandejáry. Hekovía omoĩ Cristo reko: "Pene mopotī hagwā ojejuka uka va'ekwe" he'i Nhandejáry nhande reko omombe'u-vy.

¹⁰ Nhandejáry oipota va'ekwe gwive ojapopa voi Cristo. Gwete reheve peteigwe onheme'ẽmba-ma íxupe. Omano hagwā onheme'ẽ íxupe. Upéa-gwi Nhandejáry-pe onheme'ẽ-gwi, nhane moingo-ma kuri gweko irū teerā.

¹¹ Yma gware pa'i kwéry opu'ã-ma oĩ-vy lona gwigwa koty-py Nhandejáry róga kakwaa-py ave. Pa'i upé-py ojapo japo gwembiaporā. Ijukapyrā ime'ẽpyrā ave ome'ẽ me'ẽ. Ome'ẽ rire, ome'ẽ hagwe-rami ome'ẽ jevy. Ndai-japýi ome'ẽ-vy. Ome'ẽ me'ẽ ramo jepe, nonhemopotīry he'ýi kwéry py'a. Nomboykéi íxugwi hembiapo vaikwe.

* 10:7 Sl 40.6-8

¹² Ha Cristo katu nhane rembiapo vaikwe omboyke hagwā-rehe, peteīgwe mante ojejuka uka va'ekwe. Nomano jevy jevýiry. Nhane mopotī tee-gwi, jaiko meme va'erā Nhandejáry ndive japa e'ŷ reeve. Onheme'ē rire Nhandejáry-pe, ogwapy-ma va'ekwe ijyke-rehe ijakatúa-koty oĩ-vy. Onhem-botuvixave va'e ogwapy haty-pyma ogwapy oĩ-vy.

¹³ Āy upe-py ogwapy oĩ-vy. Oha'arō oĩ-vy Nhandejáry-pe. Ija'e'ŷha-rehe ombopu'aka-ta Nhandejáry íxupe.

¹⁴ Peteīgwe onheme'ē ramo, Nhandejáry reko irūrā-pe omopotīmba ete-ma opa e'ŷ reeve.

¹⁵ "Upéa nhe'ē anhetegwa voi" he'i ave Nhe'ē Marangatu tee va'e.

He'i ypy va'ekwe:

¹⁶ "Heko pyahurā íxupe amombe'u va'erā a-rami, he'i Nhandejáry. Xe rembi-haikwe oĩ vérami arā ipy'apy-py. Amomandu'a meme hagwā íxupe xe remimombe'ukwe-rehe amo'arandu va'erā íxupe. Upéixa-gwi ojapose va'erā xe nhe'ē"

he'i Nhandejáry kwtia nhe'ē.

¹⁷ Upéi he'i jevy:

"Naxe mandu'avéi-ma hembiapokwe-rehe otoko avy avy eterei rire. Hembi-apo vaikwe amokanhy ukapa-ma va'erā"*

he'i Nhandejáry kwtia nhe'ē.

¹⁸ Upéixa-gwi nhane rembiapo vaikwe omboykepa rire, nanhaikotevēví-ma nhande-rehe onheme'ē jevy va'erā-rehe.

Nhanhemo'agwī katu Nhandejáry-gwi nhamoirū hagwā

(Ef 3.11-12; Hb 4.16; 6.4-6)

¹⁹ Iporā katu, xe re'yí kwéry, nhagwahē jaha-vy Nhandejáry oiko haty-py. Hugwy reeve omano-gwi Hesu, upe koty marangatu ete onhegwahē e'ŷ ha-py oike va'e-rami jaiko voi nhande py'amirī e'ŷ reeve. Ndaiporivéi-ma nhande jokoharā.

²⁰ Hesu nhande rerahaha va'erā Nhandejáry-pe. Ha'e oiko meme nhande rape apo pyahu hagwā nhande-vy nhagwahē hagwā jaha-vy Nhandejáry renda-py. Upe ao-py ijopiahā tuvixa va'e ohasa oike oiko-vy va'e-rami ave nhande reraha Nhandejáry-pe. Hesu rete-rehe voi he'i upe ao-py ijopiahā. Ojejuka uka-ma jave Hesu, ojepe'a va'ekwe upe ao-py ijopiahagwe. Nhande jokoharā ndaiporivéi.

²¹ Nhande-vy gwarā oĩ pa'i ruvixagwasu-rami Nhandejáry róga-rehe onhangareko va'e.

²² Upéa-rehe nhanhemo'agwī agwī katu Nhandejáry-gwi jaha-vy nhande reko apu e'ŷ reeve. Jajerovia ku'a ku'a e'ŷ reeve nhanhemo'agwī katu íxugwi jaha-vy. Nanhande py'a ky'avéi-ma hagwā nhane mopotī. Y potī-my yma gware onhembojahu va'ekwe-ramima nhane mbohete resakā-ma va'ekwe ojéupe Nhandejáry. Upéa-gwi nhanhemo'agwī katu jaha-vy Nhandejáry-pe.

²³ Atýra-py nhamombe'u jaiko-vy Nhandejáry he'i hagwe-rami ojapo va'erā. Jarovia porāve rāve katu upe nhe'ē, "Ojapo va'erā katu he'i hagwe-rami" ja'e Nhandejáry-rehe. Upéa-gwi, "Ojapo-ta para'e, tapa ndojapo mo'ai" ani ja'e teī hese. Nhamombe'u katu jarovia tee va'e.

²⁴ Ani jajoteta teta teī. Nhapena ae katu ojóehe jajohayhu rei hagwā nhanhopytygwō hagwā.

²⁵ Oĩ Hesu reroviahā va'e ndohói voi ojogweroaty ramo heroviahā kwéry. Ani oho e'ŷ va'e reko-rupi jaiko teī. Nhanhomombaraete katu nhande

* **10:17** Jr 31.33-34; Hb 8.10

nhanhomboaty aty-vy. Ja'e ae katu ojóupe: "Nhandejáry Hesu ou jevytaha áry hi'agwí-ma nipo ra'e" ja'e joty ojóupe. Upéa-gwi nhanhombarae katu nhanhomboaty atyve-vy jajehesa rerova uka e'ý hagwā.

²⁶ Oĩ nhande-vy ijukapyre Nhandejáry omboyke hagwā nhandéhegwi nhane rembiapo vaikwe. Ha nhande nhane mo'arandu rire, jajejavységwi rei jajejavysy jevy ramo katu, nhane arandu tei, jaikwaa tei anhetegwa. Ndoikovéi-ma nhande-vy ijukapyrā Nhandejáry omboyke hagwā mo'ã nhandéhegwi nhane rembiapo vaikwe.

²⁷ Upéixa jaiko ramo, ndajaiko poravéi-ma. Nhande kyhyje ojehu va'erā nhande-vy jaikwaa-vy: "Xe ambojevy-ma nipo ra'e Nhandejáry-pe. Upéa-gwi xe rereko-ma va'erā xe rembiapokwe-rehe" ja'e. "Tata ipoxy va'e-py xe hundi va'erā" ja'e arā nhandéjehe nhane renonderā jaikwaa-vy.

²⁸ Gwī Moisés amyrī nhe'ẽ rendu e'ýha-rehe, "Tojejapi katu ita-py tojejuka" he'i hese yma gware. "Hembiaapo vai-ma" he'i ramo hese mokōi, mbohapy hexahare, ndoiporiahuverekóiry íxupe, pya'e ojuka va'ekwe.

²⁹ Ha Nhandejáry ra'y Cristo nhe'ẽ-rehe opyrū va'e katu, mba'éixa po ogwereko va'erā ãy Nhandejáry íxupe? Ombohasa asyve va'erā íxupe. Cristo rugwy-py onhemopotí rire jepe Nhandejáry re'ýirā oiko hagwā jepe, nomomba'evéi-ma Cristo rugwy. Omomba'e rei-ma Cristo-pe. "Omano rei" he'i mo'ã hese. Nhe'ẽ Marangatu tee va'e-pe ombojevy voi. Hembiaihu jepe, ombojevy íxupe hendusere'ý-vy. Mba'éixa po ogwereko va'erā íxupe Nhandejáry? Hembiaapkwe-rehe ogwereko asyve syve va'erā íxupe Nhandejáry.

³⁰ Jaikwaa voi Nhandejáry rekoha:

"Xe ko enterovéa-pe ahepy va'erā"*

he'ihā jaikwaa voi.

"Enterovéa-pe xe ae areko va'erā hembiapo apokwe-rehe"

he'ihā jaikwaa voi ave.

"Nhandejáry ogweru va'erā gwovagwy-py gwe'ýi kwéry-pe omonhe'ẽ hagwā
íxupe"

he'i ave Nhandejáry kwatia nhe'ẽ.

³¹ Nde pyhy ramo Nhandejáry hekove tee va'e, nde rereko asy-vy, ne monghyje eterei voi arā. Ivai eterei arā nde-vy. Nderekapái arā íxugwi, nerekanhýi arā íxugwi. Upéa-rehe tanhanhangareko porā katu nhandéjehe.

³² Aipota pene mandu'a jevy pende rekowke-rehe. Are-ma pende resape rire Nhandejáry pene mo'arandu-vy, pehassa asy va'ekwe. Ha pehassa asy ramo jepe, ndapeváiry joty va'ekwe Cristo rape-gwi.

³³ Oĩ pene pa'ü-my atýra-py onhe'ẽ rei rei va'ekwe hese. Entéro hexapyrápyrā-rupi pende rereko asy va'ekwe. Oĩ pene pa'ü-my hembiereko asy va'e-pe omoirúse va'e. Opena hese-gwi omoirú íxupe.

³⁴ Ha preso onhemooi va'e katu ohasa asy jave pemoirú íxupe. Pene mba'e kwéry osakea ramo heraha-vy, napemboasýi joty hembieraha. Ogwerahapa ramo jepe, pevy'a joty kuri. "Oĩ joty nhande-vy gwarā opa e'ý va'e" peje joty kuri pendejéupe. Peë-my gwarā peikwaa voi. Upéa-gwi pevy'a joty kuri peikovy.

³⁵ Pende py'amirī e'ý reheve Nhandejáry reko irú ramo peiko ramo, ome'ẽ va'erā peë-my pene rembiapo porā repyrā. Upéa-gwi ani penhembopy'amirī uka tei kuri.

³⁶ Aníke pejehesa rerova uka tei peiko-vy. Pejapo ae katu Nhandejáry remimbota he'i hagwe-rami ojapo hagwā pende-rehe.

³⁷ Upéixa he'i Nhandejáry kwatia nhe'ẽ:

* **10:30** Dt 32.36

“Ange hi'are e'ŷ reheve ogwahē-tama ou-vy ou va'erā. Ndahi'are mo'āi voi.
 38 Xe re'yí ipy'a potī va'e xe rerovia-gwi, oikove va'erā. Ha xéhegwi ojehesa
 rerova uka va'erā oĩ ramo katu, ndarohorýi va'erā íxupe”*

he'i Nhandejáry kватia nhe'ě.

39 Ha nhande kwéry katu ndaha'éi nhanhehundi hagwā jajehesa rerova uka
 va'erā mombyry Nhandejáry-gwi jaiko hagwā. Jarovia-ma ae Nhandejáry-pe
 nhande py'a gwive nhane resende hagwā.

11

Iporā katu jarovia tee voi Nhandejáry-pe

1 Jarovia tee ramo, “Anhetegwa voi nhane remiha'arō” ja'e. “Jahexa e'ŷ
 ramo jepe, jaikwaa voi oikoha” ja'e jarovia tee-gwi íxupe.

2 Yma gware nhane rembypy ogwerovia tee-gwi ojohu porā íxupe kwéry
 Nhandejáry. Imandu'a porā hese kwéry.

3 Inhe'ě jarovia-gwi, ja'e “Onhe'ě-py rei ombojehu va'ekwe ojéupe ko yvy ha
 áry ave Nhandejáry” ja'e. Hexapyrā gwive ojapo-ma ramo va'ekwe, ndaipóri
 hembiporukwe. Upéa-gwi jaikwaa voi Nhandejáry ombojehu rei va'ekwe.*

4 Oĩ va'ekwe yma gware nhane rembypy héry va'e Caim, tyvýry héry
 va'e Abel. Ha tyke'ýry katu ime'ëpyrā ome'ě va'ekwe Nhandejáry-pe. Upéi
 tyvýry ome'ě va'ekwe íxupe ijukapyrā. Nhandejáry-pe ogwerovia tee-gwi
 ome'ě íxupe. Ha Nhandejáry ojohu porā tyvýry remime'ëgwe. Ha tyke'ýry
 remime'ëgwe katu ndojohu porāiry voi. Ha tyvýry-rehe katu he'i, “Xe rerovia
 tee-gwi, heko-rupi oiko ipy'a potī reheve” he'i tyvýry-rehe Nhandejáry. En-
 terove va'e imandu'a porā hese hikwái. Yma omano va'ekwe tyvýry Abel.
 Omano jepe, onhe'ě vérami joty oĩ-vy. Ogwerovia tee-gwi íxupe, nhane
 mandu'a meme herakwā-rehe.*

5 Ha myamyrī Enoque ave ogwerovia tee va'ekwe Nhandejáry-pe. Og-
 werovia tee-gwi, nomanói va'ekwe Enoque. Imanoha rāgwe-py, Nhandejáry
 ogweraha rei íxupe. Upéa-gwi ndotopavéi-ma íxupe. Ne'írā vyteri ogwerojeupi
 íxupe heraha-vy ramo, ogwerohory íxupe Nhandejáry, he'i Nhandejáry kватia
 nhe'ě.*

6 Ogwerovia e'ŷ reheve, avave-pe ndogwerohoryí Nhandejáry.
 Nhamoirūse ramo Nhandejáry-pe, “Oĩ voi Nhandejáry” ja'e va'erā hese.
 “Ha'e nhande rovasa va'erā, jaheka tee ramo íxupe” ja'e ave hese. Upéa nhe'ě
 nhamombe'u e'ŷ ramo, nanhamoirūiry va'erā voi íxupe. Tekotevē jarovia
 tee ae íxupe nhamoirū hagwā íxupe. Jarovia e'ŷ ramo, nanhamoirūiry va'erā
 íxupe.

7 Ha Noé amyrī katu ogwerovia tee va'ekwe Nhandejáry-pe. Upéa-gwi
 ogwerovia tee-ma ojéupe omombe'u va'e. Ohexa e'ŷ reheve jepe henonderā
 omombe'u-ma íxupe Nhandejáry. Upéixa-gwi ojapo va'ekwe kanoagwasu
 Nhandejáry nhe'ě rendu-vy. Ha upe rire katu ovu ramo y, onheresende-ma
 ha'e-py. Hóga pygwa gwive onheresende ave. Upéixa ha'e ogwerovia oiko-
 vygwi, ojekwaa porāve va'ekwe yvypóry-rehe ogwerovia e'ŷha. Ogwerovia-
 gwi, “Ipy'a potī-ma” he'i hese Nhandejáry.*

8 Ha myamyrī Abraão katu ogwerovia tee-gwi, ohendu va'ekwe Nhan-
 dejáry nhe'ě ohenói ramo íxupe. Ohendu-gwi ova oho-vy outro yvy-koty.
 “Ame'ě va'erā nde-vy nde yvyrā” he'i hagwe-py íxupe ova va'ekwe oho-vy.
 Gwetā oheja oho-vy ha ki-koty po oho-ta ndoikwaái oho hagwā. Nhandejáry
 omondose ha-py íxupe oho.

* 10:38 Hc 2.3-4 * 11:3 Gn 1.1-31 * 11:4 Gn 4.3-10 * 11:5 Gn 5.21-24 * 11:7 Gn 6.13-22

⁹ Ogwerovia tee-gwi, ogwahē rire Nhandejáry omondo hagwe-py, upe yvy-rehe rei oiko. “Ame'ē va'erā nde-vy” nde'i reíry íxupe Nhandejáry. Upe he'i ojéupe hagwe-rupima oiko. Yvy oyvy e'ŷ-rupi oiko va'e-rami oiko. Ao gwigwa óga gwy-rupi oiko. Hendive oiko ta'ýry Isaque, hemiarirō Jacó ave. Ta'ýry-pe, hemiarirō-pe ave, “Ame'ē va'erā nde-vy nde yvyrā” he'i va'ekwe íxupe Nhandejáry. He'i ojéupe hagwe-pyma ãy oiko hikwái.*

¹⁰ Ha Abraão katu oha'arō arō oiko-vy va'ekwe oiko hagwā upe tetā tee yváy pygwa-py. Nhandejáry he'i hagwe-ramima oiko upe tetā. Ha'e ae hembiapo voi. Upéa ra'arō arō-vy, ao gwigwa óga gwy-rupi oiko joty va'ekwe.

¹¹ Ha hembireko Sara ogwerovia tee ave. Ogwerovia tee-gwi, omemby e'ŷha ogwenogwaigwī-ma jepe, ituja-ma teĩ iména, ogwerovia joty oiko-vy Nhandejáry nhe'ē. Upéa-gwi oiko-ma va'ekwe imemby. Nhandejáry he'i va'ekwe ogwerovia-gwi, oiko-ma imemby.*

¹² Ituja eterei ramo jepe Abraão, omano va'erā-rami oiko ramo jepe, oiko joty va'ekwe ta'ýry. Upéi heta heta hemiarirō joapyri pyri. Ha'e anho ramo jepe, heta eterei-ma hemiarirō onhemboe'ýi oho-vy. Heta heta jasytata pyhare. Ygwasu rembe-rehe heta eterei oĩ yvy ku'itī ndajaipapapái va'e. Upéixa ete heta eterei onhemboe'ýi ave Abraão remiarirō joapyri pyri.*

¹³ Omano ramo jepe Abraão, omano ramo jepe ta'ýry, hemiarirō ogwerovia tee joty. Omano jave, ne'írā ome'ëse va'e ome'ë íxupe. Ne'írā ome'ë íxupe he'i va'ekwe. Mombyry-gwi ohexa va'e-rami, ogwerovy'a Nhandejáry ojéupe ome'ë va'erā. “Ko yvy-rehe jaiko rei oyvy e'ŷ-rupi oiko va'e-rami” he'i ojóupe hikwái.

¹⁴ Upéa he'i va'e, “Nhande yvy teerā jaheka jaiko-vy” he'i ojóupe hikwái. Upéixa-gwi hexahare oikwaa voi ome'ë-ta va'ekwe ijyvyrā íxupe kwéry.

¹⁵ Naimandu'avéi-ma yvykwe-rehe osë oho-vy va'ekwe-gwi. Imandu'a jevy ramo ra'e, ome'ë arā ra'e oho jevy hagwā oyvykwe-py. Ha naimandu'avéi-ma gwembiejare-rehe.

¹⁶ Gwendarā iporāve va'e ae katu ohexa nga'u hikwái. Yváy pygwa gwenagwā-py oho hagwā-rehe ikyre'ŷ ete voi hikwái. Oĩ va'ekwe henagwā Nhandejáry rembiapo. Ogwerovia tee-gwi nomotíry va'ekwe oiko-vy Nhandejáry-pe. “Ha'e ko Nhande Ru tee voi” he'i ramo hese, anhetegwa voi. Upéixa-gwi nomotíry Nhandejáry-pe.

¹⁷ Ogwerovia tee-gwi, oipota Nhandejáry ojekwaa porāve Abraão amyrī rekoha. Upéa-gwi oheko johu va'ekwe íxupe. Upéi Nhandejáry nhe'ë-py ojukata mo'ã ime'ë-vy gwa'ýry Isaque. Are-ma, “Oromboe'ýi va'erā” he'i ramo jepe íxupe Nhandejáry, nahakate'ýi joty va'ekwe gwa'ýry petēimi oiko va'e-rehe.

¹⁸ “Oiko va'erā nde ra'y Isaque remiarirō joapyri pyri”
he'i ramo jepe íxupe Nhandejáry, ojuka-ta mo'ã joty ime'ë-vy gwa'ýry.

¹⁹ “Xe ra'y ojejuka rire, omoingove kwaa jevy va'erā íxupe Nhandejáry” he'i joty ojéupe Abraão. Ha ojejuka e'ŷ ramo jepe, onhemoingove jevy va'e vérami oiko jevy joty.*

²⁰ Ha upe rire katu okakwaa va'ekwe ta'ýry Isaque. Upe ramo, ogwerovia tee-gwi, “Anhetegwa amombe'u-ta. Nde rovasa va'erā Nhandejáry” nde'i reíry gwa'ýry-pe Jacó Esaú ndive. Oiko va'erā omombe'u íxupe.*

²¹ Ogwerovia tee-gwi, omano-ta ramo ta'ýry Jacó, “Anhetegwa amombe'u-ta nde-vy. Nde rovasa va'erā Nhandejáry” he'i mokõi gwemiarirō José ra'y-

* **11:9** Gn 12.1-8; Gn 35.27 * **11:11** Gn 18.11-14; 21.2 * **11:12** Gn 15.5-6; 22.17 * **11:19** Gn 22.1-14;
21.12 * **11:20** Gn 27.27-29,39-40

pe, opykokaha-rehe ojepytaho opu'ã onhembo'y-vy omboete hagwā Nhandejáry-pe.*

²² Ogwerovia tee-gwi, omano-ta ramo Jacó ra'y José, "Xe re'ýi Israel kwéry ova jevy va'erā oho-vy Egito yvy-gwi" he'i omombe'u-vy. "Peho ramo, peraha katu ave xe akāgwe peho-vy pemoingatu jevy hagwā pegwahē hagwā-py" he'i gwe'ýi kwéry-pe ojapo uka-vy.*

²³ Ogwerovia tee-ma va'ekwe Nhandejáry-pe myamyrī Moisés ru isy ave. Oiko-ma ramo ta'ýry, "Mitā porā voi oiko" he'i hese Moisés-rehe. Ha mburuvixagwasu ojuka ukase mo'ã ramo íxupe, ndokyhyjéi joty túvy isy ave. Ogwerovia tee-gwi, ojuka e'ý hagwā mbohapy jasy onhomí tee imoĩ-vy. Mburuvixa-gwi onhomí tee imoĩ-vy.*

²⁴ Ha Moisés katu ogwerovia tee va'ekwe Nhandejáry-pe. Upéa-gwi okakwaa rire, "Xe ae ndaikosevéiry mburuvixa Faraó rajy memby ramo" he'i ójehe.*

²⁵ "A-py aiko ramo, sapy'a ete mburuvixarā-rami aiko va'erā" he'i ójehe. "Upéixa aiko ramo, aiko teĩ arā ajererohory rei va'erā Nhandejáry nhe'ẽ rendu e'ý-vy" he'i ójehe. "Ha xe katu ndaiko mo'āi upéixa" he'i. "Nhandejáry re'ýi-pe ae-ma xe amoirū-ta" he'i. "Ojerereko asy ramo hikwái, hendive xe rerekó asy va'erā ave" he'i ójehe Moisés.

²⁶ "Upéixa xe ajerereko asy ramo jepe, iporā ave xe-vy" he'i ójehe. Imandu'a meme ojéupe gwarā-rehe. Ojéupe Nhandejáry remime'ẽrā gwenonde-py ogwereco. Nhandejáry remime'ẽrā-rehe imandu'a. Upéa-gwi he'i, "A-py Egito-py heta opamba'e areko" he'i. "Ha xe rembiereko iporâve xe ahejapa, Nhandejáry rembiporavo re'ýi reko-rupi xe aiko hagwā" he'i ójehe. "Hese onhe'ẽ rei reiha-rami, xe-rehe tonhe'ẽ rei rei ave" he'i Cristo ou va'erā-rehe.

²⁷ Ogwerovia tee-gwi, ova oho-vy Egito yvy-gwi. Mburuvixagwasu remim-bota e'ý-rupi oiko. Ipoxo ramo jepe, ndaikyhyjéi joty íxugwi. Nhandejáry jahexa e'ý va'e-pe ohexa va'e-rami joty oiko. Upéa-gwi ndojehesa rerova ukáj joty íxugwi. Hape meme joty oipyhy oiko-vy.*

²⁸ Ogwerovia tee-gwi, Egito-gwi ova-tama ramo, omoĩ ypy va'ekwe arete héry va'e páscoa, "Pembohayvi katu pene rokē ári ijukapyre rugwy" he'i gwe'ýi kwéry-pe. "Ani pembohayvi e'ý teĩ" he'i. "Ou arā ojuka-vy peteĩ teĩ otopa va'e mitā kwimba'e ypykwe gwive gwī Nhandejáry rembigwái yváy pygwa oporojuka va'ety he'i va'e. Tugwy ohexa oĩ ramo pene rokē-rehe, ohasa rei arā oho-vy ijukaharāgwe" he'i gwe'ýi kwéry-pe.* ²⁹ Ogwerovia tee-gwi, Moisés re'ýi kwéry ohasa va'ekwe oho-vy ygwasu pytā oje'eha. Yvy ete-rupi ohasa oho-vy va'e-rami ohasa oho-vy hikwái. Upéi hapykwerigwa Egito pygwa ohasase mo'ã. Ohapykwe segi mo'ã ha ndohasáiry. Y mbyte-rupi oho jave, ojaho'i onhapymimba-ma íxupe kwéry y.*

³⁰⁻³¹ Ogwerovia tee-gwi nhane rembypy Israel kwéry ogweroajere Jericó tetā oho-vy hikwái. Peteĩ semana ogweroajere oho-vy. Ha upe rire katu ho'apa ijokoha. Oikepa upe-py Israel kwéry ojuka hagwā Nhandejáry nhe'ẽ renduse e'ýha-pe. Ha ndojukapáiry upe tetā mygwa-pe.* Peteĩ kunha Raabe héry va'e, ikwimba'ese ramo jepe, ha'e ohendu joty Nhandejáry nhe'ẽ. Upéa-gwi onheresende joty. Ogwerovia tee-gwi, gwī soldado henonde-rupi ogwahē nhemi ou-vy ohexa va'ekwe-pe, "Pegwahē katu" he'i joty ra'e íxupe. Oimeha nomombe'úi joty ijukaharā mo'ã-pe.*

* **11:21** Gn 47.31-48.22 * **11:22** Gn 50.24-25; Êx 13.19 * **11:23** Êx 2.2; 1.16,22 * **11:24** Êx 2.10-15 * **11:27** Êx 2.14-15 * **11:28** Êx 12.12-13,21-30 * **11:29** Êx 14.21-31 * **11:30-31** Js 6.12-21
* **11:30-31** Js 6.22-25; 2.1-21

³² Heta amombe'u kuri gwī Nhandejáry reroviaha rehewga nhe'ẽ. Āy namombe'upa mo'āi. Nome'ẽiry xe amombe'upa Gideão rehewga nhe'ẽ, Baraque rehewga nhe'ẽ, Sansão rehewga nhe'ẽ, Jefté rehewga nhe'ẽ ave. Namombe'upa mo'āi Davi rehewga nhe'ẽ, Samuel rehewga nhe'ẽ ave. Gwī Nhandejáry nhe'ẽ-py omombe'u va'ety rehewga nhe'ẽ nome'ēi xe amombe'u.*

³³ Ogwerovia tee-gwi, onhorairō va'ekwe outro tetā mygwa ndive. Onhorairō rire, ipu'aka hese kwéry. Hembia po vai va'ekwe-pe ogwerekō asy. Ha'e ae hembiapo porā. "Arovia tee katu Nhandejáry remimombe'u" he'i tee-gwi, Nhandejáry ojapo hese he'i hagwe-rami. Jagwarete juru omboty pono oisu'u íxupe.*

³⁴ Oĩ tata ipoxy va'e-rehe ipu'aka tata rendy mbogwe-vy va'e. Oĩ kyse-py okutuharā-gwi, onheresende joty va'e. Oĩ onhorairō jave nonhembopy'amirī ukáiry va'e. Onhembopy'agwasu joty oiko-vy. Oĩ soldado kwéry outro yvy-gwi ou va'ekwe ndive onhorairō ramo, omboripara joty, ipu'aka joty hese.*

³⁵ Oĩ kunha hóga pygwa omano va'ekwe. Ogwerovia tee-gwi, onhemoin-gove jevy íxupe va'ekwe. Oĩ ave heta ojererekō asy eterei rire, ojejuka va'ekwe. Nhandejáry-gwi ojere ramo ra'e, ndojukái arā ra'e. Ha ndováiry joty íxugwi. "Ava e'ŷ rire, iporāve xe rekoha arā xe moingove jevy rire Nhandejáry" he'i ae joty ójehe.*

³⁶ Oĩ onhembohory hese va'ekwe. Ombopi mbopi íxupe va'ekwe. Oĩ onhapytī íxupe va'ekwe. Oipokwa heraha-vy íxupe omoī hagwā preso va'ekwe.*

³⁷ Oĩ ita-py ojapi íxupe va'ekwe. Oĩ serra-py onhektytī va'ekwe imbyte-rupi. Oĩ kyse-py ojejuka va'ekwe. Ombojehesa rerova ukase ramo jepe, ndovái joty Nhandejáry-gwi. Gwóga-py ndoptái. Opa-rupi oiko rei. Omonde ovexa ragwe, kavara pirekwe omonde ave oiko-vy. Iporiahu oiko-vy. Ipy'a jopy ojererekō asy ave oiko-vy.*

³⁸ Upéa kente kwéry remimbojevy voi. Omboeteve va'erāgwe-pe omomba'e rei va'ekwe hereko-vy. Tekwat y e'ŷ-rupi oiko, opyta e'ŷ va'e. Yvyaty-rehe ogwata oiko va'e. Hóga e'ŷ va'e. Opa-rupi rei oiko va'e. Ojohu ha-py rei oke va'e. Onhemí nhemi oiko-vy ita kwa-rupi. Yvy kwa-rupi oiko ave. Upéa kwéry omboeteve va'erāgwe-pe, omomba'e rei joty hereko-vy kente kwéry.

³⁹ Upe va'e kwéry yma gware ogwerovia tee-gwi, imandu'a porā hese kwéry Nhandejáry. Imandu'a porā ramo jepe, ne'írā ojapopa joty hese kwéry he'i hagwe-rami.

⁴⁰ Nhande kwéry ãygwa nhane ra'arō joty ojapo porāve hagwā nhande kwéry-rehe. Nhandejáry he'i va'ekwe yma gware-pe nomboagwyjéi va'ekwe. Ha ko'ángá katu ãygwa ojapo-gwi inhe'ẽ, omboagwyje-ma íxupe. "Ãygwa rehewga nhe'ẽ onhemboagwyje rire, aroagwyje-ta ave yma gware-pe ahovasa-vy" he'i ojéupe Nhandejáry. Upéa-gwi ãygwa ra'arō-vy ne'írā ojapopa yma gware-pe he'i hagwe-rami.

12

*Nhandejáry Nhande Ru voi
(Pv 13.24)*

* ^{11:32} Jz 6.11-8.32; 4.6-5.31; 13.2-16.31; 11.1-12.7; 1 Sm 1.1-25.1 * ^{11:33} Dn 6.1-27 * ^{11:34} Dn 3.1-30 * ^{11:35} 1 Rs 17.17-24; 2 Rs 4.25-37 * ^{11:36} 1 Rs 22.26-27; 2 Cr 18.25-26; Jr 20.2; 37.15; 38.6 * ^{11:37} 2 Cr 24.21

¹ Yma gware heta eterei oī Nhandejáry-rehe ojerovia tee va'e. Ñy nhande rexaha-rami oiko. Opa-rupi nhande jerekwe-rupi oī nhande rexaháry. Upéa-gwi jaiko katu ohose ha-py pya'e oripara oho-vy va'e vérami. Pya'e ogwahésgwi, ndopyta pytái oripara oho-vy. Ha'e heko-rupi jaiko katu. Gwī oripara va'e omboi oao pya'eve oripara hagwā. Ha'e omboykeha-rami onhembopo-hyiharāgwe, upéixa ave nhande nhamboyke nhandéhegwi tekoha vai. Pya'e a'e ipu'akase nhande-rehe tekoha vai. Ani ipu'aka hagwā-rami teñ jaiko. Jaiko porā meme katu jajehexa uka porā hagwā nhande rexaháry-pe.

² Ha Hesu katu nhane renonde-py jareko katu jajehesa rerova uka meme katu jaiko-vy Hesu-rehe. Ha'e ojerovia tee va'e Nhandejáry-rehe. Ogwerovia ku'a ku'a e'ý va'e voi ha'e. Hesu rekoha-rami jaiko. Ha'e ojejuka uka-tama ramo kurusu-rehe, ndovái joty va'ekwe Nhandejáry rape-gwi. "Amano rire, anhemoingove jevy rire, avy'a eterei joty va'erā" he'i ójehe Hesu. Upéa-gwi nopenái ójehe hembiapo vai va'ety-rami kurusu-rehe ojuka-tama ramo íxupe. Omotí eterei ramo íxupe, nahakate'ýi joty ójehe. Upéa-gwi ãy katu ogwapy-ma oī-vy Nhandejáry akatúa-koty. Ogwapy haty yke-rehe ogwapy-ma oī-vy.

³ Pene mandu'a kena Hesu ojererekoy asy hagwe-rehe. Ndaija'éi hese hekoha vai va'e ha ndovái joty Nhandejáry rape-gwi. Pene mandu'a kena hese pono pevy'are'ý, pono pejehesa rerova uka íxugwi.

⁴ Tekoha vai-pe pejoko joko ramo, ne'írā pende juka. Upéa-gwi ani kena pende-rehe ipu'aka tekoha vai.

⁵⁻⁶ Ani pende resarái Nhandejáry nhe'ë-gwi. Tajýry, ta'ýry-rami pene mbopy'agwapy va'e inhe'ë. He'i Nhandejáry kватia nhe'ë:
"Nhandejáry onhemonhe'ë joty gwembiayhu kwéry va'e-pe. Xe ra'y, xe rajy, he'i íxupe va'e gwive, túvy-rami ogwerekoy asy íxupe oheko rerova uka-vy. Upéa-gwi pehendu mani inhe'ë, peë-my onhemonhe'ë jav. Pende rayhu-gwi ae pende rerekoy asy pende reko rerova uka-vy. Pene mbohasa asy ramo, ani joty kuri pende py'amirí teñ."

Upéixa he'i Nhandejáry kватia nhe'ë.*

⁷ Pehasa asy ramo jepe, pende rerekoy Nhandejáry gwa'ýry-rami joty. Upéa-gwi ani pende py'amirí teñ pejererekoy asy ramo jepe. "Gwa'ýry-rami xe rerekoy Nhandejáry" peje ae pendéjehe kwéry. Ndoikói mitä túvy ombohasa asy e'ý íxupe va'e oheko rerova uka-vy.

⁸ Nane mbohasa asýi ramo ra'e, ta'ýry tee ramo ndereikói arā ra'e. Túvy e'ý va'e-rami ereiko arā ra'e.

⁹ Nde ru yvy pygwa ne mbohasa asy ramo jepe, eremboete joty íxupe ereiko-vy. Upéixa nhande ru yvy pygwa-pe nhamboete voi. Aipo ramo Nhande Ru yváy pygwa-pe nhamboeteve katu. Ani pehendu e'ý teñ íxupe. Penheme'ë katu ae íxupe peiko tee hagwā hendife.

¹⁰ Ha nhande ru yvy pygwa nanhane mbohasa asy aréiry oiko-vy. Nhande mbohasa asyse ramo, sapy'a nhane mbohasa asy. Ha Nhandejáry nhane renohë porā nhande rerekoy asy-vy, jaiko marangatu hagwā heko-rupi.

¹¹ Jajererekoy asy jav. ndajarovy'ái voi. "Aiko asy voi" ja'e mo'ã nhandéjehe. Ha upe rire katu Nhandejáry rembiereko asy nhande heko-rupi jaiko. Nhande py'agwapy rehewe jaiko. Heko tee-rupima jaiko.

Nhande rekoha a-rami

¹²⁻¹³ Ani pene ate'ý teñ pene mytu'e'ý-gwi. Penhemokyre'ý ae peho meme hagwā tape porā-rupi. Penhembopy'agwasu katu pendéjehe, peho meme hagwā tape porā-rupi. Upéixa ramo gwī ogwerovia ku'a ku'a va'e ndohói arā ogwata porā e'ý va'e-rami. Onhepysanga sanga va'e-rami, ndogwatavéi arā.

* ^{12:5-6 Pv 3.11-12; Jo 5.17}

Oho ramo tape vai-rupi, okaráu va'e-rami onhemaxuka va'erā. Peho porā ramo ae, ogwerovia tee-ma va'erā.

¹⁴ Ani pejoteta teñ. Enterovéa-pe ae perekō porā pende joja porā hagwā. Peiko marangatu katu. Pende reko marangatu e'ŷ reheve ndapehexái arā Nhandejáry-pe.

¹⁵ Penhangareko porā pendéjehe ani hagwā oiko pene pa'ū-my ojehesa rerova uka va'erā Nhandejáry nhande rexakwaa rei va'e-gwi. Toiko e'ŷ pene pa'ū-rupi pono pende resa rerovapa ójehe. Upeixagwa-pe he'i temitŷ hái hi'a va'e. Upe temitŷ okakwaa, hi'a. Upéi heta oĩ hi'upy e'ŷ jepe, ho'u joty. Ho'u-gwi ndoiko porāvēi-ma. Upéa-gwi ani oiko pene pa'ū-my pende akwaa rerovase va'e gweko-rupi.

¹⁶ Penhangareko porā pendéjehe. Toiko e'ŷ katu pene pa'ū-my myamyrī Esaú rekokwe-rami oiko va'e. Ha'e otĩ kwaa e'ŷ va'e Nhandejáry-rehe nopenáiry oiko-vy. Ha'e túvy ra'y ypykwe jepe, ovende joty va'ekwe ojéupe Nhandejáry remime'ẽrā. Ho'u va'erā-rehe, ombovare'a e'ŷharā-rehe ovende joty va'ekwe.*

¹⁷ Ha upe rire katu, "Eme'ẽ mani katu xe-vy nde ra'y ypykwe pegwarā eme'ẽ xe-vy" he'i mo'ã gwu-pe. "Ndikatuvéi-ma ame'ẽ va'erā nde-vy xe ra'y ypykwe pegwarā ae" he'i joty íxupe túvy. Hasē voi upe-ma ramo. Ojahe'o-vy ojerure rure ojéupe gwarā-rehe mo'ã. Onhemboasy ramo jepe, ndikatúi ome'ẽ íxupe. Ndikatúi ohekoviariõ gwembiapokwe. Gwemime'égwe oipe'ase jevy ramo jepe, ndikatuvéi-ma ome'ẽ jevy íxupe gwa'ýry ypykwe pegwarā. Ha peẽ katu ani ha'e-rami pemoõ ko yvy rehewa-rehe anho pende resa.*

¹⁸ Áy ndapeikovéi-ma yma gware Israel kwéry amyrī rekokwe-rupi. Ha'e kwéry oho ramo Nhandejáry renda-py, ogwahē oho-vy va'ekwe upe vvyaty-py héry va'e Sinai-py. Japoko hese va'e ha-py ogwahē va'ekwe. Tata ipoxy ramo, ohexa. Upe-py pytū rei-ma, pyhare va'e-rami. Upe-py oĩ marány vvytu.

¹⁹⁻²⁰ Upe-py ohendu mimbygwasu nhe'ẽ. Onhe'ẽ va'e ohendu ave:*

"Ko vvyatyrusu onhegwahē e'ŷ va'e-rehe opyrū va'e gwive, mymba nhu pygwa jepe opyrū va'e gwive hese, tojejapi hu'y-py. Ita-py omano peve tojejapi, he'i onhe'ẽ va'e ojapo uka-vy."*

Upéa nhe'ẽ omondýi-ma va'ekwe yma gware Israel kwéry-pe. Upéa-gwi ojerure rure Moisés-pe omombe'u e'ŷve hagwā íxupe upe onhe'ẽ va'e.

²¹ Ha Moisés katu onhemondýi voi: "Xe py'a ryrýi xe kyhyje-gwi" he'i ójeho upe vvyaty-rehe oĩ va'e rexa-vy.*

²² Ha áy katu ndapeikovéi-ma yma gware reko-rupi. Hekovía peiko áy ogwahē oho-vy va'e-rami yváy pygwa vvyaty-py héry va'e Sião-py. Nhandejáry hekove tee va'e retā-my ogwahē oho-vy va'e-rami peiko. Upe-py oĩ yváy pygwa Jerusalém tetā, upe-py oiko heta eterei Nhandejáry rembigwái ojepapa e'ŷ va'e.

²³ Upe-py yváy-py ojogweroaty oiko-vy javé, ov'y'a Nhandejáry ra'y ypykwe. Peteñ teñ héry va'e gwive onhemoõ kwatia-rehe va'ekwe vérami, "Xe re'yí tee" he'i hese Nhandejáry. Áy katu pemoirū-ma peiko-vy Nhandejáry-pe. Ha'e hembiapo apokwe-rehe enterovéa-pe ogwerekó va'erā. Pemoirū-ma ave gwī omano va'ekwe-pe gwive, "Ogweroagwyje ete-ma onhe'ẽ onhemopotímaba ete-ma" he'i hese va'e Nhandejáry. Upéa rehewa-pe pemoirū-ma.

²⁴ Áy katu pemoirū-ma peiko-vy Hesu-pe. Ha'e ojejuká uka va'ekwe nhande-rehe. Upéa-gwi Nhandejáry oiko-ma pende Járy ramo. He'yí tee ramo

* ^{12:16} Gn 25.29-34 * ^{12:17} Gn 27.30-40 * ^{12:19-20} Ex 19.12-22; 20.18-21; Dt 4.11-12; 5.22-27
* ^{12:19-20} Ex 19.12-13 * ^{12:21} 2 Co 3.7-13

peiko-ma peē. Abel amyrī gwugwy mbyte-py ojejuka va'ekwe. Omano rire, "Xe repy katu, xe repy katu" he'i va'e-rami. Ha Hesu katu gwugwy mbyte-py ojejuka uka ramo, "Xe repy katu" nde'íry va'ekwe "Eiporiahuvereko katu íxupe" he'i gwī hugwy-py onhemopotī va'erā-rehe.*

²⁵ Penhangareko porā pendéjehe. Ani ijapysa e'ŷ va'e-rami peiko teī. Yma gware nohenduséi va'ekwe ko yvy-py gwī Nhandejáry nhe'ẽ omombe'u va'e. Upéa-gwi ndaiporivéi va'ekwe hesendeharā. Áy katu nhahenduse e'ŷ ramo yváy-gwi omombe'u va'e, ivaive arā nhande-vy. Ndoikói arā voíte nhane resendeharā.

²⁶ Yma omomýi va'ekwe Nhandejáry nhe'ẽ yvy. Ha áy katu he'i Nhandejáry kwatia nhe'ẽ:

"Amomýi jevy va'erā yvy. Áry yvate jepe peteīgwe jevy joto amomýi va'erā, he'i. Ha upé rire katu namomyivéi-ma va'erā íxupe, he'i Nhandejáry"*

²⁷ "Peteīgwe jevy joto amomýi va'erā" he'i ko yvy opa va'erā-rehe. Upéixa jaikwaa Nhandejáry rembiaporā. Gwī jahexa va'e hembiapokwe gwive omomýi va'erā oipe'a hagwā, optya hagwā jahexa e'ŷ va'e meme, omýi e'ŷ va'e meme optya va'erā.

²⁸⁻²⁹ Nomýiry va'erā Nhandejáry nhande ruvixa ndive jaiko hagwā-py. Upéa-gwi nhatima porā katu Nhandejáry-pe nhande-vy hemime'ẽrā-rehe. Tata vérámi nhande rapy va'e Nhandejáry rekoha. Gwī inhe'ẽ renduse e'ŷha ohapy va'e-rami hekoha. Hemimbota-rupi jaiko va'erā nhamboete hagwā íxupe. Nhande py'a porā reheve, nhande py'agwapy ete reheve nhamboete íxupe. Upéa-gwi nhatima porā katu íxupe. Jakyhyje íxugwi pono nhamonhem-boasy. "Tuvixave va'e voi Nhandejáry" ja'e nhamboete-vy íxupe.*

13

Nhandejáry remimbota a-rami

(1 Pe 2.11-12)

¹ Ani pehayhu e'ŷ teī pende re'ýi kwéry-pe. Pehayhu meme katu Hesu reroviaha-pe gwive. Peē kwéry Cristo re'ýi voi. Upéa-gwi ani pejohayhu e'ŷ teī. Pejohayhu rei ae katu peiko-vy.

² Ogwahē ou-vy ramo pende róga-py Hesu reroviaha peikwaa e'ŷ va'e, ani pembojevy rei teī íxupe imondo-vy. Ogwahē ramo jepe peikwaa e'ŷ va'e, emogwahē porā joto íxupe. Oĩ he'i va'ekwe: "Egwahē katu" he'i gwī ogwahē ou-vy oikwaa e'ŷ va'e-pe. Oikwaa e'ŷ ramo jepe, ogwerohory joto ra'e Nhandejáry rembigwái yváy pygwa-pe omogwahē uka-vy.*

³ Ani pende resarái gwī preso onhemoĩ uka va'ekwe-gwi. Hendive preso penhemoĩ va'ekwe vérámi pene mandu'a meme joto hese. Ani ave pende resarái gwī ojerereko asy va'e-gwi. Hendive pejerereko asy va'e-rami ave joto pene mandu'a hese.

⁴ "Naiporāi ereiko kunha ndive" nde'íry Nhandejáry nhande-vy. Nhane momandu'a uka va'e Nhandejáry nhe'ẽ voi. Iporā katu nhamboete nhane rembireko, nhane ména ave. Ha gwī onhemotī e'ŷ va'e, hapixa rembireko ndive hapixa ména ndive oiko va'evy katu, ogweroko asy va'erā íxupe Nhandejáry. Úpéa-gwi nhane rembireko ndive anhóte jaiko katu. Nhane ména ndive jajohayhu rei jaiko-vy.

⁵ Pirapire hetave va'erā-rehe anhóte ani peiko meme teī. "Tuvixave-ta vérámi xe-vy pirapire. Pirapire aipotave tave xe jéupe gwarā" ani peje teī

* **12:24** Gn 4.10 * **12:26** Èx 19.18; Ag 2.6 * **12:28-29** Dt 4.24; 9.3; Is 33.14 * **13:2** Gn 18.1-8; 19.1-3

pendejéupe. "Avy'a xe rembiereko-rehe" peje ae pendejéupe. He'i Nhandejáry kwatia nhe'ẽ:

"Ndapoheja mo'ãiry voi. Apomoirū meme va'erā"*

he'i Nhandejáry nhande-rehe.
6 Upéa-gwi ani katu jakyhyje teĩ. He'i Nhandejáry kwatia nhe'ẽ:
 "Nhandejáry ko xe pytygwōharā voi. Ndaipu'aka mo'ãi xe-rehe teko rei. Naxe kyhyje mo'ãvéi-ma xe"*

he'i. Upéa nhe'ẽ nhamombe'u katu nhandejehegwa pono ojekwaa nhande-rehe nhane kangyha, nhande py'agwasu reheve ae jaiko hagwā.

7 Ani pende resarái pene mbo'e mbo'ehare-gwi. Nhandejáry nhe'ẽ peẽ-my omombe'u mbe'uhare-rehe pene mandu'a ndu'a joty kuri. Mba'éixa oiko va'ekwe, mba'éixa omano va'ekwe peikwaa voi. Nhandejáry-rehe ojeroviave ave oho-vy hikwái. Upéa-gwi peiko katu hekokwe-rami.

8 Omano ramo jepe hikwái, ojehekoviarō e'ỹ va'e Hesu Cristo. Omano e'ỹ va'e. Kwehe oiko hagwe-ramima joty oiko ãy peve. Opa e'ỹ reheve ndojehekoviarōvái-ma va'erā.

9 Upéa-gwi gwī nhe'ẽ ambue-py pene mbo'ese va'erā-rehe ani pejehesa rerova uka teĩ. Ani pejeapysaka teĩ inhe'ẽ-rehe. "Ore reko-rami pekaru ramo, omombaraete va'erā pende py'a Nhandejáry" he'i mo'ã ramo peẽ-my, ani pejeapysaka teĩ inhe'ẽ-rehe. Gwī henduhare nonhemombaraetéi joty. Onhemombaraeteve ae nhande py'a nhande rovasa vasa-gwi Nhandejáry. Nhande rexakwaa rei-py nhanhemombaraete. Upéixa iporā nhande-vy. Upéa-gwi ani pejeapysaka teĩ inhe'ẽ-rehe.

10 Ay apomomandu'a-ta judeu reko rehewa nhe'ẽ-rehe. Gwī pa'i kwéry oiko joty judeu reko-rupi Nhandejáry-pe ijukapyrā ome'ẽ-vy mo'ã. Omoirūse-vy mo'ã ho'u ijukapyre ha nomoirūi joty Nhandejáry-pe. Upéixa ramo ndikatúi ha'e kwéry omoirū Cristo nhande-rehe ojejuka uka va'ekwe-pe. Ndaiporivái-ma ho'u va'erā onhemombaraete hagwā. Ay gwī ijukapyre ho'u joty-vy onhemombaraetese va'e mo'ã, ndikatúi joty nhane ndive omoirū Cristo nhande-rehe ojejuka uka va'ekwe-pe.

11 Judeu kwéry va'e pa'i ruvixagwasu ogweroike heraha-vy ijukapyre rugwy. Koty imarangatu ete onhegwahē e'ỹ ha-py ogweroike. Upe-py ome'ẽ Nhandejáry-pe omboyke hagwā mo'ã judeu kwéry-gwi hembiapo vaikwe. Hugwy ogweraha koty-py ha hetekwe katu ogwenohē heraha-vy tetā-gwi. Ohapy hagwā-py tetā jerekwe-rehe ogweraha.*

12 Upéa-gwi tetā jerekwe-py ave ojejuka uka va'ekwe Hesu gwugwy avytepyp, omopotī hagwā nhande py'a jajejav rire.

13-14 Upéa-gwi nhamoirū katu Hesu-pe. Gwetā oheja oho-vy va'e-rami, jaha nhamoirū hagwā íxupe heko-rupi jaiko hagwā. Hese onhembohory hagwe-rami ave, onhembohory va'erā nhande-rehe. Ko yvy-py ndaipori nhane renagwā opa e'ỹ va'erā. Nhamoī meme ae nhande resa yváy pygwa nhane renagwā opa e'ỹ va'erā-rehe. Upéa-gwi nhamoirū katu Hesu-pe. Gwetā oheja oho-vy va'e-rami jaiko Hesu moirūse-vy.

15 Upéa-gwi nanhame'ẽvái-ma Nhandejáry-pe ijukapyrā. Hekovía Nhandejáry remimbota ae katu nhame'ẽ íxupe. Nhamboete meme katu Nhandejáry-pe ae, nhande-rehe ojejuka uka-gwi Hesu Cristo. Héry nhamomba'egwasu nhamombe'u-vy ramo, hemimbota nhame'ẽ íxupe.

16 Pejapo porā meme katu pende rapixa-rehe. Ani pene rakate'ỹ teĩ pene mba'e-rehe. Hemikotevē peme'ẽ katu íxupe. Upéa pejapo ramo, pende

* **13:5** Dt 31.6-8; Js 1.5 * **13:6** Sl 118.6 * **13:11** Lv 16.27

rerohory va'erā Nhandejáry pene rembiapo-rehe. Yma gware reko-rupi ijukapyrā ome'ẽ joty va'e-pe ndojohu porāvēi-ma. Pene rembiapo porā-rehe ae pende rerohory va'erā.

¹⁷ Hesu rervoviaha rerekwa he'i va'e pejapo katu. Pehendu katu inhe'ẽ. Orepura oiko-vy pende rekove-rehe peho porā hagwā-rehe. "Mba'éixa jarepara va'erā hekove-rehe xe monhe'ẽ va'erā Nhandejáry" he'i ojéupe pende-rehe. Upéa-gwi pehendu katu inhe'ẽ. Pehendu ramo, ov'a va'erā pende-rehe onhangareko-vy. Ha pehenduse e'ŷ ramo katu, pembovy'are'ŷ va'erā íxupe, ndapeiko porāi va'erā. Ha ndovy'ái ramo pende rerekwa naporāi arā peẽ-my.

¹⁸ Pembojeupi upi katu pene nhe'ẽ Nhandejáry-pe ore-rehe. Ore rembiapo porāse meme oroiko-vy. Ipotī ore py'a. Upéa-gwi ndoikói voi ore py'apy-py "Erejejavy-ma" he'i va'e vērami ore-vy.

¹⁹ Aipota eterei pejapo oraçao xe-rehe pya'eve xe mogwahē hagwā pende ha-py Nhandejáry.

Onhe'ẽ paha

²⁰ Omano rire Nhandejáry Hesu, omoingove jevy íxupe Nhandejáry nhande rerekwagwasurā. Gwugwy mbyte-py ojejuka uka-gwi Nhandejáry Hesu, he'yi meme voi nhande. Nhandejáry ruvixa tee voi ha'e. Omano rire omoingove jevy íxupe Nhandejáry nhande rerekwagwasurā. Nhandejáry nhane mbopy'agwapyhaty voi.

²¹ Tapende rovasa porā porā katu hemimbota gwive pejapo hagwā. Hesu Cristo ojapo uka hagwā peẽ-my hembijohu porā tapende rovasa katu. Ton-hemomba'egwasu meme katu opa e'ŷ reheve. Upéixa aipota. Amém.

Omondo uka omandu'aha

²² Xe re'yi, naxe nhe'ẽ mbuku etéiry kwtia-rehe amoī va'ekwe. Upéa-gwi pene kyre'ŷ reheve pehendu katu, pende rekorā amombe'u ramo peẽ-my anhemonhe'ẽ-vy.

²³ Timóteo rehegwa nhe'ẽ amombe'u-ta peẽ-my. Preso onhemoī ha-gwi, osẽ jevy-ma oho-vy. Pya'e ogwahē ou-vy ramo xe ha-py araha-ta íxupe. Pende ha-py aha ramo, araha-ta íxupe ave.

²⁴ Amondo uka-ta xe mandu'aha Hesu rervoviaha rerekwa-pe gwive. Hesu rervoviaha-pe gwive amondo uka-ta ave xe mandu'aha. Nhande re'yi Itália yvy pygwa omondo uka-ta ave peẽ-my omandu'aha.

²⁵ Tapende rovasa vasa katu Nhandejáry pende rexakwaa rei-vy.

Tiago remimombe'ukwe

epístola de Tiago

1 Xe Tiago Tupā Nhandejáry rembigwái. Nhandejáry Hesu Cristo rembigwái ave xe. Amondo uka-ta kwatia-rehe xe nhe'ẽ peẽ-my gwarã. Peẽ judeu kwéry Hesu rervoviaha va'e opa-rupi judeu e'ŷ kwéry pa'ũ-my peiko va'e ahaita peẽ-my. Mba'éixa pa peiko, xe re'ýi kwéry?

*Jaiko asy ramo jepe, nhande reko vy'a reheve joty tajaiko katu
(Lc 6.22-23; Rm 5.3; 1 Pe 4.14)*

2-4 Opaixagwa nhande mbovy'are'ŷ va'e pende johu meme para'e. Upéixa jaiko ramo ndaha'ei jarova hagwã nhande rekoha Nhandejáry-gwi. Nhane mbojerovia tee hagwã-rehe ójehe oheja upe va'e ojehu nhande-vy. Upéixa-gwi jahasa asy ramo jepe nhande reko vy'a reheve tajaiko katu. Ha peẽ katu, xe re'ýi kwéry, pende-rehe ndija'ei ramo Hesu-rehe ndojeroviái va'e, pende rereko asy ramo jepe, pende reko vy'a reheve joty tapeiko katu. Pende rasy ramo jepe, pende poriahu verei ramo jepe, pende reko vy'a reheve joty tapemondo katu pende resa Nhandejáry-rehe. Pehasa asy ramo jepe ani joty perova teĩ pende resa Nhandejáry-gwi, xe re'ýi kwéry. Ndaha'ei nhane mbovy'are'ŷ hagwã rei jahasa asy. Nhane mombaraete hagwã-rehe ae nhane mbojerovia tee hagwã-rehe ae ójehe Nhandejáry oheja nhane mbohasa asy va'erã ojehu nhande-vy. Upéixa jajerovia tee ramo jaiko arã inhe'ẽ-rupi jaipyhy porãve arã nhane arandurã. Hesu remimbota jajapo kwaa va'erã. Upéixa ramo he'i va'erã peteĩ teĩ nhande-rehe "Ipy'a ijagwyje-ma oiko-ma xe nhe'ẽ-rupi" he'i va'erã Hesu nhande-rehe.

5 "Xe arandu mbyky eterei. Ndajapo kwaái Nhandejáry remimbota." Aipo ere para'e ndejéupe nde py'apy-py erenhemoneta-vy. Aipo ramo ejerure katu íxupe ne arandurã-rehe: "Ajerure nde-vy xe arandurã-rehe. Nde mante xe mo'arandu-ta". Upéixa ere arã íxupe. Ha'e ohendu arã voi ne mo'arandu hagwã. Ipy'a porã eterei-gwi ha'e ome'ẽ meme va'e nhande-vy nhane remikotevõ. Upéixa ramo nde a'o e'ŷ reheve nde rexakwaa rei arã ne rembijerure ome'ẽ-vy.

6-8 Ereporandu jave Nhandejáry-pe "Ome'ẽ-ta xe-vy, tapa nome'ẽ mo'ãi xe-vy" ani aipo ere teĩ. Ani upéixa ererekoo mokõi nhe'ẽ nde py'a-py. Inhe'ẽ mokõi va'e oiko ygwasu yvytu omomýiha-rami. Ojere jere oiko-vy. Nhande, Hesu-rehe jajerovia va'e ndikatúi jaiko upéixa. Inhe'ẽ mokõi va'e-pe Nhandejáry nome'ẽ mo'ãi hembijerure, ndojerovia teéi-gwi hese.

Ani ne mba'e reta-rehe anho erevy'a

9-10 Peẽ ae pevy'a katu Hesu re'ýi kwéry voi peẽ. Ojoha'e-rami meme pende rereko Nhandejáry pejerovia-gwi hese. Pevy'a katu. Ambue kwéry nde rereko asy ramo jepe, nane mba'e retái ramo jepe, evy'a katu eiko-vy. Nhandejáry nde rereko-ma gwa'ýry-rami gwajýry-rami ave. Ha nde, Hesu re'ýi jepe ne mba'e reta reta ererekoo vyteri va'e. Gwekogwypyve-rami nde rereko ramo jepe evy'a katu. Nhandejáry-rehe mate erevy'a va'erã. Yvoty pya'e ipoty piruha-rami voi ndahi'aréi va'erã imba'e reta reta rei va'e.

11 Kwarahy osẽ ramo, kwarahy ojope-ma ramo, ipoty piru-ma yvoty. Ombopirupa-ma kwarahy. Upéixa ave ombo'e reta-rehe anho rei oiko va'e oiko. Hetave ogwerekoo hagwã-rehe ombo'apo jave, ipiru ete ho'a hagwã oho-vy. Upéixa-gwi ne mba'e reta reta jepe, nde rereko ramo gwekogwypyve

Hesu-rehe ha-py evy'a joty eiko-vy. Peẽ, Hesu reroviah kwéry, pevy'a meme katu peiko-vy.*

Jejavy rehewa nhe'ẽ

¹² Oiko asy ramo jepe Hesu-gwi ojevy e'ŷ joty va'e ov'y'a voi joty oiko-vy. Nhandejáry rape-gwi ndojeréi joty-gwi ome'ẽ va'erã íxupe hekove opa e'ŷ va'erã. "Xe rayhu va'e-pe ame'ẽ va'erã hekoverã opa e'ŷ va'erã" he'i va'ekwe-gwi ome'ẽ va'erã íxupe.

¹³ Erehasa asy rei ramo erenhemoneta ramo nde py'a ndive ereva hagwã erejejavy hagwã, ani ere teĩ "Xe mbojejavy ukase para'e Nhandejáry. Xe mbova ukase para'e Nhandejáry" ani peje teĩ. Ndaipóri voi Nhandejáry-gwi inharanduve va'e ombojejavy uka hagwã Nhandejáry-pe. Ha'e ave nhane mbojejavy e'ŷ va'e voi. Avave-pe nombojejavy ukaséi Nhandejáry. Nhandejáry heko porã va'e voi.

¹⁴ Nhandejéhegwi voi nhanhetantea nhande ae jajejavy hagwã. "Xe mbo'e vai-gwi, ajapo vai" oĩ he'i va'e mo'ã. Ndaha'éi upéixa. Nhandejéhegwi ae jajapo vai. Nhande py'a-py jajapose va'e ae-gwi, nhanhembotavy.

¹⁵ Nanhande pu'akavéi-ma nhandéjehe jajejoko kwaa hagwã. Jajejavy joty. Jajapose-gwi rei jajapo. Nhandejéhegwi nhanohẽ nhane rembiaporã jajapo va'erã. Upéixa-gwi nhane rembiapo vai nhandejéhegwi rei mante jajapo. Nhane rembiapo vai eterei ramo nhane mboyke arã ojéhegwi Nhandejáry.

¹⁶ Ani penhembotavy xe re'ýi kwéry, xe rembiayhu kwéry.

¹⁷ Nhandejáry-gwi ou mba'e porã. Opa mba'e iporã va'e imarâne'ŷ va'e ome'ẽmba nhande-vy. Ha'e ojapo va'ekwe entéro tesapeha yváy pygwa. Kwarahy ojapo va'ekwe. Jasy ave, jasytata ave, jasytagwasu ave ojapo va'ekwe. Hemimoingokwe va'e heko ambue mbue. Ha'e ae peteĩ tekoha ogwereko. Kwarahy okanhy va'e. Jasy oiko rei va'e. Nhandejáry ae katu tekoha peteĩ ogwereko. Iporã meme joty hekoha Nhandejáry.

¹⁸ Ojéhegwi voi gwemimbota-rupi nhande poravo va'ekwe gwe'yirã. Nhe'ẽ anhetegwa va'e jarovia. Upéixa-rupi nhane moingo gwe'ýi ramo entéro gwembiapokwe-gwi nhane moporãseve Nhandejáry.

¹⁹ Upe va'e peikwaa xe re'ýi kwéry, xe rembiayhu kwéry. Upéixa-gwi ekiriri porã eiko-vy erejeapysaka porã hagwã nhe'ẽ-rehe. Ani erenhe'ẽ erepensa e'ŷ reheve. Eha'arõ nde rapixa onhe'ẽ ranhe hagwã. Ani ave pende poxy pya'e a'e teĩ.

²⁰ Nhande poxy rei rei ramo ndajaikói Nhandejáry rekoha-rupi. Hemimbota ndajajapóiry.

²¹ Upéixa ramo ani pende poxy rei rei ojóupe. Epoi kena nde poxy rei reihagiwi.

Opa nde rekoha rei-gwi epoi ave. Anive ne mandu'a ne rembiapo vairã-rehe. Nhandejáry nhe'ẽ-rehe ae katu ne mandu'a. Ha'e omoĩ-ma onhe'ẽ nde py'apy-py. Erovia kena inhe'ẽ kuri erejeheko kiriri-vy. Inhe'ẽ-rupi ereiko ramo ne resende tee va'erã Nhandejáry.

²² Pehendu kena inhe'ẽ. Oĩ inhe'ẽ ohendu rei va'e, ojapo e'ŷ va'e, onhembotavy va'e. Ani upe va'e reko-rupi ereiko. Nhandejáry nhe'ẽ remimombe'u ejapo kena. Ndereroviái ramo inhe'ẽ erenhembotavy rei-ma arã ereiko-vy.

²³⁻²⁴ Jahexa nhane ra'anga epéco-py. Jajere rire ndajahexavéi-ma nhane aÿgwe. Pya'e nanhane mandu'avéi-ma hese. Upéixa ave Nhandejáry nhe'ẽ ndogweroviái va'e. Ohendu ramo ohendu rei ha ojere oho ramo opa jevy-ma íxugwi.

* **1:11** SI 102.4,11; Is 40.6-8

25 Anhetegwa tee va'e Nhandejáry nhe'ẽ. Nhane mo'arandu Nhandejáry reko-rupi jaiko hagwā ponove ipu'aka nhande-rehe tekoha vaiha. Nhahendu-ma ramo nhanhongatu-ma ramo nhande py'apy-py Nhandejáry nhe'ẽ nokanhy mo'āvéi-ma va'erā nhandéhegwí. Hemimombe'ukwe-gwi ndajava java mo'āvéi va'erā. Nhane mandu'a porā meme va'erā Nhandejáry nhe'ẽ-rehe. Upéa-rehe opamba'e nhane rembiapo gwive ohovasa meme va'erā nhande-vy Nhandejáry.

26 Nhanhe'ẽ rei rei ramo nhande rapixa-pe, ja'e rei arā nhandéjehe "Ajerovia-ma Hesu-rehe". Upéixa ramo nhanhembotavy rei mante va'erā jaiko-vy.*

27 Áy amombe'u-ta nde-vy mba'éixa pa Nhandejáry Nhande Ru yváy pygwa oipota ójehe ojerovia va'e oiko. Ha'e nhane mo'arandu gwemimbota-rupi jaiko hagwā. Oipota nhaipytygwō tyre'ỹ oiko va'e-pe, ime omano va'ekwe va'e-pe ave nhaipytygwō pono ohasa asy oiko-vy. Oipota ave japoi nhane rembiapo vaise hagwe-gwi. Upéixa nhande reko ramo, "Erejerovia tee-ma xe-rehe" he'i va'erā nhande-vy Nhandejáry.

2

Nhandejáry Hesu Cristo-rehe ojerovia va'e ndogwereko joavy avýi va'erā gwapixa-pe

1 Tapejeapysaka katu xe nhe'ẽ-rehe xe re'ýi kwéry, Nhandejáry Hesu Cristo reroviaha kwéry. Peteĩxa jaiko-ma Nhandejáry ipu'aka marangatu tee va'e ndive. Upéixa-gwi peteĩxa tapejogwereko porā meme rei katu. Oĩ imba'e reta va'e-pe ogwereco porā va'e ha iporiahu va'e-pe katu ndogwereko porāi peteĩxa. Upéixa ani teĩ pejogwereko joavy avy imboete-vy.

2-4 Peteĩxa ndapejogwereko reíry ramo ojogweroaty ha-py ou va'e-pe, ni-porāi voi. Ijao porā va'e-pe, ikwāirũ hepyve reheve ou va'e-pe eremboeteve ramo ijao porā e'ỹ va'e-gwi, naporāi voi nde rekoha. Upéixa ramo erereko joavy avy imboete-vy Hesu-rehe ojerovia va'e kwéry-pe. Ijao porā va'e-pe mante henagwā porārā eremombe'u ramo, nerepenái javé iporiahu va'e-rehe, eremboete joavy avy íxupe kwéry. "Enhembo'y rei eĩ-vy" ere ramo iporiahu va'e-pe, "Yvy-py egwapy" ere ramo eremboete e'ỹ-vy íxupe, naporāi voi upéixa erereko joavy avy ramo nde rapixa kwéry-pe. "Ipy'a porāha ojehexa voi ijao porā-rehe voi" ere ramo ijehexa rei omboete va'e-rupi ereiko. Nerenhemongeta porāi voi nipo ra'e nde py'apy-py. Imboetepyrā-rupi ndereikói. Ani upéixa nde reko joavy teĩ avave-pe.

5 Tapejeapysaka porā kena xe nhe'ẽ-rehe, xe rembiayhu kwéry. Nhandejáry oiporavo meme iporiahu va'e kwéry-pe ojerovia porā hagwā ójehe. "Xe rayhu va'e-pe aiko arā huvixarā ramo" he'i. "Xe moirū tee va'erā hikwái" he'i va'ekwe Nhandejáry. Ha'e he'i hagwe-rami ave ojapo meme.

6 Upéa-rehe napene mandu'avéi para'e. Napembootéi ramo iporiahu va'e kwéry-pe, Nhandejáry reko-rami e'ỹ peiko íxupe. Ma'erā tipo. Napene mandu'avéiry imba'e reta va'e rekoha-rehe. Ha'e kwéry pende rerekoy asy rei voi. Pende jokwái rei rei. Pende reraha rei ave mburuvixa renda-py ojapo hagwā pende-rehe ojapose va'e.

7 Onhe'ẽ rei ave Nhandejáry Hesu Cristo-rehe. Inhe'ẽ reroviaha va'e-rehe onhe'ẽ vai ramo, Nhandejáry Hesu Cristo-rehe ae onhe'ẽ vai.

8 "Ne ndivegwa-pe ehayhu kena nde reko erehayhuha-rami ave"** ohai uka va'ekwe Nhandejáry Nhande Ruvixa nhande rekorā-rehe. Erejapose ramo inhe'ẽ tekotevē erehayhu rei enterovéa-pe.

* **1:26** Sl 34.13; Tg 3.2-12 * **2:8** Lv 19.18

⁹ Penhomboete joavy avy ramo, pene rembiapo vai-ma voi. Upéa-rehe Nhandejáry nhe'ẽ erejapo e'ŷ ramo, ojekwaa-ma voi nde-rehe nde reko jejavyha.

¹⁰ Oĩ heta Nhandejáry nhe'ẽ Moisés amyrī remimombe'ukwe nhande rekorā. Upe mixī jepe ndojapói va'e osē joty inhe'ẽ-gwi. Opyta osēmba ete va'e-rami. "Osēmba ete xe nhe'ẽ-gwi" he'i hese Nhandejáry.

¹¹ Onhe'ẽ-py he'i va'ekwe "Ani eremenda menda reise teĩ ereiko-vy" he'i va'ekwe. "Ani ereporojuka teĩ" he'i ave va'ekwe onhe'ẽ-py. Aipo ramo Nhandejáry remimombe'ukwe rendu-gwi nomenda mendái teĩ oiko-vy va'e oporojuka ramo osē-ma hemimombe'ukwe-gwi. Hembiapo vai joty.*

¹²⁻¹³ Aipo ramo nhamondo kena nhande resa nhane renonderā-rehe. Og-wahē arā peteĩ áry Nhandejáry nhande rerekō reko hagwā nhane rembiapo apokwe-rehe. Hesu remimbota-rupi e'ŷ joty jaiko ramo ndojohu porāi arā nhande-rehe. Hemimbota-rupi ae jaiko ramo ojohu porā arā nhande-rehe. Upéa-rehe ha'e-ta peẽ-my pende reko peheja kena ipogwy-py. Tape-joporiahuverekō rei kena enterove va'e ndive. Ndajaiporiahuverekói ramo nhande-rehe ndija'ei va'e-pe, Nhandejáry ave nanhande poriahuverekói ave arā. Jaiporiahuverekō ramo enterovéa-pe Nhandejáry ave nhande poriahuverekō ave va'erā. Ovy'a va'erā nhande-rehe ojohu ramo nhane rembiapokwe.

Nhandejáry-rehe jajerovia teeha rehewa nhe'ẽ

¹⁴ Ndajarovái ramo nhande rekoha "Ajerovia-ma Hesu-rehe" ja'e ramo, ja'e rei. Upéixa ramo ndovaléi-ma voi nhande jeroviaha mo'ã, xe re'ýi kwéry.

¹⁵⁻¹⁶ Pene mandu'a kena iporaihu va'e-rehe. Nhane nhe'ẽ-py rei jahovasa ukase ramo, gweko-rupi joty oiko iporaihu va'e. Oĩ ramo nhane pa'ũ-my Hesu reroviaha iporaihu va'e pene nhe'ẽ rei-rupi napeipytygwōi va'erā íxupe. "Nhandejáry tandem rovasa katu nde ao repyrā ereheka-vy" peje rei íxupe. "Nhandejáry tane mbopy'agwapy katu ne rembi'u repyrā ereheka hagwā" peje rei ave íxupe. Pene nhe'ẽ-py rei pehovasa ukase mo'ã Nhandejáry-pe. Iporaihu joty va'erā voi.

¹⁷ Upéixa ave nhane rembiapo porā e'ŷ rehewe "Ajerovia-ma Hesu-rehe" ja'e ramo, ja'e rei ójehe. Nhande reko tujakwe-rupi joty jaiko.

¹⁸ Oĩ para'e pene pa'ũ-my gwī xe remimombe'u ombojevyse va'e: "Ndaha'ei peteĩxa nhande reko nhande Nhandejáry ndive jaiko porā va'e kwéry" he'i rei va'erā. "Oĩ hese ojerovia tee va'e. Oĩ ave hembiapo porā rei va'e" he'i rei va'erā. "Mokōive ombovy'a va'erā Nhandejáry-pe" he'i rei va'erā nhande reko-rehe. "Xe, xe rembiapo porā-rehe ambovy'a Nhandejáry-pe. Nde ae, Ajerovia-ma Hesu-rehe ere-gwi nde ave erembovy'a íxupe. Ndaha'ei peteĩxa nhande reko nhambovy'a hagwā íxupe" he'i rei arā nhande reko-rehe.

Aipo peje ramo, aipo ramo tanhemonhe'ẽ xe peẽ-my. Mba'eixa-rami po ereiko arā Hesu reroviaha ramo ne rembiapo porā e'ŷ rehewe? Mba'eixa-rami po ereikwaa arā nde ae nde jeroviaha? Xe ae xe rembiapo porā-rupi aikwaa uka enterove-pe Hesu-rehe ajeroviamaha. Iporā voi nhande reko nhambajoja nhane nhe'ẽ ndive.

¹⁹ "Peteĩ anho Tupā Nhandejáry" peje nipo ra'e. Upéa peje ramo anhetegwa voi ne nhe'ẽ. Upéa mante ere ramo ae ne'írā ererovia porā-ma íxupe. Anháy kwéry upéixa ave he'i hese. Onheresende e'ŷ hagwā jepe ikyhyje-ma íxugwi.

²⁰ Pende tavy vyteri nipo ra'e. Napene mandu'avéi-ma nipo ra'e hekoha porā e'ŷ rehewe oiko jave he'i ramo "Arovia-ma Hesu" ndovaléi voi ijerovalaha. Upéa nhe'ẽ pemokanhy-ma nipo ra'e pendejéhegwi.

* ^{2:11} Ex 20.13-14; Dt 5.17-18

²¹ Upéixa-gwi apomomandu'a jevy-ma Abraão amyrī rekokwe rehewa nhe'ẽ-rehe. Gwekoha porã reheve ojerovia va'ekwe Nhandejáry-rehe hemimbota ojapo-vy. Ome'ẽ hagwā Nhandejáry-pe ojuka-ta mo'ã va'ekwe gwa'ýry Isaque-pe. Nhandejáry omboete-vy hemimbota ojapo-vy, ojuka-tama ramo Nhandejáry he'i "Ojerovia tee nipo ra'e xe-rehe. Xe remimbota ojapo hagwā nahakate'̄yi gwa'ýry-rehe. Oiko xe nhe'ẽ-rupi. Ipy'a potī-ma Abraão" hei hese.*

²² Ojerovia tee hese oiko-vygwi Nhandejáry remimbota ete ojapo va'ekwe oiko-vy Abraão. Ohexa uka ijeroviaha gwembiapo porã-rupi.

²³ Upe rire Nhandejáry he'i kwatia-rehe onhe'ẽ-py: "Abraão ojerovia Nhandejáry-rehe. Ojerovia tee ójehe-gwi, Ipy'a potī-ma, he'i hese Nhandejáry." "Xe irū tee-ma voi Abraão" he'i ave hese.*

²⁴ Upéa-rehe nhane mandu'a ramo jaikwaa arā ave: Ojerovia rei hese va'e nombovy'ái Nhandejáry-pe. Ohexa porāse ave nhande rekoha nhande-rehe Nhandejáry "Ipy'a potī-ma" he'i hagwā nhande-rehe.

²⁵ Upéixa voi ave Raabe amyrī Nhandejáry reroviaha-rupi hembiapo porã va'ekwe. Kunha ikwimba'ese va'e jepe upé hembiapo porã-rehe "Ipy'a potī" he'i joto va'ekwe hese Nhandejáry. Josué amyrī remimondo va'e-pe Raabe omogwahē porã va'ekwe gwóga-py. Ojaho'i íxupe imonhemi hagwā. Tape ambue-rupi omondo ijukaharāgwe-gwi iresende-vy. Upe hembiapo porã-rehe Nhandejáry he'i hese "Ipy'a potī-ma" he'i hese.*

²⁶ "Hesu-pe arovia-ma" ja'e ramo nhane rembiapo porã e'ŷ reheve, het-ekwe ndovaleveiha-rami ave ndovaléi nhande jeroviaha.

3

Nhande juru ipu'aka nhande-rehe

¹ "Xe ave, amombe'use Nhandejáry nhe'ẽ poromo'aranduha-rami" ere ramo, pejeapysaka kóá xe nhe'ẽ-rehe, xe re'yí kwéry. Ogwahē arā nhande óra nhane rembiapokwe-rehe nhane monhe'ẽ hagwā Nhandejáry. Ore oroporomo'arandu va'ekwe-pe ore rerekoyasyve va'erā Nhandejáry ore rembiapo vaikwe-rehe. Upéixa-gwi ha'e-ta peē-my iporāve ndahetái pene pa'ũ mygwa oiko inhe'ẽ poromo'aranduhaty.

² Nhande kwéry, enterove, nanhane arandúi voi. Jajejavý javy voíte jaiko-vy. Nhande juru nhane mbojejavý rei ave. Ha nanhanhe'ẽ reíry ramo mba'eve-rehe ndajajejavý arā ra'e. Upéixa ramo ndajajejavý arā ra'e, nhande pu'aka tee arā ra'e nhandéjehé.

³ Pene mandu'a porã kena. Kavaju juru-py nhamoñ imbogwataharā. Mixī jepe ogwerogwata porã ojáry-pe kavaju. Ijáry oipota ha-rupi oho joto kavaju.

⁴ Kanoagwasu tuvixa vixa va'e-rehe pene mandu'a ave. Imbogwataha mixī jepe ogwerova joto kanoagwasu ijáry-pe. Imbogwataha-rehe imbogwatase ha-rupi, ogweraha joto ojáry-pe. Yvytu hatā vai-rupi jepe oho joto.

⁵ Ha'e ramigwa voi nhande juru. Nhande rete rehewa mixī voi nhande juru. Mixī ramo jepe ipu'aka tee joto heta mba'e-rehe.

Nhane mandu'a kena tata-rehe ave. Mixīmi oĩ ramo hesa'imi ramo jepe ojepota joto. Hendy-ma oho-vy. Nande pu'akavéi-ma hese. Ka'agwygwasu jepe ohapypa voi oho-vy. Tuvixa va'ekwe jepe ohapypa voi.

⁶ Upéixa ete nhane nhe'ẽ ojepysa oho-vy. Tata-rami voi anháy rembiporu-rami nhande juru. Nhanhe'ẽ hetave ramo nhande reity vaive ive oho-vy nhande juru. Nhande rapypa va'erā nhande juru.

* 2:21 Gn 22.1-14 * 2:23 Gn 15.6 * 2:25 Js 2.1-21

⁷ Jaipota ramo nhande pu'aka opaixagwa mymba kwéry-rehe nhamománso hagwā. Ka'agwy rupigwa mymba jepe, mymba oveve va'e jepe, osyryry va'e jepe, ygwasu rupigwa jepe nhande pu'aka voi hese.

⁸ Nhande juru-rehe ae avave ndaipu'akái. Ndajajoko kwaái nhande juru. Nanhande rerekirí kwaái nhande juru. Nanhanhe'ëséi ramo jepe nhanhe'ë voi joto. Jaiporu rei nhande juru. Mbói nhande su'u va'e-rami nhande juru nhande mbohasa asy va'erā.

⁹ Jaiporu nhande juru nhamboete hagwā Nhandejáry-pe. Ha upe rire katu nhanhe'ë vai nhande rapixa-rehe. Gweko-rami nhane moingo va'ekwe Nhandejáry. Aipo ramo, nhanhe'ë rei ramo nhande rapixa-rehe, Nhandejáry rekoha-rami hemimoingo va'ekwe-rehe nhanhe'ë rei ave. Upe va'e naiporāi voi.

¹⁰ Upéixa ramo peteī nhande juru-gwi osē nhe'ë vai nhe'ë porā ave. Omboete joavy onhe'ë vai ndive. Niporāi upéixa nhande rekoha, xe re'ýi kwéry.

¹¹ Ygwa-gwi peteīxa osē y. Y he'ë va'e osē ramo ndikatúi osē y iro va'e íxugwi. Peteī ygwa-gwi peteīxa meme osē. Nhande juru ae ndaha'ëiry upeixagwa. Osē jopara nhane nhe'ë.

¹² Figo máta-gwi noséiry azeitona oliveira'a. Uva máta-gwi ndajaipe'ái figo. Upéixa ave peteī ygwa-gwi nanhanohë mo'äi he'ë va'e, y iro va'e ndive. Upeixagwa e'ë nhande juru. Naiporāi voi upéixa nhande reko, xe re'ýi kwéry.

Arandu Nhandejáry remime'ë rehewa nhe'ë

(1 Co 2.6-7)

¹³ Tekotevē nhande reko porā rehewe jaiko, xe re'ýi kwéry. Oï ramo pene pa'ü-my inharandu porā va'e ombojekwaa va'erā ójehe gwekoha porāha. Hexaha e'ë jepe onhemboete e'ë rehewe jepe inharandu porā-gwi gweko kirirí rehewe ojapo arā gwembiapo porārā rei.

¹⁴ Nhande py'a-py nhandejéupe gwarā mate jaipota meme ramo, nhande rapixa ogwereko va'e-rehe nhapena rei rei ramo, nhanhemonhemoyrō ramo, "Xe arandu porā-ma xe" ja'e rei mo'ä nhandéjehe. Ani upéixa teī nhande apu nhandéjehe, xe re'ýi kwéry.

¹⁵ Aipo ramo jaiko ramo, nhane arandu vérami mo'ä nhandejéupe. Nhandejáry nome'ëi upeixagwa arandu nhande-vy. Nhane akä-gwi rei upe va'e. Teko rei-gwi ae upe va'e ave, anháy reko ae upe va'e.

¹⁶ Nhande rapixa ogwereko va'e-rehe nhapena rei rei ramo, nhandejéupe gwarā jaipota eterei ramo, ndajajohúi ramo, nanhande py'agwapyvéi va'erā. Jaikwaa e'ë rehewe nhande ayvupa rei arā ojóehe. Nhanhomonhe'ë mbojevy jevy rei va'erā. Nanhande reko jojái va'erā onhondive. Opáixagwa mba'e vai ave jajapo arā nhane pa'ü-rupi.

¹⁷ Nhandejáry remimombe'u-rupi ae nhane arandu ramo nanhane rembiapo vaivéi-ma va'erā. Nhande py'agwapy va'erā peteīxa onhondive. Nhande reko kirirí rehewe jajogwereko va'erā. Nanhanhe'ë asýi arā ojóupe. Jahex-akwaa va'erā nhande rapixa-pe hemikotevē nhame'ë-vy. Nanhane rakate'ëi va'erā mba'eve-rehe. Nhane rembiapo porā porā rei va'erā ojóupe.

¹⁸ Nhande py'agwapy rehewe jaiko ramo, ija'e'ë va'e ojóehe nhambojoja porā jevy va'erā imbopy'agwapy-vy onhondive. Temitýgwe járy oha'arō ojaty va'ekwe hi'a hagwā. Upéixa ave nhaha'arō jaiko-vy nhande py'agwapy rehewe Nhandejáry rekoha tee-rupi jaiko hagwā.

¹ Niporāi voi pende rekoha. Penhonhe'ē mbojevy jevy nipo ra'e peikovy onhondive. A'e'ŷ rei nipo ra'e perekō ojōehe. Ma'erā-gwi upéixa peiko? Ndéjehe rei mante nipo erenhemoneta ngeta ra'e nde py'apy-py. Ne remimbota ndejéupe gwarā-rehe mante nipo ne mandu'a ra'e. Upéixa-gwi peē ojoekoha-rehe napende a'éiry.

² Ne mba'e porārā ndererekói va'e-rehe mate nipo ne mandu'a meme ra'e. Nde reko porāverā mo'ā-rehe peiko rei-vy. Ndererekói-gwi ereporojukase mo'ā nipo ra'e ne rembijukakwe mba'ekwe ererekō hagwā mo'ā ne ma'erā. Imba'e ndererekói-gwi nipo erenhe'ē mbojevy jevy ne a'e'ŷ-vy nde rapixa-rehe ra'e. Ne remimbota nderehupitýi nipo ra'e Nhandejáry-pe nderejeruréi-gwi ra'e.

³ Ne remimbotarā-rehe erejerure ramo Nhandejáry-pe, nome'ēi nde-vy nde-vy gwarā. Nome'ēi pono ne rembiapo vairā upe erejapose va'e ereiporu ramo. Ndaha'ēi Nhandejáry rekoha-rami ereiko hagwā ereipota upe ne rembigerure. Ne akā-gwi rei ereikotevē e'ŷ reheve ereipota upe va'e. Nde rory rei hagwā mo'ā ne mba'erā ereipota rei. Upéixa-gwi nome'ē mo'āi nde-vy ne rembigerurekwe.

⁴ Nhandejáry-gwi katu erejere jere rei nipo ra'e. Nane mandu'avéi-ma nipo ra'e kóa-rehe: Nhamoirū meme ramo teko rei va'e-pe nanhande a'ēi ave Nhandejáry-rehe. Upe va'e nhe'ē okanhy-ma para'e ndéhegwi. Upéixa-gwi eremoirūse meme ramo Nhandejáry-rehe ija'e'ŷ va'e, nde ave nande a'ēi va'erā Nhandejáry-rehe.

⁵ Nhandejáry nhe'ē ojehai va'ekwe nhahendu hagwā he'i va'ekwe nhande-vy:

“Nhandejáry omoī-ma nhande py'apy-py Nhe'ē Marangatu tee va'e. Hakate'ŷ voi nhande-rehe Nhe'ē Marangatu tee va'e. Ha'e oikwaa ukase va'e-rehe oipota nhane mandu'a meme nhanhemoneta-vy, hemimbota anho mante jajapo hagwā. Hakate'ŷ voi nhande-rehe Nhe'ē Marangatu tee va'e.”*

Upe va'e nhe'ē ojehai rei ra'e peē-my gwarāgwe voi nipo ra'e.

⁶ Hembiaapo porā meme nhande-vy Nhandejáry nhane pytygwō tygwō voi. Upéa-rehe oī ave inhe'ē kwatia-rehe ohai va'ekwe:

“Nhandejáry ombojevy va'erā onhembotuvixamba'e ukase va'e. Onhembotuvixase e'ŷ oiko va'e-pe ae ohexakwaa porā rei Nhandejáry”*
he'i va'ekwe Nhandejáry ohai uka-vy.

⁷ Aipo ramo penhemoī katu Nhandejáry yke-rehe. “Ndaikoséi voi xe anhaygwasu nhe'ē-rupi” peje kena. Upéixa ere ramo opoi arā ndéhegwi anhaygwasu.

⁸ Enheme'ē katu Nhandejáry-pe ijyke rehewarā. Ome'ē arā nde-vy ne arandurā. Ha'e ho'arandu-rupi nde rerekō. Ha'e nde yke-rehe onhemoī va'erā. Epoi katu ne rembiapo vaiseha-gwi. Ha nde, nde rekoha porā ra'anga va'e erova katu nde rekoha. Enhemmoneta ngeta Nhandejáry remimbota-rehe mate ponove erejere jere ereiko-vy íxugwi.

⁹ Nde reko vai eterei-gwi enhemboasy kena. Nde rekoha vaikwe-rehe ejahē'o ave. Anive ne rembiapo vai reheve erepuka puka teī ereiko-vy. Erejahe'o rei-vy hese eiko katu. Anive erevy'a teī ne rembiapo vaikwe-rehe. Erenhemboasy-vy eiko katu nde rekoha vaikwe-rehe.

¹⁰ Penhembohekogwypyve Nhandejáry-pe “Xe pytygwō katu, xe Járy. Xe arandu e'ŷ ramo ndaxe pu'akáiry xéjehe. Ndaiko kwaái nde reko-rupi”

* ^{4:5} Ex 20.1,5; 1 Co 6.19 * ^{4:6} Pv 3.34

peje kena Nhandejáry-pe pene moingo hagwā tekoha porā-rupi. Ha'e pene pytygwō va'erā pende rovasa porā va'erā.

Ani erenhe'ẽ rei rei nde rapixa-rehe

(Mt 7.1-5; Lc 6.37-38; Rm 2.1-3; 14.1-4,10; 1 Co 4.5)

¹¹ Ani penhe'ẽ rei rei ojóehe xe re'ýi kwéry. Nhande rapixa-rehe nhanhe'ẽ rei rei ramo nhanhe'ẽ rei ave Nhandejáry nhe'ẽ-rehe. Moisés amyrī remimombe'ukwe judeu re'ýi rekoharā-rehe nhanhe'ẽ rei ave. Nhande rapixa jajohu vai ramo, "Ivai" ja'e hese anho mo'ã. Nhandejáry nhe'ẽ Moisés amyrī rembihaikwe-rehe ave aipo ja'e ave. Upéixa ramo ndajaikovéi Moisés amyrī rembihaikwe pogwy-py. Nhande ae nhanhemoī rei jajohu hagwā hembihaikwe-rehe.

¹² Nhandejáry peteĩ va'e anho oiko omombe'u hagwā mba'eixagwa nhande reko jaiko porā hagwā ondice. Peteĩ anho nhande reko johu kwaa va'e. Ha'e anho nhane resende kwaa va'e. Ha'e anho nhane hundi kwaa ave. Ndaijáiry erejohu vai nde rapixa rembiapokwe. "Eresẽ-ma Nhandejáry remimombe'ukwe-gwi" ani ere teĩ íxupe.

Ko'ẽ ramogwarā-rehe ndajaikwaái mba'eve

¹³ Pejeapysaka porā katu ko xe nhe'ẽ-rehe. "Jaha katu mombyry upe tetā ambue-py" peje nipo ra'e ojóupe. "Ãy jaha" "Ko'ẽ ramo jaha" peje nipo ra'e ojóupe peiko-vy ra'e. "Nhamba'apo-ta upe-py. Nhande are-ta peteĩ mba'e agwyje-rupi upe-py nhamba'apo-vy. Upe rire ae jaju jevy va'erā" peje nipo ra'e ojóupe. Upéixa pene nhe'ẽ ramo pejeapysaka katu ko xe nhe'ẽ-rehe.

¹⁴ Mbava'e tipo peikwaa peẽ ko'ẽ ramo ojehu va'erā. Mba'eve. Ndapeik-waáiry pende rekoverā-rehe. Hatatī otimbo va'e-rami voi nhande rekoha. Sapy'ami anho jahexa, okanhymba jevy-ma. Upéixa ave nhande reko. Nanhande are aréi ko yvy-py. Sapy'a nhamano jevy va'erā. Avave ndoikwaái nhande óra nhamano hagwā.

¹⁵ Upe va'e-rehe iporāve peteĩ teĩ peje "Nhandejáry oipota ramo ajapo-ta upéixa" peje.

¹⁶ "Ko'ẽ ramo aha-ta upe-py" "Ko'ẽ ramo ajapo-ta upe va'e" ere nde rekorā-rehe erevy'a-vy. Upéixa ere ramo, "Xe remimbota-rupi aiko" ere nipo ra'e. "Nhandejáry remimbota-rupi aikose" nderéiry ndéjehe. Upéixa pene nhe'ẽ rei.

¹⁷ Nhandejáry nhe'ẽ nhahendu rire hemimombe'u-rupi ae tekotevē jaiko. "Iporā" ja'e-ma ramo hese tekotevē jaiko inhe'ẽ-rupi. Hemimombe'u e'ý jajapo ramo "Ojere xe nhe'ẽ-gwi" he'i va'erā nhande-rehe. "Ojejavy-ma xevy" he'i va'erā nhande-rehe Nhandejáry.

5

Imba'e reta va'e pegwarā nhe'ẽ

(Lc 12.15-21; 1 Tm 6.7-10)

¹ Peẽ, pene mba'e reta reta va'e kwéry, pejeapysaka porā kena xe nhe'ẽ-rehe. ãy pene mba'e reta ramo jepe pehasa asy joty arā peẽ. Upéa-rehe penhemboasy mani pejahe'o kena.

² Pene mba'ekwe itujupa-ma va'erā. Pende ao porāgwe osoropa va'ekwe raso ho'u-ma va'erā. Ndahyvera porāvéi-ma pene mba'ekwe.

³ Pene mba'e hepy va'e pende ouro, pende plata ave havẽmba-ma va'erā. Pereko rei-ma pene mba'e reta. Ndovalevéi-ma pene mba'e. "Om̄ba'e reta-rehe hakate'ý rei nipo ra'e. Ndovaléi voi" he'i arā pende-rehe pende rexaháry. "Omono'õ no'õ rei nipo om̄ba'e reta gwekoha porārā mo'ã hagwā ra'e ojéupe gwarā. Hakate'ý te'ý rei nipo ra'e" he'i va'erā pene mombe'u-vy. Pene

rembiapo vai-gwi, tata-py okái va'e-rami erehasa asy va'erā. Pemono'ō rei peē-my gwarā. Nhandejáry ae ohexa tee voi. "Ivai eterei ne rembiapokwe" he'i va'erā peē-my.

⁴ Pende kokwe-py omba'apo va'e-pe ndapepaga porāiry. Pereko asy eterei pene rembigwái-pe. Upéa pene rembiapo vaikwe-rehe ha'e kwéry pene mombe'u-ma Nhandejáry-pe. "Ore rerekoha ore mbohasa asy asy" he'i-ma Nhandejáry-pe pende-rehe. "Onhembigwái vai ore-rehe. Omono'ō ojéupe gwarā ha nome'ē mo'āi ore rembiapo repy ore-vy" he'i pene mombe'u-vy Nhandejáry-pe. Ojeporahuvereko uka Nhandejáry-pe pene rembigwái kwéry: "Ore repy katu ore mbohasa asyhare-pe. Embohasa asy jevy íxupe" he'i ave Nhandejáry-pe. Ha Nhandejáry yváy pygwa, nhande ruvixagwasu ipu'aka tee va'e ohendu-ma upe pene rembigwái nhe'ē. Oiporahuvereko-ma íxupe kwéry.

⁵ Ko yvy ári peiko jave pevy'a pene mba'e-rehe. Pejapose va'e rei pejapo. Pejogwase va'e pejogwa ave. Opaixagwa rei perekó yvy arigwa peiko va'e. Pekaru porā porā penhemongyra rei peiko-vy. Heta rei pene rembi'u. Pejapose va'e rei pejapo. Upéa-rehe Nhandejáry pene mondo-ta pende rerekó asy hagwā-py pene rembiapo vaikwe-rehe. Ma'e mymba vérámi ijáry omon-garú va'e peē ave pene mongyra pende juka uka hagwā.

⁶ Hembiapo vai e'ŷ va'e-pe "Ne rembiapo vai eterei" peje rei va'ekwe. Pejuka rei va'ekwe ave hembiapo vai e'ŷ va'e-pe. Ndaipu'akái mba'eve ojapo hagwā pende-rehe jave pejuka íxupe.

Nhande kwerái e'ŷ reheve nhaha'arō Nhandejáry-pe jaiko-vy

⁷ Upe va'e-gwi, xe re'ýi kwéry, Hesu reroviaha, pende reko pyatā joty katu pekirirí-vy peiko pende rerekó asy ramo jepe. Peiko marangatu katu pende rerekó asyha-pe. Nhandejáry Hesu ou jevyha áry-rehe peha'arō katu. Ani pende kwerái teĩ ha'arō-vy. Kokwe-py nhanhemitý ramo nhaha'arō va'e-rami nhaha'arō katu Nhandejáry-pe. Nhaha'arō ama nhanhemitý hagwā. Oky rire katu jajaty henhoi hagwā. Oky jevy ramo, nhaha'arō íxupe ombohi'a porā hagwā. Oky hagwā nhaha'arō kwaajoty.

⁸ Upéixa ave ani pende kwerái teĩ ha'arō-vy Nhandejáry Hesu ou jevy hagwā-rehe. Agwī-ma ou jevy hagwā óra. Upéa-rehe peha'arō porā kena peiko-vy.

⁹ Ani pejoheko mombe'u mbe'u teĩ, xe re'ýi kwéry. "Hekoha vai ko" ani peje teĩ pende rapixa-rehe. "Ne rembiapo vai va'e ko nde" ani ave peje rei teĩ íxupe ani hagwā Nhandejáry he'i nde-vy "Nde rekoha vai voi ko nde" he'i nde-vy. Agwī-ma ogwahē hagwā óra. Ha'e anho mate omombe'u kwaan hane rembiapokwe-rehe.

¹⁰ Pene mandu'a kena myamyrí rekoke-rehe, Nhandejáry nhe'ē-py omombe'u va'etykwe rekoke-rehe. Yma va'ekwe ha'e kwéry Nhandejáry pogwy-rupi omombe'u mbe'u va'ekwe inhe'ē. Inhe'ē-gwi ndojereséi-gwi ohasa asy ramo jepe, omombe'u mbe'u joty va'ekwe inhe'ē. Nonhe'ēi joty ombohasa asyhare-pe. Upéixa nahembiapo vaíry ha'e kwéry. Ha peē katu pehasa asy jave, pene mandu'a kena myamyrí rekoke-rehe. Ha'e-rami peiko porā kena, xe re'ýi kwéry. Ani pene rembiapo vai teĩ pene nhe'ē-rupi.

¹¹ Upe myamyrí kwéry-rehe ja'e "Ovy'a voi Nhandejáry nhe'ē mombe'uhatygwe. Ohasa asy jepe omombe'u joty inhe'ē. Ogwerovia kwaan araka'e Nhandejáry-pe" ja'e hese. Pene mandu'a kena Jó amyrí-rehe. Ha'e ojerovia voi va'ekwe Nhandejáry-rehe. Ohasa asy asy jepe, heko pyatā joty oiko-vy. Ojerovia tee joty va'ekwe Nhandejáry-rehe pono inhe'ē-gwi ojere gwembiapo vairā apo-vy. Pene mandu'a kena. Oiporahuvereko joty ave

Jó-pe Nhandejáry. Upéi ombopyahupa jevy íxupe imba'e retave hagwā. Upéixa voi Nhandejáry iporā porā voi nhande-vy. Oiporiahuvereko va'e Nhandejáry.*

¹² Pejeapysaka porā kena xe re'yi kwéry. Ani ereiporu ambue va'e réry erembojerovia uka hagwā ne renduha-pe ne nhe'ē-rehe. Ani ereiporu yváy, yvy réry ave ne renduha kwéry ogwerovia hagwā ne nhe'ē. "Ajapo-ta" ere ramo, ejapo katu. Nderejaposéi ramo "Ndajapo mo'ai" ere katu. Ani nde apu rei tei. Anhetegwa mate pemombe'u katu. Upéixa nde reko pyatā ramo ne nhe'ē rei jepe ogwerovia arā ne renduha. Ha nane mbohasa asýi va'erā Nhandejáry.*

¹³ Pehasa asy ramo pemondo pene nhe'ē Nhandejáry-pe. Pevy'a ramo, peporahéi katu Nhandejáry-pe pemboete-vy.

¹⁴ Nde rasy ramo, erehenói uka katu Hesu reroviahä rerekwa-pe ou hagwā nde rexa. Ou rire, ojerure va'erā Nhandejáry-pe ne mbogwera hagwā. Omoi arā mixi nhandy ne akā-rehe a-rami he'i-vy: "Nhandejáry Hesu réry-py amoita ne akā-rehe ko nhandy" he'i arā nde-vy.

¹⁵ Upéixa he'i ramo, ombogwera va'erā hasy va'e-pe Hesu ójehe ojerovia-gwi. Hesu omopu'ā jevy va'erā íxupe. Ha oī ramo hembiapo vaikwe, omboyke va'erā íxugwi oresende hagwā.

¹⁶ Upéa-gwi iporā nhande Hesu reroviahä va'e nhanhemombe'u katu ojóupe jajeavy hagwe "Amboasy-ma xe rembiapo vaikwe" ja'e ojóupe nhanhemombe'u-vy. Nhandejáry-pe ave nhanhemombe'u nhane mboasyha. Tajajerure kena nhandéjehe nhane mbogwera hagwā Nhandejáry. Opy'a ete gwive ojerure va'e-pe ohexa uka opu'akaha Nhandejáry hembigerure ome'ē-vy.

¹⁷ Ymagware Nhandejáry nhe'ē-py omombe'u va'etykwe, Elias amyrī oiko va'ekwe. Nhande-rami oiko va'ekwe voi Elias. Yma va'ekwe omondo mondo onhe'ē Nhandejáry-pe "Anive eremongy ore-vy" he'i ojerure-vy. Ha ndokyyéi va'ekwe íxupe kwéry. Hembigerurekwe ojapo va'ekwe íxupe Nhandejáry. Inhe'ē rendu-vy omongy po'o-ma íxupe. Are-ma voi oky po'o tee-ma. Mbo-happy ro'y haimete jevy ogwahē outro ro'y-py ohasa va'ekwe oky e'ŷ reheve.

¹⁸ Upe rire ae-ma Elias amyrī ombojeupi jevy onhe'ē Nhandejáry-pe oky jevy hagwā-rehe. "Xe Járy" he'i "emongy jevy katu ore-vy" he'i Tupā Nhandejáry-pe ojerure-vy. Inhe'ē ohendu-gwi Nhandejáry omongy jevy íxupe kwéry. Oky porā jevy-ma íxupe kwéry. Henhói porā jevy-ma va'ekwe temitŷgwe. Elias amyrī rekokwe-rami peiko katu. Pende py'a ete gwive pembojeupi pene nhe'ē Nhandejáry-pe pene mbaraete-vy. Perovia íxupe pene rembigerure ra'arō-vy.

¹⁹ Xe re'yi kwéry, Hesu reroviahä va'e, oī para'e pene pa'ū-my Nhandejáry rape porā-gwi ojere jere va'e. Penhemonhe'ē katu íxupe kwéry ogwerova hagwā gwekoha onhembohekoha porā jevy hagwā.

²⁰ Pene mandu'a kena Nhandejáry rape-gwi ojere va'e-rehe. Jarojevy ramo íxupe hekoha porā hagwā-rupi jevy oiko hagwā, oheja hagwā gweko vaikwe oiko porā jevy hagwā Nhandejáry ndive, nharesende íxupe. Nhandejáry nomondói va'erā íxupe ohasa asy hagwā-py. Omboyke va'erā íxugwi hembi-apo vaikwe. Heta heta hembiapo vaikwe jepe omboykepa joty va'erā íxugwi.

* ^{5:11} Jó 1.21-22; 2.10; 42.10,12; Sl 103.8

* ^{5:12} Mt 5.34-37

Pedro remimombe'ukwe 1

primeira epístola de Pedro

Pedro omondo kватia nhe'ẽ Hesu Cristo reroviahа kwéry táva ambue mbue-py oyvy e'ŷ-py oiko va'e pegwarā

¹ Xe Pedro Hesu Cristo remimondo va'e. Amondo uka-ta kватia-rehe xe nhe'ẽ peẽ-my gwarā. Peẽ Nhandejáry reroviahа kwéry pende yvy e'ŷ-py peho peiko-vy araka'e. Penhemosarambipa araka'e peho-vy pene retã-gwi. Nhandejáry reroviahа e'ŷ va'e pa'ũ-rupi táva ambue mbue-rupi peiko va'e. Peẽ Ponto yvy-py peiko va'e, Galácia yvy-py peiko va'e ave, peẽ Capadócia yvy-py peiko va'e ave, Ásia yvy-py peiko va'e ave, yvy ambue Bitínia-py peiko va'e pegwarā ahai-ta.

² Nhandejáry pende poravo va'ekwe ojéupe gwarā. Yma va'ekwe "Upéa xe rembiporavorā" he'i va'ekwe pende-rehe kwéry Nhandejáry, Nhande Ru. Gwe'yirā voi pende poravo va'ekwe hekoha-rami peiko hagwā. Nhe'ẽ Marangatu tee va'e omopotimbama peteĩ teĩ va'e pende py'a Hesu Cristo remimbota pejapo meme hagwā Hesu omanoha-rupi pene resende hagwā.

Tapende rovasa katu pende rexakwaa porâve râve rei hagwā Nhandejáry. Tapene mbopy'agwapy tee katu pende rovasa-vy.

Nhande rekove pyahurā ome'ẽ-ma nhande-vy nhande poriahuverekogwi Nhandejáry

³ Tanhamboete katu Nhandejáry-pe "Nde tuvixa" taja'e Hesu Cristo Ru-pe nhamboete-vy. Nhande poriahuverekoy eterei Nhandejáry. Nhande rekove pyahurā ome'ẽ-ma nhande-vy nhande poriahuverekogwi. Ha'e omopu'ã jevy-ma va'ekwe Hesu Cristo-pe. Omano tee rire omoingove jevy joty va'ekwe íxupe. Upéa-gwi nhande rekove pyahu teerā-rehe nhaha'arõ jaiko-vy íxupe. "Oikove jevy-ma Nhandejáry Hesu Cristo. Upéa-gwi aikwaa-ma ou jevyta xe reraha hagwā, opa e'ŷ rehevai aiko hagwā hendive" ja'e voi Hesu Cristo ra'arõ arõ jaiko-vy.

⁴ Ha Nhandejáry katu "Anhongatu-ma peẽ-my gwarā yváy-py", he'i voi va'ekwe nhande-vy. Upéixa-gwi nhaha'arõ arõ joty jaiko-vy íxupe. Opa e'ŷ va'erā onhembyai e'ŷ va'erā onhehundi e'ŷ va'erā upa va'e onhongatu-ma va'ekwe Nhandejáry nhande-vy gwarā.

⁵ Mba'e vai-gwi onhangareko meme nhande-rehe Nhandejáry. Hese pejerovia tee-gwi opu'akaha-rupi onhangareko pende-rehe oiko-vy. Pende py'a poti tee hagwā pende rekove-rehe onhangareko. Hesu Cristo ogwejy jevy tee ha'óra ohexa uka-ta entero va'e-pe pene nhangareko porā memeha pende py'a poti teeohexa uka-vy.

⁶ Upéa-rehe peẽ pevy'a voi katu. Pehasa asy ramo jepe, sapy'a penhemboasy ramo jepe, tapevy'a joty kuri. Penhemboasy óra ohasa va'erā. Hi'are e'ŷ va'e, ko yvy rupigwa mate peẽ-my pene mbohasa asy arā.

⁷ Nhandejáry oipota pejerovia tee ójehe, ojekwaa hagwā pende rekoharehe pejerovia teeohexa hese. Upéa-gwi pehasa asy peiko-vy. Oĩ ouro hepy va'e. Ímokanhymba reipyrā ramo jepe, nhamoĩ joty íxupe tata-py itantea-vy. Nhambohyku ojekwaa hagwā ouro ra'angakwe ouro tee-gwi.*

Upéixa voi peẽ kwéry. Tuvixa mba'eve Nhandejáry-pe peẽ kwéry ourogwi, hese pejerovia-gwi. Aipo ramo ouro nhatantea va'e vérami pehasa asy

* ^{1:7} Rm 8.17-18; 2 Co 12.9; Tg 1.2-4; 1 Pe 4.12-13

ojekwaa porāve hagwā pende-rehe pejerovia teeha. Upéixa ramo Hesu Cristo ojehexa uka jevy hagwā óra-py pene mboete va'erā. "Xe-rehe ojerovia tee va'e. Ohasa asy jepe va'ekwe, ojeroviave ave joty xe-rehe" he'i arā pende-rehe pene momba'egwasu-vy.

⁸ Peē katu ndapehexái vyteri Hesu Cristo-pe. Pehexa e'ŷ ramo jepe pehayhu joty voi íxupe. Ha ko'ây ndapehexái ramo jepe pejerovia tee joty ave hese. Upe va'e-rehe pevy'a voi. Peē-my peteī teī-pe yváy-gwi ou va'ekwe pende py'apy gwive pende vy'aha. Haimete nome'ëi nhamombe'u hagwā mba'eixagwa iporā pende py'a vy'aha.

⁹ Peteī teī pejerovia-ma araka'e Hesu Cristo-rehe. Upéixa-gwi omopotí-ma peteī teī pende py'a. Upéa-rehe pevy'a tee joty peiko-vy.

¹⁰⁻¹¹ Yma ete myamyrí Nhandejáry nhe'ë-py omombe'u va'ety kwéry omotenonde va'ekwe imombe'u-vy: "Nhandejáry pende rexakwaa rei va'erā pene resende-vy. He'yirā peiko va'erā" he'i peteī teī omombe'u-vy va'ekwe pende rehewa nhe'ë. Ha Cristo rehewa nhe'ë omohenonde-ma ave va'ekwe. "Ogwereko asy va'erā upe va'e-pe" he'i va'ekwe Cristo-rehe. "Upe heta-ma ohasa asy va'e-pe Nhandejáry omomba'egwasu ete va'erā, oiko va'erā Nhande Ruvixa ramo" he'i ave va'ekwe Cristo rekorā omohenonde-vy. Ha Cristo Nhe'ë Marangatu tee va'e ipy'apy-py oiko va'e oikwaa uka va'ekwe íxupe kwéry aipo va'e nhe'ë omohenonde hagwā imombe'u-vy.

Ha kiva'e rehewa omombe'u uka íxupe ndoikwaa ukái vyteri íxupe kwéry. Nomombe'úi voi íxupe kwéry araka'e pa oiko va'erā. Oikwaase eterei-gwi ojerure rure Nhandejáry-pe: "Xe mo'arandu katu, xe Járy. Upe va'e ne nhe'ë amombe'u kuri araka'e pa oiko va'erā? Araka'e pa ogwahē va'erā ne remimbou? Mba'éixa pa ogwahē va'erā? Xe ave, aheda-ta para'e íxupe? Xe mo'arandu katu, xe Járy. Aikwaa porāseve voi íxupe" he'i peteī teī va'e Nhandejáry-pe.

¹² Ha Nhandejáry oikwaa uka va'ekwe peteī teī-pe: "Ndaha'ëi va'erā nde-vy gwarā ne remimombe'ukwe" he'i íxupe. "Ãygwa ndohexái va'erā upe va'e ne remimombe'ukwe" he'i íxupe. "Ne remiarirõ joapy rire mate ohexa va'erā ne remimombe'ukwe" he'i va'ekwe peteī teī-pe Nhandejáry.*

Ha peē katu, ây peikwaa-ma. Pehendu-ma Cristo rehewa nhe'ë. Ou-ma pende ha-py Cristo-rehe omombe'u mbe'u va'e. Nhe'ë Marangatu tee va'e, yváy-gwi ou va'e pene mo'arandu-ma. Imbaraeteha-rupi pene mbo'eháry omombe'u peē-my anhete teegwa voi Cristo rehewa nhe'ë. Ha upe nhande-vy iporā va'e Cristo rehewa nhe'ë-rehe oikwaaase eterei mo'â ave yváy pygwa, Nhandejáry rembigwái kwéry.

Nhandejáry nhande pe'a-ma va'ekwe nhande py'a potí rehewe nhane rembi-apo porāve râve hagwā jaha-vy

(1 Ts 2.10-12)

¹³ Upéa-rehe tapenhangareko reko porā katu peiko porā hagwā. Ani pemondo teī pende resa Hesu Cristo rekoha e'ŷ-rehe. Pejejoko katu pene kyre'ŷ hagwā Nhandejáry remimbota mate pejapo hagwā. Hesu Cristo ojehexa uka jevy hagwā óra ani pemokanhy teī pendejéhegwi. Nhande rovasa-vy voi ou va'erā ha'e. Upéa-rehe tapene mandu'a meme katu Nhandejáry nhe'ë-rupi peiko hagwā.

¹⁴ Mitā inharendu porā gwu nhe'ë ohendu va'e-rami peē ave pehendu katu Nhandejáry nhe'ë. Anive pejapose va'e rei pejapo teī. Anive pene arandu e'ŷ rehewe, inhe'ë rendu e'ŷ rehewe rei pejapo teī pene rembiapose rei va'e.

* ^{1:12} Mt 13.17; Lc 10.23-24

15 Nhandejáry katu hembiapo vai e'ŷ va'e voi. Imarangatu tee va'e. Hembiapo marangatu tee-ma voi oiko-vy. Pende pe'a-ma araka'e pejerovia hagwā ójehe. Upéixa-gwi ha'e-rami voi ave katu tapeiko kena pende py'a potī reheve pene rembiapo porā meme hagwā hendive.

16 Upéa-rehe Nhandejáry nhe'ẽ kватia-rehe oĩ va'e he'i:
“Xe-ma xe reko marangatu tee va'e ko xe. Upéixa-gwi peẽ ave pende reko marangatu reheve tapeiko kena”*
he'i Nhandejáry kватia nhe'ẽ.

17 “Xe Ru” peje ra'e íxupe pene nhe'ẽ pembojeupi ramo. Xáke, nhande kwaa voi va'e ha'e. Ndohejái reíry hembiapo ku'a ku'a va'e. Ndaha'ei oa'e e'ŷha-rehe anho ojapo va'e Nhande Ru yváy pygwa. Ombojoavy e'ŷ va'e voi ha'e. Peteĩ teĩ nhande reko johu kwaa. Upéa-rehe nhane monhe'ẽ va'erā. Upe rire nhande reko hagwe-rehe omombe'u va'erā nhande-vy nhande rekora. Upéixa-gwi ko yvy-rupi peikoha vapy peve ani pehasa teĩ inhe'ẽ.

18 Peikwaa voi pende rekohakwe kwéry. Nhane ramoigwasu amyrī gweko-hakwe rei oheja nhande-vy. Ha Nhandejáry nhande pe'a upéa tekoha-gwi nhande repy gwe'yirā ramo jaiko hagwā. Peẽ katu, pene mandu'a porā kena mbava'e po ome'ẽ nhande repy-vy. Ko yvy pygwa hepy va'e nome'ẽi. Nome'ẽi prata. Nome'ẽi ave ouro nhande repy-vy. Upe va'e opa va'erā. Iporâve va'e ome'ẽ.

19 Pende repy-vy Cristo omano va'ekwe. Pende rekove-rehe gwugwy-rupi omano va'ekwe pende repy-vy.

Yma va'ekwe nhande ru amyrī kwéry oiporavo ovexa ra'y iporâite va'e imarā e'ŷ va'e ojuka hagwā Nhandejáry-pe ijáry rembiapo vaikwe repy-vy. Upe ovexa ra'y-rami ave Cristo omano va'ekwe. Imarā e'ŷ va'e voi Cristo nhande-rehe ha-py omano va'ekwe.

20 Ha yma ete ko yvy nomoingói vyteri jave Nhandejáry oikwaa-ma va'ekwe Cristo omano-ma hagwā. Oiporavo va'ekwe íxupe ijuka uka hagwā. Ha upe rire katu, oiko are-ma rire ko yvy, haimete jevy ko yvy opa jevy hagwā óra, ogwahē-ma va'ekwe ou-vy Cristo. Ou-ma va'ekwe nhande rayhu nhande rovasa hagwā.*

21 Cristo-rehe jajerovia-gwi jajerovia ave Tupā Nhandejáry-rehe. Omano va'ekwe pa'ũ-gwi ha'e omoingove jevy va'ekwe Cristo-pe. Omomba'egwasu ete ave íxupe. Upéixa-gwi jajerovia Tupā Nhandejáry-rehe nhaha'arō ave Cristo-pe nhande rovasa tee hagwā.

22 Perovia-ma araka'e nhe'ẽ anhete va'e. Nhandejáry nhe'ẽ-pyma peiko-ma pene mopotī tee-ma. Upéixa-gwi tapehayhu kena Cristo reroviaha kwéry-pe. Pende py'a gwive tapejohayhu rei katu pejogwerovy'a-vy.

23 Mitā oiko ramo tuvy, isy-pe ko yvy arigwa-pe, túvy-rami, isy-rami voi oiko íxupe. Upéixa ave Nhandejáry nhane mbopy'apyahu ramo jaiko-ma íxupe ta'ýry ramo, tajýry ramo ave. Nhande Ru yváy pygwa opa e'ŷ va'e. Inhe'ẽ opa e'ŷ va'e-rupi pene mbopy'apyahu pende rekove pyahu reheve peiko-ma hagwā opa e'ŷ reheve.

24 Upéa-rehe inhe'ẽ kватia-rehe oĩ va'e he'i:
“Kente kwéry kapi'i ramigwa voi. Hemimomba'egwasu yvoty ramigwa.

Kapi'i ipirupa. Yvoty ipoty kúi-ma. Upéixa ave kente kwéry, hemimomba'egwasu gwive yvoty okúi va'e pirukwe-rami voi. Ndahi'aréi va'erā.

25 Ha Nhandejáry nhe'ẽ katu opa e'ŷ va'e voi”*
he'i Nhandejáry nhe'ẽ kватia-rehe oĩ va'e.

* **1:16** Lv 11.44-45; 19.2 * **1:20** Hb 9.12-14 * **1:25** Is 40.6-9; Tg 1.11

Ha peẽ katu pehendu-ma upe nhe'ẽ. Omombe'u-ma peẽ-my Cristo rehewa nhe'ẽ.

2

Itagwasu óga pytahoha-rami oiko Hesu Cristo gwe'yi kwéry-pe imombaraete hagwā

¹ Upéa-rehe tapejejoko katu opamba'e ivai va'e-gwi. Anive pende py'a vai pende a'e e'ŷ-vy ojóehe. Pejohayhu katu. Anive ave peporombotavy. Anhetegwa tee va'e mate pemombe'u va'erā. Anive ave pende juru mymýi rei ojóehe. Anive ave peipotapa rei tei. Ne mba'e ererekva'e-rehe anho katu evy'a. Anive ave penhe'ẽ vai ojóehe. Opa mba'e ivai va'e-gwi tapejejoko kena.

²⁻⁵ Pejohu porā nipo ra'e Nhandejáry py'a porāha. Pende poriahuvareko meme-gwi pejohu porā-ma ra'e. Aipo ramo pene kyre'ŷ katu peikwaa porāve rāve hagwā hesegwa nhe'ẽ. Mitā ikambuhéi va'e-rami peẽ ave peheka heka katu pene arandurā. Kamby porā tee-rehe okakwaa mitā. Peẽ ave Nhandejáry nhe'ẽ pehendu porā ramo pene arandu porāve rāve va'erā pende rekoha porā reheve peiko hagwā.*

Penhemogwī katu Hesu Cristo-gwi. Ha'e pene moingove va'e. Pene moise pa'i ramo nde py'a potī marangatu reheve ereme'ẽ meme hagwā íxupe hemimbota imboete-vy. Yma gware pa'i reko-rupi ndereikói va'erā. Ijukapyre hemime'ēgwe rekoria, nde reko porā teeha reheve enheme'ẽ katu íxupe imboete-vy. Penhemogwī katu Hesu Cristo-gwi pembovy'a hagwā Nhandejáry-pe imboete-vy. Heta oĩ íxupe omboete e'ŷ va'e. "Ijapu" he'i mo'ā hese. Nhandejáry ae oiporavo va'ekwe íxupe omomba'egwasu tee hagwā. Pejogweroaty ramo hese pene mombaraete tee va'erā peiko porā hagwā.

Nhane mandu'a óga itagwigwa-rehe. Itagwasu omopu'ã óga pytahoha-ramo. Opa hagwā ete-ma hi'ári omoi mixive va'e ita. Upéixa ave Nhandejáry re'yi. Itagwasu óga pytahoha-rami oiko Hesu Cristo gwe'yi kwéry-pe imombaraete hagwā. Penhemogwī katu Hesu Cristo-gwi pene mombaraete hagwā.

⁶ Upéa-rehe Nhandejáry nhe'ẽ kwtia-rehe oĩ va'e he'i Hesu Cristo-rehe: "Xe re'yi kwéry ruvixarā ambou-ta tetā Sião-py" he'i. "Itagwasu-rami, óga jepytaohaha-rami imba'egwasu ete-ta. Ha'e katu aiporavo va'ekwe íxupe. Xe rakate'ŷ hese. Upe xe rembiporavo-rehe ojerovia va'e nonhemotiry va'erā."*

he'i Nhandejáry nhe'ẽ kwtia-rehe oĩ va'e.

⁷ Ha peẽ katu pejerovia-ma araka'e Hesu Cristo-rehe. Pehayhu-ma araka'e íxupe. Pejohu porā tee íxupe. Oĩ jepe kente kwéry hese ndojeroviái va'e. Upe va'e-rehe Nhandejáry nhe'ẽ kwtia-rehe oĩ va'e he'i ave: "Ndovaléi upe ita, he'i óga omopu'ã va'e imboyke-vy. Ha ojohu vai jepe, upe ita óga pytahoha ramo oiporu. Óga pytahoha voi upe ita".*

he'i Nhandejáry nhe'ẽ kwtia-rehe oĩ va'e.

⁸ "Ndovaléi voi pe ita he'i va'e onhepysanga hese. Oporoity va'e upe va'e ita"** he'i ave Nhandejáry nhe'ẽ kwtia-rehe oĩ va'e. Upéixa voi Hesu Cristo oiko va'erā kente kwéry-pe. Onhe'ẽ renduse e'ŷ va'e-pe oity uka-ta ogwereko asy-ta. Tenonde-rupi Nhandejáry hekorā oikwaa va'ekwe-rami, ha'e kwéry nahi'arandu porāiry ay okwa-vy.

⁹ Peẽ ae katu Nhandejáry re'yi tee ramo peiko-ma. Ha'e pende pe'a-ma va'ekwe ojéupe gwarā. Ondive gwarā voi pende pe'a-ma pende py'a potī

* 2:2-5 Sl 34.8 * 2:6 Is 28.16 * 2:7 Sl 118.22 * 2:8 Is 8.14-15

reheve peiko hagwā. Ha'e mburuvixagwasu tee yváy-py ha pende pe'a-ma pende rerekō hagwā pa'i heko marangatu va'e ramo. Upéixa peiko heko porā teeha rehewa nhe'ẽ pemosarambi rambi hagwā, íxupe pemboete meme hagwā. Yma va'ekwe pytū-rupi oiko va'e-rami rei peiko va'ekwe. Ndapeikwaái va'ekwe mba'eve Nhandejáry-rehe. Ha'e ae pene mo'arandu-ma ójehē pene mbojerovia uka hagwā. Ko'ángā hesakā va'e-rupima peiko-ma pemombe'u mbe'u hagwā mba'éixa Nhandejáry ojapo porā meme peē-my.*

¹⁰ Yma va'ekwe ndapeikói Nhandejáry re'ýi ramo. Ko'ángā katu he'ýi ramo-ma peiko. Yma va'ekwe ndapeikwaái Nhandejáry pende poriahu-verekoseha. Ko'ángā ae peikwaa-ma. Pende poriahuvereko voi-ma peiko-ma hagwā he'ýi ramo.*

Tupā Nhandejáry-rehe pejerovia-gwi pehendu katu mburuvixa ko yvy pygwa nhe'ẽ ave

¹¹ Xe re'ýi kwéry pene mandu'a kena kóa-rehe: Yvy akéno-py oiko va'e-rami jaiko ko yvy pype. Nhandejáry re'ýi tee-gwi jaiko a-py sapy'a rei va'e-rami. Upéa-rehe anive pejapo pene rembiapose rei. Upéa nhamoĩ ramo nhane renonderā-py nhande py'a-py onhondive onhorairõseha-rami voi jaiko. Anive katu pemondo teĩ pende resa pene mbojejavu ukase va'e-rehe rei. Nhandejáry remimbota-rehe mate pene mandu'a pejapo hagwā.

¹² Nhandejáry reroviaha e'ý va'e pa'ü-my peime-ma. Ha'e kwéry onhe'ẽ vai vai para'e pende-rehe. Upe jave jepe tapeiko porā meme katu. Upéixa ramo pende-rehe ha-py pende rexaha kwéry omomba'egwasu va'erā Nhandejáry-pe upe ou jevyha áry-py.*

¹³ Nhandejáry-rehe pejerovia-gwi pehendu katu mburuvixa ko yvy pygwa nhe'ẽ ave ipogwy-py peiko hagwā. Upéixa ramo pende reko porā-rehe pemboete arā Nhandejáry-pe. Heta oĩ mburuvixa kwéry ko yvy pype. Mburuvixagwasu oĩ omandapa va'e ko yvy arigwa-rehe. Tapejapo katu inhe'ẽ.

¹⁴ Hembiporavokwe oĩ jevy mburuvixarā mixīve va'e. Tapejapo ave inhe'ẽ. Tetā tetā-my ombou uka íxupe kwéry oikwaa uka hagwā upe pygwa rembiapo-rehe. Hembiaipo vai va'e-pe katu ombohosa asy va'erā. Hembiaipo porā va'e-pe ogwereko porā va'erā. Mburuvixagwasu nhe'ẽ-py ou va'ekwe. Pejapo katu inhe'ẽ.

¹⁵ Nhandejáry oipota pene rembiapo porā meme. Upéixa ramo inhe'ẽ-rupi ndoikoséi va'e kwéry ndojohúi arā pende-rehe onhe'ẽ rei hagwā.

¹⁶ Peē katu peteĩ teĩ ndejehénte eremba'apo va'e. Upéixa jepe tapeiko porā katu. Ani pejapo vai teĩ. Tapenheme'ẽ Nhandejáry rembigwairā ae.

¹⁷ Peteĩxa perekō enterove-pe pemboete-vy. Hesu Cristo reroviaha-pe pehayhu katu. Nhandejáry-pe inhe'ẽ pejapo katu pemboete-vy. Mburuvix-agwasu yvy pygwa va'e-pe pemboete ave.*

*Cristo rekoha eiporu katu
(Lc 6.22-23; Hb 12.2-3; 1 Pe 3.14)*

¹⁸ Peē tembigwái ramo peiko va'e tapeiko katu pene mba'ejáry nhe'ẽ-rupi. Tapemboete katu íxupe. Peteĩxa taperekō pene mba'ejáry. Oĩ pene mba'ejáry hekoha porāve va'e, heko kirirí reheve pende rerekō va'e. Oĩ ave pene mba'ejáry pende rerekō asy va'e. Peteĩxa katu taperekō íxupe kwéry. Pemba'apo porā meme katu íxupe.

¹⁹ Nhane mbohosa asy ramo jepe nhane mba'ejáry tanhamba'apo porā joty katu íxupe. Taja'e katu "Nhandejáry xe kwaa porā-ma. Íxupe amboete hagwā

* ^{2:9} Ex 19.5-6; Dt 7.6; 14.2; Ap 1.6; 5.10 * ^{2:10} Os 1.10; 2.23; Rm 9.25 * ^{2:12} 1 Ts 5.15 * ^{2:17} Rm 13.1-7; Tt 3.1; Hb 13.17

amba'apo porā-ta xe járy-pe" taja'e katu nhamba'apo-vy. Upéixa jajapo ramo Nhandejáry nhande rexakwaa rei va'erā, nhane rembiapo porā-rehe nhande rovasa va'erā.

²⁰ Ne rembiapo vai ramo ae nde járy-pe, ne rembiapo vai-rehe ne nupā va'erā nde rerekō asy ave arā. "Xe rerekō asy ramo jepe xe nupā ramo jepe xe ndajehepýi joty íxugwi. Kirírī-vy areko íxupe. Upéa-rehe xe py'a porā" ani upéixa erenhembotavy teī. Ne rembiapo vai-rehe voi ne nupā kuri. Ne'írā voi nde py'a porā. Ne rembiapo vai eterei voi ereiko-vy. Iporāve ne rembiapo porā meme íxupe. Upéixa ereiko porā porā ramo jepe ne nupā ramo, nde rerekō asy ramo, erovy'a joty. Ani erejehepy teī. Ekirirī katu íxugwi. Upéixa ereiko porā ramo erembovy'a va'erā Nhandejáry-pe. Ha'e nde rovasa joty va'erā nde rexakwaa rei-vy.

²¹ Pende rekoha porā hagwā pende pe'a va'ekwe gwe'yirā Nhandejáry. Cristo ave ohasa asy va'ekwe peē kwéry-rehe ha-py. Upe va'e-rehe ohexā uka peē-my mba'eixa pa peiko hagwā pehasa asy javē. Ha'e ohasa asy ramo jepe ndojehepýiry joty va'ekwe. Ha'e oiko hagwe-rami ave tapeiko katu.

²² Ndojejavýi voi va'ekwe Cristo. Ijapu e'ŷ va'e voi ha'e. Oporombotavy e'ŷ va'e voi Cristo. Upéixa oiko teī va'ekwe ha ombohasa asy joty va'ekwe íxupe.*

²³ Onhe'ẽ vai vai ramo jepe va'ekwe hese hekoha porā-gwi ha'e nonhe'ẽ vaíry joty va'ekwe. Ogweroko asy ramo jepe va'ekwe íxupe "Ajehepy arā" nde'íry joty ombohasa asyhare-rehe. Nhandejáry po-py onhemoi "Nhandejáry nhande kwaa porā va'e. Nhande reko johu kwaa va'e. Aha'arō ha'e xe repy hagwā" he'i Cristo ójehe.

²⁴ Okurusugwasu-rehe omano ramo va'ekwe Cristo ogweraha-ma ójehe nhane rembiapo vai. Nhande reko vaikwe-gwi nhane mopotī hagwā ha'e omano. Upéa ojapo va'ekwe omano va'ekwe vérami ndajajejavývēi-ma jaiko hagwā. Nhandejáry omoingove jevy va'ekwe vérami nhande kwéry jaiko hagwā nhande py'a potī rehēve. Ha'e ojekutu va'ekwe nhane mbogwera hagwā.

²⁵ Peē peiko va'ekwe ovexa okanhy va'e-rami, pende raperā okanhy pendéhegwi va'e-rami. Nhandejáry ae ovexa rerekwa porā-rami pende reka reka-ma va'ekwe pende reru jevy hagwā oha-py. Ko'ánga peiko jevy-ma indive. Ha'e nhande py'a-rehe onhangareko va'e. Nhande rerekō porāha ave ha'e.*

3

Omenda va'e kwéry pegwarā nhe'ẽ (1 Co 7; Ef 5.22-25; Cl 3.18-19)

¹ Upéixa ave tembireko kwéry tapeiko katu peteī teī pene ména nhe'ẽ-rupi. Nhandejáry nhe'ẽ-rupi ndoikói ramo jepe, ejapo katu ne ména nhe'ẽ erembojerovia uka hagwā íxupe Nhandejáry-rehe. Neremombe'úi ramo jepe íxupe Nhandejáry nhe'ẽ, inhe'ẽ nohenduséi ramo jepe oikwaa va'erā nde reko porāha-rehe nde-rehe. Ojeroviase ave va'erā ha'e ave Nhandejáry-rehe.

² "Xe rembireko heko porā voi va'e. Nhandejáry-rehe ojerovia-magwi nipo ogwereko-ma gwekoha porā ra'e" he'i arā nde-rehe nde reko kwaa-vy. "Xe aroviase ave Nhandejáry-pe" he'i va'erā ohexā kwaa-gwi nde rekoha porā-rehe.

³ Ha peē katu kunha kwéry, niperāi pejehexa uka porā rei pene nhemondeha-rehe pejekyvu porā-rehe rei, pende ao hepyve va'e-rehe rei, pende po'y porā-rehe rei ave niperāi pejehexa uka porā rei upéixa.

* 2:22 Is 53.9; 2 Co 5.21 * 2:25 Is 53.5-6

⁴ Iporāve pende py'apy porāha pehexa uka. Pende reko kirirī-rehe pende py'agwapy rehevē pehexa uka pende rekoha porā teeha opa e'ŷ va'e. Nhandejáry-pe upéa ovale voi.

⁵ Yma gware kunhagwe amyrī ipy'a potī va'e kwéry upéixa oiko va'ekwe. Nhandejáry-rehe ojerovia-gwi oiko va'ekwe oména nhe'ẽ-rupi.

⁶ Upéixa voi Sara amyrī ojapo Abraão amyrī nhe'ẽ. "Xe járy xe rerekoha" he'i oména-pe. Ipogwy-py voi oiko va'ekwe. Sara amyrī rekockwe-rami ãy pende reko porā katu. "Osy rekockwe-rami hekoha porā" he'i arā pende-rehe Sara membyre-rami voi peiko-gwi. Tapene rembiapo porā meme katu. Pende kyhyje e'ŷ rehevē tapende reko porā. Pende kyhyje e'ŷ rehevē pene ména nhe'ẽ tapejapo Nhandejáry-pe pemboete-vy.*

⁷ Peē katu kwimba'e kwéry, peteī teī perekō porā katu pene rembireko-pe. Kunha ko ikangyve kwimba'e-gwi. Ani perekō asy teī pene rembireko kwéry-pe. Peteī teī pemboete katu pene rembireko-pe. Ndaha'ei kwimba'e-pe anho ome'ẽ va'erā hekoverā Nhandejáry. Kunha pegwarā ave ome'ẽ hekoverā. Upéa-rehe nde sy eremboeteha-rami, terereko katu ne rembireko-pe Nhandejáry ojeapysaka hagwā ne nhe'ẽ-rehe. Upéixa ramo nerembojeupi reíry arā ne nhe'ẽ íxupe.

*Jajoporiahuvereko rei katu jajohayhu porā-vy
(Rm 12.16-21; Fp 1.27-30; 1 Ts 5.14-15; 1 Pe 2.12)*

⁸ Xe ha'e-ta ave enterove-pe taperekō katu peteī py'a onhondive. Pejoporiahuvereko rei katu pejohayhu porā-vy. Outro kwéry-pe tapemboeteve katu pendejéhegwi.

⁹ Ojapo vai ramo jepe nde-vy ani erembojovái teī íxupe. Onhe'ẽ vai ramo nde-vy ani ave erembojovái íxupe. Tapembojeupi katu Nhandejáry-pe pene nhe'ẽ ohovasa porā hagwā upe va'e-pe. Upéixa erejapo hagwā Nhandejáry pende pe'a-ma gwe'yirā ramo. Upéixa erejapo ramo ha'e nde rovasa porā va'erā.

¹⁰ Upe va'e rehewa oī Davi amyrī porahéi-py kwaitia-rehe oī va'e:
"Ko vvy-rehe ereiko jave nde reko porā rehevē erevy'ase para'e ereiko-vy.

Aipo ramo kóixa ae eiko: Ejoko ne nhe'ẽ hatā. Eipe'a ndejéhegwi ne nhe'ẽ vaiha. Ani teī ne nhe'ẽ rei rei ereiko-vy. Ani ave nde apu rei rei teī.

¹¹ Ejoko ave ndejéhegwi ne rembiapo vaiseha. Ne rembiapo porārā ae katu ejapo. Nde py'agwapy porā rehevē eiko nde rapixa kwéry ndive.

¹² Nhandejáry ko orepara ipy'a porā va'e-rehe. Ojéupe ojerure ramo ohendu arā inhe'ẽ. Ipy'a vai va'e ae ombojeupi ramo onhe'ẽ Nhandejáry-pe nohendúi va'e-rami arā inhe'ẽ** he'i Nhandejáry nhe'ẽ oī va'e.

¹³ Tapeiko porā katu. Peiko porā meme ramo ndaipóri arā para'e pene mbohasa asyse va'erā.

¹⁴ Ha sapy'a pende reko porāha-gwi pene mbohasa asy ramo, Nhandejáry pene mbovy'a jevy joty va'erā. Ani joty pende kyhyje avave-gwi. Pene mbohasa asyse ramo jepe ani joty pejepy'apy teī pendéjehe.

¹⁵ Penhembojáry katu Cristo-rehe, pende py'a gwive pejerovia tee katu hese. Peime meme katu pende jeroviah-rehe pemombe'u hagwā: "Ma'erā-gwi erejerovia Cristo-rehe?" he'i va'e oporandu ramo nde-vy nde rapixa, nde reko kirirī rehevē emombe'u porā íxupe.*

¹⁶ Mbegwe katu porā emombe'u íxupe imboete-vy. Nde py'a porā rehevē emombe'u íxupe. Nde py'a potī-gwi ojekwaa arā nde-rehe nde rekoha porā.

* 3:6 Gn 18.12 * 3:12 Sl 34.12-16 * 3:15 Is 8.12-13; Mt 5.10

Cristo-rehe pejerovia-gwi peiko porā meme ramo onhemotī arā pendéhegwi pende-rehe onhe'ē vai vai rei va'ekwe.

¹⁷ Oĩ hembiapo vaikwe-rehe ohasa asy va'erā. Oĩ ave hembiapo porāgwe-rehe ohasa asy ave va'erā. Peẽ katu Nhandejáry remimbota ramo pehasa asy hagwā iporāve pene rembiapo porāgwe-rehe mate pehasa asy.

¹⁸ Cristo ave ohasa asy va'ekwe. Hembiapo apo porā jepe ohasa asy joty va'ekwe. Nhane rembiapo vai-rehe nhande repy eterei-gwi omano tee va'ekwe. Opy'a potī reheve gwī ipy'a ky'a va'e-rehe ojejuka uka va'ekwe. Nhande reraha hagwā Nhandejáry ha-py upéixa ha'e oiko nhande-rehe va'ekwe. Omano rire opu'ā jevy oho-vy. Gwekove marangatu-rupi onhemoingove jevy va'ekwe.*

¹⁹ Preso oĩ va'e-rami va'e-py ogwahē oho-vy va'ekwe omano va'ekwe nhe'ēgwe rendaty-py ojéhegwa nhe'ē omombe'u ogwahē oho-vy.

²⁰ Ha'e kwéry omano e'ŷ mboyve ndoikói va'ekwe Nhandejáry nhe'ē-rupi. Yma va'ekwe Noé amyrī ojapo jave va'ekwe okanoagwasu omombe'u íxupe kwéry Nhandejáry nhe'ē. Ha nohenduséiry voi hikwái. Hi'are voi Noé amyrī ojapopa hagwā okanoagwasu. Ha Nhandejáry oha'arō arō joty inhe'ē nohenduséi va'e kwéry-pe. Nohenduséiry ramo jepe inhe'ē, nohundi pya'éiry joty íxupe kwéry. Oito mate oike va'ekwe kanoagwasu-py nonhehundíry. Kanoagwasu-py oikepa-ma va'ekwe Nhandejáry onhangareko joty hese. Y-gwi ogweroresende va'ekwe heraha-vy íxupe.*

²¹ Onheresende rei va'ekwe Noé amyrī Nhandejáry nhe'ē reroviaha-gwi. Nhane mongarai hagwā-rehe upéa omombe'u-ma nhande-vy. Nhane apymī y-py nhane mongarai-vy. Ndaha'éiry nhane mbojahu-vy. Ndoipe'airy nhande ky'akwe nhandéhegwi. Nhane momandu'a mate Hesu Cristo-rehe nhane mongarai-vy. Hese jajerovia-gwi nhanhemongarai uka jahexa uka hagwā nhande py'a omopotī-ma nhane resende-vy Nhandejáry. Oikove jevy-ma Hesu Cristo. Upéi omano va'ekwe pa'ū-gwi Cristo omopu'ā jevy va'ekwe.

²² Upe rire ojeupi jevy oho-vy yváy-py. Nhandejáry akatúa-koty oĩ. Ipu'aka entéro va'e-rehe. Ipu'aka va'e gwive oiko ipogwy-py. Nhandejáry rembigwái kwéry oiko ipogwy-py. Entéro mburuvixa jahexa e'ŷ va'e gwive, ndokoséi mo'ā va'e gwive, oiko joty ipogwy-py.

4

Penhemoirū katu Cristo-rehe pejejavyse hagwe pehejapa hagwā (Ef 4.17-32; Cl 3.1-11)

¹ Pene mandu'a kena Cristo-rehe. Yvy-rupi oiko jave ombohasa asy ranhe va'ekwe íxupe imoingo-vy upe rire ojuka uka hagwā. Upéixa ramo peẽ ave tapenhembopy'agwasu kena pehasa asy hagwā. "Ipy'a porā reheve Cristo ohasa asy va'ekwe" tapeje katu. "Xe ave ahasa asy va'erā. Upe ramo ha'e-rami xe py'a porā reheve aikose." Aipo-rami katu tapeje pendejéupe. Jahasa asy rire ndajajejavyséi-ma Cristo nhamoirū teese-gwi.

² Upéa-gwi ãy peve anive pejapo pejapose rei va'e. Nhandejáry remimbota ae mate tapejapo.

³ Yma araka'e pene rembiapo vai meme araka'e Nhandejáry-rehe ojerovia e'ŷ va'e-rami. Teko rei-rupi peiko araka'e mba'e vai-pe pehayhu araka'e peiko-vy. Karugwasu-py, oka'u hagwā renda-py ave peho meme araka'e. Peka'u rei araka'e peiko-vy. Pende rekoha vai eterei-gwi Tupā Nhandejáry e'ŷ rei-pe pemboete meme peiko-vy ave araka'e.

* **3:18** Rm 5.6-8; 2 Co 5.19-21 * **3:20** Gn 6.1-7.24

⁴ Ha ãy katu peẽ nipo napemoirũvéi-ma ra'e upéixa oiko va'e-pe. Pene irũvykwe ojohu vaipa-ma pende reko pyahu ra'e. Ndaipy'a horyvéi-ma voi ra'e pene ndive. Onhe'ẽ vai vai ave pende-rehe. Ndapeikovéi indive-gwi ndovy'avéi voi okwa-vy.

⁵ Ogwahé va'erã hi'óra onhemombe'u hagwã gwembiapokwe-rehe Nhandejáry-pe. Ha'e ojohu kwaa voi enterove rembiapokwe-rehe, oikove vyteri va'e rembiapokwe-rehe ave ojohu kwaa voi hese. Hembiaapo vai va'ekwe-pe ombohasa asy va'erã.

⁶ Upéa-rehe omano va'ekwe-pe ave omombe'u-ma Hesu Cristo rehewa nhe'ẽ. Kente meme-gwi ojohu-ma íxupe kwéry omano hagwã. Nhandejáry ae oikove va'e. Ha'e kwéry oikove ave hagwã oíkwaa ukapa-ma Hesu rehewa nhe'ẽ íxupe kwéry. Omoingove jevy ave íxupe kwéry inhe'ẽgwe kwéry. Ha'e kwéry ave oiporu hagwã oikove va'e reko.

⁷ Ko yvy sapy'a opa-tama. Nhane arandu porã mani katu. Nhande py'agwapy rehewe, nhande reko kirirõ rehewe ave nhaha'arõ katu jaikovy Nhandejáry-pe. Nhanhomoneta meme katu hendive. Nhamoĩ ae katu nhane renonde-py.

⁸ Ha tajajohayhu rei katu jaiko-vy. Jajohayhu porã ramo mba'eve vai ndajajohúi arã ojóehe. Nhane rembihayhu ojapo vai ramo jepe tajahayhu rei katu íxupe.

⁹ Tanhamogwahé porã katu jahayhu-vy nhane mbohupa-pe. Ndaikatúi nhande juru mym̄yi rei hexa-vy. Nhande py'a gwive ae nhande rory arã nhane mbohupa rexa-vy.

¹⁰ Penhopytygwõ porã kena. Nhandejáry remimoarandu peẽ kwéry pende ae ae pejapo kwaa va'e pejapo hagwã. Penhopytygwõ jepe pende ae ae joty pene rembiapo pejapo. Nhandejáry rembigwái porã va'e-rami upéixa penhopytygwõ katu peiko-vy.

¹¹ Peẽ, Nhandejáry pene moarandu-gwi pemosarambi kwaa inhe'ẽ va'e, tapemombe'u mbe'u porã katu inhe'ẽgwe. Peẽ, peporopytygwõ kwaa va'e, Nhandejáry pene mombaraete pehexa uka porã hagwã entéro va'e-pe kente pytygwõha voi peiko hagwã. Hesu Cristo nhe'ẽ-rupi nhande py'a rory ete-gwi opamba'e jajapo va'e tajajapo nhamboete ete hagwã Nhandejáry-pe. Ipu'aka tee, imomba'egwasuha ave opa e'ŷ va'e. Nhane remimboete voi. Nhandejáry tee voi ha'e. Amém.*

*Ani joty nhati tei jahasa asy ramo Cristo-rehe jajerovia-gwi
(Mt 24.9; Jo 16.1-4; Fp 1.29; 2 Ts 1.4-5; 1 Pe 3.14; 1 Jo 3.13)*

¹² Ani nde kyhyje tei, xe rembihayhu kwéry. Nde rerekoy asy ramo jepe ani nde kyhyje tei. "Ma'erã-gwi" ndaja'ei nhandéjehe. Jaiko asy ramo jepe ojekwaa joty nhande rekoha. Tata-py nhamoĩ ramo nhane mba'e ndahyku reíry ramo, "Imbaraete voi ra'e tata-py" ja'e arã hese. Upéixa ete imbaraete ave nhande rekoha. Ani nde kyhyje tei.

¹³ Pehasa asy ramo jepe taperovy'a katu. Hesu Cristo ohasa asy va'ekwe. Ha'e-rami peẽ ave pehasa asy peiko-vy. Upéixa ramo ha'e ojehexa uka ramo omba'egwasuha peẽ ave pevy'a va'erã. Upéa-rehe ãy peve erehasa asy ramo jepe, erovy'a katu.

¹⁴ Cristo-rehe pejerovia-gwi inhe'ẽgwasu rei va'e ndojejokói va'erã onhe'ẽ rei-vy peẽ-my. Upéixa ramo taperovy'a joty kuri hekoha. Oĩ pende py'apy-py Nhandejáry Nhe'ẽ Marangatu tee va'e opu'akaha rehewe pene mombaraete pene mbovy'a hagwã.

* **4:11** Rm 12.6-8; 1 Co 12.8-10; Ef 4.7-12

¹⁵ Ani pene rembiapo vai teĩ pene mbohasa asy uka hagwã. Petĩ kena pene rembiapo naporã va'e pejapo hagwã. Ani peporojuka teĩ. Ani pemonda teĩ. Pende reko porã e'ŷ reheve ani ave peiko. Pejoko katu pene nhe'ẽ. Petĩ kena pehasa asy hagwã upéa pene rembiapo vaikwe-rehe.

¹⁶ Hesu-rehe pejerovia-gwi ae pene mbohasa asy ramo ani joty kuri petĩ peiko-vy. Iporâve pemomba'egwasu Nhandejáry-pe. "Hesu Cristo re'yi voi ko xe. Natã mo'ãi ahasa asy ramo hese ha-py" peje katu kuri Hesu-pe pemboete-vy.

¹⁷ Ogwahẽ-ma Nhandejáry áry ogwereko asy hagwã enterove-pe hembiapokwe-rehe. Onhypyrũ-ma ojohu-vy gwe'yi kwéry-rehe ranhe. Túvrami nhande rerekko asy nhane rembiapo vai-rehe. Ndoheja reíry nhane rembiapo vaikwe nhande-vy. Áy upéixa nhande rerekko-ma. Ou va'erã hi'óra gwe'yi e'ŷ rekoke-rehe ogwereko hagwã. Hesu rehewa nhe'ẽ porã nohenduséi hagwe-rehe ndoheja rei mo'ãi íxupe kwéry. Ombohasa asy ete-ta voi íxupe kwéry.

¹⁸ Inhe'ẽ kwatia-rehe oĩ va'e he'i:
"Nhande reko porã ramo jepe hasy peve jahupity arã jaha-vy Nhandejáry oikoha. Ha hekoha vai va'e katu nogwahẽi arã voi oho-vy Nhandejáry oikoha-py"*

he'i Nhandejáry nhe'ẽ kwatia-rehe oĩ va'e.

¹⁹ Upéixa-gwi Nhandejáry remimbota-rupi pehasa asy ramo penheme'ẽ jevy katu íxupe peiko porã-vy. Gwemimombe'ukwe ojapo meme Nhandejáry nhane moingoha. Onhangareko porã pende-rehe ha'e oiko-vy. Pehasa asy jave, pene rembiapo porã reheve pemondo mondo katu pende resa hese.

5

Cristo reroviahä kwéry rerekwa pegwarã nhe'ẽ

¹ Xe ko aiko-ma Cristo reroviahä kwéry rerekwa ramo. Xe ahexa voi va'ekwe ohasa asy ramo Cristo. Ha'e ojehexa uka ramo ombo'egwasuha, xe amoirũ jevy va'erã íxupe. Heroviahä rerekwa ramo voi aiko-ma xe. Ha ahaise ko kwatia nhe'ẽ xe rapixa kwéry-pe, Cristo reroviahä rerekwa kwéry-pe.*

² Hymba kwéry rerekwa porã-rami penhangareko porã katu Cristo reroviahä kwéry-rehe. Ani perovy'a e'ŷ reheve penhangareko hese kwéry. Pende py'a porã reheve perekko íxupe kwéry. Ani ave pene rembiapo repy-rehe pemondo teĩ pende resa. Pene kyre'ŷ rei katu peipytygwõ hagwã pene reminhangareko kwéry-pe. Upéixa ramo Nhandejáry remimbota-rupi peiko va'erã.

³ Ani pemanda rei teĩ ave íxupe kwéry. Peiko porã meme katu pejapoharami ojapo jevy hagwã ha'e kwéry ave.

⁴ Nhande Rerekoha tee ou jevy ramo nhande rexakwaa rei-ma va'erã. Upe-ma ramo ome'ẽ-ta peẽ-my onhemomba'egwasu va'e pegwarã opa e'ŷ va'e. Upéa mate amombe'use Cristo reroviahä ruvixa kwéry-pe.

Pedro onhemonhe'ẽ Cristo reroviahä kwéry-pe

⁵ Peẽ ipyahuve va'e kwéry-pe ha'e-ta ko va'e. Nde ru-rami, nde sy-rami pehendu pendéhegwi itujave va'e nhe'ẽ.

Ha enterovéa-pe ha'e-ta ani penhembotuvixavese teĩ. Penhopytygwõ ae arã penhembotuvixa e'ŷ-vy. Jaikwaa-ma Nhandejáry nhe'ẽ:
"Nhandejáry ombojevy va'erã onhembotuvixase va'e-pe. Ha onhemomirívive va'e-pe ae ohexakwaa rei va'erã Nhandejáry"

* **4:18** Pv 11.31 * **5:1** Mt 20.25-26; Mc 9.35; Lc 14.10-11; 18.9-14; Jo 13.12-15; Fp 2.3-8; Tg 4.6-7

he'i Nhandejáry nhe'ẽ kwatia-rehe oĩ va'e.

⁶ Upéa-rehe penheme'ẽ Nhandejáry pogwy-py pene py'amirĩ reheve. Ha'e imbaraete ete nhane pytygwō hagwā. Hi'óra-py ha'e nhane mboete uka va'erã.

⁷ Pende py'apy-py pejepy'apyse ramo pembojeupi ae pene nhe'ẽ Nhandejáry-pe. Nhane mbopy'agwapy meme voi ha'e nhane pytygwō-vy.

⁸ Opáy va'e-rami ae katu peiko. Penhangareko porã porã katu pendéjehe. Nhande-rehe ija'e'ỹ va'e anhaygwasu nhande reity vaiseha voi. Jagwarete onhe'ẽ nhe'ẽ gwemi'urã ohekaha-rami voi anhaygwasu nhande reka.

⁹ Tapenhemombarae te ae katu anhaygwasu-pe pejoko hagwā pendejéhegwi. Cristo-rehe pejerovia-gwi pene mbarae te katu anháy-pe. Pene mandu'a ave nhande re'ýi kwéry, Cristo reroviaha kwéry-rehe. Opa ko yvy-rupi oiko va'e ha'e kwéry ave peẽ-rami ave ohasa asy.

¹⁰ Sapy'a ete mate pehasa asy va'erã. Nhandejáry ae pene moingo va'erã gweko-rupi. Ha'e nhande pe'a va'ekwe nhane moingo hagwā peteixa Cristo Hesu ndive. Opa e'ỹ reheve enterove omomba'egwasu ramo Cristo Hesupe peteixa nhamořru arã íxupe. Upe va'e-rehe nhane mombaraete nhane mboheko porã ojéupe nhane mbojere e'ỹ-vy ojéhegwi.

¹¹ "Ha'e imburuvixagwasu ete va'e opa e'ỹ peve" ja'e hese nhamoř peteixa nhe'ẽ.

Pedro omboapy-ta okwatia nhe'ẽ

¹² Silvano xe pytygwō ahai hagwā kuri ko kwatia. Ha'e nhande re'ýi. Ojerovia tee va'e Cristo-rehe. Ohai-ma xe nhe'ẽ peẽ-my gwarã. Ndaipukúi ko kwatia nhe'ẽ. Anhemonhe'ẽ hagwā peẽ-my pene kyre'ỹ hagwā amombe'u peẽ-my anhetegwa nhe'ẽ. Nhandejáry nhande rexakwaa rei rehewa amombe'u peẽ-my. Tapene mbarae te katu pejere e'ỹ-vy inhe'ẽ-gwi.

¹³ Babilônia tetã mygwa Cristo reroviaha kwéry onhomboaty aty va'e omondo-ta omandu'aha peẽ-my. Peẽ-rami íxupe kwéry ave Nhandejáry oipe'a va'ekwe gwe'yirã. Marcos xe ra'y-rami oiko va'e omondo-ta ave peẽ-my omandu'aha.

¹⁴ Peẽ pejotopa ramo pejohayhu-gwi pejohovaetũ katu Cristo réry-py. Hese pejerovia-gwi tapene mbopy'agwapy meme katu Nhandejáry pende rovasavy.

Pedro remimombe'ukwe 2

segunda epístola de Pedro

Pedro omondo jevy kwatia nhe'ẽ mokõiha Hesu reroviahá kwéry táva ambue mbue-py oyvy e'ŷ e'ŷ-rupi okwa va'e pegwarã.

¹ Xe Simão Pedro Hesu Cristo rembigwái voi, hemimondo va'e voi xe. Ahaita kwatia-rehe xe nhe'ẽ peẽ-my gwarã. Hesu Cristo Nhandejáry voi. Ha'e nhande resendeha voi. Ha'e gweko marangatu ete-rupi nhane mbopy'a potĩ-ma. Ore va'ekwe orojerovia-ma hese. Ha peẽ ave pejerovia-ma voi ave araka'e hese. Peteĩ teĩ jajerovia-ma hese-gwi gweko potĩ tee-rupi nhane mbopy'a potĩ-ma.

² Tapende rexakwaa rei katu Nhandejáry. Tapene mbopy'agwapy katu ave. Tapeikwaa porãve rãve katu Tupã Nhandejáry-pe, Nhandejáry Hesu Cristo-pe ave. Upéa-gwi pende rexakwaa porãve rãve va'erã pene mbopy'agwapy tee hagwã.

Nhande rekoha porãrã nhamono'õ no'õ va'e rehewa nhe'ẽ

³ Ombo'egwasuha-rupi, opy'a porã tee-ha-rupi nhande pe'a-ma va'ekwe Nhandejáry. Jajerovia-ma Hesu-rehe. Upéa-gwi ipu'aka-rupi opamba'e nhane remikotevẽ ome'ẽ nhande-vy jaiko porã hagwã heko marangatu-rupi. Ndaipóri mba'eve jareko e'ŷ ha'e-rami ave jaiko porã hagwã.

⁴ “Xe remime'ẽgwe porã-rupi pende reko porã va'erã teko rei-rupi ndapeikovéi-ma hagwã, pejapose va'e rei ndaipu'akavéi-ma hagwã pende-rehe” he'i va'ekwe Nhandejáry nhande-vy. He'i hagwe-rami ojapo va'erã jaheko arupity hagwã Cristo reko jejavy e'ŷ porã-pe.

⁵ Upéa-gwi pemondo mondo meme katu pende resa pende reko porãrã-rehe.

Amombe'u-ta peẽ-my pemono'õ no'õ hagwã pende rekoha porãrã, Nhandejáry remime'ẽgwe porã-rupi hemimbota-rami peiko hagwã. Pejerovia tee katu Hesu-rehe. Upe rire katu peiko katu pene rembiapo porãve rãve reheve. Upe pejapo kwaa rire Nhandejáry nhe'ẽ kwatia-rehe oĩ va'e peikwaa porãve rãve rei katu peikwaa porã tee rei hagwã hemimbota.

⁶ Upéi ha'e oipotaha-rami pene arandu porã-ma reheve peiko-ma ramo, penhemombaraete tee uka katu íxupe. Ou ramo jepe pende-rehe hembiapo vai va'e, ani joty kuri penhe'ẽ asy íxupe. Ndaikatúiry pembohovái íxupe. Hesu rape-rupi ae katu peiko. Ha hape-rupi pejere e'ŷ va'e peiko-ma rire pemondo mundo meme katu hese pende resa.

⁷ Upéixa peiko kwaa-ma ramo perohory rei katu pende rapixa kwéry-pe peiko-vy, pejohayhupa rei katu Hesu reroviahá kwéry ndive pende re'yí tee-rami.

⁸ Upéixa ramo, pende rekoha porãve rãve va'erã peho-vy. Upéixa peiko ramo, ndapeiko reíry va'erã. Nhandejáry Hesu Cristo-pe peikwaa tee-gwi, pene rembiapo porãve rãve arã peho-vy.

⁹ Ha upéixa ndereikói ramo, neremono'õ no'õi ramo nde rekoha porãve rãverã, nane arandu porãi ereiko-vy. Hesa piruvã va'e-rami rei ereiko. Haimete voi nande resapysóiry ereiko-vy. Yma araka'e ne rembiapo vaikwe omboyke-ma araka'e ndéhegwí Nhandejáry. Upéa eremokanhy rei-ma araka'e ndejéhegwí. Nande reko porãve rãvéi-gwi “Xe mbopy'a porã-ma Nhandejáry” nderevéi nipo ra'e ndejéupe ereiko-vy. Ne arandurágwe eremokanhymba-ma nipo ra'e.

¹⁰ Upéixa-gwi ha'e-ta peẽ-my, xe re'yi kwéry, Hesu reroviaha va'e, Nhandejáry nhande poravo va'ekwe nhande pe'a ave va'ekwe gwe'yirã. Gwe'yi kwéry tee-pe omboheko porã uka-ma Nhandejáry. Upéixa-gwi pende resa pemondo katu pende reko porãverã-rehe. "Nhandejáry xe pe'a-ma voi araka'e heko-rami ave xe aiko hagwã" peje hagwã katu pene mandu'a meme-vy hese. Upéixa peiko ramo ndapejeréi va'erã íxugwi.

¹¹ Nde rekoha porã meme-ma ramo "Eju katu xe renda-py" he'i arã nde-vy Nhandejáry Hesu Cristo. Ha'e nhande resende va'e. Opyta-ta mburuvixag-wasu ramo opa e'ŷ hagwã-rehe. Upe-ma ramo "Eju katu xe aiko ha-py" he'i arã ne renói-vy erejere e'ŷ-gwi íxugwi.

¹² Upe anhetegwa nhe'ẽ perovia-ma araka'e. Áy peve napemokanhýi pendejéhegwi. Ipogwy-py pene rembiapo porã meme peiko-vy. Úpéa aikwaa jepe apomomandu'a ndu'a xe remimombe'ukwe-rehe ponove pende resarái íxugwi.

¹³ Upéa-rehe anhemonhe'ẽ jevy-ta peẽ-my. Tapeiko porã katu Nhandejáry nhe'ẽ apo-vy. Aikove kove reheve anhe'ẽ nhe'ẽ arã peẽ-my pono okanhy pendéhegwi xe remimombe'u. Amboypy-tama peẽ-my nhe'ẽ.

¹⁴ Ndaiko puku mo'ávéi-ma pene ndive. Nhandejáry Hesu Cristo oikwaa uka-ma xe-vy amano hagwã. Ndaxe arevái-tama pene ndive aiko-vy.

¹⁵ Upéixa-gwi amano e'ŷ ngatu pende reko porãrã-rehe amombe'u-ma peẽ-my. Anive pemokanhýi xe remimombe'ukwe. Amano ramo jepe pene mandu'a joty xe remimboypykwe-rehe.

*"Nhandejáry ombotuvixa mba'e tee joty-ma ramo Hesu-pe ore orohexa-ma va'ekwe" he'i Pedro
(Mt 17.1-5; Mc 9.2-9; Lc 9.28-36)*

¹⁶ "Ipu'aka teeha reheve ogwejy jevy-ta Nhandejáry Hesu Cristo" oromombe'u meme peẽ-my. Ndaha'éiry voi-ma ore ore akã-gwi rei oromombe'u. Anhetegwa voi ore nhe'ẽ. Ore katu orohexa-ma va'ekwe imba'egwasu teeha.

¹⁷ Oromoírũ jave Hesu-pe Nhandejáry Nhande Ru yváy-gwi onhe'ẽ ombotee tee joty íxupe ombotuvixa mba'e tee joty íxupe va'ekwe. Nhandejáry Tupãgwasu va'e ha'e anho onhembotuvixa mba'e tee va'e. Ha ombotuvixa mba'e tee joty Hesu-pe. Yváy-gwi he'i va'ekwe ore-vy: "Upe va'e xe ra'y tee voi" he'i. "Ahayhu tee voi íxupe. Xe mbovy'a tee voi va'e Hesu" he'i.

¹⁸ Yváy-gwi he'i va'ekwe onhe'ẽ ramo ore-vy. Hesu-pe oromoírũ jave yvyatyrusu ári Nhandejáry onheandu uka ore-vy yváy-gwi. Orahendu-ma upéa inhe'ẽ.

¹⁹ Upe va'e e'ŷ mboyve orogwerovia-ma va'ekwe Nhandejáry nhe'ẽ kwatia-rehe oĩ va'e. Imombe'uhaty myamyrí kwéry remimombe'u voi araka'e. Orahendu-ma ramo Nhandejáry nhe'ẽ yváy-gwi ou ore-vy va'e ae "Anhetegwa voi ra'e Nhandejáry nhe'ẽ kwatia-rehe oĩ va'e" oro'e-ma hese. "Yma gware inhe'ẽ mombe'uhaty inhe'ẽ tee voi omombe'u araka'e" oro'e joty orogwerovia tee-vy. Upéixa-gwi ha'e-ta peẽ-my: Iporã voi pene mandu'a ndu'a ramo Nhandejáry nhe'ẽ-py omombe'u mbe'u va'etygwe remimombe'ukwe-rehe perovia porãve hagwã. Inhe'ẽ tataendy-rami nhande resape pytûgwy-rupi jaiko va'e-pe. Tataendy-rami Nhandejáry nhe'ẽ pytû-rupi oiko va'e-rami jaiko jave, nhande resapeha voi ha'e. Iporã katu pemoi meme pene renonde-py upe nhe'ẽ. Pytû jave, ko'ẽ reruha jasytata-pe nhaha'arõ. Ohesapeve va'erã nhaha'arõ. Upéixa ko'ẽ reruha-pe oha'arõ va'e-rami peẽ ave peha'arõ katu Hesu-pe peiko-vy. Ou va'erã pende py'a resape-vy. Ani katu pemokanhý tei pende py'apy-gwi kwatia-rehe oĩ va'e Nhandejáry nhe'ẽ.

²⁰ Pehendu ramo pene mandu'a porã katu kóa-rehe: Ndaha'éi nhane akã-gwi rei nhahendu kwaa hagwã Nhandejáry nhe'ë kwatia-rehe oĩ va'e.

²¹ Ndaha'éi ave oakã-gwi rei omombe'u va'ekwe nhane renonderã rehewga nhe'ë Nhandejáry nhe'ë-py omombe'u va'ety amyrí kwéry. Nhandejáry Nhe'ë Marangatu tee va'e ae omoarandu íxupe kwéry. Ipogwy-py omombe'u inhe'ë.

2

"Tupã Nhandejáry nhe'ë amombe'u" he'i mo'ã ójehe va'e kwéry rehewga nhe'ë (Jd 3-16)

¹ Yma ete oiko ave va'ekwe myamyrí pa'ũ-my "Tupã Nhandejáry nhe'ë amombe'u" he'i mo'ã va'ekwe ójehe va'e kwéry. Æy katu ou jevy va'erã ha'e ramigwa. Ojéhegwi rei omombe'u va'erã Nhandejáry rekoha rehewga nhe'ë ra'anga anga nhande-vy nhane mbotavyse-vy rei. Ani perovia teĩ kuri inhe'ë. Ndoikói Nhandejáry pogwy-py. Upéa-rehe pya'e onhehundipa va'erã hikwái. Omano hagwã jepe ndokwaáiry. Pya'e Nhandejáry omondo-ta íxupe kwéry ohasa asy hagwã-py. Nhandejáry Hesu Cristo ojejuka uka okurusugwasu-rehe va'ekwe omboyke hagwã nhandéhegwi nhane rembiapo vaikwe. Inhe'ë ra'anga anga omombe'uhaty kwéry-rehe ave ojejuka uka va'ekwe Hesu. Upéa ha'e kwéry oikwaa jepe ndojeroviái joty hese. Ndoikói ipogwy-py.

² Otĩ kwaa e'ý reheve rei oiko hikwái. Inhe'ë reroviaha kwéry oipe'a-ma va'erã ave íxugwi kwéry gwekoha vairã. Upe-ma ramo oĩ va'erã heko vai rexahare nohendusevéi-ma va'erã Nhandejáry nhe'ë tee. "Hekoha vai voi nipo ra'e Hesu Cristo-rehe ojerovia va'e ra'e" he'i arã omopavëmba-vy íxupe kwéry. Hesu Cristo rehewga nhe'ë tee nohenduséi arã hexahare.

³ Pende plata oipota eterei-gwi ojéupe gwarã omombe'u va'erã gwí ijapu va'e. Ojéhegwi rei omombe'u va'erã Nhandejáry nhe'ë ra'anga anga rei, hetave tave iplatarã henduháry ome'ë hagwã íxupe inhe'ë porã ra'anga-rehe. Nhandejáry katu ipy'a vaiha hese yma-ma voi oikwaa. Osapymi e'ý va'e Nhandejáry. Nokanhýi íxugwi tekoha vai. Ohundipa hagwã voi íxupe kwéry ogwereco.

⁴ Yma ete Nhandejáry ndoheja reíry voi va'ekwe gwí gwembigwái yváy pygwa hembiapo vai va'e. Hembiapo vaikwe-rehe oity íxupe kwéry imbohasa asy hagwã-py. Pytú-my rei oiko-ma isã-rehe onhapytí-ma hereko-vy. Ha oha'arõ joty upé áry Nhandejáry renonde-py enterove va'e ombojogweroaty hagwã peteĩ teĩ-pe ogwereco hagwã hembiapokwe pokwe-rehe.

⁵ Yma gware hembiapo vaikwe va'e kwéry-pe ave ohundipa va'ekwe Nhandejáry. Hekoha vai rehe-ma voi ohundipa va'ekwe. Tuvixa omongy va'ekwe Nhandejáry. Ymbovu hagwã voi omongy va'ekwe. Ha ohundipa-ma íxupe kwéry. Noé amyrí-pe ae katu nohundíry va'ekwe. Noé amyrí onhemonhe'ë meme araka'e hekoha vai va'e kwéry-pe: "Perova katu pende rekoha" he'i porã voi araka'e myamyrí kwéry-pe araka'e. "Nhandejáry-rehe pepena katu" he'i onhemonhe'ë-vy íxupe kwéry. Upéa-rehe oresende íxupe Nhandejáry. Sete he'ýi kwéry reheve oresende íxupe kwéry. Inhe'ë rendu e'ýhare-pe katu ohundipa araka'e Nhandejáry.*

⁶ Yma gware Sodoma tetã mygwa kwéry-pe ave ohundipa araka'e Nhandejáry, Gomorra tetã mygwa-pe ave. Upe mokõi tetã mygwa hóga kwéry reheve ohapypa ohundi-vy. Hembiapo vai eterei-rehe ohundipa íxupe kwéry. Upéa-rupi ohexa ukase nhande-vy mba'eixagwa ogwereco asy arã hekoha vai va'e-pe.*

* 2:5 Gn 6.1-7.24 * 2:6 Gn 19.24

⁷ Yma va'ekwe oiko ipy'a porā va'e Ló amyrī. Íxupe anho oresende va'ekwe Nhandejáry hembiapo vai eterei va'e pa'ū-gwi. Ipy'a porā reheve Ló ojepy'apy voi Sodoma pygwa kwéry rekoha vai vai-rehe, otī kwaa e'ŷ reheve okwa va'e-rehe ave. Upe pygwa rekoha kwéry ombovy'are'ŷ íxupe.*

⁸ Hekoha porā jepe tekoha rei-rupi okwa va'e pa'ū-my oiko araka'e Ló amyrī. Ivy'are'ŷ reheve Ló oiko hekoha vai va'e ndive. Ohexa hexa hembiapo vai. Ohendu hendl hembiapo vai, nhe'ẽ vai rendu-vy ave ndovy'avéi-ma hembiapo vai eterei oikwaa-ma. Upéa-rehe Nhandejáry mate oresende joty íxupe, Ló-pe. He'ýi kwéry ohundipa ramo jepe Ló anho mate oresende.

⁹ Upéixa voi Nhandejáry. Áy ave ójehe ojerovia tee va'e-pe oresende va'erā. Ha'e kwéry ohasa asy ramo jepe onhangareko porā joty hese kwéry. Oresende va'erā ojéupe ohayhu va'e-pe. Hekoha vai va'e-pe ae katu ombohasa asy voi va'erā Nhandejáry. Henonde-py enterove ojogweroatyha áry-py omondo va'erā hekoha vai va'e kwéry-pe ombohasa asy hagwā-py.

¹⁰ Upe áry-py ombohasa asyve va'erā gwī ivaive va'e-pe. Ojapose va'e ojapo teko vai-rupi oiko-vy va'ekwe-pe Nhandejáry pogwy-py ndoikoséi va'ekwe-pe ave ombohasa asy ivaive va'erā.

Ha'e-ta voi katu peē-my heko vai mbo'eha kwéry otī e'ŷ reheve onhembopy'agwasu rei. Nohendúiry ave mburuvixa kwéry nhe'ẽ. Onhe'ẽ rei rei ave Nhandejáry rembigwái yváy pygwa-rehe.

¹¹ Upe jave jepe Nhandejáry rembigwái yváy pygwa katu nomombe'u jevyí hesegwa nhe'ẽ Nhandejáry-pe. Okirirī porā opyta. Ohendu rei ojehegwā nhe'ẽ rei. Nhandejáry nhe'ẽ ra'anga mombe'uhaty-gwi imbaraeteve voi hikwái. Ipu'akave ave íxugwi. Upe jave jepe, nonhembotuvixáiry onhe'ẽ rei hagwā hese kwéry. "Ijapu voi upe va'e" nde'íry Nhandejáry-pe. "Upe va'e kwéry ohekombo'e vai ne nhe'ẽ mo'ã omombe'u-vy" nde'íry omombe'u jevy hagwā Nhandejáry-pe.

¹² Nhandejáry nhe'ẽ ra'anga rei omombe'u va'e kwéry ae onhe'ẽ rei rei ambue kwéry-rehe. Gwembigwaa e'ŷ-rehe onhembohory oiko-vy. Onhe'ẽ vai rei hese. Ojapose va'e rei ojapo ave. Mymba ka'agwy rupigwa rekoharami oiko upe va'e kwéry. Pene mandu'a kena mymba ka'agwy rupigwa-rehe. Teko rei-rupi oiko. Opamba'e apo-vy rei oiko mymba ka'agwy rupigwa. Nahi'arandúi-gwi nhanhapytī va'erā, jajuka va'erā. Upéixa ete ave heko vai mbo'eha kwéry oiko. Mymba reko-rami rei ave oiko. Itavy voi. Itavy-rehe ohundi-ta voi íxupe kwéry Nhandejáry.

¹³ Ha'e kwéry onhombohasa asy uka oiko-vy ambue kwéry-pe. Upéa-rehe ha'e kwéry ave ohasa asy ave va'erā. Onhembopy'a vai hagwe-rehe ohasa asy va'erā oiko-vy. Áry-rupi rei ogwerohory gwembiaapo ky'a gwekoha vai rexu uka-vy. Penhomboaty ha-py jepe, Hesu-rehe pene mandu'a hagwā pe'u mbojape ramo jepe notívéi-ma. Onhembohory-vy rei Hesu-rehe jepe ho'u joty mbojape pene pa'ū-my. Notívéi-ma. Hesu reroviah-a-rami mo'ã voi oiko pene pa'ū-my pene mbotavy-vy.

¹⁴ Itavy rei rei kunha-rehe ombopopa reise voi kunha oiko-vy. Gwembiaapo vairā nomokanhy mo'ãi ojéhegwī. Otantea tea gwī heko kangy rei va'e-pe ombotavy hagwā. Gwekotevē e'ŷ va'e oipota eterei. Hetave tave ojéupe gwarā-rehe mante imandu'a ndu'a oiko-vy. Nhandejáry ae katu he'i-ma hese "Ambohasa asy-ta íxupe kwéry" he'i-ma voi hese.

¹⁵ Ha'e kwéry omokanhy-ma ojéhegwī anhetegwa nhe'ẽ. Nhandejáry rape porā-gwi ojere-ma. Balaão amyrī rekoharami voi heko. Beor amyrī ra'y Balaão amyrī. Oplatarā-rehe hembiapo vai va'ekwe Balaão amyrī.

* 2:7 Gn 19.16

¹⁶ Nhandejáry ae ojoko uka íxugwi. Hymba mburika omonhe'ẽ uka íxupe ojoko hagwã hembiapo vai va'e-gwi. "Ejapo katu Nhandejáry remimbota" he'i mburika ojáry-pe. Oiporu ojáry nhe'ẽ íxupe onhemonhe'ẽ-vy. Balaão amyrí Nhandejáry nhe'ẽ-py omombe'u va'ety jepe inhe'ẽ-rupi ndoikói joty va'ekwe. Upe javé hymba mburika ae onhemonhe'ẽ íxupe. Balaão amyrí-rami ãygwa Nhandejáry nhe'ẽ ra'anga rei mombe'uhaty. Opirapirerâ-rehe ae omombe'u heko vairã rei.*

¹⁷ Yrypagwe ndovaleiha-rami Nhandejáry nhe'ẽ ra'anga rei mombe'uhaty ndovaléi ave. Araigwepa rei ndovaléi va'e-rami ave hikwái. Araigwepa rei ramo yvytu rei ohasa rei oho-vy oky e'ŷ hagwã. Upe araigwepa va'e-rami voi hikwái. Pytû tee-py ohasa asy hagwã-py hikwái henagwã onhongatu-ma íxupe gwarã.

¹⁸ Onhembotuvixa mo'ã Nhandejáry nhe'ẽ ra'anga anga omombe'u-vy. Hesu-rehe ojeroviase va'e-pe, Nhandejáry-rehe ne'irã oikwaa porã va'e-pe ave ha'e kwéry omombe'u a'ã a'ã oiko-vy. "Teko rei-rupi nanhatíry rehevé jajapose va'e jajapo ramo mba'eve ndojapó arã nhande-vy Nhandejáry" he'i rei. "Nhane mbovy'ase voi" he'i rei hikwái. "Hemimbota ome'ëse gwe'ýi kwéry-pe Nhandejáry. Upéixa-gwi jajapose va'e iporã voi jajapo" omombe'u rei. Gweko ky'aha ae omoporâse mo'ã-gwi omombe'u joavy avy rei Nhandejáry rehewa nhe'ẽ. Ombyai ukase-vy ae gwenduhare-pe. Anhete teegwa ne'irã oikwaa va'e ombotavy hagwã pono oiko Hesu rape porã-rupi.

¹⁹ "Avave pogwy-py voi ndajapytái va'erã voi. Nhande ae peteñ teñ nhande reko járy va'erã" he'i mo'ã omombe'u rei ijapu-vy. Ha'e kwéry ae ogwereko gwembiaapo vaikwe gweko járy ramo. Ha'e-ta peë-my nhande reko járy pogwy-py nhanhemoñ ramo ipu'aka voi nhande-rehe. "Xe ae xe reko járy voi" ja'e rei arã voi nhandéjehe. Nanhande pu'akavéi-ma va'erã voi nhandéjehe.

²⁰ Ha'e kwéry ojerovia-ma araka'e Nhandejáry Hesu Cristo-rehe. Upéixa-gwi omboyke-ma íxugwi hembiapo vaikwe. Nhandejáry ombopy'a porã-ma va'ekwe íxupe kwéry. Ñygwa hekoha vai va'e pa'ü-gwi ogwenohë-ma va'ekwe íxupe kwéry Nhandejáry. Upe rire, ipy'a porã-ma rire, Nhandejáry remimbota oikwaa-ma jepe, ojere jevy joty hekoha vai-rupi oiko jevy hagwã. Hekoha vaive ive-ma oho. Hekoha vaikwe-gwi hekoha vaive ive rei oho-vy.

²¹ Nhandejáry nhe'ẽ oikwaa e'ŷ javé omano ramo ohasa asy va'erã. Hese ojerovia-ma va'e, Hesu Cristo rape oipyhy-ma va'ekwe oikwaa-ma rire Nhandejáry nhe'ẽ tee ojere jevy ramo ohasa asy asyve va'erã voi.

²² Anhete ja'e mymba-rehe "Jagwa ogwe'ẽ rire ogwe'ëgwe ho'u jevy. Kure katu, erembojahu rire onhemboapajeréi jevy iky'a va'e-py". Upéixa ete voi upe Nhandejáry rape-gwi ojere jevy va'e. Gweko vaikwe-rupi jevy ho'a jevy arã onhemongy'a jevy hagwã oiko-vy.

3

Mba'éixa po oiko arã Hesu Cristo ou jevy hagwã óra-py

¹ Yma va'ekwe amondo-ma peteñ kwatia peë-my gwarã. Ñy katu amoñ jevy-ta xe nhe'ẽ kwatia-rehe peë-my gwarã. Xe rembihayhu kwéry, Hesu reroviaha, penhemongeta porã porã katu anhetegwa-rehe mate, mba'e porã tee-rehe. Pono Hesu Cristo rehewa nhe'ẽ okanhy rei pendéhegwí ahai jevy-ta peë-my. Ha'e ogwejy jevytaha ou-vy peikwaa-ma voi ra'e pehendu va'ekwe-gwi. Ñy amombe'u jevy-ta upéa rehewa nhe'ẽ.

² Yma gware, Nhandejáry nhe'ẽ-py omombe'u va'ety amyrí kwéry ohai va'ekwe Hesu ou jevy-ma hagwã-rehe. Upe myamyrí heko marangatu va'e

* ^{2:16} Nm 22.4-35

kwéry remimombe'ukwe-rehe iporã voi pene mandu'a ndu'a peiko-vy. Ây katu Nhandejáry Nhane Resendeha ombou jevy peẽ-my onhe'ẽ mombe'uha. Hesu Cristo remimondo kwéry ou-ma anhetegwa omombe'u-vy. Pehendu porã katu ore Hesu remimondo va'e nhe'ẽ pene mandu'a hagwã hese.

³ Pejeapysaka porã xe nhe'ẽ-rehe. Hesu ogwahẽ-tama óra-py ou arã pende ha-py pene mbotavyse va'e rei. Gweko vai-rupi oiko va'e onhembohory va'erã Hesu ou jevy hagwã-rehe.

⁴ “Aju jevy-ta, he'i ra'anga rei nipo ra'e Hesu” he'i arã onhembohory-vy Hesu-rehe. “Ndou mo'ãvéi-ma Hesu” he'i arã peẽ-my. “Mamo tipo oĩ?” oporandu va'erã. “Omano-ma nhane ramói amyrí kwéry Hesu reroviaha, ha ndoúi joty” he'i rei arã peẽ-my. “Ko yvy oiko vyteri. Yma araka'e Nhandejáry omoingo yvy hi'ári gwarã ave omoingo araka'e. Onhepyrũha gwive oiko joty” he'i va'erã onhembohory-vy. Hesu ou jevy hagwã-rehe onhembohory va'erã.

⁵ Omokanhy-ma nipo ojéhegwí ra'e gwí Nhandejáry rembiapokwe. Yma, yma ete onhe'ẽ rei-py Nhandejáry omoingo áry, yvy ave. Y rei-gwi jepe ojapo yvy. Y mbyte-gwi ombojekwaa uka va'ekwe yvy.

⁶ Upe rire hi'are jevy rire ohundipa yvy. Nhandejáry omongy tuvixa ombovu hagwã y ohundipa hagwã-ma yvy-pe.

⁷ Aygwa áry, yvy ave Nhandejáry nhe'ẽ-py voi oiko joty. Oĩ arã hi'óra ohundipa jevy hagwã. Tata-py omokanhy ngatu-ma va'erã áry, yvy reheve. Nhandejáry renonde-py enterove ojogweroaty va'erã ha'e ogwerekohagwã peteĩ teĩ-pe hembiapokwe pokwe-rehe. Upe áry-py hekoha vai va'e kwéry omondo va'erã imbohosa asy hagwã renda-py. Ohapy va'erã ave yváy yvy reheve. Upéa nhe'ẽ ojéhegwí rei para'e omokanhy hikwái. Onhembohory rei hese.

⁸ Xe rembihayhu kwéry, Hesu reroviaha, pejeapysaka katu ko xe nhe'ẽ-rehe. “Hi'are eterei Hesu. Inhate'ỹ para'e ou jevy hagwã” ani peje teĩ Hesu-rehe. Ojepy'a moneta ramo Nhandejáry ndaha'éiry nhanhemongetaharami. Nhande-vy áry pya'e ohasa. Ha Nhandejáry-pe katu are eterei vérami oĩ áry. Mil ro'y vérami ojehasa íxugwi. Ha, nhande-vy hi'are voi mil ro'y. Nhandejáry-pe ae nda aréi joty. Peteĩ áry vérami oiko íxupe. Pya'e voi ojehasa íxugwi.

⁹ Upéa-rehe nhane mandu'a ramo “Nomokanhýi onhe'ẽ Nhandejáry. Aju jevy-ta, he'i va'ekwe-rehe imandu'a ndu'a ho'áry-py ou hagwã” ja'e kwaa va'erã hese.

Oĩ he'i rei va'e: “Inhate'ỹ eterei-gwi ra'e ndoúi Hesu” he'i rei hese. Inhate'ỹ e'ỹ va'e voi Hesu. Ndogwereko asy pya'éiry kente kwéry-pe. Upéixa-gwi hi'are ou jevy hagwã. Avave-pe nohundiséi. Oha'arõ arõ hetave tave ójehe ojerovia hagwã.

¹⁰ Avave ndoikwaaíry igwahẽ hagwã áry. Omonda va'e ogwahẽ hagwã óra-rami ou va'erã Hesu. Mba'e járy oha'arõ e'ÿha-py sapy'a ou omonda va'erã. Upéixa ave avave ndoikwaaí ogwahẽ jevy hagwã Nhandejáry Hesu Cristo óra.

Ogwahẽ jevy javé áry opa-ma va'erã yvy. Hyapu-ma ave arã áry okái-vy. Hykupa va'erã yvy ave. Ohapypa-ma va'erã. Ko yvy ári okwa va'e gwive kente kwéry e'ÿ ngatu hykupa-ma va'erã.*

¹¹ Upéixa okaipa va'erã hykupa va'erã áry, yvy ave. Ohundi-ma va'erã áry, yvy ave.

Upéa jaikwaa-gwi tajaiko porã katu nhande py'a marangatu ipotí reheve. Ani pene rembiapo vai teĩ ha'arõ-vy. Pende resa pemondo mondo katu Nhandejáry-rehe ipogwy-py peiko porã hagwã.

* ^{3:10} Mt 24.43-44; Lc 21.25-27; 1 Ts 5.2-4; 2 Pe 3.7

¹² Peha'arõ arõ katu ou hagwã Nhandejáry áry. Pene rembiapo porãrã pejapo meme hagwã-rehe pene mandu'a katu pya'eve ou hagwã hi'áry. Ou ramo pe áry, áry ohundi-ma va'erã tata-py. Yvy ave ohundi-ma va'erã tata-py. Hykupa va'erã tata rendy-py.

¹³ “Áry ipyahu va'e amoingo-ta” he'i va'ekwe Nhandejáry. “Ahekoviatarõ-ta áry. Yvy ave amboopyahu-ta” he'i va'ekwe ave Nhandejáry. Inhe'ẽ-py nhamondo nhande resa áry ohekoviatarõ hagwã-rehe, yvy ohekoviatarõ hagwã-rehe ave. Upe-py ndaipóri va'erã ivai va'e. Imarangatu ete-ma va'erã upe pygwa. Nhaha'arõ nhane py'a potĩ reheve upe-py jaiko hagwã. Upe áry-rehe nhaha'arõ arõ jaiko-vy.*

¹⁴ Upéa-rehe ha'e jevy-ta peẽ-my, xe rembihayhu kwéry, Hesu reroviaha va'e: Pende py'a potĩ potíve hagwã peho katu. Ha'e ogwahẽ jevy ramo pene rembiapo vai e'ỹ reheve pende py'agwapy reheve pende topa hagwã Nhandejáry.

¹⁵ No'ã-rami tapeje katu pende py'a-py peha'arõ-vy: “Nhande poriahuvareko reheve Nhandejáry onhangareko nhande-rehe. Nohundi ukaséiry avave-pe. Oipota enterove ojerovia ójehe. Upéa-rehe oha'arõ arõ oiko-vy hetave tave kente ojerovia hagwã ójehe.”

Upe va'e xe remimombe'u-rami Paulo remimombe'u ave. Nhande ryke'y-rami jahayhu Paulo-pe. Nhandejáry omo'arandu porã va'ekwe íxupe ojehewa nhe'ẽ-rehe. Ko xe nhe'ẽ ramigwa Paulo ave ohai va'ekwe peẽ-my peha'arõ porã hagwã Hesu-pe peiko-vy.

¹⁶ Kwatia ojapo meme-ma Paulo. Upe-py ohai meme Hesu ou jevytamaharehe. Oĩ inhe'ẽ jaikwaa porã va'e. Oĩ ave inhe'ẽ hasy peve jaikwaa porã joty va'e. Gwĩ Hesu reroviaha tape porã-gwi ojerese va'e inhe'ẽ oikwaa ku'a ku'a va'e ave nohendu kwaái Paulo remimombe'u hasy va'e. Ohendu porã hagwã-rami teĩ voi Paulo remimombe'ukwe, ha nohendu kwaái porã joty. Upéixa ha'e kwéry ohendu ku'a ku'a meme Nhandejáry nhe'ẽ kwatia-rehe oĩ va'e. Ha ohendu ku'a ku'a va'ekwe omombe'u jevy ojóupe Nhandejáry nhe'ẽ ra'anga. Inhe'ẽ nohendu kwaái-gwi ha'e kwéry voi ojerereko asy uka hagwã-py onhemondo uka va'erã.

¹⁷ Xe rembihayhu kwéry anhemonhe'ẽ jevy peẽ-my. Peikwaa-ma Nhandejáry nhe'ẽ mombe'u a'ã va'e ou va'erã. Ani kena pehendu inhe'ẽ. Anhetegwa nhe'ẽ mate pehendu. Hesu-rehe pejerovia-ma va'ekwe. Anive anhetegwa e'ỹ nhe'ẽ perovia teĩ. Hesu katu omboýke-ma pendéhegwi peteĩ teĩ-gwi pene rembiapo vaikwe. Gweko vai reheve omombe'u ramo Hesu nhe'ẽ ra'anga ani joty kuri perovia inhe'ẽ. Xáke, pejejokóke omombe'u ku'a ku'a va'e-gwi. Pende py'a ndive penhemongeta porã joty inhe'ẽ-rehe pono penhembotavy. Pende rekoha porãha-gwi ani perova pende reko.

¹⁸ Nhandejáry Hesu Cristo nhande rexakwaa porã rei-ma. Tapeikwaa porãve rãve katu íxupe pende rexakwaa porãve rãve hagwã. Hesu Nhandejáry voi. Ha'e nhane Resendeha voi. Tonhemomba'egwasu katu Nhandejáry Hesu Cristo-pe. Ko'ãy opa e'ỹ reheve tomomba'egwasu meme kena Hesu-pe.

* ^{3:13} Is 65.17; 66.22; Ap 21.1

João remimombe'ukwe 1

primeira epístola de João

*Nhane moingoveha rehewa nhe'ẽ
(Jn 1.1)*

¹ Hesu reroviahā peẽ. Xe João amondo-ta peẽ-my xe nhe'ẽ. Kwatia-rehe amoĩ-ta Hesu Cristo rehewa nhe'ẽ. Ha'e ko opamba'e rerekō kwaaha. Nhane moingoveha voi. Ko yvy nhépyrū e'ŷ vyteri ramo oiko-ma va'ekwe. Upéi orohendu va'ekwe inhe'ẽ. Ore resa-rupi voi orohexā-ma va'ekwe íxupe. Oromā'ẽ-ma hese oroiko-vy. Ore po-rupima oroipyhy pyhy va'ekwe íxupe orogwerekō-vy.

² Ojekwaa porã ramo, orohexā-ma va'ekwe. Upéa-gwi oronhe'ẽ hese oromombe'u-vy peẽ-my. Ha'e nhane moingove va'ety voi Nhandejáry ndive jaiko memete hagwā. Nhandejáry ndive oiko-ma va'ekwe. Upéi ojehexā uka-ma va'ekwe ore-vy.

³ Oromombe'u ore rembiexagwe, ore remiendukwe oromombe'u ave peẽ-my jajogwerekō hagwā peteīxa. Ore ko oromoirū peteīxa Nhande Ru. Ta'ýry Hesu Cristo oromoirū ave. Upéixa ete oroiptā peteīxa jajogwerekō.

⁴ Upe va'e nhe'ẽ oromoĩ ave kwatia-rehe javy'apa rei hagwā.

Nhandejáry nhande resapeha voi

⁵ Oromombe'u jevy-ta peẽ-my ore-vy Cristo remimombe'ukwe. Nhandejáry nhande resapeha voi. Pytū e'ŷ va'e ha'e.*

⁶ Pytū-my rei jaiko ramo, "Xe amoirū íxupe peteīxa" ja'e ramo mo'ã, nhande apu nhandéjehe. Ja'e va'e ndajajapói voi.*

⁷ Ha arakatu-py jaiko ramo katu, Nhandejáry rekoha-rami jaiko. Nhanhomoirū-ma voi peteīxa jaiko-vy. Nhande py'a omopotū-ma oiko-vy Nhandejáry ta'ýry Hesu gwugwy avyte-py omano-gwi. Nhane rembiapo vaikwe gwive omopotū nhandéhegwi.

⁸ Ha "Xe ajejavy e'ŷ va'e" ja'e ramo katu, jajerovia mo'ã nhandéjehe. Anhetegwa e'ŷ va'e nhande.

⁹ Ha nhamombe'u ramo katu Nhandejáry-pe nhane rembiapo vaikwe-rehe nhanhemboasyha, oipe'a va'erā nhandéhegwi nhane rembiapo vaikwe. Omopotūmba va'erā nhande py'a jajejavv rire. Inhe'ẽ ojavy e'ŷ va'e Nhandejáry. Hembiapo porã meme va'e. Oporombotavy e'ŷ va'e.

¹⁰ Ha "Ajejavy e'ŷ va'e xe" ja'e ramo, "Ijapu-ma" ja'e ave Nhandejáry-rehe. Nhande py'apy-py ndoikói voi inhe'ẽ.*

2

*Hesu Cristo oĩ nhane pytygwōharā
(Jo 14.15,21; 1 Tm 2.5; Hb 4.14-16; 9.11-15; 1 Jo 5.3)*

¹ Ko va'e nhe'ẽ amondo-ta peẽ-my kwatia-rehe, xe ra'y kwéry, pejejavv e'ŷ hagwā peiko-vy. Ha jajejavv ramo katu, nhamombe'u ramo Nhande Ru-pe nhane rembiapo vaikwe-rehe nhanhemboasyha, Hesu Cristo oĩ nhane pytygwōharā. Ha'e ojavy e'ŷ va'e.

* ^{1:5} Jo 1.4-5; 3.19-21; 8.12; 12.35-36 * ^{1:6} Ef 5.8; 1 Ts 5.5; 1 Jo 2.9-11 * ^{1:10} Lc 18.9-14

² Ha'e ojejuka va'ekwe-gwi omboyke nhandéhegwi Nhandejáry nhane rembiapo vai va'ekwe. Enterovéa rembiapo vai va'ekwe ave omboyke. Nhande-rehe ha-py ojejuka-gwi nanhande rerekó asy asyvéi-ma nhane rembiapo vaikwe-rehe.

³ Nhandejáry remimanda nhahendu ramo, jaheko kwaa íxupe. "Jaheko kwaa ave íxupe" ja'e ramo, nanhande apúiry nhandéjehe.

⁴ Ha "Xe aheko kwaa íxupe" oī he'i rei va'e ójehe. Ha Nhandejáry remimanda nohenduséi voi. Upe va'e Nhandejáry omanda va'e rendu e'ŷ va'e, ijapu ójehe. Opy'a-py ndogwerekói anhetegwa nhe'ẽ.

⁵ Ha inhe'ẽ renduha katu ohayhu tee voi Nhandejáry-pe. Upéixa voi, "Amoirū íxupe peteīxa" ja'e ramo, anhetegwa voi ja'e nhandéjehe. Nanhande apuiha jaikwaa nhandéjehe.

⁶ "Peteīxa xe amoirū íxupe" he'i va'e gwive, toiko katu Hesu Cristo reko-rupi.

Ame'ẽ jevy-ta peẽ-my pene rembiaporã

⁷ Amondo jevy-ta peẽ-my, xe rembiayhu va'e, pene rembiaporã. Ndaha'ei pene rembiapo pyahurã. Are-ma peiko-ma ramo Hesu rerviaha ramo, omombe'u va'ekwe peẽ-my pene rembiaporã. Ndaipyahúi voi xe amombe'u va'erã peẽ-my.

⁸ Ha ko'ângâ katu amombe'u jevy-ta peẽ-my Cristo remimombe'u pyahu va'e. "Pejohayhu katu" he'i nhande-rehe va'ekwe. Upéixa ojekwaa ramo pende-rehe pejohayhuha, Cristo pende rayhuha pende-rehe ojekwaa ramo ave. "Anhetegwa ra'e Hesu remimombe'u" he'i arã pende-rehe. Upéixa pytû-my rei oiko va'e-pe nhande resape tee va'e omo'arandu-ma imoingo-vy.

⁹ "Arakatu-py aiko" oī he'i rei ójehe va'e. Ha gwe'yi-rehe ndaija'ei va'e gwive katu, ijapu ójehe. Ko'ângâ ete peve pytû-my rei joto oiko.

¹⁰ Ha ojohayhu porã rei va'e katu, arakatu-py tee meme-ma oiko. Ndaipóri ipysangaha imbojejavý uka hagwã.

¹¹ Ha gwe'yi-rehe ndaija'ei va'e katu pytû rupigwa voi. Pytû-my rei vyteri oiko va'e. Hesa pytûmby tûmby rei va'e. Pytû va'e ojopía hesa. Upéa-gwi kikoty rei po oho-ta ndoikwaái.*

¹² Ha'e-ta peẽ-my xe mitã kwéry, Hesu-rehe pejerovia va'e-pe. Cristo réry-py omboyke-ma Nhandejáry pene rembiapo vaikwe. Cristo-rehe omboyke-ma pendéhegwi. Upéa-gwi amondo-ta peẽ-my xe kватia nhe'ẽ.

¹³ Xe ru kwéry, peikwaa voi upéva'e ko yvy nhepyrû e'ŷ ngatu oiko-ma voi araka'e. Peikwaa voi íxupe. Upéa-gwi amondo-ta peẽ-my xe kватia nhe'ẽ. Xe ryvy kwéry, pemosê-ma anháy ruvixa pemondo-vy. Ndapehejavéi-ma peikovy anháy ipu'aka pendéjehe. Upéa-gwi amondo-ta peẽ-my xe kватia nhe'ẽ.

¹⁴ Xe ra'y kwéry, peheko kwaamagwi Nhande Ru-pe, amondo-ta peẽ-my xe kватia nhe'ẽ. Xe ru kwéry, peikwaa voi upéva'e ko yvy nhepyrû e'ŷ ngatu oiko-ma voi araka'e. Peikwaa voi íxupe. Upéa-gwi amondo-ta peẽ-my xe kватia nhe'ẽ. Xe ryvy kwéry, oiko pende py'apy-py Nhandejáry nhe'ẽ pene mbopy'a mbaraeteha. Ndapehejavéi-ma anháy ruvixa ipu'aka pendéjehe. Upéa-gwi amondo-ta peẽ-my xe kватia nhe'ẽ.

¹⁵ Ani peipota teĩ teko rei remimbota. Ani pejererova teĩ hese, teko rei reko-rupi peiko hagwã. Pehayhu ramo Nhande Ru rembiayhu e'ŷ-pe, pene rembiayhu e'ŷ voi Nhande Ru.

¹⁶ Teko rei rekoha a-rami. Ojapo ojapose va'e rei-ma. Opaixagwa rei oipota ojéupe gwarã. Imba'e pota rei va'e. Oipota gwembiexa exa. Ojohu va'e rei oipota. Imba'e reta rei omboete oipota-gwi. Upéixa voi teko rei rekoha. Nhande Ru remimbota e'ŷ-rupi oiko va'e.

* ^{2:11 Ef 5.8; 1 Jo 1.5-7}

17 Ha teko rei rekoha katu opa va'erā. Hemimbota mbota opa va'erā ave. Ha Nhandejáry remimbota ojapo va'e katu opa e'ŷ reheve oiko va'erā.*

Cristo-rehe ija'e'ŷ va'ety voi

18 Ogwahē-ta ko yvy opa hagwā óra. Omombe'u va'ekwe peẽ-my gwī Cristo-rehe ija'e'ŷ va'ety voi outaha. Ha ko'ánga katu heta ojekwaa-ma gwī Cristo-rehe ija'e'ŷ va'ety. Upéa-gwi jaikwaa ogwahētaha ko yvy opa hagwā.

19 Gwī va'e ndaha'éi nhande javegwa tee. Upéa-gwi nhane pa'ũ-gwi osē nhande reja oho-vy. Nhande javegwa tee ramo ra'e, opyta joty arā ra'e nhande jave. Ha nhande reja-ma voi oho-vy. Upéa-gwi ojekwaa-ma voi hekoha. Ñy jaikwaa-ma hese. “Gwī va'e kwéry ndaha'éi nhande javegwa tee nipo ra'e” ja'e-ma hese.

20 Ha peẽ-my katu Cristo ombou va'ekwe peẽ-my ime'ŷ-vy Nhe'ẽ Marangatu tee va'e. Upéa-gwi anhetegwa kwaaha voi peẽ kwéry.

21 Anhetegwa kwaaha voi peẽ. Ndaha'éiry anhetegwa kwaa e'ŷha voi peẽ. Anhetegwa tee va'e voi ndaijapúi va'e voi. Upéa peikwaa. Upéa-gwi amondo-ta peẽ-my xe kwatia nhe'ẽ.

22 Oĩ ijapu va'e. Kiva'e pa amombe'u-ta peẽ-my. “Hesu ndaha'éi Cristo Nhandejáry remimbou va'e” he'i va'e mo'ã, ijapu. Ha'e Cristo-rehe ija'e'ŷ va'ety voi upéa. Onhe'ẽ mbojevy va'e Nhandejáry ra'y-pe. Onhe'ẽ mbojevy ramo íxupe, Nhande Ru-pe onhe'ẽ mbojevy ave.

23 Ta'ýry-pe ombojevy va'e gwive ombojevy Nhande Ru-pe ave. Ha Ta'ýry ogwerohory va'e gwive, peteixa omoirū Nhande Ru-pe ave.

24 Toiko meme katu pende py'a-py peẽ-my hemimombe'ukwe, Hesu rerovi-aha ramo peiko-ma ramo va'ekwe. Upéa nhe'ẽ oiko ramo pende py'a-py, peteixa pemoirū va'erā Ta'ýry-pe Nhande Ru-pe ave.

25 Upéixa ramo Nhandejáry ndive jaikove va'erā Cristo he'i hagwe-rami. “Apomoingove va'erā opa e'ŷ reheve peiko hagwā” he'i ete va'ekwe peẽ-my.

26 Ha gwī Cristo nhe'ẽ mbojevyha katu pene mbotavyse mo'ã. Upéa-gwi hesegwa nhe'ẽ amondo-ta peẽ-my.

27 Ha peẽ-my katu Cristo ombou peẽ-my ime'ŷ-vy onhe'ẽ marangatu. Pende py'a-py oiko ramo inhe'ẽ marangatu, napeikotevēgwasúi va'erā pene mbo'eharā kwéry-rehe. Inhe'ẽ mante pene mbo'e va'erā. Opamba'e-py pene mbo'e va'erā. Anhetegwa voi hemimombe'u. Apu e'ŷ voi omombe'u. Upéa-gwi pehendu katu Nhe'ẽ Marangatu tee va'e remimombe'u peteixa pemoirū hagwā Cristo-pe.*

28 Upéixa ramo, xe ra'y kwéry, peteixa pemoirū katu íxupe. Nhamoirū ramo íxupe, ojehexa uka jevy ou-vy ramo, nanhanhemondýiry va'erā jahexava-yv íxupe. Nanhatíry va'erā íxugwi ogwahē jevyha áry-py.

29 Peikwaa Cristo ojejavy e'ŷ va'e voiha. Upéa-gwi hembiapo porā porā va'e gwive peikwaa Nhandejáry ra'y kwéry voiha.

3

Nhandejáry re'ýi kwéry (Jn 1.12; Rm 8.29)

1 Nhandejáry rembiexakwaa porā voi nhande. Nhande rayhu tee rei-ma oiko-vy. Upéa-gwi Nhandejáry ra'y kwéry-py nhane renói. Nhandejáry ra'y kwéry voi nhande. Ha teko rei katu ndohexa kwaáiry Cristo-rehe. Nhandejáry ra'yha ndohexa kwaáiry hese. Upéa-gwi ndohexa kwaáiry nhande-rehe ave ta'y kwéryha nhande.

* 2:17 Tg 4.4 * 2:27 Jo 14.26; 16.13

² Ìy katu, xe rembiayhu, Nhandejáry ra'y kwéry voi nhande. Ha upe rire katu ndojekwaái vyteri nhande rekorã. Ojehexa uka jevy ou-vy ramo, jahex-a-gwi íxupe onhemomba'egwasu ramo, Hesu rekoha-ramima nhan-hehekoviаrõ va'erã íxupe. Upéa peikwaa voi.

³ “Cristo-pe ahexa va'erã hekoha-rami. Anhehekoviаrõ va'erã íxupe” he'i va'e gwive, onhemopotíse tíse oiko-vy. Cristo py'a potíha-ramima onhemopotí oiko-vy.

⁴ Jajejavý ramo, Nhandejáry nhe'ẽ apo e'ŷha nhande. Upéa-gwi ojejavý va'e gwive ndoikovéi-ma voi Nhandejáry reko-rupi. Otekoha rasa-ma va'e oiko-vy.

⁵ Ojehexa uka ou-vy va'ekwe Cristo omboyke hagwã nhandéhegwi nhane rembiapo vaikwe. Ha'e ko ojejavý e'ŷ va'e voi.*

⁶ Upéixa ramo Cristo-pe peteїxa omoirũ va'e gwive, ndaha'evéi-ma ojejavý va'ety. Ha ojejavý va'ety katu ohexa kwaa e'ŷ va'e Nhandejáry-rehe. Ndoheko kwaái íxupe. Nomoirüri voi íxupe.

⁷ Ani penhembotavy uka teї avave-pe, xe re'ýi kwéry. Hembiapo porã va'e gwive ojejavý e'ŷ va'e voi. Cristo ojejavý e'ŷha-rami ndojejavý ave.

⁸ Ha ojejavý va'e gwive katu anháy reko-rupi oiko. Ha anháy ruvixa ko vvy nhepyrũ gwive, ojejavý va'ekwe oiko-vy. Upéa-gwi ojejavý va'e oiko heko-rupi. Upéa-rehe ojehexa uka ou-vy va'ekwe Nhandejáry ra'y omokanhy ngatupa hagwã anháy rembiapokwe.

⁹ Ha Nhandejáry ra'y kwéry katu oiko Nhandejáry reko-rupi. Ipy'a kwéry-py oiko inhe'ẽ. Upéa-gwi ojejavý e'ŷ va'e voi oiko-vy. Túvy Nhandejáry voi. Upéa-gwi ndikatúi ojejavý oiko-vy.

¹⁰ Upéixa ramo ojekwaa porã Nhandejáry ra'y kwéry. Anháy ruvixa ra'y kwéry ojekwaa porã ave. Ojejavý va'e gwive, Hesu reroviaha-pe ndohayhúi va'e, ndaha'éi Nhandejáry re'ýi kwéry-rami.

Pejohayhu katu peiko-vy

¹¹ Are-ma Hesu reroviaha ramo peiko-ma ramo, omombe'u va'ekwe peẽ-my pejohayhu hagwã. “Pejohayhu katu peiko-vy” he'i peẽ-my.

¹² Ha myamyrí Caim reko-rupi katu aníke peiko teї. Caim anháy reko-rupi oiko-gwi, ojuka va'ekwe gwyvýry-pe. Ma'erã po ojuka íxupe? Tyke'ýry hembiapo vai meme va'e. Ha tyvýry katu hembiapo porã va'e. Upéa-gwi ojuka va'ekwe gwyvýry-pe.*

¹³ Upéixa ramo, xe ryvy kwéry, ndaija'éi ramo pende-rehe teko rei, pendéjehe ani aipo peje “Ma'erã po ndaija'éi nhande-rehe” ani aipo peje pendéjehe.

¹⁴ Yma va'ekwe jaiko rei va'ekwe Nhandejáry-gwi mombyry. Ha ãy katu jaikove meme-ma Nhandejáry ndive. Nhandejáry ndive jaikoha jaikwaa voi. Jahayhu voi nhande re'ýi Hesu-rehe ojerovia va'e-pe. Jajohayhu-gwi peteїxa Nhandejáry ndive jaikoha jaikwaa voi “Nhandejáry ndive-ma voi jaiko” ja'e nhandéjehe. Ha gwe'ýi-pe ohayhu e'ŷ va'e katu, Nhandejáry-gwi mombyry joty oiko.

¹⁵ Ha gwe'ýi-pe ohayhu e'ŷ va'e katu, oporojuka va'e ojejavýha-rami ojejavý ave. Ha Nhandejáry ndive ndoiko mo'ãi opa e'ŷ reheve oporojuka va'e. Upéa peikwaa voi.

¹⁶ A-rami jaikwaa ohayhu teeha. Cristo nahakate'ýiry gwekove-rehe. Nhande-rehe ojejuka uka va'ekwe. Ha'e-rami iporã nanhane rakate'ýiry nhande rekove-rehe. Iporã nhaipytygwõ nhande re'ýi-pe nhamano ete peve,

* 3:5 Jo 1.29 * 3:12 Gn 4.8

nhapena e'ŷ reheve nhandéjehe. “Apa ete peve aporesende va'erā” peje katu pende re'ŷi kwéry-pe.

¹⁷ Ha imba'e reta va'e katu oĩ ohexa va'e gwe'ŷi remikotevẽ. Ha ndoipo-riahuverekóiry íxupe. Ndohexakwaa reíry íxupe. Upéa, “Nhandejáry xe rembiayhu voi” he'i mo'ã ojéupe. Ndochayhú voi Nhandejáry-pe.

¹⁸ Oĩ “Jajohayhu va'e” he'i mo'ã ójehe. Ha nonhopytygwōiry. Ojuru-py rei ojohayhu. Jajohayhu tee katu nhanhopytygwō-vy.

*Nhandejáry rovagwy-py nanhatíry va'erā jajapo ramo oração
(Jo 15.17)*

¹⁹ Upéixa voi “Hesu reroviaha tee voi nhande” ja'e nhandéjehe nhande apu e'ŷ reheve nhandéjehe. Upéixa Nhandejáry rovagwy-py nanhatíry va'erā jajapo hagwã oração.

²⁰ Ha sapy'ânte nde py'a-py “Erejejavy-ma” he'i vérami mo'ã, ani pepena teĩ hese. Ipu'akave joty Nhandejáry nhande py'a-py oĩ va'e nhe'ẽ-rehe. Ome'ẽve py'agwapy. Opamba'e oikwaa voi. Jajejavy e'ŷseha oikwaa ave.

²¹ Upéixa ramo peẽ xe rembiayhu va'e, nhande py'a-py mba'eve nde'íry vérami, Nhandejáry rovagwy-py nanhatíry va'erā jajapo hagwã oração.

²² Hemimanda nhahendu va'e, hemimbota jajapo va'e. Upéa-gwi oime raẽ va'e-rehe jajerure íxupe va'e ome'ẽ nhande-vy.

²³ A-rami he'i nhande-vy: “Perovia katu xe Ra'y Hesu Cristo réry-pe. Pejohayhu katu, Cristo peẽ-my he'i hagwe-rami” he'i nhande-vy omanda-vy.

²⁴ Nhandejáry remimanda ohendu va'e gwive peteĩxa omoirũ Nhandejáry-pe. Nhandejáry ave peteĩxa omoirũ íxupe. Ome'ẽ va'ekwe nhande-vy Nhandejáry onhe'ẽ marangatu tee va'e. Upéa-gwi inhe'ẽ marangatu tee va'e nhande py'a-py oiko-gwi jaikwaa Nhandejáry peteĩxa nhane moirũha.

4

Oĩ “Nhe'ẽ Marangatu tee va'e-py amombe'u Nhandejáry nhe'ẽ” he'i va'e mo'ã

¹ Pejeapysaka katu xe nhe'ẽ-rehe, xe rembiayhu va'e.

“Nhe'ẽ Marangatu tee va'e xe monhe'ẽ uka” he'i va'e gwive, ani perovia pya'e teĩ íxupe. Eporandu ranhe katu hemimombe'u-rehe:

“Kiva'e nhe'ẽ-py ha'e omombe'u? Nhandejáry gwigwa nhe'ẽ para'e. Anháy remimombe'ukwe para'e omombe'u” ere hese. Heta anháy nhe'ẽ-py omombe'u va'ety opa-rupi osẽ oho-vy. Opa-rupi omosarambi onhe'ẽ oho-vy. Upéa-gwi epolandu randu ranhe katu íxupe hemimombe'u-rehe. Ani ererovia teĩ Nhandejáry nhe'ẽre'ŷ.

² A-rami pehexa kwaa va'erā hese. “Hesu Cristo ojehexa uka-ma ou-vy va'ekwe nhande-rami” he'i va'e gwive, oiko ipy'a-py Nhandejáry gwigwa Nhe'ẽ Marangatu tee va'e.

³ Ha upéixa Hesu ojehexa uka va'ekwe ou-vy rehegwa nhe'ẽ nomombe'úi va'e gwive ndoikóiry ipy'a-py Nhandejáry gwigwa Nhe'ẽ Marangatu tee va'e. Upéixa he'i va'e Cristo-rehe ija'e'ŷ va'ety voi. Peẽ-my omombe'u va'ekwe outaha. Ha ko'ângâ katu ojehexa uka-ma oiko-vy gwí Cristo-rehe ija'e'ŷ va'ety. Ani ererovia teĩ inhe'ẽ.

⁴ Ha peẽ katu, xe ra'y kwéry va'e, Nhandejáry re'ŷi voi. Ipu'akave Nhe'ẽ Marangatu tee va'e pende py'a-py oiko va'e. Teko rei py'a-py oĩ va'e-rehe ipu'akave voi. Upéa-gwi napenhembotavy ukái va'erā upeixagwa ijapu va'e-pe.

⁵ Teko rei rehegwa nhe'ẽ omombe'u. Teko rei reko-rupi oiko. Upéa-gwi tekó rei ohendu ave inhe'ẽ.

6 Ha nhande kwéry katu Nhandejáry re'ýi voi. Nhandejáry irũ va'e gwive nhane nhe'ẽ renduha voi. Ha Nhandejáry re'ýi e'ý va'e nanhane rendúi oiko-vy. Upéixa jaikwaa kiva'e nhe'ẽ anhetegwa va'e. kiva'e onhe'ẽ-py nhane mbotavy va'e jaikwaa ave.

*Heko porayhu tee rei va'e Nhandejáry
(Jo 3.16; Rm 5.6-8)*

7 Pejeapysaka katu xe nhe'ẽ-rehe peẽ, xe rembiayhu va'e. Nhane mbojohayhu uka va'e Nhandejáry voi. Upéa-gwi jajohayhu katu. Ojohayhu va'e gwive Nhandejáry ra'y kwéry voi. Oheko kwaa-ma voi íxupe.

8 Heko porayhu tee rei va'e voi Nhandejáry. Upéa-gwi oporohayhu e'ý va'e ndoheko kwaáiry íxupe.

9 Oikwaa uka va'ekwe nhande-vy nhande rayhuha. Gwa'ýry ombou nhande rayhu-gwi. Ko yvy-py ombou va'ekwe íxupe, ha'eixagwa ndoikói va'e, peteĩ voi oiko va'e. Ombou íxupe jajerovia ramo hese, jaikove meme hagwã hendive.

10 Nhande rayhu teeha jaikwaa-ma a-rami. Nhande ranhe ndajahayhúi va'ekwe íxupe. Ndaupéixairy voi va'ekwe nhande. Ha'e ae ranhe nhande rayhu tee nhande-vy. Nhande rayhu-gwi ombou va'ekwe gwa'ýry omboyke hagwã nhandéhegwi nhane rembiapo vaikwe nhande rerekoso asy e'ý-vy.

11 Upéixa nhande rayhu tee-ma va'ekwe oiko-vy. Upéa-gwi jajohayhu katu, peẽ xe rembiayhu kwéry.

12 Nhandejáry ko jahexá e'ý va'e. Ha jajohayhu ramo katu peteĩxa nhane moirũ Nhandejáry. Upéixa jajohayhu tee rei jaiko-vy.

13 Ha Nhe'ẽ Marangatu tee va'e-py nhande rexakwaa rei va'ekwe Nhandejáry ime'ẽ-vy. Upéa-gwi jaikwaa voi peteĩxa nhamoirûha íxupe. Peteĩxa nhane moirûha jaikwaa ave.

14 Ha ta'ýry-pe orohexá-ma va'ekwe oroiko-vy. Ore rapixa-pe oromombe'u va'ekwe hesegwa. "Ko yvy-py oiko va'e-pe gwive ombou va'ekwe Nhande Ru gwa'ýry hesendeharã" oro'e oromombe'u-vy.

15 Ha "Nhandejáry ra'y voi Hesu" he'i va'e gwive, peteĩxa omoirû íxupe Nhandejáry. Omoirû peteĩxa Nhandejáry-pe ave.

16 Nhandejáry nhande rayhu teeha jarovia-ma jaiko-vy. "Nhande rayhu porã tee rei nipo ra'e" ja'e hese. Ha Nhandejáry katu nhane mbojohayhu uka va'e voi. Ojohayhu va'e gwive oiko-vy, peteĩxa omoirû va'e Nhandejáry-pe, omoirû ave íxupe Nhandejáry.

17 Upéixa jajohayhu porã tee rei voi jaiko-vy. Jajohayhu porã-gwi, ojehexá uka jevy ou-vy ramo Nhandejáry, nanhanhemondýi va'erã jahexá-vy. Hembiapokwe pokwe-rami enterovéa-pe ohekojohuha áry-py, nanhatíry va'erã jaha hagwã hovagwy-py. Ko'ánga Hesu reko-rupima jaiko ko yvy-py. Upéa-gwi upé áry-py jaha va'erã hovagwy-py nhatí e'ý reheve.

18 Nhande rayhu-gwi, naiporãi jajepy'apy rei nhandéjehe. Jajohayhu tee rei ramo katu, nanhane mytu'e'ývái-ma nhandéjehe. Ha nhane mytu'e'ý ramo katu, "Nhane moingo asy-ta Nhandejáry" ja'e nhandéjehe. Upéixa ramo jajepy'apy jave ndajajohayhu porã teéiry vyteri.

19 Nhande rayhu ranhe va'ekwe-gwi Nhandejáry, jajohayhu ave nhande.

20 "Xe ahayhu Nhandejáry-pe" oĩ he'i va'e mo'ã. Ha ndaija'éi gwe'ýi-rehe. Upe va'e ijanpu-ma ójehe. Ohexá ramo jepe, ndohayhu porãi gwe'ýi-pe. Mba'éixa po ohayhu-ta Nhandejáry-pe? Nhandejáry-pe ndohexáiry.

21 Hesu remimanda a-rami nhande-rehe: "Nhandejáry rayhuha tohayhu katu gwe'ýi ave" he'i Cristo nhande-rehe omanda-vy.

5

Ndaipu'akavéi-ma nhande-rehe teko rei

¹ “Cristo Nhandejáry remimbou voi Hesu” he'i va'e gwive herovia-vy, Nhandejáry ra'y ramo ave oiko íxupe ra'e. Nhande rapixa-pe jahayhu ramo, ta'ýry ndive jahayhu ave.

² Upéixa voi Nhandejáry-pe jahayhu-gwi, hemimanda nhahendu-gwi ave, “Nhandejáry ra'y kwéry-pe ave jahayhu tee ra'e” ja'e nhandéjehe nhande apu e'ý reheve.

³ Nhandejáry-pe jahayhu va'e, jajapo katu hemimanda. Ha hemimanda ndahasýiry nhande-vy. Nomanda pohýiry nhande-vy. “Ndikatúi ajapo upéa” ndaja'éi íxupe.

⁴ Nhandejáry ra'y kwéry va'e-rehe gwive ndaipu'akavéi-ma teko rei nhe'ë. Upéa-gwi ojapose katu Nhandejáry remimanda. Ndojohu pohýiry he'i va'e. Jarovia tee-ma ramo íxupe, ndaipu'akavéi-ma nhande-rehe teko rei nhe'ë.

⁵ “Nhandejáry ra'y tee voi Hesu” he'i va'e herovia-vy, ndaipu'akavéi-ma teko rei nhe'ë hese. Ha'e anho mante ipu'akave teko rei nhe'ë-rehe.

Hesu Cristo rehewa nhe'ë omombe'u va'e

(Jo 3.14-16,36; 5.31-38; 6.40; 11.25-26; 20.31)

⁶ Ojehexa uka ou-vy va'ekwe Hesu Cristo voi. Ojehexa uka rire, y-pyma onhemongarai va'ekwe. Upéi gwugwy avyte-py omano va'ekwe. Upéixa ojehexa uka ou-vy va'ekwe. Ojehexa uka ou-vy ramo, y-py ojehexa uka ranhe rire, gwugwy avyte-py ave ojehexa uka. Upe va'e omombe'u katu Nhe'ë Marangatu tee va'e. Hekoha apu e'ý va'e voi ha'e. Upéa-gwi anhetegwa va'e voi hemimombe'u.

⁷ Mbohapy Cristo rehewa omombe'aha yváy-py oĩ va'e. Oĩ Nhande Rugwasu, oĩ Nhandejáry reko kwaa ukaha, oĩ Nhe'ë Marangatu tee va'e. Ha mbohapyháixa jepe peteĩ va'e joto.

⁸ Ha mbohapy Cristo rehewa oikwaa uka yvy arigwa-pe. Oĩ Nhe'ë Marangatu tee va'e. Oĩ y-py onhemongarai uka hagwe rehewa nhe'ë. Oĩ ave gwugwy avyte-py omano hagwe rehewa nhe'ë. Upéa mbohapy nhe'ë ijoja. Peteĩxa he'i imombe'u-vy. “Hesu Cristo Nhandejáry remimbou voi” he'i nhande-vy nhane mbo'e-vy va'ekwe.

⁹ Nhande rapixa remimombe'u jarovia va'e. Ha Nhandejáry remimombe'u katu anhete teegwa va'e voi. Onhe'ë avy e'ý va'e. Ha mbohapy inhe'ë mombe'aha remimombe'u voi Nhandejáry remimombe'u voi. Gwa'ýry rehewa nhe'ë omombe'u.

¹⁰ Upéixa ramo, Nhandejáry ra'y-rehe ojerovia va'e gwive, anhetegwa voi hemimombe'u ha'e oikwaa opy'a-py. Ha herovia e'ýha katu, Nhandejáry-pe omboapu voi. Nhandejáry ra'y rehewa omombe'u ramo ndogweroviáiry hikwái.

¹¹ Nhandejáry remimombe'u a-rami: Nhane moingove va'ekwe Nhandejáry opa e'ý reheve jaiko hagwã hendive. Ta'ýry-rehe jajerovia-ma ramo, nhane moingove va'ekwe.

¹² Ta'ýry-pe omoirũ va'e gwive oiko meme va'e Nhandejáry ndive. Ha ta'ýry-pe omoirũ e'ý va'e gwive, ndoikói voi Nhandejáry ndive. Mombyry rei oiko íxugwi.

Nhandejáry ndive peiko memeha peikwaa

(Jo 14.12-14)

¹³ Nhandejáry réry-rehe pejerovia va'e. Aipota peikwaa Nhandejáry ndive opa e'ý-rehe peiko memeha. Upéa-rehe amondo-ta peẽ-my xe kwatia nhe'ë.

¹⁴ Oime raẽ va'e-rehe jajerure ramo Nhandejáry-pe, hemimbota-rupi jajerure ramo, jaikwaa voi nhande renduha. Upéa-gwi nanhane kyhyjéi jajapovy oração. Hovagwy-py jepe ndajajehko renotiry va'e.

¹⁵ Jajerure javéte íxupe nhane rendu-ma voi. Nhane rendu-gwi nhane rembijerure ome'ẽ va'erã nhande-vy. Upéa jaikwaa voi.

¹⁶ Oĩ nhande re'yí ojejavy va'e ha ojejavy va'ekwe-rehe nomondo mo'ãi íxupe Nhandejáry ojéhegwi mombyry. Upeixagwa erehexa ramo, ejerure katu hese Nhandejáry-pe ohexa uka hagwã íxupe hape porãrã. Oĩ ave nhande rapixa ojejavyve va'e ha ojejavy va'ekwe-rehe omondo va'erã voi íxupe Nhandejáry ojéhegwi mombyry. Ani joty erejerure hese, ha'e-ta peẽ-my.

¹⁷ Entéro hembiapo vai va'e gwive ojejavy voi. Ojejavy ramo jepe, oĩ joty ojejavy va'ekwe-rehe Nhandejáry remimondo e'ý ojéhegwi mombyry.

¹⁸ Nhandejáry ra'y ramo-ma oiko va'e, ndojejavýi oiko-vy onhangareko-gwi hese kwéry Cristo Nhandejáry ra'y tee va'e. Ndaipu'akái-gwi anhaygwasu hese, ndojejavýiry oiko-vy. Ndoheko johúiry voi íxupe anhaygwasu. Upéa jaikwaa voi.

¹⁹ Nhandejáry javegwa voi nhande. Ha entéro teko rei va'e gwive katu anháy ruvixa ipu'aka hese kwéry. Upéa jaikwaa voi.

²⁰ Jaikwaa ave ko va'e. Ojehexa uka-ma oiko-vy va'ekwe Nhandejáry ra'y. Nhane mo'arandu ou-vy va'ekwe jaheko kwaa hagwã Nhandejáry tee-ha. Peteíxa nhamoirû Nhandejáry tee va'e-pe. Ta'ýry Hesu Cristo-pe peteíxa nhamoirû ave. Nhandejáry tee voi ha'e. Ondive nhane moingove va'e voi ha'e jaiko hagwã opa e'ý reheve indive.

²¹ Penhangareko katu pendéjehe, xe ra'y kwéry. Tupã ra'anga anga rei-rehe ani katu pejehesa rerova tei. Heta teko rei omboete va'e. Upe va'e-rehe ani pejehesa rerova tei. Nhandejáry-pe anho nhamboete teeve katu.

João remimombe'ukwe 2

segunda epístola de João

¹ Nde, xe reindy, Nhandejáry rembiporavo voi ne memby kwéry ndive, xe João amondo-ta peẽ-my xe kватia nhe'ẽ. Hesu reroviaha-rehe anhangareko va'e xe. Ne memby kwéry xe rembiayhu tee va'e voi. Anhetegwa va'e nhe'ẽ jarovia-gwi, xe rembiayhu voi peẽ. Naxe anhóiry voi apohayhu va'e. Anhetegwa nhe'ẽ oikwaa va'e gwive pende rayhu porã oiko-vy.

² Anhetegwa va'e nhe'ẽ jarovia-gwi, jajohayhu porã jaiko-vy. Nhamoangeri ngeri inhe'ẽ. Ange vérami joty nhande-vy inhe'ẽ. Opyta meme va'erã nhande py'a-py.

³ Tanhande rovasa katu Nhandejáry Nhande Ru. Tanhande rovasa katu ta'ýry Hesu Cristo nhande rexakwaa rei-vy. Tanhande poriahuverekoo katu. Tanhane mbopy'agwapy katu ave jajohayhu porã hagwã anhetegwa nhe'ẽ-rupi jaiko-vy.

Jajohayhu porã katu anhetegwa nhe'ẽ-rupi jaiko-vy

⁴ Oĩ ne memby anhetegwa nhe'ẽ-rupi oiko va'e. Nhande Ru remimombe'ukwe-rupi oiko. Upéa xe aikwaa-ma ramo avy'a eterei-ma xe.

⁵ Ha ko'ângâ katu anhemonhe'ẽ-ta nde-vy, xe reindy, jajohayhu hagwã. Ipyahu e'ŷ va'e voi kватia-rehe nde-vy xe remimondo. Upéixa omanda va'ekwe nde-vy peiko hagwã, Hesu reroviaha ramo ereiko-ma ramo va'ekwe.*

⁶ Ha "Jajohayhu voi jaiko-vy" ja'e ramo nhandéjehe katu, Nhandejáry nhe'ẽ renduha ramo iporã jaiko. Hesu reroviaha ramo peiko-ma ramo va'ekwe, omanda va'ekwe peẽ-my "Pejohayhu katu peẽ peiko-vy" he'i va'ekwe peẽ-my.

⁷ Opa-rupi oho oporombotavy tavy rei va'e. Hesu Cristo kwimba'e ramo ojehexa ukaha nomombe'úi voi. Ijapu rei hese. Oporombotavy tavy rei oiko-vy va'e voi upéa va'e. Cristo nhe'ẽ mbojevyhaty voi.*

⁸ Upéa-rehe penhangareko katu pendéjehe. Aipota peẽ-my ome'ẽ pene rembiapo porã repyrã. Pendéjehe penhangareko porã ramo, entéro peẽ-my gwarã gwive ome'ẽ va'erã peẽ-my.

⁹ Cristo remimombe'u rendu e'ŷha gwive ojehesa rerova-ma Nhandejáry-gwi, nomořuvéi-vy íxupe. Cristo remimombe'u renduhaty ojehesa rerova e'ŷ reheve, omoirũ Nhande Ru-pe. Ta'ýry-pe omoirũ ave oiko-vy.

¹⁰ Ha Cristo nhe'ẽ ra'anga anga rei omombe'uga katu pende ha-py ogwahẽ ou-vy ramo, ani katu pemogwahẽ kuri pende ha-py. "Tande rovasa katu Nhandejáry" ani ave peje tei íxupe.

¹¹ Ereheja ramo ogwahẽ, peipytygwõ arã íxupe hembiapo vai-rehe. Opyta va'erã upéixa ramo ne iru ramo.

Pende róga-rupi apopohuse

¹²⁻¹³ Heta xe remimombe'use peẽ-my. Ha namombe'u uka mo'âi nde-vy tinta-py. Kватia rekoria xe voi ahase apopohu hagwã jajovái hagwã nhaï-vy nhanhombovy'apa hagwã nhanhomongeta-vy. Omundo-ta nde-vy omundu'aha nde kypy'ýry memby kwéry, Nhandejáry rembiporavo va'e.

* ^{1:5} Jo 13.34 * ^{1:7} 1 Jo 4.1-3

João remimombe'ukwe 3

terceira epístola de João

¹ Xe rembiayhu tee va'e Gaio. Xe João amondo-ta nde-vy xe kwatia nhe'ẽ. Hesu reroviah-a-rehe anhangareko va'e xe. Xe rembiayhu tee voi nde.

² Ajapo oraçāo nde-rehe ojehu e'ŷ hagwā nde-vy mba'eve, ne resāi porā hagwā. Nde py'a gwive erevy'aha xe aikwaa. Ha'e-rami aipota ave nde rete resāi porā ereiko-vy.

³ Ogwahē ou-vy Hesu reroviah-a va'e xe mbovy'a-vy, “Gaio Cristo nhe'ẽ rendu ku'a ku'a e'ŷha voi” he'i nde-rehe omombe'u-vy. Upéixa Cristo rekoha tee-rupi ereiko meme voi ra'e.

⁴ “Nde ra'y kwéry Cristo nhe'ẽ-rupi oiko” he'i ramo xe-vy, avy'a eterei voi xe. Upéixa ne mombe'u ramo, ndaipóri xe mbovy'ave va'erā.

João omomba'egwasu Gaio rembiapo

⁵ Ne rembiapo porā tee ereiko-vy, xe rembiayhu va'e. Hesu reroviah-a-pe ereipytygwō-vy ne rembiapo porā voi. Ogwahē va'e gwive nde ha-py nde eremogwahē porā meme voi. Ereikwaa va'e eremogwahē. Ereikwaa e'ŷ ramo jepe eremogwahē porā joty.

⁶ Upéi gwī eremogwahē va'ekwe ogwahē jevy ou-vy ramo ko'a-py, Hesu reroviah-a ojogweroaty va'e ha-py, omombe'u porā ne rerakwā erhexakwaa entérō va'e-pegwi. Ko'āy aipota ne remipytygwō-pe ereme'ẽ oime raẽ va'e ogweraha hagwā mombyryve oho porā jevy hagwā Nhandejáry-pe eremboete-vy.

⁷ Cristo remimbou upe va'e. Hesu rervovia e'ŷha-pe oho omombe'u inhe'ẽ. Ha ha'e noimba'e pe'ái íxupe kwéry, ndojeroviái-gwi Hesu-rehe. Aipo ramo aipota ererekoo porā hemimbou hemikotevē ereme'ẽ-vy eremotī e'ŷ hagwā imbouhare-pe.

⁸ Nhande kwéry Hesu reroviah-a va'e nhaipytygwō katu Cristo remimbou. Anhetegwa nhe'ẽ-rehe omaba'apo va'e, nhamoirū katu íxupe nhaipytygwō-vy.

Diótrefes rehewa nhe'ẽ, Demétrio rehewa nhe'ẽ ave

⁹ Heta e'ŷ va'e xe kwatia nhe'ẽ amondo kuri nde re'yí Hesu reroviah-a va'e-pe. Ha Diótrefes katu onhembotuvixase va'e mo'ã. Nohenduséi xe nhe'ẽ.

¹⁰ Upéa-gwi agwahē aha-vy ramo pende ha-py aikwaa ukapa arā hembi-apokwe inhe'ẽ vaiha ave. Ha'e onhe'ẽ rei xe-rehe, xe renohē vai rei. Xe-rehe ijanu rire, ojapo vaiseve. Ha Hesu reroviah-a va'e ogwahē oho-vy ramo iha-py, nomogwahēséi voi. Omogwahēséi voi ave ogwahē. Ha omogwahēséi katu ete va'e-pe omosése Hesu reroviah-a ojogweroaty va'e ha-gwi.

¹¹ Ani ereheko a'ã hekoha vai va'e-pe, xe irū. Eheko a'ã hekoha porā va'e-pe katu. Hembiapo porā va'e Nhandejáry reko irū voi. Ha hembiapo vai va'e katu ndohexa kwaáiry hese. Nhandejáry oiko e'ŷ va'e-rami oiko ha'e.

¹² Ha Demétrio katu enterove imandu'a porā hese. Ohexa kwaa hese: “Hekoha porā tee voi” he'i hese. Hekoha porā tee-ha xe ave amombe'u. Ereikwaa xe remimombe'u apu e'ŷ va'e voi.

Angeve ngeve-rupi apohexase

¹³ Heta xe nhe'ẽrā oĩ. Ha kwatia-rehe namondo mo'ãi. Tinta-py namoĩ mo'ãi kwatia-rehe.

¹⁴ Angeve ngeve-rupi apohexase voi. Aipo ramo nhanhomongeta va'erā nhande juru-rupi jajovái nhaī-vy.

¹⁵ Tapende mbopy'agwapy katu Nhandejáry. Pene irū gwive a-py oiko va'e, omondo-ta peē-my omandu'aha. Ore irū pene pa'ū-my oiko va'e peteī teī va'e-pe emombe'u ore mandu'aha.

Judas remimombe'ukwe epístola de Judas

Judas omondo onhe'ẽ kватия-rehe Nhандејáry rembiporavokwe pegwarã

¹ Xe Judas, Hesu Cristo rembigwái. Tiago ryvy xe. Ahai-ta kватия-rehe xe nhe'ẽ peẽ-my gwarã. Peẽ Nhандејáry pegwa-ma. Nhандејáry, Nhанде Ru pende pe'a-ma va'ekwe ojéupe gwarã. Pende rayhu voi ha'e. Onhangareko porã pende-rehe Hesu Cristo pegwarã.

² Tapende rovasa katu pende poriahuvereko reko hagwã Nhандејáry. Tapene mbopy'agwapy tee katu pende rovasa-vy. Tapende rayhu porãve rãve katu pende rovasa-vy Nhандејáry.

Penhemokyre'ẽ katu pemonhe'ẽ mbojevy hagwã gwĩ Hesu Cristo-rehe omombe'u a'ã a'ã rei va'e-pe

³ Xe rembiayhu kwéry are-ma ahaise peẽ-my. Nhандејáry omboyke-ma nhandéhegwí nhane rembiapo vaikwe nhane resende tee hagwã. Xéhegwí omboyke-ma voi va'ekwe xe rembiapo vaikwe. Ha omboyke-ma ave pendéhegwí araka'e pene rembiapo vaikwe. Upéa-rehe are-ma ahaise ramo jepe, ahai va'erãgwe aheja-ta. Xe tuvixa mba'eve va'e ahai-ta. Tekotevé apomo'arandu ambue va'e. Ko kватия-rehe ahai ani hagwã pejere rei anhetegwa jarovia va'ekwe-gwi. Ko kватия ahai pene mokyre'ẽ hagwã, penhe'ẽ mbojevy jevy hagwã anhetegwa e'ý nhe'ẽ. Hesu Cristo rehewa tee nhe'ẽ peipy'apyhy va'ekwe. Hesegwa anhetegwa e'ý nhe'ẽ pejoko jevy katu.

⁴ Oime-ma pene pa'ũ-rupi gwĩ Nhандејáry-rehe ndojeroviái va'e. Porombotavy-vy rei oike nhemi pene pa'ũ-my. "Nhande rekorã Nhандејáry remimbota voi nipo ra'e" peje rei hagwã hemimombe'ukwe-rehe. Ojéhegwí rei omombe'u Nhандејáry remimbota mo'ã. "Nhандејáry nhande rexakwaa rei va'e voi. Opaixagwa jajapo ramo jepe ha'e nhande rexakwaa rei va'erã voi" he'i mo'ã. "Aipo ramo nanhatívéi reheve tajaiko katu nhande rexakwaa reive ive hagwã" he'i mo'ã pene mbotavy rei-vy. Ndogweroviái Nhандејáry Hesu Cristo-pe. "Ha'e anho nhande ruvixa" nde'íry hikwái. Pejoko katu upe onhe'ẽ rei va'e kwéry-pe. Yma va'ekwe Nhандејáry nhe'ẽ kватия-rehe oĩ va'e he'i hese:

"Hembiapó vai va'erã ohasa asy hagwã-my oho va'erã"
he'i va'ekwe hese kwéry.

Myamyrí-pe Nhандејáry ogwereko asy ete va'ekwe ójehe ndojeroviái-gwi va'ekwe

⁵ Pene rembigwaa-rehe apomomandu'a jevy-ta. Yma va'ekwe Nhандејáry oipe'a myamyrí Israel ra'y kwéry Egito yvy-gwiiresende-vy. Ogwerova heraha-vy. Upe rire ohundi tee íxupe kwéry ójehe ndojeroviái va'e kwéry-pe gwemiresendekwe-pe.*

⁶ Apomomandu'a jevy-ta gwĩ yváy pygwakwe-rehe, Nhандејáry rembigwaikwe-rehe. Yváy pygwa voi jepe gweko ypykwe-rupi ndopytasei va'ekwe hikwái. Oheja rei gweko porã teekwe. Upéa-rehe Nhандејáry ombogwejy uka-ma va'ekwe íxupe kwéry. Pytú gwy-py isã-rehe onhapytí pytí hereko-vy imbohasa asy-vy íxupe kwéry. Ohundi hagwã áry-rehe oha'arõ arõ joty okwa-vy. Nhандејáry renonde-py enterovéa omboaty hembiapokwe

* 1:5 Ex 12.51; Nm 14.29-30

pokwe-rehe nhande rereko hagwā áry-py ohundipa va'erā íxupe kwéry Nhandejáry.

⁷ Apomomandu'a jevy-ta ave gwī tetāgwe ymagware-rehe. Sodoma tetāgwe, Gomorra tetāgwe-rehe ave, gwī tetā ijerekwe rehewa ave-rehe pene mandu'a katu. Myamyrī upe pygwa kwéry hembiapo vai tee va'ekwe hikwái. Nhandejáry rembigwaikwe-rami hembiapo vai hikwái. Teko reirupi opaixagwa ivaive ive va'e ojapo va'ekwe hikwái onhemotī e'ŷ-vy. Upéarehe Nhandejáry ohundipa ete va'ekwe íxupe kwéry. Tatagwasu-py voi omokanhymba va'ekwe íxupe kwéry. Upéixa ogwereco va'ekwe íxupe kwéry nhane mo'arandu hagwā. Upéa-rehe Nhandejáry oikwaa uka nhande-vy entéro hembiapo vai va'e-pe ha'e ombohasa asy arā tata ogwe e'ŷ va'e-py omondo-vy.*

⁸ Aipo ramo jepe upe pene pa'ū-my oĩ va'e upéa myamyrī-rami heko reirupi ivaive ive oho-vy. "Nhande kéra-py vérampi ahexa nhande rekorā" he'i. "Xe kéra-py ojehexa uka kuri xe-vy nhande rekorā" he'i okéra pygware omombe'u-vy onhembotavy rei-vy. Ha'e ae ojapose va'e rei ojapo hikwái. Gweko vaiha-rupi okwa-vy. Mburuvixa kwéry pogwy-py ndoikoséi ave hikwái. Onhembohory ave yváy pygwa-rehe okwa-vy. Nhandejáry rembigwái kwéry-pe ohexa uka gwova asyha onhe'ẽ rei rei-vy.

⁹ Nhandejáry rembigwái ruvixa Miguel ae ndaha'ei ha'eixagwa. Yváy pygwa tee jepe ojoko hagwā anhaygwasu-pe nonhe'ẽ asýi jotsy íxupe. Onhonhe'ẽ mbojevy jevy jepe araka'e anhaygwasu ndive nonhe'ẽ asýi jotsy íxupe. Onhemoakate'ŷ jotsy mokōive Moisés amyrī retekwe-rehe. Miguel ndohejái anhaygwasu ogweraha hetekwe. Onhonhe'ẽ mbojevy jepe nonhe'ẽ asýi jotsy anhaygwasu-pe. "Nde ko ne rembiapo vai" nde'íry jotsy íxupe. "Tande joko katu Tupā Nhandejáry" he'i ae jotsy íxupe ijoko-vy.*

¹⁰ Upe Nhandejáry nhe'ẽ omombe'u ra'anga anga rei va'e Miguel arandurami e'ŷ voi inharandu. Gwembigwaa e'ŷ-rehe onhe'ẽ vai vai rei. Mymba ka'agwy rupigwa-rami mante oikwaa gwete-rehe. Ha ha'e kwéry oikwaaharupi ae oiko-gwi ae onhehundipa rei va'erā.

¹¹ Ohasa asy va'erā. Caim amyrī rapekwe-rupi ogwata Nhandejáry remimbotia apo e'ŷ-vy. Balaão amyrī rapekwe-rupi jevy oiko. Opirapirerā-rehe rei ae omombe'u. Hemimombe'ukwe katu ndaha'ěiry voi Nhandejáry rehewa nhe'ẽ. Coré amyrī rapekwe-rupi jevy oiko. Hembiapo vai oiko-vy. Yma araka'e Coré onhemoirū uka heta va'e kwéry-pe ojoko uka hagwā mburuvixagwasu-pe, Nhandejáry remimoī va'e-pe. Coré rapekwe-rupi ohasa asy ave arā pene mbo'eha ra'anga kwéry.*

¹² Peē Nhandejáry reroviahia pejohayhu-gwi penhomboaty meme karugwasu haty-py. Upe jave Nhandejáry nhe'ẽ omombe'u ra'angaha ave ou. Ojapo vai rei hagwā ou. Ijayvupa rei okwa-vy. Notī kwaái. Ndaheko porāi peē-my. Pende rerekoha ramo mo'ā oikose. Ha'e kwéry ae rei onhemohygwyatā. Ita y gwy-py oĩ va'e-rami nhane kanóa ojoka-ta va'e-rami voi pene ra'arō hikwái. Yvytu arai-pe omosarambipaha-rami voi ha'e kwéry naiporāi voi peē-my. Yvyra hi'aha óra jepe ndahi'airy va'e-rami, ha'e kwéry naiporāi peē-my. Ndaheko porāi voi peē-my. Yvyra yvygwy-gwi ohekýi va'e-rami hikwái. Omano tee-ma va'e-rami ave hikwái.

¹³ Ygwasu hatā omýi omboaty gwyjuikwe ohexa uka hagwā oky'akwe. Upéixa ave ha'e kwéry ohexa uka gwekoha ky'akwe hikwái. Gwembia po vaise-vy ndogwapýi oiko-vy enterove-pe ohexa uka hagwā gweko ky'akwe. Gwendagwe-gwi oripara rei oho-vy jasytata pytū ha-rupi rei okanhy kanhy

* ^{1:7} Gn 19.1-24 * ^{1:9} Dt 34.6; Zc 3.2 * ^{1:11} Gn 4.3-8; Nm 16.1-35

oho-vy. Upéixa ave pene mbo'e ra'angaha. Hesu Cristo rape-gwi oripara rei oho-vy. Ndohesapéi avave-pe tape porãrã. Ây katu pytû-my rei oiko. Nhandejáry ombohasa asy va'erã íxupe kwéry hembiapo vaikwe-rehe.

¹⁴ Yma gware Nhandejáry réry-py Enoque amyrí omotenonde pende reko mbo'e vaiharã rekoharã-rehe. Adão amyrí remiarirõ joapyri pyri remiarirõkwe jevy oiko va'ekwe Enoque amyrí. Ha'e omotenonde pende reko mbo'e vaiharã rekoharã-rehe.
“Nhandejáry ou va'erã” he'i. “Heta gwembigwái imarangatu va'e yváy pygwa kwéry ndive ou va'erã” he'i.*

¹⁵ “Imonhe'ẽ uka-vy hembiapokwe-rehe ou va'erã Nhandejáry. Hembiapo vaikwe-rehe ombohasa asy va'erã ave” he'i. “Hekoha vai va'ekwe-rehe ombohasa asy va'erã. Ojéupe omboete e'ŷ hagwe-rehe ombohasa asy ave va'erã. Ójehe onhe'ẽ pohýi hagwe-rehe Nhandejáry ombohasa asy ave va'erã íxupe kwéry”

he'i va'ekwe Enoque amyrí kwaitia-rehe ohai-vy. Upéa ohai ramo pende reko mbo'e vaiharã-rehe omotenonde-ma imombe'u-vy.

¹⁶ Mba'éixa po ra'e ha'e kwéry hekoha? Perepara porã katu hekoha-rehe. Onhe'ẽ rei rei oiko-vy ambue kwéry-rehe. Onhomymyí rei rei. Mba'eve-rehe voi ha'e ndovy'airy. Gwembiapo vaise mante ojapose oiko-vy. Ha'e ae onhe'ẽ-rupi onhembotuvixase mo'ã oiko-vy. Onhembojuruhe'ẽ ete íxupe kwéry oiko-vy ome'ẽ uka hagwã ojéupe gwarã. Upéixa voi pene mbo'e ra'anga va'e.*

Pende resa pemondo katu Nhandejáry Hesu Cristo ou jevy hagwã áry-rehe peha'arõ porã hagwã íxupe

¹⁷ Peẽ, xe rembiayhu kwéry, pene mandu'a katu Nhandejáry Hesu Cristo remimondo tee remimombe'ukwe-rehe.

¹⁸ Kóixa he'i va'ekwe peẽ-my:
“Ogwahë-tama yvy opa hagwã áry. Upe jave ogwahë va'erã ou-vy gwî
Nhandejáry reroviah-a-rehe onhembohory va'e. Nomboetéi va'erã
Nhandejáry-pe. Gweko vai-rupi ae oiko va'erã”
he'i va'ekwe pene mo'arandu-vy.

¹⁹ Ha ko'ângä katu perepara pene mbo'e ra'angaha reko-rehe. Gwemimombe'u ambue mbue-rupi omboheko joavypa Hesu Cristo reroviah kwéry-pe. Teko rei-rupi inharandu. Ndogwerekói Nhe'ẽ Marangatu tee va'e inharandurã ome'ẽ hagwã.

²⁰ Peẽ ae katu, xe rembiayhu kwéry, penhemo'aranduve nduve katu peikovsky. Hesu Cristo heko marangatu tee va'e-rehe pejerovia-gwi peẽ ave pende reko marangatu hagwã katu peiko-vy. Oĩ pende py'a-py Nhe'ẽ Marangatu tee va'e. Ipu'aka-rupi pembojeupive pive katu Nhandejáry-pe pene nhe'ẽ.

²¹ Nhandejáry nhande rayhuha-rehe pene mandu'a meme katu inhe'ẽ pejapo meme hagwã. Pende resa pemondo katu Nhandejáry Hesu Cristo-rehe. Ha'e nhande poriahuverekoo va'e. Nhane mogwahë porã va'erã gwenda-py jaiko hagwã opa e'ŷ reheve onhondive. Nhande rekove opa e'ŷ va'erã-rehe peha'arõ porã katu.

²² Gwî Hesu Cristo-rehe ojerovia ku'a ku'a va'e-pe, gwî ipy'a mokõi-rupi oiko va'e-pe, pemo'arandu porã katu ojerovia porã hagwã hese.

²³ Peresende uka katu íxupe kwéry, gwî tata-py ho'a-tama va'e-ramipe peresende uka ani hagwã Nhandejáry ombohasa asy tee íxupe kwéry tata ogwe e'ŷ va'e-py. Peiporiahuverekoo rei katu gwî teko vai-rupi oiko va'e-pe, gwî notõ kwaái va'e-pe. Oĩ ramo tetekwe ine va'e, ijao-rehe ave inegwe

* ^{1:14} Gn 5.21-24 * ^{1:16} 2 Pe 2.1-18

ohasapa. Xáke upéa-gwi. Ani erenhemongy'a uka teñ íxupe. Pene mbohekoha vai va'erã. Tapende kyhyje katu íxugwi pemoirũ hagwã íxupe. Hembiaipo vai va'e-pe ae peiporiahuverekó rei íxupe peipytygwô-vy.

Judas omomba'egwasu Nhandejáry-pe imboete-vy

(1 Co 1.8; 10.13; Ef 3.20-21; 1 Tm 1.17)

²⁴ Nhandejáry ipu'aka tee va'e. Onhangareko porã nhande-rehe ani hagwã jaiko jajejavý reheve. Nhane mogwahé va'erã onhemomba'egwasu ete ha-py nhande py'a potí marangatu reheve. Javy'a ete va'erã indive jaiko ramo.

²⁵ Nhandejáry mante Tupã tee. Ha'e anho nhane mopotí tee va'e nhane resendehaty. Nhandejáry Hesu Cristo omano va'ekwe omboyke hagwã nhandéhegwi nhane reko jejavy ky'akwe. Upéa-rehe tanhamomba'egwasu ete katu Nhandejáry-pe. Ha'e anho Tupágwasu tee onhembotuvixa mba'e tee va'e. Ha'e anho nhande Ruvixa tee voi. Ipogwy-py enterove oiko va'e. Inhe'ë-py enterove toiko. Upéixa omomba'egwasu va'ekwe nhande ypy oiko e'ÿ mboyve. Omboete hagwe-rami ãy peve joty tomomba'egwasu íxupe. Ha opa e'ÿ reheve upéixa-ma tomomba'egwasu ave Nhandejáry-pe. Amém.

Hesu Cristo rembiexa ukakwe apocalipse de João

1 Yma va'ekwe Nhandejáry ohexa uka Hesu Cristo-pe mbava'e pa oiko-ta nhande-vy. Ndahi'aréi ko oiko va'erã nhande-vy oiko-ta. Omombe'u íxupe omombe'u jevy hagwã ójehe ojerovia va'e kwéry-pe.

Upéi Hesu Cristo ombou gwembigwái yváy pygwa va'e ohexa uka jevy hagwã João-pe ikéra-py vérarsi. Upéi okéra-py vérarsi ohexa va'ekwe João ohai kwatia-rehe oikwaa uka hagwã enterovéa-pe.

2 Opamba'e ohexa va'ekwe, ohendu va'ekwe ohaipa kwatia-rehe omombe'u-vy. Anhete teegwa ko kwatia pygwa Nhandejáry nhe'ẽ Hesu Cristo ohexa uka va'ekwe João-pe. Gwembixagwe katu ohai va'ekwe João kwatia-rehe.

3 Ovy'a va'erã voi ko kwatia nhe'ẽ omonhe'ẽ va'e. Ovy'a voi ave arã henduháry ogwata ramo oiko-vy hemimombe'ukwe-rupi. Ndahi'arevéi-ma oiko va'erã nhande-vy. Oiko-ma va'erã ko va'e nhe'ẽ nhane renonderã omombe'u va'ekwe.

João ohai kwatia nhe'ẽ sete tetã-my oiko va'e Hesu reroviahaw kwéry pegwarã

4 Xe, João, ahai-ta ko va'e kwatia nhe'ẽ sete tetã-my oiko va'e pegwarã kwatia. Hesu reroviahaw onhomboaty aty va'e Ásia yvy-rupi oiko va'e kwéry pegwarã kwatia ahai-ta.

Tapende rovasa porã pende rexakwaa rei-vy Nhandejáry. Tapene mbopy'agwapy ave. Nhandejáry ha'e voi va'e. Yma gwive voi oiko va'ekwe. Ha opa e'ŷ reheve joty oiko va'erã.

Tapende rovasa porã pende rexakwaa rei-vy. Tapene mbopy'agwapy ave upe Nhandejáry mandaha renda-py okwa va'e, sete nhe'ẽ marangatu Tupã Nhandejáry gwapy haty renonde-py okwa va'e.

5 Tapende rovasa porã pende rexakwaa-vy pene mbopy'agwapy-vy ave Hesu Cristo. Ha'e anhete teegwa va'e voi. Omano ete rire ha'e onhemoōgo ve jevy oikove jevy-ma va'ekwe. Onhypyrū va'ekwe nhande-vy omano va'ekwe atýra-gwi opu'ã jevy va'erã oikove jevy hagwã. Ko yvy pygwa mburuvixag-wasu oiko va'e kwéry ruvixave voi Hesu. Ha'e nhande rayhuha voi. Omano va'ekwe oipe'a hagwã nhandéhegwi nhane rembiapo vaikwe. Gwugwy avyte-py omano-gwi nhande py'a omopotí va'ekwe.*

6 Gwe'yirã voi nhande pe'a va'ekwe. "Pa'i-rami peiko va'erã xe Ru-pe. Nhandejáry ramo oiko va'erã peẽ-my xe Ru" he'i nhande-vy nhande pe'a-vy. Upéa-gwi tanhamomba'egwasu meme katu Hesu Cristo-pe. Toiko ha'e imburuvixagwasu ijapy e'ŷ reheve. Amém.*

7 Pema'ẽ katu, ou-ta Hesu. Araigwasu avyte-rupi ogwejy-tama ou-vy. Ha'e ojehexa uka-ta entéro va'e-pe ogwejy ou-vy ramo. Gwī ikutuhare jepe ohexata ave íxupe igwejy igwahẽ ramo. Opa va'e ko yvy arigwa onhemboasy arã ohexa ou-ma ramo. Upe va'e aipota voi. Amém.*

8 Tupã Nhandejáry onhemombe'u nhande-vy:
"Mba'e ypyrū ramo voi aiko-ma xe va'ekwe. Ipaha rire ave xe aiko joty. Mba'e nheypyrūha voi ko xe. Mba'e paha voi ave ko xe"**
he'i ójehe onhemombe'u-vy.

* 1:5 Sl 89.27 * 1:6 Ex 19.6 * 1:7 Dn 7.13; Zc 12.10 * 1:8 Ex 3.14

Ha'e ko Tupā tee voi. Ha'e va'e voi. Yma gwive oiko va'ekwe opa e'ŷ va'e voi ha'e. Ha'e ipu'aka tee va'e voi entéro va'e rehe.

Hesu, imba'egwasuha reheve ojehexa uka va'ekwe João-pe

⁹ Xe, João, ahexa va'ekwe Hesu ojehexa uka ramo xe-vy. Xe kéra-py rei vérami aiko jave ahexa va'ekwe íxupe. Xe, João, pende re'ýi va'e. Hesu-rehe jajerovia-gwi nhande jaiko ojoe'ýi kwéry ramo. Hese ha-py jahasa asy asy jaiko-vy. Upe jave nhanhemokirirí katu Nhandejáry Nhande Ruvixagwasu áry-rehe ha'arõ-vy.

Hesu-rehe ha-py aime ramo va'ekwe preso ahexa va'ekwe íxupe. Hesegwa nhe'ẽ amombe'u mbe'u-gwi upe anhetegwa nhe'ẽ amombe'u mbe'u-gwi xe moĩ va'ekwe preso hikwái. Ýgwasu mbyte-py oĩ va'e yvy'ajere héry va'e Patmos. Upe-py aime preso jave ojehexa uka va'ekwe xe-vy Hesu.

¹⁰ Peteĩ domingo-py Nhandejáry Nhe'ẽ Marangatu tee va'e peteĩ onhe'ẽ va'e ohendu uka xe-vy. Xe rapykwe-gwi ahendu hatã onhe'ẽ va'e onheandu uka-vy xe-vy. Temimbygwasu nhe'ẽ ramigwa hatã ahendu.

¹¹ He'i xe-vy:

—Ehai katu ne rembihexarã kватia-rehe, he'i va'ekwe xe-vy. —Sete tetã-my oiko va'e pegwarã kватia ehai katu. Hesu reroviah onhomboaty aty va'e kwéry pegwarã emõi katu kватia-rehe, he'i. —Erehai rire eraha uka Éfeso tetã mygwa-pe. Eraha uka ave Esmirna tetã mygwa-pe ave, Pérgamo tetã mygwa-pe ave, Tiatira tetã mygwa-pe ave, Sardes tetã mygwa-pe ave, Filadélfia tetã mygwa-pe ave, Laodicéia tetã mygwa-pe ave, he'i va'ekwe xe-vy ohai uka-vy. —Hesu reroviah upe sete tetã mygwa kwéry pegwarã ne rembihexavyrã ehai katu, he'i voi va'ekwe xe-vy.

¹²⁻¹³ Onhe'ẽ ramo ajere va'ekwe ama'ẽ ahexa hagwã. Ajere ama'ẽ hese-ma ramo ahexa-ma Nhande Ryke'y tee va'e ra'e. Sete tataendy'y ouro-gwi ijapopyre va'e ahexa. Ipa'ũ-my oĩ Nhande Ryke'y tee va'e. Oao puku puku reheve onhembo'y oĩ-vy. Ikupy peve ogwahé iiao. Ipyti'a kwaha ouro-gwi ijapopyre.

¹⁴ Morotí hi'avv. Ovexa ragwe potípyre morotí va'e-rami hi'ávy. Amandáu-rami hi'ávy morotí. Tata rendy-rami voi hesa nhande resaka.

¹⁵ Ipy ave hyverapa. Bronze tata-py ombohyku jave onhembohyvera vera va'e-rami ipy. Inhe'ẽ ryapu etei. Y hyapu hatãha-rami voi hyapu atã inhe'ẽ.

¹⁶ Ha opo ijakatúa va'e pyte-py ogwereko sete jasytata. Ijuru-gwi ojehexa osẽ va'e. Kysepuku hãi jovái va'e ramigwa inhe'ẽ. Overapa va'e-rami voi hova. Hembipepa voi hova. Kwarahy larose hembipe porã va'e-rami omohembipepa hova.

¹⁷ Ahexa-ma íxupe-ma ramo ha'a ipy renonde-py. Omano va'e-rami voi xe ha'a ipy renonde-py. Ha'e katu oakatúa gwigwa opo omoõ xe-rehe.

—Ani erenhemondýi teĩ xéhegwí, he'i xe-vy. —Xe ko mba'e ypyrûha voi, he'i xe-vy. —Ipaha ramo voi ko xe aiko va'e voi, he'i xe-vy.

¹⁸ —Xe aikove tee va'e voi, he'i. —Amano tee va'ekwe. Amano rire aikove jevy-ma. Áy katu ndapavéi-ma va'erã voi aiko-vy. Namanori norivéi-ma va'erã xe, he'i. —Xe aipota ramo omano, omano arã yvypóry, ha ndaipotái ramo omano, nomanói ave va'erã. Xe nhe'ẽ-py ae mate omano va'erã. Xe nhe'ẽ-py ave omano va'ekwe opyta va'erã imbohasa asy hagwã-py, he'i xe-vy onhemombe'u-vy.

¹⁹ —Ehai katu kватia nhe'ẽ. Ne rembihexavyrã ehaipa. Áy oiko va'erã ahexa uka-tama nde-vy. Upe rire oiko jevy va'erã yvypóry renonderã-rehe ahexa uka-tama nde-vy erehai hagwã nde kватia-rehe.

²⁰ Upéa erhexa va'e-rehe aikwaa uka-ta ave nde-vy. Sete jastata erhexa va'e xe po-py. Sete tataendy'y pa'ū-my anhembo'y aī-vy. Upe va'e-rehe amombe'u-ta nde-vy. Oĩ sete tetā-my xe reroviaha kwéry onhomboaty aty meme hikwái. Upe tataendy'y he'ise upe tetā-rehe. Ha upe va'e kwéry rerekwa oĩ xe remimoīgwe sete ave. Jasytata he'ise upe xe remimoīgwe-rehe, he'i xe-vy. Upéixa he'i xe-vy, Hesu xe-vy anho mante ojehexa uka va'ekwe.

2

Hesu reroviaha Éfeso tetā mygwa pegwarā nhe'ẽ

¹ —Ehai katu xe nhe'ẽ kwatia-rehe, he'i xe-vy. —Éfeso tetā mygwa-pe anhemonhe'ẽse, he'i. —Xe-rehe ha-py onhomboaty aty va'e kwéry rerekwa-pe xe remimoīgwe pegwarā ehai katu xe-vy, he'i. —Ko va'e ehai íxupe gwarā, he'i va'ekwe xe-vy.

—Ko xe po akatúa-py areko va'e sete jasytata va'e voi xe, he'i ójehe. —Sete tataendy'y pa'ū-rupi ogwata va'e voi ko xe, he'i ojehegwa ohai uka-vy.

² —Ko'āy anhemonhe'ẽse nde-vy, he'i ohai uka-vy. —Aikwaa porā-ma nde rekoha. Eremba'apo apo porā meme. Eremboykepa voi teko rei-rupi oiko va'e kwéry pendéhegwí. Ndererovia reíry ave enterove va'e-pe. “Xe Tupā Nhandejáry remimondo va'e” he'i ramo peē-my, erejeapysaka porā ereikwaa porā hagwā ijapu va'e para'e, Nhandejáry nhe'ẽ mombe'u ã'ã ã'ãha rei para'e, Nhandejáry nhe'ẽ tee omombe'u va'e para'e, oakā-gwi rei para'e omombe'u nhe'ẽ. Erepolandu kwaai voi nhe'ẽ-rehe. Ha nde katu ndererovia mo'āi voi ijapu va'e nhe'ẽ. Aikwaa-ma katu xe nde rekokwe.

³ Xe aikwaa ave ereha'arō teeha. Ha erehasa asy asy-ma xe-rehe ha-py. Na nde kweráiry vyteri joty xe ra'arō-vy.

⁴ Upéixa nde rekokwe porā jepe ndavy'apáiry vyteri nde-rehe ndaxe ray-hugwasuvéi-magwi. Yma nde xe rayhu tee voi va'ekwe. Ha ãy katu ndaxe rayhuvéi-ma. Ne mandu'a ku'a ku'a rei-ma xe-rehe. Nde resa yvuku rei-ma mombyry-gwi xe-rehe. Upe va'e nde rekoha-rehe xe ndavy'ái voi.

⁵ —Ne mandu'a katu upéixa nde reko porāgwe-rehe. ãy ae katu haimete ndaxe rayhuvéi-ma. Erova jevy katu xe-rehe nde resa. Ejevy jevy katu yma ne rembiapo porā nhypyrrūgwe-rupi ereiko jevy hagwā. Ndererovái ramo nde resa xe rayhu porā jevy hagwā, aha va'erā nde ha-py arova va'erā ndéhegwí nde rataendy'y ererova e'ŷ-gwi nde rekoha.

⁶ —Oĩ joty peteī mba'e erejapo xe mbovy'a va'e. Xe-rami nde ave nde jegwaru gwī Nicolaíta rembiapo-rami hembiapo va'e-gwi, he'i.

⁷ —Ne aranduse va'e, ejeapysaka porā katu ko Tupā Nhandejáry Nhe'ẽ Marangatu tee va'e nhe'ẽ-rehe. Hesu reroviaha kwéry pegwarā-rehe ejeapysaka porā katu. Onhembohekopyatā uka va'e xe-vy, ojehesa rerova e'ŷ va'e xéhegwí va'e-pe ae ha'uka-ta yvá pygwa yva aju Nhandejáry kokweg-wasu mbyte-py oĩ va'e yva aju. Upe yva aju ho'u va'e oikove arā opa e'ŷ va'erā voi, he'i. —Upéa ha'ese nde-vy anhemonhe'ẽ-vy, he'i ohai uka-vy Éfeso tetā mygwa kwéry pegwarā. Upéa he'i xe-vy Hesu, xe-vy anho mante ojehexa uka ramo va'ekwe.

Hesu reroviaha Esmirna tetā mygwa kwéry pegwarā nhe'ẽ

⁸ —Ehai jevy katu xe nhe'ẽ kwatia-rehe, he'i jevy xe-vy. —Esmirna tetā mygwa-pe anhemonhe'ẽse ave, he'i. —Xe-rehe ha-py onhomboaty aty va'e kwéry rerekwa-pe xe remimoīgwe pegwarā ehai katu xe-vy, he'i. —Ko va'e ehai íxupe gwarā, he'i va'ekwe xe-vy.

—Xe ko mba'eve vyteri ndoikói ramo xe aiko-ma voi va'ekwe. Opa ramo jepe xe aikove joty va'erā. Apa e'ŷ reheve voi xe aikove joty arā. Amano-ma va'ekwe. Upéi aikove jevy va'ekwe. Áy katu namano jevyvéi-ma va'erā xe, he'i ójeho. —Anhemonhe'ëse nde-vy, he'i ohai uka-vy va'ekwe.

⁹ —Xe aikwaa-ma nde rekoha. Nde erehasa asy ereikovyha aikwaa-ma. Nde poriahu tee voi nde ereiko-vy. Upe jave jepe heta joty ne mba'erā yváy-py.

—Aikwaa ave heta onhe'ë vai vai rei nde-rehe. Aikwaa voi inhe'ë kwéry: Xe judeu kwéry va'e ko xe. Upéa-rehe xe Nhandejáry re'ýi, he'i rei rei ójeho okwavy. Xe ae ha'e-ta, Ha'e kwéry anhaygwasu re'ýi va'e voi, ha'e voi hese kwéry. Nde-rehe onhe'ë vai vai va'e-rehe aipo ha'e.

¹⁰ —Xe aikwaa ave nde rekora. Nde-rehe ija'e'ŷ va'e nde rerekro asy-ta. Upe va'e-gwi ani erekhyje tei. Anhaygwasu rekoha ogweroko va'e omoi va'erā preso gwí pene pa'ü mygwa. Petei tei pende rekoha oikwaase-gwi pene moi arā preso. “Ojerovia tee para'e Hesu-rehe, ndojerovia teéiry para'e?” he'i-vy pene moi arā preso. Nda aréi arā nde rerekro asy. Dez áry peve mate nde rerekro asy va'erā. Upéixa nde rerekro ramo jepe ani joty erejere xéhegwí. Eremano peve jepe ejerovia tee katu xe-rehe. Erejere e'ŷ ramo ame'ë va'erā nde-vy nde rekoverä opa e'ŷ va'erā.

¹¹ —Ne aranduse va'e, ejeapysaka porä katu ko Tupä Nhandejáry Nhe'ë Marangatu tee va'e nhe'ë-rehe. Hesu reroviaha kwéry pegwarä-rehe ejeapysaka porä katu. Onhembohekopyatä uka va'e xe-vy ogwata meme hagwā ipukukwe-vy xe ndive oikove jevy rire nomano jevyvéi-ma va'erā. Ijukaharágwe ndaipu'akavéi-ma va'erā hese, he'i. —Upéa ha'ese nde-vy anhemonhe'ë-vy, he'i ohai uka-vy Esmirna tetä mygwa kwéry pegwarä. Upéa he'i xe-vy Hesu xe-vy anho mante ojehexa uka ramo va'ekwe.

Hesu reroviaha Pérgamo tetä mygwa kwéry pegwarä nhe'ë

¹² —Ehai jevy katu xe nhe'ë kwtia-rehe, he'i jevy xe-vy. —Pérgamo tetä mygwa-pe anhemonhe'ëse ave, he'i. —Xe-rehe ha-py onhomboaty aty va'e kwéry rerekwa-pe xe remimoigwe pegwarä ehai katu xe-vy, he'i. —Ko va'e ehai íxupe gwarä, he'i va'ekwe xe-vy.

—Xe ko kysepuku hääi jovái va'e rerekoha voi ko xe.

¹³ Aikwaa voi xe nde rekoha. Anhaygwasu rekoha-rupi oiko va'e pa'ü-my voi ereiko. Íxupe ae omboete ojáry ramo ogwerokwa hikwái. Nde katu nderejehesa rerovái joty xéhegwí. “Hesu reroviaha voi” he'i joa nde-rehe upe pygwa kwéry. Nderejeréiry joty xéhegwí. Erejerovia tee voi xe-rehe. Ne retä anhaygwasu Satanás oikoha voi. Gwí xe rehegwa nhe'ë omombe'u porä va'ekwe-pe ojuka va'ekwe upe pygwa. Antipas amyrí-pe ojuka va'ekwe hikwái. Upéixa xe rembigwái amyrí-pe ombohasa asy ramo jepe va'ekwe nande resaráiry voi joty va'ekwe xéhegwí. Upéa nde reko porä-rehe aikwaa.

¹⁴ —Oí ae ne rembiapokwe xe mbovy'are'ŷha. Eremoirü meme-gwi heko vai va'e-pe. Oí gwí ne irü ne ndive oiko va'e kwéry ojohu porä Balaão amyrí remimombe'ukwe. Naiporäi upéa. Yma va'ekwe Balaão amyrí nhe'ë ohendugwi myamyrí pene ramoigwasu kwéry ojejavypa va'ekwe. Balaão amyrí ogwerova ukapa myamyrí pende ramoi kwéry Nhandejáry remimombe'ukwegwi. Hemimombe'ukwe e'ŷ-my Balaão amyrí ohekombo'e vai va'ekwe Bal-aque amyrí-pe ombotavy hagwā Israel remiarirö kwéry-pe. Upéixa Nhandejáry remimbota e'ŷ ojapo uka va'ekwe íxupe kwéry. Ombotavy rei voi íxupe kwéry. Heko porägwe-gwi ogwerova ukapa íxupe kwéry ho'u uka íxupe kwéry gwí ipotí e'ŷ va'e. “Iporä voi ko ja'u so'o. Tupä ra'anga rovagwy-py ijukapyre ro'o ja'u katu” he'i ombotavy rei hagwā íxupe kwéry omboete hagwā Tupä

Nhandejáry e'ŷ va'e kwéry-pe. Omombe'u ave íxupe otĩ e'ŷ reheve oiko hagwā. Ha ko'ây katu gwī ne irū kwéry aipo va'e nhe'ē ojohu porā joty hikwái. Oiko hekombo'e vaikwe-rupi hikwái. Naiporāi voi eremoirū íxupe kwéry. Upéa-rehe xe ndavy'ái, he'i.*

15 —Oĩ ave ne ndive oiko va'e, ne irū kwéry Nicolaíta kwéry remimombe'u ojohu porā va'e. Gwekoha oipe'a ave íxugwi kwéry. Niporāi voi eremoirū ha'e kwéry.

16 —Erova katu upe nde rekoha. Ererova e'ŷ ramo nde rekoha vai-gwi, aha-ta nde ha-py. Ndaxe arevéi-ma aha hagwā orombohasa asy. Areko asy-ta gwekoha ogwerova e'ŷ va'e kwéry-pe. Onhorairō va'e-rami voi areko asy-ta íxupe kwéry. Kysepuku-rami voi aiporu-ta xe nhe'ē ipy'apy-py kwéry amoinge hagwā.

17 —Ne aranduse va'e, ejeadysaka porā katu ko Tupā Nhandejáry Nhe'ē Marangatu tee va'e nhe'ē-rehe. Hesu reroviaha kwéry pegwarā-rehe ejeadysaka porā katu. Onhembohekopyatā uka va'e xe-vy xe rape-rupi ogwata meme hagwā areko porā va'erā. Teminhomigwe ha'u uka va'erā íxupe héry va'e maná. Ame'ē va'erā ave íxupe peteī ita morotī. Hese onhemoī va'ekwe héry. Avave ndoikwaáiry upe héry hesegwa. Ha'e ae ijáry mate oikwaa va'erā heryrā. Upéa ha'eše nde-vy anhemonhe'ē-vy, he'i ohai uka-vy Pérgamo tetā mygwa kwéry pegwarā. Upéa he'i xe-vy Hesu xe-vy anho mante ojehexa uka ramo va'ekwe.

Hesu reroviaha Tiatira tetā mygwa kwéry pegwarā nhe'ē

18 —Ehai jevy katu xe nhe'ē kwatia-rehe, he'i jevy xe-vy. —Tiatira tetā mygwa-pe anhemonhe'ēse ave, he'i. —Xe-rehe ha-py onhomboaty aty va'e kwéry rerekwa-pe xe remimoīgwe pegwarā ehai katu xe-vy, he'i. —Ko va'e ehai íxupe gwarā, he'i va'ekwe xe-vy, he'i.

—Xe ko Tupā Nhandejáry ra'y tee voi. Xe ko xe resa tata rendy-rami ohesape va'e voi ko xe. Bronze hyverapa va'e-rami voi xe py hyverapa, he'i.

19 —Xe aikwaa porā voi nde rekoha. Xe rayhuha voi nde. Erejerovia porā voi xe-rehe. Erepohayhu kwaa voi nde. Ereipytygwō tygwō kwaa voi ereiko-vy. Ereharō arō kwaa ave Nhandejáry he'i va'ekwe oiko hagwā. Ne rembiapo nhypyrrū-gwi iporāve rāve oho-vy.

20 —Upéixa jepe xe-vy ereiko porā jepe oĩ vyteri nde rekoha xe mbovy'are'ŷ va'e. Upéa-rehe anhe'ē pohýi-ta nde-vy. Oĩ pene pa'ū-my upe kunha Jezabel ramigwa hekoha vai eterei va'e. Ha, “Ani teī eremombe'u nhe'ē vai rei” nderéi joty íxupe. Ha'e ombo'e mbo'e vaipa voi xe reroviaha kwéry-pe. Ha, “Anive upéixa eremombe'u mbe'u rei nhe'ē rei” nderéi joty íxupe. Henduha kwéry-pe ave nderéi, “Ani erehendu teī upe va'e nhe'ē. Ekirirī rei katu íxugwi. Ani ererovia teī íxupe. Upéa ko ijapu va'e voi” nderéi ave henduháry-pe. Upéa-rehe xe ndavy'ái voi. Ombotavy tavy voi xe reroviaha kwéry-pe. “Tupā Nhandejáry nhe'ē-py amombe'u voi” he'i rei rei ójehe. Ha nde katu, “Ani erenhe'ē rei teī” nderéi íxupe. Heko porāgwe-gwi ogwerova uka rei xéhegwi xe reroviaha kwéry-pe. “Ani eretī pejogwereko menda e'ŷ reheve” he'i rei upe kunha omombe'u-vy. “Iporā joty ja'u ramo so'o tupā ra'anga rovagwy-py ijukapyre va'e” he'i ave xe reroviaha kwéry-pe ombotavy rei-vy. Ha nde, ereheja rei íxupe. Niporāi voi upéa. Ejoko katu íxugwi.*

21 —Xe aha'arō arō va'ekwe upe kunha ogwerova hagwā mo'ã tekoha vai-gwi gwekoha. Ha ndogwerova mo'ã voi gwekoha.

* **2:14** Nm 25.1,2; 31.16 * **2:20** 1 Rs 16.31; 2 Rs 9.22,30

22 Anhete upéa-rehe ambohasy ete-ta íxupe gwupa-py ohasa asy asy tee hagwā. Gwī indive oiko teko rei-rupi va'ekwe-pe ave ambohasa asy-ta ave indive. Ko'ánga ambohasa asy-ta íxupe kwéry. Upe kunha ndive oiko va'e ndogwerovái ramo gwekoha, ndohejái ramo gwembiaapo vaikwe ambohasa asy tee-ta voi íxupe kwéry.

23 —Ha upe kunha remimbo'e-rupi oiko va'e kwéry omanomba-ta. Xe ahundipa-ta íxupe kwéry. Upéixa ramo entéro xe reroviaha va'e opa-rupi oiko va'e oikwaa-ta ipy'a pygwa xe aikwaaha. Ne akā mygwa nde py'apygwa ave aikwaapa voi xe, he'i.

—Ha peē katu, apogwereko-ta peteī teī-pe pene rembiapokwe-rehe. Hekoha vai va'ekwe-pe areko asy va'erā íxupe. Ha hekoha porā va'ekwe-pe areko porā ave va'erā. Pene rembiapo apokwe-rami apogwereko arā. Upéa ha'ese Jezabel ramigwa va'e nhe'ẽ renduha kwéry-pe.*

24 —Ha peē ambue kwéry va'e naapehenduséiry upe kunha nhe'ẽ. Kóa ha'ese peē-my. Tiatira tetā-my peime jepe pende rekoha porā meme va'e voi peē. Pene mbo'e mbo'e ramo jepe naapehendúiry joty peē upe kunha nhe'ẽ. Heroviaha kwéry he'i mo'ā: "Ore, ore aranduve pendéhegwi" he'i rei va'ekwe peē-my ójehe kwéry. "Orohendu-ma Nhandejáry nhe'ẽ, ha anhaygwasu arandu ave oroikwaa ave ore" he'iri iri va'ekwe ójehe kwéry. Ojohu porā joty voi upe kunha nhe'ẽ hikwái. Anhaygwasu rekoha-rupi voi katu oiko hikwái. "Oroikwaa voi anhaygwasu rekoha" he'iri iri joty ójehe. Ha peē katu ndapejohu porāiry inhe'ẽ. Peē katu ndapeikóiry kuri anhaygwasu arandu-rupi. Upéa pende rekoha-rehe avy'a. Aŷ katu namombe'u heta mo'āvei-ma peē-my.

25 Xe ra'arō tee jave xe aju jevy hagwā áry peve eiko porā katu xe nhe'ẽ-py xe remimombe'ukwe-py, he'i.

26-28 —Onhembohekopyatā va'e, xe nhe'ẽ ojapo meme va'e-pe ambotuvixa va'erā. Omano peve aju jevy ha áry peve ojapo meme ramo xe nhe'ẽ ambotuvixa arā íxupe. Tetā tetā mygwa kwéry xe reroviaha e'ŷ va'e kwéry gwive amoī-ta ipogwy-py. Yma va'ekwe xe Ru omoī va'ekwe opavave xe pogwy-py. Upéixa ave amoī jevy-ta xe-rehe ha-py onhembohekopyatā va'e pogwy-py. Ogweroko va'erā mburuvixagwasu tee mba'e hierro-gwi ijapopyre enterove oikwaa hagwā ipogwy-py oiko-ma xe rerovia e'ŷha kwéry gwive. Ha omanda asy-ta hese kwéry. Ipu'aka hagwe omongu'ipa-ta ita-rami. Mba'e ryru tuju gwigwa-rami omongu'ipa rei va'erā íxupe kwéry ipu'aka hagwe. Omanda asy va'erā hese kwéry. Ha xe nhe'ẽ ojapo va'e-pe ame'ẽ ave ima'erā jasytata ko'ẽ reruha.

29 —Ne aranduse va'e, ejeadysaka porā katu ko Tupā Nhandejáry Nhe'ẽ Marangatu tee va'e nhe'ẽ-rehe. Hesu reroviaha kwéry pegwarā-rehe ejeadysaka porā katu. Upéa ha'ese nde-vy anhemonhe'ẽ-vy, he'i ohai uka-vy Tiatira tetā mygwa kwéry pegwarā. Upéa he'i xe-vy Hesu xe-vy anho mante ojehexa uka ramo va'ekwe.

3

Hesu reroviaha Sardes tetā mygwa kwéry pegwarā nhe'ẽ

1 —Ehai jevy katu xe nhe'ẽ kwaitia-rehe, he'i jevy xe-vy. —Sardes tetā mygwa-pe anhemonhe'ẽse ave, he'i. Xe-rehe ha-py onhomboaty aty va'e kwéry rerekwa-pe xe remimoīgwe pegwarā ehai katu xe-vy, he'i. —Ko va'e ehai íxupe gwarā, he'i va'ekwe xe-vy.

* 2:23 Sl 7.9; Jr 17.10; Sl 62.12

—Xe ko Tupā Nhandejáry rovagwy-py sete nhe'ẽ marangatu ogwerokwa va'e rerekoha voi ko xe. Sete jasytata rerekoha voi ave ko xe. Aikwaa voi nde rekoha. “Ojerovia tee Hesu-rehe” he'i rei nde-rehe hikwái. Ne rerakwā porā rei nde. Nde rekoha tee xe aikwaa voi ave. Nderejerovia porāi-gwi xe-rehe omano-ma va'ekwe-rami voi ereiko. Ndejéupe ne rembiapo porā porā mo'ã ereiko-vy, ha Nhandejáry-pe katu naiporāiry voi.

² Erepala katu ndéjehe. Anive oke va'e-rami rei ereiko. Enhembohekopyatā uka katu xe-vy ne rembigwaa porāgwe-py ereiko hagwā. Okanhy va'erā-ramima oiko ndéhegwi nhe'ẽ porā. Eiko katu ha'e-rupi. Nhandejáry-pe ne rembiapo porā mo'ã. Nerembovy'airy joty íxupe. Ndaha'éi nde py'apy gwive erejapo erejapo va'e. Nane kyre'ỹ porāi erejapo-vy. Upéa aikwaa-ma voi xe, he'i.

³ —Ne mandu'a kena anhetegwa nhe'ẽ Nhandejáry remimombe'ukwe-rehe. Ani eremokanhy teñ upe va'e nhe'ẽ. Erova katu nde rekoha Nhandejáry remimombe'ukwe erejapo porā jevy hagwā. Erepala para katu ndéjehe xe mbovy'a hagwāixa ereiko meme hagwā. Agwahē hagwā óra katu ndereikwaái va'erā. Omonda va'e ogwahēha óra-rami aju arā nde ha-py. Xe ra'arō e'ỹ reheve agwahē-ma va'erā aju-vy.

⁴ —Upéixa ereiko jave xe ndive oĩ joty gwī xe ndive ogwata porā va'e upe pene retā-my, Sardes tetā-my. Ijao morotī va'e-rami ipy'a ky'a e'ỹ reheve oiko joty. Naimandu'ái mba'e vai-rehe. Ha'e kwéry oao morotī reheve oiko-ta xe ndive. Tupā Nhandejáry remimboete voi ha'e kwéry. “Ipy'a potū-ma” he'i va'ekwe hese kwéry.

⁵ Upéixa omonde va'erā oao morotī entérō xe-vy onhembohekopyatā va'e xe-rehe ojehesa mondo mundo va'e gwive. Hekove apyre'ỹ reheve hagwā héry pa'ũ-my onhemoĩ va'ekwe kватia-rehe héry. Upe kватia-gwi namboje'ói voi arā héry. “Ko va'e kwéry xe re'ýi tee” ha'e-ta hese xe Ru-pe. Xe Ru rembigwái kwéry yváy pygwa-pe ave upéixa ave amombe'u-ta hese kwéry.

⁶ Upéa ha'ese nde-vy anhemonhe'ẽ-vy, he'i ohai uka-vy.

—Ne aranduse va'e, ejeadysaka porā katu ko Tupā Nhandejáry Nhe'ẽ Marangatu tee va'e nhe'ẽ-rehe. Hesu reroviahha kwéry pegwarā-rehe ejeadysaka porā katu. Upéa erehai upe Sardes tetā mygwa kwéry pegwarā, he'i xe-vy Hesu xe-vy anho mante ojehesa uka ramo va'ekwe.

Hesu reroviahha Filadélfia tetā mygwa kwéry pegwarā nhe'ẽ

⁷ —Ehai jevy katu xe nhe'ẽ kватia-rehe, he'i jevy xe-vy. —Filadélfia tetā mygwa-pe anhemonhe'ẽse ave, he'i. —Xe-rehe ha-py onhomboaty aty va'e kwéry rerekwa-pe xe remimoigwe pegwarā ehai xe-vy, he'i. —Ko va'e ehai íxupe gwarā, he'i va'ekwe xe-vy.*

—Xe ko xe reko marangatu tee va'e xe. Anhete tee va'e voi ko xe. Chave ogwereko va'e-rami voi aiko. Nhandejáry Nhande Ruvixa ramo renda rokē pe'aha-rami voi xe. Xe-rehe ha-py anho mate oike va'erā yváy-py. Oĩ Davi remiarirõre amoinge va'e, oĩ ave hemiarirõre amoinge e'ỹ va'e. Xe aipe'a ramo okē ndaikatuvéi-ma avave omboty. Ha xe amboty ramo okē ndaikatuvéi-ma ave avave oipe'a. Xe-rehe ha-py mate voi oike va'erā yváy-py. Ha ko'ãy katu anhemonhe'ẽse nde-vy, he'i.

⁸ —Aikwaa nde rekoha. Nane mbaraetéiry jepe erejapo meme xe remimbota. Nde rerekko asy ramo jepe nderejehesa rerovái joty voi xéhegwi. Aipe'a-ma kuri nde-vy ne rokẽrā ramigwa. Ndikatúi avave omboty jevy ndéhegwi upe va'e.

* [3:7 Is 22.22](#)

9 Amondo-ta ne renda-py gwī anhaygwasu re'ýi oikwaa hagwā orohayhu teeha. “Xe ko judeu kwéry va'e” he'i mo'ā ójehe. Onhembotavy rei voi. Judeu re'ýi jepe ndaha'íi joty Nhandejáry rembiporavo teekwe ha'e kwéry. Amogwahē-ta íxupe kwéry ne renda-py. Amonhesū-ta ave íxupe kwéry nde rovagwy-py. Ha'e kwéry oikwaa va'erā orohayhuha. “Ko'ángá ore ave orojerovia-ma ave Hesu-rehe” he'i va'erā nde-vy hikwái. “Ko'ángá oroikwaa-ma Nhandejáry nde rayhu teeha voi” he'i va'erā nde-vy.

10 —Ani erejere xéhegwí, ha'e va'ekwe nde-vy. “Erehasa asy ramo jepe ejapo joty katu xe nhe'ẽ. Tande py'apyhy katu xe nhe'ẽ” ha'e ave nde-vy va'ekwe. Upe xe nhe'ẽ nde py'apyhy-ma. Upéa-rehe anhangareko-ta nde-rehe. Ou va'erā áry areko asy va'erā yvy arigwa-pe ipy'a rekoha imbojehexa uka-vy. Upe jave anhangareko porā joty va'erā nde-rehe.

11 —Xe voi katu aju-ta pya'e nde ha-py. Tane rakate'ý katu upéa nde rekoha porā-rehe. Ani ereheja avave ne mbojere uka xéhegwí oipe'a hagwā ndéhegwí ne mba'erā upéa xéhegwí ojere e'ý va'e pegwarā.

12 —Amombe'u-ta peē-my xéhegwí ojere e'ý va'e rekoha óga jekoka rehewa nhe'ẽ-rami. Óga jekoka óga pygwa voi. Mba'egwasu voi óga pygwa. Óga oiko gwive ndojepé'a mo'āi óga-gwi ijekokaha. Upéixa ave xéhegwí ojere e'ý va'e, onhembohekombaraete xe nhe'ẽ ojapo meme va'e oiko va'erā Nhandejáry oiko ha-py. Nosévéi va'erā Nhandejáry renda-gwi. Mba'egwasu va'e ramo opyta pyta va'erā upé-py. Xe-vy onhembohekopyatā uka va'e-pe amoingo arā Tupā xe Járy re'ýi ramo. Ogwejy ramo yváy-gwi Jerusalém héry va'e tetā pyahu, ha'e oiko va'erā upéa tetā pyahu-py. Xe ave xe rekoha tee-rupi ajehexa uka porā-ma ramo íxupe, areko-ma va'erā íxupe kwéry xe re'ýi tee ramo. Upéa ha'e se nde-vy.

13 —Ne aranduse va'e, ejeapysaka porā katu ko Tupā Nhandejáry Nhe'ẽ Marangatu tee va'e nhe'ẽ-rehe. Hesu reroviahá kwéry pegwarā-rehe ejeapysaka porā katu. Upéa erehai upéa Filadélfia tetā mygwa pegwarā, he'i xe-vy Hesu xe-vy anho mante ojehexa uka ramo va'ekwe.

Hesu reroviahá Laodicéia tetā mygwa pegwarā nhe'ẽ

14 —Ehai jevy katu xe nhe'ẽ kwatia-rehe, he'i jevy xe-vy. —Laodicéia tetā mygwa-pe anhemonhe'ëse ave, he'i. —Xe-rehe ha-py onhomboaty aty va'e kwéry rerekwa-pe xe remimoigwe pegwarā ehai katu xe-vy, he'i. —Ko va'e ehai íxupe gwarā, he'i va'ekwe xe-vy.

—Xe ko, Upéixa toiko kena, ha'e va'e voi ko xe. Xe nhe'ẽ ko ipokatu meme va'e voi. Anhetegwa meme va'e voi xe remimombe'u. Aporombotavy e'ý va'e voi ko xe. Xe ko xe rembiexagwe amombe'u jevy. Nhandejáry omba'e nheypyrru ramo va'ekwe aiko-ma va'ekwe indive xe. Opamba'e Nhandejáry ojapo va'ekwe ndoikói vyteri ramo, aiko-ma voi va'ekwe xe. Xe e'ý rehewe mba'eve ndojapói va'ekwe Nhandejáry. Ha ko'áy katu anhemonhe'ëse-ta nde-vy. Ko va'e ha'e se nde-vy.

15-16 —Aikwaa porā nde rekoha. Yaku vai vai-rami ereiko xe-vy. Naho'ýsā porāiry ha ndahaku porāiry. Upéixa ave ereiko xe-vy nde reko-rehe. Ho'ýsā porā ramo, terā haku porā porā ramo, upéixa ramo iporā va'erā mo'ā xe-vy. Háke, xe jegwaru-tama ndéhegwí. Y ho'ýsā porā e'ý va'e-rami oronhomu-ta.

17 —Amombe'u-ta nde-vy ma'erā-gwi kóixa ha'e kuri nde-vy. Nde ere ndéjehe: “Xe xe mba'e reta va'e ko xe” ere ndéjehe. “Oho porā eterei opamba'e xe-vy. Naikotevëi mba'eve-rehe” ere mo'ā kuri ndéjehe. Xe ae ha'e nde-rehe: Nde ndereikwaáiry voi nde rekoha tee-rehe. Nde poriahu teeha ndereikwaái joty. Ne mba'e reta rei ndovaléi arā nde-vy. Erevy'a e'ýha ave ndereikwaái voi. Ne remikotevë tee va'e-rehe yváy pygwa-rehe nane mandu'ái voi. Xe-vy

ramo hesapyso e'ŷ va'e-rami rei voi ereiko. Ijao e'ŷ va'e-rami ave ereiko. Ha upéa ndereikwaái voi ra'e nde.

¹⁸ Xe ha'e nde-vy: Ejogwa vérámi katu nde reko porãrã. Nde ouro teerã jogwaha-rami opa e'ŷ va'erã ojéupe ojogwaha-rami katu eiko xe-vy ne arandu porãrã ererekohagwã pono nde poriahu eterei. Ao morotã jogwaha-rami ave katu eiko xe-vy ani hagwã ojehexa nde ao e'ŷha nde-rehe nde py'a potilha ereikwaa uka hagwã. Tesa rasy pohã jogwaha-rami ave katu eiko xe-vy ereipohano porã va'e-rami nde resa erehexa porã hagwã xe rape. Anive ere rei ndéjehe, “Aiko porã va'e voi ko xe” anive ere rei tei upéixa ndéjehe.

¹⁹ —Opa ahayhu va'e-pe anhemonhe'ẽ hekoha porã e'ŷ-rehe. Ambohasa asy ave íxupe ogwerova hagwã gwekoha oiko porãve hagwã xe rape-rupi. Upéa-rehe tane kyre'ŷ katu ererova hagwã nde rekoha.

²⁰ —Ejeapysaka katu ko xe nhe'ẽ-rehe: Aime-ma peteĩ okẽ ramigwa yke-rehe. Ojéupe oipe'a ukase va'e-rami aime. Óga járy oipe'a gwokẽ omogwahẽ porã hagwã ombohupa-pe ojogwerohory hagwã va'e-ramima aiko. Xe nhe'ẽ ohendu va'e upéixa xe mogwahẽ porã ramo, aike arã ipy'apy-py. Ambohory-ma arã íxupe. Ha'e ave xe rerohory porã-ma ave va'erã. Onhondivegwa-rami jaiko va'erã.

²¹ Jagwapy katu onhondive xe apykagwasu ári, ha'e-ta xe-rehe ojerovia va'e-pe, xe nhe'ẽ ohendu meme va'e-pe. Xe ajapo hagwe-rami ave ha'e ojapo ave va'erã. Xe Ru remimbota mate ajapo meme hagwã amondo mondo xe resa hese. Ha ãy katu agwapy ijyke-rehe ijapykagwasu ári. Ipu'aka reheve omanda haty ári agwapy ijyke-rehe aĩ-vy. Ha xe-rehe mate omondo gwesa va'e onhembohekopyatã va'e xe remimbota ojapo hagwã ogwapy arã ave xe yke-rehe xe apykagwasu ári.

²² —Ne aranduse va'e, ejeapysaka porã katu ko Tupã Nhandejáry Nhe'ẽ Marangatu tee va'e nhe'ẽ-rehe. Hesu reroviaha kwéry pegwarã-rehe ejeapysaka porã katu. Upéa erehai upé Laodicéia tetã mygwa kwéry pegwarã, he'i xe-vy Hesu xe-vy anho mante ojehexa uka ramo va'ekwe.

4

Yváy-py oĩ va'eomboete tee Nhandejáry-pe

¹ Upéa rire katu ahexa-ma yváy rokẽ ojepe'a-ma va'ekwe oĩ-vy ramo xe-vy. Ha ahexa jave ahendu jevy upe hatã onhe'ẽ va'e onheandu uka xe-vy va'ekwe temimbygwasu nhe'ẽ-rami hatã voi ahendu jevy. He'i xe-vy:

—Ejeipi katu ko'a-py, he'i xe-vy. —Ahexa uka-tama nde-vy ereikwaa hagwã ko'ã rire katu oiko-ma va'erã mba'e, he'i xe-vy.

² Upe jave Tupã Nhandejáry Nhe'ẽ Marangatu tee va'e xe mo'arandu-ma jahexa e'ŷ va'e ahexa hagwã yváy pygwa.

Ahexa peteĩ apykagwasu mburuvixagwasu gwapy haty. Hi'ári oĩ ogwapy va'e. Nhandejáry tee nipo ra'e.

³ Ogwapyha ári ha'e omimbi oĩ-vy. Ita kyra jaspe endy hesakã porã tee va'e-rami voi omimbipa ogwapy oĩ-vy oapykagwasu ári. Ita kyra hesakã sardônio pytã tee opiriri va'e-rami ave ogwapyha ári omimbipa oĩ-vy. Ha ijapykagwasu jerekwe-rehe oĩ jy'y. Ita kyra endy hesakã esmeralda hovy va'e mimbi-rami opyryryrpa voi jy'y ijere-rehe.

⁴ Ahexa ave mburuvixagwasu gwapy haty apykagwasu jerekwe-rehe heta apyka mixi mixi ve va'e oĩ. Vinte e quattro apyka'i oĩ ijerekwe-rehe. Ha'e kwéry mburuvixa gwapyha voi. Vinte e quattro hembiporu igwapyha. Oao morotã omonde va'ekwe. Ojegwaka ouro-gwi ijapopyre omonde ave va'ekwe. Ha

mburuvixa gwapyha ári ogwapy okwa-vy. Apykagwasu jere-rehe ogwapy joa ave okwa-vy apyka'i ári mburuvixa kwéry.

⁵ Upe mburuvixagwasu apykagwasu ae katu overa verapa voi oĩ-vy. Hyapu apu voi oĩ-vy mburuvixagwasu apykagwasu osunu sunu oĩ-vy. Oĩ ave íxugwi onhe'ẽ hatã va'e. Henonde-py ohesape sete tataendy nhane momandu'a hagwã Tupã Nhandejáry Nhe'ẽ Marangatu tee va'e sete okwa va'e-rehe.

⁶ Oĩ ave mburuvixagwasu apykagwasu rovagwy-py peteĩ hesakãgwasu va'e. Tuvixa ete va'e. Ygwasu-rami tuvixa tee voi. Hesakã ita kyra resakã rendygwasu-rami. Irundy Nhandejáry apyka jere-rehe oiko va'ety oĩ ave mburuvixagwasu apykagwasu jerekwe-rehe. Oĩ igwapy haty pa'ũ-my. Ha upe Nhandejáry apyka jere-rehe oiko va'ety hesa reta va'e voi. Henonde-py hapykwe-py ave hesa reta va'e voi.

⁷ Peteĩ va'e jagwaxaygwasu-rami tuvixa jepe ndaipoxýi oiko va'e. Ambue katu tóro-rami oiko va'e. Ambue katu kwimba'e rova-rami oiko va'e. Ambue katu tagwatogwasu oveve va'e-rami oiko va'e.

⁸ Peteĩ teĩ ipopo va'e upe irundy Nhandejáry apyka jere-rehe oiko va'ety. Seis ipopo meme ogwereko. Hesa hesapa va'e meme upe irundy va'e. Ndopytu'úi va'erã voi ha'e kwéry. Áry peve pyhare peve oporahéi joa okwa-vy. He'i oporahéi-vy:

Tupã Nhandejáry imarangatu va'e.

Tuvixa vixa ete va'e Nhande Ruvixa.

Ipy'a potí va'e. Ipu'aka tee va'e.

He'i oporahéi okwa-vy.

Ha'e va'e voi.

Yma gwive ha'e va'ekwe.

Opa e'ŷ va'e voi Nhandejáry, Nhande Ruvixa*
he'i oporahéi joa okwa-vy.

⁹ Oromomba'egwasu tee katu.

Oromboete ete katu.

Orotima tima voi nde-vy.

Orogwerovy'ase Tupã tee ore Járy-pe
he'i oporahéi joa-vy hikwái. Mburuvixagwasu apykagwasu ári ogwapy oĩ-vy
va'e-pe omboete tee okwa-vy. Upe opa e'ŷ reheve oiko va'e-pe omboete joa
oporahéi hikwái.

¹⁰ Ha upe irundy Nhandejáry apyka jere-rehe oiko va'ety oporahéi jave
upe vinte e quatro mburuvixa onhesũ nhesũ joa voi hikwái ogwapy va'e
rovagwy-py. Mburuvixagwasu apykagwasu ári oĩ va'e-pe omboete tee voi
okwa-vy. Upe opa e'ŷ reheve oiko va'e rovagwy-py onhesũ nhesũ joa
voi hikwái imboete-vy. Peteĩ teĩ oity ojegwaka ijapykagwasu renonde-py
imboete-vy. Ombotuvixave hagwã ogwapy va'e-pe ombogwejy. Ha omboete
hagwã íxupe oporahéi joa okwa-vy.

¹¹ Tupã ore Járy, ore Ruvixa

entérove va'e remimomba'egwasuve va'erã voi nde
he'i íxupe.

Nde voi opamba'e erejapo va'ekwe.

Ne remimbota-rupi anhónte entéro oiko-ma va'ekwe.

Eremoingo paete va'ekwe.

Upéa-rehe nde-vy anho mante oromboete tee va'e.

Nde-rehe anho mante oro'e, Tuvixa mba'e, oro'e.

Nde pu'aka tee va'e voi nde.

Ore Járy, ore Ruvixa

* **4:8** Ez 1.18; 10.12; Is 6.2-3

he'i oporahéi joa imboete-vy hikwái. Upe mburuvixagwasu apykagwasu ári ogwapy oĩ va'e-pe omboete tee voi íxupe hikwái.*

5

Kwatia imbojapyre ojora va'erã Ovexa Ra'y ramigwa va'e

¹ Upe rire ahexa kwatia inhapemombypyre. Mburuvixagwasu apykagwasu ári ogwapy oĩ va'e po akatúa-py ahexa oĩ upe va'e kwatia. Ijape-rehe igwy-rehe ave oĩ hese nhe'ẽ. He iraity ramigwa-py omondyky omboja hagwã ojóehe va'ekwe. Sete imbojapyre oĩ hese. Ogwapy oĩ-vy va'e po-py ahexa upe kwatia.

² Ahexa ave peteĩ Nhandejáry rembigwái yváy pygwa va'e. Ipu'aka va'e. Hatã onhe'ẽ oporandu-vy: Kiva'e po oipe'a va'erã kwatia imbojapyre ojora va'erã hexa-vy? he'i oporandu-vy. Avave para'e ndoikóiry heko marangatu porã va'e ojora va'erã hexa-vy? he'i oporandu-vy.

³ Ha avave ndoikói ipe'a kwaaharã. Yváy-py ndaipóri. Yvy-py ndaipóri ave. Yvygwy-py ndaipóri ave. Avave ndoikóiry heko kwaaharã.

⁴ Ahexase eterei-gwi amboasy. Upéa-gwi xe rasẽ. "Ndojohúi ra'e ipe'aharã" ha'e xejéupe. "Ndikatúi opa va'e rei oipe'a. Heko marangatu va'e po pygwarã voi ra'e upe kwatia ha upeixagwa ndojohúiry ra'e ipe'aharã" ha'e xejéupe anhemboasy-vy.

⁵ Upéa ha'e-ma ramo peteĩ mburuvixa he'i xe-vy:

—Ani erejahe'o teĩ, he'i. —Oĩ voi peteĩ ipe'a kwaaharã, he'i xe-vy. —Judéu re'ýi kwéry gwigwa upe va'e, he'i. —Davi hembypy, he'i hese. —Ha'e leão imbaraeteha-rami imbaraete tee va'e, he'i hese. —Onhembo'aka-ma va'ekwe opamba'e-rehe. Nonheme'ëi va'ekwe ojeity ukaharãgwe-pe. Sete imbojapyre oipe'a va'erã voi ko kwatia nhe'ẽ ohexa hagwã, he'i hese.*

⁶ Upéi katu ama'ẽ ramo ahexa Ovexa Ra'y ijukapyre ramigwa oikove jevy-ma onhembo'y oĩ-vy ramo mburuvixagwasu apykagwasu renonde ete-py. Upe irundy Nhandejáry apyka jere-rehe oiko va'ety pa'ũ-my oĩ. Gwĩ mburuvixa kwéry pa'ũ-my ahexa upe Ovexa Ra'y ramigwa va'e oiko. Hesa jojapa va'e. Hatã eta va'e. Sete hesa ogwereco va'e. Sete hatã ave ogwereco ave upe Ovexa Ra'y ramigwa va'e. Upe sete hesa nhane momandu'a Tupã Nhandejáry Nhe'ẽ Marangatu tee va'e-rehe. Gwĩ sete opa-rupi yvy ári onhemondo mondo va'ekwe-rehe.*

⁷ Ha upe jave upe Ovexa Ra'y ramigwa va'e ijukapyre oikove jevy va'ekwe ou ogwahẽ ogwapy oĩ-vy va'e ha-py. Upéi oipyhy ipo-gwi, ipo akatúa koty ogwereco va'e kwatia oipyhy oipe'a íxugwi.

⁸⁻⁹ Oipe'a-ma ramo gwĩ ijerekwe rupigwa onhesũ joa Ovexa Ra'y ramigwa va'e rovagwy-py imboete-vy. Upe irundy Nhandejáry apyka jere-rehe oiko va'ety onhesũ hovagwy-py ave. Upe vinte e quatro mburuvixa kwéry ave hovagwy-py onhesũ ave. Peteĩ teĩ ogwereco opo-py hikwái gwemimbopu isã reta va'e. Mba'e ryru ouro-gwi ijapopyre ogwereco meme ave. Ha mba'e ryru meme-py oĩ hyakwã porã porã va'e. Hesu reroviaha kwéry ombojeupi upi onhe'ẽ Nhandejáry-pe hyakwã porã va'e vérami.* Ha mburuvixa kwéry onhesũ Ovexa Ra'y ramigwa va'e rovagwy-py imboete-vy. Oha'ã peteĩ mborahéi pyahu okwa-vy hikwái.

Enterove remimomba'egwasu arã nde.

Iporã voi ereipyhy ko kwatia nhe'ẽ

Imbojapyre ereipe'a ave.

* **4:11** Ap 5.9-14; 7.9-12; 11.16-18; 19.1-4
Sl 141.2

* **5:5** Gn 49.9-10; Is 11.1

* **5:6** Is 53.7; Zc 4.10

* **5:8-9**

Nde voi erejejuka va'ekwe.

Nde rugwy avyte-py eremano va'ekwe
eremopotī potī hagwā heta eta va'e Nhandejáry pegwarā.
Opa opa rupigwa yvy oho va'e-rupigwi ou va'ekwe eremopotī Nhan-dejáry pegwarā.

Ijypyē pye va'e eremopotī Nhandejáry pegwarā.

Nhe'ẽ ambue mbue-py onhe'ẽ va'e eremopotī Nhandejáry pegwarā.
Kente ambue mbue opa rupigwa eremopotī Nhandejáry pegwarā.
Gwetā gwetā rupigwa eremopotī íxupe gwarā.

Ereipe'a va'ekwe íxupe kwéry

Tupā Nhandejáry pegwarā he'yirā va'ekwe.

¹⁰ Eremingo íxupe kwéry mburuvixagwasu ramo.

Eremingo-ma íxupe kwéry Nhandejáry re'yí kwéry ramo
pa'i-rami ha'e kwéry omboete ete hagwā Nhandejáry-pe.

Oiko va'erā mburuvixagwasu ramo yvy ári ne remimopotīkwe.

Upéa-rehe iporā voi nde ereipe'a imbojapyre
erehexa hagwā kwtia nhe'ẽ,

he'i oporahéi joa okwa-vy Ovexa Ra'y ramigwa va'e-pe imboete-vy.*

¹¹ Upéi ahexa, ahendu ave hetave oporahéi va'e. Avave ndoipapa kwaáiry upe oporahéi va'e-pe heta eterei hikwái. Nhandejáry rembigwái yváy pygwa meme hikwái. Mburuvixagwasu apykagwasu jerekwe-rehe oporahéi.* Gwī Nhandejáry apyka jere-rehe oiko va'ety jerekwe-rehe ave, mburuvixa va'e kwéry jerekwe-rehe ave

¹² oporahéi okwa-vy.

Oromboetese-gwi ore oroporahéi nde jerekwe-rehe.

Ereikove jevy-gwi oromboeteseve voi nde-vy,

he'i íxupe oporahéi okwa-vy imboete-vy.

Nde Ovexa Ra'y-rami nde juka va'ekwe.

Upe rire ereikove jevy-ma va'ekwe.

Nde pu'aka tee va'e nde opaixagwa-rehe, opamba'e-rehe ave.

Entéro mba'e mba'e nde-vy gwarā voi.

Nde ne arandu tee va'e voi.

Tuvixa vixa ete va'e voi nde.

Iporā voi enterove ne mboete ete tee.

Ne mba'egwasu gwasu ete voi nde.

Iporā voi enterove omoherkwā porā nde rehewa nhe'ẽ

Ne rerohory hagwā.

Iporā voi oronhe'ẽ porā porā nde-rehe,

he'i oporahéi okwa-vy.*

¹³ Upéi ahendu-ma oporahéi joa ramo okwa-vy. Yváy-py oĩ va'e, yvate okwa va'e, yvy pype ave yvygwy-py okwa va'e ave, ygwasu gwy-rupi okwa va'e ave, opamba'e ipy-py kwéry okwa va'e gwive oporahéi joa okwa-vy. He'i oporahéi ramo okwa-vy:

Tonhemomba'egwasu porā katu

Mburuvixagwasu apyka ári ogwapy oĩ-vy va'e-pe,

Ovexa Ra'y ramigwa-pe ave.

Tonhemboete tee katu pe Nhandejáry-pe.

"Entéro remimomba'egwasu voi ko nde"

te'i katu Nhandejáry-pe.

"Nde ko, nde pu'aka tee va'e voi" te'i ave íxupe.

* ^{5:10} Èx 19.6 * ^{5:11} Dn 7.10 * ^{5:12} Is 13.10; Ez 32.7; Jl 2.31; Mt 24.29; Mc 13.24-25; Lc 21.25

Opa e'ŷ reheve upéixa toiko íxupe,
he'i oporahéi joa okwa-vy.

¹⁴ Ha gwĩ irundy Nhandejáry apyka jere-rehe oiko va'ety he'i:
—Upéixa voi toiko, he'i.

Ha gwĩ vinte e quattro mburuvixa kwéry onhesũ ogwapy oĩ va'e rovagwy-py Ovexa Ra'y ramigwa va'e rovagwy-py ave. Ha omomba'egwasu gwasu upe Nhandejáry-pe.**

6

Ovexa Ra'y ramigwa va'e oipe'a kwatia-gwi gwĩ imbojapyre

¹ Upéi ahexa Ovexa Ra'y ramigwa va'e oipe'a peteĩ vyte kwatia nhe'ẽ imbojapyre. Upe jave ahendu peteĩ Nhandejáry apyka jere-rehe oiko va'ety onhe'ẽ.

—Ejo katu, ho'e-vy hyapu inhe'ẽ.

² Ama'ẽ ramo ahexa-ma ou kavaju morotĩ ári ou va'e. Gwyrapa ave ogweru opo-py. Ha ahexa omoĩ ramo inhakã-rehe ijegwakarã mburuvixagwasu pegwarã. Upe rire osẽ ipu'aka reheve onhembopu'aka hagwã opaixagwa-rehe kavaju morotĩ arigwa.

³ Upe-ma ramo upe Ovexa Ra'y ramigwa va'e peteĩ imbojapyre jevy oipe'a kwatia nhe'ẽ-gwi. Upe mokõiha oipe'a-ma ramo ambue Nhandejáry apyka jere-rehe oiko va'ety katu onhe'ẽ:

—Ejo katu, he'i onhe'ẽ-vy.

⁴ He'i-ma ramo osẽ peteĩ kavaju pytã va'e ári ou va'e. Upéi ome'ẽ íxupe ipu'akarã.

—Ne nhe'ẽ-py kente kwéry ndaipy'a porã mo'ãvéiry ojóehe kwéry, he'i íxupe.

—Inhanha tee tee va'e onhorairõ va'erã ojojuka hagwã hikwái onhondive, he'i ave íxupe.

Ome'ẽ ave íxupe peteĩ kyse ipuku tee va'e.

⁵ Upéi Ovexa Ra'y ramigwa va'e oipe'a jevy peteĩ imbojapyre kwatia-gwi. Upe mbohapyha oipe'a-ma ramo ahendu ambue Nhandejáry apyka jere-rehe oiko va'ety katu. He'i:

—Ejo katu, he'i.

He'i ramo, ahexa-ma peteĩ kavaju hũ va'e ári ou va'e. Opo-py ogwereko peteĩ mba'e pohýi kwaaha.

⁶ Upe irundy Nhandejáry apyka jere-rehe oiko va'ety apyte-gwi ahendu ave nhe'ẽ. He'i:

—Ivare'apa rei va'erã okwa-vy. Temi'urã ojogwa hagwã kente kwéry hepy voi va'erã, he'i. —Peteĩ áry repy-rehe peteĩ kilo mate ojogwa arã trigo, he'i.
—Ha cevada ojogwase ramo mbohapy kilo ojogwa arã peteĩ áry repy-rehe. Upéixa hepy eterei ramo jepe hemi'urã ani joty erembohepy eterei teñ nhandy ha vinho ave, he'i.

⁷ Upe rire Ovexa Ra'y ramigwa va'e oipe'a jevy peteĩ imbojapyre. Upe irundyha oipe'a-ma ramo kwatia-gwi ahendu jevy ambue Nhandejáry apyka jere-rehe oiko va'ety nhe'ẽ:

—Ejo katu, he'i.

⁸ Ha ama'ẽ ahexa peteĩ kavaju hesa'yju va'e ári ou va'e. Upéa réry Nhemanó Járy. Omano va'ekwe ogweropyta haty járy ou hapykwéri. Ha Nhandejáry omombe'u íxupe ojuka juka uka hagwã kente kwéry-pe:

—Ekwa katu opa-rupi upe yvy arigwa oĩ ha-rupi erejuka juka uka hagwã, he'i. —Irundy kente meme-gwi ejuka uka peteĩ teñ-pe optya hagwã mbohapy

* ^{5:14} Is 31.4 * ^{5:14} Ap 4.8-11; 7.9-12; 11.16-18; 19.1-4

hapy. Kysepuku-py omano hagwā heta eta va'e. Ivare'a eterei-gwi heta ave omano hagwā. Mba'asy-gwi omano hagwā heta ave. Ha mymba kwéry ka'agwy-rupi oī va'e ojuka va'erā ave heta eta kente-pe, he'i omanda-vy Mano Járý-pe.

⁹ Upe rire jevy katu Ovexa Ra'y ramigwa va'e oipe'a jevy peteī kwatia nhe'ē imbojapyre. Ko va'e cincoha oipe'a-ma. Oipe'a-ma ramo upe cincoha ahexa heta omano va'ekwe nhe'ē marangatukwe. Ha'e kwéry omosarambi porā porā va'ekwe Tupā Nhandejáry remimombe'ukwe. Oiko porā ave va'ekwe inhe'ē-py. Hemimombe'ukwe nohenduséi va'e kwéry ojukase jepe íxupe omombe'u joty. Nahakate'ŷiry gwekove-rehe. Omombe'u meme joty. Upéa-rehe nohenduséi va'e ojuka va'ekwe peteī teī-pe íxupe kwéry. Ha ko'āy ahexa inhe'ē marangatukwe. Nhandejáry-pe omboeteha renda gwy-py oime hikwái.

¹⁰ Peteīxa onhe'ē hatā hikwái:

—Ore Járý, ore Ruvixagwasu, ne marangatu tee va'e. Anhetegwa voi nde. Araka'e peve tipo nde are-ta ore repy hagwā-rehe? Araka'e tipo ererekō asyta ore jukahare kwéry-pe? he'i oporandu randu íxupe okwa-vy.

¹¹ Upe he'i-ma ramo ome'ē peteī teī-pe ijao morotřā. Ha he'i íxupe kwéry:

—Pepytu'u kirirīha-py peha'arō-vy, he'i. —Oī joty hetave omano va'erā pende juka hagwe-rami. Gwī Hesu rembigwái, ne irūra ojejuka va'erā gwive peha'arō kirirī-my pene irūrā kwéry-rehe, he'i íxupe kwéry.

¹² Upéi ahexa Ovexa Ra'y ramigwa va'e oipe'a jevy peteī kwatia nhe'ē imbojapyre. Seisha-ma oipe'a. Peteī mate ndoipe'ái vyteri. Ha oipe'a-ma ramo upe seisha-ma omýimba-ma yvy. Ha kwarahy onhemohūmba-ma ave. Ao hū ete-rami optya kwarahy rova. Jasy rova katu pytāmba-ma ave. Tugwy-rami ipytā mbaete jasy rova.

¹³ Ha jasytata ho'a joa-ma. Yvytu eterei oipeju peju ramo figo rakā-me okuipa figo hi'a e'ŷ va'e. Upéixa voi ho'a paete jasytata yvy-py.

¹⁴ Áry jepe ojei henda-gwi onheapypewā rehewe ho'a ou-vy. Gwī yvyatyrusu kwéry ojeipa-ma voi gwendarwe kwéry-gwi. Ymbyte-py oī va'e yvygwasu kwéry ave ojeipa gwendarwe-gwi.

¹⁵ Upéa-rehe entérō kente kwéry omondýí eterei-gwi okanhymba onhemi hagwā. Mburuvixagwasu ete yvy arigwa kwéry jepe okanhymba mo'ā ave. Coronel kwéry ave okanhymba mo'ā ave. Entérō imba'e reta va'e gwive, ipu'aka va'e gwive, hembigwái ramo oiko va'e kwéry gwive, gwembiapo mate ojapo va'e kwéry gwive okanhymba mo'ā ave hikwái. Entérōve gwive okanhymbase mo'ā. Yvyatyrusu gwy-py oikepa hikwái okanhymba hagwā mo'ā. Itaty-rupi oje'ói hikwái okanhymba hagwā mo'ā. Ojepy'apy voi hikwái omanose oiko-vy ojejuka ukapase mo'ā.*

¹⁶ He'i ójehe kwéry,

—Ndaipotáiry xe rexā avave, he'i. —Tondururu katu nhande ári itagwasu pehēgwe hēgwe. Taxe mbohay'i y'ipa itagwasu. Taxe jatypa yvyatyrusu omongu'igwasu-vy pono xe rexave upe mburuvixagwasu apykagwasu ári ogwapy oī-vy va'e, pono ave upe Ovexa Ra'y ramigwa va'e xe rexā ave, he'i. —Ogweroma'eandu va'erā xe rekoha vaikwe, he'i okanhymse mo'ā-vy hikwái.*

¹⁷ —Ogwahē-ma ra'e upe áry ogweroma'eandu hagwā nhande rekoha vaikwe, he'i ojóupe hikwái. —Ogwahē-ma hi'áry hembiapo vaikwe-rehe gwive ogwereco asy asy hagwā, he'i. —Avave ndaipu'akái va'erā hese, he'i onhemise mo'ā okwa-vy hikwái.*

* 6:15 Is 2.10 * 6:16 Os 10.8 * 6:17 Jl 2.11; Ml 3.2

7

Nhandejáry re'yi ojekwaa hagwā omoī va'e isyva kwéry-rehe

¹ Upe rire ahexa irundy Nhandejáry rembigwái yváy pygwa va'e. Yvy rapy rugwa-py peteī teī onhembo'y oī-vy ramo. Ha'e kwéry ojoko joko gwī irundy yvytu pono oipeju mba'eve-pe. Pono oipeju yvy-pe terā ygwasu-pe terā entéro va'e yvyra-pe ojoko joko yvytu hikwái. Upe irundy oī va'e yvytu jokoha.*

²⁻³ Ahexa ave peteī jevy Nhandejáry rembigwái yváy pygwa. Kwarahy resē ha-gwi ou. Ojekwaa uka hagwā Tupā Nhandejáry opa e'ŷ va'e re'yi kwéry va'e syva-rehe ohai hagwā ou. Upéa-rehe osapukái hatā gwe'ŷi kwéry-pe, upe irundy va'e yvytu jokoha-pe osapukái hatā:

—Eha'arō ranhe katu, he'i íxupe osapukái-vy.

Nhandejáry omanda íxupe kwéry ponove ojoko yvytuhu yváy pygwa re-he ygwasu-rehe ojapo vai hagwā ave. Ha upe kwarahy resē-gwi ou va'ekwe ojerure íxupe kwéry oha'arō hagwā.

—Eha'arō ranhe katu erejapo vai hagwā upe yvytuhu yváy pygwa re-he yvýra kwéry-rehe ave. Eha'arō ranhe katu. Orohai ranhe-ta oromoī-vy Nhandejáry reroviaha kwéry syva-rehe ojekwaa hagwā. Oromoīmba rire ae kuri ejapo vai, he'i Nhandejáry rembigwái yvýtugwasu jokoha kwéry-pe.*

⁴ Upe he'i rire ae katu ahendu-ma mbovy pa oī upeixagwa isyva-rehe Nhandejáry re'yi ojekwaa hagwā omoī va'e oī. Ahendu-ma cento cuarenta e quattro mil-ma oī. Entéro Israel ra'y re'yi kwéry re-hegwa va'e gwive omoī heta.

⁵ Omoī doze mil meme hese kwéry. Omoī doze mil Judá re'yi kwéry re-hegwa va'e syva-rehe omoī. Doze mil Rúben re'yi kwéry re-hegwa va'e syva-rehe ave omoī. Doze mil Gade re'yi kwéry re-hegwa va'e syva-rehe ave omoī.

⁶ Doze mil Aser re'yi kwéry re-hegwa va'e syva-rehe ave omoī. Doze mil Naftali re'yi kwéry re-hegwa va'e syva-rehe ave omoī. Doze mil Manassés re'yi kwéry re-hegwa va'e syva-rehe ave omoī.

⁷ Simeão re'yi kwéry re-hegwa va'e syva-rehe ave omoī doze mil. Levi re'yi kwéry re-hegwa va'e syva-rehe ave omoī doze mil. Issacar re'yi kwéry re-hegwa va'e syva-rehe ave omoī doze mil.

⁸ Doze mil Zebulom re'yi kwéry re-hegwa va'e syva-rehe ave omoī. Doze mil José re'yi kwéry re-hegwa va'e syva-rehe ave omoī. Doze mil Benjamim re'yi kwéry re-hegwa va'e syva-rehe ave omoī. Doze mil meme omoī. Heta voi Nhandejáry re'yi ombojekwaa hagwā omoī va'ekwe isyva-rehe.

Opy'a potīha-rami ao morotī-my onhemonde va'e oī okwa-vy Nhandejáry rovagwy-py

⁹ Upe rire ae ahexa heta eta onhomboaty va'e. Onhemboheta verei okwa-vy ndikatúi hagwā avave oipapa íxupe kwéry. Opa opa rupigwa yvy oho va'e-rupigwi ou va'ekwe hikwái. Gwetā gwetā rupigwa ou va'ekwe hikwái. Gwembypyre pye-gwi ou va'ekwe hikwái. Opa opa kente ambue mbue kwéry re-hegwa ou va'ekwe hikwái. Nhe'ẽ ambue mbue-py onhe'ẽ va'e kwéry ave ou va'ekwe hikwái. Mburuvixagwasu gwapy haty rovagwy-py, Ovexa Ra'y ramigwa va'e rovagwy-py onhembo'y joa okwa-vy. Oao morotī re-heve oī hikwái upe-py. Ha entérove pindo rakāgwe opo-py ogwereko joa re-heve hikwái.

¹⁰ —Tupā Nhandejáry katu ogwapy oī-vy mburuvixagwasu gwapy haty ári. Ha'e katu Nhane Resendeha voi.

Ovexa Ra'y ramigwa va'e Nhane Resendeha voi,

* 7:1 Zc 6.5 * 7:2-3 Ez 9.4

he'i oporahéi hatã okwa-vy.

¹¹ Ha entéro Nhandejáry rembigwái yváy pygwa va'e onhembo'y joa oĩ-vy hikwái Nhandejáry gwapy haty jere-rehe. Upe mburuvixa kwéry va'e gwive ojere joa ave hese hikwái. Upe irundy Nhandejáry apyka jere-rehe oiko va'ety gwive ojere joa ave hese hikwái. Ha onhesú joa okwa-vy henonde-py ojeayvy-ma Nhandejáry-pe omboete eterei-gwi.

¹² —A-rami toiko,
ho'e-vy.

—Terenhemomba'egwasu katu ore-vy ore Járy,
he'i joa omboete ete tee-vy íxupe.

—Orombotuvixa ete voi nde-vy.
Nde ne arandu tee va'e voi nde.
Orotima tima meme va'erã voi nde-vy.
Oromoherakwãgwasu va'erã nde réry.
Nde pu'aka tee-ma va'e voi nde,

he'i íxupe.

—Ne mbaraete tee va'e voi nde.
Upéixa oro'e meme va'erã ne mboete tee-vy
erepa e'ý reheve oromboete tee-vy oro'e nde-vy.
Nde ore Járy tee va'e.

A-rami toiko meme,
he'i oporahéi joa imboete-vy hikwái íxupe.*

¹³ Upéi peteĩ mburuvixa oporandu xe-vy:
—Ereikwaa tipo ki-gwi pa ou ra'e pa ko'ã va'e kwéry ijao morotí va'e? he'i xe-vy. —Ereikwaa tipo kiva'e kwéry ko'ã va'e? he'i xe-vy oporandu-vy.

¹⁴ Ha xe katu ha'e íxupe:
—Ndaikwaái voi xe. Nde ae, ne mburuvixa va'e ereikwaa ra'e, ha'e íxupe.
Upe-ma ramo he'i jevy xe-vy:

—Ko va'e kwéry ohasa asy puku va'ekwe jepe ojerovia joty upe Ovexa Ra'y ramigwa va'e-e-rehe. Gwugwy apyte-py omano va'ekwe-gwi ha'e omboykepa íxugwi kwéry hembiapo vaikwe gwive. Opy'a potíha rexá uka-vy omonde-ma hikwái oao morotí.*

¹⁵ Upéixa-gwi onhembo'y joa hikwái Tupã Nhandejáry gwapyha rovagwy-py. Áry-rupi, pyhare peve nosẽ mo'ãi hikwái Nhandejáry renda-gwi. Hemim-bota ojapo meme hikwái íxupe omboete-vy. Upe mburuvixagwasu gwapy haty ári ogwapy va'e onhangareko porã ete hese kwéry. Indive oĩ-gwi ndojeju mo'ãi mba'eve íxupe kwéry.

¹⁶ Ndaivare'a mo'ãvéi-ma va'erã. Ndaijy'uhéi mo'ãvéi-ma va'erã. Nonhan-duvéi-ma va'erã íxupe kwéry kwarahy haku eterei va'e terã ambue haku va'e.*

¹⁷ Pe Ovexa Ra'y ramigwa va'e mburuvixagwasu gwapy haty mbyte-py oĩ va'e onhangareko va'erã hese kwéry. Herekwa onhangareko porãha-rami gwymba-rehe ogweraha va'erã íxupe kwéry omboy'u hagwã upe yvu nhane moingove va'e-py, nhande py'apy pygwarã. Ha Tupã Nhandejáry oikyty va'erã íxupe kwéry hesay.*

8

Ipahagwe oipe'a jevy kwatia-gwi imbojapyre

* **7:12** Ap 4.8-11; 5.9-14; 11.16-18; 19.1-4 * **7:14** Dn 12.1; Mt 24.21; Mc 13.19 * **7:16** Is 49.10 * **7:17** Sl 23.2; Is 25.8

¹ Upe Ovexa Ra'y ramigwa oiko va'e oipe'a jevy kwaitia-gwi imbojapyre ipahagwe va'e. Oipe'a-ma ramo onhekiririmbá yváy pygwa kwéry. Meia hora-rupi enterove va'e okiririmbá voi okwa-vy.

² Upe rire ahexa sete yváy pygwa Nhandejáry rembigái Tupã Nhandejáry rovagwy-py onhembo'y oĩ-vy va'e. Ahexa jave peteĩ teĩ mimbygwasu ome'ẽ-ma íxupe kwéry.

³ Upéi ambue va'e yváy pygwa Nhandejáry rembigwái ou ave. Onhembo'y oĩ-vy nhemboete haty renonde-py. Opo-py ogwereco ouro-gwi ijapopyre hyakwã porã va'e ryru. Ha ome'ẽ íxupe heta eta hyakwã porã va'e.

—Ko hyakwã porã va'e embojehe'a Nhandejáry re'yi remimbojeupikwe ndive. Opa rupigwa Nhandejáry-rehe ojerovia va'e ombojeupi upi onhe'ẽ Nhandejáry-pe. Upe hemimbojeupikwe oĩ-ma mburuvixagwasu gwapy haty rovagwy-py. Nhemoete haty ári oĩ-ma Tupã Nhandejáry re'yi remimbojeupikwe. Embojehe'a katu hemimbojeupikwe ko hyakwã porã va'e ndive, he'i íxupe.

⁴ Ombojehe'a ojóehe rire ipo-gwi osẽ oho-vy hyakwã porã va'e ratatígwé ojeupi ogwahẽ hagwã oho-vy Nhandejáry-pe. He'yi remimbojeupikwe ndive onhehetũ uka hagwã ogwahẽ oho-vy íxupe.

⁵ Upéi katu upe yváy pygwa Nhandejáry rembigwái omohynyhẽ jevy upe ouro-gwi ijapopyre hyakwã porã va'e ryrukwe. Oipe'a tata nhemboete haty-gwi ha omohynyhẽ hyakwã va'e ryrukwe. Upéi onhohẽmba jevy yvy-py oitypa tata yvy-py. Upe-ma ramo osunu sunu hyapu ijayvu hatã joa ave. Overa vera hatã atã ave. Hatã atã ave oryrí yvy.*

Gwemimbygwasu ombopu peteĩ teĩ Nhandejáry rembigwái marány kwéry oity uka-vy

⁶ Upe-ma ramo upe Nhandejáry rembigwái yváy pygwa va'e opo-py meme ogwereco hikwái gwemimbygwasu ombopu va'erã-rami teĩ ogwereco hikwái opo-py. Sete meme ogwereco hikwái gwemimbygwasu ombopu va'erã hikwái.

⁷ Upéi upe ombopu ypy va'e ombopu gwemimbygwasu. Ombopu ramo ho'a-ma amandáu, tata ave tugwy reheve ojepe'a ho'a oho-vy yvy-rupi. Okái yvy. Terça parte okái. Imbohapy hapyha yvyra máta hakã reheve okái. Kapi'ipe ohapypa ave. Upéixa Nhandejáry ombou uka marány íxupe kwéry.*

⁸ Upe rire joty Nhandejáry rembigwái mokõiha ombopu jevy gwemimbygwasu. Upéi ombopu rire joty gwemimbygwasu yvyatyrusu ramigwa tata reheve onhemombo ygwasu hembe'y e'ŷ va'e-py. Upéi ho'a rire upe yvyatyrusu tata reheve haimete rei y mbyte gwive ogwahẽ tugwy. Imbohapy hapyha ave tugwy ramo oiko.

⁹ Haimete omanomba vixo ygwasu hembe'y e'ŷ va'e gwy-py okwa va'e kwéry. Terça parte omano. Omano ave ogwata va'e kanoagwasu-py. Heta omano. Imbohapy hapyha ave omano. Hyrukwe reheve onhembyaipa. Upéixa Nhandejáry ombou uka jevy marány íxupe kwéry.

¹⁰ Upéi katu Nhandejáry rembigwái mbohapyha ombopu jevy gwemimbygwasu. Ombopu-ma ramo gwemimbygwasu katu, ho'a yváy-gwi jasytata hendy va'e. Tata rendy-rami ho'a. Ysyry-rupi meme ho'a. Yvu-py meme ave ho'a. Imbohapy hapyha-rupi ho'a.*

¹¹ Ho'a va'e renda renda omboro. Jasytata hendy va'e ho'a ramo onhembohéry iro va'e. Ho'a ramo y-py omboropa-ma y. Ijy'uhéi va'e gwive hoy'u

* ^{8:5} Lv 16.12; Ez 10.2; Ap 11.19; 16.18 * ^{8:7} Ex 9.23-25 * ^{8:10} Is 14.12

ramo ojuka íxupe kwéry. Heta heta voi omano oy'u va'e. Upéixa Nhandejáry ombou uka jevy marány íxupe kwéry.

¹² Upéi Nhandejáry rembigwái inhirundyha ombopu jevy gwemimbyg-wasu. Ombopu jevy-ma jave katu ombogwe-ma kwarahy rendy, jasy rendy, jasytata rendy ave. Terça parte ombogwe-ma íxugwi. Upéa-gwi nahendyvéi-ma imbohapyha kwarahy, jasy, jasytata ave. Upéa-gwi áry ramo imbohapyha va'e ndohesapevéi-ma kwarahy. Pyhare ramo imbohapyha ndohesapevéi-ma ave jasy, jasytata reheve. Upéixa Nhandejáry ombou uka jevy marány íxupe kwéry.*

¹³ Upéi katu ahexa oveve ramo yváy-rehe tagwatogwasu. Yváy mbyte-rehe oveve jave ahendu hatã hatã onhe'ẽ omombe'u-vy:

—Amboasy voi, amboasy voi, amboasy voi. Omomytu e'ŷmba-ta yvypóry, he'i. —Ohendu ramo upe mbohapy hemimbygwasu ne'írã vyteri ombopu va'e omomytu'e'ŷmba-ta yvypóry, he'i.

9

¹ Ko cincoha Nhandejáry rembigwái yváy pygwa va'e ombopu gwemimbygwasu. Upe jave ahexa jasytata ramigwa ho'a voi nipo araka'e yváy-gwi. Yvy-py ho'a-ma araka'e. Upéa katu onheme'ẽ íxupe peteĩ imboty teeha chave ramigwa yvykwarusu ijapyre'ŷ va'e onhehekoenda'o jevy hagwã.

² Ha oipe'a-ma ramo upe yvykwarusu ijapy e'ŷ va'e rokẽ íxugwi osẽ-ma tatatírusu tatakwagwasu-gwi osẽ va'e ramigwa tatatírusu. Upe yvykwarusu ijapy e'ŷ va'e ratatíwe ojereroyvate oho-vy. Kwarahy rova-py oho-ma omopytũmba hagwã. Ndohesapevéi-ma kwarahy. Aragwy opa-ma omopytũmba-ma ave.

³ Tatatírusu pa'ũ-gwi osẽ-ma tukukaru marány. Ogwejy-ma ko yvy-rehe. Ome'ẽ ave íxupe gwĩ tukukaru-pe oporojopi hagwã opykõi-py japeusagwasu-rami joty.*

⁴ He'i ave gwĩ tukukaru-pe ani hagwã ombyai gwĩ hogwe rovy va'e, ani hagwã ombyai yvyra máta ave, ani hagwã ombyai oime raẽ va'e temitýgwe, omoingo asy hagwã ae gwĩ kente kwéry ogwerek e'ŷ va'e Nhandejáry Tupã rembihaikwe osyva-rehe.*

⁵ Ndojuka mo'ãi jepe gwĩ kente kwéry-pe ombohasa asy-ta ae íxupe kwéry. Cinco jasy peve upe mba'asy hasy arã japeusa nhande jopi hagwe-rami.

⁶ Upe cinco jasy jave kente kwéry he'i arã, "Amanose-ma voi xe" he'i rei arã ójehe. Ha nomano mo'ãi va'erã voi. Oheka arã omano hagwã mo'ã. Ndojohúi arã omano hagwã. Omanose asy ramo jepe, nomanói va'erã voi. Okanhy arã íxugwi imanoharãgwe.*

⁷ Aipo ramo tukukaru katu ijehexa kavaju-rami onhorairõ hagwã-py oho va'e. Hova anheĩ-rami voi kwimba'e rova, ijegwaka katu anheĩ-rami ave ouro-gwi ijapopyre.*

⁸ Ha inhakã ragwe kwéry katu ha'ete voi kunha akã ragwe ipuku. Hãi katu ha'ete voi jagwaxaygwasu rãi-rami etei.*

⁹ Ipty'a kwéry-rehe oĩ va'e anheĩ-rami voi hatã va'e ijukaharãgwe jepe ndojukái arã voi íxupe. Ipepo kwéry hyapupa voi oje'ó-i-vy hikwái. Anheĩ-rami voi onhorairõ hagwã-py oho va'e-rami heta heta voi carroça reheve kavaju kwéry reheve ave ohoha-rami voi hyapupa voi ipepo kwéry.*

¹⁰ Japeusa-rami voi hugwái pykõi. Ipykõi joja-gwi kente kwéry-pe omoingo asy-vy arã cinco jasy peve.

* ^{8:12} Is 13.10; Ez 32.7; Jl 2.10 * ^{9:3} Ex 10.12-15 * ^{9:4} Ez 9.4 * ^{9:6} Jó 3.21 * ^{9:7} Jl 2.4 * ^{9:8} Jl 1.6 * ^{9:9} Jl 2.5

11 Nhandejáry rembigwaikwe optya huvixa ramo íxupe kwéry. Upe va'e yvykwarusu ijapy e'ŷ va'e-rehe onhangareko va'e. Hebreu kwéry nhe'ẽ-py katu héry, "Abadom" ha grego kwéry nhe'ẽ-py katu héry, "Apoliom" ha nhane nhe'ẽ-py héry voi, "Mba'e Mbyaihaty".

12 Peteĩ yvypóry momytu'e'ŷha ohasa-ma. Ndopái joty mba'e rasy yvypóry-pe. Oïve joty mokõi imomytu'e'ŷha kwéry.

13-14 Ombopu-ma ramo gwemimbygwasu seisha Nhandejáry rembigwái yváy pygwa va'e, ahendu ave íxupe omombe'u va'e. Tupã Nhandejáry renonde-py oï nhemboete renda ouro-gwi ijapopyre. Hugwa joja va'e pa'ũ-gwi ahendu upe onhe'ẽ va'e. Omombe'u upe Nhandejáry rembigwái gwemimbygwasu seisha va'e-pe.* He'i íxupe:

—Tereho katu ysyrygwasu Eufrates héry va'e-py. Irundy ne irûgwe on-henhapytîha-py ekwa katu ejora íxugwi kwéry oho hagwã, he'i Nhandejáry rembigwái-pe.

15 Upe rire ejora íxugwi kwéry onhenhapytî hagwe-gwi. Ojepoi-ma ramo oho ojukapa ete hagwã heta kente kwéry-pe. Imbohapy hapyha-pe ojuka moko mokõi optya hagwã. Ha'e kwéry onhembosako'i va'ekwe upe áry ramogwarã. Upe Nhandejáry omboypy hagwe óra-py onhembosako'i ojuka hagwã mbohapyha kente kwéry-pe.

16 Ahendu ave onhendu ramo kavaju heta eta reheve ou va'e. Duzentos milhões ou va'e.

17 Xe rembiexa uka ahexa ramo kavaju ári kwimba'e kwéry ogwereco hikwái ipyi'a resaupa-rehe oï va'e. Oï tata rendy ramigwa pytã va'e. Oï hovyhû va'e. Oï ave hesa'yju va'e. Ahexa kavaju inhakã jagwarete akã-rami meme. Ijuru ryepy-gwi osë tata rendy, tatatî ave. Hesa'yju ita rendy omboykupa va'erã osë ave ijuru ryepy kwéry-gwi.

18 Upe tata, tatatî, hesa'yju va'e ave katu ojuka heta heta va'e-pe. Mbohapyha katu yvypóry oikove va'e gwive. Imbohapy hapyha-pe ojuka paete upe osë va'ekwe kavaju ramigwa juru ryepy-gwi.

19 Gwugwái-gwi, ojuru ryepy-gwi ave imbaraete oporojuka-vy. Hugwái katu ha'ete gwî mbói oakã rehevewga. Ha upe va'e-py gwî kavaju kwéry ombohosa asy entéro yvypóry kwéry-pe. Upéa-rehe ojuka heta eta va'e-pe. Imbohapy hapyha ojuka meme. Peteĩ teĩ ojuka. Mokõ mokõi mate ndojukái.

20 Ha upe optya va'ekwe ndogwerovái joty gwekoha kwéry. Hapixa kwéry ohasa asy omano hagwã jepe ha'e kwéry ndogwerovái joty gweko vaiha. Ojapo joty Nhandejáry remimbota e'ŷ. Omboete joty tupã ra'anga-pe. Omboete joty ave anháy kwéry-pe ha entéro gwî tupã ra'anga ojejapo va'ekwe. Ouro-gwi ojejapo va'ekwe, prata-gwi ave. Oï ave ojapo va'e bronze-gwi, oï ojapo va'e ita-gwi, yvyra-gwi ave ojapo tupã ra'anga omboete hagwã. Gwî tupã ra'anga mba'eve ndohexáiry va'e, mba'eve nohendúiry ave, ndogwatáiry ave. Upe va'e kwéry-pe omboete hikwái.*

21 Ndohejáiry gweko tujakwe. "Amboasy xe rembiapo vaikwe" nde'iry. Oporojuka va'e, "Ndaporojukavéi-tama ãy" nde'iry joty ave ójehe. Mohãy ojapo va'ekwe ave, "Ndajapovéi-tama mohãy avave-rehe" nde'iry joty voi ójehe. Kunha ikwimba'ese va'e, kwimba'e ikunhase va'e heko vai-gwi ndogwerovái joty gwekoha. Imonda va'e, "Ãy naxe mondavéi-tama" nde'iry ave ójehe. Nomboasýiry gwembiapokwe oheja hagwã.

10

Ãy katu João Nhandejáry rembigwái va'e omombe'u jevy gwembiexagwe

* 9:13-14 Ex 30.1-3 * 9:20 Sl 115.4-7; 135.15-17; Dn 5.4

1 Upe ramo ahexa jevy Nhandejáry rembigwái yváy pygwa imbaraete va'e ogwejy ou-vy ramo yváy-gwi. Araigwasu pa'ū-my ogwejy yváy-gwi. Oakā-rehe ogwereko jy'y. Gwova-rehe katu ohexa uka xe-vy ramo kwarahy rendy vérami omimbi porā. Aipo ramo hetyma katu tata rendy opu'ā va'e-rami etei.

2 Upe va'e katu opo-py ogwereko peteī kватia ohapype'a hereko-vy. Omoī ave peteī opy ygwasu hypyete va'e ári. Ipy oakatúa kotygwa va'e omoī ygwasu hypyete va'e ári. Ha ipy ijasu kotygwa katu omoī yvy mbyte-py.

3 Upe-gwi osapukái. Osapukái hatā voi ko jagwaxaygwasu okororōha-rami voi osapukái. Upe-ma ramo osapukái hatā-ma ramo, ahendu sete hyapu va'e. Peteī teī hyapu jevy íxupe.

4 Hyapu ramo nhe'ē vérami ahendu inhe'ē. Upe va'e ahendu ramo, "Tamoī kватia-rehe" ha'e xejéupe. Amoī-tama ramo, yváy-gwi onhe'ē va'e xe-vy ahendu he'i va'e:

—Ani eremoī teī kватia-rehe. Ehendu porā rei katu. Ani eremoī teī, he'i xe-vy.

5-7 Upe rire katu upe kватia ogwereko va'ekwe opo-py ha omoī va'ekwe peteī opy ygwasu hypyete va'e ári ha peteī opy ave omoī yvy mbyte-py he'i:^{*}

—Nhandejáry Tupā tee va'e réry-py anhetegwa mate amombe'u-ta nde-vy, ho'e-vy opo akatúa omopu'ā yváy pyte-koty. —Nhandejáry Tupā opa e'ŷ va'e voi. Ha'e voi hembiapokwe voi va'ekwe ygwasu, áry, yvy, yvypy-pe ave ojapo ave. Yvy arigwa hembiapokwe joty ave. Áry pygwa ha'e hembiapokwe ave. Ygwasu pygwa hembiapokwe ave. Amombe'u jevy-tama xe ãy anhete teegwa voi. Ndahi'arevái-tama Nhandejáry remimombe'ukwe oiko hagwā. Ombopu vove hembigwái seteha gwemimbygwasu jahexa va'erā ãy jahexata. Upe-ma ramo ae Nhandejáry Tupā ojapo-ta entéro gwembiaporā gwive. Yma gwembiaporā onhongatu araka'e. Upéi gweminhongatu araka'e omombe'u oikwaa ukave kave hagwā onhe'ē-py omombe'u va'ety kwéry-pe. Gwembigwaa ukakwe upe gwembigwái kwéry-pe ãy katu ojapo-ta Nhandejáry Tupā, he'i.

8 Upe onhe'ē va'e xe-vy yváy-gwi onhe'ē jevy xe-vy. ãy onhe'ē-vy he'i:

—Ekwa katu eipe'a ipo-gwi opo-py ogwereko va'e kватia ohapype'a hereko-vy va'e. Upe Nhandejáry rembigwái omoī va'e peteī opy ygwasu hypyete va'e ári ha peteī yvy-py upe va'e-gwi eipe'a ohapype'a ogwereko va'e kватia, he'i.

9 Aha upe Nhandejáry rembigwái renda-py. Ajerure íxupe kватia-rehe ha ome'ē xe-vy. Ome'ē jave he'i xe-vy:

—Eipyhy eraha eremokō hagwā ko kватia nhe'ē. Nde rye-py iro arā ko kватia eremokō rire. Nde juru-py ae katu ei ryapi-rami voi arā, he'i:^{*}

10 Aipo ramo aha-ma katu aipyhy ipo-gwi upe kватia nhe'ē. Aipyhy rire amoī xe juru-py ha amokō. Xe juru-py ei ryapi-rami voi. Xe ryepy-py iro voi.^{*}

11 Upe-ma ramo he'i xe-vy okwa-vy:

—Tekotevē eremombe'u hetave Tupā Nhandejáry nhe'ē eremotenonde hagwā heta eta oikove va'e-rehe. Ojehu va'erā rekora eremombe'u mbe'u hagwā tenonderā. Entéro kente kwéry ambue mbue opa rupigwa-rehe gwive. Gwetā gwetā rupigwa-rehe gwive, nhe'ē ambue mbue-py onhe'ē va'e-rehe gwive ave, mburuvixagwasu kwéry-rehe ave tekotevē eremombe'u mba'éixa pa ogwereko-ta Nhandejáry íxupe kwéry, he'i xe-vy okwa-vy.

11

Mokōi Nhandejáry nhe'ē mombe'uhā rehewa nhe'ē

* 10:5-7 Dn 12.7 * 10:9 Ez 2.8-9 * 10:10 Ez 3.1-3

1 Upe rire katu ome'ẽ-ma xe-vy peteĩ yvyra ramigwa. Upe yvyra jaikwaa-haty óga mbovy pa ipukukwe ha mbovy pa ipekwe ave. Upéa ome'ẽ ramo he'i xe-vy:

—Ekwa katu tereipapa upe Nhandejáry-pe omboete haty pukukwe. Ha nhemboete haty ave. Upe-py kwimba'e omboete va'e ave eipapa kuri.*

2 Upe Nhandejáry-pe omboete haty-py hoka ani kuri ereipapa. Oĩ ae arã opyrũ va'erã upe-py ojerovia e'ŷ va'e Nhandejáry-rehe. Opyrũ arã imoingoasy-vy tetã marangatu-rehe quarenta e dois jasy peve.*

3 Amondo-ta mokõi xe nhe'ẽ mombe'uharã yvypóry kwéry oikwaa hagwã gwekojejavykwe. Xe remimondo onhemonde va'erã ov'yare'ŷ va'e ao-py, “Nhandejáry ndovy'ái voi ra'e xe-rehe, xe rembiapo vaikwe-rehe ra'e” he'i hagwã hexaháry. Xe nhe'ẽ-py onhemonhe'ẽ va'erã yvypóry kente kwéry-pe. Mbohapy ro'y seis jasy peve omombe'u va'erã xe rehewa nhe'ẽ, he'i Nhandejáry-gwi onhe'ẽ va'e.

4 Upe mokõi va'e-rehe Nhandejáry he'i, “Mokõi oliveira rakã ramigwa” “Mokõi tataendy'y ramigwa ave” he'i hese. Tupã Nhandejáry yvy Járy tee va'e rovagwy-py onhembo'y-ma oĩ-vy upe mokõi inhe'ẽ mombe'uga. Ha'e kwéry omombe'u-ta inhe'ẽ mbohapy ro'y seis jasy peve.*

5 Ha ndaikatúiry avave ombohasa asy íxupe kwéry. Ombohasa asyse ramo jepe ha'e kwéry ojehepy va'erã. Ijuru ryepy-gwi osẽ arã tata ramigwa omohundi hagwã hese ija'e'ŷ va'e kwéry-pe. Upéixa voi omano va'erã hese ojapo vaise va'e.

6 Nhandejáry oipytygwõ arã íxupe kwéry, omombaraete va'erã íxupe kwéry. Omombe'u mbe'u jave Nhandejáry nhe'ẽ, ipu'aka va'erã ama-rehe. Oipota ramo, ndokýi va'erã. He'i ramo y-gwi oikopa hagwã tugwy ramo oiko ave va'erã tugwy ramo. Ombohasa asyse ramo yvypóry, ombohasa asy ave va'erã opaixagwa mba'e rasy-py.*

7 Nhe'ẽ mombe'uga omombe'upa-ma ramo katu peteĩ mymba vaigwasu ete rekoporuhha ojeupi arã yvykwarusu ijapy e'ŷ va'e-gwi. Ha onhorairõ arã upe mokõi Nhandejáry nhe'ẽ omombe'u va'ekwe ndive. Ipu'aka va'erã hese kwéry. Ojuka va'erã upe mokõi Nhandejáry nhe'ẽ mombe'uhare-pe.*

8 Ojuka rire hetekwe optya rei arã tape-rehe, jegwata haty-rupi rei ho'a arã oĩ-vy. Hetekwe optya ave arã upe tetã-my Nhandejáry Hesu Cristo rete ojehupi hagwe-py. Sodoma tetã mygwa hekoha vai va'e-rami, Egito tetã mygwa hekoha vai va'e-rami ave upe tetã mygwa ave hekoha vai okwa-vy.*

9 Entéro yvypóry gwive entéro ijypyre pye va'e gwive, entéro nhe'ẽ ambue mbue-py onhe'ẽ va'e gwive, opa opa kente ambue mbue kwéry gwive ohexa katu katu arã upe mokõigwa retekwe-pe. Upe-py oĩ arã hetekwe haimete irundy áry peve. Hetekwe katu ndojatýi arã enterove ohexa hagwã.

10 Upe va'e, upe mokõi va'e omano rire entéro yvypóry ov'yapagwasu-ma va'erã hikwái. Ovy'a ete rei-gwi gwemime'ẽ me'ẽ ome'ẽ arã okwa-vy ojoupe. “Nanhane mbohasa asyvéi-ma upe mokõigwa nhe'ẽ mombe'uhatykwe. Hi'are eterei voi nhane mbohasa asy asy va'ekwe. Nanhane mbohasa asyvéi-ma va'erã” he'i-gwi hese ov'y'a eterei arã hikwái.

11 Tupã Nhandejáry ae omoingove jevy íxupe kwéry, mokõigwa-pe. Ohasa rire mbohapy áry larose jevy-ma ramo peteĩ yvytugwasu ou oipeju upe mokõigwa retekwe-pe. Oipeju ramo upe mokõi va'e omano ete-ma va'ekwe

* **11:1** Ez 40.3 * **11:2** Lc 21.24 * **11:4** Zc 4.3,11-14 * **11:6** 1 Rs 17.1; Èx 7.17-19 * **11:7** Dn 7.3,21; Ap 13.5-7; 17.8 * **11:8** Is 1.9-10

opu'ã jevy-ma. Enterove ohexa. Ohexa-ma ramo opu'ã jevy hexaháry onhemondýipa hexa-vy hikwái.*

¹² Upe omano va'ekwe opu'ã rire, ohendu yváy gwigwa onhe'ẽ va'e ojéupe:
—Aipo ramo pejeupi katu, he'i íxupe, mokõigwa-pe.

Upe jave oma'ẽ hese okwa-vy. Oma'ẽ jave upe mokõigwa gwete rehevoi ojeupi-ma oho-vy yváy-py. Araigwasu pa'ũ-my ojereroyvate-ma oho-vy upe mokõigwa. Hese ija'e'ŷ va'ekwe jepe ohexa-ma ave iho ramo.*

¹³ Upe jave yvy oryrýi-ma. Heta eterei óga okuipa upe tetã-my. Yvy oryrýi-gwi heta óga oity. Omopehëgwe hëgwepa voi heity-vy. Décima parte oity. Heta voi omano upe pygwa. Sete mil omano yvy oryrýi eterei-gwi. Omano e'ŷ va'ekwe okyhyje paete-gwi omboete joa Nhandejáry-pe. He'i:

—Nde tuvixa Tupã yváy pygwa, he'i joa hikwái omboete-vy íxupe.*

¹⁴ Mokõi yvypóry momytu'e'ŷha ohasa-ma. Ndopái vyteri joty mba'e rasy yvypóry kwéry-pe. Oíve joty peteĩ oporomomytu'e'ŷha pya'e ojehu va'erã.

Ombopu gwemimbygwasu Nhandejáry rembigwái yváy pygwa va'e seteha

¹⁵ Ombopu-ma ramo gwemimbygwasu Nhandejáry rembigwái yváy pygwa va'e seteha, oĩ yváy-py onhe'ẽ hatã atã va'e. Oiko va'erã-rehe omombe'u hikwái:

—Ay Nhandejáry Tupã oiko-ma yvypóry ruvixa ramo yvy-rehe. Ha'e oiko-ma mburuvixa ramo Cristo ndive. Ha'e oiko-ta mburuvixagwasu opa e'ŷ rehevoi, he'i Nhandejáry rembigwái onhe'ẽ hatã-vy oiko va'erã-rehe.*

¹⁶ Upe jave upe vinte e quatro mburuvixa Nhandejáry renonde-py ogwapy okwa-vy va'e ojesyva mboja joa yvy-rehe okwa-vy omboete eterei-vy Nhandejáry-pe.

¹⁷ He'i omboete-vy íxupe:

—Nde Tupã ore Járy voi nde.

Nde pu'aka tee va'e voi nde entéro mba'e-rehe.

Orotima tima nde-vy.

Yma va'ekwe nde.

Ko'ângá ete peve nde ha'e joty.

Ko'ângá katu eremoi-ma opamba'e nde pogwy-py.

Eregwahë-ma katu ãy enterovéa ruvixarã.

Erenhemomburuvixagwasu ete hagwe-rehe

orotima voi nde-vy,

he'i omboete joa-vy íxupe.

¹⁸ —Ay ogwahë-ma nde áry ererekoy asy hagwã

enterovéa-pe hekoha vaikwe-rehe.

Upéa-rehe entéro tetã tetã mygwa kwéry ima'andupa hikwái.

Ay ogwahë-ma nde áry ereme'ẽ hagwã hembiapokwe-rehe gwí omano va'ekwe gwive hekorã.

Ay ereme'ẽ-ta hembiapokwe repy

Ne rembigwái ramo oiko va'ekwe

Ne nhe'ẽ-py omombe'u va'ety kwéry-pe

Entéro nde re'yi kwéry-pe gwive,

Nde-rehe ojerovia va'e-pe gwive,

entéro ne mboetehare-pe gwive,

gwí mburuvixa va'e-pe gwive,

ha gwí heko miríve va'e-pe ave

ereme'ẽ-ta hekokwe repy.

* **11:11** Ez 37.10 * **11:12** 2 Rs 2.11 * **11:13** Ap 16.18 * **11:15** Dn 7.14,27

Ây katu eremomba arã katu
gwĩ yvypóry kwéry-pe gweko vai-rupi oity uka va'ekwe-pe,
he'i hikwái Nhandejáry-pe omboete-vy.**

¹⁹ Upéi ojepe'a yváy-py oĩ va'e Nhandejáry-pe omboete haty rokẽ. Ikoty tee-py ojehexa hyru. Nhandejáry nhe'ẽ mokõi ita-rehe oĩ va'e ryru upe va'e. Ymagware nhane moingokwaa Nhandejáry irurã rehewa nhe'ẽ ryru, "arca do acordo" héry va'e. Ojehexa jave overa vera voi osunu hatã-ma, hyapu atã atã voi oĩ-vy. Yvy katu oryrí ha amandaugwasu ave ho'a-ma hese.*

12

Hexapyrã ojekwaa kunha, tejujagwagwasu ave rehewa nhe'ẽ

¹⁻² Upéi ojekwaa jevy áry-rehe hexapyrã. Ogwerajahe'o kunha omemby rasy aigwe etereiha-rami. Upe kunha opyrã jepe jasy-rehe. Ipy gwy-py optya jasy. Ijegwaka ramo oĩ doze jasytata. Kwarahy rendy-py onhemonde. Imemby rasy aigwe rei-ma ramo ogwerajahe'o.**

³ Upéi ojekwaa jevy áry-rehe ambue hexapyrã jevy. Osẽ ave áry-rehe tejujagwagwasu pytã va'e. Inharõ va'e voi upe tejujagwagwasu. Inhakã jojapa rei va'e voi upe va'e. Sete akã ogwerekva'e. Peteĩ teĩ oakã-rehe ogwerekva'e. Heta ave upe va'e hatã. Dez voi hatã.*

⁴ Gwugwái-py oity yváy-gwi jasytata ko yvy-rehe. Mbohapy hapyha jasytata ombotyryry heity-vy. Upe kunha hyegwasu va'e oĩ upe-py. Tejujagwagwasu katu ho'use-ma imemby-pe. Ho'use-gwi oho-ma oha'arõ kunha imemby pota va'e-pe imemby-ma ramo ho'u-ma hagwã mo'ã imemby.*

⁵ Upéi oiko-ma imemby kunumi. Upe kunha memby katu oiko arã entero va'e yvypóry ruvixarã. Opo-py ogwerekva'e mba'e hierro-gwi ijapopyre enterove oikwaa hagwã ipogwy-py oiko arã entero kente kwéry hemimbota e'ŷ avave ndojapói hagwã. Ha oiko hagwe-py ndopytai joto upe mitã. Nhandejáry ogwerajeupi joto íxupe heraha-vy ombogwapy hagwã imoĩ-vy íxupe ondice oapykagwasu ári oypy-py.*

⁶ Nhandejáry Tupã omoĩ-ma voi upe kunha-pe kipy mapo oho hagwã optya. Ha'e oho upe tekwat y e'ŷ-koty pono avave ohexá íxupe. Upe-py Nhandejáry onhangareko arã hese mbohapy ro'y seis jasy peve.

⁷⁻⁹ Upéi katu oiko nhairõgwasu yváy-py. Heta heta Nhandejáry rembigwaikwe onhembohuvixa va'ekwe tejujagwagwasu-rehe. Ha ha'e kwéry onhorairõ joa okwa-vy Nhandejáry rembigwái tee kwéry ndive. Nhandejáry rembigwái ruvixa, héry va'e Miguel onhorairõ ave upe tejujagwagwasu ndive. Onhemombaraeteseve mo'ã tejujagwagwasu hembigwái kwéry ndive Nhandejáry rembigwái tee kwéry-rehe. Ha ipu'akase mo'ã ramo jepe ndaipu'akáiry Nhandejáry rembigwái tee-rehe. Ndokwa porãvéi-ma hikwái Miguel-gwi. Nhandejáry rembigwái kwéry-gwi ave. Upéa-rehe Nhandejáry oity íxupe kwéry omondo-vy yvy-py. Tejujagwagwasu-pe, inhiri kwéry ndive oitypa-ma yvy-py imondo-vy. Tejujagwagwasu he'i anhaygwasu-rehe. Satanás he'i ave hese. Hese joto mbói he'i ave. Upe mbói rekoporuhama va'ekwe Eva amyrí-pe ombojeavy va'ekwe. Ây peve nhande kwéry-pe nhane mbotavyha voi nhane mbojeavy-vy upe va'e. Upéa-rehe onhorairõ

* ^{11:18} Sl 115.13 * ^{11:18} Ap 4.8-11; 5.9-14; 7.9-12; 19.1-4 * ^{11:19} Ap 8.5; 16.18 * ^{12:1-2} Gn 37.9
* ^{12:1-2} Mq 4.10 * ^{12:3} Dn 7.7 * ^{12:4} Dn 8.10 * ^{12:5} Is 66.7; Sl 2.9

onhemombaraeteseve mo'ã hagwe-rehe Nhandejáry oity íxupe kwéry. Anhaygwasu hembigwái kwéry ndive oity yváy-gwi. Oitypa-ma yvy-py imondo-vy. Ndaikatuvéi opyta yváy-py hikwái. Nhandejáry katu oitypa-ma íxupe kwéry yvy-py imondo-vy.**

10 Upéi katu ahendu jevy yváy-gwi onhe'ẽ va'e. He'i:

—Ãy katu Nhandejáry nhande rexakwaa rei-tama. Ou-ma Nhandejáry nhane resendeharã. Nhandejáry Tupã ohexa uka-ma ipu'akaha oiko hagwã nhande ruvixarã. ãy Hesu Cristo ta'ýry peteĩmi oiko-ma mburuvixa ramo, ogwereko-tama opamba'e opogwy-py, he'i. —Ãy nhane mombe'u vai vahaty ndoikovéi-ma yváy-py, he'i. —Nhande re'ýi kwéry omombe'u vaise va'ety Nhandejáry renonde-py oiko va'ekwe. ãy katu ndoikovéi-ma upe-py. Onhe'ẽ rei rei va'ekwe hese kwéry áry gwive pyhare peve omoĩ vaise rei va'ekwe íxupe kwéry Nhandejáry-pe. ãy katu ndoikovéi-ma yváy-py. Nhandejáry oityma imondo-vy anhaygwasu-pe yvy-py.*

11 —Upe nhande re'ýi kwéry yvy-rehe oiko ramo va'ekwe onhembopu'aka va'ekwe hese. Ojerovia tee-gwi Ovexa Ra'y ramigwa va'e-rehe ndojeréi joty íxugwi. Peteĩ teĩ omoherakwã porã ave hesegwa nhe'ẽ. Ohasa asy asy jepe peteĩ teĩ nahakate'ýi joty va'ekwe gwekove-rehe. “Hesu omano va'ekwe ovexa ra'y-rami gwugwy apyte-py nhane resende hagwã” omombe'u porã porã reheve peteĩ teĩ onhembopu'aka anhaygwasu-rehe. Ohasa asy va'ekwe jepe omano peve va'ekwe Hesu reroviaha ipu'akave joty anhaygwasu-gwi. Ndojeréi joty va'ekwe Hesu-gwi.

12 Upéa-rehe pevy'a katu peẽ peiko va'e yváy-py. Peẽ yvypóry kwéry ae katu pevy'are'ý va'erã. Anhaygwasu ogwejy-magwi kuri yváy-py, ygwasu-py ave. Peẽ peime ha-py ogwejy. ãy opoxyha-rupi ogwereko-ta yvypóry kwéry-pe, ygwasu pygwa-pe ave. Ha'e oikwaa-ma voi gwenonderã. Ndoiko puku mo'ãvá-ma. Upe va'e-rehe ãy ha'e ipoxy eterei-ma, he'i omombe'u-vy xe-vy.

13 Anhaygwasu oho-ma ramo yvy-rehe oho upe kunha imemby kunumi va'ekwe rapykwéri ombohosa asy hagwã mo'ã íxupe. Tejujagwagwasu rekoporú-vy oho hapykwéri.

14 Nhandejáry ae ohekowkwa jevy upe kunha-pe. Ombopepo íxupe oveve hagwã tagwatogwasu-rami oho-vy tekwat y e'ý-my. Upe-py katu onhenhangareko-ta hese mbohapy ro'y seis jasy peve pono mbói rekoporuhu ohexa íxupe.*

15 Anhaygwasu katu ogwereko asyse mo'ã upe kunha-pe. Mbói ramo ojehexa uka jave ojuru ryepy-gwi jepe ogwenohé y osyry va'e ramigwa ogwersosyry hagwã mo'ã upe kunha-pe.

16 Ha ndogwersosyry ukáiry joty. Onhemboyvykwa y oho hagwã ha'e-py pono ogwahé kunha-pe.

17 Ndochupitýi-ma ramo anhaygwasu kunha-pe ipoxy rei voi opyta-vy hese. Ndochupitýi-gwi íxupe oho ombohosa asy hagwã upe kunha re'ýi kwéry-pe. Gwí ojerovia va'e Nhandejáry-rehe, hemimombe'u ukakwe ojapo gwive anhete ha-py ojerovia va'e Hesu-rehe, hemimombe'ukwe-rupi oiko meme va'e-pe ombohosa asy hagwã oho.

18 Upéa-gwi tejujagwagwasu rekoporuhu onhembo'y rei oha'arõ oĩ-vy ygwasu rembe'y-py.

* **12:7-9** Dn 10.13,21; 12.1 * **12:7-9** Gn 3.1-6; Lc 10.18 * **12:10** Jó 1.9-11; Zc 3.1 * **12:14** Dn 7.25; 12.7

13

Ojehexa uka mymba vaigwasu ohekoporou va'e

¹ Upe jave ahexa ojehexa uka ygwasu-gwi ojeupi ou-vy peteī mymba vaigwasu ete ohekoporou va'e. Oakā reta reheve gwatī reta reheve ojehexa uka-ma ou-vy. Sete inhakā, dez hatī ave ogwerekō. Peteī teī gwatī rakwa apyrehe ogwerekō jegwaka. Dez ogwerekō jegwaka ogwerekō peteī teī gwatī-rehe. Enterove rembiexarā ohai héry kwéry peteī teī syva kwéry-rehe. Héry kwéry omoī Nhandejáry-rehe he'i vaiha.*

² Ojehexa uka upe va'e ta'yrvāsu ipini va'e-rami. Ipokwe urso po-rami. Ipykwe ave urso py-rami ave. Aipo ramo ijuru katu tuvixa jagwaxaygwasu juru-rami. Tejujagwagwasu rekopuru va'e katu ome'ē íxupe opu'akakwe oiko hagwā mburuvixa ramo. Ogwapy hagwā ijapykakwe-py omanda hagwā heta va'e-rehe.*

³ Ahexa ave peteī onhakā kytī va'ekwe, "Hasy ete ramo ndokweravéi-tama" he'i moā upe hasy va'e-rehe. Ijukapyrāgwe voi ãy okwera jevy-ma ngatu. Entéro hexaháry katu opondera ndera hese oho-vy hupive.

⁴ Entéro omboete upe tejujagwagwasu rekoporuha-pe, ome'ē-ma kuri ipu'akakwe mburuvixagwasurā-pe. Upéa-rehe omboete íxupe hikwái. Omboete ave upe mymba vaigwasu ete rekoporuha-pe osē va'ekwe ygwasu-gwi. He'i omboete-vy:

—Ndaipóri ha'eixagwa imbaraeteve va'e, he'i rei omboete-vy íxupe. — Ndaipóri hese ipu'aka va'erā, he'i rei imboete-vy hikwái.

⁵ Aipo ramo tejujagwagwasu ome'ē mymba vaigwasu ete-pe opy'agwasu. Ombotuvixa ete íxupe onhe'ē vai vai hagwā Nhandejáry-rehe. Ombopu'aka ave íxupe oiko hagwā mburuvixagwasu ramo mbohapy ro'y seis jasy peve.

⁶ Oiko-ma kuri mburuvixagwasu ramo onhe'ē vai vai hagwā Nhandejáry-rehe, henda marangatu-rehe ave, entéro Nhandejáry-rehe ojerovia va'e gwive-rehe.*

⁷ He'i ave pe mymba vaigwasu ete-pe onhemomburuvixa hagwā entéro yvypórý kwéry-rehe. Hesu reroviahá kwéry gwive ipogwy-py jevy opyta hagwā. Ha Hesu reroviahá kwéry-pe orairō va'erā voi ha ipu'aka ave arā hese kwéry. Enterove yvy ári oiko va'e gwive oiko arā ipogwy-py. Opa opa kente ambue mbue kwéry gwive, entéro ijypyre pye va'e gwive, nhe'ē ambue mbue-py onhe'ē va'e kwéry gwive, opa opa-rupi yvy oho va'e rupigwa kwéry gwive oiko arā ipogwy-py.*

⁸ Omomba'egwasu arā íxupe okwa-vy hikwái. Gweko járy ramo ogwerekō va'erā íxupe hikwái. Héry kwéry ndoikói joty Ovexa Ra'y ramigwa va'e kwaitia nhe'ē-rehe. Ko yvy oiko e'ŷ mboyve nonhemořy va'ekwe kwaitia-rehe héry kwéry. Entéro hekove tee ijapyre'ŷ reheve va'e réry oiko upe kwaitia-rehe. Ha upe mymba vaigwasu ete-pe omboete va'e kwéry réry ndoikói voi upe kwaitia-rehe.*

⁹ Ne aranduse va'e, ejeadysaka katu ko xe nhe'ē-rehe:

¹⁰ Oĩ preso omoī hagwā-py ojereraha va'erā. Nhandejáry oipotaha-rami ave ogweraha va'erā íxupe. Oĩ kyse puku-py omano va'erā. Nhandejáry oipotaha-rami ave ojuka va'erā íxupe. Upéa oikwaa-rehe Nhandejáry reroviahá ohasa asy ete jepe tekotev̄ ojesaupi meme gwekojáry-rehe anho mate onhembopy'agwasu hagwā ojerovia tee hagwā hese.*

¹¹ Upe rire katu ojehexa uka-ma ovexa-rami ou va'e, mokōi hatī va'e, yvygwy-gwi osē va'e. Tejujagwagwasu-rami inhe'ē.

* **13:1** Dn 7.17; Ap 17.3,7-12 * **13:2** Dn 7.4-6; Os 13.7-8 * **13:6** Dn 7.8,25; 11.36 * **13:7** Dn 7.21

* **13:8** Sl 69.28 * **13:10** Jr 15.2

¹² Mymba vaigwasu ete rekoporuhā ombopu'aka íxupe imbaraete hagwā ave ome'ẽ íxupe. Hovagwy-py oiporu upe ipu'aka hagwe ombohesa rerova uka hagwā mymba vaigwasu-rehe yvypóry kwéry-pe onhembotuvixa uka hagwā enterovéa-pe. Upe mymba vaigwasu ete ojekutu va'ekwe omano-tama voi va'ekwe, upe ramo okwera jevy-ma. "Tupā Nhandedjáry voi ra'e ipu'aka tee voi" he'i hagwā mo'ã hese oporombotavy-vy rei. Omomba'egwasu omomba'e tee hagwā íxupe.

¹³ Ojapo japo tembiexapyrā. Enterove rembiexarā-rupi ombogwejy jepe tata yvate áry tee-gwi ho'a hagwā yvy ári he'i hagwā hese hexaha kwéry, "Ipu'akave va'e voi nipo ra'e" he'i hagwā hikwái mymba vaigwasu ete-rehe.

¹⁴ Upéixa ojapo-ma ramo ombotavy voi yvypóry kwéry-pe omboete hagwā mymba vaigwasu ete ojehexa uka ranhe va'ekwe-pe. Mymba vaigwasu ete renonde-py ojapo meme mba'e hexapyrā opondera ndera hagwā hese hexaha kwéry. Ombotavy tavy rei voi oho-vy omombe'u ave entéro yvypóry-pe ojapo hagwā hemimboete ra'anga upe ojehexa uka va'ekwe ra'anga upe kyse puku-py ojekutu va'ekwe omano-tama oī-vy va'ekwe ha okwera jevy va'ekwe ra'anga. Ha upéixa oipota ojapo hagwā hikwái yvypóry kwéry.

¹⁵ Ipu'akaha-rupi joty omoingo upe ta'anga. Ome'ẽ íxupe hekoverā ave. Omonhe'ẽ uka ave ta'anga-pe. He'i hagwā: "Kiva'e po naxemboetéi va'e gwive omanomba va'erā" he'i onhe'ẽ-vy ta'anga. Ome'ẽ ave íxupe ojuka uka hagwā ójehe omboete e'ỹ va'e kwéry-pe.

¹⁶ Upe rire katu he'i enterove va'e-pe omoī hagwā ojehexa uka hagwā, "Xe ko mymba vaigwasu ete mboete teeha voi ko xe" he'i hagwā ójehe. Omoī arā osyva-rehe. Nomoīry ramo osyva-rehe, opo akatúa apyape ári omoī va'erā. Enterove-pe omoī uka. He'i heko tuvixa va'e kwéry omoī hagwā, heko mirī va'e kwéry gwive omoī hagwā, imba'e reta reta va'e kwéry gwive omoī hagwā, iporiahu va'e kwéry gwive, ojejokwái va'e kwéry gwive, ojejokwái e'ỹ va'e kwéry gwive omoī hagwā ójehe kwéry.

¹⁷ Upe oikwaa ukaha ndaipórí hese va'e ndaikatúi mba'eve ojogwa. Ndaikatúi ave ojogwa gwemi'urā. Ndaikatúi oheka ombo'apo hagwā. Ndaikatúi ave ovende mba'eve avave-pe. Ha oikwaa ukaha onhemoī hese va'e katu, ojapo gwembiaaporā. Upe oikwaa ukaha mymba vaigwasu ete réry omoī hese. Nomoīry ramo héry, ha'e ae inúmero omoī hese.

¹⁸ "Inúmero rei" he'i mo'ã arā hexaháry upe mymba vaigwasu ete kwaa ukaha-rehe. Inharandu porā va'e mante oikwaa porā arā mbava'e pa he'ise upe número réry rehewa. Upéa número he'i kwimba'e réry-rehe. Seiscentos e sessenta e seis voi inúmero, mymba vaigwasu ete rekoporuhā número voi.

14

Mborahéi pyahu oha'ã joa okwa-vy Nhandedjáry remiresendekwe

¹ Áy katu ojehexa uka-ma Ovexa Ra'y ramigwa tee va'e gwugwy avyte-py omano va'ekwe. Ojehexa uka onhembo'y oī-vy ramo yvyatyrusu Sião héry va'e ári. Upe-py oī hendive heta heta va'e. Cento e quarenta e quatro mil oī hendive upe-py. Hendive oī va'e ogwerekjoa osyva-rehe kwéry Hesu Cristo réry, Nhandedjáry Tupā Hesu Cristo Ru réry ave ogwerekjoa osyva-rehe hikwái.*

² Ha yváy-gwi ahendu ave anheī-rami voi ygwasu vérami voi hyapu apu. Hatā hatā osunu ave. Hyapu voi oporahéi joa va'e nhe'ẽ. Ombopu joa okwa-vy isā reta reta va'e vérami inhe'ẽ ryapu.

* **14:1** Ez 9.4; Ap 7.4; Ez 9.4; Hb 12.22; Ap 5.6; 7.4

3 Upéi heta eta oporahéi va'e Nhandejáry rembiporavokwe va'e oĩ Nhandejáry mburuvixagwasu gwapy haty renonde-py. Irundy Nhandejáry apyka jere-rehe oiko va'ety renonde-py, vinte e quatro mburuvixa renonde-py ave onhembo'y oĩ-vy hikwái. Mborahéi pyahu oha'ã joa okwa-vy Nhandejáry mboete-vy. Ha'e kwéry mante oikwaa upe mborahéi pyahu. Ha outro kwéry ndoikwaáiry voi. Ha'e kwéry Nhandejáry-rehe ojerovia va'ekwe. Ogwerova va'ekwe gwekoha. Upe rire katu oiko marangatu va'ekwe Nhandejáry ndive. Nhandejáry oresende va'ekwe íxupe kwéry yvypóry pa'ũ-gwi.*

4 Ha'e kwéry karia'y omenda e'ŷ va'e onhemongy'a rei e'ŷ va'e voi. Upéixa ete Nhandejáry-pe voi oiko tekoha-rupi. Omoirũ meme va'ekwe Ovexa Ra'y ramigwa va'e-pe. Mamo oho ha-py, hendive voi oho meme. Nhandejáry oiporavo voi va'ekwe yvypóry apyte-gwi onhypyrū hagwā ojéupe gwarā, ãy oho Nhandejáry re'yirā, Ovexa Ra'y ramigwa va'e re'yirā ave.

5 Heko porã meme va'e voi ha'e kwéry. Ijapu e'ŷ va'e voi ha'e kwéry. Ojejavy e'ŷ va'e voi ha'e kwéry. Ipy'a potĩ tee va'e voi ha'e kwéry. Ha'e kwéry mante voi oporahéi okwa-vy Nhandejáry-pe imboete-vy mborahéi pyahu oha'ã joa okwa-vy.*

Nhandejáry rembigwái yváy pygwa irundy va'e remimombe'ukwe

6 Upéi ahexa yváy mbyte-py Nhandejáry rembigwái ambue va'e. Ha'e omombe'u-ma Nhandejáry nhe'ẽ opa e'ŷ va'erā Hesu Cristo rehewa nhe'ẽ porã. Ahexa yváy mbyte-rehe oveve jave onhe'ẽ va'e. Entéro yvypóry kwéry ohendu hagwā opa opa-rupi yvy oho va'e rupigwa gwive, opa opa kente ambue mbue kwéry rehewa gwive, entéro nhe'ẽ ambue mbue-py onhe'ẽ va'e ramo jepe, entéro ijypyre pye va'e gwive ohendu hagwā.

7 Hatã hatã voi onhe'ẽ he'i-vy:

—Pejerovia tee katu Nhandejáry Tupã-rehe, he'i. —Ha pemomba'egwasu tee katu íxupe. Tuvixagwasu tee va'e voi ha'e. ãy katu hi'óra ogwahẽ-ma entéro yvypóry-pe ogwereco hagwā hembiapo apokwe-rehe. Pemboete tee katu yvy, yváy ave apohare-pe. Ojapo va'e ygwasu entéro yvu ysêha gwive. Pemboete tee katu íxupe, he'i onhe'ẽ hatã-vy.

8 Upe rire ou jevy mokõiha Nhandejáry rembigwái yváy pygwa omombe'u-vy:

—Tekohagwe voi Babilônia tetãgwasukwe. Tekohagwe voi. Uva ryk-were gwapixa-pe ho'u ukaha-rami ha'e omonga'u vérami va'ekwe tetã tetã rupigwa kwéry-pe heko vai-rupi ave oiko hagwā hikwái, he'i Nhandejáry rembigwái omombe'u-vy.*

9-10 Upe rire ou jevy mbohapyha Nhandejáry rembigwái onhe'ẽ ngatã ngatã reheve omombe'u-vy yvypóry kwéry-pe:

—Upe mymba vaigwasu ete va'e-pe omboete va'e gwive ohasa asy eterei va'erã. Ha'anga-pe omboete va'e gwive, héry omoĩ uka va'ekwe osyva-rehe gwive, héry omoĩ uka va'ekwe opoapy ape ári va'e gwive ohasa asy eterei va'erã. Nhandejáry ogwereco asy asy va'erã íxupe kwéry hekoha vaikwe-rehe. Marány upeixagwa ne'írã vyterí omoingo omondo va'erã íxupe kwéry. Onhembosako'i va'ekwe oity va'erã hese kwéry ogwereco asy asy-vy. Tata ita omboykupa reheve-py ombohasa asy va'erã upe mymbagwasu ivai ete va'e mboetehare-pe. Uva rykwere naimohe'ẽ pyréiry vérami iro va'erã íxupe kwéry hekoha. Ndohexakwaa mo'âvéi íxupe kwéry Nhandejáry. Ovexa Ra'y ramigwa va'e rovagwy-py, hembigwái heko marangatu kwéry rovagwy-py ave ohasa asy ete arã voi okwa-vy.*

* 14:3 Ap 19.4-7 * 14:5 Sf 3.13 * 14:8 Is 21.9; Ap 18.2 * 14:9-10 Is 51.17; Gn 19.24

¹¹ Upe tatatī oporombohasa asy va'e-gwi meme katu ojeupi arā. Upe-py ndoikói arā py'agwapy. Áry ramo pyhare ramo ave ndopytu'úi va'erā. Entéro mymba vaigwasu ete ha'anga ave omboetehare, hesegwa héry ogwereko va'ekwe gwive ohasa asy va'erā upe-py opa e'ŷ reheve.*

¹² Upéa oikwaa-ma ramo Hesu reroviaha kwéry tonhembopy'a mbaraete uka va'erā katu Nhandejáry Hesu Cristo-pe ojehexa kwaa hagwā ojerovia teeħa hese. Ojapo meme hagwā hemimombe'ukwe.

¹³ —Áy rire ae katu hetave ojuka arā Hesu reroviaha kwéry-pe. Upéixa ramo jepe ový'a joty va'erā hikwái. Ehai katu upéa nde kwatia-rehe, he'i xe-vy yváy-gwi onhe'ẽ va'e.

Upéi ahendu ave Nhandejáry Nhe'ẽ Marangatu tee va'e he'i:

—Anhete tee voi upé va'e nhe'ẽ. Ha'e kwéry optytu'u arā omba'apoha-gwi. Heko porā hagwe-rehe Nhandejáry ogwereko porāve arā íxupe kwéry yváy-py, he'i Nhandejáry Nhe'ẽ Marangatu tee va'e omombe'u-vy xe-vy.

Ombopapa va'erāha áry rehewa nhe'ẽ

¹⁴ Upéi ama'ẽ jevy ha ojehexa uka xe-vy arai morotīgwasu ári ogwapy oĩ-vy peteĩ va'e kwimba'e. Nhande Ryke'y tee va'e voi nipo ra'e. Ogwapy ramo oĩ-vy ojegwaka ouro-gwi ijapopyre reheve. Opo-py temitŷgwe kytihaty haimbe va'e voi ogwereko.*

¹⁵ Upe rire katu peteĩ Nhandejáry rembigwái va'e osẽ Nhandejáry rendaty-gwi. Onhe'ẽ ngatā arai morotīgwasu ári ogwapy oĩ-vy va'e-pe. He'i-vy:

—Áy katu ogwahē-ma hi'óra ereipe'a hagwā temitŷgwe, he'i omondo onhe'ẽ íxupe. —Áy ae ereiporu-tama ne mba'e kytihaty yvy-rehe temitŷgwe ereipe'a hagwā, he'i íxupe onhe'ẽ-vy.*

¹⁶ Upe-ma ramo onhepyrū-ma oipe'a temitŷgwe upé ogwapy oĩ-vy va'ekwe arai morotīgwasu va'e ári. Onhepyrū-ma oipo'o-vy. Ha onhenhongatu ha-py ogwerahapa-ma. Upéixa ete voi ave ombojogweroaty va'erā ojéupe Nhandejáry entéro yvypóry kwéry-pe hembiapokwe pokwe-rehe ogwereko-vy.

¹⁷ Upe rire joty ojehexa uka xe-vy Nhandejáry rendaty yváy-py oĩ va'e. Íxugwi osẽ ramo Nhandejáry rembigwái ahēxa jevy-ma. Ha'e ave ogwereko omba'e kytihaty opo-py.

¹⁸ Nhemboete haty rata-rehe onhangareko va'e osẽ ave gwenda-gwi. Onhe'ẽ ngatā-vy omba'e kytihaty ogwereko va'e-pe he'i hagwā:

—Eikytī katu uva hi'a inhapesā va'e hi'ajupa-ma kuri, he'i. Uva rehewa-rami he'i íxupe.

¹⁹ Upe-ma ramo Nhandejáry rembigwái onhepyrū omba'apo. Onhepyrū oikytī-vy uva inhapesā-gwi. Oity-ma ngatu mba'e ryrugwasu-py ohumbiri hagwā uva inhami-vy. Upéixa ete uva rykwe ohumbiriha-rami Nhandejáry ogwereko asy va'erā hekoha vaikwe-rehe.

²⁰ Ha mba'e ryrugwasu-py ohumbiri uva rykwere onhami hagwā. Upe mba'e ryrugwasu onhemoĩ va'ekwe tetā roka-py. Hykwere osẽ va'e-rami tugwy osẽ íxugwi. Heta eterei voi osyry oho-vy tugwy. Nhandejáry rerovia e'ŷha va'e kwéry rugwy katu ohumbiri onhami hagwe-gwi mombyry voi osyry. Osyry heta ma voi oho-vy. Tugwy rei hygwasu-ma. Hypyve pyve oho-vy. Kavaju rendyvagwy peve ogwahē hypyve pyve oho-vy. Trezentos quilômetro peve tugwy osyry oho-vy. Mombyry voi tugwy osyry oho-vy.*

* **14:11** Is 34.10 * **14:14** Dn 7.13 * **14:15** Jl 3.13 * **14:20** Is 63.3; Ap 19.15

15

Nhandejáry pu'akaha heko porāha-rehe ave omboete voi íxupe yváy-py oime va'e kwéry

¹ Ìy katu ojekwaa-ma hexapyrã áry-rehe. Ojehexa uka-ma oiko va'erã nhane monghyjeharã voi ombou va'erã. Nhandejáry oiporavo sete gwem-bigwái kwéry pa'ù-gwi ombou hagwã ko yvy-py marány kwéry ombohosa asy voi hagwã yvypóry kwéry-pe.

² Xe-vy anhei-rami ygwasu hesakã va'e espéko ramigwa ave. Ijavyte-rupi katu oï tata endy endy ramigwa. Upe-py oï ipu'aka va'ekwe pe mymba vaigwasu ete va'e-rehe. Ha'anga rei imboetepyrãgwe nomboetéi va'ekwe. Nomoï ukái va'ekwe ójehe inúmero. Upe número mymba vaigwasu ete réry voi. Omano peve jepe nonheme'ë ukái joty va'ekwe upe número-pe. Número omoï hagwã hese nome'ëi va'ekwe gwete. Onhemopyatã uka Nhandejáry Hesu-pe. Ha ko'ay katu ojehexa uka-vy onhembo'y okwa-vy ygwasu hesakã va'e espéko ramigwa va'e rembe'y-rehe. Ombopu ave okwa-vy Nhandejáry Tupã ome'ë va'ekwe íxupe kwéry mba'epu isã reta va'e. Ombopu joa hikwái.

³ Oporahéi joa ave okwa-vy omboete hagwã Nhandejáry-pe. Nhane ramoigwasu Moisés mborahéi oporahéi okwa-vy hembigwái. Ovexa Ra'y ramigwa va'e mborahéi oha'ã joa okwa-vy.

Nde, nde tuvixa voi va'e

Nde ore Járy voi va'e

he'i oporahéi joa okwa-vy.

Nde nde pu'aka tee voi nde.

Entéro mba'e erejapo va'e voi nde.

Iporã porã voi avave voi
ndojakwaaíry nde erejapoha-rami.

Nde erejejavy e'ý va'e,

Nde rekoha porã ete va'e voi nde.

Anhete voi nde.

Anhete teegwa voi ave nde.

Entéro yvypóry opa opa-rupi

yvy oho va'e-rupi va'e ruvixa va'e voi nde.*

⁴ Ndaipóri va'erã ne momba'egwasu e'ý va'e, ore Járy.

Noíry arã ombotuvixa e'ý va'e nde réry.

Ne anho ete voi ne marangatu tee va'e.

Enterove tetã tetã mygwa kwéry gwive
ne mboete arã nde-vy anho mante.

Ne rembiapo porã porã
entéro va'e-pe ojehexa uka-gwi,
ne mboete arã.

Nde réry ohendu ramo

imandu'a porã arã nde-rehe ne mboete hagwã,

he'i oporahéi joa okwa-vy.*

⁵ Upe rire katu ahexa-ma onhokëndavo ramo yváy pygwa oï va'e rokë. Ikoty tee tee-py voi oï koty imarangatu ete va'e, Nhandejáry renda tee voi va'e.

⁶ Ha ahexa ramo osë osë hikwái oje'ói-vy Nhandejáry rendaty-gwi, ikoty marangatu ete-gwi sete hembigwái yvypóry-pe ombohosa asyharã. Inhemondeha katu omimbipa va'e, morotí porã voi va'e. Ndaipóri hese iky'a va'e. Ku'akwaha ramigwa ouro-gwi ijapopyre ogwereko optyi'a-rehe hikwái.

* 15:3 Èx 15.1 * 15:4 Jr 10.7; Sl 86.9

⁷ Osē-tama hikwái oje'ói-vy ramo upe sete Nhandejáry rembigwái peteī va'e ome'ẽ íxupe kwéry imba'e ryrurã ouro-gwi ijapopyre. Peteī va'e osē upe irundy Nhandejáry apyka jere-rehe oiko va'ety pa'ū-gwi osē ome'ẽ hagwā setegwa-pe imba'e ryrurã. Imba'e ryru omohynyhēmba marány-py ogwereco asy hagwā Nhandejáry hekoha vaikwe-rehe. Ha'e oiko opa e'ŷ reheve.

⁸ Ohexa uka gweko pu'akaha omba'egwasu porāha ave tatatī-rami. Upe tatatī ramigwa, hembipe reheve ojohupa Nhandejáry rendaty-py. Upéixa-gwi ndikatúiry avave oike upe-py. Are-ma ndikatúi oike. Nhandejáry rembigwái sete va'e ombohasa asyharā yvypóry kwéry-pe ojapopa e'ŷ mboyve gwembíaporā avave voi ndikatúi oike upe-py.*

16

Mba'e ryru pygwa sete marány rehewa nhe'ẽ

¹ Nhandejáry rembigwái sete va'e kwéry-pe ombou hatā voi onhe'ẽ íxupe kwéry Nhandejáry rendaty-gwi. Ahendu onhe'ẽ ramo:

—Tapeho penhohē sete peve mba'e ryru pygwa yvy ári. Peity marány Nhandejáry ombohassa asy hagwā hekoha vaikwe-rehe, he'i íxupe kwéry ombou-vy onhe'ẽ.

² Aipo ramo peteī onhypyrū va'e osē oho-vy onhohē yvypóry kwéry-rehe teko rasy. Entero ójehe kwéry onhemoi uka va'ekwe gwive mymba vaigwasu ete ikwaa ukaha gwive, entero omboete va'ekwe gwive ha'anga-pe, mymba vaigwasu ete va'e ra'anga-pe ave ijaipa ete-ma ipire. Hasy eterei-gwi oiko asypa-ma hikwái. Upéixa peteī mba'e ryru-gwi onhohēmba uka-ma Nhandejáry ombohassa asy-vy hekoha vaikwe-rehe.

³ Upe rire mokōiha Nhandejáry rembigwái yváy pygwa omarány onhohē ygwasu-rehe. Marány oity-ma ramo ygwasu-rehe y-gwi rei oiko-ma tugwy. Kente omano va'ekwe rugwy-rami oiko-ma voi y. Hugwy-ma ramo y, omanomba ete y gwy-rupi okwa va'e gwive. Upéixa ambue mba'e ryru-gwi ogwereco asy uka-ma Nhandejáry marány ogweroma'eandu-vy hekoha vaikwe.

⁴ Upe rire mbohapyha Nhandejáry rembigwái yváy pygwa omarány onhohē entero sysry-rehe entero y ovuvu rei va'e-rehe gwive hugwypa hagwā y.

⁵ Upe óra-py onhe'ẽ va'e yváy-gwi ahendu entero y kwéry-rehe onhangareko va'e he'i ramo Nhandejáry-pe:

—Nde ae nde reko porā va'e. Nde ae nde reko marangatu tee va'e. Nde ae erereko arā anhete ha-py yvypóry hembiapokwe-rehe. Yma gwive ãy ete peve nde voi.

⁶ Ha'e kwéry ojuka va'ekwe ne nhe'ẽ-py omombe'u va'etykwe-pe. Heta heta nde-rehe ojerovia va'e-pe ojuka ave. Ñy katu upéixa-gwi erereko asy-ma íxupe kwéry hembiapokwe-rami jevy. Ijy'uhéi va'e tugwy mate ojohu va'erā ho'y'u mo'ā hagwā. Oiko asy-ma ave arā ha'e kwéry, he'i y kwéry-rehe onhangareko va'e Nhandejáry rembigwái imboete-vy.

⁷ Upéi ambue va'e nhemboete haty-gwi onheandu uka onhe'ẽ va'e. Upe-gwi ombou onhe'ẽ xe remiendu ramo he'i va'e:

—Nde ae Tupā ore Járy, nde tuvixa vixa ete va'e nde. Nde pu'aka tee va'e voi nde. Nde ae heko porā tee va'e. Nde erehekohojohu kwaa voi hembiapo vaikwe-rehe. Nde ae ereikwaa erembohassa asy hagwā hembiapo vaikwe-rehe yvypóry kwéry-pe. Anhete ha-py voi ne rembiapo, he'i imboete-vy.

* ^{15:8} 1 Rs 8.10-11; 2 Cr 5.13-14; Is 6.4

Upéixa ambue mba'e ryru-gwi onhohēmba uka-ma Nhandejáry marány ombohasa asy-vy hekoha vaikwe-rehe.

⁸⁻⁹ Upe rire irundyha Nhandejáry rembigwái yváy pygwa omarány onhohē kwarahy-rehe. Omoī-ma ramo marány kwarahy-rehe haku etereima kwarahy. Tata piragwái-py ohapy entéro yvypóry-pe. Kwarahy rata-py enterove okáipa. Ohasa asy-ma jepe hikwái onhe'ẽ vai vai joty Nhandejáry-rehe hikwái. Ndogwerovái joty gwekoha omboete hagwā íxupe. Ipu'aka marány kwéry-rehe oikwaa teĩ jepe nombotuvixamba'éiry joty íxupe.

Upéixa ambue mba'e ryru-gwi onhohēmba uka-ma Nhandejáry marány ogwereco asy hekoha vaikwe.

¹⁰ Upe rire cincoha Nhandejáry rembigwái yváy pygwa oity omarány mymba vaigwasu ete va'e gwapy haty-rehe. Upe marány ohupity joty entéro omandaha gwive. Inhypytūmba-ma. Íxupe omboete va'e gwive ohasa asy asy upe jave hikwái. Mba'e rasy rendu-vy ojesu'u su'upa hikwái.

¹¹ Mba'e rasy rendu-vy onhe'ẽ vaipa-ma Nhandejáry-rehe. Ha ijai aipa va'e onhe'ẽ rei-ma ave hese. Ndogwerovái joty gwekoha vaikwe, noséséi joty tape vai-gwi. Tape ky'a-rupi joty oje'oise hikwái.

Upéixa ambue mba'e ryru-gwi onhohēmba uka-ma Nhandejáry marány ogwereco asy-vy hekoha vaikwe.

¹² Upe rire katu seisha Nhandejáry rembigwái yváy pygwa oity omarány ysryrgwasu Eufrates héry va'e-rehe. Oity marány ramo y katu hypa-ma. Y hypa rire ombohape porā hagwā mburuvixagwasu kwéry ou va'erā kwarahy resē ha-gwi gwembigwái kwéry ndive. Ykwe-rupi ohasa va'erā hikwái oje'óiy ohovaití hagwā oa'e'ýha kwéry-pe.

¹³⁻¹⁴ Upe-ma ramo aheda ju'i ramo oho anháy mbohapy. Peteĩ osẽ oho-vy tejujagwagwasu juru ryepy-gwi. Peteĩ jevy osẽ oho-vy mymba vaigwasu ete va'e juru ryepy-gwi. Peteĩ jevy osẽ oho-vy hesegwa nhe'ẽ mombe'uhatty juru ryepy-gwi. Ju'i ramo meme osẽ oho-vy anháy ijuru ryepy kwéry-gwi. Hexapyrā ojapo va'e meme. Upe va'e-ma oporombotavyha rei voi-ma. Upe mbohapy va'e anháy rembiporu oho arā entéro mburuvixa oĩ va'e gwive yvyrehe omboaty aty hagwā imonhorairō uka-vy. Nhandejáry Tupā ipu'aka tee va'e áry-py onhorairō irō va'erā.

¹⁵ —Tapejeapysaka porā katu ko xe nhe'ẽ-rehe, he'i Hesu nhande-vy. —Avave ndoikwaái mba'e áry-py pa aju arā. Imonda va'e-rami avave ndoikwaái aju hagwā óra, he'i. —Ovy'a va'erā ójehe onhangareko va'e. Oao-py onhemondeha-rami voi gweko porā reheve xe ra'arō va'e pono opi-vy oiko va'e-rami otĩ enterove va'e pa'ũ-my, he'i.*

¹⁶ Upe rire katu omboaty-ma okwa-vy mburuvixa kwéry-pe onhorairō hagwā. Hebreu nhe'ẽ-py ombohéry upe onhorairō hagwā Armagedom.

Upéixa ambue mba'e ryru-gwi onhohēmba uka-ma Nhandejáry marány ogwereco asy-vy hekoha vaikwe.

¹⁷ Áy katu seteha-ma voi Nhandejáry rembigwái yváy pygwa ombou omarány. Onhohē omarány yvytu-rehe. Upe jave Nhandejáry rendaty-gwi ahendu jevy onhe'ẽ ramo. Ijapykagwasu yke-rehe oĩ va'e ombou onhe'ẽ he'i-vy:

—Tembiapo aporā gwive opa-ma. Ojejapopa-ma, he'i.

¹⁸ Upe ho'e-vy oiko overa va'e ara sunu hyapu va'e, yvy katu osüsű-ma. Nhandejáry omoingo kwimba'e gwive áy peve ndoikói koixagwa ivai vaive va'e yvy osüsű vai ete.

* ^{16:15} Mt 24.43-44; Lc 12.39-40

¹⁹ Upe tetāgwasu gwive omboja'o ja'o mbohapy tavarāxa omboja'o ja'o ipa'ū-my. Entero va'e yvy ári oĩ va'e gwive tetā tetā-rupi óy hapovy-ma okyta ovapy-py ho'apa-ma hóy kwéry. Tetā tetā gwive onhembyaipa-ma. Upe jave Nhandejáry ndoheja reíry Babilônia tetāgwasu. Yma nombohasa asýi ramo jepe, ipaha-py ombou-ma íxupe maranygwasu imbohasa asy ete-vy.

²⁰ Heta heta yvy okanhy-ma yvy ryrýi hatā eterei-gwi. Opa okanhy y ogweroajere va'e, yvyatygwasu gwive okanhymba. Ndojehexavéi-ma.

²¹ Yváy-gwi Nhandejáry ombou amandaugwasu ho'a hagwā kwimba'e kwéry-rehe. Amandaugwasu pohyikwe ogwereco va'e quarenta kilo voi. Upéa-gwi gwī kente kwéry onhe'ẽ vai vai voi Nhandejáry-rehe ombou-ma ramo marány amandaugwasu reheve íxupe kwéry. Maranygwasu vai eterei-gwi ombopoxy íxupe kwéry Nhandejáry-rehe.

Upéixa mba'e ryrupaha-gwi onhohémba uka-ma Nhandejáry marány ogwereco asy hekoha vaikwe.

17

Tetā kunha ikwimba'ese va'e-rami rehewa nhe'ẽ

¹⁻² Sapy'a katu arova ramo xe resa aheda jevy sete marány ryrukwe rekoha. Ama'ẽ jave peteĩ ou onhopa'ū-gwi he'i xe-vy:

—Eju katu xe rupive. Taheda uka nde-vy kunha ikwimba'ese va'e ramigwa heko vai va'e, he'i xe-vy. —Nhandejáry ombohasa asy-ta upé tetā mygwa ysyry kwéry rembe'y-py okwa va'e kwéry-pe. Kunha ikwimba'ese va'e-rami upé tetā mygwa kwéry ojáry e'ŷ rapykwéri oje'ói hikwái. Tupā tee e'ŷ va'e-pe ogwereco gweko járy ramo hikwái. Heko vai-rupi okwa va'e teko ky'a-py oiko va'e hendive. Entero mburuvixa kwéry yvy ári oĩ va'e gwive oipe'a íxugwi gweko vairã. Ha yvypóry kwéry-pe ogweroka'u vai vai vérami voi hikwái. Ivai vaive voi hekoha kwéry, he'i.

³ Upéi katu Nhandejáry Nhe'ẽ Marangatu tee va'e xe mo'arandu-vy tekwat y kwaty e'ŷ-rupi xe reraha hagwā hembigwái. Upé-py aheda ogwapy oĩ-vy kunha mymba vaigwasu ete ári. Mymba pytā ári ogwapy. Oĩ nhe'ẽ vai vai ojehai va'e upé mymba rete-rehe Nhandejáry-rehe onhe'ẽ vai vai hagwā. Upé mymba vaigwasu ete va'e ogwereco sete voi inhakā, dez voi hatā jojapa va'e ave.

⁴ Upé kunha katu onhemonde voi ao pytā-my va'e voi. Oaoa-rehe ombo-jegwa jegwapa voi ouro-py. Ita kyra hendy hendy va'e pérola, hepy meme va'e-py ave ombojegwa jegwapa oao onhemonde-vy. Ha opo-py ogwereco oipyhy-vy mba'e ryru ouro-gwi ijapopyre. Ipy'a-py hyntyhē-ma voi ipy'a ky'a vaikwe. Upé mba'e vai ha'e voi oakā-gwi rei ojapose-gwi oiko gweko vari-upri gweko tī e'ŷ reheve. Ipy'a ky'aha rexha ukaha vérami omohynyhēmba-ma hereko-vy ombo'a'e ryru.

⁵ Osyva-rehe ogwereco ojehai va'ekwe avave ndoikwaáiry mba'e pa he'ise upé va'e: "Tetāgwasu Babilônia kunha ikwimba'ese va'e kwéry ruvixa oĩ va'e upé va'e. Heko tī e'ŷ va'e ruvixa voi" he'i ojehai va'ekwe upé kunha syva-rehe.

⁶ Upé-py aheda upé kunha ogwerohory-vy. Gwī oka'u va'e ogwerohory hory eterei voi kánha-pe ho'useve seve-gwi vérami upé kunha ogwerohory Nhandejáry reroviaha kwéry ojuka juka va'ekwe rexha-vy. Gwī Nhandejáry Hesu-rehe ojerovia tee va'e kwéry-pe ojuka juka-rehe onhemonga'useve seve vérami oho-vy upé kunha.

Aheda ramo upé kunha oka'u va'ety voi ra'e ha xe py'a onhemondýi-ma voi.

⁷ Ha Nhandejáry rembigwái he'i xe-vy:

—Ani erenhemondýi eterei teĩ, he'i xe-vy. —Amombe'u-ta nde-vy mba'e pa he'ise upe kunha erehexa va'ekwe-rehe. Ha henda ave heta hatĩ va'e inhakã reta va'e ave he'ise va'e amombe'u-tama ave nde-vy, he'i.

⁸ —Upe mymba vaigwasu ete va'e oiko va'ekwe. Ko'ánga ae ndoikovéi-ma. Upéi ae katu osẽ jevy va'erã yvykwarusu ijapyre'ŷ va'e-gwi oiko jevy hagwã. Upe rire ae katu omokanhy ete va'erã íxupe. Gwí héry oĩ e'ŷ va'e yváy pygwa kwatia-rehe onhemondyipa arã. Yma ko yvy oiko e'ŷ mboyve Nhandejáry nomoíry héry kwéry tekove ijapyre'ŷ rehewe oiko hagwã réry pa'ũ-my. Ha ãy onhemondyipa hikwái mymba vaigwasu ete va'e rexa-vy. Ohexa ramo upe oiko va'e, ko'ánga ndoikovéi-ma, upéi ojekwaa jevy joty ramo, onhemondyipa voi va'erã íxugwi hikwái.

⁹ Upe va'e-rehe inharandu porã voi va'e mante oikwaa porã arã. Upe sete inhakã he'ise sete yvyatyrusu kunha gwapy hatygwe. He'ise ave sete mburuvixa.

¹⁰ Cinco osẽ sẽ va'ekwe-ma. ãy peteĩ mante omanda va'e. Ambue va'e ne'írã vyteri oiko mburuvixa ramo. Oiko-ma ramo ndahi'are mo'ãi joty opyta omanda hagwã.

¹¹ —Ha upe mymba vaigwasu ete oikove va'ekwe ha ãy ndoikovéi va'e-ma, oiko va'erã mburuvixa ramo. Upe sete mburuvixakwe-gwi ha'e tuvixave voi va'erã. Ha íxupe ave omokanhy ete va'erã.

¹² Upe dez hatĩ erehexa va'ekwe katu dez mburuvixagwasurã-rehe ha'e ohexaukase. Ne'írã vyteri mburuvixa oiko ramo. Peteĩ óra oiko arã mburuvixa ramo upe mymba vaigwasu ete va'e ndive.

¹³ Peteĩxa ogwerojoja va'erã onhe'ë. Peteĩxa ome'ë va'erã opu'akaha upe mymba vaigwasu ete va'e-pe ipu'akave hagwã.

¹⁴ Onhorairõ arã Ovexa Ra'y ramigwa va'e ndive. Ha'e ae katu ipu'akave va'erã hese kwéry. Ha'e Nhandejáry tee-gwi ha'e mburuvixa ruvixagwasu voi ha'e. Entéro mba'e járy-gwi ha'e mba'e jaryve voi va'e ha'e. Ha'e ae ipu'aka arã voi hese kwéry. Gwembipe'akwe onhondive gwarã ojehesa rerova e'ŷ rehewe ojerovia tee hese va'e kwéry ndive ha'e ipu'aka va'erã hese kwéry.

¹⁵ He'i ave xe-vy Nhandejáry rembigwái:

—Erehexa kuri y tuvixa osyry va'e. Upe pygwa tetã kunha ikwimba'ese va'e ramigwa ave erehexa-ma kuri. Upe y tuvixa osyry va'e he'ise yvypóry kwéry-rehe. Opa opa-rupi yvy oho va'e rupigwa kwéry gwive entéro ijypyre pye va'e kwéry gwive, opa opa kente ambue mbue kwéry gwive, entéro nhe'ë ambue mbue-py onhe'ë va'e kwéry gwive he'ise upe ysyrygwasu.

¹⁶ —Upe dez hatĩ va'e-rami voi erehexa kuri mburuvixa kwéry, mymba vaigwasu ete ave va'e ojere arã upe kunha ikwimba'ese va'e ramigwa-gwi. Ndaija'evéi arã hese. Ha'e kwéry oipe'a paete arã íxugwi ogwerekva'e gwive. Mba'eve ndohejái arã íxupe. Ha'enso oiko arã. Opi-vy oheja arã íxupe. Ho'u arã ho'okwe ha hembyre ohapypa va'erã.

¹⁷ Nhandejáry voi omoï ipy'apy-py kwéry ojapo hagwã hese ojapose va'e peteĩxa oiko hagwã okwa-vy ome'ë hagwã ave opu'akakwe upe mymba vaigwasu ete-pe mburuvixa ramo oiko va'e-pe. Nhandejáry omombe'u hagwerami oiko peve ojapo.

¹⁸ —Upe kunha ikwimba'ese va'e erehexa kuri he'ise upe tetãgwasu-rehe. Upe tetãgwasu ipu'akave voi. Mburuvixagwasu kwéry ko yvy ári oĩ va'e gwive oiko ipogwy-py.

18

Babilônia tetãgwasukwe tekohagwe rehewa nhe'ë

1 Upe mba'e oikopa rire ojehexa uka xe-vy ogwejy ramo yváy-gwi ipu'aka va'e Nhandejáry rembigwái. Hembipepa-ma voi igwejy ramo yvy-rehe. Ohesapepa voi yvy-rehe.

2 Osapukái etei imombe'u-vy:

—Tekohagwe voi Babilônia tetãgwasukwe, he'i, —tekohagwe voi. Upe-py okwa va'e gwive omokanhymba-ma. Áy anhaygwasu kwéry mante okwa upe-py. Áy entéro anháy ivaive ive va'e mba'e ovale e'ý va'e mante okwa upe-py. Áy gwyra kwéry katu ivai vai va'e mate oí upe-py.

3 Yma oiko vyteri ramo upe pygwa kwéry kente meme ogwereko kuri kente ambue kwéry, tetã tetã rupigwa kwéry-pe gweko ky'aha-rupi. Ndoikoséi ramo teĩ jepe omoingo joty va'ekwe gweko ky'aha-rupi íxupe kwéry. Ogweroka'u vai vai vérami voi hikwái. Ivaive ive voi hekoha kwéry. Entéro mburuvixagwasu kwéry yvy arigwa teko vai-py oiko voi hendive. Íxugwi oipe'a gweko vairã. Ombo'e vende va'ety kwéry ovy'a paete voi araka'e upe tetã-my. Upe pygwa kwéry ojogwa jogwa voi araka'e ombo'erã ojohu hagwã gwekoha vairã. Ha upe tekoha vai rexah ukaha vendeha araka'e hepykwe kwéry-rehe organave nave voi okwa-vy, he'i.

4 Upe nhe'ẽ omombe'u rire ambue va'e onhe'ẽ ramo ahendu-ma yváy-gwi:

—Xe re'ýi kwéry, entéro xe-rehe ojerovia va'e gwive, ani kuri pepytá teĩ upe tetã-my. Pesëmba katu kuri upe-gwi. Ani katu peipe'a teĩ íxugwi kwéry heko vaiha pono peẽ ave pehasa asy hendive, he'i onhe'ẽ ombou va'e yváy-gwi.

5 —Opaixagwa ojapo vai eterei upe pygwa kwéry. Nombohasa asy pya'éi ramo jepe Nhandejáry, ndikatuvéi-ma oheja rei teko avy hagwe-rehe.

6 Áy hekokwe-rami joty perekó kuri íxupe kwéry. Pembohasa asy tee katu íxupe kwéry. Hembiapokwe-rami joty pejapo kuri hese. Heta ojapo vai va'ekwe pende-rehe. Áy hembiapokwe-gwi hetave pejapo kuri hese kwéry. Ombojehe'a araka'e gwekoha vaikwe y-rehe vérami ho'u va'erã-rehe ave. Ogwerova voi gwekoha vaikwe gwapixa kwéry-rehe. Upéixa pejapo ave kuri hese. Hetave pejapo ave hese. Pembojehe'a ave vérami íxupe kwéry hekoharã kwéry ohasa asy tee hagwã hekoha vaikwe-rehe, he'i.

7 —Yma ovy'a va'ekwe oiko-vy hikwái. Ha'e oiko porã porã vérami mo'ã va'ekwe, oao porã porã omonde va'ekwe. Áy katu pembovy'are'ý-ma íxupe kwéry. Pembohasa asy íxupe kwéry ipy'a vy'are'ý hagwã. Yma ha'e he'i rei ójehe onhembotuvixa-vy: “Ore mburuvixagwasu-rami voi ore oroiko. Omanda va'e apyka ári orogwapy voi oroí-vy” he'i rei voi araka'e ójehe hikwái. “Tembirekokwe vérami, imytu'e'ý va'e vérami ndoroikói voi ore. Ore-vy ndoikóiry voi ore remimboasy” he'i onhemboete rei-vy araka'e hikwái.

8 Upéa-rehe voi peteĩ áry-py ogwahé arã íxupe marány. Heta heta mba'e rasy oiporu va'erã. Onhemboasy joa va'erã hikwái. Ivare'agwasupa voi va'erã hikwái. Ohapypa joty va'erã upe tetã. Nhandejáry ipu'aka tee va'e ae ogwereko asy arã upe tetã mygwa kwéry-pe hembiapo vaikwe-rehe, he'i onhe'ẽ ombou va'e yváy-gwi.

9 Yma va'ekwe entéro mburuvixagwasu gwive yvy arigwa omomorã morã hekoha ipy'a jerure rure hese va'e gwive teko vai-rupi oiko. Ha'e-rami joty heko vai va'e ave omboasy arã íxupe. Ogwersapukái va'erã ogwerovy'are'ý-vy ave ohexa ramo opu'ã tatati íxugwi okái jave.

10 Mombyry-gwi rei hesayvuku arã hese okyhyje-gwi mba'e rasy ha'e ohasa va'e-gwi. Upéixa-gwi he'i okwa-vy:

—Marány ho'a-ma tetāgwasu Babilônia-rehe. Sapy'a ete-py ho'a ipu'aka va'ekwe-rehe. Ojehu va'ekwe rapypa-vy voi ombou kuri Nhandejáry marány ombohasa asy-vy íxupe kwéry.

¹¹ Enterove mombyrygwa ogwerojahe'o voi marány ohexa-ma ho'a-ma ramo hese kwéry. Ombo'e vende va'ety kwéry ave ogwerojahe'o. Omboasy rei mate okwa-vy.

—Ndojogwavéi-ma va'erã nhandéhegwí Babilônia pygwa kwéry, he'i. —Naxe pirapirevéi-ma, he'i-ma.

¹² —Avave ndojogwavéi-ma va'erã omba'e porãrã onhembojegwa jegwa va'erã mo'ã mba'eve hepy va'e ouro-gwi ijapopyre, prata-gwi ijapopyre, ita rendy rendy ita kyra rendy va'e pérola-gwi ijapopyre ave ndojejogwavéi-ma va'erã xéhegwí. Áy katu nonhembojegwa porãvéi-ma va'erã hikwái. Ndojejogwavéi-ma va'erã xéhegwí ao porã porã avendese eterei va'e, he'i. —Hepyve pyve va'e oaorã gwí ipo hyverapa va'e, gwí pytã porã va'e, gwí isýimba rei va'e, gwí hagwegwasu pytã va'e ave ao ndojejogwavéi-ma va'erã xéhegwí, ho'e-vy ojahe'o.

Yvyra kwéry hyakwã porã-gwi hepy va'e ave novende mo'ãvéi-ma. Yvyra aju'y ave novende mo'ãvéi-ma. Ha entéro mba'e porã ojejapo va'ekwe marfim-gwi, yvyra hepy va'e-gwi, bronze-gwi, hierro-gwi, ita morotí mármore-gwi iporãve rãve-gwi hepy tee va'e novende mo'ãvéi-ma Babilônia pygwakwe-pe. Ovende-ta mo'ã rire katu ndovy'avéi-ma hikwái.

¹³ He porã va'e aju'y mombyry gwigwa, opaixagwa hyakwã porã porã va'e ave novende mo'ãvéi-ma hikwái upe-py.

Ndojogwavéi-ma va'erã avave íxugwi kwéry uva rykwere ijapopyre. Ndojejogwavéi-ma va'erã ave nhandy íxugwi. Ndojogwavéi-ma va'erã trigo ku'i, trigo iku'i e'ý va'e ave íxugwi. Ndojogwavéi-ma va'erã íxugwi vaka, ovexa ave, kavaju kwéry ha imba'e ryru ave. Ndojogwavéi-ma va'erã ave kente gwembigwa mbigwairã.

¹⁴ Mba'e vende va'ety kwéry he'i yvy kái rexá-vy:

—Entéro mba'e nde py'a jerure hese va'ekwe áy katu opa-ma. Ne mba'e reta reta va'ekwe yma. Áy katu nane mba'e retavéi-ma. Ne mba'e rakate'ý hagwã áy katu opa-ma ndéhegwí. Ndaiporivéi-ma. Ndererekovéi-ma mba'eve. Nenhembohory hagwe opa rei ndéhegwí, he'i.

¹⁵ Yma va'ekwe mba'e vende vende va'ety kwéry ojohu upe-py omba'e jogwa va'erã íxugwi kwéry. Áy okyhyje-vy hikwái. Áy katu omanha sayvuku rei okwa-vy. Ndohasa asyséi mo'ã indive hikwái. Upéixa-gwi onhemboasy joa rei hikwái. Ogwerosapukái joa hikwái ho'e-vy upe tetã-rehe:

¹⁶ —Ou-ma katu maranygwasu pe tetã-my. Tetãgwasu porã va'ekwe upe va'e. Upe pygwa kwéry ijaoo kwéry ojegwapa va'ekwe. Onhemonde va'ekwe ao iporã va'e-py. Ojegwa va'e ijegwaha ouro-gwi ijapopyre-py. Ita kyra pérola-py imbojegwa jegwapyre.

¹⁷ Sapy'a ete-gwi ndogwerekovéi-ma omba'e reta iporã va'ekwe, he'i onhemboasy joa-vy okwa-vy.

Entéro kente y-rupi ogwata va'e mba'e ryru pygwa onhemomombyry hikwái. Mba'e ryru rerekwa kwéry, hembigwái kwéry gwive, hemimbogwataha kwéry gwive, mba'e ryru moatyrõhaty kwéry gwive, ogwata rei va'e kwéry gwive onhemomombyry joa hikwái. Hesayvuku vuku rei hikwái mombyry-gwi rei.

¹⁸ Yvy kái rexá-vy ramo ohexa-ma ramo tatatí opu'ã íxugwi onhemboasy-vy ogwerosapukái hikwái.

—Ne'írā vyteri oiko a-ramigwa tuvixa va'e tetā opamba'e rei jogwa jogwahaty, he'i hikwái onhemboasy joa-vy.

¹⁹ Omombo oakā-rehe onhemboasy rexā uka-vy yvy ku'i omombo ójehe ov'yare'ŷ-vy onhemboasy eterei-vy hikwái. Ojahe'o osapukái ohapirō-vy. He'i ndovy'ái-gwi:

—Kanoagwasu járy kwéry oiko porā va'ekwe om̄ba'e ovende jave upe tetā-my oĩ va'e kwéry-pe, he'i om̄boasy joa-vy hikwái imandu'a ndu'a om̄ba'e vende vendehatygwe-rehe. —Onhemomorāse rei-gwi ojogwa heta va'ekwe hikwái. Sapy'a ete-py ndojogwavéi-ma va'erā. Nhandejáry ombou-ma kuri marány ijukapaharā kwéry. Ndoikovéi-ma voi kuri upe tetā-my. Peteĩ óra-py ndoikovéi-ma, he'i ohexa-vy onhemboasy joa-vy hikwái.

²⁰ —Peẽ ae, yváy-py peiko va'e gwive, pevy'a katu. Entéro Nhandejáry remimondo kwéry ha inhe'ẽ-py omombe'u va'etykwe ave Nhandejáry-rehe ojerovia va'e gwive pevy'a katu. Nhandejáry tee ogwereko-ma íxupe kwéry hembiapokwe-rehe. Hembiapo vai meme va'ekwe peẽ-my. Áy katu hembiapo vai hagwe-rami ogwereko-ma ave íxupe kwéry.

²¹ Upe rire peteĩ Nhandejáry rembigwái yváy pygwa imbaraete va'e oipyhy peteĩ itagwasu avati soka ramigwa ha omombo-ma ygwasu mbyte-py. Upéi he'i:

—Upe avati soka xe amombo hagwe-rami ave Nhandejáry omombo-ta ave Babilônia tetā mygwa kwéry ndohexavéiry hagwā-py.

²² Upe-py avave nohenduvéi arā ov'y'a joa va'e. Nahembýiry ombopu kwaa va'e gwī mba'e ryapu gwyrapasā reko ete. Nonhehenduvéi-ma arā ipu ramo flauta, mimbygwasu ave. Avave nombopuvéi-ma va'erā upe-py. Avave nomba'apovéi-ma arā upe tetā-my. Avave nonhembiapovéi-ma va'erā upe-py. Nonhehenduvéi-ma va'erā onhembiso va'e. Ndaijayvuvéi-ma va'erā avave upe tetā-my.

²³ Mba'eve nahendyvéi-ma va'erā ave. Nonhehenduvéi-ma va'erā ave omenda ramo kunhataĩ, karia'y ave. Hembiapo vai-gwi ombotavypa rei va'ekwe entéro tetā tetā rupigwa-pe. Mba'e reta porā porā hepy ramo jepe ovendepa ete joty va'ekwe íxupe kwéry. Babilônia tetā mygwa ovende kwaa ave. Ambue tetā mygwa ha'e-rami e'ŷ ovende. Enterovea-gwi hekoha vaive ave hikwái. Upéixa-gwi ombohasa asy-ma Nhandejáry íxupe kwéry.

²⁴ Upe-py Nhandejáry-rehe ojerovia va'e-pe ojuka meme voi va'ekwe. Inhe'ẽ-py omombe'u va'ety-pe ojuka meme ave va'ekwe. Ha entéro yvypóry kwéry-pe ave. Opa opa tetā tetā rupigwa-pe ave ojuka uka meme voi va'ekwe upe tetā mygwa kwéry. Upéa-rehe Nhandejáry ogwereko asy-ma Babilônia tetā mygwa kwéry-pe, he'i Nhandejáry rembigwái omombe'u-vy.

19

¹ Upe rire katu yváy-gwi onhe'ẽ va'e ahendu. Onhemboaty atypa va'e oporahéi joaha-rami iporahéi ryapu ahendu yváy pygwa kwéry porahéi:

—Tanhampoete katu Nhandejáry-pe.

Nhandejáry ae ogwereko pu'aka

oipe'a hagwā kente kwéry-gwi heko vaikwe.

Nhatima katu íxupe.

Ha'e anho imba'egwasu tee va'e.

Ipu'aka ete tee va'e voi Nhandejáry,

he'i oporahéi joa-vy hikwái.

² —Ha'e heko porā tee va'e voi.

Upéixa-gwi anheteha-rupi

ojohu kwaa hembiapo vaikwe hese.

Ha'e omondo-ma upe kunha ikwimba'ese va'e veramigwa oiko asy hagwā-py.
 Omongy'a va'ekwe vérami yvypóry kwéry-pe gweko ky'akwe-rupi.
 Hesu-rehe ojerovia va'ekwe-pe ojuka juka-ma va'ekwe.
 Upéa-rehe Nhandejáry Tupā ombohasa asy íxupe kwéry,
 he'i oporahéi imboete-vy Nhandejáry-pe hikwái.

³ Upéi ha'e kwéry osapukái jevy he'i-vy:

—Tanhambóete katu Nhandejáry-pe. Ohapy tetāgwasukwe. Tatatīgwasu opu'ã ojereroyvate oho-vy. Ijapyre'ŷ arā upe tatatīgwasu, he'i Nhandejáry-pe imboete-vy.

⁴ Ha gwī vinte e quattro mburuvixa kwéry, ha irundy Nhandejáry apyka jere-rehe oiko va'ety onhesū Nhandejáry rovagwy-py omomba'egwasu eterei hagwā íxupe. Ogwapy oĩ-vy oapykagwasu ári. He'i íxupe okwa-vy:

—Ore oromboete va'e voi nde-vy. Orovy'a eterei voi nde-rehe ore, he'i omboete tee-vy íxupe.

Yváy-py oiko-ta vy'agwasu mendaha pygwa-rami

⁵ Upéi, apykagwasu-gwi mburuvixagwasu renda-gwi ahendu-ma onhe'ẽ ramo:

—Tapemboete katu Tupā Nhandejáry Tupā tee-pe, he'i onhe'ẽ-vy. — Pemboete katu íxupe peẽ enterove hembigwái kwéry. Peẽ yvypóry kwéry, hese ojerovia va'e gwive pemboete joa ete katu íxupe. Peẽ, huvixa va'e kwéry, peẽ, pende reko mirīve va'e kwéry ave pemboete joa ete katu Nhandejáry-pe, he'i onhe'ẽ-vy íxupe kwéry.

⁶ Upe javé ahendu hyapu va'e kente heta va'e nhe'ẽ vérami, y onhehẽ va'e vérami oky-tama va'e hyapu va'e vérami voi ahendu. He'i:

—Tanhambóete katu Tupā Nhandejáry-pe. Ha'e anho voi Nhandejáry tee va'e ipu'aka tee va'e nhande-rehe kwéry. Ha'e anho nhande ruvixa. Ha'e anho mante onhemingo-ma mburuvixagwasu-ramo enterove-rehe.*

⁷ Javy'apa katu japorahéi katu imboete-vy. Nhambohory katu íxupe. Nhamomba'egwasu katu íxupe ituvixave-gwi ha'e entéro va'e-gwi. Ây og-wahẽ-ma vy'agwasu ete áry. Oiko-tama ãy Ovexa Ra'y ramigwa va'e ójehe ojerovia va'e omenda-ta va'e vérami oiko-ta hendive kwéry. Hembirekorã vérami onhembosako'i-ma voi va'ekwe ha'arō-vy hese ojerovia tee va'e kwéry.

⁸ Onhemonde-ma ao iporā tee va'e-py omimbi etei va'e-py. Ipotī ete va'e-py onhemonde-ma voi katu. Hembireko vérami oiko hagwā indive omoirū hagwā íxupe. Upe ija Nhandejáry-rehe ojerovia va'e py'a potī hagwe ae upe ija.

⁹ Upe-ma ramo Nhandejáry rembigwái yváy pygwa he'i xe-vy:

—Emoĩ katu kwtia-rehe. Ovy'apagwasu menda ha-py oĩ va'e kwéry. Upéixa Ovexa Ra'y ramigwa va'e remienoigwe kwéry ovy'apa gwasu va'erā. Hemimongaru kwéry ovy'apagwasu-ma va'erā hikwái, he'i.

Upe-ma ramo he'i jevy:

—Ko va'e Nhandejáry nhe'ẽ tee va'e voi. Anhete tee voi ko nhe'ẽ, he'i.

¹⁰ Upe-ma ramo anhesū-ma amboete hagwā íxupe. Ha'e ae he'i xe-vy:

—Ani katu erenhesū teĩ xe-vy, he'i. —Nhandejáry-pe ae emboete katu. Xe ko ne irū tee voi. Entéro Hesu rehogwa nhe'ẽ omombe'u va'e ave irū voi xe. Ani erenhesū teĩ xe-vy. Nhandejáry-pe ae katu emboete tee, he'i-ma onhe'ẽ-vy xe-vy. —Entéro Nhandejáry nhe'ẽ-py omombe'u va'ety, entéro Hesu rehogwa nhe'ẽ omombe'u va'e ave Nhandejáry Nhe'ẽ Marangatu tee va'e ae omoarandu-gwi oikwaa anhetegwa va'e omombe'u hagwā, he'i.

* 19:6 SI 93.1; 97.1; 99.1

Kavaju morotī va'e arigwa rehewa nhe'ẽ

¹¹ Upéi ahexa kavaju morotī va'e yváy onheha'ýnha jave. Upe kavaju ári oĩ va'e héry, "Anhete Teegwa Voi" "Ha'ete Voi Jeroviah" ave héry. Mokõi héry ogwereko gwekoha porã tee oikwaa uka hagwã. Gweko marangatu rehewe ombohosa asy meme ójehe ija'e'ý va'e kwéry-pe. Gweko marangatu rehewe onhorairõ ave ondive onhorairõse va'e ndive. Enterove he'i hagwã hese: "Anhete tee ha-py voi a-rami xe rerekro. Gweko jejavy e'ý tee rehewe a-rami xe rerekro asy" he'i hagwã hese.

¹² Tata rendy-rami voi hesa. Ha oakã-rehe ogwereko heta ijegwaka. Avave ndoikwaái téry hese ojehai va'ekwe. Gwéry tee ha'e mante oikwaa.

¹³ Ijahoja-rehe katu heta oĩ hugwy va'e. Héry voi "Tupã Nhandejáry reko kwaa ukaha".

¹⁴ Heta heta Nhandejáry rembigwái yváy pygwa ao morotī ipy hyverapa va'e ipotī va'e rehewe oho hapykwéri. Kavaju morotī kwéry ári oje'óí hikwái.

¹⁵ Ha Tupã Nhandejáry reko kwaa ukaha oikwaa uka ojuru-gwi osẽ va'e kysepuku oikytîha-rami, onhe'ẽ-py ohundi yvypóry kwéry-pe. Onhemomburuvixagwasu teeha oikwaa uka-vy ogwereko hierrogwasu ijapopyre opo-py. Tetã tetã mygwa kwéry-pe, ójehe ojerovia e'ý va'e kwéry-pe gwive ha'e oiko va'erã mburuvixagwasu ramo. Opu'akaha-rupi voi omanda pohýi arã hese kwéry. Nhandejáry ipu'aka tee va'e ov'y'a e'ý eterei-gwi ogwereko asy asy va'erã opa opa rupigwa nhande py-py nhahumbiri va'e-rami.*

¹⁶ Ijahoja-rehe hetyma-rehe ojehai a-rami: "Mburuvixa Ruvixagwasu jevy ha entéro mba'e járy-gwi ha'e Mba'e Jaryve voi" he'i ojehai-vy hese.

¹⁷ Upéi ojehexa uka xe-vy kwarahy rova-rehe onhembo'y oĩ-vy peteñ Nhandejáry rembigwái yváy pygwa. Onhe'ẽ ngatã-vy entéro gwyra kwéry-pe:

—Peju penhombovy'agwasu hagwã karugwasu Nhandejáry remimbojehe'a-py.

¹⁸ To'okwe-rehe rei penhomboaty. Entéro mburuvixa va'e kwéry ro'okwe-rehe, mburuvixagwasu va'e kwéry ro'okwe-rehe, mburuvixa mirõi va'e kwéry ro'okwe-rehe, ipu'aka va'e kwéry ro'okwe-rehe ave, kavaju ro'okwe ha ijáry kwéry ro'okwe-rehe ave penhomboaty aty pe'u hagwã. Yvypóry kwéry ro'okwe-rehe ave, heko mirõi va'e kwéry ro'okwe-rehe ave, onhemboete va'e kwéry ro'okwe-rehe ave, ojejokwái rei va'e ro'okwe-rehe ave, ojejokwái e'ý va'e ro'okwe-rehe ave. Pe'upa mani katu to'okwe okwe, he'i gwyra kwéry-pe.*

¹⁹ Upéi xe ahexa ave onhomboaty aty va'e-pe. Upe mymba vaigwasu ete rekoporuhä mburuvixagwasu kwéry yvy ári oĩ va'e gwive gwembigwái kwéry ndive onhomboaty aty onhorairõ hagwã upé kavaju ári oiko va'e ndive, hembigwái kwéry ndive ave.

²⁰ Ha nonhorairõi joty hikwái. Mymba vaigwasu ete rekoporuhä-pe ae oipyhy omoõ-ma íxupe preso. Hesegwa nhe'ẽ mombe'u hatygwe-pe ave oipyhy-ma omoõ-ma ave kuri íxupe preso. Yma ha'e hexapyrã-rupi ombotavy tavy yvypóry kwéry-pe omboete hagwã mymba vaigwasu ete rekoporuhä-pe onhemonhandejáry-rami, ha'anga-pe ave omboete hagwã, héry omoõ uka ave va'ekwe ójehe imboete-vy. Áy katu oipyhy-ma upé mokõi ivai ete va'e-pe omoõ-ma katu preso kuri ha'e kwéry. Upe mokõi va'e, mymba vaigwasu ete rekoporuhä, hesegwa nhe'ẽ mombe'uhaty ave hekove rehewe rei omombo tatagwasu pa'ü-my opa e'ý rehewe ohasa asy hagwã. Ita omboykupa hese rehewe okái va'erã ombohasyve hagwã íxupe kwéry.

* **19:15** SI 115.13 * **19:18** Ez 39.4,17-18

21 Ha entéro íxupe omboete va'e kwéry ave omanomba. Kavaju morotí ári oiko va'e ojukapa íxupe kwéry. Ijuru-gwi osẽ va'e kysepuku oikytíha-rami onhe'ë-py ojuka paete-ma íxupe kwéry. Ha entéro gwyra ho'u ho'okwe. Hygwyatã atã voi ho'okwe-rehe. Ombyaju peve ho'u ho'okwe.

20

Mil ro'y rehewa nhe'ë

1 Upéi ahexa ave peteñ Nhandejáry rembigwái ogwejy ou-vy yváy-gwi. Ogwereko ramo opo-py peteñ yvykwarusu hugwa e'ë va'e rokë mbotyha. Peteñ calenagwasu inhapytíha, ipohýi va'e ogwerekó ave opo-py.

2 Ha oipyhy upe tejujagwagwasu-pe, upe mbói yma va'ekwe kunha ppy Eva-pe ombojejavyhare-pe upe onhembotejujagwagwasu va'e, upe on-hemombói va'e anhaygwasu voi. Satanás ave héry va'e voi. Ha ojokwa íxupe hereko-vy mil ro'y peve.

3 Ha upe-gwi Nhandejáry rembigwái omondo íxupe yvykwarusu-py opyta hagwã hugwa e'ë va'e-py. Upe rire hatã voi omboty heseve pono osẽ jevy ponove ombotavy tavy rei yvypóry kwéry-pe. Omboty-ma íxupe upe yvykwarusu hugwa e'ë va'e-py opa peve mil ro'y. Upe rire katu opa rire mil ro'y anháy osẽ jevy-ma arã. Upe yvykwarusu hugwa e'ë va'e-gwi omosẽ tei ndaha'ei hi'are hagwã.

4 Pya'e voi ahexa jevy apyka rysy. Ha upe apyka rysy-py ogwapy va'e ojohu-tama hekokwe-rehe kente kwéry-pe. Upe-py ahexa ave heta onhaka'õ ete-ma va'ekwe nhe'ë marangatukwe. Anhetegwa Hesu remimombe'ukwe omombe'u eterei va'ekwe. Nhandejáry nhe'ë omombe'u mbe'u ave va'ekwe. Nohenduséi va'e onhaka'õ ete-ma va'ekwe peteñ teñ-pe íxupe kwéry. Ha'e kwéry nomboetéi voi va'ekwe mymba vaigwasu ete rekoporuhape. Ha'anga-pe ave nomboete reíry va'ekwe ha'e kwéry. Ndogwerekó voi va'ekwe ave osyva-rehe opo apyape ári ave. Oikove jevy-ma Cristo ndive oiko ave mburuvixa ramo omanda hagwã onhondive mil ro'y peve.*

5 Oí ave heta omano va'ekwe ne'írã vyteri oikove jevy va'erã, ha'arõ-vy rei oiko arã. Upe mil ro'y peve Hesu ndive nomandái arã ha'e oiko-vy. Hesu-rehe ojejuka uka va'ekwe oikove jevy ranhe va'e kwéry onhypyrú jevy-ma va'erã nhane moingove jevyha óra-py.

6 Ovy'a ete voi va'erã imarangatu va'e kwéry onhypyrú jevy-gwi nhane moingove haty. Nomanovéi-ma va'erã ha'e kwéry. Oiko joty arã pa'i-rami Hesu Cristo pytyvõha ramo ha Nhandejáry Tupã pytyvõha ramo ave. Ha oiko arã Hesu Cristo ndive mil ro'y peve mburuvixa ramo oiko va'e hikwái.

Anhaygwasu-pe Nhandejáry omondo tatagwasu-py ohasa asy hagwã apyre'ë gwarã

7-8 Anhaygwasu osẽ jevy arã mil ro'y rire ojapo vai hagwã. Osẽ jevy va'erã yvykwarusu onhemboty hagwe-gwi ombotavy jevy hagwã entéro yvypóry kwéry opa opa rupigwa kwéry-pe. Hesu reroviaha e'ë va'e-pe, hese ija'e'ë va'e-pe, Gogue pygwa kwéry-pe, Magogue mygwa kwéry-pe ombotavypa jevy va'erã. Anhaygwasu omboaty arã heta heta va'e yvy ku'i-rami etei onhorairõ hagwã mo'ã. Kwarahy resẽ-gwi, ka'aru-gwi, arapopy popy-gwi omboaty aty arã heru-vy onhorairõ hagwã mo'ã.

9 Gwí Nhandejáry-rehe ojerovia va'e kwéry oimeha-rupi, entéro yvypóry kwéry osarambipa hikwái ogweroajere ijoko-vy mo'ã íxupe kwéry. Tetã Nhandejáry rembihayhu va'e jere-rupi ave. Ndojapói joty gwembiapo vairágwe. Nhandejáry ombou yváy-gwi tata ohapypa ete íxupe kwéry.

* **20:4** Dn 7.9,22,27

10 Upe-ma ramo yvypóry mbotavyhare, anhaygwasu-pe Nhandejáry omondo ombohosa asy hagwā-py. Tatagwasu oīha-py omondo íxupe. Ita omboykupa va'erā heseve ave tata-py ombohosa asy voi hagwā íxupe. Upe-py omondo-ma va'ekwe upe mymba vaigwasu ete va'e-pe hesegwa nhe'ē mombe'uhaty-pe ave ohasa asy meme hagwā. Ndopái arā voi íxupe mba'asy. Áry, pyhare peve ohasa asy arā apyre'ŷ gwarā.

Yvy yváy ave okanhymba rire Nhandejáry ohekojohu va'erā enterove-pe

11 Ahexa ave apykagwasu mburuvixagwasu pegwa morotī va'e. Hi'ári oī ogwapy va'e Tupā Nhandejáry. Upe-py ogwapy jave ogwahē-ma hi'óra yvy opa hagwā, yváy ave opa hagwā. Avave ndohexavéi-ma va'erā áry yvy ave. Ha opaete. Ndajahexavéi-ma va'erā.

12 Upe jave ahexa-ma ave upe-py entéro omano va'ekwe ojoparapa on-hembo'y oī-vy Nhandejáry rovagwy-py. Oipe'a heta kwatiagwasu. Peteī kwatia-rehe oī Nhandejáry-rehe ojerovia va'e kwéry réry. Hekove ijapyre'ŷ rehewe oiko hagwā upe-py omoī uka va'ekwe héry kwéry upe kwatia-py. Ha ambue kwatia-rehe katu héry kwéry ndive ohai hembiapokwe pokwe-rehe ojerovia va'e, ojerovia e'ŷ va'e kwéry gwive rekohagwe. Omano va'ekwe gwive Nhandejáry hembiapokwe pokwe ojohu hese kwéry. Upe kwatia-rehe ojehaipa ete voi kente kwéry ojapo va'ekwe gwive. Ohekojohu-ma voi íxupe Nhandejáry.

13 Ygwasu-rupi omano va'ekwe ave ogwahē Nhandejáry rovagwy-py. Ha entéro omano va'ekwe rendaty-gwi osē sēmba okwa-vy. Nhémokanhy ngatu haty-gwi ogwahē hikwái Nhandejáry rovagwy-py. Ha enterovéa-pe, peteī teī-pe Nhandejáry ohekojohu hembiapo vai vaikwe-rehe.

14 Omano va'ekwe rendaty ogwerova uka-ma omombo tatagwasu-py. Áy ae katu ndoikovéi-ma va'erā nhemano. Upe tatagwasu nhane moingove e'ŷha voi. Nhane mokanhy ngatu haty voi.

15 Ha entéro va'e réry ndoikói ramo Nhandejáry kwatia-rehe hekove ijapyre'ŷ rehewe oiko hagwā, Nhandejáry omondo va'erā íxupe ohasa asy hagwā-py upe tatagwasu-py oiko hagwā.

21

Yvy ipyahu va'e, yváy ipyahu va'e ave rehewa nhe'ē

1 Upe rire ojehexa uka xe-vy yvy ipyahu va'e áry ipyahu va'e ave. Áry oiko-ma va'ekwe yvy ave, ygwasu ave ndaiporivéi-ma.*

2 Ahexa-ma katu Nhandejáry ombosako'i va'ekwe tetā hese ojerovia va'e pegwarā. Tetā imarangatu ete va'e upe va'e. Héry va'e Jerusalém ipyahu va'e. Ou va'e Tupā Nhandejáry-gwi. Ojegwa jegwa porā porā verei voi. Kunhataī onhemonde porā omenarā ha-py ogwahēha vérami voi upe tetā.*

3 Upe jave Nhandejáry apykagwasu ypy-gwi ombou nhe'ē. Onhe'ē hatā ramo ahendu he'i:

—Áy katu Nhandejáry oiko-tama kente kwéry pa'ū-rupi. Ha peē kwéry peiko-ta Nhandejáry re'ýi ramo. Nhandejáry Tupā tee va'e oiko-ta pene ndive kwéry. Oiko-ta pende Járy ramo.*

4 Nhandejáry oikyty-ta pendéhegwí pende resay ponove hagwā pene rasē. Upe-py ndoikovéi-tama omano va'e, ndoikovéi-tama onhemboasy va'e, ojahe'o va'e. Mba'asy rasy ave nohendu mo'āvéri-ma upe pygwa. Yma oiko

* 21:1 Is 65.17; 66.22; 2 Pe 3.13 * 21:2 Is 52.1; 61.10 * 21:3 Ez 37.27

va'ekwe gwī va'ekwe opa-ma, ohasapa-ma, he'i apykagwasu ypy-gwi ombou va'e onhe'ẽ.*

⁵ Upéi Nhandejáry ogwapy jave oapykagwasu ári he'i:

—Ay ajapopa-ta ipyahu va'erā, he'i onhe'ẽ-vy.

He'i ave xe-vy:

—Ehai katu ko va'e anhete teegwa voi ko ko nhe'ẽ. Iporā voi enterove ojerovia tee hese, he'i.

⁶ Upéi he'i jevy:

—Ajapo japo va'erā gwive ajapopa-ma. Xe ko mba'e ypyrū ramo voi aikoma xe va'ekwe. Ipaha rire ave xe aiko joty. Mba'e nheypyrrūha voi ko xe. Mba'e paha voi ave ko xe. Upe ijy'uhéi va'e-pe ame'ẽ va'erā y oy'u hagwā. Ipy'apygwarā hekoverā ame'ẽ rei va'erā íxupe.*

⁷ Yvy pype oiko jave xe-rehe ha-py onhembohekopyatā xéhegwi ojehesa rerova e'ŷ va'e-pe ame'ẽ va'erā ko heko porārā. Peteĩ teĩ-pe ame'ẽ va'erā ko heko porārā amombe'u kuri nde-vy. Xe aiko ave arā hekojáry ramo ha ha'e kwéry oiko ave arā xe re'ŷi ramo.

⁸ Entéro heko vai va'e ae oho va'erā ohasa asy hagwā-py. Entéro ipy'amirī va'e xe rape-rupi ogwata hagwā, entéro xe rerovia e'ŷha, entéro mba'e ojapo va'e ivai va'e, oporojuka va'e, teko ky'a-py oiko va'e, mohāy ojapo va'e, omboete va'e ta'anga-pe, Tupā Nhandejáry e'ŷ va'e-pe, ha entéro ijapu va'e oho arā ohasa asy hagwā-py. Oiko asy arā tatagwasu-py ita omboykupa va'erā hese. Upe tatagwasu yvypóry ombohéry rei nhane mokanhy ngatu haty ave, he'i xe-vy Nhandejáry ahai hagwā.

Jerusalém tetā ipyahu va'e rehewa nhe'ẽ

⁹ Upe-ma ramo upe sete marány'y ogwerekva'e pa'ū-gwi ou peteĩ va'e xe renda-py. Ou ramo he'i xe-vy:

—Eju katu ahexa uka-ta nde-vy upe Ovexa Ra'y ramigwa va'e re'yirā. Hembireko vérani oiko meme arā índive he'ŷi kwéry, he'i xe-vy.

¹⁰ Upéi Nhandejáry Tupā Nhe'ẽ Marangatu tee va'e xe mo'arandu-ma xe reraha hagwā yvyatyrusu ijyvate va'e ári ohexa uka hagwā xe-vy. Upe ijyvate va'e ári-gwi ohexa uka xe-vy Jerusalém tetā. Imarangatu tee va'e voi upe tetā. Ou ramo Tupā Nhandejáry-gwi yváy-gwi ou upe va'e.

¹¹ Iporā eterei voi. Nhandejáry mba'egwasuha rehewe omimbipa upe tetā pyahu. Ita kyra rendy ramigwa jaspe héry va'e-rami omimbi porā va'e.

¹² Onhemboty ijerekwe-rupi oipemimba tetā jerekwe okēra kēraja mate oheja. Yvate peve hatā va'e-py omboty. Doze okē oī. Ijyke-rehe meme oī inhagarekoha Nhandejáry rembigwái. Doze oī inhagarekoha. Dozegwa réry oī ave ojehai okē ári. Peteĩ teĩ Israel ra'y amyrī kwéry réry oī okēgwasu-rehe. He'ŷi tee pegwarā.

¹³ Mbohapy hapy hokē. Hokē jovalovaipa voi upe tetā. Kwarahy resē hakoty oī mbohapy. Ka'aru-koty oī mbohapy. Arapopy-koty oī mbohapy ave. Áry yke-koty oī mbohapy ave.

¹⁴ Upe tetā ogweroajere ijokoha. Igwy-py oī ipytahoha, doze ita va'e. Ojehai hese doze héry ave. Ovexa Ra'y ramigwa va'e remimondokwe réry.

¹⁵ Upe Nhandejáry rembigwái onhe'ẽ va'e xe-vy ogwerekvo oyvyra ramigwa ouro-gwi ijapopyre oipapa hagwā upe tetā, hokē ave. Ijerekwe rehewa ave oipapa hagwā upe tetā.

¹⁶ Ipekwe-rami joty ipukukwe. Upe Nhandejáry rembigwái oipapa ramo oyvyra ramigwa-py otopa hese:

* **21:4** Is 25.8; 65.19 * **21:6** Is 55.1

—Dois mil e duzentos quilômetro ipukukwe, he'i hese.

Ha ipekwe ijyvatekwe ave peteñxante ave. Ijyvatekwe-py ave ogwereco dois mil e duzentos ave.

¹⁷ Oipapa ave ijokoha ha otopa sessenta e quatro metro ipekwe Nhandedjáry rembigwái yváy pygwa kwéry oipapaha-rami.

¹⁸ Upe ijyke-rupi oĩ va'e ijokoha katu ojejapo ita kyra omimbi va'e-gwi, héry va'e jaspe-gwi. Ha upe tetã katu ouro tee gwigwa omimbi voi va'e.

¹⁹ Ha ijere rehewa ojoko va'e katu ojejapo heta ita kyra jegwa-gwi. Ita hepyve pyve va'e-gwi voi ojejapo va'ekwe. Ijepytahoha ypykwe ita kyra jaspe hesakã tee va'e. Ijepytahoha imokõiha ita kyra safira hovy ete va'e. Ijepytahoha imbohapyha ita kyra ágata pykasu ragwe hovy endy-rami va'e. Ijepytahoha inhirundyha ita kyra esmeralda hovy ete va'e.

²⁰ Ijepytahoha icincoha ita kyra sardônia hesa'yju pytã va'e. Ijepytahoha iseisha ita kyra sárdio pytã ete voi va'e. Ijepytahoha iseteha ita kyra crisólito hesa'yju endy va'e. Ijepytahoha hi'oitoha ita kyra berilo hovy ete va'e. Ijepytahoha inoveha ita kyra topázio hesa'yju va'e. Ijepytahoha idezha ita kyra crisópraso hovyngy va'e. Ijepytahoha hi'onzeha ita kyra jacinto hesa'yju pytã va'e. Ijepytahoha idozeha ita kyra ametista pytã ete va'e. Ita hepyve pyve va'e-gwi voi ojejapo va'ekwe ipytahoha kwéry.

²¹ Upe doze okẽ va'e ojejapo va'ekwe doze hepy eterei va'e pérola-gwi. Ita kyra morotí tee hendy rovy sa'yju va'e voi pérola. Peteñ pérola oiporu va'ekwe ojapo hagwã peteñ okẽ. Upéixa oiporu doze pérola ojapo hagwã doze okẽ. Ha ojegwata hagwã upe tetã-rupi ojapo va'ekwe ouro tee-gwi. Hesakã porã va'e-gwi ojejapo va'ekwe.

²² Ndahexái ni peteñ Nhandedjáry-pe nhamboete haty upe tetã-my. Nhandedjáry ae oiko upe-py ha'e Tupã ipu'aka tee va'e, Ovexa Ra'y ramigwa va'e ave oiko upe-py. Upéa-gwi nanhaikotevëiry nhamboete haty-rehe nhane mandu'a meme hagwã hese. Indivepa-ma nhaime.

²³ Upe-py avave noikotevëi va'erã ohesape va'e-rehe. Noikotevëi va'erã kwarahy-rehe, jasy-rehe ave. Nhandedjáry Tupã voi oiko upe-py. Ha'e voi opu'akaha rehevem omohebipeva va'erã gweko marangatu ete-py upe-py. Ovexa Ra'y ramigwa va'e ave oiko upe-py omohebipe ave hagwã. Upéa-rehe noikotevëi arã gwasape hagwã-rehe.*

²⁴ Entéro yvypóry opa opa rupigwa gwive oiko arã ha'e hendy-rupi. Gwĩ mburuvixagwasu kwéry ome'ëmba-ma va'erã íxupe ombo'egwasukwe.

²⁵ Upe okẽ-ma onhemboty e'ý va'e voi. Áry ramo jepe nonhembotyir. Ha ndoikóiry pyhare. Ijojapa rei voi áry. Upéixa-gwi nonhemboty okẽ. Okẽ nandi va'e voi upe va'e.

²⁶ Ha opa tetã tetã gwigwa otuvixakwe rehevem, opu'akakwe rehevem omohebipe arã Nhandedjáry-pe. Ome'ëmba ombo'e retakwe. Gwembihayhukwe gwemiakate'ýgwe ave opa ome'ëmba va'erã. Ojéupe omboete va'ekwe ohesa rerova va'erã Nhandedjáry-rehe.*

²⁷ Upe-py ndoikéi va'erã ipotí tee e'ý va'e. Gwĩ hembiapo vai va'e ave ndoikéi va'erã. Ijapu va'e ndoikéi va'erã. Upe-py Cristo-rehe ojerovia tee va'e mante oike arã. Héry oĩ va'e Ovexa Ra'y ramigwa va'e kwatia-rehe hekove oiko hagwã apyre'ý. Ha'e kwéry mante oike arã upe-py.*

22

¹ Ohexa uka ave xe-vy Nhandedjáry rembigwái yváy pygwa y reko ete oporomoingove va'e, hesakã porã va'e. Osẽ va'e Nhandedjáry apykagwasu

* ^{21:23} Is 60.19 * ^{21:26} Is 60.11 * ^{21:27} Is 52.1; 1 Co 6.9-10; Gl 5.19-21; Ef 5.5

gwy-gwi, Ovexa Ra'y ramigwa va'e apykagwasu gwy-gwi.

² Ha ohasa osyry-vy tetā mbyte-rupi. Ha upe mokōive y rembe'y-py ojoovái oī-vy yvyra rakā yva'y. Upe yva ho'u va'e oikove arā opa e'ŷ reheve. Peteī jasy jasy meme hi'a. Doze-ma oī hi'a peteī ro'y-py. Ha hogwe katu oiko yvpórý pohārā omohesāi hagwā íxupe kwéry.

³ Ndoikói arā upe-py Nhandejáry rembihayhu e'ŷ va'e. Upe-py oī arā Nhandejáry, Ovexa Ra'y ramigwa va'e ave oapykagwasu ári. Ha enterove omboete va'erā íxupe. Heroviaha kwéry gwive omomba'egwasu va'erā íxupe imboete-vy.

⁴ Enterove ohexa arā Tupā Nhandejáry rova-pe. Ha héry katu oī arā isyva kwéry-rehe.

⁵ Upe-py ndoiko mo'āvéi pyhare. Upéixa-gwi avave noikotevēiry tataendyrehe, kwarahy rendy-rehe ave. Nhandejáry Tupā omohembipe jojapa arā íxupe kwéry. Hembipe-py mante oiko va'erā gwe'yi kwéry ndive. Nhandejáry ndive ha'e kwéry oiko meme-ma va'erā mburuvixagwasu ramo apyre'ŷ gwarā.

Hesu ou jevy-tama óra rehewa nhe'ē.

⁶ Upéi katu Nhandejáry rembigwái he'i jevy xe-vy:

—Anhete teegwa voi ko nhe'ē. Iporā jarovia tee voi hese, he'i. —Tupā tee va'e omombe'u va'ekwe onhe'ē-py omombe'u va'ety kwéry-pe oiko va'erā-rehe. Āy ombou-ma katu gwembigwái yváy-gwi omombe'u hagwā ko'ā va'e ojehu-tama va'e-rehe. Ndahi'arevái-ma voi oiko hagwā, he'i.

⁷ —Xe ko aju jevy-tama voi, he'i Hesu. —Ovy'a va'erā Nhandejáry remim-bota ojapo va'e, inhe'ē-py oiko va'e. Ko kwatia nhe'ē ndahi'aréi oiko hagwā nhe'ē-py oiko va'e gwive ovy'a-ma va'erā, he'i Hesu.

⁸ Xe, João, Nhandejáry rembigwái tee va'e ko ahendu ahexa ave ko'ā va'e gwive. Upéa-rehe anhesū Nhandejáry rembigwái yváy pygwa renonde-py amboete hagwā mo'ā íxupe, ha'e ohexa ukapa-gwi xe-vy entéro mba'e.

⁹ Ha'e katu he'i xe-vy:

—Ani erenhesū teī xe-vy xe mboete hagwā, he'i xe-vy. —Nhandejáry Tupā-pe ae katu emboete. Xe ko ne irū voi. Nhandejáry nhe'ē-py omombe'u va'ety kwéry irū ave ko xe. Entéro va'e opy'apy gwive ogwerovia tee-ma ko Nhandejáry nhe'ē erehai va'e kwatia-rehe inhirū ave ko xe. Ani xe mboete. Nhandejáry Tupā-pe ae emboete katu, he'i xe-vy.

¹⁰ —Ani ereha'arō are are teī eremombe'u hagwā ko ojehu va'erā. Ndahi'arevái-ma voi oiko va'erā.

¹¹ Upe ojapo va'e gwembiaipo vai meme tojapo joty oiko-vy ivai va'e. Heko ky'a va'e toiko joty kuri teko ky'a-py. Heko porā meme va'e taheko porā meme joty ave. Heko marangatu va'e taheko marangatu meme joty, he'i xe-vy.

¹² —Pehendu katu, he'i Hesu Cristo. —Xe aju jevy-tama. Aru-tama enterovéa-pe íxupe gwarā hembiapo apo repykwe.*

¹³ Xe ko mba'e ypyrū ramo voi aiko-ma va'ekwe. Ipaha rire ave xe aiko joty. Mba'e nheypyrrūha voi ko xe. Mba'e paha voi ave ko xe. Xe voi mba'e nheypyrrū ramo aiko, ipaha ramo ave aiko xe, he'i Hesu ójehe.*

¹⁴ —Heko vy'a va'erā ipy'a potī va'e. Oao omongy'a e'ŷ va'e-rami oiko. Ha'e kwéry oike va'erā Nhandejáry retā-my indive oiko hagwā, yva aju oporomoingovehaty ho'u hagwā, ha oike hagwā okē-rupi, he'i.

¹⁵ —Oī va'erā oike e'ŷ va'erā. Jagwa reko-rami oiko va'e ndoikéi va'erā. Mohāy ojapo va'e ndoikéi ave va'erā. Teko ky'a-rupi oiko va'e ndoikéi va'erā.

* **22:12** Is 40.10; 62.11; SI 28.4 * **22:13** Is 44.6; 48.12

Oporojuka va'e,omboete va'e ta'anga-pe tupā tee e'ŷ va'e-pe ndoikéi ave va'erā. Heko apu va'e ndoikéi ave va'erā. Oporombotavy va'e, onhe'ē rei va'e ave ndoikéi ave va'erā. Oka-rupi rei okwa va'erā hikwái. Ndoikéi va'erā upepy, he'i.

¹⁶—Xe ko Hesu Cristo voi. Amondo kuri xe rembigwái yváy-gwi omombe'u hagwā nde-vy eremombe'u jevy hagwā Nhandejáry-pe omboete haty-rupi okwa va'e-pe. Xe ko xe rembypy voi mburuvixagwasu Davi. Inhemonha joapyri pyrire voi ko xe. Jasytata ko'ē reruha hembipe porā va'e ramigwa voi ko xe. Xe aju jevy-tama, he'i Hesu.

¹⁷—Eju katu, he'i ha'arō-vy okwa va'e gwive.
Ha Nhe'ē Marangatu tee va'e ave.

—Eju katu, he'i íxupe.
Kóa nhe'ē renduha ave:

—Eju katu, he'i ave arā íxupe.
Upe ijy'uhéi va'e gwive tou katu. Upe y oporomoingove va'e hoy'use va'e tou ave katu. Ome'ē rei va'erā ou va'e-pe. Upe y omboy'u rei va'erā íxupe kwéry.*

Kwatia nhe'ēpaharā ohai Joāo

¹⁸ Xe, Joāo, amombe'use entéro ko kwatia nhe'ē ohendu va'e-pe gwive. Ko kwatia nhe'ē nhane mo'arandu nhane renonderā-rehe. Ani teī eremoī ambue va'e. Ereheja joty koxagwa voi. Oī ramo gwī omoīve va'e, peteī nhe'ē jepe oakā-gwi rei omoīve ramo, anhete tee voi Nhandejáry ombohasa asy arā íxupe. Ko kwatia-rehe ojehai va'ekwe marány ombou arā íxupe.

¹⁹ Oipe'a va'e ave ko kwatia nhe'ē nhane renonderā rehewa nhe'ē-gwi oipe'a ramo peteī nhe'ē jepe Nhandejáry ave oipe'a va'erā íxugwi ima'erāgwe yváy pygwa. Yva aju oporomoingove va'e oipe'a arā íxugwi. Ndo'ui arā voi. Ndoikéi ave va'erā tetā marangatu-py. Henonderā porārāgwe ko kwatia-rehe ojehai va'ekwe oipe'a-ma va'erā ave íxugwi. Oima'erāgwepe'apa va'erā íxupe.

²⁰ Ko va'e oikwaa uka va'e he'i:
—Ndaxe arevēi-ma voi aju jevy hagwā, he'i.

Ha xe ave ha'e:
—Eju katu xe Járy Hesu, ha'e joty íxupe.

²¹ Nhandejáry Hesu tapende rexakwaa porā rei katu enterovéa-pe. Amém

* ^{22:17} Is 55.1